


Didza' cubi rucá'ana  
tsahui



New Testament in Zapotec, Rincón (MX:zar:Zapotec, Rincón)

# **Didza' cubi rucá'ana tsahui'** **New Testament in Zapotec, Rincón (MX:zar:Zapotec, Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

## **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files dated 29 Jan 2022

58bf86df-ae22-508c-81dc-936dbf138c25

## Contents

San Mateo . . . . .	1
San Marcos . . . . .	78
San Lucas . . . . .	125
San Juan . . . . .	204
Hechos . . . . .	262
Romanos . . . . .	335
1 Corintios . . . . .	367
2 Corintios . . . . .	397
Gálatas . . . . .	415
Efesios . . . . .	426
Filipenses . . . . .	437
Colosenses . . . . .	444
1 Tesalonicenses . . . . .	451
2 Tesalonicenses . . . . .	457
1 Timoteo . . . . .	461
2 Timoteo . . . . .	470
Tito . . . . .	476
Filemón . . . . .	480
Hebreos . . . . .	482
Santiago . . . . .	504
1 Pedro . . . . .	512
2 Pedro . . . . .	520
1 Juan . . . . .	525
2 Juan . . . . .	532
3 Juan . . . . .	533
Judas . . . . .	535
Apocalipsis . . . . .	538

## DIDZA' DXI'A BUZÚAJË' MATEO

*Yugu' xuz xinë'e gudödi queë' Jesús  
(Lc. 3:23-38)*

<sup>1</sup> Ni ruzúaja' lágaquië' xuz xinë'e gudödi queë' Jesucristo. Nabábagaquië' David, enca' Abraham xuz gudödi queë'.

<sup>2</sup> Abraham gúquië' xuzë' Isaac.

Isaac gúquië' xuzë' Jacob.

Jacob gúquië' xúzgaquië' Judá, en yugu' bönni' böchë'ë.

<sup>3</sup> Judá gúquië' xúzgaquië' Fares, en Zara, ate' Tamar gúcanu xiná'agaquië'.

Fares gúquië' xuzë' Esrom.

Esrom gúquië' xuzë' Aram.

<sup>4</sup> Aram gúquië' xuzë' Aminadab.

Aminadab gúquië' xuzë' Naasón.

Naasón gúquië' xuzë' Salmón.

<sup>5</sup> Salmón gúquië' xuzë' Booz, ate' Rahab gúcanu xinë'ë.

Booz gúquië' xuzë' Obed, ate' Rut gúcanu xinë'ë.

Obed gúquië' xuzë' Isaí.

<sup>6</sup> Isaí gúquië' xuzë' David.

David na' gunná bé'enë' bönachi Israel, ate' butsaga ná'alënë'-nu nigula na' gúcanu zí'alö nigula queë' Urías, ate' David, en nigula ni guláquië' xuz xinë'ë Salomón.

<sup>7</sup> Salomón gúquië' xuzë' Roboam.

Roboam gúquië' xuzë' Abías.

Abías gúquië' xuzë' Asa.

<sup>8</sup> Asa gúquië' xuzë' Josafat.

Josafat gúquië' xuzë' Joram.

Joram gúquië' xuzë' Uzías.

<sup>9</sup> Uzías gúquië' xuzë' Jotam.

Jotam gúquië' xuzë' Acaz.

Acaz gúquië' xuzë' Ezequías.

<sup>10</sup> Ezequías gúquië' xuzë' Manasés.

Manasés gúquië' xuzë' Amón.

Amón gúquië' xuzë' Josías.

<sup>11</sup> Josías gúquië' xúzgaquië' Jeconías, en yugu' bönni' böchë'ë.

Yugu' bönni' ni gula'cu'ë dza ni' cate' yugu' bönni' Babilonia gula'chë'ë bönachi Israel nadzúngaca lu xiyúgaquië'.

<sup>12</sup> Jeconías gúquië' xuzë' Salatiel.

Salatiel gúquië' xuzë' Zorobabel.

<sup>13</sup> Zorobabel gúquië' xuzë' Abiud.

Abiud gúquië' xuzë' Eliaquim.

Eliaquim gúquië' xuzë' Azor.

14 Azor gúquië' xuzë' Sadoc.

Sadoc gúquië' xuzë' Aquim.

Aquim gúquië' xuzë' Eliud.

15 Eliud gúquië' xuzë' Eleazar.

Eleazar gúquië' xuzë' Matán.

Matán gúquië' xuzë' Jacob.

16 Jacob gúquië' xuzë' José.

José ni gúquië' bönni' queënu María, ate' María ni gúcanu xinë' Jesús, lë' ca' Cristo, Bönni' na' tun löza bönachi judío guídë' idinná bé'enë' légaquië'.

17 Caní naca, gulaca chidá' cö' di'a dza ga gusí lo zoë' Abraham ga bidxintë zoë' David, ate' gulaca ca' ia'chidá' cö' di'a dza ga gusí lo zoë' David ga bidxintë dza yugu' bönni' Babilonia gula'chë'ë bönachi Israel nadzúngaca, ate' gulaca ca' ia'chidá' cö' di'a dza ga gusí lo dza ni' gula'chë'ë léguequi ga bidxintë dza guljë' Cristo.

*Yugu' le guca cate' guljë' Jesucristo*

*(Lc. 2:1-7)*

18 Caní guca cate' guljë' Jesucristo. Cate' ni' chinazí' lu ná'abi' María, xinë'ë Jesucristo utsaga ná'aleni' José, en zí'atëlö cate' si' utsaga ná'aleni'-bi', en cabí ne sóaleni'-bi', guyú'ubi' tubi' bí'ido' lë'ëbi' María na'. Guca caní ni'a que yöl-la' huáca queë' Dios Bö' Lá'ayi. 19 Náquië' José na', bönni' queëbi' María, bönni' tsahuí', pero biti' gú'unnë' uzéguie'-bi' didza' lógaca bönachi. Gú'unnë' ulá'aleni'-bi' bagáchi'sö. 20 Tsanni ni' rizá' ládxe'ë José ca na' gunë', bulu'i lahuë' gubáz lá'ayi queë' Xanru' lahuë' José lu yëla bëchigal, en gudxë' lë':

—José, xzí'ini xzi'söë' David. Biti' gádxinu' si'u-bi' María, para gácabi' nigula quiu', tu' yú'ubi' bi'i bönni'do' lë'ëbi' ni'a que yöl-la' huáca queë' Dios Bö' Lá'ayi. 21 Gáljabi' tubi' bi'i bönni'do' queëbi', ate' gu'u labi' Jesús, tu' usölábi' bönachi queëbi' lu dul-la' nabága'gaca.

22 Caní guca yúgu'të lë' ni para gaca lë' na' gunnë' Xanru' lu ru'ë bönni' bë'ë didza' uláz queë' Dios, gunnë':

23 Buli'yútsöca', tu nigula ra'bando',

tsú'ubi' bí'ido' lë'ëbi',

ate' gáljabi' tubi' bi'i bönni'do',

ate' ilu'ë labi' Emanuel.

Emanuel naca tu didza' hebreo le rnna: Len rë'u Dios.

24 Cate' bubanë' José lu yëla bëchigal, benë' ca na' gudxë' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'. 25 Biti' guzóaleni'-bi' cate' bidxinrö dza chigúlajbi' bi'i bönni'do' queëbi', bi'i zí'alö queëbi', ate' gulu'ë labi' Jesús.

## 2

*Bönni' ta'yéajni'inë' ridiyúgaquië' bí'ido' Jesús*

<sup>1</sup> Cate' gúljabí' Jesús lu yödzö Belén, luyú Judea, rinná bē'ē Herodes luyú ni', ate' bila'dxinë' bönni' ta'yéajni'inë' Jerusalén, narúajgaquië' tu yödzö dē saca' ga rilén gubidza. <sup>2</sup> Gula'nabë' bönni' ni, ta'nnë':

—¿Gazxi zóabi' bí'ido' na' ral-la' inná bé'ebi' bönachi judío, bí'ido' na' si' gúljabí'? Cate' ni' zóatu' ga rilén gubidza bilé'etu'-ba' bōlaj bení' naca bē' chigúlajbí', ate' za'tu' ni para tseaj lādxi'tu'-bí'.

<sup>3</sup> Cate' gúquibe'enë' Herodes, bönni' rinná bē'ē, lē ni, gurō'ödë' böniga, en lēsca' caní gula'bō' böniga yúgu'të bönachi nacua' Jerusalén. <sup>4</sup> Ní'irō Herodes na' bulidzë' yúgu'të bixúz unná bē', len bönni' yudo' tu'sédinë', ate' gunábinë' légaquië' gazxi ral-la' galjē' Cristo, bönni' na' tunë' löza bönni' judío ilá lahuë' para inná bé'enë' légaquië'. <sup>5</sup> Tē' lē':

—Lu yödzö Belén luyú Judea. Caní naca tu' buzúajë' tu bönni' bē'ē didza' uláz queë' Dios le rnna caní:

<sup>6</sup> Biti' nácarō cá'asō yödzö Belén luyú Judá lahuë' Dios ca náca'gaca yödzö gapa nacua' nupa ta'nná bē' luyú ni, tu' irúajë' tu bönni' yödzö Belén, en gáquië' lo, bönni' na' gun chi'ë bönachi Israel quia'.

<sup>7</sup> Ní'irō Herodes bulidzë' bagáchi'sō bönni' ta'yéajni'inë' na', en gunábinë' légaquië' para inōzinë' dxi'a gáca'xte chiguca buluí'i lahui bōlaj na' bila'lé'enë'. <sup>8</sup> Ní'irō gusól-lë'ë légaquië' tsójáquië' Belén. Rē' légaquië':

—Guli'tséaj ni', en guli'tsōjnaba dxi'a nacxi naca queébi' bí'ido' na'. Cate' chibidzōlilí'-bí', ididí'xjōi'ili' neda', para tseja' ca' neda', tseaj lādxa'a-bí'.

<sup>9</sup> Gudōdi bila'yōnnë' didza' bē'ē Herodes na', sōjáquië' bönni' ta'yéajni'inë' na', ate' bōlaj na' bila'lé'enë' cate' ni' nacu'ë lādzagaquië' sōjnōruba' lógaquië' ga bidxintë' yōjsóa ga na' dēbi' bí'ido' na'. <sup>10</sup> Cate' bila'lé'enë' bōlaj na', bulu'dzējade'enë'. <sup>11</sup> Cate' gula'yázië' yu'u, bila'lé'enë'-bí' bi'i bönni'do' na', zóalenbí'-nu María, xiná'abi'. Bulu'zóa zxíbigaquië' lobi', en gula'yéaj lādxi'gaquië'-bí'. Gudōdi na' gula'saljē' yugu' yōxaj quégaquië', ate' bulu'nōdzjē' queébi' oro, en yalaj, en nōrido' rilá' zxixi que yaga mirra. <sup>12</sup> Tu' chibuzéajni'inë' Dios légaquië' lu yēla bēchigal para cabí tsōjhuōjquië' ga zoë' Herodes na', que lē ni na' yōjhuōjquië' lādzagaquië' nōza yúbölō.

*José, en María, ta'chë'ë-bi' Jesús luyú Egipto*

<sup>13</sup> Gudōdi bulu'zë'ë yugu' bönni' ta'yéajni'inë' ni', buluí'i lahuë' tuë' gubáz lá'ayi queë' Xanru' lu yēla bēchigal, ga na' dē' José, en rē' lē':

—Guyaschi. Guchě'-bi' bí'ido' ni, enca' xiná'abi', ate' buz-unnaj ni. Guyéaj luyú Egipto, ate' ugá'anu' ni' cate' guiéra' li ia'tú. Caní gunu' tu' uguiljě' Herodes bí'ido' ni para gútiě'-bi'.

<sup>14</sup> Ní'irō guyasě' José, en ni' naca chi'i dzō'ölō, guchě'-bi' bí'ido' na', enca' xiná'abi', ate' yōjáquiě' luyú Egipto. <sup>15</sup> Bulu'gá'aně' ni' cate' gútirě' Herodes. Caní guca para gaca lě na' gunně' Xanru' Dios lu ru'ě tu bönni' bē'ě didza' uláz queě', gunně': "Ga naca luyú Egipto bulidza' Zxí'ina'."

*Risöl-lě'ě Herodes bönni' ilútiě'-bi' bi'i huě'ënido' nacuá'abi' yōdzō Belén*

<sup>16</sup> Cate' gúquibe'eně' Herodes biti' guluně' bönni' ta'yéajni'ině' ca rnně', guléně', ate' gunná bē'eně' bönni' tsōjáquiě' ni' para ilútiě'-bi' yúgu'těbi' bi'i bönni'do' nacuá'abi' yōdzō Belén, en idú gásibi'ilō ga dē Belén na', yugu' bí'ido' chiyú'ugacabi' chopa iz, en bí'ido' nahuě'ë'nigacarōbi'. Caní beně' ca busáquiě' queě' Herodes na', tsca chiguca dza buluí'i lahui böljaj na', dza na' bulu'zėjni'ině' bönni' ta'yéajni'ině' na' lě'. <sup>17</sup> Caní guca, bidxín lě na' gunně' Jeremías, bönni' bē'ě didza' uláz queě' Dios, gunně':

<sup>18</sup> Lu yōdzō Ramá riyón chí'igaca nupa ta'bōdxi, en nupa ta'bōdxi yechi'.

Raquel ribōdxi nu ni'a qué'gacabi' zxi'ininu.

Biti' gaca nu huě' tsahui' lěnu, tu' chinátigacabi'.

<sup>19</sup> Gudōdi gútiě' Herodes na', ní'irō buluí'i lahuě' gubáz lá'ayi na' queě' Xanru' lu yēla bēchigal lahuě' José ga ni' zoě' luyú Egipto, ate' rě' lě':

<sup>20</sup> —Guyasa. Guchě'-bi' bi'i bönni'do' ni, enca' xiná'abi', ate' böaj luyú Israel, tu' chigulátiě' bönni' ni' gulě'ënně' ilútiě'-bi' bi'i bönni'do' ni.

<sup>21</sup> Ní'irō guyasě' José, ate' guchě'-bi' bi'i bönni'do' na', enca' xiná'abi', ate' yōhuōjquiě' luyú Israel. <sup>22</sup> Cate' gúquibe'eně' José rinná bē'ě Arquelao luyú Judea tu' chigútiě' Herodes, xuzě' Arquelao na', que lě ni na' gúdxině' José huōjě' ni'. Cate' buzėjni'ině' Dios lě' lu yēla bēchigal, guyijě' luyú Galilea. <sup>23</sup> Cate' bidxině' ni', yōjsóe' lu yōdzō Nazaret. Caní guca para gaca lě na' gula'nně' yugu' bönni' gulu'ě didza' uláz queě' Dios ca ral-la' gaca queě' Jesús, si' Lě', Bönni' Nazaret.

### 3

*Juan, bönni' ruquilě' bōnachi nisa runě' libán lu lataj cá'asō (Mr. 1:1-8; Lc. 3:1-9, 15-17; Jn. 1:19-28)*

<sup>1</sup> Yugu' lu dza ni' buluí'i lahuě' Juan, bönni' na' buquilě' bōnachi nisa, en runě' libán lu lataj cá'asō luyú Judea. <sup>2</sup> Juan na' rnně':

—Buli'bí'i ládxi'li, tu' chizóa idxín dza idinná bē' Nu na' zoa yehua' yubá luyú ni.

<sup>3</sup> Ca naca queē' Juan na', buzúajē' Isaías, bönni' bē'ē didza' uláz queē' Dios dza ni'tē, le rnna caní:

Riyön chi'ē bönni' rulidzē' lu lataj cá'asö, rnnē':

“Buli'pá'a nöza para idxín Xanru' ga zóali'.

Guli'béaj li yugu' nöza lasi tödē' lu icja ládxi'do'oli'.”

<sup>4</sup> Nácuē' zxē' Juan lari' néquini lítsa'ba' böa', ate' núguē'ē lē'ē le néquini guídi. Rahuē'-ba' böchi'zu, en re'jē' bidxindo' que

buzdo'. <sup>5</sup> Yugu' bönni' yödz Jerusalén len bönachi narúajgaca idú luyú Judea, en idú gásibi'ilö ga dē yegu Jordán bila'dxinē' ga zoē' Juan na'. <sup>6</sup> Cate' gula'xóalēpē' dul-la' nabága'gaquiē', Juan na' buquilē' légaquiē' nisa lu yegu Jordán na'.

<sup>7</sup> Cate' bilé'enē' Juan ta'dxinē' zían bönni' yudo' fariseo len yugu' bönni' yudo' saduceo ga zoē' para ila'dilē' nisa, gudxē' légaquiē':

—Libi'ili', di'a dza quégacaba' bëla sínia'. ¿Zoa nu buzéajni'i libi'ili' para izxúnnajli' yöl-la' rusiúdxí na' si' gaca quégaca bönachi? <sup>8</sup> Guli'gún le gaca bē' chibubí'i ládxi'li'. <sup>9</sup> Biti' cuéqui ícjali', bití innali' nácali' tsahui' tu' naca Abraham xuz gudödi queéli'. Rea' libi'ili', huáca gunē' Dios ga ulu'huóaca yugu' guiój nacuá' ni di'a dza queē' Abraham. <sup>10</sup> Chizóa riböza guíē huága para ichugu yugu' yaga le rulu'i ca gaca queéli'. Yúgu'tē yaga bití ta'bía le naca dxi'a, irúgugaca, ate' ila'gu'ē léguequi lu guí'. <sup>11</sup> Le nácatē neda' ruquila' libi'ili' nisa lu nisa, núlöli' chibubí'i ládxi'li', pero Bönni' na' ral-la' guidē' cate' tödi quia' neda', Lē' gunē' le rulu'isö yöl-la' ridila nisa ni, uchíziē' libi'ili' Dios Bö' Lá'ayi len guí' queē'. Bönni' ni nácatērē' lo ca neda', ate' neda' bití naca' lesaca' ilecja' xiráchuē' nudē'ē. <sup>12</sup> Zönē' lu nē'ē böcö' queē', le ulúbinē' ga ridxi'a zxoa' xtila queē'. Cu'ē zxoa' xtila queē' lu yu'u ga ni' gun chi'ē le, pero uzéguí'ē bëbu que lu guí', ate' guí' na' bití' ca' ulu.

### *Ridile' nisa Jesús*

(Mr. 1:9-11; Lc. 3:21-22)

<sup>13</sup> Ní'irö buzē'ē Jesús luyú Galilea, ate' bidxinē' ra' yegu Jordán ga na' zoē' Juan, para idilē' nisa lu nē'ē Juan na'. <sup>14</sup> Juan buzáguē'ē xinözē', en rē' Jesús:

—Neda' ral-la' idila' nisa lu no'o Li'. ¿Za'tso' Li' quia' neda'?

<sup>15</sup> Bubi'ē didza' Jesús, rē' lē':

—Benna lataj na'a, tu' caní ral-la' gunru' idütē le naca tsahui'.

Ní'irö Juan bē'ē Lē' lataj. <sup>16</sup> Cate' chinadilē' Jesús nisa, la' burúajtē' lu nisa. Ní'irö gualaj lúzxiba lahuē' Jesús, ate' bilé'enē' ruhuötjē' Dios Bö' Lá'ayi, en bidxinē' ga na' zoē',



rin'ë ca riná'aba' gu'dödo'. <sup>17</sup> Ní'irö biyön chi'i nu ruí'i didza' yehua' yubá, rnna:

—Bönni' ni náquië' Zxí'ina'. Nadxí'ida' Lë', en raza ládxa'a Lë'.

## 4

*Rë'ëni Satanás tu' xihui' ibaga' Jesús dul-la'*

(Mr. 1:12-13; Lc. 4:1-13)

<sup>1</sup> Ní'irö la' guchë'të' Dios Bö' Lá'ayi Jesús lu lataj cá'asö para gata' lataj si' bë' Satanás tu' xihui' Lë'.

<sup>2</sup> Idú choá' dza choá' yëla bití' bi gudahuë' Jesús, ate' gudödi ni' ridunë'. <sup>3</sup> Ní'irö tu' xihui', nu na' run ga tá'baga' bönachi dul-la', bidxín ga zoë' Jesús, en rë Lë':

—Channö nacu' idú Zxí'inë' Dios, gunná na'a ulu'huóaca guiöj nacuá' ni yöta xtila.

<sup>4</sup> Bubi'ë didza' Jesús, rë' le:

—Nazúaj lu guichi lá'ayi le rnna: “Calëgasö yöta xtila nabánigaca bönachi, pero lësca' yúgu'të didza' ru'ë Dios nabánigaca bönachi.”

<sup>5</sup> Ní'irö tu' xihui' guchë' Jesús lu yödzö lá'ayi Jerusalén, ate' budxía Lë' ga naca xitsá' ícjo'oló yudo'. <sup>6</sup> Ní'irö tu' xihui' rë Lë', rnna:

—Channö nacu' Li' idú Zxí'inë' Dios, busuladzu' cuinu' ni, tu' nazúaj lu guichi lá'ayi le rnna:

Dios isöl-lë'ë gubáz lá'ayi queë' para ilún chi'ë Li',

ate' ulu'chisé' Li' lu ná'agaquië',

para cabí tsöjchégu'u guiöj, en cabí gunu' zi' ni'u.

<sup>7</sup> Bubi'ë didza' Jesús, rë' le:

—Ia'stú nazúaj lu guichi lá'ayi, le rë bönachi, rnna: “Bití' ugunu' dxin Xanu' Dios.”

<sup>8</sup> Ní'irö tu' xihui' guchë' Jesús ga naca tu lu guí'a sibi, ate' ni' buluí'i Lë' yúgu'të yödzö nacuá' yödzölió ni, en yúgu'të yöl-la' tsahui' quëguequi. <sup>9</sup> Ní'irö rë Lë':

—Yúgu'të lë ni udöda' lu no'o channö uzóa zxibu' lahua', en gunu' neda' zxön.

<sup>10</sup> Jesús rë' le:

—Böaj quiu' li', Satanás tu' xihui', tu' nazúaj lu guichi lá'ayi le rë netu', rnna: “Xanu' Dios tseaj ládXu'u, en udödi cuinu' lu na' tuzë' Lë'.”

<sup>11</sup> Ní'irö buzá' Satanás tu' xihui' ga na' zoë' Jesús, ate' gubáz lá'ayi queë' Dios bila'dxinë' ga zoë', en gulácalenë' Lë', en gula'gu'ë le gudahuë'.

*Risí lahuë' Jesús runë' libán luyú Galilea*

(Mr. 1:14-15; Lc. 4:14-15)

<sup>12</sup> Cate' biyönnë' Jesús nadzunë' Juan lidxi guié, guyijë' luyú Galilea. <sup>13</sup> Buzë'ë yödzö Nazaret, ate' yöjsóë' lu yödzö Capernaum ga naca ra' nísado', lu buzá' quégaca bönachi Zabulón, en bönachi Neftalí. <sup>14</sup> Caní guca, bidxín lë na' gunné' Isaías, bönni' bë'ë didza' uláz queë' Dios, gunné':

<sup>15</sup> Luyú Zabulón, en luyú Neftalí, la' nöza ra' nísado' ia'tsölá'a yegu Jordán saca' ga rilén gubidza. Luyú Galilea, ga nacué' bönachi biti' nácagaca judío.

<sup>16</sup> Bönachi chul-la niti ni' bila'lé'e bení', ate' bönni' ni' nácagaquië' ca nupa chinátigaca, gulén quégaquië' bení'.

<sup>17</sup> Cate' ní'irö gusí lahuë' Jesús runë' libán, en rë' bönachi ni':  
—Buli'bí'i ládxi'li, tu' chizóa idxín dza idinná bë' Nu na' zoa yehua' yubá luyú ni.

*Jesús rulidzë' tapë' bönni' uzxön böla para tsöjtá'gaquië' Lë'  
(Mr. 1:16-20; Lc. 5:1-11)*

<sup>18</sup> Cate' gudë' Jesús ra' nísado' que Galilea, bilé'enë' chopë' bönni'. Tuë' lë' Simón, en zoa ia'tú lë' Pedro, ate' dzáguië' Andrés, bönni' böchë'ë, lë'. Chopë' ni ta'chiljë' yöxaj böla quégaquië' lu nísado' na' tu' nácagaquië' uzxön böla. <sup>19</sup> Jesús rë' légaquië':

—Guli'dutá' neda', ate' guna' ga ichë'ëli' bönachi quia', gunli' ca runli' rizönli'-ba' böla.

<sup>20</sup> Chopë' ni la' bulu'cá'angatë' yugu' yöxaj böla quégaquië', ate' sōjácalenë' Jesús.

<sup>21</sup> Cate' gudödë' Jesús ia'lati' ní'ilö, bilé'enë' ia'chopë' bönni'. Tuë' lë' Jacobo, ate' dzáguië' Juan, bönni' böchë'ë lë'. Nácagaquië' xzí'inë' Zebedeo. Nacu'ë lë'e bárcodo' dzágagaquië' Zebedeo, xúzgaquië', en tu'únë' yöxaj böla quégaquië'. Ní'irö Jesús bulidzë' chopë' ni para tsöjtá'gaquië' Lë'. <sup>22</sup> La' bulu'cá'angatë' bárcodo' na', enca' xúzgaquië', ate' sōjácalenë' Jesús.

*Jesús rusédinë' bönachi zían  
(Lc. 6:17-19)*

<sup>23</sup> Gudë' Jesús idú luyú Galilea, rusédinë' bönachi gapa naca lu yu'u ga tu'dubë' bönni' judío, en tu'sédë' queë' Dios. Benë' libán ni' que didza' dxi'a ca si' idinná bë'ë Dios luyú ni', en bunë' yúgu'të nupa te'e tsca naca yödzöhuë' té'eguequi.

<sup>24</sup> Guzë didza' que yöl-la' huáca queë' Jesús, ate' bila'yöni bönachi idú luyú Siria, ate' dujuá'gaquië' yúgu'të bönni' té'enë' zían yödzöhuë' que queëgaquië', en ta'guí'i ta'zaquië', ga zoë' Jesús. Dujuá'gaquië' ca' yugu' bönni' yú'ugaquië' bö' xihui', en yugu' bönni' té'enë' huë' xjote', en yugu' bönni' nacú'unigaquië' bin ni'a ná'agaquië', ate' Jesús bunë' yúgu'të bönni' na'. <sup>25</sup> Bönachi zían bila'rúajgaca luyú Galilea, en yugu'

yödzö Decápolis, en yödzö Jerusalén, enca' luyú Judea, en yugu' yödzö nacua' ia'tsölá'alö yegu Jordán saca' ga rilén gubidza, ate' röjácálen Jesús.

## 5

*Libán bené' Jesús ga naca lu guí'ado'*

*(Lc. 6:20-23)*

<sup>1</sup> Cate' bilé'ené' Jesús bönachi zián söjácálen Lë', ní'irö gurené' tu lu guí'ado' ga naca xitsá'alö, ate' gurö'ë lu guí'a ni'. Ní'irö bulu'dubé' bönni' usëda queë' ga zoë'. <sup>2</sup> Gusi lahuë' rusédiné' légaquië', rnné':

<sup>3</sup> —Bica' ba yugu' bönni' téquibe'ené' ta'yádzjané' le naca queë' Dios, tu' nadéli'gaquië' lataj ga rinná bë'ë Bönni' na' zoë' yehua' yubá.

<sup>4</sup> 'Bica' ba yugu' bönni' tu'huí'ini ládxi'gaquië' tu' nabága'gaquië' dul-la', tu' huë tsahuë'ë Dios caz légaquië'.

<sup>5</sup> 'Bica' ba yugu' bönni' náca'gaquië' nöxaj ladxi' lahuë' Dios, tu' gata' quégaquië' luyú ni.

<sup>6</sup> 'Bica' ba yugu' bönni' ta'zë ládxi'gaquië' le naca tsahui' lahuë' Dios, ate' raca quégaquië' ca raca quégaca nupa ta'dún, en ta'bidxi nisa, tu' guné' Dios ga ulu'zi'ë xibé lë na' ta'zë ládxi'gaquië'.

<sup>7</sup> 'Bica' ba yugu' bönni' tu'huechi' ládxi'gaquië' luzá'agaquië', tu' huéchi' ládxi'ë Dios légaquië'.

<sup>8</sup> 'Bica' ba yugu' bönni' naca tsahui' icja ládxi'do'gaquië', en bití' bi dul-la' nabága'gaquië', tu' ila'lé'ené' Dios.

<sup>9</sup> 'Bica' ba yugu' bönni' ta'bequi dxíë' didza' bizxaj, tu' ila'zí' légaquië' zxi'ini cazë' Dios.

<sup>10</sup> 'Bica' ba yugu' bönni' ta'zaca' ta'gui'ë lu le ta'bía ládxi'gaca bönachi légaquië' cate' tuné' le naca tsahui', tu' dë lataj quégaquië' ga rinná bë'ë Bönni' na' zoë' yehua' yubá.

<sup>11</sup> 'Bica' ba libí'ili' cate' tu'lidza bönachi libí'ili' zi', en ta'bía ládxi'gaquië' libí'ili', ate' lu yöl-la' rizi' yë' ta'nné' queéli' le xihui' tu' dá'ali' neda'. <sup>12</sup> Buli'dzeja, en guli'chaza ládxi'li', tu' uzí'da'ali' xibé yehua' yubá. Ca raca queéli', guca quégaquië' bönni' gulu'ë didza' uláz queë' Dios, en gula'cu'ë zí'atëlö ca libí'ili', tu' gula'bía ládxi'gaca ca' bönachi légaquië'.

*Bönachi dá'gaca Cristo ilaca ca zödi', en ca bení'*

*(Mr. 9:50; Lc. 14:34-35)*

<sup>13</sup> Gunné' ca' Jesús:

—Libi'ili' nácali' ca zödi' luyú ni, pero channö initi zödi' na' yöl-la' siná'a que, bití' gaca gunru' ga huóaca siná'a. Bítí'rö naca lesaca', pero chinaca tu le chú'unaru', ate' ulu'libi bönachi le.

<sup>14</sup> 'Libí'ili' nácali' ca bení' yödzölió ni para ulu'ili' lahui le naca queë' Dios. Ral-la' gácali' ca tu yödzö rö'ö tu lu gu'á, tu' cabí gaca igachi' yödzö na'. <sup>15</sup> Cate' ruquéla'ru' guí', bití' rigú'uru' le tu zxan gu'ina, pero ruzóaru' le ga liná' para uzení' yúgu'të nupa nacua' lu yu'u. <sup>16</sup> Ca na' run bení', ral-la' gunli' ca' libí'ili', güf'ili' lataj gaca bë' le nácali' lógaca yúgu'të bönachi, para cate' ila'lé'e le naca tsahui' runli', ila'gú'u-në' Xúzili' Dios zoë' yehua' yubá yöl-la' ba.

*Rusédinë' Jesús que le gunná bë'ë Dios lu në'ë Moisés*

<sup>17</sup> Gunnë' ca' Jesús:

—Bití' guéquili' bida' para usunítia' yugu' le gunná bë'ë Moisés, o xibá na' bulu'sédinë' bönni' gulu'ë didza' uláz queë' Dios. Bida', calëga para usunítia' yugu' lë na', pero para ulu'a lahui idútë le tu'sedi lë na'. <sup>18</sup> Le nácatë rea' libí'ili'. Tsanni nacua' lúzxiba, en yödzölió ni, bití' tödi cá'asö nitú dídza'do', en nitú le rinná bë' xibá na', cate' gácarö yúgu'të le ral-la' gaca. <sup>19</sup> Que lë ni na', núti'tës bönni' quítsjë' tu xibá cuídí'do'os le zoa lu xibá na', en usédinë' bönachi para ilún caní, bönni' ni gácatërë' cuídí'do'os ca yúgu'të nupa ila'cuá' ga rinná bë' Bönni' na' zoë' yehua' yubá, pero núti'tës bönni' gunë' ca rinná bë' xibá na', en usédinë' bönachi para ilún ca' caní, bönni' ni tsëpisëtërë' ga rinná bë' Nu na' zoa yehua' yubá. <sup>20</sup> Rea' ca' libí'ili': Channö cabí gunli' le nácatërö tsahui' ca le tunë' bönni' yudo' usedi, enca' ca tunë' bönni' yudo' fariseo, bití' ca' tsú'uli' ga rinná bë'ë Dios yehua' yubá.

*Rusédinë' Jesús ca naca que nu rilé luz'ë*

*(Lc. 12:57-59)*

<sup>21</sup> Gunnë' ca' Jesús:

—Chibiyönili' ca gula'nnë' bönni' guta' lu ná'agaquië' le gulë' xuz xtó'oli': "Bití' gútili' bönachi. Nu bönni' gútië' bönachi, nabáguë'ë xíguia', ate' huadxinë' ga uchi'a usöröë' Dios lë'." <sup>22</sup> Na'a, neda' rea' libí'ili': Nu bönni' rilenë' böchi' luzë'ë, nabáguë'ë xíguia' huadxinë' ga uchi'a usöröë' Dios lë'. Lëscá caní, nu bönni' innë' zi'ë queë' böchi' luzë'ë nabáguë'ë xíguia' ulu'chi'a ulu'söröë' bönni' lo tu'chi'a tu'söröë' lë', ate' nu bönni' guíë' luzë'ë: "¡Böa' canöz!" nabáguë'ë xíguia' tsöjtsu'ë lu guí' gabila.

<sup>23</sup> 'Caní naca, channö chizóa cu'u tu le unödzu' lu bucugu lá'ayi, ate' tsöjnenu' ni' zoa bizx que rilenë' böchi' luzó'o lí', <sup>24</sup> bucá'ana lë na' unödzu' lu bucugu ni', en böaj lidxu'. Zí'alö yöjca'ana tsahui' le benu' queë' böchi' luzó'o, ate' ní'irö gudá unödzu' lë na' nu'u.

<sup>25</sup> 'Channö zoa nu bönni' rinábinë' li' bi ubi'u queë', en ichë'ë li' ga uchi'a usöröë' tu bönni' li', budzágatë tsahui' bönni' na' tsanni ni' yú'ulenu' lë' nöza, para cabí udödë' li' lahuë' bönni'

ruchi'a rusöröë', ate' bönni' ni udödë' li' lu në'ë bönni' rusayjë' lidxi guië, ate' lë' cu'ë li' lidxi guië na'. <sup>26</sup> Le nácatë rea' li', biti' ca' uruju' ni' cate' idxinrö dza quixzju' ga buitë le ral-lu'u.

*Rusédinë' Jesús ca naca que nu riguitsaj xibá que yöl-la' nutsaga na'*

<sup>27</sup> Gunnë' ca' Jesús:

—Chibiyönili' ca na' gula'nnë': "Biti' gunu' dul-la' le riguitsaj xibá que yöl-la' nutsaga na'." <sup>28</sup> Na'a, neda' rea' libí'ili': Núti'tës bönni' ruyúë' tu nigula len yöl-la' rizë'ladxi' le ruá' dö', chibenë' dul-la' len lënu lu icja ládxi'da'ahuë'.

<sup>29</sup> 'Que lë ni na', channö guiöj lo' ibëla gun ga gunu' dul-la', guléaj le, en gurú'una le. Gácarö dxi'a quiu' unítíu' tu guiöj lo', en calëga idúteo' tsöjtsú'u lu guí' gabila. <sup>30</sup> Channö no'o ibëla gun ga gunu' dul-la', guchugu le, en gurú'una le. Gácarö dxi'a quiu' unítíu' tu no'o, en calëga idúteo' tsöjtsú'u lu guí' gabila.

*Rusédinë' Jesús ca naca que nu bönni' rulá'alenë' nigula queë' (Mt. 19:9; Mr. 10:11-12; Lc. 16:18)*

<sup>31</sup> Gunnë' ca' Jesús:

—Lësca' gula'nnë': "Núti'tës bönni' rusanë'-nu nigula queë', ral-la' unödzejë' queënu tu guichi le rnna rulá'alenë'-nu." <sup>32</sup> Na'a, neda' rea' libí'ili', channö zoë' nu bönni' rusanë'-nu nigula queë', en biti' zoa le ruá' dö' runnu, gunë' bönni' na' ga gunnu dul-la' le riguitsaj xibá que yöl-la' nutsaga na' channö utsaga ná'lennu bönni' yúbölö, ate' bönni' na' si'ë-nu nigula na', lësca' gunë' dul-la' le riguitsaj xibá que yöl-la' nutsaga na'.

*Rusédinë' Jesús ca naca que nu ruzötaj La la'ayi queë' Dios*

<sup>33</sup> Gunnë' ca' Jesús:

—Lësca' biyönili' ca yugu' bönni' guta' lu ná'agaquië' gulë' xuz xtó'oli', gula'nnë': "Biti' si' yë'u cate' run tsutsu xtídz'u ni'a queë' Dios, en ral-la' gunu' lahuë' Xanru' Dios idútë lë na' run tsutsu xtídz'u ni'a queë' Lë'." <sup>34</sup> Na'a, neda' rea' libí'ili', biti' ca' gun tsutsu xtídza'li'. Biti' gun tsutsu xtídza'li' ni'a que yehua' yubá, tu' naca ga rö'ë rinná' bë'ë Dios. <sup>35</sup> Biti' gun tsutsu xtídza'li' ni'a que luyú ni, tu' naca luyú ni ca xilibi ni'ë Dios, en calëga ni'a que Jerusalén, tu' naca ladzë' Bönni' nayëpisëtërë' rinná' bë'ë. <sup>36</sup> Biti' gun tsutsu xtídz'u ni'a que icju', tu' cabí gaca gunu' ga huóaca chiguichi o gasaj nitú guitsa' icju'. <sup>37</sup> Ral-la' innásili': "Ön", o innásili': "Biti'", tu' naca que tu' xihui' le nadödi bë' ca nácgaca didza' ni.

*Rusédinë' Jesús ca naca que nu ruzí' lëbi luz'ë'e (Lc. 6:29-30)*

<sup>38</sup> Gunnë' ca' Jesús:

—Chibiyõnili' ca naca le gunná bē'ē Moisés, gunnē': "Nu bi run que guiõj lahui luzē'e, ubí'i ca' que, enca' nu bi run que layi' luzē'e, ubí'i ca' que." <sup>39</sup> Na'a, neda' rea' libí'ili': Biti' tá'baga'li' nu guá' dō' queēli', ate' channō nu capa' xagu' ibēla, bē' lataj capa' ca' ia'tú xagu' yõgõla. <sup>40</sup> Channō zoa nu gun ga uchi'a usõrõē' tu bõnni' li', en cuē' zxo', bē' ca' queē' lari' rixõa cúdzu'u. <sup>41</sup> Channō zoa nu gun bayudxi gu'u yua' que tu chi'i, guyéajlen nu na' chopa chi'i. <sup>42</sup> Nu bi rinábini li', bunõdzaj que, en nu bi guē'ēni gunnu' que tu chi'i, biti' tá'bagu'u lē na' inabi li'.

*Rusédinē' Jesús ca ral-la' idxí'iru' nupa biti' ta'lé'e rē'u dxi'a*  
(Lc. 6:27-28, 32-36)

<sup>43</sup> Gunnē' ca' Jesús:

—Lēasca' caní biyõnili' lē na' gula'nnē': "Ral-la' idxí'inu' nu nadxi'i li', en udí'inu' nu biti' rilé'e li' dxi'a." <sup>44</sup> Na'a, neda' rea' libí'ili', guli'dxi'i nupa biti' ta'lé'e libí'ili' dxi'a. Guli'nábinē' Dios gácalenē' nupa tu'lidza libí'ili' zi'. Guli'gún le naca tsahui' quégaca nupa tu'dí'i libí'ili', en buli'lidzē' Dios inábili'-nē' gunē' ga gaca dxi'a quégaca nupa ta'nnē' queēli', en tuá' dō' queēli'. <sup>45</sup> Channō gunli' caní, gácali' zxi'ini cazē' Xúziru' Dios, zoē' yehua' yubá, tu' runē' Lē' ga ruzení' gubidza queē' ga nacuá' bõnachi tuá' dō', enca' ga nacuá' bõnachi tsahui'. Risõl-lē'ē tu nisa guiõj lu yu quégaca bõnachi tsahui', enca' lu yu quégaca bõnachi biti' nácagaca tsahui'. <sup>46</sup> Channō nadxi'isili' bõnni' nadxi'iguequinē' libí'ili', ¿nuzxi caz cu'u libí'ili' yõl-la' ba? Lēasca' caní tunē' bõnni' biti' nácagaca tsahui' na', bõnni' tu'quizxjē' uláz que yõdzõ zi'tu', nadxi'iguequinē' luzá'agaquiē'. <sup>47</sup> Channō rugápalí' Dios tuzē' bõchi' luzá'ali', ¿bizxi caz runli' le nácatērõ dxi'a? Lēasca' caní tunē' bõnni' biti' núnbē'gaquiē' Dios. <sup>48</sup> Pero libí'ili', guli'gaca idú tsahui', ca na' náquiē' Xúziru' Dios, zoē' yehua' yubá, náquiē' idú tsahui'.

## 6

*Rusédinē' Jesús ca ral-la' gácalenru' bõnachi*

<sup>1</sup> Gunnē' ca' Jesús:

—Guli'güi' ládxi'li' gaca idú ca reaj ládxi'li'-nē' Dios. Biti' gúnsili' lē ni lógaca bõnachi para ila'lé'e ca na' runli'. Channō runli' caní, biti' bi gunnē' Xúziru' Dios zoē' yehua' yubá queēli'. <sup>2</sup> Cate' bi unõdzju' que nu bi riyadzaj, biti' gunu' ga ilá' lahui lē na' runu' ca tunē' bõnni' tu'luí'isõ tsahui' cuíngaquiē' ga naca lu yu'u ga tu'dubē' bõnni' judío, en tu'sedē' queē' Dios, enca' ga naca lu yē'eyi. Caní tunē' para ila'gú'u bõnachi légaquiē' yõl-la' ba. Le nácatē' rea' libí'ili', cá'asõ naca yõl-la' ba gata' quégacaquiē'. <sup>3</sup> Pero li', cate' bi unõdzju' que nu bi riyadzaj, biti' ca' gu'u lataj nu inõzi. <sup>4</sup> Na'a, lē na' unõdzju', bagáchi'sõ ral-la'

unödzu', ate' Xúziru' Dios, Nu rilé'e ca na' runu' bagáchi'sö, Lë' ubi'ë quiu'.

*Rusédinë' Jesús ca ral-la' ulídzaru'-në' Dios*

(Lc. 11:2-4)

<sup>5</sup> Gunnë' ca' Jesús:

—Cate' ulídzali'-në' Dios, biti' gunli' ca tunë' bönni' tu'lu'isö tsahui' cuíngaquië', tu' ta'yaza ládxi'gaquië' ta'zuínë' tu'lidzë' Dios gapa naca lu yu'u ga tu'dubë' tu'sëdë' bönni' judío queë' Dios, en gapa naca lu yë'ëyi para ila'lé'e bönachi légaquië'. Le nácatë rea' libí'ili', cá'asö naca yöl-la' ba gata' quégaquië'. <sup>6</sup> Pero libí'ili', cate' ulídzali'-në' Dios guli'tsaza lídxili', en buli'sayaj yu'u. Buli'lidzë' Dios inábili'-në' Xúziru' Dios, zóalenë' libí'ili' ga na' zóali' queézili', ate' Xúziru' Dios, Nu rilé'e ca runli' bagáchi'sö, Lë' ubi'ë queëli'.

<sup>7</sup> 'Cate' ulídzali'-në' Dios biti' gunli' la' yë'ëyi la' lez ca na' tunë' bönni' biti' núnbë'gaquië' Dios, tu' téquinë' huayönnë' Dios légaquië' tu' tu'lidzë' la' yë'ëyi la' lez. <sup>8</sup> Biti' gunli' ca na' tunë' légaquië'. Xúziru' Dios, zí'atëlö cate' si' inábali'-në', chinöz quézinë' le riyadzaj queëli'. <sup>9</sup> Que lë ni na', ral-la' ulídzali'-në' Dios innali' caní:

Xuz netu', zu' yehua' yubá, gaca zxön Lo'.

<sup>10</sup> Gudá inná bë'u luyú ni.

Ben ga gaca luyú ni ca raza ládxi'u Li'

ca na' raca yehua' yubá.

<sup>11</sup> Benna le gágutu' na'a dza.

<sup>12</sup> Buniti lo netu' le huiá' dö' bentu' Lo' Li' ca runtu' netu', runiti lotu' nupa bi tun queëtu'.

<sup>13</sup> Biti' gu'u lataj si' bë' tu' xihui' netu',

pero busölá netu' lu na' nu ruá' dö'.

Nequi quiu' ga rinná bë'u, en yöl-la' unná bë', en yöl-la' ba.

Caní rë'ënitü' gácatica'sö. ¡Ca' gaca!

<sup>14</sup> 'Channö uniti loli' luzá'ali', nupa tuá' dö' queëli', uniti lahuë' Xúziru' Dios, zoë' yehua' yubá, libí'ili'. <sup>15</sup> Channö cabí uniti loli' luzá'ali', biti' uniti lahuë' Xúziru' Dios libí'ili' ca naca dul-la' nabága'li'.

*Rusédinë' Jesús ca ral-la' gunru' gubasa*

<sup>16</sup> Gunnë' ca' Jesús:

—Cate' gunli' gubasa, biti' gunli' bayechi' loli' ca tunë' bönni' tu'lu'isö tsahui' cuíngaquië', tu' tunë' bayechi' lógaquië' para iléquibe'e bönachi tunë' gubasa. Le nácatë rea' libí'ili', cá'asö naca yöl-la' ba gata' quégaquië'. <sup>17</sup> Libí'ili', cate' gunli' gubasa, buli'pá'a ícjali', en guli'quibi loli', <sup>18</sup> para cabí iléquibe'e bönachi runli' gubasa. Bagáchi'sö ral-la' gunli' gubasa, ate' Xúziru' Dios, zóalenë' libí'ili' ga na' zóali' queézili', Lë' ubi'ë queëli'.

*Yehua' yubá ral-la' utúbiru' yöl-la' tsahui' queëru'*

*(Lc. 12:33-34)*

<sup>19</sup> Gunnë' ca' Jesús:

–Biti' utúbili' yöl-la' tsahui' luyú ni, ga ni bélado' que tu'töba' le, ate' raca ditaj, en ga ni ta'yaza gubán, ta'banë'. <sup>20</sup> Buli'tubi yöl-la' tsahui' yehua' yubá, ga ni' bélado' que bití' ulu'töba' le, en bití' gaca ditaj, en ga ni' bití' ila'yázië' bönni' gubán, en bití' ila'banë'. <sup>21</sup> Ga ni' dë yöl-la' tsahui' queëli', ni' gü'i ládxi'li' idxinli'.

*Le rigú'u bení icja ládxi'do'oru'*

*(Lc. 11:34-36)*

<sup>22</sup> Gunnë' ca' Jesús:

–Guiöj loru' naca ca tu le rigú'u bení icja ládxi'do'oru'. Que læ ni na', channö guiöj loli' naca tsahui', idútëli' tsëpili' yösa bení'. <sup>23</sup> Channö guiöj loli' bití' naca tsahui', idútëli' nachúl-lali'. Que læ ni na', channö bení' zóalen libí'ili' nuhuöáca le naca chul-la, yénni'tërö nachúl-lali'.

*Dios, en dumí*

*(Lc. 16:13)*

<sup>24</sup> Gunnë' ca' Jesús:

–Cuntu nu bönni' gaca gunë' xichíngaquië' chopa xanë', tu' uzóë' tuë' tsólá'alö, ate' ia'túë' na' idxí'inë', o ugá'analenë' tuë', ate' ia'túë' na' usán ládxi'ë. Biti' gaca gunli' xichinë' Dios, enca' dumí.

*Dios rapa chi'ë nupa néquiquequi queë'*

*(Lc. 12:22-31)*

<sup>25</sup> Gunnë' ca' Jesús:

–Ia'stú rea' libí'ili': Biti' ubi uguí'ili' ni'a que le gáguli' o ni'a que le guí'jali', yugu' le nabánili', o ni'a que lari' gáguli'. Nazáca'tërö yöl-la' na'bán queëli' ca le gáguli', ate' nácatërö lesaca' le nácali' ca lari' gáguli'. <sup>26</sup> Buli'yú ca raca quégacaba' biguínido' ta'daba' lúzxiba. Biti' bi taz tu'zóaba', en bití' tu'lápaba', en bití' tu'túbiba' ga bi ila'gú'uba' quégacaba', pero Xúziru' Dios zoë' yehua' yubá, rugagu cazë' légacaba'. Nazáca'tëröli' libí'ili' ca yugu' biguínido' na'. <sup>27</sup> ¿Nuzxi caz bönni' nútsë'ë ládjali' gaca gunë' ga soë' ibanë' ia'túz dza tu' ruúbi ruguí'inë' para gaca caní queë'?

<sup>28</sup> ¿Bizx que ruúbi ruguí'ili' ni'a que le gáguli'? Buli'yútsöca' ca raca quégaca yöjdo' rögaca la' guixi' ca ta'zxön. Biti' tun dxin, en bití' tun du lari'. <sup>29</sup> Neda' rea' libí'ili', Salomón, bönni' ni' gunná bë'ë, sal-la' gúta'da' yöl-la' tsahui' queë', lari' gúcuë' bití' gunná'tërö lachi ca rinná'gaca yöjdo' na'. <sup>30</sup> Dios caz runë' lachi yöj guíxi'do', le rögaca la' guixi', le nacúa' na'a dza, ate' cuxö huidzaj ila'yegui lu guí'. Channö caní ruí' ládxi'ë yöj guíxi'do', runë' léguequi lachi, gúnda'arë' ca' queëli', sal-la' bití'



réajlë'ëli'-në' idú ládxi'li'. <sup>31</sup> Que lë ni na', bití' ubi uguí'ili', en bití' innali': "¿Bizxi gágutsatu?" o "¿Bizxi guí'jatsatu?" o "¿Bizxi lari' gágutsatu?" <sup>32</sup> Bönachi yödžolió ni tu'úbi tu'guí'i ni'a que yúgu'të lë ni, pero zoë' Xúziru' yehua' yubá, ate' Lë' nözínë' naquínili' yúgu'të lë ni. <sup>33</sup> Na'a, guli'gü'irö ládxi'li' inná bé'enë' Dios libí'ili', en gunli' le naca tsahui' lahuë' Lë', ate' Lë' cu'ë xinözali' yúgu'të lë ni. <sup>34</sup> Que lë ni na', bití' ubi uguí'ili' ni'a que le ral-la' gaca cuxö huidzaj, tu' huáca gü'í ládxi'li' cuxö huidzaj le gaca queëli' dza na'. Tu tu dza ilaca le ral-la' gü'í ládxi'li' dza na'.

## 7

*Bití' ral-la' ichugu bë'ëru' böchi' luzá'aru'*

*(Lc. 6:37-38, 41-42)*

<sup>1</sup> Gunnë' ca' Jesús:

–Bití' ichugu bë'ëli' böchi' luzá'ali', para cabí ichugu bë'ë Dios queëli', <sup>2</sup> tu' ichugu bë'ë Lë' queëli' la' leze ca na' richugu bë'ëli' queë' böchi' luzá'ali', ate' ca na' rurixi rudödili' que luzá'ali', la' cá'asö urixi udödë' Dios queëli'. <sup>3</sup> ¿Bizx que ruyú' bëbudo' yu'u guiöj lahuë' böchi' luzó'o, en bití' réquibe'enu' yu'u le zxöntëro guiöj lo' li'? <sup>4</sup> ¿Guíëtso' böchi' luzó'o: "Gulöz, cueja' bëbudo' yu'u guiöj lo'", ate' li', le zxöntëro ca' yu'u guiöj lo' li'? <sup>5</sup> Li', bönni' rulu'isö tsahui' cuinu'. Guléaj zí'alö le zxön yu'u guiöj lo' li', ate' ní'irö ilé'enu' tsáhui'do' para gaca cueju' bëbudo' yu'u guiöj lahuë' böchi' luzó'o.

<sup>6</sup> 'Bití' gü'í'ili' quégacaba' bö'cu' le naca lá'ayi, para cabí ulu'huécjaba', en iláguya'aba' libí'ili', en bití' chú'unali' le naca lesaca' queëli' láhuigacaba' cuchi, para cabí ulu'zadi' ní'aba' le.

*Guli'naba, guli'guilaj, en buli'lidza ra' yu'u*

*(Lc. 11:9-13; 6:31)*

<sup>7</sup> Gunnë' ca' Jesús:

–Guli'naba, ate' Dios gunnë' queëli'. Guli'guilaj, ate' gunnë' lataj idžoli queëli'. Buli'lidza ra' yu'u, ate' Lë' isaljë' queëli'. <sup>8</sup> Núti'tës bönni' rinabë', ridéli'në', ate' bönni' riguiljë', ridžoli queë', ate' bönni' rulidžë' ra' yu'u, ralaj queë'.

<sup>9</sup> 'Channö zoë' nu bönni' ládjali' libí'ili', ate' zóabi' bi'i queë', channö inábibi' lë' yöta xtila, ¿naru' unödžjë'-bi' guiöj?

<sup>10</sup> Channö inábibi' lë' tuba' böla, ¿naru' unödžjë'-bi' bëla?

<sup>11</sup> Libí'ili' nácali' huiá' dö', pero nözili' unödžjali' xzi'nili' le naca tsahui'. Nácatëro löza, Xúzili' zoë' yehua' yubá unödžjë' nupa ta'nábini Lë' le naca dxi'a.

<sup>12</sup> 'Que lë ni na', ca na' rë'ënili' ilún bönachi queëli', lë'sca' caní guli'gún quégaquië'. Lë ni naca le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios.

*Tu ga ral-la' tsú'uru' le naca tsúpi'do'*

*(Lc. 13:24)*

<sup>13</sup> Gunnë' ca' Jesús:

—Guli'tsáz ga nu riyaza le naca tsúpi'do'. Blaga' naca ga nu riyaza, en yalaj naca nöza le röjácalenë' bönni' ga ni' ila'nítië', ate' ta'yázië' bönni' zían ni'. <sup>14</sup> Tsúpi'do' naca ga nu riyaza, en lásido'os naca nöza le röjácalen bönachi ga ni' ila'deli' yöl-la' na'bán idú, ate' nabábasö nupa ta'dzöli le.

*Le runru' naca bë' le nácaru'*

*(Lc. 6:43-45)*

<sup>15</sup> Gunnë' ca' Jesús:

—Guli'gún chi'i cuinli' para cabí ila'zí' yé'enë' bönni' ta'zí' yë'ë libí'ili', ta'nnë' tu'ë didza' uláz queë' Dios. Ila'dxinë' bönni' caní ga zóali', en ulu'luí' cuíngaquië' nöxaj ládxi'do' ca nácagacaba' bö'cu' zxíla'do', pero lu icja ládxi'do'gaquië' nácagaquië' ca bö'cu' guí'a sínia'. <sup>16</sup> Yugu' le tunë' ilaca bë' le nácagaquië'. Biti' ruchíbiru' le ribía lubá uva lu yaga yötsi', en bití' ruchíbiru' le ribía yaga higo lu guixi' legui lásido'. <sup>17</sup> Caní naca, yúgu'të yaga dxi'a ta'bía le naca dxi'a, ate' tu yaga cabí naca dxi'a ribía le cabí naca dxi'a. <sup>18</sup> Yaga dxi'a na' bití' gaca cuía le cabí naca dxi'a, ate' yaga na' bití' naca dxi'a bití' gaca cuía le naca dxi'a. <sup>19</sup> Yúgu'të yaga bití' ta'bía le naca dxi'a ila'rugu, ate' ila'gu'ë léguequi lu guí'. <sup>20</sup> Caní naca, yugu' le tunë' bönni' na' ilaca bë' le nácagaquië'.

*Nupa bití' ila'yázië' ga rinná bë'ë Dios*

*(Lc. 13:25-27)*

<sup>21</sup> Gunnë' ca' Jesús:

—Zian nupa të neda': "Xan, Xan", pero calëga yúgu'të ila'yázië' ga rinná bë'ë Dios yehua' yubá. Ila'yázasë' ni' bönni' tunë' ca rë'ënë' Xuza' Dios, zoë' yehua' yubá. <sup>22</sup> Cate' idxín dza údxi que yödzölió ni, bönni' zían ilé' neda', ila'nnë': "Xan, Xan, bentu' libán que xtídzë'ë Dios, buguntu' dxin Lo', en buguntu' ca' dxin Lo' para bubéajtu' yugu' bö' xihui', en buguntu' ca' dxin Lo' bentu' zían yöl-la' huáca zxön." <sup>23</sup> Ní'irö neda' guía' légaquië': "Bití' ca' núnbë'a libí'ili'. Guli'cuíta ga zoa', libí'ili' ruá'ali' dö'."

*Chopa ca gaca udxíaru' xilibi zö'ö*

*(Lc. 6:47-49; Mr. 1:22)*

<sup>24</sup> Gunnë' ca' Jesús:

—Ia'stú ca', nu bönni' riyönnë' xtídzä'a ni, en gunë' ca rnna, bönni' ni náquië' ca tu bönni' réajni'inë', budxíë' lidxë' ga naca lu guiöj. <sup>25</sup> Cate' gulaj guiöjsiu', en guzxön yegu gubó'o, en guyecja bö', gudibi nisa cuita yu'u na', pero bití' gubixi, tu dxía xilibi lu guiöj. <sup>26</sup> Na'a, nu bönni' riyönnë' xtídzä'a ni, en

biti' runë' ca rnna, bönni' ni náquië' ca tu bönni' biti' réajni'inë', budxië' lidxë' lu yu dzöbi. <sup>27</sup> Cate' gulaj guiöjsiu', en guzxön yegu gubó'o, en guyecja bö', ní'irö gudá'a nisa cuíta yu'u na', ate' gubíxité, en tsaz biguinnaj.

<sup>28</sup> Cate' Jesús budxi bé'lenë' légaquië' didza' ni, bulu'bani bönnachi zían nacuá' ni' ca naca le rusédinë', <sup>29</sup> tu' rusédinë' légaquië' ca tu bönni' dë lu në'ë, en calëga ca tunë' bönni' yudo' usedi quëgaquië'.

## 8

*Ruhuóáquië' tu bönni' ré'enë' huë' nudzu' ruzödi*  
(Mr. 1:40-45; Lc. 5:12-16)

<sup>1</sup> Cate' böjtë' Jesús lu guí'a na', söjácálen bönnachi zían Lë'.  
<sup>2</sup> Bidxinë' tu bönni' ré'enë' huë' nudzu' ruzödi ga zoë' Jesús, ate' buzóa zxi'bë' lahuë' Jesús, en rë' Lë':

—Xan, channö ré'ënu', huáca unu' neda'.

<sup>3</sup> Ní'irö Jesús la' bulité në'ë, en gudanë' lë'. Rë' lë':

—Rë'ënda'. Huóácu' dxi'a.

La' bunítité xihuë'ë bönni' huë' na'. <sup>4</sup> Ní'irö Jesús gudxë' lë':

—Buyú, cuntu nu guío' caní, pero guyéaj, yöjluí'i cuinu' lahuë' bixúz, ate' yöjnodzaj le gunná bé'ë Moisés le uluí'i bönnachi chibóácu'.

*Jesús ruúnë' bi'i huen dxin queë' tu bönni' rinná bé'ë lu gudil-la*  
(Lc. 7:1-10)

<sup>5</sup> Cate' guyázië' Jesús yödzö Capernaum, bidxinë' tu bönni' ga zoë', bönni' rinná bé'enë' tu gáyu'ë bönni' röjáquië' gudil-la, ate' gúta'yuë' lahuë' Jesús, <sup>6</sup> en rë' Lë':

—Xan, bi'i huen dxin quia' dëbi' yu'u, ré'ebi' huë' nacú'unibi' bin, ate' riguí'i rizáca'da'abi'.

<sup>7</sup> Jesús rë' lë':

—Neda' guída' una'-bi'.

<sup>8</sup> Bubi'ë didza' bönni' na' rinná bé'enë' bönni' röjáquië' gudil-la, en rë' Jesús:

—Xan, biti' naca' zi tsázui' lidxa', pero tsa innasu' quia', ate' huóácabi' bi'i huen dxin quia'. <sup>9</sup> Lësca' neda', zoa nu rinná bé'ë neda', en nacu'ë ca' bönni' röjáquië' gudil-la rinná bé'egacada-në'. Cate' rea'-në' tuë': “Guyéaj ni”, rejë'. Cate' rea'-në' ia'tué': “Gudá ni”, ridë'. Cate' rea'-në' bönni' huen dxin quia': “Ben dxin ni”, la' runtë' dxin na'.

<sup>10</sup> Cate' biyönnë' Jesús didza' ni, bubánnië', ate' gudxë' bönni' söjácálenë' Lë', rnnë':

—Le nácatë' rea' libí'ili', ga nacuá' bönnachi Israel, cuntu nu bönni' röjxéqui'da'-në' réajlë'ë neda' ca runë' bönni' ni. <sup>11</sup> Ia'stú' rea' libí'ili': Ila'rúaj bönnachi zían saca' ga rilén gubidza, en saca'

ga ribía gubidza, ate' ila'bö'len tsözxön Abraham, en Isaac, en Jacob, yehua' yubá ni' ga rinná bē'ē Dios, <sup>12</sup> pero yugu' bönni' na' gurō cazē' Dios para ila'yáziē' ga na' rinná bē'ē Lē', chú'unē' légaquiē' ní'lō ga na' naca chul-la, ate' ni' ila'bödxē', en ulu'til-la láyē'ē lu yöl-la' ruhuí'ini quégaquiē'.

<sup>13</sup> Ní'irō Jesús gudxē' bönni' na' rinná bé'enē' bönni' rōjáquiē' gudil-la, rnnē':

—Böaj lidxu'. Ca na' réajlē'u, ca' gaca quiu'.

La' ná'asō böácatēbi' bí'i huen dxin queē' na'.

*Jesús ruúnē' xiná'anu nigula queē' Pedro*

(Mr. 1:29-31; Lc. 4:38-39)

<sup>14</sup> Bidxinē' Jesús lidxē' Pedro, ate' ni' bilé'enē'-nu xiná'anu nigula queē', dēnu lu da'a, en yú'unu tu xilá. <sup>15</sup> Gudane' Jesús ná'anu, ate' la' burúajtē xilá na' yú'unu. Ní'irō böásanu, en bunödžjanu le gulahuē'.

*Jesús ruúnē' zían nupa te'e*

(Mr. 1:32-34; Lc. 4:40-41)

<sup>16</sup> Cate' chiridzō' dza na', dujuá'agaquiē' zían bönni' yú'ugaca bö' xihui' légaquiē' ga zoē' Jesús, ate' len yöl-la' rinnēsō queē' bubéajē' yugu' bö' xihui' na', en bunē' ca' yúgu'tē nupa te'e. <sup>17</sup> Caní guca para gaca ca na' gunné' Isaías, bönni' bē'ē didza' uláz queē' Dios, gunné': "Lē' bu'ē yugu' le rizáca'ru', en bu'ē ca' yugu' yödžohuē' queēru'."

*Nupa gulē'ēni tsöjácalen Jesús*

(Lc. 9:57-62)

<sup>18</sup> Cate' bilé'enē' Jesús nacuá' bönachi zían gásibi'ilē', gunná bé'enē' yugu' bönni' usēda queē' ila'dödē' ia'tsölá'a nísado' ní'.

<sup>19</sup> Bidxinē' tu bönni' yudo' usedi ga na' zoē' Jesús, en rē' Lē':

—Bönni' Usedi, sá'lēna' Li' gátitēs ga tseju'.

<sup>20</sup> Jesús rē' lē':

—Yugu' böza' nacuá' zzan guiōj quégacaba', ate' yugu' biguínido', nudxiágacaba' xicá'agacaba', pero nēda', Bönni' Guljē' Bönachi, biti' dē ga quíxaj icja'.

<sup>21</sup> Ia'tuē' bönni', náquiē' bönni' usēda queē' Jesús, gudxē' Lē':

—Xan, bēna nēda' lataj huōja' ga idxinrō dza chibucácha'a-nē' xuzá'.

<sup>22</sup> Jesús gudxē' lē':

—Gudá' nēda'. Bē' lataj yugu' bönni' tati cazē' ulu'cáché'ē nupa ilátigaca quégaquiē'.

*Jesús ribequi dxíē' bö' budunu'*

(Mr. 4:35-41; Lc. 8:22-25)

<sup>23</sup> Gurenē' Jesús lē'e bārcodo', ate' dzágagaquiē' Lē' bönni' usēda queē'. <sup>24</sup> Ní'irō guyecja bö' budunu' lu nísado' na', ate' riyasa ridxiáda' nísado' na' ga bidxintē riyaza nisa lē'e bārcodo'

na'. Dë' rásie' Jesús lë'e barco na'. <sup>25</sup> Ní'irö bila'dxinë' bönni' usëda queë' Jesús ga na' zoë', ate' bulu'subanë' Lë', en tē' Lë':

—Xan, busölá netu'. Chirigáchi'ru' lu nisa.

<sup>26</sup> Bubi'ë didza' Jesús, en rë' légaquië':

—¿Bizx que rádxili'? Láti'do'os réajlë'ëli'-në' Dios.

Ní'irö guyasë' Jesús, en bulidzë' bö' na' recja, en nísado' na', ate' la' guró'otë dxi. <sup>27</sup> Bulu'báinë' bönni' na', ta'nnë':

—¿Nuzxi caz bönni' ni? Ru'isë' didza', ate' bö' recja, en nísado' tun ca rnnë'.

*Yugu' bönni' Gadara yú'ugaca bö' xihui' légaquië'*

(Mr: 5:1-20; Lc: 8:26-39)

<sup>28</sup> Cate' bidxinë' Jesús ia'tsölá'a nísado' ga na' naca lu xiyú yödzo Gadara, bila'rúajë' chopë' bönni' ga nacuá' ba quégaca nupa nátigaca, dutságagaquië' Jesús. Nácagaquië' sínia', ate' cuntu nu gaca tödi la' nöza ni'. <sup>29</sup> La' gulu'itë' zidzaj didza' chopë' ni, ta'nnë':

—¿Bizxi ral-la'tu' quiu', Jesús, Zxí'inë' Dios? ¿Naru' bidxintso' ni dusaca' zi'u netu' zí'alö ca idxín dza queëtu'?

<sup>30</sup> Ga ni' nacu'ë nacuá'aba' cuchí zían ta'daba' táguba', nacuá'aba' láti'do' ga naca zi'tu'. <sup>31</sup> Gula'naba yechi' bö' xihui' na' Jesús, en tē' Lë':

—Channö ubéaju' netu', benna lataj tsöjtsú'ugacatu'-ba' cuchí zían ni'.

<sup>32</sup> Ní'irö Jesús gudxë' léguequi:

—Guli'tséaj.

La' bila'rúajtë bö' xihui', en yöjcházagaca cuchí zían ni'.

Ní'irö yúgu'tëba' cuchí zían na' yöjbíxitégacaba' ga naca lë'e guiöj, en yöjcházagacaba' lu nísado', ga ni' gula'yépiba' nisa, en gulátiba'.

<sup>33</sup> Guládxinë' bönni' tu'yüë'-ba' cuchí na', ate' bulu'zxúnnajë'. Cate' bila'dxinë' lu yödzo, gula'guíxjö'ë yúgu'të lë' na' guca quégagaquië' bönni' ni' gula'yú'u bö' xihui' légaquië'. <sup>34</sup> Ní'irö bila'rúaj bönachi lu yödzo ni', yöjtságagaquië' Jesús. Cate' bila'lë'enë' Lë', guláta'yüë' lahuë' uzë'ë lu xiyúgaquië' na'.

## 9

*Jesús ruúnë' tu bönni' nacú'unië' bin*

(Mr: 2:1-12; Lc: 5:17-26)

<sup>1</sup> Ní'irö bubenë' Jesús lë'e bárcodo', en gudödë' ia'tsölá'a nísado' ni', ate' budxinë' ga naca ladzë'. <sup>2</sup> Ní' dujuá'gaquië' tu bönni' nacú'unië' bin ga zoë' Jesús, zxoë' lu da'a yaga. Cate' bilé'enë' Jesús ca na' ta'yéajlë'ë bönni' ni' Lë', gudxë' bönni' na' nacú'unië' bin, rnnë':

—Butipa ládXu'u, zxi'ina'do'. Chibuníti lahua' dul-la' nabágu'u.

<sup>3</sup> Nacu'ë ca' bönni' yudo' tu'sédinë' ni', ate' ta'nnë' lu icja ládxi'do'gaquië', ta'nnë': "Didza' ru'ë bönni' ni ruzóa Dios tsölá'alö."

<sup>4</sup> Cate' réquibe'enë' Jesús le ta'zá' ládxi'gaquië', rë' légaquië':

—¿Bizz que rizá' ládxi'li' caní le cabí naca tsahui'? <sup>5</sup> Biti' naca böniga nu guiësö bönni' ni: "Yugu' dul-la' nabágu'u chibuníti lahua'", pero naca böniga nu gun ga huóasë', en uzé'enë'.

<sup>6</sup> Na'a, ulu'ida' libí'ili' neda', Bönni' Guljë' Bönachi, dë lu na'a yöl-la' unná bë' uniti lahua' dul-la' luyú ni.

Ní'irö Jesús gudxë' bönni' na' nacú'unië' bin, rnnë':

—Guyása. Buchisa da'a yaga quiu', en böaj lidxu'.

<sup>7</sup> Ní'irö la' guyásatë' bönni' na' nacú'unië' bin, en böajë' lidxë'. <sup>8</sup> Cate' bila'lé'enë' bönni' nacu'ë ni' lë ni, bulu'bábinë', ate' gula'gu'ë Dios yöl-la' ba tu' bunödzjë' yöl-la' huáca caní quégaca bönachi.

### *Jesús rulidzë' Mateo*

(Mr. 2:13-17; Lc. 5:27-32)

<sup>9</sup> Cate' buzë'ë Jesús ni', bilé'enë' bönni' lë' Mateo, rö'ë ga na' ruquíxjë' uláz que yödzö zi'tu', ate' Jesús gudxë' lë':

—Gudá' neda'.

Ní'irö la' guyásatë' Mateo na', ate' sa'yéajlenë' Jesús.

<sup>10</sup> Ia'tú le guca, cate' ni' rö'ë Jesús rahuë' ga naca lidxë' Mateo, zían bönni' tu'quíxjë', en yugu' bönni' cá'asö bila'dxinë' ga zoë', ate' gula'bö'lenë' Jesús tsözxön len yugu' bönni' usëda queë'. <sup>11</sup> Cate' bönni' yudo' fariseo bila'lé'enë' lë ni, gula'nábinë' yugu' bönni' usëda queë' Jesús, ta'nnë':

—¿Naru' bönni' rusédinë' libí'ili' rágulentsë' tsözxön bönni' tu'quíxjë', en iá'zica'rë' bönni' dul-la'?

<sup>12</sup> Cate' biyönnë' Jesús lë ni, rë' légaquië':

—Biti' naquíniguequinë' bönni' nácagaquië' dxi'a nu un bönachi, pero bönni' té'enë' naquíniguequinë' nu un bönachi.

<sup>13</sup> Guli'tséaj, en buli'sëda le rnna lë na' nazúaj lu guichi lá'ayi, le rnna caní: "Rë'ënda' ulu'huéchi' ládxi'gaquië' bönni' luzá'agaquië', en calëga ilútië'-ba' böa' bëdxi lu bucugu lá'ayi quia'." Bida' ni, calëga para ulídzagaca'-në' bönni' tsahui', pero bida' para ulídzagaca'-në' bönni' dul-la' para ulu'bí'i ládxi'gaquië'.

### *Rusédinë' Jesús ca ral-la' gunru' gubasa*

(Mr. 2:18-22; Lc. 5:33-39)

<sup>14</sup> Ní'irö bönni' dá'gaquië' Juan, bönni' na' buquilë' bönachi nisa, bila'dxinë' ga zoë' Jesús, ate' gula'nábinë' Lë', ta'nnë':

—¿Bizz que na' netu', enca' yugu' bönni' yudo' fariseo, zían luzuí runtu' gubasa, pero yugu' bönni' usëda quiu' Li' bití tunë' gubasa?

<sup>15</sup> Bubi'ë didza' Jesús, en rë' légaquië':

—¿Naru' huácatsö ila'sëbi ládxi'gaca nupa nacuá' laní que yöl-la' rutsaga na' tsanni ni' bönni' rutsaga në'ë zóalenë' légaquië'? Za' dza cate' idüé' bönni' na' rutsaga në'ë ga nacu'ë. Dza ní'irö ilunë' gubasa.

<sup>16</sup> Bucúdzu'ë didza' Jesús, rnnë':

—Cuntu nu un tu lari' tēbi len lari' cubi, tu' uxú'uni lari' cubi na' nugu'ë lari' tēbi na', ate' ichōza'rō lari' tēbi na'. <sup>17</sup> Lēscá' caní, cuntu nu bönni' riguë'ënë' xisi uva cubi tu lu buzudi guídi gula, tu' galaj ilēbi xisi uva cubi na', en uzuzxaj buzudi guídi gula na', ate' gaca ditaj xisi uva na', ate' initi ca' buzudi guídi na'. Rigá'aru' xisi uva cubi tu lu buzudi guídi cubi, ate' irópatē taca chí'i.

*Rubanbi' bi'i nigula queë' Jairo, en ruhuóácanu tu nigula gudannu lari' nácuë' Jesús*

(Mr: 5:21-43; Lc. 8:40-56)

<sup>18</sup> Tsanni ni' Jesús ru'ilenë' légaquië' didza' ni, tu bönni' rinná bé'enë' bōnachi judío bidxinë' ga zoë', ate' buzóa zxi'bë' lahuë' Jesús, en rë' Lë':

—Bi'i nigúlado' quia' la' gútitébi'. Gudá ixóa no'o lēbi', ate' ubanbi'.

<sup>19</sup> La' guzuítenë' Jesús, en sa'yéajlenë' lë'. Dzágagaquië' bönni' usēda queë' Lë'.

<sup>20</sup> Ní'irö bidxinnu tu nigula zaca' cúdzulë' Jesús, chiguca chinnu iz ré'enu, bití' ruhu'í rōn queënu que huë' quégaca cázanu nigula, ate' gudannu lari' nácuë' Jesús. <sup>21</sup> Caní bennu tu' rizá' ládxi'nu, rnnanu: Channō cansa' zxië', huóáca'.

<sup>22</sup> Ní'irö buécjé' Jesús, en ruyúé' lēnu, ate' rë'ë-nu:

—Butipa ládxi'u, zxi'ina'do'. Chibóácateu' tu' réajlë'u neda'.

La' ná'asö böácatēnu.

<sup>23</sup> Cate' bidxinë' Jesús lidxë' bönni' unná bē' na', bilé'enë' nacu'ë ni' bönni' tu' cōdxë' gui, en nupa ta'bōdxi yechi'. <sup>24</sup> Jesús rë' légaquië':

—Guli'cuita ni, tu' cabí nátibi' bi'i nigúlado' ni. Rásisibi' na'.

Ní'irö nupa nacuá' ni' bulu'titaj Lë'.

<sup>25</sup> Cate' chinubéajé' Jesús bōnachi na' ní'ilō, guyázië', en gudélë'ë ná'abi' bi'i nigula na', ate' la' guyásatēbi'. <sup>26</sup> Guzë' didza' ca guca lē ni, ate' bila'yōni bōnachi nacuá' idütë luyú na'.

*Jesús ruúnë' bönni' nachul-la guiōj lógaquië'*

<sup>27</sup> Cate' Jesús burúajé' ni', chopë' bönni' nachul-la guiōj lógaquië' sōjácalenë' Lë'. Tu'ë zidzaj didza', ta'nnë':

—Zxi'ini xi'sóë' David, buéchi' ladxi' netu'.

<sup>28</sup> Cate' bidxinë' Jesús ga naca lu yu'u, bila'dxinë' chopë' bönni' na' nachul-la guiōj lógaquië' ga zoë'. Jesús gunábinë' légaquië', rnnë':

—¿Ba réajlë'ëli' neda', huáca una' libí'ili'?

Légaquië' ta'nnë':

—Ön, Xan.

<sup>29</sup> Ní'irö Jesús gudanë' guiöj lógaquië', ate' rnnë':

—Ca réajlë'ëli', ca' gaca queëli'.

<sup>30</sup> La' böäljatë guiöj lógaquië'. Ní'irö Jesús buzenë' bach légaquië', rnnë':

—Guli'gü'itica'sö ládxi'li' cuntu nu inözi lë ni.

<sup>31</sup> Cate' bulu'rúajë' ni', la' bulu'zëtë' didza' idútë luyú ni' ca naca lë na' benë' Jesús.

*Jesús ruúnë' tu bönni' biti' ru'ë didza'*

<sup>32</sup> Cate' Jesús, en yugu' bönni' usëda queë' bulu'rúajë' tu lu yu'u, bila'dxinë' bönni' ga zoë' Jesús nachë'gaquië' lahuë' tu bönni' biti' ru'ë didza', tu' yu'u lë' bö' xihui'. <sup>33</sup> Cate' bubéajë' Jesús bö' xihui' na', la' gunnëtë' bönni' na' biti' guca gu'ë didza'. Bulu'báinë' bönni' nacu'ë ni', ta'nnë':

—Catu caz rilé'etu' le caní ladaj bönachi Israel.

<sup>34</sup> Ní'irö bönni' yudo' fariseo gula'nnë' queë' Jesús, ta'nnë':

—Bönni' ni rubéajë' yugu' bö' xihui', rugunë' dxin yöl-la' unná bë' que xángaca bö' xihui' na'.

*Jesús ruhuéchi' ládxi'ë bönachi zían*

<sup>35</sup> Gudë' Jesús idú gásibi'ilö gapa nacuá' yödzö zxön, en gapa nacuá' yödzödo', ate' gapa naca lu yu'u ga tu'dubë' tu'sëdë' bönni' judío queë' Dios. Rusédinë' Jesús bönachi nacuá' ni', en runë' libán que didza' dxi'a ca rinná bë'ë Dios. Bunë' yúgu'të nupa bi ta'gu'i ta'zaca' yugu' lu yödzö na'. <sup>36</sup> Cate' Jesús bilé'enë' bönni' zían ni', buéchi' ládxi'ë légaquië', tu' ta'gu'i ta'záquië', en nudú ládxi'gaquië' ca raca quégacaba' bö'cu' zxila' biti' zoa nu ruyú légacaba'. <sup>37</sup> Ní'irö Jesús rë' yugu' bönni' usëda queë', rnnë':

—Le nácatë dëda' yöla, pero nabábasö nupa tu'lapa. <sup>38</sup> Que lë ni na', guli'gáta'yu lahuë' Dios, náquië' Xan yöla na', inábili'-në' isöl-lë'ë bönni' huen dxin ulu'lapë' yöla queë'.

## 10

*Jesús riböë' bönni' ilácagaquië' gubáz queë'*

(Mr. 3:13-19; Lc. 6:12-16)

<sup>1</sup> Ní'irö bulidzë' Jesús idxínnutë' bönni' usëda queë', en budödë' lu ná'agaquië' yöl-la' unná bë' para ulu'béajë' bö' xihui' yú'ugaca bönachi, en ulu'ünë' yúgu'të nupa te'e, en yúgu'të nupa bi ta'gu'i ta'zaca'.

<sup>2</sup> Caní naca lágaquië' idxínnutë' gubáz na' nasöl-lë'ë Jesús: Simón, (lë' ca' Pedro), Andrés, (böchë'ë Simón na'), Jacobo, (zxí'inë' Zebedeo),



Juan, (böchë'ë Jacobo na'),  
<sup>3</sup> Felipe, Bartolomé, Tomás,  
 Mateo, (bönni' uquízxaj),  
 Jacobo, (zxí'inë' Alfeo),  
 Lebeo, (lë' ca' Tadeo),

<sup>4</sup> Simón, (bönni' ruí'i ládxe'ë yödzö queë'),  
 Judas Iscariote, (bönni' udödë' Jesús lu ná'agaquië' bönni'  
 ilútië' Lë').

*Jesús risöl-lë'ë gubáz queë' tsöjéngaquië' libán*  
 (Mr. 6:7-13; Lc. 9:1-6)

<sup>5</sup> Ní'irö Jesús gusöl-lë'ë idxínnutë' bönni' ni tsöjéngaquië'  
 libán, ate' gunná bé'enë' légaquië', rnnë':

–Biti' tséajli' ga nacua' bönachi biti' nácagaca judío, en biti'  
 tsú'uli' ládzagaca bönachi nacua' luyú Samaria. <sup>6</sup> Guli'tséaj  
 ga nacua' bönachi Israel, nácagaquië' ca bö'cu' zxíla'do'  
 nanítigacaba'. <sup>7</sup> Guli'tsöjén libán, innali': "Chibidxín gala' dza  
 Dios, Nu na' zoa yehua' yubá, inná bë'ë luyú ni." <sup>8</sup> Buli'ún  
 nupa te'e. Buli'ún dxí'a nupa te'e huë' nudzu' ruzödi.  
 Buli'subán nupa chinátigaca. Buli'béaj bö' xihui' yú'ugaca  
 bönachi. Bénnasa' queëli' yöl-la' unná bë' ni. Buli'gún dxin le,  
 en biti' bi uquízxjali'.

<sup>9</sup> Biti' bi guá'ali' lu buzudi queëli', calëga dumí oro, en calëga  
 dumí plata, en calëga dumí lásido'. <sup>10</sup> Biti' guá'ali' yöxaj yöta  
 queëli' le gáguli' la' nöza. Tuz lari' ixóa yenli', en biti' guá'ali'  
 xiráchuli' o xiyaga queëli', tu' idzöli quézinë' bönni' huen dxin  
 le gahuë'.

<sup>11</sup> 'Gáti'tës yödzö zxön o yödzödo' ga idxinli', guli'naba  
 nuzxi naca idú ladxi' lu yödzö ni', ate' ugá'anali' lidxi nu  
 na' cate' gála'rö dza urúajli' yödzö na'. <sup>12</sup> Cate' tsú'uli' tu lu  
 yu'u, buli'gapa Dios bönachi nacua' lu yu'u na', inábili'-në'  
 Dios unödzjë' quégaquië' le cuéqui dxi ícja ládxi'do'gaquië'.  
<sup>13</sup> Channö bönachi nacua' lu yu'u ni' nácagaca lesaca',  
 ugá'analen le ribequi dxi ladxi' na' léguequi, pero channö  
 bönachi na' cabí nácagaca lesaca', inábali' cabí ugá'ana lë  
 na' ribequi dxi ladxi' len léguequi. <sup>14</sup> Gáti'tës ga idxinli' ga  
 bönachi ni' biti' ilún libí'ili' bal, en biti' ulu'zë nagui xtídza'li',  
 buli'rúaj lu yu'u ni' o yödzö ni', ate' guli'cuíbi bëchtö da'  
 lë'e lábali', le ulu'i' léguequi nabága'gaca xíguia'. <sup>15</sup> Le nácate  
 rea' libí'ili', cate' idxin dza ichúguíë' Dios quégaca bönachi,  
 ila'gu'i ila'záca'rö bönachi yödzö na' ca ila'gu'i ila'záca'  
 bönachi gula'cuá' yödzö Sodoma, en yödzö Gomorra, nupa  
 ni' busunítië' Dios.

*Nupa biti' ta'yéajlë' ulu'saca' zi' nupa dá'gaca Cristo*

<sup>16</sup> Gunnë' ca' Jesús:

—Buli'yútsöca', neda' risöl-la'a libí'ili', ate' gácali' ca bö'cu' xzíla'do' ta'daba' ga dzö'öba' bö'cu' guí'a sínia'. Guli'gaca sina' ca nácagacaba' sina' bëla sínia', pero guli'gaca ca' nöxaj ladxi' ca nácagacaba' gu'dödo'. <sup>17</sup> Guli'gún chi'i cuinli' quégaca bönachi, tu' ulu'dödë' libí'ili' lu ná'agaquië' bönni' yúlahui', en ila'guínë' libí'ili' gapa naca lu yu'u ga tu'dubë' tu'sëdë' bönni' judío queë' Dios. <sup>18</sup> Lësca' caní, ila'chë'ë libí'ili' lógaquië' bönni' lo, en lógaquië' bönni' ta'nná bë'ë, tu' dá'ali' neda'. Caní gaca para gaca gunli' ba nali' quia' lógaquië' bönni' ni', en lógaquië' bönni' bití' nácagaquië' judío. <sup>19</sup> Ní'irö cate' ulu'dödë' libí'ili' lu ná'agaquië' bönni' unná bë'na', bití' cö'öli' böniga nacxi innali', tu' ichizë' Dios icja ládxi'do'oli' didza' gü'ili', en ca innali' la' dza ná'asö. <sup>20</sup> Calëga libí'isili' na' innali', pero Dios Bö' Lá'ayi, Nu na' risöl-lë'ë Xúziru' Dios queëli', Lë cazë' sóalenë' libí'ili', en gu'ë didza'.

<sup>21</sup> Ila'cuá' bönachi ulu'dödi böchi'guequi lu ná'agaquië' bönni' ilútië' légaquië', en lësca' caní, bönni' nácagaquië' xuz ulu'dödë' xzí'nigaquië', ate' ila'cuá'abi' bi'i ila'dá'baga'bi' xúzgacabi', en ilunbi' ga ilátië' xúzgacabi' na'. <sup>22</sup> Yúgu'të bönachi ulu'zóa libí'ili' tsölá'alö tu' dá'ali' neda', pero nu ugá'ana tsutsu ga idxinrö dza údxi, nu ni ulá. <sup>23</sup> Cate' ulu'saca' zi' bönachi libí'ili' tu lu yödzö, buli'zxunnaj ni', ate' tséajli' ia'tú yödzö, tu' rea' libí'ili', huöda' neda', Bönni' Guljë' Bönachi, zí'alö cate' údxi gunli' libán gapa nacuá' yugu' yödzö quégaca bönachi Israel.

<sup>24</sup> Núti'tës bönni' náquië' bönni' usëda bití' nácarë' lo ca nu rusëdi lë', en lësca' caní, nu bönni' náquië' huen dxin bití' nácarë' lo ca xanë'. <sup>25</sup> Nu na' naca bönni' usëda ral-la' udzëjanë' channö huadéli'në' gáquië' ca naca nu rusëdi lë', ate' bönni' huen dxin na' ral-la' udzëjanë' channö gáquië' ca naca xanë'. Channö ta'nnë' quia' neda', bönni' xan yu'u, ta'nnë' naca' Belzebú tu' xihui', ila'nnë' zí'irë' quégaca bönachi tá'gaquië' neda'.

*Nu ral-la' gádxiru'*

*(Lc. 12:2-9)*

<sup>26</sup> Gunnë' ca' Jesús:

—Que lë ni na', bití' gádxili' bönachi. Hualá' lahui yúgu'të le raca bëdxi lándos, ate' huáca bë' yúgu'të le nagachi'. <sup>27</sup> Yugu' didza' ru'ílëna' libí'ili' ga naca chul-la, guli'quixjö' ga naca lu bení', ate' le rea' libí'ili' ga nagachi', guli'nnë' zidzaj ga naca lahui' lógaca bönachi. <sup>28</sup> Bití' gádxili' nupa tuti le nácagaca caz bönachi, pero bití' gaca ulu'suniti bö' naca cázaru'. Guli'gadxi Dios, Bönni' na' gaca gútië' idútë le nácali', en chú'unë' bö' naca cázali' lu guí' gabila.

<sup>29</sup> 'Ta'dá'uba' chópaba' biguínido' len tu dumí lásido', pero bití' ibíxiba' tuba' lu yu channö cabí ru'ë Xúziru' Dios lataj gaca caní. <sup>30</sup> Lësca' caní, nabábagaca yúgu'të guitsa' ícjali' lahuë' Dios. <sup>31</sup> Que lë ni na', bití' gádxili'. Ru'ítërö ládxe'ë Dios libí'ili' ca ru'í ládxe'ë-ba' zianba' biguínido'.

*Yugu' bönni' ta'zí' lu ná'agaquië' Cristo lógaca bönachi*  
(Lc. 12:8-9)

<sup>32</sup> Gunnë' ca' Jesús:

—Nu bönni' si' lu në'ë neda' lógaca bönachi, neda' si' lu na'a bönni' na' lahuë' Xuza' zoë' yehua' yubá. <sup>33</sup> Bönni' ta'dá'baguë'ë lógaca bönachi, ila'nnë' bití' ta'dë'ë neda', lësca' caní neda' tá'bagá'a légaquië' lahuë' Xuza' zoë' yehua' yubá.

*Jesús náquië' le run ga ila'rúaj choplö bönachi*  
(Lc. 12:51-53; 14:26-27)

<sup>34</sup> Gunnë' ca' Jesús:

—Bití' guéquili' za'a idigu'a le ribequi dxi bönachi yödzölió ni. Bití' za'a idigu'a le ribequi dxi, pero za'a idigu'a le gun ga ila'rúaj choplö bönachi. <sup>35</sup> Za'a ni, ate' guna' ga ila'dá'bagá' bönachi xúzguequi, ate' yugu' nigula ila'dá'bagá'nu ca' xiná'agacanu. Lësca' caní, yugu' nigula zxoá' lídxigacanu ila'dá'bagá'nu xto' zxí'ininu. <sup>36</sup> Caní gaca, la' di'a dzasö quégaca bönachi ulu'saca' zì' luzë'eguequi.

<sup>37</sup> Nu nadxí'irö xuz xinë'e ca nadxí'i neda', bití' naca bachi nu na' ta' neda', ate' nu nadxí'irö bi'i bönni' que o bi'i nigula que ca nadxí'i neda', bití' naca bachi nu na' ta' neda'. <sup>38</sup> Nu bití' si' lu në'e gaca ca tu bönni' söjtë'ë lë'e yaga cruz, en ta' neda', bití' naca bachi guequi quia' neda'. <sup>39</sup> Nu ru'í ladxi' gun chí'i yöl-la' na'bán que, uniti le, pero nu uniti yöl-la' na'bán que tu da' neda', ulá nu na'.

*Yugu' le ubi'ë Dios queëru'*  
(Mr. 9:41)

<sup>40</sup> Gunnë' ca' Jesús:

—Nu gun libí'ili' bal, neda' ca' gun bal, ate' nu na' gun neda' bal, gun bal ca' Dios Xuz nasól-lë'ë neda'. <sup>41</sup> Nu gun bal tu bönni' ru'ë didza' uláz queë' Dios tu' ru'ë didza' uláz queë' Dios, huadeli' nu na' lu në'ë Dios la' leze na' idéli'në' bönni' ru'ë didza' uláz queë' Dios. Lësca' caní, nu gun bal tu bönni' tsahui' tu' náquië' bönni' tsahui', huadeli' nu na' lu në'ë Dios la' leze na' idéli'në' bönni' tsahui'. <sup>42</sup> Núti'tës nu unödzej queë' tu bönni'do' ni tu zxibíndo'os nisa tu' náquië' bönni' usëda quia' neda', le nácatë rea' libí'ili', bití' uniti nu na' le ral-la' si' lu në'ë Dios.

## 11

*Ta'dxinë' bönni' nasöl-lë'ë Juan ga zoë' Jesús*  
(Lc. 7:18-35)

<sup>1</sup> Cate' Jesús budxi buzéajni'inë' yugu' bönni' usëda queë', buzë'ë ni', sa'yéajë' röjsëdinë' bönachi, en röjenë' libán yugu' lu ládzagaca bönachi na'.

<sup>2</sup> Juan, bönni' buquilé' bönachi nisa, ni' yu'ë lidxi guié, ate' biyönnë' ca náca'gaca le runë' Jesús. Ní'irö Juan na' gusöl-lë'ë chopë' bönni' dá'gaquië' lë', ate' bila'dxinë' ga na' zoë' Jesús.

<sup>3</sup> Chopë' ni gula'nábinë' Jesús, të' Lë':

—¿Nacu' Li' Cristo, Bönni' na' ral-la' idxinë' yödzölió ni, o ralla' cöztu' dza idxinë' ia'túë' bönni'?

<sup>4</sup> Bubi'ë didza' Jesús, rë' légaquië':

—Guli'tséaj tsöjtíxjöi'ili'-në' Juan lë ni riyónili', en rilé'eli'.

<sup>5</sup> Guli'tsöjödxe' ca raca, tu'lé'enë' bönni' guchul-la guió'j lógaquië', ate' tu'zë'ë bönni' biti' guca ila'dë'. Nuhuóacagaquië' bönni' gü'iguequinë' huë' nudzu' ruzödi, ate' ta'yönnë' bönni' gula'códzuë'. Nnita' nabángaquië' bönni' gulátie', ate' raca libán que didza' dxi'a lógaca bönachi yechi'. <sup>6</sup> Bica' ba nu bönni' biti' gáquië' chopa ládxe'ë, biti' ubéaj ládxe'ë neda'.

<sup>7</sup> Cate' yugu' bönni' na' dá'gaquië' Juan bulu'zë'ë söjhuó'jgaquië', ní'irö gusí lahuë' Jesús ru'ílenë' bönachi nacua' ni' didza' ca naca queë' Juan na'. Rë' légaquië':

—¿Bizxi gú'unili' ilé'eli' cate' ni' guyéajli' lu lataj cá'asö? ¿Naru' gú'unili' ilé'eli'-në' tu bönni' náquië' ca tu gui ruzecaj bö' recja le? <sup>8</sup> Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' nácuë' lari' dxí'ado'? Nöz quézili' bönni' nácuagaquië' lari' dxí'ado' nacu'ë lídxigaquië' bönni' ta'nná bë'ë.

<sup>9</sup> Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' ru'ë didza' uláz queë' Dios? Ca' naca, réquida'. Rea' libí'ili', bilé'eli'-në' tu bönni' nácatë'rë' lo ca ia'zíca'rë' bönni' gulu'ë didza' uláz queë' Dios. <sup>10</sup> Caní naca, tu' náquië' Juan bönni' na' ru'í didza' le nazúaj lu guichi lá'ayi ca naca queë', le rnna:

Buyú, risöl-la'a bönni' gubáz quia', inöruë' ca Li'.

Lë' upë'ë nöza ga tödu'.

<sup>11</sup> Le nácatë rea' libí'ili'. Idútë yödzölió ni, cuntunu zoa nácarö lo ca Juan, bönni' ni' buquilé' bönachi nisa, pero nu naca cuídi'do'os ga rinná bë' Nu na' zoa yehua' yubá nácatë'rö lo ca Juan na'.

<sup>12</sup> 'Cate' ni' gusí lahuë' buquilé' Juan bönachi nisa, ga ridxintë na'a dza, bayudxi túngaca bönachi para ta'yaza ga rinná bë'ë Bönni' na' zoë' yehua' yubá, ate' nupa tunsö bayudxi ta'deli' le. <sup>13</sup> Ga bidxintë dza na' blë'ë Juan, le rinná bë' xibá queë' Moisés, en le bulu'zúajë' lu guichi yúgu'të bönni' gulu'ë

didza' uláz queë' Dios guluí'i didza' ca rinná bē'ë Bönni' na' zoë' yehua' yubá. <sup>14</sup> Channö rē'ënili' si' lu ná'ali' lē ni, ral-la' inözili' Juan na' náquië' Elías, bönni' ni' bē'ë didza' uláz queë' Dios, bönni' na' Dios gunnē' ral-la' ilá' lahuë' leyúbölö dza ni zóaru' na'a. <sup>15</sup> Nu zoa nagui, en riyöni ral-la' uzé nagui.

<sup>16</sup> '¿Bizxi ubéqui'tseda' ca nácagaca bönachi nacua' dza ni zóaru' na'a? Nácagaquië' ca yugu' bí'ido' ta'bö'öbi' lu yē'ëyi. Zidzaj tu'lídzabi' luzá'agacabi', <sup>17</sup> ta'nnabi': "Rucödxitu' queëli' gui. ¿Bizx que biti' ruyá'ali'? Rul-la yéchi'tu' queëli'. ¿Bizx que biti' ribödxu yéchi'li'?" <sup>18</sup> Caní nácali', tu' bidē' Juan, ate' tu' cabí gü'i gudahuë' ca ráguli' libí'ili', gunnēli' queë', gunnali': "Tu' xihui' dzágui lē." <sup>19</sup> Ní'irö bidxina' neda', Bönni' Guljē' Bönachi, ate' re'aj rahua', ate' rnnēli' quia', rnnali': "Náquië' bönni' huágulē'ë, en bönni' re'jē'. Náquië' luzá'agaquië' bönni' uquízxaj, en ia'zica'rö huen dul-la'." Yö-la' réajni'i queë' Dios naca bē' ni'a que le tun nupa ta'z'í' lu nē'eguequi le.

*Le gaca que nu biti' run ca rnna xtídzē'ë Dios*  
(Lc. 10:13-15)

<sup>20</sup> Ní'irö gusí lahuë' Jesús ruzenē' bach bönachi nacua' yugu' yödzö gapa ni' benē' zían yöl-la' huáca, tu' cabí tu'b'ini ládxi'guequi. <sup>21</sup> Gudxē' léguequi:

—Bica' bayechi' libí'ili', bönachi Corazín. Bica' bayechi' libí'ili', bönachi Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca bena' ga zóali', dza ní'tëlö ulu'b'í'í ládxi'gaca bönachi yödzö Tiro, en yödzö Sidón na', en ilácugaca lari' tēbi, en ulu'dxía dö ícjaguequi, le ulu'luí'í tu'b'í'í ládxi'gaca bönachi na'. <sup>22</sup> Na'a, neda' rea' libí'ili', cate' idxín dza ichúguië' Dios quégaca bönachi, quí'í sáca'röli' libí'ili' ca ila'guí'í ila'zaca' bönachi yödzö Tiro, en yödzö Sidón, nupa na' busunítië' Dios. <sup>23</sup> Libí'ili', bönachi Capernaum, guca queëli' ca bidxíntēli' ga nu riyaza yehua' yubá. Huójtjalí' lu guí' gabila. La'tu' gulaca yugu' yöl-la' huáca bena' ga zóali' lu yödzö Sodoma, ulu'gá'ana bönachi yödzö ni' ga ridxintē na'a dza. <sup>24</sup> Na'a, neda' rea' libí'ili', cate' idxín dza ichúguië' Dios quégaca bönachi, quí'í sáca'röli' libí'ili' ca ila'guí'í ila'zaca' bönachi Sodoma na'.

*Rnnē' Jesús: "Guli'dá ga zoa', uzí' ládxi'li'"*  
(Lc. 10:21-22)

<sup>25</sup> Dza na' bē'ë didza' Jesús, rnnē':

—Xuza', nacu' Xani yehua' yubá, en Xani luyú ni. Rigu'a Li' yöl-la' ba, tu' bucáchu'u lē ni, para cabí ila'lé'enē' bönni' ta'yéajni'ide'enē' le, pero buluí'inu' nupa nácagaca ca yugu' bí'ido' le. <sup>26</sup> Ca' gaca, Xuza', tu' caní guyaza ládxu'u Li'. <sup>27</sup> Yúgu'tē nudödē' Xuza' lu na'a. Cuntu nu nunbē' neda',

Zxi'inē Dios, pero tuzē Dios Xuz, en cuntu nu nunbē Dios Xuz, pero tuza' neda', Zxi'inē Dios, enca' nupa na' rē'ēnda' ulu'ida' léguequi Dios Xuz. <sup>28</sup> Guli'dá ga zoa' yúgu'tēli' rōjxéqui'li' tu' rúntica'sili' dxin que yōl-la' yudo', en nuá'ali' yua' zi'i quégaca xibá que, ate' neda' guna' ga uzí lādxi'li'. <sup>29</sup> Lu yōl-la' nōxaj ladxi' queéli' guli'gún xichina', gácali' ca bēdxi ta'z'íiba' yugu' quégacaba'. Guli'sēda lu na'a neda', tu' naca' nōxaj ladxi', en dō' ladxi', ate' idzōli yōl-la' ruzí' ladxi' queéli', le cuéqui dxi lādxi'li'. <sup>30</sup> Yugu' na' ugu'a libí'ili', le naca le inná bé'eda' libí'ili', bití' naca bōniga, ate' yua' ugu'a libí'ili' le naca le rusédida', dzá'do'os naca.

## 12

*Ta'lecjē' do bōnni' usēda queē' Jesús dza lá'ayi*

*(Mr. 2:23-28; Lc. 6:1-5)*

<sup>1</sup> Dza ni', le naca dza lá'ayi quégaquiē' bōnni' judío, gudōdē' Jesús gapa dē yōla zxoá' xtila, ate' ta'dunē' bōnni' usēda queē', en gusí lógaquiē' ta'lecjē' do ga dxía zxoá' xtila, en tahuē' zxoá' xtila na'. <sup>2</sup> Cate' bila'lé'enē' bōnni' yudo' fariseo lē ni, tē' Jesús: —Buyútsōca', tunē' bōnni' usēda quiu' le cabí ral-la' gunru' dza lá'ayi.

<sup>3</sup> Ní'irō Jesús gudxē' légaquiē':

—¿Naru' cabí nulábanili' lu guichi lá'ayi bi benē' David cate' gudunē', ate' gula'dún ca' nupa gula'cuá'len lē'? <sup>4</sup> Guyu'ē lu yu'u queē' Dios, en gudahuē' yugu' yōta xtila nagú'ugaquiē' lu bucugu lá'ayi, le cabí ral-la' gahuē' lē', en bití' ral-la' ilahuē' bōnni' gula'cuá'lenē' lē', pero légacsē' bixúz dē lataj ilahuē' le. <sup>5</sup> ¿Naru' cabí nulábanili' le rinná bē' xibá queē' Moisés ca tunē' bixúz yugu' dza lá'ayi? Tunē' dxin lō'a yudo' yugu' dza lá'ayi, en bití' ta'báguē'ē xíguia'. <sup>6</sup> Na'a, neda' rea' libí'ili', zoa' neda' ni, en naca' bōnni' nácarē' lo ca yudo'. <sup>7</sup> Bití' réajni'ili' lē na' nazúaj lu guichi lá'ayi, le rnna: “Rē'ēnda' huéchi lādxi'li' luzá'ali', en calēga gútigacali'-ba' bōa' bēdxido' ruzégui'gacali'-ba' lu bucugu lá'ayi quia'.” La'tu' réajni'ili' lē ni, bití' ichúguli' quégaca nupa bití' nabága'gaca xíguia'. <sup>8</sup> Ca' naca, tu' naca' neda', Bōnni' Guljē' Bōnachi, Xani dza lá'ayi.

*Jesús ruúnē' tu bōnni' narequi' nē'ē*

*(Mr. 3:1-6; Lc. 6:6-11)*

<sup>9</sup> Ní'irō buzē'ē Jesús ni', ate' guyu'ē lu yu'u ga tu'dubē' bōnni' judío, en tu'sedē' queē' Dios. <sup>10</sup> Lu yu'u na' zoē' tu bōnni' narequi' nē'ē, ate' tu' té'ēnnē' bōnni' judío unná bē' ila'dzōlinē' bi ulu'zégui'ē Jesús didza', que lē ni na' gula'nábinē' Lē', ta'nnē':

—¿Naru' dē lataj unru' nu re'e cate' naca dza lá'ayi?

<sup>11</sup> Bubi'ē didza' Jesús, rē' légaquiē':

—Nu bönni' núsë'ë ládjali', channö zóaba' tuba' bö'cu' zxila' queë', en channö ibíxiba' lu yeru cate' naca dza lá'ayi, ¿naru' cabí tsöjxönë'-ba', en tsöjléajë'-ba'? <sup>12</sup> Nazáca'tërë' tu bönni' ca tuba' bö'cu' zxila'. Que lë ni na', dë lataj gunru' le naca dxi'a quégaca bönachi cate' naca dza lá'ayi.

<sup>13</sup> Ní'irö Jesús gudxë' bönni' huë' na':

—Bulí no'ó.

Cate' bulí në'ë, la' böácatë dxi'a ca naca ia'tsólá'a në'ë.

<sup>14</sup> Ní'irö bulu'rúajë' bönni' yudo' fariseo na', ate' gulún xtídza'gaquië' para gaca ilútië' Jesús.

*Le gunné' tu bönni' bë'ë didza' uláz queë' Dios ca ral-la' gaca queë' Jesús*

<sup>15</sup> Cate' réquibe'enë' Jesús lë ni, buzë'ë ni', ate' sôjácálen bönachi zían Lë'. Jesús bunë' yúgu'të nupa te'e ladaj bönachi na', <sup>16</sup> en gunná bé'enë' léguequi biti' usiyönguequi bönachi Nu náquië'. <sup>17</sup> Caní gunné', para gaca lë na' gunné' Isaías, bönni' bë'ë didza' uláz queë' Dios, gunné':

<sup>18</sup> Buli'yútsöca', Bönni' ni náquië' Huen Dxin quia', na' gurö caza' neda' Lë'.

Nadxí'ida' Lë', en raza ládxa'a Lë'.

Ichiza' Lë' Bö' Lá'ayi.

Lë' usiyönnë' yúgu'të bönachi ca guna',

uchi'a usöröa' quéguequi.

<sup>19</sup> Cuntu nu tíl-lalenë' didza', en biti' ulidzë' zidzaj.

Cuntu nu yöni chi'ë ga naca zi'tu'.

<sup>20</sup> Tu guído' zoa bö' biti' quítsjë' le, ate' gu' chizóa ulu, biti' usúluë' le, cate' uzóarë' le naca tsahui' queë'.

<sup>21</sup> Yúgu'të bönachi ilún löza Lë'.

*Ta'nnë' bönni' judío unná bë': "Dzaga Jesús tu' xihui'"*

*(Mr. 3:19-30; Lc. 11:14-23; 12:10)*

<sup>22</sup> Ní'irö dujuá'gaquië' tu bönni' ga zoë' Jesús, nachul-la lahuë', en biti' raca gu'ë didza', tu' yu'u bö' xihui' lë', ate' Jesús bunë' bönni' na'. Caní guca, rilé'enë', en ru'ë didza' bönni' na' guchul-la lahuë', en biti' guca gu'ë didza'. <sup>23</sup> Que lë ni na' bulu'bani yúgu'të bönachi nacuá' ni', ta'nná:

—¿Naru' nácatsë' bönni' ni Zxí'ini Xi'sóë' David, Bönni' na' ral-la' guídë'?

<sup>24</sup> Cate' bila'yönnë' bönni' yudo' fariseo lë ni, ta'zá' ládxe'ë, ta'nnë': Bönni' ni rubéajë' yugu' bö' xihui' tu' dzaga Beelzebú tu' xihui', xángaca bö' xihui', Lë'.

<sup>25</sup> Réquibe'enë' Jesús lë na' ta'zá' ládxi'gaquië', ate' rë' légaquië':

—Gátitës ga ta'nná bë' bönachi, channö bönachi ni' ila'rúaj choplö, en ila'díl-lalen luzë'eguequi, initi yöl-la' unná bë'

quéguequi. Lësca' caní, channö ila'ruáj choplö bönachi nacuá' tu yödzo o tu yu'u, en ila'dil-la, bití' gaca ila'día' bönachi nacuá' yödzo na' o yu'u na'. <sup>26</sup> Lësca' caní, channö ubéaj Satanás tu' xihui' la' luzé'esö, ate' yugu' bö' xihui' na' ila'díl-lalen la' léguequisö, ¿naru' idía' yöl-la' unná bē' que tu' xihui'? <sup>27</sup> Rnnali' quia' rubéaja' yugu' bö' xihui' tu' dzaga Beelzebú tu' xihui' neda'. Channö runa' caní, ¿nuzxi dzaga nupa dá'gaca libí'ili' cate' tu'béaj yugu' bö' xihui'? Que lē ni na' le túngaca caz naca bē' nachíxili'. <sup>28</sup> Na'a, channö neda' rubéaja' yugu' bö' xihui' tu' zóalen yöl-la' huáca queē' Dios Bö' Lá'ayi neda', le nácatē chibidxín le rinná bē'ē Dios ga zóali'.

<sup>29</sup> ¿Naru' huácatsö nu bönni' tsu'ē lidxē' bönni' nal-la, en cuéajē' yöl-la' tsahui' dzö'ö lidxē' channö cabí gúguē'ē bönni' nal-la na' zí'alö? Ní'irö gaca tsu'ē, en ulatjē' lidxē' bönni' nal-la na'.

<sup>30</sup> Nu bití' run neda' tsözxön, ridá'baga' neda', en nu bití' rutubi tsözxön len neda', rusilasi nu na'.

<sup>31</sup> Que lē ni na' rea' libí'ili', ca naca yúgu'tē dul-la' tun bönachi, en yugu' didza' xihui' ta'nná, uniti lahuē' Dios léguequi, pero nu bönni' innē zi'ē queē' Dios Bö' Lá'ayi, bití' ca' uniti lahuē' Dios lē'. <sup>32</sup> Lësca' caní, nu bönni' innē' quia' neda', Bönni' Guljē' Bönachi, Dios uniti lahuē' lē', pero nu bönni' innē' queē' Dios Bö' Lá'ayi, bití' ca' uniti lahuē' Dios lē'. Bití' uniti lahuē' lē' dza ni zóaru' na'a, en bití' uniti lahuē' lē' dza si' za'.

*Le runru' naca bē' le nácaru'*  
(Mt. 7:15-20; Lc. 6:43-45)

<sup>33</sup> Gunnē' ca' Jesús:

—Channö naca dxi'a tu yaga, cuía le naca dxi'a, pero channö naca cá'asö yaga na', cuía ca' le naca cá'asö. Caní naca, le ribía tu yaga naca bē' yaga na'. <sup>34</sup> Libí'ili' nácali' di'a dza quégacaba' bëla sínia'. ¿Nacxi gaca güi'ili' dxi'a didza', channö cabí nácali' dxi'a? Ca naca le ta'zá' ládxi'gaca bönachi, lësca' caní tuí' didza'. <sup>35</sup> Tu bönni' tsahui' ru'ē didza' tsahui' tu' yu'u le naca tsahui' icja ládxi'da'ahuē', pero tu bönni' huiá' dö' ru'ē didza' bití' naca tsahui' tu' yu'u le cabí naca tsahui' icja ládxi'da'ahuē'. <sup>36</sup> Que lē ni na' rea' libí'ili', cate' idxín dza ichúguie' Dios quégaca bönachi, uchi'a usöröē' tu tu bönni' ca naca yúgu'tē didza' gula'nnazē' ca'. <sup>37</sup> Ca naca didza' ru'u, uchi'a usöröē' li', ate' uruju' tsahui' o ibágu'u xíguia' ni'a que didza' na' bē'u.

*Ta'nábinē' Jesús gunē' le gaca bē' nu náquiē'*  
(Mr. 8:12; Lc. 11:29-32)

<sup>38</sup> Ní'irö bulu'bi'ē didza' yugu' bönni' yudo' fariseo, en yugu' bönni' yudo' tu'sédinē', en tē' Jesús:



—Bönni' Usedi, rě'ënitu' ilé'etu' tu le gunu' le gaca bē' dē lu no'o yöl-la' unná bē'.

<sup>39</sup> Bubi'ë didza' Jesús, en rě' légaquiē':

—Yugu' bönni' tuá' dō' ni, biti' zoa idú ládxi'do'gaquiē', ta'nábinē' neda' guna' tu le gaca bē' nu naca'. Biti' bi le gaca bē' ila'lé'enē', pero le naca bē'sō na' ca guca queē' Jonás, bönni' bē'ë didza' uláz queē' Dios. <sup>40</sup> Ca na' guca queē' Jonás na', bugá'anē' lé'ëba' tu böla zxon idú tsonna dza tsonna yēla, lēscá' caní gaca quia' neda', Bönni' Guljē' Bönachi, tsonna dza tsonna yēla ugá'ana' zxan yu. <sup>41</sup> Ila'yasē' bönni' gula'cu'ë yōdzō Nínive dza ichúguiē' Dios quégaca bönachi cate' uchi'a usöröē' bönachi nacuá' dza ni zóaru' na'a, ate' le gulunē' usubaga' bönachi ni xíguia' tu' bulu'bí'i ládxi'gaquiē' bönni' Nínive na' cate' ni' busiyönnē' Jonás légaquiē' xtídzē'ë Dios, ate' na'a zoa' ni neda', en nácatēra' lo ca Jonás na'. <sup>42</sup> Lēscá' caní, nigula ni' gunná bé'enu yōdzō dē saca' ga ridōdi gubidza beo' ziaga chásanu dza ichúguiē' Dios quégaca bönachi cate' uchi'a usöröē' bönachi nacuá' dza ni zóaru' na'a, ate' le bennu usubaga' légaquiē' xíguia', tu' birúajnu nigula na' ga nácatērō zi'tu' para yóninu didza' réajni'i bē'ë Salomón, ate' na'a zoa' ni neda', en nácatēra' lo ca Salomón na'.

*Cate' rudxín tu bö' xihui' xilataj*

*(Lc. 11:24-26)*

<sup>43</sup> Gunnē' ca' Jesús:

—Cate' rirúaj tu bö' xihui' yu'u bönni', ridá gapa nabidxi, riguilaj ga uzí ladxi'. Channō cabí idzōli ga na' uzí ladxi', <sup>44</sup> ní'rō inná: "Huōja' xilatja' ga ni' birúaja'." Cate' udxín ga ni' birúaj, tsōjxaca' bönni' na', náquiē' ca tu yu'u nadachi', en nalúaj, en chinabá'a para nu tsōjsóa ni'. <sup>45</sup> Ní'rō tseaj, tsōjzxi' ia'gadxi bö' xihui' nácatērō xihui' ca le, ate' ila'yaza yúgu'tē, en ila'cuá' icja ládxi'da'ahuē' bönni' na', ate' ga údxi huayáli'tērō ca gaca queē' bönni' na' ca guca queē' zí'alō. Lēscá' caní gaca quégaca bönachi tuá' dō' ni.

*Xinē'ë Jesús, en yugu' bönni' böchē'ë*

*(Mr. 3:31-35; Lc. 8:19-21)*

<sup>46</sup> Cate' ni' ruí'ilenē' Jesús bönachi didza' ni, xinē'ë, en yugu' bönni' böchē'ë bila'dxinē' ni'. Gula'cu'ë lő'alō, en gulé'ëniagueuinē' ilu'í'ilenē' Jesús didza'. <sup>47</sup> Ní'rō tu bönni' busiyönnē' Jesús, en rě' Lē':

—Buyútsōca', nacu'ë xinó'o, en yugu' bönni' böchu'u lő'alō, en té'ënnē' ilu'í'ilenē' Li' didza'.

<sup>48</sup> Bubi'ë didza' Jesús, en rě' bönni' na' busiyönnē' Lē' caní, rnnē':

—¿Nözili' nuzxi caz xiná'a, en nupxi caz bönni' böcha'a?

49 Ní'irö bulí nē'ē, en bulu'e yugu' bönni' usēda queē', en rnnē':

—Buli'yútsöca', bönni' ni nácaqaquiē' ca xiná' caza', en yugu' böchi' caza'. 50 Núti'tēs nu run ca rē'ēni quézine' Xuza' zoē' yehua' yubá, nu ni naca bi'i böchi' caza', en bi'i zan caza', en xiná' caza'.

## 13

*Rucúdzu'ē didza' Jesús ca naca queē' tu bönni' guz*  
(Mr. 4:1-9; Lc. 8:4-8)

1 La' dza ní'sö birúajē' Jesús niu' yu'u, ate' yöjchö'ē ra' nísado'. 2 Tu' bila'dxín bönachi zían ga zoē' Jesús, gurenē' tu lē'e bárcodo', en gurö'ē ni', ate' bönachi zían na' gula'cuá' luyú bidxi ra' nísado' na'. 3 Ní'irö Jesús bē'lenē' légaquiē' didza', zían le busédinē' légaquiē'. Bucúdzu'ē didza', rnnē':

—Buli'yútsöca', birúajē' tu bönni' guz, sōjēsīē' xisedo'. 4 Tsanni ni' sōjēsīē', bal-la xisedo' na' gulasi ra' nōza, ate' bila'dxinba' biguinnido', en gulē'ajba' xisedo' na'. 5 Gulasi ia'zica'rō xisedo' na' luyú ga rō'ō guiōj, ga na' rō'ō látisō yu, ate' la' gula'lentē, tu' cabí rō'ōda' yu ni'. 6 Ní'irö cate' budzá'a gubidza, lē na' bēsīē' la' gula'cuáditē, en gula'bidxi, tu' cabí dē ga ilún luí. 7 Gula'lén ia'zica'rō xisedo' na' ga bulu'lén lubá yōtsi', ate' gula'zxön lubá yōtsi' na', en bila'rōli lē na' bēsīē', en gulún ditaj le. 8 Gulasi ia'zica'rō xisedo' na' ga naca luyú bēbu, ate' bulu'nōdzaj. Bal-la lē na' bēsīē' bulu'nōdzaj ia'tú gayuá'tērō ca'. Ia'zica'rō bulu'nōdzaj ia'tsónnalalaj ca', ate' ia'zica'rō bulu'nōdzaj ia'chí uruá' ca'. 9 Nu zoa nagui, en riyōni, ral-la' uzē nagui.

*Le tē'ēni ilún le bucúdzu'ē Jesús didza'*  
(Mr. 4:10-12; Lc. 8:9-10)

10 Ní'irö bila'dxinē' bönni' usēda queē' Jesús ga zoē', en gula'nábinē' Lē', ta'nnē':

—¿Bizx que ru'ilenu' bönachi didza' yugu' le rucúdzu'u didza'?

11 Bubi'ē didza' Jesús, en rē' légaquiē':

—Dios ru'ē libí'ili' lataj tséajni'ili' le nagachi' ca rinná bē'ē Lē' yehua' yubá, pero bönachi ni biti' tē'ēni ila'yéajni'i. 12 Nu si' xtídzē'ē, Dios unōdzjē' que ia'lati', ate' gáta'da'arō que, pero nu biti' si' le, la's dui le dē que udúa. 13 Que lē ni na' ru'ilena' légaquiē' didza' yugu' le rucúdzu'a didza', tu' tu'yúē' pero biti' ta'lē'enē'. Ta'yōnnē' pero biti' tu'zē nágagaquiē', en biti' ta'yéajni'inē'. 14 Caní raza quégaquiē' para gaca ca na' gunné' Isaías, bönni' bē'ē didza' uláz queē' Dios, gunné':  
Le nácatē yōnili' pero biti' tséajni'ili'.

Uyuli' iná'ali' pero biti' ilé'eli'.

15 Caní raca tu' nazidi ládxi'do'gaca bönni' ni,  
en biti' bi riyaza icja nágagaquië'.

Nadzudi' guiõj lógaquië',  
para cabí ila'lé'enë' len guiõj lógaquië' na'.

Biti' ulu'zë nágagaquië',  
en biti' ulu'zëajni'i ládxi'gaquië',  
en biti' ulu'huõáquië' quia' neda'  
para gaca una' légaquië'.

16 'Na'a, bica' ba libí'ili', tu' rilé'e guiõj loli', en riyõni nágali'.

17 Le nácatë rea' libí'ili', zían bönni' gulu'ë didza' uláz queë'  
Dios en yugu' bönni' tsahui' gulé'ënnë' ila'lé'enë' le rilé'eli'  
libí'ili' pero biti' bila'lé'enë' le. Gulé'ënnë' ila'yönnë' le riyõnili'  
libí'ili' pero biti' bila'yönnë' le.

*Riguíxjö'ë Jesús le bucúdzu'ë didza'*

*(Mr. 4:13-20; Lc. 8:11-15)*

18 Gunnë' ca' Jesús:

—Buli'zë nágali' ca naca le bucúdzu'a didza' que bönni' guz.

19 Núti'tës nu riyõni didza' ca rinná bë'ë Dios yehua' yubá,  
en biti' réajni'i le, raca que didza' riyõni nu na' ca guca que  
xisedo' na' gulasi ra' nõza. La' za'të tu' xihui', en rugúa  
didza' na' guyú'u icja ládxi'da'ahuë' bönni' na'. 20 Xisedo' na'  
gulasi luyú ga rõ'õ guiõj rulu'i ca raca queë' bönni' riyönnë'  
didza' na', en la' ruzëtë náguië' lu yõl-la' rudzeja queë', 21 pero  
ca na' biti' ridía' xisedo' na' tu' cabí dë ga gun luí, lësca'  
caní raca queë' bönni' ni. Cate' idxín tu le usaca' zi' lë',  
ate' ila'bía ná'gaca bõnachi lë' tu' nazí lu në'ë didza' na', la'  
gácatë chopa ládxe'ë. 22 Xisedo' na' gulasi ga na' bulu'lén lubá  
yõtsi' rulu'i ca raca queë' bönni' na' riyönnë' didza' na', pero  
ru'i ládxe'ë yugu' le dë yõdzõlió ni, ate' nazí yë'ë bönni' na',  
tu' ru'i ládxe'ë yugu' yõl-la' tsahui' que. Yugu' lë ni ta'rõli  
didza' na', en tun ga biti' gun dxin lu icja ládxi'da'ahuë'.

23 Xisedo' na' gulasi luyú bëbu rulu'i ca raca queë' bönni'  
riyönnë' didza' na', en réajni'inë' le, ate' run dxin didza' na'  
lu icja ládxi'da'ahuë'. Nácgaca bal-la bõnachi ca xisedo' na'  
bulu'nõdzaj ia'tú gayuá'tërõ ca'. Nácgaca ia'zica'rõ bõnachi ca  
xisedo' na' bulu'nõdzaj ia'tsónnalalaj ca', ate' nácgaca ia'zica'rõ  
bõnachi ca xisedo' na' bulu'nõdzaj ia'chí uruá' ca'.

*Tu guíxi'do' cané le nalá' ca rilá' yõla zxoa' xtila*

24 Ia'tú le bucúdzu'ë didza' Jesús, ate' rë' légaquië':

—Ca gaca cate idxín ni le rinná bë'ë Dios yehua' yubá naca  
ca guca que xisedo' dxi'a le guzë' tu bönni' ga naca lu xiyúë'.

25 Tsanni na' tasië' bönni' nacu'ë lidxe', bidxín tu nu biti' rilé'e  
xan yu'u na' dxi'a, ate' yõjõza lu xiyúë' xisedo' guíxi'do' cané  
le nalá' ca naca yõla zxoa' xtila, ate' bõaj xilataj. 26 Cate'

gulén xzoa' xtila na', en gurö'ö do que, ga na' dxíá xui'i, ní'irö gulaca bē' guíxi'do' cané na'. <sup>27</sup> Ní'irö bila'dxinē' bönni' huen dxin ga zoē' bönni' xan la' yēla na', en tē' lē': "Xan, channö guzu' xisedo' dxi'a lu yu quiu', ¿nacxi guca gula'lén guíxi'do' cané na'?" <sup>28</sup> Xan yu na' gudxē' légaquiē', rnnē': "Tu bönni' biti' rilē'enē' neda' dxi'a benē' caní." Ní'irö gula'nábinē' huen dxin queē' lē', ta'nnē': "¿Ba rē'ēnu' tséajtu' tsöjölajtu' guíxi'do' cané na'?" <sup>29</sup> Xángaquiē' rē' légaquiē': "¿Biti' ca! Nadx ca' cate' iládzu'li' guíxi'do' cané na', iládzu'lentēli' ca' yōla xzoa' xtila. <sup>30</sup> Gácarö dxi'a gü'ili' lataj ila'zxöngarö tsözxön cate' idxinrö dza tsöjtúbiru' le, ate' ní'irö guía' nupa ulu'tubi le: Buli'tubi zí'alö guíxi'do' cané na', en guli'guga' tsöjxili huéaj para uzégui'ru' le, ate' ní'irö utúbili' xzoa' xtila lu yu'u quia'."

*Rucúdzu'ē didza' Jesús ca naca que xisé mostaza*

*(Mr. 4:30-32; Lc. 13:18-19)*

<sup>31</sup> Ia'tú le bucúdzu'ē didza' Jesús, ate' rē' légaquiē':

—Ca gaca ga idxín le rinná bē'ē Dios yehua' yubá, gaca ca raca que tu xisé mostaza, le guzē' tu bönni' ga naca lu xiyüē'.

<sup>32</sup> Le nácatē xisé mostaza na' nácatērö cuidi' ca yúgu'tē xisedo' ia'zícá'rö, pero cate' chinadúz, rizxöntērö ca yúgu'tē guixi' cuan, en rizxön ca naca tu yaga, ate' ta'dxinba' biguínido', en tunba' xicá'agacaba' lu ni'a nē'e.

*Rucúdzu'ē didza' Jesús que cúa zi que yōta xtila*

*(Lc. 13:20-21)*

<sup>33</sup> Ia'tú le bucúdzu'ē didza' Jesús, ate' rē' légaquiē':

—Ca gaca ga idxín le rinná bē'ē Dios yehua' yubá gaca ca le run cúa zi que yōta xtila, le buchíxinu tu nigula len tsonna libixi yöjza xzoa' xtila, ate' guyazxa idútē cúa na'.

*Le rē'ēni gun le rucúdzu'ē didza' Jesús*

*(Mr. 4:33-34)*

<sup>34</sup> Yúgu'tē lē ni bucúdzu'ē didza' Jesús, le bē'lenē' bönachi nacua' ni' didza', en biti' bi didza' bē'lenē' légaquiē' le cabi bucúdzu'ē didza'. <sup>35</sup> Caní benē' para gaca lē na' buzúajē' lu guichi tu bönni' bē'ē didza' uláz queē' Dios, gunnē':

Gu'a didza' yugu' le ucúdzu'a didza'.

Inniá' yugu' le nagachi' cate' ni' gusí lo si' guta' yödzölió.

*Rigúxjö'ē Jesús le bucúdzu'ē didza' que guíxi'do' cané*

<sup>36</sup> Ní'irö buzenē' Jesús bönachi nacua' ni' didza', en gusöl-lē'ē légaquiē', ate' guyu'ē yu'u. Ní'irö bila'dxinē' bönni' usēda queē' ga zoē', en tē' Lē':

—Gudíxjöi'i netu' le rē'ēni inná lē na' bucúdzu'u didza' que guíxi'do' cané le nalá' ca naca yōla xzoa' xtila.

<sup>37</sup> Bubi'ē didza' Jesús, ate' rē' légaquiē':

—Bönni' razë' xisedo' dxi'a naca' neda', Bönni' Guljë' Bönachi.  
 38 La' yëla na' naca yödzölió ni, ate' xisedo' dxi'a na' tu'lu'i ca  
 nácagaca nupa nabábagaca ga rinná bë'ë Dios. Guíxi'do' cané  
 na' le nalá' ca naca yöla zxoá' xtila tu'lu'i ca nácagaca nupa  
 néquiguequi que tu' xihui'. 39 Nu na' biti' rilé'e dxi'a xan la'  
 yëla na', en yöjöza guíxi'do' cané na', tu' xihui' caz naca. Dza  
 ulu'tubë' na' rulu'i ca gaca dza údxi que yödzölió ni, ate' nupa  
 na' tu'tubi nácagaca gubáz lá'ayi queë' Dios. 40 Ca na' guca,  
 bulu'tubë' guíxi'do' cané na', en bulu'zégui'ë le lu guí, lësca'  
 caní gaca cate' údxi que yödzölió ni. 41 Neda', Bönni' Guljë'  
 Bönachi, isöl-la'gaca'-në' gubáz lá'ayi quia', ate' ulu'béajë' ga  
 rinná bë'ë Dios yúgu'të nupa tun ga tun dul-la' luzë'eguequi,  
 enca' nupa tuá' dö'. 42 Yugu' gubáz lá'ayi na' ila'gu'ë bönni' tuá'  
 dö' na' lu guí gabila. Ni' ila'bödxë', en ulu'tíl-la láyi'gaquië'.  
 43 Ní'irö ila'yëpi yösa bení' bönachi tsahui', en ilácagaquië' ca  
 gubidza ga ni' rinná bë'ë Dios yehua' yubá. Nu zoa nagui, en  
 riyöni ral-la' uzë nagui.

*Rucúdzu'ë didza' Jesús que tu yöl-la' tsahui' nagachi'*

44 Lësca' caní bucúdzu'ë didza' Jesús, rnnë':

—Le rinná bë'ë Dios yehua' yubá naca ca tu yöl-la' tsahui'  
 nagachi' tu la' yëla. Cate' bidzölinë' tu bönni' le, bucáchë'ë le  
 leyúbölö ga na' bigachi', ate' lu yöl-la' rudzeja queë' guyijë',  
 yöjëti'ë yúgu'të le dë queë' ate' gú'uë' la' yëla na' para gata' yöl-  
 la' tsahui' na' queë'.

*Rucúdzu'ë didza' Jesús que tu bugá le nazáca'da'*

45 Gunnë' ca' Jesús:

—Ca ral-la' së ládxi'li' le rinná bë'ë Dios yehua' yubá naca ca  
 benë' tu bönni' rá'uë', en ruúti'ë, en riguiljë' bugá nazáca'gaca.  
 46 Cate' bidzölinë' tu bugá le nazáca'da', guyijë', yöjëti'ë yúgu'të  
 le dë queë', ate' gú'uë' bugá na'.

*Rucúdzu'ë didza' Jesús que tu yöxaj böla*

47 Lësca' caní gunnë' Jesús:

—Ca gaca ga ridxín le rinná bë'ë Dios yehua' yubá, gaca  
 ca run tu yöxaj böla le ta'chiljë' bönni' lu nísado', le röjxí' zían  
 böla izá'a. 48 Cate' chibidzá' yöxaj na', bulu'béajë' le luyú bidxi  
 ra' nísado' na', ate' gula'bö'ë ni', en gula'gu'ë-ba' yugu' böla  
 dxi'a tu lu ga'böra, pero gula'ru'unë'-ba' yugu' böla cá'asö.  
 49 Lësca' caní gaca cate' údxi que yödzölió ni. Ila'rúajë' gubáz  
 lá'ayi queë' Dios, ate' ulu'béajë' quez yugu' bönachi tsahui', ate'  
 ulu'cuítië' légaquië' ladaj bönachi tuá' dö'.

50 Ní'irö ila'gu'ë bönachi tuá' dö' na' lu guí gabila. Ni'  
 ila'bödxë', en ulu'tíl-la láyë'ë.

*Yöl-la' tsahui' le naca gula, en le naca cubi*

51 Ní'irö Jesús gunábinë' yugu' bönni' usëda queë', rnnë':

—¿Ba réajni'ili' yúgu'të lë ni?

Bulu'bi'ë didza', të' Lë':

—Ön, Xan.

52 Jesús gudxë' légaquië':

—Cate' tu bönni' yudo' usedi chinazí' lu në'ë le rinná bë'ë Dios yehua' yubá, náquië' ca tu bönni' xan yu'u, rubéajë' lada'j yöl-la' tsahui' queë' le naca cubi, en le naca gula, le nácgaca tsahui' le ruzi'ë xibé.

*Le benë' Jesús lu yödzö Nazaret*

(Mr: 6:1-6; Lc: 4:16-30)

53 Cate' budxi bucúdu'ë Jesús yugu' didza' ni, buzë'ë ni'.

54 Cate' budxinë' ladzë', busédinë' bönachi nacua' lu yu'u ga tu'dubë' bönni' judío, en tu'sëdë' queë' Dios, ate' bulu'báinë', ta'nnë':

—¿Gazxi caz guzëdë' bönni' ni yöl-la' réajni'i ni? ¿Nacxi caz naca, runë' yugu' yöl-la' huáca ni? 55 Náquië' bönni' ni zxí'inë' bönni' gubëdxi yaga, ate' xinë'ë lënu María. Náquië' böchi'gaquië' Jacobo, en José, en Simón, en Judas. 56 Lëscá' nigula zanë' nacua'lennu rë'u ni. ¿Gazxi caz guzëdë' yúgu'të lë ni?

57 Que lë ni na' gulaca chopa lãdxi'gaquië', ate' bulu'cá'anë' Lë'. Ní'irö Jesús gudxë' légaquië':

—Yúgu'të bönachi tun bal tu bönni' ru'ë didza' uláz queë' Dios, pero bönachi uládz queë', en bönachi nacua' lidxë' biti' tun lë' bal.

58 Que lë ni na' biti' benë' Jesús zían yöl-la' huáca ni, tu' cabí ta'yéajlë'ë Lë'.

## 14

*Ca bëtgaquië' Juan, bönni' buquilë' bönachi nisa*

(Mr: 6:14-29; Lc: 9:7-9)

1 Lu dza ni', biyönnë' Herodes, bönni' rinná bë'ë luyú Galilea, ca nácgaca yugu' yöl-la' huáca runë' Jesús. 2 Herodes na' gudxë' yugu' ni'a në'ë, rnnë':

—Bönni' na' Juan, bönni' buquilë' bönachi nisa. Chibubanë' lu yöl-la' guti. Que lë ni na' dë lu në'ë yöl-la' huáca zxön na'.

3 Caní gunnë' Herodes tu' gusöl-lë'ë lë cazë' bönni' gula'zönë' Juan, en gulúgui'ë lë' du guië, ate' gula'gu'ë lë' lidxi guië tu' gú'uninu Herodías ilunë' caní. Herodías na' gúcanu nigula queë' Felipe, böchë'ë Herodes na'. 4 Caní benë' Herodes, tu' gudxë' Juan na' lë': "Biti' ral-la' sóalenu'-nu."

5 Que lë ni na' gú'unne' Herodes gútië' Juan, pero gúdxinë' ila'dá'baga' bönachi lu yödzö ni' lë', tu' téquiquequi bönachi náquië' Juan na' tu bönni' ru'ë didza' uláz queë' Dios. 6 Ní'irö

cate' guca laní que dza guyé'enë' iz Herodes, birúajbi' bi'i nigula queënu Herodías na', en buyá'abi' lógaca nupa nacua' laní na', ate' guyaza ládxë'ë Herodes le benbi'. <sup>7</sup> Guzxí' lu në'ë Herodes, en benë' tsutsu xtídzë'ë unödzejë' queëbi' bíti'tës bi inábibi' lë'. <sup>8</sup> Tu' chibusédinu-bí' zí'alö xiná'abi', gúdxibi' lë':

—Benna quia' na'a icjë' Juan, bönni' buquilë' bönachi nisa. Gulú'u le tu lu zxiga' zxön.

<sup>9</sup> Ní'irö buí'innë' Herodes, pero tu' chibenë' tsutsu xtídzë'ë, en tu' bila'yöni nupa te'aj tágulen lë', que lë ni na' gunná bé'enë' nu tsöjnödzej' icjë' Juan na' queëbi'. <sup>10</sup> Caní guca, gusöl-lë'ë nu tsöjrixí yenë' Juan ga ni' yu'ë lidxi guíë. <sup>11</sup> Bönni' na' nasöl-lë'ë bu'ë icjë' Juan na', zxoalu zxiga' zxön, ate' bunödzejë' le queëbi' bi'i nigula na', ate' lëbi' buá'abi' le queënu xiná'abi'.

<sup>12</sup> Ní'irö bila'dxinë' bönni' gula'dë'ë Juan na', ate' bulu'ú'ë lë', en bulu'cáché'ë lë'. Gudödi ni', yójtíxjöi'iguequinë' Jesús ca gulaca lë ni.

*Jesús rugahuë' zíanrö ca chi-un gayuá' bönachi*

*(Mr. 6:30-44; Lc. 9:10-17; Jn. 6:1-14)*

<sup>13</sup> Cate' réquibe'enë' Jesús lë ni, buzë'ë ni', ate' gurenë' tu lë'e bárcodo', en sa'yéajë' la' queëzë' tu lataj cá'asö. Cate' bila'yöni bönachi zéajë' ni', bila'rúaj yugu' yödzö ni', en yöjaca ga ni' idxinë' Jesús, ta'zë'e ní'aguequi. <sup>14</sup> Cate' burúajë' Jesús lë'e barco, bilé'enë' nacua' bönachi zían ni', ate' buéchi' ládxë'ë léguequi, en bunë' nupa te'e, nútsa'gaca ladjaguequi. <sup>15</sup> Cate' chiridzö' dza na', bila'dxinë' yugu' bönni' usëda queë' Jesús ga zoë', en të' Lë':

—Chiridzö' na'a, ate' cá'asö naca lataj ni. Busöl-la' bönachi ni para tsöjaca gapa dë yödzödo' para gá'ugaca bi ilagu.

<sup>16</sup> Ní'irö Jesús gudxë' légaquië':

—Biti' run bayudxi tsöjáquië'. Buli'nödzej' libí'ili' le ilahuë'.

<sup>17</sup> Ní'irö të' Lë':

—Gáyu'sö yöta xtila dë, en chópasöba' böla dëba' queëtu' ni.

<sup>18</sup> Jesús rë' légaquië':

—Buli'dödi le lu na'a.

<sup>19</sup> Ní'irö Jesús gunná bé'enë' bönachi na' ila'bö' ga yu'u daca'. Gudödi na' gudélë'ë gayu' yöta xtila na', en chópaba' böla na', ate' guchisa lahuë', ruyúë' zaca' yehua' yubá. Gudxë' Dios: "Xclenu." Ní'irö buzuzxjë' yöta xtila na', en budödë' le lu ná'agaquië' bönni' usëda queë', ate' légaquië' gula'guisië' le lógaca bönachi zían na'. <sup>20</sup> Gulahuë' yúgu'tëgaquië', en bulu'huöljanë'. Ní'irö bulu'tubë' yugu' bizxaj nagá'anagaca, en bulu'lié' chinnu ga'böra. <sup>21</sup> Bönni' ni' gulahuë' guláquië' idú chi-un gáyu'ë, pero cuntu nu bulaba yugu' nigula, en bí'ido'.

*Jesús rizë'e ni'ë lu nísado'*

*(Mr. 6:45-52; Jn. 6:16-21)*

<sup>22</sup> Ní'irö la' bentë' Jesús ga gula'benë' bönni' usëda queë' lë'e bárcodo', en tsöjáquië', ila'nöruë' lahuë' Lë', para ila'dödë' ia'tsölá'a nísado' ni', tsanni na' uzenë' Lë' bönachi nacua' ni' didza'. <sup>23</sup> Cate' chibusöl-lë'ë Jesús bönachi na', gurenë' tu lu guí'ado' ga ni' yöjsöë' tuzë'. Ni' bulidzë' Dios. Cate' chigul-la, tuzë' zoë' ni'. <sup>24</sup> Bárcodo' ga na' nacu'ë bönni' usëda queë' ridödi gatsaj láchui'lö nísado' na', ate' riyasa bárcodo' na' tu' riyasa ridxia nísado' na', ate' ruzaga' bö' recja barco na'. <sup>25</sup> Gudödi guluhuëla, gubígui'ë Jesús gala' ga na' nacu'ë, rizë'e ni'ë lu nísado'. <sup>26</sup> Cate' yugu' bönni' usëda queë' bila'lé'enë' Lë', rizë'e ni'ë lu nísado', gula'bö'dë'ë böniga tu' tádxinë'. Gula'bö'dxi'ë, ta'nnë':

—Tu' ridasö na'.

<sup>27</sup> Ní'irö Jesús la' bulidztë' légaquië', rnnë':

—Buli'zxo'ni láchxi'li'. Neda' ni. Biti' gádxili'.

<sup>28</sup> Ní'irö bubi'ë didza' Pedro, rë' Jesús:

—Xan, channö nacu' Li', gunná be'e neda' guída' ga na' zu' lu nisa.

<sup>29</sup> Jesús gudxë' lë':

—Gudá.

Ní'irö bö'tjë' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús. <sup>30</sup> Ní'irö cate' bilé'enë' Pedro ca bö' na' recja rutá nisa, gúdxinë'. Ní'irö gusí lahuë' rötjë' lu nisa, ate' gurö'dxi'ë. Bulidzë' Jesús, rnnë':

—Xan, busölá neda'.

<sup>31</sup> Jesús la' bulitë në'ë. Buguélë'ë lë', en rë' lë':

—Láti'sö réajlë'u neda'. ¿Bizx que guca chopa láchxu'u?

<sup>32</sup> Cate' bulu'benë' lë'e bárcodo' na', gurö'ö dxi bö' na' recja.

<sup>33</sup> Ní'irö bönni' nacu'ë lë'e bárcodo' na' gula'yéaj láchxi'gaquië' Jesús, ta'nnë':

—Le nácatë, Zxí'inë' Dios nacu'.

*Jesús ruúnë' yugu' bönni' huë' nacu'ë yödzö Genesaret  
(Mr. 6:53-56)*

<sup>34</sup> Cate' chigula'dödë' ia'tsölá'a nísado' na', la' bila'dxintë' lu xiyú yödzö Genesaret. <sup>35</sup> Cate' bulu'únbë'ë bönni' yödzö ni' Jesús, gula'söl-lë'ë didza' idútë luyú ni', ate' dujuá'gaquië' yúgu'të nupa te'e ga na' zoë' Jesús. <sup>36</sup> Guláta'yue' lahuë' Jesús gu'ë légaquië' lataj ila'gansë' ru'i lari' nácuë', ate' la' bulu'huóacaté yúgu'të nupa na' bila'gán lari' na'.

## 15

*Le tun ga bití' nácaru' tsahui' lahuë' Dios*

*(Mr. 7:1-23)*

<sup>1</sup> Ní'irö yugu' bönni' yudo' fariseo, en bönni' yudo' tu'sédinë', narúajgaquië' Jerusalén, bila'dxinë' ga zoë' Jesús, ate' tē' Lë':



<sup>2</sup> —¿Bixx que tunë' bönni' usëda quiu' le ridödi bë' ca naca le nulaga loru' runru' ca gulunë' xuz xtó'oru'? Biti' ta'guíbi nëë ca naca que yudo' cate' si' ilahuë'.

<sup>3</sup> Bubi'ë didza' Jesús, en gunábinë' légaquië', rnnë':

—¿Bixx que libí'ili' ca' rucá'anali' cá'asö xibá queë' Dios para gunli' le nulaga loli' runli'? <sup>4</sup> Caní raca, tu' gunná bë'enë' Dios libí'ili', gunné': "Ben bal xuz xino'o", en gunné' ca': "Nu innë zi' que xuz xinë'e, tsaz gati nu na'." <sup>5</sup> Pero libí'ili' rnnali': "Channö nu guíë xuz xinë'e: Biti' bi gaca gunna' quiu' tu' chiguzxí' lu na'a gunna' yúgu'të queë' Dios, <sup>6</sup> bíti'rö bi run bayudxi gun nu na' que xuz xinë'e." Caní runli', rucá'anali' cá'asö le gunná bë'ë Dios, para gunli' le nulaga loli' runli'. <sup>7</sup> Libí'ili', bönni' ruluí'isö tsahui' cuinli', idú ca nácali' gudíxjö'ë Isaías, bönni' bë'ë didza' uláz queë' Dios, gunné':

<sup>8</sup> Bönni' ni, len rú'agacsë' tunë' neda' bal, en calëga idú ládxi'gaquië'.

<sup>9</sup> Nítisö naca le ta'yéaj ládxi'gaquië' neda', tu' tu'sédinë' yugu' le gula'nná bë' bönachi.

<sup>10</sup> Ní'irö bulidzë' Jesús bönachi nacué' ni', en rë' léguequi:

—Buli'zë nágali' le guía' libí'ili', en guli'tséajni'i. <sup>11</sup> Calëga le riyaza ru'ë nu bönni' run ga bití' náquië' tsahui' lahuë' Dios, pero le rirúaj ru'ë, lë ni run ga bití' náquië' tsahui' lahuë' Dios.

<sup>12</sup> Ní'irö yugu' bönni' usëda queë' Jesús gula'bígüi'ë ga zoë', en të' Lë':

—¿Naru' nöztsenu' gula'lenë' yugu' bönni' yudo' fariseo cate' bila'yönnë' didza' ni bë'u?

<sup>13</sup> Ní'irö bubí'ë didza' Jesús, en rë' légaquië':

—Yúgu'të le nadúz, le cabí guzë' Xuza' zoë' yehua' yubá, huadúl'jagaca idú luí. <sup>14</sup> Buli'cá'ana légaquië'. Chinachúl-la lógaquië', en ta'chë'ë nupa nachul-la lógaca. Channö tu bönni' lo chul-la ichë'ë ia'túë' bönni' lo chul-la, iropë' ila'bixë' tu lu yeru.

<sup>15</sup> Ní'irö bubí'ë didza' Pedro, en rë' Jesús:

—Buzéajni'i netu' lë ni rucúdz'u didza'.

<sup>16</sup> Jesús rë' légaquië':

—¿Naru' cabí réajni'itseli' ca' libí'ili'? <sup>17</sup> ¿Naru' cabí réajni'itseli' riyaza lé'ëru' yúgu'të le riyaza ruá'aru', ate' rurúaj lé'ëru'? <sup>18</sup> Na'a, le rirúaj rúa'ali', lu icja ládxi'do'oli' za', ate' lë ni run ga bití' nácali' tsahui' lahuë' Dios. <sup>19</sup> Caní raca, tu' ta'lén lu icja ládxi'do'oli' yugu' le rizá' ládxi'li' le ruá' dö', le ilún ga gútili' bönachi, en le ilún ga quítsjali' xibá que yöl-la' nutsaga na', en le ruá' dö' runli', en yugu' le rizë ládxi'li' cuanli', en yugu' le rinnëli' que luzá'ali' le cabí nácate, en yugu' le rinnë xihui'li'. <sup>20</sup> Yugu' le caní tun ga bití' náquië' tu bönni' tsahui'

lahuë' Dios, pero channö cabí nayari në'ë ca naca que yudo' cate' bi gahuë', bitì' gun ga bitì' náquië' tshui' lahuë' Dios.

*Tu nigula izá'a réajlë'ënu Jesús*

*(Mr. 7:24-30)*

21 Ní'irö buzë'ë Jesús ni', en guyéajë' lu xiyú yödzo Tiro, en yödzo Sidón. 22 Tu nigula nabábanu luyú Canaán birúajnu yödzo ni', ate' bë'ënu zidzaj didza', rënu Jesús:

—Xan, zxi'ini xi'sóë' David, buéchi' ladxi' neda'. Bi'i nigúlado' quia' riguí'i rizáca'da'abi' tu' yu'u bö' xihui' lëbi'.

23 Bitì' bi didza' bubì'ë Jesús. Ní'irö gula'bígüi'ë bönni' usëda queë' ga zoë', ate' gulë' Lë', ta'nnë':

—Busöl-la'-nu, tu' zá'anu cúdzu'ru' ribödxi'anu.

24 Ní'irö bubì'ë didza' Jesús, ate' rë'ë-nu:

—Dios nasöl-lë'ë neda' gácalena' bönachi Israel, nupa nácacaga ca bö'cu' zxi'la'do' nanítigacaba'.

25 Ní'irö gubíga'nu nigula na' ga zoë' Jesús, en guyéaj ládxi'nu Lë', ate' rënu Lë':

—Xan, gúcalen neda'.

26 Bubi'ë didza' Jesús, rnnë':

—Bitì' naca dxi'a ugúaru' yöta quégacabi' bí'ido', en chú'unaru' le lógacaba' bö'cu'do'.

27 Ní'irö nigula na' rënu Jesús, rnnanu:

—Ön, Xan, pero táguba' bö'cu'do' na' le bizxaj tu'huóxaj ga tagu xángacaba'.

28 Ní'irö bubì'ë didza' Jesús, rnnë':

—Nigúlado'. Idú naca ca réajlë'u neda'. Gaca quiu' ca rë'ënnu'.

La' ní'isö böácatëbi' bi'i nigúlado' queënu.

*Jesús ruúnë' zían nupa te'e*

29 Ní'irö buzë'ë Jesús ni', en gudödë' ga naca ra' nísado' que Galilea. Gurenë' tu lu guí'ado', ate' gurö'ë ni'. 30 Bönachi zían dujuá'gaquië' nupa bitì' guca ila'zá', en nupa nachul-la guí'oj lógaca, en nupa bitì' guca ila'nnë', en nupa narugu ni'a në'eguequi, en ia'zica'rö zían nupa te'e, ate' gula'guíxaj léguequi xini'ë Jesús, ate' Lë' bunë' léguequi. 31 Bulu'bani bönachi ni' ca naca le benë' Jesús, tu' bila'lé'e tu'nnë' nupa bitì' guca ila'nnë', ate' nuhuóácagaca nupa gurugu ni'a në'eguequi, ate' tu'zá' nupa bitì' guca ila'zá', ate' tu'lé'e nupa guchul-la lógaca. Que lë'ni na' gula'gu'ë yöl-la' ba Dios quégaca bönachi Israel.

*Jesús rugahuë' zíanrö ca choá' gayuá' bönachi*

*(Mr. 8:1-10)*

32 Ní'irö Jesús bulidzë' yugu' bönni' usëda queë', en rë' légaquië':

—Ruhuechi' ládxa'a bönachi zían ni, tu' chiguca tsonna dza zá'lenguequi neda', en biti' bi dë le ilagu. Biti' ré'ënda' usöla'gaca'-në' tsöjhuöajgaquië' lédxigaquië' ta'dunsë' ca', nadxi ca' udú ládxi'gaquië' la' nöza.

<sup>33</sup> Ní'irö yugu' bönni' usëda queë' të' Lë', ta'nnë':

—¿Gazxi caz idzölitu' yöta xtila zían lu lataj cá'asö ni, le ugágutu' bönachi zían ni?

<sup>34</sup> Gunábinë' Jesús légaquië', rnnë':

—¿Bal-laxi yöta xtila dë queëli'?

Bulu'bi'ë didza', ta'nnë':

—Gadxi, ate' nabábasöba' böla cuidi' dëba' queëtu' ni.

<sup>35</sup> Ní'irö Jesús gunná bé'enë' bönachi zían na' ila'bö' lu yu. <sup>36</sup> Gudélé'ë gadxi yöta xtila na', en yugu' böla na', ate' gudxë' Dios: "Xclenu'." Ní'irö buzzuxjë' iroptë na', en bunödzjë' quégaquië' bönni' usëda queë', ate' légaquië' gula'guísië' le lógaca bönachi zían na'. <sup>37</sup> Gulahuë' yúgu'të', en bulu'huöljanë'. Gudödi ni' bulu'tubë' le bizxaj nagá'anagaca, ate' bulu'lié' gadxi ga'böra. <sup>38</sup> Yugu' bönni' na' gulahuë' nácagaquië' choá' gáyú'ë, pero cuntú nu bulaba yugu' nigula, en bí'ido'. <sup>39</sup> Ní'irö busöl-lë'ë Jesús bönachi na' tsöjhuöajgaquië' lédxigaquië', ate' gurenë' lë'e bárcodo' ni', en sa'yéajë' lu xiyú yödzö Magdala.

## 16

*Ta'nábinë' Jesús gunë' tu le gaca bë' nuzxi náquië'*  
(Mr. 8:11-13; Lc. 12:54-56)

<sup>1</sup> Ní'irö yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zí' bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'.

<sup>2</sup> Bubi'ë didza' Jesús, en rë' légaquië':

—Cate' ridzö', rnnali' caní: "Gun dxi'a cuxö, tu' rö'ö böaj xiná lúzxiba." <sup>3</sup> Cate' naca zílado', rnnali' caní: "Biti' gun dxi'a na'a dza tu' rö'ö böaj xiná, en ruchul-la lúzxiba." Libí'ili', bönni' rulu'isö tsahui' cuinli'. Raca innë ya'ali' naca gun lúzxiba, pero biti' gaca tséajni'ili' le tu'sedi le taca dza ni zóaru' na'a.

<sup>4</sup> Yugu' bönachi tuá' dö' ni, en biti' zoa idú ládxi'gaca ta'nábini neda' guna' tu le gaca bë' Nu naca', pero biti' bi le gaca bë' ila'lé'enë'. Ila'lé'esinë' lë na' guca bë' ca guca queë' Jonás, bönni' bë'ë didza' uláz queë' Dios.

Ní'irö Jesús bucá'anë' légaquië', söhuöjë'.

*Le tu'sedinë' bönni' yudo' naca ca cúa zi que yöta xtila*  
(Mr. 8:14-21)

<sup>5</sup> Cate' bila'dxinë' ia'tsölá'a nísado' ni', guléquibe'enë' bönni' usëda queë' Jesús gulál-la ládxi'gaquië' ilu'ë le ilahuë'. <sup>6</sup> Ní'irö Jesús gudxë' légaquië':

—Buli'yútsöca'. Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

<sup>7</sup> Ní'irö la' légacasë' gulún xtídza'gaquië' bönni' usëda queë', ta'nnë':

—Rnnë' caní tu' cabí nuá'aru' yöta xtila.

<sup>8</sup> Réquibe'enë' Jesús lë ni, ate' rë' légaquië':

—¿Bizx que run xtídza'li' la' libí'sili' tu' cabí nuá'ali' yöta xtila? Láti'do'os réajlë'ëli' neda'. <sup>9</sup> ¿Naru' cabí réajni'itseli', en biti' röjnétseli' ca guca quégaca gayu' yöta xtila ni', lë na' gulahuë' chi-un gáyu'ë bönni', ate' tsca xö ga'böra butúbili'? <sup>10</sup> ¿Naru' cabí röjnétseli' ca' ca guca quégaca gadxi yöta xtila ni', lë na' gulahuë' choá' gáyu'ë bönni', ate' tsca xö ga'böra butúbili'? <sup>11</sup> ¿Naru' cabí réajni'ili'? Biti' bë'a didza' que yöta xtila cate' gudxa' libí'ili' gun chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

<sup>12</sup> Ní'irö gula'yéajni'inë' biti' gudxë' Jesús légaquië' ilún chi'i cuíngaquië' que cúa zi que yöta xtila, pero ral-la' ilún chi'i cuíngaquië' que le tu'sédinë' yugu' bönni' yudo' fariseo, en yugu' bönni' yudo' saduceo.

*Pedro rnnë' Jesús náquië' Cristo*

(Mr. 8:27-30; Lc. 9:18-21)

<sup>13</sup> Cate' bidxinë' Jesús lu xiyú yödzö Cesarea, ga na' rinná bë'ë Filipo, gunábinë' yugu' bönni' usëda queë', rnnë':

—¿Bizxi ta'nná bönachi nu naca' neda', Bönni' Guljë' Bönachi?

<sup>14</sup> Bulu'bi'ë didza', ta'nnë':

—Bal-lë' ta'nnë': “Juan nacu', bönni' ni' buquilë' bönachi nisa.” Ia'zica'rë' ta'nnë': “Elías nacu', bönni' ni' bë'ë didza' uláz queë' Dios dza ni'te.” Ia'zica'rë' ta'nnë': “Jeremías nacu', o ia'túë' bönni' bë'ë didza' uláz queë' Dios.”

<sup>15</sup> Ní'irö Jesús gudxë' légaquië':

—Naru' libí'ili', ¿nuzxi rnnali' naca' neda'?

<sup>16</sup> Bubi'ë didza' Simón Pedro, en rë' Lë':

—Li' nacu' Cristo, Zxí'inë' Dios ban.

<sup>17</sup> Bubi'ë didza' Jesús, rë' lë':

—Bica' xibó' li', Simón, zxí'inë' Jonás, tu' cabí buluí'inë' nu bönni' li' lë ni. Xuza' zoë' yehua' yubá buluí'inë' li' lë ni. <sup>18</sup> Neda' rea' li', li' nacu' Pedro, ate' lu guiöj ni ucuá'a nupa ulu'dubi quia', ate' yöl-la' unná bë' que tu' xihui' biti' sequi' uzaga' xinözgaquië'. <sup>19</sup> Gunna' quiu' yugu' zxí'ini guíë que lataj ga rinná bë' Nu zoa yehua' yubá. Le inná bë'u luyú ni, chigunná bë' ca' Nu na' zoa yehua' yubá, ate' le gu'u lataj gaca luyú ni, chibë' lataj gaca lë na' Nu na' zoa yehua' yubá ni'.

<sup>20</sup> Ní'irö Jesús gunná bé'enë' yugu' bönni' usëda queë' cuntu nu ilë'ë náquië' Lë' Cristo.

*Jesús riguíxjö'ë ca si' ilútië' Lë'*

*(Mr. 8:31-9:1; Lc. 9:22-27)*

<sup>21</sup> La' dza ní'sö gusí lahuë' Jesús riguíxjöi'inë' yugu' bönni' usëda queë' run bayudxi tsejë' Jerusalén, ga ni' yugu' bixúz unná bë' en bönni' gula tu'zéajni'inë', en bönni' yudo' tu'sédinë' ulu'saca' zi'ë Lë', ate' ní'irö ilútië' Lë', pero cate' gaca tsonna dza ubanë' lu yöl-la' guti. <sup>22</sup> Ní'irö Pedro guchë'ë Jesús quez, en gusí lahuë' ridil-lë' Lë' didza', rnnë':

—Xan, biti' gu'ë Dios lataj. Biti' ca' gaca quiu' ca rnno'.

<sup>23</sup> Ní'irö buécjë' Jesús, en rë' Pedro:

—Gucuita ga zoa'. Runu' ca run Satanás, tu' xihui'. Runu' ga gaca chopa ládxa'a tu' cabí naca le rizá' ládXu'u li' ca rizá' ládXë'ë Dios, pero ca ta'za'sö ládxi'gaca bönachi.

<sup>24</sup> Ní'irö Jesús gudxë' yugu' bönni' usëda queë', rnnë':

—Channö zoë' tu bönni' rë'ënë' të'ë neda', ral-la' uzóë' tsölá'alö yugu' le rë'ëni quézinë', en gáquië' ca tu bönni' sa'yéajë' zeajtë'ë lë'e yaga cruz, ate' ní'irö gaca të'ë neda'.

<sup>25</sup> Nu bönni' guë'ënnë' gun chi'ë yöl-la' na'bán queë', unítië' le, pero bönni' unítië' yöl-la' na'bán queë' tu' dë'ë neda', gata' yöl-la' na'bán idú queë'. <sup>26</sup> ¿Naru' uzi'tsë' xibé tu bönni' channö utubë' yúgu'të le dë yödzölió ni pero unítië' yöl-la' na'bán idú queë'? Biti' bi gaca unödziejë' tu bönni' para gata' yöl-la' na'bán idú queë'. <sup>27</sup> Caní rnnía', tu' huöda' neda', Bönni' Guljë' Bönachi, en idzaga yöl-la' unná bë' queë' Xuza' Dios neda', ate' idzágagaquië' gubáz lá'ayi quia' neda'. Ní'irö ubi'a que queë' bönachi tsa naca le núngaca. <sup>28</sup> Le nácatë rea' libí'ili': "Biti' ca' ilátigaca bal-la nupa naca' ni cate' ila'lé'erö idinná bë'a neda', Bönni' Guljë' Bönachi."

## 17

*Ridzá' ca nalá' lahuë' Jesús*

*(Mr. 9:2-13; Lc. 9:28-36)*

<sup>1</sup> Gudödi xopa dza, Jesús gudélë'ë Pedro len Jacobo, en Juan, böchë'ë Jacobo na', en guchë'ë légaquië', ate' yöjáquië' quez tu lu guí'a sibi. <sup>2</sup> Ni' bidzá' ca nalá' lahuë' Jesús lógaquië'. Guyëpi yösa bení' lahuë' Jesús ca ruzení' gubidza, ate' lari' nácuë' böáca chiguíchido'os ca bení'. <sup>3</sup> Ní'irö bila'lé'enë' bönni' usëda queë' buluí' lógaquië' Moisés, en Elías, ate' tu'ílenë' Jesús didza'. <sup>4</sup> Ní'irö Pedro rë' Jesús:

—Xan, naca dxi'a zóaru' ni. Channö rë'ënu', guna' ni tsonna yu'u lága'do', tu quiu', ia'tú queë' Moisés, en ia'tú queë' Elías.

<sup>5</sup> Tsanni ni' ru'ë Pedro didza' ni, la' guró'ötë tu böaj bení' le guzxóa légaquië', ate' lu böaj na' biyön chi'i nu rnna:

—Bönni' ni Zxí'ini caza'. Nadxí'ida'-nè', en raza ládxa'a Lè'. Buli'zé nágalí' didza' gu'è.

<sup>6</sup> Cate' bila'yönnè' bönni' usèda queè' chi'i na', gula'dzö'è gusurú'alö, en guladxi bila'dzöbinè'. <sup>7</sup> Ní'irö gubígui'è Jesús ga na' nacu'è, ate' gudanè légaquiè', rnnè':

—Guli'chasa. Biti' gádxili'.

<sup>8</sup> Cate' gula'chisa lógaquiè', en bulu'yúé', cúnturö nu bila'lé'enè', pero tuzè' Jesús.

<sup>9</sup> Cate' ni' tu'dínniè' lu guí'a na', Jesús gunná bé'enè' légaquiè', rnnè':

—Cuntu nu guiéli' ca guca lè ni bilé'eli' cate' ubanra' lu yöl-la' guti neda', Bönni' Guljè' Bönachi.

<sup>10</sup> Ní'irö yugu' bönni' usèda queè' gula'nábinè' Lè', ta'nnè':

—¿Bizx que ta'nnè' bönni' yudo' usèdi run bayudxi uluí' lahuè' Elías zí'alö ca uluí' lahuè' Cristo?

<sup>11</sup> Bubi'è didza' Jesús, rè' légaquiè':

—Le nácatè uluí' lo cazè' zí'alö Elías, en ucá'anè' tsahui' yúgu'tè. <sup>12</sup> Neda' rea' libí'ili': “Chibuluí' lahuè' Elías na', pero bití' bulu'únbè'è lè', ate' yúgu'tè ca rnnasö quégaquiè' gulunè' queè'.” Lësca' caní ilunè' quia' neda', Bönni' Guljè' Bönachi, ulu'saca' zì'è neda'.

<sup>13</sup> Ní'irö gula'yéajni'inè' bönni' usèda queè', bé'lenè' Jesús légaquiè' didza' ca guca queè' Juan, bönni' na' buquilè' bönachi nisa.

*Ruúnè'-bi' Jesús tubi' bi'i bönni' ré'ebi' xjote'*

*(Mr. 9:14-29; Lc. 9:37-43)*

<sup>14</sup> Cate' bila'dxinè' ga na' nacuá' bönachi zían, gubígui'è tu bönni' ga zoè' Jesús, ate' buzóa zxibè' lahuè' Lè', <sup>15</sup> en rè' Lè':

—Xan, buéchi' ladxi'-bi' bi'i bönni'do' quia', tu' ré'ebi' xjote', en riguí' rizáca'da'abi', ate' zían luzuí ridzö'öbi' lu guí' o lu nisa. <sup>16</sup> Chidiguá'a-bi' lógaquiè' bönni' usèda quíu' pero bití' guca ulu'únè'-bi'.

<sup>17</sup> Bubi'è didza' Jesús, rnnè':

—Libí'ili', bönachi cabí réajlè'èli', en bití' nácali' tsahui'. ¿Gáca'xte caz ral-la' sóalena' libí'ili' para tséajlè'èli' neda'? ¿Gáca'xte caz ral-la' guá' ilena' queéli'? Guli'diguá'-bi' quia' ni.

<sup>18</sup> Ní'irö Jesús buzenè' le bach bö' xihui' na' yu'u lèbi', ate' la' burúajtè lèbi', ate' la' ná'asö böácatèbi' bi'i bönni'do' na'.

<sup>19</sup> Ní'irö, yugu' bönni' usèda queè' Jesús gula'biguè'è quez ga zoè', ate' gula'nábinè' Lè', ta'nnè':

—¿Bizx que na' bití' guca ubéajtu' netu' bö' xihui' na'?

<sup>20</sup> Jesús rè' légaquiè':

—Bití' guzxéqui'li' tu' cabí réajlè'èli' Dios idú ládxi'li'. Le nácatè rea' libí'ili', sal-la' cuídísö naca yöl-la' réajlè' queéli' Dios, nácatè ca tu xisedo' mostaza, huáca guiéli' guí'ado' ni: “Gucuíta ni, en yójsóa ní'ilö”, ate' la' icuítatè guí'ado' na'. Bití'

bi zoa le cabí gaca gunli' channö réajlë'ëli' Dios idú ládxi'li'.  
 21 Tu bö' xihui' caní gácasö ubéajli' channö ulídzali'-në' Dios, en gunli' gubasa.

*Riguíxjö'ë Jesús leyúbölö ca si' ilútië' Lë'*  
 (Mr. 9:30-32; Lc. 9:43-45)

22 Tsanni ni' ta'dë' luyú Galilea, Jesús gudxë' yugu' bönni' usëda queë', rnnë':

—Zoa nu udödi neda', Bönni' Guljë' Bönachi, lu ná'agaca bönachi. 23 Ilútië' neda', pero cate' gaca tsonna dza Dios usubanë' neda'.

Ní'irö bulu'huí'innë' bönni' usëda queë'.

*Jesús riguíxaj lazë' que yudo'*

24 Cate' bulu'dxinë' Jesús, en yugu' bönni' usëda queë' lu yödzo Capernaum, bila'dxinë' yugu' bönni' tu'quixjë' bönachi lázagaca que yudo' ga zoë' Pedro, ate' të' lë':

—¿Naru' cabí quixaj lazë' que yudo' bönni' rusédinë' libí'ili'?

25 Bubi'ë didza' Pedro, rnnë':

—Ön, huaguixjë'.

Cate' buázië' Pedro lu yu'u, Jesús la' bulidztë' lë', en rë' lë':

—¿Nacxi rusaca' quiu', Simón? Bönni' ta'nná bë'ë luyú ni, ¿nupxi tu'quixjë' le riguíxaj laz, en lazxaj que yu? ¿Naru' tu'quixjë' bönachi uládz quégaquië' o bönachi izá'a?

26 Bubi'ë didza' Pedro, rë' Lë':

—Bönachi izá'a tu'quixjë'.

Ní'irö Jesús rë' lë':

—Que lë ni na', biti' run bayudxi quixaj laza' que yudo' tu' naca' Zxí'inë' Dios ca na' biti' bi ta'guíxaj nupa nácagaca bönachi uládz queë' bönni' na' ruquíxjë'. 27 Na'a, para cuntú nu gun leri', guyéaj ra' nísado', yöjzalaj lu nisa le rizóninu'-ba' böla, ate' böla cueju'-ba' zí'alö, guzxí'i-ba'. Cate' isalju' ruá'aba', ni' idzölinu' tu dumí lásido'. Guzxí'i le, ate' gudizxaj laza', en lazu'.

## 18

*¿Núzxilö gaca lo?*

(Mr. 9:33-37; Lc. 9:46-48)

1 La' dza ní'isö bila'dxinë' bönni' usëda queë' Jesús ga zoë', ate' gula'nábinë' Lë', ta'nnë':

—¿Núzxilé' bönni' ni gáquië' lo ga rinná bë'ë Dios yehua' yubá?

2 Bulidzë'-bi' Jesús tubi' bi'i bönni'do', ate' buzóë'-bi' gatsaj láhui'lö ga na' nacu'ë. 3 Ní'irö rë' légaquië':

—Le nácatë rea' libí'ili', channö cabí huóácali' ca zeaj nácabi' bí'ido', biti' ca' tsú'ulí' ga ni' rinná bë'ë Dios yehua' yubá. 4 Que lë ni na', núti'tës nu gaca nöxaj ladxi', en huóáca ca nácabi'

bí'ido' ni, nu ni gaca lo ga ni' rinná bē'ē Dios yehua' yubá.  
 5 Núti'tēs nu gun bal tubi' bí'ido' caní tu' néquibi' quia', neda' caz gun bal.

*Le tun ga nu gun dul-la'*  
 (Mr. 9:42-48; Lc. 17:1-2)

6 Gunnē' ca' Jesús:

—Nu gun ga gunbi' dul-la' tubi' bí'ido' caní réajlē'ēbi' quia', gácarō dxi'a queē' bönni' na' la'tu' ugalē'ē guiōj riyētuni yaga yenē', ate' tsōjsuladzu' cuinē' lu nísado'. 7 Bica' bayechi' bōnachi yōdzōlió ni tun ga gun dul-la' luzē'eguequi. Nacuá'tica'sō le tun ga nu gun dul-la', pero bica' bayechi' nu run ga nu gun dul-la'.

8 'Que lē ni na', channō gun no'o o ni'u ga gunu' dul-la', guchugu le, en gurú'una le. Gácarō dxi'a quiu' tsōjtsáziu' ga su' ibanu' biti' rizó'o o narugu ni'a no'o, en calēga nacuá' chopa no'o, en chopa ni'u ate' tsōjtsáziu' lu guí' gabila le catu caz ulu. 9 Channō gun guiōj lo' ga gunu' dul-la', guléaj le, en gurú'una le. Gácarō dxi'a quiu' tsōjtsáziu' ga su' ibanu', zoa tuz guiōj lo', en calēga nacuá' chopa guiōj lo', ate' tsōjtsáziu' lu guí' gabila.

*Jesús rucúdzu'ē didza' que tu bö'cu' zxila' nanítiba'*  
 (Lc. 15:3-7)

10 Gunnē' ca' Jesús:

—Guli'gún chi'i cuinli' para cabí uzóali'-bi' tsölá'alō tubi' bí'ido' caní. Neda' rea' libí'ili', gubáz lá'ayi tapa chi'ē légcabi' nacuá'tica'sē' lahuē' Xuza' zoē' yehua' yubá. 11 Bida' ni neda', Bönni' Guljē' Bōnachi, para usólá' nu ni naniti.

12 '¿Nacxi rusáca'li' queēli'? Tu bönni', nacuá'aba' tu gayuá' bö'cu' zxila' queē', channō nítiba' tuba', ¿naru' cabí ucá'anē'-ba' tápalalaj yu' chēnnaba' na', ate' tsejē' gapa naca lu guí'a, para tsōjtijlē'-ba' bö'cu' zxíla'do' na' nanítiba'? 13 Channō udzōlinē'-ba', le nácatē rea' libí'ili', udzējarōnē' ni'a queēba' bö'cu' zxíla'do' na' ca gunē' quégacaba' ia'tápalalaj yu' chēnnaba' ni' biti' gula'nítiba'. 14 Lēscá' caní, Xúziru' Dios, zoē' yehua' yubá, biti' rē'ēnē' nítibi' tubi' bí'ido' caní.

*Ca ral-la' uniti loru' böchi' luzá'aru'*  
 (Lc. 17:3)

15 Gunnē' ca' Jesús:

—Channō böchi' luzó'o guá' dō' quiu', guyéajtsōca', en yōjcá'analenē' tsahui' la' libí'isili'. Channō uzē náguiē' li', chibuguélu'u böchi' luzó'o. 16 Channō cabí uzē náguiē' xtídzu'u, guchē'ē ia'túē' o ia' chopē' bönni' para urúaj li xtídzu'u lógaquiē' chopa tsonnē' bönni', nupa gaca ilún ba nalí que xtídza'li'. 17 Channō cabí uzē náguiē' xtídza'gaquiē', gudxi ca' bōnachi tu'dubi tu'sēdi queē' Dios, en channō cabí uzē náguiē' xtídza'gaca bōnachi na', ní'rō bönni' na' gáquiē' quiu' ca tu



bönni' biti' réajlë'ë Dios, en ca tu bönni' ruquízjxjé' uláz que yödzö zi'tu'.

<sup>18</sup> 'Le nácatë rea' libí'ili', yúgu'të le inná bë'ëli' lu yödzölió ni, naca le chigunná bë'ë Dios yehua' yubá, ate' yúgu'të le gü'ili' lataj lu yödzölió ni, naca le chibë'ë lataj Dios yehua' yubá.

<sup>19</sup> 'Lësca' caní rea' libí'ili', channö chópasili' gun tuz xtídza'li' lu yödzölió ni ca naca tu le inábili'-në' Dios, gunë' Xuz caza' Dios, zoë' yehua' yubá, lë na' rinábili'-në'. <sup>20</sup> Ga nacué' chopatonna nupa ni nudúbigaca quia' neda', zoa caza' neda' gatsaj láhui'lö ga na' nacu'ë.

<sup>21</sup> Ní'irö gubígui'ë Pedro ga zoë' Jesús, en gunábinë' Lë', rnnë':

—Xan, ¿bál-laxitë luzuí ral-la' uniti lahua' böchi' luzá'a, nu na' ruá' dö' quia'? ¿Naru' gadxi luzuí?

<sup>22</sup> Jesús rë' lë':

—Neda' rea' li', calëgasö gadxi luzuí, pero idú tsónnalalaj yu' chi cuía le naca gadxi luzuí.

*Jesús rucúdu'ë didza' que tu bönni' huen dxin biti' buniti lahuë' luzë'ë*

<sup>23</sup> Gunnë' ca' Jesús:

—Ia'stú, ca gun Nu na' rinná bë' yehua' yubá naca ca benë' tu bönni' rinná bë'ë. Gü'unnë' ucá'analënë' tsahui' yugu' bönni' huen dxin queë'. <sup>24</sup> Cate' gusí lahuë' rucá'analënë' légaquië' tsahui', dujuá'gaquië' ga zoë' tu bönni' ral-lë'ë queë' zían gayuá' dumí. <sup>25</sup> Tu' cabí guca quizzjé', gunná bë'ë xanë' idó'ogaquië' lë', en nigula queë', en yugu' bi'i queë', en yúgu'të le dë' queë', ate' ní'irö gazxaj le ral-lë'ë queë' xanë' na'. <sup>26</sup> Ní'irö bönni' huen dxin na' buzóa zxibë' lahuë' xanë', en gunábinë' lë', rnnë': "Xan, ben zxon ladxu'u neda'. Huaguizxaj caza' li' idutë." <sup>27</sup> Ní'irö xanë' na' buéchi' ladxë'ë bönni' huen dxin queë' na', en buniti lahuë' lë' lë na' ral-lë'ë queë', ate' busanë' lë'. <sup>28</sup> Cate' burúajë' bönni' huen dxin na', la' yöjtságatë' tu bönni' rúnlenë' lë' tsözxön dxin, ate' bönni' na' ral-lë'ë queë' látido'os dumí. Ní'irö guzxönë' lë', en guxzínnejë' yenë', ate' rë' lë': "Gudíxjatë lë na' ral-lu'u quia'." <sup>29</sup> Ní'irö luzë'ë na' buzóa zxibë' lahuë', en gunaba yechë'ë lahuë', rnnë': "Ben zxon ladxu'u neda'. Huaguizxaj caza' li' idutë." <sup>30</sup> Biti' gü'unnë' bönni' huen dxin na', ate' yöjlu'ë lë' lidxi guié dza quíxjarë' lë na' ral-lë'ë queë'. <sup>31</sup> Cate' bila'lë'enë' lë ni ia'zica'rë' huen dxin, bulu'huí'inide'enë' ni'a queë', ate' yöjtixjoi'iguequinë' xángaquië' yúgu'të lë na' guca. <sup>32</sup> Ní'irö xángaquië' bulidzë' bönni' huen dxin na', ate' rë' lë': "Li', huen dxin catsahui'. Yúgu'të dumí na' gúl-lu'u quia' buniti lahua' li'. Busúlua' lë na' gúl-lu'u quia' tu' gunaba yechu'u lahua'. <sup>33</sup> ¿Naru' cabí ral-la' huéchi' ladxu'u ca' luzó'o ca na' bena' neda', buéchi' ladxá'a

li'?" <sup>34</sup> Ní'irö guléde'enë' xanë', en budödë' lë' lu ná'agaca nupa ulu'saca' zi' lë' dza quíxjarë' idútë le ral-lë'ë queë'.

<sup>35</sup> Ní'irö rnnë' Jesús:

—Lësca' caní gunë' Xuza' zoë' yehua' yubá queëli' channö cabí uniti loli' idú ládxi'li' yugu' böchi' luzá'ali'.

## 19

*Nupa tu'lá'a yöl-la' nutsaga na'*

*(Mr. 10:1-12; Lc. 16:18)*

<sup>1</sup> Cate' budxi bë'ë Jesús yugu' didza' ni, buzë'ë luyú Galilea, ate' bidxinë' luyú Judea le dë ia'tsolá'a yegu Jordán saca' ga rilén gubidza. <sup>2</sup> Bönachi zían söjácálen Jesús, ate' bunë' léguequi ni'.

<sup>3</sup> Ní'irö bila'dxinë' bal-lë' bönni' yudo' fariseo ga zoë' Jesús para ila'zí' bë'ë Lë', ate' gula'nábinë' Lë', ta'nnë':

—¿Naru' dë lataj bönni' nutsaga në'ë usanë' nigula queë' tu' nözi bíti'tës bi raca?

<sup>4</sup> Bubi'ë didza' Jesús, rë' légaquië':

—¿Naru' cabí nulábanili' le nazúaj lu guichi lá'ayi ca benë' Dios bönachi cate' si' benë' yödzölió? Bönni', en nigula benë' légaquië'. <sup>5</sup> Caní gunné' Dios: “Que lë ni na', ral-la' usanë' tu bönni' xuz xinë'ë, ate' tsaz tsöjsóalenë'-nu nigula queë', ate' iropë' na' ulu'huóáquië' tuz bönachi.” <sup>6</sup> Caní naca, bíti'rö nácaquië' chopë' pero tuz bönachi chinuhuóáquië'. Que lë ni na', bití' ral-la' ulu'lë'ë bönni' nupa na' benë' Dios tuz.

<sup>7</sup> Ní'irö bönni' yudo' na' gula'nábinë' Jesús, ta'nnë':

—¿Bizx que na' gunná bé'enë' Moisés légaquië' le ruí'i lataj nu bönni' unödzjë' tu guichi queënu nigula queë' le rnna nulá'a yöl-la' nutsaga na', ate' usanë'-nu nigula queë' na'?

<sup>8</sup> Jesús rë' légaquië':

—Caní benë' Moisés tu' nazidi icja ládxi'do'oli'. Bennë' libí'ili' lataj usanli'-nu nigula queëli', pero cate' gusí lo guta' gurö'ö yödzölió, bití' guca caní. <sup>9</sup> Neda' rea' libí'ili', channö tu bönni' usanë'-nu nigula queë', en bití' gudálennu bönni' yúbölö, ate' utsaga ná'alenë'-nu nigula yúbölö, gunë' dul-la' le riguitsaj xibá que yöl-la' nutsaga na'. Lësca' caní, channö nu bönni' utsaga ná'alenë'-nu nigula na', nusanë'-nu bönni' queënu, gunë' dul-la' le riguitsaj xibá que yöl-la' nutsaga na'.

<sup>10</sup> Ní'irö yugu' bönni' usëda queë' Jesús gulë' Lë', ta'nnë':

—Channö caní naca queë' tu bönni' zóalenë'-nu nigula queë', gácarö dxi'a queë' la'tu' cabí utsaga caz në'ë, ugá'anë' tuzë'.

<sup>11</sup> Bubi'ë didza' Jesús, rë' légaquië':

—Bití' gaca ila'zí' lu ná'agaca yúgu'të bönachi didza' ni, pero núpasö na' Dios ruzéajni'inë' léguequi. <sup>12</sup> Nacu'ë bönni' bití' tu'tsaga ná'alengaquië' nigula tu' cabí nácaquië' idú

bönni' biguiú', tu' gulaljé' ca', ate' ia'zica'rè' bönni' biti' tu'tsaga ná'alengaquié' nigula tu' bulu'zaga' bönachi xinözgaquié', ate' ia'zica'rè' bönni' biti' tu'tsaga ná'alengaquié' nigula para gaca iluné' xichiné' Dios, Nu rinná' bē' yehua' yubá. Nu sequi' si' lu nē'e didza' ni ral-la' si' lu nē'e le.

*Jesús rulidza tsáhuē'ē-bi' yugu' bí'ido'*

*(Mr. 10:13-16; Lc. 18:15-17)*

<sup>13</sup> Ní'irō yugu' xuz xiná'agacabi' bí'ido' dujuá'agaquié'-bi' ga zoé' Jesús para ixó'a nē'ē' lé'gacabi', en ulidzē' Dios ni'a quégacabi', ate' bönni' usēda queé' bulu'zá'gui'ē' xinözgaquié'.

<sup>14</sup> Ní'irō Jesús rē' lé'gaquié', rnnē':

—Guli'gü'i-bi' yugu' bí'ido' lataj ila'dxinbi' ga zoa', en biti' uzága'li' xinözgacabi', tu' ila'zí' lataj nupa nácagaca ca yugu' bí'ido' caní' ga ni' rinná' bē'ē' Dios yehua' yubá.

<sup>15</sup> Jesús guxó'a nē'ē' lé'gacabi', ate' ní'irō buzē'ē' ni'.

*Tu bönni' unná' bē' cuidi' dē' yöl-la' tsahui' queé'*

*(Mr. 10:17-31; Lc. 18:18-30)*

<sup>16</sup> Tu bönni' ni zoé' iz cuidi' queé' buduyúé' Jesús, en rē' Lē':

—Bönni' Usedi idú' tsahui'. ¿Bizxi le naca tsahui' ral-la' guna' para gata' yöl-la' na'bán idú' quia'?

<sup>17</sup> Bubi'ē' didza' Jesús, rē' lē':

—¿Naru' nōztsenu' lē' na' rnno' quia', rnno' naca' idú' tsahui'? Cuntu nu bönni' ná'quié' idú' tsahui'. Tuzē' Dios ná'quié' idú' tsahui'. Channō' rē'ēnu' gata' yöl-la' na'bán idú' quiu', ben ca rinná' bē' xibá queé' Dios.

<sup>18</sup> Ní'irō bönni' na' rē' Jesús, rnnē':

—¿Bízxi' lō' xibá na'?

Jesús rē' lē':

—Xibá na' gunná' bē'ē' Moisés:

Biti' gútiu' bönachi.

Biti' gunu' dul-la' le riguitsaj xibá que yöl-la' nutsaga na'.

Biti' cuanu'.

Biti' innió' que böchi' luzó'o le cabí' nácate.

<sup>19</sup> Ben bal xuz xinó'o.

Bidxi'i böchi' luzó'o ca nadxi'i cuinu'.

<sup>20</sup> Bönni' na' ni zoé' iz cuidi' queé' gudxé' Jesús, rnnē':

—Yú'gu'tē' lē' ni runa' ga gudela' naca' bí'ido'. ¿Naru' zoa ia'tú' le ral-la' guna'?

<sup>21</sup> Jesús rē' lē':

—Channō' rē'ēnu' gacu' tsahui', guyé'aj, yōjēti' le dē' quiu', ate' dumí' na' si'u, bunōdzaj quégaca bönachi yechi'. Caní' gata' yöl-la' tsahui' quiu' ni' yehua' yubá. Ní'irō gudá, gudá' neda'.

<sup>22</sup> Cate' bönni' na' ni zoé' iz cuidi' queé' biyōnnē' didza' ni, söhuōjē' ruhuí'innē' tu' dēda' yöl-la' tsahui' queé'.

<sup>23</sup> Ní'irō Jesús gudxé' yugu' bönni' usēda queé', rnnē':

—Le nácatë rea' libí'ili', böniga naca tsázië' nu bönni' dë yöl-la' tsahui' queë' ga rinná bë'ë Dios yehua' yubá. <sup>24</sup> Ia'stú rea' libí'ili', nácarö böniga tsázië' tu bönni' dë yöl-la' tsahui' queë' ga ni' rinná bë'ë Dios ca tódiba' böa' lu nagui yötsi'.

<sup>25</sup> Cate' bila'yönnë' yugu' bönni' usëda queë' didza' ni, bulu'bánninë, ta'nnë':

—¿Nuzxi caz gaca ulá, channö?

<sup>26</sup> Jesús buyúë' légaquië', en rë' légaquië':

—Biti' gaca ilún bönachi lë ni, pero Dios huáca gunë' yúgu'të.

<sup>27</sup> Ní'irö bubi'ë didza' Pedro, en rë' Jesús:

—Buyútsöca', netu' chibucá'anatu' yúgu'të, en zá'lentu' Li'.

¿Bízxi rë' gata' queëtu'?

<sup>28</sup> Jesús rë' légaquië':

—Le nácatë rea' libí'ili', dza ni' cate' ucubi yödzölió, ate' cö'a inná bë'a neda', Bönni' Guljë' Bönachi, ga ni' gácatëra' lo, lësca' libí'ili' zá'lenli' neda' na'a, cö'öli' chinnu lataj ga inná bë'ëli', en uchi'a usörolí' quégaca idxinnu cö'të yödzö quégaca xzí'ini xi'sóë' Israel. <sup>29</sup> Nu bönni' rucá'anë' lidxë', o yugu' böchë'ë, o yugu' zanë', o xuzë', o xinë'ë, o nigula queë', o yugu' xzí'inë', o yugu' xiyúë', para gunë' xichina', bönni' ni si'ë ia' tú gáyua'tërö ca' queë', en gata' ca' yöl-la' na'bán idú queë'. <sup>30</sup> Zían nupa náca gaca lo na'a, ulu'gá'ana cá'asö, ate' nupa nagá'anagaca cá'asö na'a, hualácagaca lo.

## 20

*Rucúdzu'ë didza' Jesús ca tunë' bönni' huen dxin*

<sup>1</sup> Gunnë' ca' Jesús:

—Ca gun Bönni' na' rinná bë'ë yehua' yubá naca ca benë' tu bönni' xan yu'u. Birúajë' zílado', yöjdiljë' yugu' bönni' ilunë' dxin ga naca lu xiyúë' ga na' nadúzgaca lubá uva. <sup>2</sup> Cate' chibugá'analenë' tsahui' yugu' bönni' huen dxin na', quizxjë' légaquië' tu dumí lazxaj que tu dza, gusöl-lë'ë légaquië' ilunë' dxin ga naca lu xiyúë'. <sup>3</sup> Cate' burúajë' idú xsila, bil'éenë' ia'zíca'rë' bönni' nacuá'asë' ca' ga naca lu yë'ëyi. <sup>4</sup> Rë' légaquië': "Guli'tséaj ca' libí'ili' ga naca lu xiyúá, ate' quizxja' libí'ili' le naca tsahui'." La' yöjácátë' ca' légaquië'. <sup>5</sup> Burúajë' bönni' xan yu'u na' leyúbölö idú huagubidza, enca' idú xihuó udzö, en la' tuz ca benë', gusöl-lë'ë yugu' bönni' yöjxáquië' lu xiyúë'. <sup>6</sup> Burúajë' ca' cate' ni' zoa ia'látí'do'os gubidza, en yöjxáquië' ia'zíca'rë' bönni' nacuá'asë' ca' ni', ate' rë' légaquië': "¿Bizx que zóatsali' ni cá'asö idú dza, biti' bi dxin runli'?" <sup>7</sup> Yugu' bönni' na' të' lë', ta'nnë': "Cuntu nu benna xichintu'." Ní'irö rë' légaquië': "Guli'tséaj ca' libí'ili' ga naca lu xiyúá, ate' quizxja' libí'ili' le naca tsahui'." <sup>8</sup> Cate' chizóa gal-la, bönni' xan yu na' rë' bönni' yu'u lu në'ë yugu' huen dxin na', rnnë': "Bulidza

yugu' bönni' huen dxin na', ate' gu'u lázxjagaquië'. Quizxju' zí'aló yugu' bönni' na' bila'dxinë' yöjsetë. Udxí na' quizxju' yugu' bönni' na' bila'dxinë' zí'atëlö." <sup>9</sup> Ní'irö bila'dxinë' bönni' yöjéngaquië' dxin cate' ni' zoa ia'láti'do'os gubidza, en gula'zi'ë tu tuhuéajë' dumí lazzaj que tu dza. <sup>10</sup> Cate' bila'dxinë' bönni' yöjéngaquië' dxin zí'atëlö, guléquinë' huazí'gaquië' ia'lati', pero lësca' gula'zi'ë tu tuhuéajë' dumí lazzaj que tu dza. <sup>11</sup> Cate' gula'zi'ë le, gula'nnëdë'ë queë' bönni' xan yu'u na', <sup>12</sup> ta'nnë': "Yugu' bönni' ni bila'dxinë' ga yöjsetë, tu chí'isö gulunë' dxin, en tuz ca gudíxjatso' légaquië' ca netu', ate' netu' ni bentu' dxin idú dza, en gúguida'atu' gubidza." <sup>13</sup> Bubi'ë didza' xan yu na', en rë' tuë': "Böcha'a, bití' bi runa' quiu' le cabí naca tsahui'. ¿Naru' cabí bugá'ana tsáhui'ru' si'u tu dumí lazzaj que tu dza? <sup>14</sup> Guzxí' lazzju', en böaj lidxu'. Neda' rë'ënda' quizxja' bönni' ni yöjenë' dxin ga yöjsetë la' leze ca na' riguíxja' li'. <sup>15</sup> ¿Naru' cabí dë lu na'a guna' ca rë'ënda' len le nequi quia'? ¿Naru' ruzxé'etsenu'-në' luzó'o tu' rúnnada'a queë'?" <sup>16</sup> Caní naca, bal-lë' bönni', tu' cá'ana bönachi légaquië' cá'asö, ilácagaquië' lo, ate' ia'zíca'rë' bönni', nácagaquië' lo na'a, ulu'gá'anë' cá'asö. Zían nupa nulidza', pero nabábasö nupa narögaca.

*Rigúxjö'ë Jesús leyúbölö ca si' ilútië' Lë'*

*(Mr. 10:32-34; Lc. 18:31-34)*

<sup>17</sup> Cate' ni' yu'ë Jesús nöza, sa'yéajë' Jerusalén, guchë'ë quez idxínmutë' bönni' usëda queë', en rë' légaquië':

<sup>18</sup> —Buli'yútsöca', ribenru' zéajru' Jerusalén, ate' ni' soa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usëdi, ate' ila'chúguië' quia' gátia'. <sup>19</sup> Ulu'dödë' neda' lu ná'agaquië' bönni' zí'tu' para ulu'titjë' neda'. Ila'guinë' neda', en ulu'dë'ë neda' lë'e yaga cruz, pero cate' gaca tsonna dza, Dios usubanë' neda' lu yöl-la' guti.

*Le gunábanu xiná'agaquië' Jacobo, en Juan*

*(Mr. 10:35-45)*

<sup>20</sup> Ní'irö bidxinnu xiná'agaquië' Jacobo, en Juan, yugu' zxí'inë' Zebedeo, ga zoë' Jesús, dzágagaquië'-nu chopë' ni, ate' buzóa zxíbinu lahuë' Jesús, en gunábinu Lë' tu le uzá' ládxe'ë queënu. <sup>21</sup> Jesús gunábinë'-nu, rnnë':

—¿Bizxi rë'ënu'?

Rënu Lë':

—Gunná bë' cõ'öbi' tubi' zxí'ina' ni cuita lë'u ibëla, en ia'tubi' cõ'öbi' cuita lë'u yögöla ga ni' inná bë'u.

<sup>22</sup> Bubi'ë didza' Jesús, rë' légaquië':

—Bití' nözili' le rinábalí'. ¿Naru' huáca guá' ilenli' le qui'i saca' neda', en idílali' nisa ca idíla' neda' nisa, gátia'?

Të' Lë':

—Huácatu’.

<sup>23</sup> Ní’irö Jesús rë légaquië’:

—Le nácatë le ral-la’ qui’i saca’a neda’, gaca ca’ queëli’, en le ral-la’ idila’ neda’ nisa, gátia’, idílali’ ca’ nisa libí’ili’, pero que cõ’oli’ cuita lë’a ibëla o cuita lë’a yõgõla, biti’ dë lu na’a nu gu’a que, pero gata’ quégaca nupa ni’ chinupë’ë Xuza’ quéguequi.

<sup>24</sup> Cate’ ia’chíë’ bönni’ usëda queë’ Jesús bila’yönnë’ lë ni, gula’lenë’. <sup>25</sup> Ní’irö Jesús bulidzë’ légaquië’, rnnë’:

—Nözquëzili’ ca tunë’ yugu’ bönni’ ta’nná bé’enë’ bönachi izá’a, ridödité bë’ ta’nná bé’enë’ légaquië’, ate’ nupa ni’ nácagacarö lo ta’nná be’e la’ luzë’eguequisö. <sup>26</sup> Biti’ gaca caní queëli’. Núti’tëslöli’ libí’ili’ nu rë’ëni gaca zxön ga zóali’, nu ni ral-la’ gun dxin que ia’zíca’röli’. <sup>27</sup> Lësca’ caní, núti’tëslöli’ libí’ili’ nu guë’ëni gaca lo, ral-la’ gaca ca tu bönni’ nadó’o que ia’zíca’röli’. <sup>28</sup> Lësca’ neda’, Bönni’ Guljë’ Bönachi, bida’ ni, calëga para nu gun xichina’, pero para guna’ xichíngaca bönachi, en udöda’ yöl-la’ na’bán quia’, le quízxjada’ ni’a quégaca bönachi zían para ulu’lágaca.

*Ruúnë’ Jesús chopë’ bönni’ nachul-la lógaquië’*

*(Mr. 10:46-52; Lc. 18:35-43)*

<sup>29</sup> Cate’ ni’ tu’ruájë’ yödzö Jericó, bönachi zían sójácalen Jesús. <sup>30</sup> Nacu’ë chopë’ bönni’ nachul-la lógaquië’ ni’, rõ’gaquië’ ra’ nöza. Cate’ bila’yönnë’ ridödë’ Jesús ni’, gulu’ë zidzaj didza’, ta’nnë’:

—Xan, xzí’ini xi’sóë’ David, buéchi’ ladxi’ netu’.

<sup>31</sup> Bönachi zían nacuá’ ni’ gulë légaquië’ ila’cu’ë dxisö, pero zídzejrö gulu’ë didza’, ta’nnë’:

—Xan, xzí’ini xi’sóë’ David, buéchi’ ladxi’ netu’.

<sup>32</sup> Ní’irö guzë’ ribözë’ Jesús, en bulidzë’ légaquië’, ate’ gunábinë’ légaquië’, rnnë’:

—¿Bizxi rë’ënilí’ guna’ queëli’?

<sup>33</sup> Të’ Jesús:

—Xan, rë’ënitú’ gunu’ ga huóálaj guiõj lotu’.

<sup>34</sup> Ní’irö Jesús buéchi’ ládxë’ë légaquië’, ate’ gudanë’ guiõj lógaquië’. La’ böáljatëgaca guiõj lógaquië’, ate’ yójácalenë’ Jesús.

## 21

*Ridxinë’ Jesús yödzö Jerusalén len yöl-la’ ba zxön*

*(Mr. 11:1-11; Lc. 19:28-40; Jn. 12:12-19)*

<sup>1</sup> Cate’ bila’dxíngalë’ yödzö Jerusalén, en ni’ nacu’ë ga dë yödzö Betfagé ga na’ zoa Guí’a Yaga Olivo, ní’irö gusól-lë’ë Jesús chopë’ bönni’ usëda queë’, <sup>2</sup> ate’ rë’ légaquië’:

—Guli’tséajtsöca’ yödzödo’ ni’ ca dödilö ga ni zóaru’, ate’ la’ tsöjxáca’tëli’-ba’ tuba’ burro guná’ nága’ba’, ate’ dzaga lëba’ tuba’ burro biguiú’do’. Guli’tsöjsedxi-ba’, en ichë’ëli’-ba’ quia’

ni. <sup>3</sup> Channö nu bi guié libí'ili', guli'guié nu na': "Xanru' riquinné'-ba'." Ní'irö isöl-lë'ë légaçaba' quia'.

<sup>4</sup> Caní guca para gaca lë na' buzúajë' lu guichi bönni' bë'ë didza' uláz queë' Dios, gunnë':

<sup>5</sup> Guli'guié nupa nacuá' yödzö Sión,  
Buli'yútsöca', zë'ë Bönni' inná bé'enë' libí'ili'.

Lu yöl-la' nöxaj ladxi' queë' dxíë'-ba' tuba' burro.

Dxíë' cúdzu'ba' búrrodo' nácaba' zxi'iniba' böa' ruá'aba' yua'.

<sup>6</sup> Ní'irö bönni' usëda queë' yöjáquië' ni', ate' gulunë' ca na' gunná bé'enë' Jesús légaquië'. <sup>7</sup> Gula'chë'ë-ba' burro guná' na', en burro biguiú'do' na', ate' bulu'dxíë' cúdzu'gacaba' yugu' lari' guitsa' quégaquië', ate' gudxíë' Jesús lahui' lari' na'.

<sup>8</sup> Nacuá' ca' bönachi zían ni', ate' gula'chilaj yugu' lari' ta'xóa cúdzu'guequi la' nöza. Ia'zíca'rë' bulu'chibë' zin le bulu'zxóë' ga naca la' nöza. <sup>9</sup> Gulu'í zidzaj didza' bönachi na' nanörugaca, en nupa na' söjácalen Jesús, ta'nná:

—¡Yöl-la' ba Lë', zxi'ini xi'sóë' David! ¡Bica' ba nu ni za' ni'a que Lë' Xanru'! ¡Yöl-la' ba Dios!

<sup>10</sup> Cate' guyázië' Jesús yödzö Jerusalén, bulu'dzatsa yúgu'të bönachi lu yödzö na', ate' zían nupa gulë luzë'eguequi, ta'nná:

—¿Nuzxi caz bönni' ni'?

<sup>11</sup> Ia'bal-la bönachi ni' ta'nná:

—Nu ni Jesús, bönni' ru'ë didza' uláz queë' Dios, ate' naca ladzë' Nazaret luyú Galilea.

*Jesús rulatjë' lö'a yudo'*

(Mr. 11:15-19; Lc. 19:45-48; Jn. 2:13-22)

<sup>12</sup> Cate' guyázië' Jesús lö'a yudo' queë' Dios, bulágui'ë ní'ilö yúgu'të nupa tuti' to'o ga naca lö'a yudo' na'. Burixë' ca' yugu' blaga quégaquië' bönni' tu'tsë'ë dumí yödzö zi'tu', en yugu' le ta'bö'i nupa tuti' gu'dodo'. <sup>13</sup> Rë' légaquië':

—Nazúaj lu guichi lá'ayi le rnna: "Lidxa' si'i le, yu'u ga nu ulidza Dios", pero libí'ili' chinunli' lataj ni ca naca yu'u lídxigaca gubán.

<sup>14</sup> Cate' ni' zoë' Jesús chila yudo', bal-lë' bönni' nachul-la lógaquië', en bönni' biti' raca ila'zë'ë bila'dxinë' ga na' zoë', ate' Lë' bunë' légaquië'. <sup>15</sup> Gula'lenë' yugu' bixúz unná bë', en bönni' yudo' tu'sëdinë' cate' bila'lé'enë' yugu' yöl-la' huáca ni runë' Jesús, en bila'yönnë' tu'íbi' bí'ido' zidzaj didza' ga naca chila yudo', ta'nnabi':

—¡Bica' ba Lë', zxi'ini xi'sóë' David!

<sup>16</sup> Ní'irö të' Jesús:

—¿Naru' cabí riyönnu' ca ta'nnabi' bi'i ni'?

Bubi'ë didza' Jesús, rnnë':

—Ön, riyönda'. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rnna: "Li' benu' ga yugu' bi'i

cuidi', en yugu' bí'ido' ni' tádxí'bi' gulúl-labi' yöl-la' ba le naca idú."

<sup>17</sup> Ní'irö Jesús buca'anë' légaquië', ate' burúajë' Jerusalén. Guyijë' yödzo Betania ga ni' bugá'anë' idú yëla.

*Jesús rulidza zi'ë yaga higo*

(Mr. 11:12-14, 20-26)

<sup>18</sup> Cate' za' rení', ate' ni' söhuöjë' Jesús Jerusalén, ridunë'.  
<sup>19</sup> Bilé'enë' tu yaga higo rö' gal-la' cuite nöza, ate' gubígui'ë ga na' rö', pero biti' bi bidzölinë' lu yaga na'. Xilágui'sö dxía. Ní'irö Jesús gudxë' le:

—Bíti'rö cuía le ribía quiu'.

La' gubídxitë yaga higo na'. <sup>20</sup> Cate' bila'lé'enë' bönni' usëda queë' lë ni, bulu'báinë', ate' gula'nábinë' Jesús, ta'nnë':

—¿Nacxi caz guca, gubídxitë yaga ni?

<sup>21</sup> Bubi'ë didza' Jesús, rë' légaquië':

—Le nácatë rea' libí'ili', channö tséajlë'ëli' Dios, en biti' gaca chopá ládxi'li', calégasö huáca gunli' ca na' bena' que yaga ni, pero channö guiëli' gu'a ni: Gucuíta, en yöjsóa lu nísado', gaca ca na' innali'. <sup>22</sup> Lësca' caní, yúgu'të le inábali' cate' ulídzali'-në' Dios, channö huayéjlë'ëli' gunnë' Dios queëli', huazí'ili' lë na' inábali'.

*Yöl-la' unná bë' dë lu në'ë Jesús*

(Mr. 11:27-33; Lc. 20:1-8)

<sup>23</sup> Ní'irö guyázië' Jesús chila yudo', ate' tsanni ni' rusédinë' bönachi nacua' ni', bila'dxinë' yugu' bixúz unná bë' len bönni' gula tu'zéajni'inë' ga zoë', ate' gula'nábinë' Jesús, ta'nnë':

—¿Bizxi yöl-la' unná bë' dë lu no'o, runtso' yugu' lë ni? ¿Nuzxi budödi lu no'o yöl-la' unná bë' ni?

<sup>24</sup> Bubi'ë didza' Jesús, rë' légaquië':

—Lësca' neda' inábatsöqui'da' libí'ili' tu didza'. Channö quíxjöi'ili' neda' ca naca, neda' ca' guía' libí'ili' bizxi yöl-la' unná bë' dë lu na'a runa' caní. <sup>25</sup> ¿Nuzxi caz gusöl-la' Juan para buquilë' bönachi nisa? ¿Naru' Dios gusöl-lë'ë lë', o gula'söl-lë'ë yugu' bönni' lë'?

Ní'irö gula'sí lógaquië' bönni' yudo' na' ta'nnë' la' légacasë':

—Channö innaru': Dios gusöl-lë'ë lë', la' guiëtë' rë'u: "¿Bizxi que biti' guyéajlë'ëli' lë'?" <sup>26</sup> Na'a, channö innaru': Gula'söl-lë'ë yugu' bönni' lë', rádxiru' le ilún bönachi lu yödzo tu' ta'yéajlë'ë yúgu'të' Juan na' bë'ë didza' uláz queë' Dios.

<sup>27</sup> Que lë ni na' bulu'bi'ë didza', të' Jesús:

—Bíti' nöztu'.

Jesús rë' légaquië':

—Neda' ca', biti' guía' libí'ili' bizxi yöl-la' unná bë' dë lu na'a runa' lë ni.

*Rucúdzü'ë didza' Jesús ca gulunbi' chópabi' xzí'inë' tu bönni'*



28 Ní'irö Jesús gudxë' yugu' bönni' yudo' na':

—¿Nacxi rusáca'li' queé'li'? Guzóë' tu bönni' nacuá'abi' chópabi' bi'i bönni' queë', ate' yöjödxe'-bi' tubi' bi'i queë' na', gunné': "Zxí'ina', guyéaj na'a tsöjenu' dxin ga naca luyú quia' ga rögaca lubá uva." 29 Bubí'ibi' didza' bi'i na', gúdxibi'-në': "Biti' rë'ënda' tseja'." Gudödi ni' bubí'i ládxi'bi', ate' yöjenbi' dxin. 30 Ní'irö bönni' na' yöjödxe'-bi' ia'tubi' bi'i queë' na', en la' tuz ca gunné', ate' bubí'ibi' didza' bi'i ni, gúdxibi'-në': "Huaca, Dad. Uyéaja'." Biti' guyéajbi' bi'i ni. 31 ¿Núzxilöbi' bi'i chopa ni benbi' le guyaza ládxe'ë xúzibi'?

Bulu'bi'ë didza', të' Jesús:

—Bi'i zí'alö na'.

Ní'irö Jesús rë' légaquië':

—Le nácatë rea' libí'ili', ila'nöruë' bönni' uquízxaj tuá' dö', en yugu' nigula udá dzaga ca libí'ili', ate' ila'yázië' ga ni rinná bë'ë Dios. 32 Caní gaca, tu' bidë' Juan, bönni' buquilé' bönachi nisa, ga zóali', en busédinë' libí'ili' le naca tsahui' ca ral-la' gunli', ate' libí'ili' bití' guyéajlë'ëli' lë', pero yugu' bönni' uquízxaj, en yugu' nigula udá dzaga gula'yéajlë'ë lë'. Sal-la' bilé'eli' lë' ni, bití' bubí'i ládxi'li' para tséajlë'ëli' lë'.

*Rucúdzu'ë didza' Jesús ca béngaquië' bönni' huen dxin bití' nácagaquië' tsahui'*

(Mr. 12:1-12; Lc. 20:9-19)

33 Gunnë' ca' Jesús:

—Buli'zë nágali' ia'tú le ucúdzu'a didza'. Guzóë' tu bönni' xan yu'u, ate' bönni' ni budë'ë yugu' lubá uva luyú queë'. Guléquië' lë'aj que, en guchö'önë' tu lerui guiöj ga isié' xisi uva na'. Benë' ca' tu yu'u xitsá' ga gaca nu uyú idütë luyú queë'. Ní'irö budödë' luyú na' lu ná'agaquië' bönni' huen dxin, para ila'zi'ë quégaquië' gatsaj huéaj, ate' sa'yéajë' yödzo' zítu'.

34 'Cate' chibidxín dza ulu'chibë' yugu' lubá uva na', gusöl-lë'ë bönni' xan luyú na' bal-lë' ni'a në'ë ga na' nacu'ë bönni' huen dxin ni' para ulu'zi'ë lu ná'agaquië' uláz queë'. 35 Ní'irö gula'zönë' bönni' huen dxin na' yugu' ni'a në'ë na'. Gulunë' huë' tuë', en ia'tué' bétigaquië' lë', en ia'tué' bulu'ladxë' lë' guiöj. 36 Leyúbölö bönni' xan luyú na' gusöl-lë'ë ca' ia'zica'rë' ni'a në'ë, ate' guláquië' ziantërë' ca nupa na' gusöl-lë'ë zí'alö, ate' la' tuz ca gulunë' bönni' huen dxin ni' quégaquië'.

37 'Ga yöjsete, gusöl-lë'ë ca' zxí'inë' ga na' nacu'ë. Guzá' ládxe'ë, rnnë': Hualunë' bal bi'i quia'. 38 Cate' yugu' bönni' huen dxin na' bila'lé'enë'-bi' zxí'inë', la' gula'nnatë' la' légacasë': "Bi'i ni guequi queëbi' luyú ni. Guli'dá, gútiru'-bi', ate' le ral-la' guequi queëbi' guequi queëru'." 39 Ní'irö gula'zönë'-bi', ate' bulu'béajë'-bi' ní'ilö luyú ga na' rögaca lubá uva, ate' bétigaquië'-bi' ni'.

40 Ní'irō Jesús gunábinē' légaquiē', gunnē':

—Cate' udxinē' bōnni' xan luyú na', ¿nacxi gunē' quégaquiē' bōnni' huen dxin ni'?

41 Bulu'bi'ē didza' bōnni' yudo' na', tē' Jesús:

—Usunítiē' bōnni' tuá' dō' na', ate' luyú queē' na' udödē' lu ná'agaquiē' ia'zícá'rē' bōnni' huen dxin, bōnni' ilu'ē lē' uláz queē' cate' idxín dza ulu'chibē' le.

42 Ní'irō Jesús gudxē' légaquiē':

—¿Naru' catu caz nulábanili' lē na' nazúaj lu guichi lá'ayi ca naca lē ni? Caní rna:

Guiōj na' gula'rú'unē' bōnni' tu'cu'ē zō'ō,

la' guiōj ná'asō chinaca guiōj len zō'ō.

Lē cazē' Xanru' benē' ga naca caní,

ate' naca tu le run ga rubániru'.

43 'Que lē ni na' rea' lib'ili', xilátjali' ga na' rinná bē'ē Dios idúa queēli', en gata' quégaca bōnachi ilún ca ral-la' gun nu nadelí' lataj ni'. 44 Nu tsōjchegu' lu guiōj ni, la' cuinsi quitsaj, ate' channō guiōj ni tseajbaga' bōnni' na', uzxuzxaj lē'.

45 Cate' yugu' bixúz unná bē', en yugu' bōnni' yudo' fariseo bila'yōnnē' lē na' bucúdzu'ē didza' Jesús, téquibe'enē' bē'ē Jesús didza' ca naca quégaquiē'. 46 Gula'zóa gula'bō'ē ila'zōnē' Jesús, pero guládxinē' bi ilún bōnachi zían nacúa' ni' tu' ta'yéajlē' náquiē' Jesús bōnni' ru'ē didza' uláz queē' Dios.

## 22

*Rucúdzu'ē didza' Jesús ca naca que laní que yöl-la' rutsaga na'*

1 Jesús bē'lenē' légaquiē' didza' leyúbölö, ate' bucúdzu'ē didza', rnnē':

2 —Ca gaca quégaca nupa ila'yaza ga rinná bē'ē Dios yehua' yubá naca ca guca quégaca nupa bulidzē' tu bōnni' rinná bē'ē cate' benē' laní que dza utsaga ná'abi' bi'i bōnni' queē'. 3 Gusöl-lē'ē ni'a nē'ē tsōjxí'gaquiē' yugu' bōnni' chinulidzē' para guídagaquiē' laní queēbi', pero biti' gulē'ēnē' guídagaquiē'. 4 Ní'irō gusöl-lē'ē ia'zícá'rē' ni'a nē'ē, en gudxē' légaquiē': "Guli'tsōjōdxitsōca' nupa na' chinulidza', na' guiéli' légaquiē': Buli'yútsōca', chinupá'a la' huagu. Chibétia'-ba' yugu' xpēdxa', en yugu' bōa' bēdxi renni' quia'. Yúgu'tē chinupá'a. Guli'dá, sóaru' laní queēbi' bi'i bōnni' quia' utsaga ná'abi'." 5 Yugu' bōnni' na' yōjlídzagaquiē' biti' gulunē' légaquiē' bal, ate' yōjáquiē' que queēgaquiē'. Tuē' yōjenē' dxin, en ia'túē' guyijē' tsōjō'u tsōjēti'ē. 6 Ia'zícá'rē' gula'zōnē' yugu' ni'a nē'ē na', ate' gulu'ē dō' quégaquiē', en bētgaquiē' légaquiē'. 7 Cate' bōnni' na' rinná bē'ē biyōnnē' lē ni, gulénē', en gusöl-lē'ē yugu' bōnni' queē' rōjáquiē' gudil-la, ate' bētigaquiē' yugu' bōnni' hueti bōnachi na', en bulu'quéliē'ē guí' ládzaquiē'. 8 Ní'irō

bönni' na' rinná bē'ē gudxē' yugu' ni'a nē'ē, gunnē': "Le nácatē chinupá'a que laní na', pero yugu' bönni' bulidza' biti' guláquiē' lesaca' guídagaquiē' laní quia'.<sup>9</sup> Guli'tséajtsöca' gapa naca la' nōza, en buli'lidza yúgu'tē nupa tsöjxáca'li' ni' para guídagaca laní queēbi' bi'i bönni' quia' utsaga ná'abi'." <sup>10</sup> Ní'irö bila'ruájē' ni'a nē'ē na', söjáquiē' gapa naca la' nōza, ate' bulu'tubē' yúgu'tē nupa yöjxáca'gaquiē', yugu' bönni' dxi'a, en yugu' bönni' tuá' dö', ate' ga na' raca laní bilíró bönachi.

<sup>11</sup> 'Cate' guyáziē' bönni' na' rinná bē'ē para uyúē' nupa ni' nudúbigaca, bilé'enē' tu bönni' biti' nácuē' lari' tsahui' le bunödzejē' quégaquiē' bönni' nacu'ē laní na'. <sup>12</sup> Ní'irö gudxē' bönni' na': "Bönni'do', ¿zóatso' ni, en biti' nacu' lari' tsahui' bunödza' quégaca nupa nacuá' laní?" Bönni' na' busayaj ru'ē. <sup>13</sup> Ní'irö bönni' na' rinná bē'ē gudxē' nupa na' tun xichiné', gunnē': "Guli'guga' ni'a nē'ē bönni' ni. Guli'tsöjchú'un-nē' ní'lö ga na' rö'ö chul-la. Ni' cödxē', en utíl-la láyē'ē, lu yöl-la' ruhu'ini queē'."

<sup>14</sup> Ní'irö Jesús gudxē' légaquiē':

—Zian nupa nulidza', pero nabábasö nupa ila'rögaca.

*Jesús ru'ē didza' ca naca le riguízxaj lázaru'*

(Mr. 12:13-17; Lc. 20:20-26)

<sup>15</sup> Ní'irö yugu' bönni' yudo' fariseo na' bulu'zē'ē ni', ate' gulún xtídza'gaquiē' ilunē' ga bi innē' Jesús para gaca ulu'zéguiē' Lē' didza'. <sup>16</sup> Para ilunē' caní, gula'sól-lē'ē bal-lē' bönni' dá'gaquiē' légaquiē', len bönni' dá'gaquiē' Herodes, ga zoē' Jesús, nupa na' gulē' Jesús:

—Bönni' Usedi, nöztu' Li' ru'u didza' cātēze naca, en naca idútē li ca rusédinu' ca naca queē' Dios, en biti' ru'í'í ládXu'u le ta'nná quiu' bönachi, tu' cabí ruchi'a rusöröu' bönachi ca naca le ta'nnasö bönachi na'. <sup>17</sup> Gudíxjöi'í netu'. ¿Nacxi runi li'? ¿Naru' run bayudxi, o biti' run bayudxi quizzxaj lastu' queē' César, bönni' yödzö zi'tu' na' rinná bé'enē' rē'u?

<sup>18</sup> Réquibe'enē' Jesús té'ennē' ulu'béajē' Lē' didza', ate' gudxē' légaquiē':

—Libi'ili', bönni' rulu'isö tsahui' cuinli', ¿bizx que ru'í'ili' didza' le ruzóa neda' ra' guí'a? <sup>19</sup> Buli'lu'í'í neda' dumí le riguízxaj lázali'.

Ní'irö bulu'lu'ínē' Lē' tu dumí que yödzö Roma. <sup>20</sup> Jesús gunábinē' légaquiē', rnnē':

—¿Nuzxi lahui da' ni, en nuzxi le nazúaj lē'e dumí ni?

<sup>21</sup> Tē' Lē':

—Queē' César na'.

Ní'irö Jesús gudxē' légaquiē':

—Guli'guízxjē' César le nequi queē' César, ate' Dios le nequi queē' Dios.

<sup>22</sup> Cate' bila'yönnë' lë ni, bulu'bánninë' ca naca didza' tsahui' bubí'ë Jesús, ate' bulu'cá'anë' Lë', söhuöajtëgaquië'.

*Ta'nabi yúdxinë' Jesús ca ulu'bán nupa chinátigaca*  
(Mr. 12:18-27; Lc. 20:27-40)

<sup>23</sup> La' dza ná'asó yugu' bönni' yudo' saduceo, bönni' na' ta'nnë' bití' ulu'bán nupa chinátigaca, bila'dxinë' ga zoë' Jesús, ate' gula'nábinë' Lë', <sup>24</sup> ta'nnë':

—Bönni' Usedi, Moisés gunné': "Channö gátie' tu bönni' zóanu nigula queë', en cuntú nu bi'i zóabi' queë', ní'irö bi'i böchë'ë bönni' na' ral-la' utsaga ná'alénbi'-nu nigula uzëbi' queë', para cabí iníti dí'a dza queë' bönni' böchi'bi' na'." <sup>25</sup> Gula'cuá'abi' gadxi bi'i bönni' ga zóatu', naca böchi'gacabi'. Bi'i zí'alö na' butsaga ná'alénbi'-nu nigula, ate' gútitébi'. Tu' cuntú nu bi'i queëbi' zóabi', bi'i buropi na' butsaga ná'alénbi'-nu nigula uzëbi' queëbi' bi'i böchi'bi' na'. <sup>26</sup> Lësca' caní guca queëbi' bi'i buropi na', enca' queëbi' bi'i bunny, en la' tuz ca guca quégacabi' igádxitébi', gulátibi' yúgu'tëbi'. <sup>27</sup> Ga búdxité gútinu ca' nigula na'. <sup>28</sup> Cate' idxín dza ulu'bán nupa chinátigaca, ¿núzxilögacabi' bi'i gadxi ní' guéquinu nigula na' queëbi', tu' bulu'tsaga ná'alénbi'-nu yúgu'tëbi' nigula na'?

<sup>29</sup> Ní'irö bubí'ë didza' Jesús, ate' rë' légaquië':

—Nachíxili' libí'ili' tu' cabí réajni'ili' le nazúaj lu guichi lá'ayi, en tu' cabí núnbë'ëli' yöl-la' huáca queë' Dios. <sup>30</sup> Cate' idxín dza ulu'bán nupa chinátigaca, bíti'rö gaca yöl-la' rizóalen nigula, en bití' ulu'tsaga ná'agaquië', pero gácagaquië' ca nácagaquië' gubáz lá'ayi queë' Dios nacué' yehua' yubá. <sup>31</sup> Ca na' ral-la' ulu'bán nupa chinátigaca, ¿naru' cabí nulábanili' lë na' gudxi cazë' Dios libí'ili'? <sup>32</sup> Caní gunné': "Neda' naca' Dios queë' Abraham, en Dios queë' Isaac, en Dios queë' Jacob." Dios na' bití' náquië' Dios quégaca nupa nátigaca tsaz, pero náquië' Dios quégaquië' bönni' ni nabángaquië' sal-la' gulátie'.

<sup>33</sup> Cate' bila'yöni bönachi nacué' ní' didza' ni, bulu'bani ca naca lë na' rusédinë' Jesús léguequi.

*Xibá queë' Dios le naca lo*  
(Mr. 12:28-34)

<sup>34</sup> Cate' guléquibe'enë' bönni' yudo' fariseo ca benë' Jesús, busayjë' ruá'agaquië' bönni' yudo' saduceo, ní'irö bulu'dubë' yúgu'të'. <sup>35</sup> Tuë' bönni' nútsë'ë ládjagaquië', en nazëdë' xibá queë' Moisés, gú'unnë' sí' bë'ë Jesús. <sup>36</sup> Que lë ni na' gunábinë' Jesús, rnnë':

—Bönni' Usedi, ¿bízxilö xibá queë' Dios naca lo?

<sup>37</sup> Jesús rë' lë':

—Idxi'inu' Xanu' Dios idú ládxi'u, en idú icja ládxi'do'o, enca' len idú yöl-la' réajni'i quiu'. <sup>38</sup> Xibá ni naca lo, en

nazáca'tërö. <sup>39</sup> Xibá na' naca buropi, la' ca nácatë, en caní rRNA: "Idxí'ínu' böchi' luzó'o ca nadxí'i cuinu'." <sup>40</sup> Chopa xibá ni nácgaca ga röjlox yúgu'të le rinná bë' xibá queë' Dios, en yúgu'të le bulu'sédinë' bönni' gulu'ë didza' uláz queë' Dios.

*¿Nuzxi xí'ini náquië' Cristo?*

*(Mr. 12:35-37; Lc. 20:41-44)*

<sup>41</sup> Tsanni ni' nacu'ë tsözxön bönni' yudo' fariseo na', Jesús gunábinë' légaquië', <sup>42</sup> rnnë':

—¿Nacxi rusáca'li' queëli' queë' Bönni' na' lë' Cristo? ¿Nuzxi xí'ini náquië'?

Bulu'bi'ë didza', ta'nnë':

—Zxi'ini xi'sóë' David náquië'.

<sup>43</sup> Ní'irö Jesús rë' légaquië':

—¿Bizx que na' lë' cazë' David bulidzë' Lë', gunnë': "Xana"? Caní gunnë' cate' ni' bë'ë didza' uláz queë' Dios Bö' Lá'ayi, gunnë':

<sup>44</sup> Xanru' Dios gudxë' Xana':

"Gurö'ö cuita lë'a ibëla, cate' gunra' ga ulu'zechu zxíbigaca Lo' nupa tequi Li' zi'."

<sup>45</sup> Channö David na' gunnë' queë' náquië' Xanë', ¿nacxi caz naca, rnnali' náquië' xí'ini xi'sóë' David na'?

<sup>46</sup> Cuntu nu guca ubí'i didza', ate' ga gusí lo dza na', cúnturö nu burugui bi inábini Lë'.

## 23

*Jesús ruzéqui'ë yugu' bönni' yudo' didza'*

*(Mr. 12:38-40; Lc. 11:37-54; 20:45-47)*

<sup>1</sup> Ní'irö Jesús bë'lenë' bönachi nacua' ni' len yugu' bönni' usëdi queë' didza'. <sup>2</sup> Rë' légaquië':

—Yugu' bönni' yudo' fariseo, en yugu' bönni' yudo' usedi nuhuóazagaquië' xilatjë' Moisés, en tu'sédinë' bönachi. <sup>3</sup> Que lë' ni na', guli'gún yúgu'të le ilë' libí'ili', pero bití' gunli' libí'ili' ca na' tunë' légaquië', tu' tu le ta'nnë', en ia'tú le tunë'. <sup>4</sup> Le ta'nná bé'enë' bönachi naca ca tu yua' zi'i le cabí sequi' nu guá', ate' tu'gu'ë le ya'zxicjagaca bönachi, pero légaquië' bití' té'ënnë' ulu'tenë' le, calëga len tuze xibön ná'agaquië'. <sup>5</sup> Yúgu'të le tunë', tunë' para ila'lé'e bönachi légaquië', tu' tunë' zxön le túgui'ë yen ná'agaquië', en ra' xigágaquië' ga na' nuzúajgaquië' tu le nazúaj lu guichi lá'ayi, en tu'tunnë' luzxi lari' nácugaquië'. <sup>6</sup> Té'ënnë' ila'bö'ë ga naca lataj lo ga na' tu'dubë' tahuë', enca' ga na' naca lataj lo lu yu'u ga tu'dubë' tu'sëdë' queë' Dios. <sup>7</sup> Lë'sca' caní, té'ënnë' ulu'gapa bönachi légaquië' didza' ba zxön gapa naca lógaca bönachi, en té'ënnë' ilë' bönachi légaquië': "Padiux, bönni' usedi."

<sup>8</sup> 'Pero libí'ili', bití' ral-la' gunli' ga nu guié libí'ili': Bönni' Usedi, tu' zoa tuz Nu naca Bönni' Usedi queéli', neda', Cristo, ate' yúgu'téli' nácali' böchi'li' tuli' ia'tuli'. <sup>9</sup> Cuntu nu guiéli' luyú ni, bití' innali': Xuz, tu' zoa tuz Nu naca Xúzili', zoé' yehua' yubá. <sup>10</sup> Bití' gunli' ga nu guié libí'ili': Xan, tu' zoa tuz Nu naca Xanli', neda', Cristo. <sup>11</sup> Nu nutsa' ladjali' nu run xichinli' ia'zica'röli', nu ni na' gácarö lo ga zóali'. <sup>12</sup> Channö nu uzóa cuini lataj lo, cá'asö ugá'ana nu na', pero nu naca nöxaj ladxí, gaca lo.

<sup>13</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruzága'li' nöza söjácalen bönachi para ila'dxín ga ni' rinná bē'ē Dios yehua' yubá. La' libí'isili' bití' sequi' tsú'uli', en bití' ru'ili' lataj ila'yú'u nupa té'ēni ila'yú'u.

<sup>14</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Rugúali' yugu' lídxigacanu nigula uzēbido', en para ulu'isö tsahui' cuinli', xidzé rulídzali'-nē' Dios. Que lē ni na', zítērö irugu queéli' quí'i sáca'li'.

<sup>15</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ridödili' idú lu nísado', en idú yōdzölió ni para gunli' ga tseaj ládxē'ē tu bönni' Dios tsözxón len libí'ili', en cate' chiguzxéqui'li'-nē', runli' ga nabága'rē' xíguia' ca libí'ili', ate' tsöjtsu'ē lu gu' gabila.

<sup>16</sup> 'Bica' bayechi' libí'ili'. Nachul-la loli', ate' rē'ēnili' ulu'ili' nöza bönachi. Caní naca queéli' tu' rnnali': "Channö bi rizí' lu nē'ē tu bönni' ni'a que yudo', bití' run bayudxi, pero channö runē' le ni'a que oro dzö'ö yudo', bayudxi gun." <sup>17</sup> Libí'ili', bönni' lo chul-la, en tu' caréajni'i. ¿Bíxilö nácarö lo? ¿Naru' oro na', o yudo' le run lá'ayi oro na'? <sup>18</sup> Lēasca' caní rnnali': "Channö nu bönni' gunē' le ni'a que bucugu lá'ayi, bití' gun bayudxi, pero channö gunē' le ni'a que gun zxoa lahui, bayudxi gun." <sup>19</sup> Libí'ili', nazídili', en nachul-la loli'. ¿Bíxilö nácarö lo? ¿Naru' gun zxoa láhuisö, o bucugu lá'ayi na' run lá'ayi gun na'? <sup>20</sup> Que lē ni na', channö nu bönni' runē' le ni'a que bucugu lá'ayi, runē' le ni'a que le, enca' ni'a que yúgu'tē le zxóagaca láhuisö. <sup>21</sup> Lēasca' caní, channö nu bönni' runē' le ni'a que yudo', runē' le ni'a que le, enca' ni'a queē' Dios, nun cazē' xilatjē' ni'. <sup>22</sup> Lēasca' caní, channö nu bönni' runē' le ni'a que yehua' yubá, runē' le ni'a que lataj ga rö'ē rinná bē'ē Dios, enca' ni'a que Lē cazē' Dios rö'ē ni'.

<sup>23</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Caní naca queéli' tu' riguíxjali' que yudo' tu cō' huéaj tu' chi cō' le rizí'ili' que xōhuéaj, en que guixi' anís, en que comino la' huagu, pero

rucá'anali' le nácarö lo le rinná bë' xibá queë' Dios, tu' cabí runli' le naca tsahui', en bití' ruhuéchi' ládxi'li' luzá'ali', en bití' réajlë'ëli'-në' Dios. Yugu' lë ni run bayudxi gunli', en lës bití' ucá'anali' ia'zica'rö lë na' runli', le riguixzjali' que yudo'.<sup>24</sup> Libí'ili', nachul-la loli', en rë'ënili' ulu'í'li' nöza bönachi. Ca na' runli' naca ca rudödili' bödzádzado' le ré'jali', rubéajgacali'-ba' bö'iyudo', pero ré'jali'-ba' böa' ta'bié'-ba' bönni'.

<sup>25</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'ísö tsahui' cuinli'. Nácali' ca zxíga'do' ré'jali', en yö'öna ráhuili'. Riguíbili' le nuá' cuita lë'e, pero lu icja ládxi'do'oli' nalí yugu' le ribanli', en yugu' le ruá' dö' runli'.<sup>26</sup> Libí'ili', bönni' yudo' fariseo lo chul-la. Zí'alö guli'quibi le nuá' lu zxíga'do', en lu yö'öna, lë na' sa'yéaj gácali' tsahui' lu icja ládxi'do'oli', para gácali' ca' tsahui' cuita lë'ëli'.

<sup>27</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'ísö tsahui' cuinli'. Caní naca queëli' tu' nácali' ca yugu' yeru ba quégaca nupa chinátigaca, le nácgaca chiguíchido'os cuita lë'e, en le nácatë lachi nalá'gaca, pero nalí'gaca dxita quégaca nupa chinátigaca, enca' yúgu'të le siguti.<sup>28</sup> Lësca' caní nácali' libí'ili'. Le nácatë láhuisö rulu'í' cuinli' tsahui' lógaca bönachi, pero lu icja ládxi'do'oli' nalili' yugu' le rulu'ísö tsahui' cuini, en le ruá' dö' runli'.

<sup>29</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'ísö tsahui' cuinli'. Ruchísali' biquitaj que ba gapa nagáchi'gaquië' bönni' gulu'ë didza' uláz queë' Dios, en ru'í'li' biquitaj gapa nagáchi'gaca bönachi tsahui'.<sup>30</sup> Lësca' caní rnnali': "La'tu' zóatu' dza ni'te cate' gula'cu'ë xuz xtó'otu', bití' guntu' légaquië' tsözxön cate' gulútië' yugu' bönni' gulu'ë didza' uláz queë' Dios."<sup>31</sup> Tu' rnnali' caní, la' libí'isili' runli' ba nalí nácali' zxi'ini xi'sógaca nupa ni' bétigaca yugu' bönni' gulu'ë didza' uláz queë' Dios.<sup>32</sup> Caní naca, rusubaga' cuinli' xíguia' na' gula'báguie' xuz xtó'oli'.

<sup>33</sup> 'Libí'ili' na', nácali' ca yugu' bëla sínia', en di'a dza quégacaba' bëla sínia'. ¿Nacxi caz uláli' lu le usaca' zi' libí'ili' lu guí' gabila?<sup>34</sup> Que lë ni na', neda' isöl-la'a queëli' yugu' bönni' ilu'ë didza' uláz queë' Dios, enca' yugu' bönni' ta'yéajni'inë', en yugu' bönni' usedi. Yugu' bönni' ni, bal-lë' gútili'-në', en ia'zica'rë' udá'ali' lë'e yaga cruz, en ia'zica'rë' quinli' gapa naca lu yu'u ga rudúbili' rusédali' queë' Dios, ate' ulágali' légaquië' tu ia'tú yödzö.<sup>35</sup> Caní gaca, ibága'li' libí'ili' xíguia' que idútë rön quégaquië' bönni' tsahui' le gulalaj luyú, ga gudela' nu bëti Abel, bönni' tsahui', ga ridxintë nupa bétigaca Zacarías, zxi'inë' Berequías, bönni' na' bëtili'-në' gatsaj láhui'lö ga dë yudo', en ga dë bucugu lá'ayi ga na' tu'zégui'ë' böa' bédxido'

lahuë' Dios. <sup>36</sup> Le nácatë rea' libí'ili', yúgu'të lë ni ila'baga' bönachi nacuá' dza ni zóaru' na'a.

*Jesús ribödxë' ni'a que yödzö Jerusalén*

*(Lc. 13:34-35)*

<sup>37</sup> Lësca' caní gunnë' Jesús:

—Jerusalén, Jerusalén, libí'ili' na' rútigacali'-në' bönni' tu'ë didza' uláz queë' Dios, en ruládxigacali' guiöj nupa nasöl-lë'ë Dios. Zían luzuí gú'unida' utuba' libí'ili' quia', ca runba' yöjede, rutúbiba' börado' queëba' zcan xíliba', pero biti' gú'unili'. <sup>38</sup> Buli'yútsöca', cá'asö ugá'ana yu'u lídxili'. <sup>39</sup> Caní gaca, tu' rea' libí'ili', na'a isí lo biti' ulé'eli' neda' cate' innárolí': “Lá'ayi náquië' Bönni' na' zë'ë uláz queë' Xanru.”

## 24

*Rigúxjö'ë Jesús ca si' ulu'quínajë' yudo'*

*(Mr. 13:1-2; Lc. 21:5-6)*

<sup>1</sup> Birúajë' Jesús chila yudo', en tsanni ni' rizë'ë ni', gula'bígüi'ë bönni' usëda queë' ga na' zoë', ate' bulu'lu'inë' Lë' ca nácgaca zö'ö nagú'ugaca lë'a yudo'. <sup>2</sup> Bubi'ë didza' Jesús, ate' rë' légaquië':

—¿Rilé'etseli' yúgu'të lë ni? Le nácatë rea' libí'ili', biti' ca' ugá'ana guiöj nabaga' luzë'e ni, le cabí iguínaj.

*Le ilaca bë' chizóa idxín dza údxi que yödzölió*

*(Mr. 13:3-23; Lc. 21:7-24; 17:22-24)*

<sup>3</sup> Cate' ni' rö'ë Jesús ga naca lu Guí'a Yaga Olivo, bila'dxinë' bönni' usëda queë' ga na' zoë' queëzë', en të' Lë':

—Gudíxjöi'i netu', ¿bátaxi ilaca lë ni, en bizxi gaca bë' dza huödu', en dza údxi que yödzölió ni?

<sup>4</sup> Ní'irö bubi'ë didza' Jesús, ate' rë' légaquië':

—Buli'yú para cabí nu si' ye'e libí'ili', <sup>5</sup> tu' zá'gaquië' zían bönni' légaquië' ca lea' neda'. Ila'nnë' nácgacquië' Cristo, en ila'zí' yé'enë' bönachi zían. <sup>6</sup> Huayönilí' raca gudil-la, en le ruí'i didza' que gudil-la, pero biti' cö'öli' böniga, tu' ral-la' ilaca yúgu'të lë ni, pero cabí ridxini dza údxi cate' ilácarö lë ni. <sup>7</sup> Til-la tu yödzö len ia'tú yödzö, ate' tu ga nu rinná bë' len ia'tú ga nu rinná bë'. Ilatsaj yödzöhuë' zxon, en gaca gubín, ate' zían lataj tödi budó' zxu'. <sup>8</sup> Yúgu'të lë ni nácgaca le isí lógaca yugu' le ila'guí'i ila'zaca' bönachi.

<sup>9</sup> Ní'irö ulu'dödi bönachi libí'ili' lu na' nu usaca' zi' libí'ili'. Yúgu'të bönachi ulu'dí'i libí'ili' tu' dá'ali' neda', en ilútië' bál-lali' libí'ili'. <sup>10</sup> Cate' gaca caní, gaca chopá ládxi'gaca zían bönachi, en ulu'cá'ana neda', ate' udödi tu ia'tú luzë'e, en tu ia'tú udí'i luzë'e. <sup>11</sup> Ní'irö ulu'luí'i lógaquië' zían bönni' ta'zí' yë'ë. Ulu'luí'i cuíngaquië' ca yugu' bönni' tu'ë didza' uláz queë' Dios, en ila'zí' yé'enë' bönachi zían. <sup>12</sup> Iluá'ada' dö' bönachi, ate' que lë ni na'



bíti'rö ila'dxi'i böchi' luzé'eguequi. <sup>13</sup> Nu guequi tsaz queë' Dios ga idxintë dza údxi, nu ni ulá. <sup>14</sup> Idú yödzülió gaca libán que didza' dxi'a ca rinná bē'ë Dios para gaca ba nalí que lógaca yúgu'të bönachi izá'a, ate' ní'irö idxín dza údxi.

<sup>15-16</sup> 'Nu ulaba lë ni ral-la' uzéajni'i ladxi'. Gunnë' Daniel, bönni' bē'ë didza' uláz queë' Dios, gunnë': "Tsaza le rudí'inë' Dios lataj lá'ayi queë' Dios, lë na' rusuniti." Cate' ilé'eli' gaca caní, ní'irö nuli' zóali' luyú Judea ral-la' tsöjzxúnajli' saca' guí'ado'. <sup>17</sup> Nu dxía ícjo'olö biti' gal-la' huötaj tsöjzxí' bi dë que lu yu'u, pero ral-la' izxúnajtë. <sup>18</sup> Nu zoa la' guixi', biti' gal-la' huöaj tsöjzxí' lari' que. <sup>19</sup> Bica' bayechi' yugu' nigula si' ulu'zóanu bí'ido' quégacanu, enca' nigula ni' tu'gádxí'nu-bi' bí'ido' quégacanu cate' idxín dza ni'. <sup>20</sup> Buli'lidzë' Dios inábili'-në' cabí idxín dza ni' izxúnajli' cate' raca beo' ziaga o cate' naca dza lá'ayi, <sup>21</sup> tu' ila'guí' ila'záca'tërö bönachi dza ni' ca gula'guí' gula'záca' bönachi dza ni'te cate' si' guta' gurö'ö yödzülió, ga ridxintë na'a dza, en calëga dza zá'gaca biti' ila'guí' ila'záca' caní. <sup>22</sup> Cate' idxín dza ni', channö Dios biti' cuéqui lahuë' quégaquië', cuntu nu ulá, pero cuéqui lahuë' quégaquië' dza ni', en gácalenë' nupa gurö cazë' Lë'.

<sup>23</sup> 'Ní'irö biti' tséajlë'ëli' channö nu idxín queëli', en guíë libí'ili': "Buli'yútsöca', ni zoë' Cristo", o inná: "Ní' zoë'." <sup>24</sup> Ulu'luí' lógaquië' zían bönni' ta'z'í' yë'ë, en ila'nnë' nácagaquië' Cristo, o ila'nnë' tu'ë didza' uláz queë' Dios. Ilunë' le ilaca bē', en le ilún ga ulu'bani bönachi, ate' ila'z'í' yé'enë' nupa gurö cazë' Dios channö huala'zéqui'në'. <sup>25</sup> Buli'yútsöca', chigudxi caza' libí'ili' yúgu'të lë ni z'í'atëlö ca si' ilaca. <sup>26</sup> Que lë ni na', biti' irúajli' channö ila'dxín queëli' nupa ilë libí'ili': "Buli'yútsöca', ni' zoë' Cristo lu lataj cá'asö." Lësca' caní, biti' tséajlë'ëli' channö ila'nná: "Buli'yútsöca', lu yu'u zoë'." <sup>27</sup> Ca na' raca cate' rëpi yösa ga rilén gubidza, en ruzení' ga ribía gubidza, lësca' caní gaca cate' huöda' neda', Bönni' Guljë' Bönachi. <sup>28</sup> Ilácatë caní, ca na' ta'nná bönachi: "Gáti'tës ga dë tu le nati, ni' ulu'dubi cázaba' bíchulab."

*Ca gaca cate' huödë' Bönni' Guljë' Bönachi*

*(Mr. 13:24-37; Lc. 21:25-33; 17:26-30, 34-36)*

<sup>29</sup> Gunnë' ca' Jesús:

—Tödi yugu' dza ni' cate' ila'guí' ila'záca' bönachi caní, ichul-la gubidza, ate' beo' biti' gunna bení' que. Ila'guínnajba' böljaj lúzxiba, ate' ila'zxízi le nalá'gaca naca tsutsu lúzxiba. <sup>30</sup> Ní'irö ilá'lahui lúzxiba le gaca bē' huöda' neda', Bönni' Guljë' Bönachi, ate' ila'bödxí yechi' yúgu'të bönachi yödzülió ni, cate' ila'lé'e neda', Bönni' Guljë' Bönachi, suzá'a lu böaj lúzxiba, dë lu na'a yöl-la' unná bē', en yöl-la' huáca zxön. <sup>31</sup> Ní'irö isöl-la'gaca'në' gubáz lá'ayi quia'. Ulu'cödxë' zidzaj lúzuba' böa' guixi', ate'

ulu'tubē' nupa nabōa' quia', nacuá' idapa la'atē yōdzōlió, en yúgu'tē lataj zxan lúzxiba.

<sup>32</sup> 'Buli'zéajni'i ládxi'li' le rusedi libí'ili' le raca que yaga higo. Cate' ta'lén ni'a nē'e yúludo', en chirubía xilagui' yúludo', inōzili' chizóa idxín cusubá. <sup>33</sup> Lēscá' caní, cate' ilé'eli' taca yúgu'tē lē ni, inōzili' chizóa idxín dza údxi na', en chiridzaga lahui. <sup>34</sup> Le nácatē rea' libí'ili', yúgu'tē lē ni ilaca zí'atēlō ca ilátigaca bōnachi nacuá' dza ni'. <sup>35</sup> Huadōdi quégaca lúzxiba, en luyú ni, pero yugu' xtídza'a bití' ila'dōdi cá'asō.

<sup>36</sup> 'Cate' idxín dza ni' cuntunu nōzi. Bití' nōzguequinē' gubáz lá'ayi queē' Dios nacu'ē yehua' yubá, en bití' nōzda' neda', Zxí'inē' Dios, pero tuzē' Dios Xuz nōzinē'.

<sup>37</sup> 'Ca na' guca dza cate' ni' zoē' Noé, lēscá' caní gaca cate' huōda' neda', Bōnni' Guljē' Bōnachi. <sup>38</sup> Yugu' dza ni' zí'atēlō ca si' idxín nisa guiōj le busuniti yōdzōlió, gulē'aj gulahuē', bulu'tsaga ná'agaquiē', en bulu'dōdē' zxí'inigaquiē' lu yōl-la' rutsaga na' ga bidxintē dza guyáziē' Noé lē'e barco zxōn ni' benē', <sup>39</sup> en bití' gulēquibe'enē' cate' bidxintē nisa guiōj le busuniti yōdzōlió, atē' gula'nítiē' yúgu'tē'. Lēscá' caní gaca cate' si' huōda' neda', Bōnni' Guljē' Bōnachi, cuntunu guēquibe'e. <sup>40</sup> Dza huōda' ila'cu'ē chopē' bōnni' la' guixi'. Tuē' uchē'a-nē' quia', atē' ia'túē' ucá'ana'-nē'. <sup>41</sup> Ila'cuá'anu chópanu nigula nacuá'anu huētu. Tunu uchē'a-nu quia', atē' ia'tunu ucá'ana'-nu.

<sup>42</sup> 'Buli'subán ládxi'li' tu' cabí nōzili' bizxi dza huōda' neda', Xanli'. <sup>43</sup> Na'a, guli'tséajni'i lē ni. La'tu' nōzinē' xan yu'u bizxi dza guídē' gubán, huanē'ē yēla, en bití' gu'ē lataj nu quidaj zō'ō para cuan le dzō'ō lidxē'. <sup>44</sup> Que lē ni na', buli'subán ládxi'li' ca' libí'ili', tu' huōda' neda', Bōnni' Guljē' Bōnachi, tu dza bití' nuzóa icjali'.

*Bōnni' huen dxin tsahui', en bōnni' huen dxin bití' náquiē' tsahui'*

(Lc. 12:41-48)

<sup>45</sup> Gunnē' ca' Jesús:

—¿Nuzxi caz bōnni' huen dxin náquiē' tsahui', en réajni'inē', bōnni' huen dxin na', xanē' cu'ē lu nē'ē bōnachi nacuá' lidxē' para gu'ē le ilágugaca cate' idxín dza? <sup>46</sup> Bica' ba bōnni' huen dxin na' náquiē' tsahui', bōnni' na', cate' udxinē' xanē', uduxáquiē' lē' caní runē' le nudōdē' xanē' lu nē'ē. <sup>47</sup> Le nácatē rea' libí'ili', yúgu'tē le dē queē' xanē', udōdē' lu nē'ē bōnni' huen dxin na' runē' caní. <sup>48</sup> Channō huóáquiē' bōnni' huen dxin queē' huiá' dō', en sa' ládxi'ē, innē': "Huadzenē' xana', en bití' huódatiē'", <sup>49</sup> en channō isí lahuē' gundē' zi' bōnni' túnlenē' lē' tsōzōn dxin, en isí lahuē' ca' gu'aj gágulenē' nupa ta'zudxi, <sup>50</sup> ní'irō huōdē' xanē' bōnni' huen dxin na' tu dza

cate' biti' zoë' ribözë', o tu yëla biti' réquinë'. <sup>51</sup> Ní'irö xanë' na' usaca' zí'dë'ë bönni' huen dxin na', en gunë' ga gaca queë' ca na' ral-la' gaca quégaca nupa tu'lu'isö tshui' cuínguequi. Ní'irö cödxí yechë'ë, en gagu zxea láyë'ë.

## 25

*Rucúdzu'ë didza' Jesús ca naca quégacabi' chibi' bi'i nigula ra'bando'*

<sup>1</sup> Gunnë' ca' Jesús:

—Ca gaca quégaca nupa ila'yaza ga rinná bë'ë Dios yehua' yubá naca ca guca quégacabi' chibi' bi'i nigula ra'bando'. Gula'zí'ibi' le nuá'gaca guí' quégacabi', ate' bila'rúajbi' tsöjtságagacabi' bönni' utsaga në'ë. <sup>2</sup> Gáyu'bi' nácagacabi' bi'i biti' ta'yéajni'ibi' ate' ia'gáyu'bi' nasína'gacabi'. <sup>3</sup> Yugu' bi'i nigula biti' ta'yéajni'ibi' na' gula'zí'ibi' le nuá'gaca guí' quégacabi' pero biti' guluá'abi' ia'lati' za régui. <sup>4</sup> Yugu' bi'i sina' na' guluá'abi' za régui lu böga'do' quégacabi' len le nuá'gaca guí' quégacabi'. <sup>5</sup> Tu' gudzenë' bönni' utsaga në'ë, gudödi yëla lógacabi', en gulásitëbi'. <sup>6</sup> Cate' bidxín idú guluhuëla, biyön chi'i nu rinnë zidzaj, rna: “¡Chizë'ë bönni' utsaga në'ë! ¡Guli'rúaj tsöjtságali'-në'!” <sup>7</sup> Ní'irö gula'yásabi' yúgu'tëbi' bi'i nigula na', ate' bulu'pá'abi' le nuá'gaca guí' quégacabi'. <sup>8</sup> Gulu'í'ibi' didza' bi'i biti' ta'yéajni'ibi' na', en gulëbi' yugu' bi'i sina' na': “Guli'gunna queëtu' láti'do' za régui queëli' tu' tu'úlu le nuá'gaca guí' queëtu' ni.” <sup>9</sup> Bulu'bi'ibi' didza' bi'i sina' na', gula'nnabi': “Biti' gaca, tu' cabí bi ugá'ana queëtu', en queëli'. Guli'tséajtsöca' ga ridó'o za régui, tsöj'ö'uli' queëli'.” <sup>10</sup> Tsanni ni' söjácabi' söjxi'gacabi' le, bidxinë' bönni' utsaga në'ë. Yugu' bi'i na' nacuá'abi' sina', en ta'bözabi' lë' gula'yú'ulentëbi' lë' ga na' raca laní que utsaga na', ate' la' guyáyajtë yu'u. <sup>11</sup> Gudödi ni' ia'zíca'röbi' bi'i nigula ra'bando' na' bila'dxinbi' ni', ate' bulu'lídzabi'-në', en gula'nnabi': “Xan, Xan, gusalaj queëtu'.” <sup>12</sup> Lë' bubí'ë didza', rnnë': “Le nácatë rea' libí'ili', biti' nözda' gazxi libí'ili'.”

<sup>13</sup> Ní'irö Jesús gudxë' légaquië':

—Buli'subán ládxi'li', tu' cabí nözili' bizxi dza o bizxi yëla huöda' neda', Bönni' Guljé' Bönachi.

*Rucúdzu'ë didza' Jesús ca naca que dumí zaca'*

<sup>14</sup> Gunnë' ca' Jesús:

—Ca gun Nu na' rinná bë' yehua' yubá naca ca benë' tu bönni', chizóa tsejé' zi'tu'. Bulidzë' yugu' bönni' huen dxin queë' en gulu'ë yugu' le dë queë' lu ná'agaquië'.

<sup>15</sup> Tuë' bönni' huen dxin na', gulu'ë gayu' dumí nazaca' lu në'ë, ate' ia'túë' gulu'ë chopa dumí nazaca' lu në'ë. Ia'túë' gulu'ë tu dumí nazaca' lu në'ë. Tu tuë' gulu'ë lu në'ë tsca huéaj

le ila'zéqui'né. Ní'irö la' guzá'atè' ga naca zi'tu'. <sup>16</sup> Guyijè' bönni' huen dxin na' guzxi'è gayu' dumí nazaca' na', en yöjtíljalenè' le ia'gayu' dumí nazaca'. <sup>17</sup> Lësca' caní, bönni' na' guzxi'è chopa dumí na', yöjtíljalenè' le ia'chopa ca'. <sup>18</sup> Bönni' na' guzxi'è tu dumí guyijè', en yöjchö'önè' lu yu, ate' bucháché'è dumí queé' xané' lu yu ni'.

<sup>19</sup> 'Cate' chigudzé, budxinè' xángaquiè' bönni' huen dxin na', ate' bucá'analénè' légaquiè' tsahui'. <sup>20</sup> Ga gusí lo bidxintè' bönni' na' guzxi'è gayu' dumí nazaca' na', en sunu'è ia'gayu' dumí ca', ate' rè' xané': "Xan, gayu' dumí gulú'u lu na'a. Ni dè ia'gayu' dumí ca' yöjtíljalena' le." <sup>21</sup> Xané' na' rè' lè': "Naca dxi'a. Nacu' huen dxin tsahui'. Tsáhui'do' benu' cate' ni dè lu no'o láti'do'os. Na'a yénni'tèrö cu'a lu no'o. Guyaza ga zoa', udzéjalenu' neda'." <sup>22</sup> Gudödi ni' bidxinè' ca' bönni' huen dxin na' guzxi'è chopa dumí nazaca', ate' rnnè': "Xan, chopa dumí gulú'u lu na'a. Ni dè ia'chopa dumí ca' yöjtíljalena' le." <sup>23</sup> Ní'irö xané' na' rè' lè': "Naca dxi'a. Nacu' huen dxin tsahui'. Tsáhui'do' benu' cate' ni dè lu no'o láti'do'os. Na'a, yénni'tèrö cu'a lu no'o. Guyaza ga zoa', udzéjalenu' neda'." <sup>24</sup> Ní'irö cate' bidxinè' bönni' huen dxin na' guzxi'è tu dumí nazaca' na', rnnè': "Xan, nözda' nacu' bönni' bizxaj, tu' rulapu' ga bití' guzu', en rutubu' ga bití' guchilju'. <sup>25</sup> Que lè ni na' gúdxida' li', ate' guyija', yöjcácha'a dumí quiu' lu yu. Ni dè na'a le nequi quiu'." <sup>26</sup> Ní'irö bubi'è didza' xané', en rè' lè': "Nacu' huen dxin bití' naca tsahui', en xöhuédi. Nöz quézinu' rulapa' ga bití' guza', en rutuba' ga bití' guchilja'. <sup>27</sup> Que lè ni na', gácarö dxi'a quiu' la'tu' bunödzu' dumí quia' lu ná'agaquiè' bönni' ulu'gunè' le dxin, ila'guíljalenè' le ia'lati', para cate' huöda' neda', uzi'a le nequi quia' len icja ca'." <sup>28</sup> Ní'irö xané' na' gudxè' nupa naca' ni': "Guli'cúa dumí na' dè lu nè'è bönni' ni, en guli'cú'u le lu nè'è bönni' na' dè queé' chi dumí." <sup>29</sup> Núti'tès nu rugún tsahui' dxin le dè queé', zoa nu unödzej queé' ia'lati', ate' gáta'da' queé', pero nu na' bití' rugún tsahui' dxin le dè lu nè'e, la's dui le dè queé' idúa. <sup>30</sup> Na'a, bönni' huen dxin bití' naca tsahui' ni, guli'tsöjchú'una-nè' ní'ilö ga naca chul-la. Ni cödxí yéché'è, en gagu zxea láyè'è.

*Cristo uchi'a usöröè' quégaca bönachi*

<sup>31</sup> Gunnè' ca' Jesús:

—Cate' ni' huöda' neda', Bönni' Guljè' Bönachi, idinná bē'a, ate' dzágagaquiè' neda' yúgu'tè gubáz lá'ayi quia', ní'irö cö'a lataj tsahui' quia', ga na' uchi'a usöröa' quégaca bönachi. <sup>32</sup> Ulu'dubi dèrö lahua' neda' bönachi yödzölió ni, ate' ucu'a léguequi tsölá'a huéaj ca runè' bönni' uyú bö'cu' zxila', rucu'è-ba' tsölá'a huéajba' yugu' chivo, en yugu' bö'cu' zxila'. <sup>33</sup> Yugu' bö'cu' zxila' na' ucu'è-ba' cuita lè'è ibèla, ate' yugu' chivo na'

ucu'ë-ba' cuita lë'ë yögöla. <sup>34</sup> Ní'irö, neda', bönni' unná bë', guía' nupa nacuá' cuita lë'a ibëla, innía': "Guli'dá ga zoa', libí'ili' bubéajë' Xuza' libí'ili' quez queë'. Nequi queéli' lataj ga na' rinná bë'ë, lë na' bupë'ë queéli' dza ni'te cate' ni' benë' yödzoilió. <sup>35</sup> Caní nequi queéli' tu' guduna', ate' bénnali' le gudahua'. Gubidxa' nisa, ate' bénnali' le gu'a. Guca' ca tu bönni' ridá zi'tu', ate' gulú'uli' neda' lídxili'. <sup>36</sup> Biyadzaj le gácua', ate' bugáculi' neda' le ráculi'. Güí'ida', ate' buduyúli' neda'. Guyu'a lidxi guíë, ate' buduyúli' neda'." <sup>37</sup> Ní'irö ulu'bi'ë didza' bönni' tsahui' na', ilë' neda': "Xan, ¿bátaxi bilé'etu' Li' gudunu', ate' bugágutu' Li'? ¿Bátaxi gubidxu', ate' bénnatu' le gu'u? <sup>38</sup> ¿Bátaxi bilé'etu' Li' gudó' zi'tu', ate' gulú'utu' Li' lídxitu'? ¿Bátaxi biyadzaj le gacu', ate' bugácutu' Li' le rácutu'? <sup>39</sup> ¿Bátaxi bilé'etu' Li' güí'inu', o guyú'u lidxi guíë, ate' buduyútu' Li'?" <sup>40</sup> Ubi'a didza' neda', bönni' unná bë', ate' guía' légaquië': "Le nácatë rea' libí'ili', tu' benli' caní queë' nu bönni' bócha'ado' ni, sal-la' náquië' bönni' cá'asö, quia' neda' caz benli' ca'."

<sup>41</sup> Ní'irö guía' nupa nacuá' cuita lë'a yögöla, innía': "Guli'cuíta ga zoa', libí'ili' na' nabága'li' xíguia', tsöjtsázali' lu guí' na' biti' ulu, lë na' bupë'ë Dios ni'a que tu' xihui', en quéguequi gubáz dá'gaca le. <sup>42</sup> Caní gaca queéli' tu' guduna', ate' biti' bénnali' le gahua'. Gubidxa' nisa, ate' biti' bénnali' le guí'ja'. <sup>43</sup> Guca' ca bönni' ridé' zi'tu', ate' biti' gulú'uli' neda' lídxili'. Biyadzaj le gácua', ate' biti' bugáculi' neda' le ráculi'. Güí'ida', enca' guyu'a lidxi guíë, ate' biti' buduyúli' neda'." <sup>44</sup> Ní'irö ila'nná ca' nupa na', ilë' neda': "Xan, ¿bátaxi bilé'etu' Li' gudunu', o gubidxu', o gucu' ca bönni' ridé' zi'tu', o biyadzaj le gacu', o güí'inu', o guyú'u lidxi guíë, ate' biti' gúcalentu' Li'?" <sup>45</sup> Ní'irö ubi'a didza' neda', bönni' unná bë', guía' légaquië': "Le nácatë rea' libí'ili', tu' cabí bi benli' que tu nu nutsa' ladaj nupa nacuá' ni, sal-la' naca cá'asö nu na', biti' bi benli' quia' neda'." <sup>46</sup> Ní'irö bönachi tuá' dö' na' la' tsöjtsázagacatë ga ni' ila'gu'i ila'záca'tica'sö, pero bönachi tsahui' ni' gata' yöl-la' na'bán idú quéguequi.

## 26

*Tun xtí'dza'gaquië' bönni' yudo' ila'zönë' Jesús*  
(Mr. 14:1-2; Lc. 22:1-2; Jn. 11:45-53)

<sup>1</sup> Cate' budxi bë'ë Jesús yugu' didza' ni, gudxë' yugu' bönni' usëda queë', <sup>2</sup> rnnë':

—Nöz quézili' ia'chopa dza idxín Laní Pascua, ate' dza na' neda', Bönni' Guljë' Bönachi, ulu'dödë' neda' lu ná'agaca nupa ulu'dá' neda' lë'e yaga cruz.

<sup>3</sup> Ní'irö bila'dxinë' yugu' bixúz unná bë' len yugu' bönni' yudo' usedi, en bönni' gula tu'zéajni'inë' bönachi judío, ate'

bulu'dubë' ga naca lö'a lidxi bixúz lo, lë' Caifás. <sup>4</sup> Ni' gulún xtídza'gaquië' ila'zönë' Jesús, lu yöl-la' rizi' yë' quégaquië', para ilútië' Lë'. <sup>5</sup> Ta'nnë':

—Biti' gunru' lë ni dza laní, para cabí ila'dzatsa bönachi.

*Tu nigula rigú'unu le rilá' zxixi icjë' Jesús*

*(Mr. 14:3-9; Jn. 12:1-8)*

<sup>6</sup> Cate' ni' zoë' Jesús lu yödzo Betania lu yu'u lidxë' Simón, bönni' na' gü'inë' huë' nudzu' ruzödi, <sup>7</sup> bidxinnu cúdzulë' Jesús tu nigula, nuá'anu tu böga'do' néquini guiöj nazaca', en yudzu tu le rilá' zxixi le nazáca'da', ate' gulú'unu le icjë' Jesús cate' ni' rö'ë rahuë'. <sup>8</sup> Cate' bila'lé'enë' bönni' usëda queë' Jesús lë ni, gula'lenë', ta'nnë':

—¿Bizx que réqui ditaj lë ni? <sup>9</sup> Guca nu guti' lë ni, en si' dumí zían para gácalenru' yugu' bönachi yechi'.

<sup>10</sup> Cate' biyönnë' Jesús lë ni, rë' légaquië':

—¿Bizx que rnnëli' queënu nigula ni? Tsahui' naca le bennu quia'. <sup>11</sup> Yugu' bönachi yechi' ila'cuá'lentica'sö libí'ili', pero neda' biti' ugá'analentica'sa' libí'ili'. <sup>12</sup> Le bennu nigula ni, gulú'unu neda' le rilá' zxixi ni, naca le rupá'anu neda' para dza igácha'a yeru ba. <sup>13</sup> Le nácatë rea' libí'ili', gátitës luyú yödzo'lió ga gaca libán que didza' dxi'a ni, lësca' ila'guixjö' bönachi le bennu nigula ni quia' para nu tsöjné lënu.

*Rizi' lu në'ë Judas udödë' Jesús lu ná'agaquië' bönni' unná bë'*

*(Mr. 14:10-11; Lc. 22:3-6)*

<sup>14</sup> Ní'irö guyijë' Judas Iscariote ga na' nacu'ë bixúz unná bë'. Náquië' bönni' dzáguië' chinnuë' na' dá'gaquië' Jesús, <sup>15</sup> ate' gudxë' légaquië':

—¿Bizxi gúnnali' quia' channö neda' udöda'-në' Jesús lu ná'ali'?

Bulu'gá'analënë' lë' tsahui' ilu'ë lë' chi uruá' dumí plata. <sup>16</sup> Ní'irö gusí lahuë' Judas na' risí ribö'ë udödë' Jesús lu ná'agaquië'.

*Le ráguru' le rusá' ládxi'ru' ca gútië' Xanru'*

*(Mr. 14:12-25; Lc. 22:7-23; Jn. 13:21-30; 1Co. 11:23-26)*

<sup>17</sup> Cate' naca dza risí lo laní quégaquië' bönni' judío cate' tahuë' yöta xtila le cabí nazí'i cúa zi que, gula'bígui'ë bönni' usëda queë' Jesús ga zoë', en të' Lë':

—¿Gazxi ré'ënu' tsöjpa'atu' queëru' para gáguru'-ba' bö'cu' zxíla'do' dzö' Laní Pascua?

<sup>18</sup> Jesús rë' légaquië':

—Guli'tséajtsöca' yödzo ni' ga na' zoë' tu bönni', en guli'guië': “Bönni' rusédinë' netu' rnnë': Chizá' gala' dza quia'. Lu yu'u lidxu' gágulengaca'-në' bönni' usëda quia' bö'cu' zxíla'do' dzö' Laní Pascua.”

19 Ní'irö gulunë' bönni' usëda queë' ca na' gunná bé'enë' Jesús légaquië', ate' bulu'pë'ë le ilahuë' dzö' Laní Pascua.

20 Cate' chigudzö' dza na', Jesús gurö'lenë' idxínnutë' bönni' usëda queë' tahuë'. 21 Tsanni ni' tahuë', Jesús rë' légaquië':

—Le nácatë rea' libí'ili', tu nu nutsa' ládjali' ni udödi neda'.

22 Ní'irö bulu'huí'ini ládxi'gaquië', en gula'nábinë' Jesús tu tuë', ta'nnë':

—Xan, ¿naru' neda'?

23 Bubi'ë didza' Jesús, rnnë':

—Bönni' ni runë' në'ë tsözxön len na'a lu yö'öna, bönni' ni udödë' neda'. 24 Le nácatë neda', Bönni' Guljë' Bönachi, uyija' ga gátia' ca na' nazúaj lu guichi lá'ayi ca ral-la' gaca quia', pero bica' bayechi' nu na' udödi neda' gátia'. Gácarö dxi'a queë' bönni' na' la' cabí guljë'.

25 Ní'irö bubi'ë didza' Judas, bönni' na' udödë' Jesús, rnnë':

—Bönni' Usedi, ¿naru' neda'?

Jesús rë' lë':

—Ön, lí' na'.

26 Tsanni ni' tahuë', gudélë'ë Jesús yöta xtila, en gudxë' Dios: "Xclenu'." Ní'irö buzzuzxjë' le, en bunödzjë' quégaquië' bönni' usëda queë', rnnë':

—Guli'sí', guli'gagu. Lë ni le naca caza'. Ca bena' que yöta xtila ni ruluí' ca gaca que le naca caza'.

27 Gudélë'ë ca' tu zxi'ga'do', en gudxë' Dios: "Xclenu'." Ní'irö bunödzjë' ca' quégaquië', rnnë':

—Guli'gui'aj yúgu'tëli'. 28 Lë ni ruluí' ca naca xichöna' le run tsutsu didza' cubi rucá'ana tsahui'. Xichöna' na' ilalaj ni'a quégaca bönachi zián para gaca uniti lahuë' Dios yugu' dul-la' nabága'gaquië'. 29 Rea' ca' libí'ili', bíti'rö guí'ja' xisi le ribía lubá uva ni cate' idxinrö dza ni' guí'jalena' libí'ili' tu le cubi ga ni' rinná bë'ë Xuza'.

*Jesús rnnë' innë' Pedro biti' núnbë'ë Lë'*

*(Mr. 14:26-31; Lc. 22:31-34; Jn. 13:36-38)*

30 Cate' budxi gulúl-lë' yöl-la' ba queë' Dios, yöjáquië' lu Guí'a Yaga Olivo. 31 Ní'irö Jesús rë' légaquië':

—Yúgu'tëli' gaca chopa ládxi'li', en ucá'anali' neda' na'a dzö' ni, tu' nazúaj lu guichi lá'ayi ca gaca quia', le rnna: "Guna' ga gátie' Bönni' Uyú Bö'cu' Zxila', ate' ilásilasiba' bö'cu' zxila' na'."

32 Cate' ubana' lu yöl-la' guti, ní'irö tséaja' tsöjnörua' loli' saca' luyú Galilea.

33 Ní'irö bubi'ë didza' Pedro, en rë' Jesús:

—Sala' ilaca chopa ládxi'gaquië', en ulu'cá'anë' yúgu'të' Lí', neda' biti' gaca chopa ládxa'a, biti' ucá'ana' Lí'.

34 Jesús gudxë' lë':

—Le nácatë rea' li', na'a dzö' ni, cate' si' cödxilöba' böra, li' innó' tsonna luzuí bití' núnbë'u neda'.

<sup>35</sup> Ní'irö Pedro gudxë' Jesús:

—Sal-la' gátilentea' Li', bití' ca' innía' bití' núnbë'a Li'.

Lësca' caní gula'nnë' yúgu'të bönni' usëda queë'.

*Jesús rulidzë' Dios la' yëla Getsemaní*

(Mr. 14:32-42; Lc. 22:39-46)

<sup>36</sup> Ní'irö Jesús bidxínlenë' légaquië' la' yëla Getsemaní, ate' gudxë' yugu' bönni' usëda queë' na', rnnë':

—Guli'cö'tsöca' ni tsanni tséaja' ia'lati' ní'ilö, tsöjlidza'-në' Dios.

<sup>37</sup> Jesús guchë'ë Pedro len iropë' zxi'inë' Zebedeo, ate' gusi lahuë' ruhu'innë', en risëbi ládxe'ë. <sup>38</sup> Ní'irö Jesús gudxë' légaquië':

—Ruhuí'ini ládxa'a, en huáti caza' lu yöl-la' risëbi ladxi'. Guli'gá'ana ni, en guli'ná' yëla tsözxön len neda'.

<sup>39</sup> Gudödë' Jesús ia'láti'do' ní'ilö, ate' ni' biyéchuë'. Busudxín lahuë' lu yu, en bulidzë' Dios, gunnë':

—Xuza', channö huáca, ben ga bití' gun bayudxi qui'i saca'a lë ni, calëga ca rë'ënda' neda', pero ca rë'ënu' Li' gunu'.

<sup>40</sup> Cate' budxinë' Jesús ga na' nacué bönni' usëda queë', yöjxáquië' légaquië' tasië', ate' rë' Pedro:

—¿Naru' cabí gúcatsö iná'alenu' neda' tsözxön yëla tu chí'ido'? <sup>41</sup> Guli'ná' yëla, en buli'lidzë' Dios inábili'-në' gácalenë' libí'ili', para cabí gü'ili' Satanás tu' xihui' lataj si' bë' libí'ili' le xihui'. Bö' naca cázali' nasína'tica'sö, pero lu yöl-la' bönáchisö queëli' nacuí'di'li'.

<sup>42</sup> Ní'irö guyijë' Jesús le buropi luzuí, en bulidzë' Dios, rnnë':

—Xuz, channö cabí gaca gunu' ga bití' qui'i saca'a lë ni, ben ca raza ládxi'u Li'.

<sup>43</sup> Cate' böajë', leyúbölö buduxaquië' légaquië' tasië' tu' nadödirö yëla guiöj lógaquië'. <sup>44</sup> Ní'irö bucá'anë' Jesús légaquië', ate' guyijë' leyúbölö, en bulidzë' Dios le bunní luzuí, ate' tuz ca gunné' zí'alö rnnë'. <sup>45</sup> Leyúbölö böajë' ga na' nacué bönni' usëda queë', en rë' légaquië':

—¿Rásitsali' na'a, en ruzi'tsö ládxi'li'? Buli'yútsöca', chibudzaga lo. Neda', Bönni' Guljë' Bönachi, chinadöda' lu ná'agaquië' bönni' dul-la'. <sup>46</sup> ¡Guli'chasa, uyéajru'! Buli'yútsöca', bönni' na' rudödë' neda' chibidxinë' ni.

*Ta'chë'ë Jesús nadzunë'*

(Mr. 14:43-50; Lc. 22:47-53; Jn. 18:2-11)

<sup>47</sup> Tsanni ni' ru'ë Jesús didza' ni, Judas, bönni' nabábalenë' idxínnutë' na', la' bidxintë' ni', ate' dzágagaquië' bönni' zían lë', nuá'agaquië' guié tuchi', en yugu' yágado'. Yugu' bixúz unná bë', en bönni' gula tu'zéajni'inë' bönachi judío nasöl-la'gaquië'



légaquië'. <sup>48</sup> Judas, bönni' na' rudödë' Jesús, chibulu'ínë' légaquië' tu le gunë' le gaca bë' nu naca Jesús, gunnë':

—Bönni' na' utsaga lahua'-në', Lë' na' Jesús. Guli'sönë'.

<sup>49</sup> Ní'irö gubígui'ë Judas ga na' zoë' Jesús, rnnë':

—Padiux, Bönni' Usedi.

Ní'irö la' busudxín lotë' Lë'. <sup>50</sup> Jesús rë' lë':

—Böcha'a, ¿bizxi huen zo'o ni?

Ní'irö gula'biguë'ë bönni' na', ate' gula'zönë' Jesús. <sup>51</sup> Tuë' bönni' dzáguië' Jesús gulecjë' guíë tuchi' queë', en benë' huë', guchúguië' guídi náguië' bönni' huen dxin queë' bixúz lo. <sup>52</sup> Jesús gudxë' lë':

—Bugú' guíë tuchi' quiu' lidxi. Yúgu'të nupa tu'dí'ini guíë tuchi', lu guíë tuchi' ílátigaca. <sup>53</sup> ¿Naru' cabí nõzinu' huáca ulidza' Xuza', ate' Lë' la' isól-la'të' zióntërö ca chinnu cö' gubáz lá'ayi le naca zían gáyu'ë tu cö' huéaj? <sup>54</sup> Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

<sup>55</sup> Ní'irö Jesús gudxë' yugu' bönni' ni':

—¿Birúajtsali' nuá'ali' guíë tuchi', en yágado' para sönli' neda' ca runli' rizönlí'-në' gubán? Yugu' dza gurö'a loli' ga naca lu chila yudo', en busédigacada' bönachi, pero biti' guzxonli' neda'. <sup>56</sup> Raca caní yúgu'të lë' ni para udxín le nazúaj lu guichi lá'ayi, ca na' gula'nnë' bönni' gulu'ë didza' uláz queë' Dios.

Ní'irö yúgu'të bönni' usëda queë' Jesús bulu'cá'anë' Lë', en bulu'zxúnnajë' ni'.

*Ridxinë' Jesús lógaquië' bönni' yudo'*

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup> Ní'irö yugu' bönni' na' zöngaquië' Jesús gula'ché'ë Lë', ate' bila'dxinë' lahuë' Caifás, bixúz lo, ga ni' nudúbigaquië' ca' yugu' bönni' yudo' usedi len bönni' gula tu'zéajni'ínë'. <sup>58</sup> Pedro sójnáhuë' Jesús zítu' zítu'sö, en bidxinë' ga naca lö'a lidxi bixúz lo na', para ilé'enë' nacxi utságuië' Jesús.

<sup>59</sup> Yugu' bixúz unná bë' len bönni' gula tu'zéajni'ínë', en bönni' yudo' tu'chi'a tu'söröë', bulu'guiljë' nu uzegui Jesús didza' sal-la' si' yë'ë bönni' na', para gaca ila'chúguië' queë' gátie'. <sup>60</sup> Cuntu nu bila'dzölinë' sal-la' bila'dxinë' bönni' zían, en gula'nnë' queë' le cabí nácatë. Ga búdxitë bila'dxinë' chopë' bönni', ate' lu yöl-la' rizí' yë' quégaquië' gula'nnë' queë', <sup>61</sup> ta'nnë':

—Bönni' ni gunnë': "Huaca uquínna' yudo' queë' Dios, ate' uchisa' le ia'tsonna dzasö."

<sup>62</sup> Ní'irö guzuínë' bixúz lo na', en rë' Jesús:

—¿Naru' cabí rubí'tso' didza'? ¿Bizxi caz lë' ni ta'nnë' bönni' ni quiu'?

<sup>63</sup> Jesús biti' bi gunnë'. Ní'irö bixúz lo gudxë' Lë':

—Ni'a queë' Xanru' Dios ban rinná bé'eda' Li' quíxjö'u le nácatë. Gudíxjö'i netu' channö nacu' Li' Cristo, Zxí'inë' Dios.

<sup>64</sup> Jesús rë' lë':

—Ca na' rnno' naca'. Le nácatë rea' libí'ili', ilé'eli' neda', Bönni' Guljé' Bönachi, rö'a cuita lë'ë ibëla Dios, ga ni' dë lu na'a yöl-la' unná bë', ate' guída' lu böaj lúzxiba, en idxina' ga zóali'.

<sup>65</sup> Ní'irö lu yöl-la' rilé queë' guchözë' bixúz lo lari' nácuë', rnnë':

—¡Gunnë' zi'ë bönni' ni queë' Dios! ¿Núzxirö naquíniru' nu innë queë' bönni' ni? Chibiyön quézili' didza' zi' bë'ë queë' Dios. <sup>66</sup> ¿Nacxi rusáca'li' queë'li'?

Bulu'bi'ë didza', gula'nne':

—Nabáguë'ë xíguia' gátie'.

<sup>67</sup> Ní'irö bulu'chejë' zxöna' lahuë' Jesús, en gulu'ë dö' queë'. Gula'gápë'ë ru'ë Jesús ia'zica'rë', <sup>68</sup> en të' Lë':

—¿Nácatso' Li' Cristo? Gunnëya'atsöca' na'a, ¿nuzxi na' gu-dapa' Li'?

*Pedro rnnë': "Biti' núnbë'a-në' Jesús"*

*(Mr. 14:66-72; Lc. 22:56-62; Jn. 18:15-18, 25-27)*

<sup>69</sup> Tsanni ni' gulaca lë na', rö'ë Pedro lö'alö, ate' bidxinnu tunu nigula huen dxin ga na' zoë', ate' rnnanu:

—Lësca' li' gudálenu' Jesús, bönni' Galilea na'.

<sup>70</sup> Gudá'baguë'ë Pedro lógaca bönachi nacua' ni', rnnë':

—Biti' nözda' nuzxi que na' ru'u didza'.

<sup>71</sup> Cate' birúajë' Pedro ga nu riyaza lö'a, bilé'enu-në' ia'tunu nigula, ate' gúdxinu nupa nacua' ni':

—Bönni' ni gudálenë' ca' Jesús, bönni' Nazaret na'.

<sup>72</sup> Leyúbölö gudá'baguë'ë Pedro, en buzötjé' Dios, rnnë':

—Biti' ca' núnbë'a-në' bönni' ni.

<sup>73</sup> Já'láti'do'os gudzé, gula'biga' nupa nacua' ni' ga na' zoë' Pedro, en të' lë':

—Le nácatë li' nunu' ca' tsözxön légaquië' tu' naca bë'u yöl-la' ru'isö quiu' didza'.

<sup>74</sup> Ní'irö gusí lahuë' Pedro rudxía dö' cuinë', en ruzötjé' Dios, rnnë':

—Biti' ca' núnbë'a-në' bönni' ni.

La' ná'asö gurödxitëba' böra. <sup>75</sup> Ní'irö yöjnenë' Pedro didza' gudxë' Jesús lë', gunnë': Cate' si' cödxilöba' böra, tsonna luzuí chigunnó' bití' núnbë'u neda', ate' burúajë' Pedro ni', en gurödxí yéchi'dë'ë.

## 27

*Tu'dödë' Jesús lu në'ë Pilato*

*(Mr. 15:1; Lc. 23:1-2; Jn. 18:28-32)*

<sup>1</sup> Cate' za' rení' dza na', gulún xtídza'gaquië' yúgu'të bixúz unná bē' len bönni' gula tu'zėjni'inē' bönni' judío para ilútiē' Jesús. <sup>2</sup> Gula'chē'ē Jesús náguē'ē, ate' bulu'dödē' Lē' lu nē'ē Poncio Pilato, bönni' rinná bē'ē uláz que yödzo Roma.

### *Ratiē' Judas*

<sup>3</sup> Cate' chinözinē' Judas, bönni' na' budödē' Jesús lu ná'agaquiē' bönni' yudo', narugu queē' Jesús gátie', bu'innē', ate' yöju'ē chi uruá' dumí plata na' lu ná'agaquiē' bixúz unná bē', en yugu' bönni' gula na'. <sup>4</sup> Rē' légaquiē':

—Bena' dul-la' tu' budöda'-nē' bönni' tsahui' gátie'.

Ní'irö tē' lē':

—Biti' gun lē ni ga cō'ötu' böniga. Le ben cazu' li' na'.

<sup>5</sup> Ní'irö gurú'unē' Judas yugu' dumí plata na' ga naca chila yudo', ate' buzē'ē ni', en yöjsi yenē'.

<sup>6</sup> Bulu'zi'ē bixúz unná bē' yugu' dumí plata na', ta'nnē':

—Biti' sa'yéaj cú'uru' dumí ni ga rigú'uru' dumí que yudo', tu' naca lazxjē' tu bönni' ratiē' bönachi.

<sup>7</sup> Ní'irö gulún xtídza'gaquiē', ate' gulá'uinē' dumí na' tu la'yēla queē' tu bönni' huen rö'ö para gaca ga ila'gáchē'ē bönni' zi'tu'. <sup>8</sup> Que lē ni na', ga ridxintē na'a dza nazi'i le lataj na', La' Yēla Rön. <sup>9</sup> Caní guca ca na' gunnē' Jeremías, bönni' bē'ē didza' uláz queē' Dios, gunnē': "Gula'guélē'ē chi uruá' dumí plata na', tsca le gula'zėjni'nē' bönni' Israel Lē', <sup>10</sup> ate' dumí na' gulá'uinē' la'yēla queē' tu bönni' huen rö'ö. Lē ni bulu'inē' Xana' neda'."

### *Ridxinē' Jesús lahuē' Pilato*

(Mr. 15:2-5; Lc. 23:3-5; Jn. 18:33-38)

<sup>11</sup> Cate' bulu'sudxinē' Jesús lahuē' Pilato, bönni' na' rinná bē'ē uláz que yödz Roma, bönni' ni gunábinē' Jesús, rē' Lē':

—¿Nacu' Li' Bönni' inná bé'enē' bönachi judío?

Jesús rē' lē':

—Ca nácasö rnno'.

<sup>12</sup> Cate' yugu' bixúz unná bē' len bönni' gula tu'zėjni'inē' bulu'zėjni'ē Jesús didza', biti' bi didza' bubí'ē Jesús. <sup>13</sup> Ní'irö Pilato rē' Jesús:

—¿Naru' cabí riyöntsenu' cate' xö le ta'nnē' quiu'?

<sup>14</sup> Jesús biti' bi didza' bubí'ē. Caní guca, bubáninē' bönni' unná bē' na'.

### *Rirugu queē' Jesús gátie'*

(Mr. 15:6-20; Lc. 23:13-25; Jn. 18:38-19:16)

<sup>15</sup> Cate' naca dza Laní Pascua na', dē caz tu le runē' Pilato, bönni' unná bē' na', ca ta'naba bönachi rusanē' tuē' bönni' yu'ē lidxi guíē, nütí'tēs nu té'ēni usanē'. <sup>16</sup> Dza na' tu bönni' nabáguē'ē xíguia', lē' Barrabás, yu'ē lidxi guíē ni'. <sup>17</sup> Cate'

bulu'dubi bönachi zían ni', Pilato gunábinë' légaquië', rnnë': — ¿Nuzxi rë'ënili' usana' queëli'? ¿Naru' Barrabás o Jesús, Bönni' na' lë' Cristo?

<sup>18</sup> Caní gunné' Pilato tu' réquibe'enë' bulu'dödë' bönni' yudo' Jesús lu në'ë tu' tu'zxé'enë' Lë'.

<sup>19</sup> Tsanni ni' rë'ë Pilato ga na' ruchi'a rusöröë', nigula queë' gusöl-la'nu nu tsöjödxi lë', rna:

—Biti' bi gunu' queë' bönni' tsahui' ni, tu' gúdxide'eda' guduyëla lu yëla bëchigal tu' nözinë' Lë'.

<sup>20</sup> Yugu' bixúz unná bë' len bönni' gula tu'zëajni'inë' gula'gú'u yöl-lë'ë bönachi zían na' para ila'nabi Pilato usanë' Barrabás na', ate' gútië' Jesús. <sup>21</sup> Leyúbölö bë'ë didza' bönni' unná bë' na', rë' légaquië':

—¿Núzxilë' chopë' ni rë'ënili' usana'-në' queëli'?

Gula'nnë':

—Barrabás.

<sup>22</sup> Ní'irö Pilato gunábinë' légaquië', rnnë':

—¿Nacxi guna' queë' Jesús, bönni' na' lë' Cristo?

Yúgu'të' ta'nnë':

—¡Budë'ë lë'e yaga cruz!

<sup>23</sup> Ní'irö bönni' unná bë' na' rë' légaquië':

—¿Bizxi dö' benë'?

Zídzajrö gulu'ë didza', ta'nnë':

—¡Budë'ë lë'e yaga cruz!

<sup>24</sup> Cate' réquibe'enë' Pilato biti' birúaj xtídzë'ë, pero gula'dzátsarö bönachi, ní'irö gudélë'ë nisa, en gudibi në'ë lógaquië', rnnë':

—Biti' bi xíguia' nabága'a neda' tu' nözi yöl-la' guti queë' bönni' tsahui' ni. Le gun cázali' libí'ili' lë ni.

<sup>25</sup> Bulu'bí'i didza' yúgu'të bönachi ni', ta'nná:

—¡Yöl-la' guti queë' bönni' ni ibága'tu' netu', en ila'baga' ca' xzí'initu'!

<sup>26</sup> Ca' guca, Pilato busanë' Barrabás na' lu ná'agaquië'. Ní'irö gunná bé'enë' bönni' röjáquië' gudil-la ila'guínë' Jesús, ate' gudödi ni' budödë' Lë' lu ná'agaquië' para ulu'dë'ë Lë' lë'e yaga cruz.

<sup>27</sup> Yugu' bönni' röjáquië' gudil-la nacu'ë lu në'ë bönni' unná bë' na' gula'chë'ë Jesús lu yu'u yúlahui' nazí'i le pretorio, ate' ni' bulu'tubë' yúgu'të bönni' röjáquië' gudil-la nacu'ë ni' ga na' zoë' Jesús. <sup>28</sup> Ní'irö gula'lecjë' lari' nácuë' Jesús, en bulu'gácuë' Lë' tu lari' xiná chul-la, ca rácu gaca nupa ta'nná bë'. <sup>29</sup> Bulu'dxíë' icjë' tu le néquini ni'a në'e yaga yötsi' le naca ca le dxia icjë' bönni' rinná bë'ë, en bulu'zóë' tu guído' lu në'ë ibëla le ruluí'i ca tu yaga que bönni' yúlahui'. Ní'irö bulu'zóa xzibë' lahuë', en bulu'titjë' Lë', ta'nnë':

—¡Bica' ba Li', rinná bé'enu' bönachi judío!

<sup>30</sup> Ní'irö bulu'chejë' Lë' zxöna', ate' bulu'guélë'ë gui na', en gula'guinë' icjë'. <sup>31</sup> Gudödi bulu'titjë' Jesús, gula'lecjë' lari' na' nácuë', ate' bulu'gácuë' Lë' lari' que cazë'. Ní'irö gula'chë'ë Lë' para tsöjda'agaquië' Lë' lë'e yaga cruz.

*Tu'dë'ë Jesús lë'e yaga cruz*

*(Mr. 15:21-32; Lc. 23:26-43; Jn. 19:17-27)*

<sup>32</sup> Cate' ni' bila'rúajë' bönni' na', yöjxáca'gaquië' Simón, tu bönni' Cirene, ate' gulunë' ga bi'ë yaga cruz queë' Jesús.

<sup>33</sup> Cate' bila'dxinë' lataj nazí'i le Gólgota, le rnna lu didza' xidza', Lataj Que Böga' Ícjaru', <sup>34</sup> bulu'guijë' Jesús nupi zi nutsí'i xzíjala'aba' böa' guixi'. Cate' buxí'i ru'ë Jesús, biti' gú'unnë' guíjë'.

<sup>35</sup> Cate' chinudá'agaquië' Lë' lë'e yaga cruz, gula'guisië' lari' nácuë', en bulu'quitjë' lahui le gaca bë' núzxilë' guequi queë'. Caní guca, budxín lë na' gunné' bönni' bë'ë didza' uláz queë' Dios, gunné': "Gula'guisië' lari' nácuá', en bulu'quitjë' lahui le gaca bë'." <sup>36</sup> Ní'irö gula'bö'ë ni', tu'yúë' Jesús. <sup>37</sup> Lësca' bulu'zóë' lë'e yaga cruz ícjälë' Jesús tu didza' le riguixjõ' le nabáguë'ë le rnna caní: "Bönni' ni Jesús, Bönni' rinná bé'enë' bönachi judío."

<sup>38</sup> Ga ni' dë'ë Jesús, bulu'dë'ë ca' lë'egaca yaga cruz chopë' bönni' gubán. Tuë' bulu'dë'ë cuita lë'ë ibëla, en ia'túë' na' cuita lë'ë yögöla. <sup>39</sup> Gula'dödë' ni' yugu' bönni' bulu'lidza zi'ë Jesús, en bulu'tá ícjagaquië', tu'titjë' Lë', <sup>40</sup> ta'nnë':

—jÖn, Li' na' uquínnaju' yudo', ate' tsonna dzasö ca' uchísatso' le! jBusölá cuinu' na'a channö nacu' Li' Zxí'inë' Dios! jBötjatsöca' lë'e yaga cruz na'!

<sup>41</sup> Lësca' caní bulu'titjë' Lë' yugu' bixúz unná bë' len yugu' bönni' yudo' usedi, en yugu' bönni' yudo' fariseo, len bönni' gula tu'zéajni'inë', ta'nnë':

<sup>42</sup> —Yugu' nu yúbölö busölë' bönni' ni, pero biti' gaca usölá cuinë'. Channö náquië' Bönni' inná bé'enë' bönachi Israel, huötjatsöquië' na'a lë'e yaga cruz, ate' tséajlë'ëru' Lë'. <sup>43</sup> Lë' buzzöni ládxë'ë Dios. Dios usölá cazë' Lë' na'a channö raza ládxë'ë Lë', tu' gunné': "Zxí'inë' Dios naca'."

<sup>44</sup> Lësca' caní yugu' bönni' gubán na' dá'gaquië' lë'egaca yaga cruz ga ni' dë'ë Jesús bulu'lidza zi'ë Lë'.

*Ratië' Jesús*

*(Mr. 15:33-41; Lc. 23:44-49; Jn. 19:28-30)*

<sup>45</sup> Cate' bidxín huagubidza, guchul-la idütë yödzölió ga bidx-intë idú ridödi xihuö. <sup>46</sup> Idú ridödi xihuö na', bë'ë zidzaj didza' Jesús, rnnë':

—Elí, Elí, ¿lama sabactani?

Didza' ni rnna lu didza' xidza': "Dios quia', Dios quia', ¿bizz que nubéaj ládXu'u neda'?"

47 Cate' nupa nacua' ni' bila'yöni didza' ni, ta'nná:

—Bönni' ni ruldzë' Elías, bönni' ni' bë'ë didza' uláz queë' Dios.

48 La' guxítitë' tuë' bönni' nútsë'ë ladjagaquië', en gudélë'ë tu le bululu rixupi nisa, ate' buxúpinë' le nupi zi, en buzóë' le tu lu gui, ate' butságuië' le ru'ë Jesús para xupë'. 49 Ní'irö ia'zica'rë bönni' ni' ta'nnë':

—¡Gulözagarö! ¡Yuyútsöca'ru' channö huidë' Elías usölë' Lë'!

50 Leyúbölö gurödxí'ë zidzaj Jesús, ate' burúajtë bö' naca cazë, gútitë'. 51 La' ná'asö biröza'të lari' nal-la' lu yudo', birúaj choplö, le gudela' icjlö ga bidxintë xiní'i. Ní'irö gudödi budó' zxu', en gula'lá'a guiöj. 52 Gula'yala' yeru ba quégaca nupa chinátigaca, nupa ni' gula'yéajlë' Dios, ate' bulu'bán bönachi na'. 53 Gudödi bubanë' Jesús, bulu'rúajë' bönni' na' yeru ba quégaquië', en gula'yázië' yödzö lá'ayi Jerusalén, ga ni' bila'lé'e bönachi zían légaquië'.

54 Ní'irö gúdxinë' bönni' na' rinná bé'enë' bönni' röjáquië' gudil-la, enca' yugu' bönni' röjáquië' gudil-la nacua'lenë' lë' tu'yúë' Jesús, ate' gunné':

—Le nácatë bönni' ni gúquië' Zxí'inë' Dios.

55 Zí'tu'sö gula'cuá'anu nigula zían tu'yunu Jesús, nigula na' gula'dálennu Jesús cate' ni' buzë'ë luyú Galilea, ate' gu-lunnu xichinë', gula'gú'unu le gulahuë'. 56 Lësca' María Magdalena, en María, xiná'agaquië' Jacobo, en José, nútsa'gacanu ladjagacanu, ate' zóanu ca' ni' xiná'agaquië' yugu' zxí'inë' Zebedeo.

*Ta'gu'ë Jesús yeru ba le nadaj lë'e guí'a guiöj*

*(Mr. 15:42-47; Lc. 23:50-56; Jn. 19:38-42)*

57 Cate' chiridzö' dza na', bidxinë' José, bönni' Arimatea, tu bönni' rilé'enë' yöl-la' tsahui' queë', en dë'ë ca' Jesús. 58 Bönni' ni yöjyúë' Pilato, en gunabë' lataj u'ë Jesús. Ní'irö Pilato gunná bë'ë ulu'nödzjë' queë' Jesús. 59 Guzxí'ë José Lë', en buchölinë' Lë' tu lari' nazaca'. 60 Ní'irö gulu'ë Lë' lu yeru ba cubi queë' le naguidjë' lë'e guí'a guiöj. Budë'ë tu guiöj blaga zxon ga nu riyaza yeru ba na', ate' söhuöjë'. 61 Gula'cuá'anu María Magdalena, en ia'tunu María ni', rö'gacanu ra' yeru ba na'.

*Yugu' bönni' röjáquië' gudil-la tapa chi'ë ba queë' Jesús*

62 Cate' za' rení' ia'tú dza, gudödi bulu'pë'ë que dza lá'ayi quégaquië' bönni' judío, bulu'dubë' yugu' bixúz unná bë', en yugu' bönni' yudo' fariseo ga zoë' Pilato. 63 Të' Pilato:

—Bönni', röjnetu' bi gunné' bönni' rizí' yë'ë na', cate' ni' zoë' nabanë', gunné': "Cate' gaca tsonna dza ubana' lu yöl-la' guti."

64 Que lë' ni na' gunná be'e nupa ilún chi'i ba ni' ga idxintë dza

bunni, para cabí ídigaquië' bönni' usëda queë' chi'i dzö'ölö, en ulu'béajë' Lë'. Ní'irö ilë' bönachi: "Bubanë' Jesús lu yöl-la' guti." Channö caní gaca, didza' cabí nácatë ni ilu'ë gúntërö huiá' dö' ca ben didza' cabí nácatë na' gulu'ë zí'alö.

<sup>65</sup> Pilato gudxë' légaquië':

—Ni nacu'ë bönni' röjáquië' gudil-la. Guli'chë'ë queëli'. Guli'tséaj, guli'gún chi'i yeru ba na' tsca séqui'li' gunli'.

<sup>66</sup> Ní'irö yöjáquië' ni', en bulu'sayjë' dxi'a yeru ba na', en bulu'dë'ë lë'e guiöj na' tu le gaca bë' channö isalaj, ate' bulu'cá'anë' ni' bönni' röjáquië' gudil-la ilún chi'ë le.

## 28

*Rubanë' Jesús lu yöl-la' guti*

(Mr. 16:1-8; Lc. 24:1-12; Jn. 20:1-10)

<sup>1</sup> Cate' chigudödi dza lá'ayi quégaquië' bönni' judío, en chizá' rení' dza domingo, yöjyúgacanu María Magdalena en ia'tunu María na' yeru ba queë' Jesús. <sup>2</sup> Tsárido'os gudödi budó' zxu'. Caní guca, tu' böjtë' tuë' gubáz lá'ayi queë' Xanru' narúajë' yehua' yubá. Bidxinë' ra' yeru ba na', ate' gudüë' guiöj blaga zxön na', en gurö'ë lu guiöj na'. <sup>3</sup> Nalá' lahui gubáz lá'ayi na' ca yösa bení', ate' zxíla'do'os naca lari' nácuë'. <sup>4</sup> Cate' yugu' bönni' na' röjáquië' gudil-la tapa chi'ë yeru ba na' bila'lé'enë' lë', guládxinë', en gula'zxízië'. Gula'dzö'ë lu yu, en guláquië' ca bönni' nati caz. <sup>5</sup> Ní'irö gubáz lá'ayi na' gudxë' yugu' nigula na', rnnë':

—Biti' gádxili'. Nözda' ruguíjali'-në' Jesús, bönni' na' bulu'dë'ë lë'e yaga cruz. <sup>6</sup> Biti' zoë' ni tu' chibubanë' ca na' chigunná cazë' Lë'. Guli'dá, uyuli' ga ni' gutë' Xanru'. <sup>7</sup> Guli'tséaj na'a, guli'tsöjödxi yugu' bönni' usëda queë' chibubanë' Jesús lu yöl-la' guti, ate' na'a Lë' cazë' inöruë' loli' saca' luyú Galilea. Ni' ulé'eli'-në'. Chigudxa' libí'ili' le gulu'ë Dios lu na'a.

<sup>8</sup> Ní'irö la' bulu'zá'tënu ra' yeru ba na', tádxinu, en tu'dzéjanu, ate' carelö söjácacu söjtíxjöi'iguequinu yugu' bönni' usëda queë'. <sup>9</sup> Tsanni ni' söjácacu, Jesús yöjtságuië' légacanu, ate' rë' légacanu:

—Padiux.

Ní'irö gula'bíga'nu ga zoë' Jesús, en bulu'nída'nu ni'ë. Gula'yéaj ládxi'gacanu Lë'. <sup>10</sup> Ní'irö Jesús rë' légacanu:

—Biti' gádxili'. Guli'tséaj, guli'tsöjtíxjöi'i yugu' böcha'a tsöjáquië' saca' luyú Galilea, ate' ni' ulu'lé'enë' neda'.

*Le gula'guíxjö'ë yugu' bönni' röjáquië' gudil-la*

<sup>11</sup> Tsanni ni' söjácacu nigula na', yugu' bönni' na' röjáquië' gudil-la gulún chi'ë yeru ba na' bulu'dxinë' lu yödzö ni', ate' gula'guíxjöi'inë' yugu' bixúz unná bë' yúgu'të lë na' gulaca.

<sup>12</sup> Cate' chibulu'tubë' yugu' bönni' gula tu'zéajni'inë', gulún

xtídza'gaquië'. Ní'irö bulu'nödzjë' dumí zían quégaquië' bönni' na' röjáquië' gudil-la. <sup>13</sup>Të' légaquië':

—Caní innali': "Bila'dxinë' bönni' usëda queë' chi'i dzö'ölö, en bulu'béajë' Lë' tsanni ni' rásitu'." <sup>14</sup>Channö huayönnë' bönni' rinná bë'ë lë ni, netu' uzéajni'itu' lë', en guntu' ga biti' bi gunë' queéli'.

<sup>15</sup>Ní'irö yugu' bönni' röjáquië' gudil-la na' gula'zi'ë dumí na' ate' yöjéngaquië' ca na' chinazëdagaquië'. Caní guca, tu'zë' bönni' judío didza' ni ga ridxintë na'a dza.

*Jesús risöl-lë'ë yugu' bönni' gubáz queë'*

*(Mr. 16:14-18; Lc. 24:36-49; Jn. 20:19-23)*

<sup>16</sup>Ní'irö idxinéajtë' bönni' usëda queë' Jesús yöjáquië' luyú Galilea, ate' bila'dxinë' lu gu'ado' na' chibulu'inë' Jesús légaquië'. <sup>17</sup>Cate' bulu'lé'enë' Jesús, gula'yéaj ládxi'gaquië' Lë', pero bal-lë' gulaca chopa ládxi'gaquië'. <sup>18</sup>Ní'irö gubígui'ë Jesús ga na' nacu'ë, en rë' légaquië':

—Dios chinudödë' lu na'a yúgu'të yöl-la' unná bë' yehua' yubá, en luyú ni. <sup>19</sup>Que lë ni na', guli'tséaj, guli'tsöjsëdi yúgu'të bönachi idútë yödzölió. Buli'quíla légaquië' nisa, ugunli' dxin Lë' Dios Xuz, en Lë' Dios Zxí'ini, en Lë' Dios Bö' Lá'ayi. <sup>20</sup>Guli'sëdi légaquië' ilunë' yúgu'të lë na' gunná bé'eda' libí'ili'. Buli'yútsöca', neda' caz zóalena' libí'ili' yúgu'të dza ga idxinrö dza údxi que yödzölió. Ca' gaca.



## DIDZA' DXI'A BUZÚAJË' MARCOS

*Libán benë Juan, bönni' buquilë' bönachi nisa*  
(Mt. 3:1-12; Lc. 3:1-9, 15-17; Jn. 1:19-28)

<sup>1</sup> Caní gusí lo didza' dxi'a ca guca queë' Jesucristo, Zxí'inë' Dios.

<sup>2</sup> Budxín lë na' buzúajë' lu guichi Isaías, bönni' bë'ë didza' uláz queë' Dios, le gunné' Dios:

Buyútsöca', risól-la'a bönni' gubáz quia', inöruë' Lo'.

Lë' upë'ë nöza ga tödu'.

<sup>3</sup> Yön chi'ë tu bönni' ulidzë' zidzaj lu lataj cá'asö, innë':

"Buli'pá'a nöza para idxín Xanru' yichaj lázxdö'oli'.

Buli'béaj li yugu' nöza lasi ga tödë'."

<sup>4</sup> Caní budxín, tu' ruquilë' Juan bönachi nisa lu lataj cá'asö, en runë' libán para ila'dila bönachi nisa, bönni' na' bulu'bí'i ládxi'gaquië' para uniti lahuë' Dios dul-la' nabága'gaquië'.

<sup>5</sup> Bila'rúaj bönachi zían yúgu'të yödzö luyú Judea, enca' yödzö Jerusalén, en yöjáquië' ga na' zoë' Juan, ate' Juan na' buquilë' légaquië' nisa lu yegu Jordán, bönni' na' gula'xóalëpë' dul-la' nabága'gaquië'.

<sup>6</sup> Nácuë' Juan lari' néquini lítsa'ba' böa', en núguë'ë lë'ë tu guídi. Rahuë'-ba' böchi'zu, en re'jë' le zxixi que buzdo'. <sup>7</sup> Runë' Juan libán, rnnë':

—Si' zë'ë bönni' tödi na'a, náparë' yöl-la' unná bë' ca neda'. Biti' naca' neda' lesaca' yéchuá', para ilecja' xiráchuë' nudë'ë.

<sup>8</sup> Neda' ruquila' libí'ili' nisa, pero Lë' gunë' le rulu'isö yöl-la' ridila nisa ni, uchízië' libí'ili' Dios Bö' Lá'ayi.

*Ridilë' Jesús nisa*

(Mt. 3:13-17; Lc. 3:21-22)

<sup>9</sup> Tu dza ni' birúajë' Jesús yödzö Nazaret luyú Galilea, ate' Juan na' buquilë' Lë' nisa lu yegu Jordán. <sup>10</sup> Cate' burúajë'

Jesús lu nisa, la' ná'asö bilé'enë' gualaj lúzxiba, en ruhuötjë' Dios Bö' Lá'ayi, rulu'í cuinë' ca tuba' gu'dödo', en bidisóalenë' Lë'.

<sup>11</sup> Biyön chi'i nu ru'í didza' yehua' yubá, rnna:

—Li' nacu' Zxí'ina'. Nadxí'ida' Li', en raza ládxa'a Li'.

*Rë'ëni tu' xihui' gun ga ibáguë'ë Jesús dul-la'*

(Mt. 4:1-11; Lc. 4:1-13)

<sup>12</sup> Ní'irö Dios Bö' Lá'ayi guchë'ë Jesús bayudxi lu lataj cá'asö.

<sup>13</sup> Guzóë' Jesús lataj cá'asö na' idú choá' dza, ate' gu'uni Satanás tu' xihui' gun ga ibáguë'ë Jesús dul-la'. Guzóë' Jesús ga ni' ta'daba' böa' guixi' dzö'öba' gu'ado'. Yugu' gubáz lá'ayi queë' Dios gulácalenë' Jesús, en gula'gu'ë le gudahuë'.

*Rusédinë' Jesús bönachi luyú Galilea**(Mt. 4:12-17; Lc. 4:14-15)*

<sup>14</sup> Gudödi gula'gu'ë Juan na' lidxi guíë, sa'yéajë' Jesús luyú Galilea. Runë' libán ni' que didza' dxi'a ca rinná bè'ë Dios.

<sup>15</sup> Caní rnnë':

—Chibidxín dza. Chizóa idinná bè'ë Dios. Buli'bí'i ládxi'li', en guli'tséajlë' didza' dxi'a ni.

*Rulidzë' Jesús tapë' bönni' uzxön böla**(Mt. 4:18-22; Lc. 5:1-11)*

<sup>16</sup> Tsanni ni' ridë' Jesús ra' nísado' luyú Galilea, bilé'enë' Simón len Andrés, bönni' böchë'ë Simón na'. Nácagaquië' uzxön böla, en ta'chiljë' yöxaj böla quégaquië' lu nisa na'.

<sup>17</sup> Jesús gudxë' légaquië', rnnë':

—Guli'dutá' neda', ate' guna' ga ichë'ëli' bönachi quia' neda', gunli' ca runli' rizönli'-ba' böla.

<sup>18</sup> La' bulu'cá'anatë' yöxaj quégaquië', en sōjácalenë' Jesús.

<sup>19</sup> Gudödë' Jesús ia'látido' ní'ilo, ate' bilé'enë' Jacobo, en Juan, yugu' zxi'inë' Zebedeo, nacu'ë lë'e bárcodo' quégaquië', tu'ünë' yöxaj böla quégaquië'. <sup>20</sup> Jesús la' bulidztë' légaquië', ate' bulu'cá'anë' xúzgaquië' Zebedeo, dzáguië' yugu' huen dxin queë' lë'e bárcodo' na', ate' sōjácalenë' Jesús.

*Tu bönni' yu'u lë' bö' xihui'**(Lc. 4:31-37)*

<sup>21</sup> Bila'dxinë' Jesús, en yugu' bönni' dá'gaquië' Lë' lu yödzö Capernaum. Cate' ni' naca dza lá'ayi quégaquië' bönni' judío, guyazië' Jesús yu'u ga tu'dubë' bönni' judío, en tu'sëdë' queë' Dios, ate' gusí lahuë' rusédinë' nupa nudúbigaca ni'.

<sup>22</sup> Bulu'bánninë' ca na' rusédinë' Jesús, tu' rusédinë' ca runë' tu bönni' dë lu në'ë, en calëga ca tunë' bönni' yudo' usëdi. <sup>23</sup> Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' gurödxí'ë bönni' na', rnnë':

<sup>24</sup> —¿Bizxi rál-la'tu' quiu', Jesús, bönni' Nazaret? ¿Za'tsu' usunítu' netu'? Núnbë'a Li', nacu' Bönni' Lá'ayi queë' Dios.

<sup>25</sup> Jesús buzenë' le bach, rnnë':

—Busayaj ru'u, en burúaj lu bönni' ni.

<sup>26</sup> Ní'irö bö' xihui' na' buxízida' bönni' na' yu'u lë', ate' gurödxí'a zidzaj, en la' burúajtë. <sup>27</sup> Bulu'bánninë' yúgu'të bönni' nacu'ë ni', ate' gula'nabi luzé'egaquië', ta'nnë':

—¿Bizxi caz lë ni? ¿Naru' nácatsö xibá cubi? ¡Len yöl-la' unná bë' rinná bé'enë' yugu' bö' xihui', ate' tun ca rnnë'!

<sup>28</sup> La' guzëtë didza' que yöl-la' huáca queë' Jesús, ate' bila'yöni bönachi idútë luyú Galilea na'.

*Ruúnë' Jesús xiná'anu nigula queë' Pedro**(Mt. 8:14-15; Lc. 4:38-39)*

29 Ní'irö burúajë' Jesús lu yu'u ga na' tu'dubë' tu'sëdë' queë' Dios, en la' guyéajlentë' Jacobo, en Juan, ate' bila'dxinë' lídxigaquië' Simón, en Andrés. 30 Ni' dënu xiná'anu nigula queë' Pedro, yú'unu tu xilá. La' gula'guíxjöi'itenë' Jesús ca raca queënu. 31 Ní'irö gubígui'ë Jesús, ate' gudélë'ë ná'anu, en guchisë'-nu. La' burúajtë tu xilá na' yú'unu, ate' bupá'anu le gulahuë'.

*Ruúnë' Jesús zían nupa te'e*  
(Mt. 8:16-17; Lc. 4:40-41)

32 Cate' chiridzö', ca gudxía gubidza, la' dujuá'gacatë' yúgu'të nupa te'e, en yugu' bönni' yu'u légaquië' bö' xihui' ga zoë' Jesús. 33 Yúgu'të bönachi lu yödzo bila'guirö ga nu riyaza yu'u ga na' zoë' Jesús. 34 Jesús bunë' zían nupa te'e, naca zían yödzo huë' té'enë'. Bubéajë' ca' zían bö' xihui' yú'ugaca bönachi na'. Biti' bë'ë lataj ila'nnë bö' xihui' na' tu' núnbë'gaca Lë' Nu náquië'.

*Runë' libán Jesús luyú Galilea*  
(Lc. 4:42-44)

35 Zí'acado' guyasë' Jesús, ni' naca chul-la. Burúajë' yödzo na', en sa'yéajë' tu lataj cá'asö, ate' ni' bulidzë' Dios. 36 Simón, en nupa nacuá'len lë' söjdíljagaquië' Jesús. 37 Cate' yöjxáca'gaquië' Lë', të' Lë':

—Yúgu'të bönachi tu'guílaj Li'.

38 Ní'irö Jesús gudxë' légaquië', rnnë':

—Uyéajru' yugu' dzaga yödzo, para guna' ca' libán ni'. Que lë ni na' birúaja'.

39 Caní guca, gudödë' Jesús idú luyú Galilea, runë' libán lu yu'u gapa tu'dubë' bönni' judío, tu'sëdinë' queë' Dios, ate' rubéajë' bö' xihui' yú'ugaca bönachi.

*Tu bönni' ré'enë' huë' nudzu' ruzödi*  
(Mt. 8:1-4; Lc. 5:12-16)

40 Tu bönni' ré'enë' huë' nudzu' ruzödi bidxinë' ga zoë' Jesús. Buzóa zxibë', en gúta'yuë' lahuë', rnnë':

—Channö ré'ënu', huáca unu' neda'.

41 Jesús buéchi' ládxë'ë lë'. Bulí në'ë, gudanë' lë', en gudxë' lë':

—Rë'ënda'. Chinuhuöácu'.

42 Ca gunné' ca', la' bunítitë huë' ré'enë', en böáquië' dxí'ado'.

43 Ní'irö Jesús buzenë' bach bönni' na', en la' busöl-la'të' lë'.

44 Caní gudxë' lë':

—Cuntu nu guío' ca bena' quiu', pero guyéaj, yöjlu'í' cuinu' lahuë' bixúz, en yöjnödzej para le böácanu' li' que yudo' ca na' gunná bë'ë Moisés, lë na' uluí' bönachi chinuhuöácu'.

45 Burúajë' bönni' ni, en gusí lahuë' riguíxjöi'inë' bönachi zían ca guca queë'. Tu' buzë' didza' ni, biti'rö guca tsázië' Jesús

yálajdo' tu lu yödzo, pero guzóasë' ní'lö gapa naca lu lataj cá'asö. Bönachi yúgu'të yödzo bila'dxin ga na' zoë' Jesús.

## 2

*Bönni' ré'enë' huë' nacú'unië' bin*  
(Mt. 9:1-8; Lc. 5:17-26)

<sup>1</sup> Cate' chigudödi chopa tsonna dza, buázië' Jesús yödzo Capernaum, ate' guzé didza' zoë' yu'u. <sup>2</sup> La' bulu'dúbitë bönachi zían ga na' zoë' Jesús, ga bidxintë bíti'rö guzxequí' ila'cuá' ni', ni ra' yu'u, ate' Jesús benë' libán que xtídzë'ë lógaquië'. <sup>3</sup> Ní'irö bila'dxinë' ga na' zoë' Jesús tapë' bönni', nuá'agaquië' tu bönni' huë' nacú'unië' bin. <sup>4</sup> Biti' guca ila'dxinë' lahuë' Jesús tu' nacuá' bönachi zían ni'. Que lë ni na' gula'saljë' ícjo'olö ca dödilö ga zoë' Jesús. Cate' budxi bulu'dxië' yeru na', ni bulu'zöjtjë' le denë' bönni' huë' na'. <sup>5</sup> Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Zxi'ina', chibunít lahua' li' ca naca dul-la' nabágu'u.

<sup>6</sup> Rő'ögaquië' bal-lë' bönni' yudo' usedi ni'. Ta'zá' lądxi'gaquië', ta'nnë': <sup>7</sup> ¿Bizx que ru'ë caní didza' bönni' ni? Rucá'anë' cá'asö Dios. Cuntu nu bönni' gaca uniti lahuë' dul-la'. Tuzë' Dios gaca gunë' lë ni. <sup>8</sup> La' gúquibe'etenë' Jesús le ta'zá' lądxi'gaquië', ate' gudxë' légaquië':

—¿Bizx que rizá' lądxi'li' caní? <sup>9</sup> Biti' naca böniga nu guiësö bönni' huë' ni chibuníti lo dul-la' nabáguë'ë, pero naca böniga nu gun ga huöásë', en u'ë le denë', en uzë'e ni'ë. <sup>10</sup> Guna' le gaca bë' neda', Bönni' Guljë' Bönachi, dë lu na'a luyú ni uniti lahua' dul-la' nabága'gaca bönachi.

Ní'irö Jesús gudxë' bönni' huë' na':

<sup>11</sup> —Li' rea': Guyasa. Buá' le denu', en böaj lidxu'.

<sup>12</sup> La' guyásatë' bönni' huë' na', bu'ë le gúti'në', en burúajë' lógaca yúgu'të nupa nacuá' ni'. Bulu'bájinë' yúgu'të', en gula'gu'ë Dios yöl-la' ba, ta'nnë':

—Catu caz rilé'etu' le caní.

*Jesús rulidzë' Leví*  
(Mt. 9:9-13; Lc. 5:27-32)

<sup>13</sup> Burúajë' Jesús yödzo Capernaum, na' gudödë' leyúbölö ra' nísado'. Bulu'dubi bönachi zían ga zoë' Jesús, ate' Lë' busédinë' légaquië'. <sup>14</sup> Cate' ridödë' Jesús ni', bilé'enë' Leví, zxi'inë' Alfeo, rő'ë ga ruquíxjë' uláz que yödzo zi'tu'. Jesús gudxë' lë':

—Gudá' neda'.

La' guyásatë' Leví na', sa'yéajlenë' Jesús.

<sup>15</sup> Gudödi guca lë ni, rő'ë Jesús rahuë' lu yu'u lidxë' Leví na', ate' zían bönni' uquíxaj, en ia'bal-lë' bönni' cá'asö rő'ölengaquië' tsözxön Jesús, en yugu' bönni' usëda queë'. Caní guca, tu' rójaca bönachi zían len Jesús. <sup>16</sup> Cate' yugu' bönni'

yudo' usedi, en yugu' bönni' yudo' fariseo, bila'lé'enë' Lë' rö'ë rágulenë' tsözxön yugu' bönni' uquízxaj, en ia'bal-lë' bönni' cá'asö, gulë' yugu' bönni' usëda queë' Jesús, ta'nnë':

—¿Bizxi caz runtsë'? ¡Rë'aj rágulentsë' yugu' bönni' uquízxaj, en ia'bal-lë' bönni' dul-la'!

<sup>17</sup> Biyönnë' Jesús didza' ni tu'ë, en gudxë' légaquië':

—Nupa nacué' dxi'a biti' naquíniguequi nu un bönachi, pero nupa te'e naquíniguequi nu un bönachi. Za'a neda', calëga dulídzagaca' bönachi tsahui', pero rulídzagaca' bönachi dul-la' para ulu'bí'i ládxi'gaca.

*Ru'ë Jesús didza' que yöl-la' run gubasa*

*(Mt. 9:14-17; Lc. 5:33-39)*

<sup>18</sup> Tu dza ni' tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bila'dxín nupa gula'nabi Jesús, ta'nná:

—¿Bizx que tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, pero bönni' dá'gaquië' Li' biti' tunë' gubasa?

<sup>19</sup> Bubi'ë didza' Jesús, rë' légaquië':

—¿Naru' réquitseli' ilún gubasa nupa nacué' laní queë' bönni' rutsaga në'ë tsanni ni' bönni' na' rutsaga në'ë zóalenë' légaquië'? Tsanni ni' bönni' na' rutsaga në'ë zóalenë' légaquië', biti' gaca ilunë' gubasa. <sup>20</sup> Idxín dza cate' udúë' bönni' na' rutsaga në'ë, en bíti'rö sóalenë' légaquië', ate' dza ní'irö ilunë' gubasa.

<sup>21</sup> 'Cuntu nu bönni' udë'ë tu lari' cúbido' lu lari' chinatëbi, tu' utsupi' lari' cubi na', en huachöza' lari' tëbi na', ate' huaröza' rö lari' tëbi na'. <sup>22</sup> Lë'sca' caní cuntu nu bönni' quë'ë xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

*Bönni' dá'gaquië' Jesús ta'lecjë' do dza lá'ayi*

*(Mt. 12:1-8; Lc. 6:1-5)*

<sup>23</sup> Tu dza lá'ayi quégaquië' bönni' judío, gudödë' Jesús gapa dë yöla zxoa' xtila, ate' bönni' usëda queë' gula'si lógaquië' ta'lecjë' do ga dxía zxoa' xtila. <sup>24</sup> Ní'irö bönni' yudo' fariseo gulë' Jesús, ta'nnë':

—Buyútsöca'. ¿Bizx que tunë' bönni' dá'gaquië' Li' le cabí ral-la' gunru' dza lá'ayi?

<sup>25</sup> Jesús gudxë' légaquië':

—¿Naru' cabí nulábanili' ca benë' David cate' gudunë'? Biyadzaj le ilahuë' lë', en nupa nacué'len lë' <sup>26</sup> ate' guyázië' lu yu'u queë' Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Díos, lë na' biti' dë lataj nu gagu,

pero tuz bixúz də lataj ilahuë' le. Bë'ë ca' le ilahuë' bönni' nacua'lenë' lë'.

<sup>27</sup> Ní'irö Jesús gudxë' légaquië':

—Dios benë' dza lá'ayi le ulu'zì' xibé bönachi, calëga benë' bönachi para ilún chí'i dza lá'ayi. <sup>28</sup> Que lë ni na', neda', Bönni' Guljë' Bönachi, naca' Xani dza lá'ayi.

### 3

*Ruúnë' Jesús tu bönni' narequi' në'ë*

(Mt. 12:9-14; Lc. 6:6-11)

<sup>1</sup> Leyúbölö guyu'ë Jesús tu lu yu'u ga tu'dubë' tu'sädë' bönni' judío queë' Dios, ate' zoë' ca' ni' tu bönni' narequi' në'ë. <sup>2</sup> Bönni' yudo' nacu'ë ni' tu'yúë' Jesús channö únë' bönni' na' dza lá'ayi, tu' té'ennë' ulu'zégui'ë Lë' didza'. <sup>3</sup> Ní'irö Jesús gudxë' bönni' na' narequi' në'ë, rnnë':

—Guyasa, en guzuí lógaca bönachi ni.

<sup>4</sup> Jesús gunábinë' bönachi ni', rnnë':

—¿Naru' də lataj gunru' le naca dxi'a cate' naca dza lá'ayi o gunru' le ruá' dö'? ¿Naru' də lataj gunru' ga ila'deli' bönachi yöl-la' na'bán o usunítiru' le?

Gula'cuá' dxisö bönachi ni'. <sup>5</sup> Ní'irö len yöl-la' rilé queë', buyúë' Jesús bönachi na' nacua' gásibi'ilë'. Ruhuí'innë' tu' nácagaquië' zidi ladxi'. Gudxë' bönni' na' narequi' në'ë, rnnë':

—Bulí no'o.

Ní'irö bulí në'ë bönni' na', ate' böácatë dxi'ado' në'ë. <sup>6</sup> Ní'irö bulu'ruájë' bönni' yudo' fariseo, ate' la' guluntë' tsözxön didza' len bönni' dá'gaquië' Herodes bi ilunë' queë' Jesús, para ilútië' Lë'.

*Tu'dubi bönachi zían ra' nísado'*

<sup>7</sup> Buzë'ë Jesús ni' tsözxön len bönni' dá'gaquië' Lë', en bidxinë' ra' nísado', ate' söjácalen Lë' bönachi zían narúajgaca luyú Galilea, en luyú Judea. <sup>8</sup> Bönachi zían narúajgaca Jerusalén, en luyú Idumea, en ia'tsolá'a yegu Jordán, en yugu' yödzö nacua' idú gásibi'ilö ga nacua' yödzö Tiro, en yödzö Sidón bila'dxín ca' ga zoë' Jesús. Caní gulunë', tu' bila'yönnë' ca nácagaca yugu' le zxön runë' Jesús. <sup>9</sup> Que lë ni na' Jesús gunná bé'enë' bönni' dá'gaquië' Lë' ulu'cöztica'së' tu bárcodo' ga gaca cuenë', para cabí ulu'quí bönachi zían na' Lë'. <sup>10</sup> Caní guca tu' chibunë' zían nupa te'e, ate' bila'guírö bönachi zían na' ga zoë' para ila'gán Lë'. <sup>11</sup> Cate' bö' xihui' yú'ugaca bönachi bila'lé'e Jesús, bulu'dxiga' bönachi na' yú'ugaca xini'ë Jesús, ate' gula'bödxí'a, ta'nná:

—Nacu' Li' Zxí'inë' Dios.

<sup>12</sup> Jesús buzenë' le bach bö' xihui' na', cabí ila'guixjö' nu náquië' Lë'.

*Riböë Jesús chinnu bönni' ilácagaquië' gubáz queë'*  
(Mt. 10:1-4; Lc. 6:12-16)

<sup>13</sup> Ní'irö gurenë' Jesús tu lu gu'ado', ga ni' bulidzë' nupa rë'ëne'. Gula'biguë'ë bönni' ni gásibi'ilë'. <sup>14</sup> Jesús bucu'ë chinnuë' bönni' ni, para ila'cuá'lenë' Lë', en para isöl-lë'ë légaquië' tsöjéngaquië' libán. <sup>15</sup> Budödë' lu ná'agaquië' yölla' huáca ulu'únë' nupa te'e, en ulu'béajë' bö' xihui' yú'ugaca bönachi. <sup>16</sup> Caní ná'agaca lágaquië':

Simón, (buzóë' Jesús ia'tú lë', Pedro),

<sup>17</sup> Jacobo,

Juan, (bönni' böchë'ë Jacobo, ate' ná'agaquië' zxi'inë' Zebedeo.

Chopë' ni, Jesús buzóë' ia'tú lágaquië', Boanerges, le rna lu didza' xidza': Bönni' sínia' ca guziú'),

<sup>18</sup> Andrés, Felipe, Bartolomé, Mateo, Tomás,

Jacobo, (zxi'inë' Alfeo),

Tadeo,

Simón, (bönni' ruí'i ladxë'ë yödzö queë'),

<sup>19</sup> Judas Iscariote, (bönni' udödë' Jesús lu ná'agaquië' bönni' ilútië' Lë').

*Yugu' bönni' yudo' ta'nnë': "Tu' xihui' dzaga Jesús"*  
(Mt. 12:22-32; Lc. 11:14-23; 12:10)

Gudödi ni' Jesús len bönni' dá'gaquië' Lë' bulu'dxinë' tu lu yu'u. <sup>20</sup> Leyúbölö bila'guirö bönachi zían ga zoë' Jesús, ate' bitirö guta' lataj bi ilahuë' Jesús, en bönni' na' dá'gaquië' Lë'. <sup>21</sup> Cate' di'a dza queë' Jesús bila'yönnë' ca raca queë', bila'dxinë' ni' para ulu'chë'ë Lë', ta'nnë': Richixi icjë'.

<sup>22</sup> Lësca' caní bönni' yudo' usedi, narúajgaquië' Jerusalén gula'nnë' queë', ta'nnë':

—Dzaga Belzebú, xángaca bö' xihui' Lë', ate' len yöll-la' unná bë' que rubéajë' yugu' bö' xihui'.

<sup>23</sup> Ní'irö Jesús bulidzë' yugu' bönni' yudo' usedi na', en bucúdzu'ë didza', rnnë':

—¿Naru' ubéaj la' cuinsi Satanás tu' xihui'? <sup>24</sup> Channö ila'ruáj choplö bönachi tu yödzö, en ila'díl-lalen luzë'eguequi, biti' gaca idía' yödzö na'. <sup>25</sup> Lësca' caní channö ila'ruáj choplö bönachi nacua' tu yu'u, en ila'díl-lalen luzë'eguequi, biti' gaca ila'día' bönachi nacua' yu'u na'. <sup>26</sup> Que lë ni na', channö Satanás tu' xihui' tá'baga' luzë'e, narúajgaca choplö bö' xihui'. Biti' gaca idía' yöll-la' unná bë' que, pero chizóa údxi que.

<sup>27</sup> 'Cuntu nu gaca tsu'u lidxë' tu bönni' nál-la, en cuéaj yöll-la' tsahui' queë' channö cabí gaga' zí'alö bönni' nál-la na', ate' ní'irö sequi' cuéaj le dzö'ö lidxë'.

<sup>28</sup> 'Le nácatë rea' libí'ili': Dios gaca unti lahuë' bönachi ca naca yúgu'të dul-la' nabága'gaca, en ca naca yúgu'të didza' schanní' ta'nná, <sup>29</sup> pero nútí'tës nu innë schanní' queë' Dios

Bö' Lá'ayi, catu caz uniti lahuë' Dios nu na'. Tsaz nabaga' xíguia' nu na'.

<sup>30</sup> Caní gunné' Jesús tu' ta'nné' queë' bönni' yudo' usedi na', ta'nné':

—Tu' xihui' dzaga Lë'.

*Nu naca xinë'ë Jesús, en bönni' böchë'ë*

*(Mt. 12:46-50; Lc. 8:19-21)*

<sup>31</sup> Ní'irö bila'dxinë' yugu' bönni' böchë'ë Jesús, enca' xinë'ë ga zoë'. Gula'cu'ë lö'alö, en gula'söl-lë'ë nu tsöjlidza Jesús.

<sup>32</sup> Bönachi zían na' rögaca cuitë' Jesús gulë Lë', ta'nná:

—Yugu' bönni' böchu'u, enca' xinó'o nacu'ë lö'alö, tu'lidzë' Li'.

<sup>33</sup> Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' böcha'a?

<sup>34</sup> Ní'irö buyüë' nupa na' rögaca gásibi'ilë', rnnë':

—Buli'yútsöca'. Nupa ni nácagaca ca xiná'a, en yugu' bönni' böcha'a. <sup>35</sup> Nu run ca rë'ënë' Dios, nu ni naca ca bi'i böcha'a, en bi'i zana' enca' xiná'a.

## 4

*Rucúdzu'ë didza' Jesús ca naca queë' bönni' guz*

*(Mt. 13:1-9; Lc. 8:4-8)*

<sup>1</sup> Leyúbölö gusí lahuë' Jesús rusédinë' bönachi ga naca ra' nísado'. Bulu'dubi bönachi zían ga zoë', ate' gurenë' Jesús tu lë'e bárcodo' zxoá lu nisa na', en gurö'ë ni', ate' yúgu'të bönachi na' gula'cuá' luyú ra' nisa na'. <sup>2</sup> Zían le busédinë' Jesús légaquië', bucúdzu'ë didza'. Tsanni ni' rusédinë' légaquië', rnnë':

<sup>3</sup> —Guli'zé nágali' didza' ni. Birúajë' tu bönni' guz, søjësië' xisedo'. <sup>4</sup> Tsanni ni' rúsië', gulasi bal-la xisedo' na' ra' nöza, ate' bila'dxinba' biguínido', gulé'ajba' le. <sup>5</sup> Gulasi ia'bal-la xisedo' na' ga rö'ö guiöj ga biti' rö'ö yenni' yu. Bayön gula'lén xisedo' na' tu' cabí rö'ö yenni' yu. <sup>6</sup> Ní'irö cate' gulén gubidza, buquexu' le, ate' gubidxi, tu' cabí nun luí ga rë'. <sup>7</sup> Gulasi ia'bal-la xisedo' na' ga tu'lén lubá yötsi'. Cate' gula'lén xisedo' na', bulu'lén ca' lubá yötsi' na', en gula'röli le, ate' lë na' bësië' biti' bi bunödzej. <sup>8</sup> Gulasi ia'bal-la xisedo' na' ga naca luyú bëbu, ate' gula'zxön, en xitsá' ra' gula'bö'. Bulu'nödzej lë na' bësië'. Tu dxigu' xisedo' na' bësië' bunödzej ia'chí uruá' xisedo' ca'. Ia'tú bunödzej ia'tsónnalaj ca', ate' ia'tú na' bunödzej ia'tú gayuá' ca'.

<sup>9</sup> Ní'irö Jesús gudxë' légaquië', rnnë':

—Nu zoa nagui, en riyöni ral-la' uzë nagui.

*Rigúxjö'ë Jesús bizx que rucúdzu'ë didza'*

*(Mt. 13:10-17; Lc. 8:9-10)*



<sup>10</sup> Cate' chibugá'anè' tuzè' Jesús, bila'dxín nupa dá'gaca Lè' ga zoè', núngaca tsözxön idxínnutè' bönni' usèda queè', ate' gula'nábinè' Lè' bi sa'yéaj lè na' bucúdzu'è didza'. <sup>11</sup> Jesús gudxè' légaquiè', rnnè':

—Libi'ili' nadéli'li' tséajni'ili' le nagachi' ca rinná bè'è Dios, pero nupa na' biti' nácgaca tuz len rë'u, ru'ílena' légaquiè' didza' yugu' le rucúdzu'a didza'. <sup>12</sup> Caní runa' para gaca lè na' nazúaj lu guichi lá'ayi, rnna:

Ulu'yúè', en biti' ila'lé'enè'.

Ulu'zè nágagaquiè', en biti' ila'yéajni'inè'.

Biti' ulu'bí'i ládxi'gaquiè' para gaca uniti lahua' légaquiè' ca naca dul-la' nabága'gaquiè'.

*Rigúxjö'è' Jesús le bucúdzu'è didza'*

*(Mt. 13:18-23; Lc. 8:11-15)*

<sup>13</sup> Jesús gudxè' ca' yugu' bönni' dá'gaquiè' Lè', rnnè':

—¿Naru' cabí réajni'itseli' lè na' bucúdzu'a didza'? ¿Nacxi caz gaca tséajni'ili' ia'zíca'rö le ucúdzu'a didza'? <sup>14</sup> Bönni' guz na' náquiè' nu ruzè xtídzè'è Dios.

<sup>15</sup> 'Nácgaca bal-la bönachi ca xisedo' na' gulasi ra' nöza. Ta'yönnè' xtídzè'è Dios, en ca ta'yönisinè' ca', la' za'tè Satanás tu' xihui', en rigúa didza' na' bidxín lu icja ládxi'do'gaquiè'.

<sup>16</sup> 'Nácgaca ia'bal-la bönachi ca xisedo' na' gulasi ga rö'ö guiøj. Ta'yönnè' didza' na', ate' len yöl-la' rudzeja quégaquiè' ta'zi'è le. <sup>17</sup> Biti' riyaza icja ládxi'do'gaquiè', ate' tu chí'sö ta'dé'è le. Cate'bi raca quégaquiè', o zoa nu ribía ládxi' légaquiè' tu' ta'dé'è didza' na', la' tu'huöatè ládxi'gaquiè'.

<sup>18</sup> 'Nácgaca ia'bal-la bönachi ca xisedo' na' gulasi ga na' tu'lén lubá yötsi'. Ta'yönnè' didza' na', <sup>19</sup> pero tuí'i ládxi'gaquiè' le nácgaca que yödzölió ni. Nazí'yé'eguequinè' tu' nadxí'iguequinè' yugu' yöl-la' tsahui', en ta'zè ládxi'gaquiè' yugu' le dè. Ta'yaza icja ládxi'do'gaquiè' yúgu'tè lè ni, en tu'suniti didza' na', para cabí gun dxin lu icja ládxi'do'gaquiè'.

<sup>20</sup> 'Nácgaca ia'bal-la bönachi ca xisedo' na' gulasi ga naca luyú bëbu. Ta'yönnè' didza' na', en ta'zí' lu ná'agaquiè' le, ate' run dxin lu icja ládxi'do'gaquiè'. Nácgaca bal-la bönachi caní ca xisedo' na' bulu'nödzaj ia'chí uruá' huéaj. Nácgaca ia'bal-lè' ca xisedo' na' bulu'nödzaj ia'tsónnalalaj ca', ate' nácgaca ia'bal-la bönachi ca xisedo' na' bulu'nödzaj ia'tú gayuá' ca'.

*Rucúdzu'è didza' Jesús que tu le rigú'u bení'*

*(Lc. 8:16-18)*

<sup>21</sup> Jesús gudxè' ca' bönni' dá'gaquiè' Lè', rnnè':

—¿Naru' rigála'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní. Ruzóaru' guí' ga naca xitsá' ga cu'u bení'. <sup>22</sup> Yúgu'tè le nagachi' ilá' lahui, ate' yúgu'tè

le raca balándo'os ila'rúaj ga liná'. <sup>23</sup> Nu zoa nagui, en riyöni ral-la' uzé nagui.

<sup>24</sup> Gudxë' ca' légaquië':

—Guli'güf' ládxi'li' le riyönili'. Ca naca le ruríxili', la' leze urixë' Dios queéli', ate' gunnë' queéli' ia'lati'. <sup>25</sup> Nu nazí'i le za' que, gu'ë que ia'lati', pero nu biti' nazi'i le, la's dui le dë que, udúa.

*Rucúdzu'ë didza' Jesús ca rizxön zxaa' xtila*

<sup>26</sup> Gunnë' ca' Jesús:

—Ca raca ni le rinná bë'ë Dios naca ca raca cate' ruchejë' tu bönni' zxaa' xtila lu yu. <sup>27</sup> Chi'i dzö'ölö rásie', en riyasë' cate' za' reni'. Ta'lén zxaa' xtila na', en ta'zxön, pero biti' nözinë' lë' nacxi raca ta'zxön. <sup>28</sup> La' cuinsi luyú na' ruxön le nadúzgaca luyú na', zí'alö xiyazi, ní'irö za' do que, en tödi na' cuía xui'i nál-la lu do que. <sup>29</sup> Cate' chinal-la xui'i na', la' tséajtë' tsöjchibë' do na' tu' chibidxín dza uzi'ë xui'i.

*Rucúdzu'ë didza' Jesús ca raca que xisé mostaza*

(Mt. 13:31-32; Lc. 13:18-19)

<sup>30</sup> Gunnë' ca' Jesús:

—¿Bizxi caz innaru' ca raca ni le rinná bë'ë Dios? ¿Bizxi ucúdzu'ru' didza' ca raca? <sup>31</sup> Raca ca raca que tu xisedo' mostaza. Cate' riyaza luyú naca tu xisedo' nácatërö cuidi' ca yúgu'të xisedo' dzö'ö luyú, <sup>32</sup> pero cate' chinadúz, rilén, en rizxöntërö ca yúgu'të guixi' cuan rö'gaca luyú. Tsca run yana' ni'a në'e, gaca ila'dxinba' biguínnido', en ulu'dxíaba' xicá'agacaba' lu zxul-la que.

*Ca rugunë' dxin Jesús le rucúdzu'ë didza'*

(Mt. 13:34-35)

<sup>33</sup> Caní guca, busédinë' Jesús légaquië', en zíanrö ca' le bucúdzu'ë didza' tsca guca ila'yéajni'inë'. <sup>34</sup> Yúgu'të didza' bë'lenë' bönachi bucúdzu'ë didza', ate' yúgu'të didza' ni buchila lá'anë', buzéajni'inë' légacasë' bönni' usëda queë'.

*Jesús ribequi dxie' bö' budunu'*

(Mt. 8:23-27; Lc. 8:22-25)

<sup>35</sup> La' dza ná'asö, cate' ridzö', Jesús gudxë' yugu' bönni' dá'gaquië' Lë', rnnë':

—Töditsöca'ru' ia'tsölá'a nísado' ni.

<sup>36</sup> Ní'irö bulu'lá'alënë' bönachi zían nacuá' ni', ate' bulu'së'ë bárcodo' ga na' chizóasë' Jesús. Gula'cuá' ca' ni' ia'zica'rö bárcodo' sôjácalen légaquië'. <sup>37</sup> Gusí lo recja bö' budunu' lu nisa na', ate' gudá'a nisa lë'e bárcodo' na'. Ca' guca, zeaj ridzá' nisa lë'e bárcodo' na'. <sup>38</sup> Dë' rásie' Jesús lu xicúgüë' ga naca xitsá'alö lë'e bárcodo' na', ate' bulu'subanë' Lë'. Të' Lë':

—¡Bönni' Usedi! ¿Naru' cabí ru'í iládxí'tso' netu'? ¡Huáti caztu' lu nisa ni!

<sup>39</sup> Ní'irö guyasë' Jesús, en gunná bé'enë' bö' na' recja, gunné':

—Gurö'ö dxi.

Gudxë' ca' nisa na', gunné':

—Dxisö guzóa.

Gurö'ö dxi bö' na' guyecja, en guzóa dxi lu nísado' na'.

<sup>40</sup> Ní'irö Jesús gudxë' yugu' bönni' dá'gaquië' Lë', rnnë':

—¿Bizx que radxi ridzöbili' caní? ¿Naru' cabí réajlë'ëli' Dios?

<sup>41</sup> Ní' tádxinë' gulë luzë'ë tuë' ia'túë':

—¿Nuzxi caz bönni' ni? ¡Tun bö' recja, en nísado' ca rna xtídzë'ë!

## 5

*Bönni' Gadara yu'u bö' xihui' lë'*

(Mt. 8:28-34; Lc. 8:26-39)

<sup>1</sup> Ní'irö bila'dxinë' Jesús, en yugu' bönni' dá'gaquië' Lë' ia'tsölá'a nísado' ga naca lu xiyúgaca bönachi Gadara. <sup>2</sup> Cate' burúajë' Jesús lë'e bárcodo' na', tu bönni' rirúajë' zcan bulóaj ga nacua' yeru ba la' dutságatë' Lë'. Bönni' ni yu'u bö' xihui' lë', <sup>3</sup> ate' nun xilatjë' ga na' nacua' yeru ba. Cuntu nu guca guga' bönni' na', calëga len du guíë. <sup>4</sup> Zián luzuí bulu'zöë' bregui' guíë yen në'ë, en ni'ë, en gulúgui'ë lë' du guíë. Yugu' du guíë na' bulë'ë, ate' bregui' guíë na' guditsjë'. Biti' rizéqui'në' nu bönni' inná bé'enë' lë'. <sup>5</sup> Ridática'së' ribödxí'ë rëla, en tē dza ga na' nacua' yeru ba, en gapa naca lu guí'ado', run huë' cuinë' yugu' lu guiöj dzö'ö ni'. <sup>6</sup> Cate' bilë'enë' zë'ë zi'tu' Jesús, guxíti'ë guyijë' ga na' zë'ë, ate' buzóa zxibë' lahuë' Lë'. <sup>7</sup> Bë'ë zidzaj didza', rë' Jesús:

—¿Bizxi ral-la'a quiu' Jesús, Zxí'inë' Dios nayëpisëtërë'? Ni'a queë' Xanru' Dios ráta'yua' lo', bití' usaca' zi'u neda'.

<sup>8</sup> Caní gunné' bönni' na' tu' chigudxë' Jesús bö' xihui' na':

—Li', bö' xihui', burúaj lu bönni' ni.

<sup>9</sup> Jesús gunábinë' le, rnnë':

—¿Bi leu'?

Bubí'i didza' le, gudxi Lë':

—Lea': Le Zián, tu' rö'ö ziantu'.

<sup>10</sup> Gula'nabi yechi' yugu' bö' xihui' na' Jesús para cabí isöl-lë'ë léguequi zi'tu' luyú ni'. <sup>11</sup> Nacua'aba' cuchi zián lu guí'ado' ní'isö, ta'daba' táguba' ni'. <sup>12</sup> Gula'nabi yechi' bö' xihui' na' Jesús, ta'nná:

—Gusöl-la' netu' ga ni' dzö'öba' cuchi zián. Bë' netu' lataj tsöjtsú'ugacatu'-ba'.

<sup>13</sup> La' bë'të' Jesús léguequi lataj, ate' bila'rúaj bö' xihui' na', en yöjtsú'ugaca cuchi zián na', ate' gula'xíti'ba' cuchi zián

na', yöjbíxigacaba' ga naca ra' guí'a, yöjcházagacaba' nísado'. Lu nísado' na' gula'yépiba' nisa, gulátiba', en nácagacaba' ca galaj gayuá'aba'.

14 Ní'irö bulu'zxunnaj nupa ni' gulún chi'i cuchi zían na'. Yöjtíxjöi'iguequinë' bönachi lu yödzö ni', enca' bönachi nacuá' la' guixi' ni'. Bila'rúaj bönachi lu yödzö, söjyúgaquië' bizxi na' guca ni'. 15 Cate' bila'dxinë' ga ni' zoë Jesús, bila'lé'enë' bönni' na' zí'alö yú'ugaca bö' xihui' lë'. Bönni' ni rö'ë ni', nácuë' lari', en zoë dxi'ado', ate' guladxi bönachi na'. 16 Nupa na' bila'lé'e le benë' Jesús gula'guíxjöi'i bönachi na' bila'rúaj lu yödzö ca na' guca queë' bönni' na' zí'alö yú'ugaca bö' xihui' lë', enca' ca guca quégacaba' cuchi na'. 17 Ní'irö gula'sí lógaca bönachi zían na' ta'ta'yu lahuë' Jesús urúajë' lu xiyúguequi.

18 Cate' bubenë' Jesús lë'e bárcodo', bönni' na' zí'alö yú'ugaca bö' xihui' zían lë', gúta'yuë' lahuë' Jesús gu'ë lë' lataj tséajlenë' Lë'. 19 Jesús biti' bë'ë lë' lataj, pero gudxë' lë':

—Böaj lidxu'. Yöjtíxjöi'i dí'a dza quiu' yugu' le zxön bena' quiu' neda', naca' Xanu', en ca bena' buéchi' ládxa'a li'.

20 Söhuöjë' bönni' na', en ruzë' didza' yugu' yödzö Decápolis ca nácagaca le zxön benë' Jesús queë', ate' bulu'bani yúgu'të bönachi nacuá' yugu' yödzö ni'.

*Bi'i nigula queë' Jairo, en nigula na' gudannu lari' nácuë' Jesús*

*(Mt. 9:18-26; Lc. 8:40-56)*

21 Cate' budxinë' Jesús ia'tsölá'a nísado' na', ní'irö bulu'dubi bönachi zían ga na' zoë ra' nísado'. 22 Bönni' lë' Jairo, bönni' rinná bë'ë lu yu'u ga tu'dubë' bönni' judío, en nazëdë' queë' Dios, bidë' ga zoë Jesús. Cate' bilé'enë' Jesús, buzóa zxi'bë' lahuë', 23 en gúta'yuë' lahuë', rnnë':

—Chiraqui gátibi' bi'i nigúlado' quia'. Gudá ixóa no'o lëbi' para huóacabi', en biti' gátibi'.

24 Sa'yéajlenë' Jesús lë', ate' bönachi zían söjácálen Jesús, tu'quirö Lë'. 25 Tu nigula, chinaca chinnu iz ré'enu, zóanu ca' ni'. Biti' ruhuí'i rön queënu que huë' quégaca cázanu nigula. 26 Yenni' chigudí'i guzxáca'nu lu ná'agaquië' zían bönni' tu'únë' bönachi. Nítisö chibutönu dëra le dë queënu, tu' cabí bi gúcalen lënu, pero riyali' queënu. 27 Cate' biyöninu tuí'i didza' bönachi ca naca queë' Jesús, gudödinu ládjalö bönachi zían na', en bidxinnu zaca' cúdzu'lë' Jesús, en gudannu lari' nácuë'. 28 Caní bennu tu' rnnanu: "Channö cansa' le nácuë', huóaca'." 29 La' buí'itë rön queënu, ate' réquibe'enu chiböácanu que le guca queënu.

30 La' gúquibe'etenë' Jesús ben dxin yöl-la' huáca queë', ate' buécjë', ruyúë' bönachi zían na'. Rnnë':

—¿Nuzxi na' gudán neda'?

<sup>31</sup> Ní'irö bönni' dá'gaquië' Lë' tē' Lë', ta'nnë':

—Rilé'e quézinu' bönachi zián ni tu'quirö Li', en rnnatso':  
“¿Nuzxi na' gudán neda?”

<sup>32</sup> Ruyüé' Jesús gásibi'ilë' para ilé'enë' nuzxi na' gudán Lë'.

<sup>33</sup> Ní'irö nigula na' gubíga'nu lahuë'. Rádxinu, en rizzízinu tu' chinózinu bi na' guca queënu, ate' buzóa zxíbinu lahuë' Jesús, en gúdxinu Lë' idútë le nácatë. <sup>34</sup> Jesús rē'ë-nu:

—Nigúlado'. Chiböácu' tu' réajlë'u neda'. Böaj lidxu' idú ládxu'u. Tsaz nuhuóácu' que le guca quiu'.

<sup>35</sup> Tsanni ni' ru'ë caní didza' Jesús, bönni' narúajgaquië' lidxë' bönni' na' rinná bē'ë lu yu'u ga tu'dubë' tu'sedë' queë' Dios bila'dxnë' ni', en tē' bönni' na':

—Chigútibi' bi'i nigúlado' quiu'. Bítirö upízxjanu' Bönni' Usedi.

<sup>36</sup> Biti' bē' ládxë'ë Jesús lë na' ta'nnë', ate' gudxë' bönni' unná bē' na', rnnë':

—Biti' gádxinu'. Guyéajlë'ësë' Dios.

<sup>37</sup> Biti' bē'ë lataj Jesús tsöjácalen Lë' ia'zícá'rö bönachi, pero légacasë Pedro, en Jacobo, en Juan, böché'ë Jacobo na'. <sup>38</sup> Cate' bidxinë' lidxë' bönni' na' rinná bē'ë ga tu'dubë' tu'sedë' queë' Dios, bilé'enë' raca dzatsa, enca' nupa ni' ta'bödxi, en nupa ta'bödxi yechi'. <sup>39</sup> Guyázië' Jesús, en gudxë' légaquië':

—¿Bizx que rutsátsali', en ribödxi' caní? Biti' nátibi' bi'i nigúlado' ni. Rásisibi' na'.

<sup>40</sup> Ní'irö bulu'titjë' Jesús, pero Lë' bubéajë' yúgu'të bönachi na' ní'ilö, ate' guchë'ë xuz xiná'abi' bi'i nigúlado' na', enca' nupa nacué'len Lë', ate' guyázië' ga na' dēbi'. <sup>41</sup> Gudélë'ë ná'abi' bi'i nigúlado' na', en gudxë'-bi':

—Talita, cumi.

Didza' hebreo ni rnna lu didza' xidza': Bi'i nigúlado', guyasa.

<sup>42</sup> La' guyásatēbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacué' ni'. <sup>43</sup> Ní'irö Jesús gunná bé'enë' légaquië' cuntu nu ulu'siyönnë' lë na' guca. Gudxë' légaquië':

—Guli'güi' le gágubi' bi'i nigúlado' ni.

## 6

*Ridxinë' Jesús Nazaret, le naca ladzë'*

*(Mt. 13:53-58; Lc. 4:16-30)*

<sup>1</sup> Buzë'ë Jesús ni', budxinë' ladzë', ate' yugu' bönni' dá'gaquië' Lë' söjácalenë' Lë'. <sup>2</sup> Cate' bidxín dza lá'ayi quégaquië' bönni' judío, gusí lahuë' Jesús rusédinë' bönachi ga na' tu'dubë' tu'sedë' queë' Dios. Gula'cuá' bönachi zián ni ta'yöni Lë'. Bulu'bani, ta'nná:

—¿Gazxi caz bizédë' bönni' ni yugu' lë ni? ¿Bizxi caz yöl-la' réajni'i ni nadéli'në'? ¿Nacxi caz runë' le nácagaca bë' na' zá'gaca yehua' yubá? <sup>3</sup> Náquië' bönni' ni gubëdxi yaga na', en xzí'ininu María. Náquië' böchi'gaquië' Jacobo, en José, en Judas, en Simón. Nigula zanë' nacua'lennu ca' rë'u.

Que lë ni na' bulu'cá'anë' Lë' cá'asö. <sup>4</sup> Ní'irö Jesús gudxë' légaquië', rnnë':

—Gátitës tunë' bal nu bönni' ru'ë didza' uláz queë' Dios, pero bönachi uládz queë', en bönachi di'a dza queë', en bönachi nacua' lidxë' biti' tun lë' bal.

<sup>5</sup> Que lë ni na' biti' guca gunë' Jesús nitú yöl-la' huáca zxön ni'. Bunsë' nabábasö bönachi te'e cate' guxóa në'ë léguequi. <sup>6</sup> Bubáninë' Jesús tu' cabí ta'yéajlë' Lë'. Gudödi na' gudödë' yugu' yödzödo' nacua' gásibi'ilö, rusëdinë' bönachi ni'.

*Risöl-lë'ë Jesús bönni' dá'gaquië' Lë' tsöjéngaquië' libán*  
(Mt. 10:5-15; Lc. 9:1-6)

<sup>7</sup> Ní'irö bulidzë' Jesús idxínnutë' bönni' dá'gaquië' Lë', en gusí lahuë' risöl-lë'ë légaquië' chopa huéajgaquië'. Budödë' lu ná'agaquië' yöl-la' unná bë' ulu'béajë' yugu' bö' xihui' yú'ugaca bönachi. <sup>8</sup> Gunná bé'enë' légaquië' biti' bi ilu'ë la' nöza, calëga yöxaj, calëga yöta, en calëga dumí biti' ila'gu'ë lu buzudi quégaquië', pero iluá'asë' xiyágado'. <sup>9</sup> Ral-la' ulu'dë'ë xiráchugaquië', pero calëga chopa lari' ulu'xóa yéngaquië'. <sup>10</sup> Gudxë' ca' légaquië':

—Gátitës ga tsú'uli' tu yu'u, guli'sóa yu'u na' cate' uzá'aröli' yödzö na'. <sup>11</sup> Channö tsú'uli' tu yödzö ga biti' ilún bönachi lu yödzö na' libí'ili' bal, en biti' ulu'zë nágagaquië' xtídza'li', buli'rúaj ni', en buli'quínnaj bëchtö da' lë'e lábali'. Lë ni gaca bë' nabága'gaquië' xíguia'. Le nácátë rea' libí'ili', cate' idxín dza ichúguië' Dios quégaca bönachi, ila'gu'i ila'záca'rö bönachi lu yödzö na' ca ila'gu'i ila'záca' bönachi Sodoma, en Gomorra, yugu' yödzö na' busunítie' Dios.

<sup>12</sup> Ní'irö bila'rúajë' bönni' dá'gaquië' Lë', yöjéngaquië' libán ca ral-la' ulu'bí'i ládxi'gaca bönachi. <sup>13</sup> Bulu'béajë' zían bö' xihui' yú'ugaca bönachi. Gula'gu'ë le za zían nupa te'e, ate' bulu'huóáquië'.

*Ca bëtigaquië' Juan, bönni' buquilë' bönachi nisa*  
(Mt. 14:1-12; Lc. 9:7-9)

<sup>14</sup> Biyönnë' Herodes, bönni' unná bë', ca naca le runë' Jesús, tu' rizë didza' gátitës que yöl-la' huáca queë'. Bal-la bönachi ta'nná:

—Chibubanë' Juan, bönni' ni' buquilë' bönachi nisa, lu yöl-la' guti. Que lë ni na' napë' yöl-la' huáca runë' yugu' lë ni.

<sup>15</sup> Ia'bal-la bönachi ta'nná:

—Náquië' Elías, bönni' bë'ë didza' uláz queë' Dios dza ni'te.

Ia'bal-la bönachi ta'nná:

—Naquië' bönni' ru'ë didza' uláz queë' Dios ca guláquië' bönni' gulu'ë didza' uláz queë' dza ni'te.

<sup>16</sup> Cate' biyönnë' Herodes yugu' lë ni, gunnë':

—Naquië' Juan, bönni' na' burixa' yenë'. Chibubanë' lu yöla' guti.

<sup>17</sup> Caní gunnë' Herodes tu' gusöl-lë'ë lë cazë' bönni' yöjxöngaqüë' Juan na', ate' gulúgui'ë lë' du guié lu yu'u lidxi guié. Caní benë' Herodes tu' rilenu Herodías Juan na'. Nácanu nigula na' gúcanu nigula queë' Felipe, böchë'ë Herodes na'. Herodes gudúë'-nu Herodías na', en butsaga ná'alënë'-nu.

<sup>18</sup> Juan na' gudxë' Herodes:

—Biti' ral-la' sóalenu'-nu nigula queë' böchu'u.

<sup>19</sup> Que lë ni na' gusí gurö'önu Herodías. Gú'uninu bi gunnu queë' Juan, tu' gú'uninu gútinu lë', pero biti' bi guxzéqui'nu <sup>20</sup> tu' rádxiñë' Herodes Juan. Nözinë' náquië' Juan na' tsahui', en lá'ayi. Que lë ni na' gudapa chi'ë lë', en buzë náguië' lë' idú láchxë'ë sal-la' lë na' rnnë' Juan ben ga gurö'ë böniga Herodes na'. <sup>21</sup> Ní'irö bidxín tu dza guxzéqui'nu Herodías na', le naca dza runë' Herodes laní que dza guyé'enë' iz. Bupë'ë le ilë'aj ilahuë' bönni' dë lu ná'agaquië' uláz queë', en bönni' ta'nná bé'enë' bönni' röjáquië' gudil-la, enca' bönni' nácagaquië' lo luyú Galilea. <sup>22</sup> Guyázabi' bi'i nigula queënu Herodías ga na' tē'aj tahuë', en buyá'abi' lógaquië'. Guyaza láchxë'ë Herodes ca runbi', en gula'yaza láchxi'gaca ca' nupa tē'aj tágulen lë'. Ní'irö Herodes gudxë'-bi' bi'i nigula na', gunnë':

—Gunaba bi rë'ënu' gunna' quiu', ate' guna' ca'.

<sup>23</sup> Benë' tsutsu xtídzë'ë, gudxë'-bi':

—Ni'a queë' Xanru' Dios gunna' quiu' bítitës bi inabu' ga idxintë gatsaj ga rinná bē'a.

<sup>24</sup> Burúajbi' lëbi', ate' gunábabi' xiná'abi':

—¿Bizxi inábatsa'?

Lënu gúdxinu-bi':

—Icjë' Juan, bönni' buquilë' bönachi nisa, inabu'.

<sup>25</sup> La' buázatëbi' ga na' zoë' Herodes, en rëbi'-në':

—Rë'ënda' ixú' quia' na'a lu zxiga' zxön icjë' Juan, bönni' na' buquilë' bönachi nisa.

<sup>26</sup> Ní'irö buí'innë' Herodes, pero tu' buzötjë' Dios, en tu' bila'yöni ca' nupa tágulen lë', biti' gú'unnë' initi xtídzë'ë na' guxzí' lu nē'ë queëbi'. <sup>27</sup> Herodes la' gusöl-la'të' tu bönni' rejë' gudil-la zoë' rapa chi'ë, ate' gunná bé'enë' lë' tsöjxi'ë icjë' Juan. <sup>28</sup> Bönni' na' rejë' gudil-la guyijë' lidxi guié, yöjrixë' yen Juan na', ate' bu'ë icjë', nuxóë' le tu lu zxiga' zxön. Budödë' le lu ná'abi' bi'i nigula na', ate' lëbi' bunödzbabi' le queënu xiná'abi'.

<sup>29</sup> Cate' bönni' dá'gaquië' Juan na' bila'yönnë' didza' chiguca lë na', bila'dxinë' ni', en bulu'ú'ë lë', ate' yöj'cáchi'gaquië' lë' yeru ba.

*Rugahuë' Jesús zíanrö ca chi-un gayuá' bönachi*  
(Mt. 14:13-21; Lc. 9:10-17; Jn. 6:1-14)

<sup>30</sup> Gudödi ni' bulu'dubë' bönni' gubáz queë' Jesús ga zoë', en gula'guíxjöi'inë' Lë' yúgu'të le gulunë', en yugu' le bulu'sédinë' bönachi. <sup>31</sup> Nacuá' bönachi zían ni', nupa zá'gaca, en nupa söjaca, ga bidxintë bíti'rö dë lataj ilahuë' Jesús, en yugu' bönni' dá'gaquië' Lë'. Que lë ni na' Jesús gudxë' légaquië', rnnë':

—Guli'dá. Uyéaj cázaru' ga naca lataj cá'asö, en uzí' ládxi'ru' tu chí'i.

<sup>32</sup> La' légacasë' yöjáquië' tu lë'e bárcodo', ate' bila'dxinë' tu lataj cá'asö. <sup>33</sup> Bila'lé'e bönachi zían légaquië' söjáquië' ni', en núnbë'gaca Jesús. Que lë ni na' bönni' yúgu'të yödzö ni' carelö yöjáquië' ni'. Gula'zë'e ní'agaquië', ate' bila'dxinë' ni' zí'atëlö ca Jesús, en yugu' bönni' dá'gaquië' Lë'. <sup>34</sup> Cate' burúajë' Jesús lë'e bárcodo' na', bilé'enë' bönachi zían na', ate' buéchi' ládxi'ë légaquië' tu' nácagaquië' ca bö'cu' zxi'la'do' biti' zoa nu gapa chí'i légacaba'. Gusí lahuë' rusédinë' légaquië' le zían. <sup>35</sup> Cate' chiridzö' dza na', yugu' bönni' dá'gaquië' Jesús bila'dxinë' ga zoë', en të' Lë':

—Chiridzö', ate' lataj cá'asö naca ni. <sup>36</sup> Busöl-la' bönachi zían ni para tsöjaca yugu' yú'udo', en yugu' yödzödo' nacuá' gásibi'ilö, tsöjö'ugaca yöta, tu' cabí bi dë ni le ilagu.

<sup>37</sup> Bubi'ë didza' Jesús, gudxë' légaquië':

—Guli'güí' libí'i cázali' le ilahuë'.

Gulë' Lë':

—¿Naru' tsöjö'utsatu' yöta xtila len lászjatu' que idú xunu' beo', ate' güí'itu' le ilahuë'?

<sup>38</sup> Jesús gudxë' légaquië':

—¿Bal-laxi yöta xtila dë queëli'? Guli'tsöjyútsöca'.

Cate' chinöziguequinë', të' Lë':

—Gáyu'sö yöta xtila dë, en chópasöba' böla dëba'.

<sup>39</sup> Ní'irö gunná bë'ë Jesús ilunë' ga ila'bö' bönachi zían na', ila'cuá' tu cö' huéajguequi ga naca lachi' lu daca'. <sup>40</sup> Gula'cu'ë tu cö' huéajgaquië', tu gayuá' huéajgaquië', en chi-un huéajgaquië'.

<sup>41</sup> Ní'irö gudélé'ë Jesús igáyu'të yöta xtila na', en irópaba' böla na'. Buyúë' zaca' lúzxiba, en gudxë' Dios: "Xclenu'." Ní'irö buzuxzjë' yöta xtila na', en bë'ë quégaquië' bönni' uséda queë' para ila'guísië' quégaca bönachi zían na'. Gudísië' ca' irópatëba' böla na' quégaca yúgu'të bönachi na'. <sup>42</sup> Gulahuë' yúgu'të, en bulu'huöljanë'. <sup>43</sup> Ní'irö bulu'tubë' le bizxaj que yöta xtila na', en quégacaba' böla, ate' chinnu ga'böra bulu'lié'. <sup>44</sup> Guláquië' ca chi-un gáyu'ë bönni' na' gulahuë'.



*Rizë'e ni'ë Jesús lu nísado'*  
(Mt. 14:22-27; Jn. 6:16-21)

<sup>45</sup> La' bentë' Jesús ga gula'benë' yugu' bönni' dá'gaquië' Lë' lë'e bárcodo', para ila'nöruë' lahuë', ila'dödë' lu nísado' na', para ila'dxinë' lu yödzo Betsaida, tsanni ni' Lë' rusöl-lë' bönachi zían na' lídxiguequi. <sup>46</sup> Cate' chibudxi busöl-lë' légaquië', guyijë' tu lu gu'ado', ate' ni' ru'ilenë' Dios didza'. <sup>47</sup> Cate' chizá' ral-la, zeaj bárcodo' na' gatsaj láhui'lö nísado', ate' zoë' Jesús tuzë' luyú bidxi na'. <sup>48</sup> Bilé'enë' Jesús légaquië', böniga tu'së'ë bárcodo' na' tu' recja bö' za' ga na' ta'dödë'. Gudödi guluhuëla bidxinë' Jesús ga na' nacu'ë, rizë'e ni'ë lu nísado' na', ate' gú'unnë' tödisë' ga na' nacu'ë. <sup>49</sup> Cate' bila'lé'enë' Lë' rizë'e ni'ë lu nísado', guléquinë' bixín na', ate' gula'bödx'i'ë <sup>50</sup> tu' bila'lé'enë' yúgu'të' Lë', en guladxi gula'dzöbinë'. Ní'irö la' bulidztë' Jesús légaquië', rnnë':

—Buli'tipa ládxi'li'. Neda' caz. Biti' gádxili'.

<sup>51</sup> Gurenë' Jesús lë'e bárcodo' ga na' nacu'ë, ate' gurö'ö dxi bö' na' recja, ate' légaquië' gula'niti gula'tíqui'sinë' bulu'báninë'. <sup>52</sup> Biti' ta'yéajni'ininë' le rulu'i lë na' benë' Jesús que yöta xtila na'. Ni' naca zidi icja ládxi'do'gaquië'.

*Ruínë' Jesús nupa te'e lu yödzo Genesaret*  
(Mt. 14:34-36)

<sup>53</sup> Gula'dödë' Jesús, en yugu' bönni' dá'gaquië' Lë' ia'tsölá'a nísado', ate' bila'dxinë' ga naca lu xiyúgaca bönachi Genesaret. Bulu'dxíguë'ë bárcodo' luyú bidxi ni'. <sup>54</sup> Cate' bulu'rúajë' lë'e bárcodo' na', la' bulu'únbë'të bönachi ni' Jesús. <sup>55</sup> Gula'xiti' bönachi na', yöjaca yúgu'të yödzödo' idú gásibi'ilö, en gula'sí lógaquië' dujuá'agaquië' yúgu'të nupa te'e ga zoë' Jesús, zxóagaca yugu' le déguequini, ate' bila'dxinë' gáti'tës ta'yönnë' zoë' Jesús. <sup>56</sup> Gáti'tës ga ridödë' Jesús, yugu' lu yödzödo', en yugu' yödzö zxön, en yugu' yú'udo', tu'cu'ë nupa te'e quégaquië' gapa naca la' nöza, en gapa naca lu yë'ëyi, en ta'tá'yuë' lahuë' Jesús gu'ë légaquië' lataj ila'gansë' luzxi lari' nácuë'. Yúgu'të nupa na' bila'gán lari' nácuë' bulu'huóacaté dxí'ado'.

## 7

*Le tun ga biti' nácacaca bönachi tsahui' lahuë' Dios*  
(Mt. 15:1-20)

<sup>1</sup> Ní'irö bal-lë' bönni' yudo' fariseo len bal-lë' bönni' yudo' usedi narúajgaquië' Jerusalén, bulu'dubë' ga zoë' Jesús. <sup>2</sup> Bönni' yudo' ni bila'lé'enë' bönni' usëda queë' Jesús tahuë' yöta, biti' nuchí'agaquië' ná'agaquië', lë na' rnna: Biti' nayárigaca ca nalëbiguequinë' tunë' bönni' yudo' na'. Que lë ni na' gula'nnë' quégaquië'. <sup>3</sup> Yugu' bönni' yudo' fariseo na', en

ia'zica'rö bönachi judío tunë' ca gulëbiguequinë' gulunë' xuz xtó'ogaquië', ate' channö cabí ta'guíbi ná'agaquië' zían luzuí ca na' nalëbiguequinë' tunë', bití' ca' tahuë'. <sup>4</sup> Cate' tu'dxinë' röjõ'ugaquië' lu yë'ëyi, channö cabí ta'guibë' lë na' ca nalëbiguequinë' tunë', bití' ca' tahuë'. Zíanrö ca' tunë', yugu' le nalëbiguequinë' tunë'. Caní ta'guibë' zxiga' yõ'õna, en yugu' zxiga' guíë, en yugu' le táti'në'. <sup>5</sup> Que lë ni na' yugu' bönni' yudo' fariseo, en yugu' bönni' yudo' usedi gula'nábinë' Jesús, ta'nnë':

—¿Naru' cabí tunë' yugu' bönni' usëda quiu' ca gulëbiguequinë' gulunë' xuz xtó'oru', pero tahuë' yõta bití' nuchí'agaquië' ná'agaquië'?

<sup>6</sup> Bubi'ë didza' Jesús, rë' légaquië':

—Libí'ili', bönni' rulu'isö tsahui' cuinli'. Nácatë le gudíxjö'ë Isaías, bönni' ni' bë'ë didza' uláz queë' Dios, ca naca queëli'. Buzúajë' lu guichi, gunné':

Yugu' bönni' ni, len rú'agacasë' tunë' neda' bal, calëga idú ládxi'gaquië'.

<sup>7</sup> Níti'sö naca yöl-la' ba ta'gu'ë neda' tu' tu'sëdinë' le ta'nná bë' bönachi, calëga xibá quia'.

<sup>8</sup> Caní naca, tu' rucá'anali' le gunná bë'ë Dios, ate' runli' yugu' le nazí' láhuili' lu ná'agaca bönachi.

<sup>9</sup> Gudxë' ca' légaquië':

—Idú ládxi'li' rucá'anali' cá'asö le gunná bë'ë Dios para gunli' ca naca le nulaga loli' runli'. <sup>10</sup> Moisés gunné' caní: “Ben bal xuz xinó'o.” Gunnë' ca': “Nu ulidza zí' xuzi o xin'é, e, guli'gútité nu na'.” <sup>11-12</sup> Libí'ili' rnnali' caní: “Channö nu bönni' guíë' xuzë' o xiné'ë: Bití' gaca bi gunna' queëli', tu' naca Corbán.” (Didza' ni rna lu didza' xidza': Tu' nuzóa' quez queë' Dios yúgu'të.) Ní'irö rnnali': “Bití' run bayudxi bi gunë' bönni' na' quëgaquië' xuz xiné'ë.” <sup>13</sup> Caní naca, rucá'anali' cá'asö xtídzë'ë Dios para gunli' le nulaga loli' runli', yugu' le rudödili' lu ná'agaca zxi'ini xi'sóali'. Zíanrö ca' le caní runli'.

<sup>14</sup> Ní'irö Jesús bulidzë' bönni' zían na' nacu'ë ni', en rë' légaquië':

—Guli'zë nágali' didza' gu'a, yúgu'tëli', en guli'tséajni'i. <sup>15</sup> Bití' bi dë le riyaza nu bönni' le gaca gun ga bití' náquië' tsahui' lahuë' Dios, pero le rirúaj lë', lë ni gaca gun ga bití' náquië' tsahui' lahuë' Dios. <sup>16</sup> Channö zoa nágali', en riyönili', buli'zë nágali'.

<sup>17</sup> Cate' Jesús bulá'alenë' bönachi zían na', guyu'ë tu yu'u, ate' yugu' bönni' usëda queë' gula'nábinë' Lë' ca naca lë na' bucúdzü'ë didza'. <sup>18</sup> Jesús gudxë' légaquië':

—¿Riyádzjatsö ca' queëli' yöl-la' réajni'i? ¿Naru' cabí réajni'ili', yúgu'té le riyaza nu bönni', bití' gaca gun ga bití' náquië' tsahui' lahuë' Dios? <sup>19</sup> Naca caní tu' cabí riyaza icja ládxi'da'ahuë', pero lé'ësë' riyaza, ate' rurúaj lé'ë.

Tu' gunné' caní Jesús, buluí'inë' rë'u naca dxi'a yúgu'té le rë'aj ráguru'. <sup>20</sup> Gunnë' ca' Jesús:

—Le rirúaj lu bönni' run ga bití' náquië' tsahui' lahuë' Dios. <sup>21</sup> Caní naca, tu' ta'rúaj icja ládxi'do'gaquië' bönni' yugu' le ta'zá' ládxi'gaquië' le naca xihui', yugu' le tun ga tunë' dul-la' ta'guitsjë' xibá que yöl-la' nutsaga na', en yugu' le ruá' dö'. Tun ga tútië' bönachi, <sup>22</sup> en ta'banë', en ta'zë ládxi'gaquië' le dë que luzá'agaquië', en tu'ë dö', en ta'zí' yë'ë, en tu'zxë'ë, en ta'nná' zi'ë que luzá'agaquië', en tun ba zxön cuíngaquië', en tunë' le canöz. <sup>23</sup> Yúgu'té le xihui' caní ta'rúaj icja ládxi'da'ahuë' nu bönni', en tun ga bití' náquië' tsahui' lahuë' Dios.

*Tu nigula izá'a réajlë'ënu Jesús*  
(Mt. 15:21-28)

<sup>24</sup> Buzë'ë Jesús ni', ate' bidxinë' gala' ga nacué' yödzö Tiro, en yödzö Sidón. Guyázië' tu yu'u ni', en gú'unnë' cuntú nu inözi, pero bití' ca' guca ucachi' cuinë'. <sup>25</sup> Tu nigula zóabi' bi'i nigúlado' queënu, yu'u bö' xihui' lébi', biyöninu didza' rizë ca naca queë' Jesús, ate' la' bídatënu ga zoë' Jesús, en buzóa zxíbinu xini'ë. <sup>26</sup> Nigula ni bití' nácanu judío, pero nabábanu bönachi Sirofenicia. Gúta'yunu lahuë' Jesús ubéajë' bö' xihui' na' yu'u-bi' bi'i nigúlado' queënu. <sup>27</sup> Ní'irö Jesús gudxë'-nu, rnnë':

—Bë' lataj ulu'huö'aj zí'alö nupa nácgaca ca zxi'ini xan yu'u, tu' cabí naca dxi'a ugúaru' yöta quégacabi' bi'i na', en chú'unaru' le lógacaba' bö'cu'do'.

<sup>28</sup> Bubí'inu didza' nigula na', gúdxinu Jesús:

—Ön, Xan, pero yugu' bö'cu'do' nacué'aba' zxani ga tágubi', táguba' le bizxaj tu'huö'xaj ga na' tágubi'.

<sup>29</sup> Ní'irö Jesús gudxë'-nu, rnnë':

—Tu' gunnó' caní, huáca huö'aju'. Chiburúaj bö' xihui' na' guyú'u-bi' bi'i nigúlado' quiu'.

<sup>30</sup> Cate' budxinnu lídxinu, bilé'enu-bi' bi'i nigúlado' queënu na', dëbi' lu da'a, en chinurúaj bö' xihui' na' guyú'u lébi'.

*Jesús ruúnë' tu bönni' nacödzuë', en bití' gaca innë'*

<sup>31</sup> Burúajë' Jesús lataj na' nababa yödzö Tiro, ate' gudödë' gapa dë yödzö Sidón, en yugu' yödzö Decápolis, ate' bidxinë' ra' nísado' lu xiyú Galilea. <sup>32</sup> Bönachi ni' dujuá'gaca tuë' bönni' nacödzuë', en bití' raca innë' ga zoë' Jesús, ate' ta'ta'yu lahuë' Jesús ixóa në'ë lé'. <sup>33</sup> Jesús bubéajë' lé' tsölá'alö lád'agaca bönachi na', ate' bunë'ë xibön në'ë yeru náguië' bönni' na'.

Gurú'unë' zxóna'do', en gudanë' lúdxë'ë. <sup>34</sup> Ní'irö buyúé' lúzxibálö, en gunné lúdxë'ë, rnnë':

—Efata.

Didza' hebreo ni rnna lu didza' xidza': Gyalaj.

<sup>35</sup> La' böáljatë náguië', en la' buguítjatë lúdxë'ë, en gunnëtë' dxí'ado'. <sup>36</sup> Jesús gunná bé'enë' légaquië' cuntú nu ilë' ca', pero tsca gunná bé'enë' légaquië', bulu'zëtërë' ca' didza' que lë na' benë'. <sup>37</sup> Bulu'bánninë, ta'nnë':

—Tsáhui'do' runë' yúgu'të. Runë' ga tu'yöni nupa gulaca cödzu, en ga tu'i didza' nupa biti' guca ila'nnë.

## 8

*Rugahuë' Jesús zíanrö ca choá' gayuá' bönachi*

*(Mt. 15:32-39)*

<sup>1</sup> Yugu' dza na' bulu'dubi bönachi zían ga zoë' Jesús. Tu' cabí dë le ilágugaca, Jesús bulidzë' bönni' usëda queë', ate' bë'lenë' légaquië' didza'. <sup>2</sup> Gudxë' légaquië':

—Ruhuechi' lúdx'a a bönachi zían ni tu' chinaca tsonna dza nacua'len neda' ni, en biti' dë le ilágugaca. <sup>3</sup> Channö usól-la'a léguequi lúdxigaca ta'dunsö ca', huala'cuídi' la' nöza, tu' zá'gaca zi'tu' bál-lagaca.

<sup>4</sup> Bulu'bi'ë didza' bönni' usëda queë', të' Lë':

—¿Bizxi ugágutsaru' bönachi guizxi yu ni, ga ni naca lataj cá'asö?

<sup>5</sup> Gunábinë' Jesús légaquië', rnnë':

—¿Bál-laxi yöta xtila dë queëli'?

Të' Lë':

—Gádxisö.

<sup>6</sup> Ní'irö Jesús gunná bé'enë' bönachi zían na' ila'bö' lu yu. Gudélé'ë gadxi yöta xtila na', ate' gudxë' Dios: "Xclenu'." Ní'irö buzuxzjé' léguequi, en bë'ë quégaquië' bönni' usëda queë' para ila'guisië' lógaca bönachi zían na'. <sup>7</sup> Guta' ca' quégaquië' tu chópaba' böla cuidi'. Jesús gudxë' Dios: "Xclenu'", ate' gunná bé'enë' légaquië' ila'guisië' ca' légacaba' lógaca bönachi. <sup>8</sup> Gulagu yúgu'të bönachi na', en bulu'huölaj. Ní'irö bulu'tubë' le bizxaj nagá'anagaca, ate' gula'lí idú gadxi ga'böra. <sup>9</sup> Bönachi na' gulagu gulaca idú ca choá' gayuá'gaca. Jesús busöl-lë' léguequi lúdxigaca, <sup>10</sup> ate' gurenë' lë'e bárcodo' tsözxön len yugu' bönni' usëda queë', ate' bila'dxinë' lu xiyúgaca bönachi Dalmanuta.

*Ta'nábinë' Jesús gunë' tu le gaca bë' nuzxi náquië'*

*(Mt. 16:1-4; Lc. 12:54-56)*

<sup>11</sup> Ní'irö bila'dxinë' bönni' yudo' fariseo ga zoë' Jesús, en gula'sí lógaquië' ta'díl-lalenë' Lë' didza'. Gulë'ënnë' ila'z'í bë'ë Jesús. Que lë ni na' gula'nábinë' Lë' gunë' tu le naca bë' za' yehua' yubá. <sup>12</sup> Gunnëda' lúdxë'ë Jesús, rnnë':

—¿Bizz que ta'nábítsö bönachi ni neda' guna' tu le naca bē' za' yehua' yubá? Le nácatē rea' libí'ili', bití' ca' ilé'eli' tu le naca bē' za' yehua' yubá.

<sup>13</sup> Ní'irö bulá'alenē' légaquiē'. Bubenē' lē'e bárcodo', en sa'yéajē' ia'tsölá'a nísado'.

*Le tu'sēdinē' bönni' yudo' naca ca cúa zi que yöta xtila*  
(Mt. 16:5-12)

<sup>14</sup> Gulal-la ládxi'gaquiē' bönni' usēda queē' Jesús ilu'ē bi ilahuē', ate' tuz yöta xtila dē lē'e bárcodo' na'. <sup>15</sup> Ní'irö Jesús buzéajni'inē' légaquiē', rnnē':

—Buli'yútsöca' queēli'. Guli'gún chi'i cuinli' para cabí sí'ili' le naca ca cúa zi que yöta xtila quégaquiē' bönni' yudo' fariseo, en queē' Herodes.

<sup>16</sup> Gula'sí lógaquiē' tu'ē didza' bönni' usēda queē' la' légacasē', ta'nnē':

—Gunnē' caní tu' cabí dē yöta xtila gáguru'.

<sup>17</sup> Réquibe'enē' Jesús le ta'nnē', ate' rē' légaquiē':

—¿Bizz que ruí'ili' caní didza' tu' cabí dē yöta xtila gáguru'? ¿Naru' cabí réajni'itseli', en bití' réquibe'itseli'? ¿Ni nácatsö zidi icja ládxi'do'oli'? <sup>18</sup> ¿Zóatsö guiöj loli', en bití' rilé'eli', en zóatsö guídi nágali', en bití' riyönili'? ¿Naru' cabí röjnétseli'? <sup>19</sup> Cate' ni' buzuxzja' gayu' yöta xtila, ate' gulahuē' chi-un gáyu'ē bönni', ¿bál-laxi ga'böra bulili' le bizzaj butúbili'?

Gula'nnē':

—Chinnu.

<sup>20</sup> Gunnē' ca' Jesús:

—Cate' ni' buzuxzja' gadxi yöta xtila, ate' gulagu choá' gayuá' bönachi, ¿bál-laxi ga'böra bulili' le bizzaj butúbili'?

Gula'nnē':

—Gadxi.

<sup>21</sup> Ní'irö Jesús gudxē' légaquiē':

—¿Naru' cabí réajni'itseli' na'a, bē'a didza' que le tu'sēdinē' bönni' na'?

*Jesús ruúnē' bönni' Betsaida nachul-la lahuē'*

<sup>22</sup> Cate' Jesús, en bönni' dá'gaquiē' Lē' bila'dxinē' yödzö Betsaida, bila'dxín ga zoē' Jesús nupa dujuá'gaquiē' queē' tu bönni' nachul-la lahuē'. Ta'tá'yué' lahuē' canē' bönni' na'. <sup>23</sup> Jesús gudélé'ē nē'ē bönni' na' nachul-la lahuē', ate' guchē'ē lē' ní'ilo ra' yödzö. Ni' budxíé' zxöna' guiöj lahuē', en guxóa nē'ē lē'. Ní'irö gunábinē' lē', rnnē':

—¿Ba rilé'enu' lati'?

<sup>24</sup> Buyúé' bönni' na' nachul-la lahuē', rnnē':

—Rilé'egacada' bönachi, nalá'gaca ca yugu' yaga, pero ta'dá bönachi na'.

<sup>25</sup> Leyúbölö guxóa nē'ē Jesús guiöj lahuē', ate' buyúdē'ē bönni' na' nachul-la lahuē', ate' böácate' dxí'ado' guiöj lahuē'.

Na'a rilé'enë' dxí'ado' yúgu'të. <sup>26</sup> Ní'irö Jesús gusöl-lë'ë lë' lidxë', rnnë':

—Biti' tsöjdödu' lahui' yödzö, en cuntu nu guío' le bena' nu zoa lu yödzö ni.

*Rnnë' Pedro: "Jesús náquië' Cristo"*

*(Mt. 16:13-20; Lc. 9:18-21)*

<sup>27</sup> Gudödi na', bulu'zë'ë Jesús, en yugu' bönni' usëda queë' ni', ate' gula'dödë' yugu' yödzödo' nabábagaca Cesarea, ga na' rinná bë'ë Filipo. Tsanni ni' yú'ugaquië' nöza, Jesús rinabi yudxë' yugu' bönni' usëda queë', rnnë':

—¿Nuzxi ta'nná bönachi naca'?

<sup>28</sup> Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilé' bönachi nisa. Ta'nná ia'bal-la nacu' Elías, bönni' bë'ë didza' uláz queë' Dios dza ni'te. Ta'nná ia'bal-la nacu' bönni' yúbölö bë'ë didza' uláz queë' Dios dza ni'te.

<sup>29</sup> Ní'irö Jesús gunábinë' légaquië', rnnë':

—Nazxi libí'ili', ¿nuzxi rnnali' naca'?

Bubi'ë didza' Pedro, rnnë':

—Li' nacu' Cristo.

<sup>30</sup> Ní'irö Jesús gunná bé'enë' légaquië' cuntu nu ulu'siyönnë' Nu náquië'.

*Rigúxjö'ë Jesús ca si' ilútië' Lë'*

*(Mt. 16:21-28; Lc. 9:22-27)*

<sup>31</sup> Ní'irö gusí lahuë' Jesús rusëdinë' bönni' dá'gaquië' Lë', rnnë':

—Run bayudxi qui'i saca'a neda', Bönni' Guljë' Bönachi. Bönni' gula tu'zéajni'inë', en yugu' bixúz unná bë', en bönni' yudo' tu'sëdinë' ulu'zöë' neda' tsölá'alö. Ilútië' neda', pero cate' gaca tsonna dza ubana'.

<sup>32</sup> Yálajsö bë'lenë' légaquië' didza' ni. Ní'irö Pedro guchë'ë Jesús tsölá'alö, en gusí lahuë' ridil-lë' lë' didza'. <sup>33</sup> Buécjë' Jesús, en buyüë' ia'zícá'rë' bönni' usëda queë', ate' buzenë' bach Pedro, rnnë':

—Gucuita ga zoa'. Nacu' ca Satanás, tu' xihui'. Le rizá' ládXu'u bití' za' lu në'ë Dios, pero ca ta'zá' ládxi'gaca bönachi naca'.

<sup>34</sup> Ní'irö Jesús bulidzë' yugu' bönni' usëda queë', enca' bönachi nacuá' ni', en gudxë' légaquië':

—Channö rë'ënë' nu bönni' të'ë neda', ral-la' uzöë' tsölá'alö le rë'ëni quézinë', en gáquië' ca tu bönni' sa'yéajë' söjtë'ë lë'e yaga cruz, ate' ní'irö huáca të'ë neda'. <sup>35</sup> Nu bönni' ru'ida' ládXë'ë yöl-la' na'bán queë', unítie' le, pero nu bönni' unítie' yöl-la' na'bán queë' tu' dë'ë neda', o tu' dë'ë didza' dxí'a quia', udéli'në' bönni' ni yöl-la' na'bán queë'. <sup>36</sup> ¿Naru' uzi'tsë' xibë' tu bönni' channö utubë' yúgu'të le dë' yödzölió ni, pero uniti

cuinë'? <sup>37</sup> Biti' bi gaca unödzejë' tu bönni' le huóá'ui cuinë'.  
<sup>38</sup> Channö zoë' nu bönni' rutuí'inë' quia' neda', en que xtídza' a  
 lógaca bönachi ni nucá'anagaca Dios, en tun dul-la', lësca'  
 caní neda', Bönni' Guljë' Bönachi, utuí'ida' queë' bönni' na'  
 cate' guídalená' yöl-la' huáca zxön queë' Xuza', ate' dzágagaquië'  
 gubáz lá'ayi neda'.

## 9

<sup>1</sup> Jesús gudxë' ca' légaquië', rnnë':

—Le nácatë rea' libí'ili', nacuá' ni nupa biti' ilátigaca cate'  
 ilal'é'erö idinná bë'ë Dios luyú ni, en ilá' lahui yöl-la' huáca  
 zxön queë'.

*Ridzá'a ca riná' lahuë' Jesús*  
 (Mt. 17:1-13; Lc. 9:28-36)

<sup>2</sup> Cate' chigudödi xopa dza, Jesús guchë'ë Pedro, en Jacobo,  
 en Juan, ate' légacasë' yójáquië' tu lu guí'a sibi. Ni' bidzá'a ca  
 riná' lahuë' Jesús lógaquië' yonnë' na'. <sup>3</sup> Guyëpi yösa bení' lari'  
 nácuë' Jesús, ate' guca chiguíchido'os. Zxíla'do'os guca, le cuntú  
 nu ra' lari' yödžölió ni gaca gun chiguíchido'os ca guca lari'  
 na'. <sup>4</sup> Bulu'luí'i lógaquië' Elías, en Moisés, tuí'ilenë' Jesús didza'.  
<sup>5</sup> Ní'irö Pedro gudxë' Jesús:

—Bönni' Usedi, bica' ba rë'u zóaru' ni. Gúntsöca'tu' tsonna  
 yu'u lága'do', tu quiu', ia'tú queë' Moisés, en ia'tú queë' Elías.

<sup>6</sup> Caní gunné' Pedro tu' cabí nõzinë' bi na' rnnë', tu' tádxinë'  
 bönni' usëda queë' Jesús na'. <sup>7</sup> Ní'irö gur'ö böaj le gulú'u zxul-  
 la légaquië', ate' biyön chi'i nu ruí'i didza' lu böaj na', rnna:

—Bönni' ni Zxí'ina'. Nadxí'ida' Lë'. Buli'zë nágali' Lë'.

<sup>8</sup> La' bulu'yutë' pero cúnturö nu ta'lé'enë'. Tuzë' Jesús  
 zóalenë' légaquië'.

<sup>9</sup> Tsanni ni' yú'ugaquië' nõza, tu'dínnië' lu guí'a sibi na',  
 Jesús gunná bé'enë' légaquië' cuntú nu ulu'siyönnë' ca', lë  
 na' bila'lé'enë', cate' ubanrë' lu yöl-la' guti Lë', Bönni' Guljë'  
 Bönachi. <sup>10</sup> Que lë ni na' gula'gú'usë' ícjagaquië' didza' ni bë'ë,  
 ate' la' légacasë' ta'nabi yúdxinë' luzá'agaquië' bizxi sa'yéaj  
 didza' na' bë'ë, gunné' ubanë' lu yöl-la' guti. <sup>11</sup> Gula'nábinë'  
 Jesús, ta'nnë':

—¿Bizx que ta'nnë' bönni' yudo' usedi run bayudxi guídë'  
 Elías zí'alö ca guídë' Cristo?

<sup>12</sup> Bubi'ë didza' Jesús, rnnë':

—Le nácatë guídë' Elías zí'alö, en ucu'ë yúgu'të ca ral-la' gaca.  
 Na'a, ¿bizxi sa'yéaj le nazúaj lu guichi rnna run bayudxi qui'i  
 sáquë'ë Bönni' Guljë' Bönachi, ate' cá'asö ulu'cá'ana bönachi  
 Lë'? <sup>13</sup> Rea' libí'ili': Chibidë' Elías, ate' gulunë' queë' tsca  
 gulë'ënnë', tsca nazúaj lu guichi lá'ayi ca ral-la' gaca queë'.

*Jesús ruúnë'-bi' bi'i bönni' yu'u lëbi' bö' xihui'*

*(Mt. 17:14-21; Lc. 9:37-43)*

<sup>14</sup> Cate' ni' bulu'dxinë' Jesús, en bönni' dzágagaquië' Lë' ga na' nacu'ë ia'zica'rë' bönni' usëda queë' Jesús, bila'lé'enë' nacua' bönnachi zián ni', ate' bönni' yudo' tu'sëdinë' ta'díl-lalenë' yugu' bönni' usëda queë' na' didza'. <sup>15</sup> Cate' bönnachi zián na' bila'lé'e Jesús, bulu'bani, en carelö zá'gaca ga na' zë'ë, dijöd'xigaca Lë': "Padiux."

<sup>16</sup> Ní'irö Jesús gunábinë' yugu' bönni' usëda queë' na', rnnë':

—¿Bizxi didza' na' ridíl-lalenli légaquië'?

<sup>17</sup> Bubi'ë didza' tu bönni' nútsë'ë ladaj bönnachi zián na', rnnë':

—Bönni' Usedi, nachë'a-bi' bi'i bönni'do' quia' ni quiu', yu'u lëbi' bö' xihui' le run ga biti' raca innëbi'. <sup>18</sup> Cate' bö' xihui' na' ru'u lëbi', rurixi rutula lëbi' lu yu, ate' ribía bidxina' zidi' ruá'abi', en rutil-la láya'bi'. Que lë ni na' zeaj ridxítabi'. Gunábigacada'-në' bönni' usëda quiu' ulu'béajë' bö' xihui' na', pero biti' gula'zéqui'në'.

<sup>19</sup> Bubi'ë didza' Jesús, rnnë':

—Libi'ili', bönni' cabí ta'yéajlë'ë. ¿Gáca'xte caz ral-la' sóalena' libí'ili'? ¿Gáca'xte caz ral-la' guá' ilena' queëli'? Guli'diguá'-bi' quia' ni.

<sup>20</sup> Dujuá'agaquië'-bi' ga na' zoë' Jesús. Cate' bö' xihui' na' bilé'e Lë', la' buxízitë lëbi'. Gudzö'öbi' lu yu, ate' burixi butula lëbi', ate' bidxía bidxina' zidi' ruá'abi'. <sup>21</sup> Ní'irö Jesús gunábinë' xúzibi' bi'i na', rnnë':

—¿Gáca'xi chiguca raca caní queëbi'?

Rnnë' xúzibi' na':

—Ní' nácatebi' bí'ido' ré'ebi' caní. <sup>22</sup> Zián luzuí rirú'una lëbi' lu guí', en lu nisa para guti lëbi'. Que lë ni na', channö racu' lati', buéchi' ladxi' netu', gácalenu' netu'.

<sup>23</sup> Jesús gudxë' lë':

—Channö huáca tséajlë'u, yúgu'të huáca channö tséajlë'u Dios.

<sup>24</sup> La' bë'të' zidzaj didza' xúzibi' bi'i na', rnnë':

—¡Réajlë'a! ¡Gúcalen neda' para tséajlë'ëra' Lë'!

<sup>25</sup> Cate' bilé'enë' Jesús zá'gaca bönnachi zián, tu'quí Lë', buzenë' bach bö' xihui' na', rë' le:

—Li', bö' xihui' runu' ga biti' raca inná, en biti' raca yöni bönnachi, rinná bé'eda' li' uruju' lu bi'i ni, en bí'ti'rö tsu'u lëbi'.

<sup>26</sup> Gurödxi'a bö' xihui' na', en burixi butúlada' bi'i na'. Ní'irö burúajtë, en bucá'ana bi'i na' ca bi'i nati cázabi'. Ca' naca, gulu'i didza' bönnachi zián ni', ta'nná:

—Chinátibi'.

<sup>27</sup> Ní'irö Jesús gudélë'ë ná'abi', en buchisë'-bi', ate' guzuíbi' bi'i na'.

<sup>28</sup> Ní'irö guyázië' Jesús tu yu'u, ate' la' légasë' gula'nábinë' bönni' usëda queë' Lë', ta'nnë':



—¿Bizx que bití' guca ubéajtu' netu' bö' xihui' na'?

<sup>29</sup> Jesús gudxë' légaquië':

—Bití' gaca ubéajli' cá'asö bö' xihui' caní, pero tuz channö ulídzali'-në' Dios, en gunli' gubasa.

*Jesús rigu'xjö'ë leyúbölö ca si' ilútië' Lë'*

(Mt. 17:22-23; Lc. 9:43-45)

<sup>30</sup> Cate' bulu'zë'ë Jesús, en yugu' bönni' dá'gaquië' Lë' ni', gula'dödë' luyú Galilea. Bití' ré'ënë' Jesús nu inözi ga na' zoë'  
<sup>31</sup> tu' rusédinë' yugu' bönni' usëda queë'. Ré' légaquië':

—Ulu'dödë' neda', Bönni' Guljë' Bönachi, lu ná'agaquië' bönni' ilútië' neda', pero tödi gátia', cate' gaca tsonna dza ubana'.

<sup>32</sup> Bití' gula'yéajni'inë' didza' ni ré' légaquië', ate' tu' tádxinë', bití' bi gula'nábinë' Lë'.

*Nu naca lo*

(Mt. 18:1-5; Lc. 9:46-48)

<sup>33</sup> Ní'irö Jesús, en bönni' dá'gaquië' Lë' bila'dxinë' yödzö Capernaum, ate' tsanni ni' nacu'ë lu yu'u, Jesús gunábinë' légaquië', rnnë':

—¿Bizxi didza' na' gudíl-lalen luzá'ali' cate' ni' yú'uli' nöza?

<sup>34</sup> Légaquië' bulu'sayaj rú'ugaquië', tu' gula'díl-lalen luzá'agaquië' didza' la' nöza ni' núzxilögaquië' gáquië' bönni' lo. <sup>35</sup> Ní'irö gurö'ë Jesús, en bulidzë' idxínnutë' bönni' usëda queë'. Ré' légaquië':

—Nu ré'ëni gaca lo ral-la' gaca ca tu bönni' cuídi'sö, enca' ca ni'a ná'ali' yúgu'tëli'.

<sup>36</sup> Ní'irö Jesús gudélë'ë-bi' tubi' bí'ido', en buzöë'-bi' gatsaj láhui'lö ga na' nacu'ë. Ni' runidë'-bi', ré' légaquië':

<sup>37</sup> —Nu bönni' si' lu në'ë tu bí'ido' caní tu' néquibi' quia', si' lu në'ë ca' neda', ate' nu bönni' si' lu në'ë neda', calëga néda'sö si' lu në'ë, pero si' lu në'ë ca' Xuza', Bönni' na' nasöl-lë'ë neda'.

*Nu bití' ridá'baga' rë'u, rácalen rë'u*

(Mt. 10:42; Lc. 9:49-50)

<sup>38</sup> Ní'irö Juan gudxë' Jesús:

—Bönni' Usedi, bilé'etu'-në' tu bönni' rubéajë' yugu' bö' xihui', rugunë' dxin lo'. Gunná bé'etu' lë' bíti'rö gunë' ca', tu' cabí dë'ë rë'u.

<sup>39</sup> Ní'irö Jesús gudxë' lë':

—Bití' inná bé'eli'-në', tu' channö zoë' nu bönni' runë' tu yöl-la' huáca le za' yehua' yubá, en rugunë' dxin La' neda', bití' ca' gaca bönni' na' innë' zi'ë quia'. <sup>40</sup> Caní naca, nu bití' ridá'baga' rë'u, rácalen nu na' rë'u. <sup>41</sup> Núti'tës nu gunna queëli' tu zxíga'do' nisa gu'jali' tu' dá'ali' neda', Cristo, si'i caz nu na' le ral-la' gata' que.

*Zoa bönadxi queëru' gunru' ga nu gun dul-la'*  
(Mt. 18:6-9; Lc. 17:1-2)

<sup>42</sup> Gunnë' ca' Jesús:

—Núti'tës nu gun ga gunbi' dul-la' tubi' bí'ido' caní réajlë'ëbi' neda', gácarö dxi'a ugal-la' nu na' guichi riyëtu yaga yeni, en tsöjchú'una cuini lu nísado'. <sup>43</sup> Channö tu no'o gun ga gunu' dul-la', guchugu le. Dxi'arö gaca quiu' tsöjtsáziu' ga su' ibanu' zoa tuz no'o, calëga zoa chopa no'o, ate' tsöjtsáziu' lu guí' gabila, ga ni' biti' ulu guí' que. <sup>44</sup> Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu. <sup>45</sup> Lësca' caní, channö tu ni'u gun ga gunu' dul-la', guchugu le. Gácarö dxi'a quiu', tsöjtsáziu' ga su' ibanu' zoa tuz ni'u, calëga zoa chopa ni'u, ate' tsöjtsáziu' lu guí' gabila, ga ni' biti' ulu guí' que. <sup>46</sup> Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu. <sup>47</sup> Lësca' caní, channö tu guiöj lo' gun ga gunu' dul-la', guléaj le. Gácarö dxi'a quiu' tsöjtsáziu' ga rinná bë'ë Dios zoa tuz guiöj lo', calëga zoa chopa guiöj lo', ate' tsöjtsáziu' lu guí' gabila. <sup>48</sup> Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu.

<sup>49</sup> 'Ruxi'iru' bëla' zödi', en rugála'ru' le ra' guí', para cabí gaca ditaj. Lë ni rusedi rë'u ca ulu'huöáca dxi'a yúgu'të bönachi. Lësca' caní, rë'ënë' Dios izxí'i zödi' yúgu'të böa' bëdxido' tu'zëgui'gaquië'-ba' lu bucugu lá'ayi queë'. <sup>50</sup> Dxi'a naca zödi', pero channö initi yöl-la' siná'a que, ¿nacxi úniru' le siná'a? Guli'gaca la' libí'isili' ca zödi' dxi'a, sóali' dxí'ado' tuli' len ia'tuli'.

## 10

*Rusëdinë' Jesús que nu rulá' yöl-la' nutsaga na'*  
(Mt. 19:1-12; Lc. 16:18)

<sup>1</sup> Buzë'ë Jesús yödzö Capernaum, ate' guyijë' luyú Judea, en gudödë' ia'tsolá'a yegu Jordán saca' ga rilén gubidza. Bulu'dubi leyúbölö bönachi zían ga zoë', ate' leyúbölö busëdinë' légaquië' ca run cazë'. <sup>2</sup> Ní'irö bila'dxinë' bönni' yudo' fariseo ga zoë' Jesús, ate' té'ënnë' ilunë' ga bi innë' Jesús para gaca ulu'zëguië' Lë' didza'. Gula'nábinë' Lë', ta'nnë':

—¿Dë lataj bönni' nutsaga në'ë usané'-nu nigula queë'?

<sup>3</sup> Bubi'ë didza' Jesús, rnnë':

—¿Bizxi gunná bé'enë' Moisés libí'ili'?

<sup>4</sup> Gula'nnë':

—Moisés bë'ë lataj nu bönni' uzúajë' lu guichi le rnna rulá'alënë'-nu nigula queë' na', ate' ní'irö usané'-nu.

<sup>5</sup> Bubi'ë didza' Jesús, rnnë':

—Gunná bé'enë' Moisés libí'ili' caní tu' naca zidi icja ládxi'do'oli', <sup>6</sup> pero cate' gusí lo rata' yödzölió, Dios benë'

légaquië' bönni', en nigula. <sup>7</sup> Gunnë': "Que lë ni na' ucá'anë' bönni' xuz xinë'ë, en tsöjsóalenë'-nu nigula queë', <sup>8</sup> ate' chopë' ni ulu'huóaqië' ca tuz bönachi." Que lë ni na' bíti'rö nácagaquië' chopë' pero tuz chinácagaquië'. <sup>9</sup> Que lë ni na' ca', nu naca bönachi biti' ral-la' ulá'a nupa na' chinutságuië' Dios.

<sup>10</sup> Cate' gula'yázië' yu'u, gula'nabi yúdxinë' bönni' usëda queë' Jesús ca naca didza' na' bë'ë. <sup>11</sup> Jesús gudxë' légaquië':

—Núti'tës bönni' ulá'alenë'-nu nigula queë', en utsaga ná'alenë'-nu nigula yúbölö, runë' dul-la' le riguitsaj xibá que yöl-la' nutsaga na' tu' rusubáguë'ë-nu dul-la' nigula na' guzóalenë'-nu zí'alö. <sup>12</sup> Lësca' caní channö tu nigula nutsaga ná'lennu bönni' usannu-në', en sí'ínu-në' bönni' yúbölö, runnu ca' dul-la' le riguitsaj xibá que yöl-la' nutsaga na'.

*Jesús rulidza tsáhuë'ë-bi' yugu' bí'ido'*  
(Mt. 19:13-15; Lc. 18:15-17)

<sup>13</sup> Ní'irö bila'dxín bönachi ga zoë' Jesús dujuá'gaquië' bí'ido' quéguequi. Të'ëni ixóa në'ë légacabi', ate' gula'sí lógaquië' bönni' usëda queë' Jesús ta'dil-la dídza'gaquië' nupa na' dujuá'agaca légacabi'. <sup>14</sup> Cate' bilé'enë' Jesús lë ni, gulénë' légaquië', en gunné':

—Guli'güf'-gácabi' bí'ido' lataj ila'dxinbi' quia'. Biti' uzága'gacali'-bi', tu' gata' quégaca nupa nácagaca ca bí'ido' ni, lataj ga rinná bë'ë Dios. <sup>15</sup> Le nácate' rea' libí'ili': Nu cabí si' lu në'e le rinná bë'ë Dios ca runbi' tu bí'ido', biti' ca' tsaza ga ni rinná bë'ë.

<sup>16</sup> Ní'irö Jesús bunidë'-bi' yugu' bí'ido' na'. Guxóa në'ë légacabi', en bulidza tsáhuë'ë-bi'.

*Bönni' cuidi' napë' yöl-la' tsahui'*  
(Mt. 19:16-30; Lc. 18:18-30)

<sup>17</sup> Cate' bu'ë Jesús nöza, carelö bidë' tu bönni', en buzóa zxibë' lahuë' Jesús, en gunábinë' Lë', rnnë':

—Bönni' Usedi idú dxi'a, ¿nacxi guna' para idéli'da' yöl-la' na'bán idú?

<sup>18</sup> Jesús gudxë' lë':

—¿Bizx que ru'u neda' didza', rnno': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. <sup>19</sup> Chinöz quézinu' yugu' le gunná bë'ë Dios, gunné':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innió' que luzó'o le cabí nácate'.

Biti' ucáchi'lanu'.

Ben bal xuz xinó'o.

<sup>20</sup> Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni' nácatea' bí'ido'.

21 Len yöl-la' dxi'i ladxi' queë', Jesús buyüë' lë', rnnë':

—Tu le riyadzaj quiu'. Guyéaj, yöjèti' yúgu'të le dë quiu', en bunödzej quégaca bönachi yechi' lë na' si'u, ate' gata' quiu' yöl-la' tsahui' yehua' yubá. Ní'irö huödu' quia', gacu' ca tu bönni' sa'yéajë' söjtë'ë lë'e yaga cruz, ate' to'o neda'.

22 Cate' biyönnë' didza' ni, bu'innë', ate' söhuöjë' risëbi lãdxë'ë tu' dëda' yöl-la' tsahui' queë'.

23 Ní'irö buyüë' Jesús gásibi'ilë', en gudxë' yugu' bönni' usëda queë':

—Böniga naca ila'yaza nupa ta'lë'e yöl-la' tsahui' ga rinná bë'ë Dios.

24 Bulu'bánninë' bönni' usëda queë' ca naca xtídzë'ë, ate' leyúbölö Jesús gudxë' légaquië':

—Libi'ili', xzí'ina'do', böniga naca ila'yázië' bönni' tu'zxöni lãdxi'gaquië' yöl-la' tsahui' quégaquië' ga rinná bë'ë Dios.

25 Nácarö böniga tsázië' nu bönni' rilé'enë' yöl-la' tsahui' ga rinná bë'ë Dios, ca tödiba' böa' ta'bía-ba' bönachi lu nagui yötsi'.

26 Cate' bila'yönnë' didza' ni, bulu'bánnitëronë' ca'. Ta'nnë' la' légacasë':

—¿Nuzxi caz gaca ulá, channö?

27 Buyüë' Jesús légaquië', rnnë':

—Biti' gaca gun bönachi lë ni, pero huáquië' Dios, tu' rizéqui'në' Dios yúgu'të.

28 Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Li'.

29 Bubi'ë didza' Jesús, rnnë':

—Le nácatë rea' libí'ili', nu bönni' ucá'anë' lidxë', o böchë'ë, o zanë', o xuzë', o xinë'ë, o nigula queë', o yugu' xzí'inë', o xiyüë', tu' runë' xichina' o tu' runë' libán que didza' dxi'a quia', 30 bönni' ni huazí' queë' ia'tú gayuá'tërö ca' dza ni zóaru' na'a, yugu' lidxë', en yugu' böchë'ë, en yugu' zanë', en yugu' xinë'ë, en yugu' xzí'inë', en yugu' xiyüë', enca' yugu' le ila'bía lãdxi'gaca bönachi lë', ate' lu yödzölió si' za', gata' yöl-la' na'bán idú queë'. 31 Zían nupa nácgaca lo na'a, ilaca cuídi'sö ni', ate' nupa nácgaca cuídi'sö na'a, ilaca lo ni'.

*Leyúbölö rigúxjö'ë Jesús ca si' ilútië' Lë'*

*(Mt. 20:17-19; Lc. 18:31-34)*

32 Cate' ni' yú'ugaquië' nöza, ta'benë' söjáquië' Jerusalén, nanöruë' Jesús lógaquië' bönni' usëda queë'. Nanítiguequinë', en lu yöl-la' rádxisö söjácalenë' Lë'. Leyúbölö Jesús guchë'ë quez idxínnutë' na'. Gusí lahuë' ru'ilenë' légaquië' didza' ca naca le ral-la' gaca queë'. 33 Rnnë':

—Rilé'e quézili' ribenru' zéajru' Jerusalén ga ni' zoa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usedi, ate' chúguië' quia' gátia',

en ulu'dödë' neda' lu ná'agaquië' bönni' zi'tu'. <sup>34</sup> Bönni' na' ulu'titjë' neda', en ilündë'ë neda' zi'. Ulu'chejë' neda' zxöna'. Ní'irö ilútië' neda', pero cate' gaca tsonna dza ubana' lu yöl-la' guti.

*Jacobo en Juan ta'nábinë' Jesús bi gunë' quégaquië'*  
(Mt. 20:20-28)

<sup>35</sup> Ní'irö gula'biguë'ë Jacobo, en Juan, zxí'inë' Zebedeo, lahuë' Jesús, en të' Lë':

—Bönni' Usedi, rë'ënitü' gunu' queëtu' le inábatu'.

<sup>36</sup> Jesús gudxë' légaquië':

—¿Bizxi rë'ënili' guna' queëli'?

<sup>37</sup> Gulë' Lë':

—Cate' idxin dza cö'u ga inná bë'u, ben ga cö'ötu' tutu' cuitu' ibëla, en ia'tutu' cuitu' yögöla.

<sup>38</sup> Ní'irö Jesús gudxë' légaquië':

—Biti' nözili' bi rinábali'. ¿Naru' huáca sí'ili' le ral-la' si'a neda', le naca le qui'i saca'a? ¿Naru' huáca idílali' nisa ca idila' neda' nisa, gátia'?

<sup>39</sup> Bulu'bi'ë didza', ta'nnë':

—Huácatu'.

Jesús gudxë' légaquië':

—Le nácatë, le qui'i saca'a neda', sí'ili' ca' libí'ili', en ca idila' neda' nisa, idílali' ca' nisa, <sup>40</sup> pero biti' dë lu na'a cöa' nu cuía cuita' ibëla, en nu cuía cuita' yögöla. Dios unödzejë' quégaquië' bönni' chinupë'ë quégaquië' yugu' lataj na'.

<sup>41</sup> Cate' bila'yönnë' ia'chië' bönni' usëda queë' Jesús didza' ni, gula'lenë' Jacobo, en Juan na'. <sup>42</sup> Ní'irö Jesús bulidzë' légaquië', rnnë':

—Nöz quézili' ca tun nupa ta'nná be'e yugu' yödzö, tu'zenë' bach bönachi, ate' nupa nácgaca lo ladjagaquië' ta'nná be'e luzë'eguequi. <sup>43</sup> Biti' gaca caní queëli', pero nu guë'ëni gaca zxön ga zóali', ral-la' gun xichinli' ia'zíca'röli', <sup>44</sup> ate' núti'tëslöli' nu guë'ëni gaca lo ral-la' gaca ca bönni' huen dxin tsaz queëli' yúgu'tëli'. <sup>45</sup> Caní ral-la' gunli' tu' bida' ni neda', Bönni' Guljë' Bönachi, calëga para nu gun xichina', pero para guna' xichíngaca bönachi, en udöda' yöl-la' na'bán quia' le huóá'uida' bönachi zían.

*Jesús ruúnë' Bartimeo, bönni' lo chul-la*  
(Mt. 20:29-34; Lc. 18:35-43)

<sup>46</sup> Ní'irö bila'dxinë' Jesús, en yugu' bönni' dá'gaquië' Lë' yödzö Jericó. Cate' ni' rurujë' Jesús yödzö ni, dzágagaquië' Lë' yugu' bönni' usëda queë', enca' bönachi zían. Ra' nöza ni' rö'ë tu bönni' nachul-la lahuë', lë' Bartimeo, zxí'inë' Timeo. Rinabë' nu bi gúnнасö queë'. <sup>47</sup> Cate' biyönnë' Bartimeo ridödë' Jesús, bönni' Nazaret, ni', gusí lahuë' ru'ë zidzaj didza', rnnë':

—¡Jesús, xzí'ini xi'sóë David! ¡Buéchi' ladxi' neda'!

48 Nupa ta'dodi ni' gula'dil-la lë' didza'. Të lë':

—Busayaj ru'u.

Ní'irö zídzejrö bulidzë', rnnë':

—¡Xzí'ini xi'sóë David! ¡Buéchi' ladxi' neda'!

49 Ní'irö guzóë' dxisö Jesús, ribözë', ate' rë' légaquië':

—Buli'lidzë'.

Bulu'lidzë' bönni' na' nachul-la lahuë'. Të lë':

—¡Butipa lãdxu'u! ¡Guyaschi! ¡Rulidzë' li'!

50 Ní'irö gurú'unë' tsólá'alö lari' naxóa yenë'. La' guyásatë', en bidë' ga na' zoë Jesús. 51 Jesús gunábinë' lë', rnnë':

—¿Bizxi rë'ënu' guna' quiu'?

Bubi'ë didza' bönni' na' nachul-la lahuë', rnnë':

—Bönni' Usedi, rë'ënda' gunu' ga huóalaj guiöj lahua'.

52 Jesús gudxë' lë':

—Böaj lidxu'. Chinuhuóacu' tu' réajlë'u neda'.

La' böáljatë guiöj lahuë', ate' sa'yéajlenë' Jesús.

## 11

### *Riyazië' Jesús yödzö Jerusalén*

(Mt. 21:1-11; Lc. 19:28-40; Jn. 12:12-19)

1 Bila'dxinë' Jesús, en yugu' bönni' dá'gaquië' Lë' gala' ga dë Jerusalén, ga na' nacua' yödzö Betfagé, en yödzö Betania, en ga na' dë ca' Gu'a Yaga Olivo. Ní'irö Jesús gusöl-lë'ë chopë' bönni' usëda queë', 2 en rë' légaquië':

—Guli'tséaj lu yödzödo' dë loru' ni', en cate' tsú'uli' ni', tsöjxáca'li'-ba' tuba' búrrodo' nága'ba' ni', en cuntu nu ribíani lëba'. Guli'sedxi-ba', en guli'chë'-ba' quia' ni. 3 Channö nu bi guië libí'ili' tu' runli' lë ni, guli'guië nu na': "Xanru' riquinnë'-ba', ate' la' usól-la'të'-ba' quiu'."

4 Ní'irö yöjáquië', en yöjxáca'gaquië'-ba' búrrodo' na', nága'ba' ra' nöza ga nu riyaza lö'a, ate' gula'sedxë'-ba'. 5 Nupa nacua' ni' tē légaquië':

—¿Bizxi ni runli'? ¿Bizx que risédxili'-ba' búrrodo' na'?

6 Bulu'bi'ë didza' bönni' usëda queë' Jesús, gulë' légaquië' ca na' chigudxi cazë' Jesús légaquië', ate' gulu'ë légaquië' lataj.

7 Ní'irö gula'chë'-ba' búrrodo' na' ga na' zoë Jesús. Gula'xóë' lari' quégaquië' cúdzu'ba', ate' Jesús gudxíë'-ba'. 8 Zían bönni' nacu'ë ni' gula'chiljë' lari' quégaquië' gapa naca la' nöza. Ia'bal-la bönachi ni' gula'guítsaj zin le bulu'zxóa la' nöza.

9 Gula'sí lo nupa nanörugaca lahuë' Jesús, en nupa na' zá'gaca cúdzu'lë' tuí' zidzaj didza', ta'nnë':

—¡Yöl-la' ba! ¡Xanru' Dios gun lá'ayë' Bönni' zë'ë ni, nasól-lë'ë Dios Lë'! 10 ¡Dios gun lá'ayë' Bönni' ni sí' inná bë'ë, ca na' gunná bë'ë xuz xtó'oru' David! ¡Yöl-la' ba Dios!

11 Caní guca, bidxinë' Jesús Jerusalén, ate' guyázië' lö'a yudo'. Cate' budxi buyüë' yúgu'të le nacua' idú gásibi'ilö ni', burúajë' zaca' yödzö Betania tu' chiridzö', ate' dzágagaquië' Lë' yugu' bönni' usëda queë'.

*Jesús rulidza zi'ë tu yaga higo*

*(Mt. 21:18-19)*

12 Cate' za' rení ia'tú dza, ate' tu'rúajë' Jesús, en yugu' bönni' dá'gaquië' Lë' yödzö Betania, ridunë' Jesús. 13 Zi'tu' bilé'enë' tu yaga higo dxía xilagui'. Gubígui'ë ga na' zoa yaga na' channö utsöjxaquië' lati' le ribía. Cate' bidxinë' ni' biti' bi yöjxáquië' le ribía. Xilágui'sö dxía tu' cabí ridxini dza cuía. 14 Ní'irö Jesús bulidzë' yaga na', rnnë':

—Bíti'rö nu gagu le ribía quiu'.

Yugu' bönni' usëda queë' bila'yönnë' didza' ni.

*Jesús rulatjë' lö'a yudo'*

*(Mt. 21:12-17; Lc. 19:45-48; Jn. 2:13-22)*

15 Cate' bila'dxinë' Jesús, en yugu' bönni' dá'gaquië' Lë', yödzö Jerusalén, guyázië' Jesús lö'a yudo', en gusí lahuë' rubéajë' ní'ilö nupa tuti', en nupa to'o lu lö'a yudo'. Burixë' yugu' blaga quegaca nupa tu'tsá' dumí izá'a, enca' yugu' ga ta'bö' nupa tuti' yugu' gu'dödo'. 16 Biti' ca' bë'ë lataj nu bi guá', uzóa nöza ga naca lö'a yudo'. 17 Busëdinë' nupa nacua' ni', rnnë':

—Nazúaj lu guichi lá'ayi, rna: “Lidxa' si'i le, yu'u ga bönachi iduté yödzölió ulu'lidza Dios.” Libí'ili' chinunli' le ca naca lídxigaca gubán.

18 Cate' yugu' bixúz unná bë', en yugu' bönni' yudo' usedi bila'yönnë' didza' ni, gula'sí lógaquië' tu'guiljë' nacxi ilútië' Jesús, pero tu' tádxinë' le ilún bönachi, biti' bi gulunë' queë', tu' tu'bani yúgu'të bönachi ca naca le rusëdinë' Jesús. 19 Cate' chiridzö' burúajë' Jesús lu yödzö na'.

*Ribidxi yaga higo bulidza zi'ë Jesús*

*(Mt. 21:20-22)*

20 Cate' za' rení ia'tú dza, gula'dödë' Jesús, en yugu' bönni' dá'gaquië' Lë' ga zoa yaga higo na' bulidza zi'ë Jesús, en bila'lé'enë' le, chinabidxi idú luí. 21 Ní'irö yöjnenë' Pedro bi guca, ate' gudxë' Jesús:

—Bönni' Usedi, buyútsöca'. Chinabidxi yaga higo ni bulidza zi'u néaje.

22 Bubi'ë didza' Jesús, rë' légaquië':

—Guli'tseajlë' Dios. 23 Le nácatë rea' libí'ili', channö nu bönni' guíë' gu'ado' ni: “Gucuíta ni, yöjsóa lu nísado”, en biti' gaca chopa ládxë'ë bönni' na', pero idú ládxë'ë tseajlë'ë gunë' Dios ca na' rnnë', ca' gaca. 24 Que lë ni na' rea' libí'ili': Yúgu'të

le inábali' cate' ulídzali'-nē' Dios, guli'tséajlě' chibennē' Dios queēli' lē na' rinábali', ate' gunnē' queēli'. <sup>25</sup> Cate' ni' rulídzali'-nē' Dios, channō zoa nu rileli' nu bi ben queēli', buli'niti lo nu na', para uniti lahuē' ca' libí'ili' Xúzili' na' zoē' yehua' yubá ca naca dul-la' nabága'li'. <sup>26</sup> Channō cabí uniti loli' bōnachi, bití' uniti lahuē' Xúzili' zoē' yehua' yubá libí'ili' dul-la' nabága'li'.

*Yöl-la' unná bē' dē lu nē'ē Jesús*

*(Mt. 21:23-27; Lc. 20:1-8)*

<sup>27</sup> Ní'irō Jesús, en yugu' bōnni' dá'gaquiē' Lē' yōjhuōjgaquiē' Jerusalén. Cate' ni' ridē' Jesús ga naca chila yudo', bila'dxinē' yugu' bixúz unná bē', en yugu' bōnni' yudo' usedi, en bōnni' gula tu'zéajni'inē', ga zoē'. <sup>28</sup> Gula'nábinē' Jesús, ta'nnē':

—¿Bizxi yöl-la' unná bē' dē lu no'o runu' yugu' lē ni? ¿Nuzxi caz budōdi lu no'o yöl-la' unná bē' gunu' caní?

<sup>29</sup> Bubi'ē didza' Jesús, rē' légaquiē':

—Neda' ca' inábida' libí'ili' tu didza'. Channō ubí'ili' quia' didza', ní'irō guía' libí'ili' bi yöl-la' unná bē' rúnida' yugu' lē ni.

<sup>30</sup> ¿Nuzxi budōdi lu nē'ē Juan uquilē' bōnachi nisa? ¿Naru' Dios o bōnachi? Guli'nnátsōca'.

<sup>31</sup> Gula'sí lógaquiē' tun xtídza'gaquiē' la' légacasē', ta'nnē':

—Channō innaru' Dios gusöl-lē'ē lē', guíē' rē'u: “¿Bizx que bití' guyéajlě'ēli' lē'?” <sup>32</sup> ¿Naru' guíētsaru'-nē': Gula'söl-lē'ē bōnni' lē'?

Caní ta'zá' ládxi'gaquiē' tu' tádxinē' le ilún bōnachi zían nacuá' ni' tu' téquiguesqui yúgu'tē bōnachi na' bē'ē didza' Juan na' uláz queē' Dios. <sup>33</sup> Que lē ni na' gulē' Jesús:

—Bití' nōztu'.

Ní'irō Jesús gudxē' légaquiē':

—Neda' ca' bití' quíxjōi'ida' libí'ili' bi yöl-la' unná bē' dē lu na'a rúnida' yugu' lē ni.

## 12

*Rucúdzu'ē didza' Jesús ca gaca quégaca huen dxin bití' náca gaca tsahui'*

*(Mt. 21:33-46; Lc. 20:9-19)*

<sup>1</sup> Ní'irō gusí lahuē' Jesús ru'ilenē' yugu' bōnni' dá'gaquiē' Lē' didza' yugu' le rucúdzu'ē didza', rnnē':

—Guzóē' tu bōnni', budē'ē lubá uva zían ga naca lu xiyúē'. Guléquiē' lē'a que, en guchō'ōnē' tu rōga' guíōj ga isíē' xisi uva na'. Budxíē' tu yu'u gupa ga naca xítsá' ga nu uyú xiyúē' na'.

'Ní'irō budōdē' xiyúē' na' lu ná'agaquiē' huen dxin, ila'zi'ē gatsaj huéaj le unōdzaj, ate' guyijē' yōdzō zi'tu'. <sup>2</sup> Cate' bidxín dza ulu'chibē' le ribía, gusöl-lē'ē-bi' bi'i huen dxin tsōjxí'ibi' lu ná'agaquiē' huen dxin na' le ral-la' si'ē xanbi' que le gula'bia lubá uva na'. <sup>3</sup> Ní'irō yugu' huen dxin na' gula'guélé'ē-bi' bi'i



na', en gulundë'-bi' zi', ate' bulu'söl-lë'-ë-bi' cá'asöbi'. <sup>4</sup> Ní'irö bönni' xan luyú na' gusöl-lë'-ë-bi' ia'tubi' bi'i huen dxin queë', ate' bi'i ni bulu'ladxë'-bi' guiöj. Bulu'lë'ë ícjabi'. Gulu'ë dö queëbi'. <sup>5</sup> Ní'irö bönni' xan luyú na' gusöl-lë'-ë-bi' ca' ia'tubi' bi'i huen dxin queë', ate' bi'i ni gulútië'-bi'. Gusöl-lë'-ë-bi' ca' ziánröbi', ate' bál-labi' gulúngacadë'-bi' zi', en ia'bál-labi' gulútigaquië'-bi'.

<sup>6</sup> 'Cúnturö nu nagá'ana queë' xan luyú na'. Nagá'anasibi' xzí'inë', ate' nadxí'ide'enë'-bi'. Ga yöjsetë, gusöl-lë'-ë-bi' xzí'inë', rnnë': "Ilunë' bal xzí'ina'." <sup>7</sup> Ní'irö yugu' bönni' huen dxin na' gula'nnë' la' légacasë, ta'nnë': "Bi'i ni ral-la' guequi queëbi' luyú ni. Guli'dá, gútiru'-bi', ate' guequi queëru' luyú ni." <sup>8</sup> Que lë ni na' gula'zönë'-bi', en gulútië'-bi'. Gula'ru'unë'-bi' ní'ilö ga dá'gaca lubá uva na'.

<sup>9</sup> Ní'irö Jesús gunábinë' bönni' nacu'ë ni', rnnë':

—¿Nacxi gunë' bönni' xan luyú na', channö? Huidë', en gútigaquië' bönni' huen dxin na', ate' udödë' luyú na' lu ná'gaquië' bönni' yúbölö.

<sup>10</sup> ¿Naru' cabí nulábanili' lë na' nazúaj lu guichi lá'ayi? Caní rna:

Guiöj na' gula'ru'unë' bönni' tu'cu'ë zö'ö, na'a naca guiöj len, squin zö'ö.

<sup>11</sup> Xanru' Dios benë' ga naca caní ate' rubániru' ca naca lë ni rilé'eru'.

<sup>12</sup> Ní'irö ta'zóa ta'bö'ë ila'zönë' Jesús tu' téquibe'enë' bucúdzu'ë didza' ca naca quégaquië', pero tádxinë' le ilún bönachi zían nacua' ni', en que lë ni na' bulu'cá'anë' Lë', söhuöjgaquië'.

*Ca naca le ta'guíxaj lázagaca bönachi*  
(Mt. 22:15-22; Lc. 20:20-26)

<sup>13</sup> Gudödi lë ni yugu' bönni' yudo' unná bë' na' gula'söl-lë'ë bal-lë' bönni' yudo' fariseo len bönni' dá'gaquië' Herodes ga zoë' Jesús para ilunë' ga bi innë' para gaca ulu'zéguië' Lë' didza'. <sup>14</sup> Bila'dxinë' bönni' ni ga na' zoë' Jesús, en të' Lë':

—Bönni' Usedi, nözitu' ru'u didza' idútë li. Biti' ru'í ládxi'u bi ta'nnasö bönachi, tu' cabí ruyusu' le tu'lú'isö cuínguequi bönachi, pero rusédinu' ca nácatë le rë'ënë' Dios ilún bönachi. ¿Ru'í netu' lataj xibá queë' Moisés quíxaj laztu' le tu'quíxjé' uláz queë' César? ¿Naru' uguíxajtu' o bití' quíxajtu'?

<sup>15</sup> Réquibe'enë' Jesús tu'ë didza' lu yöl-la' riguílaj ladxi' quégaquië', ate' rë' légaquië':

—¿Bizx que rubéajli' neda' didza'? Guli'diguá'tsöca' tu dumí ridá para ilé'eda' le.

<sup>16</sup> Diguá'agaquië' le, ate' Jesús gunábinë' légaquië', rnnë':

—¿Nuzxi lahui da' lë'e ni, en nuzxi lë ni?

Bulu'bi'ë didza', ta'nnë':

—Queë' César na'.

<sup>17</sup> Ní'irö Jesús gudxë' légaquië', rnnë':

—Buli'nödzej queë' César le nequi queë' César, ate' queë' Dios le nequi queë' Dios.

Bulu'báninë' ca naca didza' bubi'ë Jesús.

*Ca naca que yöl-la' rubán lu yöl-la' guti*

(Mt. 22:23-33; Lc. 20:27-40)

<sup>18</sup> Ní'irö bila'dxinë' bal-lë' bönni' yudo' saduceo ga zoë' Jesús. Bönni' ni ta'nnë' biti' ulu'bán nupa chinátigaca. Que lë ni na' gulë' Jesús, ta'nnë':

<sup>19</sup> —Bönni' Usedi, Moisés nuzúajë' queëru' lu guichi channö gatië' tu bönni' biti' zoa bi'i queë', ate' ugá'ananu nigula queë', bi'i böchë'ë bönni' na' ral-la' utsaga ná'alenbi'-nu, en uzóabi' bí'ido' gácabi' bi'i queëbi' böchi'bi'. <sup>20</sup> Gula'cuá'abi' gádxibi' bi'i nácagacabi' böchi'gacabi'. Bi'i huáca na' butsga ná'alenbi'-nu nigula, ate' gútibi', cuntú nu zoa bí'ido' queëbi'. <sup>21</sup> Bi'i buropi na' butsga ná'alenbi'-nu nigula uzëbi na', ate' gútibi' ca', cuntú nu zoa bí'ido' queëbi'. Lësa' caní guca queëbi' bi'i bunni. <sup>22</sup> Caní guca, bulu'tsaga ná'alenbi'-nu yúgu'tëbi', cuntú nu zoa bí'ido' quegacabi'. Ga yöjsetë, gútinu ca' nigula na'. <sup>23</sup> Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'alenbi'-nu igádxitëbi'?

<sup>24</sup> Bubi'ë didza' Jesús, rë' légaquië':

—Richíxili' tu' cabí núnbë'ëli' le nazúaj lu guichi lá'ayi, en biti' nözili' ca naca yöl-la' huáca queë' Dios. <sup>25</sup> Cate' ulu'bán nupa chinátigaca, biti' ca' ulu'tsaga ná'agaquië', ate' yugu' bönni' biti' ila'cuá'lenë' nigula, pero ilácagaquië' ca nácagaquië' gubáz lá'ayi queë' Dios, nacu'ë yehua' yubá. <sup>26</sup> Na'a, ca naca quegaca nupa chinátigaca channö ulu'bán, ¿naru' cabí nulábanili' le buzúajë' lu guichi Moisés? Rúfi didza' ca na' bulidzë' Dios lë' lu yaga yótsi'do' régui. Gudxë' lë': “Neda' naca' Dios queë' Abraham, en Dios queë' Isaac, en Dios queë' Jacob.” Tu' gunnë' caní quegaquië', naca bë' nabángaquië' sal-la' gulátië' zí'alö. <sup>27</sup> Dios náquië' Dios quegaca nupa nabángaca, calëga quegaca nupa nátigaca tsaz. Richíxitëroli'.

*Le naca lo le gunná bë'ë Dios*

(Mt. 22:34-40)

<sup>28</sup> Bidë' ca' tu bönni' yudo' usedi ga zoë' Jesús. Biyönnë' ca na' gulu'ilenë' Jesús didza', en nözinë' dxí'ado' bubi'ë Jesús didza'. Que lë ni na' gunábinë' Jesús, rnnë':

—¿Bízxilö le gunná bë'ë Dios nácaterö lo ca yúgu'të le gunná bë'ë?

<sup>29</sup> Bubi'ë didza' Jesús, rë' lë':

—Le gunná bē'ē le nácatērō lo ca yúgu'tē naca lē na' rna: “Guli'yōni bōnachi Israel. Xanru' Dios, tuzē' Lē' náquiē' Xanru'.<sup>30</sup> Ral-la' idxí'inu' Xanu' Dios idú ládxi'u, en lu idú icja ládxi'do'o, en lu idú yōl-la' réajni'i quiu', en lu idú yōl-la' huáca quiu'.” Lē ni naca le gunná bē'ē le nácatērō lo.<sup>31</sup> Le gunná bē'ē le naca buropi, lēbisō ca naca. Caní rna: “Ral-la' idxí'inu' luzó'o ca nadxí'i cuinu'.” Biti' ca' zoa ia'tú le gunná bē'ē le nácarō lo ca chopa ni gunná bē'ē.

<sup>32</sup> Ní'irō bōnni' yudo' usedi na' gudxē' Jesús, rnnē':

—Dxi'ado' gunnó', Bōnni' Usedi. Le nácatē rno'. Tuzē' náquiē' Dios, en cúnturō nu zoa naca Dios.<sup>33</sup> Para idxí'iru'-nē' Dios idú ládxi'ru', en lu idú yōl-la' réajni'i queēru', en lu idú icja ládxi'do'oru', en lu idú yōl-la' huáca queēru', en para idxí'iru' luzá'aru' ca nadxí'i cuinru', nácarō lesaca' ca yúgu'tē bōa' bēdxido' rútigacaru'-ba' lu bucugu lá'ayi queē' Dios, enca' ca yúgu'tē bōa' bēdxido' ruzégui'gacaru'-ba' lu bucugu na'.

<sup>34</sup> Cate' biyōnnē' Jesús dxi'ado' rubi'ē didza' bōnni' ni, ní'irō gudxē' lē', rnnē':

—Ia'látisō riyadzaj quiu' gúnbē'u le rinná bē'ē Dios.

Cúnturō nu burugui bi inábini Jesús.

*¿Nuzxi zxi'ini náquiē' Cristo?*

*(Mt. 22:41-46; Lc. 20:41-44)*

<sup>35</sup> Cate' ni' rusēdinē' Jesús bōnachi ga naca chila yudo', rnnē':

—¿Bizx que ta'nnē' bōnni' yudo' usedi náquiē' Cristo zxi'ini xi'sóē' David?<sup>36</sup> Lē cazē' David na' bē'ē didza', zóalenē' Dios Bō' Lá'ayi lē', gunné':

Xanru' Dios gudxē' Xana':

“Gurō'ō cuita lē'a ibēla

cate' gunra' ga ulu'zóa zxi'bigaca lo'

nupa biti' ta'lé'e Li' dxi'a.”

<sup>37</sup> ¿Naru' nácatsē' Cristo zxi'ini xi'sóē' David channō lē' cazē' David na' rnnē' queē' náquiē' Xanē'?

Bōnachi zían nacua' ni' tu'zē' nágagaca Lē' gula'yaza ládxi'gaca didza' ni.

*Jesús ruzégui'ē didza' bōnni' yudo' tu'sēdinē'*

*(Mt. 23:1-36; Lc. 11:37-54; 20:45-47)*

<sup>38</sup> Ni' rusēdinē' Jesús yugu' bōnni' dá'gaquiē' Lē', rē' légaquiē':

—Guli'gún chi'i cuinli' quégaquiē' bōnni' yudo' tu'sēdinē'. Ta'yaza ládxi'gaquiē' ta'dē' nilō na'lō, nácugaquiē' lari' tunna. Ta'yaza ládxi'gaquiē' ca' tu'lidza tsahui' bōnachi légaquiē' gapa naca lu yē'ēyi.<sup>39</sup> Ta'bō'ē yugu' lataj lo lu yu'u ga tu'dubē' tu'sēdē' queē' Dios, enca' gapa tu'dubē' tē'aj tahuē'.

<sup>40</sup> Rugúagaquiē' lídxigacanu nigula uzēbi, en para ulu'lu'isō

tsahui' cuíngaquië', xidzé tu'lidzë' Dios. Bönni' ni, gúnda'rë' Dios légaquië' xíguia'.

*Le bunödjanu tu nigula uzëbido' queë' Dios*  
(Lc. 21:1-4)

<sup>41</sup> Tsanni ni' rö'ë Jesús chila yudo' ga zoa guí'ina ga ta'gú'u bönachi dumí que yudó', ruyüé' ca tun bönachi ta'gú'u dumí lu guí'ina. Dumí zían ta'gu'ë bönni' dë yöl-la' tsahui' quégaquië'. <sup>42</sup> Ní'irö bidxinnu tu nigula yechi' uzëbido' ni', ate' gulú'unu chopá dumí lásido', le nazáca'gaca láti'do'os. <sup>43</sup> Ní'irö bulidzë' Jesús yugu' bönni' usëda queë', en rë' légaquië':

—Le nácatë rea' libí'ili', nigula yechi' uzëbido' ni gulú'urönu ca yúgu'të nupa bi ta'gú'u lu guí'ina que yudo'. <sup>44</sup> Yúgu'të bönni' ni ta'gu'ë que le nagá'anasö quégaquië', pero nigula ni, lu yöl-la' yéchi'do' queënu gulú'unu idútë la's dui tsca le dësö queënu, le ral-la' gáhuinu.

## 13

*Rigúxjö'ë Jesús ca si' ulu'quínnajë' yudo'*  
(Mt. 24:1-2; Lc. 21:5-6)

<sup>1</sup> Cate' burúajë' Jesús chila yudo', tuë' bönni' usëda queë' gudxë' Lë', rnnë':

—Bönni' Usedi, buyútsöca' náctiga yugu' yu'u zxön ni, en náctiga yugu' guiöj lë'e zö'ö quéguequi.

<sup>2</sup> Bubi'ë didza' Jesús, rë' lë':

—Rilé'enu' yugu' yu'u zxön ni, pero biti' ca' ugá'ana guiöj lahui luzë'e ni, tu' ulu'quínnaj bönachi léguequi.

*Le ilaca bë' cate' si' údxi que yödzölió*  
(Mt. 24:3-28; Lc. 21:7-24; 17:22-24)

<sup>3</sup> Ní'irö yöjáquië' Jesús, en yugu' bönni' dá'gaquië' Lë' lu Guí'a Yaga Olivo, guí'a na' dë ca dödilö ra' yudo'. Cate' chirö'ë Jesús ni', la' légacasë' Pedro, en Jacobo, en Juan, en Andrés, gulé' Lë', ta'nnë':

<sup>4</sup> —Gudíxjö'i' netu' bátaxi ilaca lë ni. ¿Bizxi gaca bë' chizóa ilaca yúgu'të lë ni?

<sup>5</sup> Bubi'ë didza' Jesús, rusëdinë' légaquië', rnnë':

—Gulí'gún chí'i cuinli' para cabí nu si' ye'e libí'ili'. <sup>6</sup> Ila'lá' lahuë' zían bönni' si' légaquië' ca lea' neda', ila'nnë' nácagaquië' Cristo. Caní ila'zí' yé'enë' bönachi zían.

<sup>7</sup> 'Ní'irö cate' yönilí' raca gudil-la nilö ná'alö, biti' gádxili'. Yúgu'të lë ni ral-la' ilaca, pero biti' ridxini dza údxi. <sup>8</sup> Tu yödzö tíl-lalen ia'tú yödzö, en tu ga nu rinná bë' tsöjtíl-lalen ia'tú ga nu rinná bë'. Zían lataj tödi budó' zxu', en tsu'u gubín. Ila'tsatsa bönachi. Yugu' lë ni ilaca le isí lo ila'guí' ila'zaca' bönachi dza ni'.

<sup>9</sup> 'Ní'irö guli'gún chi'i cuinli', tu' ulu'dödë' libí'ili' lu ná'agaquië' bönni' yúlahui'. Ila'guinë' libí'ili' gapa tu'dubë' tu'sëdë' queë' Dios bönni' judío. Idxinli' lógaquië' bönni' ta'nná bé'enë' libí'ili', en lógaquië' bönni' ta'nná bé'enë' yödzo zì'tu'. Ilunë' caní queëli' tu' dá'ali' neda', pero gunli' ba nali' quia' neda' ni'. <sup>10</sup> Zí'alö ca idxín dza údxi, run bayudxi gaca libán que didza' dxi'a quia' lógaca bönachi idútë yödzölió. <sup>11</sup> Cate' ni' ila'chë'ë libí'ili', en ulu'dödë' libí'ili' lu ná'agaquië' bönni' yúlahui', biti' gü'i ládxi'li' bizxi innali'. La' dza ní'sö Dios gunnë' queëli' didza' gü'ili', ate' lë ni innali'. Cate' ni' gü'ili' didza', calëga libí'sili' na' innali', pero Dios Bö' Lá'ayi innë'. <sup>12</sup> Ulu'dödi bönachi la' böchi'gacasö lu ná'agaquië' bönni' ilútië' légaquië'. Yugu' bönni' nacua'abi' bi'i quégaquië' ulu'dödë' la' zxi'inigaca cazë' ca', ate' zxi'inigaquië' na' ulu'dödibi' la' xuz xiná'agaca cázabi' lu ná'agaquië' bönni' ilútië' légaquië'. <sup>13</sup> Yúgu'të bönachi ulu'zóa libí'ili' tsölá'alö tu' dá'ali' neda', pero núlöli' guá' ilenli' lë na' ga idxinrö dza údxi, uláli'.

<sup>14</sup> 'Nupa tu'laba didza' ni ral-la' ila'yéajni'i. Buzúajë' lu guichi Daniel, bönni' ni' bë'ë didza' uláz queë' Dios, le rnna caní: "Tsaz tu le xihui' le rucá'ana cané ga naca la'ayi." Dza ní'irö ral-la' ila'zxunnaj nupa nacua' luyú Judea, en tsójaca gapa naca lu gu'ado'. <sup>15</sup> Nu zoa ícjo'olö dza ni' ral-la' izxúnnajtë, en biti' huötaj znan yu'u para tsøjzxi' bi dë que lu yu'u. <sup>16</sup> Nu zoa la' guixi' ral-la' izxúnnajtë, en biti' huöaj tsøjzxi' lari' rixóa yeni. <sup>17</sup> Bica' bayechi' yugu' nigula dza ni' nuá'agacanu-bi' bí'ido', enca' nigula tu'gádxinu-bi' bí'ido'. <sup>18</sup> Buli'lidzë' Dios inábili'-në' cabí gun bayudxi izxúnnajli' cate' raca beo' ziaga ca'. <sup>19</sup> Yugu' dza ni' ila'guí'ila'zaca'rö bönachi ca le guca zí'atëlö cate' si' guta' yödzölió le benë' Dios ga ridxintë na'a dza, ate' dza zá'gaca biti' gaca caní. <sup>20</sup> La'tu' cabí nunë' Dios ga ulu'huóaca nabábasö yugu' dza ni', cuntunu ulá, pero tu' nadxí'inë' nupa chigurö cazë', chinunë' queë' gunë' ga ulu'huóaca nabábasö yugu' dza ni'.

<sup>21</sup> 'Na'a, channö nu gué libí'ili': "Buli'yútsöca', ni zoë' Cristo", o inná: "Buli'yútsöca', ni' zoë'", biti' ca' tséajlë'ëli' nu na'. <sup>22</sup> Ila'lá' lahuë' zían bönni' ila'zì' yé'enë' bönachi. Ila'nnë' nácagaquië' Cristo, en ila'nnë' nácagaquië' bönni' tu'ë didza' uláz queë' Dios. Ulu'lu'ínë' le ilaca bë', en ilunë' yugu' yöl-la' huáca zxon. Huala'zì' yé'enë' ca' nupa gurö cazë' Dios channö ila'zéqui'në'. <sup>23</sup> Ní'irö libí'ili', guli'sóa ban ladxi'. Yúgu'të chigudxa' libí'ili' zì'atëlö ca gaca.

*Ca huödë' Bönni' Guljë' Bönachi*  
(Mt. 24:29-35, 42-44; Lc. 21:25-36)

<sup>24</sup> Gunnë' ca' Jesús:

—Yugu' dza ni', tödi gaca dza na' ila'guí'i ila'zaca' caní bönachi, ichul-la gubidza, en bití' cu'u bení' beo'. <sup>25</sup> Ila'guínnaj bölaj lúzxiba, en ila'zxizi le nál-lagaca nalá'gaca lúzxiba na'. <sup>26</sup> Ní'irö ila'lé'eni neda', Bönni' Guljé' Bönachi, za'a lu böaj lúzxiba, napa' yöl-la' huáca zxön, en yöl-la' bení' quia'. <sup>27</sup> Isöl-la'gaca'-né' gubáz lá'ayi quia', ate' ulu'tubé' bönachi gurö caza' quia' nacuá' idapa la'a yödzölió, ga naguéla'té luyú bidxi, ga ridxinté ga naguela' lúzxiba.

<sup>28</sup> 'Guli'tséajni' le rusedi yaga higo ni'. Cate' ta'lén ni'a në'e hué'enido', en rubía xilagui' yulu, nözili' chizóa idxín beo' cusubá. <sup>29</sup> Lësca' caní, cate' ilé'eli' taca lë ni, inözili' chizóa idxín dza údxi na', en chiridzaga lo. <sup>30</sup> Le nácaté rea' libí'ili', yúgu'té lë ni ilaca zí'atëlö ca ilátigaca nupa nacuá' dza na'. <sup>31</sup> Huadödi que lúzxiba, en que luyú ni, pero xtídza'a catu caz tödi que.

<sup>32</sup> 'Cate' idxín dza ni' o rëla ni', cuntú nu nözi. Bití' nözguequiné' gubáz lá'ayi nacu'é yehua' yubá, en bití' nözda' neda', Zxí'iné' Dios. Tuzé' Dios Xuz nöziné'. <sup>33</sup> Que lë ni na', buli'subán ládxi'li'. Guli'sóa sina', en buli'lidzé' Dios tu' cabí nözili' bizxi dza gaca lë ni. <sup>34</sup> Gaca ca raca cate' sa'yéajé' zi'tu' tu bönni'. Cate' chizóa uzé'è lidxé', udödé' lu ná'agaquié' huen dxin queé' yugu' le dë queé'. Que queé'gaquié' gu'é xichíngaquié', en inná bē'è soa ban ladxi' nu zoa huen chí'i ga nu riyaza. <sup>35</sup> Guli'sóa libí'ili' ban ladxi' tu' cabí nözili' bátaxi huödé' xan yu'u, cate' chiridzö', o gatsaj lahui' yëla, o cate' ribödxiba' böra, o zílado'. <sup>36</sup> Guli'gún caní, para cabí idixáquié' libí'ili' rásili' channö huödé' tsálido'os. <sup>37</sup> Lë ni rea' libí'ili', rea' ca' yúgu'té bönachi: Guli'sóa ban ladxi'.

## 14

*Tun xtídza'gaquié' bönni' yudo' ila'zöné' Jesús*  
(Mt. 26:1-5; Lc. 22:1-2; Jn. 11:45-53)

<sup>1</sup> Ia'chopa dza ca' gaca Laní Pascua cate' tu'subané' bönni' judío ca bené' Dios, bubéajé' xuz xtó'ogaquié' luyú Egipto. Naca laní cate' tahué' yöta xtila bití' nazí' cúa zi que. Ta'zóa ta'bö'è yugu' bixúz unná bē', en bönni' yudo' tu'sédiné' ila'zöné' Jesús bagáchi'sö para ilútié' Lë'. <sup>2</sup> Ta'nné':

—Bití' gaca sönru'-né' dza laní tu' ila'tsatsa bönachi.

*Nigula rigú'unu le rilá' zxixi icjé' Jesús*  
(Mt. 26:6-13; Jn. 12:1-8)

<sup>3</sup> Zoé' Jesús yödzö Betania, lu yu'u lidxé' Simón, bönni' güí'iné' hué' nudzu' ruzödi. Tsanni ni' rö'è rahué' Jesús, guyázanu tu nigula, nuá'anu tu böga'do' néquini guiöj zaca', yudzu le rilá' zxixi que yöj susén lasi idú, le nazaca' yenni'.

Gulá'anu böga'do' na', en gulú'unu le rilá' zixi na' icjē' Jesús.  
 4 Gula'lélanē' bal-lē' bönni' nacu'ē ni'. Ta'nnē' la' légacasē':

—¿Bixz que guca ditaj le zixi na'? 5 La'tu' nu guti' lē na', huazí' que ia'lati' ca lázxjaru' que tu iz para nu quisi le quégaca bönachi yechi'.

Gula'nnēdē'ē queēnu.

6 Ní'irō Jesús bē'ē didza', rnnē':

—Guli'güi'-nu lataj. ¿Bixz que rinnē zí'ili' queēnu? Naca dxi'a le bennu quia'. 7 Nacuá'lentica'sō bönachi yechi' libí'ili', en bátati'tēs guē'ēnili', huáca gunli' dxi'a quégaquiē', pero neda' biti' sóatica'sa' ga zóali'. 8 Tsca le guzxéqui'nu bennu nigula ni. Cate' gulú'unu le rilá' zixi ni neda', bupá'anu neda' zí'atēlō ca igácha'a yeru ba. 9 Le nácatē rea' libí'ili', gátitēs ga gaca libán que didza' dxi'a quia' idú yōdzōlió, soa nu quixjō' ca' lē ni bennu nigula ni quia'. Caní gaca para nu tsōjné lēnu.

*Rizí' lu nē'ē Judas udödē' Jesús*

*(Mt. 26:14-16; Lc. 22:3-6)*

10 Ní'irō birúajē' Judas Iscariote, bönni' nabábalenē' chínnuē' na' dá'gaquiē' Jesús. Guyijē' ga nacu'ē bixúz unná bē' para udödē' Jesús lu ná'agaquiē'. 11 Cate' bila'yönnē' xtídzē'ē Judas na', bulu'dzējanē', ate' gula'zí' lu ná'agaquiē' ilu'ē lē' dumí. Ní'irō gusí lahuē' Judas rizóa ribō'ē udödē' Jesús lu ná'agaquiē'.

*Le rē'aj ráguru' rusubanru' ca gútiē' Xanru'*

*(Mt. 26:17-29; Lc. 22:7-23; Jn. 13:21-30; 1Co. 11:23-26)*

12 Naca dza risí lo laní cate' tahuē' yōta xtila biti' nazí'i cúa zi que, dza na' tutiē'-ba' bö'cu' zxíla'do' tahuē'-ba' dzō' Laní Pascua na', cate' tu'subanē' ca benē' Dios busölē' bönachi judío luyú Egipto. Ní'irō bönni' usēda queē' Jesús gula'nábinē' Lē', ta'nnē':

—¿Gazxi rē'ēnu' tséajtu' tsōjpá'atu' le gáguru' xtsō' que Laní Pascua?

13 Ní'irō Jesús gusöl-lē'ē chopē' bönni' usēda queē', en rē' légaquiē':

—Guli'tséaj lu yōdzō. Ni' huadzágali' tu bönni' nu'ē tu rō'ō nisa. Guli'tséajlenē'. 14 Ga na' tsáziē', guli'guíē' xan yu'u na': “Rnnē' Bönni' Usedi: ¿Gazxi zoa yu'u ga na' gágulengaca'-nē' bönni' usēda quia' xtsō' que Laní Pascua?” 15 Ní'irō ulu'inē' libí'ili' tu yu'u zxön ga naca buropi cuía ga chinabá'a. Buli'pá'a le gáguru' ni'.

16 Bila'rúajē' bönni' usēda queē' na', en bila'dxinē' lu yōdzō, ate' yōjxáca'gaquiē' yúgu'tē ca na' chigudxē' légaquiē' Jesús. Bulu'pē'ē le ilahuē' ni' que Laní Pascua.

17 Cate' chizá' ral-la, bidxiné' Jesús ni', dzágagaquié' idxínnutë' bönni' usëda queë' Lë'. 18 Tsanni ni' rō'ōgaquié' tahuë', bë'ë didza' Jesús, rnnë':

—Le nácatë rea' libí'ili', zoa nu dzaga libí'ili', nu rágulen neda' tsözxön, nu udödi neda' lu ná'agaca bönachi.

19 Ní'irō bulu'huí'innë', en gula'si lógaquië' tu tuë' të' Lë':

—¿Naru' neda'?

Ia'tué' ca' gunnë':

—¿Naru' neda'?

20 Bubi'ë didza' Jesús, rë' légaquië':

—Naca tu nu nutsa' ladaj chínnuli' ni, bönni' na' nunë'ë në'ë tsözxön len na'a lu yō'ōna. 21 Tseja' ga gátia' neda', Bönni' Guljë' Bönachi, ca na' nazúaj lu guichi lá'ayi ca gaca quia', pero bica' bayechi' bönni' na' udödë' neda' lu ná'agaquië' bönni' ilútië' neda'. Gácarō dxi'a queë' bönni' na' la'tu' cabí guljë'.

22 Tsanni ni' tahuë', gudélë'ë Jesús yōta xtila. Gudxë' Dios: "Xclenu'." Buzxuzxjë' le, en bë'ë quégaquië', rnnë':

—Guli'gagu. Lë ni naca bëla' rön quia'.

23 Gudélë'ë ca' tu zxíga'do', en gudxë' Dios: "Xclenu'." Ní'irō bë'ë quégaquië', ate' yúgu'të' gulé'ajë' le. 24 Jesús rë' légaquië':

—Lë ni xichōna' le run tsutsu didza' cubi rucá'ana tsahui', le núnlenë' Dios bönachi. Rön ni ilalaj ni'a quégaca bönachi zían.

25 Le nácatë rea' libí'ili', bití'rō guí'ja' xisi uva ga idxinrō dza guí'ja' le cubi ga ni' rinná bë'ë Dios.

*Jesús rnnë' innë' Pedro biti' núnbë'ë Lë'*

*(Mt. 26:30-35; Lc. 22:31-34; Jn. 13:36-38)*

26 Gudödi gulúl-lë' yöl-la' ba, bila'rúajë' sōjáquië' Guí'a Yaga Olivo. 27 Ní'irō Jesús gudxë' légaquië', rnnë':

—Yúgu'tëli' gaca chopa ládxi'li', ucá'anali' neda' na'a dzö', tu nazúaj lu guichi lá'ayi, rnna: "Gutia'-në' uyú bö'cu' zxila', ate' ilásilasiba' bö'cu' zxila' na'." 28 Tödi ubana' lu yöl-la' guti, tseja' luyú Galilea zí'alö ca libí'ili'.

29 Ní'irō Pedro gudxë' Jesús, rnnë':

—Sal-la' yúgu'të' ilaca chopa ládxi'gaquië', en ulu'cá'anë' Li', biti' ca' gaca chopa ládxa'a neda'.

30 Jesús gudxë' lë', rnnë':

—Le nácatë rea' li', la' dzö' nisö, si' cödxilöba' böra le buropi luzuí, tsonna luzuí innó' biti' núnbë'u neda'.

31 Ní'irō Pedro buzötjë' Dios, rnnë':

—Sal-la' gátilentea' Li' tsözxön, biti' ca' innía' biti' núnbë'a Li'. Lësca' caní gula'nne' yúgu'të'.

*Jesús rulidzë' Dios la' yëla Getsemani'*

*(Mt. 26:36-46; Lc. 22:39-46)*



<sup>32</sup> Ní'irö Jesús, en bönni' dá'gaquië' Lë' bila'dxinë' la' yëla Getsemaní, ate' Jesús gudxë' légaquië', rnnë':

—Guli'cö' ni, tsanni tseja' neda', tsöjlidza'-në' Dios.

<sup>33</sup> Jesús guchë'ë Pedro, en Jacobo, en Juan, ate' gusí lahuë' ridzöbinë', en risëbi ládxe'ë. <sup>34</sup> Gudxë' légaquië', rnnë':

—Huati caza' lu yöl-la' risëbi ladxi'. Guli'cöz ni, en guli'ná' yëla.

<sup>35</sup> Ní'irö guzë'ë Jesús ia'láti'do', en busudxín lahuë' lu yu, bulidzë' Dios. Gunábinë' Lë', channö huáca, ucuítë' queë' le ral-la' qui'i sáquë'ë dza na'. <sup>36</sup> Ni' rulidzë' Dios, rnnë':

—Xúza'do', yúgu'të huáca gunu' Li'. Gucuíta lë na' ral-la' qui'i saca'a, pero calëga ca rë'ënda' neda', pero ca rë'ënu' Li', gunu'.

<sup>37</sup> Ní'irö böajë' Jesús ga na' nacu'ë bönni' usëda queë', ate' yöjxáquië' légaquië' tasië'. Gudxë' Pedro:

—Simón, ¿rásitso'? ¿Naru' cabí rubéajts'o' yëla lo' tu chí'ido'?

<sup>38</sup> Guli'ná' yëla, en buli'lidzë' Dios, inábili'-në' para cabí gata' lataj tu' xihui' idilú'u yöl-la' libí'ili'. Le nácatë bö' naca cázali' zoa caz sina', pero lu yöl-la' bönáchisö queëli' ricuúdi'li'.

<sup>39</sup> Ní'irö sa'yéajë' Jesús leyúbölö, rulidzë' Dios, en la' tuz ca gunné'. <sup>40</sup> Cate' böajë' leyúbölö ga na' nacu'ë, yöjxáquië' légaquië' tasië' tu' nadöditë yëla lógaquië'. Biti' nözguequinë' bizxi didza' ulu'bi'ë, le ilé' Lë'. <sup>41</sup> Cate' böajë' le bunni luzuí ga na' nacu'ë, rë' légaquië':

—¿Rásitsali'? ¿Ruzi'tsa ládxi'li'? ¡Tsca'ti' gaz! ¡Chibidxín dza! ¡Buli'yútsöca', Neda', Bönni' Guljë' Bönachi, chinadöda' lu ná'agaca bönachi dul-la'! <sup>42</sup> ¡Guli'chasa, uyéajru'! ¡Buli'yútsöca', chizë'ë bönni' na' udödë' neda' lu ná'agaca bönachi!

### *Ta'zönë' Jesús*

*(Mt. 26:47-56; Lc. 22:47-53; Jn. 18:2-11)*

<sup>43</sup> Ni' ru'ë Jesús didza' ni, bidxinë' Judas, bönni' nabábalenë' chínnuë' na' dá'gaquië' Jesús, ate' zá'lengaquië' bönni' zían lë', nuá'agaquië' guíë tuchi', en yaga. Yugu' bixúz unná bë', en yugu' bönni' yudo' usedi, en bönni' gula tu'zéajni'inë' nasöl-la'gaquië' légaquië'. <sup>44</sup> Judas, bönni' na' rudödë' Jesús lu ná'agaquië' chinulu'inë' légaquië' tu le gunë' le gaca bë' nu naca Jesús, gunné':

—Bönni' na' utsaga lahua'-në', Lë' na' Jesús. ¡Guli'sönë', en guli'chë'ë! ¡Guli'yútsöquië'!

<sup>45</sup> Cate' bidxinë' Judas ni', la' gubíga'të' ga na' zoë' Jesús, en gudxë' Lë':

—Bönni' Usedi, Bönni' Usedi.

Ní'irö busudxín lahuë' Jesús. <sup>46</sup> Ní'irö gula'zönë' Jesús, en gula'chë'ë Lë' nadzunë'.

47 Ní'irö tuë' bönni' ni' dë'ë Jesús guléajë' guié tuchi', en benë'-bi' huë' bi'i huen dxin queë' bixúz lo. Guchúguië' guídi nágabi'. 48 Jesús gudxë' bönachi na', rnnë':

—¿Narúajtsali' nuá'ali' guié tuchi', en yaga para sönli' neda', runli' ca runli' cate' rizönli'-në' gubán? 49 Yugu' dza guzóalena' libí'ili' rusëdigacada' bönachi ga naca chila yudo', ate' biti' guzxönli' neda', pero raca caní para gaca le nazúaj lu guichi lá'ayi.

50 Ní'irö yúgu'të bönni' usëda queë' Jesús bulu'cá'anë' Le', ta'zxúnnajë'.

### *Rizxúnnajbi' tubi' bi'i ra'bán*

51 Zóabi' ca' ni' tubi' bi'i ra'bán søjnobi' Jesús, nuxóasö cuinbi' tu lari' blaga'. Yugu' bönni' na' nachë'gaquië' Jesús gula'zönë'-bi' 52 pero busanbi' lari' na', en xiguídisöbi' buzxúnnajbi'.

### *Ridxinë' Jesús lógaquië' bönni' yúlahui' lo*

(Mt. 26:57-68; Lc. 22:54-55, 63-71; Jn. 18:12-14, 19-24)

53 Gula'chë'ë Jesús lahuë' bixúz lo, ate' bulu'dubë' ni' yúgu'të bixúz unná bë', en bönni' gula tu'zéajni'inë', en yugu' bönni' yudo' usedi. 54 Pedro yøjnahuë' Jesús zí'tu' zí'tu'sö, en guyázië' lö'a lidxi bixúz lo na', en gurö'ölenë' tsözxön yugu' ni'a në'ë bixúz lo na', rutsë'e cuinë' ra' guí'.

55 Yugu' bixúz unná bë' len yúgu'të bönni' yúlahui' lo bulu'guiljë' tu le ulu'subáguië' Jesús para gaca ila'chúguië' queë' gátië' pero biti' bi bulu'dzölinë'. 56 Bönni' zían gula'nnë' queë' Jesús le cabí nácatë, pero biti' yöjlözagaca le gula'nnë' queë'. 57 Ní'irö gula'zuinë' yugu' bönni' gula'nnë' queë' Jesús le cabí nácatë, ta'nnë':

58 —Netu' biyönitu' didza' bë'ë bönni' ni, gunné': “Uquínnaja' yudo' ni, lë ni nequi lu ni'a lu na' bönachi, ate' tsonna dzasö uchisa' ia'tú le cabí nequi lu ni'a lu na' bönachi.”

59 Lësca' lë ni, biti' yöjlözagaca xtídza'gaquië'.

60 Ní'irö guyasë' bixúz lo na' gatsaj láhui'lö bönachi nacúa' ni', en gunábinë' Jesús, rnnë':

—¿Naru' cabí rubi'itso' didza'? ¿Bizxi na' ta'nnë' quiu' bönni' ni?

61 Jesús, dxisö zoë'. Biti' bi didza' rubi'ë. Gunábinë' Lë leyúbölö bixúz lo na', rnnë':

—¿Naru' nacu' Li' Cristo, Zxí'inë' Dios Lá'ayi?

62 Bubi'ë didza' Jesús, rnnë':

—Naca'. Il'é'eli' neda', Bönni' Guljë' Bönachi, soa' cö'a cuitë' ibëla Dios napa cazë' yöl-la' huáca cate' ni' huöda' lu böaj lúzxiba.

63 Ní'irö bixúz lo na', lu yöl-la' rilé queë' guchözë' lari' nácuë', rnnë':

—¿Núzxirö naquíniru' nu quixjö'? <sup>64</sup> ¡Riyón quézili' rucá'ané' Dios cá'asö len didza' ru'è! ¿Nacxi rusáca'li' queëli'?

Yúgu'tè gula'chúguiè' queè' gátiè'.

<sup>65</sup> Ní'irö gula'sí lógaquiè' bal-lè' tu'chejë' Jesús zxöna'. Bulu'sayjë' lahuè', en gulundé' Lè' zi', ta'nné':

—Gunnè yá'atsöca' nuzxi na' bē' Li'.

Yugu' bönni' ni'a nē'è bixúz lo gula'gápē'è ru'è Jesús.

*Rnnè' Pedro biti' núnbē'è Jesús*

(Mt. 26:69-75; Lc. 22:56-62; Jn. 18:15-18, 25-29)

<sup>66</sup> Cate' ni' zoè' Pedro lö'a zxan yu'u, bidxinbi' tubi' bi'i nigula huen dxin queè' bixúz lo na' ga na' zoè'. <sup>67</sup> Cate' bilé'ebi' Pedro, rö'è rutsè'e cuinë' ra' guí, buyubi' lè', rnnabi':

—Do'o ca' li' Jesús, bönni' Nazaret na'.

<sup>68</sup> Gudá'baguiè' Pedro, rnnè':

—Biti' núnbē'a-nē', en biti' nözda' bizxi na' rnno'.

Burúajè' Pedro yöjsöè' ga nu riyaza lö'a. Ní'irö gurödxiba' böra. <sup>69</sup> Buyubi' lè' leyúbölö bi'i nigula huen dxin na', en gusi lobi' rēbi' nupa nacua' ni':

—Bönni' ni dzáguiè' légaquiè'.

<sup>70</sup> Leyúbölö gudá'baguiè' Pedro. Ia'lati' gudzé nupa nacua' ni' tē Pedro, ta'nná:

—Le nácatè dzagu' légaquiè', tu' nacu' bönni' Galilea. Yöl-la' ru'ísö quiu' didza' naca bē'u, tu' tuz ca ru'ili' didza'.

<sup>71</sup> Gusi lahuè' Pedro rudxía dö' cuinë', en ruzötjè' Dios, rnnè':

—Biti' ca' núnbē'a-nē' bönni' na' ru'ili' didza' ca naca queè'.

<sup>72</sup> La' gurödxitēba' böra le buropi luzuí. Ní'irö yöjnenè' Pedro didza' na' bē'è Jesús, gudxè' lè': “Zi'alö cödxiba' böra le buropi luzuí, tsonna luzuí innó' biti' núnbē'u neda'.” Cate' yöjnenè' didza' ni, gusi lahuè' ribödxidē'è.

## 15

*Ridxinè' Jesús lahuè' Pilato, bönni' rinná bē'è*

(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Ni' naca zílado', yugu' bixúz unná bē' len bönni' gula tu'zėjni'inè', en yugu' bönni' yudo' usedi, en yúgu'tè bönni' yúlahui' lo gulún xtídza'gaquiè'. Ní'irö gula'chē'è Jesús náguē'è, en bulu'dödē' Lè' lu nē'è Pilato, bönni' rinná bē'è uláz que yödz Roma. <sup>2</sup> Pilato gunábinè' Jesús, rnnè':

—¿Naru' nacu' Li' Bönni' inná bé'enè' bönachi judío?

Bubi'è didza' Jesús, rnnè':

—Ca nácatè rnno'.

<sup>3</sup> Yugu' bixúz unná bē' bulu'zéguiè' Jesús didza' le zían.

<sup>4</sup> Ní'irö Pilato gunábinè' Lè' leyúbölö, rnnè':

—¿Naru' cabí rubi'itso' didza'? Buzétsöca' nagu' cate' xö zían le ta'nné' quiu'.

<sup>5</sup> Biti' bi didza' bubí'ë Jesús. Ca' guca, bubáninë' Pilato.

*Ta'chúquië' queë' Jesús gátíë'*

*(Mt. 27:15-31; Lc. 23:13-25; Jn. 18:38-19:16)*

<sup>6</sup> Dë tu le runë' Pilato cate' raca laní na', rusanë' lu ná'agaca bönachi tu bönni' nadzunë' lidxi guíë, núti'tës nu ta'naba. <sup>7</sup> Nadzunë' tu bönni' lë' Barrabás lidxi guíë, ate' dzágagaquië' lë' ia'bal-lë' luzé'ë, yugu' bönni' gulútië' bönachi cate' gula'dá'báguíë' yúlalui'. <sup>8</sup> Cate' bila'dxín bönachi zían ní', gula'sí lógaquië' ta'nabë' lahuë' Pilato gunë' quégaquië' ca run cazë'. <sup>9</sup> Bubi'ë didza' Pilato, rnnë':

—¿Rë'ënili' usana'-në' queëli' Bönni' Inná Bé'enë' Bönachi Judío?

<sup>10</sup> Caní gunnë' Pilato tu' réquibe'enë' bulu'dödë' yugu' bixúz unná bë' Jesús lu në'ë tu' tu'zxé'enë' Lë'. <sup>11</sup> Yugu' bixúz unná bë' na' gula'gu'ë xilá ládxi'gaca bönachi zían na', para ila'nabë' lahuë' Pilato usanë' lu ná'agaquië' Barrabás. <sup>12</sup> Ní'irö Pilato gunábinë' légaquië' leyúbölö, rnnë':

—¿Bizxi rë'ënili' guna' queë' bönni' na' ru'íli' lë', Bönni' Inná Bé'enë' Bönachi Judío?

<sup>13</sup> Gulu'ë zidzaj didza', ta'nnë':

—¡Budë'ë lë'e yaga cruz!

<sup>14</sup> Gunábinë' Pilato légaquië', rnnë':

—¿Bizxi caz dö' nu'ë?

Leyúbölö tu'ë zidzaj didza', ta'nnë':

—¡Budë'ë lë'e yaga cruz!

<sup>15</sup> Tu' gu'unnë' Pilato gunë' ga ila'yaza ládxi'gaca bönachi zían na', busanë' Barrabás lu ná'agaquië'. Ní'irö gunná bé'enë' nu quin Jesús, ate' budödë' Lë' lu ná'agaquië' bönni' ulu'dë'ë Lë' lë'e yaga cruz.

<sup>16</sup> Ní'irö yugu' bönni' röjáquië' gudil-la gula'chë'ë Jesús lö'a yúlalui', ate' bulu'tubë' luzá'agaquië' ni'. <sup>17</sup> Bulu'gacué' Jesús tu lari' xiná gul-la, en gulunë' tu bregui' ni'a në'e yötsi', le bulu'dxië' icjë'. <sup>18</sup> Ní'irö gula'sí lógaquië' tu'lidzë' Jesús, ta'nnë':

—¡Yöl-la' ba li', rinná bé'enu' bönachi judío!

<sup>19</sup> Gula'guínë' gui icjë', en bulu'chejë' Lë' zxöna'. Bulu'zóa zxíbigaquië' lahuë', en lu yöl-la' rutitaj gulunë' Lë' bal. <sup>20</sup> Cate' budxi bulu'titjë' Lë', bulu'gúë' lari' xiná chul-la na' nácuë' ate' bulu'gacué' Lë' lari' que cazë'. Ní'irö gula'chë'ë Lë' ní'ilö yúlalui' na' para tsöjda'gaquië' Lë' lë'e yaga cruz.

*Tu'dë'ë Jesús lë'e yaga cruz*

*(Mt. 27:32-44; Lc. 23:26-43; Jn. 19:17-27)*

<sup>21</sup> Gulunë' ga bi'ë tu bönni' Cirene yaga cruz queë' Jesús, ridödisë' ni' suzë'ë la' guixi'. Lë' Simón, xúzgacabi' Alejandro, en Rufo.

<sup>22</sup> Gula'chë'ë Jesús lataj na' nazí'i le Gólgota, tu didza' hebreo le rna lu didza' xidza', Lataj Que Böga' Íjaru'. <sup>23</sup> Gulu'ë le guí'jë' Jesús xisi uva nutsi' nōri silá' que yaga mirra, pero Lë' biti' gu'ë le. <sup>24</sup> Ní'irō bulu'dë'ë Jesús lë'e yaga cruz, ate' gula'guísië' lari' nácuë', le gula'zí' que queëgaquië' bönni' na' rōjáquië' gudil-la. Bulu'béajë' le gaca bë' para ila'nōzinë' bízxilō idela' que queëgaquië'.

<sup>25</sup> Naca idú xsila cate' bulu'dë'ë Lë' lë'e yaga cruz. <sup>26</sup> Didza' na' bulu'zōë' lë'e yaga cruz ícjälë' Jesús ca naca le tu'quíë' Lë' rna caní: "Bönni' Rinná Bé'enë' Bönachi Judío." <sup>27</sup> Bulu'dá'lenë' Jesús tsōzxōn lë'egaca yaga cruz chopë' gubán, tuë' cuita lë'ë ibëla, en ia'tué' cuita lë'ë yōgōla. <sup>28</sup> Caní guca lë' na' nazúaj lu guichi lá'ayi, rna: Gubábalenë' bönni' tuá' dō'.

<sup>29</sup> Yugu' bönni' ta'dödë' ni' tu'lidza zi'ë Jesús, en tu'tá ícjagaquië', ta'nnë':

—¡Ōn! ¿Naru' uquínnajtso' yudo' queë' Dios, ate' tsonna dzasō uchísatsu' le? <sup>30</sup> ¡Busölá cuinu' na'a, en bōtaj lë'e yaga cruz na'!

<sup>31</sup> Lësca' caní yugu' bixúz unná bë', en yugu' bönni' yudo' usedi tu'titjë' Lë'. Të' luzá'agaquië' tuë' ia'tué':

—Bönachi yúbölō busölë', pero biti' gaca usölá cuinë'.

<sup>32</sup> Ta'nnë' ca':

—¡Ōn! ¿Nácatsu' Cristo, Bönni' Inná Bé'enë' Bönachi Israel? ¡Bōtjatsōca' na'a lë'e yaga cruz para ilé'etu', ate' tséajlë'ëtu' Li'!

Yugu' bönni' na' dá'gaquië' tsōzxōn len Lë' lë'egaca yaga cruz bulu'lidza zi'ë ca' Lë'.

*Le guca cate' gútië' Jesús*

*(Mt. 27:45-56; Lc. 23:44-49; Jn. 19:28-30)*

<sup>33</sup> Cate' bidxín idú huagubidza, guchul-la idútë yōdzōlió. Guca caní ga bidxintë idú ridōdi xihuó. <sup>34</sup> Idú ridōdi xihuó na' bë'ë Jesús zidzaj didza', rnnë':

—Eloi, Eloi, ¿lama sabactani?

Didza' hebreo ni rna lu didza' xidza': Dios quia', Dios quia', ¿bizx que nubéaj lādxi'u neda'?

<sup>35</sup> Yugu' bönni' nacu'ë ni' bila'yōnnë' didza' ni, ate' ta'nnë':

—Buli'zëtsōca' nágali'. Elías rulidzë'.

<sup>36</sup> Ní'irō guxítí'ë tu bönni' nútsë'ë lādjagaquië', en buxúpinë' nupi zi tu le bululu rë'aj nisa. Budë'ë le lahui gui, en bë'ë le xupë' Jesús, rnnë':

—Cōztsōca'ru', uyuru' channō huidë' Elías uzōtjë' Lë'.

<sup>37</sup> Gurōdxi'ë zidzaj Jesús, en la' gútitë'. <sup>38</sup> Birōza' lari' yōdx nala' lu yudo'. Birúaj choplō, gudela' icjlō, en birúajtë zxánilō.

<sup>39</sup> Bönni' na' rinná bé'enë' bönni' rōjáquië' gudil-la zuínë' lahuë'

Jesús, en bilé'enë' ca na' guca gurödxí'ë Jesús, en la' gútitë', ate' gunné':

—Le nácatë bönni' ni gúquië' Zxí'inë' Dios.

<sup>40</sup> Nacuá'anu ca' ni' nigula, zí'tu'sö tu'yunu. Nútsa'gacanu ladjagacanu María Magdalena, en Salomé, en María, xiná'agacabi' Jacobo cuidi', en José. <sup>41</sup> Nigula ni yójacalennu Jesús cate' ni' gudë' luyú Galilea, en gulácalennu Lë', gula'gú'unu le gulahuë'. Nacuá'anu ca' ni' ia'bál-lanu nigula zían gula'zá'lennu Lë' lu yödzö Jerusalén.

*Ta'gu'ë Jesús yeru ba*

(Mt. 27:57-61; Lc. 23:50-56; Jn. 19:38-42)

<sup>42</sup> Chizá' ral-la, en naca dza tu'pë'ë, dza si' idxín dza lá'ayi quégaquië' bönni' judío. <sup>43</sup> Que lë ni na' bidë' José, bönni' yödzö Arimatea, bönni' lo ladjagaquië' bönni' yúlahui' lo. Ribözë' ca' dza idinná bë'ë Dios. Idú láchë'ë guyázië' ga na' zoë' Pilato, en gunábinë' lë' gu'ë lë' lataj u'ë Jesús. <sup>44</sup> Bubánninë' Pilato tu' gunné' chigútië' Jesús, ate' bulidzë' bönni' na' rinná bé'enë' bönni' röjáquië' gudil-la para inábinë' lë' channö chinátië' Jesús. <sup>45</sup> Cate' biyönnë' ca na' gunné' bönni' na' rinná bé'enë' bönni' röjáquië' gudil-la, bë'ë José lataj u'ë Jesús. <sup>46</sup> Ní'irö José na' gú'uë' tu lari' xtila dxí'ado', ate' buzötjë' Jesús lë'e yaga cruz, en buchölinë' Lë' lari' na'. Ní'irö gulu'ë Lë' yeru ba nadaj lë'e gu'a guiöj. Budë'ë tu guiöj blaga zxön ga nu riyaza ba na'. <sup>47</sup> María Magdalena, en María, xinë'ë José tu'yunu ga na' ta'gu'ë Jesús.

## 16

*Rubanë' Jesús lu yöl-la' guti*

(Mt. 28:1-10; Lc. 24:1-12; Jn. 20:1-10)

<sup>1</sup> Cate' chinadödi dza lá'ayi quégaca bönachi judío le naca dza gadxi, María Magdalena, en Salomé, en María, xinë'ë Jacobo, ta'zí'inu yugu' le rilá' zxixi para tsöjlú'ugacanu Jesús. <sup>2</sup> Ni' naca zílado' dza risí lo, yójacanu ra' yeru ba queë'. Bila'dxinnu ni' cate' si' gulén gubidza. <sup>3</sup> Gula'nábinu luzá'agacanu:

—¿Nuzxi cúatsö queëru' guiöj na' da' ga nu riyaza ba queë'?

<sup>4</sup> Cate' bila'dxinnu ni', bulu'yunu, en bila'lé'enu chinadúa guiöj na', ate' guiöj zxön naca. <sup>5</sup> Gula'yú'unu yeru ba lë'e gu'a guiöj na', ate' ni' bila'lé'enu-bi' tubi' bi'i bönni' ra'bán, nácabi' gubáz lá'ayi queë' Dios. Rö'öbi' tsölá'a ibëla lu yeru ba na', nácubi' lari' tunna chiguíchido'os. Guládxide'enu. <sup>6</sup> Ní'irö bi'i na' gúdxibi' légacanu, rnnabi':

—Bíti'rö gádxili'. Ruguílajli' Jesús, Bönni' Nazaret, Bönni' na' gudë'ë lë'e yaga cruz. Chibubanë'. Biti' zoë' ni. Buli'yú ga ni gula'gu'ë Lë'. <sup>7</sup> Guli'tséaj na'a, guli'tsöjtíxjöi'i ca' yugu' bönni'

usëda queë', enca' Pedro. Guiëli' légaquië': "Tsejë' Jesús luyú Galilea zí'alò ca libí'ili'. Ní' ulé'eli'-në' ca na' chigudxi cazë' libí'ili'."

<sup>8</sup> Ní'irö bulu'rúajnu ni', bulu'zxúnnajnu ra' yeru ba na' tu' ta'zxízinu lu yöl-la' radxi ridzöbi quégacanu. Cuntu nu gulënu ca' tu' tádxinu.

*Rulu'i lahuë' Jesús lonu María Magdalena*  
(Jn. 20:11-18)

<sup>9</sup> Cate' bubanë' Jesús zílado' dza na', buluí'i lahuë' zí'alò lonu María Magdalena, nigula na' bubéajë' gadxi bö' xihui' gula'yú'u lënu. <sup>10</sup> Guyéajnu yöjtíxjöi'ínu nupa na' gula'dalen Jesús. Nupa ni ta'sëbi ládxi'gaca, en ta'bödxí yechi'. <sup>11</sup> Cate' bila'yöni didza' ruí'ínu, zoë' nabanë' Jesús, ate' bilé'e quézínu Lë', biti' gula'yéajlë' lënu.

*Chopë' bönni' usëda queë' Jesús tu'lé'enë' Lë'*  
(Lc. 24:13-35)

<sup>12</sup> Gudödi na', nadzá'alò buluí'i lahuë' Jesús lógaquië' chopë' bönni' usëda queë' yú'ugaquië' nöza, söjáquië' ga naca ladaj guixi'. <sup>13</sup> Ní'irö bulu'dxinë', dutíxjöi'iguequinë' ia'zícá'rë', ate' ni xtídza'gaquië' biti' gula'yéajlë'ë.

*Le rigü'ë Jesús lu ná'agaquië' bönni' gubáz queë'*  
(Mt. 28:16-20; Lc. 24:36-49; Jn. 20:19-23)

<sup>14</sup> Ga yöjsetë, buluí'i lahuë' Jesús lógaquië' idxinéajtë' tsanni ni' ta'bö'ë tahuë', ate' gudil-lë' légaquië' didza' tu' cabí ta'yéajlë'ë Lë', en tu' naca zidi icja ládxi'do'gaquië', tu' cabí gula'yéajlë'ë xtídza'gaca nupa na' bila'lé'e Lë' nubanë'. <sup>15</sup> Ní'irö gudxë' légaquië', rnnë':

—Guli'tséaj idütë yödzölió tsöjenlí' libán que didza' dxi'a lógaca yúgu'të bönachi. <sup>16</sup> Nu tséajlë' neda', en idila nisa, ulá nu na', pero nu biti' tséajlë', irugu que gati nu na'. <sup>17</sup> Le ilaca bë' ni ilunë' bönni' ila'yéajlë'ë neda'. Ulu'gunë' dxin La' neda', en ulu'béajë' yugu' bö' xihui' yú'ugaca bönachi, en ilu'ë didza' izá'a. <sup>18</sup> Channö ila'zönë'-ba' bëla sínia' lu ná'agaquië', o channö ile'jë' le nachë' yöl-la' guti, biti' bi gun quégaquië'. Ila'xóa në'ë nupa te'e, ate' ulu'huóacatë.

*Ruhuëpë' Jesús yehua' yubá*  
(Lc. 24:50-53; Hc. 1:6-11)

<sup>19</sup> Cate' Xanru' budxi bë'lenë' légaquië' didza' ni, buchisë' Dios Lë' yehua' yubá ga ni' gurö'ë cuitë' ibëla Lë'. <sup>20</sup> Bila'rúajë' légaquië', yöjéngaquië' libán yúgu'të yödzö. Gúcalenë' Xanru' légaquië', en benë' ga gulunë' le ná'agacaca bë' naca idütë li didza' tu'ë. Ca' naca.

## DIDZA' DXI'A BUZÚAJË' LUCAS

*Didza' rigu'ë Lucas lu në'ë Teófilo*

<sup>1</sup> Zián nupa chigulún bayudxi ulu'zúaj lu guichi idútë le nácatë, le guca ga zóaru', <sup>2</sup> ca na' bila'lé'e nupa ni' dza ni'te, ate' bulu'luí'i rë'u, en bulu'zë didza' que. <sup>3</sup> Teófilo, bönni' tsáhui'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguílaj bubéquia' ga ze lo dzö' ca naca yúgu'të lë na' guca dza ni'te. <sup>4</sup> Ruzúaja' quiu' lu guichi ni para inózinu' naca idútë li lë na' chinazëdu'.

*Rulu'inë' gubáz lá'ayi queë' Dios ca si' gálajbi' Juan, bönni' uquilë' bönachi nisa*

<sup>5</sup> Dza ni'te cate' gunná bë'ë Herodes luyú Judea, ni' zoë' tu bixúz lë' Zacarías. Nabábalenë' cö' bixúz, nazí'i le Cö' Queë' Abías. Elisabet, nigula queë' Zacarías na' nácanu ca' xzí'ini xi'sóë' Aarón, bönni' gúquië' bixúz lo dza ni'te. <sup>6</sup> Nácagaquië' Zacarías, en Elisabet tsahui' lahuë' Dios, ate' idú ládxi'gaquië' tunë' ca rnna xtídzë'ë Dios, en le rinná bë' xibá queë'. Caní guca, cuntu nu guca bi innë quégaquië'. <sup>7</sup> Cuntu nu zoa bi'i quégaquië', tu' nácanu Elisabet nigula huödx, ate' chingálagáquië' irópatë'.

<sup>8</sup> Guca beo' gul-la' uláz que cö' na' nabábalenë' Zacarías ilunë' dxin lahuë' Dios, lu yöl-la' bixúz quégaquië'. <sup>9</sup> Ca naca le nulaga lógaquië' tunë' bixúz, gul-la' uláz queë' Zacarías guyázië' lu lataj lá'ayi que yudo' para uzégui'ë yalaj lahuë' Xanru' Dios. <sup>10</sup> Tsanni ni' ruzégui'ë Zacarías na' yalaj, gula'cuá' yúgu'të bönachi ní'lö, tu'lidza Dios. <sup>11</sup> La' ná'asö bulu'í'i lahuë' gubáz lá'ayi queë' Xanru' ga zoë' Zacarías na'. Zuinë' gubáz na' tsölá'a ibëla bucugu lá'ayi ga na' régui yalaj. <sup>12</sup> Cate' bilé'enë' Zacarías gubáz lá'ayi na', gurö'ë böniga, en gudxi bidzöbinë'. <sup>13</sup> Ní'irö gubáz lá'ayi na' gudxë' lë', gunné':

–Zacarías, biti' gádxinu', tu' chibiyönnë' Dios le rinabu' lahuë', ate' Elisabet, nigula quiu', uzóanu-bi' tubi' bi'i bönni'do', ate' gu'u labi' Juan. <sup>14</sup> Gata' quiu' le uzi'u xibë, en udzéjanu', ate' zián nupa ulu'dzeja ládxi'gaca cate' gálajbi' bí'ido' na', <sup>15</sup> tu' gácatëbi' zxön lahuë' Dios. Biti' gu'ajbi' xisi uva, en calëga tu le rusudxi bönachi, ate' sóalenë'-bi' Dios Bö' Lá'ayi cate' isí lo si' gálajbi'. <sup>16</sup> Gunë' Juan ni ga ulu'huóaca zián bönachi Israel queë' Xanru'. <sup>17</sup> Inöruë' lë' ca Xanru', ate' ila'cuá'alén lë' Bö' na', en yöl-la' huáca na' gula'cuá'alén Elías, bönni' bë'ë didza' uláz queë' Dios dza ni'te. Caní gunë' para ünë' tuz nupa nácagaca xuz len xzí'inigaquië', en uzéajni'inë'



nupa ta dá'baga' para ilácagaca tsahui', en ucözë' bönachi para ila'zì' lu nē'eguequi Xanru'.

<sup>18</sup> Zacarías gunábinë' gubáz lá'ayi na', rnnë':

—¿Bizxi gaca bē' para inözda' ilaca lē ni? Chinagúla' neda', en chinagúlanu ca' nigula quia'.

<sup>19</sup> Bubi'ë didza' gubáz lá'ayi na', rnnë':

—Neda' lea' Gabriel. Runa' dxin lahuë' Dios. Lē cazë' gusöl-lē'ë neda' para gú'ilená' li' didza', en usiyönda' li' didza' dxi'a ni. <sup>20</sup> Na'a, tu' cabí guyéajlë'u xtídza'a, icödzü', en bíti'rö gaca innó' cate' gácarö lē ni. Yúgu'të lē ni udxín cate' idxín dza que.

<sup>21</sup> Tsanni ni' raca lē ni, nacua' bönachi ní'ilö, ta'böza Zacarías, ate' tu'bani tu' ridzenë' xidzé ga na' zoë' lu lataj lá'ayi. <sup>22</sup> Cate' burúajë' Zacarías, biti' guca gú'ilenë' légaquië' didza', ate' guléquibe'enë' bilé'enë' tu le buluí'inë' Dios lē' lu lataj lá'ayi. Bulá'a buluí'isë' Zacarías, buzéajni'inë' légaquië', tu' cabí raca innë'.

<sup>23</sup> Cate' bizá'a yugu' dza na' ral-la' gunë' dxin Zacarías lahuë' Dios, ní'irö böajë' lidxë'. <sup>24</sup> Gudödi yugu' dza na' Elisabet, nigula queë' Zacarías na', biá'anu-bi' lē'ënu bí'ido', ate' idú gayu' beo' bugá'anasinu ga zoa lídxigaquië'. Guzá' ládxi'nu, rnnanu: <sup>25</sup> "Caní runë' Xanru' quia'. Ruzá' ládxi'ë quia' bí'ido', en runë' ga bíti'rö utuí'ida' lógaca bönachi."

*Rigúxjö'ë gubáz lá'ayi ca si' gálajbi' Jesús*

<sup>26</sup> Cate' chiguca xopa beo', buluí' lahuë' gubáz lá'ayi na', tu' gusöl-lē'ë Dios lē cazë' Gabriel, tsejë' Nazaret, tu yödzö luyú Galilea. <sup>27</sup> Dios gusöl-lē'ë lē' ni' tsöjyüë'-bi' tubi' bi'i nigula ra'bando' lēbi' María. Chinazí' lu ná'abi' María utsaga ná'alēbi'-nē' bönni' lē' José. Nababë' José di'a dza queë' David, bönni' gunná bé'enë' bönachi Israel dza ni'te. <sup>28</sup> Cate' guyázië' Gabriel na' ga zóabi' María, gudxë'-bi':

—Padiux. Dios ruzá' ládxi'ë quiu'. Xanru' Dios zóalenë' li'. Lē cazë' benë' ga nácaru' li' bica' ba ca yúgu'të nigula.

<sup>29</sup> Cate' bilé'ebi' María gubáz lá'ayi na', gurö'öbi' böniga tu' nözi didza' na' bē'ë, en rubani ládxi'bi' nacxi sa'yéaj didza' na' bulidzë'-bi' gubáz lá'ayi na'. <sup>30</sup> Ní'irö gubáz lá'ayi na' gudxë'-bi', rnnë':

—María, biti' gádxinu', tu' chibidéli'nu' le ruzá' ládxi'ë Dios quiu'. <sup>31</sup> Na'a, tsú'ubi' tubi' bí'ido' lē'u, ate' uzú'-bi' tubi' bi'i bönni'do', ate' gu'u labi' Jesús. <sup>32</sup> Jesús ni tsépisëtërë', en si' Lē' Zxí'inë' Dios, Nu nayépisëtërö. Xanru' Dios gunë' ga inná bē'ë ca na' gunná bē'ë David, xuz gula gudödi queë'. <sup>33</sup> Jesús na' inná bé'etica'sinë' bönachi Israel, ate' le inná bē'ë Lē' catu caz tödi que.

<sup>34</sup> Ní'irö María gunábibi' gubáz lá'ayi na', rnnabi':

—¿Nacxi caz gaca lē ni, tu' cabí zóalēna' bönni'?

<sup>35</sup> Bubi'ë didza' gubáz lá'ayi na', rë'ë-bi':

—Guidë' Dios Bõ' Lá'ayi ga zu', ate' yöl-la' huáca queë' Dios, Nu nayëpisëtë'rö, sóalen li', le gaca ca tu zxul-la rigú'u böaj ga zu'. Que lë ni na' bi'i bönni'do' na' ral-la' gálajbi', tsú ubi' lu në'ë Dios, ate' si' labi' Zxí'inë' Dios. <sup>36</sup> Cá'anqueze Elisabet, nigula di'a dza quiu', chinuá'anu-bi' lë'ënu tubi' bi'i bönni'do' sal-la' chinagúlanu. Gula'nnë' queënu: “Nácanu nigula huödx”, pero chizéaj xopa beo' nuá'anu-bi' lë'ënu bí'ido' na'. <sup>37</sup> Biti' bi zoa le cabí séqui'në' Dios.

<sup>38</sup> Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'.

Ní'irö la' buza'të' gubáz lá'ayi na' ga zóabi' María.

### *María söjyubi'-nu Elisabet*

<sup>39</sup> La' dza ní'isö guyú'ubi' nōza María, ate' carelō sa'yéajbi' ga naca gu'ado', en bidxinbi' tu yödzo luyú Judea. <sup>40</sup> Ni' guyázabi' lidxë' Zacarías, en gúdxibi'-nu Elisabet:

—Padiux.

<sup>41</sup> Cate' biyöninu Elisabet didza' na' bë'ëbi' María, la' butátë cuinbi' bi'i huë'ënido' na' yú'ubi' lë'ënu, ate' bidisóalenë'-nu Dios Bõ' Lá'ayi. <sup>42</sup> Ní'irö bë'ënu Elizabet zidzaj didza', rnnanu:

—¡Chinunë' Dios ga nácaru' li' bica' ba ca yúgu'të nigula, en chinunë' ca' ga nácabi' bica' ba bí'ido' na' yú'ubi' lë'u!

<sup>43</sup> ¿Núzxitë neda', zá'anu xinë'ë Xana' quia'? <sup>44</sup> Cate' biyönda' didza' bë'u, bulidzu' neda', lu yöl-la' rudzeja queëbi' la' butátë cuinbi' bi'i huë'ënido' ni yú'ubi' lë'a. <sup>45</sup> ¡Bica' ba li' tu' guyéajlë'u xtídzë'ë gubáz lá'ayi, ate' udxín caz lë na' gudxë' li' uláz queë' Xanru'!

<sup>46</sup> Ní'irö gunabi' María:

¡Idútë le naca' rigú'u Xanru' yöl-la' ba,

<sup>47</sup> en rudzeja ládxi'lëna'-në' Dios, Nu rusölá neda'!

<sup>48</sup> ¡Dios caz buzá' ládxi'ë quia' neda'!

Yu'a lu në'ë, en tsaz naca' huen dxin queë'.

Na'a isí lo, ca naca quia' ila'nná:

Bica' ba nigula na'.

<sup>49</sup> ¡Zxöntë'rö naca le benë' Dios unná bë' quia'!

¡Lá'ayi naca Lë'!

<sup>50</sup> Lë' ruhuéchi' ládxi'tica'së' bönachi tadxi Lë' na'a dza, en dza zá'gaca.

<sup>51</sup> Yugu' yöl-la' huáca zxön chibenë' Lë'.

Buzötjë' nupa gulún zxön yöl-la' réajni'i quéguequi.

<sup>52</sup> Bugúë' yöl-la' unná bë' quégaca nupa gulaca lo, en benë' ga gulaca lo nupa gulaca nōxaj ladxi'.

<sup>53</sup> Benë' ga bulu'huölej bulu'dzë'e nupa gula'dún, en bucá'anë' cá'asö nupa bila'lë'e yöl-la' tsahui'.

<sup>54</sup> Gúcalenē' bōnachi Israel, nupa na' tun xichinē', tu' yōjnenē' légaquiē', en buéchi' ládxe'ē légaquiē'.

<sup>55</sup> Benē' ca guzxí' lu nē'ē gunē' quégaquiē' xuz xtó'oru' enca' queē' Abraham, en quégaca di'a dza queē'.

<sup>56</sup> María bugá'analenbi'-nu Elisabet idú ca tsonna beo', ate' gudōdi ni' bōajbi' lídxibi'.

*Le guca cate' gúlajbe' Juan, bōnni' uquilē' bōnachi nisa*

<sup>57</sup> Cate' bidxín dza ral-la' sóabi' bí'ido' queēnu Elisabet, buzóanu-bi' tubi' bi'i bōnni'do'. <sup>58</sup> Bila'yōni dzaga yu'u queēnu, en yugu' di'a dza queēnu ca na' guca, buéchi' ládxe'ē-nu Dios, ate' bulu'dzėjalen lēnu. <sup>59</sup> Cate' chiguca xunu' dza zóabi' bí'ido' na', bila'dxinē' di'a dza queēnu para ila'chúguiē' lu xipéla'bi' bi'i bōnni'do' na' lē na' gaca bē' néquibi' queē' Dios, ate' té'ennē' ilu'ē labi' Zacarías ca na' lē' xúzibi'. <sup>60</sup> Ní'irō bubí'inu didza' Elisabet, xiná'abi', rnnanu:

—Calēga. Juan si' labi'.

<sup>61</sup> Gula'nábinē'-nu, ta'nnē':

—¿Bizx que? Cuntu nu di'a dza quiu' lē' Juan.

<sup>62</sup> Ní'irō bulu'lá' bulu'lu'isinē', gula'nábinē' xúzibi' nacxi rē'ēnē' gu'ē labi'. <sup>63</sup> Zacarías na' gunabē' tu blágado', ate' buzúajē' lahui caní: Juan lēbi'. Bulu'bábinē' yúgu'tē'. <sup>64</sup> La' ní'sō bōáljatē ru'ē Zacarías na', en buguítjatē lúdxē'ē, ate' bē'ē didza' le gulu'ē Dios yōl-la' ba. <sup>65</sup> Ní'irō guládxinē', en bulu'bábinē' yúgu'tē dzaga yu'u quégaquiē', ate' yúgu'tē yōdzōdo' nacuá' lu gu'ado' luyú Judea, guzē didza' ca guca lē ni. <sup>66</sup> Gula'zá' ládxi'gaca yúgu'tē nupa bila'yōni ca na' guca, ta'nná: “¿Nacxi caz gácabi' bi'i bōnni'do' ni? Le nácatē Xanru' zóalenē'-bi'.”

*Didza' bē'ē Zacarías uláz queē' Dios*

<sup>67</sup> Ní'irō Dios Bō' Lá'ayi bidisóalenē' Zacarías, xúzibi' Juan, ate' bē'ē didza' uláz queē' Dios, rnnē':

<sup>68</sup> ¡Yōl-la' ba Dios, Xángaca bōnachi Israel tu' buduyúē' rē'u, bōnachi queē', en bōá'uē' rē'u!

<sup>69</sup> ¡Gusōl-lē'ē queēru' Bōnni' usōlē' rē'u,

len yōl-la' huáca zxōn queē'!

Bōnni' ni guljē' ládajgaca di'a dza queē' David, huen dxin queē' Dios.

<sup>70</sup> ¡Dza ni'te guzxí' lu nē'ē gunē' ga gaca caní!

Raca ca na' gunné' lu ruá'agaquiē' bōnni' gulu'ē didza' uláz queē'.

<sup>71</sup> Guzxí' lu nē'ē usōlē' rē'u

lu ná'agaca nupa tequi rē'u zi',

enca' lu ná'agaca nupa biti' ta'lé'e rē'u dxi'a.

<sup>72</sup> Guzxí' lu nē'ē huéchi' ládxe'ē xuz gudōdi queēru', en tsōjnenē' le guzxí' lu nē'ē le naca lá'ayi.

73 Lë ni benë' tsutsu xtídzë'ë, en guzxí' lu në'ë,  
le gunë' queë' Abraham, xuz gudödi queëru',  
le naca tu le ral-la' gunë' queëru' rë'u.

74 Guzxí' lu në'ë usölë' rë'u  
lu ná'agaca nupa bití' ta'lé'e rë'u dxi'a  
para cabirö gádxiru' gunru' xichinë' Lë',  
75 en para gácaru' ba'a ladxi', en idú dxi'a  
lahuë' Lë' yúgu'të dza sóaru' ibanru'.

76 Li', xzí'ina'do', si' lo' bönni' ru'ë didza' uláz queë' Dios unná  
bë'

tu' tsöjnöru' ca Xanru' caz, en upó'o nöza ga tödë'.

77 Gunu' ga ila'nözi bönnachi queë' ca gaca ulu'lágaca,  
en ca na' uniti lahuë' Dios dul-la' nabága'gaca.

78 Caní gaca, tu' ruhuéchi'da' ládxi'ë Dios rë'u,  
en runë' ga tsení' queëru' Bönni' na' náquië' bení' idú.

79 Lë' uzení'ë quégaca nupa nacua' gapa naca chul-la,  
en gapa nacua' nupa chizóa ilátigaca  
para ugú'ë rë'u nöza ga cö'ö dxi ládxi'do'oru'.

<sup>80</sup> Guzxönbi' bi'i bönni'do' na', en bidipa ládxi'bi'. Guzóasibi'  
gapa naca lu lataj cá'asö cate' bidxinrö dza buluí'i lobi' lógaca  
bönnachi Israel.

## 2

### *Le guca cate' gúlajbi' Jesús (Mt. 1:18-25)*

<sup>1</sup> Lu dza na' gunná bë'ë Augusto César, bönni' Roma, ila'yaza  
lu guichi yúgu'të bönnachi nacua' yödzülió. <sup>2</sup> Cate' gusí lo ta'yaza  
lu guichi caní, rinná bë'ë bönni' lë' Cirenio luyú Siria. <sup>3</sup> Yúgu'të  
bönnachi yójaca yödzö que queëguequi ga na' zeaj nababa  
para ila'yaza lu guichi. <sup>4</sup> Guzé'ë José yödzö Nazaret luyú  
Galilea, sa'yéajë' luyú Judea, en bidxinë' yödzö Belén, ga ni'  
guljë' David, tu' guljë' José ládajgaca di'a dza queë' David na'.  
<sup>5</sup> Guyijë' José ni' para tsázië' lu guichi, ate' dzágabi'-në' María,  
bi'i nigula nazí' lu ná'abi' utsaga ná'alenbi' lë', en chizóa sóabi'  
bí'ido' queëbi'. <sup>6</sup> Cate' ni' nacu'ë lu yödzö Belén, bidxín dza  
sóabi' bí'ido' queëbi'. <sup>7</sup> Buzóanu-bi' tubi' bi'i bönni'do', bi'i  
huáca queënu. Buchölinu-bi' yugu' lári'do', ate' gudíxjanu-  
bi' tu lu yú'udo' ga tun chi'i le táguba' böa' quégaca bönnachi  
yú'ugaca nöza. Caní guca, tu' cabí bidzüli lataj ila'cu'ë lu yu'u  
ga ni' ta'dxín bönnachi yú'ugaca nöza.

*Tu'luí'i lahuë' gubáz lá'ayi queë' Dios ga nacu'ë bönni' tu'yúé'-  
ba' bö'cu' zxila'*

<sup>8</sup> Gala' ra' yödzö Belén nacu'ë bönni' tu'yúgaquië'-ba' bö'cu'  
zxila' la' guixi', tapa chí'igaquië'-ba' chi'i dzö'ölö. <sup>9</sup> La' buluí'itë  
lahuë' gubáz lá'ayi queë' Xanru' ga na' nacu'ë. Yöl-la' bení'

queë' Xanru' buzení' ga na' nacu'ë, ate' guládxinë'. <sup>10</sup> Ní'irö gubáz lá'ayi na' gudxë' légaquië', rnnë':

—Biti' gádxili'. Na'a rusiyönda' libí'ili' didza' le gun ga udzëjade'eli', le ulu'zí' ca' xibé yúgu'të bönachi. <sup>11</sup> Na'a chigúlajbi' lu ladzë' David Nu usölá libí'ili'. Nu ni naca Cristo, Xanru'. <sup>12</sup> Lë ni gaca bë'ëbi'. Udzölili'-bi' Bí'ido' na', narölibi' yugu' lári'do', en dëbi' tu lu yú'udo' ga tun chi'i le táguba' böa' quégaca bönachi yú'ugaca nöza.

<sup>13</sup> Ga na' zoë' gubáz lá'ayi na', tsárido'os bulu'luí'i lógaquië' zianrö ca' gubáz lá'ayi queë' Dios, narúajgaquië' yehua' yubá, en ta'gu'ë Dios yöl-la' ba, ta'nnë':

<sup>14</sup> ¡Yöl-la' ba Dios zoë' xitsá',  
ate' luyú gaca le cuéqui dxi ládxi'do'gaquië'  
bönni' raza ládxë'ë Dios légaquië'!

<sup>15</sup> Cate' bulu'zë'ë gubáz lá'ayi na' ga ni' nacu'ë, söjhuöjgaquië' yehua' yubá, ní'irö gulë luzë'ë tuë' ia'túë' bönni' uyú bö'cu' zxila' na', ta'nnë':

—Uyéajtsöca'ru' Belén para ilé'eru' lë ni chiguca ca na' chibusiyönnë' Xanru' rë'u.

<sup>16</sup> La' yöjácatië', ate' yöjácaga'gaquië' María len José, enca' bí'ido' na', dëbi' tu lu yú'udo' ga tun chi'i le táguba' böa' quégaca bönachi yú'ugaca nöza. <sup>17</sup> Cate' bila'lé'enë' lëbi', gula'guíxjö'ë lë na' si' busiyönnë' gubáz lá'ayi na' légaquië' ca naca queëbi' bí'ido' na'. <sup>18</sup> Bulu'bani yúgu'të nupa bila'yöni didza' gulu'ë bönni' tu'yúë' bö'cu' zxila' na'. <sup>19</sup> María gulú'usö icja náganu didza' ni, ate' guzá' ládxi'nu ca naca que. <sup>20</sup> Söjhuöjgaquië' bönni' na' tu'yúë'-ba' bö'cu' zxila', tunë' zxön Dios, en ta'gu'ë Lë' yöl-la' ba ni'a que yúgu'të lë na' bila'yönnë', en bila'lé'enë', le guca ca na' busiyönnë' gubáz lá'ayi na' légaquië'.

### *Ta'gu'ë-bi' bí'ido' Jesús lu në'ë Dios*

<sup>21</sup> Cate' chiguca xunu' dza zóabi' bí'ido' na', gula'chúguië' lu xipéla'bi' lë na' naca bë' néquibi' queë' Dios, ate' gulu'ë labi' Jesús ca na' chibë' cazë' labi' gubáz lá'ayi na' zí'alö cate' si' tsú'ubi' lë'ënu xiná'abi'.

<sup>22</sup> Cate' chibizá'a dza que le tu'pá'a cuíngacanu nigula ca rinná bë' xibá queë' Moisés, gula'chë'ë-bi' bí'ido' Jesús yödzö Jerusalén para ila'gu'ë-bi' lu në'ë Xanru' Dios. <sup>23</sup> Caní gulunë', tu' nazúaj lu guichi lu xibá queë' Xanru' le rnna: “Yúgu'tëbi' bi'i bönni'do' nácagacabi' bi'i zí'alö queënu xiná'agacabi', ulu'béajë'-bi' quez queë' Xanru' Dios.” <sup>24</sup> Que lë ni na' yöjácië' ni' para ilútië'-ba', en ila'gú'ë-ba' lahuë' Dios chópaba' gúgudo' o chópaba' budödu' ca na' rinná bë' xibá queë' Xanru' Dios.

<sup>25</sup> Dza ní'isö zoë' tu bönni' lë' Simeón lu yödzö Jerusalén. Bönni' ni náquië' tsahui', en reaj ládxë'ë Dios. Ribözë' Bönni' na' isöl-lë'ë Dios, Bönni' na' gácalenë' bönachi Israel. Dios Bö' Lá'ayi

zóalenë' Simeón na', <sup>26</sup> en chibulu'inë' lë' biti' gátië' cate' il'erönë' Cristo, Bönni' na' isöl-lë'ë Xanru' Dios. <sup>27</sup> Bidxinë' Simeón na' chila yudo' tu' guchë'ë Dios Bö' Lá'ayi lë' ni'. Cate' xuz xiná'abi' gula'chë'ë-bi' bí'ido' Jesús chila yudo' para ilunë' queëbi' ca rinná' bë' xibá na', <sup>28</sup> ní'irö bunidë'-bi' Simeón na', en guyéaj lãdxë'ë Dios, rnnë':

<sup>29</sup> Xana', na'a huáca gunnu' neda' lataj gátia', soa dxi lãdxa'a tu' chiguca le gudxu' neda', huen dxin quiu'.

<sup>30</sup> Chibilé'eda' Nu na' buzóa cazu', Nu usölá bönachi,

<sup>31</sup> Nu na' ulú'u lahui lógaca yúgu'të bönachi.

<sup>32</sup> Lëbi' nácabi' bení' le uzení' bönachi izá'a, en nácabi' ca' bení' quégaca bönachi Israel quiu'.

<sup>33</sup> Bulu'bánninë' José, en María, xiná'abi' bí'ido' Jesús, ca naca lë na' gunnë' Simeón ca naca queëbi' Jesús. <sup>34</sup> Simeón na' gunábinë' Dios gunë' ga gaca dxi'a quégaquië', ate' gudxë'-nu María, xiná'abi' Jesús, rnnë':

—Buyútsöca'. Bi'i ni nuzöë'-bi' Dios para gunbi' ga ila'chixi bönachi zían, ate' ulu'huöása bönachi zían ladaj bönachi Israel. Gácabi' tu le naca bë', ate' ila'nnë' bönachi queëbi'. <sup>35</sup> Gaca caní para ila'lá' lahui le ta'zá' lãdxi'gaca bönachi zían. Yugu' lë ni ilaca quiu' ca tu guíë tuchi' le tsaza lãdxi'do'o.

<sup>36</sup> Ana, nigula ru'ínu didza' uláz queë' Dios, zóanu ca' ni'. Nácanu xzi'inë' Fanuel, bönni' nababë' di'a dza queë' Aser. Chinagúlada'anu Ana na', tu' guzóalennu bönni' queënu idú gadxi iz gudödi gúcanu ra'bando', <sup>37</sup> ate' bugá'ananu tuzi cate' bidxintë' dza chiyú'unu idú ca tápalalaj yu' tapa iz. Biti' ca' rubí'i ruzá'anu ga naca chila yudo'. Rëla, en te dza reaj lãdxi'nu-në' Dios, runnu gubasa, en rulídzanu-në' Dios. <sup>38</sup> La' ná'asö bidxintënu ni', rënu-në' Dios: "Xclenu'." Gudíxjöi'ínu yúgu'të bönachi ca naca queëbi' bí'ido' Jesús, bönachi na' nacuá' Jerusalén, nupa ta'böza dza idxín Nu na' isöl-lë'ë Dios para gácalen bönachi.

### *Söjhuöjgaquië' José, en María yödzo Nazaret*

<sup>39</sup> Gudödi gulunë' José, en María yúgu'të le rinná' bë' xibá queë' Xanru' Dios, yöjhuöjgaquië' lãdzagaquië' Nazaret luyú Galilea. <sup>40</sup> Guzxönbí' bí'ido' Jesús, en bidipa lãdxi'bi'. Guta' queëbi' yöl-la' réajni'i, ate' zxön naca le ruzá' lãdxë'ë queëbi' Dios.

### *Rudxinbi' bí'ido' Jesús chila yudo'*

<sup>41</sup> Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subanë' bönni' judío ca benë' Dios, bubéajë' xuz xtó'ogaquië' luyú Egipto. <sup>42</sup> Cate' chiyú'ubi' chinnu iz bi'i Jesús, yöjáquië' Jerusalén ca tun cazë' cate' raca laní na'. <sup>43</sup> Cate' gudödi laní, söjhuöjgaquië', ate' bugá'anabi'

bí'ido' Jesús Jerusalén, pero biti' téquibe'enë' José, en María, xiná'abi' Jesús. <sup>44</sup> Tu' téquinë' nútsa'bi' ladaj bönachi zián yú'ulengaca légaquië' nöza, tu dza nayá' gula'zë'ë. Ní'irö cate' bulu'guiljé'-bi' gapa nacuá' di'a dza quégaquië', en gapa nacuá' nupa núnbë'gaquië' <sup>45</sup> biti' bulu'dzölinë'-bi'. Que lë ni na' yöjhuöjgaquië' Jerusalén, söjdíljagaquië'-bi'.

<sup>46</sup> Cate' chiguca dza bunny, bulu'dzölinë'-bi' ga naca chila yudo', rö'öbi' gatsaj láhui'lë' bönni' yudo' tu'sédinë'. Ruzë nágabi' didza' tu'ë, en rinaba yúdxibi' légaquië'. <sup>47</sup> Bulu'bani yúgu'të nupa bila'yöni didza' bë'ëbi' ca naca yöl-la' réajni'i queëbi', en ca nácagaca didza' bubí'ibi'. <sup>48</sup> Cate' bila'lé'enë'-bi' xuz xiná'abi', bulu'báninë', ate' gúdxinu-bi' xiná'abi', rnnanu:

—Zxi'ina', ¿bizx que benu' caní queëtu? Buyútsöca', len yöl-la' ruúbi ruguí' neda', en xuzu' buguúljatu' li'.

<sup>49</sup> Ní'irö gúdxibi' Jesús légaquië', rnnabi':

—¿Bizx que buguúljali' neda'? ¿Naru' cabí nözili' run bayudxi guna' xichinë' Xuza'?

<sup>50</sup> Biti' gula'yéajni'inë' xuz xiná'abi' didza' na' gúdxibi' légaquië'.

<sup>51</sup> Jesús böajlenbi' légaquië', budxinbi' Nazaret, ate' benbi' ca rnna xtídza'gaquië' xuz xiná'abi'. María, xiná'abi' Jesús, gulú'usönu icja ládxi'do'onu yúgu'të lë ni. <sup>52</sup> Ráta'rö yöl-la' réajni'i queëbi' bi'i Jesús, en rizxönbi'. Burúajbi' dxi'a lahuë' Dios, en lógaca bönachi.

### 3

*Libán runë' Juan, bönni' ruquilë' bönachi nisa*

*(Mt. 3:1-12; Mr. 1:1-8; Jn. 1:19-28)*

<sup>1</sup> Cate' chiguca chinu iz rinná bé'enë' Tiberio César idútë yödzölió, rinná bë'ë Poncio Pilato luyú Judea, ate' Herodes rinná bë'ë ca' luyú Galilea. Felipe, böchë'ë Herodes na', rinná bë'ë luyú Iturea, en luyú Traconite, ate' Lisancias rinná bë'ë luyú Abilinia. <sup>2</sup> Yugu' dza na' nácagaquië' bixúz lo Anás, en Caifás, ate' la' ná'asö Dios bë'lenë' Juan, zxí'inë' Zacarías, didza' cate' ni' zoë' Juan lu lataj cá'asö. <sup>3</sup> Ridë' Juan ni yúgu'të lataj nacuá' ra' yegu Jordán, runë' libán ca ral-la' ila'dila nisa nupa tu'bí'i ládxi'gaca para uniti lahuë' Dios dul-la' nabága'gaca. <sup>4</sup> Guca caní ca na' nazúaj lu guichi lá'ayi yugu' didza' bë'ë Isaías, bönni' bë'ë didza' uláz queë' Dios, rnna:

Riyön chi'ë bönni' rulidzë' lu lataj cá'asö, rnnë':

“Buli'pá'a nöza lu icja ládxi'do'oli' para idxín Xanru' queëli'.

Buli'béaj li yugu' nöza lasi ga tödë'.

<sup>5</sup> Ral-la' ulígaca yúgu'të gapa naca röga',

en ulu'huóaca lachi' yúgu'të guí'a sibi, en guí'ado'.

Ral-la' ulu'rúaj li nöza nayecja nabí'igaca,

ate' ulu'huóaca dxi'a nöza guióǰ.

<sup>6</sup> Ila'lé'eni yúgu'tè bönachi Bönni' na' isöl-lè'è Dios,

Nu usölá bönachi."

<sup>7</sup> Cate' bila'rúaj bönachi zían para ila'dila nisa lu në'è Juan, lè' gudxè' légaquiè':

—Libí'ili', di'a dza quégacaba' bëla sínia'. ¿Zoa nu bu-luí' libí'ili' ral-la' izxúnajli' yöl-la' rusiúdxí si' gaca quégaca bönachi? <sup>8</sup> Na'a, guli'gún le ilaca bë' chibubí'i ládxi'li', en bití' sa' ládxi'li', bití' innali': "Nácatu' tsahui' tu' nácatu' di'a dza queé' Abraham", tu' rea' libí'ili', huáca quélé'è Dios yugu' guióǰ ni, en gunè' ga ulu'huóaca di'a dza queé' Abraham. <sup>9</sup> Nácali' ca yugu' yaga. Chizóa riböza guié huága para ichugu yugu' yaga. Yúgu'tè yaga bití' ta'bía le naca dxi'a, ila'chúguié' yaga na', en ila'gu'è léguequi lu guí'.

<sup>10</sup> Ní'irö bönachi nacua' ni' gula'nabi lè', ta'nná:

—¿Nacxi gúntsatu'?

<sup>11</sup> Bubi'è didza' Juan, rë' légaquiè':

—Nu dë chopa cö' zxe ral-la' unödzej que nu bití' dë que, ate' nu dë le gagu, lësca' caní ral-la' quisi quégaca nupa bití' dë le ilágugaca.

<sup>12</sup> Bal-lè' bönni' tu'quizxjè' lázagaca bönachi uláz que yödzö zi'tu' bila'dxinè' ca' ni' para ila'dilé' nisa, ate' gula'nábinè' lè', ta'nnè':

—Bönni' usèdi, ¿nacxi gúntsatu' netu'?

<sup>13</sup> Juan gudxè' légaquiè':

—Bití' uquízxjaröli' tsca le chigunnè' bönni' yú'uli' lu në'è.

<sup>14</sup> Bal-lè' bönni' röjáquiè' gudil-la gula'nábinè' ca' lè', ta'nnè':

—¿Nazxi netu', nacxi guntu'?

Juan gudxè' légaquiè':

—Bíti'rö gun gádxili' bönachi para cúali' le dë quéguequi. Bíti'rö innéli' quégaca bönachi le cabí nácatè para gunli' ga ila'guixxaj libí'ili', pero guli'tsaza ládxi'li' tsca rázxjali'.

<sup>15</sup> Ta'zá' ládxi'gaca bönachi na' ta'böza Bönni' na' ral-la' isöl-lè'è Dios, channö náquiè' Juan na' Bönni' lè' Cristo. <sup>16</sup> Bubi'è didza' Juan, gudxè' yúgu'tè', rnnè':

—Le nácatè neda' ruquila' libí'ili' nisa, pero zè'è Bönni' gunè' le rulu'isö yöl-la' ridila nisa ni, ichíziè' libí'ili' Dios Bö' Lá'ayi, en le naca guí' queé'. Bönni' ni náparè' yöl-la' unnábè' ca neda', ate' neda' bití' naca' lesaca' ilecja' le nudè'è ni'e. <sup>17</sup> Zönè' lu në'è böcö' queé', ate' ulubè' ga rilubi zxoá' xtila queé', lè ni rulu'i le gaca quégaca bönachi. Utubè' zxoá' xtila, en cu'è le xilataj, pero bëbu que uzégui'è lu guí' le catu caz ulu.

<sup>18</sup> Ca nácgaca didza' ni, en ia'zica'rö zían didza' le guchíziè' icja nágagaca bönachi, benè' libán Juan lógaquiè' que didza' dxi'a. <sup>19</sup> Juan na' buzégui'è didza' Herodes, bönni' rinná bë'è,



tu' zóalenë'-nu Herodías, nigula queë' Felipe, bönni' böchë'ë, enca' tu' runë' zían le ruá' dö'. <sup>20</sup> Ní'irö benë' Herodes tu le nácarö huiá' dö', gulu'ë Juan na' lidxi guíë.

*Ridíle' Jesús nisa*

(Mt. 3:13-17; Mr. 1:9-11)

<sup>21</sup> Dza na' cate' cabí nadzunë' Juan lidxi guíë, cate' ni' ruquilë' bönachi nisa, bidilë' ca' Jesús nisa. Cate' ni' rulidzë' Dios, gualaj lúzxiba, <sup>22</sup> ate' bötjë' Dios Bö' Lá'ayi, bidxinë' ga na' zoë' Jesús. Buluí'i lahuë', rinë'ë ca riná' tuba' gu'dödo', ate' biyön chí'i Nu ruí'i didza' yehua' yubá, rnna:

—Li' nacu' Zxí'ina'. Nadxí'ida' Li', en raza ládxa'a Li'.

*Yugu' xuz xinë'e gudödi queë' Jesús*

(Mt. 1:1-17)

<sup>23</sup> Cate' gusí lahuë' runë' xichinë' Jesús, yu'ë ca chi uruá' iz. Téquiguequi bönachi náquië' zxí'inë' José. Jesús náquië' zxí'ini xí'sóë' Elí,

nu na' náquië' xúzinu María, nigula queë' José na'.

<sup>24</sup> Elí na' gúquië' zxí'inë' Matat,

nu ni guca zxí'inë' Leví,

nu ni guca zxí'inë' Melqui,

nu ni guca zxí'inë' Jana,

nu ni guca zxí'inë' ia'tué' José.

<sup>25</sup> José ni gúquië' zxí'inë' Matatías,

nu ni guca zxí'inë' Amós,

nu ni guca zxí'inë' Nahum,

nu ni guca zxí'inë' Esli,

nu ni guca zxí'inë' Nagai.

<sup>26</sup> Nagai na' gúquië' zxí'inë' Mat,

nu ni guca zxí'inë' ia'tué' Matatías,

nu ni guca zxí'inë' Semei,

nu ni guca zxí'inë' ia'tué' José,

nu ni guca zxí'inë' Judá.

<sup>27</sup> Judá na' gúquië' zxí'inë' Joana,

nu ni guca zxí'inë' Resa,

nu ni guca zxí'inë' Zorobabel,

nu ni guca zxí'inë' Salatiel,

nu ni guca zxí'inë' Neri.

<sup>28</sup> Neri na' gúquië' zxí'inë' ia'tué' Melqui,

nu ni guca zxí'inë' Adi,

nu ni guca zxí'inë' Cosam,

nu ni guca zxí'inë' Elmodam,

nu ni guca zxí'inë' Er.

<sup>29</sup> Er na' gúquië' zxí'inë' Josué,

nu ni guca zxí'inë' Eliezer,

nu ni guca zxí'inë' Jorim,

nu ni guca zxi'inë' ia'tué' Matat.

<sup>30</sup> Matat na' gúquië' zxi'inë' Leví,

nu ni guca zxi'inë' Simeón,

nu ni guca zxi'inë' Judá,

nu ni guca zxi'inë' ia'tué' José,

nu ni guca zxi'inë' Jonán,

nu ni guca zxi'inë' Eliaquim.

<sup>31</sup> Eliaquim na' gúquië' zxi'inë' Melea,

nu ni guca zxi'inë' Mainán,

nu ni guca zxi'inë' Matata,

nu ni guca zxi'inë' Natán.

<sup>32</sup> Natán na' gúquië' zxi'inë' David,

nu ni guca zxi'inë' Isaí,

nu ni guca zxi'inë' Obed,

nu ni guca zxi'inë' Booz,

nu ni guca zxi'inë' Salmón,

nu ni guca zxi'inë' Naasón.

<sup>33</sup> Naasón na' gúquië' zxi'inë' Aminadab,

nu ni guca zxi'inë' Aram,

nu ni guca zxi'inë' Esrom,

nu ni guca zxi'inë' Fares,

nu ni guca zxi'inë' ia'tué' Judá.

<sup>34</sup> Judá na' gúquië' zxi'inë' Jacob,

nu ni guca zxi'inë' Isaac,

nu ni guca zxi'inë' Abraham,

nu ni guca zxi'inë' Taré,

nu ni guca zxi'inë' Nacor.

<sup>35</sup> Nacor na' gúquië' zxi'inë' Serug,

nu ni guca zxi'inë' Ragau,

nu ni guca zxi'inë' Peleg,

nu ni guca zxi'inë' Heber,

nu ni guca zxi'inë' Sala.

<sup>36</sup> Sala na' gúquië' zxi'inë' Cainán,

nu ni guca zxi'inë' Arfaxad,

nu ni guca zxi'inë' Sem,

nu ni guca zxi'inë' Noé,

nu ni guca zxi'inë' Lamec.

<sup>37</sup> Lamec na' gúquië' zxi'inë' Matusalén,

nu ni guca zxi'inë' Enoc,

nu ni guca zxi'inë' Jared,

nu ni guca zxi'inë' Mahalalel,

nu ni guca zxi'inë' ia'tué' Cainán.

<sup>38</sup> Cainán na' gúquië' zxi'inë' Enós,

nu ni guca zxi'inë' Set,

nu ni guca zxi'inë' Adán,

nu ni guca ca zxi'ini cazë' Dios.

## 4

*Satanás tu' xihui' rë'ëni usubaga' Jesús dul-la'*  
(Mt. 4:1-11; Mr. 1:12-13)

<sup>1</sup> Buzë'ë Jesús ra' yegu Jordán, zóalenë' Dios Bö' Lá'ayi Lë', ate' Dios Bö' Lá'ayi na' guchë'ë Jesús lu lataj cá'asö. <sup>2</sup> Guzöë' Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahuë' Jesús yugu' dza na', ate' gudödi ni ridunë'. <sup>3</sup> Ní'irö tu' xihui' na' gudxi Jesús, rnna:

—Channö naca cazu' Li' Zxi'inë' Dios, gunnátsöca' ulu'huöáca guiöj ni yöta xtila.

<sup>4</sup> Bubi'ë didza' Jesús, rë' le:

—Nazúaj lu guichi, rnna: “Calégasö yöta xtila nabánigaca bönachi, pero nabánigaca ca' yúgu'të xtídzë'ë Dios.”

<sup>5</sup> Ní'irö guchë' tu' xihui' na' Jesús ga naca tu lu gu'a sibi ate' tu chí'ido'osö buluí'i Lë' yúgu'të xilátjagaca nupa ta'nná bë' yödzölió. <sup>6</sup> Tu' xihui' na' rë Jesús, rnna:

—Gunna' quiu' yúgu'të xilátjagaca nupa ta'nná bë' ni, en yöl-la' tsahui' quéguequi, tu' nadödi lu na'a yúgu'të lë ni, ate' nu rë'ënisida' ruá'a que. <sup>7</sup> Channö Li' uzóa zxibu' lahua', en gunu' neda' zxön, yúgu'të lë ni guequi quiu'.

<sup>8</sup> Bubi'ë didza' Jesús, rë' le:

—Gucuita ga zoa', Satanás, tu' nazúaj lu guichi lá'ayi le rë netu', rnna: “Xanu' Dios tseaj ládxi'u-në', en tuzë' Lë' gunu' xichinë'.”

<sup>9</sup> Ní'irö tu' xihui' na' guchë' Jesús Jerusalén, ate' budxía Lë' lu zö'ö ícjo'olö yudo', en rë Lë':

—Channö nacu' Zxi'inë' Dios, busuládzu'tsöca' cuinu' ni <sup>10</sup> tu' nazúaj lu guichi lá'ayi, rnna:

Dios isöl-lë'ë gubáz lá'ayi queë', ilácalenë' Li'.

<sup>11</sup> Lu ná'agaquië' ulu'chisë' Li' para cabí tsöjchégu'u guiöj, en bití' gunu' zi' ni'u.

<sup>12</sup> Bubi'ë didza' Jesús, rë' le:

—Nazúaj lu guichi lá'ayi le rë netu': “Biti' si' bë'u Xanu' Dios.”

<sup>13</sup> Cate' bití' budzöli tu' xihui' na' ia'tú le si' bë' Jesús, buzá' ga zoë' tu chí'ido'.

*Risí lahuë' Jesús runë' xichinë' luyú Galilea*  
(Mt. 4:12-17; Mr. 1:14-15)

<sup>14</sup> Böajë' Jesús luyú Galilea, dë lu në'ë yöl-la' huáca queë' Dios Bö' Lá'ayi. Guzë' didza' ca naca queë', ate' bila'yöni bönachi nacuá' yúgu'të yödzö idú gásibi'ilö. <sup>15</sup> Busédinë' Jesús bönachi gapa naca lu yu'u ga tu'dubë' tu'sédë' bönni' judío queë' Dios, ate' yúgu'të bönachi gulún Lë' zxön.

*Le benë' Jesús yödzo Nazaret, ga naca ladzë'*

*(Mt. 13:53-58; Mr. 6:1-6)*

<sup>16</sup> Ní'irö budxinë' Jesús yödzo Nazaret ga ni' guzxönë'. Cate' bidxín dza lá'ayi quégaquië' bönni' judío, ca run cazë' Jesús, guyázië' lu yu'u ga tu'dubë' tu'sëdë' bönni' judío queë' Dios, ate' guzuínë' para ulabë' tu le nazúaj lu guichi lá'ayi. <sup>17</sup> Bulu'dödë' lu në'ë Jesús guichi ga na' nazúaj didza' bë'ë Isafas, bönni' bë'ë didza' uláz queë' Dios. Cate' gusaljë' guichi na', budzölinë' ga nazúaj lu guichi le rnna:

<sup>18</sup> Zóalenë' Bö' Lá'ayi queë' Xanru' neda' tu' nubéajë' neda' quez queë'

para usiyönda' bönachi yechi' didza' dxi'a.

Gusöl-lë'ë neda' para una' nupa raca zi' ládxi'do'guequi,

en usiyönda' nupa nadzúngaca, ca gaca ulu'lágaca,

en úna' bönachi nachul-la lóguequi,

en usölá' bönachi zoa nu run léguequi zi',

<sup>19</sup> en guna' libán que dza ruzá' ládxe'ë Xanru' Dios quégaca bönachi.

<sup>20</sup> Ní'irö butubë' Jesús guichi na', en bugu'ë le lu në'ë bönni' rapa chi'ë yugu' guichi lá'ayi, ate' gurö'ë. Ní'irö yúgu'të nupa nudúbigaca lu yu'u na' gula'ná' Jesús. <sup>21</sup> Gusí lahuë' Jesús rë' légaquië':

—Na'a dza ni zóali' libí'ili', rudxín caz le nazúaj lu guichi ni.

<sup>22</sup> Yúgu'të' gula'nnë' dxi'a queë', en bulu'bánninë' ca naca didza' dxi'a ru'ë, ate' ta'nnë':

—¿Naru' calëga bönni' ni zxí'inë' José?

<sup>23</sup> Jesús rë' légaquië', rnnë':

—Nadxi huëli' neda' lë ni ta'nná bönachi, le rnna: “Li', bönni' ruún bönachi, bun cuinu.” Lësca' caní huëli' neda': “Yugu' le biyönitu' benu' Capernaum, ben ca' ga ni naca ladzu'.”

<sup>24</sup> Gunnë' ca' Jesús:

—Le nácatë rea' libí'ili', channö zoë' nu bönni' ru'ë didza' uláz queë' Dios, biti' tun bönachi uládz queë' lë' bal. <sup>25</sup> Le nácatë rea' libí'ili', gula'cuá'anu zían nigula uzëbi luyú Israel yugu' dza ni' zoë' Elías, bönni' bë'ë didza' uláz queë' Dios, cate' ni' biti' gulaj guiöj idú ca tsonna iz yu' xopa beo', ate' guca gubín luyú na', <sup>26</sup> pero Dios biti' gusöl-lë'ë Elías na' ga nacué'anu nigula uzëbi nabábagacanu Israel, pero gusöl-lë'ë lë' ga na' zóanu tu nigula uzëbi lu yödzo Sarepta, le nababa yödzo Sidón. <sup>27</sup> Lësca' caní, gula'cuá' zían nupa te'e huë' nudzu' ruzödi luyú Israel dza ni' zoë' Eliseo, bönni' bë'ë didza' uláz queë' Dios, pero biti' böáquië' nu bönni' nútsë'ë ladaj bönachi Israel na', pero böáquië' tuzë' Naamán, bönni' nababë' luyú Siria.

<sup>28</sup> Cate' bila'yönnë' didza' ni, gula'lenë' yúgu'të bönni' nacu'ë lu yu'u ga na' tu'dubë' tu'sëdë' queë' Dios. <sup>29</sup> Ní'irö gula'yasë',

en bulu'béajë Jesús ní'ilö ra' yödzö. Gula'ché'ë Lë' ga naca lë'e guí'a guiöj ga na' dë ládzagaquië' para ulu'suládzuë' Lë' ga naca lë'e guí'a guiöj na'. <sup>30</sup> Ní'irö gudödë' Jesús gatsaj láhui'lö ga na' nacu'ë, söhuöajtë'.

*Tu bönni' yu'u lë' bö' xihui'*

*(Mr. 1:21-28)*

<sup>31</sup> Ní'irö guyijë' Jesús yödzö Capernaum luyú Galilea, ate' busédinë' bönachi yugu' dza lá'ayi quégaquië' bönni' judío. <sup>32</sup> Bulu'báinë' ca naca le rusédinë' Jesús légaquië', tu' bë'ë didza' ca tu bönni' dë lu në'ë yöl-la' unná bë'.

<sup>33</sup> Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' bë'ë zidzaj didza', <sup>34</sup> rnnë':

—¡Busán netu'! ¿Bizxi rála'tu' quiu', Jesús, bönni' Nazaret? ¿Naru' zo'o para usunítui' netu'? Núnbë'a Li' Nu nacu'. Bönni' Lá'ayi queë' Dios nacu'.

<sup>35</sup> Jesús buzenë' le bach bö' xihui' na', en rë' le:

—Busayaj ru'u, en burúaj lu bönni' ni.

Ní'irö bö' xihui' na' gurú'una bönni' na' lu yu lógaca bönachi nacuá' ni'. Burúajtë lu bönni' na', en bíti'rö bi ben queë'.

<sup>36</sup> Bulu'báinë' yúgu'të', en gulu'ë didza' tuë' len ia'tué', ta'nnë':

—¿Bizxi didza' ni ru'ë? Len yöl-la' unná bë', en yöl-la' huáca zxon rinná bé'enë' yugu' bö' xihui', ate' tu'rúajtë bö' xihui' na'.

<sup>37</sup> Guzë didza' ca naca queë' Jesús, ate' bila'yöni bönachi yúgu'të yödzö idú gásibi'ilö.

*Ruúnë' Jesús xiná'anu nigula queë' Pedro*

*(Mt. 8:14-15; Mr. 1:29-31)*

<sup>38</sup> Ní'irö guyasë' Jesús, en burúajë' lu yu'u ga na' tu'dubë' tu'sëdë' queë' Dios, ate' guyázië' lidxë' Simón. Xiná'anu nigula queë' Simón na' zóanu ni', en yú'unu xilá, ate' guláta'yuë' lahuë' Jesús únë'-nu. <sup>39</sup> Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bë'ënu le gulahuë'.

*Ruúnë' Jesús zían nupa te'e*

*(Mt. 8:16-17; Mr. 1:32-34)*

<sup>40</sup> Cate' chiribía gubidza, yúgu'të nupa nacuá'len léguequi nupa na' te'e que queéguëqui yödzhuë' bila'dxín ni', ate' du-juá'gaca léguequi ga na' zoë' Jesús. Lë' guxóa në'ë nupa na' te'e, en bunë' léguequi. <sup>41</sup> Bulu'rúaj ca' zían bö' xihui' yú'ugaca bönachi te'e na'. Ta'bödxi'a bö' xihui' na', ta'nná:

—Li' nacu' zxi'inë' Dios.

Ní'irö Jesús buzenë' le bach yugu' bö' xihui' na', en bití' bë'ë lataj ila'nná, tu' nöziguequi náquië' Cristo.

*Runë' Jesús libán luyú Galilea*

*(Mr. 1:35-39)*

<sup>42</sup> Cate' za' rení' ia'tú dza, burúajë' Jesús Capernaum na', ate' guyijë' tu lataj cá'asö. Bila'dxin bönachi zían ni', tu'guílaj Jesús. Cate' bila'dxinë' ga na' zoë', gulë'éniguequinë' ulu'tsenë' Lë', para cabí uzë'ë ga na' nacu'ë. <sup>43</sup> Ní'irö Jesús gudxë' légaquië', rnnë':

—Run bayudxi tseja' gapa nacua' ia'zica'rö yödzö, tsöjena' ca' libán ni' que didza' dxi'a ca rinná bë'ë Dios. Que lë ni na' gusöl-lë'ë neda' ni.

<sup>44</sup> Caní guca, benë' libán yugu' yödzö luyú Galilea gapa naca lu yu'u ga tu'dubë' bönni' judío, en tu'sëdë' queë' Dios.

## 5

*Ta'dzunba' böla zían*  
(Mt. 4:18-22; Mr. 1:16-20)

<sup>1</sup> Cate' ni' zoë' Jesús ra' nísado' nazí'i le Genesaret, lu xiyú Galilea, bulu'quída' bönachi zían Lë' para ila'yöni xtídzë'ë Dios.

<sup>2</sup> Ní'irö bilé'enë' Jesús chopa bárcodo', zxóagaca lu nísado' ga na' naca ra' yu bidxi, ate' narúajgaquië' bönni' uzxön böla lë'egaca bárcodo' na', en ta'guibë' yöxaj böla quégaquië'. <sup>3</sup> Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxíguië' le ia'látido' zi'tu' ga naca ra' yu bidxi na'. Ní'irö gurö'ë Jesús lë'e bárcodo' na', en rö'ösë' ca' ni' rusédinë' bönachi zían nacua' lu yu bidxi na'. <sup>4</sup> Cate' budxi bë'ë didza' Jesús, ní'irö gudxë' Simón, rnnë':

—Busá bárcodo' ni lu nísado' ga na' rö'ö zila, ate' ni' guli'zalaj yöxaj böla queëli' para sönli'-ba' böla.

<sup>5</sup> Bubi'ë didza' Simón, rë' Jesús:

—Bönni' Usëdi, idú yëla chibentu' dxin, en bití' bi böla nazönitu'-ba', pero didza' quiu' izáljagara' yöxaj.

<sup>6</sup> Cate' chigula'zaljë' le, gula'zönë' ziantëröba' böla, ate' réquitiqui' iröza' yöxaj böla na'. <sup>7</sup> Ní'irö bulu'lá'a bulu'luí'isinë', bulu'lidzë' luzá'agaquië' nacu'ë ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzë'ë-ba' böla irópatë bárcodo' na', ate' chirequi ulu'huötaj bárcodo' na' lu nisa. <sup>8</sup> Cate' bilé'enë' Simón Pedro lë ni, ní'irö buzóa zxibë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

<sup>9</sup> Caní gunnë' tu' radxi ridzöbinë' Pedro ni'a quégacaba' böla zían na' gula'zóngaqüie'-ba', en lësca' caní guca quégaca nupa nacua'len lë'. <sup>10</sup> Guladxi gula'dzöbinë' ca' Jacobo, en Juan, yugu' zxfínë' Zebedeo, nupa ni nácagaca luzë'ë Simón Pedro na'. Ní'irö Jesús rë' Simón na', rnnë':

—Bití' gádxinu'. Na'a isí lo' ichë'u quia' bönachi ca runu' rizönu'-ba' böla.

<sup>11</sup> Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' sójácalenë' Jesús.

*Ruúnë' Jesús tu bönni' ré'enë' huë' nudzu' ruzödi*  
(Mt. 8:1-4; Mr. 1:40-45)

<sup>12</sup> Cate' zoë' Jesús tu lu yödzö ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bilé'enë' Jesús, busudxín lahuë' lu yu, en gúta'yuë' lahuë', rnnë':

—Xan, channö ré'ënu', huáca unu' neda'.

<sup>13</sup> Ní'irö bulí në'ë Jesús, en gudanë' lë'. Rë' lë':

—Rë'ënda'. Gacu' dxi'a.

La' gubídxité huë' nudzu' queë' bönni' na'. <sup>14</sup> Ní'irö Jesús gunná bé'enë' lë' cuntu nu guíë' ca'. Gudxë' lë':

—Guyéaj, yöjluí'i cuinu' lahuë' bixúz, ate' yöjñodzaj que yudo' le ruluí'i nuhuóácu' dxi'a ca gunná bë'ë Moisés, lë' na' uluí'i légaquië' chibóácu'.

<sup>15</sup> Guzëtë' didza' que yöl-la' huáca queë' Jesús, ate' bulu'dubi bönachi zían ga na' zoë' para ila'yöni xtídzë'ë, en para únë' léguequi, ugüë' yödzöhuë' té'eguequi. <sup>16</sup> Ní'irö buzë'ë Jesús ni', en guyijë' tu lataj cá'asö, ate' ni' bulidzë' Dios.

*Ruúnë' Jesús tu bönni' huë' nacú'unië' bin*  
(Mt. 9:1-8; Mr. 2:1-12)

<sup>17</sup> Ia'tú dza, cate' ni' rusédinë' Jesús bönachi, rö'ögaquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzö luyú Galilea, en luyú Judea, en lu yödzö Jerusalén. Naca bë' dë lu në'ë Jesús yöl-la' huáca queë' Xanru' Dios tu' ruúnë' bönachi te'e nacua' ni'. <sup>18</sup> Ní'irö bönni' nuá'agaquië' le denë' tu bönni' huë' nacú'unië' bin bila'dxinë' ga ni', ate' bulu'guiljë' nacxi ilunë' para ila'gu'ë lë' lu yu'u para ila'guixjë' lë' lahuë' Jesús. <sup>19</sup> Cate' biti' gula'dzölinë' nacxi ilunë', tu' nacua' bönachi zían ni', gula'benë' ícjo'olö yu'u na', en gula'saljë' ícjo'o na'. Ní'irö bulu'zötjë' le denë' bönni' huë' na', ate' gula'guixjë' lë' gatsaj láhui'lö bönachi ni' lahuë' Jesús. <sup>20</sup> Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Bönni', yugu' dul-la' nabágu'u chibuníti lahua'.

<sup>21</sup> Ní'irö gula'sí lógaquië' ta'zá' ládxi'gaquië' bönni' yudo' tu'sédinë' na', en yugu' bönni' yudo' fariseo, ta'nnë': “¿Nuzxi caz bönni' ni rnnë' le rucá'ana Dios cá'asö? ¿Nuzxi caz gaca uniti lo dul-la'? Tuzë' Dios runiti lahuë' dul-la'.”

<sup>22</sup> Réquibe'enë' Jesús le ta'zá' ládxi'gaquië', ate' rë' légaquië':

—¿Bizx que rizá' ládxi'li' caní? <sup>23</sup> Biti' naca böniga nu guië'sö bönni' ni: “Yugu' dul-la' nabágu'u chibuníti lahua'”, pero naca böniga nu gun ga chasë', en së'e ni'ë. <sup>24</sup> Guna' ga inözili' dë lu na'a neda', Bönni' Guljë' Bönachi, yöl-la' unná bë' uniti lahua' dul-la' luyú ni.

Ní'irö gudxë' bönni' na' nacú'unië' bin, rnnë':

—Li' rea', guyasa. Buá' le denu', en böaj lidxu'.

<sup>25</sup> La' guyásatë' bönni' huë' na' lógaquië', ate' bu'ë lë na' gúti'në', en söhuöjë' lidxë', rigu'ë Dios yöl-la' ba.  
<sup>26</sup> Gula'nítitiqui'sinë' yúgu'të', ate' gula'gu'ë Dios yöl-la' ba, en tádxisinë' ca', ta'nnë':

—Na'a bilé'eru' le run ga rubániru'.

*Jesús rulidzë' Leví*

(Mt. 9:9-13; Mr. 2:13-17)

<sup>27</sup> Gudödi gulaca yugu' lë ni burúajë' Jesús ni', ate' bilé'enë' tu bönni' uquízxaj lázagaca bönachi, lë' Leví, rö'ë ga na' ruquíxjë', ate' Jesús rë' lë':

—Gudá' neda'.

<sup>28</sup> La' guyásatë' Leví, ate' bucá'anë' yúgu'të', en sa'yéajlenë' Jesús.

<sup>29</sup> Gudödi ni' benë' Leví na' tu gü'i huagu queë' Jesús ga naca lu yu'u lidxë', ate' gula'cu'ë zían bönni' uquízxaj ni' len ia'bal-lë' bönni' ta'bö'lenë' légaquië' tahuë'. <sup>30</sup> Ní'irö bönni' yudo' tu'sédinë' len yugu' bönni' yudo' fariseo gula'nnë' quégaquië' bönni' usëda queë' Jesús, ta'nnë':

—¿Bizz que rë'aj rágulenli' yugu' bönni' uquízxaj, en ia'zíca'rë' bönni' dul-la'?

<sup>31</sup> Bubi'ë didza' Jesús, rë' légaquië':

—Yugu' bönni' nacu'ë dxi'a biti' naquíniguequinë' nu un bönachi, pero bönni' té'enë' naquíniguequinë' nu un bönachi. <sup>32</sup> Za'a, calëga ulídzagaca'-në' bönni' tsahui', pero za'a ulídzagaca'-në' bönni' dul-la' para ulu'bí'i ládxi'gaquië'.

*Ta'nábinë' Jesús ca naca que yöl-la' run gubasa*

(Mt. 9:14-17; Mr. 2:18-22)

<sup>33</sup> Ní'irö bönni' yudo' na' gula'nábinë' Jesús, ta'nnë':

—¿Bizz que tunë' gubasa zían luzuí bönni' dá'gaquië' Juan, en tu'lidzë' Dios, ate' tunë' ca' caní bönni' dá'gaquië' yugu' bönni' yudo' fariseo, pero bönni' dá'gaquië' Li' té'aj tahuë'?

<sup>34</sup> Jesús rë' légaquië':

—¿Naru' huácatsö gunli' ga ilunë' gubasa bönni' nacu'ë laní que yöl-la' rutsaga na' tsanni ni' bönni' rutsaga në'ë zóalenë' légaquië'? <sup>35</sup> Huadxín dza cate' udüë' bönni' rutsaga në'ë ga nacu'ë. Dza ní'irö ilunë' gubasa.

<sup>36</sup> Ní'irö bucúdzü'ë didza' Jesús ca naca lë ni, ate' rë' légaquië':

—Cuntu nu bönni' ichúguië' tu lari' cubi chinadía, en cuejë' tsötaca' le udë'ë lë'e lari' tēbi. Channö gunë' caní, calëgasö gaca ditaj lari' cubi na', pero lári'do' na' birúaj lë'e lari' cubi na' biti' tsöjlöza lari' tēbi na'. <sup>37</sup> Lësca' caní, cuntu nu bönni' rigué'ë xisi uva cubi lu buzudi guídi gula. Channö nu gun caní, xisi uva cubi na' uchöza' buzudi guídi gula, ate' ilalaj xisi uva na', ate' gaca ditaj buzudi guídi gula na'. <sup>38</sup> Que lë ni na' ralla' cá'aru' xisi uva cubi lu buzudi guídi cubi, ate' irópatë' ilaca



chi'i. <sup>39</sup> Channö zoa nu rë'aj xisi uva gula, biti' guë'ënitë gu'aj xisi uva cubi, tu' ranna: "Nácarö sizxí' xisi uva gula na'."

## 6

*Bönni' usëda queë' Jesús ta'lecjë' do zxa' xtila dza lá'ayi*  
(Mt. 12:1-8; Mr. 2:23-28)

<sup>1</sup> Cate' naca tu dza lá'ayi quégaquië' bönni' judío, ridödë' Jesús gapa dë yöla zxa' xtila, ate' bönni' usëda queë' ta'lecjë' do ga dxía zxa' xtila. Ta'zxúbi'ni ná'agaquië' le, en tahuë'. <sup>2</sup> Ní'irö gula'nábinë' bönni' yudo' fariseo légaquië', ta'nnë':

—¿Bizx que runli' le cabí ral-la' gunru' dza lá'ayi?

<sup>3</sup> Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún ca' nupa nacuá'len lë'? <sup>4</sup> Guyázië' lu yu'u queë' Dios, en guzxi'ë yöta xtila tu'cu'ë lahuë' Dios, lë na' biti' ral-la' gáguru', pero tuz bixúz dë lataj ilahuë', ate' gudahuë' David le, en bë'ë ca' quéguequi nupa nacuá'len lë'.

<sup>5</sup> Ní'irö Jesús gudxë' légaquië', rnnë':

—Neda', Bönni' Guljë' Bönachi, naca' xani dza lá'ayi.

*Tu bönni' narequi' në'ë*

(Mt. 12:9-14; Mr. 3:1-6)

<sup>6</sup> Cate' naca ia'tú dza lá'ayi quégaquië' bönni' judío, guyázië' Jesús lu yu'u ga tu'dubë' tu'sedë' queë' Dios, en busédinë' nupa nacuá' ni'. Zoë' ca' tu bönni' ni' narequi' në'ë ibëla. <sup>7</sup> Yugu' bönni' yudo' tu'sédinë', en yugu' bönni' yudo' fariseo tu'yúë' Jesús para ila'lé'enë' channö únë' bönni' na' cate' naca dza lá'ayi quégaquië' para ulu'dzölinë' nacxi ulu'zéguië' Lë' didza'. <sup>8</sup> Réquibe'enë' Jesús le ta'zá ládxi'gaquië', ate' gudxë' bönni' na' narequi' në'ë, rnnë':

—Guyasa. Guzuí gatsaj láchui'lö ni.

La' guyásatë' bönni' na', guzuínë'. <sup>9</sup> Ní'irö Jesús gudxë' yugu' bönni' yudo' na', rnnë':

—Unábitsöqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxi'a o gunru' le ruá' dö'? ¿Naru' dë lataj uguéla'ru' yöl-la' na'bán quégaca bönachi, o ugúaru' le?

<sup>10</sup> Ní'irö buyúë' Jesús yúgu'të bönni' na' nacu'ë gásibi'ilë', ate' gudxë' bönni' huë' na':

—Bulí no'o.

Bulí në'ë bönni' na', ate' la' böácatë në'ë na'. <sup>11</sup> Ní'irö gula'lenë' bönni' yudo' na', ate' gulún xtídza'gaquië' la' légacasë' nacxi bi ilunë' queë' Jesús.

*Riböë' Jesús chínnuë' bönni' ilácagaquië' gubáz queë'*

(Mt. 10:1-4; Mr. 3:13-19)

<sup>12</sup> Dza ni' guyijë' Jesús ga naca tu lu gu'ado'. Bulidzë' Dios ni', ate' idú yöla bë'lenë' Dios didza'. <sup>13</sup> Cate' za' rení, bulidzë'

yugu' bönni' dá'gaquië' Lë', ate' guröë' chinnuë' para iláquië' gubáz queë'. <sup>14</sup> Bulidzë':

Simón, (lë' ca' Pedro),

Andrés, (böchë'ë Pedro),

Jacobo, en Juan, en Felipe, en Bartolomé,

<sup>15</sup> Mateo, en Tomás,

Jacobo, (zxí'inë' Alfeo),

Simón, (bönni' ruí'i láchë'ë yödzö queë'),

<sup>16</sup> Judas, (böchë'ë Jacobo),

en Judas Iscariote, (bönni' udödë' Jesús lu ná'agaquië' bönni' ilútië' Lë').

*Ruúnë' Jesús bönachi zían*

(Mt. 4:23-25)

<sup>17</sup> Jesús bötjalenë' yugu' bönni' gubáz queë' na' lu guí'ado' na', ate' bila'dxinë' tu ga naca lachi', ga ni' nacu'ë zíanrö ca' bönni' usëda queë', ate' nacuá'len légaquië' bönachi zían narúajgaca yúgu'të yödzö luyú Judea, en yödzö Jerusalén, en yugu' yödzödo' dëgaca ra' nísado' ga na' nacuá' yödzö Tiro, en yödzö Sidón. Bila'dxín bönachi ni ga ni' para ulu'zë nágagaca xtídzë'ë Jesús, en ulu'huóáca lu yödzöhuë' té'eguequi.

<sup>18</sup> Bulu'huóáquië' ca' bönni' ni' ta'guí'i ta'záquië' lu ná'agaca bö' xihui'. <sup>19</sup> Yúgu'të bönachi zían na' tuí'i láchí'gaca ila'gán Jesús tu' ruúnë' léguequi len yöl-la' huáca queë'.

*Nupa nácagaca bica' ba, en nupa nácagaca bica' bayechi'*

(Mt. 5:1-12)

<sup>20</sup> Ní'irö buyúë' Jesús yugu' bönni' usëda queë' nacu'ë ni', en gudxë' légaquië':

—Bica' ba libí'ili', réquibe'eli' riyadzjali' le naca queë' Dios, tu' gata' queëli' lataj ga rinná bë'ë Dios.

<sup>21</sup> 'Bica' ba libí'ili' ridunli' le gunnë' Dios queëli', tu' huóljali'.

'Bica' ba libí'ili' ribödxili' tu' bi nadéli'li' le naca tsahui', tu' huadxín dza uzídxili'.

<sup>22</sup> 'Bica' ba libí'ili', tu' za' dza cate' biti' ila'lé'ë bönachi libí'ili' dxi'a, en ulu'béaj libí'ili' ga nacuá', en ila'nnë' zí' queëli', en ulu'cá'ana cá'asö le nazí'i lali' ca tu le naca xihui' tu' dá'ali' neda', Bönni' Guljé' Bönachi. <sup>23</sup> Buli'sí' xibé dza na', en buli'dzeja, tu' naca zxön le guequi queëli' yehua' yubá. Lë'sca' caní gulunë' xuz xtó'ogaca bönachi ni quégaquië' bönni' gulu'ë didza' uláz queë' Dios.

<sup>24</sup> 'Bica' bayechi' libí'ili', dë yöl-la' tsahui' queëli', tu' chidë le ruzí'ili' xibé.

<sup>25</sup> 'Bica' bayechi' libí'ili' nuhuólaj nudzé'eli' na'a, tu' huadunli'.

'Bica' bayechi' libí'ili' ruzídxili' na'a, tu' huí'inili', en cödxí yéchi'li'.

<sup>26</sup> 'Bica' bayechi' libí'ili' ta'nně yúgu'tě bönachi dxi'a queéli'. Lësca' caní guluně' xuz xtó'oli', gula'nně' dxi'a quégaquié' bönni' gula'z'í' yě'ě, gula'nně' nácagaquié' bönni' tu'ě didza' uláz queé' Dios.

*Ral-la' idxí'iru' nupa biti' ta'lé'e rě'u dxi'a*

*(Mt. 5:38-48; 7:12)*

<sup>27</sup> Gunně' ca' Jesús:

—Libí'ili' zóali' ni, en riyönili' xtídza'a, rea' libí'ili': Guli'dxí'i nupa biti' ta'lé'e libí'ili' dxi'a. Guli'gún le naca dxi'a quégaca nupa tu'dí'i libí'ili'. <sup>28</sup> Guli'nabi Dios gaca dxi'a quégaca nupa tua' dō' queéli', en buli'lidzě' Dios inábili'-ně' gácaleně' nupa ta'nně' z'í' queéli'. <sup>29</sup> Channō nu capa' tsólá'a xagu', buzě ia'tsólá'a ca' xagu'. Channō nu cúa lari' naxóa cúdz'u, bē' lataj cúa ca' xzo'. <sup>30</sup> Núti'tēs nu bi inaba le dē quiu', bunōdzaj que, ate' nu cúa le nequi quiu', biti' unabu' le. <sup>31</sup> Ca rě'ēnili' ilún bönachi queéli', lësca' caní guli'gún quéguequi.

<sup>32</sup> 'Channō nadxí'isili' nupa nadxí'igaca libí'ili', ¿bizxi yöl-la' ba idéli'li'? Lësca' caní tuně' bönni' dul-la', ta'dxí'ině' nupa nadxí'iguequi légaquié'. <sup>33</sup> Channō runli' le naca dxi'a quégacasō nupa tun dxi'a queéli', ¿bizxi yöl-la' ba idéli'li'? Lësca' caní tuně' bönni' dul-la'. <sup>34</sup> Channō runōdzjali' quégaca nupa runli' löza ulu'bí'i queéli', ¿bizxi yöl-la' ba idéli'li'? Lësca' caní tuně' bönni' dul-la', tu'nōdzjě' quégaca nupa tun dul-la', tu' tuně' löza ulu'bí'i quégaquié' lē na' bulu'nōdzjě'. <sup>35</sup> Neda' rea' libí'ili': Guli'dxí'i nupa biti' ta'lé'e libí'ili' dxi'a, en guli'gún le naca dxi'a. Buli'nōdzaj quégaca bönachi sal-la' biti' runli' löza nu ubí'i queéli'. Channō caní gunli', zxōn naca le gata' queéli', ate' gácali' zxi'ini cazě' Dios, Nu nácaterō lo, tu' runě' Lē' le naca dxi'a quégaca bönachi biti' ta'yaza lādxi'gaca, en quégaca bönachi tuá' dō'. <sup>36</sup> Buli'huéchi' lādxi'li' bönachi ca na' runě' Xúzili' Dios, ruhuéchi' lādxě'ě yúgu'tě bönachi.

*Biti' ral-la' ichugu bě'ěru' que luzá'aru'*

*(Mt. 7:1-5)*

<sup>37</sup> Gunně' ca' Jesús:

—Biti' ichugu bě'ěli' que luzá'ali', ate' cuntu nu ichugu bě' queéli'. Biti' cuéaj bě'ěli' que luzá'ali', ate' cuntu nu cuéaj bě' queéli'. Buli'niti lo luzá'ali', ate' Dios uniti lahué' ca' libí'ili'. <sup>38</sup> Buli'nōdzaj que luzá'ali', ate' Dios gunně' queéli'. Ulu'nōdzjě' queéli' le ulu'rixě' len tu guí'ina ribixi le naca idú, le naguirō, en naguí gate ga rě', en zóatica' gubá. Ca naca le ruríxili', la' cá'asō urixě' Dios ca' queéli'.

<sup>39</sup> Bucúdz'u'ě didza' Jesús, rě' légaquié':

—¿Naru' huácatsō nu bönni' lo chul-la' ichě'ě ia'tú'ě bönni' lo chul-la'? Biti' ca' gaca, tu' ila'bixě' iropě' tu lu yeru. <sup>40</sup> Biti' ca'

gácaré' lo tu bönni' usëda ca nu rusëdi lë', pero cate' údxi izëdë' bönni' na', gáquië' ca naca nu na' rusëdi lë'.

<sup>41</sup> ¿Bizx que ruyú' bëbudo' yu'u guiöj lahuë' böchi' luzó'o, en biti' rilé'enu' le zxön yu'u guiöj lo cazu'? <sup>42</sup> ¿Naru' huácatsö guío'-në' böchi' luzó'o: "Böcha'a, benna lataj cueja' bëbudo' yu'u guiöj lo'", en biti' rilé'enu' le zxön yu'u guiöj lo cazu'? Li', bönni' rulu'isö tsahui' cuinu', guléaj zí'alö le zxön yu'u guiöj lo cazu', ate' ní'irö ilé'enu' dxi'a para cueju' bëbudo' yu'u guiöj lahuë' böchi' luzó'o.

*Le runru' naca bë' le nácaru'*  
(Mt. 7:17-20; 12:34-35)

<sup>43</sup> Gunnë' ca' Jesús:

—Tu yaga dxi'a biti' cuía le naca cá'asö. Lësca' caní, tu yaga guí'a biti' gaca cuía le naca dxi'a. <sup>44</sup> Caní naca, le ribía tu yaga naca bë' ca naca yaga na'. Biti' ruchíbiru' le ribía yaga higo lu yaga yötsi', en calëga lu bisequi' yötsi' biti' ruchíbiru' le ribía lubá uva. <sup>45</sup> Tu bönni' dxi'a ru'ë didza' dxi'a tu' yu'u le naca dxi'a icja ládxi'da'ahuë', ate' didza' xihui' ru'ë bönni' xihui' tu' yu'u icja ládxi'da'ahuë' le xihui'. Rinnë ruá'aru' ca naca le yu'u icja ládxi'do'oru'.

*Chopa ca gaca cuéquiru' xilibi yu'u*  
(Mt. 7:24-27)

<sup>46</sup> Gunnë' ca' Jesús:

—¿Bizx que rulídzali' neda', rnnali': "Xantu', Xantu'", pero biti' runli' ca rinná bé'eda' libí'ili'? <sup>47</sup> Ulu'ida' libí'ili' ca naca nu na' za' quía', en riyöni xtídza'a, en run ca rnna xtídza'a. <sup>48</sup> Nu ni naca ca tu bönni', cate' benë' lidxë', guchö'önë' ga rë', en guléquië' xilibi yu'u ga naca lu guiöj. Cate' bötaj yegu gubó'o, guchö'öna cuita yu'u na', pero biti' guca uquínnaj le, tu' nulibi ga naca lu guiöj. <sup>49</sup> Na'a, nu riyöni xtídza'a, en biti' run ca rnna, nu ni naca ca tu bönni' benë' lidxë' ga naca lu yu cá'asö. Biti' benë' xilibi. Cate' guchö'öna yegu gubó'o cuita yu'u na', la' biguínnajtë, ate' gubixi dërö zö'ö que.

## 7

*Jesús ruúnë'-bi' bi'i huen dxin queë' tu bönni' unná bë'*  
(Mt. 8:5-13)

<sup>1</sup> Cate' Jesús budxi bë'lenë' légaquië' didza' ni, guyázië' yödzö Capernaum. <sup>2</sup> Lu yödzö ni' zoë' tu bönni' Roma rinná bé'enë' bönni' röjáquië' gudil-la. Zóabi' bi'i huen dxin queë' nadxí'ide'enë'-bi', ate' bi'i ni ré'ebi', en chirequi gátibi'. <sup>3</sup> Cate' biyönnë' bönni' ni didza' tu'ë bönachi ca naca queë' Jesús, la' gusöl-la'të' bal-lë' bönni' gula tu'zëajni'inë' bönni' judío ga na' zoë' Jesús, tsöjötayugaquië' lahuë' Lë' guidë' uduhuënë'-bi' bi'i huen dxin queë' na' ré'ebi'. <sup>4</sup> Bönni' gula

tu'zėjni'inē' na' bila'dxinē' ga zoē' Jesús, ate' guláta'yuē' lahuē' idú ládxi'gaquiē', ta'nnē':

—Náquiē' lesaca' bönni' na' gunu' queē' lē ni, <sup>5</sup> tu' runē' bal bönachi uládz queēru', en benē' tu yu'u queēru' ga rudúbiru' rusēdaru' queē' Dios.

<sup>6</sup> Ní'irō Jesús guyéajlenē' légaquiē'. Cate' chizóa ila'dxinē' lidxē' bönni' na', lē' gusól-lē'ē bal-lē' böchi' luzē'ē ga zē'ē Jesús, ate' tē' Lē':

—Xan, rnnē' bönni' na': "Biti' uguí'inu', tu' cabí naca' lesaca' tsáziu' lidxa', <sup>7</sup> en biti' naca' lesaca' guída' ga zu'. Que lē ni na' biti' burúguida' guída' ga zu'. Bě'ēsō didza', ate' huóacatēbi' bi'i huen dxin quia'. <sup>8</sup> Neda' ca', zoa nu rinná be'e neda', ate' nacu'ē ca' bönni' rōjáquiē' gudil-la rinná bé'eda' légaquiē'. Rea'-nē' tuē': Guyéaj ni', ate' rejē'. Rea'-nē' ia'túē': Gudá ni, ate' ridē'. Rea'-nē' ca' huen dxin quia': Ben dxin ni, ate' runē' dxin na'."

<sup>9</sup> Cate' biyönnē' Jesús didza' ni, bubáninē' queē' bönni' na', ate' buécjē', en gudxē' bönachi na' zá'gaca cúdzu'lē', rnnē':

—Le nácatē rea' libí'ili', cuntu nu bönni' Israel biti' rōjxáqui'da'-nē' réajlē'ē quia' ca réajlē'ē quia' bönni' ni.

<sup>10</sup> Cate' bulu'dxinē' bönni' na' gusól-lē'ē bönni' rinná bé'enē' bönni' rōjáquiē' gudil-la, gula'yáziē' ga naca lu yu'u lidxē', en bila'lé'enē' chibōacabi' bi'i huen dxin na'.

*Jesús rusubanē'-bi' bi'i bönni' queēnu tu nigula uzēbi*

<sup>11</sup> Gudōdi guca lē ni, sa'yéajē' Jesús yōdzō Naín, ate' dzágagaquiē' bönni' usēda queē' Lē', len bönachi zían. <sup>12</sup> Cate' bidxinē' gala' ra' yōdzō na', bilé'enē' yugu' bönni' nuá'agaquiē'-bi' tubi' bi'i bönni' nati. Sōjčáchi'gaquiē'-bi'. Bi'i nati na' nácabi' la's dui bi'i queēnu tu nigula uzēbido'. Zían bönachi uladza queēnu nigula uzēbi na' sōjácalen-nu. <sup>13</sup> Cate' Xanru' bilé'enē'-nu, buéchi' ládxe'ē-nu, ate' gudxē'-nu:

—Bíti'rō cōdxu'.

<sup>14</sup> Ní'irō gubígui'ē Jesús, en gudanē' da'a yaga ga na' dēbi' bi'i nati na'. Gula'bözē' bönni' na' nuá'agaquiē'-bi', ate' Jesús gunné':

—Bi'ido', li' rea', guyasa.

<sup>15</sup> Ní'irō bubanbi'. Gurō'ōbi' bi'i na' zí'alō nátibi', ate' gusi' lobi' ru'ibi' didza'. Jesús budōdē'-bi' lu ná'anu xiná'abi'. <sup>16</sup> Cate' bönni' ni' bila'lé'enē' lē ni, guládxinē' yúgu'tē', ate' gula'gu'ē Dios yōl-la' ba, ta'nnē':

—Bidxín queēru' tu bönni' lo, ru'ē didza' uláz queē' Dios. Dios caz rácalenē' bönachi queē'.

<sup>17</sup> Guzē didza' ca naca yōl-la' huáca queē' Jesús, ate' bila'yōni bönachi yúgu'tē yōdzō luyú Judea, en yúgu'tē yōdzō idú gásibi'ilō.

*Le rinabë' Juan, bönni' buquile' bönachi nisa*  
(Mt. 11:2-19)

<sup>18</sup> Bönni' dá'gaquië' Juan gula'guíxjöi'inë' lë' yúgu'të lë ni runë' Jesús. Ni' yu'ë Juan lidxi guië, bulidzë' chopë' bönni' na' dá'gaquië' lë, <sup>19</sup> ate' gusöl-lë'ë légaquië' ga na' zoë' Jesús para ila'nábinë' Lë', ila'nnë': "¿Nacu' Li' Cristo, bönni' ral-la' guidë', o naru' ral-la' cöztu'-në' bönni' yúbölö?" <sup>20</sup> Cate' bila'dxinë' bönni' na' nasöl-lë'ë Juan ga na' zoë' Jesús, të' Lë':

—Juan, bönni' buquile' bönachi nisa, nasöl-lë'ë netu' para inábitu' Li', innatu': "¿Nacu' Li' Cristo, bönni' na' ral-la' guidë', o naru' ral-la' cöztu'-në' bönni' yúbölö?"

<sup>21</sup> La' ná'asö ruúnë' Jesús zían nupa te'e, yugu' bönni' huë', en bönni' yú'ugaca légaquië' bö' xihui', ate' zían bönni' lo chul-la busaljë' guiöj lógaquië'. <sup>22</sup> Bubi'ë didza' Jesús, rë' chopë' bönni' na' nasöl-lë'ë Juan, rnnë':

—Guli'tséaj, guli'tsöjtíxjöi'i-në' Juan ca naca le bilé'eli', en le biyönili'. Tu'lé'enë' bönni' guchul-la lógaquië'. Tu'zë'ë bönni' gulatsjë'. Nuhuóácagaquië' bönni' gü'iguequinë' huë' nudzu' ruzödi. Tu'yönnë' bönni' gula'cödzue'. Nubángaquië' bönni' gulatië'. Ta'yönnë' bönni' yechi' didza' dxi'a. <sup>23</sup> Bica' ba nu biti' gaca chopa ladxi', ate' za'len neda' sal-la' biti' runa' ca réqui nu na' ral-la' guna'.

<sup>24</sup> Cate' bönni' na' gusöl-lë'ë Juan bulu'zë'ë ni', gusí lahuë' Jesús rulu'í'inë' bönachi ni' ca naca queë' Juan na', rnnë':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le? <sup>25</sup> ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' nácuë' lari' nazáca'de'e? Nöz quézili' nupa nácu'gaca lari' nazáca'de'e, en tu'zí' xibé yöl-la' tsahui', nacua' lídxigaquië' bönni' ta'nná bë'ë. <sup>26</sup> ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' ru'ë didza' uláz queë' Dios? Ön, rea' libí'ili', ate' nayëpisëtë're' ca nu ruí'í didza' uláz queë' Dios. <sup>27</sup> Náquië' Juan bönni' na' nazúaj lu guichi lá'ayi ca naca queë', rna:

Buyútsöca', risöl-la'a-në' gubáz quia', inöruë' ca Li'.

Bönni' ni uchi'ë nöza ga tödu'.

<sup>28</sup> Neda' rea' libí'ili': Gapa nacua' bönachi, channö zoë' nu bönni' ru'ë didza' uláz queë' Dios, biti' nácarë' lo ca Juan, bönni' na' buquile' bönachi nisa, pero nu nácatë'rö cuídi'sö ga rinná bë'ë Dios nayëpisëtë'rö ca Juan na'.

<sup>29</sup> Cate' bönachi ni', en bönni' tu'quizxjë' lázagaca bönachi bila'yönnë' didza' ni bë'ë Juan, guléquibe'enë' le naca tsahui' lahuë' Dios, en bila'dilë' nisa lu në'ë Juan, <sup>30</sup> pero yugu' bönni' yudo' fariseo, en bönni' yudo' tu'sédinë' xibá queë' Moisés biti' bila'dilë' nisa lu në'ë Juan, ate' caní guca, bulu'cá'anë' cá'asö le gú'unnë' Dios gunë' quégaquië'.

<sup>31</sup> Gunnë' ca' Xanru':

—¿Nacxi uséqui'tseda' bönachi nacuá' dza ni zóaru' na'a? ¿Nacxi caz nácagaquië'? <sup>32</sup> Nácagaquië' ca bí'ido' ta'guítjabi'. Ta'bõ'öbi' lu yë'ëyi, en ta'bõdxi'abi'. Ta'nnabi' tubi' ia'tubi': "Rucõdxitu' queëli' gui, pero biti' ruyá'ali'. Rul-la yéchi'tu', pero biti' ribõdxili'." <sup>33</sup> Caní nácali' tu' bidë' Juan, bönni' buquile' bönachi nisa, en biti' gudahuë' yõta xtila, en biti' gu'ë xisi uva, ate' rnnali' queë': "Tu' xihui' dzaga lë'." <sup>34</sup> Cate' bida' neda', Bönni' Guljë' Bönachi, en rë'aj rahua', rnnali' quia': "Bönni' ni náquië' bönni' huágulë'ë, en bönni' re'jë'. Náquië' luzá'agaquië' bönni' tu'quizzjë', en ia'zíca'rë' bönni' dul-la'." <sup>35</sup> Rea' libí'ili': Naca bè' nupa nápagaca yõl-la' réajni'i queë' Dios ni'a que le túngaca.

*Le benë' Jesús lidxë' tu bönni' yudo' fariseo*

<sup>36</sup> Tu bönni' yudo' fariseo bulidzë' Jesús gágulenë' lë' tsõzõn, ate' guyazië' Jesús lidxë' bönni' na', en gurõ'ë rahuë'. <sup>37</sup> Zóanu lu yõdzõ na' tu nigula udá dzaga, en cate' nõzinu rõ'ë rahuë' Jesús lidxë' bönni' yudo' fariseo na', ní'irõ bidxinnu ni' nuá'anu tu böga'do' néquini guiõj nazaca' le yudzu tu le rilá' zxixi. <sup>38</sup> Cate' bidxinnu zaca' cúdzulë' Jesús, gurõ'õnu xini'ë ribõdxinu. Ní'irõ gusí lonu rigú'unu nisa ribõdxinu ni'ë Jesús, en ruzxinu ni'ë len guitsa' ícjanu. Butsaga lonu ni'ë, en gulú'unu ni'ë lë na' rilá' zxixi. <sup>39</sup> Cate' bönni' yudo' fariseo na' nulidzë' Jesús bilé'enë' lë ni, guzá' ládxë'ë, rnnë': "La'tu' náquië' bönni' ni bönni' ru'ë didza' uláz queë' Dios, huéquibe'enë' nuzxi na', en nacxi nácanu nigula ni rigannu Lë', tu' nácanu nigula udá dzaga." <sup>40</sup> Ní'irõ Jesús gudxë' bönni' fariseo na', rnnë':

—Simón, dë tu le ral-la' guía' li'.

Bubi'ë didza' bönni' na', rnnë':

—Gunná, Bönni' Usedi.

<sup>41</sup> Jesús rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazxjë' que chopa iz, ate' ia'túë' na' ral-lë'ë queë' lazxjë' que chopa beo'. <sup>42</sup> Tu' cabí dë quégaquië' dumí ulu'guízxjë' lë na' tál-lë'ë queë', que lë ni na' buniti lahuë' iropë' lë na' tál-lë'ë queë'. Gunnátsõca' na'a. ¿Núzxilë' bönni' chopë' ni idxí'irõnë' bönni' na' buniti lahuë' légaquië'?

<sup>43</sup> Bubi'ë didza' Simón na', rnnë':

—Réquida' neda', bönni' na' rála'rë' queë' dumí, lë na' buniti lahuë'.

Jesús gudxë' lë':

—Le nácasõ rnno'.

<sup>44</sup> Ní'irõ buécjë' Jesús, ate' ni' ruyúë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' biti' bennu' quia' nisa quíbida' ni'a, pero nigula ni gulú'unu ni'a nisa ribödxinu, en buzzinu ni'a len guitsa' ícjanu. <sup>45</sup> Biti' butsaga lo' neda', pero cate' bidxíntea' lidxu', biti' ruzóa dxinu nigula ni, rutsaga lonu ni'a. <sup>46</sup> Biti' gulú'u icja' le za, pero nigula ni gulú'unu ni'a lë na' rilá' zxixi. <sup>47</sup> Que lë ni na' rea' li', dul-la' zían gubága'nu nigula ni, chiguyú'u yöl-la' runiti lo quéguequi, ate' nadxí'ide'enu neda'. Nu na' Dios runiti lahuë' le láti'do'os, láti'do'os nadxí'i Dios nu na'.

<sup>48</sup> Ní'irö Jesús gudxë'-nu nigula na', rnnë':

—Dul-la' gubágu'u chiguyú'u yöl-la' runiti lo que.

<sup>49</sup> Yugu' bönni' na' ta'bö'lenë' Jesús tahuë' gula'sí lógaquië' tē luzá'agaquië', ta'nnë':

—¿Nuzxi caz bönni' ni, runiti lotsë' ca' dul-la'?

<sup>50</sup> Ní'irö Jesús gudxë'-nu nigula na', rnnë':

—Tu' réajlë'u neda', chibuló' li'. Böaj lidxu', zoa dxi ládXu'u.

## 8

*Yugu' nigula tácalennu Jesús, ta'gú'unu le tahuë'*

<sup>1</sup> Gudödi gulaca lë ni, gudë' Jesús gapa nacua' zían yödzö zxon, en yugu' yödzödo', ate' benë' libán ni', en bë'ë didza' que didza' dxi'a ca rinná bë'ë Dios, ate' idxínnutë' bönni' usëda queë' dzágagaquië' Lë'. <sup>2</sup> Bál-lanu nigula bunë' Jesús légacanu dzágagacanu ca' Lë'. Bubéajë' bö' xihui' yú'ugaca légacanu, en bugúë' yugu' yödzöhuë' gü'iguequinu. Nútsa'nu ládjagacanu María, lënu ca' Magdalena, nigula na' bubéajë' gadxi bö' xihui' yú'ugaca lënu. <sup>3</sup> Juana, nigula queë' Chuza, bönni' yu'u lu në'ë le dë lidxë' Herodes, nútsa'nu ca' ládjagacanu, ate' cá'unqueze Susana nútsa'nu ca' légacanu. Ta'gú'unu nigula ni, en zíanrönu ca', le tahuë' Jesús, en yugu' bönni' usëda queë'. Tu'nödZjanu le dë quégacanu.

*Rucúdzu'ë didza' Jesús ca naca queë' bönni' guz*

*(Mt. 13:1-9; Mr. 4:1-9)*

<sup>4</sup> Bila'rúaj bönachi zían yugu' yödzö ni', en bilá'gaca ga na' zoë' Jesús. Cate' bulu'dubë' ga na' zoë', Lë' bucúdzu'ë didza', rë' légaquië':

<sup>5</sup> —Birúajë' bönni' guz, söjësië' xisedo'. Cate' ni' söjësië', bulu'huöxaj bal-la xisedo' na' ga naca la' nöza, ate' bulu'libi bönachi léguequi. Bila'dxinba' ca' biguínido', en gulé'ajba' xisedo' na' dzö'ö la' nöza. <sup>6</sup> Bulu'huöxaj ia'bal-la xisedo' na' lu yu ga rö'ö guiöj. Cate' gula'lén xisedo' na', la' gula'bídxité tu' cabí nalupa' yu na'. <sup>7</sup> Bulu'huöxaj ia'bal-la xisedo' na' ga bulu'lén lubá yötsi'. Tsözxön gula'zxön lubá yötsi' na', en xisedo' na', ate' lubá yötsi' na' bila'röli xisedo' na' gula'lén, en gulún ditaj léguequi. <sup>8</sup> Bulu'huöxaj ia'bal-la xisedo' na' ga



naca luyú bëbu. Cate' chigula'zxõn, bulu'nödzej. Tu dxigu' na' bunödzej ia'tú gayuá'tërö xisedo' ca'.

Cate' budxi gunné' caní Jesús, bë'ë zidzej didza', rnnë':  
—¡Nu zoa nagui, en riyõni ral-la' uzë nagui!

*Bizx que rucúdu'ë Jesús didza'*

(Mt. 13:10-17; Mr. 4:10-12)

<sup>9</sup> Ní'irö yugu' bönni' usëda queë' Jesús gula'nábinë' Lë', ta'nñë':

—¿Bizxi sa'yéaj lë na' bucúdu'u didza'?

<sup>10</sup> Jesús gudxë' légaquië':

—Dios ruzéajni'inë' libí'ili' le nagachi' ca rinná bë'ë Lë', pero ia'zica'rö bönachi ni, ruí'ilena' léguequi didza' le rucúdu'a didza' para cate' ulu'yúë', biti' ila'lé'enë', en cate' ila'yönnë', biti' ila'yéajni'inë'.

*Rigúxjö'ë Jesús le ruluí'i le bucúdu'ë didza'*

(Mt. 13:18-23; Mr. 4:13-20)

<sup>11</sup> Gunnë' ca' Jesús:

—Caní naca le ruluí'i lë na' bucúdu'a didza'. Xisedo' na' naca xtídzë'ë Dios. <sup>12</sup>Xisedo' na' bulu'huõxaj la' nõza tu'luí'i ca raca quégaca bönni' ta'yönnë' didza' na', pero la' za'të tu' xihui', en rigúa didza' na' bidxín lu icja ládxi'do'gaquië', para cabí ila'yéajlë'ë, en cabí ulu'lë'. <sup>13</sup>Xisedo' na' bulu'huõxaj lu yu ga röö'õ guiõj tu'luí'i ca raca quégasakië' bönni' ta'yönnë' didza' na', en tu'dzëjanë' ta'zi'ë le, pero nácagasakië' ca xisedo' na' biti' ben lui. Tu chí'isö ta'yéajlë'ë, tu' ridxín le rizí' bë' légaquië', ate' la' tu'huõatë ládxi'gaquië'. <sup>14</sup>Xisedo' na' bulu'huõxaj ga bulu'lén lubá yötsi' tu'luí'i ca raca quégasakië' bönni' ta'yönnë' didza' na', en cate' chibila'yönnë', yugu' le tuí'i ládxi'gaquië' yödzölió ni, en yugu' yöl-la' tsahui' que, en yugu' le ta'yaza ládxi'gaquië' le taca ni, tun nigui légaquië', ate' biti' run dxin didza' na' lu icja ládxi'do'gaquië'. <sup>15</sup>Xisedo' na' bulu'huõxaj ga naca luyú bëbu tu'luí'i ca raca quégasakië' bönni', idú ládxi'gaquië' ta'yönnë' didza' na', en ta'gu'ë tsutsu le lu icja ládxi'do'gaquië', ate' lu yöl-la' ribõza zxõn ladxí' tunë' ca rnna didza' na'.

*Rucúdu'ë didza' Jesús que le rigú'u bení' lídxiru'*

(Mt. 4:21-25)

<sup>16</sup> Gunnë' ca' Jesús:

—Cuntu nu bönni' ruquelë'ë guí, ate' la' rudúsi'të' le guí'ina, en biti' rigú'ë le zxani le ráti'në', pero ruzóë' le xilataj ga naca liná' lu yu'u, ate' nupa ila'yaza ni' ulu'zí' xibé guí' na'. <sup>17</sup> Ilá' lahui yúgu'të le nagachi', ate' gaca bë', ate' irúaj ga liná' yúgu'të le raca balándo'os.

<sup>18</sup> Que lë ni na', buli'zë nágali, tu' huadéli'në' ia'lati' bönni' ruzóë' tsutsu icja ládxi'da'ahuë' didza' riyönnë', en huazi'rë'

xtídzë'ë Dios, pero bönni' biti' ruzóë' tsutsu icja ládxi'da'ahuë'  
didza' riyönnë', huadúa didza' na' biyönnë'.

*Xinë'ë Jesús, en yugu' bönni' böchë'ë*

*(Mt. 12:46-50; Mr. 3:31-35)*

<sup>19</sup> Ní'irö bila'dxinë' xinë'ë Jesús, en yugu' bönni' böchë'ë  
ga na' zoë', pero biti' guca ila'bíguë'ë gala' ga zoë' tu' nacuá'  
bönnachi zían ni'. <sup>20</sup> Zoa ni' nu bulidza Jesús, rnna:

—Nacu'ë xinó'o, en yugu' bönni' böchu'u lö'a. Të'ënnë'  
ilu'ílenë' Li' didza'.

<sup>21</sup> Bubi'ë didza' Jesús, rë' légaquië':

—Nupa ni ta'yöni xtídzë'ë Dios, en tun ca rnna, bönni' ni  
nácagaquië' ca xiná' caza', en yugu' bönni' böchi' caza'.

*Jesús ribequi dxíë' bö' budunu'*

*(Mt. 8:23-27; Mr. 4:35-41)*

<sup>22</sup> Tu dza gurenë' Jesús tu lë'e bárcodo', dzágagaquië' bönni'  
usëda queë' Lë', ate' Jesús rë' légaquië':

—Udöditsöca'ru' ia'tsölá'a nísado' ni.

Ní'irö söjácatë'. <sup>23</sup> Tsanni ni' ta'dödë' lu nísado' na', rásië'  
Jesús. Ní'irö gusí lo recja bö' budunu' lu nísado' na', ate' chire-  
qui huötaj bárcodo' na' znan nisa, en zoa bönnadxi quégaquië'.

<sup>24</sup> Ní'irö gula'biguë'ë ga dë' Jesús, en bulu'subanë' Lë', ta'nnë':

—¡Bönni' Usedi! ¡Bönni' Usedi! ¡Chirequi huötjaru' lu nisa!

Cate' bubanë' Jesús, bulidzë' bö' na' recja, en nisa na' riyasa  
ridxiada', ate' guzóa dxi bö' na' recja, en guró'o dxi lu nísado'  
na'. <sup>25</sup> Ní'irö Jesús gudxë' yugu' bönni' usëda queë', rnnë':

—¿Naru' cabí réajlë'ëli' Dios?

Guládxinë' légaquië', en tu'bánninë'. Gulë luzá'agaquië' tuë'  
ia'tué':

—¿Nuzxi caz bönni' ni? Rinná bé'enë' bö' recja, en nísado', ate'  
tun ca rnna xtídzë'ë.

*Tu bönni' yödzö Gadara yu'u lë' bö' xihui'*

*(Mt. 8:28-34; Mr. 5:1-20)*

<sup>26</sup> Ní'irö bila'dxinë' lu xiyúgaquië' bönni' Gadara, le dë  
ia'tsölá'a nísado' ca dödilö ga dë luyú Galilea. <sup>27</sup> Cate' birúajë'  
Jesús lë'e bárcodo' na' ga naca lu yu na', dutságuië' tu bönni'  
yödzö na' Lë'. Chigudzé yu'u bö' xihui' lë', ate' bíti'rö rácuë'  
lari', en bíti'rö rizóë' lu yu'u, pero nun xilatjë' lu znan bulóaj ga  
nádjagaca yeru ba. <sup>28</sup> Cate' bönni' na' yu'u bö' xihui' lë' bilé'enë'  
Jesús, guródxí'ë zidzaj, ate' buzóa zxi'bë' lahuë' Jesús, en bë'ë  
zidzaj didza', rnnë':

—¿Bizxi ral-la'a quiu', Jesús, Zxi'inë' Dios nayëpisëtërë'?  
Ráta'yua' lo' cabí usaca' zi'u neda'.

<sup>29</sup> Caní gunnë' tu' chigunná bé'enë' Jesús bö' xihui' na' urúaj  
lu bönni' na'. Zían luzuí zí'atëlö burixi butúluda' bö' xihui' na'  
bönni' na', ate' yugu' bönni' yödzö ni' gulúgui'ë lë' du guië', en

bulu'xéjanë' bregui' guié ni'a në'ë, pero blë'ë yugu' du guié na',  
ate' bö' xihui' na' yu'u lë' guchë' lë' lu lataj cá'asö. <sup>30</sup> Ní'irö  
Jesús gunábinë' bö' xihui' na', rnnë':

—¿Bi leu'?

Bö' xihui' na' gudxi Lë':

—Le Zián lea'.

Caní gunná tu' yú'ugaca bö' xihui' zián bönni' na'. <sup>31</sup> Ní'irö  
yugu' bö' xihui' na' guláta'yugaca lahuë' Jesús cabí isöl-lë'ë  
léguequi lataj chul-la quégaca nupa nátigaca. <sup>32</sup> Nacuá'aba' ca'  
tu cö'öba' cuchí zián ta'daba' táguba' lu guí'ado' ni', ate' bö' xi-  
hui' na' gula'naba yechi' Jesús gu'ë léguequi lataj tsöjtsú'ugaca  
cuchi zián na'. Jesús bë'ë léguequi lataj. <sup>33</sup> Bulu'rúaj yugu'  
bö' xihui' lu bönni' na', en yöjtsú'ugaca cuchí zián na', ate'  
yöjácaba' cuchí zián na' ga naca tu lë'e guíöj. Yöjbíxigacaba' lu  
nísado', ate' ni' gula'yëpiba' nisa, gulátiba'.

<sup>34</sup> Cate' bila'lé'enë' bönni' tu'yúgaquië'-ba' cuchí zián na' ca  
na' guca quégacaba', guladxi gula'dzöbinë'. Bulu'zxúnnajë' ni',  
ate' yöjhuöjgaquië' yöjtíxjö'i'iguequinë' nupa nacua' yödzö na',  
en nupa nacua' la' guixi' ni'. <sup>35</sup> Ní'irö bila'rúajë' bönni' yödzö  
na', yöjyúgaquië' lë na' guca. Cate' bila'dxinë' ga na' zoë' Jesús,  
bila'lé'enë' bönni' na' gula'yú'u bö' xihui' lë', rö'ë xini'ë Jesús.  
Nácuë' lari', en dxí'ado' chizóë', ate' guládxinë'. <sup>36</sup> Nupa na'  
bila'lé'e lë na' guca gula'guíxjö'i' légaquië' ca guca, böáquië'  
bönni' na' gula'yú'u bö' xihui' lë'. <sup>37</sup> Ní'irö yúgu'të bönachi  
zián na' quégaca yödzö nabábagaca Gadara na' guláta'yu lahuë'  
Jesús urúajë' lu xiyúguequi, tu' tádxinë'. Bubenë' Jesús lë'e  
bárcodo' na', en söhuöjë'. <sup>38</sup> Bönni' na' bulu'rúaj bö' xihui' na' lë'  
gúta'yuë' lahuë' Jesús gu'ë lë' lataj tséajlenë' Lë' tsözxön. Gunná  
bé'enë' Jesús lë' ugá'anë' ni', rnnë':

<sup>39</sup> —Böaj lidxu'. Yöjtíxjö'i' bönachi uládz quiu' yugu' le zxön  
benë' Dios quiu'.

Böajë' bönni' na' lidxë', ate' buzë' didza' idú lu yödzö ni' ca  
naca le zxön benë' Jesús queë'.

*Jesús ruúnë'-bi' bi'i nigula queë' Jairo enca' nigula na' gu-  
dannu lari' nácuë'*

*(Mt. 9:18-26; Mr. 5:21-43)*

<sup>40</sup> Cate' budxinë' Jesús ia'tsölá'a nísado' na', bulu'dzeja  
bönachi zián nacua' ni' ni'a queë' Lë', tu' ta'böza Lë'. <sup>41</sup> Ní'irö  
bidxinë' Jairo ga zoë' Jesús. Náquië' bönni' lo que yu'u ga  
tu'dubë' bönni' judío, en tu'sëdë' queë' Dios. Biyéchuë' xini'ë  
Jesús, en gúta'yuë' lahuë' tsejë' lidxë'. <sup>42</sup> Caní benë' tu' zóabi'  
tubi' bi'i nigula queë', chirequi gátibi'. Nácabi' bi'i la's dui  
queë', en yú'ubi' ca chinnu iz. Tsanni ni' sa'yéajë' Jesús,  
sönógaca tu'quirö bönachi zián Lë'.

<sup>43</sup> Nútsa'nu tu nigula ladaj bönachi zián na', chiguca chinnu iz riguí'i rizáca'nu. Biti' ruhuí'i rön queënu que hué' quégaca cázanu nigula, ate' chibutönu dëra le dë queënu, riguíxjanu nupa tu ún bönachi, pero bití' guca nu bönni' únë'-nu. <sup>44</sup> Gubíga'nu zaca' cúdzu'lë' Jesús, en gudannu ruí'i lari' nácuë', ate' la' buí'të hué' rön queënu.

<sup>45</sup> Ní'irö Jesús gunábinë' nupa nacua' ni', rnnë':

—¿Nuzxi na' gudán neda'?

Gula'dá'bagui'ë yúgu'të. Ní'irö Pedro, en nupa nacua'len lë' gulë' Lë', ta'nnë':

—Bönni' Usedi, nacua' bönachi zián ni, tu'quirö Li', en tu'dxiga' Li', ate' ¿rnnatso': "¿Nuzxi na' gudán neda'?"

<sup>46</sup> Ní'irö Jesús gunné':

—Zoa nu gudán neda', tu' gúquibe'eda' birúaj yöl-la' huáca neda' le ruún bönachi.

<sup>47</sup> Cate' réquibe'enu nigula na' nözinë' Jesús le bennu, ní'irö guxzízinu. Biyéchunu xini'ë Jesús, en gudíxjöi'ínu Lë' lógaca bönachi zián na' bizx que na' gudannu lari' nácuë', en ca na' guca, la' böacatënu. <sup>48</sup> Ní'irö Jesús gudxë'-nu:

—Nigúlado', tu' réajlë'u neda' chiböácu'. Böaj lidxu', zoa dxi ládxu'u.

<sup>49</sup> Cate' ni' ru'ë Jesús didza' ni, bidxinë' tu bönni' ni', zë'ë lidxë' bönni' lo na' que yu'u ga tu'dubë' tu'sëdë' queë' Dios, ate' gudxë' bönni' lo na':

—Chigútibi' bi'i nigúlado' quiu'. Bítirö upíxjanu'-në' Bönni' Usedi.

<sup>50</sup> Cate' biyönnë' Jesús lë ni, bubi'ë didza', rë' bönni' lo na':

—Biti' gádxinu'. Guyéajlë'ësö Dios. Huöácabi' bi'i nigúlado' quiu'.

<sup>51</sup> Cate' guyázië' Jesús yu'u na', bití' bë'ë lataj nu tsázalen Lë', pero légacasë' Pedro, en Jacobo, en Juan, enca' xuz xiná'abi' nigúlado' na'. <sup>52</sup> Ta'bödxi nupa nacua' ni'. Ta'bödxi yechë'ë ni'a queëbi' bi'i nigúlado' na', ate' Jesús rë' légaquië', rnnë':

—Bítirö cödxili'. Biti' nátibi' nigúlado' ni. Rásisibi'.

<sup>53</sup> Bulu'titjë' Lë' tu' nözguequinë' chinátibi'. <sup>54</sup> Ní'irö gudélë'ë Jesús ná'abi', en bë'ë zidzaj didza', rnnë':

—Bi'i nigúlado', guyaschi.

<sup>55</sup> Ní'irö bu'u bö' naca cázabi', bubanbi', ate' la' guyásatëbi'. Jesús gunná bé'enë' légaquië' ilu'ë le gágubi'. <sup>56</sup> Bulu'báinë' xuz xiná'abi', pero Jesús gunná bé'enë' légaquië' cunttu nu ilë' ca na' guca.

## 9

*Risöl-lë'ë Jesús bönni' usëda queë' tsöjéngaquië' libán  
(Mt. 10:5-15; Mr. 6:7-13)*

<sup>1</sup> Ní'irö butubë' Jesús idxínnutë' bönni' usëda queë', ate' budödë' lu ná'agaquië' yöl-la' huáca, en yöl-la' unná bë' para ulu'béajë' bö' xihui' yú'ugaca bönachi, en ulu'únë' nupa te'e. <sup>2</sup> Gusöl-lë'ë légaquië' tsöjéngaquië' libán ca rinná bë'ë Dios, en tsöjhuéngaquië' nupa te'e. <sup>3</sup> Jesús gudxë' légaquië':

—Biti' bi guá'ali' para la' nöza, calëga xiyágado', en calëga yöxaj, en calëga yöta, en calëga dumí, en biti' ixóa yenli' chopa lari'. <sup>4</sup> Bítí'tës yu'u ga tsú'uli', guli'sóa ni' cate' uzá'aröli' yödzö na'. <sup>5</sup> Gátí'tës ga biti' ilún bönachi libí'ili' bal, buli'rúaj yödzö na', en guli'cuíbi bëchtö da' lë'e lábali', le ulu'í légaquië' nagá'ana xíguia' nabága'gaquië'.

<sup>6</sup> Ní'irö bila'rúajë' bönni' usëda queë' na'. Gula'dödë' yúgu'të yödzödo', tunë' libán que didza' dxi'a, en tu'únë' nupa te'e yúgu'të lu yödzö na'.

*Ca gútië' Juan, bönni' buquilë' bönachi nisa*  
(Mt. 14:1-12; Mr. 6:14-29)

<sup>7</sup> Biyönnë' Herodes, bönni' rinná bë'ë, ca naca yúgu'të le runë' Jesús, ate' gurö'ë böniga, tu' ta'nná bönachi:

—Juan na' chibubanë' lu yöl-la' guti.

<sup>8</sup> Ia'bal-lë' ta'nnë':

—Chibulë'ë Elías, bönni' na' bë'ë didza' uláz queë' Dios.

Ia'bal-lë' ta'nnë':

—Chibubanë' tu bönni' bítsë'ë yugu' bönni' gulu'ë didza' uláz queë' Dios dza ni'te.

<sup>9</sup> Herodes na' gunné':

—Juan na' burixa' yenë'. ¿Nuzxi caz bönni' ni, riyönda' queë' runë' yugu' lë ni?

Rizóa ribö'ë Herodes ilé'enë' Jesús.

*Rugahuë' Jesús chi-un gayuá' bönachi*  
(Mt. 14:13-21; Mr. 6:30-44; Jn. 6:1-14)

<sup>10</sup> Cate' bulu'dxinë' bönni' gubáz nasöl-lë'ë Jesús ga zoë' Lë', bulu'siyönnë' Lë' yúgu'të le gulunë'. Ní'irö guchë'ë Jesús légaquië' quez. Yöjáquië' tu lataj cá'asö lu xiyú yödzö Betsaida.

<sup>11</sup> Cate' chinöziguequi bönachi lë ni, yöjnóguequi Lë', ate' Jesús benë' léguequi bal, en bë'lenë' léguequi didza' ca rinná bë'ë Dios, ate' bunë' nupa te'e.

<sup>12</sup> Cate' chizá' ral-la dza na', idxínnutë' bönni' gubáz queë' Jesús gula'bíguë'ë ga zoë', en të' Lë':

—Busöl-la' bönachi ni tsöjaca gapa dë yödzödo', en gapa dë yú'udo' idú gásibi'ilö para tsöjtíljagaquië' gapa ulu'gá'anë', en bi ilahuë', tu' naca lataj cá'asö ga ni zóaru'.

<sup>13</sup> Ní'irö Jesús rë' légaquië':

—Guli'gu'ë libí'ili' le ilahuë'.

Të' Lë':

—Gáyu'sö yöta xtílado' dē, en chópasöba' böla dēba' queétu', o ¿naru' huayéajtsatu' tsöj'ö'outu' le ilágugaca bönachi zían ni?

14 Nacu'ë ca chi-un gáyu'ë bönni' ga na'. Ní'irö Jesús gudxé' yugu' bönni' usēda queë', rnnë':

—Guli'gún ga ila'bö'ë tu cö' huéajgaquië', ilaca ca chi-un huéajgaquië'.

15 Caní gulunë', ate' gula'bö'ë yúgu'të'. 16 Ní'irö gudélë'ë Jesús gayu' yöta xtila na', en chópaba' böla na', ate' guchisa lahuë' ruyúë' lúzhiba, en rē' Dios: "Xclenu'." Ní'irö buzxuzxjé' léguequi, en bē'ë quégaquië' bönni' usēda queë' para ulu'cu'ë lógaca bönachi na'. 17 Gulahuë' yúgu'të', en bulu'huöljanë'. Gudödi na' bulu'tubë' yugu' bizxaj bugá'ana, ate' bulu'lié' idú chinnu ga'böra.

*Rnnë' Pedro Jesús náquië' Cristo*

*(Mt. 16:13-19; Mr. 8:27-29)*

18 Tu dza tsanni ni' zoë' quez Jesús, rulidzë' Dios, bila'dxinë' bönni' usēda queë' ga zoë', ate' gunábinë' légaquië', rnnë':

—¿Nuzxi ta'nná bönachi naca' neda'?

19 Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bítsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

20 Ní'irö Jesús gunábinë' légaquië', rnnë':

—Názxi libí'ili', ¿nuzxi rnnali' naca'?

Bubi'ë didza' Pedro, rnnë':

—Nacu' Cristo nasöl-lë'ë Dios.

*Rigúxjö'ë Jesús ca si' ilútië' Lë'*

*(Mt. 16:20-28; Mr. 8:30-9:1)*

21 Ní'irö Jesús gúdxidë'ë légaquië', en gunná bé'enë' légaquië' cuntu nu ilë' Nu náquië' Lë'. 22 Ní'irö rē' légaquië':

—Run bayudxi qui'i saca'a neda', Bönni' Guljé' Bönachi, zían le gaca quia'. Ulu'cá'anë' neda' cá'asö yugu' bönni' gula tu'zéajni'inë', en yugu' bixúz unná bē', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

23 Gudxé' ca' yúgu'të':

—Channö rē'ënë' nu bönni' tē'ë neda', ral-la' uzóë' tsölá'alö le dē queë', en gáquië' ca tu bönni' sa'yéajé' söjté'ë lē'e yaga cruz, ate' ní'irö gaca tē'ë neda'. 24 Núti'tës bönni' ru'i ladxë'ë gun chi'ë yöl-la' na'bán queë', unítië' le, pero channö unítië' yöl-la' na'bán queë' tu' dē'ë neda', bönni' ni gata' yöl-la' na'bán idú queë'. 25 Biti' bi uzi'ë xibé tu bönni' channö utubë' queë' yúgu'të le dē yödzölió ni, pero unítië' tsaz yöl-la' na'bán queë'.

26 Nu bönni' rutuí'inë' neda', en rutuí'inë' ca' xtídza'a, lē'sca'

neda', Bönni' Guljē' Bönachi, utu'ida' bönni' na' cate' huöda' idinná' bē'a, dzágagaca neda' yöl-la' zxon' queē' Xuza', en yöl-la' zxon' quegaquiē' gubáz' lá'ayi queē' Dios. <sup>27</sup> Le nácatē' rea' libí'ili', nacuá' bal-lē' bönni' ni bití' ilátiē' cate' ila'lé'erönē' dza idinná' bē'ē' Dios.

*Ridzá' ca riná' lahuē' Jesús*

(Mt. 17:1-8; Mr. 9:2-8)

<sup>28</sup> Cate' bizá'a xunu' gubidza gudödi bē'ē' Jesús yugu' didza' ni, ní'irö' guchē'ē' Pedro, en Juan, en Jacobo, ate' gurenē' tu lu gu'ado', ga na' bulidzē' Dios. <sup>29</sup> Tsanni ni' ru'ilenē' Dios didza', bidzá' ca riná' lahuē', ate' böáca chiguí'chido'os lari' nácuē', en guyēpi yōsa bení'. <sup>30</sup> Ní'irö' bulu'lu'i lógaquiē' chopē' bönni' ga zoē' Lē' tu'ilenē' Lē' didza'. Nácagaquiē' Moisés, en Elías. <sup>31</sup> Chopē' ni gula'yēpē' yōsa bení', ate' tu'ilenē' Jesús didza' ca si' uzē'ē' yödžolió' ni, gátiē' lu yödžö' Jerusalén. <sup>32</sup> Salla' chirácada' ilásiē' Pedro, en nupa nacuá'len lē', bayudxi gula'ná'asē', ate' bila'lé'enē' yöl-la' bení' queē' Jesús, en chopē' na' nacuá'lenē' Lē'. <sup>33</sup> Cate' bulu'zē'ē' chopē' na' ga na' zoē' Jesús, ní'irö' Pedro gudxē' Lē':

—Bönni' Usedi, dxi'a naca zóaru' ni. Gúntsöca'tu' tsonna yu'u lága'do', tu quiu', ia'tú' queē' Moisés, en ia'tú' queē' Elías.

Bití' réquibe'enē' Pedro bi na' rnnē'. <sup>34</sup> Tsanni ni' ru'ē' didza' ni, la' gurö'ötē' böaj le bugacu légaquiē', ate' guládxinē' tu' nacu'ē' lu böaj na'. <sup>35</sup> Ní'irö' biyön' chí'i Nu ru'i didza' lu böaj na', rna:

—Bönni' ni náquiē' Zxi'ina'. Nadxi'ida' Lē'. Buli'zē' nágali' didza' gu'ē.

<sup>36</sup> Cate' budxi bē' didza' chí'i na', tuzē' Jesús nagá'analenē' légaquiē'. Ta'cuá' dxíē' bönni' usēda queē', ate' dza na' cuntu nu gulē' ca naca le bila'lé'enē'.

*Ruúnē' Jesús bi'i bönni' yu'u bö' xihui' lēbi'*

(Mt. 17:14-21; Mr. 9:14-29)

<sup>37</sup> Cate' za' rení' ia'tú' dza bulu'huötjē' Jesús, en bönni' na' dzágagaquiē' Lē' lu gu'ado' na', ate' bila'ruáj' bönachi zían' dutságagaca Jesús. <sup>38</sup> Ní'irö' bē'ē' zidzaj didza' tu bönni' nútsē'ē' ladaj bönachi zían' na'. Bulidzē' Jesús, rnnē':

—Bönni' Usedi, ráta'yua' lo' duyú'-bi' bi'i bönni' quia' tu' nácabi' bi'i la's dui quia'. <sup>39</sup> Yu'u bö' xihui' lēbi' le run ga ribödxí'abi', en ruxízida' lēbi'. Run ga ribía' bidxina' zxöna' ruá'abi', en rurixi rutúluda' lēbi', ate' catu' caz rusán' lēbi'. <sup>40</sup> Gúta'yua' lógaquiē' bönni' usēda quiu' ulu'béajē' le, pero bití' gula'zéquínē'.

<sup>41</sup> Bubi'ē' didza' Jesús, rnnē':

—Libi'ili', biti' réajlë'ëli', en nachixi ícjali'. ¿Gáca'xte ral-la' sóalena' libi'ili', en guá' ilena' queëli'? Dijuá'a-bi' bi'i bönni' quiu' ni.

<sup>42</sup> Cate' ni' zá'abi' ribíga'bi' ga na' zoë' Jesús, burixi butúluda' bö' xihui' na' lëbi'. Jesús gudil-lë' bö' xihui' na', en bunë'-bi' bi'i bönni' na'. Ní'irö bugu'ë-bi' lu në'ë xúzibi'. <sup>43</sup> Bulu'bani yúgu'të bönachi ni' ca naca yöl-la' huáca zxön queë' Dios.

*Jesús ru'ë didza' leyúbölö ca si' ila'zönë' Lë'*

*(Mt. 17:22-23; Mr. 9:30-32)*

Tsanni ni' tu'bani yúgu'të bönachi ca naca le zxön runë' Jesús, Lë' gudxë' yugu' bönni' usëda queë', <sup>44</sup> rnnë':

—Guli'cú'u icja nágalí' didza' ni, tu' si' ulu'dödë' neda', Bönni' Guljë' Bönachi, lu ná'agaca bönachi.

<sup>45</sup> Biti' gula'yéajni'inë' bönni' usëda queë' didza' ni, tu' cabí ru'ínë' Dios légaquië' lataj ila'yéajni'inë', pero biti' bulu'rúguinë' ila'nábinë' Jesús ca naca didza' ni.

*Nu naca lo*

*(Mt. 18:1-5; Mr. 9:33-37)*

<sup>46</sup> Ní'irö gula'sí lógaquië' bönni' usëda queë' Jesús tu'ë didza'. Ta'nábini luzá'agaquië' tuë' ia'tué' núzxilë' gáquië' lo. <sup>47</sup> Réquibe'enë' Jesús le ta'zá' ládxi'gaquië', ate' gudélé'ë-bi' tubi' bí'ido', en buzóë'-bi' cuitë'. <sup>48</sup> Ní'irö rë' légaquië':

—Núti'tës bönni' gunë' bal tu' bí'ido' caní tu' néquibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasöl-lë'ë neda'. Que lë ni na' bönni' nútsë'ë ládjali' nácarë' nöxaj ladxi', bönni' ni náquië' lo.

*Nu biti' ridá'baga' rë'u, rácalen rë'u*

*(Mr. 9:38-40)*

<sup>49</sup> Ní'irö Juan bulidzë' Jesús, rnnë':

—Bönni' Usedi, bilé'etu'-në' tu bönni' rugunë' dxin Lo' rubéajë' bö' xihui', ate' gunná bé'etu'-në' tu' cabí dë'ë rë'u.

<sup>50</sup> Jesús rë' lë':

—Biti' inná bé'eli'-në', tu' rácalen rë'u nu biti' ridá'baga' rë'u.

*Jesús ridil-lë' Jacobo, en Juan*

<sup>51</sup> Cate' chizá' gal-la' dza ral-la' gátië' Jesús, en huëpë' yehua' yubá, benë' bayudxi tsejë' Jerusalén. <sup>52</sup> Gusöl-lë'ë yugu' bönni' gubáz queë' ila'nöruë' ca Lë', ate' yójáquië' tu yödzödo' quégaca bönachi Samaria para tsöjpá'agaquië' ga ugá'anë' Jesús tu yëla. <sup>53</sup> Yugu' bönni' yödzö na' biti' gulunë' Jesús bal tu' chinaca queë' sa'yéajë' Jerusalén. <sup>54</sup> Cate' Jacobo, en Juan, bönni' usëda queë' Jesús, bila'lé'enë' lë ni, të' Lë':

—Xan, ¿naru' inábatsöca'tu' huötaj guí' le za' yehua' yubá, en usuniti légaquië', guntu' ca na' benë' Elías?

<sup>55</sup> Buécjë' Jesús, en gudil-lë' légaquië', rnnë':



—Biti' nözili' bizxi bö' dzágui libí'ili'. <sup>56</sup> Bida' ni neda', Bönni' Guljé' Bönachi, caléga para usunítia' yöl-la' na'bán quégaca bönachi, pero bida' dusölá' bönachi.

Ní'irö yöjáquië' yödzö yúbölö.

*Nupa té'ëni tsöjácálen Jesús*

*(Mt. 8:19-22)*

<sup>57</sup> Tsanni ni' yú'ugaquië' nöza Jesús, en yugu' bönni' dá'gaquië' Lë', bidxinë' tu bönni' yödzö Jerusalén, en rë' Jesús:

—Xan, rë'ënda' sá'lena' Li' gáti'tës ga tseju'.

<sup>58</sup> Jesús rë' lë':

—Yúgu' böza', nacuá' zxan bulóaj quégacaba', ate' biguínido', dxíagaca xcá'agacaba', pero neda', Bönni' Guljé' Bönachi, biti' dë quia' ga gáta'a uzí' ládxa'a.

<sup>59</sup> Ní'irö Jesús gudxë' tu bönni' yúbölö, rnnë':

—Gudá' neda'.

Bönni' ni gudxë' Lë':

—Xan, benna neda' lataj huöja' lidxa' ga idxinrö dza chibucácha'a-në' xuzá'.

<sup>60</sup> Jesús gudxë' lë':

—Bë' lataj bönni' chizóa ilátië' ulu'cáché'ë nupa chinati quégaquië', pero li', guyéaj, yójén libán ca inná bë'ë Dios.

<sup>61</sup> Ní'irö bidxinë' ia'túë' ca', en rë' Jesús:

—Xan, rë'ënda' sá'lena' Li', pero benna neda' lataj tseja' tsöjzégacada'-në' didza' di'a dza quia'.

<sup>62</sup> Jesús gudxë' lë':

—Núti'tës bönni' ruí'i ládxe'ë le raca yödzölió náquië' ca tu bönni' rugá'anë'-ba' bëdxi, en ruyúë' zaca' cúdzu'lë'. Nu run caní' biti' naca lesaca' tsaza ga rinná bë'ë Dios.

## 10

*Risöl-lë'ë Jesús tsónnalalaj yu' chië' bönni' tsöjéngaquië' libán*

<sup>1</sup> Gudödi gulaca yugu' lë ni, guröë Xanru' ia'tsónnalalaj yu' chië' bönni' usëda queë', ate' gusöl-lë'ë légaquië' chopa huéajgaquië' para ila'nöruë' ca Lë', en tsöjáquië' yúgu'të yödzö, en yödzödo' gapa chizóa tödë' Lë'. <sup>2</sup> Gudxë' légaquië':

—Le nácatë, dëda' dxin quia', le naca ca tu la' yëla zxön ga nu tsöjlapa', pero nabábasö huen dxin quia' nacuá'. Que lë ni na', guli'gáta'yu lahuë' Dios, náquië' Xan la' yëla na', isöl-lë'ë yugu' huen dxin ga naca la' yëla queë'. <sup>3</sup> Guli'tséaj na'a. Buli'yútsöca', neda' risöl-la'a libí'ili', nácali' ca yugu' bö'cu' zxila' söjácaba' ládjagacaba' bö'cu' guí'a sínia'. <sup>4</sup> Biti' guá'ali' yöxaj dumí, en caléga buzudi yöta, en biti' guá'ali' ia'tú cö xiráchuli', en biti' tseli' para guí'ilenli' bönachi didza' gapa naca la' nöza. <sup>5</sup> Gáti'tës yu'u ga tsú'uli', innali': "Le ribequi dxi ladxi' gaca quégaca bönachi nacuá' yu'u ni." <sup>6</sup> Channö zoa

ni' nu bönni' si'ë yöl-la' ribequi dxi ladxi', ugá'analen læ' le ribequi dxi ladxi' na' inábali', pero channö cabí zoa ni' nu bönni' caní, ugá'analen libí'ili' le ribequi dxi ladxi' na' inábali'.<sup>7</sup> Guli'gá'ana yu'u ga na' tsú'uli', en guli'guí'aj guli'gagu bi ilunnë' queéli', tu' udzöli quézínë' bönni' huen dxin le gahuë'. Biti' tödili' yu'u yu'u. <sup>8</sup> Gátitës yödzö ga tsú'uli', ate' ilún libí'ili' bal, guli'gagu le ulu'cu'ë loli'. <sup>9</sup> Buli'ún nupa te'e nacué' yödzö na', en guli'guíë léguequi: "Chibidxín le rinná bë'ë Dios ga zóali'." <sup>10</sup> Gátitës yödzö ga tsú'uli', channö cabí ilún libí'ili' bal, guli'rúaj, tsöjsóali' la' nöza que yödzö na', en innali': <sup>11</sup> "Bëchtö que ládzali' le da' lë'e lábatu' ruquínnajtu', le rulu'i nabága'li' xíguia', pero ral-la' inözili' lë ni, chibidxín le rinná bë'ë Dios ga zóali'." <sup>12</sup> Neda' rea' libí'ili', cate' idxín dza ichúguíë' Dios quégaca bönachi, ila'guí'i ila'zaca'rö bönachi yödzö ni' ca ila'guí'i ila'zaca' bönachi yödzö Sodoma, nupa ni busunítië' Dios.

*Le gaca quégaca nupa biti' ulu'bí'i ládiz'gaca*  
(Mt. 11:20-24)

<sup>13</sup> Gunnë' ca' Jesús:

—Bica' bayechi' libí'ili', bönachi yödzö Corazín. Bica' bayechi' libí'ili', bönachi yödzö Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca rubani ca yugu' le bena' ga zóali', dza ni'te ulu'bí'i ládiz'gaquië' bönni' ni', ate' ilácuë' lari' cá'asö, en ila'gu'ë dö ícjagaquië', le ulu'ígaca chibulu'bí'i ládiz'gaquië'. <sup>14</sup> Que lë ni na', cate' idxín dza ichúguíë' Dios quégaca bönachi, quí'i sáca'röli' ca ila'guí'i ila'záquië' bönni' yödz Tiro, en yödz Sidón. <sup>15</sup> Libí'ili', bönachi Capernaum. Réquili' tsázali' yehua' yubá. Huó'tjali' tsöjtsázali' lataj chul-la quégaca nupa nátigaca.

<sup>16</sup> Ní'irö Jesús gudxë' yugu' bönni' usëda queë', rnnë':

—Nu ruzë nagui libí'ili', ruzë nagui ca' neda', ate' nu rucá'ana libí'ili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasöl-lë'ë neda'.

*Bönni' yöjéngaquië' libán tu'dxinë' ga zoë' Jesús*

<sup>17</sup> Cate' tsónnalalaj yu' chië' bönni' na' gusöl-lë'ë Jesús bulu'dxinë' ga zoë' Lë', bönni' na' yöjéngaquië' libán, ta'nnë':

—Xan, tun bö' xihui' ca rnnatu' cate' ruguntu' dxin Lo'.

<sup>18</sup> Jesús gudxë' légaquië':

—Neda' bilé'eda' Satanás tu' xihui', gubixi zxan lúzxiba ca run yösa, le riyaza luyú. <sup>19</sup> Buli'yútsöca', neda' nudöda' lu ná'ali' yöl-la' unná bë' para gaca söngacali'-ba' bëla sía'ia', en xöjnö', en biti' bi gaca queéli', ate' ucúl-lali' yöl-la' unná bë' que tu' xihui', nu biti' rilé'e rë'u dxi'a. <sup>20</sup> Na'a, buli'dzeja, calégasö

tu' tun bö' xihui' ca rnnali', pero tu' nuzúajgaca lali' lu guichi ni' yehua' yubá.

*Rudzéjanë' Jesús*

*(Mt. 11:25-27; 13:16-17)*

<sup>21</sup> La' ní'isö rudzéjanë' Jesús, dzáguië' Dios Bö' Lá'ayi Lë', rnnë':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë ni lógaquië' bönni' táquië' yenni', en bönni' ta'yéajni'inë', pero buluí'iguequinu'-bi' bí'ido' ca naca. ¿Ca' gaca, Xuza', tu' caní guyaza ládxi'u!

<sup>22</sup> Ní'irö gunné':

—Yúgu'të budödë' Xuza' lu na'a. Cuntu nu bönni' nözinë' Nu náquië' Zxí'inë' Dios, pero tuzë' Dios Xuz nözinë', ate' cuntu nu nözi Nu náquië' Dios Xuz, pero tuzë' Zxí'inë' nözinë', ate' inözigaca ca' nupa na' Zxí'inë' rë'ënë' uluí'inë' léguequi Xuzë'.

<sup>23</sup> Ní'irö Jesús buyúë' yugu' bönni' usëda queë', en rë' légaquië':

—Bica' bágaca nupa ta'lé'e le rilé'eli' libí'ili', <sup>24</sup> tu' rea' libí'ili': Zían bönni' gulu'ë didza' uláz queë' Dios, enca' bönni' gula'nná bë'ë, gulé'ënnë' ila'lé'enë' le rilé'eli', pero biti' bila'lé'enë' le. Gulé'ënnë' ila'yönnë' le riyönili', pero biti' bila'yönnë' le.

*Tu bönni' Samaria, bönni' tsahui'*

<sup>25</sup> Ní'irö guyasë' tu bönni' yudo' usedi, en para si' bë'ë Jesús, gunábinë' Lë', rnnë':

—Bönni' Usedi, ¿bizxi ral-la' guna' para idéli'da' yöl-la' na'bán idú?

<sup>26</sup> Jesús rë' lë':

—¿Bizxi caz nazúaj lu guichi lu xibá queë' Moisés? ¿Nacxi rusaca' quiu' lë na' rulabu'?

<sup>27</sup> Bubi'ë didza' bönni' na', rnnë':

—Caní rna: "Idxí'inu' Xanu' Dios idú ládxi'u, en len idú icja ládxi'do'o, en len idú yöl-la' run quiu', en len idú yöl-la' réajni'i quiu', ate' idxí'inu' bönni' luzó'o ca nadxí'i cuinu'."

<sup>28</sup> Jesús rë' lë':

—Dxi'ado' bubi'u didza'. Ben caní, ate' gata' quiu' yöl-la' na'bán na'.

<sup>29</sup> Tu' gú'unnë' bönni' na' ubéaj dxi'a cuinë', rë' Jesús:

—¿Nuzxi na' bönni' luzá'a?

<sup>30</sup> Bubi'ë didza' Jesús, rë' lë':

—Buzë'ë tu bönni' Jerusalén, rudínnië', sa'yéajë' yödzö Jericó. La' nöza ni' gula'zönë' gubán lë'. Gula'gúë' lari' nácuë', en gulunë' lë' huë'. Ní'irö bulu'zë'ë ni', en nucá'anagaquië' lë', chirati cazë'. <sup>31</sup> Ní'irö gudödë' tu bixúz la' nöza ni'. Cate' bilé'enë' bönni' huë' na', tsölá'alö gudödë'. <sup>32</sup> Gudödë' ca' ni' tu bönni' nababë' zxi'ini xi'sóë' Leví, yugu' bönni' na' tunë' dxin

que yudo'. Cate' bilé'ené'lè', tsölá'alö ca' gudödë'. <sup>33</sup>Lësca' yu'ë tu bönni' Samaria nõza na', ate' bidxinë' gala' ga dë' bönni' huë' na'. Cate' bilé'ené'lè', buéchi' ládxe'ë lë'. <sup>34</sup>Gubígui'ë ga na' dë', ate' gulu'ë le za, en xisi uva nál-la lu huë' queë', ate' buchölinë' le lari'. Ní'irö budxië' lë' cúdzu'ba' böa' queë', en bu'ë lë' yu'u ga ta'dxinë' bönni' yú'ugaquië' nõza, ate' ni' gudapa chi'ë lë'. <sup>35</sup>Cate' za' reni' ia'tú dza, en chizóa uzë'ë bönni' Samaria na', guléajë' lászjaru' que chopa dza, le bucá'anë' lu në'ë bönni' xan yu'u na', en rë' lë': "Gudapa chi'ë bönni' ni, en channö utöu' ia'lati' dumí, ubi'a neda' quiu' cate' huöda'." <sup>36</sup>Na'a, ¿nacxi runi li'? ¿Núzxilë' bönni' yonna ni gúquië' bönni' luzë'ë bönni' na' gulu'ë dö' bönni' gubán queë'?

<sup>37</sup>Bubi'ë didza' bönni' yudo' usedi na', rë' Jesús:

—Bönni' na' buéchi' ládxe'ë lë'.

Ní'irö Jesús gudxe' lë':

—Guyéaj na'a, yöjén ca' li'.

*Le benë' Jesús lídxigacanu Marta, en María*

<sup>38</sup>Ní'irö bu'ë nõza Jesús, ate' bidxinë' tu yödzödo' ga ni' tu nigula lënu Marta guchë'ënu Lë' lídxinu. <sup>39</sup>Marta ni zóanu nigula zxílanu lënu María, ate' María na' gurö'ötënu ga naca xini'ë Jesús, en ruzë náganu xtídzë'ë. <sup>40</sup>Marta na' bubi buguí'ínu, zían dxin runnu, ate' gubíga'nu ga na' zoë' Jesús, en rënu Lë':

—Xan, ¿naru' cabí ruí'i ládxi'tso' neda' tu' nucá'anabi' bi'i zxila' ni neda', ate' tuza' runa' dxin? Gudxi-bi' gácalenbi' neda'.

<sup>41</sup>Bubi'ë didza' Jesús, rë'ë-nu:

—Marta, Marta, ruúbi ruguí'ide'enu', en zían le ruí'i ládxi'ú runu'. <sup>42</sup>Tuz le run bayudxi nu gun, ate' María ni guröbi' lë na' nácatërö dxi'a, ate' lë na' guröbi' biti' udúa queébi'.

## 11

*Ca ral-la' ulídzaru'-në' Dios*

*(Mt. 6:9-15; 7:7-11)*

<sup>1</sup>Tu dza ni' Jesús rulidzë' Dios. Cate' budxi bë'lenë' Dios didza', tuë' bönni' usëda queë' rë' Lë', rnnë':

—Xan, busedi netu' ulídzatu'-në' Dios gü'íleentu'-në' didza', ca benë' Juan, busédinë' bönni' dá'gaquië' lë'.

<sup>2</sup>Ní'irö Jesús rë' légaquië':

—Cate' ulídzali'-në' Dios gü'ílenli'-në' didza', guli'ná: Xuztu', zu' yehua' yubá, gá'ana zxön Lo'.

Gudá inná bë'u.

Gaca ca raza ládxi'ú Li' luyú ni, ca na' raza yehua' yubá.

<sup>3</sup>Benna le gágutu' na'a dza.

<sup>4</sup>Buniti lo netu' dul-la' nabága'tu'

ca netu' ca' runiti lotu' nupa tua' dö' queëtu'.

Biti' gu'u lataj si' bē' tu' xihui' netu',  
pero busölá netu' lu na' nu ruá' dö'.

<sup>5</sup> Jesús rē' ca' légaquiē':

—Channō zoē' nu bönni' ladjali', en zoē' böchi' luzē'ē, en channō huidē' ga na' zoē' guluhuēla, ate' ulidzē' lē', innē': “Böcha'a, benna quia' tsonna yöta xtila <sup>6</sup> tu' si' bidxinē' quia' böchi' luzá'a, zē'ē zi'tu', pero biti' bi dē le gu'a-nē' gahuē'.” <sup>7</sup> ¿Naru' ubi'ē didza' caní bönni' na' zoē' yu'u, guiē' lē': “Biti' utsó'o neda' tu' chinayayaj yu'u, en chidélengacabi' bi'i quia' neda', ate' biti' gaca chasa' bi gunna' quiu'”? <sup>8</sup> Neda' rea' libí'ili': Sal-la' biti' chasē' bi unödzejē' queē' tu' náquiē' böchi' luzē'ē, pero chasē', en unödzejē' queē' idutē le riquinnē' para cabirō upíxjanē' lē'. <sup>9</sup> Que lē ni na' rea' libí'ili': Guli'naba, ate' Dios gunnē' queéli'. Guli'quilaj, ate' idzöli queéli'. Buli'lidza ra' yu'u, ate' tsalaj queéli'. <sup>10</sup> Nu rinaba, rizí' que, ate' nu riguilaj, ridzöli que, ate' nu rulidza ra' yu'u, ralaj que.

<sup>11</sup> Channō zoē' nu bönni' ladjali', en náquiē' xuz, ate' channō xzí'inē' inábibi' lē' yöta xtila, ¿naru' unödzejatsē' queēbi' guiój? Channō inábibi' lē' tuba' böla, ¿naru' unödzejatsē' queēbi' bëla? <sup>12</sup> Channō inábibi' lē' dxita que böra, ¿naru' unödzejatsē' queēbi' xöjnō'? <sup>13</sup> Caní naca, nácali' libí'ili' huiá' dö', pero nözili' unödzejali' quégacabi' xzí'inili' le naca dxi'a. Nácatērö löza Xúzili' zoē' yehua' yubá gunnē' queéli' Dios Bö' Lá'ayi, nülöli' inábili' Lē'.

*Ta'nnē' runē' dxin Jesús len yöl-la' huáca que tu' xihui'*

*(Mt. 12:22-30; Mr. 3:19-27)*

<sup>14</sup> Tu dza bubéajē' Jesús bö' xihui' yu'u tu bönni', le run ga biti' raca innē'. Cate' burúaj bö' xihui' na', bë'ē didza' bönni' na' biti' guca innē', ate' bulu'bani bönachi nacua' ni'. <sup>15</sup> Bal-la bönachi nacua' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajē' yugu' bö' xihui' na'.

<sup>16</sup> Ia'bal-la bönachi na' gulē'ēni ila'zí' bë' Jesús, ate' gula'nabi Lē' gunē' tu le gaca bë' le za' yehua' yubá. <sup>17</sup> Réquibe'enē' Jesús le ta'zá' ladxigaquiē', ate' rē' légaquiē':

—Gátitēs ga ta'nná be'e bönachi luzē'eguequi, channō ila'rúaj choplö la' léguequisö bönachi na', ila'niti. Channō ila'rúaj choplö bönachi nacua' tu yu'u, údxi quéguequi. <sup>18</sup> Lē'sca' caní raca que Satanás, tu' xihui', nazí'ile ca' Beelzebú. Channō ila'rúaj choplö nupa dá'gaca le, ¿nacxi gaca idía' yöl-la' unná bë' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'? <sup>19</sup> Channō neda', len yöl-la' huáca que Beelzebú rubéaja' yugu' bö' xihui', ¿nuzxi runna quégaca nupa dá'gaca libí'ili' yöl-la' huáca tu'béaj yugu' bö' xihui'? Que lē ni na', le tun nupa ni naca bë' nachíxili'. <sup>20</sup> Channō neda',

len yöl-la' huáca queë' Dios rubéajgaca' bö' xihui', le nácatë chibidxín le rinná bë'ë Dios ga zóalí'.

<sup>21</sup> 'Cate' tu bönni' nál-la dë lu në'ë le rudí'inë', en rapa chi'ë lidxë', naca chi'i dërö le dë queë'. <sup>22</sup> Na'a, channö zë'ë ia'tué' bönni' nál-latërë' ca lë', en ucul-lë' lë', ní'irö cuë' yúgu'të le rudí'inë', lë na' ruzxöni ládxe'ë, ate' quisië' le dë queë' bönni' na'.

<sup>23</sup> 'Nu biti' rácalen neda', ridá'baga' neda'. Nu biti' rutúbilen neda', rusilasi nu na'.

*Ca naca que bö' xihui' rudxín xilataj*

*(Mt. 12:43-45)*

<sup>24</sup> Gunnë' ca' Jesús:

—Cate' rirúaj bö' xihui' lu bönni', ridá gapa nabídx, riguilaj ga uzí ladxi'. Channö cabí idzöli que, inná: "Huöja' xilatja' ga ni' birúaja'." <sup>25</sup> Cate' rudxín ni', röjxaca' bönni' na', náquië' ca tu yu'u chinulúa, en chinabá'a para nu tsöjsóa ni'. <sup>26</sup> Ní'irö reaj, en röjxi' ia'gadxi bö' xihui', nácacatërö xihui' ca le, ate' ta'yú'u bönni' na'. Na'a, le raca queë' bönni' na' nayáli'tërö ca le guca queë' zí'alö.

*Le naca bica' ba le naca idú*

<sup>27</sup> Tsanni ni' ru'ë Jesús didza' ni, tu nigula nútsa'nu ladaj bönachi zían na' bë'ënu zidzaj didza', rnnanu:

—Bica' ba nigula na' biá'anu Li' lë'ënu, en bica' ba ca' luchú'unu ga na' gúdxu'u.

<sup>28</sup> Bubi'ë didza' Jesús, gunnë':

—Nácacatërö bica' ba nupa ta'yöni xtídzë'ë Dios, en tun ca rnna.

*Ta'nábinë' Jesús gunë' le gaca bë' nuzxi náquië'*

*(Mt. 12:38-42; Mr. 8:12)*

<sup>29</sup> Tsanni ni' ta'biga' bönachi zían ga zoë' Jesús, gusí lahuë' ru'ë didza', rnnë':

—Ta'nába bönachi tuá' dö' ni guna' le gaca bë' ga za' yöl-la' huáca quia', pero biti' bi le gaca bë' ila'lé'enë'. Tuz le gaca bë' ca na' guca queë' Jonás ila'lé'enë'. <sup>30</sup> Ca na' guca queë' Jonás, gúquië' tu le naca bë' lógaca bönachi yödzö Nínive, lësca' caní gaca quia' neda', Bönni' Guljé' Bönachi, gaca' tu le gaca bë' lógaca bönachi dza ni zóaru' na'a. <sup>31</sup> Cate' idxín dza ichúguië' Dios quégaca bönachi ila'guí'i ila'zaca', en uchi'a usöröë' bönachi dza ni zóaru' na'a, Dios uchisë'-nu nigula gunná bé'enu bönachi dza ni'te luyú ni' dë tsölá'a ga ridödi gubidza beo' ziaga, ate' le bennu uluí'i nabága'gaca bönachi ni xíguia', tu' bídanu lënu, birúajnu ga naca zi'tu' para uduzë náganu didza' réajni'i bë'ë Salomón, bönni' gunná bé'enë' bönachi Israel, pero na'a, zoa' neda' ni, en nayëpisëtëra' ca Salomón na'. <sup>32</sup> Lësca' caní, Dios uchisë' bönni' gula'cu'ë

yödzö Nínive cate' idxín dza ichugu bè'è quégaca bönachi, en uchi'a usöröë' bönachi dza ni zóaru' na'a, ate' le gulunë' uluí' nabága' gaca bönachi ni xíguia', tu' bulu'bí'i ládxi'gaquië' bönni' Nínive cate' bila'yönnë' libán benë' Jonás, ate' na'a zoa' neda' ni, en nayëpisëtëra' ca Jonás na'.

*Le rigú'u bení' lu icja ládxi'do'oru'*

*(Mt. 5:15; 6:22-23)*

<sup>33</sup> Gunnë' ca' Jesús:

—Cate' nu ruquela' guí', biti' rigú'u le ga nagachi', en biti' rudusi' le guí'ina, pero ruzóa le xitsá' ga liná', para uzení' quégaca nupa ta'yú'u yu'u na'. <sup>34</sup> Guió'j loru' naca ca tu le rigú'u bení' lu icja ládxi'do'oru'. Channö guió'j lo' naca dxi'a, idúteo' yudzu le naca bení', pero channö naca xihui' guió'j lo', idúteo' yudzu le naca chul-la. <sup>35</sup> Ben chí'i cuinu' na'a, para cabí huóáca chul-la lë na' rigú'u bení' lu icja ládxi'do'o. <sup>36</sup> Caní naca, channö idúteo' nalísinu' le naca bení', en biti' bi zóalen lí' le chul-la, yúgu'të ilé'enu' dxi'a ca raca cate' ruzeni' quiu' guí'.

*Jesús ruzéqui'ë yugu' bönni' yudo' didza'*

*(Mt. 23:1-36; Mr. 12:38-40; Lc. 20:45-47)*

<sup>37</sup> Cate' budxi bè'è didza' ni Jesús, tu bönni' yudo' fariseo bulidzë' Lë' para tsójtágulenë' lë'. Cate' guyázië' Jesús lidxë' bönni' yudo' na', gurö'ë rahuë'. <sup>38</sup> Cate' bönni' yudo' fariseo na' bilé'enë' Lë', bubáinë' tu' cabí gudibi në'ë Jesús cate' si' gahuë'. <sup>39</sup> Xanru' rë' lë':

—Libí'ili', bönni' yudo' fariseo, riguibi cuinli' ca riguíbili' láhuilögaca le rë'aji ráhuili', pero lu icja ládxi'do'oli' ruhuídí'li', en rizá' ládxi'li' le ruá' dö'. <sup>40</sup> Libí'ili', bönni' biti' réajni'ili'. ¿Naru' cabí nözili', Nu ben le zoa láhuisö ben ca' le yu'u lë'elö? <sup>41</sup> Na'a, guli'gún gun le dë queéli', ate' ní'irö huóáca dxi'a yúgu'të le dë queéli'.

<sup>42</sup> 'Bica' bayechi' libí'ili', bönni' yudo' fariseo. Riguízxjali' que yudo' tu cö' huéaj tu' chi cö' le rizí'ili' que xöhuéaj, en que guixi' ruda, en quégaca guixi' cuando', pero rudódisili' le naca tsahui', en yöl-la' nadxí'i queéli' Dios. Yugu' lë ni run bayudxi gunli', en biti' ucá'anali' ia'zica' lë na' runli'.

<sup>43</sup> 'Bica' bayechi' libí'ili', bönni' yudo' fariseo. Rë'ënili' cö'öli' gapa naca lo lu yu'u ga rudúbili' rusédali' queë' Dios, en rë'ënili' ulu'lidza bönachi libí'ili' ba zxön gapa naca láhuilöguequi bönachi.

<sup>44</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'ísö tsahui' cuinli', tu' nácali' ca nácgaca yeru ba quégaca nupa nátigaca le cabí nalá'gaca, ate' ta'dá bönachi láhuigaca yeru ba na', en biti' téquibe'e.

45 Ní'irö bubí'ë didza' tu bönni' yudo' usedi raquië' xibá queë' Moisés. Rë' Jesús:

—Bönni' Usedi, cate' rnno' caní, netu' ca' runu' zi'.

46 Jesús rë' lë':

—Bica' bayechi' ca' libí'ili', bönni' yudo' usedi rácali' xibá queë' Moisés, tu' rusubága'gacali' bönachi tu yua' zi'i le cabí gaca nu guá, pero libí'ili' calëga láti'do'os bití' ruláhui'li' le len ná'ali'.

47 'Bica' bayechi' libí'ili', tu' richísali' biquitaj quégaca ba ga nagáchi'gaquië' bönni' gulu'ë didza' uláz queë' Dios, ate' gulútië' xuz xtó'oli' légaquië'. 48 Caní naca, runli' ba nalí runli' tuz le gulunë' xuz xtó'oli' tu' gulútië' xuz xtó'oli' na' légaquië', ate' libí'ili' richísali' biquitaj quégaca ba ga nagáchi'gaquië'.

49 'Que lë ni na', lu yöl-la' réajni'i queë', Dios gunné' caní: "Isöl-la'a queëli' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lë' gútili', en ia'bal-lë' cuia na'li' légaquië'." 50 Caní gunë' Dios tu' uchi'a usöröë' quégaca bönachi dza ni zóaru' na'a, ni'a que rön quégaca yúgu'të bönni' gulu'ë didza' uláz queë', bönni' ni' bëtigaca bönachi légaquië' cate' gusí lo rata' yödzülió, 51 ga gusí lo nu bëti Abel, ga bidxintë gulútië' Zacarías, bönni' na' gulútië' gatsaj láhui'lö ga dë bucugu lá'ayi ga na' tu'zégui'gaquië'-ba' böa' bédxido' lahuë' Dios, en ga dë lataj lá'ayi. Que lë ni na', rea' libí'ili', Dios uchúguë' quégaca bönachi dza ni zóaru' na'a, ni'a que rön quégaca yúgu'të bönni' na' gulútië' xuz xtó'oli' légaquië'.

52 'Bica' bayechi' libí'ili', bönni' yudo' usedi, rácali' xibá queë' Moisés. La' libí'isili' dë lu ná'ali' zxi'ini guíë que lataj ga ta'dzüli bönachi yöl-la' réajni'i. Libí'ili' bití' riyázali', ate' ruzága'li' xinözigaca nupa tē'ëni ila'yaza.

53 Cate' Jesús budxi bë'lenë' légaquië' didza' ni, bönni' yudo' tu'sédinë', en yugu' bönni' yudo' fariseo gula'léde'enë' Lë', ate' gula'sí lógaquië' ta'naba yúdxide'enë' Lë' ca naca zían le taca, 54 en tu'béajë' Lë' didza' para gaca ulu'zéguië' Lë' didza' ni'a que didza' ubi'ë.

## 12

*Rusédinë' Jesús ca naca yöl-la' rulu'isö tsahui' cuini*

<sup>1</sup> La' dza na' bulu'dubi zían gayuá' bönachi ga zoë' Jesús ga bidxintë ta'rölisö luzë'eguequi bönachi na'. Ní'irö gusí lahuë' Jesús rë' yugu' bönni' usëda queë' cazë', rnnë':

—Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, le naca yöl-la' rulu'isö tsahui' cuini quégaquië'. <sup>2</sup> Bití' bi dë le naca balándo'os le cabí ilá' lahui, en bití' bi dë le nagachi' le cabí gaca bë'. <sup>3</sup> Que lë ni na', yúgu'të le chigunnáli' ga naca chul-la, ila'yöni bönachi ga naca



lu bení, ate' didza' bë'ëli' bagáchi'sö ga guzóa lu yu'u nayayaj, gaca libán que ga naca lógaca bönachi.

*Nu ral-la' gádxiru'*

*(Mt. 10:28-31)*

<sup>4</sup> Gunnë' ca' Jesús:

—Böcha'ado', rea' libí'ili': Biti' gádxili' bönni' tútigaquië' bönachi, ate' tödi na' bíti'rö bi gaca ilunë' quéguequi. <sup>5</sup> Uluí'ida' libí'ili' nu ral-la' gádxili'. Guli'gadxi Nu na' gaca ugúa yöl-la' na'bán queëli', en tödi na' dë lu në'ë yöl-la' unná bë' chú'unë' libí'ili' lu guí' gabila. Ön, rea' libí'ili', guli'gadxi Nu na'.

<sup>6</sup> 'Túti'gaquië'-ba' gáyu'ba' biguínido' len chopa dumí lásido'. Biti' ral-la láchë'ë-ba' Dios tu biguínido' na'. <sup>7</sup> Lësca' caní, yúgu'të guitsa' ícjali' nabábagaca lahuë' Dios. Que lë ni na', bití' gádxili'. Nazáca'tëröli' libí'ili' ca zianba' biguínido'.

*Nupa ta'nnasö néquiquequi queë' Jesús*

*(Mt. 10:32-33; 12:32; 10:19-20)*

<sup>8</sup> Gunnë' ca' Jesús:

—Rea' libí'ili': Yúgu'të bönni' ta'nnë' néquiquequinë' quia' neda' lógaca bönachi, lësca' neda', Bönni' Guljë' Bönachi, innía' néquiquequinë' quia' lógaquië' gubáz lá'ayi queë' Dios, <sup>9</sup> ate' bönni' ta'dá'baguë'ë néquiquequinë' quia' lógaca bönachi, lësca' neda' tá'baga'a néquiquequinë' quia' lógaquië' gubáz lá'ayi queë' Dios.

<sup>10</sup> Yúgu'të nupa bi ila'nnë quia' neda', Bönni' Guljë' Bönachi, gaca uniti lahuë' Dios léguequi, pero nu innë zi' queë' Dios Bö' Lá'ayi, bití' uniti lahuë' Dios nu na'.

<sup>11</sup> 'Cate' ila'chë'ë libí'ili' gapa naca lu yu'u ga tu'dubë' bönni' judío, en tu'sedë' queë' Dios, en lógaquië' bönni' ulu'chi'a ulu'söröë' libí'ili', en lógaquië' bönni' dë lu ná'agaquië', bití' ubi uguí'ili' nacxi gunli' o bizxi didza' ubí'ili', o bizxi innali'. <sup>12</sup> La' dza ná'asö usédinë' Dios Bö' Lá'ayi libí'ili' le ral-la' innali'.

*Huáca gun yöl-la' tsahui' queëru' ga gal-la láchiru'-në' Dios*

<sup>13</sup> Tu bönni' nútsë'ë ladaj bönachi zían na' rë' Jesús, rnnë':

—Bönni' Usedi, gudxë' böcha'a gunnë' uláz quia' le guta' queë' xuztu'.

<sup>14</sup> Jesús rë' lë':

—Bönni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dë queëli'?

<sup>15</sup> Ní'irö Jesús gudxë' bönachi nacua' ni', rnnë':

—Buli'yútsöca'. Guli'gún chi'i cuinli' para cabí' uhuí'di'li'. Le uzi'ë xibé nu bönni' bití' nácasö le zían le dë queë'.

<sup>16</sup> Ní'irö Jesús bë'lenë' légaquië' didza', bucúdzü'ë didza', rnnë':

—Zoë' tu bönni' rilé'enë' yöl-la' tsahui' queë', ate' runödzejada' gulapa lu xiyúë'. <sup>17</sup> Ní'irö guzá' ládxe'ë bönni' na', rnnë': "¿Nacxi guntsa? Biti' dë ga gapa chi'a le rulá' quia'." <sup>18</sup> Ní'irö rnnë': "Caní' guna'. Uquínnajgaca' yu'u ga rapa chi'a le rulá' quia', ate' guna' yugu' yu'u zxöntëro ca', ate' gapa chi'a le rulá' quia' ni', len yugu' le dë quia'. <sup>19</sup> Ní'irö gaca guíë cuina': Chidëda' quia' zían le chinutuba', le gáhuida' zían iz. Uzí' ládxa'a. Gu'aj gahua', en udzëjada'." <sup>20</sup> Ní'irö Dios rë' lë': "Li', bönni' bití' bi nözinë'. Na'a dzö' gátíu'. Na'a, ¿nuzxi caz guequi que, lë na' chinutubu'?" <sup>21</sup> Caní' raca queë' bönni' rutubë' la' queëzë' yöl-la' tsahui', en bití' runë' le naca ca yöl-la' tsahui' lahuë' Dios.

*Dios run chi'ë yugu' bönachi queë'*  
(Mt. 6:25-34)

<sup>22</sup> Gudödi ni' Jesús gudxë' yugu' bönni' usëda queë', rnnë':

—Que lë ni na' rea' libí'ili': Bití' ubi uguí'ili' ni'a que le gu'aj gáguli', lë na' nabánili', o ni'a que lari' gáguli'. <sup>23</sup> Nácarö lesaca' yöl-la' na'bán queëli' ca le ráguli', ate' nácarö lesaca' idú le nácali' ca lari' ráculi'. <sup>24</sup> Bulí'yutëz ca raca quégacaba' boíquiaj. Bití' tázaba', en bití' ta'lápaba', en bití' nacua' quégacaba' ga ilún chí'iba' le rulá' quégacaba', pero Dios rugahuë' légacaba'. ¿Naru' cabí' nazáca'tëröli' libí'ili' ca yugu' biguínnido'? <sup>25</sup> ¿Nuzxi caz bönni' ladjali' gaca gunë' ga soë' ibanë' ia'tú chí'ido'os tu' ruúbi ruguí' ládxi'da'ahuë'? <sup>26</sup> Que lë ni na', channö cabí' gaca gunli' lë ni naca cuídi'sö, ¿bizx que ruúbi ruguí'ili' ni'a que le naca zxöntëro?

<sup>27</sup> 'Bulí'yutëz ca ta'zxön yöjdo'. Bití' tun du lari', en bití' taba lari', pero rea' libí'ili', bití' gúcarö lachi le gúcuë' Salomón ca nácgaca yöjdo' ni, sal-la' gúta'da' yöl-la' tsahui' queë'. <sup>28</sup> Channö Dios runë' lachi yöj guíxi'do' rögaca na'a la' guixi', ate' cuxö huidzaj ila'gu'ë léguequi lu guí', ¿naru' cabí' gunë' le nácarö dxi'a queëli', libí'ili' na' bití' réajlë'ëli' Dios idú ládxi'li'? <sup>29</sup> Que lë ni na', bití' gü'í ládxi'li' le ral-la' gáguli', en le ral-la' guí'jali', en bití' ubi uguí' ládxi'do'oli'. <sup>30</sup> Yúgu'të lë ni ta'guilaj bönachi yödzölió ni, pero chinöz quëzinë' Xúzili' Dios le riquínili'. <sup>31</sup> Guli'güí ládxi'li' tsú'uli' ga rinná bë'ë Dios, ate' yúgu'të lë ni cu'ë xinöza queëli'.

*Yöl-la' tsahui' rigú'uru' yehua' yubá*  
(Mt. 6:19-21)

<sup>32</sup> Gunnë' ca' Jesús:

—Bití' gádxili', libí'ili' na' nácali' bö'cu' zxíla'do' quia'. Nabábasili' zóali', pero raza ládxe'ë Xúzili' Dios gunnë' queëli' lataj tsú'uli' ga ni' rinná bë'ë Lë'. <sup>33</sup> Guli'guti' le dë queëli', en bulí'nödzaj quégaca bönachi yechi'. Caní' gaca, gunli' queëli'

yöxaj dumí le cabí gaca ditaj, en cú'uli' yöl-la' tsahui' na' yehua' yubá le bití' ubidxi udú, ga ni' bití' idxiné' bönni' gubán, en bití' usunítiba' böa'do' le. <sup>34</sup> Ga ni' dē yöl-la' tsahui' queéli', ni' gü'í ládxi'li' idxinli'.

*Ral-la' sóaru' ban ladxi'*

<sup>35</sup> Gunné' ca' Jesús:

—Guli'sóa sina', en guli'quela' gu' le uzení' queéli'. <sup>36</sup> Guli'gaca ca bönni' huen dxin ta'bözé' dza huödē' xángaquié', bönni' sa'yéajē' laní que yöl-la' rutsaga na', para cate' udxiné', en ulidzē', la' ila'sáljatē' queē' tsu'ē. <sup>37</sup> Bica' bágaca huen dxin na' ila'cu'ē ban ladxi' cate' huödē' xángaquié'. Le nácatē rea' libí'ili', upá'a cuiné' xángaquié' na', ate' guné' ga ila'bö'ē ga ilahué', ate' cu'ē le ilahué'. <sup>38</sup> Sal-la' huödē' cate' chiral-la o idú guluhuēla, channö idixáquié' légaquié' nacu'ē ban ladxi', bica' bágaca huen dxin na'. <sup>39</sup> Lē ni ral-la' inözili'. La'tu' nōziné' xan yu'u bizxi dza huadxiné' bönni' gubán, usubán ládxē'ē, en bití' gu'ē lataj bönni' na' udxíē' yeru lidxē', para cabí cuané' le dzö'ö lidxē'. <sup>40</sup> Que lē ni na', guli'sóa ban ladxi' ca' libí'ili', tu' huöda' neda', Bönni' Guljē' Bönachi, tu dza bití' ribözali' neda'.

*Bönni' huen dxin tsahui', en bönni' huen dxin bití' náquié' tsahui'*

(Mt. 24:45-51)

<sup>41</sup> Ní'irö Pedro gunábinē' Jesús, rnné':

—Xan, ¿naru' reo' nétu'sö lē ni rucúdz'u didza', o reo' ca' caní yúgu'tē bönachi?

<sup>42</sup> Rē' Xanru' lē':

—¿Nuzxi na' bönni' huen dxin tsahui', en réajni'iné', dē lu nē'ē uláz queē' xanē'? Bönni' ni, xanē' udödē' lu nē'ē lidxē' para cate' gála'rö ilahué' bönni' nacu'ē lidxē', gu'ē que queégaquié' le ilahué'. <sup>43</sup> Bica' ba bönni' huen dxin na' cate' huödē' xanē', idixáquié' lē' runé' caní dxin na' nudödē' lu nē'ē. <sup>44</sup> Le nácatē rea' libí'ili', udödē' xanē' lu nē'ē bönni' huen dxin tsahui' na' idutē le dē queē'. <sup>45</sup> Channö guéquiné' bönni' huen dxin na' huadzené' huödē' xanē', ate' isí lahué' gu'ē dö' quégaquié' ia'zica'rē' huen dxin, bönni' en nigula, en isí lahué' gu'aj gahué', en súdxiné', <sup>46</sup> ní'irö huödē' xanē' bönni' huen dxin na' cate' bití' ribözē' lē', en cate' bití' réquibe'ené', ate' usaca' zi'ē bönni' huen dxin bití' náquié' tsahui' na', en ichúguié' queé' qui'i sáquié' ca narugu quégaquié' bönni' bití' ta'yéajlē'ē.

<sup>47</sup> Bönni' huen dxin na' nōziné' le ré'ēnē' xanē', en bití' zoé' sina', en bití' runé' ca rnné' xanē', bönni' ni, quínitērē' xanē' lē'. <sup>48</sup> Channö cabí nōziné' tu bönni' huen dxin le ré'ēnē' xanē', en guné' le gun ga ibágué'ē le quiné' xanē' lē', bönni' ni quiné' lē' láti'do'os. Tu bönni' yu'u lu nē'ē yenni', yenni' unabē' xanē'

lu në'ë, ate' bönni' na' xanë' nuzzöni ládxë'ë lë' le zxön, le zxöntëro ca' unabë' xanë' lu në'ë bönni' huen dxin na'.

*Le náquië' Jesús gun ga ila'rúaj choplö bönachi*  
(Mt. 10:34-36)

<sup>49</sup> Gunnë' ca' Jesús:

—Bida' neda' dujéna' ga tsegui guí' yödzülió ni, en caba ládxa'a chinaguéla' guí' na'. <sup>50</sup> Na'a, dë tu le ral-la' qui'i saca'a le naca ca tu le idílida' nisa, ate' rö'a böniga ga idxintë gaca caní quia'. <sup>51</sup> ¿Naru' réquili' bida' dulequi dxia' le raca yödzülió ni? Rea' libí'ili': ¡Calëga! Bida' duléquia' le gun ga ila'rúaj choplö bönachi. <sup>52</sup> Na'a isí lo ulu'lá'alén luzë'eguequi gayu' bönachi nacua' tu yu'u. Tsonnë' ila'dá'baguë'ë chopë' nazí'igaquië' xtídza'a, ate' chopë' na' ila'dá'baguë'ë tsonnë' na'. <sup>53</sup> Nu bönni' zóabi' bi'i bönni' queë' tá'baguë'ë xzí'inë' na', ate' bi'i bönni' na' tá'baga'bi' xúzibi'. Nigula zóabi' bi'i nigula queënu tá'baga'nu xzí'ininu na', ate' bi'i nigula na' tá'baga'bi' xiná'abi'. Nigula zóanu nigula zxoa' lídxinu tá'baga'nu zxoa' lídxinu na', ate' nigula zxoa' lídxinu na' tá'baga'nu xto' xzí'ininu.

*Le nácacaca bë' le taca na'a dza*  
(Mt. 16:1-4; Mr. 8:11-13)

<sup>54</sup> Jesús gudxë' ca' bönachi zían nacua' ni', rnnë':

—Cate' rilé'eli' za' böaj saca' ga ribía gubidza, la' rnnátëli': “Hualaj guiöj”, ate' caní raca. <sup>55</sup> Cate' recja bö' za' saca' ga ridödi gubidza beo' ziaga, rnnali': “Udzá'a na'a”, ate' caní raca. <sup>56</sup> Libí'ili', bönni' rulu'isö tsahui' cuinli'. Nözili' le rulu'i le raca lúzhiba, en le raca luyú ni, pero biti' réquibe'eli' le rulu'i le nácacaca bë' taca dza ni zóaru' na'a.

*Ral-la' ugá' analenru' tsahui' nu rilé rë'u*  
(Mt. 5:25-26)

<sup>57</sup> Gunnë' ca' Jesús:

—¿Bizx que biti' ruchi'a rusöröli' la' libí'isili' ca naca le naca tsahui'? <sup>58</sup> Channö zoa nu bi unabi yudxi li', ate' zéajli' idxinli' yúlahui', bë' ladxi' ugá' analenu' tsahui' nu na' tsanni' ni' yú'uli' nöza, para cabí zegui li' lahuë' bönni' uchi'a usöröë' libí'ili', ate' bönni' uchi'a usöröë' na' udödë' li' lu në'ë bönni' rusayjë' lidxi guié, ate' bönni' na' rusayjë' lidxi guié cu'ë li' lidxi guié na'. <sup>59</sup> Rea' li', biti' uruju' ni' cate' údxirö quizxju' yúgu'të dumí lásido' ral-lu'u que nu na'.

## 13

*Run bayudxi ubí'i ládxi'ru'*

<sup>1</sup> La' dza ní'isö bila'dxinë' bönni' ta' guíxjöi'inë' Jesús ca benë' Pilato, bëtië' bal-lë' bönni' Galilea, en guzxi'ë rön quëgaquië', le bugútsi'në' xichöngacaba' böa' bëdxi chigulútië' légacaba' para

ila'gu'ë xichõngacaba' na' lahuë' Dios. <sup>2</sup> Bubi'ë didza' Jesús, rë' légaquië':

—¿Naru' réquili' gulácarë' bönni' dul-la' bönni' Galilea na' ca ia'zica'rë' bönni' Galilea, tu' gula'gu'i gula'zaquië' caní? <sup>3</sup> Rea' libí'ili': ¡Calëga! Channö cabí ubí'i ládxi'li', nítili' ca' yúgu'tëli'. <sup>4</sup> Lësca' caní guca quégaquië' chixxunë' bönni' ni', yöjbaga' yu'u sibi na' nazí'i le Siloé légaquië', ate' gulátië'. ¿Naru' réquili' gula'bága'tërë' légaquië' xíguia' ca ia'zica'rö bönnachi nacua' Jerusalén? <sup>5</sup> Rea' libí'ili': ¡Calëga! Channö cabí ubí'i ládxi'li', nítili' ca' yúgu'tëli'.

*Rucúdzu'ë didza' Jesús que yaga higo biti' bi ribía*

<sup>6</sup> Ní'irö bucúdzu'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyúë'. Rõjtiljë' le ribía yaga na', pero biti' bi ridzölinë'. <sup>7</sup> Ní'irö gudxë' bönni' runë' dxin lu xiyúë' na', rnnë': “Chiguca tsonna iz rida' rududilja' le cuía yaga higo ni, en biti' bi ridzöliida'. Guchugu le. ¿Bizx que run nigui luyú ni?” <sup>8</sup> Ní'irö bubi'ë didza' bönni' huen dxin na', rë' lë': “Xan, bucá'anagarö le ia'tú ízatëz, ate' uzatsa' yu zxani, en cu'a bëbu zxani. <sup>9</sup> Channö cuía yaga ni, gaca dxi'a, pero channö cabí bi cuía, ní'irö ichugu' le.”

*Ruúnë' Jesús tu nigula ré'enu cate' naca dza lá'ayi*

<sup>10</sup> Tu dza rusédinë' Jesús bönnachi nacua' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi quégaquië'. <sup>11</sup> Zóanu tu nigula ni' chiguca chixxunu' iz ré'enu, tu' yu'u lënu bö' xihui' run ga te'e bönnachi, ate' nayéchutica'sinu ridanu, en biti' ca' raca ulí cuinnu. <sup>12</sup> Cate' bilé'enë'-nu Jesús, bulidzë'-nu, rnnë':

—Nigúlado', chiböácu' que yödzöhuë' quiu'.

<sup>13</sup> Ní'irö Jesús guxóa në'ë lënu, ate' la' bulitë cuinnu, en gulú'unu-në' Dios yöl-la' ba. <sup>14</sup> Ní'irö gulënë' bönni' lo que yu'u ga na' tu'dubë' tu'sëdë' queë' Dios. Rilenë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacua' ni', rnnë':

—Xopa dza nacua' cate' runru' dxin. Dë lataj yugu' dza ni guídali' para nu un libí'ili', en calëga dza lá'ayi.

<sup>15</sup> Ní'irö bubi'ë didza' Xanru', rnnë':

—Libí'ili', bönni' rulu'isö tsahui' cuinli', ¿naru' cabí rusédxigacali'-ba' böa' bëdxi que queëli' ga na' dá'gacaba' cate' naca dza lá'ayi, ate' tsöjuá'agacali'-ba' para ilë'ajba' nisa? <sup>16</sup> Nácanu nigula ni xzí'ini xí'sóë' Abraham, ate' idú chixxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

17 Cate' bë'ë didza' ni Jesús, bulu'tuí'inë' yúgu'të bönni' nacu'ë ni' ta'lenë' Lë', pero bulu'dzeja ia'zica'rö bönachi, yúgu'të nupa nacuá' ni', tu' ta'le'enë' yugu' le zxön runë' Jesús.

*Rucúdzu'ë didza' Jesús que xisedo' mostaza*

*(Mt. 13:31-32; Mr. 4:30-32)*

18 Ní'irö rnnë' Jesús:

—¿Nacxi caz raca rixxön le rinná bë'ë Dios, o bizxi uséqui'tseru' le? 19 Raca ca raca que xisedo' mostaza, le guzxi'ë tu bönni', ate' guzë' le ga naca lu xiyúë'. Guzxön yaga mostaza na', en guca ca tu yaga zxön, ate' bila'dxinba' biguínido', gulunba' xcá'agacaba' lu ni'a në'e yaga mostaza na'.

*Rucúdzu'ë didza' Jesús que cúa zi que yöta xtila*

*(Mt. 13:33)*

20 Lësca' caní rnnë' Jesús:

—¿Bizxi caz uséqui'tseda' le rinná bë'ë Dios? 21 Naca ca cúa zi que yöta xtila, le guzxi'ínu tu nigula, en bugútsi'nu tsonna cö' cúa yöta xtila, ate' guyazxaj idútë cúa na'.

*Tu ga tödiru' le naca guído'*

*(Mt. 7:13-14, 21-23)*

22 Tsanni ni' yu'ë nöza Jesús, sa'yéajë' Jerusalén, ridödë' yugu' yödzo zxön, en yugu' yödzo'do', ate' rusédinë' bönachi nacuá' gapa na'. 23 Tu bönni' zoë' ni' gunábinë' Jesús, rnnë':

—Xan, ¿narú' nabábasö nupa ulu'lágaca?

Jesús rë' nupa nacuá' ni', rnnë':

24 —Guli'güi'í ládxi'li' tsú'uli' saca' ga nu ridödi le naca guído', tu' rea' libí'ili': Zían nupa ilé'ëni ila'yaza ni', pero bití' ila'zéqui'në'. 25 Tödi chasë' Xan yu'u, en usayjë' yu'u, isí loli' libí'ili' na' zóali' ní'ilö ulídzali'-në' ra' yu'u na', ate' guiéli'-në': "Xan, Xan, gusalaj queétu'." Ní'irö ubi'ë didza' Lë', en guié' libí'ili': "Bití' nözda' nuzxi libí'ili'." 26 Ní'irö isí loli' innali': "Güi'í gudágulentu' Li', ate' busédinu' gapa naca lu yë'ëyi queétu'." 27 Ní'irö guié' libí'ili': "Rea' libí'ili', bití' nözda' gazxi bönachi libí'ili'. Guli'cuíta ga zoa', yúgu'tëli' ruá'ali' dö'."

28 Ní'irö cödxí yéchi'li', en gagu zxea láya'li' cate' ilé'egacali'-në' Abraham, en Isaac, en Jacob, en yúgu'të bönni' gulu'ë didza' uláz queë' Dios, nacu'ë ga ni' rinná bë'ë Dios, pero libí'ili' sóali' ní'ilö. 29 Ila'dxín bönachi ila'rúaj saca' ga rilén gubidza, en saca' ga ribía gubidza, en saca' ga za' bö' ziaga, en saca' ga ridödi gubidza beo' ziaga, ate' ila'bö'ë ilahuë' ga ni' rinná bë'ë Dios. 30 Ní'irö ilaca lo bal-la bönachi nátagaca cá'asö na'a, ate' ulu'gá'ana cá'asö bal-la nupa nátagaca lo na'a.

*Ribödxí yechë'ë Jesús ni'a quégaca bönachi Jerusalén*

*(Mt. 23:37-39)*

<sup>31</sup> La' dza ní'isö bila'dxinë' bal-la bönni' yudo' fariseo ga zoë' Jesús en të' Lë':

—¡Burúaj! ¡Buzxunnaj ni! ¡Rë'ënë' Herodes gútië' Li'!

<sup>32</sup> Jesús rë' légaquië':

—Guli'tséaj, guli'tsöjödxe' bönni' na' náquië' ca tuba' böza', innali': "Buyútsöca', rubéajgaca' bö' xihui', en ruúna' bönachi na'a, en cuxö, en cate' gaca lidzaj, údxi guna' dxin quia'."

<sup>33</sup> Run bayudxi tséajlensa' ca' nöza na'a, en cuxö, en huidzaj, ate' idxina' Jerusalén, tu' tútigaquië' bönni' tu'ë didza' uláz queë' Dios ni'.

<sup>34</sup> 'Libí'ili', zóali' Jerusalén. Rútigacali'-në' bönni' tu'ë didza' uláz queë' Dios, en ruládxigacali'-në' guiöj bönni' gubáz risöllë'ë Dios ga zóali'. Cate' xö zían luzuí gú'unida' utuba' libí'ili' quia' ca runba' yöjede, rutúbiba' börado' queëba' zxan xiliba', pero biti' gú'unili'. <sup>35</sup> Buli'yútsöca', cá'asö ugá'ana lídxili', ate' rea' libí'ili', bíti'rö ilé'eli' neda' cate' idxinrö dza innali': "Bica' ba Nu na' za' uláz queë' Xanru'."

## 14

### *Ruúnë' Jesús tu bönni' ré'enë' huë' gui*

<sup>1</sup> Cate' naca dza lá'ayi quégaquië' bönni' judío, guyu'ë Jesús lidxë' tu bönni' unná bë', bönni' yudo' fariseo. Rö'ë Jesús rahuë', ate' nacu'ë bönni' yudo' fariseo ni' ta'në'ë Lë'. <sup>2</sup> Zoë' ca' tu bönni' ré'enë' huë' gui ga na' zoë' Jesús. <sup>3</sup> Ní'irö Jesús gunábinë' bönni' yudo' usedi táquië' xibá queë' Moisés, en yugu' bönni' yudo' fariseo, rnnë':

—¿Naru' dë' lataj unru' nu re'e cate' naca dza lá'ayi?

<sup>4</sup> Légaquië' bulu'sayaj ruá'agaquië'. Ní'irö Jesús gudélë'ë bönni' huë' na', en bunë' lë', ate' la' busöl-la'të' lë'. <sup>5</sup> Ní'irö Jesús rë' yugu' bönni' yudo' na', rnnë':

—Channö nu bönni' ladjali' nacua'aba' queë' böa' bëdxi, ate' ibíxiba' tuba' lu yeru, ¿naru' cabí tsöjléajtë'-ba', sal-la' naca dza lá'ayi?

<sup>6</sup> Biti' bi didza' guca ulu'bi'ë ca naca lë ni.

### *Nu cö' lataj lo*

<sup>7</sup> Cate' bilé'enë' Jesús ca tunë' bönni' yudo' fariseo na', ta'bö'ë lataj lo ga na' ta'bö'ë tahuë', ní'irö bucúdzu'ë didza', ate' rë' légaquië':

<sup>8</sup> —Cate' nu bönni' ulidzë' li' guídu' ga raca laní que yöl-la' rutsaga na', biti' cö'u lataj lo. Nadxi ca' nulidzë' ca' tu bönni' nácatë'rë' lo ca li'. <sup>9</sup> Ní'irö bönni' na' bulidzë' li' huidë' ga zu', en guié' li': "Bë' lataj bönni' ni cö'ë ga zu'", ate' ní'irö lu yöl-la' rutuí' quiu' tsöjchö'u zxánitëlö. <sup>10</sup> Que lë ni na', cate' nu bönni' ulidzë' li', guyéaj yöjchö' zxánitëlö, para cate' idxinë' bönni'

na' bulidzë' li', huë' li': "Böcha'a, gudödi ia'lati' nilö." Ní'irö gácaru' li' lo lógaca nupa ta'bö'len li' tsözxön. <sup>11</sup> Nu run ba zxön cuini, ilunë' ga huöta' huöxaj, pero nu zoa nöxaj ladxi', ilunë' ga gácarö lo nu na'.

<sup>12</sup> Jesús rë' ca' bönni' na' bulidzë' Lë', rnnë':

—Cati' gunu' tu gü'i huagu o tu lanído', biti' ulídzagacu'-në' yugu' böchi' luzó'o, en yugu' bönni' böchu'u, en yugu' di'a dza quiu', en dzaga yu'u quiu' ta'lé'enë' yöl-la' tsahui' quégaquië', tu' ulu'lidzë' ca' li', ate' caní gaca, ubí'i quiu'. <sup>13</sup> Cate' gunu' tu gü'i huagu, bulidza yugu' bönachi yechi', en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la. <sup>14</sup> Ní'irö gacu' bica' ba, tu' cabí gaca bi ulu'bi'ë bönni' caní quiu', pero ubí'i quiu' cate' idxín dza ulu'bán nupa gulún le naca tsahui', en gulátigaca.

*Rucúdzu'ë didza' Jesús que tu laní zxön*

<sup>15</sup> Cate' tu bönni' rö'ë rágulenë' Jesús biyönnë' didza' ni, rë' Lë':

—Bica' ba nu gagu ga ni' rinná bë'ë Dios.

<sup>16</sup> Jesús rë' lë':

—Zoë' tu bönni' benë' laní zxön, ate' zían nupa bulidzë'. <sup>17</sup> Cate' chinabá'a la' huagu, gusöl-lë'ë bönni' huen dxin queë' tsöjödxe' nupa na' chinulidzë', gunné': "¡Guli'dá! ¡Yúgu'të chinabá'a!" <sup>18</sup> Gula'sí lógaquië' yúgu'të' ta'nabë' lataj cabí tsöjáquië'. Bönni' zí'alö na' rnnë': "Si' guzxi'a tu luyú, en runda' bayudxi tsöjyúa' le. Ráta'yua' lo' gunnu' neda' lataj." <sup>19</sup> Ia'túë' rnnë': "Si' guzxi'a gayu' nözaba' bëdxi, ate' tsöjzxi' bë'a lé'gacaba' ugúngaca'-ba' dxin. Ráta'yua' lo' gunnu' neda' lataj." <sup>20</sup> Ia'túë' rnnë': "Si' butsaga na'a, en que lë ni na' biti' gaca guída'." <sup>21</sup> Cate' böajë' bönni' huen dxin na', yöjtíxjöi'inë' xanë' yúgu'të lë ni. Ní'irö gulénë' bönni' xan yu'u na', ate' gudxë' bönni' huen dxin na', rnnë': "Guyéajtë na'a gapa naca lu yë'ëyi, en gapa naca la' nöza que yödzö ni, ate' ichë'u yugu' bönachi yechi' ni, en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la." <sup>22</sup> Cate' chinunë' bönni' huen dxin na' caní, rnnë': "Xan, chibena' ca na' gunná bé'enu' neda', ate' ni dë lataj." <sup>23</sup> Ní'irö xanë' gudxë' bönni' huen dxin na', rnnë': "Guyéaj gapa naca la' nöza, en gapa naca nöza lasi, ate' ben bayudxi guídigaca nupa nacua' ni' para ilí lidxa', <sup>24</sup> tu' rea' libí'ili': Biti' gahuë' que laní quia' nitúë' bönni' ni' bulidza' zí'alö."

*Le sáca'ru' cate' zéajlenru'-në' Cristo*

<sup>25</sup> Yugu' dza ni' röjácálen Jesús bönachi zían, ate' buécjë' Jesús, en rë' légaquië':



26 —Channö guídalenē' neda' tu bönni', en biti' idxí'irönē' neda' ca nadxí'inē' xuz xinē'ē, en nigula queē', en yugu' zxi'inē', en yugu' bi'i böchē'ē, en yugu' bi'i zanē', en yöl-la' na'bán queē', biti' gaca gáquiē' bönni' usēda quia'. 27 Nu bönni' biti' gáquiē' ca tu bönni' sa'yéajē' sōjtē'ē lē'e yaga cruz, ate' tē'ē neda', biti' gaca gáquiē' bönni' usēda quia'. 28 Channö zoē' nu bönni' ladaj libí'ili' guē'ēnnē' gunē' tu yu'u zían cuía, ¿naru' cabí cō'ē zí'alō ulabē' gáca'xi dumí ral-la' utōē' para inōzinē' channö dē queē' tsca le riquinnē' para údxi gunē' yu'u na'? 29 Channö cabí gunē' caní, en isí lahuē' cuéquiē' xilibi yu'u na', ate' biti' gaca údxi gunē' yu'u na', ní'irō ila'sí lógaca yúgu'tē nupa ila'lé'e le ulu'titaj lē', 30 ila'nná: "Bönni' ni gusí lahuē' runē' yu'u, pero biti' guca údxi gunē' le." 31 Lē'sca' caní, channö zoē' nu bönni' rinná bē'ē, en ral-la' tsejē' gudilla tsōjtíl-lalenē' ia'túē' bönni' rinná bē'ē, ¿naru' cabí cō'ē zí'alō, en cuéqui icjē' channö séqui'nē' tsōjtíl-lalenē' bönni' ni' nachē'ē galaj milē' bönni', ate' lē' chi milsē' bönni' nachē'ē? 32 Channö cabí séqui'nē', cate' ni' zoē' zi'tu' ia'túē' bönni' na' rinná bē'ē, isöl-lē'ē bönni' gubáz queē', ate' inábinē' lē' nacxi ral-la' gunē' para ulu'dzáguiē' dxi'a. 33 Caní naca, channö zoē' nu bönni' ladaj libí'ili' biti' ucá'anē' yúgu'tē le dē queē', biti' gaca gáquiē' bönni' usēda quia'.

*Zōdi' le naniti yöl-la' siná'a que*

*(Mt. 5:13; Mr. 9:50)*

34 Gunnē' ca' Jesús:

—Dxi'a naca zōdi', pero channö initi yöl-la' siná'a que, ¿nacxi gaca úniru' le siná'a? 35 Bítirō nazaca' zōdi' na', calēga para luyú, en calēga para ga rirú'uniru' bēbu, pero chú'unaru' le ní'ilō. Nu zoa nagui, en riyōni, ral-la' uzē nagui nu na'.

## 15

*Rucúdzu'ē didza' Jesús ca naca queē'ba' bō'cu' zxila' gunítiba'*  
*(Mt. 18:10-14)*

1 Bulu'dubē' yúgu'tē bönni' tu'quízjē' lázagaca bönachi, en yugu' bönni' cá'asō ga zoē' Jesús para ulu'zē náguiē' Lē'. 2 Que lē' ni na' yugu' bönni' yudo' fariseo, en yugu' bönni' yudo' usedi gula'nnē' queē' Jesús, ta'nnē':

—Bönni' ni runē' bal yugu' bönni' dul-la', en rágulenē' légaquiē'.

3 Ní'irō bucúdzu'ē didza' Jesús, rē' légaquiē':

4 —Channö zoē' tu bönni' ladaj libí'ili', nacuá'aba' queē' tu gayuá'aba' bō'cu' zxila', en channö nítiba' tuba', ¿naru' cabí ucá'anē' ia'zíca'rōba' tápalalaj yu' chēnnaba' na' ga naca lu lataj cá'asō, ate' tsejē' tsōjdiljē'-ba' bō'cu' zxila' na' nanítiba', cate' udzōlirönē'-ba'? 5 Cate' udzōlinē'-ba', lu yöl-la' rudzeja

queë' ixoë'-ba' ya' zxicjë', <sup>6</sup> en cate' udxinë' lidxë' utubë' yugu' böchi' luzë'ë, en yugu' dzaga yu'u queë', ate' guië' légaquië': "Buli'dzéjalen neda', tu' chibudzö'lida'-ba' bö'cu' zxila' quia' gunítiba'." <sup>7</sup> Rea' libí'ili': Lësca' caní gácatëro' yöl-la' rudzeja yehua' yubá ni'a queë' tuë' bönni' dul-la' ubí'i ládxe'ë ca gaca quégaquië' tápalalaj yu' chënnë' bönni' tsahui', bönni' téquinë' biti' naquíniguequinë' ulu'bí'i ládxi'gaquië'.

*Rucúdzu'ë didza' Jesús que tu dumí guniti*

<sup>8</sup> Rnnë' ca' Jesús:

—Channö zóanu tu nigula, dë queënu chi dumí plata, en channö initi tu dumí plata na', ¿naru' cabí uquéla'nu guí, ate' ulúanu yu'u, uguilaj yúdxinu le cate' udzölrönu le? <sup>9</sup> Cate' udzölinu le, utúbinu yugu' nigula luzá'anu, en yugu' nigula dzaga yu'u queënu, ate' guiënu légacanu: "Buli'dzéjalen neda', tu' chibudzö'lida' dumí plata na' guniti." <sup>10</sup> Rea' libí'ili': Lësca' caní, ulu'dzéjade'erönë' gubáz lá'ayi queë' Dios ni'a queë' tuë' bönni' dul-la' ubí'i ládxe'ë.

*Rucúdzu'ë didza' Jesús queëbi' tu bi'i gunítibi'*

<sup>11</sup> Rnnë' ca' Jesús:

—Zoë' tu bönni' nacuá'abi' chópabi' bi'i bönni' queë'. <sup>12</sup> Bi'i cuidi' na' rëbi'-në' xúzibi': "Dad, benna quia' le dë quiu' le ralla' guequi quia'." Ní'irö xúzibi' na' gudísië' quégacabi' le dë queë'. <sup>13</sup> Nabábasö dza gudzé, bi'i cuidi' na' butúbibi' yúgu'të, ate' guyéajbi' tu yödzo' zítu', ate' ni' butöbi' dëro le dë queëbi'. Le ruá' dö' benbi'. <sup>14</sup> Cate' chibutöbi' dëro le dë queëbi', guca gubín lu yödzo' ga na' zóabi', ate' biyadzaj queëbi'. <sup>15</sup> Ní'irö guyéajbi' yöjsóabi' huen dxin queë' tu bönni' lu yödzo' ni', ate' bönni' na' gusöl-lë'ë-bi' ga dë xiyúë' tsöjgágubi'-ba' yugu' cuchi queë'. <sup>16</sup> Guca ládxi'bi' gágubi' guixi' cá'asö na' táguba' cuchi, pero cuntunu bi bë' le gágubi'. <sup>17</sup> Ní'irö bubí'íládxi'bi', rnnabi': "Cate' xö bönni' huen dxin nacu'ë lidxë' xuzá', en dëda' le tahuë', pero neda' ni huáti caza' yöl-la' ridún. <sup>18</sup> Uzá'a ni, huöja' ga zoë' xuzá', en tsöjödxa'-në': Dad, bena' dul-la' lahuë' Dios, zoë' yehua' yubá, en lo' lí'. <sup>19</sup> Bítirö naca' neda' lesaca' gaca' xzí'inu'. Ben neda' ca bönni' huen dxin quiu'." <sup>20</sup> Ní'irö guyú'ubi' nöza, söhuöajbi' ga zoë' xúzibi'.

'Cate' ni' zóabi' zítu' suzá'abi', bilé'enë'-bi' xúzibi', en buéchi' ládxe'ë-bi'. Carelö yöjzxí'galë'-bi' xúzibi', en yöjnidë' yenbi', gudahuë'-bi' zxixi. <sup>21</sup> Ní'irö xzí'inë' na' rëbi'-në': "Dad, bena' dul-la' lahuë' Dios, zoë' yehua' yubá, en lo' lí'. Bítirö naca' neda' lesaca' gaca' xzí'inu'." <sup>22</sup> Ní'irö xúzibi' rë' yugu' bönni' huen dxin queë', rnnë': "Guli'tsöjléajtë lari' nazáca'tëro, en guli'gacu-bi'. Guli'cú'u le nazaca' xibön ná'abi', en buli'dá'

huarache ní'abi'. <sup>23</sup> Guli'tsöjzxi'í-ba' bédxi renni', ate' guli'guti-ba'. Gáguru'-ba', en gunru' laní, <sup>24</sup> tu' guca bi'í bönni' quia' ni ca tu bi'í chinátibi', ate' bubanbi'. Gunítibi', ate' chibulá'abi' na'a." Ní'irö gula'sí lógaquië' tu'dzëjanë'.

<sup>25</sup> "Tsanni ni' raca lë ni, zóabi' bi'í bönni' zí'alö queë' bönni' na' la' guixi'. Cate' suzá'abi' rudxinbi' gala' ra' yu'u, riyönibi' raca huila, en raca huö'a lu yu'u na'. <sup>26</sup> Ní'irö bulídzabi'-në' tuë' bönni' huen dxin zoë' ni', en gunábibi' lë' bizxi na' raca. <sup>27</sup> Bönni' huen dxin na' rë'ë-bi': "Bi'í böchu'u na' budxinbi', ate' gunná bë'ë xuzu' gulútië'-ba' bédxi renni', tu' budxinbi' lu në'ë dxi'a tsáhui'do'." <sup>28</sup> Ní'irö gulébi' bi'í zí'alö na', en biti' gú'unibi' tsú'ubi' yu'u. Ní'irö birúajë' xúzibi', en gúta'yuë' lobi' tsú'ubi'. <sup>29</sup> Bubí'ibi' didza' bi'í zí'alö na', rëbi'-në' xúzibi': "Nöz quëzinu' cate' xö iz bena' dxin lo', en catu caz gudá'baga'a lí, pero catu caz bennu' quia' tuba' bö'cu' zxi'á'do' para gú'ílena' xibé yugu' luzá'a. <sup>30</sup> Na'a, cate' budxinbi' bi'í quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútië'-ba' bédxi renni' ni'a queëbi'." <sup>31</sup> Ní'irö xúzibi' rë'ë-bi', rnnë': "Zxi'ina', lí zóalen cazu' neda' ate' yúgu'të le dë quia', quiu' nequi. <sup>32</sup> Ben bayudxi gunru' laní, en udzëjaru', tu' gúcabi' bi'í böchu'u ni ca tu bi'í chinati cázabi', ate' nubanbi'. Gunítibi' ate' chibulá'abi'."

## 16

*Rucúdzü'ë didza' Jesús queë' bönni' huen dxin biti' náquië' tsahui'*

<sup>1</sup> Jesús rë' ca' yugu' bönni' dá'gaquië' Lë', rnnë':

—Zoë' tu bönni' dë yöl-la' tsahui' queë', en zoë' ca' queë' tuë' bönni' huen dxin dë lu në'ë uláz queë'. Bila'dxinë' yugu' bönni' tu'zëguië' bönni' huen dxin na' lahuë' xanë', ta'nnë' queë' rutösë' le dë queë' xanë' na'. <sup>2</sup> Ní'irö xan yu'u na' bulídzë bönni' huen dxin na', en rë' lë': "¿Bizxi didza' ni riyönda' quiu'? Buluí'í neda' le naca bë' dxin nunu', tu' cabirö gata' lu no'ö uláz quia'." <sup>3</sup> Ní'irö guzá' lãdxë'ë bönni' huen dxin na', rnnë': ¿Nacxi guntsa'? Rubéajë' xana' neda' lataj lo ga runa' dxin. Biti' séqui'da' guna' dxin gú'una, en utuí'ida' inaba' nu bi gúnna'sö quia'. <sup>4</sup> Na'a nözda' naca guna' para cate' ubéajë' neda' lataj lo ni, ila'cuá' nupa ulu'zí' neda' lídxiguequi. <sup>5</sup> Ní'irö bönni' huen dxin na' bulídzë' yugu' bönni' bi tál-lë'ë queë' xanë', ate' rë' bönni' zí'alö: "¿Gáca'xi ral-lu'u queë' xana'?" <sup>6</sup> Lë' rnnë': "Tu gayuá' rë'ö chugu le za ral-la'a." Bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Gurö'ötë ni, en buzúaj ia'tú lu guichi le inná chi-un rë'ö chugu ral-lu'u." <sup>7</sup> Gudödi ni' gunábinë' ia'tué', rnnë': "Nazxi lí, ¿gáca'xi ral-lu'u?" Lë' rnnë': "Tu gayuá' da'a zxoá' xtila." Ní'irö bönni'

huen dxin lo na' rē' lē', rnnē': "Ni dē guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u." <sup>8</sup> Réquibe'enē' xanē' na' sína'tē benē' bönni' huen dxin biti' náquiē' tsahui' na'. Caní naca, nácagacarē' sina' bönni' yōdzölió ni lu le tunē' la' légacāsē', ca nácagaca bönachi ta'dalen Dios lu bení' queē'.

<sup>9</sup> 'Neda' rea' libí'ili': Guli'cözalen bönachi dxi'a, ugunli' dxin yöl-la' tsahui' dē queēli' yōdzölió ni, para cate' idxín dza ucá'anali' yugu' lē ni, ilunē' libí'ili' bal lataj ni' zóatica'sö.

<sup>10</sup> 'Nu rugún dxi'a dxin tu le cuídi'sö dē lu nē'e, lēscā' ugún dxi'a dxin tu le zxön gata' lu nē'e. Nu biti' rugún dxi'a dxin tu le cuídi'sö dē lu nē'e, biti' ugún dxi'a dxin tu le zxön gata' lu nē'e. <sup>11</sup> Que lē ni na', channö cabí rugunli' dxi'a dxin yöl-la' tsahui' dē queēli' yōdzölió ni, ¿nuzxi caz udödi lu ná'ali' yöl-la' tsahui' le naca idü? <sup>12</sup> Channö cabí rugunli' dxi'a dxin le dē lu ná'ali' le nequi que nu yúbölö, ¿nuzxi caz udödi lu ná'ali' le ral-la' guequi que quézili'?

<sup>13</sup> 'Biti' gaca nitüē' bönni' huen dxin gunē' xichíngaca chopa xanē', tu' udí'inē' tuē', en idxí'inē' ia'tüē', o gunē' bal tuē', en uzóē' tsölá'alö ia'tüē' na'. Biti' gaca gunli' xichinē' Dios, en gunli' ca' dxin para uzí'ili' xibé yöl-la' tsahui' que yōdzölió.

<sup>14</sup> Bila'yönnē' bönni' yudo' fariseo didza' ni, ate' tu' nadxí'iguequinē' yöl-la' tsahui' quégaquiē', que lē ni na' bulu'titjē' Jesús. <sup>15</sup> Ní'irö Jesús rē' légaquiē':

—Libí'ili' rubéaj dxi'a cuinli' lógaca bönachi, pero nōzinē' Dios le yu'u icja ládxi'do'oli', tu' naca lē na' tun zxön bönachi tu le ruzóē' Dios tsölá'alö.

*Xibá queē' Moisés, en le rinná bē'ē Dios*

<sup>16</sup> Gunnē' ca' Jesús:

—Ga bidxintē dza zoē' Juan, ben dxin le rinná bē' xibá queē' Moisés, en le bulu'zúajē' lu guichi yugu' bönni' gulu'ē didza' uláz queē' Dios. Ní'irö cate' bidxinē' Juan na', gusí lo raca libán ca gaca nu tsaza ga rinná bē'ē Dios, ate' tun bayudxi yúgu'tē bönachi ila'yaza ni'.

<sup>17</sup> 'Sal-la' raca caní, gácarö ila'dödi que lúzxiba, en que luyú ni ca initi tu dídzasö nazúaj lu guichi lu xibá queē' Dios.

*Le rulá'a yöl-la' nutsaga na'*

*(Mt. 19:1-12; Mr. 10:1-12)*

<sup>18</sup> Gunnē' ca' Jesús:

—Channö tu bönni' ulá'alenē' nigula queē', ate' utsaga ná'alenē'-nu nigula yúbölö, gunē' dul-la' le riguitsaj xibá que yöl-la' nutsaga na', ate' nu utsaga ná'alen nigula na' nusanē'-nu bönni' queēnu, gun ca' dul-la' le riguitsaj xibá que yöl-la' nutsaga na'.

*Bönni' dë yöl-la' tsahui' queë', en Lázaro*

<sup>19</sup> Ní'irö bucúdzu'ë didza' Jesús, rnnë':

–Zoë' tu bönni' rilé'enë' yöl-la' tsahui' queë'. Rácuë' lari' xiná, en lari' nazáca'da', ate' yugu' dza rúntica'së' laní, ate' tē'aj tahuë' le banéquini. <sup>20</sup> Zoë' ca' ni' tu bönni' yéchi'do' lë' Lázaro, bönni' rinabë' nu bi unödzej queë', ate' huë'tëzë' rö'ë ra' yu'u queë' bönni' na' rilé'enë' yöl-la' tsahui'. <sup>21</sup> Raca ládxe'ë bönni' yéchi'do' na' gahuë' le bizxaj tu'huöxaj zxani ga rahuë' bönni' na' rilé'enë' yöl-la' tsahui'. Ta'dxinba' ca' bö'cu', en ta'lë'ëba' lu huë' queë' bönni' yéchi'do' na'. <sup>22</sup> Bidxín dza gútië' bönni' yéchi'do' na', ate' gubáz lá'ayi queë' Dios gula'chë'ë lë' tsöjsóalenë' Abraham ga naca lataj lachi queë' Dios. Gútië' ca' bönni' na' bilé'enë' yöl-la' tsahui', ate' bulu'cáché'ë lë' yeru ba. <sup>23</sup> Cate' ni' riguí'i rizáque'ë bönni' na' bilé'enë' yöl-la' tsahui', zoë' lataj quégaca nupa nátigaca, guchisa lahuë', en bilé'enë' Abraham zoë' zi'tu', en dzáguie' Lázaro na' lë'. <sup>24</sup> Ní'irö bë'ë zidzaj didza', rnnë': “Xuza', Abraham, buéchi' ladxi' neda'. Gusól-la' Lázaro quia' para usubisé' xibön në'ë, en udusuhuóalë' lúdxa'a, tu' riguí'i rizáca'a lu guí' ni.” <sup>25</sup> Abraham rë' lë', rnnë': “Zxí'ina', busá ládxa'u ca guca quiu', buzi'u xibé yöl-la' tsahui' tsanni ni' zu' nabanu', pero Lázaro ni, guca queë' yöl-la' yechi', ate' na'a, ruzí' zxönë' Lázaro ni, pero li' riguí'i rizácu'u. <sup>26</sup> Ia'stú, tu ra' guí'a sibi rö', le zoa gatsaj láhui'lö ga ni' zóali' libí'ili', en ga ni zóatu' netu'. Que lë' ni na' nupa nacuá' ni, en ilë'ëni ila'dödi ga zóali' libí'ili', biti' ca' gaca ilunë' ca', en biti' gaca ilida ni nupa nacuá' ni.” <sup>27</sup> Ní'irö bönni' na' bilé'enë' yöl-la' tsahui' rë' lë', rnnë': “Xuza' Abraham, ráta'yua' lo' isöl-lu'u-në' Lázaro tsejë' lidxë' xuza', <sup>28</sup> tu' nacu'ë gáyu'ë bönni' böcha'a ni'. Gusól-lë'ë tsöjenë' liná' lo que le raca ni, para cabí guídigaquie' ca' lataj ga ni riguí'i rizáca'a.” <sup>29</sup> Ní'irö Abraham rë' lë', rnnë': “Dë quégaquie' le buzúajë' lu guichi Moisés, en le bulu'zúajë' lu guichi bönni' gulu'ë didza' uláz queë' Dios. Yugu' didza' quégaquie' na' ralla' ulu'zë náguië'.” <sup>30</sup> Bubi'ë didza' bönni' na' bilé'enë' yöl-la' tsahui', rnnë': “Xuza' Abraham, biti' gaca caní, pero channö ubanë' tu bönni' lu yöl-la' guti, en tsejë' ga na' nacu'ë, ulu'bí'i ládxi'gaquie'.” <sup>31</sup> Abraham rë' lë', rnnë': “Channö cabí tu'zë náguië' didza' bë'ë Moisés, en le gula'nnë' bönni' gulu'ë didza' uláz queë' Dios, biti' ila'yéajlë'ë sal-la' nu ubán lu yöl-la' guti.”

## 17

*Run bönadxi queëru' gunru' ga nu gun dul-la'*  
(Mt. 18:6-7, 21-22; Mr. 9:42)

<sup>1</sup> Jesús rë' yugu' bönni' dá'gaquie' Lë', rnnë':

—Nacuá'tica'sö le tun ga ilún bönachi dul-la', pero bica' bayechi' bönni' na' runë' ga nu gun dul-la'. <sup>2</sup> Dxí'arö gaca queë' bönni' na' runë' caní, nu ugal-la' tu guiøj riyëtu yaga yenë', en tsøjchú'una lë' lu nísado', cáte'lö gunë' ga gun dul-la' nu bi'i néquibi' quia'. <sup>3</sup> Guli'gún chi'i cuinli'. Channö böchi' luzó'o guë' dö' quiu', buzéajni'i-në', en channö ubí'i ládxe'ë, buniti lo lë'. <sup>4</sup> Sal-la' gadxi luzuí tu dza gu'ë dö' quiu', en gadxi luzuí ca' guidé' ga zu', en guíë' li': "Rubí'i ládxa'a", ral-la' uniti lo' lë'.

*Yöl-la' huáca que le réajlë'ëru' Cristo*

<sup>5</sup> Ní'irö yugu' bönni' gubáz queë' Xanru' të' Lë', ta'nnë':

—Ben ga tséajlë'ërötu'-në' Dios.

<sup>6</sup> Xanru' rë' légaquië', rnnë':

—La'tu' naca cuídi'sö yöl-la' réajlë' queëli' Dios, nácasö ca tu xisedo' mostaza, huáca guiëli' yaga zxön ni: "Gucuíta ni, en yöjsóa lu nísado'", ate' gun yaga na' ca rnnali'.

*Le ral-la' gun nu naca huen dxin*

<sup>7</sup> Gunnë' ca' Jesús:

—Channö zoë' tuë' bönni' ladaj libí'ili', en zoë' queë' tuë' bönni' nadó'o rugá'anë'-ba' bëdxi o rulapë', cate' údxi gunë' xichinë' xanë', ¿naru' huëtsë' xanë' lë', innë': "Gudá, guró'o gagu"?" <sup>8</sup> ¡Calëga! Caní guíë' lë': "Bupá'a le gahua'. Guzóa sina' cu'u le gu'aj gahua', ate' tödirö na' huáca gu'aj gagu' li'."

<sup>9</sup> ¿Naru' huëtsë' bönni' nadó'o queë' na': "Xclenu'", tu' benë' ca gunná bé'enë' lë'? Runi neda', biti' gunë' caní. <sup>10</sup> Lësca' caní gaca queëli'. Cate' chinunli' yúgu'të le gunná bé'enë' Dios libí'ili', ral-la' innali': "Nácatu' huen dxin cabí nácatu' lesaca', tu' bénsötu' le run bayudxi guntu'."

*Chië' bönni' té'enë' huë' nudzu' ruzödi*

<sup>11</sup> Tsanni ni' yu'ë Jesús nöza, sa'yéajë' Jerusalén, ridödë' gapa dë yödzödo' nabábagaca luyú Samaria, en luyú Galilea. <sup>12</sup> Cate' guyázië' tu yödzödo', bila'ruajë' dutságagaquië' Lë' chië' bönni' té'enë' huë' nudzu' ruzödi, ate' gula'cu'ë zí'tu'sö, <sup>13</sup> en tu'ë zidzaj didza', ta'nnë':

—¡Jesús, Bönni' Usedi! ¡Buéchi' ladxi' netu'!

<sup>14</sup> Cate' bilé'enë' Jesús légaquië', rë' légaquië':

—Guli'tséaj, guli'tsøjlu'í' cuinli' lógaca bixúz.

Tsanni ni' søjáquië', bulu'huóáquië' dxi'a. <sup>15</sup> Ní'irö tuë' bönni' nútsë'ë ládjagaquië', cate' réquibe'enë' chinuhuóáquië' dxi'a, böajë' ga na' zoë' Jesús, ru'ítica'së' zidzaj didza', rigu'ë Dios yöl-la' ba. <sup>16</sup> Biyéchuë', en busudxín lahuë' lu yu lahuë' Jesús, en rë' Lë': "¡Xclenu'!"

Bönni' ni nababë' Samaria. <sup>17</sup> Ní'irö Jesús rë' lë':

—¿Naru' cabí bulu'huoáquië' dxi'a chië' bönni'? ¿Gazxi nacuá'tsë' ia'zica'rë' bönni' na'? <sup>18</sup> ¿Naru' cabí zoa nu huöda cu'u Dios yöl-la' ba, pero tuzë' bönni' zi'tu' ni?

<sup>19</sup> Ní'irö Jesús gudxë' bönni' na', rnnë':

—¡Guyasa, en böaj lidxu'! ¡Chiböácu' dxi'a tu' réajlë'u neda'!

*Ca idxín le rinná bë'ë Dios*

*(Mt. 24:23-28, 36-41)*

<sup>20</sup> Cate' yugu' bönni' yudo' fariseo ta'nábinë' Jesús bátaxi ralla' idxín le rinná bë'ë Dios, Lë' bubì'ë didza', rë' légaquië':

—Ca idxín le rinná bë'ë Dios, bitì' naca le ilé'eli'. <sup>21</sup> Cuntu nu gaca inná: “¡Ni bidxín!” , o inná: “¡Ni' bidxín!” ¡Buli'yútsöca'! ¡Rinná bë'ë Dios lu icja ládxi'do'gaca bönachi!

<sup>22</sup> Ní'irö Jesús gudxë' yugu' bönni' usëda queë', rnnë':

—Huadxín dza cate' guë'ënili' ilé'eli' dza huöda' neda', Bönni' Guljë' Bönachi, pero bitì' ilé'eli' le. <sup>23</sup> Ila'cuá' nupa ilë libí'ili': “¡Ni zoë'!” , o ila'nná: “¡Ni' zoë'!” Bitì' tséajli' ni', en bitì' tséajlenli' légaquië'. <sup>24</sup> Ca raca cate' rëpi yösa, ruzenì' idá'alö lúzxiba, lësca' caní gaca cate' idxín dza huöda' neda', Bönni' Guljë' Bönachi. <sup>25</sup> Zí'alö ca gaca lë ni, run bayudxi quí'i sáca'da', atë' bönachi dza ni zóaru' na'a ulu'cá'ana neda' cá'asö. <sup>26</sup> Ca na' guca dza ni' zoë' Noé, lësca' caní gaca cate' idxín dza huöda' neda', Bönni' Guljë' Bönachi. <sup>27</sup> Dza ni'te na' gulë'aj gulahuë'. Bulu'tsaga ná'agaquië', en bulu'dödë' zxí'inigaquië' lu yöl-la' rutsaga na' ga bidxintë dza guyázië' Noé lë'e barco zxön na' nazí'i le arca, atë' bidxintë nisa guiöj usuniti yödzölió le busuniti yúgu'të'. <sup>28</sup> Lësca' caní guca dza ni' zoë' Lot. Gulë'aj gulahuë'. Gulá'uë', en gulúti'ë. Gulazë' xiyúgaquië', en gulunë' yugu' yu'u quégaquië'. <sup>29</sup> Cate' bidxín dza na' burúajë' Lot lu yödzö Sodoma, böxaj guí' ca tu nisa guiöj, enca' le ruzéguida' nazí'i le azufre, atë' bulu'suniti yúgu'të'. <sup>30</sup> Lësca' caní gaca cate' idxín dza ulu'í' lahua' neda', Bönni' Guljë' Bönachi.

<sup>31</sup> 'Cate' idxín dza na', channö zoë' tu bönni' ícjo'olö, en dzö'ö le dë queë' lu yu'u na', bitì' ral-la' huötjë' tsöjzxi'ë le dë queë', atë' nu zoa la' guixi', lësca' caní, bitì' ral-la' huöjë' lidxë'.

<sup>32</sup> Guli'sá' ládxi'li' ca guca queënu nigula queë' Lot. <sup>33</sup> Nu bönni' rë'ënë' gun chi'ë yöl-la' na'bán queë', unítië' le, pero bönni' udödë' yöl-la' na'bán queë' ni'a quia', udélé'ë le.

<sup>34</sup> 'Rea' libí'ili': Cate' idxín rëla na', ila'cu'ë chopë' bönni' tsözxön ga tasië', atë' tuë' uduzxi'a-në', en ia'tué' ucá'ana' lë'. <sup>35</sup> Ila'cuá'anu huëtu tsözxön chópanu nigula, atë' tunu uduzxi'a-nu, en ia'tunu ucá'ana'-nu. <sup>36</sup> Ila'cu'ë chopë' bönni' la' guixi', atë' tuë' uduzxi'a-në', en ia'tué' ucá'ana' lë'.

<sup>37</sup> Cate' bila'yönnë' lë ni bönni' usëda queë' Jesús, gula'nábinë' Lë', ta'nnë':

—Xan, ¿gazxi gaca lë ni?

Jesús rē' légaquiē':

—Ga dē tu le nati, ni' ulu'dubi quéziba' bíchulab.

## 18

*Tu nigula uzēbi, en bōnni' ruchi'a rusöröë'*

<sup>1</sup> Ní'irō bucúdzu'ē didza' Jesús, rē' légaquiē' ca run bayudxi ulídzatica'siru'-nē' Dios, en biti' gaca chopá lādxi'ru'. <sup>2</sup> Rnnē':

—Zoē' tu bōnni' ruchi'a rusöröë' tu yōdzō, bōnni' biti' rádxiñē' Dios, en biti' runē' nu bōnni' bal. <sup>3</sup> La' yōdzō ná'asō zóanu tu nigula uzēbi, ate' bidxinnu nigula ni ga zoē' bōnni' ruchi'a rusöröë' na', rnnanu: “Buchi'a busörö le run quia' nu ruá' dō' quia'.” <sup>4</sup> Xidzé biti' gú'unnē' bi gunē' queēnu, pero gudōdi ni' guzá' lādxi'ē, rnnē': “Biti' rádxiñā'-nē' Dios, en biti' runa' nu bōnni' bal, <sup>5</sup> pero tu' rupíxjānu nigula uzēbi ni neda', que lē ni na' uchi'a usöröā'-nu, para cabí guídati'ca'sinu ni, en para cabí tōdi bē' upíxjānu neda'.”

<sup>6</sup> Ní'irō Xanru' rē' légaquiē', rnnē':

—Gulizē' nágalí' ca na' gunnē' bōnni' ruchi'a rusöröë' na', bōnni' biti' náquiē' tsahui'. <sup>7</sup> ¿Naru' cabí uchi'a usöröë' Dios bōnachi gurō cazē' queē', nupa na' tu'lidza Lē' rēla te dza? ¿Naru' huadzétsenē' gácalenē' légaquiē'? <sup>8</sup> Rea' libí'ili': La' uchi'a usörötenē' légaquiē'. Cate' huōda' neda', Bōnni' Guljē' Bōnachi, ¿naru' idzōlida' nupa ta'yéajlē' neda' luyú ni?

*Tu bōnni' yudo' fariseo, en tu bōnni' uquízaj*

<sup>9</sup> Bucúdzu'ē didza' Jesús ca naca quégaquiē' bōnni' tu'béaj tsahui' cuíngaquiē', en tu'cá'anē' cá'asō ia'zíca'rō bōnachi. <sup>10</sup> Gunnē':

—Bila'dxinē' chopē' bōnni' ga naca chila yudo' para ulu'lidzē' Dios. Tuē' bōnni' na' náquiē' bōnni' yudo' fariseo, ate' ia'túē' na' náquiē' bōnni' ruquízajē' lázagaca bōnachi. <sup>11</sup> Guzuínē' bōnni' yudo' fariseo na', en caní bulidzē' Dios, rnnē': “Dios, rea' Li': Xclenu', tu' cabí naca' ca nácagaquiē' ia'zíca'rē' bōnni', nácagaquiē' gubán, en biti' nácagaquiē' tsahui'. Ta'guitsjē' xibá que yōl-la' nutsaga na'. Lēscā' biti' naca' ca bōnni' uquízaj ni. <sup>12</sup> Neda' runa' gubasa chopá luzuí tu' xunu' dza huéaj, en runōdzja' que yudo' tu cō' huéaj tu' chi cō' que yúgu'tē le rata' quia'.” <sup>13</sup> Guzóazē' zítu' bōnni' uquízaj na', en biti' bōázxjanē' ichisa lahuē' uyúē' lúxhiba, pero gudapē' luchu'ē, rnnē': “Dios, buéchi' lādxi' neda', bōnni' dul-la'.” <sup>14</sup> Neda' rea' libí'ili': Bōajē' lidxi' bōnni' uquízaj na', nuhuóáquiē' tsahui' lahuē' Dios, calēga ia'túē' bōnni' ni'. Núti'tēs bōnni' run ba zxōn cuinē', gunē' Dios ga huōta' igulē', pero nu bōnni' rizóē' nōxaj lādxi', gunē' Dios ga gácarē' lo.



*Jesús rulidza tsáhuë'ë-bi' yugu' bí'ido'*

*(Mt. 19:13-15; Mr. 10:13-16)*

<sup>15</sup> Ní'irö bila'dxinë' yugu' bönni', en nigula ga zoë' Jesús, nachë'gaquië'-bi' yugu' bí'ido' quëgaquië' para ixóa në'ë Jesús légaçabi'. Cate' bila'le'enë' yugu' bönni' usëda queë' Jesús lë ni, gula'dil-lë' légaquië'. <sup>16</sup> Ní'irö Jesús bulidzë' yugu' bönni' dá'gaquië' Lë', rnnë':

—Guli'güf'i-bi' lataj ila'dxinbi' bí'ido' ni ga zoa'. Biti' uzága'li' xinözagacabi', tu' gata' quëgaca nupa náçagaca ca bi'i caní'lataj ga rinná bë'ë Dios. <sup>17</sup> Le nácatë rea' libí'ili': Nu çabi' si' lu në'e le rinná bë'ë Dios, ca runbi' tubi' bí'ido', biti' ca' tsaza ga ni rinná bë'ë Lë'.

*Tu bönni' rilé'enë' yöl-la' tsahui'*

*(Mt. 19:16-30; Mr. 10:17-31)*

<sup>18</sup> Tu bönni' unná bë' gunábinë' Jesús, rnnë':

—Bönni' Usedi idú dxi'a. ¿Bizxi ral-la' guna' para idéli'da' yöl-la' na'bán idú?

<sup>19</sup> Jesús rë' lë':

—¿Bizx que rë'u neda': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. <sup>20</sup> Nöz quëzinu' yugu' le gunná bë'ë Dios:

Biti' gunu' dul-la' le riguitsaj xibá que yöl-la' nutsaga na'.

Biti' gútigacu' bönachi.

Biti' cuanu'.

Biti' innió' que luzó'o le çabi' nácatë.

Ben bal xuz xinó'o.

<sup>21</sup> Bönni' na' rë' Jesús, rnnë':

—Yúgu'të lë ni runa' ga gudela' naca' bí'ido'.

<sup>22</sup> Cate' biyönnë' Jesús didza' ni, rë' lë':

—Ia'tú le riyadzaj quiu' gunu'. Bëti' yúgu'të le dë quiu', ate' lë na' si'u bunödzej quëgaca bönachi yechi', ate' gata' quiu' yöl-la' tsahui' yehua' yubá. Ní'irö gudá, gudá' neda'.

<sup>23</sup> Cate' bönni' na' biyönnë' didza' ni, ruhuí'innë', tu' dëda' yöl-la' tsahui' queë'. <sup>24</sup> Cate' bilé'enë' Jesús ca na' ruhuí'innë' bönni' na', rnnë':

—¿Bica' böniga gaca, ila'yaza nupa ta'lé'e yöl-la' tsahui' ga rinná bë'ë Dios! <sup>25</sup> Gáçarö tódiba' böa' nagui yötsi', ca tsázië' tu bönni' rilé'enë' yöl-la' tsahui' ga rinná bë'ë Dios.

<sup>26</sup> Ní'irö nupa bila'yöni didza' ni gula'nná:

—¿Nuzxi çaz gaca ulá, çannö?

<sup>27</sup> Jesús gudxë' légaquië':

—Le biti' gaca ilunë' bönni', huáca gunë' Dios.

<sup>28</sup> Ní'irö Pedro rë' Jesús:

—Buyútsöça, netu' nucá'anatu' yúgu'të le dë queëtu', en dá'atu' Li'.

<sup>29</sup> Ní'irö Jesús rë' légaquië':

—Le nácatë rea' libí'ili', nu bönni' ucá'anë' lidxë', o xuz xinë', o yugu' böchi' zanë', o nigula queë', o yugu' xzí'inë', tu' ru'i ládxë'ë inná bē'ë Dios, <sup>30</sup> bönni' ni huazí'irë' dza ni zóaru' na'a, ate' dza si' za' idéli'në' yöl-la' na'bán idú.

*Jesús rigu'xjö'ë leyúbölö ca si' ilútië' Lë'*

*(Mt. 20:17-19; Mr. 10:32-34)*

<sup>31</sup> Jesús guchë'ë quez queë' idxínnutë' bönni' usëda queë', en rë' légaquië':

—Bulí'yútsöca', ribenru' zéajru' Jerusalén, ga ni' ilaca yúgu'të la nazúajgaca lu guichi ca gula'nnë' bönni' gulu'ë didza' uláz queë' Dios ca ral-la' gaca quia' neda', Bönni' Guljë' Bönachi.

<sup>32</sup> Yugu' bönni' Jerusalén ulu'dödë' neda' lu ná'agaquië' bönni' zi'tu', ate' ulu'titjë' neda', en ulu'lidza zi'ë neda', en ulu'chejë' neda' zxöna'. <sup>33</sup> Ila'guinë' neda', ate' tódíro ni' ilútië' neda', pero cate' gaca tsonna dza ubana'.

<sup>34</sup> Biti' gula'yéajni'inë' bönni' usëda queë' didza' ni, en biti' guléquibe'enë' ca sa'yéaj le ru'ílenë' légaquië' didza' que, tu' naca le cabí sequi' ila'yéajni'inë'.

*Jesús ruúnë' tu bönni' yödzö Jericó nachul-la lahuë'*

*(Mt. 20:29-34; Mr. 10:46-52)*

<sup>35</sup> Cate' chizöa idxinë' Jesús yödzö Jericó, zoë' tu bönni' ni' nachul-la lahuë'. Rö'ë ra' nöza rinabë' nu bi gúnna'sö queë'.

<sup>36</sup> Bönni' ni' biyönnë' ta'dödi bönachi zían ni', ate' gunabë' bizxi na' raca. <sup>37</sup> Bönachi ni' tē lē':

—Jesús, bönni' Nazaret, ridödë' ni.

<sup>38</sup> Ní'irö bönni' na' nachul-la lahuë' bē'ë zidzaj didza', rnnë':

—¡Jesús, xzí'ini xi'sóë' David, buéchi' ladxi' neda'!

<sup>39</sup> Yugu' bönni' nanöru'gaquië' lahuë' Jesús gula'dil-lë' bönni' na' nachul-la lahuë' para usayaj ru'ë, pero lë' zídzejrö bē'ë didza', rnnë':

—¡Xzí'ini xi'sóë' David, buéchi' ladxi' neda'!

<sup>40</sup> Ní'irö guzë' dxiz Jesús ribözë', ate' gunná bé'enë' nu tsöjlidza lë' para idxinë' lahuë'. Cate' bönni' na' nachul-la lahuë' bidxinë' lahuë' Jesús, gunábinë' Jesús lë', rnnë':

<sup>41</sup> —¿Bizxi rē'ënu' guna' quiu'?

Bönni' na' nachul-la lahuë' rnnë':

—Rē'ënida' huóálaj guió'j lahua'.

<sup>42</sup> Jesús rē' lē':

—Chiböálaj guió'j lo'. Chiböácu' tu' réajlë'u neda'.

<sup>43</sup> La' ní'isö bulé'etenë', ate' sa'yéajlenë' Jesús, rigu'ë Dios yöl-la' ba. Lësca' yúgu'të bönachi nacuá' ni', en bila'lé'e lë na' guca gula'gú'u Dios yöl-la' ba.

## 19

*Jesús, en Zaqueo*

<sup>1</sup> Ní'irö guyázië' Jesús yödzo Jericó, en ridödë' lu yödzo na'.  
<sup>2</sup> Zoë' tu bönni' lë' Zaqueo ni', bönni' lo ladjagaquië' bönni' uquízxaj, ate' dë yöl-la' tsahui' queë'.  
<sup>3</sup> Ru'í ládxe'ë bönni' ni il'é'enë' Jesús, pero biti' guca queë' tu' nacua' bönachi zian ni', en náquië' bönni' ga ré'ëdo'.  
<sup>4</sup> Ní'irö carelö yöjnöruë' lógaca bönachi zian na', ate' yöjchenë' tu lu yaga para gaca il'é'enë' Jesús, tu' ral-la' tödë' ni'.  
<sup>5</sup> Cate' bidxinë' Jesús ni', guchisa lahuë' ruyüë' ga na' dxíë' Zaqueo na', en rë' lë':

—Zaqueo, bötjatë lu yaga na', tu' run bayudxi tsöjgá'ana lidxu' na'a.

<sup>6</sup> Ní'irö la' bötjatë' Zaqueo lu yaga, ate' lu yöl-la' rudzeja queë' guchë'ë Jesús lidxë'.  
<sup>7</sup> Cate' bila'lé'e bönachi nacua' ni' lë ni, gula'sí lógaquië' yúgu'të' ta'nnë' queë', ta'nnë':

—Guyázië' Jesús ugá'analenë' bönni' dul-la'.

<sup>8</sup> Ní'irö guzuínë' Zaqueo, en rë' Xanru':

—Xan, buyútsöca'. Gatsaj le dë quia' gu'a quégaca bönachi yechi', en channö bi gudödi bë' buquizzxa' bönachi, ubi'a quégaca bönachi na' tapa cö'tëlö ca'.

<sup>9</sup> Jesús rë' lë':

—Na'a dza ni bidxín yöl-la' rusölá quégaca nupa nacua' yu'u ni, tu' nababë' bönni' ni di'a dza queë' Abraham.  
<sup>10</sup> Bida' neda', Bönni' Guljë' Bönachi, ududilja', en udusölá' nupa nanítigaca.

### *Rucúdzu'ë didza' Jesús que chi cö' dumí*

<sup>11</sup> Tsanni ni' ta'yönnë' didza' ni ru'ë Jesús, rë' légaquië' le rucúdzu'ë didza', tu' chizóa ila'dxinë' yödzo Jerusalén, ate' téquinë' chizóatë ilá' lahui le rinná bë'ë Dios.  
<sup>12</sup> Caní rnnë' Jesús:

—Zoë' tu bönni' lo, sa'yéajë' tu yödzo zi'tu' para si' lu në'ë yöl-la' unná bë', ate' ní'irö huödë'.  
<sup>13</sup> Cate' chizóa tsejë' ni' bulidzë' chië' bönni' huen dxin queë', en bë'ë que queégaquië' tu cö' huéaj dumí, ate' rë' légaquië': "Guli'guílajlen dumí ni tsanni huöda'."  
<sup>14</sup> Yugu' bönni' uládz queë' biti' ta'lé'enë' lë' dxi'a, ate' gula'söl-lë'ë yugu' gubáz quégaquië' ga ni' tsejë', ila'nnë': "Biti' rë'ënitü' inná bé'enë' bönni' ni netu'."  
<sup>15</sup> Ní'irö guzxi' lu në'ë yöl-la' unná bë', ate' budxinë' ladzë'. Cate' bidxinë' ni' gunná bé'enë' nu tsöjlidza yugu' bönni' huen dxin na' budödë' lu ná'agaquië' dumí na', para inözinë' gáca'xi bulu'guílajlenë' le tu tuë'.  
<sup>16</sup> Cate' bönni' zí'alö na' bidxinë' lahuë', rnnë': "Xan, tu cö' dumí quiu' na' chibén icja ia'chí cö' ca'."  
<sup>17</sup> Xanë' na' rë' lë': "Tsahui' benu'. Nacu' huen dxin tsahui'. Tu' dxí'ado' bugunu' dxin láti'do'os na' guta' lu no'o, na'a, guna' ga inná bé'enu' chi yödzo."  
<sup>18</sup> Ní'irö bidxinë' ia'túë' bönni' huen dxin na' lahuë' lë', rnnë': "Xan, tu cö' dumí quiu' na' chibén icja ia'gayu' cö' ca'."  
<sup>19</sup> Xanë' na' rë' ca' lë': "Inná bé'enu' gayu' yödzo."  
<sup>20</sup> Ní'irö bidxinë' ia'túë' lahuë' lë', rnnë': "Xan, ni dë

tu cō' dumí quiu' na'. Ben chi'a le, butúlida' le lari'. <sup>21</sup> Caní bena' tu' rádxida' li', tu' nacu' bōnni' bizxaj. Runu' ca na' ta'nná bōnachi: Ruzi'u le cabí buzú', en rulapu' ga bití' guzu'." <sup>22</sup> Ní'irō xanē' na' rē' lē': "Nacu' huen dxin bití' naca tsahui', Ní'a que didza' bē'u uchi'a usōrōa' li'. ¿Réquibe'enu' naca' bōnni' bizxaj: Ruzi'a le cabí buzóa', en rulapa' ga bití' guza'?" <sup>23</sup> Na'a, ¿bizx que bití' yōjlú'u dumí quia' na' ga gun icja, para cate' huōda', uzi'a le idú len icja na'?" <sup>24</sup> Ní'irō rē' nupa nacua' ni': "Guli'cúa lu nē'ē dumí na', ate' guli'gú'i queē' bōnni' na' dē queē' chi cō' dumí." <sup>25</sup> Légaquiē' tē' lē': "Xan, chidē queē' chi cō' dumí." <sup>26</sup> Ní'irō bubí'ē didza' xángaquiē', rnnē': "Rea' libí'ili': Nu rugún dxi'a dxin le do' dē lu nē'e, ulu'zxōni lādxi'gaca lē' ia'late', pero nu bití' rugún dxi'a dxin le do' dē lu nē'e, ulu'béaj lu nē'e lē' na' guta' lu nē'e." <sup>27</sup> Ca naca quégaquiē' bōnni' ni' bití' ta'lé'enē' neda' dxi'a, en bití' gulē'ennē' inná bé'eda' légaquiē', guli'tsōjzxi' légaquiē' para ídigaquiē' ni, ate' guli'guti légaquiē'."

*Len yōl-la' ba zxōn raziē' Jesús yōdzō Jerusalén*  
(Mt. 21:1-11; Mr. 11:1-11; Jn. 12:12-19)

<sup>28</sup> Cate' budxi gunné' caní Jesús, buguelē'ē xinōzē', sa'yéajē' zaca' yōdzō Jerusalén. <sup>29</sup> Cate' bila'dxinē' gala' ga nacua' yōdzō Betfagé, en yōdzō Betania, ga naca ra' guí'ado' nazí'i le Guí'a Yaga Olivo, gusól-lē'ē Jesús chopē' bōnni' usēda queē', <sup>30</sup> ate' rē' légaquiē':

—Guli'tséaj yōdzōdo' ni' ca dōdilō ga zóaru', en cate' idxinli' ni', tsōjxáca'li'-ba' tuba' búrrodo' nága'ba'ni', búrrodo' na' cuntu nu ribíani lēba'. Guli'sedxi-ba', en guli'duchē'-ba' quia' ni. <sup>31</sup> Channō zoa nu rinábini libí'ili', inná: "¿Bizx que risédxili'-ba'?", ubí'ili' didza' caní innali': "Xanru' riquinnē'-ba'."

<sup>32</sup> Sōjáquiē' bōnni' usēda queē' na' nasól-lē'ē, ate' yōjxáca'gaquiē'-ba' ca na' chigudxē' Jesús légaquiē'. <sup>33</sup> Cate' gula'sedxē'-ba' búrrodo' na', yugu' bōnni' xanba'tē' légaquiē':

—¿Bizx que risédxili'-ba' búrrodo' na'?

<sup>34</sup> Bulu'bi'ē didza', ta'nnē':

—Xanru' riquinnē'-ba'.

<sup>35</sup> Gula'chē'ē-ba' ga na' zoē' Jesús. Cate' chigula'xóē' yugu' lari' tsólá'a quégaquiē' cúdzu'ba' búrrodo' na', bulu'dxiē' Jesús cúdzu'ba' lahui lari' na'. <sup>36</sup> Gapa ral-la' tōdē' Jesús, gula'chiljē' lari' quégaquiē' la' nōza. <sup>37</sup> Cate' chibila'dxinē' gala' ga zoa lidinni que Guí'a Yaga Olivo, lu yōl-la' rudzeja quégaquiē' gula'sí lōgaquiē' yúgu'tē bōnni' dá'gaquiē' Jesús, tu'ē zidzaj didza', ta'gu'ē Dios yōl-la' ba, ní'a quégaca yugu' yōl-la' huáca zxōn bila'lé'enē' benē' Jesús. <sup>38</sup> Ta'nnē':

—¡Yōl-la' ba bōnni' unná bē' ni zē'ē uláz queē' Xanru' Dios!  
¡Yehua' yubá za' le ribequi dxi lādxi'ru'! ¡Yōl-la' ba Dios!

39 Ní'irö yugu' bönni' yudo' fariseo nútsa'gaquië' ladaj bönachi zían ni' tē' Jesús, ta'nnē':

—¡Bönni' Usedi, gudil-la yugu' bönni' usēda quiu'!

40 Bubi'ë didza' Jesús, rē' légaquië':

—Rea' libí'ili': Channö ila'cuá' dxíë' bönni' ni, yugu' guiöj hualuí'i caz zidzaj didza'.

41 Cate' bidxinē' Jesús gala' ra' yödzö na', en rilé'enē' le, ní'irö ribödxē' que, 42 rnnē':

—Raca ládxa'a huanözili' na'a dza le gaca gun ga cuéqui dxi ládxi'li' lahuë' Dios, pero na'a chinagachi' queéli', para cabí ilé'eli' le. 43 Huala'dxín queéli' dza cate' nupa bití' ta'lé'e libí'ili' dxi'a ila'bequi zö'ö idú gásibi'ilö ga zóali', en ila'gú'u libí'ili' lē'alö, ate' yúgu'tē lataj idú gásibi'ilö ilúnlenē' libí'ili' gudil-la.

44 Ulu'quínnejē' zö'ö run chi'i yödzö queéli', en ilútiē' nupa nacuá' lu yödzö ni. Bití' ugá'ana guiöj lahui luzē'e. Yúgu'tē lē ni gaca queéli' tu' cabí gúquibe'eli' dza bidē' Dios buduyúé' libí'ili'.

*Rulatjē' Jesús lö'a yudo'*

*(Mt. 21:12-17; Mr. 11:15-19; Jn. 2:13-22)*

45 Ní'irö guyaziē' Jesús lö'a yudo', en gusí lahuë' rubéajē' ní'ilö yúgu'tē nupa tuti', en nupa to'o ga naca lö'a yudo'. 46 Rē' légaquië':

—Nazúaj lu guichi lá'ayi, rnna: “Lidxa' naca yu'u ga ulu'lidza bönachi Dios”, pero libí'ili' chinunli' le ca tu lídxigaca bönni' gubán.

47 Yugu' dza rusédinē' Jesús bönachi ga naca chila yudo', ate' gula'zóa gula'bö'ë bixúz unná bē', len bönni' yudo' tu'sédinē', en yugu' bönni' lo que lu yödzö ilútiē' Lē'. 48 Bití' bulu'dzölinē' nacxi ilútiē' Lē', tu' idú ládxi'gaca tu'zē nágagaca yúgu'tē bönachi xtídzē'ë.

## 20

*Yöl-la' unná bē' dē lu nē'ë Jesús*

*(Mt. 21:23-27; Mr. 11:27-33)*

1 Tu dza, cate' ni' rusédinē' Jesús bönachi ga naca chila yudo', en riguíxjö'ë didza' dxí'a, bila'dxinē' yugu' bixúz unná bē', en bönni' yudo' tu'sédinē', len bönni' gula tu'zéajni'inē', ga na' zoē', 2 ate' tē' Jesús:

—Gudixjöi'i netu'. ¿Bizxi yöl-la' unná bē' dē lu no'o runu' caní? ¿Nuzxi caz budödi lu no'o yöl-la' unná bē' ni?

3 Bubi'ë didza' Jesús, rē' légaquië':

—Inábida' ca' libí'ili' tu didza', ate' ubí'ili' innali'. 4 ¿Nuzxi gusöl-la' Juan ruquilē' bönachi nisa? ¿Naru' Dios, o bönachi?

5 Gulún xtídzaj'gaquië' la' légacasē' bönni' yudo' na', ta'nnē':

—Channö innaru': Gusöl-lë'ë Dios lë', guié' rë'u: "¿Bizx que bití' guyéajlë'ëli'-në'?" <sup>6</sup> Channö guiëru'-në': Gula'söl-lë'ë yugu' bönni' lë', bönachi lu yödzö ni ulu'laxi' rë'u guiöj, tu' nöziguequi bë'ë didza' Juan na' uláz queë' Dios.

<sup>7</sup> Ní'irö bulu'bi'ë didza', ta'nnë':

—Biti' nöztu' nuzxi na' gusöl-la' Juan.

<sup>8</sup> Ní'irö Jesús rë' légaquië':

—Neda' ca' bití' guía' libí'ili' bi yöl-la' unná bë' rúnida' caní.

*Yugu' bönni' huen dxin bití' nácagaquië' tsahui'*

*(Mt. 21:33-44; Mr. 12:1-11)*

<sup>9</sup> Ní'irö la' gusi lotë' Jesús ru'ilenë' bönachi nacua' ni' didza'. Rucúdzu'ë didza', rnnë':

—Zoë' tu bönni' budë'ë yugu' lubá uva lu xiyúë', ate' budödë' luyú na' lu ná'agaquië' bönni' huen dxin para ilún gatsjë' len lë' le ulu'zi'ë, ate' guyijë' zi'tu' ga ni' bugá'anë' xidzé. <sup>10</sup> Cate' bidxín dza ulu'chibë' uva luyú na', gusöl-lë'ë tuë' bönni' gubáz queë' ga na' nacu'ë huen dxin na' para si'ë uláz queë' que le ulu'zi'ë, pero huen dxin na' gulúndë'ë lë' zi', en bulu'söl-lë'ë lë' cá'asö. <sup>11</sup> Leyúbölö gusöl-lë'ë ia'tué' gubáz queë', ate' légaquië' gulúndë'ë lë' ca' zi', en gulu'ë dö' queë', ate' bulu'söl-lë'ë lë' cá'asö. <sup>12</sup> Leyúbölö gusöl-lë'ë quégaquië' bönni' bunni gubáz queë', ate' bulu'dxië' ca' lë' huë', en bulu'béajë' lë' ní'ilö luyú na'.

<sup>13</sup> Ní'irö guzá' ladxë'ë xani luyú na', gunnë': "¿Nacxi guntsa'? Isöl-la'a xzí'ini caza' nadxí'ida'-bi' quégaquië'. Cate' ila'lé'enë'-bi', nadxi ca' ilunë'-bi' bal." <sup>14</sup> Ní'irö, cate' yugu' bönni' huen dxin na' bila'lé'enë'-bi', gulún xtídzagaquië' la' légacasë', ta'nnë': "Bi'i ni guequi queëbi' luyú ni. Guli'dá, gútiru'-bi', para guequi queëru' le ral-la' guequi queëbi'." <sup>15</sup> Bulu'béajë'-bi' ní'ilö luyú na', en gulútië'-bi'.

'Na'a, ¿nacxi caz gunë' xani luyú na' quégaquië'? <sup>16</sup> Guídë', en gútië' yugu' huen dxin na', ate' udödë' luyú queë' lu ná'agaca bönachi yúbölö.

Cate' bönachi nacua' ni' bila'yöni lë ni, gula'nnë':

—¡Inná Dios bití' gaca caní!

<sup>17</sup> Ní'irö buyúë' Jesús légaquië', rnnë':

—¿Bizxi sa'yéaj lë na' nazúaj lu guichi lá'ayi, rnna:

Guiöj na' gula'ru'unë' bönni' huen zö'ö,

guiöj ni chinaca guiöjlen squin zö'ö?

<sup>18</sup> Núti'tës nu ibixi lahui guiöj ni, quitsaj nu na', ate' nu bönni' tsöjbága' guiöj ni lë', uzxuzxaj lë'.

*Ca naca dumí ta'guixxaj lázagaca bönachi*

*(Mt. 21:45-46; 22:15-22; Mr. 12:12-17)*

<sup>19</sup> La' dza ní'isö, yugu' bixúz unná bë' len bönni' yudo' tu'sédinë' gula'zóa gula'bö'ë ila'zönë' Jesús, tu' téquibe'enë'

gunné' quégaquié' lë na' bucúdu'ë didza', pero guládxiné' bi ilún bönachi zían nacuá' ni'. <sup>20</sup> Ní'irö bulu'yúyenié' Jesús, en gula'söl-lë'ë yugu' bönni' para ulu'béajé' Lë' didza', bönni' ulu'lu'i cuíngaquié' ca bönni' tsahui', para iluné' ga bi inné' Jesús, para gaca ulu'dödé' Lë' lu në'ë bönni' rinná bé'ené' uláz queé' César. <sup>21</sup> Para iluné' caní, gula'nábiné' Jesús, ta'nné':

—Bönni' Usedi, nöztu' rno' le nácatë, en rusédinu' le nácatë, en biti' ruchi'a rusöröu' ca naca le tu'lu'isö lahui bönachi, pero idútë li naca ca rusédinu' xibá queé' Dios. <sup>22</sup> Gudíxjöi' netu'. ¿Naru' run bayudxi quixxaj laztu' queé' César, bönni' Roma rinná bë'ë, o cabí?

<sup>23</sup> Réquibe'ené' Jesús le tē'ënné' iluné' queé', ate' rë' légaquié':

—¿Bizx que rizi' bë'ëli' neda'? <sup>24</sup> Buli'lu'itsöqui' neda' tu dumí ridá. ¿Nuzxi lahui da' lë'e ni, en nuzxi le nazúaj ni?

Bulu'bi'ë didza', ta'nné':

—Queé' César na'.

<sup>25</sup> Ní'irö Jesús rë' légaquié':

—Buli'nódzaj queé' César le nequi queé' César, ate' queé' Dios le nequi queé' Dios.

<sup>26</sup> Biti' guca iluné' ga bi inné' Jesús para gaca ulu'zéguié' Lë' didza' lógaca bönachi zían na', pero bulu'bábiné' ca naca didza' bubí'ë, ate' bulu'sayaj ruá'agaquié'.

*Ca gaca quégaca nupa ulu'bán lu yöl-la' guti*

*(Mt. 22:23-33; Mr. 12:18-27)*

<sup>27</sup> Ní'irö yugu' bönni' yudo' saduceo, nupa na' ta'nná biti' ulu'bán nupa chinátigaca, bila'dxiné' ni', ate' gula'nábiné' Jesús, ta'nné':

<sup>28</sup> —Bönni' Usedi, Moisés buzúajé' queéru' lu guichi, le rna: “Channö gátié' nu bönni', ate' ugá'ananu nigula queé', en channö cuntu nu zoa bi'i queé', ní'irö bi'i böchi'bi' ral-la' sí'ibi'-nu nigula queé' na', para uzóabi' bi'i queébi' böchi'bi' na' gútibi'.” <sup>29</sup> Gula'cuá'abi' gadxi bi'i bönni' nácagacabi' böchi'bi', ate' bi'i zí'alö na' butsaga ná'alénbi' bi'i nigula, en gútibi', biti' zóabi' bi'i queébi'. <sup>30</sup> Ní'irö bi'i buropi na' butsaga ná'alénbi'-nu nigula na', ate' gútibi' ca' bi'i ni, biti' zóabi' bi'i queébi'. <sup>31</sup> Butsaga ná'alénbi'-nu bi'i bunny na', ate' la' tuz ca gulunbi' igádxitébi', ate' gulátibi', biti' zóabi' bi'i quégacabi'.

<sup>32</sup> Ga búdxité, gútinu ca' nigula na'. <sup>33</sup> Na'a, cate' ulu'bán nupa chinátigaca, ¿núzxilöbi' guéquinu nigula na' queébi', tu' bulu'tsaga ná'alénbi'-nu igádxitébi'?

<sup>34</sup> Ní'irö bubí'ë didza' Jesús, rë' légaquié':

—Tu'tsága ná'agaca bönachi dza ni zóaru' na'a, en tu'nödzjé'-bi' xí'inigaquié' para ulu'tsaga ná'agacabi'. <sup>35</sup> Na'a, nupa nácagaca lesaca' ulu'bán lu yöl-la' guti, en tsöjcuá' yödzölió sí' gata', biti' ilún yöl-la' rizóalen nigula, en biti' ulu'tsaga

ná'agaca. <sup>36</sup> Caní gaca, tu' cabirö ilati nupa na' ulu'bán lu yöl-la' guti, pero ilácagaca ca nácagaquië' gubáz lá'ayi queë' Dios, en ilácagaca zxí'ini cazë' Dios. <sup>37</sup> Ca na' ral-la' ulu'bán nupa chinátigaca, ruluí'inë' rë'u Moisés caz ga na' nazúaj lu guichi ca naca que yaga yötsi' régui, ga ni' ru'ë didza' Xanru', rnnë' náquië' Dios queë' Abraham, en Dios queë' Isaac, en Dios queë' Jacob. <sup>38</sup> Dios náquië' Dios, calëga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të bönachi, sal-la' gulati luyú ni.

<sup>39</sup> Ní'irö bulu'bi'ë didza' bal-lë' bönni' yudo' usedi, ta'nnë':  
—Bönni' Usedi, dxí'ado' gunnó'.

<sup>40</sup> Bítirö bulu'rúguinë' ila'nábinë' Lë' didza'.

*¿Nuzxi zxí'ini náquië' Cristo?*

*(Mt. 22:41-46; Mr. 12:35-37)*

<sup>41</sup> Ní'irö Jesús rë' légaquië':

—¿Nacxi caz na' ta'nnë': "Cristo náquië' zxí'inë' David"?

<sup>42</sup> David caz bë'ë didza' le nazúaj lu guichi lá'ayi ga nazúajgaca salmo, le rnna:

Xanru' Dios gudxë' Xana':

"Gurö'i cuita lë'a ibëla

<sup>43</sup> cate' gunra' ga ulu'zechu zxíbigaca lo' nupa ta'dá'baga' Li'."

<sup>44</sup> David caz na' gunné' queë' náquië' Xanë'. ¿Nacxi caz naca, rnnali' libí'ili' náquië' zxí'inë'?

*Jesús ruzégui'ë diza' bönni' yudo' tu'sédinë'*

*(Mt. 23:1-36; Mr. 12:38-40; Lc. 11:37-54)*

<sup>45</sup> Tsanni ni' yúgu'të bönachi nacua' ni' tu'zë nágagaca Jesús, rë' yugu' bönni' usëda queë':

<sup>46</sup> —Guli'gún chi'i cuinli' quégaquië' bönni' yudo' tu'sédinë', tu' ta'yaza ládxi'gaquië' ta'dë' nácugaquië' lari' tunna, en té'ënnë' ulu'lidza bönachi légaquië' zxön gapa naca lu yë'ëyi, en ta'yaza ládxi'gaquië' ca' ta'bö'ë lataj lo gapa tu'dubë' tu'sédë' queë' Dios, en gapa ta'bö'ë tahuë'. <sup>47</sup> Ta'gúë' lídxigacanu nigula uzëbido', ate' para ulu'lu'i tsahui' cuíngaquië', xidzé tu'lidzë' Dios. Yugu' bönni' ni, yénni'tërö gunë' Dios ga ila'guí'i ila'záquië'.

## 21

*Gun le gulú'unu tu nigula yechi' lahuë' Dios*

*(Mr. 12:41-44)*

<sup>1</sup> Ga na' zoë' Jesús chila yudo', guchisa lahuë', en rilé'enë' yugu' bönni' dë yöl-la' tsahui' quégaquië', ta'gu'ë dumí lu guí'ina que dumí gun que yudo'. <sup>2</sup> Bilé'enë' ca' tu nigula yechi' uzëbido', rigú'unu chopá dumí lásido', le nazáca'gaca láti'do'os. <sup>3</sup> Rnnë' Jesús:



—Le nácatè rea' libí'ili', tu le zxöntërö gulú'unu nigula yechi' uzé'bido' ni ca ia'zica'rö bönachi na' ta'gu'ë dumí. <sup>4</sup> Yúgu'të', tsca le nadödi bē' dē quégaquiē', gula'gu'ë dumí que yudo', pero nigula ni, lu yöl-la' yechi' queënu gulú'unu idútē le dē queënu, le ral-la' gáhuinu.

*Rigúxjö'ë Jesús ca ulu'sunítie' yudo'*  
(Mt. 24:1-2; Mr. 13:1-2)

<sup>5</sup> Nacuá' ni' nupa tu'i didza' ca naca que yudo' na', ca na' nazí'i biquitaj que, yugu' guiöj nazácalē'egaca, en yugu' gundo' nátagaca lachi, ate' Jesús rē' légaquiē', rnnē':

<sup>6</sup> —Yúgu'tē lē ni ril'é'eli', huadxín dza cate' bíti'rö ugá'ana guiöj lahui luzé'e ni, tu' ulu'suniti bönachi yudo' ni.

*Le ilaca bē' cate' si' idxín dza údxi*  
(Mt. 24:3-28; Mr. 13:2-23)

<sup>7</sup> Ní'irö gula'nábinē' Jesús, ta'nnē':

—Bönni' Usedi, ¿bátaxi gaca lē ni? ¿Bizxi gaca bē' chizóa gaca caní?

<sup>8</sup> Bubi'ë didza' Jesús, rnnē':

—Guli'gún chi'i cuinli', para cabí nu si' ye'e libí'ili', tu' ila'lá'gaquiē' bönni' zían, en ila'z'i lágaquiē' ca lea' neda', ila'nnē' nátagaquiē' Cristo, en ila'nnē': “Chizá' gala' dza údxi.” Neda' rea' libí'ili': Biti' tséajlenli' légaquiē'. <sup>9</sup> Cate' yönili' raca gudil-la, en ta'dá'baga' bönachi yúlahui', bití' gadxi idzöbili', tu' run bayudxi ilaca le caní, pero bití' zúitēni dza údxi.

<sup>10</sup> Ní'irö rē' ca' légaquiē':

—Til-la tu yödzö len ia'tú yödzö, ate' bönachi tu ga nu rinná bē' ila'díl-lalen bönachi ia'tú ga nu rinná bē'. <sup>11</sup> Tödígaca budó' zxu', ate' zían lataj gaca gubín, en ilatsaj yödzöhuē' zxon. Ila'lá' lahui lúzxiba le ilún gadxi bönachi, en le ilaca bē'.

<sup>12</sup> 'Zí'atēlö cate' si' ilaca lē ni, ila'zön bönachi libí'ili', en ila'bía ládxi'gaca libí'ili'. Ila'ché'ë libí'ili' gapa tu'dubē' tu'sedē' queē' Dios para ilútiē' libí'ili', en ila'gu'ë libí'ili' lidxi guíē. Ila'ché'ë libí'ili' lógaquiē' bönni' ta'nná bē'ë, en lógaquiē' bönni' lo, tu' dá'ali' neda'. <sup>13</sup> Gaca caní queēli' para séqui'li' gunli' ba nalí quia' neda'. <sup>14</sup> Tsutsu guli'gún ládxi'li', para cabí cuéqui ícjali' zí'alö nacxi innali' uláz queēli', <sup>15</sup> tu' gunna' queēli' didza' ubí'ili', en yöl-la' réajni'i, para cabí gaca ulu'cul-lē' libí'ili', en para cabí gaca bi ila'nnē' que xtídza'li' bönni' ni' bití' ila'lé'enē' libí'ili' dxi'a. <sup>16</sup> Ní'irö xuz quézili' ulu'dödē' libí'ili', en cá'anqueze yugu' bönni' böchi' quézili', en yugu' di'a dza que quézili', en yugu' böchi' luzé'e quézili', ate' ilútiē' bál-lali'. <sup>17</sup> Yúgu'tē bönachi ulu'zóa libí'ili' tsölá'alö tu' dá'ali' neda', <sup>18</sup> pero bití' initi nitú guitsa' ícjali'. <sup>19</sup> Channö ugá'anali' tsutsu, idéli'li' yöl-la' na'bán idú.

<sup>20</sup> 'Cate' ilé'eli' bönni' rōjáquië' gudil-la nagú'ugaquië' lë'a Jerusalén, inōzili' chibidxín dza iníti yōdzō ni. <sup>21</sup> Ní'irō nupa nacuá' luyú Judea ral-la' ila'zxunnaj ni, en tsōjaca gapa naca guí'ado', ate' nupa nacuá' lu yōdzō ni ral-la' ila'rúaj ni, ate' nupa nacuá' la' guixi', biti' ral-la' ulu'dxín lu yōdzō ni. <sup>22</sup> Yugu' dza ni' Dios gunë' xíguia' nupa nacuá' yōdzō ni para gaca yúgu'të le nazúaj lu guichi lá'ayi ca ral-la' gaca quégaquië'. <sup>23</sup> Cate' idxín dza ni', bica' bayechi' yugu' nigula nuá'gacanu-bi' bí'ido' si' ilaljbi', en nigula tu'gádxí'nu-bi' bí'ido', tu' ila'guí'i ila'záca'da' bōnachi nacuá' ni', ate' Dios gúndë'ë bōnachi ni' xíguia'. <sup>24</sup> Ilátie' zianë' lu gudil-la na', ate' ila'chë'ë ia'bal-lë' nadzúngaquië' ga ila'dxinë' idútë yōdzōlió, ate' yōdzō Jerusalén ni, ulu'léaj ulu'libë' le bönni' zi'tu', cate' izá'arō dza quégaquië'.

*Le ilaca bë' si' huödë' Bönni' Guljë' Bōnachi*  
(Mt. 24:29-35, 42-44; Mr. 13:24-37)

<sup>25</sup> Gunnë' ca' Jesús:

—Ni'irō ila'cuá' le ilaca bë' lu gubidza, en lu beo', en yugu' lu bōlaj lúzxiba, ate' luyú ni ulu'chixi bōnachi, en iládxiguequi, tu' yōn chí'i guziú' yu que nísado', en que le riyasa ridxía nisa na'. <sup>26</sup> Ulu'dú ládxi'gaca lu yöl-la' radxi quéguequi tu' ila'zá ládxi'gaca quégaca le ral-la' ilaca lu yōdzōlió, en ila'zxizi le nalá'gaca lúzxiba. <sup>27</sup> Ní'irō ila'lé'enë' neda', Bönni' Guljë' Bōnachi, guída' lu bōaj lúzxiba, dë lu na'a yöl-la' unná bë', ate' ilá' lahui yöl-la' zxōn quia'. <sup>28</sup> Cate' isí lo ilaca lë ni, buli'tipa ládxi'li', en guli'chisa loli', tu' chizóa udxina' neda', para huóá'ua' libí'ili'.

<sup>29</sup> Jesús gudxë' ca' légaquië' tu le bucúdzu'ë didza', rnnë':

—Buli'yútsöca' ca raza que yaga higo, en que bíti'tës yaga yúbölö. <sup>30</sup> Cate' rilé'eli' ta'lén ni'a në'e huë'ënido', nōz quézili' chizá' gala' cusu ba. <sup>31</sup> Lësca' caní, cate' ilé'eli' chitaca yugu' lë ni, inōzili' chizá' gala' dza idinná bë'ë Dios luyú ni.

<sup>32</sup> 'Le nácatë rea' libí'ili', biti' ilátigaca bōnachi ila'cuá' dza ni' cate' ilaca yúgu'të lë ni. <sup>33</sup> Ila'dödi que lúzxiba, en que luyú ni, pero xtídza'a, biti' tōdi cá'asö, tu' idxín caz ca rnna.

<sup>34</sup> 'Guli'gún chí'i cuinli' para cabí guí'ili' lataj tsaza icja ládxi'do'oli' le gun ditaj libí'ili', lë na' naca yöl-la' rágulë'e, en yöl-la' rizudxi, en yöl-la' ruúbi ruguí'i, para cate' idxín dza ni', cabí sóali' niti ladxi', <sup>35</sup> en para cabí gaca queëli' ca tu le rizōn bōnachi, ca naca le gaca quégaca yúgu'të bōnachi nacuá' idútë yōdzōlió. <sup>36</sup> Que lë ni na', guli'sóa ban ladxi', en buli'lídzatica'së' Dios, para gaca uláli' lu lë na' ral-la' ilaca, en para cabí utuí'ili' cate' idxinli' lahua' neda', Bönni' Guljë' Bōnachi.

<sup>37</sup> Lahui' dza rizóë' Jesús chila yudo', rusédinë' bōnachi, ate' chí'i dzö'ölö rirúajë' ni', en rejë' lu guí'ado' nazí'i le Guí'a Yaga

Olivo. <sup>38</sup> Yugu' zila bila'dxín yúgu'të bönachi ga zoë' Jesús chila yudo' para ulu'zë náagaca xtídzë'ë.

## 22

*Tun xtídzagaquië' ilútië' Jesús*

*(Mt. 26:1-5, 14-16; Mr. 14:1-2, 10-11; Jn. 11:45-53)*

<sup>1</sup> Cate' chizóa idxín laní cate' tahuë' yöta xtila cabí nazí'i cúa zi que, nazí'i le Pascua laní na', <sup>2</sup> bulu'dubë' yugu' bixúz unná bë' len bönni' yudo' tu'sédinë'. Ta'zóa ta'bö'ë ilútië' Jesús, pero bití' gula'zéquí'në' tu' tádxiné' bi ilún bönachi.

<sup>3</sup> Ní'irö Satanás tu' xihui' yöjtsaga Judas. Judas lë' ca' Iscariote, en nababë' idxínnutë' gubáz nasól-lë'ë Cristo. <sup>4</sup> Guyijë' Judas na', yöjë'lenë' didza' yugu' bixúz unná bë', en bönni' dë lu ná'agaquië' que yudo', nacxi gunë' para udödë' Jesús lu ná'agaquië'. <sup>5</sup> Bulu'dzéjanë' bönni' yudo' na', en gula'z'í lu ná'agaquië' ulu'nödzjë' queë' dumí. <sup>6</sup> Raza ládxe'ë Judas lë ni, ate' rizóa ribö'ë udödë' Jesús lu ná'agaquië' bagáchi'sö.

*Le ráguru' le rusá' ládxi'ru' ca gútië' Xanru'*

*(Mt. 26:17-29; Mr. 14:12-25; Jn. 13:21-30; 1Co. 11:23-26)*

<sup>7</sup> Bidxín dza na' tahuë' yöta xtila cabí nazí'i cúa zi que, cate' ral-la' ilútië'-ba' bö'cu' zxila' le tahuë' dzö' Laní Pascua. <sup>8</sup> Jesús gusól-lë'ë Pedro, en Juan, rnnë':

—Guli'tséaj, guli'tsöjpá'a queëru' le gáguru' dzö' Laní Pascua.

<sup>9</sup> Të' Lë':

—¿Gazxi rë'ënu' tsöjpá'atu' queëru'?

<sup>10</sup> Jesús rë' légaquië', rnnë':

—Buli'yútsöca', cate' tsú'uli' lu yödzö ni, irúajë' tu bönni' dutságuië' libí'ili', søjnu'ë tu rö'ö nisa. Guli'tséajlenë' ga idxíntëli' yu'u ga tsázië'. <sup>11</sup> Guli'guíë' xan yu'u na': "Bönni' Usedi rë' lí: ¿Gazxi zoa yu'u laní ga gágulena' yugu' bönni' usëda quia' dzö' Laní Pascua?" <sup>12</sup> Ní'irö uluí'inë' libí'ili' tu yu'u zxön xitsá' ga ni' chinabá'a. Buli'pá'a ni' le gáguru'.

<sup>13</sup> Ní'irö yöjáquië', en yöjxáca'gaquië' ca na' chigudxë' Jesús légaquië', ate' bulu'pë'ë ni' le ilahuë' dzö' Laní Pascua.

<sup>14</sup> Cate' bidxín dzö' na', gurö'ë Jesús ga ilahuë', ate' bönni' gubáz queë' na' gula'bö'lenë' Lë' tsözxön. <sup>15</sup> Ní'irö Jesús rë' légaquië':

—Gúcada' ládxa'a gágulena' libí'ili' tsözxön xtsö' ni zí'atëlö cate' si' qui'i saca'a, en gátia'. <sup>16</sup> Rea' libí'ili': Bítirö gahua' lë ni cate' idxinrö dza gaca le rulu'isö xtsö' ni ga ni' rinná bë'ë Dios.

<sup>17</sup> Gudélë'ë Jesús tu zxíga'do', en gudxë' Dios: "Xclenu'." Ní'irö rë' légaquië':

—Guli'sí' lë ni, en guli'gu'aj lati' huéaj, <sup>18</sup> tu' rea' libí'ili': Bítirö gu'ja' xisi uva cate' idxinrö le rinná bë'ë Dios.

19 Ní'irō gudélë'ë yōta xtila, en gudxë' Dios: "Xclenu'." Gudōdi ni' buzzuxjë' le, en bē'ë que queëgaquië', rnnë':

—Lë ni naca idütë le naca' le rudōda' uláz queëli'. Guli'gún caní para usá ládxi'li' neda'.

20 Cate' budxi gulahuë', lësca' caní bē'ë didza' que zxíga'do' na', rnnë':

—Zxíga'do' ni rulu'í ca naca didza' cubi rucá'ana tsahui', ate' rōn quia' run tsutsu le, rōn na' ilalaj ni'a queëli'.

21 'Na'a, bōnni' na' udödë' neda' lu ná'agaca bōnachi rō'ë rágulenë' neda' tsözxōn. 22 Le nácatë huayija' ga ilútië' neda', Bōnni' Guljë' Bōnachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bōnni' na' udödë' neda'.

23 Ní'irō gula'sí lógaquië' ta'nábinë' Lë' tu tuë', ta'nnë':

—¿Núzxilōtu' nu gun caní?

*Tu'í xtída'gaquië' núzxilōgaquië' gáquië' lo*

24 Ní'irō gulu'ë didza' la' légacasë' núzxilōgaquië' idéli'në' lataj lo. 25 Jesús gudxë' légaquië':

—Yugu' bōnni' unná bē' tu'gunë' dxin yōl-la' unná bē' quégaquië', ta'nná bé'enë' bōnachi, ate' nupa ni dë lu ná'agaca yōl-la' unná bē', légaquië' bōnni' tácalen. 26 Libí'ili' biti' ral-la' gunli' caní, pero nu naca lo ládjali' ral-la' gaca ca nu naca cuídí'tërō, ate' nu rinná bē' ral-la' gaca ca nu run dxin quéguequi luzé'e. 27 ¿Núzxilō na' nácarō lo, nu na' rō'ō ragu, o nu rupá' la' huagu? ¿Naru' calëga nu na' rō'ō ragu nácarō lo? Neda' zóalena' libí'ili' ca nu rupá' la' huagu.

28 'Libí'ili' ni guzóaleni' neda' cate' ni' bi guca quia', yugu' le gula'zí' bē' neda'. 29 Que lë ni na' udōda' lu ná'ali' tu ga inná bē'ëli', ca na' benë' Xuza', budödë' lu na'a ga inná bē'a neda'.

30 Caní guna' para gaca cō'ōli', en guí'aj gágulenli' neda' ga ni' inná bē'a, ate' cō'ōli' xilataj cázali' ga uchi'a usōrōli' idxinnu cō' zxi'ini xi'sóë' Israel.

*Rnnë' Jesús innë' Pedro biti' núnbë'ë Lë'*

*(Mt. 26:31-35; Mr. 14:27-31; Jn. 13:36-38)*

31 Gunnë' ca' caní Xanru':

—Simón, Simón. Buyútsöca'. Chigunaba Satanás tu' xihui' libí'ili', para urixi udōdi libí'ili' ca nu rurixi rudōdi zxoá' xtila, 32 pero chibulidza'-në' Dios, en gunábida' Lë' gácalenë' li', para cabí údxi udú yōl-la' réajlë' quiu' neda'. Na'a, cate' huóácu' quia', butipa ládxi'gaquië' böchi' luzó'o.

33 Pedro rë' Lë':

—Xan, chizóa' sá'lana' Li', calëgasō tseja' lidxi guíë, pero lësca' gátilena' Li'.

34 Jesús rë' lë':

—Pedro, rea' li': Zí'alö cödxiba' böra na'a, chigudá'bagu'u tsonna luzuí, innó' cabí núnbè'u neda'.

*Le benë Jesús cate' chizóa ilútië Lë*

<sup>35</sup> Jesús gunábinë légaquië', rnnë':

—Cati' gusöl-la'a libí'ili' cabí nuá'ali' yöxaj yöta, en calëga buzudi dumí, en calëga chopa cö' xiráchuli', ¿naru' bi biyadzaj queëli'?

Légaquië' ta'nnë':

—Biti' bi.

<sup>36</sup> Ní'irö rë' légaquië':

—Na'a, nu dë yöxaj yöta que ral-la' guá' le, ate' lësca' caní ral-la' gun nu dë que buzudi dumí, ate' nu bití' dë que guié tuchi' ral-la' gutí' lari' rixóa yeni, en si' tu guié tuchi'. <sup>37</sup> Rea' libí'ili': Run bayudxi gaca quia' lë na' nazúaj lu guichi lá'ayi, rnna: “Gulunë' queë' ca tunë' quégaca nupa tua' dö'”, ate' ilaca yúgu'të le nazúajgaca lu guichi ca ral-la' gaca quia'.

<sup>38</sup> Ní'irö légaquië' ta'nnë':

—Xan, ni dë chopa guié tuchi'.

Lë' rë' légaquië':

—Chinaca.

*Jesús rulidzë Dios la' yëla Getsemani*

(Mt. 26:36-46; Mr. 14:32-42)

<sup>39</sup> Ní'irö birúajë' Jesús, en ca run cazë' sa'yéajë' lu Guía Yaga Olivo, ate' yugu' bönni' usëda queë' sójacalenë' Lë'. <sup>40</sup> Cate' bila'dxinë' ni', Jesús rë' légaquië', rnnë':

—Buli'lídzë' Dios, inábili'-në' cabí gata' lataj si' bë' tu' xihui' libí'ili'.

<sup>41</sup> Ní'irö Jesús guzë'ë ga na' nacu'ë, en gudödë' ia'lati' tsca ga ridxín tu guíoj rirú'uniru', ate' ni' buzóa zxibë', en rulidzë' Dios. <sup>42</sup> Rnnë':

—Xúz, channö rë'ënu', bucuása ga zoa' lë na' ral-la' quí'í saca'a, pero calëga ca rë'ënda' neda', pero ca rë'ënu' Li' gunu'.

<sup>43</sup> Ní'irö buluí' lahuë' gubáz lá'ayi queë' Dios, zë'ë yehua' yubá, ate' butipë' ládxë'ë Jesús. <sup>44</sup> Lu yöl-la' risëbi ladxi' queë', idú ládxë'ë Jesús bulidzë' Dios, ate' nisa yösa queë' guca ca rön raba' luyú.

<sup>45</sup> Cate' budxi bulidzë' Dios, guyasë', en böajë' ga na' nacu'ë bönni' usëda queë', ate' duxáquië' légaquië' tásië' tu' tu'huí'ingaquië'. <sup>46</sup> Ní'irö Jesús rë' légaquië':

—¿Rásitsali'? ¡Guli'chasa, en buli'lídzë' Dios! Inábili'-në' cabí gata' lataj si' bë' tu' xihui' libí'ili'.

*Ta'zönë Jesús*

(Mt. 26:47-56; Mr. 14:43-50; Jn. 18:2-11)

<sup>47</sup> Tsanni ni' ru'ë didza' Jesús, la' bila'dxintë' bönni' zían ni', ate' Judas, bönni' na' nababë' idxínnuë' bönni' usëda queë'

Jesús dzáguië' légaquië', ate' nanöruë' lógaquië' bönni' zían na'. Gubíguië' ga zoë' Jesús para utsaga lahuë' Lë'. <sup>48</sup> Ní'irö Jesús rë' lë':

—Judas, ¿naru' rudöditso' caní neda', Bönni' Guljë' Bönachi, rutsaga lo' neda'?

<sup>49</sup> Cate' yugu' bönni' na' nacuá'lenë' Jesús bila'lé'enë' ca na' raca queë' Lë', të' Lë':

—Xan, ¿naru' güí'itu' légaquië' guíë tuchi'?

<sup>50</sup> Tuë' bönni' usëda queë' Jesús benë' huë' guídi náguië' bönni' huen dxin queë' bixúz lo. Burixë' guídi náguië' ibëla. <sup>51</sup> Jesús rnnë':

—Chinaca na'a. Tsca' gaz.

Gudanë' Jesús guídi náguië' bönni' huen dxin na', en bunë' le. <sup>52</sup> Ní'irö rë' yugu' bixúz unná bë', en bönni' dë lu ná'agaquië' que yudo', en bönni' gula tu'zëajni'inë', bönni' na' biti' ta'lé'enë' Lë' dxi'a, rnnë':

—¿Narúajtsali' nuá'ali' guíë tuchi', en yaga para sönli' neda' ca runli' rizönli'-në' gubán? <sup>53</sup> Yugu' dza guzóalen caza' libí'ili' chila yudo', ate' biti' bi benli' quia', pero na'a chibidxín dza queëli', le naca dza dë lu në'e nu na' zoa lataj chul-la.

*Rnnë' Pedro: "Biti' núnbë'a-në' Jesús"*

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

<sup>54</sup> Ní'irö gula'zönë' Jesús, en gula'chëë' Lë' ga na' bulu'sudxinë' Lë' lidxë' bixúz lo. Pedro yöjnahuë' Jesús zí'tu' zí'tu'sö. <sup>55</sup> Cate' ni'a në'ë bixúz lo chigula'béquië' guí' lö'a lidxë' bixúz lo na', gula'bö'ë idú gásibi'ilö ra' guí' na', ate' Pedro gurö'lenë' légaquië' tsözxön. <sup>56</sup> Cate' tubi' bi'i nigula huen dxin bilé'ebi'-në' Pedro, ni' rö'ösë' ra' guí', buyubi' lë', en rnnabi':

—Bönni' ni dë'ë ca' Jesús.

<sup>57</sup> Gudá'baguië' Pedro, rnnë':

—Nigúla, biti' ca' núnbë'a-në' bönni' na'.

<sup>58</sup> Ia'lati' gudzé ia'tué' bönni' bilé'enë' Pedro, ate' rnnë':

—Li' do'o ca' légaquië'.

Pedro gunné':

—Bönni', calëga neda'.

<sup>59</sup> Ia'látisö gudzé, gunné' ia'tué' bönni':

—Le nácatë bönni' ni dë'ë Jesús, tu' náquië' bönni' Galilea.

<sup>60</sup> Ní'irö Pedro gunné':

—Bönni', biti' nözda' bizxi na' ru'u didza' que.

Tsanni ni' ru'ë didza' ni, la' gurödxitëba' böra. <sup>61</sup> Ní'irö buécjë' Xanru', en ruyúë' Pedro, ate' yöjnenë' Pedro xtídzë'ë Xanru', ca na' gurdxë' lë': "Zí'alö cödxiba' böra na'a, li'

chigudá'bagu'u tsonna luzuí, innó' biti' núnbē'u neda'." 62 Burúajē' Pedro ní'ilo, ate' rōn caz gurōdxē'.

*Tu'titjē' Jesús*

(Mt. 26:67-68; Mr. 14:65)

63 Yugu' bōnni' na' nazōngaquiē' Jesús bulu'titjē' Lē', ate' gula'guiné' Lē'. 64 Ní'irō bulu'sayjē' lahuē' Jesús, ate' gula'gápē'ē lahuē', en gula'nábinē' Lē', ta'nnē':

—¿Gunnēya'atsōca! ¿Nuzxi na' gudapa' Li'?

65 Ziánrō ca' gula'nnē' queē' le gulu'ē dō' queē'.

*Ridxinē' Jesús lógaquiē' bōnni' yudo' tu'chi'a tu'söröē'*

(Mt. 26:59-66; Mr. 14:55-64; Jn. 18:19-24)

66 Cate' chizá' reni' dza na', bulu'dubē' bōnni' gula tu'zéajni'inē' bōnachi judío len yugu' bixúz unná bē', en bōnni' yudo' tu'sédinē', ate' gula'ché'ē Jesús lógaquiē' bōnni' yudo' tu'chi'a tu'söröē', ate' gula'nábinē' Lē', 67 ta'nnē':

—Gudíxjōi' netu'. ¿Naru' nactso' Li' Cristo?

Jesús rē' légaquiē':

—Channō guá' libí'ili' naca' Cristo, biti' tséajlē'ēli' neda', 68 en channō inábida' libí'ili' tu didza', biti' ubí'ili' didza', en biti' usanli' neda'. 69 Na'a isí lo, neda', Bōnni' Guljē' Bōnachi, cō'a cuita lē'ē ibēla Dios, nápatērē' yōl-la' unná bē'.

70 Gula'nábinē' Lē' yúgu'tē', ta'nnē':

—¿Naru' nactso' Li' Zxí'inē' Dios?

Lē' gudxē' légaquiē':

—Le nácasō rnnali'.

71 Ní'irō ta'nnē':

—¿Núzxirō naquíniru' nu gun ba nalí queē'? La' rē'usō chibiyōniru' didza' ru'ē.

## 23

*Ridxinē' Jesús lahuē' Pilato, bōnni' rinná bē'ē uláz queē' César*

(Mt. 27:1-2, 11-14; Mr. 15:1-5; Jn. 18:28-38)

1 Ní'irō gulazuiné' yúgu'tē' bōnni' zían ni', ate' gula'ché'ē Jesús lahuē' Pilato, 2 ga ni' gula'sí lógaquiē' tu'zéguiē' Lē' didza', ta'nnē':

—Bōnni' ni, budzōlitu' ca runē'. Runē' ga ta'dá'baga' bōnachi uláz queē'tu' yúlahui', en ruzáguē'ē xinōzigaca nupa ta'guízxaj laz ruquízxjē' César, en rnnē' lē' cazē' náquiē' Cristo, bōnni' ralla' inná bē'ē.

3 Ní'irō Pilato gunábinē' Jesús, rnnē':

—¿Naru' nacu' Li' nu inná be'e bōnachi judío?

Bubi'ē didza' Jesús, rnnē':

—Le nácasō rnnō'.

4 Ní'irō Pilato gudxē' yugu' bixúz unná bē', en bōnachi nacuá' ni', rnnē':

—Biti' bi rudzólida' le naca xíguia' nunë' bönni' ni.

<sup>5</sup> Ní'irö gulunrë' tsutsu xtídza' gaquië', ta'nnë':

—Runë' ga tu'tsatsa bönachi, en rusédinë' caní bönachi idú luyú Judea. Gusí lahuë' benë' caní luyú Galilea ga ridxintë runë' ca' ni.

*Ridxinë' Jesús lahuë' Herodes, bönni' rinná bë'ë luyú Galilea*

<sup>6</sup> Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquië' channö náquië' Jesús bönni' Galilea.

<sup>7</sup> Cate' gunözinë' nababë' Jesús ga ni' rinná bë'ë Herodes, gusöl-lë'ë Lë' lahuë' Herodes na', tu' zoë' ca' Herodes Jerusalén yugu' dza na'. <sup>8</sup> Cate' Herodes na' bilé'enë' Jesús, budzéjanë', tu' chiguca xidzé rë'ënë' ilé'enë' Lë' tu' chibiyönnë' le zían ca naca queë' Jesús, en runë' löza ilé'enë' tu' yöl-la' huáca gunë'.

<sup>9</sup> Ní'irö Herodes gunábinë' Jesús le zían, pero Jesús biti' bi didza' bubi'ë. <sup>10</sup> Nacu'ë ca' ni' yugu' bixúz unná bë', len bönni' yudo' tu'sédinë', ate' bulu'zéguidë'ë Jesús didza'. <sup>11</sup> Ní'irö Herodes, en bönni' queë' röjáquië' gudil-la bulu'cá'anë' Jesús cá'asö, en para ulu'titjë' Lë', bulu'gácuë' Lë' tu' lari' nazaca' ca rácuë' tu' bönni' unná bë', ate' leyúbölö bulu'sudxinë' Lë' lahuë' Pilato. <sup>12</sup> Dza na' bulu'dzáquië' dxi'a Pilato, en Herodes, tu' zí'alö gula'lé luzë'ë tuë' ia'tué'.

*Ta'chúquië' queë' Jesús gátië'*

*(Mt. 27:15-26; Mr. 15:6-15; Jn. 18:39-19:16)*

<sup>13</sup> Ní'irö butubë' Pilato yugu' bixúz unná bë', en bönni' dë lu ná'agaquië', en bönachi lu yödzö, <sup>14</sup> ate' rë' légaquië':

—Djujá'ali'-në' bönni' ni lahua' neda', rnnali' queë' runë' ga tu'tsatsa bönachi, pero cate' gunabi yúdxida'-në', ate' zóatëli' ca' ni, biti' bi budzólida' le naca xíguia' nabáguë'ë, yugu' lë na' ruzéguili'-në' didza'. <sup>15</sup> Cate' gusöl-la'a libí'ili' lahuë' Herodes, biti' bi budzölinë' le benë' bönni' ni le naca xíguia' nabáguë'ë para nu ichugu queë' gátië'. <sup>16</sup> Na'a usaca' zi'a-në', ate' tódi na' usana'-në'.

<sup>17</sup> Run bayudxi tu le gunë' Pilato, usané' lu ná'agaca bönachi tuë' bönni' nadzunë' cate' raca laní na', ca na' run cazë'.

<sup>18</sup> Ní'irö gulu'ë zidzaj didza' yúgu'të bönni' nacu'ë ni', ta'nnë':

—Bëtië' bönni' ni, en busané' queëtu' Barrabás.

<sup>19</sup> Nadzunë' Barrabás na' lidxi guië' tu' gudíl-lalenë' yúlalui' lu yödzö na', en tu' bëtië' bönachi. <sup>20</sup> Bulidzë' Pilato légaquië' leyúbölö, tu' rë'ënë' usané' Jesús. <sup>21</sup> Leyúbölö gulu'ë zidzaj didza', ta'nnë':

—¡Budë'ë lë'e yaga cruz! ¡Budë'ë lë'e yaga cruz!

<sup>22</sup> Ní'irö Pilato gudxë' légaquië' le bunny luzuí, rnnë':

—¿Bizxi caz le ruá' dö' benë' bönni' ni? Biti' bi budzólida' nunë' le run ga nabáguë'ë xíguia' gátië'. Usaca' zi'a-në', ate' ní'irö usana'-në'.



<sup>23</sup> Zídzajrö gulu'ë didza', ta'nabë' të'ë Jesús lè'e yaga cruz. Tu' gula'bödxi'ë yenni' yugu' bönni' na', en yugu' bixúz unná bë', gula'déli'në' gaca ca na' të'ënnë'. <sup>24</sup> Ní'irö Pilato guchúguië' queë' Jesús, para gaca queë' ca na' ta'nabë'. <sup>25</sup> Busanë' quégaquië' bönni' na' nadzunë' lidxi guië' tu' gudíl-lalenë' yúlalui', en bëtië' bönachi, bönni' na' chigula'nabë', ate' budödë' Jesús para gaca queë' ca na' të'ënnë'.

*Dë'ë Jesús lè'e yaga cruz*

*(Mt. 27:32-44; Mr. 15:21-32; Jn. 19:17-27)*

<sup>26</sup> Cate' ni' ta'chë'ë Jesús tsöjdá'gaquië' Lë' lè'e yaga cruz, gula'zönë' Simón, bönni' yödzö Cirene, suzë'ë la' guixi', ate' gula'xóë' yen zxicjë' yaga cruz na' para gu'ë le, en tsejë' cúdzulë' Jesús.

<sup>27</sup> Bönachi zían, enca' yugu' nigula söjñógaca Jesús, ta'bödxi'nu nigula na', en ta'bödxi yéchi'nu queë' Lë'. <sup>28</sup> Ní'irö buécjë' Jesús, en ruyúë' légacanu, ate' rë' légacanu:

—Libí'ili' nigula Jerusalén. Biti' cödxili' quia' neda', pero guli'cödxí que quézili', en quégacabi' zxi'inili' <sup>29</sup> tu' huadxín dza ila'nná: “Bica' bágaca yugu' nigula huödx, en nigula bití' guluá'anu-bi' bí'ido', en bití' bulu'gádxí'nu-bi' bí'ido'.” <sup>30</sup> Ní'irö ila'sí lógaca ila'nná bönachi, ilë' yugu' gu'á sibi: “Guli'dubága' netu'”, en ilë' ca' yugu' gu'ado': “Guli'cachi' netu'.” <sup>31</sup> Channö caní tunë' quia' neda', naca' ca tu yaga ya'a, çnaru' cabí ilúntërë' ca' queëli', nácali' ca yaga bidxi?

<sup>32</sup> Gula'chë'ë ca' chopë' bönni' tuá' dö', para ilútië' légaquië' tsözxön len Jesús. <sup>33</sup> Cate' bila'dxinë' lataj nazí'i le Calavera, le rna len didza' xidza' Lataj Que Böga' Ícjaru', bulu'dë'ë Jesús lè'e yaga cruz. Bulu'dë'ë ca' lë'egaca yaga cruz chopë' bönni' tuá' dö'. Tuë' bulu'dë'ë cuita lë'ë ibëla Jesús, en ia'túë' bulu'dë'ë cuita lë'ë yögöla. <sup>34</sup> Ní'irö Jesús rnnë':

—Xuz, buniti lo légaquië', tu' cabí nözguequinë' bi tunë'.

Bönni' röjáquië' gudil-la nacu'ë ni' bulu'lë'ë que queégaquië' le nacuë' Jesús, en bulu'quitjë' le gaca bë' lahui. <sup>35</sup> Bönachi nacua' ni' tu'yú, en yugu' bönni' dë lu ná'agaquië' bulu'titjë' Jesús, ta'nnë':

—Yugu' nu yúbölö busölë' bönni' ni. Na'a ral-la' usölá cuinë' channö náquië' Cristo, bönni' gurö cazë' Dios.

<sup>36</sup> Yugu' bönni' na' röjáquië' gudil-la bulu'titjë' ca' Jesús. Gula'biguë'ë ga na' zoë', en bulu'guijë' Lë' nupi zi, <sup>37</sup> ta'nnë':

—Channö nacu' Li' bönni' inná bé'enë' bönachi judío, busólá cuinu'.

<sup>38</sup> Da' ca' lè'e yaga cruz icjlë' Jesús tu le nazúaj lu guichi lu didza' griego, en lu didza' latín, en lu didza' hebreo, le rna caní: “Bönni' Rinná Bé'enë' Bönachi Judío.” <sup>39</sup> Tuë' bönni' huiá' dö' na' dë'ë lè'e yaga cruz bulidza zi'ë Jesús, rnnë':

—Channö nacu' Li' Cristo, busölá cuinu', enca' netu'.

<sup>40</sup> Bubi'ë didza' ia'tué' bönni' huiá' dö' na', en gudil-lë' luzë'ë na', rnnë':

—¿Naru' cabí rádxiinu'-në' Dios? Lësca' li' narugu quiu' gátiau'.

<sup>41</sup> Le nácatë rë'u, le rál-la'sö gaca queëru' rigui' rizáca'ru', ca na' sa'yéaj dö' biá'aru', pero Bönni' ni, biti' bi dö' nu'ë.

<sup>42</sup> Ní'irö bönni' ni rë' Jesús:

—Yöjné neda' cate' idxiinu' ga ni' inná bë'u.

<sup>43</sup> Jesús rë' lë':

—Le nácatë rea' li', na'a dza ni sóalenu' neda' lataj lachi quia'.

### *Ratië' Jesús*

(Mt. 27:45-56; Mr. 15:33-41; Jn. 19:28-30)

<sup>44</sup> Cate' bidxín idú huagubidza, guchul-la idútë yödzölió ga bidxinrö idú ridödi xihuó. <sup>45</sup> Guchul-la gubidza, ate' lari' nal-la' lu yudo' biröza' chopa dí'ilö. <sup>46</sup> Ní'irö bë'ë zidzaj didza' Jesús, rnnë':

—Xuz, rigu'a lu no'o bö' naca caza'.

Cate' budxi gunné' caní, birúajtë bö' naca cazë', gútië'.

<sup>47</sup> Cate' bönni' rinná bë'enë' bönni' röjáquië' gudil-la bilé'enë' ca na' guca, gulu'ë Dios yöl-la' ba, rnnë':

—Le nácatë bönni' ni gúquië' bönni' tsahui'.

<sup>48</sup> Cate' yúgu'të bönni' nacu'ë ni' tu'yúë' bila'lé'enë' lë na' guca, yöjhuöjgaquië' yödzö, ta'gapa' luchú'ugaquië' tu' tu'báinë'. <sup>49</sup> Zí'tu'sö bulu'gá'ana yúgu'të nupa ni' núnbë'gaca Jesús, en yugu' nigula na' yöjácalennu Lë' cate' ni' gudë' luyú Galilea, ate' tu'yúë' lë ni raca.

### *Rigáchë'ë Jesús yeru ba*

(Mt. 27:57-61; Mr. 15:42-47; Jn. 19:38-42)

<sup>50</sup> Zoë' ca' ni' tu bönni' yödzö Arimatea que luyú Judea, lë' José. Bönni' ni náquië' dxi'a, en tsahui', en nabábalenë' yugu' bönni' yudo' tu'chi'a tu'söröë'. <sup>51</sup> Biti' benë' tuz nupa na' gula'chugu queë' Jesús gátie', tu' ribözë' ca' José ni le rinná bë'ë Dios. <sup>52</sup> Ní'irö guyijë' José na' lahuë' Pilato, en gunabë' lataj u'ë Jesús. <sup>53</sup> Cate' chinuzötjë' Lë', buchölinë' Lë' lari', ate' gulu'ë Jesús yeru ba, le nadaj lë'e gu'a guiöj, ate' lu ba na', cuntu nu nagü'iguequinë'. <sup>54</sup> Dza na' naca dza tu'pë'ë que dza lá'ayi quégaquië' bönni' judío, tu' si' idxín dza na'.

<sup>55</sup> Yöjácanu ca' ni' nigula na' gula'zá'lennu Jesús, cate' ni' gudë' luyú Galilea, ate' bila'lé'enu yeru ba na', en ca na guca, gula'gu'ë Lë' ni'. <sup>56</sup> Cate' yöjhuöjgacanu yu'u, bulu'pá'anu nöri rilá'zxixi, en yugu' le za rilá'zxixi. Ní'irö bulu'zí' ládxi'gacanu dza lá'ayi na' quégaquië' bönni' judío ca na' rinná bë' xibá queë' Dios.

## 24

*Rubanë' Jesús lu yöl-la' guti*

(Mt. 28:1-10; Mr. 16:1-8; Jn. 20:1-10)

<sup>1</sup> Cate' bidxín dza risí lo ia' gadxi dza na', cate' ni' naca zílado', bila'dxinnu nigula na' ra' yeru ba queë' Jesús. Nuá'gacanu yugu' le rilá' zxixi, lë na' chinupá'agacanu, ate' dzágagacanu légacanu ia'bál-lanu nigula. <sup>2</sup> Cate' bila'dxinnu ni', bila'lé'enu chinadúa guiöj na' gudá' ga nu riyaza yeru ba queë'. <sup>3</sup> Cate' gula'yázanu yeru ba na', bití' bulu'dzölinu zoa Xanru' Jesús ni'. <sup>4</sup> Cate' ni' ta'bö'önu böniga ni'a que lë ni, chopë' bönni' nácugaquië' lari' rëpi yösa beni' la' bila'dxintë' ni', en gula'zuinë' ga na' nacuá'anu. <sup>5</sup> Ní'irö guládxinu, en bulu'zötaj ícjagacanu, tu'yunu lu yu, ate' chopë' gubáz lá'ayi na' tē légacanu, ta'nnë':

—¿Bizx que ruguílajli' nu zoa nabán xilataj nu nati? <sup>6</sup> Bití' zoë' ni, tu' chibubanë'. Guli'tsöjné lë na' chigudxi cazë' libí'ili' cate' ni' zoë' luyú Galilea. <sup>7</sup> Gunnë': "Run bayudxi nu udödi neda', Bönni' Guljë' Bönachi, lu ná'agaquië' bönni' dul-la', ate' ulu'dë'ë neda' lë'e yaga cruz, ate' ubana' cate' gaca tsonna dza."

<sup>8</sup> Ní'irö yöjnégacanu didza' na' bē'ë Jesús, <sup>9</sup> ate' bulu'zá'anu ra' yeru ba na', yöjtíxjöi'iguequinu idxinéajtë' bönni' gubáz queë' Cristo, en ia'zica'rë' ca', ca naca lë na' guca. <sup>10</sup> Nigula na' yöjtíxjöi'iguequinu bönni' gubáz na' yugu' lë ni, nácagacanu María Magdalena, en Juana, en María, xinë'ë Jacobo, en ia'bál-lanu nigula na' dzágagacanu légacanu. <sup>11</sup> Guléquinë' bönni' gubáz na' tu'ínu didza' chixi, en bití' gula'yéajlë'ë légacanu.

<sup>12</sup> Ní'irö guyasë' Pedro, en carelò sa'yéajë' ra' yeru ba na'. Cate' buyúë' lu ba na', bilé'enë' yugu' lári'sö nacuá' ni', ate' ní'irö böajë' lidxë', rubáninë' ca naca lë na' guca.

*Le guca la' nöza ridxintë Emaús*

(Mr. 16:12-13)

<sup>13</sup> La' dza ná'asö söjáquië' chopë', yú'ugaquië' nöza le ridxintë Emaús, le rö'ö ca chopa hora rizá'aru' Jerusalén. <sup>14</sup> Yú'ugacasë' ca' nöza, tu'ë didza' ca naca yúgu'të lë na' guca. <sup>15</sup> Tsanni ni' yú'ugaquië' nöza, tu'ë didza' la' légacasë', gubígui'ë gala' Lë cazë' Jesús, ate' gudálenë' légaquië' tsözxön. <sup>16</sup> Bití' bulu'únbë'ë Lë' tu' naca ca tu le nabaga' guiöj lógaquië'. <sup>17</sup> Ní'irö Jesús gunábinë' légaquië', rnnë':

—¿Bizxi didza' na' ru'íli' la' libí'isili' yú'uli' nöza? ¿Bizx que na' ruhu'ínili'?

<sup>18</sup> Bubi'ë didza' bönni' na' lë' Cleofas, rë' Lë':

—¿Nácatsö' bönni' zí'tu' lu yödzö Jerusalén, en tuzu' li' bití' nözinu' lë na' guca néaje nasi ni'?

<sup>19</sup> Ní'irö Jesús rë' légaquië':

—¿Bizxi na' guca?

Tè' Lè':

—Lè na' guca queë' Jesús, bönni' Nazaret. Gúquië' bönni' bë'ë didza' uláz queë' Dios, ate' len yöl-la' huáca zxön benë' dxin, en bë'ë didza' lahuë' Dios, en lógaca yúgu'të bönachi. <sup>20</sup> Yugu' bixúz unná bë', len bönni' ta'nná bé'enë' netu' bulu'dödë' Lè', en gulunë' ga nu guchugu queë' gátie', ate' bulu'dé'ë Lè' lè'e yaga cruz. <sup>21</sup> Netu' bentu' löza gúquië' Lè' bönni' na' ral-la' huóá'uë' bönachi Israel, pero na'a chiguca tsonna dza cate' gulaca lè ni. <sup>22</sup> Ia'stú, bál-lanu nigula nútsa'gacanu netu' gulunnu ga gurö'ötu' böniga. Yójácanu ra' yeru ba queë' cate' si' gulén gubidza na'a dza, <sup>23</sup> en cate' biti' bulu'dzölinu Lè', buduhuó'gacanu, en gulënu netu' bila'lé'enu yugu' gubáz lá'ayi queë' Dios, nupa ni' gulé lé'gacanu zoë' nabanë' Jesús. <sup>24</sup> Ní'irö bal-lë' bönni' luzá'atu' yójáquië' ra' yeru ba na', en bila'lé'enë' naca ca na' gula'nnanu nigula na', pero biti' bila'lé'enë' Jesús.

<sup>25</sup> Ní'irö Jesús gudxë' légaquië':

—Libi'ili', bönni' biti' réajni'ininë'. Nazidi icja láchxi'do'oli' para cabí tséajlë'ëli' yúgu'të le gula'nnë' bönni' gulu'ë didza' uláz queë' Dios. <sup>26</sup> ¿Naru' cabí ben bayudxi qui'i sáquë'ë Cristo yugu' lè ni, en tsázië' ga ni' tsépisëtë'rë'?

<sup>27</sup> Ní'irö gusí lahuë' Jesús riguixjöi'inë' légaquië' yúgu'të le ru'i didza' ca naca queë' le nazúajgaca lu guichi lá'ayi, ca na' gusí lo bë'ë didza' Moisés ga bidxintë yugu' le gula'nnë' yúgu'të bönni' gulu'ë didza' uláz queë' Dios.

<sup>28</sup> Cate' bila'dxinë' yödzo'do' ga na' söjáquië', benë' Jesús ca tu bönni' zéajtë'rë' zítu'. <sup>29</sup> Gulunë' bayudxi ugá'analenë' légaquië', ta'nnë':

—Bugá'analen netu', tu' chiridzö' na'a, en chizóa gal-la.

Ní'irö guyázië' Jesús yu'u, en bugá'analenë' légaquië'. <sup>30</sup> Cate' ni' Jesús rö'ë rágulenë' légaquië', gudélë'ë yöta xtila, en gudxë' Dios: "Xclenu'." Ní'irö buzzuxjé' le, en bë'ë quégaquië'. <sup>31</sup> La' ní'isö bidúa lè na' gubaga' guió'j lógaquië', ate' bulu'únbë'ë Jesús, ate' Lè' buniti cuinë' lógaquië'. <sup>32</sup> Ní'irö gulé luzé'ë tuë' ia'tué':

—¿Naru' cabí böála'tica' láchxi'do'oru' tsanni ni' ru'ilenë' rë'u didza' la' nöza, en cate' ni' ruchila lá'anië' le nazúaj lu guichi lá'ayi?

<sup>33</sup> La' ní'isö gula'zuinë' yójhuó'jgaquië' Jerusalén, ate' yójxáca'gaquië' nudúbigaquië' idxinéajtë' bönni' gubáz queë' Jesús, en nupa nacué'len légaquië'. <sup>34</sup> Ní'irö yugu' bönni' na' nacué' ni' gulé' chopë' na':

—Chibubán cazë' Xanru', en buluí'i lahuë', ate' bilé'enë' Simón Lè'.

35 Ní'irö chopë' na' gula'guíxjõ'ë ca na' guca quégaquië' la' nöza, en ca na' bulu'únb'ë Jesús cate' ni' buzuxzjë' yöta xtila na'.

*Bönni' usëda queë' Jesús tu'lé'enë' Lë'  
(Mt. 28:16-20; Mr. 16:14-18; Jn. 20:19-23)*

36 Tsanni ni' tu'ë didza' ca nácagaca lë ni, la' yöjsóatë' Jesús gatsaj láhui'lö ga na' nacu'ë, ate' rë' légaquië':

—Guli'sóa dxi ládxi'li'.

37 Ní'irö guladxi gula'dzöbinë' tu' téquinë' bixín ta'lé'enë'.

38 Jesús rë' légaquië':

—¿Bizx que rő'öli' böniga? ¿Bizx que rizá' ládxi'li' yugu' lë ni?

39 Buli'yútsöca' na'a, en ni'a. Neda' caz ni. Guli'cán neda', en buli'yú neda', tu' cabí da' bixín bëla', en biti' yu'u dxita ca ni rilé'eli' naca quia' neda'.

40 Ni' ru'isë' ca' didza' ni, bulu'inë' légaquië' në'ë, en ni'ë.

41 Tu' tu'dzëjaguequinë' biti' gula'yéajlë'ë, en gula'bö'ë baniga. Que lë ni na' Jesús gudxë' légaquië':

—¿Dë queëli' ni le gahua'?

42 Ní'irö bulu'nödzejë' queë' láti'do'oba' böla chinégui'ba', en tu quíxzi'ba' buz. 43 Guzxi'ë Jesús le, en gudahuë' lógaquië'.

44 Ní'irö rë' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ni' zóalena' libí'ili', gunniá': Run bayudxi gaca yúgu'të le nazúaj lu guichi lu xibá queë' Moisés, en le gula'nnë' bönni' gulu'ë didza' uláz queë' Dios, en le nazúaj lu guichi nazí'i le Yugu' Salmo, ca ral-la' gaca quia' neda'.

45 Ní'irö buzéajni'inë' légaquië' lë na' nazúajgaca lu guichi lá'ayi. 46 Rë' légaquië':

—Caní nazúaj lu guichi ca run bayudxi gaca queë' Cristo, qui'i sáquë'ë, en ubanë' lu yöl-la' guti cate' gaca tsonna dza, 47 ate' idütë yödzölió ral-la' gaca libán ca naca quia' neda' para ulu'bí'i ládxi'gaca bönachí para uniti lahuë' Dios dul-la' nabága'gaquië'. Lu yödzö Jerusalén isí lo gaca libán na' 48 ate' libí'i cázali' na' bilé'eli' yugu' lë ni ral-la' gunli' ba nalí que. 49 Buli'yútsöca', isól-la'a queëli' le guzxi' lu në'ë Xuza' gunnë' queëli', pero buli'gá'anasö Jerusalén cate' idxinrö queëli' yöl-la' huáca na' za' yehua' yubá.

*Ruhuëpë' Jesús yehua' yubá  
(Mr. 16:19-20)*

50 Ní'irö Jesús guchë'ë yugu' bönni' dá'gaquië' Lë', sőjáquië' yödzö Betania, ate' ni' guchisa në'ë, en bulidza tsáhuë'ë légaquië'. 51 Tsanni ni' rulidza tsáhu'i'së' ca' légaquië', buzá'atë' ga na' nacu'ë, buëpë' yehua' yubá. 52 Gudödi gula'yéaj ládxi'gaquië' Lë', lu yöl-la' rudzeja quégaquië' yöjhuöjgaquië'

Jerusalén. <sup>53</sup> Gula'cuá'tica'së' chila yudo', ta'gu'ë Dios yöl-la'  
ba, en tun zxönë' Lë'. ¡Ca' naca!

## DIDZA' DXI'A BUZÚAJĚ' JUAN

*Bönni' na' nazí'i lě' Didza' gúlajě' bönachi*

<sup>1</sup> Cate' gusí lo, zí'atělö cate' sí' gata' yödzölió, ni' zoa cazě' Bönni' lě' Didza', ate' Bönni' na' náquiě' Didza' zóaleně' Dios, ate' Didza' na' naca caz Dios. <sup>2</sup> Bönni' na' náquiě' Didza' zóaleně' Dios cate' ni' gusí lo sí' rata' yödzölió. <sup>3</sup> Lu ně'ě Bönni' ni, Dios beně' yúgu'tě le dě, en biti' bi dě le nuně' Dios le cabí beně' lu ně'ě Bönni' na'. <sup>4</sup> Dě caz queě' yöl-la' na'bán, ate' yöl-la' na'bán na' naca ca tu bení' le ruzení' lu icja ládxi'do'gaca bönachi. <sup>5</sup> Ruzení' bení' na' ga naca chul-la que dul-la', pero biti' ca' sequí' le chul-la na' usulu bení' na'.

<sup>6</sup> Dios gusól-lě'ě ni tu bönni' lě' Juan. <sup>7</sup> Bidě' bönni' ni para gáquiě' nu gun ba nalí. Bidě' para guně' ba nalí queě' Bönni' na' náquiě' bení', para tséjlě'gaca yúgu'tě bönachi Dios ni'a que lě na' runě' ba nalí. <sup>8</sup> Biti' náquiě' Juan bení' na', pero bidě' para guně' ba nalí queě' Bönni' na' náquiě' bení'. <sup>9</sup> Bönni' na' náquiě' bení' le naca idú ni' raziě' yödzölió ni, ate' ruzeni'ě lu icja ládxi'do'gaca yúgu'tě bönachi.

<sup>10</sup> Bönni' na' náquiě' bení' bidxině' yödzölió ni, ate' lu ně'ě Lě' Dios beně' yödzölió ni, pero bönachi yödzölió biti' bulu'únbě'ě Lě'. <sup>11</sup> Bidxině' ga nequi queě', pero biti' ca' gula'zí' lu ná'agaquiě' Lě' bönni' nabábaleně'. <sup>12</sup> Yúgu'tě bönni' gula'zí' lu ná'agaquiě' Lě', bönni' ni' gula'yéajlě'ě Jesús, Lě' beně' ga dě lu ná'agaquiě' ilácagaquiě' zxí'ině' Dios. <sup>13</sup> Bönni' ni nácagaquiě' zxí'ině' Dios, calěga tu' nácagaquiě' zxí'ině' nu bönni', en calěga tu' nálajgaquiě' ni'a que le rizě ládxi'ě nu bönni', o ni'a que tu le rě'ěně' nu bönni', pero nácagaquiě' caní tu' naca le rě'ěni quézíně' Dios.

<sup>14</sup> Bönni' na' náquiě' Didza' guljě' bönachi, en tu chí'isö guzóaleně' rě'u, idú dzágagaca Lě' le ruzá' ládxi'ě Dios queěru', en le naca idútě li. Bilé'etu' yöl-la' zxön queě', ate' yöl-la' zxön queě' na' naca le ruí'i queěbi' bi'i la's dui que, Nu na' naca Xúzibi'. <sup>15</sup> Juan na' beně' ba nalí queě' Bönni' na', en bě'ě zidzaj didza', rnně':

—Bönni' ni náquiě' Nu na' gudíxjō'a que, gunnía': Bönni' sí' zá'tělě' ca neda' nayěpisětěřě' ca neda', tu' zoa cazě' Lě' zí'aló ca neda'.

<sup>16</sup> Le naca idú queě' buzí'iru' xibé yúgu'těru', lě na' buzá' ládxi'ě queěru' Dios, en zíanrö ca' le ruzá' ládxi'ě queěru'. <sup>17</sup> Bidxín queěru' xibá queě' Dios lu ně'ě Moisés, pero le ruzá' ládxi'ě queěru' Dios, en le naca idútě li bila'dxín queěru' lu ně'ě Jesucristo. <sup>18</sup> Catu caz nu bilé'e Dios, pero Lě', la's dui

Zxí'inē' Dios, Bönni' na' nadxí'ide'enē' Dios Xuz, Bönni' ni na' benē' ga núnbē'ëru'-nē' Dios.

*Le benē' ba nalí Juan, bönni' buquilē' bönachi nisa, ca náquiē' Jesús*

(Mt. 3:1-12; Mr. 1:7-8; Lc. 3:1-17)

<sup>19</sup> Lē ni naca le benē' ba nalí Juan, cate' ni' bönni' judío unná bē' nacu'ë Jerusalén gula'söl-lē'ë yugu' bixúz, en bönni' nabábagaquiē' Leví, nupa ni nácagaca ni'a ná'agaquiē' bixúz, para ila'nábinē' Juan na', ila'nnē':

—¿Nuzxi bönni' li'?

<sup>20</sup> Yálajdo' bē'ë didza' Juan, en biti' gudá'baguiē', pero gudíxjö'ë catēz naca, rnnē':

—Biti' naca' Cristo, Bönni' na' guzxi' lu nē'ë Dios isöl-lē'ë queëru'.

<sup>21</sup> Ní'irö gula'nábinē' lē' leyúbölö, tē' lē':

—¿Nuzxi caz li'? ¿Naru' nacu' li' Elías, bönni' bē'ë didza' uláz queē' Dios dza ni'tē'?

Gunnē' Juan:

—Biti' naca'.

Ní'irö tē' lē':

—¿Naru' nacu' li' bönni' na' ral-la' guídē' gu'ë didza' uláz queē' Dios?

Bubi'ë didza' Juan, rnnē':

—Calēga neda'.

<sup>22</sup> Ní'irö tē' lē':

—¿Nuzxi caz nacu'? Gudíxjö'i' netu' para gaca usiyöntu' nupa gula'söl-la' netu'. ¿Bizxi rno' li' nuzxi nacu'?

<sup>23</sup> Bubi'ë didza' Juan, rē' légaquiē':

—Neda' naca' bönni' na', nazúaj lu guichi lá'ayi ca naca queē', rna: Riyön chi'i nu rulidza lu lataj cá'asö, rna: Buli'béaj li nöza para idxín Xanru' queéli'. Caní gunnē' Isaías, bönni' na' bē'ë didza' uláz queē' Dios.

<sup>24</sup> Yugu' bönni' ni nácagaquiē' bönni' yudo' fariseo nasöl-la'gaquiē' bönni' judío unná bē'. <sup>25</sup> Gula'nábinē' Juan, tē' lē':

—¿Bizx que ruquilu' bönachi nisa channö cabí nacu' li' Cristo, en biti' nacu' Elías, en calēga bönni' na' ral-la' guídē' gu'ë didza' uláz queē' Dios?

<sup>26</sup> Bubi'ë didza' Juan na', rē' légaquiē':

—Neda' ruquila' bönachi nisa lu nisa, pero gatsaj láchui'lö ga zóali' zoē' tu bönni' biti' núnbē'ëli'-nē'. <sup>27</sup> Bönni' ni náquiē' Bönni' na' si' zá'telē' ca neda', en nayēpisētērē' ca neda', ate' biti' naca' neda' lesaca' ulecja' xiráchuē' nudē'ë.

<sup>28</sup> Yúgu'tē lē ni guca lu xiyú yödzo Betábara, ga naca ia'tsölá'a yegu Jordán, zaca' ga rilén gubidza, ga ni' buquilē' Juan bönachi nisa.



*Jesús náquië' ca bö'cu' zxíla'do' tutië'-ba' lahuë' Dios tu' nözi dul-la'*

<sup>29</sup> Dza buropi ni' Juan bilé'enë' Jesús, zë'ë ga zoë', ate' rnnë':

—Buli'yútsöca'. Bönni' ni náquië' bö'cu' zxíla'do' queë' Dios, gatië' para ugúë' dul-la' nabága'gaca bönachi yödzölió. <sup>30</sup> Lë' náquië' bönni' na' gunnía' queë': "Si' zá'tëlë' ca neda' tu bönni', nayëpisëtërë' ca neda', tu' zoa cazë' zí'alö ca neda'." <sup>31</sup> Neda' biti' bénbë'a-në' zí'alö, pero bida', ruquila' bönachi nisa para ilúnbë'e bönachi Israel Lë'.

<sup>32</sup> Benë' ba nalí Juan ca naca queë' Jesús, rnnë':

—Bilé'eda'-në' Dios Bö' Lá'ayi, bötjë' birúajë' yehua' yubá, gunë'ë ca riná'aba' gu'dódo', ate' bidxinë' ga zoë' Jesús, en bugá'analënë' Lë'. <sup>33</sup> Biti' bénbë'eda' Lë' zí'alö. Gudxi neda' Nu na' gusöl-la' neda' para uquila' bönachi nisa, gunné': "Cate' ilé'enu'-në' huötjë' Dios Bö' Lá'ayi, tsöjsóalënë' Bönni' na', en ugá'analënë' Lë', Bönni' ni gunë' le rulu'ísö yöl-la' ridila nisa ni, uchízië' bönachi Dios Bö' Lá'ayi." <sup>34</sup> Na'a, chibilé'eda' lë na', en runa' ba nalí queë' Bönni' ni, náquië' Zxí'inë' Dios.

*Yugu' bönni' usëda zí'alö queë' Jesús*

<sup>35</sup> Ia'tú dza ca', leyúbölö zoë' Juan ni', ate' nacua'lenë' lë' chopë' bönni' dá'gaquië' lë'. <sup>36</sup> Cate' Juan na' bilé'enë' Jesús, ridödë' ni', ní'irö gudxë' bönni' na' dá'gaquië' lë', rnnë':

—Buli'yútsöca'. Ni' zoë' bönni' na' náquië' bö'cu' zxíla'do' queë' Dios, gatië' uláz quegaca bönachi dul-la'.

<sup>37</sup> Chopë' bönni' na' dá'gaquië' Juan bila'yönnë' didza' ni bë'ë lë', ate' yöjnógaquië' Jesús. <sup>38</sup> Ní'irö buécjë' Jesús, en buyúë' chopë' ni söjnógaquië' Lë', ate' rë' légaquië':

—¿Bizxi riguíjali'?

Të' Lë':

—Bönni' Usedi, ¿gazxi zu'?

<sup>39</sup> Bubi'ë didza' Jesús, rë' légaquië':

—Guli'dá, uyuli'.

Ní'irö yöjácälënë' Lë', en bila'lé'enë' ga na' zoë', ate' bulu'gá'analënë' Lë' dza na', tu' chizá' ral-la.

<sup>40</sup> Andrés, böchë'ë Simón Pedro, náquië' tuë' bönni' chopë' ni' bila'yönnë' didza' bë'ë Juan, en yöjnógaquië' Jesús. <sup>41</sup> Andrés na', zí'alö yöjdiljë' bönni' böchë'ë, lë' Simón, ate' rë' lë':

—Chibidzölitu'-në' Mesías.

Mesías naca tu didza' hebreo le rnna lu didza' griego: Cristo, ate' lu didza' xidza': Bönni' nasöl-lë'ë Dios.

<sup>42</sup> Ní'irö Andrés na' la' guchë'të' Simón ga na' zoë' Jesús. Cate' Jesús bilé'enë' lë', rë' lë':

—Li' nacu' Simón, zxí'inë' Jonás. Na'a, si' lo' Cefas.

Cefas naca ca' tu didza' hebreo le rnna: Pedro, lu didza' xtila, ate' lu didza' xidza': Guiöj.

*Jesús rulidzë Felipe, en Natanael*

<sup>43</sup> Cate' za' rení' ia' tú dza, gú'unnë' Jesús tsejë' luyú Galilea, ate' yöjxáquië' Felipe, en rë' lë':

—Gudá' neda'.

<sup>44</sup> Náquië' Felipe bönni' yödzö Betsaida, le naca ládzagaquië' Andrés, en Pedro. <sup>45</sup> Felipe budzölinë' Natanael, en rë' lë':

—Chibidzölitu'-në' bönni' na' buzúajë' Moisés ca naca queë' lu guichi lu xibá queë' Dios, ate' bulu'zúajë' ca' ca naca queë' bönni' gulu'ë didza' uláz queë' Dios. Bönni' ni Jesús, xzí'inë' José, bönni' yödzö Nazaret.

<sup>46</sup> Natanael rë' lë':

—¿Naru' huala'tsö Nazaret tu le naca dxi'a?

Felipe rë' lë':

—Gudá uyú'.

<sup>47</sup> Cate' bilé'enë' Jesús zë'ë Natanael na' ga zoë', rnnë':

—Buli'yú ni tu bönni' náquië' idú bönni' Israel, en bití' rnnasë' ca' bönni' ni.

<sup>48</sup> Ní'irö Natanael gunábinë' Jesús, rë' Lë':

—¿Naru' núnbë'tso' neda'?

Bubi'ë didza' Jesús, rë' lë':

—Cate' si' ulídzatërë' Felipe li', cate' ni' zu' zxan yaga higo, bilé'eda' li'.

<sup>49</sup> Ní'irö bubi'ë didza' Natanael, rë' Lë':

—Bönni' Usedi, Li' nacu' Xzí'inë' Dios. Li' nacu' Nu inná be'e bönachi Israel.

<sup>50</sup> Bubi'ë didza' Jesús, rë' lë':

—¿Réajlë'tso' tu' gudxa' li': Bilé'eda' li' zxan yaga higo? Yugu' le zxöntërö ca lë ni hualé'enu'.

<sup>51</sup> Lësca' caní rë' Jesús légaquië', rnnë':

—Le nácatë rea' libí'ili', ilé'eli' nayalaj lúzxiiba, en ta'benë', en tu'huötjë' gubáz lá'ayi queë' Dios ga zoa' neda', Bönni' Guljë' Bönachi.

**2***Laní que yöl-la' rutsaga na' le guca lu yödzö Caná*

<sup>1</sup> Cate' chiguca tsonna dza, guca laní que yöl-la' rutsaga na' lu yödzö Caná luyú Galilea, ate' zóanu xinë'ë Jesús ni'. <sup>2</sup> Lësca' zoa nu bulidza Jesús, en yugu' bönni' usëda queë' dijáquië' laní na'. <sup>3</sup> Cate' biyadzaj xisi uva ilé'ajë', ní'irö xinë'ë Jesús gúdxinu Lë', rnnanu:

—Biti'rö dë xisi uva ilé'ajë'.

<sup>4</sup> Bubi'ë didza' Jesús, rë'ë-nu:

—Nigúlado'. ¿Bizx que rulidzu' neda'? Biti' ca' ridxini dza ulu'a lahui yöl-la' huáca quia'.

<sup>5</sup> Ní'irö xinë'ë Jesús gúdxinu bönni' huen dxin ta'gu'ë le tahuë', rnnanu:

—Guli'gún yúgu'të le guíë' libí'ili'.

<sup>6</sup> Nacuá' ni' xopa yusu' guiój tu'gunë' dxin bönni' judío cate' tu'pá'a cuíngaquië' ca nalëbiguequinë' tunë', en rúdzugaca chopá tsonna rō'ō nisa tu tu yusu' na'. <sup>7</sup> Jesús gudxë' yugu' bönni' huen dxin na', rnnë':

—Buli'lí yugu' yusu' ni nisa.

Bulu'lié' yugu' yusu' na' nisa. <sup>8</sup> Ní'irō Jesús rë' légaquië':

—Guli'gachi' na'a, en guli'tsöjuá' lahuë' bönni' zoë' ra' yusu'.

Yöjuá'gaquië' na'. <sup>9</sup> Buyüë' bönni' na' zoë' ra' yusu' channō nazxí'i nisa na' nuhuōáca xisi uva, pero bití' réquibe'enë' gazxí za'. Nōziguequinë' bönni' huen dxin na' guláchë'ë nisa na'. Ní'irō bönni' na' zoë' ra' yusu' bulidzë' bönni' rutsaga nē'ë, <sup>10</sup> en rë' lë':

—Zí'alō tu'nōdzjë' yúgu'të bönni' xisi uva nácarō sizxí'i, en cate' chigulé'ajë' yenni', ní'irō tu'nōdzjë' le cabí nazxí'i. Lí, ga bidxintë' na'a ben chí'u xisi uva nácarō sizxí'i.

<sup>11</sup> Yöl-la' huáca naca bë' ni benë' Jesús lu yōdzō Caná luyú Galilea naca le risí lo yugu' yöl-la' huáca gunë'. Caní guca, bulu'e lahui yöl-la' zxōn queë', ate' gula'yéajlë'ë Lë' bönni' usëda queë'.

<sup>12</sup> Gudōdi na' guyijë' Jesús yōdzō Capernaum, ate' dzágagaquië' xinë'ë, en yugu' bönni' böchë'ë, en yugu' bönni' usëda queë' Lë', ate' zían dza gula'cu'ë Capernaum na'.

*Rulatjë' Jesús lö'a yudo', rubéajë' nupa tun le cabí ral-la' ilún ni'*  
(Mt. 21:12-13; Mr. 11:15-18; Lc. 19:45-46)

<sup>13</sup> Cate' chizóa idxín Laní Pascua cate' tu'subanë' bönni' judío ca benë' Dios, ca na' bubéajë' xuz xtó'ogaquië' luyú Egipto, guyijë' Jesús yōdzō Jerusalén. <sup>14</sup> Lu yōdzō na' yōjxáquië' Jesús nacu'ë bönni' lö'a yudo' ga na' túti'ë-ba' yugu' bëdxi, en yugu' bö'cu' zxila', en yugu' gu'dōdo', böa' bëdxi na' tútigaquië'-ba' lahuë' Dios. Rō'ōgaquië' ca' ni' bönni' tu'tsë'ë dumí za' idútë yōdzōlió. <sup>15</sup> Cate' bilé'enë' Jesús lë ni, buzalë' yugu' du lasi le quindë' bōnachi na', ate' bulágui'ë yúgu'të' ní'ilō lö'a yudo', en bulágui'ë-ba' ca' ní'ilō yugu' bö'cu' zxila', en yugu' bëdxi. Bësië' dumí quégaquië' bönni' na' tu'tsë'ë dumí lu yu, en burixë' yugu' blaga quégaquië'. <sup>16</sup> Ní'irō Jesús gudxë' bönni' na' túti'ë-ba' yugu' gu'dōdo', rnnë':

—Guli'cúa yugu' lë ni. Bití' únili' lidxë' Xuza' tu yë'ëyi.

<sup>17</sup> Ní'irō yōjnéguequinë' bönni' usëda queë' Jesús le nazúaj lu guichi lá'ayi, rnna: Tu' ruí'ida' ládxa'a lidxu', régui rilá ládxi'da'ahua'.

<sup>18</sup> Ní'irō bulu'bi'ë didza' bönni' judío unná bë' nacu'ë ni', të' Jesús:

—¿Bizxi yöl-la' huáca uluí'inu' netu' le gaca bë' dë lu no'o runu' yugu' lë ni?

<sup>19</sup> Bubi'ë didza' Jesús, rë' légaquië':

—Guli'quínnej yudo' ni, ate' tsonna dzasö uchisa' le.

<sup>20</sup> Ní'irö të' Lë' bönni' judío, ta'nne':

—Idú xopa-un iz guyá' yudo' ni, ate' Li', ¿tsonna dzasö uchísatso' le?

<sup>21</sup> Yudo' na' bē'ē didza' que Jesús naca la' cuin cazē'. <sup>22</sup> Que lē ni na', cate' bubanē' Jesús lu yöl-la' guti, yöjnéguequinē' bönni' usēda queē' Jesús ca na' gunnē', ate' gula'yéajlē'ē le nazúaj lu guichi lá'ayi, enca' yugu' didza' bē'ē Jesús.

*Jesús núnbē'ē yúgu'tē bönachi*

<sup>23</sup> Cate' ni' zoē' Jesús Jerusalén, cate' raca Laní Pascua na', gula'yéajlē' bönachi zían Lë', tu' bila'lé'enē' yugu' yöl-la' huáca runē'. <sup>24</sup> Biti' buzxöni ládxe'ē Jesús légaquiē', tu' nunbē' cazē' yúgu'tē bönachi. <sup>25</sup> Biti' naquinnē' Jesús nu quíxjöi'i Lë' ca nácagaca bönachi, tu' nöz quézinē' Lë' le yu'u icja ládxi'do'gaca bönachi.

### 3

*Jesús, en Nicodemo*

<sup>1</sup> Nicodemo, tu bönni' yudo' fariseo, nabábalenē' yugu' bönni' judío unná bē'. <sup>2</sup> Bidē' bönni' ni ga zoē' Jesús chí'i dzö'ölö, en rē' Lë':

—Bönni' Usedi. Réquibe'etu' nasöl-lē'ē Dios Li' para usédinu' netu'. Biti' séqui'nē' tu bönni' gunē' yugu' yöl-la' huáca nácagaca bē' ca nácagaca le caní runu' Li' channö cabí zóalenē' Dios lē'.

<sup>3</sup> Bubi'ē didza' Jesús, rē' lē':

—Le nácatē rea' li', nu cabí galaj leyúbölö, biti' ca' ilé'e lataj ga ni' rinná bē'ē Dios.

<sup>4</sup> Nicodemo gunábinē' Lë', rnnē':

—¿Nacxi caz séqui'nē' tu bönni' galjē' leyúbölö cate' chináquiē' bönni' gula? ¿Naru' huácatsö tsu'ē leyúbölö lē'ēnu xinē'ē, ate' galjē' ia'tú?

<sup>5</sup> Bubi'ē didza' Jesús, rē' lē':

—Le nácatē rea' li'. Nu bönni' cabí galjē' ni'a que nisa, en ni'a queē' Dios Bö' Lá'ayi, biti' gaca tsáziē' ga rinná bē'ē Dios.

<sup>6</sup> Nu na' nalaj lu ni'a lu na' bönachi, bönáchisö naca, pero nu nalaj ni'a queē' Dios Bö' Lá'ayi, Bö' Lá'ayi nabani nu na'. <sup>7</sup> Biti' ubániu' tu' rea' li', run bayudxi galju' leyúbölö. <sup>8</sup> Gáti'tēs recja bö', ate' riyönnu' rnnē bö' na', pero biti' nözinu' gazxi za', o gazxi zeaj. Lësca' caní raca quégaca nupa náljagaca ni'a queē' Dios Bö' Lá'ayi.

<sup>9</sup> Ní'irö Nicodemo gunábinē' Jesús, rnnē':

—¿Nacxi caz gaca lē ni'?

<sup>10</sup> Bubi'ē didza' Jesús, rē' lē':

—¿Ruséditsenu' li' bönachi Israel, en biti' nözinu' yugu' lē ni'?

<sup>11</sup> Le nácatē rea' li', le nöztu' ru'ítu' didza' que, en le bilé'etu'

runtu' ba nalí que, pero biti' rizi' lu ná'ali' lë na' runtu' ba nalí.  
 12 Channö cabí réajlë'ëli' neda' cate' ru'ílena' libí'ili' didza' ca naca le raca yödzölió ni, ¿nacxi caz gaca tséajlë'ëli' channö guía' libí'ili' le raca yehua' yubá?

13 'Catu caz gurenë' nu bönni' yehua' yubá, pero tuza' neda', Bönni' Guljë' Bönachi, bötja' birúaja' yehua' yubá, ate' zoa caza' ni' yehua' yubá. 14 Ca na' benë' Moisés lu lataj cá'asö, buchisë'-ba' bëla néquiniba' guié, budë'ë-ba' lë'e yaga, lësca' caní run bayudxi gaca quia' neda', Bönni' Guljë' Bönachi, ulu'chisë' neda' xitsá'. 15 Caní gaca quia', para cabí ila'niti yúgu'të nupa ila'yéajlë' neda', pero gata' quéguequi yöl-la' na'bán idú.

*Dios nadxí'ide'enë' bönachi yödzölió*

16 Tu' bidxí'ide'enë' Dios bönachi yödzölió, buzá' lãdxë'ë quéguequi Zxí'inë' la' buduínë', para cabí ila'niti yúgu'të nupa ila'yéajlë' Lë', pero gata' yöl-la' na'bán idú quéguequi. 17 Dios gusöl-lë'ë Zxí'inë' yödzölió ni, calëga para ichúguië' quégaca bönachi yödzölió ni gátigaca, pero para ulu'lágaca bönachi yödzölió ni ni'a queë' Lë'.

18 Nu bönni' réajlë'ë Zxí'inë' Dios, biti' ca' narugu queë' inítië', pero bönni' na' biti' réajlë'ë Lë', chinarugu queë' gátië', tu' cabí réajlë'ë Zxí'inë' Dios la' buduínë'. 19 Que lë ni na' chinarugu quégaca bönachi gátigaca, tu' bidxinë' Bönni' na' náquië' bení' yödzölió ni, pero gulunrö zxön bönachi ni le naca chul-la que dul-la' ca gulunë' zxön Bönni' na' náquië' bení', tu' nácagaca xihui' le tunë'. 20 Yúgu'të bönni' tu'ë dö' biti' raza lãdxi'gaquië' bení', en biti' rídigaquië' lu bení', para cabí ilá' lahui le tunë'. 21 Nu run le naca idútë li ridxín lu bení' para gaca bë' núngaca ni'a queë' Dios le run nu na'.

*Juan, bönni' ruquilë' bönachi nisa, ru'ë didza' ca naca queë' Jesús*

22 Gudödi na', Jesús guyéajlenë' bönni' dá'gaquië' Lë', ate' bila'dxinë' luyú Judea, en guzóalenë' légaquië' ni', ga na' tu'quilë' bönachi nisa. 23 Lësca' ruquilë' Juan bönachi nisa ga nazí'i le Enón, gala' ga dë yödzö Salim, tu' dë nisa zila lataj na', ate' ta'dxín bönachi ni', en ta'dila nisa. 24 Raca caní zí'atëlö cate' biti' idzunë' Juan na' lidxi guié.

25 Ní'irö gula'sí lógaquië' bal-lë' bönni' dá'gaquië' Juan ta'díl-lalenë' yugu' bönni' judío didza' ca naca que yöl-la' ruchi'a cuini que yudo'. 26 Bila'dxinë' ga zoë' Juan, en tē' lë':

—Bönni' usedi. Buyútsöca'. Bönni' na' guzóalenë' li' ia'tsölá'a yegu Jordán, bönni' na' benu' ba nalí queë', ruquilë' bönachi nisa, ate' ta'dxín yúgu'të bönachi ga zoë'.

27 Ní'irö bubí'ë didza' Juan, rë' légaquië':

—Biti' bi dē lu nē'ē nu bōnni', channō cabí nudödē' Dios le lu nē'ē. <sup>28</sup> Biyōn quézili' lē na' bena' ba nalí, gunnía': "Biti' naca' neda' Cristo", pero Dios nasól-lē'ē neda' para guía' bōnachi si' zē'ē Lē'. <sup>29</sup> Bōnni' na' rizi'ē-bi' bi' i nigula rutsaga ná'abi' náquiē' bōnni' rutsaga nē'ē, pero bōchi' luzē'ē bōnni' rutsaga nē'ē, en dzáguiē' lē', ruzē náguiē' didza' ru'ē, en rudzējanē' tu' riyōnnē' didza' ru'ē bōnni' rutsaga nē'ē. Lē'sca' caní, rudzējade'eda' neda' tu' raca lē ni caní. <sup>30</sup> Run bayudxi gácarē' zxōn Cristo, pero neda', run bayudxi gácara' cuídi'sō.

*Nu za' zaca' yehua' yubálō*

<sup>31</sup> Gunnē' ca' Juan:

—Bōnni' na' zē'ē zaca' xitsá'alō nayēpisētērē' ca yúgu'tē bōnachi. Nu bōnni' náquiē' bōnachi yōdzōlió ni, que yōdzōlió ni náquiē', en ru'ē didza' que le raca yōdzōlió ni, pero Bōnni' na' zē'ē zaca' yehua' yubálō nácatērē' lo ca yúgu'tē bōnachi. <sup>32</sup> Bōnni' na' runē' ba nalí que le bilé'enē', en le biyōnnē', pero cuntú nu rizi' lu nē'e le runē' ba nalí. <sup>33</sup> Núti'tēs bōnni' rizi' lu nē'ē lē na' runē' ba nalí, bōnni' ni rulu'ē lahui réajlē'ē naca idútē li didza' ru'ē Dios. <sup>34</sup> Bōnni' na' nasól-lē'ē Dios, didza' queē' Dios ru'ē, tu' nuzóadērē' Dios Bō' Lá'ayi queē' lu Bōnni' na'. <sup>35</sup> Dios Xuz nadxí'inē' Zxí'inē', ate' yúgu'tē le dē chinudödē' lu nē'ē Zxí'inē' na'. <sup>36</sup> Nu bōnni' réajlē'ē Dios Zxí'ini, dē yōl-la' na'bán idú queē', pero bōnni' na' bití' réajlē'ē Dios Zxí'ini, bití' idéli'nē' yōl-la' na'bán na', pero nabáguē'ē xíguia' lahuē' Dios.

## 4

*Jesús ru'ilenē'-nu didza' tu nigula Samaria*

<sup>1</sup> Bila'yōnnē' bōnni' yudo' fariseo ca na' dá'gaca Jesús zíanrō bōnachi ca dá'gaca Juan, ate' ruquilē' ca' nisa zíanrō bōnachi ca ruquilē' nisa Juan. <sup>2</sup> Calēga Jesús caz ruquilē' bōnachi nisa, pero bōnni' usēda queē' tu'quilē' bōnachi nisa. <sup>3</sup> Cate' gúquibe'enē' Jesús lē ni, buzē'ē luyú Judea, ate' sa'yéajē' leyúbölō luyú Galilea.

<sup>4</sup> Ga ni' sa'yéajē', run bayudxi tōdē' luyú Samaria. <sup>5</sup> Caní guca, bidxinē' Jesús tu yōdzōdo' luyú Samaria, nazí'i le Sicar, gala' ga dē yu na' bunōdzjē' Jacob queēbi' José, zxí'inē' Jacob na', dza ni'te. <sup>6</sup> Lataj na' zoa tu yeru nisa nachō'ōnē' Jacobo na' ga rē'. Cate' bidxinē' Jesús ní', gurō'ē ra' yeru nisa na' tu' yōjxéqui'nē' yu'ē nōza. Guca idú huagubidza. <sup>7</sup> Ní'irō bidxinnu tu nigula Samaria ní' para sí'inu nisa. Jesús rē'ē-nu:

—Benna le guí'ja'.

<sup>8</sup> Tuzē' zoē' Jesús tu' chisōjáquiē' bōnni' usēda queē' lu yōdzō sōjxí'gaquiē' le ilahuē'. <sup>9</sup> Ní'irō nigula Samaria na' rēnu Jesús, rñnanu:

—¿Rinábítsenu' neda' le guí'ju', en nacu' bönni' judío? Neda' ni naca' nigula Samaria.

Caní gunnánu tu' cabí ta'dzaga dxi'a bönachi Samaria len bönachi judío.

<sup>10</sup> Bubi'ë didza' Jesús, rë'ë-nu:

—La'tu' núnbë'u le runödzejë' Dios, en Nuzxi na' rë'li': "Benna le guí'ja", li' inabu', ate' Lë' gunnë' quiu' nisa runna yöl-la' na'bán.

<sup>11</sup> Ní'irö nigula na' rënu Lë', rnnanu:

—Bönni', bití' nu'u le cuéaju' nisa, ate' yeru nisa ni, dxí'tërö rë'. ¿Gazxi dë nisa na' runna yöl-la' na'bán? <sup>12</sup> ¿Naru' nácatërötso' Li' zXön ca xúziru' gudödi Jacob, bönni' ni' bennë' queëtu' yeru nisa ni, ga ni guzxi'ë nisa gu'ë, en gulë'ajbi' ca' zxi'inë', en gulë'ajba' ca' böa' bëdxi queë'?

<sup>13</sup> Bubi'ë didza' Jesús, rë'ë-nu:

—Núti'tës nu guí'aj nisa ni, leyúbölö ubidxi nisa, <sup>14</sup> pero nu guí'aj nisa na' unödza' neda', bití'rö ubidxi icja ládxi'da'ahuë', tu' unödza' queë' nisa na' gaca lu icja ládxi'da'ahuë' ca tu ga ralaj nisa, le gü'i yöl-la' na'bán idú queë'.

<sup>15</sup> Ní'irö nigula na' rënu Lë', rnnanu:

—Bönni', benna quia' nisa na', para cabirö ubidxa', en cabirö uduzxi'a nisa ni.

<sup>16</sup> Jesús rë'ë-nu:

—Guyéaj, yöjlidzë' bönni' quiu', ate' huödu' ni.

<sup>17</sup> Bubi'inu didza' nigula na', rënu Lë':

—Cuntu nu zoa bönni' quia'.

Ní'irö Jesús rë'ë-nu:

—Ca nácatë rnno': "Cuntu nu zoa bönni' quia'", <sup>18</sup> tu' chiguzóalenu' gayu' bönni', ate' bönni' na' zóalenu'-në' na'a, bití' náquië' bönni' quiu'. Didza' ni ru'u, ca nácatë rnno'.

<sup>19</sup> Ní'irö nigula na' rënu Lë', rnnanu:

—Bönni', runi neda' nacu' bönni' ru'ë didza' uláz queë' Dios.

<sup>20</sup> Xuz xtó'oru' guléquinë' Dios le bach lu guí'a ni, pero rnnali' libí'ili' Jerusalén naca ga ral-la' ilequi bönachi Dios le bach.

<sup>21</sup> Jesús rë'ë-nu:

—Nigula, guyéajlë' neda'. Za' dza cate' tseaj ládxi'li'-në' Dios Xuz sal-la' bití' idisóali' gu'ado' ni, en bití' tsöjsóali' Jerusalén.

<sup>22</sup> Libí'ili' reaj ládxi'li' Nu bití' núnbë'ëli', pero netu' núnbë'ëtu' Nu na' reaj ládxi'tu', tu' benë' queë' Dios ilá' lahui yöl-la' rusölá ni'a quégaquië' bönni' judío. <sup>23</sup> Na'a, za' dza, en chiridxín dza na', cate' nupa le nácatë ta'yéaj ládxi'gaca Dios, ila'yéaj ládxi'gaca Lë', zóalenë' Dios Bö' Lá'ayi léguequi, en le naca idútë li, tu' rë'ënë' Dios Xuz ilácagaquië' queë' bönni' ila'yéaj ládxi'gaquië' Lë' caní. <sup>24</sup> Dios náquië' Bö', ate' nupa ta'yéaj

ládxi'gaca Lë', run bayudxi ila'yéaj ládxi'gaca Lë', zóalenë' Dios Bõ' Lá'ayi léguequi, en le naca idútë li.

25 Ní'irõ nigula na' rënu Lë', rnnanu:

—Nözda' ral-la' guidë' Mesías, Bõnni' na' lë' Cristo. Cate' guidirë' Lë' quíxjöi'inë' rë'u yúgu'të.

26 Jesús rë'ë-nu:

—Lë' cazë' ru'ilenë' li' didza'.

27 La' náasõ bulu'dxinë' bõnni' usëda queë' Jesús, ate' bulu'bánninë' tu' ru'ilenë'-nu nigula didza', pero biti' burúguinë' nitúë' inábinë' Lë', cabí innë': "¿Bizxi rinábinu' lënu?" o: "¿Bizxi didza' ru'ilenü'-nu?" 28 Ní'irõ nigula na' bucá'ananu xichõ'õnu ni', ate' bõajnu la' yödzo, sõjõdxinu nupa nacuá' ni', rnnanu:

29 —¿Gulí'dá, ilé'eli'-në' tu bõnni' gudxë' neda' yúgu'të le chinuna! ¿Naru' cabí nácatsë' Lë' Cristo?

30 Ní'irõ bila'rúaj bõnachi yödzo na', en bila'dxín ga zoë' Jesús.

31 Tsanni ni' sõhuõajnu nigula na', bõnni' usëda queë' Jesús gulunë' bayudxi, të' Lë':

—Bõnni' Usedi, gudagu.

32 Jesús rë' légaquië':

—Dë tu le rahua', le cabí réquibe'eli'.

33 Ní'irõ gula'nabi luzá'agaquië' bõnni' usëda queë' tuë' ia'tué', ta'nnë':

—¿Zoa nu chidiguá'tsõ le gudahuë'?

34 Ní'irõ Jesús rë' légaquië':

—Le nabánida' naca guna' ca rë'ënë' Xuza' nasõl-lë'ë neda', en údxi guna' xichinë'. 35 Caní rnnali' libí'ili': "Ia'tapa beo' huadxín dza uláparu'." Neda' rea' libí'ili': Gulí'chisa loli' uyuli' bõnachi nácagaca ca gapa nadúzgaca, le chinabídxigaca para tsõjláparu'. 36 Bõnni' na' rulapë' rizi'ë lazxjë', ate' lë na' rulapë' bõnni' na', naca para gata' yõl-la' na'bán idú quégaca bõnachi, para gaca ulu'dzeja tsõzxõn nu raza, en nu rulapa. 37 Naca idútë li lë na' rnnu caní: Tu nu raza, ate' ia'tú nu rulapa. 38 Neda' gusõl-la'a libí'ili' tsõjlápali' ga biti' gúzali'. Gulún bõnachi yúbõlõ dxin guláz, ate' libí'ili' ruzí'ili' xibé dxin na' núngaquië'.

39 Zián bõnachi Samaria nacuá' yödzo Sicar na' gula'yéajlë'ë Jesús ni'a que xtídza'nu nigula na' bennu ba nalí queë', gunnánu: "Gudxë' neda' yúgu'të le chinuna'." 40 Cate' bila'dxinë' bõnni' Samaria ga ni' zoë' Jesús, guláta'yuë' lahuë' ugá'analënë' légaquië'. Jesús bugá'anë' ni' ia'chopa dza. 41 Caní guca, ziántërë' ca' bõnni' ni' gula'yéajlë'ë Jesús ni'a que didza' bë'ë. 42 Ní'irõ bõnni' ni' gulë'-nu nigula na', ta'nnë':



—Na'a réajlë'ëtu' Lë', calëgasö ni'a que didza' bë'u li', pero lëasca' tu' biyönitu' netu' Lë', en nöztu' le nácate bönni' ni náquië' Cristo, Nu rusölá bönachi yödzölió.

*Ruúnë' Jesús zxí'inë' tuë' bönni' dë lu në'ë*

<sup>43</sup> Ia'chopa dza ca', buzë'ë Jesús luyú Samaria, en sa'yéajë' luyú Galilea. <sup>44</sup> Caní benë', tu' gudíxjö'ë Lë cazë' Jesús, gunné': "Bönachi uládz queë' nu bönni' ru'ë didza' uláz queë' Dios biti' tun lë' bal." <sup>45</sup> Cate' bidxinë' Jesús luyú Galilea, gulunë' bönni' Galilea na' Lë' bal tu' yöjáquië' ca' Jerusalén cate' guca Laní Pascua, en bila'lé'enë' le benë' Jesús ni'.

<sup>46</sup> Ní'irö böajë' Jesús yödzö Caná luyú Galilea, ga ni' benë' ga böáca nisa xisi uva. Lu yödzö Capernaum na' zoë' tu bönni' dë lu në'ë uláz queë' bönni' rinná bë'ë, ate' ré'ebi' bi'i bönni' queë' bönni' na' dë lu në'ë. <sup>47</sup> Cate' biyönnë' bönni' ni chibuzë'ë Jesús luyú Judea, en budxinë' luyú Galilea na', ní'irö guyijë' ga na' zoë' Jesús, en gúta'yue' lahuë' guidë' lidxë', para uduhuénë'-bi' bi'i bönni' queë' na', tu' chirequi gátibi'. <sup>48</sup> Ní'irö Jesús rë' lë':

—Biti' ca' tséajlë'ëli' channö cabí ilé'eli' le nácagaca bë', en yugu' yöl-la' huáca guna'.

<sup>49</sup> Ní'irö bönni' na' dë lu në'ë uláz queë' bönni' rinná bë'ë gudxë' Jesús, rnnë':

—Bönni', gudía'të para cabí gátibi' bi'i quia'.

<sup>50</sup> Ní'irö Jesús rë' lë':

—Böaj lidxu'. Nabanbi' bi'i quiu'.

Bönni' ni guyéajlë'ë didza' bë'ë Jesús, ate' söhuöjë'. <sup>51</sup> Tsanni ni' yu'ë nöza söhuöjë', duzxí'gala'gaquië' lë' bönni' huen dxin queë' ate' gula'guíxjöi'inë' lë', ta'nnë':

—Nabanbi' bi'i quiu'.

<sup>52</sup> Gunábinë' légaquië' bátaxi gusí lo ruhuóaca ládxi'bi'. Të' lë':

—Ba'ayi, idú huagubidza, burúaj xilá yú'ubi'.

<sup>53</sup> Ní'irö gúquibe'enë' xúzibi' bi'i na', böácabi' cate' ni' bë'lenë' Jesús lë' didza', en gudxë' lë': "Nabanbi' bi'i quiu'." Que lë' ni na' guyéajlë'ë Jesús, ate' gula'yéajlë' ca' Lë' bönachi nacuá' lidxë'.

<sup>54</sup> Yöl-la' huáca ni naca le buropi benë' Jesús cate' ni' zoë' luyú Galilea, gudödi buzë'ë luyú Judea.

## 5

*Ruúnë' Jesús tu bönni' nacú'unië' bin ga nazí'i le Betesda*

<sup>1</sup> Gudödi guca lë ni, guca laní quégaquië' bönni' judío, ate' guyijë' Jesús Jerusalén. <sup>2</sup> Lu yödzö na', gala' ga tu'ú'uba' bö'cu' zxila', dë tu le zxön yudzu nisa, nazí'i le Betesda lu didza' hebreo, en nacuá' gayu' chila don que. <sup>3</sup> Yugu' lu chila na' dégaquië' zían bönni' té'enë', bönni' nachul-la lógaquië', en bönni' biti' gaca sá'gaquië', en bönni' nacú'unigaquië' bin.

Ta'bözë' bata utá cuini nisa na'. <sup>4</sup> Caní raca, tu' ruhuötjé' tu gubáz lá'ayi queë' Dios tu chí'i huéaj, en røjtsu'ë lu nisa na', en ruté' nisa na'. Huóacaté' nu bönni' tsöjtsú'utië' lu nisa na' cate' rutá cuini ca naca bíti'tës yödzöhuë' raca queë'. <sup>5</sup> Zoë' tu bönni' ni', chiguca chixxunu' uruá' iz ré'enë'. <sup>6</sup> Cate' bilé'enë' Jesús dë' bönni' huë' na' ni', réquibe'enë' chiguca zían iz ré'enë', ate' gunábinë' lë', rnnë':

—¿Ba rë'ënu' huóacu'?

<sup>7</sup> Bubi'ë didza' bönni' huë' na', rë' Jesús:

—Bönni', cuntu nu zoa cu'u neda' lu nisa na' cate' rutá cuini. Tsanni sa'yéaja' neda', røjtsu'ë bönni' yúbölö zí'alö ca neda'.

<sup>8</sup> Jesús rë' lë':

—Guyaschi. Buá' le denu', en guzë'e.

<sup>9</sup> La' böacaté' bönni' na', ate' bu'ë le gúti'në', en guzë'ë. Dza na' raca caní naca dza lá'ayi quégaquië' bönni' judío. <sup>10</sup> Ní'irö bönni' judío unná bë' gulé' bönni' na' nuhuóáquië', ta'nnë':

—Dza lá'ayi naca na'a. Biti' ral-la' u'u le ráti'nu'.

<sup>11</sup> Bubi'ë didza' bönni' na', rë' légaquië':

—Bönni' na' bunë' neda' gudxi cazë' neda', gunné': "Buá' le denu', en guzë'e." Bönni' na' bunë' neda'.

<sup>12</sup> Ní'irö gula'nábinë' lë', ta'nnë':

—¿Nuzxi na' gudxi caní li': "Buá' le denu', en guzë'e"?

<sup>13</sup> Biti' nözinë' bönni' na' nuhuóáquië' nuzxi na', tu' chibuzë'ë Jesús lataj ni' tu' nacuá' bönachi zían ni'. <sup>14</sup> Gudödi guca lë ni, Jesús yöjxáquië' bönni' na' ga naca chila yudo', ate' rë' lë':

—Buyútsöca'. Chiböacu'. Bíti'rö gunu' dul-la', para cabí gaca quiu' tu le nácarö zi' ca lë na' guca quiu'.

<sup>15</sup> Guyijë' bönni' na', yöjtíxjöi'inë' yugu' bönni' judío unná bë' Jesús na' bunë' lë'. <sup>16</sup> Que lë ni na' bönni' judío unná bë' gula'bía ládxi'gaquië' Jesús, en gulé'ënnë' ilútië' Lë', tu' runë' yugu' lë ni cate' naca dza lá'ayi quégaquië'. <sup>17</sup> Bubi'ë didza' Jesús, rë' légaquië':

—Xuza' ná'atë runë' dxin, ate' neda' ca' runa' dxin.

<sup>18</sup> Que lë ni na' gulé'ë'nirönë' bönni' judío unná bë' ilútië' Jesús, calégasö tu' guditsjé' xibá que dza lá'ayi quégaquië', pero lësca' tu' gunné' Dios caz náquië' Xuzë', ate' caní naca nun cuinë' ca náquië' Dios.

*Yöl-la' unná bë' dë lu në'ë Zxí'inë' Dios*

<sup>19</sup> Ní'irö bubí'ë didza' Jesús, rë' légaquië':

—Le nácatë rea' libí'ili'. Biti' bi gaca guna' neda', Zxí'inë' Dios, rácasö quia', pero tuz lë na' rilé'eda' runë' Dios Xuz. Yúgu'të le runë' Dios Xuz, lësca' caní runa' neda', Zxí'inë'.

<sup>20</sup> Dios Xuz nadxí'inë' neda', Zxí'inë', en rulu'inë' neda' yúgu'të le runë', ate' yugu' le zxöntë'rö ca lë ni ulu'inë' neda',

le ilún ga ubánili' libí'ili'. <sup>21</sup> Ca na' runë' Dios Xuz, rusubanë' nupa nátigaca, en rugú'ë légaquië' yöl-la' na'bán, lësca' caní runa' neda', Zxí'inë', runödzcja' quégaca bönachi yöl-la' na'bán ca rë'ëni quézida'. <sup>22</sup> Cuntu nu ruchi'a rusöröë' Dios Xuz, pero chinudödë' lu na'a neda', Zxí'inë', yúgu'të yöl-la' unná bë' para uchi'a usöröa' bönachi. <sup>23</sup> Caní naca para ilún bal yúgu'të bönachi neda', Zxí'inë', ca na' tun bal Dios Xuz. Nu bití' run bal neda', Zxí'inë', bití' run bal Dios Xuz, nasöl-lë'ë neda', Zxí'inë' na'.

<sup>24</sup> 'Le nácatë rea' libí'ili'. Bönni' na' riyönnë' didza' ruá'a, en réajlë'ë Dios Xuz na' nasöl-lë'ë neda' dë yöl-la' na'bán idú queë', ate' bití' irugu queë'. Náquië' ca nu chinubán lu yöl-la' guti tu' chidë yöl-la' na'bán idú queë'. <sup>25</sup> Le nácatë rea' libí'ili', za' dza, en chiridxín dza na', cate' ila'yöni nupa chinátigaca chi'a neda', Zxí'inë' Dios, ate' nupa ila'yöni xtídza'a, en ilún ca rnna, huóata' yöl-la' na'bán quéguequi. <sup>26</sup> Ca na' dë lu në'ë Dios Xuz unödzcjë' yöl-la' na'bán quégaca bönachi, lësca' caní benë' ga dë lu na'a neda', Zxí'inë', unödzcja' yöl-la' na'bán quégaca bönachi. <sup>27</sup> Lësca' caní budödë' lu na'a yöl-la' unná bë' uchi'a usöröa' bönachi, tu' naca' Bönni' Guljë' Bönachi. <sup>28</sup> Bití' ubánili' ca naca lë ni, tu' huadxín dza cate' yúgu'të nupa chinátigaca ila'yöni chi'a, <sup>29</sup> en ulu'rúaj yeru ba. Ulu'bán nupa na' gulún le naca tsahui', en huóata' yöl-la' na'bán quéguequi, pero nupa na' gulún le bití' naca tsahui', ulu'bán, ate' irugu quéguequi ilátigaca tsaz.

### *Le naca bë' le náquië' Jesús*

<sup>30</sup> Gunnë' ca' Jesús:

—Bití' bi gaca guna' la' néda'sö. Ca naca le riyönda' rë' Xuza' neda', caní ruchi'a rusöröa', ate' ca na' ruchi'a rusöröa' naca tsahui', tu' cabí runa' ca rë'ënisida' neda', pero ca rë'ëni quézinë' Xuza' nasöl-lë'ë neda', runa'. <sup>31</sup> Channö neda' runa' ba nalí que la' cuin caza', bití' naca lesaca' lë na' runa' ba nalí. <sup>32</sup> Zoa Nu yúbölö Nu run ba nalí quia' neda', Lë' Xuza', ate' nözda' naca lesaca' le runë' ba nalí quia'. <sup>33</sup> Libí'ili' gusölla'li' bönni' yöjnábiguequinë' Juan, ate' lë na' benë' ba nalí quia' naca idútë li. <sup>34</sup> Neda' bití' naquinda' nu bönni' gunë' ba nalí quia', pero ruá'a didza' caní para uláli'. <sup>35</sup> Didza' bë'ë Juan na' gulaca ca tu guí' yöri, le guyegui, en buzení', ate' libí'ili', tu chí'isö guyaza ladxí'li' uzí'ili' xibé beni' queë'. <sup>36</sup> Na'a, zoa le run ba nalí quia' neda' le nácarö idú li ladxe' ca lë na' benë' ba nalí quia' Juan. Yugu' le budödë' Dios Xuz lu na'a guna', la' leze na' runa', ate' yugu' lë na' runa', tun ba nalí quia', en nácgaca bë' gusöl-lë'ë Dios Xuz neda'. <sup>37</sup> Lësca' Dios Xuz nasöl-lë'ë neda' runë' ba nalí quia'. Catu caz biyönili' chi'ë, en catu caz bilé'eli' lahuë', <sup>38</sup> en cabí nazí' lu ná'ali' xtídzë'ë, tu'

cabí réajlë'ëli' neda', Nu na' gusöl-lë'ë. <sup>39</sup> Rusédali' le nazúaj lu guichi lá'ayi, tu' réquili' huáta' yöl-la' na'bán idú queëli' ni'a que lë na' nazúaj lu guichi lá'ayi, ate' lë na' nazúaj lu guichi run ba nalí quia' neda'. <sup>40</sup> Biti' ré'ënili' guídali' quia' neda' para gata' yöl-la' na'bán queëli'.

<sup>41</sup> 'Biti' riguilja' yöl-la' ba le ila'gú'u bönachi neda'. <sup>42</sup> Neda' núnbë'a libí'ili', en nözda' bití' nadxí'ili'-në' Dios. <sup>43</sup> Bidxina' ni uláz queë' Dios Xuz, ate' libí'ili' bití' rizí' lu ná'ali' neda', pero channö huadxín nu yúbölö nu guídi rácasö que, si' lu ná'ali' nu na'. <sup>44</sup> ¿Nacxi caz gaca tséajlë'ëli' Dios channö rizí'ili' yöl-la' run zxön que luzá'ali' tuli' ia'tuli', en bití' riguíjali' yöl-la' run zxön na' za' lu në'ë la's dui Dios? <sup>45</sup> Biti' uzóa ícjali' uzéguia' libí'ili' didza' lahuë' Xuza'. Nu na' uzegui libí'ili' didza' naca lë cazë' Moisés, bönni' na' ruzxöni ládxi'li'-në', sal-la' gútië' dza ni'te. <sup>46</sup> La'tu' réajlë'ëli'-në' Moisés, tséajlë'ëli' ca' neda', tu' buzúajë' Moisés lu guichi ca naca quia' neda'. <sup>47</sup> Na'a, ¿nacxi caz gaca tséajlë'ëli' didza' ruá'a neda' channö cabí réajlë'ëli' yugu' le buzúajë' Moisés lu guichi?

## 6

*Rugahuë' Jesús zíanrö ca chi-un gayuá' bönachi*  
(Mt. 14:13-21; Mr. 6:30-44; Lc. 9:10-17)

<sup>1</sup> Gudödi guca lë ni, guyijë' Jesús ia'tsölá'a Nísado' Que Galilea, nazí'i le ca' Nísado' Queë' Tiberias. <sup>2</sup> Bönachi zían yöjnógaca Jesús tu' bila'lé'e yugu' yöl-la' huáca benë', cate' bunë' bönni' té'enë'. <sup>3</sup> Ní'irö gurenë' Jesús, guyijë' ga naca tu lu guí'ado', ga ni' gurö'ölenë' yugu' bönni' usëda queë'. <sup>4</sup> Chizóa idxín Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. <sup>5</sup> Cate' guchisa lahuë' Jesús, en bilé'enë' bönachi zían zá'gaca ga zoë', ní'irö rë' Felipe: —¿Gazxi tsöjö'uru' yöta xtila le ilágugaca bönachi zían ni?

<sup>6</sup> Caní gunnë' Jesús para si' bë'ë Felipe na', tu' chinözinë' Lë' naca gunë'. <sup>7</sup> Bubi'ë didza' Felipe, rnnë':

—La'tu' sí'iru' yöta xtila len lázxjaru' que idú xunu' beo', bití' guequi láti'do' huéaj le ilágugaca bönachi zían ni.

<sup>8</sup> Ní'irö tu bönni' usëda queë' Jesús, lë' Andrés, böchë'ë Simón Pedro, rë' Lë', rnnë':

<sup>9</sup> —Ni zóabi' tubi' bi'i bönni', nuá'abi' gayu' yöta xtila néquiguequini zxoa' cebada, en chópaba' böla cuídi'do'. ¿Naru' huéqui'tse ugagu le do' ni cate' xö bönachi?

<sup>10</sup> Ní'irö Jesús rë' légaquië':

—Guli'gún ga ila'bö' bönachi zían ni lu yu.

Lataj na', rö'öda' daca', ate' gula'bö'ë idú ca chi-un gáyu'ë bönni' ni'. <sup>11</sup> Ní'irö gudélë'ë Jesús yugu' yöta xtila na'. Cate' chigudxë' Dios: “Xclenu”, gudísië' le quégaquië' bönni' usëda

queë', ate' légaquië' gula'guisië' le quégaca yúgu'të nupa na' rō'gaca lu daca' ni'. Lësca' caní gulunë' quégacaba' böla cuídi'do' na', ate' gulahuë' tsca gulë'ënnë' ilahuë'. <sup>12</sup> Cate' chibulu'huöljanë', Jesús gudxë' yugu' bönni' usëda queë', gunnë':

—Buli'túbi le bizxaj nagá'anagaca, para cabí ilaca ditaj.

<sup>13</sup> Bulu'tubë' ca', ate' bulu'lié' chinnu ga'börado' yugu' le bizxaj quégaca gayu' yöta xtila néquiguequini zxa' cebada na', le bulu'gá'ana quégaquië' bönni' na' gulahuë'. <sup>14</sup> Cate' bila'lé'enë' bönni' ni' yöl-la' huáca na' benë' Jesús, ta'nnë':

—Le nácatë bönni' ni náquië' bönni' na' ru'ë didza' uláz queë' Dios, bönni' na' ral-la' guídë' yödzölió ni.

<sup>15</sup> Tu' réquibe'enë' Jesús tē'ënnë' ila'chë'ë Lë' bayudxi para ilunë' ga inná bé'enë' légaquië', que lë ni na' buzë'ë ni', sa'yéajë' tuzë' tu lu guí'a.

*Rizë'e ni'ë Jesús lu nísado'*

(Mt. 14:22-27; Mr. 6:45-52)

<sup>16</sup> Cate' chizá' ral-la, yöjáquië' bönni' usëda queë' Jesús, ate' bila'dxinë' ra' nísado'. <sup>17</sup> Gula'benë' tu lë'e bárcodo' ni', en söjáquië' ta'dödë' lu nísado' na', para ulu'dxinë' Capernaum. Chinaca chul-la ate' Jesús biti' ridxíninë' ga na' nacu'ë. <sup>18</sup> Gusí lo recja bö' budunu' lu nísado' na', ate' riyasa ridxía nisa na'. <sup>19</sup> Cate' chibulu'së'ë bárcodo' na', le guzá' le naca tsca rizá'aru' tu hórásö, ní'irö bila'lé'enë' Jesús rizë'e ni'ë lu nísado' na', en zë'ë ribíguë'ë ga na' zeaj barco na', ate' guladxí gula'dzöbinë'. <sup>20</sup> Ní'irö Jesús rë' légaquië':

—Neda' caz ni. Biti' gádxili'.

<sup>21</sup> Ní'irö len yöl-la' rudzeja quégaquië' bulu'guélë'ë Lë' lë'e bárcodo' na', ate' la' bidxintë bárcodo' na' lu yu bidxi ga ni' söjáquië'.

*Bönachi zían tu'guilaj Jesús*

<sup>22</sup> Dza buropi ni', guléquië'e bönachi zían na' nagá'anagaca ia'tsölá'a nísado' bidxín tuz bárcodo' ni', ate' Jesús biti' gurénlenë' yugu' bönni' usëda queë' lë'e bárcodo' na', pero légacasë' na' yöjáquië'. <sup>23</sup> Ní'irö bila'ruáj ia'bal-la bárcodo' lu yödzö Tiberias, ate' bila'dxín tu lataj le dë gála'sö ga ni' gulahuë' yöta xtila cate' ni' Xanru' Jesús gudxë' Dios: "Xclenu" que. <sup>24</sup> Tu' bila'lé'enë' bíti'rö zoë' Jesús ni', en biti' nacu'ë bönni' usëda queë' ni', que lë ni na' gula'benë' lë'egaca bárcodo' na', ate' yöjáquië' Capernaum, tu'guiljë' Jesús.

*Náquië' Jesús yöta xtila nabánigaca tsaz bönachi*

<sup>25</sup> Cate' bila'dxín bönachi zían na' ia'tsölá'a nísado' na', yöjxáca'gaquië' Jesús, en tē' Lë':

—Bönni' Usedi, ¿bátaxi bidxinu' ni'?

26 Bubi'ë didza' Jesús, rë' légaquië':

—Le nácatë rea' libí'ili': Ruguílajli' neda', calëga tu' bilé'eli' yugu' yöl-la' huáca bena', pero tu' gudáguli' yöta xtila ni', en böljali'. 27 Guli'gún dxin, calëga para sí'ili' la' huagu ridödi que, pero para sí'ili' la' huagu na' ugá'anatica'sö, en runna yöl-la' na'bán idú. Lë ni naca la' huagu neda', Bönni' Guljë' Bönachi, gunna' queëli', tu' bulu'ë lahui Xuza' Dios naca' Zxí'inë'.

28 Ní'irö gula'nábinë' Lë', ta'nnë':

—¿Bizxi run bayudxi guntu' para guntu' le raza ládxë'ë Dios?

29 Bubi'ë didza' Jesús, rë' légaquië':

—Lë ni le raza ládxë'ë Dios, tséajlë'ëli' neda', naca' nu gusöl-lë'ë Lë'.

30 Ní'irö gula'nábinë' Lë', ta'nnë':

—¿Bizxi le naca bë' runu', le ilé'etu' para tséajlë'ëtu' Li'? ¿Bizxi yöl-la' huáca runu'? 31 Gulahuë' xuz gudödi queëru' yöta xtila nazí'i le maná lu lataj cá'asö, ca nazúaj lu guichi lá'ayi, rna: "Yöta xtila que yehua' yubá Moisés bë'ë quégaquië', gulahuë'."

32 Bubi'ë didza' Jesús, rë' légaquië':

—Le nácatë rea' libí'ili': Calëga Moisés na' bennë' queëli' yöta xtila que yehua' yubá, pero Xuza' Dios runnë' queëli' yöta xtila le naca idú que yehua' yubá. 33 Yöta xtila na' runnë' Dios quégaca bönachi naca' neda', lë na' birúaj yehua' yubá, en runödzej yöl-la' na'bán quégaca bönachi yödzülió ni.

34 Ní'irö të' Lë':

—Xan, bénnatica'sö queëtu' yöta xtila na'.

35 Jesús rë' légaquië':

—Neda' caz naca' yöta xtila nabánigaca tsaz bönachi. Nu za'len neda', huölaj udzé'e tsaz nu na' le naca queë' Dios, ate' nu tséajlë' neda', chinë'aj tsaz le naca queë' Dios. 36 Naca ca na' chigudxi caza' libí'ili': "Sal-la' rilé'eli' neda', biti' ca' réajlë'ëli' neda'." 37 Yúgu'të nupa na' runnë' Xuza' quia', ídigaca quia', ate' nupa na' zaca quia', biti' usá'gaca'-në'. 38 Caní naca, tu' bötja' birúaja' yehua' yubá, calëga para guna' ca rë'ënda' neda' caz, pero para guna' ca rë'ënë' Dios Xuz, nasöl-lë'ë neda'. 39 Lë ni le rë'ënë' Xuza' nasöl-lë'ë neda', rë'ënë' cabí unítia' nitú nupa na' bennë' quia', pero usubana' léguequi dza údxi. 40 Lë ni le rë'ënë' Dios Xuz nasöl-lë'ë neda', rë'ënë' gata' yöl-la' na'bán quéguequi, yúgu'të nupa na' ila'lé'e neda', Zxí'inë', en ila'yéajlë' neda', ate' neda' usubana' léguequi dza údxi na'.

41 Ní'irö gula'nnë' queë' Jesús bönni' judío unná bë' tu' gunné': "Neda' caz naca' yöta xtila na' bötaj, birúaj yehua' yubá." 42 Que lë ni na' ta'nnë':

—¿Naru' cabí bönni' ni Jesús, zxí'inë' José? Nunbë' cázaru' xuz xinë'ë. ¿Nacxi caz naca na', rnnë' bönni' ni: "Bötja' birúaja' yehua' yubá"?

43 Ní'irö bubi'ë didza' Jesús, rë' légaquië':

—Biti' innëli' quia' la' libí'sili'. 44 Biti' séqui'në' nitúë' bönni' guidë' quia' channö cabí idigu'ë quia' Xuza' nasöl-lë'ë neda' nu na', ate' neda' usubana' nu na' dza údxi. 45 Nazúaj lu guichi lá'ayi ca gula'nnë' bönni' gulu'ë didza' uláz queë' Dios, le rnna caní: Dios usédinë' yúgu'të bönachi. Que lë ni na', yúgu'të bönni' ta'yönnë' chi'ë Xuza', en nazédagaquië' lu në'ë Lë' zá'gaquië' quia'.

46 'Cuntu nu bönni' bilé'enë' Dios Xuz, pero tuzë' Bönni' na' birúajë' ga zoë' Dios. Bönni' ni rilé'e quézinë' Dios Xuz. 47 Le nácatë rea' libí'ili': Núti'tës bönni' réajlë'ë neda' dë yöl-la' na'bán idú queë'. 48 Neda' caz naca' yöta xtila nabánigaca tsaz bönachi. 49 Gulahuë' xuz xtó'oli' yöta xtila na' nazí'i le maná lu lataj cá'asö, en cate' bizá'a dza quégaquië' gulatië'. 50 Neda' naca' yöta xtila ruhuötaj rirúaj yehua' yubá, ate' núti'tës bönni' gahuë' le, bití' ca' gátië' bönni' na'. 51 Neda' caz naca' yöta xtila na' nabánigaca bönachi, le bötaj birúaj yehua' yubá, ate' channö núti'tës bönni' gahuë' yöta xtila na', gaca bántica'së' bönni' na'. Yöta xtila na' runödza' neda' naca xipëla'a, le runödza' para gata' yöl-la' na'bán quégaca bönachi yödzölió.

52 Ní'irö bönni' judío unná bë' gula'chixi luzá'agaquië', ta'nnë':

—¿Naru' huácatsö bönni' ni gunnë' queëru' xipëlë'ë le gáguru'?

53 Que lë ni na' Jesús rë' légaquië':

—Le nácatë rea' libí'ili': Channö cabí gáguli' xipëla'a neda', Bönni' Guljë' Bönachi, en channö cabí guí'jali' xichöna', bití' ca' zóalen libí'ili' yöl-la' na'bán na'. 54 Núti'tës nu gagu xipëla'a, en guí'aj xichöna', dë que yöl-la' na'bán idú, ate' neda' usubana' nu na' dza údxi. 55 Caní gaca, tu' naca xipëla'a la' huagu idú, ate' xichöna' naca tu le naca idú para nu guí'aj le. 56 Núti'tës bönni' gahuë' xipëla'a, en guí'jë' xichöna', sóaléntica'së' bönni' na' neda', ate' neda' sóaléntica'sa' lë'. 57 Ca na' zoë' nabanë' Dios Xuz nasöl-lë'ë neda', ate' neda' nabánida' Lë', lësca' caní ibáninë' neda' núti'tës bönni' gahuë' neda'. 58 Lë ni yöta xtila bötaj birúaj yehua' yubá, en bití' naca ca yöta xtila na' nazí'i le maná, lë na' gulahuë' xuz xtó'oli', en cate' bizá'a dza quégaquië', gulatië'. Núti'tës bönni' gahuë' yöta xtila ni sóatica'së' ibanë'.

59 Yugu' didza' ni bë'ë Jesús ga naca tu lu yu'u ga tu'dubë' bönni' judío, en tu'sëdë' queë' Dios, ate' guca lë ni tsanni ni rusédinë' bönachi Capernaum.

*Didza' rúnnagaca queëru' yöl-la' na'bán idú*

60 Cate' bila'yönnë' didza' ni, zían bönni' usëda queë' Jesús gula'nnë' que, ta'nnë':

—Banígatë didza' ni. ¿Nuzxi caz gaca si' lu në'e le?

<sup>61</sup> Réquibe'enë' Jesús ta'nnë' bönni' usëda queë' que xtídzë'ë, ate' gunábinë' légaquië', rnnë':

—¿Naru' run didza' ni libí'ili' zi'? <sup>62</sup> ¿Nacxi caz gaca channö hualé'eli' neda', Bönni' Guljë' Bönachi, huëpa' huöja' ga ni' zoa' zí'alö? <sup>63</sup> Le naca queë' Dios Bö' Lá'ayi naca le runna yöl-la' na'bán queëli'. Le naca bëla'sö cuntu nu uzi' xibé. Didza' na' bë'lëna' libí'ili' nácagaca queë' Dios Bö' Lá'ayi, en rúnnagaca yöl-la' na'bán quégaca bönachi. <sup>64</sup> Na'a, bál-lali' biti' réajlë'ëli'.

Gunnë' caní Jesús tu' nözinë' dza ni'te nupa na' biti' ta'yéajlë', enca' nu na' udödi Lë' lu ná'agaquië' bönni' ilútië' Lë'. <sup>65</sup> Que lë ni na' gunnë':

—Que lë ni na' chigudxi caza' libí'ili': Biti' séqui'në' nitúë' bönni' tē'ë neda' channö Dios Xuz cabí gu'ë lë' lataj.

<sup>66</sup> Dza na' gulaca chopa ládxi'gaquië' zían bönni' usëda queë', en bítirö gula'dálenë' Lë'. <sup>67</sup> Ní'irö Jesús gunábinë' idxínnutë' bönni' usëda queë' na', rë' légaquië':

—¿Naru' ubíga'tsali' ca' libí'ili'?

<sup>68</sup> Bubi'ë didza' Pedro, rë' Lë':

—Xan, ¿nuzxi que tséajtu'? Li' napu' didza' rúnnagaca queëtu' yöl-la' na'bán idú. <sup>69</sup> Netu' réajlë'ëtu' Li', en núnbë'ëtu' Li', nacu' Cristo na' nasöl-lë'ë Dios, en nacu' ca' Zxí'inë' Dios ban.

<sup>70</sup> Bubi'ë didza' Jesús, rë' légaquië':

—Gurö caza' libí'ili' chínnuli' ni, pero tuë' bönni' ládajli' libí'ili' dzaga tu' xihui' lë'.

<sup>71</sup> Didza' ni bë'ë Jesús ca naca queë' Judas Iscariote, zxí'inë' tu bönni' lë' Simón, tu' náquië' Judas bönni' na' udödë' Jesús lu ná'agaquië' bönni' ilútië' Lë', en nabábalenë' ia' chinéajë' bönni' usëda queë' Jesús.

## 7

### *Bönni' böchi' cazë' Jesús biti' ta'yéajlë'ë Lë'*

<sup>1</sup> Gudödi guca lë ni ridë' Jesús luyú Galilea. Biti' gú'unnë' tsejë' luyú Judea tu' tē'ënnë' bönni' judío unná bë' nacu'ë ni' ilútië' Lë'. <sup>2</sup> Dza ni' chizóa idxín laní quégaquië' bönni' judío cate' tu'subanë' ca gula'cu'ë xuz xtó'ogaquië' zxan libín lága'do'. <sup>3</sup> Que lë ni na' yugu' bönni' böchë'ë Jesús gulë' Lë', ta'nnë':

—Birúaj ni, en guyéaj luyú Judea para ila'lé'enë' ca' bönni' usëda quiu' nacu'ë ni' yugu' yöl-la' huáca runu'. <sup>4</sup> Channö rë'ëne' nu bönni' ilúnbë'e bönachi lë', biti' runë' bagáchi'sö le runë'. Tu' runu' yugu' yöl-la' huáca caní, buluí' i' cuinu' lógaca yúgu'të bönachi.

<sup>5</sup> Caní gula'nnë', tu' cabí ta'yéajlë'ë bönni' böchë'ë Jesús Lë'.

<sup>6</sup> Ní'irö Jesús rë' légaquië':



—Biti' ridxini dza quia' para ulu'i lahua' lógaca bönachi, pero dza queëli' tséajli' ni' chizóa caz. <sup>7</sup> Bönachi yödzölió ni bití' tu' zóa libí'ili' tsölá'aló, pero tu' zóa neda' tsölá'aló tu' runa' ba nali' quégaquië', rnníá' naca xihui' le tunë'. <sup>8</sup> Guli'tséaj libí'ili' lani' na'. Biti' tseja' lani' na' na'a tu' bití' ridxini dza quia'.

<sup>9</sup> Cate' chigudxë' légaquië' lë ni, bugá'anë' luyú Galilea.

*Sa'yéajë' Jesús lani' quégaca bönachi judío*

<sup>10</sup> Gudödi sôjáquië' bönni' böchë'ë Jesús lani' na', ní'irö sa'yéajë' ca' Lë', calëga yálajdo', pero bagáchi'sö sa'yéajë'. <sup>11</sup> Ga na' raca lani' na', bulu'guiljë' bönni' judío unná bë' Jesús, ta'nnë':

—¿Gazxi zoë' bönni' na'?

<sup>12</sup> Bönachi zían ni' gulu'ida' didza' ca naca queë' Jesús. Bal-lë' ta'nnë':

—Náquië' dxi'a.

Ia'bal-lë' ta'nnë':

—Biti' náquië' dxi'a tu' rizi' yé'enë' bönachi.

<sup>13</sup> Biti' bë'ë nitüë' bönni' didza' yálajdo' ca naca queë' Jesús, tu' tadxi bönachi zían na' le ilunë' yugu' bönni' judío unná bë'.

<sup>14</sup> Cate' chibidxín gatsaj lani' na', blë'ë Jesús ra' yudo', en busédinë' bönachi nacuá' ni'. <sup>15</sup> Bulu'báinë' bönni' judío, ta'nnë':

—¿Nacxi caz naca, rácadë'ë bönni' ni, en bití' ca' nazëdë' que yudo'?

<sup>16</sup> Bubi'ë didza' Jesús, rë' légaquië':

—Le rusédida' neda', calëga quia' naca, pero queë' Dios Xuz na' nasöl-lë'ë neda'. <sup>17</sup> Channö rë'ënë' nu bönni' gunë' ca rë'ënë' Dios, huéquibe'enë' bönni' na' channö nequi queë' Dios le rusédida' bönachi o channö rácasö quia' ruá'a didza'. <sup>18</sup> Nu bönni' ru'ë didza' rácasö queë', runë' caní para ilún bal bönachi lë', pero Bönni' na' rë'ënë' ilún bönachi bal Nu nasöl-la' lë', Bönni' ni ru'ë didza' idütë' li, en bití' ca' rizi' yë'ë.

<sup>19</sup> Moisés bennë' queëli' xibá queë' Dios, pero bití' runli' ca rinná bë' xibá na'. ¿Bizx que rizóa ribó'öli' gútili' neda'?

<sup>20</sup> Bulu'bí'i didza' bönachi zían na', të Lë':

—Tu' xihui' dzaga li'. ¿Nuzxi caz rizóa ribó'ö guti li'?

<sup>21</sup> Bubi'ë didza' Jesús, rë' légaquië':

—Tu yöl-la' huáca bena', ate' rubánili' yúgu'tëli'. <sup>22</sup> Le nácatë Moisés bennë' queëli' lë na' narugu lu xipëla'li' le naca bë', pero calëga Moisés caz bennë' queëli' lë na', pero guzxi'ë le lu ná'agaquië' xuz xtá'ahuë'. Na'a, sal-la' naca dza lá'ayi, richúguli' lu xipëla'gacabi' bi'i bönni'do' lë na' naca bë' néquiguequibi' queë' Dios. <sup>23</sup> Channö ta'zí'ibi' lu xipëla'gacabi' lë na' naca bë' cate' naca dza lá'ayi, para cabí quítsjali' xibá queë' Moisés, ¿naru' rilétseli' neda' tu' buna'-në' tu bönni', ate'

bóáquië' dxí'ado' cate' naca dza lá'ayi? <sup>24</sup> Biti' ral-la' uchi'a usörö lízili' ca', pero buli'chi'a buli'sörö ca naca le naca idútë li.

*Rigúxjö'ë Jesús ga narúajë'*

<sup>25</sup> Ní'irö gulu'ë didza' bal-lë' bönni' nacu'ë Jerusalén, ta'nnë':  
—¿Naru' calëga bönni' ni Nu na' tu'guiljë' bönni' judío unná bë' para ilútië' Lë'? <sup>26</sup> Buli'yútsöca', yálajdo' ru'ë didza', en biti' bi të' Lë'. ¿Naru' téquibe'enë' bönni' ta'nná bé'enë' rë'u, le nácatë bönni' ni náquië' Cristo, Nu na' ral-la' inná be'e rë'u? <sup>27</sup> Bönni' ni, nöz quezíru' gazxi bönni' Lë'. Cate' guidë' Cristo, cuntu nu inözi gazxi bönni' Lë'.

<sup>28</sup> Ní' zoë' Jesús rusédinë' bönachi chila yudo', en cate' biyönnë' didza' ni, ní'irö bë'ë zidzaj didza', rnnë':

—¿Naru' núnbe'etseli' neda', en nözitseli' gazxi bönni' neda'? Bida' ni, calëga rácasö quia', pero Dios caz nasöl-lë'ë neda', ate' Lë', biti' núnbë'ëli'-në' libí'ili'. <sup>29</sup> Neda' núnbe'eda'-në', tu' za'a queë' Lë', ate' Lë' cazë' nasöl-lë'ë neda'.

<sup>30</sup> Ní'irö gulunë' bayudxi ila'zönë' Lë', pero cuntu nu guzxön Lë', tu' cabí ridxini dza queë' tsu'ë lu ná'agaquië'.

<sup>31</sup> Gula'yéajlë' zían bönachi ni' Lë', ta'nná:

—Cate' guidë' Cristo, ¿naru' gunë' zíanrö yöl-la' huáca ca le runë' bönni' ni?

*Bönni' yudo' ta'söl-lë'ë nupa ila'zön Jesús*

<sup>32</sup> Bila'yönnë' bönni' yudo' fariseo yugu' didza' ni tuí'i bönachi ca naca queë' Jesús, ate' yugu' bixúz unná bë', en yugu' bönni' yudo' fariseo na' gula'söl-lë'ë ni'a ná'agaquië' para tsöjxöngaquië' Lë'. <sup>33</sup> Ní'irö Jesús gunnë':

—Ia'tú chí'isó sóalena' libí'ili', ate' ní'irö huöja' ga zoë' Xuza' nasöl-lë'ë neda'. <sup>34</sup> Uguíljalí' neda', pero biti' udzölili' neda'. Ga ni' tsöjsóa' neda' biti' gaca guídali' libí'ili'.

<sup>35</sup> Ní'irö të' luzá'agaquië' bönni' judío, ta'nnë':

—¿Gazxi tséajtsë' bönni' ni, ga ni' biti' udzöliru'-në'? ¿Naru' huayéajtsë' ga nacu'ë bönni' judío násilasigaquië' idútë yödzölió, en usédinë' yugu' bönni' zi'tu' ni'? <sup>36</sup> ¿Bizxi rë'ëni inná didza' na' bë'ë: “Uguíljalí' neda', pero biti' udzölili' neda'”, enca': “Ga ni' tsöjsóa' neda' biti' gaca guídali' libí'ili'”?

*Nisa yegu le runna yöl-la' na'bán queëru'*

<sup>37</sup> Cate' ni' naca dza údxi que laní na', dza na' naca lo, guzuínë' Jesús, en bë'ë zidzaj didza', rnnë':

—Channö zoë' nu bönni' ribidxi icja ládxi'da'ahuë', ral-la' guidë' bönni' na' ga zoa', en guí'jë'. <sup>38</sup> Nu bönni' réajlë'ë neda', gaca queë' ca na' nazúaj lu guichi lá'ayi, rna: Lu icja ládxi'da'ahuë' bönni' na' ilén le naca ca nisa yegu, lë na' ulu'zí xibé bönachi, gata' yöl-la' na'bán queéguqui.

<sup>39</sup> Didza' ni bē'ē Jesús ca naca queē' Dios Bō' Lá'ayi, Nu ralla' idisóalen bōnni' na' ila'yéajlě'ē Jesús. Caní gunné' Jesús tu' cabí ridxíninē' Dios Bō' Lá'ayi, tu' cabí ruhuépinē' Jesús ga tsépisētērē'.

*Ta'rúaj choplō bōnachi*

<sup>40</sup> Cate' bila'yōni didza' ni, gula'nná bal-la bōnachi zían na', ta'nná:

—Le nácatē Bōnni' ni náquiē' Bōnni' na' ru'ē didza' uláz queē' Dios, Bōnni' na' guzxí' lu nē'ē Dios isól-lě'ē queēru'.

<sup>41</sup> Ta'nnē' ia'bal-lě':

—Bōnni' ni náquiē' Cristo.

Ta'nná bal-la bōnachi:

—¿Naru' irúajtsē' Cristo luyú Galilea? <sup>42</sup> Nazúaj lu guichi lá'ayi le rnna: “Cristo galjē' ladaj di'a dza queē' David, en gáquiē' ca' bōnni' Belén le guca ladzē' David na'.”

<sup>43</sup> Caní guca, bila'rúaj bōnachi na' choplō tu' nōzinē' Jesús.

<sup>44</sup> Tě'ēnnē' bal-lě' ila'zōnē' Jesús, pero cuntu nu bi ben queē'.

*Biti' ta'yéajlě'ē Jesús bōnni' unná bē'*

<sup>45</sup> Ní'irō bulu'dxinē' ni'a ná'agaquiē' yugu' bixúz unná bē', en yugu' bōnni' yudo' fariseo ga na' nacu'ē bōnni' yudo' na', atē' légaquiē' gulē' ni'a ná'agaquiē' na', ta'nnē':

—¿Bizx que biti' dichē'ēli'-nē'?

<sup>46</sup> Bulu'bi'ē didza' ni'a ná'agaquiē', ta'nnē':

—Cuntu nu bōnni' ru'ē didza' ca ru'ē didza' Bōnni' ni.

<sup>47</sup> Ní'irō bulu'bi'ē didza' bōnni' yudo' fariseo na', ta'nnē':

—¿Naru' bē'tsali' lataj guzxí' yé'enē' ca' libí'ili'? <sup>48</sup> ¿Naru' guyéajlě'tsē' Lē' nu bōnni' unná bē' o nu bōnni' yudo' fariseo?

<sup>49</sup> Libí'ili' dxíali' dō' tu' cabí rácali' xibá queē' Dios.

<sup>50</sup> Zoē' ca' Nicodemo ni', bōnni' na' bidxinē' ga zoē' Jesús chi'i dzō'ólō, tu' náquiē' ca' bōnni' yudo' fariseo, atē' rē' légaquiē':

<sup>51</sup> —¿Naru' richúguru' queē' tu bōnni' gátiē' lu xibá queēru' channō cabí yōniru' lē' zí'alō para inōziru' bi benē'?

<sup>52</sup> Ní'irō bulu'bi'ē didza' ia'zíca'rē' na', tē' lē':

—¿Nácatso' ca' li' bōnni' Galilea? Bulaba le nazúaj lu guichi lá'ayi, atē' uyú' catu caz birúaj nitúē' bōnni' ru'ē didza' uláz queē' Dios luyú Galilea.

<sup>53</sup> Ní'irō yōjhuōjgaquiē' lidxi que queēgaquiē'.

## 8

<sup>1</sup> Guyijē' Jesús ga naca lu Guí'a Yaga Olivo.

*Nigula naguútsjanu xibá que yōl-la' nutsaga na'*

<sup>2</sup> Cate' za' rení' budxinē' Jesús ra' yudo', atē' bila'dxín yúgu'tē bōnachi ga zoē'. Gurō'ē Jesús, rusédinē' légaquiē'.

<sup>3</sup> Ní'irō yugu' bōnni' yudo' usedi, en yugu' bōnni' yudo' fariseo duchē'ēgaquiē'-nu tu nigula ga zoē' Jesús, tu' gula'dzōlinē'-nu

ni' riguítspanu xibá que yöl-la' nutsaga na'. Bulu'sudxinë'-nu lógaca bönachi na' tu'zë náagaca Jesús, <sup>4</sup> ate' tē' Lē':

—Bönni' Usedi, nigula ni guzxöntu'-nu ni' runnu dul-la' riguítspanu xibá que yöl-la' nutsaga na'. <sup>5</sup> Lu xibá queë' Moisés, gunná bé'enë' netu' uládxí'tu'-nu guiöj nu nigula runnu caní, para gátinu. ¿Názxiga Li', nacxi rno'?

<sup>6</sup> Caní gula'nnë' para ila'zì' bë'ë Jesús para ila'zéqui'në' ulu'zéguië' Lē' didza'. Ní'irö biyéchuë' Jesús, ruyúë' lu yu, en ruzúajë' lu yu na' len xibön në'ë. <sup>7</sup> Cate' gula'nábide'enë' Lē', ní'irö buzuínë' Jesús, en rē' légaquië':

—Núli' cabí nunli' dul-la' isí loli' uládxí'li'-nu guiöj.

<sup>8</sup> Leyúbölö biyéchuë' Jesús, ruyúë' lu yu, en buguelë'ë ruzúajë' leyúbölö lu yu na'. <sup>9</sup> Cate' bila'yönnë' didza' ni, bulu'xösa ládxi'do'gaquië' légaquië', ate' bila'rúajë' tu tuë'. Gula'sí lógaquië' bönni' gúlarö ga bidxintë bönni' cuidi'. Nagá'anë' Jesús ni', dzáganu nigula na' Lē' gatsaj láchui'lö nupa na' tu'zë náagaca Lē'. <sup>10</sup> Ní'irö buzuínë' Jesús leyúbölö, en cuntu nu bilé'enë' nu ruzegui lënu didza', pero túzinu nigula na', ate' rē'ë-nu:

—Nígúla, ¿gazxi nacuá' nupa na' bulu'zegui li' didza'? ¿Naru' cabí zoa nu bönni' richúguië' quiu'?

<sup>11</sup> Lënu rnanu:

—Cuntu nu caz, Xan.

Ní'irö Jesús rē'ë-nu:

—Lëzca' neda', biti' richuga' quiu'. Böaj lidxu', en bíti'rö gunu' dul-la'.

*Náquië' Jesús bení' quégaca bönachi yödzülió*

<sup>12</sup> Leyúbölö Jesús bë'lenë' bönachi didza', rnnë':

—Neda' naca' bení' quégaca bönachi yödzülió. Nu bönni' zá'lenë' neda', biti' tē' ga naca chul-la' que dul-la', pero tu bení' sóalen bönni' na' le ulu'í' lë' naca gata' yöl-la' na'bán idú queë'.

<sup>13</sup> Ní'irö tē' Lē' bönni' yudo' fariseo, ta'nnë':

—Li' runu' ba nalí que la' cuinsu'. Biti' naca lesaca' le runu' ba nalí. Nítisö naca.

<sup>14</sup> Bubi'ë didza' Jesús, rē' légaquië':

—Sal-la' runa' ba nalí que la' cuinsa', idütë li naca le runa' ba nalí, tu' nözda' ga birúaja', en ga tseja', pero libí'ili' biti' nözili' gazxi za'a, en calëga gazxi tseja'. <sup>15</sup> Libí'ili' ruchi'a rusöröli' ca náagaca le taca yödzülió ni, pero neda', rácasö quia' cuntu nu bönni' ruchi'a rusöröa' queë'. <sup>16</sup> La'tu' uchi'a usöröa', ca nácatë uchi'a usöröa', tu' calëga néda'sö uchi'a usöröa', pero Xuza' nasöl-lë'ë neda' gunë' neda' tsözxön. <sup>17</sup> Lëzca' caní lu xibá queë' Moisés nazúaj lu guichi le rna: Le tunë' ba nalí chopë' bönni', idütë li naca. <sup>18</sup> Neda' runa' ba nalí que la' cuinsa', ate' Xuza' nasöl-lë'ë neda', runë' ca' ba nalí quia'.

19 Ní'irö bönni' yudo' fariseo na' gula'nábinë' Lë', ta'nnë':

—¿Gazxi zóatsë' Xuzu'?

Bubi'ë didza' Jesús, rë' légaquië':

—Biti' núnbë'ëli' neda', en biti' núnbë'ëli'-në' Xuza'. La'tu núnbë'ëli' neda', lësca' Xuza' gúnbë'ëli'-në'.

20 Yugu' didza' ni bë'ë Jesús cate' ni' zoë' rusédinë' bönachi lu chila yudo', ga na' nacuá' guí'ina gapa ta'gu'ë gun que yudo', pero cuntú nu guzxón Lë', tu' cabí ridxini dza queë' tsu'ë lu ná'agaquië'.

*Rnnë' Jesús: "Ga tseja' neda', biti' gaca guídali'"*

21 Leyúbölö Jesús rë' légaquië', rnnë':

—Uzá'a yödzölió ni, ate' uguí'jali' nu usölá libí'ili', pero ugá'ana dul-la' nabága'li', en gátili'. Ga tseja' neda', biti' gaca guídali'.

22 Ní'irö gulu'ë didza' bönni' judío unná bë', ta'nnë':

—¿Naru' guti cuinë'? Rnnë': "Ga tseja' neda', libí'ili' biti' gaca guídali'."

23 Jesús rë' légaquië':

—Libí'ili' nácali' que luyú dë cadxí'ilö ni, pero neda' za'a yehua' yubá xitsá'. Libí'ili' nácali' bönachi yödzölió ni, pero neda' biti' naca' bönni' yödzölió ni. 24 Que lë ni na' gudxa' libí'ili': Ugá'ana dul-la' nabága'li', en gátili'. Channö cabí tséajlë'ëli' naca caza' Nu usölá, ugá'ana dul-la' nabága'li', en gátili'.

25 Ní'irö gula'nábinë' Lë', ta'nnë':

—¿Nuzxi caz nacu'?

Jesús rë' légaquië':

—Naca' la' leze ca na' chigudxa' libí'ili' dza ni'te. 26 Zían le ral-la' guía' libí'ili', en uchi'a usöröa' le naca queëli'. Didza' idútë li ru'ë Xuza' nasól-lë'ë neda', ate' didza' riyönda' ru'ë Lë', ru'ílena' bönachi yödzölió ni.

27 Biti' gula'yéajni'inë' ru'ílenë' légaquië' didza' ca naca queë' Dios Xuz. 28 Que lë ni na' Jesús rë' légaquië':

—Cate' idxín dza uchísali' neda', Bönni' Guljë' Bönachi, gútili' neda', ní'irö guéquibe'ëli' naca caza' Nu rusölá, en biti' bi runa' rácasö quia', pero ca na' rulu'í'inë' Xuza' neda', ca' ruá'a didza'.

29 Xuza' nasól-lë'ë neda' zóalenë' neda'. Biti' nucá'anë' Xuza' neda' tuza', tu' rúntica'sa' le raza ládxë'ë Lë'.

30 Cate' bë'ë Jesús didza' ni, bönni' zían gula'yéajlë'ë Lë'.

*Nupa nácaqaca zxi'inë' Dios, en nupa nadzúngaca lu na' dul-la'*

31 Ní'irö Jesús gudxë' yugu' bönni' judío na' ta'yéajlë'ë Lë', rnnë':

—Channö gúntica'sili' ca rna xtídza'a, gácali' idú bönni' usëda quia'. 32 Gúnbë'ëli' le naca idútë li, ate' le naca idútë li na' usölá libí'ili'.

<sup>33</sup> Bulu'bi'ë didza', të Lë':

—Abraham naquië' xuz gudödi queëtu', en cuntu nu ben netu' bönni' nadó'ogaca. ¿Rnatso': "Usöla libí'ili"?

<sup>34</sup> Jesús rë' légaquië':

—Le nácatë rea' libí'ili': Yúgu'të nupa tun dul-la', nadzúngaca lu na' dul-la'. <sup>35</sup> Nu naca bönni' nadó'o biti' ugá'anatica'sö lidxë' xan yu'u, pero nu naca zxí'inë' xan yu'u na' rugá'anatica'sö lidxi nu na' naca xan yu'u. <sup>36</sup> Caní naca, channö Nu na' naca Zxí'inë' Dios usöla libí'ili', le nácatë uláli'. <sup>37</sup> Nözda' naquië' Abraham xuz gudödi queëli', pero rizóa ribö'öli' gútili' neda', tu' cabí nazí' lu ná'ali' xtídza'a. <sup>38</sup> Neda' ruá'a didza' ca naca le bilé'eda' ga na' zoë' Xuza', pero libí'ili' runli' le biyönili' ga zoa xuz quézili'.

<sup>39</sup> Bulu'bi'ë didza', të Lë':

—Abraham náquië' xuztu'.

Ní'irö Jesús rë' légaquië':

—La'tu' nácali' idú zxí'ini xi'sóë' Abraham, gunli' ca na' benë' Abraham. <sup>40</sup> Na'a, rizóa ribö'öli' gútili' neda', sal-la' ruí'lena' libí'ili' didza' idútë li, didza' na' biyönda' bë'ë Dios. Biti' benë' Abraham caní. <sup>41</sup> Libí'ili' runli' ca run xuz quézili'.

Ní'irö të Lë':

—Netu' biti' ca' nácatu' bi'i lando'. Tuzë' Dios náquië' Xuztu'.

<sup>42</sup> Ní'irö Jesús rë' légaquië':

—La'tu' náquië' Dios idú Xúzili', huadxí'ili' neda', tu' birúaja' neda' ga zoë' Dios, en bida' luyú ni, ate' calëga rácasö quia' bida', pero Dios caz gusöl-lë'ë neda'. <sup>43</sup> ¿Bixx que biti' gaca tséajni'ili' didza' ruá'a? Naca tu' cabí rë'ënili' uzë nágali' xtídza'a. <sup>44</sup> Xuz quézili' naca tu' xihui'. Néquili' que tu' xihui', en rë'ënili' gunli' le rizë ladxi' xúzili' na'. Dza ni'te naca tu' xihui' nu guti bönachi, en cabí nazí' lu në'e le naca idútë li, tu' cabí ruí'i didza' idútë li. Cate' rizi' yë' tu' xihui', ca naca caz ruí'i didza', tu' naca nu rizi' yë', en naca ca xúzgaca caz nupa ta'zí' yë'. <sup>45</sup> Tu' ruá'a neda' didza' idútë li biti' réajlë'ëli' neda'. <sup>46</sup> ¿Núzxilöli' gaca usubága'li' neda' dul-la'? Channö ruá'a didza' idútë li, ¿bixx que biti' réajlë'ëli' neda'? <sup>47</sup> Nu naca queë' Dios, ruzë nagui xtídzë'ë Dios, pero libí'ili', tu' cabí nácali' queë' Dios, biti' ruzë nágali' xtídzë'ë.

*Cristo zoa cazë' zí'atëlö ca Abraham*

<sup>48</sup> Ní'irö bulu'bi'ë didza' yugu' bönni' judío, të Jesús:

—Catëz gunnatu' cate' gunnatu' nacu' bönni' Samaria, ate' dzaga tu' xihui' Li'.

<sup>49</sup> Bubi'ë didza' Jesús, rë' légaquië':

—Biti' dzaga tu' xihui' neda'. Neda' runa' Xuza' bal, ate' libí'ili' ruzóali' neda' tsöla'alö. <sup>50</sup> Biti' runa' zxön cuina'. Zoa Nu run zxön neda', ate' Lë' ruchi'a rusöröë' rë'u. <sup>51</sup> Le nácatë

rea' libí'ili': Nu bönni' si' lu në'ë xtídza'a, biti' ca' gátie' bönni' na'.

<sup>52</sup> Ní'irö yugu' bönni' judío na' tē' Lē', ta'nnē':

—Na'a réquibe'etu' dzaga tu' xihui' Li'. Abraham gútiē', ate' gulátiē' ca' bönni' gulu'ë didza' uláz queē' Dios, pero Li' rnno': “Nu bönni' si' lu në'ë xtídza'a, biti' ca' gátie' bönni' na'.”

<sup>53</sup> ¿Naru' nácatērötso' Li' zxön ca xúziru' Abraham? Gútiē' lē', ate' gulátiē' ca' bönni' gulu'ë didza' uláz queē' Dios. ¿Nuzxi caz run cuinu'?

<sup>54</sup> Bubi'ë didza' Jesús, rē' légaquiē':

—Channö neda' guna' zxön cuina', yöl-la' zxön na' biti' bi gaca. Xuza' runē' neda' zxön, ate' libí'ili' rnnali' náquiē' Dios queéli'. <sup>55</sup> Libí'ili' biti' núnbē'ëli'-nē' Dios Xuz, pero neda' núnbē'a-nē'. La'tu' innía': Biti' núnbē'a-nē', gaca' nu rizi' yē' ca na' nácali' libí'ili', rizi' yē'ëli'. Na'a, le nácatē núnbē'a-nē', en nazí' lu na'a xtídzē'ë. <sup>56</sup> Xúzili' Abraham budzéjanē' tu' ral-la' ilé'enē' dza soa' yödzölió ni, en sal-la' gútiē' dza ni'te, bilé'enē' le, en budzéjade'enē'.

<sup>57</sup> Ní'irö yugu' bönni' judío na' tē' Jesús, ta'nnē':

—Biti' yuí'inu' chi-un iz. ¿Naru' bilé'etsenu' Abraham?

<sup>58</sup> Jesús rē' légaquiē':

—Le nácatē rea' libí'ili': Zí'atēlō ca soē' Abraham, neda' zoa caza'.

<sup>59</sup> Ní'irö gula'guélē'ë guiōj para ulu'ladxē' Jesús, pero Lē' bunítitē cuinē', en burúajē' lō'a yudo' na'. Gudödē' gatsaj láhui'lō ga na' nacu'ë, ate' söhuōjē'.

## 9

### *Ruúnē' Jesús tu bönni' guljē' nachúl-latē lahuē'*

<sup>1</sup> Cate' gudödē' Jesús tu lataj, bilé'enē' tu bönni' ni' guljē' nachúl-latē lahuē'. <sup>2</sup> Gula'nábinē' Jesús bönni' usēda queē', ta'nnē':

—Bönni' Usedi, ¿nuzxi ben dul-la'? ¿Naru' bönni' ni o xuz xinē'ë tu' guljē' nachúl-latē lahuē'?

<sup>3</sup> Bubi'ë didza' Jesús, rē' légaquiē':

—Biti' naca tu' benē' dul-la' bönni' ni, en calēga tu' gulunē' dul-la' xuz xinē'ë, pero naca para ilá' lahui yöl-la' huáca queē' Dios ni'a queē' bönni' ni. <sup>4</sup> Run bayudxi gunru' xichinē' Xuza' nasöl-lē'ë neda', tsanni ni naca ca lahui' dza. Huadxín dza gaca chul-la que yöl-la' guti, cate' cuntu nu gaca gun dxin. <sup>5</sup> Tsanni ni zoa' yödzölió ni, naca' bení' quégaca bönachi yödzölió.

<sup>6</sup> Cate' Jesús budxi bē'ë didza' ni, gurú'unē' zxöna' lu yu, en benē' gúna'do' len zxöna' na', ate' bugu'ë guna' na' guiōj lahuē' bönni' na' nachul-la lahuē'. <sup>7</sup> Ní'irö rē' lē':

—Guyéaj yōjtibi lo' lu beaj nisa nazí'i le Siloé.

Siloé naca tu didza' hebreo le rnna: Nasöl-la'.

Ní'irö bönni' na' nachul-la lahuë' gуйijë' ni', yöjtibi lahuë'. Cate' buzë'ë ni' chirilé'enë'. <sup>8</sup> Ní'irö bulu'bani bönachi dzaga yu'u queë', en nupa ni' bila'lé'e lë' zí'atëlö cate' ni' nachul-la lahuë', ta'nná:

—¿Naru' calëga bönni' ni bönni' na' ribö'ë rinabë' nu bi unödzej queë'?

<sup>9</sup> Bal-lë' ta'nnë':

—Lë' na'.

Ia'bal-lë' ta'nnë':

—Calëga lë', pero ca rna' lahuë' bönni' na', rna' lahuë' ca bönni' ni.

Lë' rnnë':

—Neda' na'.

<sup>10</sup> Ní'irö gula'nábinë' lë', ta'nnë':

—¿Nacxi caz guca, guyalaj guiöj lo'?

<sup>11</sup> Bubi'ë didza', rë' légaquië':

—Bönni' na' lë' Jesús benë' gúna'do', ate' gudëbë' gúna'do' na' guiöj lahua', en gudxë' neda': "Guyéaj ra' beaj nisa nazí'i le Siloé, yöjtibi lo'." Guyija' ni', yöjtibi lahua', ate' guyálajtë guiöj lahua'.

<sup>12</sup> Ní'irö gula'nábinë' lë', ta'nnë':

—¿Gazxi zoë' bönni' na'?

Lë' rë' légaquië':

—Biti' nözda'.

*Yugu' bönni' yudo' ta'náb yúdxinë' bönni' na' guyalaj guiöj lahuë'*

<sup>13</sup> Ní'irö gula'chë'ë bönni' na' zí'alö nachul-la lahuë', en bulu'sudxinë' lë' lógaquië' bönni' yudo' fariseo. <sup>14</sup> Tu' naca dza lá'ayi quégaquië' cate' benë' Jesús gúna'do' na', en gusaljë' guiöj lahuë' bönni' na' zí'alö nachul-la lahuë', <sup>15</sup> que lë' ni na' yugu' bönni' yudo' fariseo na' gula'nábinë' lë' leyúbölö nacxi guca guyalaj guiöj lahuë'. Lë' gudxë' légaquië':

—Budxíë' gúna'do' guiöj lahua', ate' yöjtiba' le, en rilé'eda'.

<sup>16</sup> Ní'irö gulu'ë didza' bal-lë' bönni' yudo' fariseo na', ta'nnë':

—Biti' nasöl-lë' Dios bönni' na', tu' cabí rapa chi'ë dza lá'ayi.

Ia'bal-lë' ta'nnë':

—¿Naru' huácatsö tu bönni' dul-la' gunë' yugu' yöl-la' huáca runë' bönni' na'?

Caní guca, bila'rúajë' choplö. <sup>17</sup> Leyúbölö gula'nábinë' bönni' na' zí'alö nachul-la lahuë', ta'nnë':

—¿Bizxi rno' li' queë' bönni' na', gusaljë' guiöj lo'?

Lë' rnnë':

—Náquië' bönni' ru'ë didza' uláz queë' Dios.

<sup>18</sup> Biti' gula'yéajlë'ë bönni' judío unná bë' na' guljë' nachúl-latë lahuë' bönni' na', en guyalaj guiöj lahuë', cate' bulu'lídzarë'



xuz xině'ë bönni' na' guyalaj guiøj lahuë', <sup>19</sup> ate' gula'nábinë' légaquië', ta'nnë':

—¿Naru' náquië' bönni' ni xzí'inili', rnnali' guljë' nachúl-latë lahuë'? ¿Nacxi caz naca rilé'enë' na'a?

<sup>20</sup> Bulu'bi'ë didza' xuz xině'ë na', të' légaquië':

—Nözitu' bönni' ni náquië' xzí'initu', en guljë' nachúl-latë lahuë', <sup>21</sup> pero nacxi guca, rilé'enë' na'a, biti' nöztu', en nuzxi na' gusalaj guiøj lahuë', biti' nöztu'. Guli'nabi-në' lë', tu' chináquië' bönni' chinaca. Lë' cazë' quíxjö'ë.

<sup>22</sup> Caní gula'nnë' xuz xině'ë bönni' na' zí'alö nachul-la lahuë', tu' tádxinë' yugu' bönni' judío unná bë', tu' chigulún xtídza'gaquië' bönni' judío na' channö nu bönni' si' lu në'ë Jesús náquië' Cristo, tsaz ulu'béajë' bönni' na' lu yu'u ga tu'dubë' bönni' judío, en tu'sëdë' queë' Dios. <sup>23</sup> Que lë' ni na' gula'nnë' xuz xině'ë: "Guli'nabi-në' lë', tu' chináquië' bönni' chinaca."

<sup>24</sup> Ní'irö yugu' bönni' judío unná bë' bulu'lidzë' leyúbölö bönni' na' zí'alö nachul-la lahuë', ate' të' lë':

—Ní'a queë' Xanru' Dios gudixjö' le nácatë. Netu' réquibe'etu' bönni' na' náquië' bönni' dul-la'.

<sup>25</sup> Ní'irö bubi'ë didza', rnnë':

—Channö náquië' bönni' dul-la' biti' nözda'. Tu le nözda'. Zí'alö nachul-la lahua', ate' na'a rilé'eda'.

<sup>26</sup> Gula'nábinë' lë' leyúbölö, ta'nnë':

—¿Bizxi benë' quiu'? ¿Nacxi benë' gusaljë' guiøj lo'?

<sup>27</sup> Bubi'ë didza', rë' légaquië':

—Chigúdxí caza' libí'ili', pero biti' gú'unili' si' lu ná'ali' xtídza'a. ¿Bizx que na' rë'ënili' yönili' leyúbölö? ¿Naru' rë'ënili' tá'ali' ca' Lë'?

<sup>28</sup> Ní'irö bulu'lidza zi'ë lë', ta'nnë':

—Li' do'o Lë', pero netu' dá'atu' Moisés. <sup>29</sup> Netu' nöztu' Dios bë'lenë' Moisés didza', pero ca naca queë' bönni' ni, biti' nöztu' nuzxi caz gusöl-la' Lë'.

<sup>30</sup> Ní'irö bubi'ë didza' bönni' na', rë' légaquië':

—Lë' ni run ga rubánida'. Libí'ili' biti' nözili' nuzxi gusöl-la' bönni' ni, ate' Lë' gusaljë' guiøj lahua'. <sup>31</sup> Nöziru' biti' riyönnë' Dios yugu' bönni' dul-la', pero channö reaj ládxe'ë tu bönni' Dios, en runë' ca rë'ënë' Lë', Dios riyönnë' bönni' ni. <sup>32</sup> Dza ni'te biti' riyön nu gunná channö nu bönni' gusaljë' guiøj lahuë' tu bönni' guljë' nachúl-latë lahuë'. <sup>33</sup> La'tu' cabí náquië' bönni' ni queë' Dios, biti' bi gaca gunë'.

<sup>34</sup> Ní'irö bulu'bi'ë didza', të' lë':

—Ca gulju' naca bë' nabágu'u dul-la'. ¿Naru' li' ruséditsenu' netu'?

Ní'irö bulu'béajë' lë' ní'ilö.

*Nupa náca gaca chul-la niti*

<sup>35</sup> Biyönnë' Jesús ca gulunë' bönni' judío unná bë', bulu'béajë' bönni' na' zí'alö nachul-la lahuë'. Cate' budzáguë' lë', gudxë' lë':

—¿Ba réajlë'u Zxí'inë' Dios?

<sup>36</sup> Bubi'ë didza' lë', rë' Jesús:

—¿Nuzxi na', Xan, para tséajlë'a Lë'?

<sup>37</sup> Jesús rë' lë':

—Chibilé'enu' Lë', ate' neda' ni ru'ílena' li' didza', naca' Zxí'inë' Dios.

<sup>38</sup> Ní'irö bönni' na', gyalaj guiöj lahuë', guyéaj ládxë'ë Jesús, en rë' Lë':

—Xan, réajlë'a Li'.

<sup>39</sup> Jesús rnnë':

—Para uchi'a usöröa' bönachi bida' yödzölió ni, para ulu'lé'e nupa nachul-la nanítigaca, en ilaca ca nu nachul-la lahui nupa téquiquequi ta'lé'e.

<sup>40</sup> Cate' yugu' bönni' yudo' fariseo na' nacuá'lenë' Jesús bila'yönnë' didza' ni, ní'irö tē' Lë':

—¿Naru' nachul-la nanítitsatu'?

<sup>41</sup> Bubi'ë didza' Jesús, rë' légaquië':

—La'náru' nachúl-lasö guiöj loli', biti' ibága'li' dul-la'. Na'a rnnali': "Rilé'etu'." Que lë ni na' nabága'li' dul-la'.

## 10

*Rucúdzu'ë didza' Jesús que lë'a quégacaba' bö'cu' zxila'*

<sup>1</sup> Gunnë' ca' Jesús:

—Le nácatë rea' libí'ili': Nu bönni' biti' razië' saca' ga nu riyaza lë'a quégacaba' bö'cu' zxila', pero tsázië' saca' ga yúbölö, bönni' ni náquië' gubán, en ribán cazë'. <sup>2</sup> Nu bönni' razië' saca' ga nu riyaza náquië' bönni' run chi'i cazë' bö'cu' zxila' na'. <sup>3</sup> Para tsázië' bönni' ni, risalaj nu zoa run chi'i ga nu riyaza, ate' ta'yöniba' bö'cu' zxila' na' chi'ë, en tu'únbë'ëba-në'. Lë' rulidzë'-ba' que queëba' ca légacaba', en rubéajë' yugu' bö'cu' zxila' na'. <sup>4</sup> Cate' chinubéajë'-ba' yúgu'tëba' bö'cu' zxila' néquigacaba' queë', röjnöruë' lógacaba', ate' bö'cu' zxila' na' röjnógacaba' lë', tu' tu'únbë'ëba' chi'ë. <sup>5</sup> Bönni' yúbölö biti' tsöjnógacaba' lë', pero ulu'zxúnnajba' queë', tu' cabí núnbë'gacaba' chí'igaquië' bönni' yúbölö.

<sup>6</sup> Le rucudzu' didza' ni gudxë' Jesús légaquië', pero biti' gula'yéajni'inë' lë na' rë' légaquië'.

*Náquië' Jesús ca bönni' rapa chi'ë-ba' bö'cu' zxila'*

<sup>7</sup> Ní'irö Jesús rë' légaquië' leyúbölö, rnnë':

—Le nácatë rea' libí'ili': Neda' naca' ca tu ga ta'yázaba' bö'cu' zxila'. <sup>8</sup> Chigula'lë'ë zían bönni' gula'nnë' nácaquië' Cristo, pero yúgu'të bönni' na' bila'dxinë' zí'alö ca neda', nácaquië'

gubán, en ta'bán cazè', ate' biti' bulu'zè nágaba' bö'cu' zxila' na' légaquiè'. <sup>9</sup> Neda' naca' ca tu ga nu riyaza. Núti'tès bönni' tsázalenè' neda', ulé' bönni' na', en gáquiè' ca tuba' bö'cu' zxila' rázaba', en rurúajba', en ridzóliba' le ráguba'.

<sup>10</sup> 'Za'zè' bönni' gubán para cuanè'-ba', en gútiè'-ba', en usunítiè'-ba'. Neda' bida' para gata' yöl-la' na'bán idú quégaca bönachi nácagaca ca bö'cu' zxila' quia'. Le nácate' gata' quégaquiè' yöl-la' na'bán idú na'. <sup>11</sup> Neda' run chí'igaca' bönachi quia' ca runè' bönni' na', lu yöl-la' dxi'i ladxi' queè' rapa chi'è yugu' bö'cu' zxila'. Bönni' na' rapa chi'è-ba' bö'cu' zxila' caní zoa cazè' udödè' yöl-la' na'bán queè' ni'a quégacaba' bö'cu' zxila' queè'. <sup>12</sup> Tu bönni' nazxjè' rapa chi'è-ba' bö'cu' zxila', cate' rilé'enè' zá'aba' bö'cu' gu'a sínia', rucá'anè'-ba' bö'cu' zxila' na', en ruzxúnajè', ate' bö'cu' gu'a sínia' na' ráguya'aba' yugu' bö'cu' zxila' na', en rusilásiba' légacaba'. Caní runè' bönni' na' rapa chi'è-ba' bö'cu' zxila' tu' cabí náquiè' idú nu run chí'iba' bö'cu' zxila', ate' biti' néquigacaba' que cazè' bö'cu' zxila' na'. <sup>13</sup> Ruzxúnajè' bönni' nazxjè' na' tu' rapa chi'è-ba' bö'cu' zxila' na' para sí'isè' dumí, en biti' ruí'i ládxe'è-ba' bö'cu' zxila' na'.

<sup>14-15</sup> 'Neda' naca' bönni', lu yöl-la' dxi'i ladxi' quia' run chí'igaca'-ba' bö'cu' zxila'. Ca na' núnbè'è Xuza' neda', ate' neda' núnbè'a-nè' Xuza', lësca' caní núnbè'egacada' bönachi quia' nácagaca ca bö'cu' zxila' quia', en rudöda' yöl-la' na'bán quia' ni'a quégacaba' bö'cu' zxila' na', ate' bö'cu' zxila' na' néquiguequiba' quia' núnbè'gacaba' neda'. <sup>16</sup> Lësca' nacuá'aba' ia'zíca'röba' bö'cu' zxila' quia' biti' nabábagacaba' ni. Lësca' légacaba' ral-la' tsöjxi'gaca'-ba'. Léga'aba' ulu'zè nágaba' chi'a, en ilácaba' tuz len ia'zíca'röba' bö'cu' zxila' quia', ate' neda' caz gun chí'igaca'-ba'.

<sup>17</sup> 'Que lè ni na' nadxí'inè' Xuza' neda', tu' rudöda' yöl-la' na'bán quia', gu'a lataj nu guti neda', ate' uzi'a le leyúbölö, ubana' lu yöl-la' guti. <sup>18</sup> Cuntu nu bönni' séqui'nè' gútiè' neda', pero neda' rudödi caza' yöl-la' na'bán quia', gátia'. Dè lu na'a udöda' le, en dè lu na'a uzi'a le leyúbölö. Caní naca le gunná bè'enè' Xuza' neda'.

<sup>19</sup> Cate' yugu' bönni' judío bila'yönnè' didza' ni, leyúbölö bila'ruajè' choplö ca téquinè' queè'. <sup>20</sup> Zíanè' ta'nnè':

—Yu'u bö' xihui' Lè', en nachixi icjè'. ¿Bizx que ruzè nágali' Lè'?

<sup>21</sup> Ia'bal-lè' ta'nnè':

—Biti' ca' ru'è caní didza' bönni' yu'u bö' xihui' lè'. ¿Naru' huácatsö bö' xihui' usalaj guiöj lógaquiè' bönni' nachul-la lógaquiè'?

*Yugu' bönni' judío unná bè' tu'zöè' Jesús tsölá'alö*

<sup>22</sup> Raca beo' ziaga, en naca dza na' tunë' laní yödzö Jerusalén, tu'subanë' ca gula'gu'ë yudo' quégaquië' lu nëë Dios. <sup>23</sup> Ridë' Jesús ra' yudo' ga naca chila que, nazí'i le Chila Queë' Salomón. <sup>24</sup> Yugu' bönni' judío unná bë' gula'gu'ë Jesús lé'alö, en të' Lë':

—¿Bátaxi caz usanu' runu' ga rö'ötu' böniga? Channö nacu' li' Cristo, ca nácatë gudíxjö'i netu'.

<sup>25</sup> Jesús rë' légaquië':

—Chigudxi caza' libí'ili', pero biti' réajlë'ëli' neda'. Yugu' dxin runa' tu' dë lu na'a uláz queë' Xuza' nácagaca bë' Nu naca'. <sup>26</sup> Libí'ili' biti' réajlë'ëli' neda', tu' cabí nabábalenli' nupa nácagaca bö'cu' zxila' quia', ca na' chigudxi caza' libí'ili'. <sup>27</sup> Ta'yöniba' bö'cu' zxila' quia' chi'a, en tu'únbe'eba' neda', ate' neda' núnbe'egacada'-ba', ate' ridijácalenba' neda'. <sup>28</sup> Neda' runödza' yöl-la' na'bán idú quégacaba', ate' biti' ca' ila'nítiba', ate' cuntu nu sequi' ubéaj légacaba' lu na'a neda'. <sup>29</sup> Xuza' Dios bennë' quia' légacaba', ate' Lë' nápatërë' yöl-la' huáca ca yúgu'të bönachi, ate' cuntu nu sequi' ubéaj légacaba' lu nëë Xuza'. <sup>30</sup> Neda', en Dios Xuz, tuz nácatu'.

<sup>31</sup> Leyúbölö yugu' bönni' judío unná bë' na' bulu'guélé'ë guiöj ulu'ladxë' Jesús. <sup>32</sup> Jesús rë' légaquië':

—Zian le naca dxi'a bena' loli' tu' dë lu na'a uláz queë' Xuza'. ¿Ni'a que bízxilö dxin dxi'a ni uládxli' neda' guiöj?

<sup>33</sup> Bulu'bi'ë didza' bönni' judío unná bë' na', të' Lë':

—Ni'a que dxin dxi'a biti' uládxli'tu' li' guiöj, pero tu' cabí rnnió' dxi'a queë' Dios, tu' nacu' li' bönáchisö, en run cuinu' Dios.

<sup>34</sup> Bubi'ë didza' Jesús, rë' légaquië':

—¿Naru' cabí nazúaj lu guichi lu xibá queëli' ca gunné' Dios, rnna: “Neda' rnnía': Nácali' yugu' dios”? <sup>35</sup> Nöz quéziru' le nazúaj lu guichi lá'ayi nazúaj tsaz. Lu guichi lá'ayi na' ruí'i lágaquië' dios, bönni' ni' Dios bé'lenë' légaquië' didza'. <sup>36</sup> Dios bubéajë' neda' quez queë', en gusöl-lë'ë neda' yödzölió ni. ¿Naru' rnnátsali' quia': “Li' biti' rnnió' dxi'a queë' Dios”, tu' gunnía': Zxí'inë' Dios naca'? <sup>37</sup> Channö cabí runa' dxin budödë' Xuza' Dios lu na'a, biti' ral-la' tséajlë'ëli' neda'. <sup>38</sup> Channö runa' dxin budödë' Dios lu na'a, sal-la' biti' réajlë'ëli' neda' caz, guli'tséajlë' le nácagaca bë' dxin na' runa', para guéquibe'eli' náquië' Dios Xuz tuz len neda', ate' neda' ca' naca' tuz len Xuza'.

<sup>39</sup> Leyúbölö gula'zóa gula'bö'ë ila'zönë' Jesús, pero Lë' bulë' lu ná'agaquië'.

<sup>40</sup> Ní'irö guyijë' Jesús leyúbölö ia'tsolá'a yegu Jordán, ga ni' buquilë' Juan bönachi nisa zí'atëlö, ate' bugá'anë' Jesús ni'.

<sup>41</sup> Bila'dxín bönachi zían ga zoë' Jesús, ta'nná:

—Le nácatë bití' benë' Juan nitú yöl-la' huáca zxön, pero yúgu'të le gunné' Juan na' ca ral-la' gaca queë' bönni' ni, idútë li zeaj naca.

<sup>42</sup> Que lë ni na' gula'yéajlë'ë bönni' zían Jesús ga na' zoë'.

## 11

### *Le guca cate' gútië' Lázaro*

<sup>1</sup> Dza ni' ré'enë' Lázaro, bönni' Betania, le naca ládzagacanu María, en Marta. Nácanu Marta na' zxílanu María na'. <sup>2</sup> Nácanu María na' nigula zanë' Lázaro, bönni' na' ré'enë', en nácanu cá' nigula na' gulú'unu le rilá' zxixi ni'ë Xanru', en buzzinu ni'ë len guitsa' ícjanu. <sup>3</sup> Gula'söl-la'nu nigula zanë' Lázaro na' nu yöjödix Jesús, gunná:

—Xan, buyútsöca', ré'enë' Lázaro, bönni' na' nadxí'ínu'-në'.

<sup>4</sup> Cate' biyönnë' Jesús didza' ni, gudxë' nupa nacuá' ni', rnnë':

—Yödzöhuë' ni bití' naca le guti lë' tsaz, pero naca para ilá' lahui yöl-la' zxön queë' Dios, ate' ni'a que yödzöhuë' ni ilá' lahui ca' yöl-la' zxön quia' neda', Zxí'inë' Dios.

<sup>5</sup> Jesús nadxí'inë' Marta, en nigula zxílanu Marta na', en Lázaro na'. <sup>6</sup> Sal-la' nadxí'inë' Jesús légaquië', cate' biyönnë' ré'enë' Lázaro, bugá'anë' ga na' zoë' ia'chopa dza ca'. <sup>7</sup> Cate' bizá'a chopa dza na', Jesús gudxë' yugu' bönni' usëda queë', rnnë':

—Uyéajru' leyúbölö luyú Judea.

<sup>8</sup> Ní'irö yugu' bönni' usëda queë' të Lë', ta'nnë':

—Bönni' Usedi, si' gula'zóa gula'bö'ë bönni' judío unná bë' ni' ulu'ladxë' Li' guiöj. ¿Naru' uyéajtso' leyúbölö ni'?

<sup>9</sup> Bubi'ë didza' Jesús, rë' légaquië':

—Nacuá' caz chinnu hora lahui' dza. Nu bönni' ridë' lahui' dza, bití' tsöjchégu'ë, tu' rilé'enë', tu' zóalen lë' bení' zoa yödzülió ni. <sup>10</sup> Channö ridë' bönni' na' chi'i dzö'ölö, röjchégu'ë, tu' cabí zóalen bení' lë'.

<sup>11</sup> Cate' budxi bë'ë Jesús didza' ni, ní'irö gudxë' légaquië':

—Rásië' Lázaro, böchi' luzá'aru', ate' tseja' neda', en usubana'-në'.

<sup>12</sup> Ní'irö yugu' bönni' usëda queë' të Lë', ta'nnë':

—Xan, channö rásië', huóáquië'.

<sup>13</sup> Gunnë' caní Jesús tu' chigútië' Lázaro, pero légaquië' téquinë' gunné': Rásisë' Lázaro. <sup>14</sup> Ní'irö Jesús gudxë' légaquië' yálajdo', gunné':

—Chigútië' Lázaro. <sup>15</sup> Rudzëjada' tu' cabí zoa' ni', tu' gaca na'a tu le uzí'ili' xibë, le gun ga tséajlë'ëli' neda'. Uyéajru' na'a ga na' dë' Lázaro.

<sup>16</sup> Ní'irö Tomás, bönni' na' tu'ë lë', Bönni' Bilidi' gudxë' ia'zica'rë' bönni' usëda queë' Jesús, rnnë':

—Uyéajru' ca' rē'u, en gátillenru'-nē'.

*Náquiē' Jesús Nu rusubán nupa chinátigaca, enca' Nu nabániru'*

<sup>17-19</sup> Dē yōdzō Betania gála'sō ga dē Jerusalén na', le naca ca rizá'aru' tu hóratēz. Que lē ni na' chibila'dxinē' zían bōnni' judío ga na' nacua'anu Marta, en María, en tu'huē tsáhuē'ē légacanu tu' gútiē' bōnni' zángacanu. Cate' Jesús bidxinē' ni', biyōnnē' chiguca tapa dza yu'ē Lázaro na' yeru ba. <sup>20</sup> Cate' biyōninu Marta didza' zē'ē Jesús, ní'irō birúajnu yu'u, yōjtságanu Lē', pero María bugá'ananu yu'u na'. <sup>21</sup> Marta na' rēnu Jesús:

—Xan, la'tu' zu' ni, biti' gátiē' bōnni' zana'. <sup>22</sup> Lēasca' na'a, nōzda' yúgu'tē le inábinu' Dios, Lē' gunnē' quiu'.

<sup>23</sup> Jesús rē'ē-nu:

—Ubanē' bōnni' zanu'.

<sup>24</sup> Marta rēnu Lē':

—Nōzda' ubanē' cate' idxín dza údxi cate' ulu'bán nupa chinátigaca.

<sup>25</sup> Ní'irō Jesús rē'ē-nu:

—Naca caza' neda' Nu rusubán nupa chinátigaca, enca' Nu nabánigaca bōnachi. Nu tséajlē' neda', sal-la' gati nu na', ubán caz, <sup>26</sup> ate' yúgu'tē bōnni' nabángaquiē', en ta'yéajlē'ē neda', biti' ca' ilátiē' tsaz. ¿Réajlē'u lē ni?

<sup>27</sup> Marta rēnu Lē':

—Ōn, Xan. Réajlē'a nacu' Li' Cristo, Zxí'inē' Dios, Bōnni' na' guzxi' lu nē'ē Dios isól-lē'ē yōdzōlió ni.

*Ribōdxē' Jesús tu' ru'í' ládxe'ē nigula zanē' Lázaro*

<sup>28</sup> Cate' budxi bē'ēnu Marta na' didza' ni, bōajnu yu'u, yōjlídzanu María, zxílanu, ate' bagáchi'sō rēnu lēnu:

—Bōnni' Usedi zoē' ni, rulidzē' li'.

<sup>29</sup> Cate' biyōninu María didza' ni, la' guyástēnu, zéajnu ga na' zoē' Jesús. <sup>30</sup> Biti' rázinē' Jesús la' yōdzōdo' na', pero zóasē' ga na' yōjtságanu Marta Lē'. <sup>31</sup> Cate' yugu' bōnni' judío na' nacua'lenē' María na', en tu'huē tsáhuē'ē-nu bila'lé'enē'-nu guyásanu, en birúajnu carelō ga naca lu yu'u, ní'irō yōjnógaquiē'-nu, ta'nnē':

—Uyéajnu ra' yeru ba tsōjchōdxinu ni'.

<sup>32</sup> Ní'irō bidxinu María ga na' zoē' Jesús. Cate' bilé'enu Lē', biyéchunu xini'ē, en rēnu Lē':

—Xan, la'tu' zu' ni, biti' gátiē' bōnni' zana'.

<sup>33</sup> Cate' bilé'enē' Jesús ribōdxinu, en ta'bōdxē' ca' bōnni' judío na' dzágagaquiē'-nu, ní'irō buí'innē', en gunnēda' ládxe'ē.

<sup>34</sup> Rnnē':

—¿Gazxi bucáchi'li'-nē'?

Tē' Lē':

—Gudá uyú’.

<sup>35</sup> Gurödxë’ Jesús. <sup>36</sup> Ní’irö gula’nnë’ bönni’ judío na’, ta’nnë’:

—Buli’yútsöca’ ca nadxí’ide’enë’ lë’.

<sup>37</sup> Bal-lë’ ta’nnë’:

—Bönni’ ni benë’ ga rilé’enë’ bönni’ na’ zí’alö nachul-la lahuë’. ¿Naru’ cabí gúcatsö gunë’ ga biti’ gátie’ Lázaro?

*Rubanë’ Lázaro lu yöl-la’ guti*

<sup>38</sup> Leyúbölö gunnëda’ ládxë’ë Jesús, ate’ bidxinë’ ra’ yeru ba na’. Ba na’ naca tu yeru nadaj lë’e gui’a guiöj, ate’ da’ tu guiöjta’a le nusayaj ga nu riyaza le. <sup>39</sup> Jesús gudxë’ nupa nacua’ ni’, rnnë’:

—Guli’cúa guiöj ni.

Ní’irö Marta, nigula zanë’ bönni’ nati na’, rënu Lë’:

—Xan, chirilë’ë siguti tu’ chiguca tapa dza nátië’.

<sup>40</sup> Jesús rë’ë-nu:

—¿Naru’ cabí chigudxi caza’ li’ channö réajlë’u, hualé’enu’ yöl-la’ zxön queë’ Dios?

<sup>41</sup> Ní’irö gula’güë’ guiöjta’a na’ nusayaj ga nu riyaza yeru ba ga na’ yu’ë bönni’ nati na’. Buyúë’ Jesús zaca’ lúzxibalö, rnnë’:

—Xuza’, rea’ Li’, xclenu’ tu’ riyönnu’ neda’. <sup>42</sup> Neda’ nözda’ riyöntiqui’sinu’ neda’, pero ruá’a didza’ ni para ulu’zì’ xibë bönachi zían ni, en ila’yéajlë’ Li’ na’ nasöl-lu’u neda’.

<sup>43</sup> Cate’ budxi bë’ë Jesús didza’ ni, zidzaj bulidzë’, rnnë’:

—Lázaro, burúaj nilö.

<sup>44</sup> Burúajë’ bönni’ na’ gúquië’ bönni’ nati lu yeru ba, naröligacarö ni’a në’ë yugu’ lári’do’, en nagachi’ ca’ lahuë’ ia’tú lári’do’. Ní’irö Jesús rë’ légaquië’:

—Buli’lí lari’ na’ naröli ni’a në’ë, en guli’gu’ë lataj së’ë.

*Tun xtídzë’ë yugu’ bönni’ judío unná bë’ ilútië’ Jesús*

*(Mt. 26:1-5; Mr. 14:1-2; Lc. 22:1-2)*

<sup>45</sup> Ní’irö zían bönni’ judío na’ gula’yéajlë’ë Jesús, bönni’ na’ yöjácalenë’ tsözxön María, en bila’lé’enë’ lë na’ benë’ Lë’. <sup>46</sup> Bal-lë’ yöjáquië’ ga nacu’ë bönni’ yudo’ fariseo, en bulu’siyönnë’ légaquië’ ca na’ benë’ Jesús. <sup>47</sup> Ní’irö bönni’ yudo’ fariseo na’ bulu’dúbilenë’ tsözxön bönni’ yudo’ tu’chi’a tu’söröë’, en yugu’ bixúz unná bë’, ta’nnë’:

—¿Nacxi caz gunru’? Runë’ bönni’ ni zían yöl-la’ huáca zxön. <sup>48</sup> Channö gü’isiru’-në’ lataj gunë’ ca ni run cazë’, ila’yéajlë’ yúgu’të bönachi Lë’, ate’ idijáquië’ bönni’ Roma ni, duquínnajgaquië’ yudo’ lá’ayi queëru’, en yödzo queëru’.

<sup>49</sup> Ní’irö bë’ë didza’ Caifás, bixúz lo iz na’, en dzáguië’ légaquië’, rë’ légaquië’:

—Libí’ili’ biti’ bi nözili’, <sup>50</sup> en biti’ réquibe’eli’ run bayudxi gátie’ tuë’ bönni’ ni’a quégaca bönachi, para cabí initi idú yödzo.

<sup>51</sup> Calëga rácasö queë' bē'ë didza' ni, pero tu' náquië' bixúz lo iz na', que lē ni na' bē'ë didza' uláz queë' Dios ca ral-la' gátië' Jesús ni'a quégaca bönachi yödzo na'. <sup>52</sup> Gátië' Jesús, calëgasö ni'a que yödzo na', pero gátië' ca' para utübë' yugu' xzí'inë' Dios násilasigaquië', para ilácagaquië' tuz. <sup>53</sup> Caní guca, la' dza ná'asö gulún xtídza'gaquië' ilútië' Jesús. <sup>54</sup> Que lē ni na' bíti'rö gudë' Jesús yálajdo' gapa nacuá' bönachi judío, pero buzë'ë ni', sa'yéajë' tu lataj gala' ga naca lataj cá'asö, ate' bidxinë' yödzo Efraín, ga ni' bugá'anë', ate' dzágagaquië' bönni' usëda queë' Lë'.

<sup>55</sup> Dza na' chizá' gala' Laní Pascua quégaquië' bönni' judío cate' tu'subanë' ca benë' Dios, bubéajë' bönachi queë' luyú Egipto. Bila'rúaj bönachi zían yugu' yödzo ni', ate' gula'benë', söjáquië' Jerusalén cate' si' idxín laní na' para tsöjpá'a cuíngaquië' ca naca que yudo'. <sup>56</sup> Yugu' bönni' na' nacu'ë Jerusalén tu'guiljë' Jesús, en cate' ni' nacu'ë chila yudo', gula'nabi luzá'agaquië' tuë' ia'tué', ta'nnë':

—¿Bizxi rusáca'li'? ¿Huídatsë' laní, o bití' guídë'?

<sup>57</sup> Chigula'nná bē'ë yugu' bixúz unná bē', en yugu' bönni' yudo' fariseo channö nu nözi ga zoë' Jesús, ral-la' ududíxjöi' légaquië' para gaca tsöjxöngaquië' Lë'.

## 12

*María rigú'unu le rilá' zxixi ni'ë Jesús  
(Mt. 26:6-13; Mr. 14:3-9)*

<sup>1</sup> Cate' ni' nagá'anagaca ia'xopa dza cate' idxín Laní Pascua cate' tu'subanë' bönni' judío ca benë' Dios, bubéajë' bönachi queë' luyú Egipto, ní'irö bidxinë' Jesús lu yödzo Betania, ga na' zoë' Lázaro, bönni' na' gútië', en bubanë' lu yöl-la' guti. <sup>2</sup> Gula'gu'ë tu gú'i huagu ni' le gahuë' Jesús. Gulú'unu María le ilahuë', ate' nútsë'ë Lázaro ladaj bönni' rö'ölengaquië' Jesús ga na' tahuë'. <sup>3</sup> Ní'irö gudéla'nu María ca tu guíë le rilá' zxixi que yöj susén lasi idú, le nazáca'da', en gulú'unu le ni'ë Jesús. Buzxinu ni'ë len guitsa' ícjanu. Idútë lu yu'u na' guzé bö' zxixi. <sup>4</sup> Ní'irö bē'ë didza' tu bönni' usëda queë' Jesús, lë' Judas Iscariote, xzí'inë' tu bönni' lë' Simón, en náquië' bönni' na' udödë' Jesús lu ná'agaquië' yugu' bönni' yudo', rnnë':

<sup>5</sup> —¿Bizx que bití' gudó'o le rilá' zxixi na', le nazaca' lázxjaru' que tu iz, ate' huáca nu quisi dumí na' quégaca bönachi yechi'?

<sup>6</sup> Gunnë' caní, calëga tu' ru'i ládxe'ë bönachi yechi', pero tu' náquië' gubán, en lë cazë' nu'ë buzudi dumí quégaquië', en rubéajlanë' dumí na' tu'chejë' lu buzudi na'. <sup>7</sup> Ní'irö Jesús rë' lë':

—Bē'ë-nu lataj, tu' naca lē ni bennu tu le nabá'a para dza igácha'a. <sup>8</sup> Yugu' bönachi yechi' ila'cuá'lentica'sö libí'ili', pero neda' bití' ugá'anatica'sa' ga zóali'.



*Tun xtída'gaquië' bönni' judío unná bē' ilútië' Lázaro*

<sup>9</sup> Cate' bila'yönnë' bönni' judío zoë' Jesús yödz Betania, bila'dxinë' zíanë' ni', calégasö tu' zoë' Jesús ni', pero lësca' tu' tē'ënnë' ila'lé'enë' Lázaro, bönni' na' busubanë' Jesús lu yöl-la' guti. <sup>10</sup> Ní'irö gulún xtída'gaquië' yugu' bixúz unná bē', ilútië' ca' Lázaro, <sup>11</sup> tu' ta'yéajlë'ë zían bönni' judío Jesús ni'a queë' Lázaro na', en chinulá'alengaquië' yugu' bixúz unná bē' na'.

*Len yöl-la' ba zxön razië' Jesús Jerusalén*

(Mt. 21:1-11; Mr. 11:1-11; Lc. 19:28-40)

<sup>12</sup> Bönachi zían bila'dxín Jerusalén dza Laní Pascua, ate' dza buropi na' ta'yöni zë'ë Jesús ni'. <sup>13</sup> Ní'irö gula'guítsjë' zin, en bila'rúajë' sòjxí'gala'gaquië' Jesús, ate' gulu'ë zidzaj didza', ta'nnë':

—jYöl-la' ba Dios! jYöl-la' ba Bönni' ni zë'ë uláz queë' Xanru', para inná bé'enë' bönachi Israel!

<sup>14</sup> Budzölinë' Jesús tuba' búrrodo', ate' gudxíë'-ba' ca na' nazúaj lu guichi lá'ayi, rnna:

<sup>15</sup> jBiti' gádxili', libí'ili', zóali' yödzö Sión!

jBuli'yútsöca', zë'ë Bönni' inná bé'enë' libí'ili'!

jDxíë'-ba' tuba' búrrodo'!

<sup>16</sup> Cate' ni' si' guca lë ni, bití' gula'yéajni'inë' bönni' usëda queë' Jesús, pero gudödi ni', cate' bubanë' Jesús lu yöl-la' guti, en buëpë' yehua' yubá queë', ní'irö yöjnéqueuinë' lë ni nazúaj lu guichi lá'ayi ca ral-la' gaca queë', ate' guca queë' caní.

<sup>17</sup> Lësca' yugu' bönni' na' gula'cuá'lenë' Jesús cate' ni' bulidzë' Lázaro, bönni' na' yu'ë yeru ba, en busubanë' lë' lu yöl-la' guti, gulunë' ba nalí queë'. <sup>18</sup> Que lë ni na' ca' bila'rúajë' bönni' yöjxí'gala'gaquië' Jesús, tu' bila'yönnë' ca naca yöl-la' huáca ni benë' Lë'. <sup>19</sup> Ní'irö gula'nnë' la' légacasë' bönni' yudo' fariseo, ta'nnë':

—Chinaca bē' bití' bi séqui'ru' gunru'. Buli'yú ca dá'gaca yúgu'të bönachi Lë'.

*Yugu' bönni' zi'tu' tu'guljë' Jesús*

<sup>20</sup> Bal-lë' bönni' zi'tu' dzágagaquië' nupa na' bila'dxín Jerusalén dza Laní Pascua na' para ila'yéaj ládxi'gaquië' Dios. <sup>21</sup> Yugu' bönni' zi'tu' na' bila'dxinë' ga zoë' Felipe, bönni' Betsaida que luyú Galilea, ate' guláta'yue' lahuë', ta'nnë':

—Bönni', ré'ënitú' ilé'etu'-në' Jesús.

<sup>22</sup> Guyijë' Felipe na', en yöjödxe' ca' Andrés. Ní'irö Andrés, en Felipe na' gulë' ca' Jesús. <sup>23</sup> Bubi'ë didza' Jesús, ré' légaquië':

—Chizóa idxín dza gátia' neda', Bönni' Guljë' Bönachi, huöja' xilatja' yehua' yubá. <sup>24</sup> Le nácatë rea' libí'ili': Ugá'ana cá'asö tu xisedo' channö cabí igachi' luyú, en údxi que. Channö údxi que xisedo' na', ate' ilén, yénni'tërö unödzej. <sup>25</sup> Nu bönni' ruí'i ládxi'dë'ë yöl-la' na'bán queë', unítië' le, tu' gátíë' tsaz bönni'

na'. Nu bönni' biti' ruí'i láchx'è yöl-la' na'bán dë queë' yödzölió ni gun chi'è le ga idxinrö dza gata' yöl-la' na'bán idú queë'.  
<sup>26</sup> Channö rě'ëně' nu bönni' guně' xichina', ral-la' tē'ē neda' bönni' na', ate' ga ni' tsöjsóa' neda', ni' tsöjsóe' ca' bönni' na' runě' xichina'. Channö runě' xichina' nu bönni', Xuza' Dios guně' bal bönni' na'.

*Rigu'xjö'ë Jesús ca si' ilútiě' Lě'*

<sup>27</sup> Gunně' ca' Jesús:

—Na'a rō'a bōniga neda'. ¿Nacxi innatsa'? ¿Naru' innía': Xuza', busölá neda' lu le gaca quia' na'a? Que lě ni na' bida', para guá' ilena' le ral-la' gaca quia' na'a. <sup>28</sup> Xuza', ben ga ilá' lahui yöl-la' zxön quiu'.

Ní'irö biyön chi'i Nu ruí'i didza' yehua' yubá, rnna:

—Chibéna' ga nalá' lahui yöl-la' zxön quia', ate' leyúbölö guna' ga ilá' lahui yöl-la' zxön quia' na'.

<sup>29</sup> Bila'yöni bōnachi zían nacuá' ni' chi'i ni, ate' ta'nná:

—Guziú' na' gunně.

Ia'bal-la bōnachi na' ta'nná:

—Tu gubáz lá'ayi queë' Dios bē'leně' Lě' didza'.

<sup>30</sup> Ní'irö bubi'ë didza' Jesús, rě' légaquiě':

—Biyön chi'i ni, calēga para uzi'a xibé neda', pero para uzi'ili' xibé libí'ili'. <sup>31</sup> Chibidxín dza uchi'a usöröë' Dios bōnachi yödzölió ni. Na'a chú'uně' Dios tu' xihui' ní'ilö, nu na' rinná be'e bōnachi yödzölió ni. <sup>32</sup> Na'a, channö ilútiě' bönni' neda', en ulu'chisě' neda' xitsá', guna' ga ulu'dubi yúgu'tě bōnachi ga zoa'.

<sup>33</sup> Didza' ni bē'ë Jesús naca bē' ca gátie'. <sup>34</sup> Bōnachi zían na' tē Jesús, ta'nná:

—Netu' biyönitu' nupa bulu'laba le rnna xibá queë' Dios, lě na' rnna: Sóatica'sě' Cristo. ¿Nacxi caz naca, rnno' Li': "Run bayudxi Bōnni' Guljě' Bōnachi, ulu'chisě' Lě' xitsá'"? ¿Nuzxi na' Bōnni' Guljě' Bōnachi?

<sup>35</sup> Ní'irö Jesús rě' légaquiě':

—Ia'tú chí'ido'osö sóalena' neda' libí'ili', en naca' bení' queēli'. Guli'tá tsanni ni zóalena' libí'ili', en zóalen bení' libí'ili', para cabí ichul-la inítili'. Nu bönni' ridě' ga chul-la niti biti' nōzině' gazxi sa'yéajě'. <sup>36</sup> Tsanni ni zóalena' libí'ili', naca' bení' queēli'. Guli'tsajlě' neda' naca' bení' queēli' para ilé'eli' bení' na' naca idú.

Cate' Jesús budxi bē'ë didza' ni, yōjhuōjě' yōjcachi' lahuě' lōgaquiě'.

*Le run nigui bōnachi judío, para cabí ila'yéajlě' Jesús*

<sup>37</sup> Sal-la' beně' Jesús zían yöl-la' huáca lōgaquiě', biti' gula'yéajlě'ë Lě'. <sup>38</sup> Caní guca lě na' buzúajě' Isaiás lu guichi, bönni' na' bē'ë didza' uláz queë' Dios, gunně':

Xan, ¿nuzxi caz gúyéajlë' didza' bë'ëtu'?

¿Nuzxi caz bulu'ínë' Xanru' yöl-la' huáca queë'?

<sup>39</sup> Caní guca, bití' guca ila'yéajlë'ë Jesús. Guca ca na' gunné' ca' Isaías:

<sup>40</sup> Dios benë' ga gula'chul-la gula'nítië',

ate' guca zidi ládxi'do'gaquië'

para cabí ila'lé'enë' len guiöj lógaquië',

en cabí ila'yéajni'inë' lu icja ládxi'do'gaquië'.

Bití' ulu'huóáquië' quia' para úngaca'-në'.

<sup>41</sup> Bë'ë Isaías didza' ni tu' bilé'enë' yöl-la' zxön queë' Cristo, en bë'ë didza' ca naca queë' Lë'. <sup>42</sup> Sal-la' raca caní, gula'yéajlë' bönachi zían Jesús, ga bidxintë gula'yéajlë'ë bal-lë' bönni' unná bë' Lë', pero tu' tádxinë' yugu' bönni' yudo' fariseo, bití' gulunë' ba nalí queë' yálajdo', para cabí ulu'béajë' légaquië' tsaz ga na' tu'dubë' tu'sëdë' queë' Dios. <sup>43</sup> Caní gulunë' tu' tunrë' zxön le tun bönachi légaquië' bal ca le runë' Dios légaquië' bal.

*Ilún didza' bë'ë Jesús ga irugu quégaca bönachi ilátigaca*

<sup>44</sup> Bë'ë zidzaj didza' Jesús, rnnë':

—Nu bönni' réajlë'ë neda', calëga neda'sö réajlë'ë, pero réajlë'ë ca' Xuza' nasöl-lë'ë neda'. <sup>45</sup> Lësca' caní, nu bönni' rilé'enë' neda', rilé'enë' ca' Xuza' nasöl-lë'ë neda'. <sup>46</sup> Neda' naca' bení', en bida' yödzülió ni, para cabí ulu'gá'anë' ga chulla yúgu'të bönni' ila'yéajlë'ë neda'. <sup>47</sup> Channö riyönnë' nu bönni' xtídza'a, en bití' runë' le bal, calëga neda' ichuga' queë' bönni' na' gátie', tu' bida' ni, calëga para ichuga' quégaca bönachi yödzülió ni, pero para usölá' bönachi yödzülió ni. <sup>48</sup> Nu bönni' ruzöë' neda' tsölá'alö, en bití' rizi' lu në'ë xtídza'a, chizóa le ichugu queë' bönni' na'. Didza' na' chibé'lëna' libí'ili' naca tu le ichugu queë' bönni' na' dza údxi. <sup>49</sup> Caní naca, ruá'a didza', calëga rácasö quia', pero Xuza' nasöl-lë'ë neda' gudxë' neda' le ral-la' inní'a, enca' ca ral-la' gu'a didza'. <sup>50</sup> Nözda' gunná bë'ë Dios caní para gata' yöl-la' na'bán idú quégaca bönachi. Caní naca, didza' na' ruá'a, ruá'a didza' ca na' Xuza' chigudxi cazë' neda'.

## 13

*Jesús riguibë' ní'agaquië' bönni' usëda queë'*

<sup>1</sup> Ni' naca dza si' idxín Laní Pascua cate' tu'subanë' bönni' judío ca benë' Dios, bubéajë' bönachi queë' luyú Egipto. Nözinë' Jesús chibidxín dza queë' gátie', cate' ral-la' uzë'ë yödzülió ni, en huöjë' ga zoë' Xuzë'. Ca na' nadxí'inë' bönachi queë' nacuá' yödzülió ni, na'a nadxí'inë' légaquië' ga idxintë gátie' uláz quégaquië'.

<sup>2</sup> Satanás tu' xihui' chinagú'u yöl-la' Judas Iscariote, zxí'inë' tu bönni' lë' Simón, para udödë' Jesús lu ná'agaca nupa iluti Lë'.

<sup>3</sup> Nőzinë' Jesús ca naca, birúajë' ga zoë' Dios, en huöjë' ca' ga na' zoë' Dios, ate' Dios Xuzë' chinudödë' lu në'ë Lë' idütë yöl-la' unná bë' queë'. <sup>4</sup> Que lë ni na', cate' ni' tahuë', guzuínë' Jesús, en gudúë' lari' rixóa yenë'. Gudélë'ë tu lari' ruzxini ná'aru' le budë'ë lë'ë. <sup>5</sup> Ní'irö gudë'ë nisa tu lu zxiga' guië, ate' gusí lahuë' riguibë' ní'agaquië' bönni' usëda queë', en ruzxinë' ní'agaquië' len lari' na' da' lë'ë.

<sup>6</sup> Cate' bidxinë' ga rö'ë Simón Pedro, Pedro na' rë' Lë':

—Xan, ¿naru' Li' quíbitso' ni'a?

<sup>7</sup> Bubi'ë didza' Jesús, rë' lë':

—Lë ni runa', bití' réajni'ininu' na'a, pero huadzé tséajni'inu'.

<sup>8</sup> Ní'irö Pedro rë' Lë':

—Bití' ca' quíbi cazu' Li' ni'a.

Jesús rë' lë':

—Channö neda' bití' quiba' li', bití' ca' séqui'nu' gunu' neda' tsözxön.

<sup>9</sup> Ní'irö Simón Pedro rë' Lë':

—Xan, calégasö ni'a quibu', pero quibu' ca' na'a, en icja'.

<sup>10</sup> Jesús rë' lë':

—Nu nayari, ní'asö run bayudxi tsari, tu' naca cazë' dxi'a idütë', ate' libí'ili' nácali' dxi'a, pero calëga yúgu'tëli'.

<sup>11</sup> Gunnë' caní Jesús: “Calëga yúgu'tëli' nácali' dxi'a”, tu' nőzinë' núlögaquië' na' udödi Lë'.

<sup>12</sup> Gudödi gudibë' Jesús ní'agaquië', buguélë'ë lari' na' buxóa yenë'. Bubö'ë ga tahuë', ate' rë' légaquië':

—¿Réajni'ili' lë na' si' bena' queëli'? <sup>13</sup> Libí'ili' ruí'ili' La':

Bönni' Usedi enca': Xan. Dxi'a naca ca rnnali', tu' caní naca'.

<sup>14</sup> Na'a, channö neda' naca' Xanli', en Bönni' Usedi queëli', ate' gudiba' ní'ali', lësca' caní ral-la' gunli' libí'ili', quíbili' ni'a luzá'ali' tuli' ia'tuli'.

<sup>15</sup> Tu le buluí'ida' libí'ili' para gunli' libí'ili' ca na' bena' neda'. <sup>16</sup> Le nácatë rea' libí'ili': Bití' nayëpisëtëre' tu bönni' huen dxin ca xanë', ate' bönni' gubáz bití' nayëpisëtëre' ca nu nasöl-la' lë'.

<sup>17</sup> Channö réajni'ili' yúgu'të lë ni, bica' ba libí'ili' channö gunli' caní. <sup>18</sup> Didza' ni ruá'a bití' rea' yúgu'tëli'. Nöz quézida' nupa gurö caza' neda', pero run bayudxi gaca lë na' nazúaj lu guichi lá'ayi,

le rna: “Nu rágulen neda' tsözxön, nu ni tá'baga' neda'.”

<sup>19</sup> Na'a riguíxjöi'ida' libí'ili' zí'alö ca gaca, para cate' gaca caní, tséajlë'ëli' zoa caza' neda'. <sup>20</sup> Le nácatë rea' libí'ili': Nu bönni' gunë' bal gubáz isöl-la'a neda', neda' ca' gunë' bal, ate' nu bönni' gunë' neda' bal, gunë' ca' bal Xuza', nasöl-lë'ë neda'.

*Riguíxjö'ë Jesús ca gunë' Judas, udödë' Lë'*

*(Mt. 26:20-25; Mr. 14:17-21; Lc. 22:21-23)*

<sup>21</sup> Cate' Jesús budxi bë'ë didza' ni, buí'innë', ate' yálajdo' gunnë':

—Le nácatë rea' libí'ili': Tu bönni' nútsë'ë ládjali' udödë' neda'.

<sup>22</sup> Ní'irö bulu'yú lo luzá'agaquië' tuë' ia'tuë' bönni' usëda queë', en gula'cu'ë böniga, ate' ta'naba ládxi'gaquië' nuzxi que na' gunné' Jesús caní. <sup>23</sup> Tuë' bönni' usëda queë' Jesús, bönni' na' Jesús nadxí'inë' lë', zoë' cuita lë'ë. <sup>24</sup> Simón Pedro bulá'a buluí'së' bönni' ni para inábinë' Jesús nuzxi que na' gunné' caní. <sup>25</sup> Ní'irö bönni' na' zoë' cuita lë'ë Jesús rë' Lë':

—Xan, ¿nuzxi na' ru'u didza' que?

<sup>26</sup> Bubi'ë didza' Jesús, rë' lë':

—Náquië' bönni' na' gu'a-në' yöta xtila nabisa.

Ní'irö busubísië' yöta xtila na', en bë'ë queë' Judas Iscariote, zxí'inë' tu bönni' lë' Simón. <sup>27</sup> Gudödi gudahuë' Judas yöta xtila na', guyaza Satanás tu' xihui' icja ládxi'da'ahuë'. Ní'irö Jesús rë' lë':

—Lë na' gunu', yöjentë na'a.

<sup>28</sup> Biti' ta'yéajni'inë' ia'zíca'rë' bönni' usëda queë' rő'ögaquië' tahuë' bizx que na' Jesús gudxë' lë' caní. <sup>29</sup> Tu' nu'ë Judas buzudi dumí quégaquië', téquinë' bal-lë' Jesús gudxë' lë': Yöxi' le gáguru' laní, o gunné': Bë' lati' quégaca bönachi yechi'. <sup>30</sup> Cate' budxi gudahuë' Judas yöta xtila na', en ni' naca chi'i dzö'ölö, la' birúajtë'.

### *Tu xibá cubi*

<sup>31</sup> Cate' chibirúajë' Judas na', ní'irö gunné' Jesús:

—Na'a chizóa ilá' lahui yöl-la' zxön quia' neda', Bönni' Guljë' Bönachi, en ilá' lahui ca' yöl-la' zxön queë' Dios. <sup>32</sup> Channö ilá' lahui yöl-la' zxön queë' Dios ni'a quia' neda', Zxí'inë', lësca' Lë cazë' Dios gunë' ga ilá' lahui yöl-la' zxön quia' neda', Zxí'inë', en la' guntë' caní. <sup>33</sup> Libí'ili', zxí'ina'do', ia'tú chí'isö zóalena' libí'ili'. Uguíjali' neda', ate' ca na' chigúdxigaca'-në' bönni' judío, lësca' rea' libí'ili' na'a: Ga na' tseja' neda', biti' gaca guídali' rácasö queëli'. <sup>34</sup> Rea' libí'ili' tu xibá cubi le rnna caní: Guli'dxí'i luzá'ali' tuli' ia'tuli'. Ca na' neda' nadxí'ida' libí'ili', lësca' caní ral-la' idxí'ili' luzá'ali' tuli' ia'tuli'. <sup>35</sup> Channö huadxí'i luzá'ali' tuli' ia'tuli', iléquibe'e yúgu'të bönachi dá'ali' neda'.

### *Rnnë' Jesús innë' Pedro biti' núnbë'ë Lë'*

(Mt. 26:31-35; Mr. 14:27-31; Lc. 22:31-34)

<sup>36</sup> Ní'irö Simón Pedro gunábinë' Jesús, rnnë':

—Xan, ¿gazxi caz tseju'?

Bubi'ë didza' Jesús, rnnë':

—Ga na' tseja' neda', biti' gaca sá'lenu' neda' na'a, pero huadzé guídu' ga tseja' neda'.

<sup>37</sup> Pedro rë' Lë':

—Xan, ¿bizx que bití' gaca sá'lena' Li' na'a? Chizó'a' udöda' yöl-la' na'bán quia', gátia' tu' nadxí'ida' Li'.

<sup>38</sup> Bubi'ë didza' Jesús, rë' lë':

—¿Naru' udödu' yöl-la' na'bán quiu' tu' nadxí'inu' neda'? Le nácatë rea' li', zí'alö ca cödxiba' böra, li' tá'bágu'u tsonna luzuí, innó' bití' núnbë'u neda'.

## 14

*Náquië' Jesús nöza tséajlenru' para idxinru' ga zoë' Dios Xuz*

<sup>1</sup> Rnnë' Jesús:

—Bití' cö'li' baniga lu icja ládxi'do'oli'. Guli'tséajlë' Dios, en guli'tséajlë' ca' neda'. <sup>2</sup> Lu yu'u lidxë' Xuza' lataj zían nacuá'. La'tu' cabí naca caní, neda' chigudxi caza' libí'ili'. Tseja' na'a, tsöjpá'a lataj queëli' ga tsöjsóali'. <sup>3</sup> Channö huayéaja', en tsöjpá'a lataj queëli' ga tsöjsóali', huöda' leyúbölö, ate' uchë'a libí'ili' lataj quia', para ga na' tsöjsó'a' neda', tsöjsóali' ca' libí'ili'. <sup>4</sup> Nöz quézili' ga ni' tseja', en núnbë'ëli' ca' nöza.

<sup>5</sup> Tomás rë' Lë':

—Xan, bití' nöztu' gazxi na' tseju'. ¿Nacxi caz gaca gúnbë'ëtu' nöza?

<sup>6</sup> Bubi'ë didza' Jesús, rë' lë':

—Neda' naca caza' nöza, en naca' ca' le naca idútë li, en naca' ca' Nu nabánigaca bönachi. Ni'a quia' néda'sö gaca nu idxín ga zoë' Dios Xuz. <sup>7</sup> La'tu' núnbë'ëli' neda', Xuza' ca' núnbë'ëli'-në'. Na'a, núnbë'ëli'-në', en chibilé'eli'-në'.

<sup>8</sup> Ní'irö Felipe rë' Lë':

—Xan, buluí'i netu' Xuzu', ate' nácatë queëtu'.

<sup>9</sup> Bubi'ë didza' Jesús, rë' lë':

—Felipe, xidzé chiguca zóalena' libí'ili'. ¿Naru' cabí núnbë'ëtso' neda'? Nu bönni' rilé'enë' neda', rilé'enë' ca' Xuza'. ¿Rnnatso': "Buluí'i netu' Xuzu'?" <sup>10</sup> ¿Naru' cabí réajlë'u zóalen caza'-në' Xuza', ate' Xuza' zóalen cazë' neda'? Yugu' didza' ni ruí'ilena' libí'ili', calëga rácasö quia' ruá'a didza' ni, pero Xuza' zóalen cazë' neda', Lë cazë' runë' dxin ni. <sup>11</sup> Guli'tséajlë' neda', zóalen caza'-në' Xuza', ate' Xuza' zóalen cazë' neda'. Channö cabí gaca gunli' caní, guli'tséajlë' neda' ni'a quégaca dxin ni runa'. <sup>12</sup> Le nácatë rea' libí'ili': Yugu' dxin ni runa' neda', lësca' gunë' bönni' na' réajlë'ë neda', ate' le zxöntëro ca' gunë' bönni' na' tu' huöja' ga zoë' Dios Xuz. <sup>13</sup> Yúgu'të le inábali' Dios Xuz, en ugunli' dxin La' neda', neda' guna' lë na' inábali', para ulu'a lahui neda', Zxí'inë', yöl-la' zxön queë' Dios Xuz. <sup>14</sup> Bítí'tës bi inábali', en ugunli' dxin La' neda', neda' guna' le.

*Jesús isöl-lë'ë Dios Bö' Lá'ayi, para idisóalenë' bönachi queë'*

<sup>15</sup> Rnnë' ca' Jesús:

—Channö nadxí'ili' neda', guli'gún le rea' libí'ili',<sup>16</sup> ate' neda' gáta'yua' lahuë' Dios Xuz, ate' Lë' isöl-lë'ë queëli' Nu yúbölo Nu gácalen libí'ili', Nu utipa ladxí'li', en sóalenta'sö libí'ili'. Nu ni naca Dios Bö' Lá'ayi, Nu ruí' didza' idútë li. <sup>17</sup> Biti' gaca ulu'zì bönachi yödzülió ni xibé' Lë', tu' cabí gaca ila'lé'e Lë', en bití' gaca ilúnbe'e Lë'. Zóalen cazë libí'ili', ate' soë' lu icja ladxí'do'oli'. <sup>18</sup> Biti' ucá'ana' libí'ili' ca yugu' bi'i uzëbido'. Huöda' udusóalena' libí'ili'. <sup>19</sup> Ia'tú chí'ido'osö bítirö ila'lé'e bönachi yödzülió ni neda', pero libí'ili' ulé'eli' neda'. Tu' zoa caza' nabana' neda', libí'ili' ca', tsaz sóali' ibanli'. <sup>20</sup> Dza ní'irö cate' Dios Bö' Lá'ayi na' idisóalenë' libí'ili', inöz quézili' zóalen caza'-në' Xuza' Dios, ate' libí'ili' zóalenli' neda', ate' neda' ca' zóalen caza' libí'ili'. <sup>21</sup> Nu bönni' rizí' lu në'ë xtídza'a, en runë' ca rna, naca bë' nadxí'inë' neda'. Xuza' Dios idxí'inë' bönni' na' nadxí'inë' neda', ate' neda' idxí'ida'-në' bönni' na', en ulufí' lahua' lahuë'.

<sup>22</sup> Judas rë' lë', pero calëga Judas Iscariote, rnnë':

—Xan, ¿naxi caz gaca ulu'í lo' lotu' netu', en bití' ulu'í lo' lógaca bönachi yödzülió?

<sup>23</sup> Bubi'ë didza' Jesús, rë' lë':

—Nu bönni' nadxí'inë' neda' gunë' ca rna xtídza'a, ate' Xuza' Dios idxí'inë' bönni' na', ate' guídatu' idisóalentu'-në' bönni' na' lu icja ladxí'da'ahuë'. <sup>24</sup> Bönni' na' bití' nadxí'inë' neda' bití' runë' ca rna xtídza'a. Didza' na' biyönili' bë'a neda', calëgasö quia' na', pero naca queë' Dios Xuz nasöl-lë'ë neda'.

<sup>25</sup> Rë' caza' libí'ili' yugu' lë ni tsanni ni zóalena' libí'ili',<sup>26</sup> pero Dios Bö' Lá'ayi gácalenë' libí'ili', en utipë' ladxí'li'. Xuza' Dios isöl-lë'ë Lë' queëli' tu' ugunli' dxin La' neda'. Usédinë' libí'ili' yúgu'të, en usë'ë ladxí'li' ca naca yúgu'të didza' na' chigudxa' libí'ili'.

<sup>27</sup> Rucá'ana' queëli' le cuéqui dxi ladxí'li'. Runna' queëli' yöl-la' rö'ö dxi ladxí' quia'. Yöl-la' rö'ö dxi ladxí' na' runna' queëli' bití' naca ca le tunna queëli' bönachi yödzülió ni. Bití' ichixi icja ladxí'do'oli', en bití' gadxi idzöbili'. <sup>28</sup> Chibiyönili' ca na' chigudxa' libí'ili': Huöja', ate' huöda' udusóalena' libí'ili'. La'tu' nadxí'ili' neda', udzëjali' cate' ni' gudxa' libí'ili' huöja' ga zoë' Dios Xuz, tu' nayëpisëtërë' Dios Xuz ca neda'. <sup>29</sup> Na'a, chigudxa' libí'ili' zí'alö ca si' gaca, para cate' gaca caní, tséajlë'ëli' neda'.

<sup>30-31</sup> Bítirö gü'ílëna' libí'ili' didza' zían, tu' za' tu' xihui', nu rinná be'e bönachi yödzülió ni. Sal-la' bití' bi dë lu në'e bi gun quia' neda', ral-la' gaca caní para iléquibe'e bönachi yödzülió ni nadxí'ida'-në' Dios Xuz, en runa' ca na' chigudxë' neda' guna'. Guli'chasa, uzá'aru' ni.

## 15

*Ca naca que lubá uva, en ni'a nē'e lubá na'*

<sup>1</sup> Lēšca' caní Jesús gudxē' légaquiē':

—Naca' neda' ca tu lubá uva le naca idú dxi'a, ate' Xuza' náquiē' ca bōnni' guz gú'una rapa chi'ē lubá na'. <sup>2</sup> Ugúē' yúgu'tē ni'a nē'e lubá na' naca' neda', le cabí bi ta'bía, ate' uchi'ē yúgu'tē ni'a nē'e na' ta'bía, para ila'bía ia'lati'. <sup>3</sup> Libí'ili' chinácali' dxi'a ni'a que didza' na' chibē'lena' libí'ili'. <sup>4</sup> Guli'dá'tica'sō neda', ca na' neda' dá'tica'sa' ca' libí'ili'. Ca naca que ni'a nē'e lubá na', bití' gaca bi cuía rácasō que, channō cabí dá'tica'sō lubá na', lēšca' caní naca queēli', bití' bi gaca gunli' channō cabí tá'tica'sili' neda'.

<sup>5</sup> 'Naca' neda' ca lubá na', ate' libí'ili' nácali' ca ni'a nē'e. Nu bōnni' dá'tica'sē' neda', ca na' neda' dá'tica'sa' lē', bōnni' ni náquiē' ca ni'a nē'e lubá na' ribía yenni', tu' channō nulá'alenli' neda', bití' bi gaca gunli'. <sup>6</sup> Nu bōnni' bití' dá'tica'sē' neda', gaca queē' ca raca quégaca ni'a nē'e lubá na' bití' nácagaca dxi'a, ta'rú'unē' ni'a nē'e na', ate' ila'bidxi. Cate' chinabídxigaca ni'a nē'e na', ulu'tubē' léguequi, en ila'gu'ē léguequi lu guí, ate' tséguigaca.

<sup>7</sup> 'Channō tá'tica'sili' neda', en gunli' ca rnna xtídza'a, huáca inábali' bi guē'ēnili', ate' neda' guna' lē na' inábali'. <sup>8</sup> Gunli' bal Xuza' Dios cate' gunli' xichinē', ate' gácali' ca ni'a nē'e lubá na' ta'bía, en caní gaca bē' nácali' idú bōnni' ta'dē'ē neda'. <sup>9</sup> Ca na' nadxí'inē' Dios Xuz neda', lēšca' caní nadxí'ida' libí'ili'. Guli'gúntica'sō ca ral-la' gunē' bōnni' nadxí'ida'-nē'. <sup>10</sup> Channō gunli' ca rea' libí'ili', gunli' ca ral-la' gunē' bōnni' nadxí'ida'-nē', ca na' neda' ca' runa' ca chigudxē' Xuza' Dios neda' guna', en rúntica'sa' le raza láchxē'ē Lē', Bōnni' na' nadxí'inē' neda'.

<sup>11</sup> 'Yugu' didza' ni rea' libí'ili' para udzėjalenli' tsōzxōn neda', en gaca idú ca na' udzėjali'. <sup>12</sup> Lē ni naca le rea' libí'ili' gunli': Guli'dxí'íluzá'ali' tuli' ia'tuli', ca na' neda' ca' nadxí'ida' libí'ili'. <sup>13</sup> Bití' gaca idxí'irōnē' nu bōnni' luzē'ē ca nu bōnni' udōdē' yōl-la' na'bán queē', gátiē' para gácalenē' yugu' bōchi' luzē'ē tu' nadxí'inē' légaquiē'. <sup>14</sup> Libí'ili' nácali' bōchi' luzá'a channō gunli' ca na' chigudxa' libí'ili' gunli'. <sup>15</sup> Bítí'rō innía' queēli' nácali' huen dxin quia', tu' cabí nōzinē' bōnni' huen dxin naca gunē' xanē'. Neda' chigunnía' queēli' nácali' bōchi' luzá'a, tu' chibena' ga nōzili' yúgu'tē le chigudxē' Xuza' neda' guna'. <sup>16</sup> Calēga libí'ili' gurōli' neda', pero neda' gurō caza' libí'ili', en buzóa' libí'ili' para tséajli' bi tsōjenli', ca na' tun ni'a nē'e lubá na' ta'bía yenni', ate' ugá'anatica'sō lē na' gunli'. Caní gaca, Xuza' Dios gunnē' queēli' yúgu'tē le inábili' Lē', en ugunli' dxin La' neda'. <sup>17</sup> Lē ni naca le rea' libí'ili' gunli': Guli'dxí'íluzá'ali' tuli' ia'tuli'.



*Bönachi yödzülió tu'zóa tsölá'alö Jesús, en nupa dá'gaca Lé'*

<sup>18</sup> Gunné' ca' Jesús:

—Channö bönachi yödzülió ni tu'zóa libí'ili' tsölá'alö, nözili' chibulu'zöé' neda' tsölá'alö zí'alö ca tu'zöé' libí'ili' tsölá'alö na'a. <sup>19</sup> La'tu' nácali' tuz len bönachi yödzülió ni, huala'dxí'i bönachi yödzülió ni libí'ili' ca na' ta'dxí'i luzé'eguequi, pero tu'zóa bönachi yödzülió ni libí'ili' tsölá'alö tu' cabí nácali' tuz len léguequi, tu' guró caza' neda' libí'ili', en guléaja' libí'ili' ladaj bönachi yödzülió ni. <sup>20</sup> Guli'tsöjné didza' na' chigudxa' libí'ili', gunniá': Biti' nayépisetéré' nu bönni' huen dxin ca xané'. Channö gula'bía ládxi'gaca bönachi neda', ila'bía ládxi'gaca ca' libí'ili'. Channö nacua' nupa tun ca rnna xtídza'a, ilún ca' ca rnna xtídza'li' libí'ili'. <sup>21</sup> Yúgu'té lé ni ilún bönachi queéli' tu' dá'ali' neda', tu' cabí núnbé'gaca Dios Xuz nasöl-lé'è neda'.

<sup>22</sup> 'La'tu' cabí bida', en la'tu' cabí bé'lena' légaquié' didza', biti' ila'bágué'è dul-la', pero na'a tu' bida' ni, biti' bi gaca ila'nné' que dul-la' nabága'gaquié' le ubéaj légaquié' dxí'a. <sup>23</sup> Nu bönni' ruzöé' neda' tsölá'alö, ruzöé' ca' Xuza' Dios tsölá'alö. <sup>24</sup> La'tu' cabí bena' yugu' yöl-la' huáca ga nacué', yugu' le cuntú nu ben ca gulaca, biti' ila'bágué'è dul-la'. Na'a, bila'lé'ené' yugu' lé na' bena', ate' tu'zöé' neda' tsölá'alö, en tu'zöé' ca' Xuza' tsölá'alö. <sup>25</sup> Caní raca, para gaca ca rnna xtídze'è Dios, le nazí' lu ná'agaquié', le rnna: Tu'zöé' neda' tsölá'alö, en biti' zoa bizx que.

<sup>26</sup> 'Cate' idxiné' Dios Bö' Lá'ayi, Bönni' ru'è didza' idúté li, en gácalené' libí'ili', utipé' ládxi'li'. Isöl-la'a Bönni' na' queéli' uláz queé' Dios Xuz, ate' guné' ba nalí quia' neda'. <sup>27</sup> Libí'ili' ca' gunli' ba nalí quia', tu' zóalen cázali' neda' tsözxön dza ni'te.

## 16

<sup>1</sup> Gunné' ca' Jesús:

—Yugu' didza' ni chigudxa' libí'ili', para cabí gaca chopá ládxi'li'. <sup>2</sup> Yugu' bönni' judío ulu'béajé' libí'ili' tsaz ga tu'dubé' tu'sédé' queé' Dios, ate' idxín dza cate' nu bönni' gútié' libí'ili' guéquiné' dxin queé' Dios runé'. <sup>3</sup> Caní iluné', tu' cabí núnbé'gaquié' Dios Xuz, en cabí núnbé'gaquié' neda'. <sup>4</sup> Rea' libí'ili' yugu' didza' ni, para cate' idxín dza na', tsöjnéli' didza' ni chigudxi caza' libí'ili'.

*Le guné' Dios Bö' Lá'ayi*

Gunné' ca' Jesús:

—Yugu' didza' ni biti' gudxa' libí'ili' dza ni'te, tu' ni' zóalen caza' libí'ili'. <sup>5</sup> Na'a huója', tsöjsóalena'-né' Dios Xuz, nasöl-lé'è neda'. Biti' inábili' neda' nituli' libí'ili', biti' innalí': ¿Gazxi tseju? <sup>6</sup> Na'a, tu' rea' libí'ili' yugu' didza' ni, risébi ládxi'li'. <sup>7</sup> Neda' rea' libí'ili' le naca idúté li. Gácarö dxí'a queéli'

huöja', tu' channö cabí huöja', bití' idisóalenë' Dios Bö' Lá'ayi libí'ili', Bönni' na' gácalenë' libí'ili', en utipë' ládxi'li', pero channö huöja', isöl-la'a-në', na' idisóalenë' libí'ili'. <sup>8</sup> Cate' guídë' Lë', gunë' ga iléquite'e bönachi yödzölió ni nabága'gaca dul-la', en bití' núnbë'gaca le naca tsahui', ate' ichúguië' Dios quéquequi ilátigaca. <sup>9</sup> Nabága'gaquië' dul-la' tu' cabí ta'yéajlë'ë neda'. <sup>10</sup> Bití' núnbë'gaquië' le naca tsahui' tu' ilútië' neda', ate' huöja' ga zoë' Dios Xuz, Bönni' na' náquië' tsahui', ate' bíti'rö ila'lé'enë' neda'. <sup>11</sup> Ichúguië' Dios quégaquië' ilátië' tu' chiguchúguië' que tu' xihui' nu rinná be'e bönachi yödzölió ni.

<sup>12</sup> 'Ia'zica' zían didza' rë'ënda' gü'ilená libí'ili', pero bití' gaca tséajni'ili' na'a. <sup>13</sup> Cate' guídë' Dios Bö' Lá'ayi, Bönni' na' ru'ë didza' idútë li, Lë' usedinë' libí'ili' yúgu'të le naca idútë li na', tu' cabí gu'ë didza' rácasö queë', pero gu'ë yúgu'të didza' na' yönnë' ru'ë Xuzá, en gunë' ga inözili' yúgu'të le ral-la' gaca. <sup>14</sup> Lë' gunë' neda' bal, tu' si'ë le nequi quia', en gunë' ga inözili' le. <sup>15</sup> Yúgu'të le nequi queë' Dios Xuz nequi quia'. Que lë ni na' gunnía' si'ë le nequi quia', en gunë' ga inözili' le.

*Yöl-la' risëbi ládxi' queëli' huöáca yöl-la' rudzeja*

<sup>16</sup> Gunnë' ca' Jesús:

—Yetú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', tu' huöja' ga zoë' Dios Xuz.

<sup>17</sup> Ní'irö bönni' usëda queë' gulë luzá'agaquië' tuë' ia'tué', ta'nnë':

—¿Bizxi rna didza' ni rë' rë'u? Rnnë': “Ia'tú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', en naca tu' huöja' ga zoë' Dios Xuz.”

<sup>18</sup> Ní'irö gula'nnë':

—¿Bizxi caz rë'ëni inná didza' ni, gunné': “Ia'tú chí'ido'osö”? Bití' réajni'itu' didza' ni ru'ë.

<sup>19</sup> Réquite'enë' Jesús të'ënnë' ila'nábinë' Lë', ate' rë' légaquië':

—¿Naru' rinábitsö luzá'ali' ca naca que didza' na' bë'a, gunnía': Ia'tú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda'? <sup>20</sup> Le nácatë rea' libí'ili': Cödxili', en isëbi ládxi'li', pero bönachi yödzölió ni ulu'dzeja cate' iluti neda'. Ní'irö sal-la' isëbi ládxi'li', yöl-la' risëbi ládxi' queëli' huöáca yöl-la' rudzeja cate' ulé'eli' neda'. <sup>21</sup> Tu nigula cate' chizóa gáljabi' bí'ido' queënu, riguí' rizáca'nu, tu' chibidxín dza queënu, pero cate' chizóabi' tubi' bi'i bönni'do' queënu, bíti'rö röjnenu lë na' butságanu, tu' rudzéjanu tu' chigúlajbi' tubi' bi'i bönni'do' yödzölió ni. <sup>22</sup> Lësca' caní raca queëli', risëbi ládxi'li' na'a, pero huöda' uduyúa' libí'ili', ate' ní'irö udzeja ládxi'li', ate' bití' séqui'në' nu bönni' ugüë' yöl-la' rudzeja queëli' na'.

<sup>23</sup> 'Dza ní'irö biti' bi inábili' neda'. Le nácatë rea' libí'ili': Yúgu'të le inábili' Dios Xuz, en ugunli' dxin La' neda', Lë gunnë' queëli'. <sup>24</sup> Ga ridxintë na'a dza biti' rugunli' dxin La' neda' cate' bi rinábili'-në' Dios Xuz. Guli'naba caní, ate' idéli'li' lë na' inábali', para gaca idú yöl-la' rudzeja queëli'.

*Ridéli'në' Jesucristo lu le raca yödzölió ni*

<sup>25</sup> Gunnë' ca' Jesús:

—Yugu' lë na' chibë'lëna' libí'ili' didza' bucúdzu'a didza'. Huadxín dza cate' bíti'rö gü'ílena' libí'ili' didza' le rucúdzu'a didza', pero yálajdo' gü'ílena' libí'ili' didza' ca naca queë' Dios Xuz. <sup>26-27</sup> Dza na' inábili'-në' Dios, en ugunli' dxin La' neda', ate' rea' libí'ili', biti' gun bayudxi gáta'yua' lahuë' Dios Xuz uláz queëli', tu' nadxí'inë' Lë cazë' Dios Xuz libí'ili'. Nadxí'inë' libí'ili' tu' nadxí'ili' neda', en réajlë'ëli' birúaja' ga zoë' Dios. <sup>28</sup> Birúaja' ga zoë' Dios Xuz, en bidxina' yödzölió ni. Ia'tú ca', ucá'ana' yödzölió ni, ate' huöja' ga zoë' Dios Xuz.

<sup>29</sup> Ní'irö yugu' bönni' usëda queë' gulë' Lë', ta'nnë':

—Na'a ru'u didza' yálajdo', en bíti'rö rucúdzu'u didza'. <sup>30</sup> Na'a réquibe'etu' nöz quézinu' Li' yúgu'të, en biti' run bayudxi nu bi inabi yudxi Li', tu' riguíxjöi'ínu' netu' le si' inábatu'. Que lë ni na' réajlë'ëtu' birúaju' ga zoë' Dios.

<sup>31</sup> Bubi'ë didza' Jesús, rë' légaquië':

—¿Naru' réajlë'tsali' neda' na'a? <sup>32</sup> Buli'yú, huadxín dza, en chiridxín dza na', cate' gásilasili' que queëli', en ucá'anali' neda' tuza', pero biti' soa' tuza', tu' zóalen cazë' Dios Xuz neda'. <sup>33</sup> Yugu' didza' ni chigudxa' libí'ili' para cuéqui dxi ládxi'li', tu' nácali' quia' neda'. Lu yödzölió ni gaca queëli' le usaca' zi' libí'ili', pero buli'tipa ládxi'li'. Neda' chibidéli'da' lu le raca yödzölió ni.

## 17

*Jesús rinábinë' Dios gácalenë' nupa dá'gaca Lë'*

<sup>1</sup> Cate' budxi bë'ë Jesús yugu' didza' ni, guchisa lahuë', ruyüë' yehua' yubálo, ate' rnnë':

—Dios Xuz, chibidxín dza. Ben ga ilá' lahui yöl-la' zxön quia' neda', Zxí'ínu', para gaca guna' ga ilá' lahui yöl-la' zxön quiu' Li'. <sup>2</sup> Ben caní tu' chinudödu' lu na'a yöl-la' unná bë' para inná bé'eda' yúgu'të bönachi, en gu'a yöl-la' na'bán idú quégaca yúgu'të nupa na' chibennu' quia'. <sup>3</sup> Lë ni naca yöl-la' na'bán idú na', tu' núnbë'gaquië' Li', nacu' la's dui Dios idú, en tu' núnbë'gaquië' ca' neda', Jesucristo, ate' Li' nasöl-lu'u neda'.

<sup>4</sup> Neda' chibena' ga nalá' lahui yöl-la' zxön quiu' yödzölió ni, en chibudxi bena' dxin na' budödu' lu na'a. <sup>5</sup> Na'a, Xuz, ben ga

ilá' lahui yöl-la' zxon napa' tsözxön len Li', para gaca quia' yöl-la' zxon guta' quia' tsözxön len Li' dza ni'te quez cate' si' gata' yödzölió.

<sup>6</sup> Chibulu'a lahui le nacu' Li' lógaquië' bönni' ni bennu' quia', nupa na' guró casu' Li' ladaj bönachi yödzölió. Guléquinë' bönni' ni quiu', ate' bénagacu'-në' quia', ate' tunë' ca rnna xtídz'u. <sup>7</sup> Na'a nözguequinë' yúgu'të lë na' bennu' quia' zá'gaca lu no'o Li', <sup>8</sup> tu' chibudöda' lu ná'agaquië' didza' na' budödu' Li' lu na'a neda', ate' légaquië' nazí' lu ná'agaquië' le, en téquibe'enë' birúaja' ga zu' Li', ate' ta'yéajlë'ë Li' nasöl-lu'u neda'.

<sup>9</sup> Neda' ráta'yua' Lo' gácalenu' légaquië'. Ráta'yua' Lo', calëga gácalenu' yúgu'të bönachi yödzölió, pero gácalengacu'-në' bönni' ni chibénagacu'-në' quia', tu' néquiguequinë' quiu'. <sup>10</sup> Yúgu'të nupa néquiguequi quia' néquiguequi ca' quiu', ate' nupa na' néquiguequi quiu' néquiguequi ca' quia', ate' ca nácagaca nupa na' rulu'i lahui yöl-la' zxon quia'.

<sup>11</sup> Na'a, bíti'rö ugá'ana' yödzölió ni, pero yugu' bönni' ni ulu'gá'anë' yödzölió, ate' neda' udusóalena' Li'. Xuz Lá'ayi, len yöl-la' huáca quiu' ben chí'i nupa ni chibennu' quia', para ilácagaca tuz, ca na' nácaru' rë'u tuz. <sup>12</sup> Cate' ni' guzóalena' légaquië' yödzölió ni, ben chí'igaca'-në', buguna' dxin yöl-la' huáca na' bennu' quia'. Nupa na' bennu' quia', ben chí'igaca'-në', ate' nitúë' bití' bunítia'-në', pero tuzë' bönni' na' náquië' ca xzí'ini tu' xihui', en narugu queë' gátie' tsaz. Caní raca ca nazúaj lu guichi lá'ayi.

<sup>13</sup> Na'a udusóalena' Li', ate' tsanni ni zoa' yödzölió ni, ruá'a yugu' didza' ni para gaca idú yöl-la' rudzeja quégaquië' ca na' raca quia' neda' yöl-la' rudzeja. <sup>14</sup> Neda' chibudöda' lu ná'agaquië' xtídz'u, ate' bönachi yödzölió ni tu'zóa légaquië' tsólá'aló tu' cabí nácagaquië' tuz len léguequi, ca na' naca quia' neda', bití' naca' tuz len bönachi yödzölió ni. <sup>15</sup> Ráta'yua' Lo', calëga cúagacu'-në' yödzölió ni, pero gun chí'igacu'-në', para cabí ila'dzunë' lu na' tu' xihui'. <sup>16</sup> Bití' nácagaquië' tuz len bönachi yödzölió ni ca na' naca quia' neda', bití' naca' tuz len bönachi yödzölió. <sup>17</sup> Guléaj quez quiu' légaquië', ugunu' dxin le naca idútë li. Le naca idútë li na' naca xtídz'u. <sup>18</sup> Ca na' benu' Li', gusöl-lu'u neda' ladaj bönachi yödzölió ni, lësca' caní runa' neda', risöl-la'gaca'-në' ladaj bönachi yödzölió. <sup>19</sup> Tu' nadxí'igacada'-në' rudödi cuina' quiu', para ulu'rúajë' ca' légaquië' quez quiu' tu' nazí' lu ná'agaquië' le naca idútë li.

<sup>20</sup> Ráta'yua' Lo', calëga quégacasë' bönni' ni, pero lësca' quégaquië' bönni' ni' ila'yéajlë'ë neda' ni'a que didza' ilu'ë bönni' ni. <sup>21</sup> Ráta'yua' Lo' gunu' ga ilácagaquië' tuz yúgu'të',

en ilácagaquië' ca' tuz len rë'u, ca na' nacu' Li', Xuza', nacu' tuz len neda', ate' neda' ca', naca' tuz len Li'. Caní ral-la' ilácagaquië' para ila'yéajlë' ia'zica'rö bönachi yödzülió ni, Li' caz gusól-lu'u neda'. <sup>22</sup> Yöl-la' zxön na' bennu' quia', neda' bë'a ca' quégaquië', para ilácagaquië' tuz, ca na' nácaru' tuz rë'u. <sup>23</sup> Li' nacu' tuz len neda', ate' neda' naca' tuz len légaquië', para gaca idú ca nácaquië' tuz, en caní iléquibe'e ia'zica'rö bönachi yödzülió ni, Li' caz gusól-lu'u neda', ate' nadxí'igacanu'-në' ca na' nadxí'inu' neda'.

<sup>24</sup> Xúza'do', ré'ënda' ila'cuá'lenë' neda' bönni' ni bénnagacu'-në' quia' ga na' tsöjsóa', para ila'lé'enë' yöl-la' zxön na' bennu' quia' dza ni'te cate' si' gunu' yödzülió tu' nadxí'inu' neda'. <sup>25</sup> Xuza' tsahui', bönachi yödzülió ni biti' núnbë'gaca Li', pero neda' nunbë' caza' Li', ate' yugu' bönni' ni chinóziguequinë' Li' caz gusól-lu'u neda'. <sup>26</sup> Bena' ga nöziguequinë' le nacu' Li', en gunra' ca' ga ila'nözinë' lë ni para ca na' nadxí'inu' Li' neda', lësca' caní ila'dxí'i luzá'agaquië', ate' gaca caza' tuz len légaquië'.

## 18

### *Ta'zönë' Jesús*

(Mt. 26:47-56; Mr. 14:43-50; Lc. 22:47-53)

<sup>1</sup> Cate' budxi bë'ë Jesús yugu' didza' ni, birúajë' ni', ate' sa'yéajlenë' yugu' bönni' usëda queë'. Gudödë' ia'tsölá'a yegu Cedrón, en bidxinë' ga ni' nacuá' yaga olivo ca', ate' lataj ni guyázalenë' yugu' bönni' usëda queë'. <sup>2</sup> Lësca' Judas, bönni' na' udödë' Jesús, núnbë'ë la' yëla na', tu' butubë' Jesús yugu' bönni' usëda queë' ni' zían luzuí. <sup>3</sup> Ní'irö guchë'ë Judas tu cö bönni' röjáquië' gudil-la, en yugu' bönni' ni'a ná'agaquië' bixúz unná bë', en ni'a ná'agaquië' yugu' bönni' yudo' fariseo, ate' yöjáquië' ga ni' zoë' Jesús, nuá'agaquië' yugu' guí yöri, en yugu' le tu'dí'inë'. <sup>4</sup> Ní'irö, tu' nözinë' Jesús yúgu'të le ral-la' gaca queë', birúajë' ga ni' zoë', en rë' légaquië':

—¿Nuzxi riguíjali'?

<sup>5</sup> Bulu'bi'ë didza', të' Lë':

—Jesús, bönni' Nazaret, riguíjatu'-në'.

Jesús rë' légaquië':

—Neda' caz.

Judas, bönni' na' rudödë' Jesús lu ná'agaquië', zóalenë' légaquië'. <sup>6</sup> Cate' Jesús gudxë' légaquië': “Neda' caz”, ní'irö bulu'bíguë'ë cusi zxanlö, en gula'dzö'ë lu yu. <sup>7</sup> Jesús gunábinë' légaquië' leyúbölö, rnnë':

—¿Nuzxi riguíjali'?

Të' Lë':

—Jesús, bönni' Nazaret, riguíjatu'-në'.

<sup>8</sup> Ní'irö bubí'ë didza' Jesús, rnnë':

—Chigúdxá' libí'ili': Neda' caz. Channö riguíljali' neda', guli'güi'-gáquië' lataj tsöjhuöjgaquië' bönni' ni.

<sup>9</sup>Caní gunné' Jesús para idxín didza' na' bē'ë, gunné': "Nupa ni bennu' quia', nitúë' bití' bunítia'-nē'." <sup>10</sup>Ní'irö, tu' nu'ë Simón Pedro tu guíë tuchi', gulecjë' le, en bentë' huë' Malco, tu bönni' huen dxin queë' bixúz lo, guchúguië' guídi náguië' ibëla bönni' na'. <sup>11</sup>Ní'irö Jesús rë' Pedro na':

—Bugú'u guíë tuchi' quiu' lidxi. ¿Naru' cabí ral-la' quí' i saca' a lë na' chinunë' Xuza' ca gaca quia'?

*Ridxinë' Jesús lahuë' bixúz lo*

(Mt. 26:57-58; Mr. 14:53-54; Lc. 22:54)

<sup>12</sup>Yugu' bönni' na' rójáquië' gudil-la, en bönni' na' nacu'ë lu nē'ë, enca' yugu' bönni' ni'a ná'agaquië' bönni' judío unná bē' gula'zönë' Jesús, en gulúgui'ë Lë'. <sup>13</sup>Ní'irö gula'chë'ë Lë' zí'alö lahuë' Anás, tu' náquië' xto' zxi'inë' Caifás, bönni' náquië' bixúz lo iz na'. <sup>14</sup>Náquië' Caifás bönni' na' buzéajni'inë' yugu' bönni' judío unná bē', buluí'inë' légaquië' dxí'arö gaca gátië' tuzë' bönni', en calëga initi idútë yödzö quégaquië'.

*Rnnë' Pedro: "Bití' núnbë'a-në' Jesús"*

(Mt. 26:69-70; Mr. 14:66-68; Lc. 22:55-57)

<sup>15</sup>Simón Pedro, en ia'túë' bönni' usëda queë' Jesús yöjáquië' cúdzu'lë' Lë', söjnógaquië' Lë'. Bönni' usëda ni guyázalenë' Jesús lö'a que lidxi bixúz lo, tu' núnbë'ë bixúz lo na' lë'. <sup>16</sup>Bugá'anë' Pedro ní'ilö ga nu riyaza lö'a na'. Que lë ni na' burúajë' bönni' usëda na' núnbë'ë bixúz lo lë', ate' bē'lenë'-nu didza' nigula na' run chí'ínu ga nu riyaza lö'a na', ate' benë' ga guyázië' Pedro lö'a. <sup>17</sup>Ní'irö nigula na' run chí'ínu ga nu riyaza lö'a rënu Pedro, rnnanu:

—¿Naru' cabí do'o ca' li' bönni' ni?

Bubi'ë didza' Pedro, rnnë':

—Calëga neda'.

<sup>18</sup>Tu' run ziaga, yugu' bönni' huen dxin, en yugu' bönni' ni'a ná'agaca bönachi yudo' nabéquigaquië' guí', ate' zuíguequinë' ra' guí' na', en tu'tsë'e cuíngaquië'. Lësca' Pedro zuílenë' légaquië', rutsë'e cuinë'.

*Bixúz lo rinabi yúdxinë' Jesús*

(Mt. 26:59-66; Mr. 14:55-64; Lc. 22:66-71)

<sup>19</sup>Ní'irö gunabi yúdxinë' bixúz lo Jesús para inözinë' nupxi dá'gaca Lë', en nacxi naca le rusedinë' Jesús bönachi. <sup>20</sup>Bubi'ë didza' Jesús, rë' lë':

—Lahui' lo bē'lëna' yúgu'të bönachi didza'. Buseditiqui'sida' légaquië' gapa naca lu yu'u ga tu'dubë' tu'sëdë' queë' Dios, enca' chila yudo', ga ni' tu'dubë' yúgu'të bönni' judío, en bití' bi didza' bē'a bagáchi'sö. <sup>21</sup>¿Bizx que rinabi yúdxinu' neda'?

Gunabi yudxi nupa ni' bila'yöni didza' bë'lena' léguequi. Nözguequi quézinë' bönni' na' didza' na' bë'lena' légaquië'.

22 Cate' budxi bë'ë Jesús didza' ni, tu bönni' ni'a ná'agaca bönachi yudo' gudápë'ë ru'ë Jesús, rnnë':

—¿Naru' caní rubí'itso' didza' lahuë' bixúz lo?

23 Bubi'ë didza' Jesús, rë' lë':

—Channö bití' gunní'a dxi'a, gudixjō' bízxilō didza' bë'a bití' naca dxi'a, en channö guca dxi'a didza' bë'a, ¿bizx que na' gudápu'u neda'?

24 Ní'irō Anás na' gusöl-lë'ë Jesús náguë'ë, ate' bulu'sudxinë' Lë' lahuë' Caifás, bönni' náquië' idú bixúz lo.

*Leyúbölō rnnë' Pedro: "Bití' núnbë'a-në' Jesús"*

*(Mt. 26:71-75; Mr. 14:69-72; Lc. 22:58-62)*

25 Cate' ni' zuínë' Pedro ra' guí' rutsë'e cuinë', yugu' bönni' nacu'ë ni' gulë' lë', ta'nnë':

—¿Naru' cabí do'o ca' li' Jesús na'?

Gudá'baguië' Pedro, rnnë':

—Calëga neda'.

26 Zoë' ni' tu bönni' huen dxin queë' bixúz lo, náquië' di'a dza queë' bönni' na' Pedro guchúguië' guídi náguië', ate' bönni' huen dxin na' rë' Pedro:

—¿Naru' cabí bilé'e quézida' li' la' yëla ni', dzagu'-në' Jesús?

27 Leyúbölō gudá'baguië' Pedro, ate' la' gurōdxitëba' böra.

*Ridxinë' Jesús lahuë' Pilato*

*(Mt. 27:1-2, 11-14; Mr. 15:1-5; Lc. 23:1-5)*

28 Ní'irō gula'chë'ë Jesús, en bulu'zë'ë lidxë' Caifás na', ate' bila'dxinë' yúlahui' queë' bönni' yu'u lu në'ë uláz que yōdz Roma, le nazí'i le Pretorio. Chizá' rení' dza na', ate' bití' gula'yázië' yugu' bönni' judío yúlahui' na', tu' téquinë' ila'báguë'ë xíguia' channö ila'yázië' ni', le gun ga bití' gaca ilahuë' xtsō' Laní Pascua, laní na' tu'subanë' ca benë' Dios, bubéajë' bönachi Israel luyú Egipto. 29 Ní'irō birúajë' Pilato, bönni' na' yu'u lu në'ë, en bidxinë' ga na' nacu'ë, ate' rë' légaquië':

—¿Bizxi ruzégui'li'-në' bönni' ni didza'?

30 Bulu'bi'ë didza', tē' lē':

—La'tu' cabí nu'ë bönni' ni dö', bití' udōditu'-në' lo'.

31 Ní'irō Pilato rë' légaquië', rnnë':

—Libí'i cázali' guli'chë'ë, en buli'chi'a buli'sörō Lë' ca rinná bë' xibá queëli'.

Yugu' bönni' judío tē' lē', ta'nnë':

—Bití' dē lu na'tu' nu gútitu'.

32 Caní guca para idxín xtídzë'ë Jesús, le bë'ë naca ral-la' gátie'. 33 Ní'irō buázië' Pilato yúlahui' na', ate' bulidzë' Jesús, en rë' Lë':

—¿Nacu' Li' Bönni' Rinná Bé'enë' Bönachi Judío?

<sup>34</sup> Bubi'ë didza' Jesús, rë' lë':

—¿Naru' rácasö quiu' rnno' caní, o gulë bönachi li' caní ca naca quia'?

<sup>35</sup> Pilato rë' Lë':

—¿Naru' réquitsenu' naca' judío? Yugu' bönni' uládz quiu', en yugu' bixúz unná bë' bulu'dödë' Li' lu na'a. ¿Bizxi caz benu'?

<sup>36</sup> Ní'irö bubi'ë didza' Jesús, rë' lë':

—Rinná bë'a neda', pero calëga ca ta'nná bë' bönachi yödzölió ni. La'tu' rinná bë'a ca ta'nná bë' bönachi yödzölió, ila'dil-lë' bönni' dá'gaquië' neda', para cabí ilu'ë lataj nu udödi neda' lu ná'agaquië' bönni' judío. Ca rinná bë'a neda' bití' naca ca ta'nná bë' bönachi yödzölió ni.

<sup>37</sup> Ní'irö Pilato rë' Lë':

—¿Nácatso' bönni' rinná bë'ë?

Bubi'ë didza' Jesús, rë' lë':

—Naca' ca na' rnno'. Que lë ni na' bida' ga gulja' yödzölió ni, para guna' ba nalí que le naca idütë li. Yúgu'të nupa ni tun le naca idütë li tu'zë ná'gagaca didza' ruá'a.

<sup>38</sup> Pilato rë' Lë':

—¿Bizxi na' le naca idütë li?

*Ta'chúquië' queë' Jesús gátíë'*

*(Mt. 27:15-31; Mr. 15:6-20; Lc. 23:13-25)*

Cate' budxi gunné' Pilato caní, burúajë' leyúbölö ga na' nacu'ë bönni' judío unná bë' na', en rë' légaquië':

—Bití' bi dö' ridzöliida' nu'ë bönni' ni. <sup>39</sup> Libí'ili' dë tu le nulaga loli' runlí' cate' raca Laní Pascua ni, rinábili' neda' usana'-në' queëli' tuë' bönni' nadzunë'. ¿Rë'ënili' usana'-në' queëli' Bönni' Rinná Bé'enë' Bönachi Judío?

<sup>40</sup> Ní'irö yúgu'të' gulu'ë zidzaj didza' leyúbölö, ta'nnë':

—¡Calëga bönni' ni, pero Barrabás usanu'-në' queëtu'!

Barrabás na' náquië' gubán.

## 19

<sup>1</sup> Ní'irö Pilato guchë'ë Jesús, en benë' ga gula'guínë' yugu' bönni' röjáquië' gudil-la Lë'. <sup>2</sup> Bönni' röjáquië' gudil-la na' gulunë' tu bregui' ni'a në'e yötsi', ate' bulu'dxíë' le icjë' Jesús, en bulu'gácuë' Lë' tu lari' tunna xiná chul-la ca naca le tácuë' bönni' ta'nná bë'ë. <sup>3</sup> Ní'irö gula'biguë'ë lahuë' Jesús, en të' Lë':

—¡Bica' bo' Li', Bönni' Rinná Bé'enë' Bönachi Judío!

Ní'irö gula'gápë'ë lahuë'.

<sup>4</sup> Ní'irö burúajë' Pilato, en rë' yugu' bönni' judío unná bë', rnnë':

—Buli'yú, rubéaja'-në' loli' ni para inözili' bití' bi rudzöliida' le naca dö' nu'ë bönni' ni.



<sup>5</sup> Ní'irö birúajë' Jesús, dxí'a icjë' bregui' ni'a në'e yötsi' na', en nácuë' lari' tunna xiná chul-la na'. Pilato rë' légaquië':

—Ni zoë' bönni' ni.

<sup>6</sup> Cate' yugu' bixúz unná bë', en yugu' bönni' ni'a ná'agaquië' bila'lé'enë' Jesús, zidzaj gulu'ë didza', ta'nnë':

—¡Budë'ë lë'e yaga cruz! ¡Budë'ë lë'e yaga cruz!

Pilato rë' légaquië':

—Libí'i cázali' guli'chë'ë, en guli'tsöjdë'ë lë'e yaga cruz. Neda' biti' bi dö' budzö'lida' nu'ë bönni' ni.

<sup>7</sup> Ní'irö bönni' judío na' të' lë':

—Dë queëtu' tu xibá, ate' rinná bë' xibá queëtu' na' ral-la' gátie' bönni' ni tu' gunné' náquië' Zxí'inë' Dios.

<sup>8</sup> Cate' biyönnë' Pilato didza' ni, gúdxirönë'. <sup>9</sup> Leyúbölö buázië' yúlalui' na', en rë' Jesús:

—¿Gázxitë bönni' Li'?

Biti' bi didza' bubí'ë Jesús.

<sup>10</sup> Ní'irö Pilato rë' Lë':

—¿Naru' cabí ubí'tso' didza', quíxjöi'inu' neda'? ¿Naru' cabí nözinu' dë lu na'a udá'a Li' lë'e yaga cruz, en dë lu na'a usana' Li'?

<sup>11</sup> Bubi'ë didza' Jesús, rë' lë':

—Biti' bi dë lu no'o gunu' quia' la'tu' cabí nudödë' Dios yöl-la' unná bë' na' lu no'o. Que lë ni na', bönni' na' budödë' neda' lu no'o nabága'rë' xíguia' ca li'.

<sup>12</sup> La' ní'isö rizó'a ribö'ë Pilato usanë' Jesús, pero gulu'ë zidzaj didza' bönni' judío unná bë', ta'nnë':

—Channö usanu'-në' bönni' ni, biti' ridzagu'-në' dxi'a César, bönni' rinná bé'enë' idütë yödzölió. Nu bönni' run cuinë' bönni' rinná bë'ë, ridá'báguë'ë César na'.

<sup>13</sup> Cate' biyönnë' Pilato didza' ni, gunná bé'enë' nupa diguá'gaca Jesús, ate' gurö'ë xilatjë' ga ruchi'a rusöröë', lataj na' nazí'i le Lö'a Ga Zxóagaca Guiöjta'a, en ca naca didza' hebreo nazí'i le Gabata. <sup>14</sup> La' dza ná'asö naca dza si' idxín Laní Pascua, en naca idú hua gubidza. Ní'irö Pilato gudxë' yugu' bönni' judío unná bë' na', rnnë':

—Ni zoë' bönni' rinná bé'enë' libí'ili'.

<sup>15</sup> Gulu'ë zidzaj didza', ta'nnë':

—¡Bëtië'! ¡Bëtië'! ¡Budë'ë lë'e yaga cruz!

Pilato rë' légaquië':

—¿Rinábitseli' neda' udá'a-në' lë'e yaga cruz bönni' rinná bé'enë' libí'ili'?

Bulu'bi'ë didza' bixúz unná bë', ta'nnë':

—Cúnturö nu zoa rinná be'e netu'. Tuzë' César rinná bé'enë' netu'.

<sup>16</sup> Que lë ni na' Pilato budödë' Jesús lu ná'agaquië', para tsöjdá'agaquië' Lë' lë'e yaga cruz. Ní'irö gula'guélé'ë Jesús, en gula'chë'ë Lë' ní'ilö.

*Tu'dě'ë Jesús lě'e yaga cruz**(Mt. 27:32-44; Mr. 15:21-32; Lc. 23:26-43)*

<sup>17</sup> Birúajë' Jesús ni', nu'ë yaga cruz queë', sa'yéajë' lataj na' naz'i le Lataj Que Böga' Ícjaru', en ca naca didza' hebreo naz'i le Gólgota. <sup>18</sup> Bulu'dě'ë Jesús lě'e yaga cruz ni', ate' bulu'dá'lenë' Lë' tsözxön lě'egaca yaga cruz ia' chopë' bönni'. Tsölá'a huéaj ta'dě'ë, ate' Jesús dë'ë gatsaj láhui'lö chopë' bönni' na'. <sup>19</sup> Gusöl-lë'ë Pilato tu bönni' nu'ë le buzúajë' lu guichi le buzóë' lě'e yaga cruz icjlë' Jesús, le rnna caní: "Jesús, Bönni' Nazaret, Bönni' Rinná Bé'enë' Bönni' Judío." <sup>20</sup> Bulu'labë' zían bönni' judío didza' ni, tu' zoa ga na' bulu'dě'ë Jesús lě'e yaga cruz gála'sö ra' yödzö, ate' didza' na' nuzúajë' len didza' hebreo, en len didza' griego, en len didza' latín. <sup>21</sup> Yugu' bixúz unná bë' quégaquië' bönni' judío tē' Pilato, ta'nnë':

—Biti' uzúaju', "Bönni' Rinná Bé'enë' Bönni' Judío." Buzúaj caní: "Bönni' ni gunnë': Inná bé'eda' bönni' judío."

<sup>22</sup> Bubi'ë didza' Pilato, rë' légaquië':

—Le chinuzúaja', tsaz chinuzúaja'.

<sup>23</sup> Cate' yugu' bönni' na' röjáquië' gudil-la budxi bulu'dě'ë Jesús lě'e yaga cruz, gula'guélé'ë lari' gúcuë'. Gula'béajë' tápalö, tu cö' huéaj guta' que queëgaquië'. Gula'guélé'ë ca' lari' guxóa yenë' Jesús, ate' lari' na' biti' nadía, pero naduba tuz ca naduba. <sup>24</sup> Ní'irö yugu' bönni' na' röjáquië' gudil-la gulë luzá'agaquië' tuë' ia'tuë', ta'nnë':

—Biti' ichúguru' le, pero dxí'arö gaca uyuru' le gaca bë' para inöziru' nuzxi guequi que.

Caní guca, budxín ca nazúaj lu guichi lá'ayi, le rnna:

Gula'guisië' que queëgaquië' lari' nacuá',

en que lari' quia' bulu'yúë' le naca bë'.

Caní gulunë' bönni' na' röjáquië' gudil-la.

<sup>25</sup> Xinë'ë Jesús, en nigula zxílanu xinë'ë, en María, nigula queë' Cleofas, en María Magdalena gula'cuá'anu gala' ga na' dë'ë Jesús lě'e yaga cruz. <sup>26</sup> Cate' Jesús bilé'enë'-nu xinë'ë, en bilé'enë' ca' zoë' ni' bönni' usëda queë' na' nadxí'inë', gudxë'-nu xinë'ë:

—Na'a, na' zoë' zxi'ínu'.

<sup>27</sup> Ní'irö gudxë' bönni' usëda queë' na':

—Na' zóanu xinó'o.

Bönni' usëda na' benë' ga yöjsóanu lidxë' la' dza ní'isö.

*Le guca cate' gutië' Jesús**(Mt. 27:45-56; Mr. 15:33-41; Lc. 23:44-49)*

<sup>28</sup> Gudödi ni, tu' nözinë' Jesús yúgu'të chiböa budzaga lahui, en para udxín le nazúaj lu guichi lá'ayi, gunnë':

—Ribidxa' nisa.

29 Dë ni' tu zxiga' yudzu nupi zi. Ní'irö yugu' bönni' na' röjáquië' gudil-la bulu'guijë' nupi zi na' tu le bululu rizxupi nisa, ate' bulu'zóë' le tu lahui gui, en bulu'dé'ë le ru'ë Jesús para xupë'. 30 Budxi gu'ë Jesús nupi zi na', gunné':

—Chinácatë.

Ní'irö buzötaj icjë'. Burúajtë bö' naca cazë', gútië'.

*Tu bönni' reajë' gudil-la runë'ë yaga tuchi' cuita lë'ë Jesús*

31 Ní'irö, tu' naca dza si' idxín Laní Pascua na', en tu' cabí ral-la' ulu'gá'ana nupa nátigaca lë'egaca yaga cruz cate' naca dza lá'ayi quégaquië', le naca tu dza lá'ayi zxöntë, que lë ni na' yugu' bönni' judío gulá'tayuë' lahuë' Pilato guíë' bönni' röjáquië' gudil-la tsöjtítsjagaquië' xiguichjagaquië' bönni' dá'gaquië' lë'egaca yaga cruz, en ulu'zöjtjë' légaquië' lë'egaca yaga cruz na'. 32 Que lë ni na' gula'biguë'ë bönni' röjáquië' gudil-la, ate' gula'guítsjë' xiguichjë' bönni' zí'alö, en lësca' caní gulunë' queë' ia'túë' bönni' na' dá'lenë' Jesús lë'e yaga cruz. 33 Cate' bila'dxinë' ga na' dé'ë Jesús, en bila'lé'enë' chinátië', bití' gula'guítsjë' xiguichjë'.

34 Ní'irö tuë' bönni' na' reajë' gudil-la bunë'ë yaga tuchi' cuita lë'ë Jesús, ate' la' birúajtë rön, en nisa. 35 Neda', Juan, bilé'eda' lë ni, en runa' ba nalí que, ate' le runa' ba nalí naca idútë li. Nöz quézida' ruá'a didza' idútë li, para tséajlë'ëli' ca' libí'ili' ca naca queë' Jesús. 36 Gulaca yugu' lë ni para budxín le nazúaj lu guichi lá'ayi, le rnna: "Bití' gatsaj nitú dxita yu'ë." 37 Ia'tú le nazúaj ca' lu guichi rnna caní: "Ulu'yúë' bönni' na' bulu'në'ë lë' yaga tuchi'."

*Tu'cáché'ë Jesús*

(Mt. 27:57-61; Mr. 15:42-47; Lc. 23:50-56)

38 Gudödi guca yúgu'të lë ni, guyijë' José, bönni' yödzö Ari-matea, bönni' dé'ë Jesús, pero bagáchi'sö tu' rádxinë' yugu' bönni' judío unná bë', ate' gunábinë' Pilato gu'ë lë' lataj u'ë Jesús. Pilato bë'ë lë' lataj. Ní'irö bidxinë' José ga na' dé'ë Jesús lë'e yaga cruz, ate' bu'ë Lë'. 39 Lësca' bidxinë' Nicodemo ni', bönni' na' guyijë' zí'alö yöjyúë' Jesús chí'i dzö'ölö, nu'ë tu le nutsí'i nöri silá' que mirra, en tu le rilá' zxixi, le naca ca tu gayuá' guíë. 40 Ní'irö José, en Nicodemo na' gula'guélë'ë Jesús, en bulu'chölinë' Lë' yugu' lári'do', ate' gula'gu'ë láhuilö lë na' nutsí'i nöri silá' que mirra, en le rilá' zxixi. Gulunë' ca nalëbiguequinë' tunë' bönni' judío cate' tu'cáché'ë tu bönni' nati. 41 Gala' ga na' bulu'dé'ë Jesús lë'e yaga cruz dë tu luyú ga zeaj da' yaga olivo, ate' gatsaj láhui'lö lataj na' zoa tu yeru ba cubi le nadaj lë'e guí'a guiöj, yeru ba na' cuntú nu ta'güí'inë'. 42 Lu yeru ba na' gula'gu'ë Jesús tu' dë gála'sö yeru ba na', en tu' naca dza tu'pë'ë bönni' judío que Laní Pascua.

## 20

*Rubanë' Jesús lu yöl-la' guti*  
(Mt. 28:1-10; Mr. 16:1-8; Lc. 24:1-12)

<sup>1</sup> Cate' chinaca zílado' dza domingo, en ni' naca chul-la, guyéajnu María Magdalena ra' yeru ba na', ate' bilé'enu chinadúa guiójt'a na' busayaj ga nu riyaza yeru ba na'. <sup>2</sup> Ní'irö böajnu carelö ga zoë' Simón Pedro, dzáguië' lë' ia'tué' bönni' usëda, bönni' na' Jesús nadxí'inë' lë', ate' rënu légaquië':

—Bulu'béajë' Xanru' yeru ba ni', en biti' nöztu' gazxi gula'gu'ë Lë'.

<sup>3</sup> Ní'irö bila'rúajë' Pedro, en ia'tué' bönni' usëda na', söjáquië' ra' yeru ba na'. <sup>4</sup> Tsözxön ta'xíti'ë iropë', pero ia'tué' bönni' usëda na' guxíti'rë' carelö ca Pedro, ate' zí'alö lë' bidxinë' ra' yeru ba na'. <sup>5</sup> Biyéchuë', en buyúë' lu yeru ba na', ate' bilé'enë' yugu' lári'do' na' bila'röli-në' Jesús, nacuá' ni', pero biti' guyázië' yeru ba na'. <sup>6</sup> Ní'irö bidxinë' Simón Pedro cúdzu'lë' ia'tué' bönni' usëda na', ate' guyázië' lë' yeru ba na', en bilé'enë' lári'do' na' nacuá' ni'. <sup>7</sup> Lësca' bilé'enë' lári'do' na' gula'xóë' icjë' Jesús, biti' dëlen ia'zica'rö lári'do' na', pero tsólá'alö nudubi quez. <sup>8</sup> Ní'irö guyázië' ca' ia'tué' bönni' usëda na' bidxinë' zí'alö ra' yeru ba na', en bilé'enë' ca na' naca, ate' guyéajlë'ë didza' bë'ë Jesús. <sup>9</sup> Caní guca, tu' cabí ta'yéajni'ininë' le nazúaj lu guichi lá'ayi ca run bayudxi gaca queë' Jesús, ate' ubanë' lu yöl-la' guti. <sup>10</sup> Ní'irö iropë' bönni' usëda na' yöjhuójgaquië' lídxigaquië'.

*Rulu'i lahuë' Jesús lonu María Magdalena*  
(Mr. 16:9-11)

<sup>11</sup> Bugá'ananu María ní'ilö ra' yeru ba na', ribödxinu. Tsanni ni' ribödxinu, biyéchunu, buyunu lu yeru ba na'. <sup>12</sup> Bilé'enu chopë' gubáz lá'ayi queë' Dios ni', nácugaquië' lari' chiguichi. Rö'ógaquië' ni', tuë' ícjälö ba na', en ia'tué' xiní'alö ba na' ga ni' gula'gu'ë Jesús. <sup>13</sup> Yugu' gubáz lá'ayi na' tē' lënu, ta'nnë':

—Nigúlado', ¿bizx que ribödxu'?

Rënu légaquië':

—Tu' bulu'ú'ë Xana', en biti' nözda' gazxi gula'gu'ë Lë'.

<sup>14</sup> Cate' budxi gunnúanu caní, buécjanu, en bilé'enu-në' Jesús, zoë' ni', pero biti' réquibe'enu Jesús na'. <sup>15</sup> Ní'irö Jesús gudxë'-nu:

—Nigúlado', ¿bizx que ribödxu'? ¿Nuzxi ruguilju'?

Tu' réquinu náquië' Lë' bönni' rapa chi'ë latja na', rënu Lë':

—Bönni', channö li' bu'u-në', gudíxjöi'i neda' gazxi gulú'u-në', ate' neda' u'a-në'.

<sup>16</sup> Ní'irö Jesús gudxë'-nu:

—María.

Ní'irö buécjanu, en lu didza' hebreo rënu Lë':

—Raboni.

Didza' ni rnna: Bönni' Usedi quia'.

<sup>17</sup> Jesús rë'ë-nu:

—Biti' canu' neda', tu' cabí ruhuëpinida' ga zoë' Xuza'. Na'a, guyéaj ga nacu'ë böchi' luzá'a, ate' yöjödxi-gáquië': "Caní rnnë' Jesús: Huëpa' ga zoë' Xuza', náquië' ca' Xúzili'. Náquië' Dios quia', en Dios queéli'."

<sup>18</sup> Ní'irö guyéajnu María Magdalena na', yöjtíxjöi'inu yugu' bönni' usëda queë' Jesús chibilé'enu-në' Xanru', en ca naca didza' na' gudxë'-nu.

*Rulu'i lahuë' Jesús lógaquië' bönni' usëda queë'*

*(Mt. 28:16-20; Mr. 16:14-18; Lc. 24:36-49)*

<sup>19</sup> Cate' chigul-la la' dza ná'asö, le naca dza risí lo gadxi dza, nudúbigaquië' bönni' usëda queë' Jesús, ate' nayayaj yu'u ga na' nacu'ë tu' tádxinë' bönni' judío unná bë'. Ní'irö bulu'i lahuë' Jesús gatsaj láhui'lö ga na' nacu'ë, en rë' légaquië':

—Guli'zóa dxi ládxi'li'.

<sup>20</sup> Cate' budxi gudxë' légaquië' didza' ni, bulu'inë' légaquië' në'ë, en cuita lë'ë. Ní'irö tu'dzéjanë' yugu' bönni' usëda na' tu' tu'lé'enë' Xanru'. <sup>21</sup> Ní'irö Jesús rë' légaquië' leyúbölö, rnnë':

—Guli'zóa dxi ládxi'li'. Ca benë' Xuza', gusöl-lë'ë neda', lësca caní risöl-la'a libí'ili' tsöjenli' xichina'.

<sup>22</sup> Cate' budxi gunné' caní, bulubë' lógaquië', en rë' légaquië':

—Guli'sí Dios Bö' Lá'ayi. <sup>23</sup> Núti'tës nu uniti loli', nu na' ben dul-la', chiyú'u yöl-la' runiti lo que, ate' núti'tës nu biti' uniti loli' le, ugá'ana dul-la' que nu na' nun dul-la'.

*Biti' réajlë'ë Tomás*

<sup>24</sup> Tomás biti' zóalenë' légaquië' cate' Jesús buduyüë' légaquië'. Náquië' Tomás tuë' bönni' chínnuë' ni', en tu'ë ca' lë' Bönni' Bilidi'. <sup>25</sup> Gudödi ni' ia'zíca'rë' bönni' usëda na' gulë' Tomás, ta'nnë':

—Chibilé'etu'-në' Xanru'.

Tomás rë' légaquië':

—Channö cabí ilé'eda' në'ë ga gunné' bididaj, en unë'a xibön na'a ga na' gunë'gaca bididaj na', en unë'a na'a cuita lë'ë ga na' gunné' yaga tuchi', biti' ca' tséajlë'a.

<sup>26</sup> Cate' chigudödi ia'xunu' dza, nudúbigaquië' bönni' usëda na' leyúbölö lu yu'u, ate' Tomás na' zóalenë' légaquië'. Sal-la' nayayaj yu'u ga na' nacu'ë, bulu'i lahuë' Jesús gatsaj láhui'lö ga na' nacu'ë, en rë' légaquië':

—Guli'zóa dxi ládxi'li'.

<sup>27</sup> Ní'irö Jesús rë' Tomás na':

—Bunë' xibön no'o ni, en buyú na'a ni. Bunë' no'o cuita lë'a ni, en bítirö gaca chopa ládxu'u, pero guyéajlë' neda'.

28 Ní'irö bubi'ë didza' Tomás, rë' Lë':

—Xána'do', en Dios quia'.

29 Jesús rë' lë':

—Tomás, tu' bul'é'enu' neda', réajlë'u. Bica' ba nupa ni' ila'yéajlë' neda' sal-la' biti' ila'lé'eni neda'.

*Le rë'ëni gun didza' nazúaj lu guichi ni*

30 Benë' Jesús zíanrö ca' yöl-la' huáca lógaquië' bönni' usëda queë', le cabí nazúajgaca lu guichi ni. 31 Yugu' lë ni nuzúaja' lu guichi para tséajlë'ëli' náquië' Jesús Bönni' na' ru'ë Dios lë' Cristo, Zxí'inë' Dios, en cate' tséajlë'ëli', gata' queëli' yöl-la' na'bán idú tu' réajlë'ëli'-në'.

## 21

*Rulu'i lahuë' Jesús lógaquië' gadxë' bönni' usëda queë'*

1 Gudödi guca lë ni, leyúbölö bulu'i lahuë' Jesús lógaquië' bönni' usëda queë' ga naca ra' nísado' que Tiberias, ate' caní guca ca na' bulu'i lahuë' lógaquië'. 2 Nudúbigaquië' Simón Pedro, en Tomás, bönni' na' tu'ë ca' lë' Bönni' Bilidi', en Natanael, bönni' yödzo Caná que luyú Galilea, en chopë' bönni' zxí'inë' Zebedeo, en ia' chopë' ca' bönni' usëda queë' Jesús. 3 Simón Pedro rë' légaquië':

—Tseaja' tsöjxöna'-ba' böla.

Të' lë' ia' zíca'rë', ta'nnë':

—Guntu' li' tsözxön.

Ní'irö yójáquië', en gula'benë' tu lë'e bárcodo', ate' rëla ni' nituba' böla biti' gula'zönë'-ba'. 4 Cate' chizá' rení, yöjsóë' Jesús luyú ra' nisa na', pero biti' téquibe'enë' bönni' usëda queë' Jesús Lë' na'. 5 Ní'irö Jesús rë' légaquië':

—Zxí'ina'do', ¿naru' cabí deba' lati' böla queëli'?

Bulu'bi'ë didza', të' Lë':

—Nituba'.

6 Ní'irö Jesús rë' légaquië':

—Guli'chilaj yöxaj böla queëli' tsölá'a ibëla barco, ate' söngacali'-ba'.

Ní'irö gula'chiljë' le, ate' bítirö guca ulu'béajë' le, tu' naguíraba' böla lë'e yöxaj böla na'. 7 Ní'irö bönni' usëda na' nadxí'inë' Jesús lë' rë' Pedro, rnnë':

—¡Xanru' na'!

Cate' biyönnë' Simón Pedro, “Xanru' na'”, böácuë' lari' gúcuë', tu' nagüë' le zí'alö, ate' guyázië' lu nisa. 8 Bila'dxinë' ia' zíca'rë' bönni' usëda na', tu'së'ë barco na', suná'ayöjgaquië' yöxaj ga na' dzö'öba' böla, tu' cabí naca zi'tu' ga dë luyú bidxi. Nácatë ca tu gayuá' löga' ní'aru'. 9 Cate' bila'dxinë' luyú bidxi na', bila'lé'enë' rö'ö tu guí' bo' yalaj ni', en zxóaba' tuba' böla láhuilö, en dë ca' yöta ni'. 10 Jesús rë' légaquië':

—Guli'diguá'a-ba' ni böla na' si' guzxöngacali'-ba'.

11 Gurenë' Pedro lë'e barco na', ate' gú'uyöjë' yöxaj na' zaca' luyú bidxi, nalíró-ba' böla zxon, idú tu gayuá' yu' chí'inu-unba'. Sal-la' nácagacaba' böla zían, biti' biröza' yöxaj na'.

12 Ní'irö Jesús rë' légaquië':

—Guli'dá gáguli'.

Biti' burúguinë' nitúë' bönni' usëda queë' na' inábinë' Lë', innë': “¿Nuzxi Li'?” Nözguequi quézinë' náquië' Xanru'.

13 Ní'irö gubígui'ë Jesús, en gudélé'ë yöta na', enca' böla na', ate' bë'ë quégaquië'.

14 Lë ni naca le bunni luzuí buluí' lahuë' Jesús lógaquië' bönni' usëda queë' gudödi bubanë' lu yöl-la' guti.

*Jesús ru'ilenë' Simón Pedro didza'*

15 Cate' budxi gulahuë', Jesús rë' Simón Pedro:

—Simón, zxi'inë' Jonás, ¿naru' nadxí'irönu' neda' ca nadxí'iguequinë' bönni' ni neda'?

Bubi'ë didza' Pedro, rë' Lë':

—Ön, Xan. Li' nöz quézinu' raza ládxa'a Li'.

Jesús rë' lë':

—Bugagu yugu' bö'cu' zxíla'do' quia'.

16 Jesús rë' lë' le buropi luzuí, rnnë':

—Simón, zxi'inë' Jonás, ¿naru' nadxí'inu' neda'?

Bubi'ë didza' Pedro, rë' Lë':

—Ön, Xan. Li' nöz quézinu' raza ládxa'a Li'.

Jesús rë' lë':

—Bugagu yugu' bö'cu' zxíla' quia'.

17 Jesús rë' lë' le bunni luzuí:

—Simón, zxi'inë' Jonás, ¿raza ládxa'u neda'?

Buí'innë' Pedro tu' le chibunni luzuí rinabi yúdxinë' lë', gunné': “¿Raza ládxa'u neda'?” Bubi'ë didza' Pedro, rë' Lë':

—Xan, yúgu'të nöz quézinu' Li'. Nözínu' raza ládxa'a Li'.

Jesús rë' lë':

—Bugagu yugu' bö'cu' zxíla' quia'. 18 Le nácate' rea' li', cate' ni' nacu' ra'bando', rácasö quiu' bugacu cuinu', en ca gunnásö quiu' gudó'. Cate' igulu', ulí no'o, ate' nu yúbölö ugacu li' lari', en ichë' li' ga ni' biti' guë'ënnu' tseaju'.

19 Yugu' didza' ni bë'ë Jesús naca bë' naca gátië' Pedro, tsöjtë'ë lë'e yaga cruz, para gaca yöl-la' ba queë' Dios. Cate' budxi gunné' caní Jesús, gunné' ca' ia'tú:

—Gudá' neda'.

*Ru'ë didza' Jesús ca gaca queë' bönni' usëda na' nadxí'inë'*

20 Buécjë' Pedro, en bilé'enë' söjnhuë' légaquië' bönni' usëda na' Jesús nadxí'inë' lë'. Náquië' bönni' usëda na' gurö'ë cuita

lë'ë Jesús cate' ni' gulahuë', en gudxë' Jesús: "Xan, ¿nuzxi na' udödi Li'?" <sup>21</sup> Cate' Pedro bilé'enë' lë', rë' Jesús:

—Xan, ¿bizxi gunë' bönni' ni'?

<sup>22</sup> Jesús rë' lë':

—Channö rë'ënda' ugá'anë' bönni' ni ga idxinrö dza huöda', biti' ral-la' cö'u böniga. Gudá'a neda' li'.

<sup>23</sup> Guzë didza' ni ga nacu'ë böchi'ru' ta'yéajlë'ë Cristo. Téquinë' biti' gatië' bönni' usëda na'. Jesús biti' gudxë' lë' biti' gatië', pero caní gunnë': "Channö rë'ënda' ugá'anë' bönni' ni ga idxinrö dza huöda', biti' ral-la' cö'u böniga."

<sup>24</sup> Bönni' usëda ni naca' neda', Juan. Runa' ba nalí quéguequi lë ni, en nuzúaja' yugu' lë ni lu guichi, ate' nözili' naca idútë li le runa' ba nalí.

<sup>25</sup> Ziánrö ca' le benë' Jesús. Channö nu uzúaj léguequi lu guichi tu tu, rusaca' quia' biti' guequi yödzölió ni ila'cuá' guichi na' ral-la' nu uzúaj. Ca' caz.



## LE GULUNĒ' BÖNNI' GUBÁZ NASÖL-LĒ'Ē CRISTO Los Hechos

*Le guzxí' lu në'ë Dios, isöl-lë'ë Dios Bö' Lá'ayi*

<sup>1</sup> Cate' buzúaja' lu guichi zí'alö, quiu' li', Teófilo, neda', Lucas, buzúaja' yúgu'të le gusí lahuë' runë' Jesús, en rusédinë' <sup>2</sup> ga bidxintë dza buëpë' yehua' yubá. Cate' si' huëpë' Jesús yehua' yubá, dzáguie' Dios Bö' Lá'ayi Lë', gunná bë'ë ca ral-la' ilunë' gubáz queë', yugu' bönni' na' gurö cazë'. <sup>3</sup> Gudödi gudí'i guzxáque'ë Jesús, gútië'. Ní'irö hubanë', en buluí'i lahuë' lógaquie' gubáz queë' na'. Buluí'inë' légaquie' zían le gulaca bë' zoë' nabanë', le cabí gaca nu tá'baga'. Zían luzuí buluí'i lahuë' lógaquie' idú ca choá' dza, en bë'lenë' légaquie' didza' ca rinná bë'ë Dios.

<sup>4</sup> Cate' ni' nacu'ë tsözxön, gunná bé'enë' légaquie' cabí ulu'zë'ë Jerusalén. Jesús gudxë' légaquie', rnnë':

—Guli'cöz ni' le guzxí' lu në'ë Xuza' isöl-lë'ë queëli' ca na' chibusiyön quezida' libí'ili'.

<sup>5</sup> Gunnë' ca':

—Le nácatë Juan buquile' bönnachi nisa lu nisa. Na'a bití' tse xidzé gaca queëli' le ruluí'i yöl-la' ridila nisa ni, idisóalenë' Dios Bö' Lá'ayi libí'ili'.

*Ruhuëpë' Jesús yehua' yubá*

<sup>6</sup> Ní'irö yugu' bönni' ta'yéajlë'ë Jesús, nudúbigaquie' ni', gula'nábinë' Lë', ta'nnë':

—Xan, ¿naru' gunu' ga ila'nná bë' bönnachi Israel leyúbölö dza ni zóaru' na'a?

<sup>7</sup> Jesús gudxë' légaquie':

—Bití' nequi queëli' inözili' bizxi dza o bizxi dzö' gunë' Dios Xuz le nuzóë' lu na' cazë'. <sup>8</sup> Sí'ili' yöl-la' huáca cate' guidë' Dios Bö' Lá'ayi idisóalenë' libí'ili'. Ní'irö gunli' ba nalí quia' neda' lu yödzo Jerusalén, en idú luyú Judea, en luyú Samaria, en ga idxíntëli' idútë yödzölió.

<sup>9</sup> Cate' budxi bë'lenë' légaquie' didza' ni, tsanni ni' tu'yusë' ca' Lë', la' buëpitë' xitsá' ga rö'ö tu böaj le bucache' Lë', ate' bití'rö bila'lé'enë' Lë'. <sup>10</sup> Tsanni ni' tu'yúë' lúzxibalö cate' ni' buëpë' Jesús, bulu'luí'i lógaquie' chopë' gubáz lá'ayi ga na' nacu'ë, nácuagaquie' lari' chiguíchido'os. <sup>11</sup> Chopë' ni' gulë' légaquie', ta'nnë':

—Bönni' Galilea, ¿bizx que ruyuli' lúzxibalö? Lë' cazë' Jesús ni si' guzë'ë ga zóali', buëpë' yehua' yubá, lësca' caní huödë' leyúbölö ca na' chibilé'eli'-në' söhuöjë' yehua' yubá.

*Ta'böë Matías para tsázië' xilatjé' Judas*

12 Ní'irö gula'zë'ë ga na' rö'ö guí'ado' na' nazí'i le Guí'a Yaga Olivo, ate' yöjhu'öjgaquië' Jerusalén. Guí'ado' ni dë gála'sö ga dë Jerusalén, tsca nazí'gaquië' lataj ta'zë'ë dza lá'ayi quégaquië'. 13 Cate' bulu'dxinë' yödzö ni', gula'benë' ga naca buropi cuía lu yu'u, ga ni' ta'cu'ë Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, xzi'inë' Alfeo, en Simón, bönni' na' ruí'i láchxë'ë ladjë', en Judas, böchë'ë Jacobo. 14 Yúgu'të bönni' ni tu'lidzë' Dios tsözxön, ate' yugu' böchë'ë Jesús, en María, xinë'ë Jesús, en ia'zica'rönu nigula ca' núngaquië' légaquië' tsözxön.

15 La' dza ná'asö guzuinë' Pedro gatsaj lámui'lö ga nacu'ë böchi' luzá'aru' na' ta'yéajlë'ë Cristo. Gulaca idú ca xópalalaj bönachi nupa nudúbigaca ni'. 16 Pedro gudxë' légaquië', rnnë':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunnë' Dios Bö' Lá'ayi dza ni'të, le buzúajjé' David lu guichi, ca guca queë' Judas, bönni' na' guchë'ë nupa ni' gula'zön Jesús. 17 Judas na' gubábalenë' rë'u, en bënlenë' rë'u tsözxön dxin ni. 18 Gula'zfi'inë' tu la' yëla lazzaj que dö' na' bi'ë bönni' ni. Judas ni gubixë', en biröza' lë'ë, ate' bila'rúaj yúgu'të le dzö'ö lë'ë. 19 Cate' bila'yöni bönachi nacua' Jerusalén lë ni, gulu'ë le la' yëla na' Acéldama, tu didza' hebreo le rnna lu didza' xidza': La' Yëla Rön. 20 Caní guca queë' Judas, ca na' nazúaj lu guichi lá'ayi nazí'i le Salmos, le rnna:

Ugá'ana cá'asö lidxë',  
en bití' idzöli nu soa yu'u na'.

Rnna ca':  
Nu yúbölö tsaza xilatjé'.

21-22 'Run bayudxi na'a cöru'-në' tu bönni' gunë' rë'u tsözxön para gunë' ba nalí queë' Jesús, ca guca, bubanë' lu yöl-la' guti. Ral-la' gáquië' bönni' nabábalenë' bönni' ni' gula'cuá'lenë' rë'u dza ni'te cate' ni' Xanru' Jesús gudálenë' rë'u. Gula'sí lógaquië' nacua'lenë' rë'u cate' ni' buquilé' Juan bönachi nisa, ga bidxintë dza buëpë' Jesús yehua' yubá, cate' buzë'ë ga zóaru'.

23 Ní'irö bulu'lu'ë chopë', José, en Matías. José na' lë' ca' Barsabás, en zoa ia'tú lë' Justo. 24 Ní'irö bulu'lidzë' Dios, ta'nnë':

—Xantu' Dios, nunbë' casu' icja láchxi'do'gaca yúgu'të bönachi. Buluí'i netu' nulë' chopë' ni chigurö casu' Li' 25 para tsázië' lu dxin ni para gáquië' gubáz quiu'. Tsázië' xilatjé' Judas, bönni' ni' bunítië' xilatjé' tu' benë' dul-la', ate' guyijë' xilataj cazë' lataj chul-la.

26 Ní'irö bulu'zúajjé' yugu' lu guichi lágaquië', tu queë' José, en ia'tú queë' Matías. Bulu'gútsi'në' luzë'eguequi, en

bulu'béajë' tu, ate' birúaj le nazúaj lë' Matías. Caní guca, Matías na' gubábalenë' ia' chinéajë' gubáz queë' Cristo.

## 2

*Dios Bö' Lá'ayi ridisóalenë' légaquië'*

<sup>1</sup> Cate' chibidxín dza Pentecostés, nudúbigaquië' tsözxön yúgu'të bönni' ta'yéajlë'ë Cristo. <sup>2</sup> Tsálido'os biyön bö le birúaj lúzxiba, le biyön ca riyön cate' recja bö' budunu', ate' biyön idútë lu yu'u ga na' rë'ögaquië'. <sup>3</sup> Bulu'lu'í lahui yugu' bululu gu'do' lu bö'ös lógaquië', ate' gula'guísi que queëgaquië'. Bidisóalengaca tu tuë'. <sup>4</sup> Caní guca, Dios Bö' Lá'ayi bidisóalenë' yúgu'të', ate' gula'sí lógaquië' tu'ë didza' yúbölö, tsca naca le bë'ë Dios Bö' Lá'ayi que queë' gu'ë didza' yúbölö na'.

<sup>5</sup> Nacu'ë zían bönni' judío yödzö Jerusalén dza na', nácagaquië' bönni' ta'yéaj ládxi'gaquië' Dios, en zá'gaquië' narúajgaquië' yúgu'të yödzö idútë yödzölió ni. <sup>6</sup> Cate' bila'yönnë' bö na', bulu'dubë' bönni' zían, ate' gula'bö'ë böniga, tu' bila'yönnë', ca naca xtídza'gaquië' que queëgaquië', tu'ë didza' bönni' na' ta'yéajlë'ë Cristo. <sup>7</sup> Gula'ná' badxë' yúgu'të', en bulu'báninë, ta'nnë':

—Buli'yútsöca'. ¿Naru' calëga bönni' Galilea yúgu'të bönni' ni tu'ë didza'? <sup>8</sup> ¿Nacxi caz naca riyöniru' tu'ë xtídza'ru' ca naca didza' ru'iru' tu turu'? <sup>9</sup> Rë'u ni nácaru' bönni' zían yödzö, bönni' narúajgaquië'

luyú Partia, en luyú Media, en luyú Elam,  
en luyú Mesopotamia, en luyú Judea, en luyú Capadocia,  
en luyú Ponto, en luyú Asia,

<sup>10</sup> en luyú Frigia, en luyú Panfilia, en luyú Egipto,  
en luyú Africa, ga nácarö zi'tu' ga dë luyú Cirene.

'Lësca' nacu'ë bönni' yödzö Roma ni. Bal-lë' nácagaquië' bönni' judío, en ia'bal-lë' nazí' lu ná'agaquië' le ta'yéajlë'ë bönni' judío Dios. <sup>11</sup> Lësca' nacu'ë ni yugu' bönni' narúajgaquië' Creta, en luyú Arabia. Riyöniru' tu'ë didza' ru'iru' que queëru', ate' ta'guíxjö'ë yugu' le zxön benë' Dios, le tun ga rubániru'.

<sup>12</sup> Caní guca, bulu'báninë yúgu'të', en gula'bö'ë böniga. Gulë luzá'agaquië' tuë' ia'tué', ta'nnë':

—¿Bizxi caz lë ni?

<sup>13</sup> Bulu'titjë' bal-lë', ta'nnë':

—¡Ta'zúdxinë'!

*Libán benë' Pedro lógaca bönachi zían*

<sup>14</sup> Ní'irö Pedro guzuülenë' ia'chinéajë' gubáz na' nasöl-lë'ë Cristo, ate' gusí lahuë' ru'ë zidzaj didza', rë' légaquië':

—¡Libí'ili', bönni' Judea, en yúgu'tëli' nacuá'ali' yödzö Jerusalén! ¡Lë ni ral-la' inözili'! ¡Buli'zë nágali' le guía' libí'ili'!

15 Netu' ni bití' rizúdxitu' ca na' réquili' libí'ili', tu' ni zóaru' sí' gala' xsila, ate' cuntu nu rizudxi hora caní. 16 Lè ni naca le gunné' Joel, bönni' bë'ë didza' uláz queë' Dios, gunné':

17 Caní rnnë' Dios: Lè ni le gaca dza tsöjsétëgaca.

Isöl-la'a Bö' Lá'ayi quia', tsöjsóalenë' yúgu'të bönachi.

Zxí'inili', bönni', en nigula, ilu'íbi' didza' uláz quia' neda'.

Yugu' bi'i ra'bán ila'lé'ebi' le ulu'a lahui,

ate' yugu' bönni' gula ila'nenë' yëla.

18 Cate' idxín dza ni' quisia' Bö' Lá'ayi quia',

tsöjsóalenë' huen dxin quia', bönni', en nigula,

ate' ilu'ë didza' uláz quia' neda'.

19 Ulu'a lahui lúzxiba xitsá' le ilún ga ulu'bani bönachi,

ate' yödzülió ulu'a lahui le ilaca bë',

rön, en guí', en dzön ca böaj.

20 Ichul-la gubidza, ate' gaca beo' xiná ca naca rön.

Caní gaca cate' idxín dza ni' chibulu'ë Dios.

Gaca dza ni' le catu caz rilé'eru'.

21 Ulu'lágaca yúgu'të nupa ni' ulu'lidza Lë' Xanru',

lu yöl-la' réajlé' quéguequi Lë'.

22 'Buli'zé nágali' lè ni guía' libí'ili', bönachi Israel. Dios caz benë' bal Jesús, bönni' Nazaret ga zóali'. Dios bë'ë Lë' lataj benë' le tun ga rubániru', yugu' yöl-la' huáca, en le taca bë'. Yúgu'të lè na' benë' Dios lu në'ë Jesús, ca na' chinöz quézili'. 23 Lësca' caní, Dios bë'ë lataj nu budödi Jesús lu ná'ali'.

Caní guca, ca na' chigunná ladxë'ë Dios gunë', en ca naca le chibucözë' dza ni'te. Libí'i cázali' guzxönli'-në' Jesús, en bë'tili'-në' lu ná'agaquië' yugu' bönni' tuá' dö', bönni' gulútië' Lë' cate' ni' bulu'dá'gaquië' Lë' lë'e yaga cruz. 24 Ní'irö Dios caz busubanë' Jesús na'. Bubéajë' Lë' lu yöl-la' guti, tu' cabí guca ugá'anë' tsaz lu yöl-la' guti na'.

25 Ca naca lè ni, bë'ë didza' David uláz queë' Dios ca naca queë' Jesús, gunné':

Bilé'etiqui'sida'-në' Xanru', zoë' lahua'.

Lë' zoë' cuita lë'a ibëla, rizönë' neda',

para cabí gaca nu bi gun quia'.

26 Que lè ni na' budzeja ládxa'a,

ate' lu yöl-la' rudzeja quia' bil-la'.

Que lè ni na' guna' löza Lë'

cate' idxín dza gátia'.

27 Xantu' Dios, nözda' bití' ucá'anu' neda'

lataj chul-la ga nacué' nupa nátigaca.

Bití' gu'u lataj initi idútë le naca'.

Naca' bönni' nadxí'i quézinu' Li'.

28 Buzéajni'inu' neda' ca ral-la' guna'

para idéli'da' yöl-la' na'bán idú.

Gunu' ga udzëjada' tu' zóalen cazu' neda'.

29 'Na'a, libí'ili', böcha'a. Naca bē' gútiē' xuz xtó'oru' David, en bigáchē'e yeru ba, ate' ba queē' na' dē ga zóaru' ga ridxintē na'a dza. 30 David na' bē'e didza' uláz queē' Dios, en gunózinē benē' tsutsu Dios didza' le guzxi' lu nē'e queē', gunē' ga galjē' Cristo ladaj di'a dza queē' si' zá'gaca, ate' Cristo na' inná bē'e xilatjē' David na'. 31 Tu' bilé'enē' David lē ni zí'alō, bē'e didza' ca guca, bubanē' Cristo, en ca guca, biti' bugá'anē' lataj chulla ga nacuá' nupa nátigaca, en biti' guniti le naca cazē'. 32 Dios busubanē' Jesús lu yöl-la' guti, ate' ca guca lē ni yúgu'tētu' runtu' ba nalí que. 33 Caní guca, len yöl-la' huáca queē', Dios buchisē' Lē' xitsá' ga ni' nácatērē' zxön. Na'a, Cristo chigusöl-lē'e Dios Bö' Lá'ayi ni, ate' raca ca na' guzxi' lu nē'e Dios gunē' lu nē'e Cristo, ate' Dios Bö' Lá'ayi na' runē' yugu' lē ni rilé'eli', en riyönili'. 34 Biti' buēpē' David na' yehua' yubá, pero lē cazē' David na' gunnē':

Xanru' Dios gudxē' Xana':

Gurō'i cuita lē'a ibēla ga naca lo

35 cate' gunra' ga ulu' zechu zxíbigaca nupa ta'dá'baga' Li' lo' Li'.

36 'Na'a, bönachi Israel, ral-la' inözili' le nácatē. Dios benē' ga náquiē' Lē' cazē' Jesús ni Xanru', en Bönni' Rusölá, bönni' na' budá'ali'-nē' lē'e yaga cruz.

37 Cate' yugu' bönni' ni' bila'yönnē' lē ni, gula'bō'e böniga, ate' gulé' Pedro, en ia'zica'rē' bönni' gubáz queē' Cristo, ta'nnē':

—Böchi'ru', ¿nacxi gúntsatu'?

38 Ní'irō Pedro gudxē' légaquiē':

—Buli'bí'i ládxi'li', en guli'dila nisa tu tuli' lu Lē' Jesucristo para uniti lahuē' Dios dul-la' nabága'li', ate' Dios Bö' Lá'ayi idisóalenē' libí'ili', Nu na' isöl-lē'e Dios. 39 Queéli' nequi le guzxi' lu nē'e Dios, en quégaca zxí'inili', enca' quégaca yúgu'tē bönachi izá'a, yúgu'tē bönni' ni' ulidzē' Xanru' Dios légaquiē'.

40 Yugu' didza' ni, en ia'bal-la' zían didza' benē' ba nalí Pedro, le guchíziē' icja nágagaquiē', gunnē':

—Guli'gún ga uláli', irúajli' ladjagaca bönachi tuá' dö' nacuá' dza ni zóaru' na'a.

41 Caní guca, gula'dila nisa nupa ni' gula'zí' lu nē'eguequi didza' na' bē'e Pedro. Dza na' ca chi uruá' gayuá' bönachi gulún légaquiē' tuz. 42 Gulunē' yúgu'tē' idútē le bulu'sédinē' gubáz nasöl-lē'e Cristo légaquiē'. Guláquiē' tuz tuē' len ia'túē', en gulahuē' tsözxön le rusá' ládxi'ru' ca gútiē' Jesús, ate' gulunē' tsözxön, bulu'lidzē' Dios.

### *Ca tun bönachi queē' Cristo*

43 Gulunē' gubáz queē' Cristo zían le run ga rubániru', en zían le taca bē', pero guladxi gula'dzöbi ia'zica'rō bönachi. 44 Yúgu'tē nupa na' ta'yéajlē' Cristo gulaca tuz, ate' bulu'ún tuz yúgu'tē le dē quéguequi. 45 Cate' bila'lé'enē' ta'yadzaj nupa

nútsa'gaca ládjagaquië', ní'irö yugu' bönni' bi dë quégaquië' gulúti'ë le, ate' gula'guísië' dumí na' que queégaca nupa ni' bi ta'yadzaj. <sup>46</sup> Bulu'dubë' tsözxön chila yudo' yugu' dza, ate' gulahuë' le rusá ládxi'ru' ca gútië' Xanru'. Caní gulunë' gapa naca lu yu'u lídxi'gaquië'. Gulahuë' tsözxön, ate' bulu'dzëjanë', en gulaca idú ládxi'gaquië'. <sup>47</sup> Gula'gu'ë Dios yöl-la' ba, ate' yúgu'të bönachi gulún légaquië' bal. Buzanë' Xanru' nupa tu'dubi queë', nupa na' tu'lá tu tu dza.

### 3

#### *Ruhuöáquië' tu bönni' biti' raca së'ë*

<sup>1</sup> Tu dza ni' gula'benë' Pedro, en Juan, söjáquië' tsözxön lu chila yudo', cate' tu'dubi bönachi tu'lidza Dios ni', le naca idú ridödi xihuö. <sup>2</sup> Ga ni' ta'dödë' zoë' tu bönni' biti' raca së'ë dza ni'te ni' náquië' bí'ido'. Yugu' dza röjuá'gaquië' lë' ni', en ta'bëquië' lë' ra' yudo' ga nazí'i le Ra' Yu'u Lachi, para inábinë' nu bi unödztasö queë' ladaj nupa ni' ta'yaza lö'a yudo'. <sup>3</sup> Bönni' ni, cate' bilé'enë' Pedro, en Juan, söjáquië' ta'yázië' lö'a yudo', gúta'yüë' lógaquië' bi ulu'nödztasë' queë'. <sup>4</sup> Ní'irö bulu'yúë' Pedro, en Juan lë', ate' Pedro gudxë' lë':

—Buyú netu'.

<sup>5</sup> Ní'irö bönni' na' buzëda' náguië' légaquië' tu' runë' löza bi ulu'nödztasë' queë'. <sup>6</sup> Pedro gudxë' lë':

—Biti' dë dumí plata, dumí oro quia', pero le dësö quia' gunna' quiu'. Ni'a que yöl-la' huáca que Lë' Jesucristo, bönni' Nazaret, guyasa, en guzë'e.

<sup>7</sup> Ní'irö gudélë'ë Pedro në'ë ibëla bönni' huë' na', en buchisë' lë', ate' la' böacatë ni'ë, en buguitaj bëchaj ni'ë bönni' na'. <sup>8</sup> Ní'irö guzuínë' bönni' na', ate' guxíti'ë, en guzë'ë. Guyázalenë' tsözxön Pedro, en Juan, lö'a yudo', rizë'e ni'ë, en rixíti'ë, en rigü'ë Dios yöl-la' ba. <sup>9</sup> Yúgu'të bönachi nacúa' ni' ta'l'é'e lë' rizë'e ni'ë, en rigü'ë Dios yöl-la' ba. <sup>10</sup> Caní guca, guládxinë', en bulu'bánninë' ca naca lë na' guca, tu' bulu'únbë'ë lë', náquië' bönni' na' ribö'ë ra' yudo' ga nazí'i le Ra' Yu'u Lachi, rinabë' nu bi unödztasö queë'.

#### *Didza' bë'ë Pedro chila yudo'*

<sup>11</sup> Tsanni ni' bönni' na' biti' guca së'ë, ate' böáquië', zönë' ná'agaquië' Pedro, en Juan, bulu'dubi yúgu'të bönachi ga na' nacü'ë chila yudo' nazí'i le: Chila Queë' Salomón, ate' gula'ná' badxë'. <sup>12</sup> Cate' bilé'enë' Pedro lë ni, gudxë' bönachi na':

—Libi'ili', bönni' Israel, ¿bizx que rubánili' ca naca lë ni? ¿Bizx que ruyuli' netu', en réquitseli' netu'sö buntu'-në' bönni' ni, en bentu' ga rizë'e ni'ë len yöl-la' huáca queëztu', o ni'a que le reaj ládxi'tu'-në' Dios? <sup>13</sup> Naca lë ni le benë' Dios. Náquië' Dios quégaquië' xuz gudödi queëru' Abraham, en Isaac, en

Jacob. Lë cazë' bëntërë' bal Jesús, Zxi'inë'. Jesús ni, libí'í cázali' bëtili'-në' lu ná'agaquië' bönni' ta'nná bé'enë' libí'ili'. Cate' gú'unnë' Pilato usanë' Jesús, gudá'baga'li'-në'. <sup>14</sup> Buzóali' tsölá'alö Bönni' Tsahui', en Lá'ayi, ate' gunábili'-në' Pilato usanë' queëli' tu bönni' rútië' bönachi. <sup>15</sup> Caní guca, bëtili'-në' Bönni' runna cazë' yöl-la' na'bán idú queëru'. Ní'irö Dios busubanë' Lë' lu yöl-la' guti, ate' ca naca lë ni runtu' ba nalí que. <sup>16</sup> Tu' guyéajlë'ë bönni' ni Jesús, böáca ni'ë. Rilé'eli'-në', en núnbë'eli'-në'. Tu' réajlë'ë Jesús, Lë' bunë' dxí'ado' bönni' ni, ate' rilé'eli' yúgu'tëli' le nácatë na'.

<sup>17</sup> 'Na'a, böcha'a, nözda' benli' caní, bëtili'-në' Jesús tu' cabí guyéajni'ili', en biti' gula'yéajni'inë' bönni' ta'nná bé'enë' libí'ili'. <sup>18</sup> Caní busudxinë' Dios didza' na' bë'ë zí'alö, le gula'nnë' bönni' gulu'ë didza' uláz queë' ca ral-la' qui'í sáque'ë Cristo. <sup>19</sup> Que lë ni na', buli'bí'í ládxi'li', en buli'huóáca queë' Dios, para ugüë' dul-la' nabága'li', en gunë' ga huóáca ládxi'li'. <sup>20</sup> Ní'irö isöl-lë'ë leyúbölö Jesús, Bönni' na' buzóë' dza ni'te para gáquië' Cristo, Bönni' Rö queë', Bönni' na' inná bé'enë' libí'ili'. <sup>21</sup> Na'a, run bayudxi ugá'anë' yehua' yubá ni' cate' idxinrö dza uduhuénë' tsahui' yúgu'të le raca, en gaca ca na' chigunná cazë' Dios, lë na' gula'nnë' bönni' gulu'ë didza' uláz queë', bönni' ni' gula'cu'ë dza ni'te. <sup>22</sup> Lësca' caní Moisés gudxë' xuz xtó'oru', gunné': "Xanru' Dios isöl-lë'ë queëli' tu bönni' galjë' ládjagaca di'a dza queëli'. Gáquië' bönni' gu'ë didza' uláz queë' Dios. Isöl-lë'ë Lë' queëli' ca na' gusöl-lë'ë neda'. Run bayudxi uzë nágali'-në' ca naca yúgu'të le guié' libí'ili'. <sup>23</sup> Yúgu'të nupa biti' ulu'zë nágagaca bönni' ni' gu'ë didza' uláz queë' Dios ila'niti, en ulu'lá'alén bönachi queë' Dios."

<sup>24</sup> 'Ca naca dza ni zóaru' na'a, gula'guíxjö'ë yúgu'të bönni' gulu'ë didza' uláz queë' Dios ga gudéla'të zoë' Samuel, en gudödi ni'. <sup>25</sup> Libí'ili' nácali' zxi'ini xi'sóagaquië' bönni' gulu'ë didza' uláz queë' Dios, ate' nequi queëli' didza' rucá'ana tsahui', le bénlenë' Dios xuz xtó'oru', cate' ni' gudxë' Abraham: "Ni'a que le gunë' zxi'ini xi'sú' ilaca bica' ba yúgu'të bönachi yödzülió." <sup>26</sup> Cate' Dios busubanë' Zxi'inë' lu yöl-la' guti, gusöl-lë'ë Lë' zí'alö queëli' para gunë' ga gácali' bica' ba, en ucá'anali' le cabí naca dxí'a runlí'.

## 4

*Ta'dxinë' Pedro, en Juan lógaquië' bönni' yudo' tu'chi'a tu'söröë'*

<sup>1</sup> Tsanni ni' bönachi na' tu'ílenë' Pedro, en Juan, didza', yugu' bixúz judío, en yugu' bönni' yudo' saduceo, en bönni' ta'nná bé'enë' ni'a ná'agaquië' bönni' yudo', bila'dxinë' tsálido'os ga na' nacu'ë. <sup>2</sup> Gula'lenë' bönni' ni tu' tu'sédinë'

Pedro, en Juan, bönachi, en tē' léguequi ulu'bán nupa chinátigaca tu' bubanē' Jesús. <sup>3</sup> Ní'irö gula'zönē' Pedro, en Juan, ate' gula'gu'ē légaquiē' lidxi guié ga idxinrö dza yúbölö tu' chiridzö' dza na'. <sup>4</sup> Zián nupa ni' bila'yöni didza' gulu'ē Pedro, en Juan, gula'yéajlē' Cristo. Na'a, yugu' bönni' biguiú'sö ta'yéajlē'ē Cristo nácagaquiē' idú chi-un gáyu'ē.

<sup>5</sup> Dza buropi ni', yugu' bönni' unná bē', en bönni' gula tu'zéajni'inē' bönachi judío, en yugu' bönni' yudo' usēdi, bulu'dubē' lu yödzö Jerusalén. <sup>6</sup> Lësca' Anás, bixúz lo, en Caifás, en Juan, en Alejandro, enca' yúgu'tē bönni' di'a dza quégaquiē' bixúz lo bulu'dubē' ni'. <sup>7</sup> Ní'irö duchē'gaquiē' Pedro, en Juan, ate' bulu'sudxinē' légaquiē' gatsaj láhui'lö ga na' nacu'ē, en gula'nábinē' légaquiē', ta'nnē':

—¿Bizxi yöl-la' unná bē' dē lu ná'ali' runli' lē ni? ¿Nuzxi budödi lu ná'ali' yöl-la' unná bē' ni?

<sup>8</sup> Ní'irö Pedro gudxē' légaquiē', zóalenē' Dios Bö' Lá'ayi lē', rnnē':

—Libí'ili', núlöli' rinná bé'eli' netu', bönachi Israel, en libí'ili', bönni' gula. <sup>9</sup> Na'a, ¿rinábitseli' netu' ca naca dxin dxi'a bentu' queē' bönni' huē' ni, en nacxi guca, böáquiē' bönni' ni? <sup>10</sup> Riguíxjöi'itu' libí'ili' para ila'nözi yúgu'tē bönachi Israel. Zoē' bönni' ni loli', nuhuöáquiē' tu' ben dxin yöl-la' huáca queē' Jesucristo, bönni' Nazaret, Bönni' ni' budá'ali'-nē' lē'e yaga cruz, pero Dios busubanē' Lē' lu yöl-la' guti. <sup>11</sup> Dios bē'ē didza' ca naca queē' Jesús ni, cate' ni' gunné': "Libí'ili', bönni' rucúa'ali' zö'ö, gurú'unali' guiöj na', pero gurö caza' neda' guiöj na' para gaca guiöjlen zö'ö." <sup>12</sup> Cúnturö nu zoa nu gaca usölá bönachi, tu' cabí zoa yödzöliö ni ia'túé' bönni' nuzöé' Dios, nu gaca usölá rē'u.

<sup>13</sup> Cate' bila'lé'enē' nácagaquiē' rugu ladxi' Pedro, en Juan, en guléquibe'enē' bití' nazédagaquiē' que yudo', en nácagaquiē' bönni' cá'asö, bulu'báininē', ate' yöjnéguequinē' Pedro, en Juan na', gula'cuá'lenē' Jesús. <sup>14</sup> Lësca' bila'lé'enē' bönni' na' böáquiē', zuiné' lógaquiē', ate' bití' guca bi ila'nnē' quégaquiē'. <sup>15</sup> Ní'irö gula'nná bé'enē' nupa ulu'béaj légaquiē' lö'alö yu'u ga na' nudúbigaquiē', ate' gulún xtidzē'ē la' légacasē'. <sup>16</sup> Gula'nnē':

—¿Nacxi gúntsaru' quégaquiē' bönni' ni? Le nácate' gulunē' tu le run ga tu'bani bönachi, ate' nözigaca yúgu'tē bönachi nacúa' Jerusalén lē ni. Bití' gaca tá'baga'ru' le. <sup>17</sup> Na'a, para cabí sērö didza', en ila'yöni ziánrö ca' bönachi, uzeru' bach légaquiē' para cabí iluí'ilenrē' bönachi didza' ca naca queē' Jesús na'.

<sup>18</sup> Ní'irö bulu'lidzē' Pedro, en Juan, ate' bulu'zenē' bach légaquiē' para cabí iluí'ilenrē' bönachi didza', en para cabí ulu'sédinē' légaquiē' ca naca queē' Jesús. <sup>19</sup> Ní'irö bulu'bi'ē didza' Pedro, en Juan. Gulé' légaquiē':



—Buli'chi'a buli'sörö libí'ili' channö naca tsahui' lahuë' Dios uzërö nágatu' xtídza'li' libí'ili' ca xtídzë'ë Dios. <sup>20</sup> ¡Biti' gaca soa dxitu'! ¡Run bayudxi gü'itu' didza' que le bilé'etu', en le biyönitu'!

<sup>21</sup> Ní'irö yugu' bönni' yudo' tu'chi'a tu'söröë' bulu'zenë' bach légaquië', pero bulu'sanë' légaquië' tu' cabí gula'dzölinë' nacxi ilunë' légaquië' xíguia'. Caní gulunë' tu' guládxinë' le ilún bönachi lu yödzo ni', tu' ta'gú'u Dios yöl-la' ba ni'a que lë na' guca. <sup>22</sup> Bönni' na' böáquië', en guca queë' lë na' run ga rubániru', chiyú'urë' ca choá' iz.

*Ta'nábinë' Dios gunë' ga ilácagaquië' rugu ladxi'*

<sup>23</sup> Cate' bönni' yudo' bulu'sanë' Pedro, en Juan, böajgaquië' ga na' nacu'ë luzá'agaquië', ate' bulu'siyönnë' légaquië' yúgu'të lë na' gula'nnë' yugu' bixúz unná bë', en bönni' gula tu'zéajni'inë' bönachi judío. <sup>24</sup> Cate' bila'yönnë' lë ni, bulu'lidzë' Dios tsözxön, gula'nnë':

—Xantu' Dios, ¡zxöntërö nacu' Li'! ¡Li' nacu' Dios! ¡Benu' lúxiba! ¡Benu' luyú! ¡Benu' nísado'! ¡Benu' yúgu'të le nacuá' tu tu lataj na'! <sup>25</sup> Uláz quiu' Li' bë'ë didza' David, bönni' huen dxin quiu', ni' zóalenë' Dios Bö' Lá'ayi lë', gunné':

¿Bixz que tun dzatsa bönachi,  
en ta'zá' ládxi'gaca le ruá' dö'?

<sup>26</sup> Yugu' bönni' ta'nná bë'ë yödzölió ni gulún dzatsë',  
ate' guláquië' tuz bönni' unná bë'.

Gula'dá'báguë'ë Xanru' Dios,  
enca' Cristo, bönni' gurö cazë' Lë'.

<sup>27</sup> 'Le nácatë guláquië' tuz Herodes, en Poncio Pilato, en yugu' bönni' izá'a, en yugu' bönni' Israel lu yödzo ni. Gula'dá'báguë'ë Jesús, Zxí'inu' lá'ayi, Bönni' na' buzú' queëtu'.

<sup>28</sup> Gulunë' yúgu'të le bucözu' zí'atëlö, en guzxí' lu no'o, ate' guca ca na' benu' tsutsu xtídz'u ca ral-la' gaca. <sup>29</sup> Na'a, Xantu', buyú le tu'zenë' bach netu', en ben ga gácatu' rugu ladxi', para gü'itu' xtídz'u, netu' bönni' huen dxin quiu'. <sup>30</sup> Ben ga gaca úngacatu' nupa te'e, tu' sóalen yöl-la' huáca quiu' netu', en ben ga gaca gúngacatu' le ilún ga ubánitu', en le ilaca bë'. Gaca caní tu' zóalenë' Jesús, Zxí'inu' lá'ayi, netu'. ¡Ca' gaca!

<sup>31</sup> Cate' budxi bulu'lidzë' Dios, guzxizi lataj ga na' nacu'ë, ate' Dios Bö' Lá'ayi guzóalenë' yúgu'të', ate' len yöl-la' rugu ladxi' quégaquië' gulu'ë xtídzë'ë Dios.

*Tu'únë' tuz le dë quégaquië'*

<sup>32</sup> Bönachi zían na' ta'yéajlë' Cristo, tuz ca ta'zá' ládxi'guequi, en tuz ca gulúngaca. Biti' gunné' nu bönni' nútsë'ë ládjagaquië' nequi queëzë' le dë queë', pero bulu'únë' tuz le dë quégaquië'.

<sup>33</sup> Len yöl-la' huáca zxön gula'guíxjö'ë gubáz na' nasöl-lë'ë

Xanru' Jesús ca bubanë' Lë', ate' le buzá' ládxë'ë Dios quégaquië' gúcalen yúgu'të'. <sup>34</sup> Cuntu nu bi biyadzaj nu nutsa' ládjagaquië'. Caní guca tu' yúgu'të bönni' zoa bi dë quégaquië', xiyúgaquië', o lídxigaquië', gulúti'ë le, ate' dumí que na' yöjuá'gaquië', <sup>35</sup> en bulu'dödë' le lu ná'agaquië' gubáz na' nasöl-lë'ë Cristo, ate' légaquië' gula'guisië' le que queégaca nupa bi biyadzaj quéguequi. <sup>36</sup> Zoë' José ni', bönni' bulu'zóë' gubáz na' nasöl-lë'ë Cristo ia'tú lë' Bernabé, le rnna lu didza' xidza', Bönni' Ruhüé Tsáhuë'ë. Nabábalenë' zxi'ini xi'sóë' Leví, en guljé' luyú Chipre. <sup>37</sup> Bëti'ë bönni' ni tu cö' xiyúë', ate' yöju'ë dumí que na', en budödë' le lu ná'agaquië' gubáz na' nasöl-lë'ë Cristo.

## 5

### *Dul-la' gulunë' Ananías, en Safira*

<sup>1</sup> Tu bönni' yúbölö lë' Ananías, bëti'ë tu cö' xiyúë'. Safira, nigula queë', bennu tsözxön lë'. <sup>2</sup> Ananías na' bucachi' lanë' late' dumí que yu na', ate' nözinu ca' nigula queë'. Le bugá'anasö yöju'ë, en gulu'ë le lu ná'agaquië' gubáz nasöl-lë'ë Cristo. Rnnë':

—Tasca nisö guzxi'a.

<sup>3</sup> Pedro gudxë' lë':

—Ananías, ¿naru' guyázatsö Satanás tu' xihui' lu icja ládxido'o, en ben ga rizí' yé'enu' Dios Bö' Lá'ayi, ate' bucachi' lanu' late' dumí que xiyú' na'? <sup>4</sup> Tsanni ni' nagá'ana yu na' lu no'o, ¿naru' cabí nequi quez quiu'? Gudödi bëti'u le, ¿naru' cabí dë caz lu no'o dumí que na'? ¿Bizx que gurö'ö icju' gunu' caní? Dios caz guzxi' yé'enu', calégasö bönachi.

<sup>5-6</sup> Cate' biyönnë' Ananías didza' ni, gudzö'ë, en gútité'. Ní'irö gula'bíga'tëbi' bi'i ra'bán, ate' bulu'chölibi' lë' lari', en gulá'abi' lë', en yöjcáchi'gacabi' lë'. Guladxi gula'dzöbi yúgu'të nupa ni' bila'yöni ca guca lë ni.

<sup>7</sup> Ca tsonna hora gudödi ni', bidxinnu nigula queë' Ananías na' ni', en biti' nözinu lë na' guca queë' bönni' queënu. <sup>8</sup> Ní'irö Pedro gudxë'-nu:

—Gudíxjöi'i neda'. ¿Naru' guzxi'ili' tsca nisö xiyuli' na'?

Gunnánu:

—Ön, tsca nisö guzxi'itu'.

<sup>9</sup> Ní'irö Pedro gudxë'-nu:

—¿Bizx que ben tuz xtídza'li' guzxi' bë' xihui'li' Dios Bö' Lá'ayi? Buyútsöca'. Chizóa ulu'dxinbi' yugu' bi'i bulu'cáchi'bi-në' bönni' quiu', ate' ulu'béajbi' ca' li'.

<sup>10</sup> Ní'irö la' gudzö'tënu xini'ë Pedro, en gútiténu. Cate' gula'yázabi' bi'i ra'bán na', gula'lé'ebi'-nu chinátinu. Ní'irö bulu'béajbi'-nu, en yöjcáchi'gacabi'-nu cuita lë'ë bönni'

queënu. <sup>11</sup> Que læ ni na' guladxí gula'dzöbi yúgu'të bönachi queë' Dios, ate' guladxí ca' yúgu'të nupa bila'yöni ca guca læ ni.

*Tunë' bönni' gubáz nasöl-lë'ë Cristo le taca bë'*

<sup>12</sup> Gulunë' bönni' gubáz na' nasöl-lë'ë Cristo zían le taca bë', en zían yöl-la' huáca zxön lógaca bönachi lu yödzo. Yúgu'të bulu'dubë' tsözxön ga naca chila yudo' nazí'i le Chila Queë' Salomón. <sup>13</sup> Ladaj nupa ni' bití' ta'yéajlë' Cristo, cuntú nu burugui tsöjtá' légaquië', ate' bönachi lu yödzo ni' gulún légaquië' bal. <sup>14</sup> Ní'irö ia'bal-la bönachi zían ca' gula'yéajlë' Cristo, bönni', en nigula. <sup>15</sup> Cate' bila'lé'e bönachi yugu' le tunë' bönni' ni' ta'yéajlë'ë Cristo, yöjuá'agaca nupa te'e gapa naca la' nöza, ate' gula'xóë' léguequi lu dá'a yaga, en ia'bal-la lu dá'asö, para cate' tödë' ni' Pedro, tsa zxúl-lasö queë' cu'u zxul-la bal-la bönachi huë' na', para ulu'huóáca. <sup>16</sup> Lësca' bila'rúaj bönachi yugu' dzaga yödzo, en bila'dxín Jerusalén, nuá'agaca nupa te'e, en nupa ta'gu'i ta'zaca' tu' yú'ugaca bö' xihui' léguequi, ate' bulu'huóáca yúgu'téguequi.

*Bönni' yudo' ta'bía ládxi'gaquië' bönni' gubáz nasöl-lë'ë Cristo*

<sup>17</sup> Que læ ni na' bixúz lo, en bönni' yudo' saduceo na' dá'gaquië' bixúz lo, bulu'zxé'enë' Pedro. <sup>18</sup> Ní'irö bixúz lo na', en bönni' na' dá'gaquië' læ' gula'zönë' gubáz na' nasöl-lë'ë Cristo, ate' gula'gu'ë légaquië' lidxi guíë. <sup>19</sup> Ní'irö bidxinë' gubáz lá'ayi queë' Xanru' chí'i dzö'ölö, ate' gusaljë' lidxi guíë na', en bubéajë' légaquië'. <sup>20</sup> Gubáz lá'ayi na' gudxë' légaquië', rnnë':

—Guli'tséaj, guli'tsöjsóa chila yudo', en guli'tsöjë'len bönachi ni' didza', quíxjö'ili' légaquië' ca naca yöl-la' na'bán idú ni, en ca gaca ila'délinë' le.

<sup>21</sup> Cate' bila'yönnë' didza' ni ru'ë gubáz lá'ayi na', gula'yázië' chila yudo' cate' za' rení' zílado', en bulu'sédinë' bönachi.

La' ní'isö bulu'dubë' bixúz lo, en nupa nacué'len læ' tsözxön, len bönni' yudo' tu'chí'a tu'söröë', en bönni' gula tu'zéajni'inë' bönachi Israel, ate' gula'söl-lë'ë nupa tsöjaca lidxi guíë para tsöjxí'gaquië' yugu' gubáz na' nasöl-lë'ë Cristo, tu' téquinë' ni' nacué' lidxi guíë na'. <sup>22</sup> Cate' ni'a ná'agaquië' bönni' yudo' na' bila'dxinë' ni', bití' yöjxáca'gaquië' légaquië' lu yu'u lidxi guíë na', ate' ní'irö bulu'huóajë' tsöjtíxjö'gaquië' ca'. <sup>23</sup> Gulë' bönni' yudo' tu'chí'a tu'söröë' na', ta'nnë':

—Le nácatë yöjxáca'tu' nayáyajtë lidxi guíë, ate' nacué' nupa tun chí'i ra' lidxi guíë na', pero cate' gusalajtu', cuntú nu yöjxáca'tu' lu yu'u na'.

<sup>24</sup> Cate' bixúz lo, en yugu' bixúz unná bë', en bönni' nacué' lu në'ë ni'a ná'agaca bönachi yudo', bila'yönnë' didza' ni,

gula'bõ'dë'ë bõniga tu' cabí nõziguequinë' bizxi guntë lë na' raca. <sup>25</sup> Ní'irõ bidxinë' tu bõnni' ni', en gudíxjõi'inë' légaquië', rnnë':

—Buli'yútsõca'. Yugu' bõnni' na' gulú'ugacali'-në' lidxi guíë nacu'ë chila yudo' tu'sëdinë' bõnachi.

<sup>26</sup> Ní'irõ guyijë' bõnni' na' rinná bé'enë' ni'a ná'agaca bõnachi yudo', dzágagaquië' lë' ni'a ná'agaquië' na', ate' gula'chë'ë yugu' gubáz na' nasõl-lë'ë Cristo, pero biti' bi gulunë' quégaquië', tu' guládxinë' ulu'ládxí' bõnachi nacuá' ni' légaquië' guiõj. <sup>27</sup> Cate' chinachë'gaquië' yugu' gubáz na', bulu'sudxinë' légaquië' lógaquië' bõnni' yudo' tu'chi'a tu'sörõë' na', ate' bixúz lo gunábinë' légaquië', rnnë':

<sup>28</sup> —¿Naru' cabí gúdxida'atu' libí'ili' biti' usédili' bõnachi ca naca queë' bõnni' na'? Na'a, chigudísili' xibá ni idútë yõdzõ Jerusalén, en ré'ënili' usubága'li' netu' xíguia' tu' nõzi yõl-la' guti queë' bõnni' na'.

<sup>29</sup> Ní'irõ bulu'bi'ë didza' Pedro, en ia'zícá'rë' gubáz na' nasõl-lë'ë Cristo, ta'nnë':

—Run bayudxi uzërõ nágatu' xtídzë'ë Dios ca xtídzá'gaca bõnachi. <sup>30</sup> Libí'ili' bétili'-në' Jesús cate' ni' budá'ali'-në' lë'e yaga cruz, pero Dios quégaquië' xuz xtó'oru' busubanë' Lë'. <sup>31</sup> Jesús ni, Dios buzóa cazë' Lë' ga nayëpisëtë'rë' cuita lë'ë ibëla, para gáquië' Bõnni' Lo, en Bõnni' Rusólá, en gunë' ga ulu'bí'i ládxi'gaca bõnachi Israel, para gaca uniti lahuë' dul-la' nabága'gaquië'. <sup>32</sup> Ca naca lë' ni, runtu' netu' ba nalí que, ate' lësca' runë' Dios Bõ' Lá'ayi ba nalí que, Bõ' na' risõl-lë'ë Dios quégaca nupa tun ca rnna xtídzë'ë.

<sup>33</sup> Cate' bila'yõnnë' bõnni' yudo' tu'chi'a tu'sörõë' na' lë' ni, gula'lenë', en gulë'ënnë' ilútië' légaquië'. <sup>34</sup> Ní'irõ guzuinë' tu bõnni' yudo' ruchi'a rusörõë' lógaquië', lë' Gamaliel, tu bõnni' yudo' fariseo. Rácadë'ë bõnni' ni xibá queë' Moisés, ate' yúgu'të bõnachi tun lë' bal. Gudxë' nupa na' ulu'béaj yugu' gubáz na' nasõl-lë'ë Cristo lõ'alõ tu chí'ido'. <sup>35</sup> Ní'irõ gudxë' bõnni' yudo' tu'chi'a tu'sörõë' na', gunnë':

—Libí'ili', bõnni' Israel, buli'yutëz queëli' ca naca le ré'ënili' gunli' quégaquië' bõnni' ni. <sup>36</sup> Ral-la' tsõjnéli' ca guca zí'atëlõ cate' si' idxín dza ni zóaru' na'a. Birúajë' Teudas, ate' ben cuinë' ca tu bõnni' nayëpisëtë'rë'. Guláquië' bõnni' yõjtá'gaquië' lë' idú tapa gáyu'ë bõnni'. Yugu' bõnni' røjáquië' gudil-la gulútië' lë', ate' gulásilasi yúgu'të nupa ni' yõjtá'gaca lë', ate' gunítisõ ca' yúgu'të le benë' bõnni' na'. <sup>37</sup> Gudõdi guca lë' ni, birúajë' ca' Judas, tu bõnni' Galilea. Benë' caní cate' ni' gula'yú'u lu guichi bõnachi ta'guíxaj lázagaquië', ate' yõjtá'gaca bõnachi zían lë'. Lësca' gulútië' bõnni' ni, ate' gulásilasi yúgu'të nupa ni' yõjtá'gaca lë'. <sup>38</sup> Que lë' ni na' rea' libí'ili': Guli'sán-gaquië'

bönni' ni, en biti' bi gunli' quégaquié'. Channö naca quégacasö bönnachi lë ni ta'nné' o lë ni tuné', initi caz, <sup>39</sup>pero channö naca queé' Dios, biti' gaca usunítilli' le. ¡Buli'yú cuinli' cabí tíl-lalenlí'-në' Dios!

<sup>40</sup>Ní'irö gulunë' tuz didza' len lë'. Bulu'lidzë' yugu' gubáz na' nasöl-lë'ë Cristo, ate' gula'guiné' légaquié', en bulu'zenë' légaquié' bach para cabirö ilu'ilenë' bönnachi didza' ca naca queé' Jesús. Ní'irö bulu'sanë' légaquié'. <sup>41</sup>Bila'rúajë' gubáz na' nasöl-lë'ë Cristo lógaquié' bönni' yudo' tu'chi'a tu'söröë' na'. Tu'dzéjanë' tu' bë'ë Dios légaquié' lataj gula'gu'i gula'záquë'ë tu' dá'gaquié' Jesús. <sup>42</sup>Yugu' dza bulu'sëditiqui'sinë' bönnachi, en gulunë' libán queé' Jesucristo lu chila yudo', en gapa naca lu yu'u lídxigaca bönnachi.

## 6

### *Ta'böë' gadxi bönni' para ilácalenë' bönnachi queé' Cristo*

<sup>1</sup>Dza ni', tu' gula'yán bönnachi ta'yéajlë' Cristo, yugu' bönni' judío tu'ë didza' griego gula'nnë' quégaquié' bönni' judío tu'ë didza' hebreo tu' nözi le raca cate' ta'guisië' le ilágunu nigula uzëbi, tu' cuntú nu ruí'i le ilágunu nigula uzëbi quégaquié' bönni' ni' tu'ë didza' griego. <sup>2</sup>Ní'irö idxínnutë' bönni' gubáz na' nasöl-lë'ë Cristo bulu'tubë' yúgu'të bönnachi ni' ta'yéajlë' Cristo, ate' të' légaquié':

—Biti' naca dxi'a soa dxitu', en cabí guntu' libán que xtídzë'ë Dios, para guntu' dxin cú'utu' le ilágugaca bönnachi. <sup>3</sup>Que lë ni na', böchi' luzá'atu', guli'cö gadxë' bönni' ládjali', para ugú'uru' lu ná'agaquié' dxin ni. Yugu' bönni' na' run bayudxi ilácagaquié' bönni' tun yúgu'të bönnachi légaquié' bal, en nácagaquié' bönni' ta'yéajni'i, en naca bë' Dios Bö' Lá'ayi zóalenë' légaquié'. <sup>4</sup>Netu' ni ulídzatica'stu'-në' Dios, en usëditi' bönnachi xtídzë'ë Dios.

<sup>5</sup>Yúgu'të' gula'yaza ládxi'gaquié' didza' ni, ate' gula'böë' Esteban, tu bönni' réajlë'ë Cristo idú ládxe'ë, en zóalenë' Dios Bö' Lá'ayi lë'. Lësca' gula'böë' Felipe, en Prócoro, en Nicanor, en Timón, en Parmenas, en Nicolás, bönni' yödzö Antioquía, bönni' zí'alö butsé'ë ca runë' para tseaj ládxe'ë Dios ca tunë' yugu' bönni' judío. <sup>6</sup>Ní'irö bulu'sudxinë' bönni' na' gula'böë' lógaquié' gubáz na' nasöl-lë'ë Cristo. Yugu' bönni' gubáz na' gula'xóa ná'agaquié' légaquié', ni' tu'lidzë' Dios.

<sup>7</sup>Guzërö xtídzë'ë Xanru', ate' gula'yanda' bönnachi ta'yéajlë' Cristo nacua' Jerusalén. Lësca' zían bixúz judío gula'zí' lu ná'agaquié' le réajlë'ëru' Cristo.

### *Ta'zönë' Esteban*

<sup>8</sup>Esteban na' benë' le tun ga rubániru', en yugu' le taca bë' lógaca bönnachi lu yödzö, zóalen yöl-la' huáca queé' Dios

lè' le buzá' ládxë'ë queë'. <sup>9</sup> Ní'irö gula'yasë' bal-lë' bönni' nabábagaquië' yu'u ga tu'dubë' bönni' judío, en tu'sëdë' queë' Dios, nazí'i le Yu'u Quégaquië' Bönni' Nadzángaquië'. Bönni' narúajgaquië' yödzö Cirene, en yödzö Alejandria, en luyú Cilia, en luyú Asia, gulunë' légaquië' tsözxön. Bönni' ni gula'díl-lalenë' Esteban didza'. <sup>10</sup> Biti' guca tá'baga'gaquië' didza' ru'ë Esteban na', tu' bë'ë didza' len yöl-la' réajni'i, tu' zóalenë' Dios Bö' Lá'ayi lë'. <sup>11</sup> Ní'irö gula'guízxjë' bönni' ila'zí' yë'ë, ila'nnë': "Netu' biyönitu' didza' ru'ë Esteban ni, rnnë' zi'ë queë' Moisés, en queë' Dios." <sup>12</sup> Caní guca, bönni' ni gula'gu'ë xilá ládxi'gaca bönachi, tsözxön len bönni' gula tu'zéajni'inë', en yugu' bönni' yudo' usëdi. Yúgu'të bönni' ni gula'bía di'ë Esteban na'. Gula'zönë' lë', en gula'ché'ë lë' lógaquië' bönni' yudo' tu'chi'a tu'söröë'. <sup>13</sup> Lësca' bulu'cu'ë lógaquië' nupa gula'guíxj' le cabí nácatë, bönni' na' gula'nnë':

—Biti' zoë' dxisö bönni' ni rnnë' zi'ë que yudo' lá'ayi ni, en que xibá queë' Dios. <sup>14</sup> Biyönitu' didza' bë'ë bönni' ni ca gunë' Jesús, bönni' Nazaret, rnnë' usunítië' yudo' ni, en utsë'ë yugu' le nalëbiru' runru', yugu' lë' na' gunná bé'enë' Moisés rë'u.

<sup>15</sup> Ní'irö bönni' yudo' tu'chi'a tu'söröë', en yúgu'të nupa r'ógaca ni' bulu'yúë' Esteban, ate' bila'lé'enë' lahuë', rna' ca rna' lahuë' tu gubáz lá'ayi queë' Dios.

## 7

### *Didza' bë'ë Esteban, le gunné' uláz queë'*

<sup>1</sup> Ní'irö bixúz lo gunábinë' Esteban na', rnnë':

—¿Naru' nácatë caní?

<sup>2</sup> Bubi'ë didza' Esteban, rnnë':

—Libi'ili', bönni' gula, en libi'ili', böcha'a. Buli'zë nágali' le guía' libi'ili'. Dios, Bönni' nayépisëtërë', bulu'i lahuë' ga zoë' Abraham, xúziru' gudödi, cate' ni' zoë' luyú Mesopotamia, cate' si' tsöjsöë' yödzö Harán. <sup>3</sup> Dios gudxë' lë': "Birúaj ladzu', en bulá'alén di'a dza quiu', ate' guyéaj luyú ni' uluí'ida' li'."

<sup>4</sup> Ní'irö birúajë' Abraham luyú Mesopotamia le naca xiyúgaca bönachi Caldea, ate' yöjsöë' yödzö Harán. Lu yödzö ni' gútië' xuzë' Abraham na', ate' lë' buzë'ë ni', ate' Dios guchë'ë lë' luyú ga ni zóaru' na'a. <sup>5</sup> Dios biti' bë'ë lë' lataj guequi queë' luyú ni. Calëga láti'sö bunödzejë' queë' ga soë' luyú ni, pero guzxi' lu në'ë Dios unödzejë' queë' luyú ni, ate' tödi gátië' Abraham guequi luyú ni quégaca xzí'ini xi'söë', sal-la' biti' nacu'i'nibi' bi'i queë'. <sup>6</sup> Lësca' caní Dios gudxë' Abraham: "Tsöjáquië' xzí'ini xi'sú' lu xiyúgaca bönachi izá'a, ate' ni' ilácagaquië' ca bönachi zi'tu'. Ilunë' bönni' luyú ni' ga ilácagaquië' xzí'ini xi'sú' bönni' nadó'ogaquië'. Ulu'saca' zi'ë légaquië' idú ca tapa gayuá' iz." <sup>7</sup> Lësca' Dios gudxë' lë': "Neda' uzötja' bönachi luyú ni', ga

ni' ilácaquië' xzí'ini xi'sú' bönni' nadó'ogaquië', ate' tödi ni' ulu'rúajë' ni', ate' ilunë' xichina' luyú ni.' <sup>8</sup> Dios bénlenë' Abraham tu didza' rucá'ana tsahui', en gunná bé'enë' lë' ichúguië' lu xipéla'gaquië' bönni' biguiú' nacu'ë lidxë' tu le gaca bë' nazí' lu ná'agaquië' didza' na' rucá'ana tsahui'. Gudödi ni' gúquië' Abraham xúzibi' bi'i Isaac, en cate' chigúquibi' xunu' gubidza, guchúguië' lu xipéla'bi' lë' na' naca bë'. Isaac na', lësca' caní benë' queëbi' bi'i Jacob, xzí'inë', en caní benë' ca' Jacob quégaca idxínnutëbi' bi'i bönni' queë', nupa ni' gulaca xuz xtó'ogaca idxinnu cö' bönachi Israel.

<sup>9</sup> 'Yugu' xuz xtó'oru' na', lu yöl-la' ruzxé'e quégaquië', gulúti'ë-bi' bi'i José, böchi'gaquië', lu ná'agaquië' bönni' ni' gulúti'gaquië'-bi' luyú Egipto. Dios guzóalenë'-bi' bi'i José na' <sup>10</sup> en busölë'-bi' lu le gulaca queëbi'. Dios bë'ë-bi' yöl-la' réajni'i, le ben ga guyaza ládxë'ë-bi' Faraón, bönni' rinná bé'enë' bönachi Egipto, ate' Faraón na' budödë' lu ná'abi' bi'i José yöl-la' unná bë' para gunná bé'ebi' bönachi luyú Egipto, en yúgu'të bönachi nacuá' lidxë' Faraón na'.

<sup>11</sup> 'Ní'irö gúcada' gubín idú luyú Egipto, en luyú Canaán ni, ate' gula'gu'i gula'zaca' yúgu'të bönachi dza ni'. Biti' bidzöli le ilahuë' xuz xtó'oru'. <sup>12</sup> Cate' biyönnë' Jacob dë zxoá' xtila luyú Egipto, gusöl-lë'ë yugu' xzí'inë', bönni' ni' nácagaquië' xuz xtó'oru', luyú ni'. Caní guca le zí'alö luzuí yöjáquië' ni'. <sup>13</sup> Cate' le buropi luzuí yöjáquië' luyú Egipto, benë' José ga bulu'únbë'ë böchë'ë lë'. Caní guca, gunözinë' Faraón nupa nácagaca di'a dza queë' José. <sup>14</sup> Ní'irö gusöl-lë'ë José didza', en benë' ga bidxinë' Jacob, xuzë', luyú Egipto, ate' dzágagaca di'a dza queë' lë'. Gulaca idú tsónnalalaj yu' chinu bönachi. <sup>15</sup> Caní guca, bidxinë' Jacob luyú Egipto, ga ni' gútië' lë', ate' gulátië' ca' xuz xtó'oru' luyú ni' cate' bizá'a dza que queëgaquië'. <sup>16</sup> Cate' gulátië' tu tu xuz xtó'oru', xzí'ini xi'sóagaquië' yöjuá'agaquië' légaquië' luyú Siquem, ate' ni' bulu'cáché'ë légaquië' yeru ba lu zzan bulóaj na' gú'uë' Abraham lu ná'agaca xzí'inë' Hemor, bönni' Siquem na'.

<sup>17</sup> 'Gudödi zían iz, cate' bidxín dza ral-la' gaca le guzxi' lu në'ë Dios, lë' na' benë' tsutsu xtídzë'ë gunë' queë' Abraham, gula'yán bönachi yugu' cö' Israel, ate' gulaca bönachi zían cate' ni' gula'cuá' luyú Egipto. <sup>18</sup> Ní'irö guyázië' bönni' yúbölö gunná bë'ë luyú Egipto na', en catu caz biyönnë' ca naca le benë' José, gúcalenë' bönachi Egipto. <sup>19</sup> Bönni' unná bë' na' bi'ë dö' quégaca bönachi uládz queëru'. Busaca' zi'ë yugu' xuz xtó'oru' na', en benë' ga bulu'sanë'-bi' bi'i bönni' huë'ënido' que queëgaquië', para ilátibi'. <sup>20</sup> La' dza ní'isö gúljabi' ca' bí'ido' Moisés, ate' Dios guyaza ládxë'ë-bi'. Xuz xiná'abi' bulu'sculë'-bi' lídxigaquië' idú ca tsonna beo'. <sup>21</sup> Cate' bidxín dza ulu'sanë'-bi' xuz xiná'abi'

para gátibi' bí'ido' Moisés na', bidxinnu nigula zxi'iné' Faraón ga ni' bulu'cá'ané'-bi', ate' yójzxi'ínu-bi', en buscúlunu-bi' ca bi'i que cázanu. <sup>22</sup> Caní guca, bizédabi' bi'i Moisés yúgu'tè le táquiè' bönni' Egipto, en gúcatèröbi' zxön ca naca didza' bé'èbi', en ca nátagaca le benbi'.

<sup>23</sup> 'Cate' Moisés na' chiyú'ubi' choá' iz, gunná ládxi'bi' tsöjyubi' bönachi uládz queëbi', bönachi Israel. <sup>24</sup> Cate' bidxinbi' ga na' nacu'è, bilé'ebi'-né' tu bönni' Egipto, rusaca' zi'è tu bönni' uládz queëbi'. Ní'irö gúcalenbi'-né' bönni' uládz queëbi' na', en bétibi'-né' bönni' Egipto na'. Caní guca, buzí' labi' bi'i Moisés bönni' na' uláz queë' bönni' uládz queëbi'. <sup>25</sup> Gúquibi' Moisés huala'yéajni'iné' bönni' böchi'bi' guné' Dios ga usölábi' lè cázabi' légaquiè', pero légaquiè' biti' gula'yéajni'iné'. <sup>26</sup> Ia'tú dza ca' yójxáca'bi' ia' chopè' bönni' Israel, ta'dil-lè', ate' gú'unibi' cuéqui dxibi' légaquiè', en gúdxibi' légaquiè': "Libí'ili', böchi'li' naca. ¿Bizx que ruá'ali' luzá'ali' dö'?" <sup>27</sup> Ní'irö bönni' na' ru'è dö' que luz'è budxíguè'è-bi' bi'i Moisés, gunné': "¿Núzxitè buzóa li' para inná bé'enu' netu', en uchi'a usöröu' le runtu'?" <sup>28</sup> ¿Naru' r'è'ënitsenu' gútiu' ca' neda' ca benu' néaje, bétiu'-né' bönni' Egipto na'?" <sup>29</sup> Cate' Moisés biyönibi' didza' ni, buzxúnnajbi' ni', en yöjsóabi' luyú Madián ga ni' guzóabi' ca tu bönni' zi'tu'. Luyú Madián na' butsaga ná'alenbi'-nu nigula lu yödzö ni', ate' gúl'jagacabi' chópabi' bi'i bönni' queë'.

<sup>30</sup> 'Cate' chigudödi choá' iz zoë' ni', buluí'i lahuè' tu gubáz lá'ayi queë' Dios ga zoë' lu guí' que yaga yótsi'do' régui, ga ni' naca lu lataj cá'asö, le rö'ö ra' guí'a nazí'i le Sinaí. <sup>31</sup> Cate' Moisés bilé'enè' guí' na', bubájiné', ate' gubígui'è gala' para ilé'enè' dxi'a, ate' biyönnè' chi'è Xanru'. <sup>32</sup> Caní gudxè' Xanru' lè': "Neda' naca' Dios quégaquiè' xuz xto'o. Naca' Dios queë' Abraham, en Dios queë' Isaac, en Dios queë' Jacob." Ní'irö lu yöl-la' radxi queë', guzxízidè'è Moisés, en bíti'rö burúguinè' uyúè'. <sup>33</sup> Xanru' gudxè' lè': "Guléaj xirachu' nudó'o, tu' naca lá'ayi ga ni zu' tu' zoa caza' neda', Dios, ni. <sup>34</sup> Le nácatè chibilé'eda' le ta'guí'i ta'zaca' bönachi quia' nacuá' luyú Egipto, en chibiyönda' ta'bödxi yeche'. Bötja', zoa' ni para usölá' légaquiè'. Gudá na'a, isöl-la'a li' luyú Egipto."

<sup>35</sup> 'Sal-la' bönni' uládz queë' Moisés, bulu'cá'anè' lè' cá'asö, gula'nnè': "¿Núzxitè buzóa li' para inná bé'enu' netu', en uchi'a usöröu' le runtu'?" Dios gusöl-lè'è lè' para gáquiè' bönni' unná bé', en bönni' rusölá, ca na' gubáz lá'ayi na' queë' Dios gudxè' Moisés, cate' buluí'i lahuè' lu yaga yótsi'do' régui ga na' zoë'. <sup>36</sup> Moisés ni bubéajè' bönni' uládz queëru' luyú Egipto. Guca caní gudödi benè' le gulún ga bulu'bani bönachi ni', en le taca bé' benè' luyú ni'. Lësca' caní benè' lu nísado' nazí'i le Nísado'



Xiná. Caní benë' lógaquië' idú ca choá' iz lu lataj cá'asö. <sup>37</sup> Lë cazë' Moisés na' gudxë' bönachi Israel ni', gunné': "Xanru' Dios isöl-lë'ë queëli' tu bönni' galjë' ladaj di'a dza queëli', ate' gáquië' bönni' gu'ë didza' uláz queë' Dios. Isöl-lë'ë lë' queëli' ca na' gusöl-lë'ë neda'. Lë cazë' run bayudxi uzë nágali-në'." <sup>38</sup> Lësca' lë cazë' Moisés na' guzóalenë' bönachi nudúbigaca queë' Dios lu lataj cá'asö, ate' gudzáguië' gubáz lá'ayi queë' Dios lë', Nu na' bé'len lë' didza' lu guí'a Sinaí na'. Moisés na' guzóalenë' xuz xtó'oru', ate' Dios budödë' lu në'ë xibá lá'ayi queë', le ruí'i didza' ca gaca ila'deli' bönachi yöl-la' na'bán, ate' budödë' Moisés xibá ni lu ná'agaca xzí'ini xí'sóagaquië' ga ridxintë queëru' rë'u.

<sup>39</sup> Biti' gulë'ënnë' xuz xtó'oru' ilunë' ca rnna xtídzë'ë Moisés, pero bulu'zóë' lë' tsölá'alö, en gulë'ënnë' tsöjhuöjgaquië' luyú Egipto. <sup>40</sup> Cate' ni' zoë' Moisés na' lu guí'a Sinaí na', légaquië' gulë' Aarón, böchë'ë Moisés na', gula'nnë': "Rë'ënitú' gunu' yugu' dios queëtu', tu budó' guië', para tsöjnörugaca lotu'. Biti' nöztu' bi guca queë' Moisés, bönni' na' nubéajë' netu' luyú Egipto." <sup>41</sup> Ní'irö gulunë' tu budó' oro le naca ca tu bëdxido', ate' gulútië'-ba' bö'cu' xzí'la'do', en gulú'ugaquië'-ba' lo budó' oro na', ate' gulunë' laní lo budó' na' núnagaquië'. <sup>42</sup> Que lë ni na' Dios bucá'anë' légaquië', en guléaj ládxe'ë légaquië'. Ní'irö gula'yéaj ládxi'gaquië' yugu' le ta'yëpi lúzxiba. Ca naca lë ni nazúaj lu guichi le gula'nnë' bönni' gulu'ë didza' uláz queë' Dios, le rnna:

Libí'ili', bönachi Israel,

¿naru' gulú'ugacatsali'-ba' quia' neda' böa' bëdxi ni' bëtigacali'-ba', en buzégui'gacali'-ba',  
lë na' benli' lu lataj cá'asö idú ca choá' iz?

<sup>43</sup> Biti' gulú'ugacali'-ba' quia' neda',

pero biá'ali' le nequi que Moloc, budó' guiöj queëli'.

Biá'ali' ca' tu le naca ca böläj lúzxiba nazí'i le Refán,

lë na' buzóali' ca dios queëli'.

Yugu' budó' guiöj budó' yaga ni,

la' libí'sili' benli' para guyéaj ládxi'li' léguequi.

Que lë ni na', ubéaja' libí'ili' lu xiyuli',

en ichë'a libí'ili' zí'tu'rö ga dë luyú Babilonia.

<sup>44</sup> 'Cate' ni' gula'cu'ë xuz xtó'oru' lu lataj cá'asö, guta' quégaquië' yu'u lari' na' ga gulún chi'ë xibá queë' Dios, lë na' naca bë' Dios caz zóalenë' légaquië'. Gulunë' tu yu'u lari' na' ca na' Dios gunná bé'enë' Moisés, cate' ni' gudxë' lë' gunë' le ca naca lë na' bilé'enë', le buluí'inë' Dios lë' lu guí'a ni'.

<sup>45</sup> Lësca' bulu'dödë' yu'u lari' na' lu ná'agaquië' xzí'inigaquië' ga bidxintë dza ni' gulu'ë xuz xtó'oru' le luyú ni, cate' ni' dzáguië' Josué légaquië', ate' gula'gúë' xiyúgaca bönachi izá'a,

nupa ni' buláguië Dios lógaquië' xuz xtó'oru'. Caní gulunë' zían iz ga bidxintë dza zoë' David. <sup>46</sup> Dios guyaza láchxëë David na', ate' lë' gunábinë' Dios gu'ë lë' lataj gunë' tu yu'u ga soë' Dios queë' Jacob. <sup>47</sup> Biti' bë'ë Dios lë' lataj, ate' Salomón, zxí'inë' David na' benë' yu'u queë' Dios. <sup>48</sup> Caní benë' sal-la' biti' zoë' Dios, Nu nácatërö lo, tu lu yudo' núngaca bönachi. Ca naca lë ni gunnë' tu bönni' bë'ë didza' uláz queë' Dios, gunnë': <sup>49</sup> Yehua' yubá naca ga rö'a rinná bë'a, ate' yödzölió naca xilibi ni'a.

Rnnë' Xanru': "¿Naru' gúntsali' tu yu'u ga soa'?

¿Naru' zóatsö tu lataj ga ral-la' uzí láchxa'a?

<sup>50</sup> ¿Naru' cabí len na'a caza' bena' yúgu'të lë ni'?"

<sup>51</sup> Ní'irö Esteban na' gudxë' yugu' bönni' yudo' tu'chi'a tu'söröë' na', gunnë':

—Libí'ili', bönni' zidi, biti' bi raza icja nágali'. Nazidi icja láchxi'do'oli' ca raca quégaca bönachi biti' núnbë'gaquië' Dios. Ridá'baga'tica'sili'-në' Dios Bö' Lá'ayi. Ca na' gulunë' xuz xtó'oli', runli' ca' libí'ili'. <sup>52</sup> Gula'bía láchxi'gaquië' xuz xtó'oli' na' yúgu'të bönni' ni' gulu'ë didza' uláz queë' Dios. Lë'sca' gulútië' bönni' ni' gula'guíxjö'ë zí'alö ca ral-la' guidë' Cristo, Bönni' Tsahui', ate' na'a, cate' ni' bidxinë' Bönni' Tsahui' na', libí'i cázali' bëtili'-në' lu ná'agaquië' bönni' gulútië' Lë'. <sup>53</sup> Libí'i cázali' dë lu ná'ali' xibá queë' Dios, lë na' gubáz lá'ayi queë' Dios bulu'dödë' lu ná'agaquië' xuz xtó'oli', pero biti' runli' ca rnna.

### *Tútië' Esteban*

<sup>54</sup> Cate' bönni' yudo' tu'chi'a tu'söröë' na' bila'yönnë' didza' ni, gula'léde'enë' Esteban, ate' lu yöl-la' rilé quégaquië' lë' gulagu zxéatica' láyë'ë. <sup>55</sup> Ní'irö buyúë' Esteban na' lúzxibalö, ate' zóalenë' Dios Bö' Lá'ayi lë', bilé'enë' lataj bení' ga zoë' Dios, enca' Jesús, zuínë' cuita lë'ë ibëla Dios ga nayëpisëtërë'. <sup>56</sup> Ní'irö gunnë':

—Buli'yútsöca'. Rilé'eda' nayalaj lúzxiba, ate' zuínë' Bönni' Guljë' Bönachi cuita lë'ë ibëla Dios.

<sup>57</sup> Ní'irö bönni' yudo' tu'chi'a tu'söröë' na' bulu'sayaj nágagaquië'. Gula'bödxi'ë zidzaj, en tsözxön gula'bía di'ë Esteban na'. <sup>58</sup> Bulu'béajë' lë' ní'ilö ra' yödzö na', ga ni' bulu'ladxë' lë' guiöj. Yugu' bönni' ni' tunë' ba nalí le tu'zéguië' Esteban didza' bulu'cu'ë lari' ta'xóa yéngaquië' xini'ë tu bönni' lë' Saulo cate' ni' bulu'ladxë' Esteban guiöj. <sup>59</sup> Cate' ni' tu'ladxë' Esteban guiöj, lë' bulidzë' Dios, gunnë':

—Xána' Jesús. Buzí' bö' naca caza'.

<sup>60</sup> Ní'irö biyéchuë', buzóa zxibë', en bë'ë zidzaj didza', gunnë':

—¡Xan! ¡Biti' usubágu'u légaquië' dul-la' ni!

Cate' budxi bē'ē didza' ni, gútitē'.

## 8

### *Saulo ribía ládxē'ē bönachi queē' Cristo*

1-3 Saulo benē' tsözxön yugu' bönni' ni' gulútiē' Esteban.

La' ní'sö yugu' bönni' ta'yéaj ládxi'gaquiē' Dios guluá'agaquiē' Esteban, ate' yöjácachi'gaquiē' lē'. Gula'bödxidē'ē ni'a queē'.

Dza na' yugu' bönni' judío cabí ta'yéajlē'ē Cristo gula'bía ládxi'da'gaquiē' bönachi queē' Cristo nacué' Jerusalén. Lē'sca' Saulo gudxía ládxē'ē bönachi queē' Cristo. Guyáziē' gapa naca lu yu'u quégaquiē', ate' guzxönē' yugu' bönni', en nigula, ate' gulu'ē légaquiē' lidxi guié.

Ní'irö gulásilasi ia'láti'sö cabí bidáchigaca yúgu'tē bönachi queē' Cristo idú luyú Judea, en luyú Samaria, ate' légacasē' gubáz na' nasöl-lē'ē Cristo bulu'gá'anē' Jerusalén.

### *Raca libán que didza' dxi'a luyú Samaria*

4 Yugu' bönni' na' gulásilasiē' yöjáquiē' yúgu'tē lataj, ate' gulunē' libán que didza' dxi'a. 5 Ní'irö Felipe, tu bönni' dzáguié' nupa na' gulásilasi, guyijē' luyú Samaria, ate' benē' libán ni' ca naca queē' Cristo. 6 Bulu'dubē' yugu' bönni' ni', ate' idú ládxi'gaquiē' bulu'zē nágagaquiē' didza' ru'ē Felipe na', tu' bila'yönnē' xtídzē'ē, en bila'lé'enē' yugu' le taca bē' runē'. 7 Caní guca, tu' benē' ga bulu'rúaj zían bö' xihui' yú'ugaca bönachi, ta'bödxí'a zidzaj, ate' bulu'huöáca zían nupa te'e huē' nacú'uni bin, en nupa biti' guca sá'gaca. 8 Caní guca, bulu'dzeja bönachi yödzö ni'.

9 Zoē' Simón, tu bönni' zí'alö gúquiē' bönni' udzá' uné ya'a lu yödzö na', bönni' guzxí yé'enē' bönachi Samaria na', gunné' lē cazē' náquiē' bönni' nayépisētērē'. 10 Yúgu'tē bönachi bulu'zēda' nágagaca bönni' ni, ga riguela' yugu' bönni' cá'asö ga ridxintē yugu' bönni' lo, gula'nnē': "Bönni' ni dē lu nē'ē yöl-la' huáca zxön queē' Dios." 11 Caní guca, gulunē' lē' bal, tu' xidzé nazí yé'enē' légaquiē' len yöl-la' gudzá' uné ya'a queē'.

12 Cate' gula'yéajlē'ē libán runē' Felipe que didza' dxi'a ca rinná bē'ē Dios, en ca naca queē' Jesucristo, ní'irö gula'dilē' nisa, bönni', en nigula. 13 Ní'irö guyéajlē'ē ca' Simón na', en bidilē' nisa, ate' gudá'entica'sē' tsözxön Felipe na'. Cate' bilé'enē' yugu' yöl-la' huáca zxön, en yugu' le taca bē' runē' Felipe, bubáninē' Simón na'.

14 Cate' yugu' gubáz na' nasöl-lē'ē Cristo nacué' Jerusalén bila'yönnē' ca guca lē ni, chinazí lu ná'agaca bönachi luyú Samaria xtídzē'ē Dios, ní'irö gula'söl-lē'ē Pedro, en Juan ní'. 15 Cate' Pedro, en Juan na' bila'dxinē' ni', bulu'lidzē' Dios uláz

quégaca bönachi ni' ta'yéajlë' Cristo para idisóalenë' Dios Bö' Lá'ayi léguequi. <sup>16</sup> Ga bidxintë dza na', biti' ridxíninë' Dios Bö' Lá'ayi quégaquië'. Nadílagacasë' nisa para ilácagaquië' tuz len Xanru' Jesús. <sup>17</sup> Ní'irö Pedro, en Juan na', gula'xóa ná'agaquië' bönachi Samaria na'. Bulu'lidzë' Dios, ate' bidisóalenë' Dios Bö' Lá'ayi légaquië'.

<sup>18</sup> Cate' bilé'enë' Simón, bönni' udzá' na', le guca cate' gubáz na' nasöl-lë'ë Cristo gula'xóa ná'agaquië' bönachi ni', bidisóalenë' Dios Bö' Lá'ayi légaquië', gu'unnë' quizzjé' légaquië' dumí, <sup>19</sup> ate' rë' légaquië':

—Benna ca' yöl-la' huáca ni quia', para cate' ixóa na'a nútí'tës bönachi, idisóalenë' Dios Bö' Lá'ayi nu na'.

<sup>20</sup> Ní'irö Pedro gudxë' lë', rnnë':

—Initi dumí quiu' tsözxön len li', tu' réquinu' len dumí idéli'nu' yöl-la' huáca queë' Dios. <sup>21</sup> Biti' nacu' bachi gútsu'u lë ni, tu' dxía le naca ruá' dö' icja ládxi'do'o lahuë' Dios. <sup>22</sup> Bubí'i ládxi' ca naca huiá' dö' ni runu', en gúta'yu lahuë' Dios, nadxi ca' uniti lahuë' li' ca naca lë ni rizá' ládxi'u. <sup>23</sup> Réquibe'eda' nabágu'u xíguia', en nadzunu' lu yalaj que tu' xihui'.

<sup>24</sup> Ní'irö bubí'ë didza' Simón na', rë' légaquië':

—Buli'lidzë' Dios, gáta'yuli' lahuë' Xanru' ni'a quia' neda' para cabí gaca quia' nitú lë na' chigunnáli'.

<sup>25</sup> Cate' Pedro, en Juan na' budxi gulunë' ba nalí queë' Cristo lu yödzo ni', en bulu'siyönnë' légaquië' xtídzë'ë Dios, gulunë' ca' libán que didza' dxi'a yugu' lu ládzagaquië' bönni' Samaria, ate' gudödi ni' yøjhuøjgaquië' Jerusalén.

### *Felipe, en tu bönni' Etiopía*

<sup>26</sup> Ní'irö tu gubáz lá'ayi queë' Xanru' bë'lenë' Felipe didza', en gudxë' lë':

—Guyasa, en guyéaj saca' ga ridödi gubidza beo' ziaga. Idxinu' ga ni' nalá' nöza zeaj Jerusalén zéajtë yödzo Gaza, nöza na' ridödi lu lataj cá'asö.

<sup>27</sup> Ní'irö guyu'ë nöza Felipe na', sa'yéajë'. La' nöza ni' yöjtságuië' tu bönni' Etiopía, náquië' bönni' huödx. Luyú Etiopía náquië' bönni' huen dxin lo queënu Candace, nigula na' rinná bé'enu bönachi Etiopía na', en yu'u lu në'ë yúgu'të yöl-la' tsahui' queënu dzö'ö lídxinu. Guyijë' Jerusalén bönni' ni para guyéaj ládxi'ë Dios. <sup>28</sup> Na'a, söhuøjë' ladzë', rö'ë lu carreta queë', en rulabë' le nazúaj lu guichi ca gunné' Isaías, bönni' bë'ë didza' uláz queë' Dios. <sup>29</sup> Ní'irö Dios Bö' Lá'ayi gudxë' Felipe na':

—Gubíga' ga zeaj carreta na', en guyéajlen le.

<sup>30</sup> Cate' chigubíguë'ë Felipe ni', biyönnë' ru'ë didza' bönni' huödx na', rulabë' le nazúaj lu guichi ca gunné' Isaías, ate' gudxë' lë':

—¿Naru' réajni'inu' lë na' rulabu'?

<sup>31</sup> Bubi'ë didza' bönni' Etiopía na', gunnë':

—¿Nacxi gaca tséajni'ida' channö cunttu nu zoa uzéajni'i neda'?

Ní'irö gúta'yue' lahuë' Felipe cuenë', en cö'lenë' lë' tsözxön lu carreta na'.

<sup>32</sup> Lë na' nazúaj lu guichi rulabë', rna caní:

Ca bö'cu' zxíla'do',

gula'chë'ë Lë' para ilútië' Lë',

en ca bö'cu' zxíla'do',

biti' rnnëba' cate' nu richugu lítsa'ba',

ca' benë' Lë', biti' gusalaj ru'ë bi innë'.

<sup>33</sup> Bulu'cá'anë' Lë' cá'asö,

en biti' gulu'ë lataj nu uchi'a usörö Lë'.

¿Nuzxi caz gaca inözi xíguia' nabága'gaca bönachi uládz queë'?

La' légacasë' gulútië' Lë'.

<sup>34</sup> Bönni' huödx na' gunábinë' Felipe, rë' lë':

—Ráta'yua' lo' quíxjöi'ínu' neda'. ¿Nuzxi que gunnë' caní bönni' na' bë'ë didza' uládz queë' Dios? ¿Naru' queë' cazë', o que nu yúbölö?

<sup>35</sup> Ní'irö la' didza' nisö buguelë'ë Felipe, en busiyönnë' lë' didza' dxi'a ca naca queë' Jesús. <sup>36</sup> Cate' ni' yú'ugaquië' nöza söjáquië', bila'dxinë' ga dë nisa, ate' bönni' huödx na' rë' Felipe, rnnë':

—Buyútsöca'. Ni dë nisa. ¿Naru' huácatsö idila' nisa?

<sup>37</sup> Felipe gudxë' lë':

—Channö réajlë'u idú ladxu'u, huáca idilu' nisa.

Lë' bubí'ë didza', rnnë':

—Réajlë'a Jesucristo, náquië' Zxí'inë' Dios.

<sup>38</sup> Ní'irö benë' ga guzóa dxisö carreta queë' na', ate' bulu'huötjë' irópatë', yöjtsázagaquië' lu nisa. Ní'irö Felipe buquilë' bönni' huödx na' nisa. <sup>39</sup> Cate' bulu'rúajë' lu nisa, Dios Bö' Lá'ayi buchë'ë Felipe, ate' bönni' huödx na' bíti'rö bilé'enë' lë'. Ní'irö buguelë'ë xinözë', söhuöjë' rudzéjanë'. <sup>40</sup> Cate' chiréquibe'enë' Felipe, zoë' lu yödzö Azoto. Gudödë' yúgu'të yödzö ni', ate' benë' libán que didza' dxi'a, ga bidxintë' yödzö Cesarea.

## 9

### *Saulo ruhuóáquië' queë' Cristo*

<sup>1</sup> Ni' ruzenë' bach Saulo nupa ta'yéajlë' Xanru', gú'unnë' gútië' légaquië'. Para gunë' caní bidxinë' lahuë' bixúz lo, <sup>2</sup> en gunábinë' lë' tu guichi unná bë', le tsöju'ë lógaquië' bönni' unná bë' quégaca yu'u gapa tu'dubë' bönni' judío, en tu'sedë' queë' Dios lu yödzö Damasco, ate' channö utsöjxáquië' yugu' bönni', en nigula ta'yéajlë'ë Jesús ni', gaca ichë'ë légaquië' nadzúngaquië' lu yödzö Jerusalén. <sup>3</sup> Tsanni ni' yú'ugaquië'

nöza Saulo, en nupa nacuá'len lë', söjáquië', en cate' chizóa ila'dxinë' Damasco, tsárido'os buzeni'da' tu beni' za' lúzxiba, le buzeni' ga ni' söjáquië'. <sup>4</sup> Ní'irö gudzö'ë Saulo lu yu, en biyönnë' chi'i Nu rë lë':

—Saulo, Saulo, ¿bizx que ribía ládXu'u neda'?

<sup>5</sup> Saulo gunábinë' Lë', gunnë':

—¿Nuzxi li', Xan?

Lë' gunnë':

—Neda' Jesús, Nu ribía ládXu'u. Run zi' cuinu', ridá'bagu'u neda'. Raca quiu' ca na' raca queëba' bëdxi, run zi' cuinba' richégu'ba' yaga tuchi' túndë'ë-ba' zi'.

<sup>6</sup> Ní'irö Saulo guzxízidë'ë, gúdxinë', en gunnë':

—Xan, ¿bizxi rë'ënu' guna'?

Xanru' gudxë' lë':

—Guyasa, en guyáz lu yödzö, ate' ni' isöl-la'a quiu' nu guië li' le ral-la' gunu'.

<sup>7</sup> Guládxinë' yugu' bönni' na' söjácalenë' Saulo, tu' bila'yönnë' chi'i na', sal-la' cuntu nu bila'lé'enë'. <sup>8</sup> Ní'irö böasë' Saulo luyú, en cate' guxá' guiöj lahuë', biti' ca' rilé'enë'. Que lë ni na' gula'guéle'ë në'ë, en gula'chë'ë lë' Damasco. <sup>9</sup> Guzöë' ni' tsonna dza nachul-la lahuë', en biti' bi güi' gudahuë'.

<sup>10</sup> Zoë' ca' Ananías, bönni' réajlë'ë Cristo, yödzö Damasco, ate' Xanru' bulufi' lahuë' ga zoë' ca tu lu yëla bëchigal, en gudxë' lë':

—Ananías.

Lë' bubi'ë didza', gunnë':

—Ni zoa', Xan.

<sup>11</sup> Xanru' gudxë' lë':

—Guyasa, en guyéaj ga naca la' nöza na' nazí'i le Nöza Li, ate' lu yu'u lidxë' Judas gunaba didza' queë' Saulo, bönni' Tarso. Lu yu'u na' rulidzë' Dios. <sup>12</sup> Chibilé'enë' tu bönni' ca tu lu yëla bëchigal zë'ë tsázië' ga zoë', lë' Ananías, en ixóa në'ë lë' para huóalaj guiöj lahuë'.

<sup>13</sup> Ní'irö bubi'ë didza' Ananías, rë' Lë':

—Xan, zían nupa chibulu'siyönnë' neda' ca runë' bönni' ni, zían le naca dö' nu'ë le benë' quégaca bönachi ta'yéajlë' Li', nacuá' Jerusalén. <sup>14</sup> Zë'ë ca' ni, dë lu në'ë uláz quégaquië' bixúz unná bë' sönë' yúgu'të nupa tu'lidza Dios len Lo' Li'.

<sup>15</sup> Ní'irö Xanru' rë' Ananías na', rnnë':

—Guyéaj, tu' gurö caza' neda' bönni' ni para gunë' libán ca naca quia' lógaca bönachi izá'a, en lógaquië' bönni' ta'nná bé'enë' légaquië', enca' lógaca bönachi Israel. <sup>16</sup> Ulu'ida' lë' le zían le qui'i sáquë'ë uláz quia' neda', gunë' xichina'.

<sup>17</sup> Ní'irö guyijë' Ananías ni', ate' guyázië' yu'u, en guxóa në'ë Saulo, ate' rë' lë':

—Böcha'a Saulo, Xanru' Jesús, Nu na' buluí'i lahui la' nöza ga ni' zo'o, gusöl-lë'ë neda' para huóalaj guiój lo', en idisóalenë' Dios Bö' Lá'ayi li'.

<sup>18</sup> La' ní'sö gula'guínnaj le naca ca xilácuba' böla lu guiój lahuë', ate' la' böáljatë guiój lahuë'. Ní'irö guyasë' Saulo, en bidilë' nisa. <sup>19</sup> Gudödi ni' gudahuë', en böáca ládxë'ë. Ca chopa tsonna dza guzóalenë' yugu' bönni' ta'yéajlë'ë Cristo nacu'ë Damasco.

### *Runë' libán Saulo lu yödzo Damasco*

<sup>20</sup> La' gusí lotë' Saulo runë' libán queë' Cristo gapa naca lu yu'u ga tu'dubë' bönni' judío, en tu'sëdë' queë' Dios, rnnë':

—Jesús náquië' Zxí'ini cazë' Dios.

<sup>21</sup> Bulu'báinë' yúgu'të bönni' ni' ta'yönnë' lë', ta'nnë':

—¿Naru' calëga bönni' ni bönni' na' busunítië' nupa nacuá' Jerusalén, en tu'lidza Dios lu Lë' Jesús? Para gunë' caní bidë' ca' ni para ichë'ë légaquië' nadzúngaquië' lógaquië' bixúz unná bë'.

<sup>22</sup> Bidíparö ládxë'ë Saulo, en benë' ga gula'bö'ë böniga bönni' judío nacu'ë Damasco, tu' buluí'inë' légaquië' Jesús naca cazë' Cristo, bönni' na' tunë' löza idinná bé'enë' légaquië'.

### *Rulë' Saulo lu ná'agaquië' bönni' judío*

<sup>23</sup> Cate' chigudödi zían dza, gulún xtídza'gaquië' bönni' judío nacu'ë ni' ilútië' Saulo. <sup>24</sup> Rëla, en të dza gula'bö' nísie' yugu' bönni' judío ga nu ridödi lu zö'ö run chi'i yödzo na' para ilútië' lë', pero gúquibe'enë' Saulo le të'ënnë' ilunë' queë'. <sup>25</sup> Ní'irö yugu' bönni' ta'yéajlë'ë Cristo gula'guélë'ë Saulo chi'i dzö'ölö, ate' gula'gu'ë lë' tu lu ga'böra zxön naga' du, en bulu'zötjë' lë' ní'lö lu zö'ö run chi'i yödzo na'.

### *Rudxinë' Saulo Jerusalén*

<sup>26</sup> Cate' budxinë' Saulo Jerusalén, gú'unnë' tsöjenë' tsözxön bönni' ni' ta'yéajlë'ë Cristo, pero yúgu'të' guládxinë' lë', tu' cabí téquinë' réajlë'ë Saulo na' Cristo. <sup>27</sup> Ní'irö bönni' na' lë' Bernabé gudélë'ë Saulo, en guchë'ë lë' ga na' nacu'ë bönni' gubáz nasöl-lë'ë Cristo. Busiyönnë' légaquië' ca na' guca queë' Saulo, bilé'enë' Xanru' la' nöza, ate' Xanru' caz bé'lenë' lë' didza', en ca na' benë' Saulo lu yödzo Damasco, len yöl-la' rugu ladxi' benë' libán ca naca queë' Jesús. <sup>28</sup> Ní'irö Saulo guzóalenë' légaquië' lu yödzo Jerusalén, ate' gudálenë' légaquië' tsözxön. <sup>29</sup> Lu yöl-la' rugu ladxi' benë' libán Saulo ca naca queë' Xanru', en gudíl-lalenë' didza' bönni' judío tu'ë didza' griego, ate' légaquië' gula'zóa gula'bö'ë ilútië' lë'. <sup>30</sup> Cate' guléquibe'enë' böchi'ru' ta'yéajlë'ë Cristo lë ni, gula'chë'ë Saulo lu yödzo Cesarea, ate' gula'söl-lë'ë lë' yödzo Tarso, le naca ladzë' Saulo.

<sup>31</sup> Ní'irö guca tsahui' quégaca yúgu'të cö' bönachi queë' Cristo, nacuá' idú luyú Judea, en luyú Galilea, en luyú Samaria, ate' bila'dipa ládxi'gaquië'. Gula'cu'ë lu yöl-la' radxi quégaquië' Xanru', ate' gula'yanë' tu' gúcalenë' Dios Bö' Lá'ayi légaquië'.

*Pedro ruúnë' tu bönni' lë' Eneas*

<sup>32</sup> Ia'tú le guca, cate' Pedro yöjyüë' yugu' böchi'ru', bidxinë' ga nacu'ë bönni' ta'yéajlë'ë Jesús lu yödzö Lida. <sup>33</sup> Yöjxáquië' tu bönni' ni' lë' Eneas, chiguca xunu' iz dë' ré'enë', nacu'unië' bin. <sup>34</sup> Pedro gudxë' lë':

—Eneas, Jesucristo ruúnë' li'. Guyasa, en butubi xto'o.

La' guyásatë' Eneas na'. <sup>35</sup> Yúgu'të nupa nacuá' yödzö Lida, en yödzö Sarón bila'lé'e lë', ate' bulu'huóaca queë' Xanru', tu' chita'yéajlë' Lë'.

*Rátinu Dorcas, en rubannu*

<sup>36</sup> Ia'stú le guca, lu yödzö Jope zóanu tu nigula réajlë'ënu Cristo, lënu Tabita, en ca naca didza' griego lënu Dorcas. Benu nigula ni zían le nácagaca dxi'a le tácalen bönachi yechi'. <sup>37</sup> Le guca dza ni', gü'ínu Dorcas na', en gútinu. Gudödi gula'guíbinu lënu, gula'guíxjë'-nu tu lu yu'u ga naca buropi cuía. <sup>38</sup> Tu' dë yödzö Lida gála'sö ga na' dë yödzö Jope, ga na' zoë' Pedro, bila'yönnë' bönni' Jope na' ta'yéajlë'ë Cristo zoë' Pedro ni', ate' que lë ni na' gula'söl-lë'ë chopë' bönni' ga na' zoë', ate' guláta'yuë' lahuë', të' lë':

—Biti' tsenu' guídu' queëtu'.

<sup>39</sup> Ní'irö la' guyásatë' Pedro, sa'yéajlenë' légaquië'. Cate' bidxinë' ni', la' gula'chë'të' lë' ga naca lu yu'u ga dënu nigula nati na'. Ní'irö yugu' nigula uzëbi bulu'dúbinu gásibi'ilë', ta'bödxinu, en tu'luí'ínu lë' lari' quégaquië' bönni', en nigula, yugu' le benu Dorcas cate' ni' zóalennu légacanu. <sup>40</sup> Ní'irö Pedro bubéajë' ní'ilö yúgu'të nupa nacuá' ni', ate' buzóa zxibë', rulidzë' Dios. Ní'irö buécjë' ga dënu Dorcas na', gunné':

—Tabita, guyasa.

La' buxa'të guiöj lonu Dorcas. Cate' bilé'enu-në' Pedro, la' guyástënu, gurö'önu. <sup>41</sup> Gudélë'ë Pedro ná'anu, en buchisë'-nu. Ní'irö bulidzë' bönni' na' ta'yéajlë'ë Jesús, len yugu' nigula uzëbi na', ate' busudxinë' Dorcas na' lógaquië', nabannu. <sup>42</sup> Ca guca lë ni guzé didza' idú lu yödzö Jope, ate' gula'yéajlë' bönachi zían Xanru' Jesús. <sup>43</sup> Bugá'anë' Pedro yödzö Jope na' zían dza lu yu'u lidxë' Simón, bönni' runë' tsahui' guídi zxa bëdxi.



<sup>1</sup> Zoë' yödzo Cesarea tu bönni' lë' Cornelio, bönni' rinná bé'enë' tu gáyu'ë bönni' rójáquië' gudil-la, nazí'i lágaquië' Bönni' Italia Rójáquië' Gudil-la. <sup>2</sup> Cornelio na' reaj láchxë'ë Dios, en rádxinë' Lë', ate' yúgu'të bönachi nacua' lidxë' núngaca lë' tsözxön. Runödzejë' Cornelio dumí zían le rácalen bönachi yechi', en rulídzatica'së' Dios. <sup>3</sup> Tu dza idú ridödi xihuö bilé'enë' Cornelio ca tu lu yëla bëchigal, razië' tu gubáz lá'ayi queë' Dios ga na' zoë', en rë' lë':

—Cornelio.

<sup>4</sup> Gúdxinë' Cornelio. Buyúë' gubáz lá'ayi na', en gudxë' lë':

—¿Bizxi rno', Xan?

Gubáz lá'ayi na' gudxë' lë', rnnë':

—Dios riyönnë' le rulidzu'-në', en nözinë' ca runu', rácalenu' bönachi yechi'. <sup>5</sup> Na'a, gusöl-la' yugu' bönni' tsöjáquië' yödzo Jope tsöjlídzagaquië' bönni' na' lë' Simón, zoa ia'tú lë' Pedro. <sup>6</sup> Bönni' ni zoë' lidxë' tu bönni' runë' tsahui' guídi zxa bëdxi. Bönni' ni, lësca lë' Simón, ate' zoa lidxë' ra' nísado'. Pedro na' guíë' li' le ral-la' gunu'.

<sup>7</sup> Cate' chibuzë'ë gubáz lá'ayi na' bë'lenë' lë' didza', bulidzë' Cornelio chópabi' bi'i huen dxin queë', en tuë' bönni' rejë' gudil-la reaj láchxë'ë Dios, en dzáguíë' bönachi nacua' lidxë' Cornelio. <sup>8</sup> Cate' budxi busiyönnë' légaquië' yúgu'të le guca, gusöl-lë'ë légaquië' yödzo Jope.

<sup>9</sup> Dza buropi, tsanni ni' yú'ugaquië' nöza, en ta'dxinë' gala' ga dë Jope na', la' ní'isö gurenë' Pedro ícjo'olö yu'u para ulidzë' Dios, ni' naca idú huagubidza. <sup>10</sup> La' ná'asö ridunë' Pedro, en gú'unnë' gahuë', ate' tsanni ni' tu'pë'ë queë', bilé'enë' le naca ca tu lu yëla bëchigal. <sup>11</sup> Bilé'enë' nayalaj lúzxiba, en ruhuötaj tu le naca ca tu lari' guitsa' zxön ga zoë', le naga' idapa la'a. <sup>12</sup> Lahui lari' na' dxiagacaba' yugu' böa' guixi' izá'a nacua' tapa ni'a ná'agacaba', en yugu' böa' tá'ayöj lë'egacaba' lu yu, en yugu' böa' zoa xiligacaba'. <sup>13</sup> Ní'irö biyönnë' chi'i nu rë' lë':

—Pedro, guyasa. Bëti-gacaba', en gudagu.

<sup>14</sup> Bubi'ë didza' Pedro, rnnë':

—¿Calëga, Xan! Catu caz gudahua' le cabí ral-la' gágutu', o le cabí naca dxi'a.

<sup>15</sup> Le buropi luzuí biyönnë' chi'i nu na' gudxi lë':

—Le nunë' Dios dxi'a, bití' innó' que: "Bití' naca dxi'a."

<sup>16</sup> Tsonna luzuí guca caní, ate' ní'irö la' buëpitë lari' zxön na' lúzxiba. <sup>17</sup> Tsanni ni' rö'ë böniga Pedro, rizá' láchxë'ë bizzi sa'yéaj lë na' bilé'enë' ca tu lu yëla bëchigal, bila'dxinë' bönni' na' nasöl-lë'ë Cornelio légaquië' ra' yu'u, ta'nabë' gazxi zoa lidxë' Simón na'. <sup>18</sup> Cate' bila'dxinë' ni', bulu'lidzë' nupa nacua' yu'u na', en gula'nábinë' légaquië' channö zoë' tu bönni' lë' Simón ni', zoa ia'tú lë' Pedro. <sup>19</sup> Tsanni ni' rizá' láchxë'ë Pedro ca naca lë na' bilé'enë', Dios Bö' Lá'ayi gudxë' lë', rnnë':

—Buyútsöca'. Chibila'dxinë' tsonnë' bönni' ni, tu'guiljé' li'.  
<sup>20</sup> Guyaschi na'a, en bötaj zxan yu'u. Biti' gaca chopa ládXu'u tséajlenu' légaquië', tu' nasöl-la'a neda' yugu' bönni' ni.

<sup>21</sup> Ní'irö bötjé' Pedro zxan yu'u ga na' nacu'ë bönni' na' nasöl-lë'ë Cornelio, en gudxë' légaquië':

—Neda' bönni' rugúljali'. ¿Bizxi huen zá'ali' ni?

<sup>22</sup> Bulu'bi'ë didza', tē' lē':

—Cornelio, tu bönni' rinná bé'enë' bönni' röjáquië' gudilla, nasöl-lë'ë netu'. Náquië' bönni' tsahui', en rádxinë' Dios. Yúgu'të bönni' judío tunë' bal bönni' ni, en nadxí'iguequinë' lē'. Ia'tú le guca, tu gubáz lá'ayi queë' Dios bé'lenë' lē' didza', en gudxë' lē' isöl-lë'ë nu udulídza li' guídu' lidxë' para yönnë' didza' gu'u.

<sup>23</sup> Ní'irö Pedro gulu'ë légaquië' lu yu'u, en bē'ë ga ila'cu'ë. Cate' za' rení' ia'tú dza, guyasë' Pedro, en guyéajlenë' légaquië'. Bal-lë' böchi'ru' nacu'ë Jope na' gulunë' lē' tsözxón.

<sup>24</sup> Dza bunny ni', bila'dxinë' Cesarea. Chizóë' Cornelio ribözë' légaquië', ate' chinutubë' yugu' di'a dza queë', en yugu' böchi' luzë'ë nadxí'irönë' lidxë'. <sup>25</sup> Cate' guyázië' Pedro lö'a, birujájë' Cornelio yu'u, yöjtságuie' lē'. Biyéchuë' xini'ë Pedro, en guyéaj ládXë'ë lē' ca runru' queë' Dios caz. <sup>26</sup> Pedro buchisë' lē', en gudxë' lē':

—Guyasa. Lë'sca' bönachi yödzölió naca' ca nacu' li'.

<sup>27</sup> Ni' tu'isë' ca' didza', guyázatë' Pedro yu'u, en yöjxáquië' nudúbigaca bönachi zían ni'. <sup>28</sup> Ní'irö Pedro gudxë' légaquië', rnnë':

—Libi'ili' nöz quézili' ca rinná bē' xibá queë' Moisés, rnaa biti' ral-la' gunë' tu bönni' judío tsözxón o tsázalenë' nu bönni' izá'a. Na'a, Dios buluí'inë' neda' biti' ral-la' innía' queë' nitúë' bönni' náquië' cá'asö o biti' náquië' dxi'a. <sup>29</sup> Que lē' ni na' cate' bulídzali' neda', la' bídatea', en biti' guca chopa ládxa'a. Rinaba' na'a, ¿bizx que na' bulídzali' neda'?

<sup>30</sup> Ní'irö bubí'ë didza' Cornelio, gunnë':

—Chiguca tapa dza ca zóaru' na'a, idú ridödi xihuó, cate' ni' runa' gubasa, en rulidza'-në' Dios lu yu'u lidxa' ni, bilé'eda'-bi' tubi' bönni' ra'bán nácubi' lari' rëpi yösa bení', dului'i lobi' neda'. <sup>31</sup> Caní' gúdxibi' neda': "Cornelio. Dios riyönnë' le rulidzu'-në', en nözinë' ca runu', rácalenu' yugu' bönachi yechi'. <sup>32</sup> Na'a, isöl-lu'u nu bönni' lu yödzö Jope para tsöjlídzë' tu bönni' lē' Simón, zoa ia'tú lē' Pedro. Bönni' ni zoë' lidxë' tu bönni' runë' tsahui' guídi zxa bēdxi, en lē' ca' Simón. Zoa lidxë' bönni' ni ra' nísado'. Cate' idxinë' Pedro na' ga zu', usiyönnë' li' didza' dxi'a." <sup>33</sup> Caní' guca, la' gusöl-la'tea' nu tsöjlidza' li', ate' tsáhuí'do' benu' bidu' ga zóatu' ni. Que lē' ni na' zóatu'

ni yúgu'tëtu', nudúbitu' lahuë' Dios para uzë nágatu' le inná bé'enë' Dios li' innó'.

*Didza' bē'ē Pedro lidxē' Cornelio*

<sup>34</sup> Ní'irō gusí lahuë' Pedro ru'ë didza', rnnë':

—Le nácatë réajni'ida' na'a, bití' ruyusë' Dios yöl-la' rinnësö quégaca bönachi, pero tuz ca rilé'enë' rë'u. <sup>35</sup> Dios raza láchxë'ë bönachi idütë yödžolió, nupa na' tadxi Lë', en tun le naca dxi'a. <sup>36</sup> Gusöl-lë'ë Dios xtídzë'ë ga nacua' bönachi Israel, en gusöl-lë'ë nu ben libán que didza' dxi'a, le run ga raca dxi'a quégaca bönachi, lë na' bidxín queëru' lu në'ë Jesucristo. Lë cazë náquië' Xanru' yúgu'tëru'. <sup>37</sup> Libí'ili' nöz quézili' lë na' guca luyú Judea, le gusí lo guca luyú Galilea gudödi benë' libán Juan para ila'dila bönachi nisa. <sup>38</sup> Nözili' ca benë' Dios le guca queë' Jesús, bönni' Nazaret. Gusöl-lë'ë Dios Bö' Lá'ayi, en yöl-la' huáca queë' para sóalengaca Lë'. Nözili' ca na' gudë' Jesús, runë' le naca tsahui', en ruúnë' yúgu'të nupa gula'guí'i gula'zaca' lu na' tu' xihui'. Caní benë', tu' guzóalenë' Dios Lë'. <sup>39</sup> Na'a, netu' runtu' ba nalí que yúgu'të lë na' benë' Jesús luyú Judea, en lu yödžö Jerusalén, en ca na' guca, gulútië' Jesús, cate' bulu'dë'ë Lë' lë'e yaga cruz. <sup>40</sup> Ní'irō Dios busubanë' Lë' cate' guca tsonna dza nátië', en benë' ga buluí'i lahuë' ga zóatu' netu'. <sup>41</sup> Bití' buluí'i lahuë' lógaca yúgu'të bönachi, pero lotu' netu' buluí'i lahuë'. Dios guröë' netu' dza ni'te para guntu' ba nalí queë' Jesús, ate' güí'i gudágulentu' Lë' tsözxön gudödi bubanë' lu yöl-la' guti. <sup>42</sup> Gunná bé'enë' Dios netu' guntu' libán lógaca bönachi, ate' runtu' ba nalí queë' Cristo, náquië' Nu buzóa cazë' Dios para uchi'a usöröë' nupa nabángaca, en nupa chinátigaca. <sup>43</sup> Lësca' yúgu'të bönni' gulu'ë didza' uláz queë' Dios gulunë' ba nalí queë' Jesús, gula'nnë': "Yúgu'të nupa ila'yéajlë' Lë', Dios uniti lahuë' dul-la' nabága'gaquië' ni'a que le benë' Lë'."

*Dios Bö' Lá'ayi ridisóalenë' bönachi izá'a*

<sup>44</sup> Ni' ru'isë' caní didza' Pedro, la' bidxintë' Dios Bö' Lá'ayi, bidisóalenë' légaquië', yúgu'të nupa ni' ta'yöni libán runë' lë'. <sup>45</sup> Gula'ná' badxë' bönni' judío ta'yéajlë'ë Cristo, nupa na' bila'dxín ni' tsözxön len Pedro, tu' bidë' Dios Bö' Lá'ayi, Nu na' nasöl-lë'ë Dios Xuz. Bidisóalenë' bönachi ni' bití' nácagaca judío. <sup>46</sup> Caní gulunë' tu' bila'yönnë' tu'ë bönni' zí'tu' na' didza' yúbölö, en tunë' Dios zxön. <sup>47</sup> Ní'irō bē'ē didza' Pedro, gunnë':

—¿Naru' huácatsö nu inná be'e bönachi ni para cabí ila'dila nisa? Naca bē' Dios Bö' Lá'ayi bidisóalenë' légaquië', ca na' bidisóalenë' netu'.

<sup>48</sup> Gunná bē'ë Pedro ila'dilë' nisa tu' nazi' lu ná'agaquië' Lë' Xanru' Jesús. Ní'irō yugu' bönni' ni' guláta'yuë' lahuë' Pedro ugá'analenë' légaquië' ca chopa tsonna dza.

## 11

*Didza' bē'ē Pedro lógaca bōnachi queē' Cristo nacua' Jerusalén*

<sup>1</sup> Bila'yōnnē' gubáz nasōl-lē'ē Cristo, en bōchi'ru' nacu'ē luyú Judea ca na' bōnni' biti' nácagaquiē' judío gula'zī' lu ná'agaquiē' xtídzē'ē Dios. <sup>2</sup> Cate' budxinē' Pedro Jerusalén, bōchi'ru' judío gula'díl-lalenē' lē' didza'. <sup>3</sup> Gulē' Pedro:

—¿Bizx que yōjtsú'ulenu' bōnni' biti' nácagaquiē' judío, en gudágulenu' légaquiē' tsōzxōn?

<sup>4</sup> Ní'irō gusí lahuē' Pedro rusiyōnnē' légaquiē' idútē lē na' guca, rnnē':

<sup>5</sup> —Guzóa' lu yōdzō Jope, en cate' ni' rulidza'-nē' Dios, bilé'eda' ca tu lu yēla béchigal tu le bulu'inē' Dios neda'. Bilé'eda' bōtaj birúaj lúzxiba tu le naca ca tu lari' guitsa' zxōn, naga' idapa la'a, ate' bidxín ga na' zoa'. <sup>6</sup> Cate' ni' ruyúa' le para ilé'eda' le dxía láhuilō, bilé'egacada'-ba' bōa' guixi' nacua' tapa ní'agacaba', yugu' bōa' guixi' sńia', en bōa' tá'ayōj lē'egacaba' lu yu, en bōa' zoa xíligacaba'. <sup>7</sup> Biyōnda' chi'i nu gudxi neda': "Pedro, guyasa. Bēti-ba', en gudagu." <sup>8</sup> Ní'irō gudxa'-nē': "Biti' ca', Xan. Catu caz gudahua' tu le cabí ral-la' gágutu', o tu le cabí naca dxi'a." <sup>9</sup> Ní'irō le buropi luzuí bulidza chi'i lúzxiba na' neda', en gudxi neda': "Le nunē' Dios dxi'a, biti' innó' biti' naca dxi'a." <sup>10</sup> Tsonna luzuí guca caní, ate' ní'irō idútē lē na' bilé'eda' la' buēpitē lúzxiba. <sup>11</sup> La' ní'sō bila'dxintē' tsonnē' bōnni' ra' yu'u ga na' zoa', narúajgaquiē' yōdzō Cesarea, nasōl-lē'ē légaquiē' tu bōnni' lē' Cornelio. Sududíljagaquiē' neda'. <sup>12</sup> Dios Bō' Lá'ayi gudxē' neda': "Guyéajlen légaquiē', en cabí gaca chopa lādxi'u." Lēscā' izxópatē' bōchi'ru' ni gula'zá'lenē' neda' tsōzxōn. Guyéajtu' Cesarea, ate' guyaztu' lidxē' tu bōnni' zoē' ni'. <sup>13</sup> Bōnni' ni' gudíxjōi'inē' netu' ca na' bilé'enē', bidxinē' tu gubáz lá'ayi queē' Dios lu yu'u lidxē'. Guzuínē' lahuē', en gudxē' lē': "Na'a isōl-la'gacu'-nē' bōnni' tsōjáquiē' yōdzō Jope, tsōjlídzagaquiē' Simón, zoa ia'tú lē' Pedro. <sup>14</sup> Bōnni' na' usiyōnnē' li' naca gaca uló' li', en ulu'lágaca ca' yúgu'tē bōnachi nacua' lidxi'." <sup>15</sup> Cate' ni' gusí lahua' ru'ilena' légaquiē' didza', bidisóalenē' Dios Bō' Lá'ayi légaquiē' ca na' bidisóalenē' rē'u zí'atēlō. <sup>16</sup> Ní'irō yōjneda' didza' na' bē'ē Xanru', gunnē': "Le nácate Juan buquilē' bōnachi nisa lu nisa, pero libí'ili', gaca queēli' le rulu'isō yōl-la' ridila nisa na', idisóalenē' Dios Bō' Lá'ayi libí'ili'." <sup>17</sup> Que lē ni na', channō Dios gusōl-lē'ē Dios Bō' Lá'ayi quégaquiē', la' tuz ca benē' queēru' rē'u réajlē'ēru' Xanru' Jesucristo, ¿núzxitē neda' inná bé'eda'-nē' Dios?

<sup>18</sup> Ní'irō, cate' bila'yōnnē' lē ni, gula'cuá' dxíē', en gula'gu'ē Dios yōl-la' ba, ta'nnē':

—Caní naca, Dios ru'ē lataj bōnni' biti' nácagaquiē' judío, tu'bí' lādxi'gaquiē' para ila'déli'nē' yōl-la' na'bán idú.

*Yugu' bönni' nacu'ë Antioquía ta'yéajlë'ë Cristo*

<sup>19</sup> Cate' ni' yugu' bönni' judío biti' ta'yéajlë'ë gulútië' Esteban, en gula'bía ládxi'gaquië' ia'zica'rö bönachi ta'yéajlë'ë Cristo, bulu'zxunnaj bönachi ni, en gulásilasi zían yödzö luyú Fenicia, en luyú Chipre, en lu yödzö Antioquía. Gulunë' libán ni' que xtídzë'ë Dios, pero lógacasö bönachi judío. <sup>20</sup> Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzö Antioquía, gulu'ilenë' ca' didza' yugu' bönni' izá'a. Gulunë' libán lógaquië' que didza' dxi'a ca naca queë' Xanru' Jesús. <sup>21</sup> Yöl-la' huáca queë' Xanru' guzóalen légaquië', ate' bönachi zían gula'yéajlë' Xanru', en bulu'huóaca queë'.

<sup>22</sup> Cate' bidxín didza' ca guca lë ni, ate' bila'yönnë' bönni' queë' Cristo nacu'ë Jerusalén, gula'sól-lë'ë Bernabé tséajë' Antioquía na'. <sup>23</sup> Cate' Bernabé na' bidxinë' Antioquía, bilé'enë' le ruzá' ládxë'ë Dios queégaquië', en budzéjanë'. Guchízië' icja nágagaquië' para ila'día'tica'së' queë' Xanru' idú ládxi'gaquië'. <sup>24</sup> Náquië' Bernabé na' tsahui', en idú zóalenë' Dios Bö' Lá'ayi lë', en idú ládxë'ë réajlë'ë Cristo. Ni'a que libán benë' Bernabé na', bönachi zían lu yödzö na' gula'yéajlë' Xanru'.

<sup>25</sup> Gudödi ni', guyijë' Bernabé na' yödzö Tarso, yöjdljë' Saulo. Cate' budzölinë' lë', buchë'ë lë' Antioquía. <sup>26</sup> Idú ca tu iz gula'cu'ë ni', tunë' tsözxön bönachi queë' Cristo, en tu'sédinë' bönachi zían. Lu yödzö Antioquía na', gusí lo gula'zí lágaquië' cristiano le rna len didza' xidza': Bönachi Queë' Cristo, nupa ni' ta'yéajlë' Lë'.

<sup>27</sup> Dza ni' bila'rúajë' Jerusalén, en yöjáquië' Antioquía bal-lë' bönni' tu'ë didza' uláz queë' Dios. <sup>28</sup> Guzuínë' Agabo, bönni' dzáguië' yugu' bönni' na', en uláz queë' Dios Bö' Lá'ayi buzéajni'inë' légaquië', gunné':

—Si' gaca gubín iduté yödzölió.

Guca gubín na' cate' ni' rinná bë'ë Claudio, lu yödzö Roma. <sup>29</sup> Ní'irö gula'zí' lu ná'agaquië' bönni' ta'yéajlë'ë Cristo nacu'ë Antioquía, ila'sól-lë'ë tsca le dësö que queégaquië', le gácalen böchi'ru' nacu'ë luyú Judea. <sup>30</sup> Caní gulunë', ate' lë na' bulu'nödzjë', gula'gu'ë lu ná'agaquië' Bernabé, en Saulo para ilu'ë le lógaquië' bönni' gula'tapa chi'ë bönachi queë' Cristo nacu'ë Judea.

## 12

*Tútië' Jacobo, en ta'gu'ë Pedro lidxi guíë*

<sup>1</sup> Dza na' Herodes, bönni' unná bë', benë' ga gula'zönë' bal-lë' bönni' queë' Cristo para ulu'saca' zi'ë légaquië'. <sup>2</sup> Gunná bé'enë' bönni' gulútië' Jacobo, böchë'ë Juan. Gulu'ë lë' guíë tuchi'. <sup>3</sup> Cate' gúquibe'enë' Herodes gula'yaza ládxi'gaquië'

bönni' judío lë ni, benë' ga gula'zönë' ca' Pedro. Gulaca lë ni dza ni' raca laní cate' tahuë' yöta xtila biti' nazí'i cúa zi que. <sup>4</sup> Gudödi gula'zönë' Pedro, gula'gu'ë lë lidxi guié, en bulu'dödë' lë lu ná'agaquië' tapa cö' bönni' röjáquië' gudilla, nacu'ë tapë' tu huéaj cö' na', para uyúgaquië' lë'. Yu'u ládxë'ë Herodes ubéajë' Pedro lógaca bönachi tödi Laní Pascua, laní na' tu'subanë' ca benë' Dios, bubéajë' bönachi judío luyú Egipto. <sup>5</sup> Caní guca, nun chí'igacrë' Pedro lu yu'u lidxi guié na', pero bönachi queë' Cristo bulu'lídzatica'sö Dios, ta'nábini Dios gácalenë' Pedro.

*Dios rubéajë' Pedro lidxi guié*

<sup>6</sup> Cate' si' idxín dza yu'u ládxë'ë Herodes ubéajë' Pedro lidxi guié na', la' dzö' ní'sö dë' rásië' Pedro, ate' nacu'ë chopë' bönni' röjáquië' gudil-la cuita lë'ë Pedro na', en núga'gaquië' lë' chopa du guié. Gula'cu'ë ia'bal-lë' bönni' röjáquië' gudil-la tapa chi'ë ga nu riyaza lidxi guié na'. <sup>7</sup> Tsárido'os buluí'i lahuë' tu gubáz lá'ayi queë' Xanru' ni', ate' buzení'da' bení lidxi guié. Gudanë' gubáz lá'ayi na' cuita lë'ë Pedro, ate' busubanë' lë', en gudxë' lë':

—Guyaschi.

Ní'irö bulu'huédxi du guié na' naga' ni'a në'ë Pedro. <sup>8</sup> Gubáz lá'ayi na' gudxë' lë', gunné':

—Béga' lë'u, en gudá' xirachu'.

La' bentë' Pedro caní. Ní'irö gubáz lá'ayi na' gudxë' lë', rnnë':

—Guxóa lari' cúdzu'u, en gudá len neda'.

<sup>9</sup> Burúajë' Pedro, sa'yéajlenë' gubáz lá'ayi na', pero biti' réquibe'enë' nácatë le runë' gubáz lá'ayi na'. Gúquinë' yélasö rinenë'. <sup>10</sup> Cate' chigula'dödë' ga nacu'ë bönni' zí'alö, en bönni' buropi cö', bönni' na' röjáquië' gudil-la tapa chi'ë, bila'dxinë' ga zoa le néquini guié le nusayaj ga nu riyaza lidxi guié na', ga nu rurúaj la' nöza que yödzo. Ga nu riyaza na', rácasö que guyalaj. Cate' bila'rúajë' ni', gula'zë'ë ga ridzaga ia'turö nöza, ate' ni' gubáz lá'ayi na' la' bulá'alentë' Pedro. <sup>11</sup> Ní'irö réquibe'enë' Pedro, ate' lu icja ládxi'da'azë' gunné':

—Na'a chinözda' le nácatë gusöl-lë'ë Xanru' gubáz lá'ayi queë', en busölë' neda' lu në'ë Herodes, en lu yúgu'të le gulë'ënnë' bönni' judío ilunë' quia'.

<sup>12</sup> Tsanni ni' yu'ë nöza Pedro, rizá' ládxë'ë ca naca lë na' guca, ate' bidxinë' lídxinu María, xiná'abi' Juan, bi'i na' zoa ia'tú labi' Marcos. Lu yu'u na' nudúbigaca bönachi zián ta'yéajlë' Cristo, en tu'lidza Dios. <sup>13</sup> Cate' bulidzë' Pedro ra' yu'u lö'a, birúajbi' bi'i nigula lëbi' Rode para inözibi' nuzxi na'. <sup>14</sup> Cate' bünbë'ëbi' bi'i nigula ni chi'ë Pedro, lu yöl-la'

rudzeja queëbi' biti' gusaljbi' yu'u, pero carelô böajbi' lu yu'u, yöjtíxjöi' ibi' nupa nacuá' ni', rnnabi':

—Zoë' Pedro ra' yu'u.

15 Ní'irô gulé' lëbi':

—Nachixi icju'.

Lëbi' tsútsurô ben xtídza'bi' naca caní. Ní'irô gula'nné':

—Calëga lë'. Bixín queë' na'.

16 Tsanni na' biti' zoa dxíë' Pedro rulidzë' nupa nacuá' lu yu'u. Cate' gula'saljë' yu'u, gula'nítisinë' cate' bila'lé'enë' lë'.

17 Ní'irô guchisa në'ë Pedro para ila'cu'ë dxisô, ate' busiyönnë' légaquië' ca benë' Xanru', bubéajë' lë' lidxi guië. Ní'irô gudxë' légaquië':

—Guli'siyönnë' ca' Jacobo, en yugu' böchi'ru' ca na' guca.

Ní'irô burúajë' Pedro, sa'yéajë' ga yúbölô.

18 Cate' za' rení' dza na', bönni' röjáquië' gudil-la gula'böë böniga nacxi guca, bití'rô yu'ë Pedro lidxi guië. 19 Ní'irô gusöl-lë'ë Herodes nupa tsöjxí'gaca Pedro. Cate' biti' bulu'dzölinë' lë', Herodes gunabi yúdxinë' yugu' bönni' na' röjáquië' gudil-la, bönni' gulún chi'ë Pedro. Gudödi ni' gunná bé'enë' nupa bëtigaca yugu' bönni' na' röjáquië' gudil-la. Ní'irô buzë'ë Herodes luyú Judea, sa'yéajë' Cesarea, ate' bugá'anë' ni'.

### *Ca gútië' Herodes*

20 Dza ní'sô rilenë' Herodes bönachi yödzô Tiro, en yödzô Sidón. Zí'alô bönachi lu xiyúë' Herodes na' gula'söl-la' le biyadzaj quégaca bönachi lu xiyúgaca yödzô Tiro, en Sidón na', pero tu' rilenë' Herodes légaquië', bití'rô bi ta'söl-lë'ë quégaquië'. Ní'irô gulunë' tuz bönni' Tiro, en Sidón na', ate' gulunë' ga soë' Blasto unë quégaquië' lahuë' Herodes na'. Náquië' Blasto na' huen dxin nadéli'në' lataj lo lahuë' Herodes. Gulé'ënnë' bönni' Tiro, en Sidón na' ila'dxinë' lahuë' Herodes, para ila'nábinë' lë' ugá'ana tsahui' didza' bizxaj quégaquië'. 21 Ní'irô budxíë' bë' Herodes dza yönnë' légaquië', ate' dza na' gurô'ë xilatjë' ga ruchí'a rusöröë' bi raca, nácuë' lari' nazaca', en benë' libán lógaquië'. 22 Ní'irô bulu'lidzë' zidzaj bönni' na', ta'nnë':

—¡Calëga bönni'sô ni! ¡Dios caz ni ru'ë didza'!

23 La' ná'asô la' bë'të' gubáz lá'ayi queë' Xanru' lë' tu' buzië lë cazë' yöl-la' ba ral-la' gaca queë' Dios. Ní'irô gurô'ë Herodes na' buzuga', ate' gútië' tu' táguba' lë'.

24 Ní'irô guca libán que xtídze'ë Xanru', ate' gula'yán nupa nazí' lu ná'agaca le.

### *Le zí'alô luzuí röjéngaquië' Bernabé, en Saulo libán*

25 Cate' Bernabé, en Saulo chibulu'dödë' dumí na' lu ná'agaquië' bönni' gula tapa chi'ë bönachi queë' Cristo nacué'ë

Jerusalén, bulu'zë'ë ni', yøjhuøjgaquië' yödzo Antioquía. Gula'ché'ë-bi' ca' bi'i Juan, zoa ia'tú labi' Marcos.

## 13

<sup>1</sup> Dza ná'asö gula'cu'ë bönni' tu'ë didza' uláz queë' Dios, en bönni' tu'sedinë' bönachi lu yödzo Antioquía, tunë' tu zxön bönachi queë' Cristo lu yödzo na'. Cani légaquië':

Bernabé,

Simón, (lë' ca' Bönni' Gasja),

Lucio, (bönni' Cirene),

Saulo,

Manaén, (bönni' na' guzxönlenë' tsözxön Herodes, bönni' rinná bë'ë luyú Galilea).

<sup>2</sup> Tsanni ni' nudúbigaquië' bönni' ni queë' Xanru', en tunë' gubasa, Dios Bö' Lá'ayi gudxë' légaquië', rnnë':

—Guli'béaj-gáquië' quez quia' Bernabé, en Saulo para tsöjéngaquië' dxin na' bulidza' légaquië' ilunë'.

<sup>3</sup> Budxi gulunë' gubasa, en gulu'ilenë' Dios didza', ní'irö gula'xóa ná'agaquië' chopë' ni, en gula'söl-lë'ë légaquië'.

*Yugu' gubáz nasöl-lë'ë Cristo tunë' libán luyú Chipre*

<sup>4</sup> Ní'irö yøjáquië' Bernabé, en Saulo yödzo Seleucia, tu' gusöl-lë'ë Dios Bö' Lá'ayi légaquië' ni', ate' ni' gula'benë' tu lë'e barco le guchë' légaquië' ga naca tu luyú bidxi lu nísado', nazí'i le Chipre. <sup>5</sup> Cate' bila'dxinë' lu yödzo Salamina luyú na', gulu'ë xtídzë'ë Dios gapa naca lu yu'u ga tu'dubë' bönni' judío luyú na', en tu'sedë' queë' Dios. Nachë'gaquië'-bi' bi'i Juan para gunbi' légaquië' tu zxön. <sup>6</sup> Budxi gula'dödë' idú gapa dë yödzo do' luyú bidxi na' lu nisa zxön, ní'irö bila'dxinë' yödzo Pafos. Yøjxáca'gaquië' Barjesús, tu bönni' judío ni'. Náquië' bönni' udzá rinnë' yë'ë, en rnnë' ru'ë didza' uláz queë' Dios. <sup>7</sup> Bönni' ni dzáguië' Sergio Paulo, bönni' réajni'i rinná bë'ë. Bönni' unná bë' na' bulidzë' Bernabé, en Saulo, tu' rë'ënë' yönnë' xtídzë'ë Dios. <sup>8</sup> Ní'irö bönni' udzá' na' gudá'baguië' Bernabé, en Saulo, tu' gú'unnë' gunë' ga biti' tséajlë'ë Dios bönni' rinná bë'ë. Bönni' udzá' na' lë' ca' Elimas tsca naca xtídzá'gaca bönachi izá'a ga na'. <sup>9</sup> Ní'irö Saulo, lë' ca' Pablo, buzóa tsutsu lahuë', zóalenë' Dios Bö' Lá'ayi lë'. Ruyúë' Elimas na' <sup>10</sup> en rë' lë':

—Li', bönni' rizi' yë', en bönni' huiá' dö', nacu' ca zxí'ini caz tu' xihui', en bönni' biti' rilé'enë' dxi'a yúgu'të le naca tsahui'. ¿Naru' cabí soa dxitso' ca runu', ridá'bagu'u didza' tsahui' queë' Xanru', en ruzágu'u xinöza nu rë'ëni tséajlë' Lë'? <sup>11</sup> Na'a, Xanru' usaca' zi'ë li', ate' ichul-la lo', en biti' ilé'enu' gubidza nababa dza.

La' guchúl-latë lahuë' Elimas na', ate' gudë' nilö ná'alö, riguiljë' nuzxi sön në'ë para ichë' lë'. <sup>12</sup> Cate' bilé'enë' bönni'



unná bē' na' lē na' guca, bubáninē' ca naca xtídzē'ē Xanru', ate' guyéajlē'ē Cristo.

*Le gulunē' Pablo, en Bernabé lu yōdzō Antioquía luyú Pisidia*

<sup>13</sup> Ní'irō buzē'ē Pablo lu yōdzō Pafos na' len yugu' bōnni' dzágagaquiē' lē', nacu'ē tu lē'e barco, ate' bila'dxinē' yōdzō Perge luyú Panfilia. Lu yōdzō na' bi'i Juan bulá'alēnbi' légaquiē', en bōajbi' Jerusalén. <sup>14</sup> Gudōdi ni' bulu'zē'ē Perge na', en yōjāquiē' yōdzō Antioquía luyú Pisidia. Lu yōdzō na', cate' ni' naca dza lá'ayi quégaquiē' bōnni' judío, gula'yáziē' lu yu'u ga tu'dubē' tu'sedē' queē' Dios, ate' lu yu'u na' gula'bō'ē. <sup>15</sup> Ní'irō tu bōnni' zoē' ni' bulabē' guichi ga nazúaj xibá queē' Dios, enca' le nazúaj lu guichi ca gula'nnē' bōnni' gulu'ē didza' uláz queē' Dios. Gudōdi ni' yugu' bōnni' unná bē' que yu'u na' gula'sól-lē'ē nu yōjōdx Saulo, en Bernabé, gunnē':

—Libí'ili', bōchi'tu'. Channō nuá'alí' bi innalí' le uzéajni'i netu', guli'nnē.

<sup>16</sup> Ní'irō guzuínē' Pablo, en guchisa nē'ē para ila'cu'ē dxisō, gunnē':

—Bulí'zē' nágali' le guía' libí'ili', bōnni' Israel, en libí'ili', núlōli' rádxi'li'-nē' Dios. <sup>17</sup> Xanru' Dios, Nu ta'yéaj lādxi'gaca bōnachi Israel, gurō cazē' xuz xtó'oru', en benē' ga gula'yándē'ē cate' ni' nácagaquiē' bōnni' zi'tu' luyú Egipto. Len yōl-la' huáca zxōn queē' bubéajē' légaquiē' luyú ni'. <sup>18</sup> Idú choá' iz Dios biá' gulénē' quégaquiē' cate' ni' gula'dē' idú luyú bidxi lu lataj cá'asō. <sup>19</sup> Cate' budxi busunítiē' gadxi cō' yōdzō gula'cuá' luyú Canaán, bunōdzjē' xiyúgaca bōnachi ni' quégaquiē' xuz xtó'oru'. <sup>20</sup> Gudōdi ni', le guca idú ca tapa gayuá' yu' chi-un iz, Dios bucu'ē yugu' bōnni' bulu'chi'a bulu'sörōē' légaquiē' ga bidxintē zoē' Samuel, bōnni' bē'ē didza' uláz queē' Dios. <sup>21</sup> Ní'irō gula'nábinē' Dios uzōē' tu bōnni' unná bē' quégaquiē'. Dios gurōē' Saúl, zxí'inē' Cis, bōnni' nababē' di'a dza queē' Benjamín. Idú ca choá' iz gunná bé'enē' Saúl na' légaquiē'. <sup>22</sup> Gudōdi ni' Dios gudúē' Saúl na', ate' buzōē' David quégaquiē' para inná bē'ē. Dios benē' ba nalí queē' David ni, gunnē': “Nōzda' runē' David, zxí'inē' Isaí, le raza lādxa'a, en gunē' yúgu'tē le rē'ēnda' neda'.” <sup>23</sup> Ladaj zxí'ini xi'sóē' David na' benē' Dios ga guljē' Jesús para gáquiē' bōnni' usölē' bōnachi Israel, ca na' guzxi' lu nē'ē Dios zí'atēlō gunē'. <sup>24</sup> Zí'alō cate' si' ilá' lahuē' Jesús, benē' Juan libán lógaca yúgu'tē bōnachi Israel para ulu'bí'i lādxi'gaca, en ila'dila nisa. <sup>25</sup> Cate' ni' chizóa' údxi gunē' libán Juan na', gunnē': “¿Nuzxi réquili' naca' neda'? Biti' naca' Cristo, bōnni' na' ral-la' guidē'. ¡Na'a, buli'yútsōca! Chizóē' idxinē' bōnni' na' ga zoa' ni, ate' neda' bití' naca' lesaca' ilecja' xiráchuē' nudē'ē.”

26 'Libí'ili', böcha'a, yugu' xzí'ini xi'sóë Abraham, en núlöli' zóali' ni, en rádxili'-në' Dios. Dios caz gusöl-lë'ë queëli' didza' ni para uláli'. 27 Nupa nacuá' Jerusalén, en bönni' ta'nná bé'enë' légaquië' biti' bulu'únbë'ë Jesús, en biti' gula'yéajni'inë' le nazúaj lu guichi le gula'nnë' yugu' bönni' gulu'ë didza' uláz queë' Dios, sal-la' tu'laba cazë' yugu' didza' ni yugu' dza lá'ayi. Lu yöl-la' cabí réajni' quégaquië' gulunë' ga budxín ca rnna didza' ni cate' ni' gula'chúguië' queë' Jesús gátie'. 28 Sal-la' biti' budzöli le nabáguë'ë Jesús gátie', gula'nábinë' Pilato inná bé'enë' bönni' ilútië' Lë'. 29 Cate' budxi gulunë' queë' yúgu'të le nazúaj lu guichi ca ral-la' gaca queë', bulu'zötjë' Lë' lë'e yaga cruz, en bulu'cáché'ë Lë' yeru ba. 30 ¡Ní'irö Dios busubanë' Lë' lu yöl-la' guti! 31 Zían dza buluí'i lahuë' Jesús lógaca nupa yójácálen Lë' tsözxön cate' ni' buzë'ë luyú Galilea, en bidxinë' Jerusalén. Na'a, yugu' bönni' na' tunë' ba nalí queë' lógaca bönachi.

32 Caní naca, lësca' netu' ni rusiyöntu' libí'ili' didza' dxi'a ca naca lë na' guzxí' lu në'ë Dios gunë' quégaquië' xuz xtó'oru'. 33 Lë na' guzxí' lu në'ë Dios quégaquië', Lë cazë' benë' ga budxín queëru', nácaru' xzí'ini xi'sóagaquië'. Caní benë' cate' busubanë' Jesús. Guca ca na' nazúaj lu guichi ga zoa salmo buropi, le rnna caní: "Li' nacu' Xzí'ina'. Neda' buzóa caza' Li'." 34 Ca naca na', Dios busubanë' Lë' lu yöl-la' guti para cabí initi le naca cazë', Lë cazë' Dios gunné' caní: "Gunna' quiu' le nácgaca bica' ba guzxí' lu na'a lahuë' David." 35 Que lë ni na' nazúaj ca' lu guichi, ga zoa ia'tú salmo, le rnna caní: "Biti' gu'u lataj ugá'anë' bönni' lá'ayi quiu' ga initi le naca cazë'." 36 Le guca queë' David naca bë'. Gudödi benë' dxin lógaca bönachi uládz queë', ca na' gunná bé'enë' Dios lë', ní'irö gútië', ate' gula'gu'ë lë' yeru ba ga nacu'ë xuz xtá'ahuë', ate' guniti le naca cazë'. 37 Na'a, ca naca queë' Jesús na', Dios busubanë' Lë', ate' biti' guniti le naca cazë' lu yeru ba. 38 Libí'ili', böcha'a, ral-la' inözili' lë ni rusiyöntu' libí'ili'. Dios runiti lahuë' libí'ili' ca naca dul-la' nabága'li' ni'a que le benë' Jesús ni. 39 Na'a, Dios ruúnë' tsahui' yúgu'të nupa ta'yéajlë' Jesús, rugúë' yugu' dul-la' na' le cabí guca ugúa xibá queë' Dios, le bë'ë Moisés. 40 Guli'gún chi'i cuinli' na'a para cabí gaca queëli' le nazúaj lu guichi le gula'nnë' bönni' gulu'ë didza' uláz queë' Dios, le rnna caní:

41 Buli'yútsöca', libí'ili', bönni' cabí tunë' neda' bal.

Ubánili', pero lu yöl-la' cabí réajlë' queëli' gátili'.

Neda' guna' tu dxin dza ni zóali',

en sal-la' nu uluí'i libí'ili' le ruluí'i dxin na', biti' ca' tséajlë'ëli'.

42 Cate' bulu'rúajë' Pablo, en yugu' bönni' na' dzágagaquië' lë' lu yu'u ga na' tu'dubë' bönni' judío, en tu'sëdë' queë' Dios,

ni'irö bönachi ni' guláta'yu lógaquië' ulu'sédinë' légaquië' ca naca lë ni cate' idxín ia'tú dza lá'ayi quégaquië'. <sup>43</sup> Cate' ni' bulu'rúajë' lu yu'u na' bönni' nudúbigaquië' ni', zián bönni' judío, en bönni' nuhuöácagaquië' judío, yugu' bönni' ta'yéaj ládxi'gaquië' Dios, gulunë' tsözxön Pablo, en Bernabé. Chopë' ni' gulu'ilenë' légaquië' didza', en bulu'së'ë ládxi'gaquië' para ilácatíca'së' tsutsu, ilunë' löza le ruzá' ládxi'ë Dios quégaquië'.

<sup>44</sup> Ia'xunu' gubidza ca' cate' bidxín ia'tú dza lá'ayi quégaquië', bulu'dubë' látu'biqui' yúgutë bönachi lu yödzö na' para ila'yönnë' xtídzë'ë Dios. <sup>45</sup> Ní'irö bulu'zxé'enë' bönni' judío bití' ta'yéajlë'ë, cate' bila'lé'enë' bönachi zián na', ate' gula'nnë' que didza' ru'ë Pablo, en gula'dá'báguë'ë le. <sup>46</sup> Ní'irö lu yöl-la' rugu ládxi' quégaquië' Pablo, en Bernabé, gulë' yugu' bönni' judío na', ta'nnë':

—Ben bayudxi usiyöntu' libí'ili' zí'alö xtídzë'ë Dios, pero tu' rucá'anali' cá'asö didza' ni, en rusáca'li' queéli' bití' nácali' lesaca' sí'ili' yöl-la' na'bán idú ni, que lë ni na', na'a uyéajtu' ga nacua' bönachi izá'a. <sup>47</sup> Lësca' caní gunná bé'enë' Xanru' Dios netu' guntu' libán queë' Cristo lógaca bönachi izá'a, en naca ca rnna didza' na' bë'ë Dios ca naca queë' Cristo, gunné':

Nuzóa' Li' para gacu' bení' quégaca bönachi izá'a,  
en gacu' Nu usólá bönachi idútë yödzölió.

<sup>48</sup> Cate' bila'yöni bönachi izá'a nacua' ni' didza' ni, bulu'dzéjanë', en gula'gu'ë Xanru' yöl-la' ba ni'a que xtídzë'ë, yúgutë nupa ni' chinunë' Dios quéguequi gata' quéguequi yöl-la' na'bán idú. <sup>49</sup> Caní guca, guzë xtídzë'ë Xanru', ate' bila'yöni bönachi yúgu'të yödzö nacua' luyú ni'. <sup>50</sup> Ní'irö bönni' judío bití' ta'yéajlë'ë na' gula'gú'u yöl-lë'ë yugu' bönni' lo que yödzö ni' para cabí ila'lé'enë' dxi'a Pablo, en Bernabé. Lësca' caní gula'gú'u yöl-lë'ë nigula lo ta'yéaj ládxi'nu Dios. Caní guca, gulunë' ga gula'bía ládxi'gaquië' Pablo, en Bernabé, ate' bulu'láguë' chopë' ni ní'ilö lu xiyúgaquië'. <sup>51</sup> Ní'irö Pablo, en Bernabé bulu'quínnajë' yu bëchtö da' la' lábagaquië' le rulu'i nagá'ana xíguia' nabága'gaca bönachi lu yödzö na', ate' yójáquië' lu yödzö Iconio. <sup>52</sup> Bulu'dzéjanë' bönni' yödzö Antioquia na', bönni' ta'yéajlë'ë Xanru', ate' guzóalenë' Dios Bö' Lá'ayi légaquië'.

## 14

### *Le gulunë' Pablo, en Bernabé lu yödzö Iconio*

<sup>1</sup> Cate' bila'dxinë' Pablo, en Bernabé yödzö Iconio, gula'yu'ë tsözxön lu yu'u ga tu'dubë' bönni' judío, en tu'sédë' queë' Dios, ate' gulu'ë didza' ni'. Caní guca, zián bönachi judío, enca' zián bönachi izá'a gula'yéajlë' Cristo. <sup>2</sup> Ní'irö bönni' judío bití' ta'yéajlë'ë gula'gú'u yöl-lë'ë bal-lë' bönni' izá'a, para cabí

ila'lé'enë' dxi'a böchi'ru' ta'yéajlë'ë Cristo. <sup>3</sup> Tu' gula'yéajlë' bönachi zían na' Cristo, gula'cu'ë Pablo, en Bernabé ni' zían dza, ate' lu yöl-la' rugu ladxi' gulu'ë xtídzë'ë Dios, tu' tu'zxöni ládxi'gaquië' Xanru'. Lë cazë' Xanru' bulu'e naca idütë li didza' tu'ë ca naca le ruzá' ládxe'ë Dios quégaca bönachi, tu' bë'ë légaquië' lataj gulunë' yugu' le taca bë', en le tun ga tu'bani bönachi. <sup>4</sup> Ní'irö bönachi lu yödzö na' bila'rúaj choplö. Bal-lë' gula'dë'ë bönni' judío biti' ta'yéajlë'ë, ate' ia'bal-lë' gula'dë'ë Bernabé, en Pablo, gubáz na' nasöl-lë'ë Cristo. <sup>5</sup> Ní'irö bönni' judío biti' ta'yéajlë'ë na', en yugu' bönni' izá'a ni' gulunë' tuz bönni' ta'nná bé'enë' légaquië', ate' bulu'dübë' para ilu'ë dö' quégaquië' gubáz na' nasöl-lë'ë Cristo, en ulu'ladxë' légaquië' guiöj. <sup>6</sup> Cate' téquibe'enë' Pablo, en Bernabé lë ni, bulu'zxúnnajë' ni', yöjáquië' yödzö Listra, en Derbe luyú Licaonia, ate' gula'dödë' yúgu'të yödzödo' idú gásibi'ilö ni', <sup>7</sup> gapa ni' gulunë' libán que didza' dxi'a ca naca queë' Cristo.

*Tu'ladxë' Pablo guiöj lu yödzö Listra*

<sup>8</sup> Zoë' tu bönni' lu yödzö Listra biti' raca së'ë. Rö'ösë' ni' tu' cabí rizë'ë cate' ni' guljë', en catu caz guzë'e ni'ë. <sup>9</sup> Bönni' ni ruzë náguië' didza' ru'ë Pablo. Pablo buyúë' lë', en gúquibe'enë' réajlë'ë Cristo para huöáquië'. <sup>10</sup> Ní'irö Pablo bë'ë zidzaj didza', en rë' lë':

—Guzuí.

La' guxítí'të' bönni' na', en guzë'e ni'ë. <sup>11</sup> Cate' yugu' bönni' Listra bila'lé'enë' lë na' benë' Pablo, gula'sílógaquië' tu'ë zidzaj didza' lu didza' tu'ë bönni' Licaonia na', ta'nnë':

—¡Yugu' dios bönni' ni! ¡Nuhuötjagaquië' ga zóaru', en tu'luf'i cuíngaquië' ca nácagaquië' bönni'!

<sup>12</sup> Gula'nnë' Bernabé na' náquië' Júpiter, ca lë' dios lo quégaquië', ate' gula'nnë' náquië' Pablo Mercurio, ia'tú dios quégaquië'. Caní gula'nnë' tu' ru'ë didza' Pablo ca na' ta'nnë' runë' Mercurio na'. <sup>13</sup> Zoa yudo' que Júpiter ga ni' nacu'ë, cuita nöza ga ni' ta'yaza bönachi lu yödzö na'. La' bidxintë' bixúz que Júpiter na', nachë'ë-ba' yugu' bëdxi, en nu'ë ca' yugu' bregui' yöj, ate' dzágagaca bönachi zían lë'. Gulë'ënnë' ilútië'-ba' bëdxi na' lógaquië' Pablo, en Bernabé para ila'yéaj ládxi'gaquië' légaquië' ca tunë' quégaca dios quégaquië'. <sup>14</sup> Cate' Bernabé, en Pablo, gubáz na' nasöl-lë'ë Cristo, guléquibe'enë' lë ni, gula'chözë' lari' nácugaquië'. Tu'hu'ininë' tu' tunë' bönni' ni le cabí ral-la' ilunë', ate' gula'xítí'ë, en yöjcu'ë gatsaj láchui'lö bönachi zían na', en gulu'ë zidzaj didza', të' légaquië':

<sup>15</sup> —¡Libí'ili' bönachi! ¿Bixz que runli' caní? Lësca' bönni' ca libí'ili' nácatu', en riguixjöi'itu' libí'ili' lë ni caz ral-la' ucá'anali', le cabí nácatë, para guéquili' queë' Dios ban. Dios ni benë' lúzxiba, en yödzölió, en nísado', en yúgu'të le nacua' tu tu lataj

na'. <sup>16</sup> Yugu' iz chigula'dödi, gulún yúgu'të bönachi ca rnnasö que queëguequi, ate' Dios biti' buzáguë'ë xinözguequi, <sup>17</sup> pero benë' ga gulaca le tun ba nali queë', yugu' le nácagaca dxi'a benë' quegaquië'. Risöl-lë'ë queëru' nisa guiój, en runë' ga ta'yán le rázaru'. Ruzölaj rudzé'enë' rë'u, en runë' ga rudzeja ládi'ru'.

<sup>18</sup> Sal-la' Bernabé, en Pablo gulë' légaquië' caní, cánnisö bila'déli'në' bulu'záguë'ë xinözguequi bönachi zían na', para cabí ilútië'-ba' bëdxi na' lógaquië'.

<sup>19</sup> Ní'irö bal-lë' bönni' judío biti' ta'yéajlë'ë, narúajgaquië' Antioquía, en Iconio, bila'dxinë' ni', ate' gula'gú'u yöl-lë'ë bönachi zían na'. Ní'irö yúgu'të' bulu'laxë' Pablo guiój, en gulá'ayöjë' lë' ní'lö ra' yödzo na', tu' téquinë' chinátië'. <sup>20</sup> Ní'irö bulu'dubë' yugu' bönni' ta'yéajlë'ë Cristo idú gásibi'ilö ga dë' Pablo. Guyasë' lë', en buázië' lu yödzo na'. Cate' za' rení' ia'tú dza, burúajlenë' Bernabé, yöjáquië' yödzo Derbe.

<sup>21</sup> Lu yödzo ni' gulunë' libán que didza' dxi'a ca naca queë' Jesucristo, ate' bönachi zían ni' gula'yéajlë' Cristo. Gudödi ni' yöjhuöjgaquië' Listra, en Iconio, en Antioquía.

<sup>22</sup> Cate' gula'dödë' Bernabé, en Pablo yugu' yödzo na', bulu'tipë' ládi'gaquië' bönni' ni' ta'yéajlë'ë Cristo, en bulu'së'ë ládi'gaquië' ulu'gá'anë' tsutsu ca na' ta'yéajlë'ë Lë'. Gulë' légaquië':

—Rë'u tsaza cázaru' ga rinná bë'ë Dios, run bayudxi quí'i sáca'ru' zían le gaca queëru'.

<sup>23</sup> Bulu'cu'ë yugu' bönni' gula ilún chi'ë bönachi queë' Cristo tu cö' huéaj bönachi ni' queë' Cristo. Cate' chigulu'ilenë' Dios didza', en gulunë' gubasa, ní'irö gula'gu'ë légaquië' lu në'ë Xanru', Nu na' ta'yéajlë'ë.

### *Pablo, en Bernabé tu'dxinë' Antioquía luyú Siria*

<sup>24</sup> Ní'irö Pablo, en Bernabé gula'dödë' luyú Pisidia, ate' bila'dxinë' luyú Panflia. <sup>25</sup> Budxi gulunë' libán que xtídzë'ë Cristo lu yödzo Perge, yöjáquië' yödzo Atalia. <sup>26</sup> Bulu'zë'ë ni', ate' gula'benë' tu lë'e barco, en bulu'dxinë' yödzo Antioquía, ga na' nacu'ë bönni' queë' Cristo, bönni' na' gula'söl-lë'ë légaquië' tsöjéngaquië' libán, cate' ni' gula'gu'ë légaquië' lu në'ë Dios, Nu na' ruzá' ladi' quegaquië' ilunë' xichinë', dxin na' chibudxi gulunë'. <sup>27</sup> Cate' ni' bulu'dxinë' Antioquía, bulu'dubi bönachi queë' Cristo nacúa' ni'. Ní'irö Pablo, en Bernabé bulu'siyönnë' légaquië' ca nácagaca le zxön benë' Dios lu ná'agaquië', enca' ca benë' Dios, bë'ë yugu' bönachi izá'a lataj ta'yéajlë' ca' Lë'. <sup>28</sup> Pablo, en Bernabé bulu'gá'analënë' bönachi ni' ta'yéajlë' Cristo zían dza.

## 15

*Tu'dubë huen dxin queë Cristo lu yödzo Jerusalén*

<sup>1</sup> Ní'irö bal-lë' bönni' narúajgaquië' luyú Judea bila'dxinë' yödzo Antioquía, ate' bulu'sédinë' böchi'ru', bönni' izá'a ni', ta'nnë':

—Channö cabí irugu lu xipëla'li' ca nalëbitu' runtu' ca na' gunná bë'ë Moisés, biti' gaca uláli'.

<sup>2</sup> Ní'irö Pablo, en Bernabé gula'díl-lalenë' légaquië' didza', ate' gúcada' dzatsa. Gudödi ni', gula'böë' Pablo, en Bernabé len ia'bal-lë' bönni' böchi'ru' ni', para tsójáquië' Jerusalén, en ila'dxinë' lógaquië' gubáz ni' queë' Cristo, enca' lógaquië' bönni' gula tapa chi'ë bönachi queë' Cristo ni', para iluí'ilenë' légaquië' didza' ca naca lë ni raca, tu'sédinë' bönni' na' bönachi le nachixi.

<sup>3</sup> Ní'irö yugu' bönni' queë' Cristo nacu'ë Antioquía bulu'gu'ë légaquië' nöza, ate' gula'dödë' lu xiyú yödzo Fenicia, en luyú Samaria, ate' bulu'siyönnë' böchi' luzá'aru' yugu' lataj ni' ca guca, bulu'huóáquië' bönni' izá'a queë' Cristo. Lë ni ben ga bulu'dzéjanë' yúgu'të böchi' luzá'aru' ni'.

<sup>4</sup> Cate' bila'dxinë' Pablo, en Bernabé lu yödzo Jerusalén, yugu' bönni' queë' Cristo nacu'ë ni', enca' yugu' gubáz nasöl-lë'ë Lë', en yugu' bönni' gula tapa chi'ë gulunë' légaquië' bal. Pablo, en Bernabé bulu'siyönnë' légaquië' yúgu'të le benë' Dios lu ná'agaquië'. <sup>5</sup> Ní'irö gula'zuínë' bal-lë' bönni' yudo' fariseo, bönni' ta'yéajlë'ë Cristo, en ta'nnë':

—Run bayudxi irugu lu xipëla'gaquië' bönni' izá'a na' ta'yéajlë'ë Cristo, en inná bé'eru' légaquië' ilunë' ca rnaa bë' xibá queë' Moisés.

<sup>6</sup> Ní'irö bulu'dubë' gubáz nasöl-lë'ë Cristo len bönni' gula tapa chi'ë bönachi queë', para ulu'chi'a ulu'söröë' lë ni raca.

<sup>7</sup> Gudödi gulu'ë zían didza', guzuínë' Pedro, en gudxë' légaquië':

—Libi'ili', böcha'a. Nöz quézili' ca guca dza ni'te, Dios gurö cazë' neda' para guna' libán lógaca bönachi izá'a para ila'yöni didza' dxi'a, en ila'yéajlë' Cristo. <sup>8</sup> Dios, Nu nunbë' caz le yu'u icja ladxí'do'gaca bönachi, buzóë' le naca bë' runë' légaquië' bal, gusöl-lë'ë Dios Bö' Lá'ayi quégaquië', ca na' gusöl-lë'ë Lë' queëru'. <sup>9</sup> Biti' butsé'ë ca benë' quégaquië', en queëru', en lësca' bunë' dxi'a icja ladxí'do'gaquië' tu' ta'yéajlë'ë Cristo. <sup>10</sup> Na'a, ¿bizx que run leli'-në' Dios, rusubága'li' yua' xiyéngaca böchi' luzá'aru'? Yua' ni, le naca le ta'nná bë' xibá queë' Moisés, biti' guca guá'aru' rë'u, en biti' guca ilu'ë xuz xtó'oru' le. <sup>11</sup> Rë'u ni, réajlë'ëru' nuláru' ni'a que le buzá' ladxë'ë Xanru' Jesús queëru', en ca na' nuláru' rë'u, ulu'lë' ca' légaquië'.

<sup>12</sup> Cate' budxi bë'ë Pedro didza' ni, yúgu'të' gula'cu'ë dxisö, ate' bulu'zé nágagaquië' didza' gulu'ë Bernabé, en Pablo.

Bulu'siyönnë' légaquië' yugu' le taca bë', en le tun ga tu'bani bönachi, yugu' le benë' Dios lu ná'agaquië' ga nacuá' bönachi izá'a. <sup>13</sup> Cate' Bernabé, en Pablo budxi gulu'ë didza' ni, bubí'ë didza' Jacobo, gunnë':

—Libí'ili', böcha'a. Buli'zë nágali' le guía' libí'ili'. <sup>14</sup> Simón Pedro chigudíxjö'i quézinë' rë'u ca benë' Dios, bulu'e lahui yöl-la' huáca queë' le zí'alö luzuí lógaca yugu' bönachi izá'a para bubéajë' quez queë' bönachi nútsa'gaca ládjagaquië'. <sup>15</sup> Ca naca lë ni röjlózgaca xtídza'gaquië' bönni' gulu'ë didza' uláz queë' Dios, ca na' nazúaj lu guichi lá'ayi, rnna:

<sup>16</sup> Dza tödi lë ni huöda', en uchisa' Nu inná bë', bönni' na' tsázië' xilatjë' David.

Guna' ca run nu ruchisa tu yu'u naguinnaj.

Uchisa' ca' bönachi ila'cuá' lidxë', nupa nagá'anagaca.

Guna' ca run nu ruchisa tu zö'ö yexu'.

Caní uchisa' le gunná bë'ë David

<sup>17</sup> para ulu'guilaj ia'zíca'rö bönachi Xanru'.

Ulu'guilaj bönachi izá'a Lë',

ate' sí' láguequi: Bönachi Queë' Dios.

<sup>18</sup> Caní rnnë' Xanru',

Nu na' dza ni'te ben ga naca bë' yúgu'të lë ni.

<sup>19</sup> 'Que lë ni na' runi neda' biti' ral-la' gun níguiru' bönachi izá'a, nupa tu'huöáca queë' Dios. <sup>20</sup> Ral-la' uzúajru' lu guichi quégaquië' ulu'cá'anë' yugu' le biti' ral-la' ilahuë', le nadödi lógaca budó' guiöj budó' yaga, en cabí ilunë' le ruá' dö', en cabí ilahuë' xipéla'gacaba' böa' guixi' biti' narúaj-gácaba' rön, en cabí ilahuë' xichönba' bíti'tës böa' guixi'. <sup>21</sup> Dza ni'te nacuá' yúgu'të yödzo nupa tun libán lu yu'u gapa tu'dübë' bönni' judío, en tu'sedë' queë' Dios. Tunë' libán ni' que le buzúajë' lu guichi Moisés. Tu'laba cazë' le yugu' dza lá'ayi.

<sup>22</sup> Ní'irö gula'yaza ládxi'gaquië' gubáz nasöl-lë'ë Cristo, en bönni' gula tapa chi'ë, en yúgu'të bönachi queë' Cristo, ila'böë' bal-lë' bönni' ládjagaquië', en ila'söl-lë'ë légaquië' Antioquía. Tsöjácalenë' Pablo, en Bernabé. Chopë' na' gula'böë', légaquië' Judas, zoa ia'tú lë' Barsabás, enca' Silas. Nácagaquië' bönni' lo ládjagaquië' böchi'ru' ni'. <sup>23</sup> Bulu'zúajë' lu guichi le bulu'dödë' lu ná'agaquië' ilu'ë, le rnna caní:

“Netu', gubáz nasöl-lë'ë Cristo, en bönni' gula tun chi'ë, en yugu' böchi'ru', rugápatu' libí'ili' Dios, böchi'tu', nácali' bönachi izá'a zóali' Antioquía, en yugu' yödzo luyú Siria, en Cilicia. <sup>24</sup> Biyönitu' ca tun bal-la bönachi bila'rúaj ga zóatu', nupa na' biti' nasöl-la'tu'. Dutsá'agaquië' libí'ili' len le ta'nnë', en tu'bequi böniga icja ládxi'do'oli', tu' ta'nná bë'ë irugu lu xipéla'li', en gunli' ca rinná bë' xibá queë' Moisés. <sup>25</sup> Que lë ni na' guyaza ládxi'tu' cate' chibén tuz xtídza'tu',

gurötu' chopë' bönni', nupa isöl-la'tu' para uduyúgaquië' libí'ili'. Guídlengaquië' Bernabé, en Pablo, nupa na' nadxí'iru'.<sup>26</sup> Chiyöjáquië' Bernabé, en Pablo gapa guzóa bönadxi ilátië' tu' nadxí'iguequinë' Xanru' Jesucristo. <sup>27</sup> Caní naca, risöl-la'tu' Judas, en Silas ga zóali'. Chopë' ni ulu'siyönnë' libí'ili' lë ni ruzúajtu' lu guichi ni. <sup>28</sup> Dios Bõ' Lá'ayi buluí'inë' netu' le raza ládxë'ë, en lësca' caní raza ládxi'tu' netu', bití' usubága'rötu' libí'ili' yua', le naca le rinná bë' xibá queë' Moisés, pero yugu' lë nisö run bayudxi gunli':

<sup>29</sup> Bití' gáguli' le nadödi lógaca budó' guiöj budó' yaga.

Bití' gáguli' rön.

Bití' gáguli' xipéla'gacaba' böa' guixi' bití' narúaj-gácaba' rön.

Bití' gunli' le ruá' dö'.

Channö gun chi'i cuinli' para gunli' ca rna yugu' lë ni, gunli' dxi'a."

<sup>30</sup> Caní guca, yugu' bönni' na' nasöl-la'gaquië' bila'dxinë' Antioquía. Bulu'tubë' bönachi queë' Cristo nacué' ni', atë' gula'gu'ë guichi na' lu ná'agaquië'. <sup>31</sup> Cate' chibudxi bulu'labë' le, bulu'dzéjanë' ca naca le nazúaj lu guichi na', le ruhuë tsahui' légaquië'. <sup>32</sup> Tu' nácagaquië' Judas, en Silas bönni' tu'ë didza' uláz queë' Dios bulu'huë tsáhuë'ë légaquië', en bulu'tipë' ládxi'gaquië' böchi'ru' ni', bulu'gunë' dxin didza' zían le gulu'ilenë' légaquië'. <sup>33</sup> Gudödi bulu'dzënë' Judas, en Silas ni' nababa dza, ní'irö böchi'ru' ni' bulu'zenë' légaquië' dxi'a didza' para tsöjhuöajgaquië' Jerusalén ga nacué' bönni' gula'söl-lë'ë légaquië'. <sup>34</sup> Guyaza ládxë'ë Silas bugá'anë' Antioquía. <sup>35</sup> Bulu'gá'anë' ca' Pablo, en Bernabé Antioquía na', atë' bulu'sédinë' bönachi, en gulunë' libán que xtídzë'ë Xanru'. Lësca' caní gulún zíanrö ca' bönachi.

*Risí lahuë' Pablo röjenë' libán le buropi luzuí*

<sup>36</sup> Gudödi nababa dza Pablo gudxë' Bernabé:

—Uyéajru' leyúbölö tsöjyúgacaru'-në' böchi'ru' nacué' yúgu'të yödzö gapa chiyöjenru' libán que xtídzë'ë Xanru', para ilé'eru' nacxi raca quégaquië'.

<sup>37</sup> Gú'unnë' Bernabé ila'chë'ë-bi' bi'i Juan Marcos, tséajlenbi' légaquië', <sup>38</sup> pero bití' guyaza ládxë'ë Pablo ila'chë'ë-bi' tséajlenbi' légaquië' tu' bulá'alenbi' légaquië' luyú Panfilia, en bíti'rö yöjénlenbi' légaquië' dxin queë' Xanru'. <sup>39</sup> Bití' guca tuz xtídza'gaquië' Bernabé, en Pablo ga bidxintë bulu'lá'alenë' tuë' ia'tué'. Bernabé guchë'ë-bi' bi'i Marcos, atë' gula'benë' tu lë'e barco, yöjáquië' luyú Chipre. <sup>40</sup> Pablo guröë' Silas para tséajlenë' lë'. Ní'irö yugu' böchi'ru' gula'gu'ë légaquië' lu në'ë Xanru', en gula'nábinë' Lë' uzá' ládxë'ë quégaquië', atë' bulu'zë'ë Pablo, en Silas ni'. <sup>41</sup> Gula'dödë' yugu' yödzö luyú



Siria, en Cilicia, ate' bulu'tipë' ládxi'gaca bönachi queë' Cristo nacua' ni'.

## 16

### *Bi'i Timoteo runbi' tsözxön Pablo, en Silas*

<sup>1</sup> Gudödi ni' bila'dxinë' Pablo, en Silas yödzö Derbe, en yödzö Lистра. Zóabi' tu bi'i bönni' ni', réajlë'ëbi' Cristo, lëbi' Timoteo. Nácabi' xzí'ininu tu nigula judío réajlë'ënu Cristo, pero xúzibi' biti' náquië' judío. <sup>2</sup> Yugu' böchi'ru' nacu'ë Lистра, en Iconio tunë' ba nalí queëbi', ta'nnë' runbi' le naca dxi'a. <sup>3</sup> Gú'unnë' Pablo tséajlenbi' bi'i ni lë', ate' gudélë'ë-bi', en guchúguië' lu xipéla'bi' ca tun bönachi judío. Caní benë' para cabí ila'nnë' queëbi' bönni' judío nacu'ë yugu' yödzö ni', tu' nöziguequinë' yúgu'të' xúzibi' biti' náquië' judío. <sup>4</sup> Cate' Pablo, en nupa dzágagaca lë' gula'dödë' gapa nacua' yödzö ni', tu tu yödzö na' bulu'dödë' lu ná'agaquië' yugu' böchi'ru' nacu'ë gapa ni' yugu' xibá na' gulunë' gubáz nasól-lë'ë Cristo, en bönni' gula tapa chi'ë bönachi queë', nacu'ë Jerusalén. Bulu'dödë' yugu' xibá ni lu ná'agaquië' para ilunë' ca rinná bë' xibá na'. <sup>5</sup> Caní guca, bönachi yúgu'të cö' bönachi queë' Cristo bila'dipa ládxi'gaca ca naca le réajlë'ëru' Cristo, ate' gula'yán tu tu dza.

### *Tu bönni' Macedonia rulidzë' Pablo lu yëla bëchigal*

<sup>6</sup> Pablo, en bönni' dzágagaquië' lë' gula'dödë' luyú Frigia, en luyú Galacia, tu' buzáguë'ë Dios Bô' Lá'ayi xinözgaquië', para cabí ilunë' libán que xtídzë'ë Xanru' luyú Asia. <sup>7</sup> Cate' bila'dxinë' luyú Misia, gulë'ënnë' tsöjáquië' luyú Bitinia, pero Dios Bô' Lá'ayi, Nu risól-lë'ë Jesús queëru', biti' bë'ë légaquië' lataj. <sup>8</sup> Ní'irö gula'dödë' gala' ga dë Misia, ate' yöjáquië' lu yödzö Troas. Neda' Lucas, ruzúaja' lu guichi lë ni, guzóa' Troas na', ate' yöjsóalena'-në' Pablo. <sup>9</sup> Lu yödzö ni' Dios bulu'inë' Pablo tu le bilé'enë' lu yëla bëchigal. Tu bönni' Macedonia bulu'i lahuë' lë', zuínë', en ráta'yue' lahuë' Pablo, rnnë': "Gudödi ladztu', lu xiyú Macedonia, en gúcalen netu'." <sup>10</sup> Cate' bilé'enë' Pablo lë ni, lë na' bulu'i lahui lë', la' bë' ládxi'tëtu' tséajtu' luyú Macedonia, tu' gúquibe'etu' Dios chibulidzë' netu' tsöjentu' libán que didza' dxi'a lógaca bönachi luyú ni'.

### *Le gulunë' Pablo, en Silas lu yödzö Filipos*

<sup>11</sup> Ní'irö gurentu' lë'e barco, en buzá'atu' Troas. Gudöditu' líra ga bidxintu' yödzö Samotracia, ate' gudödi ia'tú dza bidxintu' yödzö Neápolis. <sup>12</sup> Buzá'atu' ni', ate' bidxintu' Filipos, yödzö na' nácarö lo ca yúgu'të yödzö nabábagaca tsölá'a ni' luyú Macedonia. Lu yödzö ni' yugu' bönni' Roma nucuá'agaquië' bönachi uládz quégaquië'. Lu yödzö nisö guzóatu' nababa dza. <sup>13</sup> Cate' bidxín tu dza lá'ayi, birúajtu' lu yödzö, en guyéajtu' ra'

yegu ga na' tu'dubi caz bönachi yödzo na', en tu'lidza Dios. Gurö'ötu' ni', en busiyöntu' yugu' nigula nudúbigacanu ni' ca naca xtídzë'ë Xanru'. <sup>14</sup> Nútsa'nu ladjagacanu Lidia, tu nigula Tiatira. Nácanu nigula rúti'nu lari' xiná chul-la le nazáca'da'. Reaj ládxi'nu Dios, ate' buzé náganu didza' ru'ë Pablo, ate' Xanru' gúcalenë'-nu para guxzí' lu ná'anu didza' na' bë'ë. <sup>15</sup> Ní'irö bidílanu lënu nisa, ate' gula'dila ca' nisa bönachi nacua' lídxi'nu. Gudödi ni' gúta'yunu lotu', gunnánu:

—Channö réquibe'eli' réajlë'a Xanru', guli'tsaza lidxa', en guli'sóa ni'.

Bennu bayudxi ugá'anatu' ni'.

<sup>16</sup> Ia'tú le guca tu dza tsanni ni' zéajtu' ga na' rulidztu'-në' Dios, birúajbi' dutságabi' tu bi'i nigula netu' yu'u lëbi' bö' le run ga rinnë yá'abi'. Len yöl-la' rinnë ya'a queëbi' runbi' ga ta'zí'dë'ë dumí yugu' bönni' xanbi'. <sup>17</sup> Bi'i nigula ni sudunóbi'-në' Pablo, en netu', ru'íbi' zidzaj didza', rnnabi':

—¡Yugu' bönni' ni tunë' xichinë' Dios nayëpisëtëre'!  
¡Tu'siyönnë' libí'ili' naca gaca uláli'!

<sup>18</sup> Caní benbi' zían dza. Cate' bíti'rö guyaza ládxe'ë Pablo, buécjë', en bulidzë' bö' na' yu'u lëbi', rnnë':

—Lu Lë' Xanru' Jesucristo, rinná bé'eda' li'. ¡Burúaj icja ládxi'do'obi' bi'i nigula ni!

La' ní'isö burúajtë bö' na'.

<sup>19</sup> Cate' bila'lé'enë' xanbi' chiburúaj bö' na' run ga rinnë yá'abi', en bíti'rö naca löza ila'zi'ë dumí ni'a queëbi', que lë ni na' gula'zönë' Pablo, en Silas, ate' gula'ché'ë légaquië' lógaquië' bönni' yúlalui', nudúbigaquië' ga naca lu yë'ëyi. <sup>20</sup> Bulu'cu'ë légaquië' lógaquië' bönni' yúlalui' na', ta'nnë':

—Yugu' bönni' ni nácagaquië' judío, en tunë' ga tu'tsatsa bönachi yödzo ni. <sup>21</sup> Tu'sédinë' le cabí ral-la' si' lu ná'aru', en bití' ral-la' gunru', tu' nabábaru' Roma.

<sup>22</sup> Ní'irö bönachi zían ni' gula'dá'baga' Pablo, en Silas, ate' yugu' bönni' yúlalui' gula'nná bé'enë' nupa gula'lecja lari' nácagaquië' Pablo, en Silas, ate' gula'guinë' légaquië' gubá'ayi. <sup>23</sup> Gudödi gula'guindë'ë légaquië', gula'gu'ë légaquië' lidxi guíë'. Gula'nná bé'enë' bönni' rusayjë' lidxi guíë na' gun chí'idë'ë légaquië'. <sup>24</sup> Bönni' ni, cate' chigula'nná bé'enë' lë' caní, gulu'ë légaquië' lu yu'u lë'e dxi' lidxi guíë na', en gulu'ë ní'agaquië' yeru yaga ta'zön ní'agaquië'.

<sup>25</sup> Idú guluhuëla Pablo, en Silas tu'lidzë' Dios, en tul-lë' yöl-la' ba queë' Dios, ate' ta'yönnë' yugu' bönni' nadzúngaquië' lidxi guíë na'. <sup>26</sup> Ní'irö tsálido'os gudödi budó' zxu' bach. Caní guca ga bidxintë guxzizi xilibi zö'ö lidxi guíë na', ate' la' gula'yáljatë yúgu'të gapa nu riyaza, ate' bulu'huédxi ca' yugu' du guíë nága'gaca bönni' nadzúngaquië' ni'. <sup>27</sup> Bubanë' bönni'

na' rusayjē' lidxi guíē. Cate' bilé'enē' nayáljagaca gapa nu riyaza lidxi guíē na', gulecjē' guíē tuchi' queē' para guti cuiné', tu' réquinē' chibulu'zxúnnejē' bönni' nadzúngaquiē' lidxi guíē na'. <sup>28</sup> Ní'irō Pablo zidzaj bulidzē' lē', gunné':

—¡Biti' bi gúni cuinu', tu' zóatu' ni yúgu'tētu'!

<sup>29</sup> Ní'irō bönni' na' gunabē' guí', ate' gudá'atē' lu yu'u lidxi guíē na'. Guzxízidē'ē lu yöl-la' radxi, ate' biyéchuē' xini'agaquiē' Pablo, en Silas. <sup>30</sup> Cate' chinubéajē' légaquiē' lidxi guíē na', gudxē' légaquiē':

—Libi'ili', bönni', ¿bizxi ral-la' guna' para ulá'?

<sup>31</sup> Légaquiē' tē' lē':

—Guyéajlē'ē Xanru' Jesucristo, ate' uló' li', en lēasca' caní ulu'lágaca bönachi nacua' lidxu'.

<sup>32</sup> Gulu'ilenē' lē' didza' ca naca xtídzē'ē Xanru', dzágagaca lē' yúgu'tē bönachi nacua' lidxē'. <sup>33</sup> La' ná'asō, ni' naca chi'i dzö'ölō la' guchē'tē' légaquiē', ate' yöjtibē' légaquiē' ga dxíagaquiē' huē'. Gudödi ni', la' bidílatē' nisa, ate' gula'dila ca' nisa yúgu'tē bönachi nacua' lidxē'. <sup>34</sup> Ní'irō guchē'ē légaquiē' lidxē', en bē'ē le gulahuē'. Rudzéjanē' lē', en tu'dzeja ca' yúgu'tē bönachi nacua' lidxē' tu' ta'yéajlē'ē Dios.

<sup>35</sup> Cate' za' rení' dza na', yugu' bönni' yúlahui' gula'söl-lē'ē ni'a ná'agaquiē', ate' gulē' bönni' na' rusayjē' lidxi guíē:

—Busán-gáquiē' bönni' na'.

<sup>36</sup> Ní'irō bönni' na' rusayjē' lidxi guíē gudíxjöi'inē' Pablo didza' ni, gunné':

—Gula'söl-lē'ē bönni' yúlahui' didza' usana' libí'ili'. Na'a, guli'rúaj, en buli'huőaj dxí'ado' ga rizóali'.

<sup>37</sup> Ní'irō birúajē' Pablo, en gudxē' yugu' ni'a ná'agaquiē' bönni' yúlahui' na', gunné':

—Chigula'guiné' netu' lógaca bönachi sal-la' biti' narúguini queētu' ca rinná bē' xibá, en gula'gu'ē netu' lidxi guíē, ate' netu' ni nabábatu' Roma. ¿Naru' tu'santsē' netu' bagáchi'sō? ¡Biti' ca' gaca! ¡lídigarē' légaquiē' udusángaquiē' netu'!

<sup>38</sup> Yöjhuőjgaquiē' ni'a ná'agaquiē' bönni' yúlahui' na', en bulu'siyönnē' yugu' bönni' yúlahui' didza' ni, ate' légaquiē' guládxiné' cate' bila'yönnē' nabábagaquiē' Pablo, en Silas Roma. <sup>39</sup> Cate' bila'dxinē' lidxi guíē ni', guláta'yuē' lógaquiē' Pablo, en Silas cabí ulu'subáguē'ē légaquiē' xíguia'. Ní'irō gula'béajē' légaquiē' lidxi guíē na', en guláta'yuē' lógaquiē' ulu'rúajē' yödzō na'. <sup>40</sup> Ní'irō bila'rúajē' Pablo, en Silas lidxi guíē na', ate' gula'yáziē' lídxinu Lidia. Cate' chibila'lé'enē' böchi'ru' nacu'ē ni', bulu'chíziē' didza' icja nágaqaquiē', en la' bulu'zá'atē' ni'.

## 17

*Yugu' bönachi Tesalónica tunë' dzatsa*

1 Gula'dödë' Pablo, en Silas lu yödzö Anfípolis, en lu yödzö Apolonia, ate' bila'dxinë' lu yödzö Tesalónica, ga ni' zoa tu yu'u ga tu'dubë' bönni' judío, en tu'sëdë' queë' Dios. 2 Bugá'anë' Pablo ni' idú galaj dza, ate' ca run cazë', guyijë' ga zoa yu'u na' cate' naca dza lá'ayi quégaquië' bönni' judío, ate' bë'lenë' légaquië' didza'. 3 Buchila lá'anë', en buluí'inë' légaquië' rusëdi le nazúaj lu guichi lá'ayi run bayudxi qui'i sáquë'ë Cristo, Bönni' na' tunë' löza bönni' judío udusölë' légaquië', ate' tödi gátie' ubanë' lu yöl-la' guti. Ní'irö Pablo gudxë' légaquië':

—¡Caní guca queë' bönni' na' lë' Jesús, runa' libán queë' ga ni zóali'! ¡Bönni' ni náquië' Cristo!

4 Ní'irö bal-lë' gula'yéajlë'ë Cristo, ate' gulunë' tsözxön Pablo, en Silas. Lësca' caní zían bönni' izá'a, bönni' ta'yéaj ládxi'gaquië' Dios, gula'yéajlë'ë Cristo. Lësca' zían nigula lo gula'yéajlë'ënu Cristo. 5 Ní'irö yugu' bönni' judío biti' ta'yéajlë'ë, lu yöl-la' ruzxé'e quégaquië' Pablo, bulu'tubë' yugu' bönni' biti' nácagaquië' tsahui', bönni' ta'dasë' ca'. Cate' chibulu'túbë' bönachi zían, gulunë' ga gulún dzatsa idú lu yödzö na', ate' bayudxi gula'yázië' lidxë' Jasón para ulu'béajë' Pablo, en Silas lógaca bönachi na' tun dzatsa. 6 Cate' biti' bulu'dzölinë' Pablo, en Silas, gula'béajë' Jasón, en ia'zíca'rë' böchi'ru' nacu'ë ni', ate' gula'chë'ë légaquië' lógaquië' bönni' yúlahui'. Gulu'ë zidzaj didza', ta'nnë':

—Yugu' bönni' na' nutsá'gaquië' bönachi idütë yödzölió chibila'dxinë' ca' ni. 7 Jasón ni gulu'ë légaquië' lidxë'. Yúgu'të bönni' ni ta'dá'baguë'ë xibá queë' César, bönni' rinná bé'enë' rë'u, ta'nnë': “Zoë' ia'tué' bönni' rinná bë'ë, lë' Jesús.”

8 Cate' bila'yönnë' yugu' bönni' lu yödzö, en yugu' bönni' yúlahui' na' lë ni, gula'bö'ë böniga. 9 Ní'irö, gudödi gula'zi'ë bönni' yúlahui' dumí le bulu'cá'anagarë' Jasón, en ia'zíca'rë' bönni' na', bulu'sanë' légaquië'.

*Le gulunë' Pablo, en Silas lu yödzö Berea*

10 Ní'irö yugu' böchi'ru' ni' la' gula'söl-la'të' Pablo, en Silas, ni' naca chi'i dzö'ölö, ate' sójáquië' yödzö Berea. Cate' bila'dxinë' ni', gula'yázië' lu yu'u ga tu'dubë' bönni' judío nacu'ë ni', en tu'sëdë' queë' Dios. 11 Gulácarë' tsahui' bönni' ni ca bönni' nacu'ë Tesalónica, tu' gula'zì lu ná'agaquië' xtídzë'ë Xanru' idú ládxi'gaquië'. Yugu' dza bulu'labë' dxi'a le nazúaj lu guichi lá'ayi, para iléquibe'enë' channö nácatë lë na' rnnë' Pablo. 12 Caní guca, zían bönni' judío gula'yéajlë'ë Cristo. Lësca' caní, zían bönni' izá'a, yugu' nigula lo, en yugu' bönni' gula'yéajlë'ë Cristo. 13 Ní'irö cate' guléquibe'enë' bönni' judío

nacu'ë Tesalónica, lësca' rigu'íxjö'ë Pablo xtídzë'ë Dios lu yödzö Berea, yöjáquië' ni', en gulunë' ca' ni' ga gulún dzatsa bönachi zían. <sup>14</sup> Ní'irö yugu' böchi'ru' ni' la' gula'söl-la'të' Pablo, para tsejë' ga naca ra' nísado', pero bulu'gá'anasë' Silas, en bi'i Timoteo lu yödzö Berea. <sup>15</sup> Yugu' bönni' Berea na' gula'chë'ë Pablo lu yödzö Atenas. Ní'irö la' yöjhu'öjgacatë' lu yödzö Berea, tu'ú'ë xtídzë'ë Pablo, para ilë' Silas, en bi'i Timoteo, tsöjácate' ga ni' zoë' Pablo.

*Le benë' Pablo lu yödzö Atenas*

<sup>16</sup> Tsanni ni' zoë' Pablo ribözë' Silas, en bi'i Timoteo, lu yödzö Atenas, ruhu'í'ini ládxe'ë tu' rilé'enë' ta'yéaj ládxi'gaca yúgu'të bönachi yödzö na' yugu' budó' guiöj budó' yaga. <sup>17</sup> Que lë ni na' bé'lenë' bönni' judío, en bönni' ta'yéaj ládxi'gaquië' Dios didza' ga naca lu yu'u ga tu'dubë' tu'sëdë' queë' Dios. Yugu' dza bé'lenë' nupa ta'dá lu yë'ëyi didza' ca naca xtídzë'ë Cristo. <sup>18</sup> Bal-lë' bönni' dá'gaquië' le tu'sëdinë' bönni' epicúreo, en le tu'sëdinë' bönni' estoico gulu'í'ilenë' Pablo didza'. Bal-lë' gula'nnë':

—¿Bizxi rë'ënitsenë' innë' bönni' huë' didza' ni?

Ia'bal-lë' gula'nnë':

—Réquitu' náquië' nu run libán quégaca dios zi'tu'.

Caní'gula'nnë' tu' runë' libán Pablo lógaquië' que didza' dxi'a queë' Jesús, en que yöl-la' rubán. <sup>19</sup> Ní'irö gula'guélé'ë në'ë Pablo, en gula'chë'ë lë' lu gu'á ga tu'dubë' tu'ë didza', nazí' i le Areópago, ta'nnë':

—¿Naru' huácatsö yönitü' didza' cubi ni rusiyönnu' netu'? <sup>20</sup> Rusiyönnu' netu' le tun ga rubánitu'. Rë'ënitü' inözitu' bizxi rna didza' ni ru'u.

<sup>21</sup> Bítí'rö ta'yaza ládxi'gaquië' ilunë' bönni' Atenas na', en bönni' izá'a nacu'ë ni', pero ila'yönsinë', en ilu'isë' didza' tu le cubi.

<sup>22</sup> Ní'irö guzuínë' Pablo gatsaj láchui'lö lö'a Areópago na', gunné':

—Bönni' Atenas, yúgu'të le rilé'eda' naca bë' reaj ládxi'da'ali' yugu' dios queéli'. <sup>23</sup> Cate' gudöda' lu yödzö, en buyúgaca' yugu' le reaj ládxi'li', yöjxáca'a ca' tu nichu ga ni' nazúaj le rna caní: "Tu Dios, Cuntu Nu Nunbë' Lë'." Dios na' reaj ládxi'li'-në' sal-la' biti' núnbë'ëli'-në', Dios ni runa' libán queë' loli'.

<sup>24</sup> '¡Dios ni benë' yödzölió, en yúgu'të le nacua' yödzölió ni! ¡Náquië' Xani yehua' yubá, en Xani luyú ni, en biti' ca' zoë' tu yudo' núngaca bönachi! <sup>25</sup> Biti' bi riyadzaj queë' le gaca ulu'nödzej bönachi, tu' runödzej' Lë cazë' quégaca yúgu'të bönachi yöl-la' na'bán, en yúgu'të le riquíniru'.

<sup>26</sup> Lë' benë' tuzë' bönni' ga zá'gaca yúgu'të bönachi izá'a para ila'cuá' idú yödzölió, en bulu'e dza ila'cuá', en gapa ral-la'

ila'cuá'. <sup>27</sup> Dios bucu'ë légaquië' para ulu'guiljé' Lë', channö nácati'tës ila'dzöliné' Lë' sal-la' ila'gán ila'zönsé'. Caní raca sal-la' biti' zoë' zi'tu' ga zóaru' tu turu'. <sup>28</sup> Lë' cazé' runé' ga zóaru' nabanru', en bi gaca gunru', en le nácaru'. Naca ca na' gula'nné' bal-lë' bönni' nútsa'gaquië' lib'i'ili', nupa bulu'zúaj le do' rúl-lali', le ta'nná: "Di'a dza queë' Dios nácaru'." <sup>29</sup> Na'a, channö nácaru' di'a dza queë' Dios, biti' ral-la' innaru' náquië' Dios ca tu budó' guiöj budó' yaga, o tu le néquini oro, o plata, o guiöj, le núngaca bönachi ca naca tu le ta'guínnajsö ícjaguequi. <sup>30</sup> Dios budödë' cá'asö yugu' le gulunë' lu yöl-la' biti' réajni'i quégaquië' yugu' iz chigula'dödi, pero na'a rinná bé'ené' yúgu'të bönachi idútë yödzölió ulu'bi'i ládxi'gaca. <sup>31</sup> Dios chinulu'ë tu dza cate' uchi'a usöröë' yúgu'të bönachi. Idú tsahui' naca ca uchi'a usöröë' légaquië' lu në'ë Jesús, bönni' na' buzóa cazë' Lë', ate' lógaca yúgu'të bönachi benë' tsutsu gaca caní tu' busubanë' Lë' lu yöl-la' guti.

<sup>32</sup> Cate' bila'yönnë' didza' bë'ë Pablo ca guca, zoa nu bubán lu yöl-la' guti, bulu'titjé' bal-lë', ate' ia'bal-lë' gula'nnë':

—Yöniguetu' ia'tú lë ni ru'u didza' que.

<sup>33</sup> Ní'irö burúajé' Pablo gatsaj láchui'lö ga na' nacu'ë, söhuöjé'.

<sup>34</sup> Bal-lë' gula'yéajlë'ë Cristo, en gulunë' tsözxön Pablo. Nútsë'ë Dionisio, bönni' areópago, ládjagaquië', ate' nútsa'nu ca' ládjagaquië' nigula na' lënu Dámaris. Ia'bal-lë' na' gula'yéajlë'ë ca' Cristo.

## 18

### *Le benë' Pablo lu yödzö Corinto*

<sup>1</sup> Gudödi guca lë ni, buzë'ë Pablo yödzö Atenas na', ate' guyijé' yödzö Corinto. <sup>2</sup> Yöjxáquië' Aquilo, tu bönni' judío ni'. Guljé' bönni' ni luyú Ponto, en si' bidxíngazë' yödzö Corinto na'. Buzë'ë luyú Italia len nigula queë', lënu Priscila, tu' gunná bë'ë Claudio, bönni' unná bë', ulu'rúajé' yúgu'të bönni' judío yödzö Roma. Guyijé' Pablo ga nacu'ë Aquilo, en Priscila na' <sup>3</sup> tu' naca tuz dxin tuné' Aquilo, en Pablo. Bugá'analenë' légaquië', ate' tsözxön gulunë' dxin, tuné' yugu' yu'u guídido'. <sup>4</sup> Cate' nácagaca dza lá'ayi quégaquië' bönni' judío, razië' Pablo lu yu'u ga tu'dubë' tu'sédë' queë' Dios, ga ni' bë'lenë' légaquië' didza'. Gú'unnë' ulu'inë' yugu' bönni' judío, en yugu' bönni' izá'a nacu'ë ni', naca idútë li le riguíxjö'ë ca naca queë' Jesucristo.

<sup>5</sup> Cate' bila'dxinë' Silas, en bi'i Timoteo ni', nuzá'agaquië' luyú Macedonia, nugu'ide'enë' Pablo, runé' libán que xtídzë'ë Dios, en runé' ba nalí lógaquië' bönni' judío, rnnë':

—Jesús náquië' Cristo, Nu na' tuné' löza yugu' bönni' judío udusölë' légaquië'.

<sup>6</sup> Cate' bönni' judío nacu'ë ni' gula'dá'báguë'ë xtídzë'ë, en gula'nnë zi'ë que, ní'irö Pablo gudxibë' lari' nácuë' para ulu'inë' légaquië' bíti'rö nabáguë'ë lë' ni'a quégaquië', ate' gudxë' légaquië':

—La' cuínsili' nabága'li' xíguia' que yöl-la' guti queëli', calëga neda' nabága'a le. Na'a, uyija' ga nacua' bönnachi izá'a.

<sup>7</sup> Ní'irö burúajë' Pablo ni', en gуйijë' lidxë' Justo, bönni' reaj ládxë'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sëdë' queë' Dios. <sup>8</sup> Crispo, bönni' lo que yu'u ga na' tu'dubë' tu'sëdë' queë' Dios guyéajlë'ë Xanru' Jesús, ate' dzágagaca lë' yúgu'të bönnachi nacua' lidxë'. Cate' bila'yönnë' xtídzë'ë Dios, zián bönni' Corinto gula'yéajlë'ë Cristo, ate' gula'dilë' nisa. <sup>9</sup> Ní'irö Lë cazë' Xanru' gudxë' Pablo lu yëla bëchigal, gunnë':

—Biti' gádxinu', en biti' su' dxisö, quíxjö'u xtídzá'a, <sup>10</sup> tu' zóalen caza' neda' li', ate' cuntu nu uzapa' në'e li' para guá' dö' quiu', tu' néquiguequi quia' bönnachi zián lu yödzö ni.

<sup>11</sup> Bugá'anë' Pablo ni' idú ca tu iz yu' gatsaj, ate' busédinë' légaquië' xtídzë'ë Dios.

<sup>12</sup> Cate' bidxín dza rinná bë'ë Galión luyú Acaya, guláquië' tuz bönni' judío bití ta'yéajlë', ate' gula'dá'báguë'ë Pablo, en gula'chë'ë lë' ga rö'ë ruchi'a rusöröë' Galión na'. <sup>13</sup> Gulë' Galión na':

—Bönni' ni rigú'u yöl-lë'ë bönnachi para ilunë' bal Dios, ca ridá'baga' xibá queëtu'.

<sup>14</sup> Cate' chizöa gu'ë didza' Pablo, Galión na' gudxë' yugu' bönni' judío, rnnë':

—Libí'ili', bönni' judío, la'tu' guca tu le riguitsaj xibá queë' César, o tu le ruá' dö', guá' ilena' uzë naga' xtídzá'li' ca ral-la' guna', <sup>15</sup> pero channö naca didza' bizxaj que dídzá'sö, o que lágaca bönnachi, en ca naca xibá queëzili', guli'cá'ana tshai' libí'isili', tu' cabí rë'ënda' neda' gaca' nu uchi'a usörö yugu' le caní.

<sup>16</sup> Ní'irö Galión bulágui'ë légaquië' lu yu'u yúlahui'. <sup>17</sup> Ní'irö yúgu'të bönni' uládz na' gula'guélé'ë Sóstenes, bönni' lo que yu'u ga tu'dubë' bönni' judío, en tu'sëdë' queë' Dios, ate' gula'guínë' lë' lö'a yúlahui', pero bití' bë' ládxë'ë Galión lë na' raca.

<sup>18</sup> Pablo bugá'anë' lu yödzö na' zián dza, ate' gudödi busiyönnë' böchi'ru' nacu'ë ni' didza', gуйijë' yödzö Cencrea, ga ni' benë' yútusö icjë', tu' dë tu le nazi' lu në'ë lahuë' Dios gunë'. Ní'irö gurenë' tu lë'e barco, para tsejë' luyú Siria, dzágagaquië' lë' Priscila, en Aquilo. <sup>19</sup> Cate' bila'dxinë' yödzö Éfeso, Pablo bulá'alënë' légaquië' ni'. Guyázië' lu yu'u ga tu'dubë' bönni' judío, en tu'sëdë' queë' Dios, ate' bë'lenë' nupa nacua' ni' didza'. <sup>20</sup> Yugu' bönni' ni' gulá'tayuë' lahuë' Pablo

ugá'analenë' légaquië' ia'lati' xidzé, pero lë' biti' gú'unnë'.  
<sup>21</sup> Bë'lenë' légaquië' didza', gunnë':

—Run bayudxi soa' gapa' laní si' gaca Jerusalén, ate' leyúbölö huöda' ga ni zóali', channö guë'ënnë' Dios.

Ní'irö gurenë' Pablo tu lë'e barco, en buzë'ë Éfeso na'.

*Ridxinë' Pablo Antioquia, ate' risi lahuë' röjenë' libán le bunny luzuí*

<sup>22</sup> Gudödi bidxinë' Pablo yödzo Cesarea, gurenë' guyijë' Jerusalén, ga ni' yöjyüë' bönachi queë' Cristo, ate' ní'irö buzë'ë ni', en guyijë' Antioquia. <sup>23</sup> Gudödi zoë' ni' nababa dza, buzë'ë ni', sa'yéajë' tu tu yödzo luyú Galacia, en Frigia. Benë' tsutsu böchi'ru' nacu'ë ni' ca naca le ta'yéajlë'ë Cristo.

*Runë' libán Apolos lu yödzo Éfeso*

<sup>24</sup> Tu dza ni' bidxinë' Apolos, tu bönni' judío lu yödzo Éfeso. Guljë' bönni' ni lu yödzo Alejandría, en nabé'ede'enë' ru'ë didza', en nazëdadë'ë le nazúaj lu guichi lá'ayi. <sup>25</sup> Chinazëdë' bönni' ni ca naca le réajlë'ëru' Xanru'. Idú ládxë'ë bë'ë didza', en ca nácatë busëdinë' bönachi ca naca queë' Jesús, sal-la' núnbë'ë tuz le ruquíla bönachi nisa ca benë' Juan. <sup>26</sup> Gusí lahuë' Apolos ru'ë didza' idú ládxë'ë ga naca lu yu'u ga tu'dubë' bönni' judío, en tu'sëdë' queë' Dios. Cate' Priscila, en Aquilo bila'yönnë' didza' ru'ë Apolos na', gula'chë'ë lë' quez, en bulu'zéajni'irönë' lë' xibá queë' Dios. <sup>27</sup> Cate' gú'unnë' Apolos tödë' luyú Acaya, bulu'tipë' ládxë'ë, ate' bulu'zúajë' tu lu guichi le tsöjuá'gaquië' quégaquië' bönni' teaj ládxë'ë Cristo luyú Acaya na', para ilunë' Apolos na' bal. Cate' bidxinë' Apolos luyú na', yugu' bönni' ni' teaj ládxë'ë Cristo bulu'zídë'ë xibé didza' ru'ë Apolos na', tu' ruzá ládxë'ë Dios quégaquië'. <sup>28</sup> Caní guca, tu' bucul-lë' Apolos na' yugu' bönni' judío ni' lógaca yúgu'të bönachi, tu' bugunë' dxin le nazúaj lu guichi lá'ayi, en bulu'e bönni' na' Jesús naca cazë' Cristo.

## 19

*Le benë' Pablo lu yödzo Éfeso*

<sup>1</sup> Tsanni ni' zoë' Apolos lu yödzo Corinto, gudödë' Pablo gapa nacuá' yödzo ia'lati' ra'lö, ate' bidxinë' Éfeso. Yöjxáquië' bal-lë' bönni' ta'yéajlë'ë Cristo ni'. <sup>2</sup> Pablo gunábinë' légaquië', rnnë':

—¿Naru' bidisóalenë' Dios Bö' Lá'ayi libí'ili' cate' ni' guyéajlë'ëli' Cristo?

Gulë' lë':

—Biti' nayönitü' channö zoë' Dios Bö' Lá'ayi.

<sup>3</sup> Ní'irö Pablo gunábinë' légaquië', rnnë':

—¿Nacxi guca le bidí'lali' nisa?

Ta'nnë':



—Ca buquílë' Juan bönachi nisa.

<sup>4</sup> Pablo gunné':

—Buquílë' Juan bönachi nisa, nupa ni' bulu'bí'i ládxi'guequi, ate' Juan caz gudxë' léguequi ral-la' ila'yéajlë' Bönni' na' si zá'tëlë' ca lë', ate' Bönni' ni naquië' Jesús, Lë' Cristo.

<sup>5</sup> Cate' yugu' bönni' na' bila'yönnë' didza' ni ru'ë Pablo, bila'dilë' nisa tu' chita'yéajlë'ë Xanru' Jesús. <sup>6</sup> Cate' guxóa në'ë Pablo légaquië', en ni' rulidzë' Dios, bidisóalenë' Dios Bö' Lá'ayi légaquië', ate' gulu'ë didza' yúbölö, en gulu'ë didza' uláz queë' Dios. <sup>7</sup> Guláquië' bönni' ni idú chínnuë'.

<sup>8</sup> Guzöë' Pablo idú ca tsonna beo' ni', ate' guyázië' lu yu'u ga tu'dubë' bönni' judío, en tu'sëdë' queë' Dios, ate' lu yöl-la' rugu ladxi' benë' libán lógaquië'. Bë'lenë' légaquië' didza', en gú'unnë' ulu'ínë' légaquië' nácatë le rigu'íxjö'ë ca rinná bë'ë Dios. <sup>9</sup> Ní'irö bizídi icja ládxi'do'gaquië' bal-lë', en biti' gula'yéajlë'ë Cristo, ate' gula'nnë' zi'ë que xtídzë'ë Xanru' ga nacuá' bönachi zían na'. Ní'irö Pablo bulá'alenë' légaquië', ate' bubéajë' quez nupa ta'yéajlë' Cristo. Bë'lenë' bönachi ni ta'yéajlë' Cristo didza' yugu' dza ga na' tu'dubë' lu yu'u ga rusédinë' Tiranno bönachi. <sup>10</sup> Caní béntica'së' Pablo idú ca chopa iz, ate' caní guca, bila'yöni yúgu'të bönachi didza' ca naca queë' Xanru' Jesús, bönachi nacu'ë yugu' yödzö luyú Asia, bönachi judío, en bönachi izá'a. <sup>11</sup> Dios benë' yugu' yöl-la' huáca zxön lu në'ë Pablo. <sup>12</sup> Caní guca, bal-lë' bönni' gula'zi'ë yugu' lári'do' béguë'ë icjë' Pablo, en yugu' lari' tsólá'a bugalë' lë'ë, ate' yöjuá'gaquië' léguequi gapa nacuá' nupa te'e, ate' bulu'huóáquië' ca naca yödzöhuë' que queëgaquië', en bulu'rúaj bö' xihui' yú'ugaca bönachi na'.

<sup>13</sup> Ní'irö bal-lë' bönni' judío udá dzaga tu'béajë' bö' xihui' gulë'ënnë' ulu'gunë' dxin Lë' Xanru' Jesús para ulu'béajë' yugu' bö' xihui' yú'ugaca bönachi, ta'nnë':

—Ni'a que Lë' Jesús, Nu na' runë' libán que Pablo, rinná bé'etu' libí'ili' urúajli'.

<sup>14</sup> Caní gulunë' gadxi bönni' zxi'ínë' Esceva, tu bönni' judío náquië' bönni' lo ládjagaquië' bixúz unná bë'. <sup>15</sup> Bubí'i didza' bö' xihui' na', gunná:

—Núnbë'a-në' Jesús, en núnbe'eda' bönni' lë' Pablo, pero libí'ili', ¿núzxité libí'ili'?

<sup>16</sup> Ní'irö guxíti'ë bönni' na' yu'u lë' bö' xihui', yöjenë' légaquië' zi', en bucul-lë' yúgu'të', tu' guzxéqui'rönë' ca légaquië'. Caní guca, xiguídigacasë', en huë'gacatézë' bulu'zxúnnajë' gadxë' bönni' na' lu yu'u ni'. <sup>17</sup> Guzë didza' ca guca lë ni, ate' bila'yöni yúgu'të nupa nacuá' lu yödzö Éfeso, bönachi judío, en bönachi izá'a, ate' yúgu'të' guládxiné' Dios. Que lë ni na' gulunë' zxön Lë' Xanru' Jesús.

18 Lësca' bila'dxinë' zían bönni' ta'yéajlë'ë Cristo, en gula'xóalëpë' dul-la' nabága'gaquië', en gula'guíxjõ'ë le chigulunë'. 19 Lësca' caní gulunë' zían bönni', zí'aló gulunë' yöl-la' udzá'. Dujuá'agaquië' yugu' guichi udzá' quégaquië', ate' bulu'zéguië' léguequi lógaca yúgu'të bönachi. Bulu'labë' tsca nazáca'gaca guichi na', le guca idú chi un mil dumí plata. 20 Caní guca, guzëda' xtídzë'ë Xanru', en bidéli'da' bönachi zían. Idú ládxi'gaquië' gula'yéajlë'ë Cristo.

21 Gudödi gulaca lë ni, benë' queë' Pablo tsejë' Jerusalén, pero zí'aló ral-la' tödë' yugu' yödzö luyú Macedonia, en luyú Acaya, ate' gunnë':

—Tödi tseja' Jerusalén, run bayudxi tseja' ca' Roma.

22 Ní'irö gusöl-lë'ë-bi' chópabi' bi'i bönni' tácalenbi' lë', lëgacabi' Timoteo, en Erasto, luyú Macedonia, pero bugá'anë' lë' nababa dza luyú Asia na'.

*Tu'tsatsa bönachi lu yödzö Éfeso*

23 Bulu'tsatsa bönachi Éfeso dza ni', ate' gula'dá'baguë'ë xtídzë'ë Xanru'. 24 Benë' Demetrio, bönni' gubëdxi guíë plata ga bulu'tsatsë'. Run cazë' yugu' lidxi budó' guiöj budó' yaga néquiguequini plata que dios quégaquië', lënu Diana. Gula'zi'ë bönni' tunë' dxin ni dumí bach. 25 Butubë' Demetrio na' ia'zica'rë' bönni' tunë' la' dxin nisó, ate' gudxë' légaquië':

—Böcha'a, nöz quézili' ca naca dxin runru', runna dumí queëru'. 26 Ril'é'eli', en riyönili' ca runë' Pablo na'. Calëgasö Éfeso ni, pero idú luyú Asia chibidéli'në' bönachi zían, ate' chibutsë'ë ca tunë', tu' rë' légaquië': “Yúgu le núngaca bönachi biti' nácagaca dios.” 27 Calëgasö zoa bönadxi ugá'ana cá'asö dxin ni runru', pero lësca' zoa bönadxi ugá'ana cá'asö yudo' que dios zxön lënu Diana. Caní gaca, ugá'ana cá'asö yöl-la' zxön queënu, dios ni ta'yéaj ládxi'gaca-nu bönachi idütë luyú Asia, enca' idütë yödzölió.

28 Cate' yugu' bönni' na' bila'yönnë' didza' ni, gula'léde'enë', ate' gulu'ë zidzaj didza', ta'nnë':

—Nácatëronu zxön Diana, dios queëru' rë'u, bönachi Éfeso.

29 Caní guca, bulu'tsatsa bönachi idütë lu yödzö na', ate' guláquië' tuz, en carelò yöjáquië' lö'a yúlahui'. Gulá'ayöjë' Gayo, en Aristarco, bönni' Macedonia túngaquië' Pablo tsözxön, ga ni'. 30 Cate' gú'unnë' Pablo tsázië' ga nacué' bönachi zían na', biti' ca' gulu'ë lë' lataj bönni' ta'yéajlë'ë Cristo. 31 Lësca' caní gulunë' bal-lë' bönni' yúlahui' que luyú Asia, bönni' ta'lé'enë' Pablo dxí'a. Gula'sól-lë'ë queë' nupa guláta'yu lahuë' biti' tsazië' lö'a yúlahui' na'. 32 Ga ni' tu'tsatsë', en ta'bödxí'ë, tu le ta'nnë' bal-lë', en ia'tú le ta'nnë' ia'zica'rë', tu' rö'ögacasë' baröli bönni' zían na' tu'tsatsë', en lá'tu'biquí'

yúgu'tëgaquië' biti' nõzguequinë' bizx que na' nudúbigaquië' ni'. <sup>33</sup> Ní'irö yugu' bönni' judío gula'béajë' Alejandro ladaj bönachi zián na', ate' bulu'dxíguë'ë lë' lógaca bönachi zián na'. Bulu'e Alejandro na' len në'ë para ila'bõ' dxisö, tu' gú'unnë' gu'ë didza' le gácalen yugu' bönni' judío na' lógaca yúgu'tëguequi. <sup>34</sup> Cate' guléquibe'enë' náquië' judío, yúgu'të' gulu'ë tsözxõn zidzaj didza' idú ca chopá hora, ta'nnë':

—¡Nácatëronu zxõn Diana, dios queëru' rë'u bönachi Éfeso!

<sup>35</sup> Ní'irö bönni' uzúaj que yúlahui' benë' ga gula'bõ' dxisö bönachi zián na', gunné':

—Bönni' Éfeso, nõzigaca yúgu'të bönachi zoa yudo' queënu Diana, dios zxõn, ni. Rë'u ni, bönachi Éfeso, run chí'iru' yudo' na', enca' budó' na' bõxaj ga zóaru', le birúaj lúzxiba. <sup>36</sup> Cuntu nu gaca tá'baga' lë ni. Que lë ni na' run bayudxi sóali' dxisö, en biti' bi gúntëzili'. <sup>37</sup> Nachë'gacali'-në' bönni' ni, en biti' ta'banë' le dzõ'õ yudo', en biti' ta'nnë xihuë'ë queënu dios queëli'. <sup>38</sup> Que lë ni na', channö zoa didza' bizxaj quëgaquië' Demetrio, en yugu' bönni' gubëdxi guíë plata nacuá'lenë' lë', len nútí'tës bönni', dë lataj ga nu uzë nagui légaquië', en zoa nu uchi'a usörö légaquië'. Ní' huáca ulu'zegui luzá'agaquië' didza' tuë' ia'tué'. <sup>39</sup> Na'a, channö dë ia'tú le inábali', huáca ucá'anaru' tsahui' le cate' ulu'dubi bönni' yúlahui' ca na' rinná bë' yúlahui'. <sup>40</sup> Zoa bönadxi nu uzegui rë'u didza' ni'a que dzatsa ni guca na'a, inná ridá'baga'ru' yúlahui'. Biti' bi gaca innaru' bizx que guca dzatsa ni.

<sup>41</sup> Cate' budxi bë'ë didza' ni, busöl-lë'ë bönachi zián na' nudúbigaca ni' tsõhuõjgaca lídxiguequi.

## 20

### *Sa'yéajë' Pablo luyú Macedonia, en luyú Grecia*

<sup>1</sup> Cate' gurõ'õ dxi dzatsa na' guca lu yödzö Éfeso, bulidzë' Pablo yugu' bönni' ta'yéajlë'ë Cristo, ate' guchízië' icja nágagaquië' didza'. Gudödi ni' bunidë' légaquië', en la' bulá'alentë' légaquië'. Birúajë' ni', ate' sa'yéajë' luyú Macedonia. <sup>2</sup> Gudödë' yugu' yödzö luyú ni', ruzéajni'ide'enë' böchi'ru' nacu'ë ni', ate' gudödi ni' bidxinë' luyú Acaya. <sup>3</sup> Guzóë' Pablo ni' idú ca tsonna beo'. Cate' chizóa cuenë' tu lë'e barco para tsejë' luyú Siria, gúquibe'enë' ta'bõ' nísie' bönni' judío lë' para ila'zönë' lë'. Que lë ni na' buguelë'ë nõza söhuõjë' luyú Macedonia, ate' bidxinë' yödzö Filipos. <sup>4</sup> Sópater, zxí'inë' Pirro, bönni' Berea, en Aristarco, en Segundo, yugu' bönni' Tesalónica, en Gayo, bönni' Derbe, enca' bi'i Timoteo, en Tíquico, en Trófimo, yugu' bönni' Asia, söjácalenë' tsözxõn lë'. <sup>5</sup> Ní'irö yugu' bönni' ni yõjnõrugaquië' lahuë' Pablo, yõjáquië' yödzö Troas, ga ni' gula'bözë' lë'. <sup>6</sup> Lu yödzö Filipos na', neda',

Lucas, yöjtsaga'-në' Pablo. Cate' chigudödi laní cate' tahuë' bönni' judío yöta xtila biti' nazí'i cúa zi que, gurentu' tu lë'e barco, en buzá'atu' Filipos na'. Gudödi gayu' dza budzá'gatu' bönni' ni' yöjnörugaquië' lahuë' Pablo, yöjáquië' Troas, ate' ni' bugá'anatu' gadxi dza.

### *Le benë' Pablo lu yödzö Troas*

<sup>7</sup> Dza risí lo le gadxi dza bulu'dubë' bönni' ta'yéajlë'ë Cristo para ilahuë' yöta xtila le rusá' ládxi'ru' ca gútië' Jesucristo. Ni' rusëdinë' Pablo légaquië', en tu' ral-la' uzë'ë ni' cate' za' rení' dza na', xidzé bë'ë didza', ga bidxintë gudödi guluhuëla. <sup>8</sup> Ga ni' nudúbigaquië' naca lu yu'u xitsá', ate' nacué' zían le ta'gú'u bení' ga na'. <sup>9</sup> Zóabi' bi'i Eutico ni', röö'öbi' ga ra'a lení' que yu'u na', ate' nadödirö yëla lobi' tu' ritunna libán runë' Pablo. Ga ni' röö'öbi' rásibi' bi'i na' naca ga bunny cuía lu yu'u, ate' rásisibi' ca' gubíxitebi', böxjabi' ga bidxintëbi' zcan yu'u. Nátitebi' bulu'lisë'-bi'. <sup>10</sup> Bötjë' Pablo zcan yu'u na', ate' yöjxóë' lëbi', en bunidë'-bi'. Ní'irö gudxë' nupa nacué' ni':

—Biti' gadxi idzöbili'. Nabanbi'.

<sup>11</sup> Cate' chibubenë' Pablo xitsá', gudélë'ë yöta xtila, gu-dahuë'. Ní'irö Pablo bë'lenë' légaquië' didza' ga bidxintë zila balö. Gudödi ni' burúajë' ni'. <sup>12</sup> Bi'i bönni' ra'bán na' gubíxibi', bulu'ché'ë-bi' nabanbi', en bulu'zí' zxöndë'ë.

### *Ca guca bidxintu' Mileto*

<sup>13</sup> Gunörutu' lahuë' Pablo, en yöjchentu' tu lë'e barco, ate' gudöditu' ga bidxintu' yödzö Asón para tsöjtságatu'-në' Pablo ni', para gaca ca na' chibén xtídzatu', tu' gú'unnë' Pablo tsejë' ni' sé'esi ni'ë. <sup>14</sup> Cate' chibudzá'gatu'-në' lu yödzö Asón na', gurénlenë' netu' lë'e barco, ate' guyéajtu' yödzö Mitilene. <sup>15</sup> Buzá' barco ni', ate' dza buropi bidxintu' tödi li ga zoa luyú bidxi nazí'i le Quío, ate' ia'tú dza ca' gudöditu' tödi li ga dë yödzö Samos, en bidxintu' yödzö Trogilio ga ni' guzóatu' tu chi'i. Ia'tú dza ca' bidxintu' yödzö Mileto. <sup>16</sup> Caní bentu' tu' chibenë' queë' Pablo tödisë' yödzö Éfeso, para cabí tsenë' luyú Asia, tu' run bayudxi soë' Jerusalén cate' naca dza Pentecostés channö séqui'në'.

### *Didza' bë'ë Pablo lu yödzö Mileto*

<sup>17</sup> Cate' ni' zoë' Pablo lu yödzö Mileto, gusöl-lë'ë nu yöjlidza bönni' gula tapa chi'ë bönachi queë' Cristo nacué' Éfeso. <sup>18</sup> Cate' bila'dxinë' ga zoë' Pablo, lë' gudxë' légaquië':

—Libí'ili' chinöz quézili' ca béntica'sa' ga zóali' ga gudela' bidxina' luyú Asia. <sup>19</sup> Yugu' dza bena' xichinë' Xanru' lu yöl-la' nöxaj ladxi', ga bidxintë gurödxá' ni'a queë'li', ate' zían le guca quia' le guzxi' bë' neda' ni'a que le ruá' dö' gulunë' quia' bönachi judío biti' ta'yéajlë' Cristo. <sup>20</sup> Béntica'sa' libán ga zóali'

que yúgu'tè le ruzí'ili' xibé, en busédida' libí'ili' yálajdo' ga nudúbili', en gapa naca lu yu'u lídxili'. <sup>21</sup> Bena' ba nalí lógaca bönachi judío, en lógaca bönachi izá'a para ulu'bí'íládxigaca, en ulu'huóaca queë' Dios, en ila'yéajlè' Xanru' Jesucristo. <sup>22</sup> Na'a, Dios Bõ' Lá'ayi chinunè' quia' tseja' Jerusalén, en biti' nözda' bizxi gaca quia' ni'. <sup>23</sup> Yúgu'tè yödzö ga ridá', riguíxjöi'inè' Dios Bõ' Lá'ayi neda', rë' neda' ila'gu'e neda' lidxi guié bönni' judío biti' ta'yéajlè', en ulu'saca' zi'è neda'. <sup>24</sup> Biti' bi runi neda' que lè na' gaca, sal-la' gátia' o cabí gátia', pero ruí'íládxisida' údxi guna' le chigudéla'a runa', para guna' dxin na' budödè' Xanru' Jesús lu na'a, le naca guna' libán que didza' dxi'a ca naca le ruzá' ládxè'è Dios queëru'. Caní guna' len yöl-la' rudzeja.

<sup>25</sup> Na'a, yúgu'tèli' na' chibena' libán loli' ca rinná bè'è Dios, nözda' bíti'rö ulé'eli' neda'. <sup>26</sup> Que lè ni na', le nácatè rea' libí'ili' na'a dza. Biti' nabága'a neda' queëli' nituli' libí'ili'. <sup>27</sup> Biti' bi bucáchi'da' libí'ili', pero gudíxjöi'ida' libí'ili' yúgu'tè le rnnè' Dios. <sup>28</sup> Que lè ni na', guli'gún chí'i cuinli', en guli'gún chí'i yúgu'tè bönachi queë' Cristo, tu' nuzóë' Dios Bõ' Lá'ayi libí'ili' para gácalenli' légaquië', en gun chí'ili' bönachi queë' Xanru', Bönni' na' gútië' uláz quégaquië', bulaljè' xichönè' le böá'uinë' légaquië'. <sup>29</sup> Chinözda', tödi uzá'a ga zóali', ila'yaza nupa ilè'èni ulu'suniti bönachi queë' Cristo ga zóali', ilunè' ca tunba' bö'cu' guí'a sínia', tu'sunítiba' yugu' bö'cu' zxila'. <sup>30</sup> Ila'rúajè' bönni' nútsa'gaquië' ládjali', ate' ilu'è didza' biti' nácatè para ulu'béajè' quégacasè' nupa ta'yéajlè' Cristo nútsa'gaca ládjali'. <sup>31</sup> Que lè ni na', guli'sóa ban ladxi', en guli'tsöjné ca bena' neda' idú ca tsonna iz, rëla, en tè dza buchízia' icja nágali' tu tuli' ga bidxintè gurödxá' queëli'.

<sup>32</sup> Na'a, böchi' luzá'ado', rigu'a libí'ili' lu në'è Dios. Rinábida' Lè' uzá' ládxè'è queëli', en gunè' ca rnna xtídzè'è. Dios gunè' libí'ili' tsutsu, en gunè' ga idéli'li' gunli' tsözxön yugu' bönni' rö queë'. <sup>33</sup> Catu caz guzè ládxa'a le nequi quégaquië' böchi' luzá'a. Biti' guzè ládxa'a dumí, o lari' quégaquië'. <sup>34</sup> Nöz quézili' dxi'a, len na'a caza' bena' dxin para gaca gá'ua' le biyadzaj quia', en quégaca nupa gula'cuá'len neda'. <sup>35</sup> Ca naca yúgu'tè le bena', buluí'ida' libí'ili' caní ral-la' gunru' dxin para gaca gácalenru' nupa bi ta'yadzaj. Ral-la' tsöjneru' didza' bè'è Xanru' Jesús, gunnè': "Uzí'irö xibé nu bi runödzej ca nu bi rizí'."

<sup>36</sup> Cate' budxi bè'è Pablo didza' ni, buzóa zxibè', ate' benè' tsözxön yúgu'tè', bulu'lidzè' Dios. <sup>37</sup> Ní'irö gula'bödxè' yúgu'tè'. Bulu'nidè' yenè' Pablo, en bulu'tsaga lahuè' lè'. <sup>38</sup> Caní gulunè' tu' bulu'huí'innè' ni'a que didza' na' bè'è Pablo, gunnè': "Bíti'rö ulé'eli' neda'." Yöjácalenè' tsözxön lè' ga na' gurenè' lu barco.

## 21

*Sa'yéajë' Pablo Jerusalén*

<sup>1</sup> Gudödi bulá'alentu' légaquië', guyu'utë nöza barco na', ate' lirá guyéajtu' ga zoa luyú bidxi nazí'i le Cos. Dza buropi na', gudöditu' ia'tú lataj nazí'i le Rodas, ate' buzá'atu' ni', en bidxintu' yödzö Pátara. <sup>2</sup> Yöjxáca'tu' tu barco yúbölö ni' le zeaj luyú Fenicia. Gurentu' lë'e barco na', ate' guyu'utë nöza. <sup>3</sup> Gudöditu' ga nalá' Chipre, le guta' tsólá'a yögöla, ate' guyéajtu' luyú Siria, ga ni' guyaza barco na' lu yödzö Tiro, tu' ral-la' tsöjca'ana yua' ni' le dzö'ö lë'e barco na'. <sup>4</sup> Lu yödzö Tiro na' yöjxáca'tu' tu bönni' réajlë'ë Cristo, ate' bugá'analentu' lë', en yugu' böchi'ru' ni' idú gadxi dza. Tu' chibulu'inë' Dios Bö' Lá'ayi légaquië' le ral-la' gaca queë' Pablo, gulë' lë' biti' tsejë' Jerusalén. <sup>5</sup> Cate' chibizá'a dza na', burúajtu' ni', ate' gula'zá'lenë' netu' tsözxón yúgu'të' len nigula que queëgaquië', en yugu' bi'i quégaquië', ga bidxintëtu' ní'ilo ra' yödzö na'. Ra' nísado' ni' buzóa zxíbitu', en bulidztu'-në' Dios. <sup>6</sup> Budxi bunida' luzá'atu' tutu' ia'tutu', bubentu' lë'e barco, ate' légaquië' yöjhuöjgaquië' lídxigaquië'.

<sup>7</sup> Buzá'atë barco na' lu yödzö Tiro, ate' ga yöjsé bidxín lu yödzö Tolemaida. Burúajtu' lë'e barco na' ni'. Bugápatu' Dios böchi'ru' nacu'ë ni', ate' bugá'analentu' légaquië' tu dza. <sup>8</sup> Cate' za' rení' ia'tú dza, burúajë' Pablo ni', ate' dzá'gatu'-në' netu' guyéajtu' yödzö Cesarea. Ni' guyu'utu' lu yu'u lidxë' Felipe, ate' bugá'analentu' lë'. Runë' Felipe na' libán que didza' dxi'a. Bítse'ë gadxë' bönni' ni' bulu'cu'ë dza ni'te para ilácalenë' bönachi queë' Cristo. <sup>9</sup> Nacuá'abi' tapa bi'i nigula ra'bán queë' Felipe na', tu'ibi' didza' uláz queë' Dios. <sup>10</sup> Gudödi gudzetu' chopa tsonna dza ni', ní'irö bidxinë' Agabo ni', bönni' ru'ë didza' uláz queë' Dios, narúajë' luyú Judea. <sup>11</sup> Bönni' ni' buduyúë' netu', ate' gudélë'ë pan le néquini guídi queë' Pablo. Béguë'ë ni'a na' cuinë', en gunné':

—Caní rnnë' Dios Bö' Lá'ayi: “Caní ilunë' bönni' judío nacu'ë Jerusalén. Ilúguië' bönni' ni' nequi queë' pan guídi ni, ate' ulu'dödë' lë' lu ná'agaca bönachi izá'a.”

<sup>12</sup> Cate' biyönitu' didza' ni, gúta'yutu' lahuë' Pablo, netu', en nupa nacua' ni', para cabí tsejë' Jerusalén. <sup>13</sup> Bubi'ë didza' Pablo, gunné':

—¿Bizxi ni runli', ribödxili', en rusuhu'inili' neda'? Neda' chizóa caza' sina', calégasö ilúguië' neda', pero gátia' ca' lu yödzö Jerusalén ni'a queë' Xanru' Jesús.

<sup>14</sup> Tu' cabí guzxéqui'tu'-në' didza', bíti'rö bi gúdxitu'-në', ate' gunnatu':

—Gaca ca raza ládxë'ë Xanru'.

<sup>15</sup> Cate' chigula'dödi dza na', bupa'atu' queëtu', ate' guyéajtu' Jerusalén. <sup>16</sup> Gula'zá'lenë' netu' bal-lë' bönni' ta'yéajlë'ë Cristo, nacu'ë Cesarea, ate' dzáguie' Mnasón, tu bönni' Chipre, légaquie'. Réajlë'ë Cristo dza ni'te, ate' ral-la' tsöjgá'anatu' lidxë' bönni' ni.

*Pablo röjyúë' Jacobo*

<sup>17</sup> Cate' bidxintu' Jerusalén, len yöl-la' rudzeja quégaquie' böchi'ru' ni' ta'yéajlë'ë Cristo gulunë' netu' bal. <sup>18</sup> Dza buropi na' Pablo guyázalenë' netu' lu yu'u, yöjyutu'-në' Jacobo, ate' nudúbigaquie' ni' yúgu'të bönni' gula tapa chi'ë bönachi queë' Cristo nacu'ë Jerusalén. <sup>19</sup> Cate' Pablo chibugapë' légaquie' Dios, busiyönnë' légaquie' yúgu'të le benë' Dios lu në'ë lë' ga nacuá' bönachi izá'a. <sup>20</sup> Cate' bila'yönnë' lë ni, gula'gu'ë Dios yöl-la' ba. Ní'irö gulë' Pablo:

—Nöz quézinu', böchi'tu', cate' xö zían gáyu'ë bönni' judío ta'yéajlë'ë Cristo, ate' yúgu'të' túndë'ë bal xibá queë' Moisés. <sup>21</sup> Chibila'yönnë' yugu' le tu'i didza' bönachi le ta'nnë' quiu', ta'nná rigú'u yöl-lu'u yúgu'të bönni' judío nútsa'gaquie' ladaj bönachi izá'a, para ulu'cá'anë' le gunná bë'ë Moisés, en rinná bé'enu' légaquie' biti' ila'chúguie' lu xpéla'gacabi' bi'i bönni'do' quégaquie', en biti' ilunë' bal yugu' le nalëbiru' runru' rë'u, bönachi judío. <sup>22</sup> ¿Nacxi caz gunru' na'a? Ulu'rúaj bönachi zían cate' ila'yöni chibidxínu' ni. <sup>23</sup> Na'a, ben lë ni rëtu' li'. Nacuá'lenë' netu' ni tapë' bönni', chinazí' lu ná'agaquie' lahuë' Dios tu le ilunë'. <sup>24</sup> Guchë'ë yugu' bönni' ni, en ben légaquie' tsözxön gun dxi'a cuinli' ca naca que yudo', en gudizxaj li' le ral-la' ila'guixjë' para ilún yútusö' ícjagaquie'. Ní'irö ila'nözinë' yúgu'të bönni' judío biti' nácatë lë na' ta'nnë' quiu', pero lëscá' li' runu' le naca dxi'a, en runu' ca rinná bë' xibá queë' Moisés. <sup>25</sup> Ca naca quégaca bönachi izá'a, nupa ni' chita'yéajlë' Cristo, chibén xtídza'tu', en buzúajtu' lu guichi ca ral-la' ilunë'. Biti' run bayudxi ilún chi'ë yugu' lë ni tunë' bönni' judío, pero tuz: Biti' ilahuë' le ta'gú'u bönachi lógaca budó' guiöj budó' yaga. Biti' ilahuë' rön. Biti' ilahuë' xipéla'gacaba' böa' guixi' biti' narúaj-gácaba' rön. Biti' ilunë' le ruá' dö'.

*Ta'zönë' Pablo lö'a yudo'*

<sup>26</sup> Ní'irö Pablo guchë'ë queë' tapë' bönni' na', ate' dza buropi ni' ben dxi'a cuinë' tsözxön len légaquie' ca naca que yudo'. Ní'irö guyázië' lö'a yudo', para gaca bë' bizxi dza údxi ilunë' le tu'ún dxi'a cúngaquie', dza ni' ral-la' tsöjuá'agaquie' le ila'gu'ë lahuë' Dios que queëgaquie'. <sup>27</sup> Cate' chizóa izá'a gadxi dza na', bal-lë' judío narúajgaquie' luyú Asia bila'lé'enë' Pablo, zoë' lö'a yudo'. Gulunë' ga gulún dzatsa bönachi zían, ate' gula'zönë' Pablo. <sup>28</sup> Gulu'ë zidzaj didza', ta'nnë':

—¿Guli'gácalen netu', bönni' Israel! Bönni' ni rusédinë' yúgu'të bönachi yúgu'të lataj ulu'cá'ana cá'asö yödzo queëru', en xibá queë' Moisés, en yudo' queëru' ni. Na'a, chigulu'ë yugu' bönni' izá'a lu yudo' ni. Caní runë', run dítjanë' lataj lá'ayi ni.

<sup>29</sup> Caní gula'nnë' tu' bila'lé'enë' Pablo zí'alö lu yödzo dzáguie' Trófimo, bönni' Éfeso, en téquinë' gulu'ë bönni' ni lu yudo'.

<sup>30</sup> Caní guca, bulu'dubi yúgu'të bönachi yödzo, ate' bila'guirë' ni'. Ní'irö gula'zönë' Pablo, en gulá'ayöjë' lë', bulu'béajë' lë' lö'a yudo', ate' la' bulu'sáyjatë' ga nu riyaza lö'a yudo' na'.

<sup>31</sup> Cate' chitequi quézinë' ilútië' Pablo, bidxín didza' lahuë' bönni' lo rinná bé'enë' bönni' rójáquië' gudil-la. Biyönnë' tun dzatsa yúgu'të bönachi Jerusalén. <sup>32</sup> Bönni' lo ni la' butúbitë' bönni' rójáquië' gudil-la, len bönni' ta'nná bé'enë' légaquië', ate' carelö guyéajlenë' légaquië' ga na' tun dzatsa bönachi na'. Cate' bila'lé'e bönachi ni' bönni' lo na' rinná bé'enë' bönni' rójáquië' gudil-la, en bönni' na' rójáquië' gudil-la, bulu'sané' ta'guinë' Pablo. <sup>33</sup> Ní'irö gubígui'ë bönni' lo na', en guzxönë' Pablo, ate' gunná bé'enë' bönni' rójáquië' gudil-la ilúguië' lë' len chopa du guie'. Gudödi ni' gunábinë' bönachi zían ni', rnnë':

—¿Nuzxi caz bönni' ni, en bizxi benë'?

<sup>34</sup> Ta'bödxi'a bönachi zían na', que queëgaca ca ta'nná. Caní guca, bití' bi guca tséajni'inë' bönni' lo na', tu' tu'tsatsa bönachi na', ate' gunná bé'enë' bönni' rójáquië' gudil-la ila'ché'ë Pablo lu yu'u zxön ga nagá'anagaquië' bönni' na' rójáquië' gudil-la. <sup>35</sup> Cate' bila'dxinë' ga naca ni'yëpi' que yu'u zxön na', bönni' na' rójáquië' gudil-la gulu'ínë' Pablo, tu' dxíadi'igaca bönachi zían légaquië', <sup>36</sup> en zá'gaca cúdzu'lögaquië', ta'bödxi'a, ta'nná:  
—Guli'gútië'.

*Didza' bë'ë Pablo uláz queë' lógaca bönachi*

<sup>37</sup> Cate' ni' gula'sí lógaquië' ila'gu'ë Pablo lu yu'u zxön ni', lë' gudxë' bönni' lo na' rinná bé'enë' bönni' rójáquië' gudil-la, gunné':

—¿Naru' gunnu' neda' lataj guía' li' tu didza'?

Bönni' lo na' gudxë' Pablo:

—¿Rácatso' didza' griego? <sup>38</sup> ¿Naru' calëga li' bönni' Egipto na' dza lahui nisö butubë' yugu' bönni' gula'dá'baguë'ë yúlahui', ate' guchë'ë idú choá' gáyu'ë bönni' huëti bönachi lu lataj cá'asö?

<sup>39</sup> Ní'irö Pablo gudxë' lë', gunné':

—Le nácatë naca' neda' bönni' judío. Gulja' Tarso, tu yödzo lo luyú Cilicia. Ráta'yua' lo' gunnu' neda' lataj gu'a didza' lógaca bönachi ni.

<sup>40</sup> Bönni' lo na' bë'ë lë' lataj, ate' guzuínë' Pablo ga naca ni'yëpi', en guchisa në'ë para ila'cuá' dxisö bönachi zían ni'.



Cate' chigula'cu'ë dxisö, Pablo bë'lenë' légaquië' didza' lu didza' hebreo.

## 22

<sup>1</sup> Canígunnë' Pablo:

—Libí'ili', bönni' gula, en libí'ili' böcha'a. Buli'zë nágali' le guía' libí'ili' ca naca le runa'.

<sup>2</sup> Cate' bila'yönnë' ru'ë didza' hebreo, gula'cuá'arë' dxisö. Pablo gudxë' légaquië', rnnë':

<sup>3</sup> —Naca caza' neda' bönni' judío. Gulja' lu yödzö Tarso luyú Cilicia, pero guxzöna' lu yödzö ni, ate' busédinë' Gamaliel neda' idú ca naca xibá quégaquië' xuz xtó'oru'. Bë'tica'sö ládxa'a guyéaj ládxa'a Dios ca runli' libí'ili' na'a. <sup>4</sup> Zí'alö gudxia ládxi'gaca'-në' bönni' nazí' lu ná'agaquië' xtídzë'ë Cristo, en guchë'gaca'-në' ga ilátie'. Guxzöngaca'-në', en gulú'ugaca'-në' lidxi guíë, yugu' bönni', en nigula. <sup>5</sup> Lësca' huáca ilunë' ba nalí yugu' bixúz unná bë', en yugu' bönni' gula tu'zéajni'inë' que le gulunë'. Gulunë' guichi unná bë' le yöju'a ga nacu'ë böchi'ru' judío lu yödzö Damasco. Guyija' ni' para tsöjxöngaca' nupa ni' ta'yéajlë' Cristo, para idichë'gaca'-në' nága'gaquië' Jerusalén ni, para ilácagaquië' xíguia'.

*Rigúxjö'ë Pablo ca böáquië' queë' Cristo*

<sup>6</sup> Ní'irö gunnë' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagubidza, tsárido'os guyëpi yösa bení' le za' lúzxiba, le buzení' ga na' sa'yéaja'. <sup>7</sup> La' yöjöta'tea' lu yu, en biyönda' chi'i Nu gudxi neda': "Saulo, Saulo, ¿bizx que ribía ládxi'u neda'?"

<sup>8</sup> Ní'irö gunábida' lë', gunnía': "¿Nuzxi li', Xan?" Lë' gudxë' neda': "Neda' ni Jesús, bönni' Nazaret. Neda' caz ribía ládxi'u."

<sup>9</sup> Nupa ni' gula'cuá'len neda' bila'lé'e caz bení' na', en guladxi, pero biti' bila'yöni chi'i Nu na' bulidza neda'. <sup>10</sup> Ní'irö gudxa'-në': "¿Nacxi guna', Xan?" Xanru' gudxë' neda': "Guyasa, en guyéaj Damasco. Zoë' ni' tu bönni' guíë' li' ca naca yúgu'të le ral-la' gunu'." <sup>11</sup> Tu' cabirö rilé'eda' tu' budí'i yösa bení' na' guyëpida' lahua', que lë ni na' yugu' bönni' dzágagaquië' neda' gula'guélë'ë na'a, ate' gula'ché'ë neda' ga bidxíntea' Damasco.

<sup>12</sup> Zoë' Ananías ni', tu bönni' runë' idútë ca rinná bë' xibá queë' Dios, ate' yugu' bönni' judío nacu'ë Damasco tunë' lë' bal. <sup>13</sup> Bidxinë' Ananías na' ga zoa', en gudxë' neda': "Saulo, böcha'a, huöálaj guiöj lo'." La' ní'sö böálaj guiöj lahua', ate' bilé'eda' lë'. <sup>14</sup> Lë' gudxë' neda': "Dios quégaquië' xuz xtó'oru', dza ni'te gurö cazë' li' para inözinu' le ré'ëni quézinë' Lë', en ilé'enu'-në' Bönni' Tsahui', Lë' cazë' Zxí'inë', en yönnu' le guíë' Lë' cazë' li'. <sup>15</sup> Caní'gaca, tu' ral-la' gunu' ba nalí queë' Lë' lógaca yúgu'të bönachi, usiyönnu' légaquië' ca naca le chibilé'enu',

en le chibiyöninu'. <sup>16</sup> Na'a, ¿bizx que ridzenu'? ¡Guyasa, en bidila nisa! Bulidzë' Xanru' para únë' li' dxi'a, en ugúë' dul-la' nabágu'u."

*Cristo gusöl-lë'ë Pablo para gunë' libán lógaca bönachi izá'a*

<sup>17</sup> Gunnë' ca' Pablo:

—Gudödi ni', cate' budxina' Jerusalén, en tsanni ni' rulidza-në' Dios lu chila yudo', bilé'eda' tu le naca ca tu lu yëla bëchigal. <sup>18</sup> Bilé'eda'-në' Xanru', ate' gudxë' neda': "¡Guyéaj careló! ¡Burúajtë Jerusalén ni, tu' cabí ilunë' bal bönni' ni le gunu' ba nalí quia!" <sup>19</sup> Neda' gudxa'-në': "Xan, nözgaca quézinë' ca bena' neda'. Guyázia' gapa naca lu yu'u ga tu'dubë' tu'sëdë' bönni' judío queë' Dios. Gudina' nupa ni' ta'yéajlë' Li', en gulú'ugaca'-në' lidxi guíë. <sup>20</sup> Cate' ni' gulútië' Esteban, bönni' ni' benë' ba nalí quiu', lësca' zoa' neda' ni', en bena' tuz yugu' bönni' gulútië' lë' tu' ben chi'a lari' nácugaquië' bönni' na' bulu'ladxë' lë' guiöj." <sup>21</sup> Ní'irö Xanru' gudxë' neda': "Guyéaj, tu' risöl-la'a li' lógaca bönachi izá'a."

*Pablo ru'ilenë' bönni' lo didza', bönni' rinná bé'enë' bönni' röjáquië' gudil-la*

<sup>22</sup> Nisö ze lo yugu' bönni' judío bulu'zë nágagaquië' didza' bë'ë Pablo, ate' ní'irö gula'bödxi'ë. Gulu'ë zidzaj didza', ta'nnë':

—¡Guli'gútië' bönni' ni! ¡Bíti'rö ral-la' soë' ibanë'!

<sup>23</sup> Ní'irö tu' ta'bödxi'ë, en ta'chözë' le nácugaquië' lu yöl-la' rilé quégaquië', en tu'chejë' bëchtö yu lu bö'ös, <sup>24</sup> bönni' lo na' rinná bé'enë' bönni' röjáquië' gudil-la gunná bë'ë ulu'gu'ë Pablo lu yu'u zxön na'. Lësca' gunná bé'enë' légaquië' ila'guinë' Pablo para quíxjö'ë le nácaté, para ila'nözinë' bizx que na' ta'bödxi'ë bönni' judío caní queë' Pablo. <sup>25</sup> Cate' gulúgui'ë lë' du guídi para ila'guinë' lë', Pablo gudxë' tu bönni' nacu'ë lu në'ë bönni' röjáquië' gudil-la zoë' ni', rnnë':

—¿Naru' dë lataj quínili' neda'? Nababa' Roma, ate' cuntu nu buchí'a busörö neda' channö nabága'a xíguia'.

<sup>26</sup> Cate' bönni' na' biyönnë' lë ni, guyijë' yöjtíxjöi'inë' bönni' lo na' rinná bé'enë' bönni' röjáquië' gudil-la. Rë' lë':

—¿Bizxi caz ni runru'? ¡Bönni' ni nababë' Roma!

<sup>27</sup> Ní'irö bidë' bönni' lo na' ga zoë' Pablo, en gudxë' lë':

—¡Gudixjö'! ¿Naru' nababu' li' Roma?

Pablo gudxë' lë':

—Ön, nababa'.

<sup>28</sup> Bubi'ë didza' bönni' lo na', gunné':

—Neda' ni, dumí zían gudizxja' para ibaba' Roma.

Ní'irö Pablo gudxë' lë':

—Neda' gubaba' Roma cate' ni' gulja' tu' nabábagaquië' xuz xiná'a Roma.

29 Cate' bönni' na' chizóa ila'guinë' lë' bila'yönnë' lë ni, la' bulu'bíga'të' ga zoë' Pablo. Lësca' gúdxinë' bönni' lo na' cate' gunözinë' nababë' Pablo Roma, tu' chigunná bë'ë ilúguië' lë'.

*Ridxinë' Pablo lógaquië' bönni' yudo' tu'chi'a tu'söröë'*

30 Dza buropi ni', gú'unnë' bönni' lo na' inözinë' gazxi ga rë' bizxi na' yugu' bönni' judío tu'zéguië' Pablo didza'. Gunná bë'ë bulu'sedxë' du guíë na' náguë'ë Pablo, ate' gunná bë'ë ulu'dubë' bixúz unná bë' judío, en yúgu'të bönni' yudo' tu'chi'a tu'söröë'. Ní'irö bubéajë' Pablo ga na' nagú'ugaquië' lë', ate' buzöë' lë' lógaquië'.

## 23

1 Ní'irö buyúdë'ë Pablo lógaquië' bönni' yudo' tu'chi'a tu'söröë' na', en gunné':

—Libí'ili', böcha'a. Ga ridxintë na'a riböza' dxí'ado'. Caní naca, bití' zoa le ruxösa ládxi'da'ahua' neda' lahuë' Dios.

2 Ní'irö Ananías, bixúz lo, gunná bé'enë' nupa nacuá' cuita lë'ë Pablo ila'gápë'ë ru'ë. <sup>3</sup> Pablo gudxë' lë':

—Lëzca' caní Dios ubi'ë quiu', li', rulu'isö tsahui' cuinu'. ¿Naru' rö'ö cazu' ruchí'a rusöröu' neda' ca rinná bë' xibá, pero ridödi bë'tso' ca rinná bë' xibá na', na' rinná bé'enu' ila'gápë'ë neda'?

<sup>4</sup> Nupa nacuá' ni' të Pablo:

—¿Naru' rulidza zi'tso'-në' bixúz lo queë' Dios?

<sup>5</sup> Pablo gudxë' légaquië':

—Libí'ili', böcha'a. Nazúaj lu guichi, rnna: “Bití' ulidza zi'u nu rinná be'e bönachi uládz quiu'”, pero neda' bití' gúquibe'eda' náquië' bixúz lo.

6 Ní'irö gúquibe'enë' Pablo bal-lë' nácagaquië' bönni' yudo' saduceo, ate' ia'bal-lë' bönni' yudo' fariseo. Ní'irö bë'ë zidzaj didza' lógaquië' bönni' yudo' tu'chi'a tu'söröë' na', gunné':

—¡Libí'ili', böcha'a! ¡Naca' bönni' fariseo, en naca' zxi'inë' tu bönni' fariseo! ¡Na'a ruchí'a rusöröli' neda' tu' runa' löza ulu'bán nupa chinátigaca!

7 Cate' bë'ë Pablo didza' ni, bila'rúajë' choplö yugu' bönni' yudo' fariseo, en yugu' bönni' yudo' saduceo, ate' gula'dil-la dídze'ë la' légacasë'. <sup>8</sup> Caní gulunë' tu' ta'nnë' bönni' saduceo na' bití' ulu'bán nupa chinátigaca, en bití' nacu'ë gubáz lá'ayi, en bití' nacuá' bö' nácagaca caz bönachi, pero ta'yéajlë'ë bönni' yudo' fariseo nácagaca yúgu'të lë ni. <sup>9</sup> Que lë ni na' gula'bödxi'ë. Ní'irö gula'yasë' bönni' nazëdagaquië' xibá queë' Dios, yugu' bönni' yudo' fariseo, en gula'dil-la dídze'ë, ta'nnë':

—Rusáca'tu' queëtu' bití' bi dö' nu'ë bönni' ni. Channö tu bö' naca caz bönachi bé'len lë' didza', o channö tu gubáz lá'ayi queë' Dios bé'lenë' lë' didza', bití' ral-la' tá'baga'ru'-në' Dios.

<sup>10</sup> Cate' chita'díl-lada' dídzě'ě bönni' judío na', gúdxině' bönni' lo na' rinná bé'eně' bönni' rójáquiě' gudil-la, tu' réquině' ulu'zxuzxaj ulu'quínnajě' Pablo. Ní'irö gunná bé'eně' bönni' rójáquiě' gudil-la tsöjléajgaquiě' Pablo ladaj bönni' judío na', en ulu'chě'ě lě' lu yu'u zxön ga na' nagá'anagaquiě' bönni' na' rójáquiě' gudil-la.

<sup>11</sup> Cate' chinaca chi'i dzö'ölö la' dza ná'asö, buluf'i lahuě' Xanru' ga zoě' Pablo, en gudxě' lě':

—Butipa ládXu'u, Pablo. Ca na' chibenu' ba nalí quia' Jerusalén ni, lěsca' run bayudxi gunu' ba nalí quia' lu yödzö Roma.

*Tun xtídza'gaquiě' ilútiě' Pablo*

<sup>12</sup> Cate' za' rení' ia'tú dza, gulún xtídza'gaquiě' bal-lě' bönni' judío, en gulún tsutsu xtídza'gaquiě', ta'nně' guně' Dios légaquiě' xíguia' channö cabí iluně' lě na' gulún xtídza'gaquiě', gula'nně' bití' ca' ilě'aj ilahuě' ga idxinrö chigulútiě' Pablo. <sup>13</sup> Nayanrö ca choá'gaquiě' bönni' na' gulún tsutsu xtídza'gaquiě' caní. <sup>14</sup> Yöjáquiě' bönni' ni ga nacu'ě yugu' bixúz unná bě', en bönni' gula tu'zėjni'ině' bönachi judío, ate' gula'nně':

—Chiben tsutsu xtídza'tu', gunnatu' guně' Dios netu' xíguia' channö cabí guntu' caní. Bití' guí'aj gágutu' ga gútirötu'-ně' Pablo. <sup>15</sup> Na'a, libí'ili', en bönni' yudo' tu'chi'a tu'söröě', guli'guíě' bönni' lo rinná bé'eně' bönni' rójáquiě' gudil-la idichě'ě Pablo cuxö para idxině' ga nudúbili', innali' rě'ënili' inábili'-ně' Pablo tu didza' gate ga rě'. Netu' cö'ö nistu'-ně' la' nöza, ate' gútitu'-ně' zí'alö ca idxině' ni.

<sup>16</sup> Biyönibi' bi'i bönni' queěnu nigula zaně' Pablo ca na' ila'bö' nísie' Pablo, ate' guyéajbi', en guyú'ubi' yu'u zxön na', ate' yöjtíxjöi'ibi'-ně' Pablo. <sup>17</sup> Pablo bulidzě' tuě' bönni' nacu'ě lu ně'ě bönni' rójáquiě' gudil-la en gudxě' lě':

—Guchě'ě-bi' bi'i ni lahuě' bönni' lo, tu' nuá'abi' didza' guiěbi'-ně'.

<sup>18</sup> Ní'irö bönni' na' gudélé'ě-bi', en guchě'ě-bi' ga na' zoě' bönni' lo na', ate' gudxě' lě':

—Bulídzě' Pablo, bönni' na' yu'ě lidxi guíě, neda', en gúta'yuě' lahua' idigu'a-bi' bi'i ni lo', tu' rě'ënibi' gú'ílenbi' lí' didza'.

<sup>19</sup> Bönni' lo na' gudélé'ě ná'abi', en guchě'ě-bi' quez, ate' gunábině'-bi', rnně':

—¿Bizxi na' ral-la' guío' neda'?

<sup>20</sup> Lěbi' gúdxibi'-ně':

—Chinúngaquiě' didza' bönni' judío iláta'yuě' lo' ichě'u-ně' Pablo cuxö, para idxině' lógaquiě' bönni' yudo' tu'chi'a tu'söröě'. Ilě' lí' tě'ënně' ila'nábině' lě' tu didza' gate ga rě', <sup>21</sup> pero bití' tséajlě'u le ila'nně' tu' nadödi choá'gaquiě' ila'bö'

nísië' Pablo. Chigulún tsutsu xtídzë'ë gula'nnë' gunë' Dios légaquië' xíguia' channö cabí ilútië' lë'. Bití' bi ilë'aj ilahuë' ga idxinrö ilútië' lë'. Chizóagaquië' ta'bözë' si' lu no'o gunu' le ila'nábinë' li'.

<sup>22</sup> Ní'irö bönni' lo na' rinná bé'enë' bönni' röjáquië' gudil-la gunná bé'enë'-bi' cuntu nu guiëbi' lë na' chigúdxibi' lë', ate' ní'irö busöl-lë'ë-bi' bi'i ni.

*Ridxinë' Pablo lahuë' Félix, bönni' rinná bë'ë luyú na'*

<sup>23</sup> Ní'irö bönni' lo na' bulidzë' chopë' bönni' nacu'ë tu gáyu'ë bönni' röjáquië' gudil-la lu ná'agaquië' tu tuë', ate' gunná bé'enë' légaquië' ulu'cözë' chopa gáyu'ë bönni' röjáquië' gudil-la ta'zë'e ní'agaquië', en tsónnalalaj yu' chië' bönni' röjáquië' gudil-la dxíagaquië' böa', en chopa gáyu'ë bönni' röjáquië' gudil-la ilu'ë yaga tuchi' para tsöjáquië' yödzo Cesarea idú ridödi xtsö'. <sup>24</sup> Lësca' gunná bé'enë' légaquië' ulu'cözë'-ba' tu böa' cuië'-ba' Pablo, ate' ila'chë'ë lë' dxí'ado', cabí bi gaca queë', para idxinë' lahuë' Félix, bönni' lo rinná bë'ë uláz que Roma.

<sup>25</sup> Gusöl-lë'ë ca' tu guichi le rnna caní:

<sup>26</sup> "Neda', Claudio Lisias, ruzúaja' quiu' lu guichi, bönni' lo unná bë', Félix. Rugapa' Dios li'.

<sup>27</sup> 'Bönni' ni risöl-la'a-në' quiu', gula'zönë' bönni' judío lë', en gulë'ënnë' ilútië' lë'. Cate' gúquibe'eda' nababë' Roma, guchë'gaca'-në' bönni' röjáquië' gudil-la, en busölá'-në' lu ná'agaquië' judío na'. <sup>28</sup> Gú'unida' inözda' bizxi benë', lë na' tu'zéguië' lë' didza' bönni' judío, ate' guchë'a-në' lógaquië' bönni' yudo' tu'chi'a tu'söröë' légaquië'. <sup>29</sup> Cate' buédxi didza', gunözda' tu'zéguië' lë' didza' ca naca le rinná bë' xibá quégaquië', en bití' bi nabáguë'ë bönni' ni para nu guti lë', o nu cu'u lë' lidxi guíë. <sup>30</sup> Ní'irö cate' bidxín nu gudíxjöi'i neda' ta'bö' nísie' yugu' bönni' judío lë', la' gusöl-la'tea' lë' ga zu', ate' gunná bé'egacada'-në' bönni' ni tu'zéguië' lë' didza' ila'dxinë' lo' li', para ila'guíxjöi'inë' li' bi didza' nápagaquië' lë'. ¡Dios gun tsáhuë'ë li'!"

<sup>31</sup> Ní'irö bönni' na' röjáquië' gudil-la gula'guélë'ë Pablo, en gulunë' ca na' chigunná bé'enë' légaquië', ate' gula'chë'ë lë' yödzo Antípatris, ni' naca chi'i dzö'ölö. <sup>32</sup> Cate' za' rení' ia'tú dza bönni' röjáquië' gudil-la ta'zë'e ní'agaquië' yöjhuöjgaquië' Jerusalén, ate' bönni' röjáquië' gudil-la dxíagaquië' böa' bulu'ú'ë nöza, dzágagaquië' Pablo. <sup>33</sup> Cate' bönni' na' röjáquië' gudil-la nachë'gaquië' Pablo bila'dxinë' Cesarea, bulu'nödzejë' guichi na' lu në'ë bönni' rinná bë'ë uláz que Roma, en bulu'sudxinë' Pablo lahuë'. <sup>34</sup> Gudödi bulabë' bönni' unná bë' guichi na', gunábinë' Pablo gazxi bönni' lë'. Cate' gúquibe'enë' nababë' luyú Cilicia, <sup>35</sup> gudxë' lë':

—Yönida' le innó' cate' ila'dxín ni nupa tu'zegui li' didza'.

Ní'irö gunná bé'enë' ilún chi'ë lë' lu yu'u yúlahui' ga ribö'ë Herodes, bönni' rinná bë'ë, para uchi'a usöröë' bönachi.

## 24

*Pablo ru'ë didza' uláz queë' lahuë' Félix*

<sup>1</sup> Cate' chibizá'a gayu' dza, bidxinë' Ananías, bixúz lo, ni', ate' dzágagaquië' lë' bal-lë' bönni' gula tu'zëajni'inë', en Tértulo, tu bönni' nazé'ede'enë' didza'. Bila'dxinë' lahuë' bönni' unná bë', ate' gula'nnë' queë' Pablo. <sup>2</sup> Cate' chibulu'lidzë' Pablo, ate' bidxinë' ni', gusí lahuë' Tértulo ruzégui'ë lë' didza', rnnë':

—Bönni' lo unná bë', Félix. Ní'a quiu' li' ruzi'tu' xibé le run tsahui' netu', ate' lu yöl-la' réajni'i quiu' rinná bé'enu' dxi'a bönachi uládz queëtu'. <sup>3</sup> Yúgu'të lë' ni ruzi'tica'stu' xibé gátitës, ate' idú ládxi'tu' rëtu' li': "Xclenu'." <sup>4</sup> Na'a, para cabí upíxjarötu' li', ráta'yua' lo' gun zxön ládxi'u, yönnu' tu le do' guiëtu' li'. <sup>5</sup> Gúquibe'etu' bönni' ni rigú'u yöl-lë'ë bönachi, en runë' ga ta'dá'baguë'ë yúlahui' yugu' bönni' judío nacu'ë idútë yödzölió, en náquië' bönni' lo quégaquië' bönni' dá'gaquië' bönni' Nazaret na'. <sup>6</sup> Lësca' gú'unnë' gun dítjanë' yudo' queëtu'. Que lë' ni na' guzxöntu'-në', en gú'unitu' uchi'a usörötu' lë' ca naca xibá queëtu'. <sup>7</sup> Ní'irö Lisias, bönni' lo rinná bé'enë' bönni' rójáquië' gudil-la bidxinë' ga zóatu', en lu yöl-la' sínia' zxön bugúë' bönni' ni lu na'tu'. <sup>8</sup> Ní'irö gunná bé'enë' Lisias na' ídigaca nupa tu'zegui lë' didza' lo' li'. Na'a, li' caz, cate' rinabi yúdxinu'-në' Pablo ni, huáca inözinu' gate ga rë' yúgu'të lë' ni ruzéguitu' lë' didza'.

<sup>9</sup> Lësca' caní gula'nnë' yugu' bönni' judío ni', gula'nnë' naca caz caní. <sup>10</sup> Ní'irö butásö në'ë bönni' rinná bë'ë uláz que Roma na' para gu'ë didza' Pablo, ate' lë' bubí'ë didza', gunné':

—Idú ládxa'a quíxjö'a ca naca le runa', tu' chinaca zían iz ruchi'a rusöröu' le raca quégaca bönachi ladztu'. <sup>11</sup> Le bena' huáca inabu'. Biti' réquini chinnu dza bidxina' Jerusalén para tseaj ládxa'a-në' Dios. <sup>12</sup> Biti' yöjxáca'gaquië' neda' nu ridíl-lalena' didza', en bití' bena' ga ulu'tsatsa bönachi ga naca chila yudo', en cabí lu yu'u ga tu'dubë' tu'sëdë' queë' Dios, en cabí lu yödzö. <sup>13</sup> Biti' ca' gaca ulu'bëaj lië' yugu' lë' ni tu'zéguië' neda' didza'. <sup>14</sup> Lë' ni rixóalëpa' lo'. Ca runa' xichinë' Dios quégaquië' xuz xtó'otu' nalëbi ca le tu'sëdinë' légaquië', pero bönni' judío ni tu'ë le: Le ridá'baga' Dios, tu' réajlë'a yúgu'të le rinná bë' xibá queë' Dios, enca' yúgu'të le bulu'zúajë' bönni' gulu'ë didza' uláz queë' Dios. <sup>15</sup> Ca na' légaquië' tunë' löza Dios, lësca' neda' runa' löza Dios, usubanë' nupa chinátigaca, bönachi tsahui', en bönachi bití' nácagaca tsahui'. <sup>16</sup> Que lë' ni na' ru'í' ládxi'tica'sa' cabí íbága'a le gun ga uxös ládxi'da'ahua' neda' lahuë' Dios o lógaca bönachi.

17 'Gudödi zoa' ga yúbölö idú chopa tsonna iz, budxina' ga nacuá' bönachi uládz quia' para unödza' dumí le gácalen bönachi yechi', en unödza' le rigu'a lahuë' Dios. 18 Tsanni ni' runa' caní, bal-lë' bönni' judío narúajgaquië' luyú Asia bidixáca'gaquië' neda'. Ni' zoa' lö'a yudo', nubéaj dxi'a cuina' ca naca que yudo', en cabí nutuba' bönachi zián, en cabí nuna' ga ulu'tsatsa bönachi. 19 Yugu' bönni' judío ni' ral-la' ila'dxinë' lo' li', en ulu'zéguië' neda' didza' channö nápagaquië' neda' didza'. 20 Ila'nnátsöquië' bönni' judío ni channö bulu'dzölinë' bi le cabí naca dxi'a bena' cate' ni' bidxina' lógaquië' bönni' yudo' tu'chi'a tu'söröë' légaquië'. 21 Tuz cate' ni' zoa' lógaquië', bë'a zidzaj didza', gunniá': "Ruchi'a rusöröli' neda' na'a tu' runa' löza ulu'bán nupa chinátigaca."

22 Cate' biyönnë' Félix didza' ni, en dxí'ado' chinözinë' ca naca que lë na' rusëdinë' Pablo, buzë lähui'së' ca' didza' bizxaj ni, gunnë':

—Cati' idxinë' Lisias, bönni' lo rinná bé'enë' bönni' rójáquië' gudil-la, údxi yönida' ca naca didza' bizxaj queéli'.

23 Ní'irö Félix gunná bé'enë' tu bönni' nacu'ë lu në'ë bönni' rójáquië' gudil-la zoë' ni', gun chi'ë Pablo, pero gu'ë lë' lataj tē' lö'a, en biti' uzáguë'ë xinözgaquië' böchi' luzë'ë duyúgaquië' lë' bi dxin ilunë' queë'.

24 Chopa tsonna dza gudzé, bidë' leyúbölö Félix na'. Drusila, nigula queë' dzáganu lë'. Nácanu nigula judío. Félix bulidzë' Pablo, ate' buzë náguie' xtídzë'ë ca naca le réajlë'ëru' Jesucristo. 25 Cate' bë'ë didza' Pablo ca ral-la' gácaru' tsahui', en inná be'e cuinru', ate' idxinru' ga uchi'a usöröë' Dios rë'u dza si' za', ní'irö gudxi bidzöbinë' Félix, en gudxë' Pablo:

—Guyéaj na'a. Cate' gapa' lataj ulidza' li'.

26 Lësca' gú'unnë' Félix si'ë dumí le unödzejë' Pablo lë' para usanë' lë', ate' que lë ni na', zián luzuí bulidzë' Pablo, en bë'lenë' lë' didza'. 27 Cate' bizá'a chopa iz guyázië' Porcio Festo xilatjë' Félix, ate' tu' gú'unnë' Félix gunë' le tsaza ládxi'gaquië' bönni' judío, bucá'anë' Pablo nadzunë' lidxi guie'.

## 25

### *Ridxinë' Pablo lahuë' Festo, bönni' unná bë'*

1 Bidxinë' Festo yödzo Cesarea para tsázië' xilatjë', gáquië' bönni' unná bë' ulaz que Roma. Cate' bizá'a tsonna dza buzë'ë yödzo na', sa'yéajë' Jerusalén. 2 Cate' bidxinë' Festo ni' yugu' bixúz unná bë', en yugu' bönni' lo quégaca bönachi judío bila'dxinë' lahuë' para ila'nnë' queë' Pablo, ate' guláta'yuë' lahuë' Festo 3 bi uzá' ládxe'ë quégaquië', isól-lë'ë nupa tsöjxí'gaca Pablo, para udxinë' Jerusalén. Gulë'ënnë' ila'bö'

nísië' lë' la' nöza para ilútië' lë'. <sup>4</sup> Bubi'ë didza' Festo, gudxë' légaquië':

—Lu yödzo Cesarea nadzunë' Pablo, ate' ral-la' tseja' ni' cuxö huidzaj nisö. <sup>5</sup> Que lë ni na', núti'tësölöli' dë lu ná'ali', ral-la' sá'lenli' neda', en channö nabáguë'ë bönni' ni' xíguia', huáca uzéguili'-në' didza' ni'.

<sup>6</sup> Gudzenë' Festo Jerusalén idú ca xunu' gubidza, ate' ní'irö böajë' Cesarea. Cate' guzá' reni' ia'tú dza gurö'ë ga ruchi'a rusöröë', en gunná bé'enë' nupa tsöjxi'gaca Pablo. <sup>7</sup> Cate' chibidxinë' Pablo ni', yugu' bönni' judío narúajgaquië' Jerusalén gula'gu'ë lë' lë'alö, en zían le gula'nnë' queë'. Bulu'zéguië' lë' le tu'subáguë'ë lë' xíguia', pero biti' guca ulu'béaj lië' yugu' lë na' gula'nnë' queë'. <sup>8</sup> Ní'irö bë'ë didza' Pablo uláz queë', gunné':

—Biti' bi le ruá' dö' bena' que xibá quégaquië' bönni' judío, en cabí que yudo' quégaquië', en cabí queë' César, bönni' Roma, rinná bé'enë' rë'u.

<sup>9</sup> Gú'unnë' Festo gunë' le ila'yaza ládxi'gaquië' bönni' judío, ate' bubí'ë didza', gudxë' Pablo:

—¿Rë'ënu' so'ö Jerusalén, ga na' soa nu uchi'a usörö li' ca nácgaca lë ni ta'nnë' quiu'?

<sup>10</sup> Bubi'ë didza' Pablo, gudxë' lë':

—Zoa caza' ga rö'ö nu ruchi'a rusörö uláz queë' César, ga na' ral-la' uchi'a usörö'u neda'. Biti' bi huiá' dö' nuna' quégaquië' bönni' judío, ate' chinöz quézinu' lë ni. <sup>11</sup> La'tu' nuna' tu le ruá' dö', o bíti'tës le run ga íbága'a xíguia' gátia', biti' tá'baga'a gátia'. Na'a, channö cabí nuna' ca ta'nnë' quia' bönni' ni, cuntu caz nu dë lu në'e udödi neda' lu ná'agaquië'. Rinaba' tseja' lahuë' César ga udxí'a urö quia'.

<sup>12</sup> Cate' Festo chibë'lenë' yugu' bönni' yúlahui' didza', bubí'ë didza', gudxë' Pablo:

—Chigunábu' tseju' lahuë' César. Lahuë' César uyiju'.

*Ru'ë didza' Pablo lahuë' Agripa, bönni' unná bë'*

<sup>13</sup> Gudödi chopa tsonna dza, bidxinë' Agripa, bönni' rinná bë'ë lu yödzo Cesarea, dzáganu Berenice lë', duyúgaquië' Festo. <sup>14</sup> Cate' chigula'cu'ë ni' zían dza, Festo buluí'inë' Agripa, bönni' rinná bë'ë, ca naca queë' Pablo. Gudxë' lë':

—Zoë' tu bönni' ni bucá'anë' Félix lë' lidxi guíë. <sup>15</sup> Cate' guzóa' Jerusalén, yugu' bixúz unná bë', en bönni' gula tu'zéajni'inë', bila'dxinë' lahua', ate' gula'nnë' queë' bönni' ni. Gula'nábinë' neda' ichuga' queë' gátie'. <sup>16</sup> Neda' bubí'a didza', gudxa' légaquië' biti' nalébiguequinë' bönni' Roma ila'chúguië' queë' tu bönni' gátie' channö cabí ila'dxini lahuë' nupa tu'zegui lë' didza', para gaca ubi'ë didza' ca naca lë na' ta'nnë' queë'. <sup>17</sup> Que lë ni na', cate' bila'dxinë' légaquië' ni, biti' ca' gudzeda',



pero cate' guzá' gyeani' ia'tú dza gurö'a ga ruchi'a rusöröa', ate' gunná bé'eda' nupa yöjxi'gaca bönni' ni. <sup>18</sup> Cate' gula'cu'ë ni bönni' na' tu'zéguië' lë' didza', biti' bi gula'nnë' queë' ca busaca' quia' ila'nnë'. <sup>19</sup> Gula'nnë' queë' bal-la didza' bizxaj ca naca le ta'yéajlë'ë Dios, en ca naca queë' tu bönni' lë' Jesús, nu na' guti, pero Pablo runë' tsutsu xtídzë'ë rnnë' ni zoë' nabanë' leyúbölö. <sup>20</sup> Tu' buchíxida' ca nácagaca lë ni, gunábida'-në' Pablo channö ré'ënë' tsejë' Jerusalén, ga ni' soa nu uchi'a usörö lë' ca nácagaca lë ni. <sup>21</sup> Ní'irö cate' gunabë' Pablo tsejë' lahuë' Augusto César para uchi'a usöröë' lë' ni', gunná bé'eda' bönni' röjáquië' gudil-la ilún chí'igarë' lë' cate' gála'rö dza isöl-la'a-në' lahuë' César.

<sup>22</sup> Ní'irö Agripa gudxë' Festo na':

—Lëzca' neda' ré'ënda' yónida' le innë' bönni' na'.

Festo gudxë' lë':

—Cuxö yönnu' le innë'.

<sup>23</sup> Cate' za' rení' ia'tú dza, len ba zxön bila'dxinë' Agripa, en Berenice ni'. Gula'yázië' ga ral-la' ilu'ë didza', dzágagaquië' légaquië' bönni' unná bë', ate' gula'söl-lë'ë nupa tsöjxi'gaca Pablo. <sup>24</sup> Ní'irö Festo gudxë' Agripa, bönni' unná bë':

—Bönni' unná bë', Agripa, en yúgu'tëli' zóali' ni tsözxön len netu'. Ni zoë' rilé'eli'-në' bönni' na', ta'nnë' queë' yúgu'të bönni' judío nacu'ë Jerusalén, enca' nupa nacuá' ni, të' neda' ral-la' gatië'. <sup>25</sup> Runi neda' biti' bi benë' le nabáguë'ë xíguia' gatië', pero tu' gunabë' lë' cazë' tsejë' ga uchi'a usöröë' Augusto César lë', que lë ni na' chinuna' quia' isöl-la'a-në' lahuë' Augusto.

<sup>26</sup> Tu' cabí nözda' bi ral-la' uzúaja' lu guichi le uzegui bönni' ni didza' para isöl-la'a lu në'ë César, xana', que lë ni na' nachë'a-në' loli', en le nácarö lo, nachë'a-në' lo' li', Agripa, bönni' unná bë', para cate' údxi rinábini yudxu'-në', ní'irö inözda' bi ral-la' uzúaja' lu guichi ca naca queë' bönni' ni. <sup>27</sup> Réquida' biti' naca dxi'a isöl-la'a-në' nu bönni' náguë'ë ni' channö cabí gaca ulu'a le nabáguë'ë.

## 26

*Didza' bë'ë Pablo uláz queë' lahuë' Agripa, bönni' unná bë'*

<sup>1</sup> Ní'irö Agripa gudxë' Pablo:

—Dë lataj gu'u didza' uláz quiu'.

Buchila në'ë Pablo lahuë' Agripa, ate' gusí lahuë' ru'ë didza', rnnë':

<sup>2</sup> —Bönni' unná bë', Agripa. Raza ládxa'a tu' dë lataj na'a gu'a didza' uláz quia' lo' li' ca naca yúgu'të le tu'zéguië' bönni' judío neda' didza'. <sup>3</sup> Raza ládxi'ra' tu' núnbë'u yúgu'të le nalébiguequinë' tunë' bönni' judío, enca' yugu' lë ni ridíl-latu' didza'.

*Yugu' le benë' Pablo zí'atëlö*

<sup>4</sup> Gunnë' ca' Pablo:

—Nözguequi quëzinë' yúgu'të bönni' judío ca na' bena' ga gudéla'të cuídia' ga nacua' bönachi uládz quia', enca' lu yödzö Jerusalén. <sup>5</sup> Nözguequi quëzinë' ca', en huáca ila'guíxjö'ë ca na' bena' dza ni'te. Guca' bönni' fariseo. Yugu' bönni' fariseo tu'í ládxí'gacarë' ila'yéaj ládxí'gaquië' Dios ca tunë' ia'zica'rë' bönni' judío. <sup>6</sup> Na'a, zoa' ni loli' para nu uchi'a usörö neda' tu' runa' löza Dios, usubanë' bönni' nati, en gunë' ca na' guzxi' lu në'ë lógaquië' xuz xtó'otu'. <sup>7</sup> Tunë' löza yugu' bönni' idxinnu cö' di'a dza queëtu' ila'déli'në' lë na' guzxi' lu në'ë Dios. Que lë ni na' ta'yéaj ládxí'gaquië' Dios, en tunë' xichinë' rëla, en tē dza. Tu' runa' löza lë ni, nuzéguigaquië' bönni' judío neda'. Caní naca, bönni' unná bē', Agripa. <sup>8</sup> Na'a, ¿naru' réquitseli' lib'ili' biti' naca le tséajlë'ëru', usubanë' Dios bönni' nati?

*Pablo gudxia ládxe'ë bönachi queë' Cristo*

<sup>9</sup> Gunnë' ca' Pablo:

—Lëzca' neda', zí'atëlö gúquida' le zían ral-la' guna', tá'baga'a-në' Jesús, bönni' Nazaret. <sup>10</sup> Caní bena' lu yödzö Jerusalén. Gulu'a zían bönachi ta'yéajlë' Jesús lidxi guié, tu' bulu'dödë' yugu' bixúz unná bē' lu na'a yöl-la' unná bē'. Cate' gulútië' bönachi ni', bënlena' légaquië' tuz didza'. <sup>11</sup> Zían luzuí busaca' zi'a yugu' bönni' ni' para ulu'sán ládxí'gaquië' ca ta'yéajlë'ë Cristo. Caní bena' gapa naca lu yu'u ga tu'dubë' bönni' judío, en tu'sedë' queë' Dios. Guléde'eda' légaquië', ate' gudxia ládxa'a légaquië' ga bidxintë guyija' gapa nacua' yödzö zítu' para tsöjxöngaca'-në'.

*Rigúxjö'ë Pablo ca böaquië' queë' Cristo*

<sup>12</sup> Gunnë' ca' Pablo:

—Para guna' caní guyija' yödzö Damasco, ate' bixúz unná bē' nasöl-la'gaquië' neda' nudódigaquië' lu na'a yöl-la' unná bē'. <sup>13</sup> Caní guca, bönni' unná bē', Agripa. Cate' ni' sa'yija' la' nöza, ni' naca idú huagubidza, bilé'eda' tu bení' lúzxiba le buzení'rö ca gubidza. Buzení' ga na' zoa', en ga nacua' nupa sójacalen neda'. <sup>14</sup> Ní'irö yúgu'tëtu' gudzö'ötu' lu yu, ate' biyönda' chi'i nu bulidza neda'. Bë'ë didza' hebreo, gunné': "Saulo, Saulo, ¿bizx que ribía ládxi'u neda'? Run zí' cuinu', ridá'bagu'u neda'. Raca quiu' ca raca queëba' bēdxi, run zí' cuinba', richégu'ba' yaga tuchi' le túndë'ë-ba' zí'." <sup>15</sup> Ní'irö gudxa'-në': "¿Nuzxi li', Xan?" Xanru' gudxë' neda': "Neda' ni Jesús, Nu na' ribía ládxi'u. <sup>16</sup> Na'a, guyasa, en guzui, tu' buluí'i lahua' li' na'a, para uzóa' li' gunu' xichina', en gunu' ba nalí que lë ni chibilé'enu', enca' quégaca le uluí'ida' li', uluí'i lahua' ga zu'. <sup>17</sup> Usölá' li' lu ná'agaquië' bönni' uládz quiu', en lu ná'agaquië' bönni' izá'a, lógaca nupa ni' risöl-la'a li' na'a. <sup>18</sup> Risöl-la'a li'

ga na' nacu'ë para gunu' ga ulu'huöälaj guiöj lógaquië', en ulu'huöáquië' queë' Dios, en ulu'cá'anë' le naca chul-la que dul-la', en ila'dxinë' lu bení'. Ulu'rúajë' lu na' Satanás tu' xihui', en ila'yázië' lu në'ë Dios. Channö ila'yéajlë'ë neda', Dios uniti lahuë' légaquië', en ugúë' dul-la' nabága'gaquië', ate' ila'délinë' ila'bábalenë' bönachi chinubéajë' Dios quez queë'."

*Benë' Pablo ca naca le buluí'inë' Xanru' lë'*

<sup>19</sup> Gunnë' ca' Pablo:

—Qui lë ni na', bönni' unná bë', Agripa, bití' gudá'baga'a guna' le buluí'inë' Dios, zoë' yehua' yubá, neda'.  
<sup>20</sup> Buzéajni'ida' nupa nacuá' yödzö Damasco, en gudödi ni' nupa nacuá' Jerusalén, en nupa nacuá' luyú Judea, en bönachi yugu' yödzö zí'tu' para ulu'bí'i ládxi'gaca, en ulu'huöáca queë' Dios, en ilún le ilaca bë' chibulu'bí'i ládxi'gaca. <sup>21</sup> Tu' bena' caní, yugu' bönni' judío gula'zönë' neda' cate' ni' zoa' lö'a yudo', en gulë'ënnë' ilútië' neda'. <sup>22</sup> Ní'irö gúcalenë' Dios neda', ate' ga ridxintë na'a dza zoa' idú ládxa'a, runa' ba nalí lógaquië' bönni' cá'asö, en lógaquië' bönni' lo. Bití' ruá'a didza' yúbölö, pero ca gula'nnasë' zí'alö bönni' gulu'ë didza' uláz queë' Dios, enca' ca gunnë' Moisés ca ral-la' gaca. <sup>23</sup> Gula'nnë': "Qui'í sáquë'ë Cristo, en tödi gátië', gáquië' nu isí lo ubán tsaz lu yöl-la' guti, para ulu'ë lahui naca löza ila'dxín bönachi lataj bení', en gaca libán que lë ni lógaca bönachi uládz queëtu', enca' lógaca bönachi izá'a."

*Pablo ruzéajni'inë' Agripa para tséajlë'ë Cristo*

<sup>24</sup> Cate' chibë'ë Pablo yugu' didza' ni, le bë'ë uláz queë', ní'irö bë'ë zidzaj didza' Festo, gunnë':

—¡Nachixi icju', Pablo! ¡Tu' nazédado'o, chiguchixi icju'!

<sup>25</sup> Ní'irö Pablo gudxë' lë':

—Bití' nachixi icja', rea' li', Festo, ate' didza' ni ruá'a naca idútë li, en naca lesaca'. <sup>26</sup> Lë cazë' Agripa, bönni' ni rinná bë'ë, nözinë' yugu' lë ni, en que lë ni na', idú ládxa'a ruá'a didza' lahuë' lë'. Nözinë' yugu' lë ni, tu' cabí guca bagáchi'sö lë na' guca. <sup>27</sup> Bönni' unná bë', Agripa. ¿Naru' réajlë'u le gula'nnë' bönni' gulu'ë didza' uláz queë' Dios? Nözda' réajlë'u lë ni.

<sup>28</sup> Ní'irö Agripa gudxë' Pablo:

—Ia'láti'sö la' réquinu' idéli'nu' neda' para gaca' queë' Cristo.

<sup>29</sup> Pablo gudxë' lë':

—Ni'a queë' Xanru' Dios rë'ënda', sal-la' ia'láti'sö o yenni', calégasö li', pero lësca' yúgu'të nupa ni ta'yöni neda', gácali' idú ca naca' neda', néquida' queë' Cristo, pero calëga gága'li' du guíë ca ni nága'a neda'.

<sup>30</sup> Cate' budxi bë'ë Pablo didza' ni, guzuínë' bönni' lo unná bë' na', ate' galazuínë' ca' bönni' rinná bë'ë, en Berenice, en

nupa rō'lengaca légaquië'. <sup>31</sup> Cate' bila'rúajë' quez, guluí'i xtidza'gaquië', ta'nnë':

—Biti' bi nunë' bönni' ni le nabáguë'ë xíguia' gátie', en calëga tsázië' lidxi guíë'.

<sup>32</sup> Agripa gudxë' Festo:

—Huáca usanu'-në' bönni' ni la'tu' cabí gunabë' tsejë' lahuë' César ga uchi'a usöröë' lë'.

## 27

### *Ta'söl-lë'ë Pablo yödzö Roma*

<sup>1</sup> Cate' chigulunë' quégaquië' ila'söl-lë'ë netu' lë'e barco para tséajtu' yödzö Roma, luyú Italia, gula'guélë'ë Pablo, en ia'bal-lë' nupa nadzúngaca, ate' bulu'dödë' légaquië' lu në'ë Julio, tu bönni' rinná bé'enë' tu cö' bönni' rōjáquië' gudil-la nazí'i le: Bönni' Queë' Augusto Rōjáquië' Gudil-la. <sup>2</sup> Gurentu' tu lë'e barco que luyú Adramitio, le ral-la' tōdi yugu' yödzö gapa ta'dxín barco ga naca luyú Asia, ate' yú'usötu' ca' lë'e barco na', buzá'atu' yödzö Cesarea. Aristarco, tu bönni' yödz Tesalónica, le nababa luyú Macedonia dzáguie' netu'. <sup>3</sup> Cate' za' rení' ia'tú dza, bidxintu' yödzö Sidón, ate' ni' Julio, bönni' na' rinná bé'enë' bönni' rōjáquië' gudil-la, lu yöl-la' dxi'i ladxi' queë', bë'ë Pablo lataj tsejë' ga nacu'ë böchi' luzë'ë para ilácalenë' lë' bi riyadzaj queë'. <sup>4</sup> Gudödi ni', bubentu' lë'e barco, ate' buzá'atu' ni'. Gudöditu' tsölá'a ga dë luyú bidxi Chipre ga rō'ö dxi bö' na' recja, tu' za' saca' lotu' bö' recja lu nísado' na'. <sup>5</sup> Ní'irö gudöditu' lu nísado' ga nalá' luyú Cilicia, en luyú Panfilia, ate' bidxintu' Mira, tu yödzö nababa luyú Licia.

<sup>6</sup> Bönni' na' rinná bé'enë' bönni' rōjáquië' gudil-la, en nachë'ë netu', yōjxáquië' tu barco ni' narúaj yödzö Alejandría que luyú Egipto, barco na' zeaj luyú Italia ga rō' yödzö Roma. Gulu'ë netu' lë'e barco na'. <sup>7</sup> Guzá' barco na' tsahui' lādxi'do' zían dza, ate' len yöl-la' rizáca'sö bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudöditu' tsölá'a luyú bidxi nazí'i le Creta ga rō'ö dxi bö' na' recja, en bidxintu' ga nalá' yödzö Salmón luyú Creta na'. <sup>8</sup> Lu yöl-la' rizáca'sö gudöditu' tsölá'a ga dë luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dë gala' ga na' dë yödzö Lasea.

<sup>9</sup> Tu' chigudzéda'atu', chigula' zoa bönadxi gaca ditaj bíti'tës barco rizá' lu nísado' na', tu' chigudödi yugu' dza tunë' gubasa cate' si' idxín beo' ziaga cate' récjada' bö'. Que lë ni na' Pablo buzéajni'inë' légaquië', <sup>10</sup> rnnë':

—Libi'ili', bönni', réquibe'eda' ga tseaj barco ni, huazóa bönadxi gaca ditaj barco ni, en yua' dzö'ö lë'e, en lësca' soa bönadxi queëru' gátiru'.

11 Bönni' na', rinná bé'enē' bönni' rōjáquiē' gudil-la, guyéajlë'ërē' le gula'nnē' bönni' na' dē lu nē'ē barco, en bönni' xan caz, ca le gunnē' Pablo. 12 Tu' cabí naca dxí'a lataj ni' ga ta'dxín barco, nazí'i le Buenos Puertos, para ulu'gá'anē' ni' yugu' beo' ziaga, que lē ni na' la'tu'biqui' yúgu'tē bönni' nacu'ē lē'e barco na' gulún tuz xtídza'gaquiē' ulu'zē'ē ni', channō huáca ila'dxinē' ga ta'dxín barco lu yōdzō Fenice, lē'sca' dē luyú bidxi na' nazí'i le Creta, le dē tsölá'a ga ribía gubidza, ate' gulē'ennē' ulu'gá'anē' ni' yugu' beo' ziaga.

*Recja bö' budunu' lu nísado'*

13 Tu' recja tu bö'do' le za' saca' tsölá'a ga ridödi gubidza beo' ziaga, téquinē' chiraca ilunē' ca tē'ennē', ate' bulu'lisē' guíē zi'i naga' du guíē le ruzóa dxisō barco, ate' gudödi barco na' gala' ra' luyú bidxi na' nazí'i le Creta. 14 Ia'tú chí'isō ca', guyecja tu bö' budunu' za' lotu', nazí'i le Euroclidón. 15 Tu' ruzéaj bö' na' recja barco na' tsölá'alö, ate' tu' cabí guca tseaj barco ga za' bö', ní'irö bē'ētū' lataj bö' na' buzéaj barco na' ga rē'ēni. 16 Cate' gudödi barco na' ga bidxintu' tsölá'a tu luyú bídximo' nazí'i le Cauda, tsölá'a ni' ga bití' récjada' bö', lu yöl-la' rizáca'sö buchísatu' bárcodo' ná'ayöj barco zxön na' yú'utu'. 17 Gudödi burentu' le lahui barco zxön na', ní'irö béga'ratu' barco zxön na'. Zxante barco na' buchölitu' du, para cabí ilá'a lu le ridxía nisa na'. Tu' gúdxitu' tödi barco na', en inídxí' lu yuzxi lu nísado' na', buzótjatu' lari' que, le rutubi bö' rusá' barco na'. Canísö bē'ētū' lataj bö' na' recja buzéaj barco. 18 Cate' za' rení' ia'tú dza, en ni' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö lē'e barco na'. 19 Dza bunny, len na' cuintu' gurú'unatu' le tun dxin que barco na' lu nísado'. 20 Cate' chiguca zían dza bití' rilé'etu' gubidza, en nitú bö'laj, en tu' récjada' bö' na' ruzéaj barco na' yú'utu', bítí'rö runtu' löza ulatu'.

21 Tu' chiguca zían dza bití' nágutu', guzuínē' Pablo gatsaj láhui'lö légaquiē', en gudxē' légaquiē':

—Libí'ili', bönni', dxí'arö guca la'tu' uzē nágali' neda', en cabí uzá'aru' luyú Creta, en cabí udutságaru' lē ni riguí'i rizáca'ru', en yugu' lē ni raca ditaj que barco ni. 22 Na'a, rea' libí'ili': Tsutsu guli'gún ládxi'li', tu' cabí gátili' nituli' libí'ili' tscali' zóali' ni, sal-la' gaca ditaj barco ni. 23 Caní gaca tu' buduluí'i lahuē' neda' gudiyēla tu gubáz lá'ayi queē' Dios. Dios ni néquida' queē', en runa' xichiné'. 24 Gubáz lá'ayi na' gudxē' neda', gunnē': "Pablo, bití' gádxinu'. Run bayudxi idxinu' lahuē' César. Tu' nadxí'inē' Dios lí', usölé' yúgu'tē bönachi nacuá'len lí' lē'e barco ni." 25 Que lē ni na', tsutsu guli'gún ládxi'li', tu' ruzxöni ládxa'a-nē' Dios, gaca ca na' chigudxē' gubáz lá'ayi

queë' neda'. <sup>26</sup> Caní gaca sal-la' run bayudxi gaca ditaj barco ni tu luyú bídxido', ga ni' tsöjca' ana rë'u.

<sup>27</sup> Cate' ni' chigudödi chidá' dza, ate' bö' na' recja ruzéaj barco na' lu nísado' nazí'i le Adriático, idú ladxi' yëla guléquinë' bönni' tunë' dxin lu barco na' chizóa idxín barco gala' tu luyú bidxi. <sup>28</sup> Gula' rú'unë' du lu nísado' na', ate' gula'nözinë' galaj ösa naca ga bidxintë ga rë' lu nisa. Cate' gudödi barco na' ia'láti'do', gula' rú'unë' du na' leyúbölö, en gula'nözinë' ch-naca chinu ösa. <sup>29</sup> Tu' guládxinë' tsöjdín barco na' lu guiöj, que lë ni na', tsölá'a láhuilö que barco gula' rú'unë' lu nísado' tapa guié zi'i nága' gaca du guié le tu' zóa dxisö barco lu nisa. Lu yöl-la' ruubi ruguí'sö ládxi'do' gaquië' gula'bözë' tsení'. <sup>30</sup> Ní'irö gulë'ennë' bönni' tunë' dxin lu barco ulu'zxúnajë' lë'e barco na'. Bulu'zötjë' bárcodo' na' dë lahui barco zxön na' lu nísado'. Gulunë' ca té'ennë' ilu'ë ia'lati' zi'tu' guié zi'i na' naga' du guié le ruzóa dxisö barco na', le zoa saca' tsölá'a láhuilö. <sup>31</sup> Ní'irö Pablo gudxë' bönni' na' rinná bé'enë' bönni' röjáquië' gudil-la, tsözxön len bönni' na' röjáquië' gudil-la, gunné':

—Channö cabí ulu'gá'anë' bönni' ni lë'e barco ni, biti' gaca uláli'.

<sup>32</sup> Ní'irö bönni' na' röjáquië' gudil-la gula'chúguië' du naga' bárcodo' na', ate' gulu'ë lataj gubixi lu nísado'.

<sup>33</sup> Cate' chizá' rení', Pablo gúta'yue' lógaquië' bi ilahuë' yúgu'të'. Gudxë' légaquië':

—Na'a chiguca chidá' dza rubéaj yëla loli', en runli' gubasa, biti' bi náguli'. <sup>34</sup> Que lë ni na', ráta'yua' loli' gáguli' para huóaca ládxi'li', tu' cabí gátili' nituli' libí'ili'.

<sup>35</sup> Cate' Pablo budxi bë'ë didza' ni, gudélë'ë yöta xtila, en gudxë' Dios: "Xclenu'." Caní benë' lógaquië' yúgu'të'. Ní'irö buzuxzjë' yöta xtila na', en gusí lahuë' rahuë'. <sup>36</sup> Ní'irö bila'dipa ládxi'gaquië' yúgu'të', en gulahuë'. <sup>37</sup> Tscatu' zóatu' lë'e barco na', gúcatu' idú chopa gayuá' yu' tsónnalalaj yu' chizxópatu'. <sup>38</sup> Gudödi gulahuë', en bulu'huöljanë', ní'irö gula' rú'unë' zxoa' xtila dë lë'e barco na' lu nisa, para ulu'lahuë' yua' dzö'ö lë'e barco na'.

### *Raca ditaj barco lu nísado'*

<sup>39</sup> Cate' chiguca lahui' dza, yugu' bönni' tunë' dxin lu barco na' biti' bulu'únbë'ë luyú na'. Bila'lë'enë' ga röjro' nisa zxön na' gatsaj láhui'lö luyú bidxi na', en dë lataj ni' ga naca lachi' ra' nísado'. Gulë'ennë' ilunë' ga tsaza barco na' ga ni'. <sup>40</sup> Ní'irö bulu'sedxë' yugu' du guié nága' gaca yugu' guié zi'i tu' zóa dxisö barco na', en bulu'sanë' léguequi, ate' gula'bixi lu nísado'. Bulu'sedxë' ca' du naga' në'e yaga le ruzecaj rudxí'i barco. Ní'irö bulu'chisë' lari' que le rutubi bö', le zoa tsölá'a láhuilö barco na', ate' ní'irö gusí lo ridödi barco saca' ga röjro' nísado'

gatsaj láhui'lö luyú bidxi na'. <sup>41</sup> Cate' bidxín barco na' tu lataj ga ridzaga chopa nisa, ni' binidxi' tsölá'a láhuilö barco na' lu yuzxi lu nísado' na', ate' bugá'anasö barco na' ga ni'. Bítirö guca bi utá le, ate' tsölá'a cúzilö barco na', gusí lo riguitsaj nísado' na' le, len yöl-la' rizá que. <sup>42</sup> Ní'irö bönni' röjáquië' gudil-la gulë'ënnë' ilútië' bönni' nadzúngaquië', para cabí ila'zxúnnajë', ila'zxóë' lu nisa na'. <sup>43</sup> Bönni' na' rinná bé'enë' bönni' na' röjáquië' gudil-la gú'unnë' usölë' Pablo, ate' gunná bé'enë' bönni' na' röjáquië' gudil-la cabí ilunë' ca na' té'ënnë'. Ní'irö gunná bé'enë' bönni' taca ila'zxóë' lu nisa, zí'alö légaquië' ila'yázië' lu nisa para ila'dxinë' luyú bidxi. <sup>44</sup> Gunná bé'enë' ca' yugu' bönni' nagá'anagaquië' ila'zxóë' lu yaga dzö'ö láhuilö barco, en ia'bal-lë' láhuigaca yágado' que barco na'. Caní guca, bulu'lë' yúgu'të'. Canísö bila'dxinë' luyú bidxi na'.

## 28

### *Le benë' Pablo luyú bidxi nazí'i le Malta*

<sup>1</sup> Cate' chibulatu' yúgu'tëtu', gunöztu' luyú bidxi ga na' zóatu' nazí'i le Malta. <sup>2</sup> Bönni' xidza' nacué luyú bidxi na' lu yöl-la' dxi'i ladxi' quégaquië' gulunë' netu' bal. Gula'béquië' guí, ate' bulu'lidzë' netu' yúgu'tëtu' iditsë'e cuintu', tu' ralaj guiöj, en runda' ziaga. <sup>3</sup> Ní'irö Pablo gúchë'ë tu tsölén huága zxisi bídxido', en cate' gulu'ë le lu guí, birúajba' tuba' bëla sínia' lë'e huágado', rizzúnnajba' böchila que guí na', ate' yöjtí'iniba' yen në'ë Pablo. <sup>4</sup> Cate' bönni' xidza' na' bila'lë'enë' bëla na', nála'ba' yen në'ë Pablo, gulë' tuë' ia'túë':

—Le nácatë bönni' ni náquië' nu ruti bönachi. Sal-la' bulë' lu nísado', dios queëru' lë' Tshui' biti' ru'ë lë' lataj soë' ibanë'.

<sup>5</sup> Gudxibi në'ë Pablo, en busládzu'ë-ba' bëla sínia' na'. Yöjxóatëba' lu guí, ate' lë' biti' bi guca queë'. <sup>6</sup> Bönni' xidza' nacué ni' tu'yúë' Pablo, bátacalö cö'ë gui, o tsö'ötë' gátie'. Ní'irö cate' chigudzë ta'bözë', en bila'lë'enë' biti' bi raca queë', ia'tú le guléquinë', ate' gula'nnë' naca cazë' tu dios.

<sup>7</sup> Lataj ní'isö dë xiyúë' Publio, bönni' lo que luyú bidxi na', ate' bönni' ni benë' netu' bal. Lu yöl-la' dxi'i ladxi' queë' gulu'ë netu' lidxë' idú tsonna dza. <sup>8</sup> Dza na' dë' ré'enë' xuzë' Publio na', yu'ë xilá, en ré'enë' huë' rön. Guyázië' Pablo söjyúë' lë', en gudödi bulidzë' Dios, ní'irö guxóa në'ë bönni' huë' na', en bunë' lë'. <sup>9</sup> Tu' benë' Pablo lë ni, lësca' bila'dxín nupa te'e ga zoë', nacué luyú bidxi ni', en bulu'huóáquië'. <sup>10</sup> Yugu' bönni' ni gulunë' netu' bal, en zían le gulunë' queëtu'. Cate' chizóa uzá'atu' luyú ni', bulu'nödzejë' yugu' le naquíniu' queëtu'.

### *Ridxinë' Pablo lu yödzo Roma*

11 Cate' chiguca tsonna beo' zóatu' ni', ní'irö gurentu' tu lè'e barco que yödzo Alejandría, le bugá'ana luyú bidxi na' yugu' beo' ziaga. Barco ni dá'gaca tsölá'a láhuilö budó' yaga léguequi Cástor, en Pólux, dios bilidi' quégaca bönachi Alejandría na'. 12 Buzá'a barco na' ga ni', ate' bidxín yödzo Siracusa, ga ni' bugá'anatu' tsonna dza. 13 Buzá'atu' ni', ate' gudöditu' tsölá'alö luyú ni', en bidxintu' yödzo Regio. Cate' za' rení' ia'tú dza, tu' recja bö' za' saca' ga ridödi gubidza beo' ziaga, buzá'atu' ni', ate' dza buropi na' bidxíntëtu' yödzo Puteoli luyú Italia. 14 Lu yödzo na' yöjxáca'tu' yugu' böchi'ru' ta'yéajlë'ë Cristo, ate' gulá'tayuë' lotu' ugá'analentu' légaquië' idú xunu' dza. Cate' bizá'a dza na' buzá'atu' ni' para tséajtu' yödzo Roma, rizë'e ní'atu'. 15 Chibila'yönnë' böchi'ru' nacu'ë Roma chizóa idxintu' ni', ate' bila'rúajë' idixí'gala'gaquië' netu'. Bila'dxinë' tu yödzo nazí'i le Yë'ëyi Que Apio. Ia'bal-lë' bila'dxinë' tu lataj nazí'i le Tsonna Yu'u Quégaquië' Bönni' Yú'ugaquië' Nöza. Cate' Pablo bilé'enë' légaquië', bidipa ládxë'ë, en gudxë' Dios: "Xclenu'."

16 Cate' bidxintu' Roma, bönni' na' rinná bé'enë' bönni' röjáquië' gudil-la, guchë'ë bönni' na' nadzúngaquië', ate' budödë' légaquië' lu në'ë tu bönni' lo rinná bé'enë' bönni' röjáquië' gudil-la, ate' bë'ë Pablo lataj soë' queëzë', zóalenë' lë' tu bönni' rejë' gudil-la ruyüë' lë'.

### *Runë' Pablo libán lu yödzo Roma*

17 Cate' chigudödi tsonna dza, bulidzë' Pablo yugu' bönni' lo quégaquië' bönni' judío nacu'ë Roma. Cate' chibulu'dubë' ga na' zoë' Pablo, lë' gudxë' légaquië':

—Libí'ili', böcha'a, sal-la' biti' bi bena' quégaca bönachi ládzaru', en calëga que le nalëbiru' runru' ca na' gulunë' xuz xtó'oru', yugu' bönni' judío nacu'ë Jerusalén bulu'dödë' neda' lu ná'agaquië' bönni' Roma nacu'ë Jerusalén, ate' bulu'sayjë' neda' lidxi guié. 18 Ní'irö cate' chigula'nabi yúdxinë' neda' bönni' Roma, gulë'ënnë' ulu'sanë' neda', tu' gulé'quibe'enë' biti' nabá'ga'a xíguia' gátia'. 19 Yugu' bönni' judío ni' gula'dá'báguë'ë nupa na' gulë'ëni ulu'sán neda', ate' ben bayudxi gunaba' tseja' lahuë' César ga uchi'a usöröë' neda', en calëga para uzéguia' bönachi uládz queëru' didza'. 20 Que lë ni na' bulidza' libí'ili' para ilé'eda' libí'ili', en gü'ílena' libí'ili' didza', tu' ná'ga'a du guié ni tu' runa' löza le runru' löza rë'u, bönachi Israel, gátatë lë na' guzxí' lu në'ë Dios gata' queëru'.

21 Ní'irö légaquië' gulë' Pablo:

—Biti' ridxini queëtu' guichi le za' luyú Judea ca naca lë na' raca quiu', en cuntú nu ridxini nu naca böchi'ru' judío, nu usiyöni netu' channö nu bi rnnë quiu' le ruá' dö'. 22 Na'a, rë'ënitú yönitu' xtídzú'u, lë na' riguinnaj icju', tu' chinözitu'



ta'nně bönachi yúgu'tě lataj quégaca nupa nazí' lu ně'eguequi xibá cubi ni.

<sup>23</sup> Caní guca, bulu'dxiě' bě' tu dza, ate' dza na' bila'dxině' zíaně' ga na' zoě' Pablo. Gusí lahuě' Pablo zílado', ate' ni' gúl-li'ni buzéajni'ině' légaquiě', en buchila lá'aně' le rinná bě'ě Dios. Gú'unně' ulu'ině' légaquiě' naca idútě li libán runě' queě' Jesús. Para guně' caní buguně' dxin le rinná bě' xibá queě' Moisés, enca' le gula'nně' bönni' gulu'ě didza' uláz queě' Dios. <sup>24</sup> Bal-lě' gula'zí' lu ná'agaquiě' didza' bě'ě Pablo, pero ia'bal-lě' biti' ca' gula'yéajlě'ě. <sup>25</sup> Tu' bila'rúajě' choplö, gula'sí lógaquiě' tu'zě'ě ni', ate' Pablo gudxě' légaquiě', rnně':

—Didza' nácatě bě'ě Dios Bő' Lá'ayi, lě na' gunně' Isaías, bönni' bě'ě didza' uláz queě' Dios, ca na' buzéajni'ině' xuz xtó'oru', gunně':

<sup>26</sup> Guyéaj lógaca bönachi ni', yöjödxi légaquiě':

Yöni nágali', pero biti' tséajni'ili'.

Uyuli' iná'ali', pero biti' ilé'eli'.

<sup>27</sup> Yugu' bönni' ni chinazidi icja ládxi'do'gaquiě',

en biti' bi riyaza icja nágagaquiě'.

Guluně' ca tun nupa nachul-la guiöj lóguequi

para cabí ila'lé'e len guiöj lóguequi,

en cabí ila'yöni nágaguequi

para cabí ulu'zéajni'i ládxi'guequi,

en cabí ilě'ěni ulu'huóaca queě' Dios

para gaca una' léguequi.

<sup>28</sup> Na'a, ral-la' inózili' lě ni. Dios risöl-lě'ě netu' lógaca bönachi izá'a para ulu'lágaca, ate' légaquiě' ila'yönně'.

<sup>29</sup> Cate' Pablo budxi bě'ě didza' ni, bila'rúajě' bönni' judío, ta'díl-lada' dídzě'ě la' légacasě'.

<sup>30</sup> Idú chopa iz bugá'aně' Pablo ni', zoě' tu lu yu'u ga na' riguizxjě', ate' beně' bal yúgu'tě nupa buduyúgaca Lě'. <sup>31</sup> Lu yöl-la' rugu ladxi' beně' libán ca rinná bě'ě Dios. Busédině' bönachi ca naca queě' Xanru' Jesucristo, ate' cuntunu buzaga' xinözě'. ¡Ca' naca!

## DIDZA' GUSÖL-LË'Ë PABLO YÖDZÖ ROMA

*Pablo rugapë' Dios bönachi queë' Cristo nacu'ë Roma*

<sup>1</sup> Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en gurö cazë' neda' para guna' libán que didza' dxi'a queë'.

<sup>2</sup> Dza ni'te guzxi' lu në'ë Dios isöl-lë'ë didza' dxi'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios. <sup>3</sup> Bulu'zúajë' lu guichi yúgu'të le ral-la' gunë' Zxi'inë' Dios, Nu na' naca Xanru' Jesucristo. Lu yöl-la' bönachi queë' náquië' zxi'ini xi'sóë' David, <sup>4</sup> pero ca naca bö' naca cazë', le naca lá'ayi, naca bë' náquië' Zxi'inë' Dios, en nápadë'ë yöl-la' huáca. Naca bë' náquië' caní tu' bubanë' lu yöl-la' guti. <sup>5</sup> Ni'a que le benë' Jesucristo ruzí'iru' xibé le ruzá' ládxe'ë queëru' Dios, ate' benë' ga naca' gubáz queë' para uláz queë' Lë' guna' ga ila'yéajlë' bönachi idútë yödzölió Lë', en ilún ca rnna xtídzë'ë. <sup>6</sup> Bitsa'li' libí'ili' ladjagaca bönachi yödzölió na', pero na'a nulidzë' Dios libí'ili' para guéquili' queë' Jesucristo.

<sup>7</sup> Rugapa' Dios libí'ili', yúgu'tëli' zóali' Roma. Dios nadxi'inë' libí'ili', en bulidzë' libí'ili' para gácali' quez queë'. Rinábida-në' Xúziru' Dios, enca' Xanru' Jesucristo, gunnë' queëli' le ruzá' ládxe'ë queëru', en le ribequi dxi ládxi'ru'.

*Rë'ënë' Pablo tsöjyüë' bönachi queë' Cristo nacu'ë Roma*

<sup>8</sup> Lë ni risí lahua' ruzúaja' lu guichi: Tu' néquiru' queë' Jesucristo rea'-në' Dios: "Xclenu'" ca naca queëli' yúgu'tëli', ate' ta'guixjö' bönachi idútë yödzölió ca réajlë'ëli' Jesucristo. <sup>9</sup> Idú ládxa'a runa' xichinë' Dios, runa' libán que didza' dxi'a ca naca queë' Zxi'inë'. Nözinë' Dios rulídzatica'sa'-në', en rinábida-në' gaca tsahui' queëli'. <sup>10</sup> Rinábitica'sida' Dios, channö naca le ré'ënë' Lë', gunnë' neda' lataj uduyúa' libí'ili'. <sup>11</sup> Caní rinábida-në' tu' raca ládxa'a ilé'eda' libí'ili' para gaca guna' ga gata' queëli' tu le unödzjë' Dios Bö' Lá'ayi queëli', le gun ga gácali' tsutsu. <sup>12</sup> Lë na' ré'ënda' naca utipa ládxi'ru' turu' ia'turu', tu' réajlë'ëru' Jesucristo yúgu'tëru'.

<sup>13</sup> Böchi' luzá'ado', ré'ënda' inözili' lë ni. Zían luzuí'bë' ládxa'a guída' ga zóali', pero ga ridxintë na'a biti' runni quia'. Ré'ënda' guída' ga zóali' para guna' ga uzí'ili' xibé libán na' runa', ca na' tu'zí' xibé ia'bal-la bönachi yödzölió ni. <sup>14</sup> Dë le ral-la' guna' quégaca yúgu'të bönachi, quégaca bönachi nazëdagaca, en quégaca bönachi cabí nazëdagaca, quégaca bönachi ta'yéajni'i,

en quégaca bönachi cabí ta'yéajni'i. <sup>15</sup> Que læ ni na', tsca gaca guna', zoa' riböza' guna' ca' libán que didza' dxi'a ga ni' zóali' libí'ili', zóali' Roma.

*Yöl-la' huáca zxön que didza' dxi'a*

<sup>16</sup> Biti' ca' rutuí'ida' runa' libán que didza' dxi'a, tu' napa yöl-la' huáca queë' Dios para gun ga ulu'lágaca yúgu'të nupa ta'yéajlë' le. Ga risílo, rë'ënë' Dios ila'yönnë' bönni' judío le, ate' tödi na' ila'yöni ca' bönachi izá'a. <sup>17</sup> Didza' dxi'a ni ruluí'i rë'u gunë' Dios ga huóácaru' tsahui', channö uyéajlë'ëru' Lë', en bití' gaca chopa ládxi'ru'. Ca naca læ ni nazúaj ca' lu guichi lá'ayi, rnna: "Nu naca tsahui' tu' réajlë' Dios, gata' yöl-la' na'bán que nu na'."

*Xíguia' nabága' gaca bönachi*

<sup>18</sup> Dios, Nu zoa yehua' yubá, bulu'e lahui bití' rilé'enë' dxi'a yúgu'të le ruá' dö', en le cabí naca tsahui' tun bönachi. Gunë' xíguia' yugu' bönni' na', lu yöl-la' bití' naca tsahui' quégaquië' ta'dá'baguë'ë le naca idútë li. <sup>19</sup> Caní gaca quégaquië' tu' nalá' lahui lógaca yúgu'të bönachi le naca bë' zoa cazë' Dios, tu' buluí'i quézínë' Dios læ ni ga na' nacu'ë. <sup>20</sup> Dza ni'te cate' si' guta' yödzülió, ga ridxintë na'a dza, yugu' le nunë' Dios nácagaca bë' le cabí gaca ilé'eru' queë' Dios, ca naca yöl-la' huáca idú queë', en le naca cazë' Dios. Que læ ni na', bití' gaca ila'nnë' bití' nabága'gaquië' xíguia'. <sup>21</sup> Cate' ni' gulúnbë'ë Dios, bití' gula'yéaj ládxi'gaquië' Lë' ca ral-la' tseaj ládxi'ru'-në' Dios, en bití' gulë' Lë': "Xclenu'." Que læ ni na', cá'asö böáca le gula'zá' ládxi'gaquië', ate' gula'chul-la gula'nítië' tu' nazidi icja ládxi'do'gaquië'. <sup>22</sup> Sal-la' guléquinë' ta'yéajni'inë' yenni', bulu'huóáquië' bönni' bití' bi nözguequinë' <sup>23</sup> tu' bulu'cá'anë' yöl-la' bení' queë' Dios Nu zóatica'sö, ate' gula'yéaj ládxi'gaquië' budó' guiöj budó' yaga, budó' na' nácagaca ca yugu' bönni' tati cazë', en ca yugu' böa'do' zoa xiligacaba', en ca yugu' böa' guixi' ta'daba' lu yu, en ca yugu' böa' bëla tá'ayöj lë'ëba' lu yu ni.

<sup>24</sup> Que læ ni na' Dios guléaj ládxi'ë légaquië' para ilunë' yugu' le ta'zë ládxi'gaquië' le ruá' dö', ate' caní guca, bulu'cá'ana cúngaquië' lu yöl-la' stu' tuë' len ia'túë'. <sup>25</sup> Guca caní tu' bulu'cá'anë' xtídzë'ë Dios, le naca idútë li, ate' gula'zí' lu ná'agaquië' tu le cabí nácatë. Gulunë' bal, en gula'yéaj ládxi'gaquië' yugu' le benë' Dios, en calëga Lë cazë' Dios, Nu na' ral-la' gácatica'sö queë' yöl-la' ba. ¡Ca' gaca!

<sup>26</sup> Que læ ni na' Dios guléaj ládxi'ë légaquië' para ilunë' yugu' le ta'zë ládxi'gaquië' le ruá' dö'. Yugu' nigula bulu'cá'ananu yöl-la' rizóalen bönni', para ilunnu le ruá' dö'. <sup>27</sup> Lë'sca' caní gulunë' yugu' bönni' biguiú', bulu'cá'anë' yöl-la' rizóalen nigula, ate' gula'zë ládxi'gaquië' le ruá' dö' túnlenë' tuë'

ia'tué', en gulunë' le tun ga nu rutuí'i, tu' gula'cuá'lenë' la' luzá'a bönni'gacasë'. Que lë ni na' gula'guí'i gula'záquië' lu xipëla'gaquië' yugu' bönni' gulunë' caní tu' bubí'ë Dios quégaquië' ca sa'yéaj dul-la' na' gulunë' tu' nucá'anagaquië' Dios.

<sup>28</sup> Tu' cabí gulë'ënnë' ilunë' Dios bal, que lë ni na' guléaj ládxe'ë Dios légaquië' para ila'zá' ládxi'gaquië' le bití' naca dxi'a, en ilunë' le cabí nazaca'.

<sup>29</sup> Túntica'së' yúgu'të le cabí naca tsahui', en yugu' le naca stu'. Tunë' le ruá' dö', en tu'huídi'në'.

Bití' ta'lé'enë' dxi'a luzá'agaquië', en tu'zxé'enë' luzá'agaquië'. Tutië' luzá'agaquië', en ta'díl-lalenë' luzá'agaquië'.

Ta'zí' yé'enë' bönachi, en zítë' nácaquië' xihui'.

Ta'nnë' que luzá'agaquië'.

<sup>30</sup> Ta'nnë' le cabí nácatë que luzá'agaquië'.

Bití' ta'lé'enë' Dios dxi'a, en nácaquië' bönni' bizxaj.

Tun cúngaquië' lo, en tun ba zxön cúngaquië'.

Ta'guiljé' le ruá' dö' ilunë', en ta'dá'baguë'ë xuz xiná'agaquië'.

<sup>31</sup> Nácaquië' bönni' bití' ta'yéajni'inë', en tun díjtjagaquië' xtídza'gaquië'.

Bití' nácaquië' dxi'i ladxi' ca ral-la' ilácagaquië'.

Bití' tu'niti lahuë' luzá'agaquië'.

Bití' tu'huechi' ládxi'gaquië' luzá'agaquië'.

<sup>32</sup> Nözguequi quézinë' le nuzóë' tsaz Dios ca ral-la' gaca quégaca nupa tun yugu' le caní, ilátigaca tsaz. Sal-la' nöziguequinë' lë ni, calëgasö caní tunë', pero ta'yaza ládxi'gaquië' nupa tun ca' caní.

## 2

### *Naca tsahui' ichúguië' Dios quégaca bönachi gátigaca*

<sup>1</sup> Que lë ni na', bití' gaca ubéaj tsahui' cuinu', núti'tës nu nacu', richugu bë'u luzó'o. Cate' richugu bë'u luzó'o, rusubaga' cuinu' xíguia', tu' richugu bë'u luzó'o, en lësca' runu' lí'.

<sup>2</sup> Nöz quéziru' ca ruchi'a rusöröë' Dios. Naca idútë li ca ruchi'a rusöröë' nupa tun le ruá' dö'. <sup>3</sup> Lí' richugu bë'u nupa tun le ruá' dö', en tuz ca runu' lí'.

¿Naru' réquitsenu' uló' lí' cate' uchi'a usöröë' Dios? <sup>4</sup> ¿Naru' rucá'angatso' cá'asö yöl-la' dxi'i ladxi' idú' queë' Dios, en yöl-la' riböza zxön ladxi' queë', en ca runë', ridzenë' para lenë' lí'?

¿Naru' cabí nöz quézinu' ruzá' ládxe'ë Dios quiu' yöl-la' dxi'i ladxi' queë' para gunë' ga ubí'i ládxi'u? <sup>5</sup> Lu yöl-la' ládxi'do' zidi quiu' bití' rubí'i ládxi'u. Que lë ni na' rusubaga' cuinu' xíguia' gunë' Dios lí' cate' uchi'a usöröë' bönachi, ate' gaca bë' naca ca ral-la' gunë' Dios cate' ichúguië' quégaca bönachi ilátigaca.

<sup>6</sup> La' dza ní'sö ubí'i cazë' Dios que queë' bönni' tsca naca le gulunë' tu tuë'. <sup>7</sup> Ünödzejë'

yöl-la' na'bán idú quégaca nupa túntica'sö le naca dxi'a, tu' tuí'i ládxi'gaquië' ulu'zi'ë xibë' Dios, en ulu'rúajë' dxi'a lahuë' Lë', en ila'cuá'tica'së'. <sup>8</sup> Lu yöl-la' rilé queë', Dios gunë' xíguia' nupa ta'dá'baga', en biti' té'ëni ilún ca rna le naca idútë li, pero tun ca rna le cabí naca tsahui'. <sup>9</sup> Ila'guí'i ila'záquië', en huí'inida' ládxi'ë yúgu'të bönni' tunë' le ruá' dö'. Ga risí lo gaca caní quégaca bönachi judío, en gaca ca' caní quégaca bönachi izá'a. <sup>10</sup> Dios gunë' ga ilácagaquië' bica' ba, en gunë' légaquië' bal, en gu'ë le cuéqui dxi ládxi'gaquië' yúgu'të bönni' tunë' le naca tsahui'. Ga risí lo gunë' caní quégaca bönachi judío, en gunë' ca' caní quégaca bönachi izá'a.

<sup>11</sup> Caní uchi'a usöröë' Dios bönachi, ate' Lë' biti' runë' bal le ta'nnasö bönachi. <sup>12</sup> Yúgu'të bönni' na' biti' bila'yönnë' le rinná bë' xibá queë' Dios, en gulunë' dul-la', lësca' ilátië', sal-la' biti' téquibe'enë' gula'dá'baguë'ë le rinná bë' xibá na', ate' yúgu'të bönni' bila'yönnë' le rinná bë' xibá queë' Dios, en gulunë' dul-la', Lë' uchi'a usöröë' légaquië' ca naca le rinná bë' xibá na'. <sup>13</sup> Caní gaca, tu' cabí nácagaquië' tsahui' lahuë' Dios yugu' bönni' ta'yónisë' xibá queë', pero ulu'huóca tsahui' lahuë' Lë' yugu' bönni' tunë' ca rna xibá queë'. <sup>14</sup> Bönni' na' biti' nácagaquië' judío, en biti' bila'yönnë' le rinná bë' xibá queë' Dios, pero tun cazë' ca rinná bë' xibá queë' na', bönni' ni, sal-la' biti' bila'yönnë' le rinná bë' xibá queë' Dios, zóalen légaquië' tu xibá le nuzóë' Dios icja ládxi'do'gaquië'. <sup>15</sup> Nupa ni tu'luí'i lahui le run xibá na' nazúaj lu icja ládxi'do'gaquië'. Le yu'u icja ládxi'do'gaquië' naca bë' naca caní. Ca ta'zá' ládxi'gaquië', tu'zéguië' luzá'agaquië' didza', o tu'béaj tsahui' luzá'agaquië' tuë' ia'tué'. <sup>16</sup> Caní ubi'ë Dios quégaquië' dza ni' uchi'a usöröë' lu na' Jesucristo yugu' le núngaquië', en le gula'zá' ládxi'gaquië' yúgu'të'. Caní rusëdi didza' dxi'a runa' libán que.

### *Yugu' bönni' judío, en xibá queë' Dios*

<sup>17</sup> Núlöli' rnnali' nácali' judío, en ruzxöni ládxi'li' xibá queë' Dios, en run ba zxön cuinli' tu' núnbë'ëli'-në' Dios, <sup>18</sup> nöz quézili' le ré'ënë' Dios gunli', en le rusëdi libí'ili' xibá queë', en réquibe'eli' le nácatërö dxi'a. <sup>19</sup> Réquili' gaca uluí'ili' nöza dxi'a nupa ta'dá ga yúbölö ca nu nachul-la lahui, en gaca uzéajni'ili' nupa nachul-la nanítigaca. <sup>20</sup> Réquili' gaca usédili' nupa biti' ta'yéajni'i, en nupa ta'yéajni'i láti'do'os, tu' dë lu ná'ali' xibá queë' Dios le rusëdi bönachi ca naca yöl-la' réajni'i idú, en le naca idútë li. <sup>21</sup> Na'a, libí'ili' rusédili' ia'zica'rö bönachi. ¿Naru' cabí ral-la' usëdi cuinli'? Libí'ili' rnnali': "Biti' cuanu'." ¿Naru' ribántsali' libí'ili'? <sup>22</sup> Rnnali' ca': "Biti' gunu' dul-la' le riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' biti' rilé'eli' dxi'a yugu' budó' guiöj budó' yaga. ¿Naru' ribántsali' le dzö'ö

lu yudo' quéguequi? <sup>23</sup> Run ba zxön cuinli' tu' dë lu ná'ali' xibá queë' Dios. ¿Naru' rucá'anatsali' Dios cá'asö, en riguítjsjali' xibá le gunná bē'ë Lē'? <sup>24</sup> Nazúaj lu guichi lá'ayi ca runli', rna: Ni'a que le runli' libí'ili' nupa biti' nácgaca judío ta'nnë zi' queë' Dios.

<sup>25</sup> Le nácatë ruzi'u xibé lë na' narugu lu xipëlu'u le naca bē' nazí' lu ná'ali' xibá queë' Dios channö runu' ca rinná bē' xibá na' queë' Dios, pero channö riguítjsju' xibá le gunná bē'ë Lē', nuhuóácu' ca tu bönni' biti' néquinë' queë' Dios. <sup>26</sup> Que lë ni na', channö zoë' tu bönni' biti' narugu lu xipëlë'ë lë na' naca bē' nu nazí'i xibá queë' Dios, pero runë' idútë ca rinná bē' xibá queë' Lë', bönni' ni náquië' lahuë' Dios ca tu bönni' narugu caz lu xipëlë'ë lë na' naca bē' sal-la' biti' narugu lu xipëla' cazë'. <sup>27</sup> Bönni' na' biti' narugu lu xipëlë'ë lë na' naca bē' nu nazí'i xibá queë' Dios, pero runë' idú ca rinná bē' xibá na' queë' Dios, ca runë' bönni' ni ruluí'i nabága'li' libí'ili' xíguia', sal-la' dë lu ná'ali' xibá na' queë' Dios, en narugu lu xipëla'li' lë na' naca bē' nazí' lu ná'ali' xibá na' queë' Dios, pero biti' runli' ca rinná bē' xibá queë' na'. <sup>28</sup> Biti' náquië' idú bönni' judío tu bönni' nácasë caní lu yöl-la' bönáchisö queë', ate' biti' naca idú lë na' naca bē' le narúgusö lu xipëlë'ë nu bönni'. <sup>29</sup> Náquië' idú bönni' judío bönni' na' náquië' caní lu icja ládxi'da'ahuë', en le naca idú le narugu lu xipëlë'ë nu bönni' le naca bē' nu nazí'i xibá queë' Dios, naca tu le yu'u icja ládxi'do'gaca bönachi. Naca que bö' naca cázaru', en calëga que yöl-la' bönáchisö queëru'. Nu bönni' náquië' caní, biti' tun bönachi lë' bal, pero Dios caz gunë' lë' bal.

### 3

<sup>1</sup> Channö caní naca, ¿bizxi ruzi'tsë' xibé tu bönni' tu' náquië' judío? ¿Bizxi ruzi'ë xibé tu bönni' judío tu' narugu lu xipëlë'ë? <sup>2</sup> Yenni' ruzi'ë xibé, en zían ca ruzi'ë xibé. Le nácatëro lo, Dios gulu'ë lu ná'agaquië' yugu' bönni' judío didza' lá'ayi queë'. <sup>3</sup> Bal-lë' biti' ta'yéajlë'ë Dios. ¿Naru' réquitsenu' biti' gunë' Dios ca rna xtídzë'ë tu' cabí ta'yéajlë'ë Lë'? <sup>4</sup> ¡Biti' ca' gaca! Ral-la' guéquibe'ëru' rúntica'së' Dios ca rna didza' bē'ë, sal-la' ta'zi' yë' yúgu'të bönachi. Ca naca queë' nazúaj lu guichi lá'ayi le rna:

Gaca bē' nacu' tsahui' ni'a que didza' ru'u,  
en uruju' tsahui' channö nu uchi'a usörö Li'.

<sup>5</sup> Cate' runru' le ruá' dö', Dios rnnë' biti' naca tsahui' le runru'. Lë ni naca bē' tsahui' náquië' Dios. Nacuá' nupa ta'nná: "Le cabí naca tsahui' le runru' naca bē' náquië' Dios tsahui', ate' que lë ni na' biti' ral-la' gunë' rë'u xíguia'." <sup>6</sup> ¡Biti' ca' naca caní! La'tu' ruzi'ë xibé Dios le ruá' dö' runru', ¿nacxi caz gaca uchi'a usöröë' bönachi yödzölió ni?

<sup>7</sup> Cate' nu rizi' yë', Dios rnnë' biti' ru'í didza' nu na' ca runë' Lë'. Lë ni naca bë' naca idútë li didza' ru'ë Dios. Ta'nnë' bönni' le ta'z'í yë'ë légaquië' run ga gaca queë' Dios yöl-la' ba, ate' biti' ral-la' ichúguië' quégaquië', cabí innë' nácagaquië' bönni' dul-la'.  
<sup>8</sup> ¿Naru' huannátsaru': "Guá'aru' dō' para gaca le naca dxi'a"? Nupa na' ta'nnë' z'í queëru' ta'nná rusédiru' caní, ate' tsahui' naca ichúguië' Dios quéguequi.

*Yúgu'tëru' nabága'ru' dul-la'*

<sup>9</sup> ¿Bixi caz innaru' na'a? Ca naca queëtu' netu', bönni' judío, ¿nácárotu' tsahui' ca ia'z'íca'rō bōnachi? ¿Biti' ca' nácatu'! Chibulu'a ni, nabága'gaca dul-la' bōnachi judío, ate' nabága'gaca ca' dul-la' bōnachi izá'a. ¡Yúgu'të' nabága'gaquië' dul-la'!  
<sup>10</sup> Nazúaj lu guichi lá'ayi le rnna:

Cuntu nu zoa naca tsahui', cuntu nu caz.

<sup>11</sup> Cuntu nu réajni'í.

Cuntu nu riguila'j Dios.

<sup>12</sup> Yúgu'të' ta'dë' ga yúbölö.

Yúgu'të' nanítigaquië'.

Cuntu nu run le naca dxi'a, cuntu nu caz.

<sup>13</sup> Lubá'agaquië' nácagaca ca yeru ba nayáljagaca.

Len yöl-la' rinnësö quégaquië' ta'z'í yé'enë' luzá'agaquië'.

Didza' rirúaj ruá'agaquië' naca ca le yudzu láya'ba' bëla sínia'.

<sup>14</sup> Len yugu' didza' tu'ë, tu'didza' yúdxinë' bōnachi,

en ta'nnë' z'í'ë quégaca bōnachi na'.

<sup>15</sup> Nacu'ë sina' tútigaquië' bōnachi.

<sup>16</sup> Gátitës ga ta'dödë' tu'sunítie', en tu'saca' z'í'ë luzá'agaquië'.

<sup>17</sup> Biti' ta'zéqui'në' ila'bözë' dxi'ado'.

<sup>18</sup> Biti' ca' tádxinë' Dios.

<sup>19</sup> Nöziru' yúgu'të didza' ni bë'ë Dios, rë' yugu' bönni' na' dë lu ná'agaquië' xibá queë'. Que lë ni na' cuntu nu gaca inná biti' nabaga' dul-la', ate' yúgu'të bōnachi idútë yōdzölió, uchi'a usöröë' Dios quéguequi. <sup>20</sup> Tu'í ládxi'gaquië' yugu' bönni' judío ilunë' yugu' le rinná bë' xibá queë' Dios para ulu'huóáquië' tsahui', pero cuntu nu huóáca tsahui' caní, tu' nuzóë' Dios xibá queë' para quéquibe'eru' nabága'ru' dul-la'.

*Uláru' tu' réajlë'ëru' Jesucristo*

<sup>21</sup> Na'a, chibulu'í lahui ca gaca huóácaru' tsahui' lahuë' Dios. Biti' gaca huóácaru' tsahui' tu' runru' ca rinná bë' xibá queë' Dios, sal-la' lu xibá queë' na', en lu guichi lá'ayi ga nazúajgaca le gula'nnë' bönni' gulu'ë didza' uláz queë' Dios, ru'í didza' ca gaca huóácaru' tsahui'. <sup>22</sup> Dios caz runë' ga huóácaru' tsahui' tu' réajlë'ëru' Jesucristo, ate' gunë' ga ulu'huóáca tsahui' yúgu'të nupa ila'yéajlë' Lë'. Tuz ca nácagaca yúgu'të bōnachi <sup>23</sup> tu' núnagaquië' yúgu'të' dul-la', en biti' ca' nácagaquië' tsahui' ca na' náquië' Dios idú tsahui'. <sup>24</sup> Dios ruzá'

ládxi'ë queëru', en nunsë' rë'u tsahui' tu' böá'uë' Jesucristo rë'u. <sup>25</sup> Dios budödë' Jesucristo uláz queëru'. Lë' bulaljë' xichönë', le rigúa dul-la', lë na' uzí'iru' xibé channö uyéajlë'ëru' Lë'. Caní benë' Dios para gaca bë' náquië' tsahui' Lë' sal-la' lu yöl-la' riböza zxön ladxi' queë' budödisë' cá'asö yugu' dul-la' benru' dza ni'te. <sup>26</sup> Caní benë' Dios, buluí'i cuinë' tsahui' dza ni zóaru' na'a, ate' rugá'anë' tsahui' sal-la' rugüë' dul-la' nabága'gaca bönachi, runë' ga tu'huóaca tsahui' nupa ta'yéajlë' Cristo.

<sup>27</sup> ¿Naru' huácatsö gun ba zxön cuinru' ca naca queëru'? ¿Biti' ca' gácaru'! ¿Bizx que na'? Naca tu' nuláru', calëga tu' runru' ca rinná bë' xibá queë' Dios, pero tu' réajlë'ësiru' Jesucristo. <sup>28</sup> Na'a, rusáca'ru' queëru' nuhuóáquië' tsahui' tu bönni' tu' réajlë'ë Jesucristo, en calëga tu' runë' ca rinná bë' xibá queë' Dios.

<sup>29</sup> Ca naca Dios, ¿náquië' Dios quégacasö bönachi judío? ¿Naru' cabí náquië' ca' Dios quégaca bönachi izá'a? Ön, náquië' ca' Dios quégaca bönachi izá'a na' <sup>30</sup> tu' zoa Tuz Nu naca Dios. Dios ni gunë' ga ulu'huóáquië' tsahui' yugu' bönni' judío tu' ta'yéajlë'ë Jesucristo, yugu' bönni' na' narugu lu xipëla'gaquië' lë na' naca bë' nu nequi queë' Dios, en lësca' caní gunë' ga ulu'huóáquië' tsahui' yugu' bönni' zi'tu' tu' ta'yéajlë'ë Jesucristo, en bití narugu lu xipëla'gaquië' lë na' naca bë'. <sup>31</sup> Na'a, channö nuláru' tu' réajlë'ësiru' Jesucristo, ¿ba nagá'ana cá'asö xibá queë' Dios? ¿Biti' ca' naca ca', pero nagá'anarö tsutsu xibá queë' na'!

## 4

### *Le benë' Abraham rusedi rë'u*

<sup>1</sup> ¿Bizxi caz innaru' na'a? ¿Bizxi bidéli'në' Abraham, xuz xtó'otu' netu', nácatu' judío? <sup>2</sup> La'tu' böáquië' tsahui' Abraham tu' zoa le ben cazë' lë', gunna gun ba zxön cuinë', pero calëga lahuë' Dios. <sup>3</sup> Ca naca lë ni nazúaj lu guichi lá'ayi, le rnna: "Abraham guyéajlë'ë Dios, ate' que lë ni na' Dios benë' ga böáquië' tsahui' lahuë' Lë'." <sup>4</sup> Channö zoa nu bönni' runë' xichinru', le riguízxjaru'-në' bití naca tu le ruzá'ládxi'ru' queë', pero naca tu le ral-la'ru' queë' bönni' na'. <sup>5</sup> Lësca' caní channö tu bönni' réajlë'ë Dios, sal-la' bití bi dxin benë' bönni' na', Dios, Nu run ga ulu'huóaca tsahui' bönachi bití nácagaca tsahui', rnnë' náquië' tsahui' lahuë' Lë' bönni' na', tu' réajlë'ë Lë'. <sup>6</sup> Lësca' caní bë'ë didza' David ca náquië' bica' ba bönni', Dios rnnë' náquië' tsahui' sal-la' bití bi dxin nunë' bönni' na'. <sup>7</sup> Caní gunné' David:

¿Bica' ba bönni' na' Dios runiti lahuë' le bití' naca tsahui' nunë', en rugüë' yugu' dul-la' nabáguë'ë!



8 ꞑBica' ba bönni' na', Dios biti' rusubáguë'ë lë' xíguia' tu' nözi dul-la' benë' bönni' na'!

9 ꞑNaru' nácacacsë' bica' ba bönni' narugu lu xipëla'gaquië' lë na' naca bë', o nácacaca ca' caní nupa na' cabí narugu lë na' lu xipëla'gaquië'? Chigunná cázaru' böáquië' Abraham tsahui' lahuë' Dios tu' guyéajlë'ë Lë'. 10 ꞑBátaxi böáquië' tsahui' caní Abraham? ꞑNaru' guca cate' ni' chinarugu lu xipëlë'ë lë na' naca bë', o guca zí'alö? Biti' guca cate' chinarugu lu xipëlë'ë, pero zí'alö guca. 11 Abraham guyéajlë'ë Dios cate' ni' biti' narúguni lu xipëlë'ë lë na' naca bë'. Gudödi na' gurugu lu xipëlë'ë lë na' naca bë', le rulu'isö chinuhuöáquië' tsahui' lahuë' Dios. Guca caní para gáquië' Abraham ca xúzgaquië' yugu' bönni' ila'yéajlë'ë Dios sal-la' biti' narugu lu xipëla'gaquië' lë na' naca bë'. Tu' ta'yéajlë'ë Dios, huáca innë' Dios nácacagaquië' tsahui' lahuë' Lë'. 12 Náquië' Abraham xuz xtó'ogaquië' yugu' bönni' judío ta'yéajlë'ë Dios. Calégasö náquië' xúzgaquië' bönni' na' narugu lu xipëla'gaquië' lë na' naca bë', pero lësca' náquië' xúzgaquië' bönni' na' tunë' ca benë' Abraham, ta'yéajlë'ë Dios ca na' benë' Abraham cate' ni' biti' narúguni lu xipëlë'ë lë na'.

*Le guzxí' lu në'ë Dios gata' queëru' tu' réajlë'ëru' Lë'*

13 Guzxí' lu në'ë Dios bi unödzejë' queë' Abraham, en quégaca xzí'ini xí'sóë', gata' quégaquië' la' yödzölió nisö. Gaca caní, calëga tu' tunë' ca rinná bë' xibá queë' Dios, pero tu' nuhuöácagaquië' tsahui' lahuë' Lë' tu' ta'yéajlë'ë Lë'. 14 La'tu' gata' yödzölió ni quégacasö nupa tun ca rinná bë' xibá queë' Dios, biti' gun bayudxi nu tséajlë' Lë', ate' nítisö gaca le guzxí' lu në'ë Dios. 15 Rulu'i xibá queë' Dios rë'u nabága'ru' xíguia', le run ga ichúguië' Dios queëru' gátiru'. Ga ni' biti' ridxini xibá queë' na', biti' gaca ila'dá'baga' bönachi le rinná bë' xibá na'.

16 Que lë ni na' uzí'iru' xibé le guzxí' lu në'ë Dios tu' réajlë'ëru' Lë', para gaca bë' naca tu le ruzá' ládxë'ë queëru'. Caní naca, para gaca bë'da' gata' quéguequi yúgu'të xzí'ini xí'sóë' Abraham lë na' guzxí' lu në'ë Dios, calégasö quégaquië' bönni' na' dë lu ná'agaquië' xibá queë' Dios, pero lësca' quégaca nupa ta'yéajlë' Dios ca na' guyéajlë'ë Abraham Dios. Abraham na' náquië' ca xuz xtó'oru' yúgu'tëru' rë'u, réajlë'ëru'-në' Dios. 17 Caní náquië' ca na' nazúaj lu guichi lá'ayi, le rnna: "Nuzóa' lí' ca xúzgaca bönachi idütë yödzölió."

Caní naca, lahuë' Dios, Nu na' guyéajlë'ë Abraham, náquië' xuz gudödi queëru' yúgu'tëru'. Dios ni rusubanë' nupa chinátigaca, en ru'ë didza' que nu biti' zuíni tsa chizóa caz nu na' biti' zuíni.

18 Caní naca tu' gudxë' Dios Abraham na': "Ziántëro' ila'cuá' xzí'ini xí'sú'." Abraham guyéajlë'ë Dios, en benë' löza lë na'

guzxí' lu në'ë Dios, sal-la' biti' guca ilé'enë' lë na' runë' löza, ate' caní guca, bidéli'në' náquië' xúzgaca bönachi idútë yödzölió. <sup>19</sup> Biti' guca Abraham chopá ládxe'ë ca na' réajlë'ë Dios, sal-la' chiyu'ë ca tu gayuá' iz, en yöjnenë' ca naca que le naca cazë', chinati caz tu' chinagúlädë'ë, enca' ca naca queënu Sara queë', nácanu nigula huödx. <sup>20</sup> Biti' guca chopá ládxe'ë, en biti' gúquië' tu' caréajlë' ca naca le guzxí' lu në'ë Dios gunë' queë', pero bidipa ládxe'ë tu' guyéajlë'ë Dios, ate' gulu'ë Dios yöl-la' ba. <sup>21</sup> Idú ládxe'ë benë' löza Dios, napë' yöl-la' huáca gunë' idútë lë na' guzxí' lu në'ë. <sup>22</sup> Que lë ni na', tu' guyéajlë'ë Abraham Dios, Dios buzóë' queë' náquië' tsahui'.

<sup>23</sup> Nazúaj lu guichi lá'ayi le rnna: "Dios buzóë' queë' náquië' tsahui'." Nazúaj lu guichi caní, calégasö para uzi'ë xibé Abraham, <sup>24</sup> pero para uzí'iru' xibé ca' rë'u. Rë'u ni, Dios gunë' ga huóácaru' tsahui' lahuë' Lë' channö uyéajlë'ëru' Lë', busubanë' Xanru' Jesús lu yöl-la' guti. <sup>25</sup> Jesús na', Dios budödë' Lë' para gútië' tu' nözi dul-la' nabága'ru', ate' busubanë' Lë' lu yöl-la' guti, para gaca gunë' ga huóácaru' tsahui' lahuë' Lë'.

## 5

### *Le rata' queëru' tu' rnnë' Dios nuhuóácaru' tsahui'*

<sup>1</sup> Na'a, rnnë' Dios nuhuóácaru' tsahui' lahuë' Lë' ni'a que le benë' Xanru' Jesucristo, channö réajlë'ëru' Lë', ate' que lë ni na' nuhuóácaru' tuz len Lë'. <sup>2</sup> Tu' réajlë'ëru' Jesucristo, ruzí'iru' xibé le ruzá' ládxe'ë Dios queëru', le rutipa ládxi'ru'. Rudzéjaru' tu' runru' löza uzí'iru' ca' xibé yöl-la' zxön queë' Dios. <sup>3</sup> Calégasö caní rudzéjaru', pero rudzéjaru' ca' cate' riguí' rizáca'ru', tu' chinöziru' le riguí' rizáca'ru' rusedi rë'u cózaru' zxön ladxi'. <sup>4</sup> Cate' ribózaru' zxön ladxi' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' rë'u. <sup>5</sup> Cate' runru' löza Lë', biti' ca' raca chopá ládxi'ru'. Caní naca, tu' nuhuólaj nudzé'e icja ládxi'do'oru' yöl-la' nadxí'i queë' Dios rë'u. Runë' Dios Bö' Lá'ayi, Bönni' gusöl-lë'ë Dios queëru' ga raca caní.

<sup>6</sup> Cate' ni' biti' ca' guca uláru' rácasö queëru', cate' gúla'rö dza queë', Cristo gútië' uláz queëru', ni' nácaru' bönachi dul-la'. <sup>7</sup> Cuntu nu guë'ëni gati uláz queë' tu' bönni' tsahui'. Nadxi ca' nu urugui gati uláz queë' tu' bönni' náquië' idú dxi'a. <sup>8</sup> Dios rulu'inë' rë'u ca nadxí'ide'enë' rë'u, tu' gútië' Cristo uláz queëru' cate' ni' nácaru' bönni' dul-la'. <sup>9</sup> Chinuhuóácaru' tsahui' lahuë' Dios tu' bulaljë' Cristo xichönë', gútië' uláz queëru'. Que lë ni na' chinácada' löza usölë' Lë' rë'u lu dza ichúguië' Dios quégaca bönachi dul-la' gátigaca. <sup>10</sup> Cate' ni' biti' rilé'ëru'-në' Dios dxi'a, gútië' Zxí'inë' Dios uláz queëru' para huóácaru' tuz len Lë'. Na'a, tu' zoë' nabanë', en chinuhuóácaru' tuz len Lë',

chinácada' löza uláru'. <sup>11</sup> Rudzéjaru' lahuë' Dios ni'a que le benë' Xanru' Jesucristo, tu' nuhuóácaru' tuz len Dios ni'a que lë na' benë' Lë'.

*Le benë' Adán, en le benë' Cristo*

<sup>12</sup> Guyú'u dul-la' yödzülió ni tu' nözi le benë' tuzë' bönni', ate' tu' benë' dul-la', guyú'u ca' yöl-la' guti. Que lë ni na' ilátigaca yúgu'të bönachi tu' nabága'gaca yúgu'të bönachi dul-la'. <sup>13</sup> Zí'atëlö ga bidxintë xibá queë' Dios, gulún bönachi yödzülió ni dul-la', pero biti' busubáguë'ë Dios bönachi na' xíguia' ca nupa ta'dá'baga' xibá queë' tu' nözi dul-la' na', tu' biti' ridxini xibá queë' quégaquië'. <sup>14</sup> Ga gudela' zoë' Adán ga bidxintë zoë' Moisés gulati yúgu'të bönachi tu' gula'baga' dul-la', sal-la' biti' gula'dá'baga' tu le gunná bë'ë Dios ca benë' Adán. Nácagaca yúgu'të bönachi tuz len Adán tu' nácagaca zxi'ini xi'sóë'. Lë ni rulu'i rë'u ca ilaca tuz len Cristo yúgu'të nupa ila'yéajlë' Lë'.

<sup>15</sup> Le rúnнасë' queëru' Dios biti' naca ca le guca queëru' tu' nözi dul-la' benë' Adán. Tu' nözi dul-la' benë' tuzë' bönni', ilátigaca yúgu'të bönachi. Dxí'atërö naca le ruzá' lãdxë'ë queëru' Dios, en le rúnнасë' queëru'. Ruzá' lãdxë'ë queëru' lë ni ni'a que le benë' yetuzë' Bönni', Jesucristo. <sup>16</sup> Le rúnнасë' Dios queëru' biti' naca ca le guca queëru' tu' nözi dul-la' na' benë' tuzë' bönni' na'. Le guchúguië' Dios queë' Adán gátië' tu' nözi dul-la' na' benë', guchúguië' ca' Dios quégaca yúgu'të bönachi gátigaca. Le rúnнасë' Dios queëru' naca para huóácaru' tsahui' lahuë' Lë' sal-la' nabága'ru' dul-la' zían. <sup>17</sup> Guyú'u yöl-la' guti tu' nözi dul-la' benë' tuzë' bönni'. Nácatërö löza ila'deli' yöl-la' na'bán nupa ulu'huóáca tsahui' lahuë' Dios tu' zoa le ruzá' lãdxë'ë queëru' Dios ni'a que le benë' yetuzë' Bönni', Jesucristo.

<sup>18</sup> Dios guchúguië' quégaca yúgu'të bönachi ilátigaca tu' nözi dul-la' benë' tuzë' bönni' na'. Lëasca' caní gaca ulu'huóáca tsahui' yúgu'të bönachi ni'a que le naca tsahui' benë' yetuzë' Bönni' na', gata' yöl-la' na'bán idú quégaquië'. <sup>19</sup> Bulu'huóáca huen dul-la' bönachi zían tu' cabí benë' tuzë' bönni' ca rna xtídzë'ë Dios. Lëasca' caní ulu'huóáca tsahui' bönachi tu' benë' yetuzë' Bönni' na' ca rna xtídzë'ë Dios.

<sup>20</sup> Guyú'u xibá queë' Dios yödzülió ni para gaca bë'da' nabága'gaca bönachi dul-la'. Tu' guca bë'rö nabága'gaca dul-la', guca bë'rö ca' zxöntërö naca le buzá' lãdxë'ë Dios quégaca bönachi. <sup>21</sup> Guta' yöl-la' huáca unná bë' que dul-la' guti rë'u. Lëasca' caní le ruzá' lãdxë'ë Dios queëru' napa yöl-la' huáca gun ga huóácaru' tsahui' lahuë' Lë', ate' gata' yöl-la' na'bán idú queëru' ni'a que le benë' Xanru' Jesucristo.

## 6

*Naca tsca chinátiru' para cabirö gunru' dul-la' tu' nabániru'-në' Jesucristo*

<sup>1</sup> ¿Bizxi caz innaru' na'a? ¿Naru' gúntsaru' dul-la' para gáta'rö queëru' le ruzá' ládxë'ë Dios queëru'? <sup>2</sup> ¡Biti' gun cázaru' ca! Naca queëru' ca tsaz chinati cázaru' para cabirö gunru' dul-la'. ¿Naru' gúntica'siru' dul-la'? <sup>3</sup> ¿Naru' cabí nözili' ca na' naca queëru'? Channö bidílaru' nisa para huóácaru' tuz len Cristo, læ na' bidílaru' nisa rulu'i rë'u chigudödiru' lu yöl-la' guti tsözxön len Lë'. <sup>4</sup> Ca na' guca, gútilenru'-në' Cristo tsözxön, læsca' caní bigáchi'lenru'-në' tsözxön niu' yeru ba cate' ni' bidílaru' nisa. Ca na' busubanë' Dios Cristo lu yöl-la' guti len yöl-la' huáca zxön queë', læs caní ca' rë'u nubánlenru'-në' Jesús tsözxön para gácaru' bönachi idútë cubi queë'.

<sup>5</sup> Channö nunru' Cristo tsözxön, gútiru' ca na' gútië' Lë', læsca' caní gunru'-në' tsözxön, ubanru' lu yöl-la' guti ca na' bubanë' Lë'. <sup>6</sup> Chinöz quéziru' læ ni, yöl-la' bönachi queëru' le guzóa zí'alö gudá'len Lë' tsözxön læ'e yaga cruz, para initi yöl-la' bönachi queëru' na' bénlenru' le dul-la', para cabirö inná be'e le naca dul-la' rë'u. <sup>7</sup> Channö nácaru' tuz len Nu na' guti tu' nözi dul-la', nuhuóácaru' tsahui' lahuë' Dios tu' cabirö nabágaru' dul-la' na', ate' bítirö yú'uru' lu na' dul-la'. <sup>8</sup> Na'a, channö nátilenru'-në' Cristo tsözxön, réajlë'ëru' ubánlenru'-në' ca' tsözxön, <sup>9</sup> tu' chinöziru' bubanë' Cristo lu yöl-la' guti, en bítirö gátie'. Que læ ni na' bítirö bi gaca gun yöl-la' guti na' queë' Lë'. <sup>10</sup> Ca na' guca, gútië' Lë', tu luzuísö gútië' tu' nözi dul-la' quégaca yúgu'të bönachi, pero ca na' naca, zoë' nabanë', nabánlenë' Dios. <sup>11</sup> Lësca' caní ral-la' usáca'li' queëli' naca queëli' ca chinati cázali' para cabirö gunli' dul-la', pero zóali' nabanli' para gunli' ca rna xtídzë'ë Dios tu' nácali' tuz len Xanru' Jesucristo.

<sup>12</sup> Que læ ni na', bití' gü'ili' lataj le naca dul-la', para cabí gun ga gunli' dul-la' lu le naca cázali' le gati caz. Bití' gunli' ca naca le rizë ládxi'li' le ruá' dö', lu le naca cázali'. <sup>13</sup> Bití' udödi cuinli' lu dul-la', bití' gunli' le ruá' dö', pero guli'dödi cuinli' lu në'ë Dios tu' nubanli' lu yöl-la' guti, en guli'dödi lu në'ë idútë le naca cázali' para ugúnlenë' le le naca dxi'a. <sup>14</sup> Bití' gü'ili' lataj le naca dul-la', para cabí gun ga gunli' dul-la', tu' nuzóë' Dios libí'ili', calëga para inná be'e libí'ili' xibá queë', pero para inná be'e libí'ili' le ruzá' ládxë'ë queëru'.

*Le rucudzu' didza' ca naca que nu bönni' nadó'o*

<sup>15</sup> ¿Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queë' Dios rë'u, pero rinná be'e le ruzá' ládxë'ë Dios rë'u? ¡Biti' ca' gunru' caní! <sup>16</sup> Chinöz quézili'

dxi'a channö udödi cuinli' lu nëë nu bönni' para gácali' bönni' nadó'ogaca queë', en gunli' ca rRNA xtídzë'ë, tsaz nácali' bönni' nadó'ogaca queë' bönni' na' runli' ca rRNA xtídzë'ë. Lësca' caní gaca channö udödi cuinli' para gunli' dul-la' le gun ga gátili', o channö udödi cuinli' para gunli' ca rRNA xtídzë'ë Dios, Nu gun ga huóacali' tsahui'. <sup>17</sup> Na'a, ¡Xclenë' Dios! Sal-la' zí'alö gúcali' bönni' nadó'ogaca lu na' dul-la', na'a idú ládxi'li' runli' ca rinná bē' xibá na' budödi cuinli' lu në'e. <sup>18</sup> Tu' chinulali' lu na' dul-la', nuhuóacali' ca yugu' bönni' nadó'ogaca lu na' le naca dxi'a. <sup>19</sup> (Ru'ílena' libí'ili' didza' ca tu'í didza' bönachi, tu' cabí réajni'ili' idútë lu yöl-la' bönachi queéli'.) Zí'alö budödi cuinli' len idútë le naca cázali' lu na' le ruá' dö', en lu na' le cabí naca tsahui', ate' gúcali' ca yugu' bönni' nadó'ogaca lu në'eguequi, en benli' xichini le ruá' dö' na'. Na'a, guli'dödi idútë le naca cázali' lu na' le naca tsahui', para gácali' ca yugu' bönni' nadó'ogaca lu në'e, en gunli' xichini lë na' naca tsahui' para gácali' bönachi narúajgaca quez queë' Dios.

<sup>20</sup> Cate' ni' nácali' ca yugu' bönni' nadó'ogaca lu na' dul-la', bití' benli' xichini le naca tsahui'. <sup>21</sup> Na'a, ¿naru' buzí'itsali' xibé lë na' benli' zí'alö? Na'a lë na' benli' run ga rutuí'ili', en run ga nu gati tsaz. <sup>22</sup> Na'a chinulali' lu na' dul-la', en nácali' ca yugu' bönni' nadó'ogaca queë' Dios, en ruzí'ili' xibé le run ga nácali' bönachi narúajgaca quez queë' Dios, en le run ga dë queéli' yöl-la' na'bán idú. <sup>23</sup> Lazxaj nu run dul-la' naca yöl-la' guti, pero le rúnmasë' Dios queëru' naca yöl-la' na'bán idú, le rata' queëru' tu' nácaru' tuz len Xanru' Jesucristo.

## 7

### *Le rucudzu' didza' yöl-la' nutsaga na'*

<sup>1</sup> Böcha'ado', núlöli' núnbë'ëli' xibá queë' Dios. Nöz quézili' rinná be'e xibá na' nu bönni' tsanni ni zoë' nabanë'. <sup>2</sup> Naca queéli' ca naca que tu nigula nutsaga ná'lennu-në' bönni', yú'unu lu nëë bönni' queënu tsanni ni zoë' nabanë' ca rinná bē' xibá que yöl-la' nutsaga na', pero channö chinátie', nurúajnu lu na' xibá na'. <sup>3</sup> Caní naca, tsanni ni zoë' nabanë' bönni' queënu, channö utsaga ná'lennu-në' ia'tué' bönni', gunnu dul-la' le riguitsaj xibá que yöl-la' nutsaga na', pero channö chinátie' bönni' queënu na', nurúajnu lu na' xibá na', ate' na'a, channö utsaga ná'lennu-në' nu bönni' yúbölö, bití' gunnu dul-la' le riguitsaj xibá que yöl-la' nutsaga na'.

<sup>4</sup> Lësca' caní raca queéli', böcha'a. Tu' dzágali'-në' Cristo chinati cázali' libí'ili' para cabirö inná be'e libí'ili' le rinná bē' xibá na', para guéquili' que Nu yúbölö. Na'a chinéquili' queë' Cristo, Nu na' bubán lu yöl-la' guti. Caní naca, para gaca

gunru' le raza ládxëë Dios. <sup>5</sup> Tsanni ni' guyú'uru' lu na' yöl-la' bönáchisö queëru', le rinná bë' xibá na' ben ga gulaca bë' le guzë ládxí'ru' le ruá' dö', le gulún dxin lu idútë le naca cázaru' para ilún ga gátiru'. <sup>6</sup> Na'a nuláru' lu na' xibá na' tu' nati cázaru' tsca naca le rinná bë' xibá na' gunná be'e rë'u zí'alö. Caní naca para gaca gunru' xichinë' Dios lu yöl-la' na'bán cubi le runnë' queëru' Dios Bö' Lá'ayi, en calëga gunru' xichinë' lu lë na' chinaca gula, le naca xibá na'.

*Le dzaga neda' le naca dul-la'*

<sup>7</sup> ¿Bizxi caz innaru' na'a? ¿Naru' runtsö xibá queë' Dios ga runa' dul-la'? ¿Biti' ca' run caní! La'tu' cabí buzëajni'i le rinná bë' xibá na' neda', bití' gunözda' naca dul-la' le runa'. La'tu' cabí zoa lu xibá na' le rnna: "Biti' së ládxu'u le dë que luzó'o", bití' gunözda' naca dul-la' yöl-la' rizë ladxi' le dë que luzá'a. <sup>8</sup> Cate' bidxín quia' xibá na', guca bë' le naca dul-la' na' run dxin lu idútë le naca', ate' ben ga gúquibe'eda' rizë ládxa'a yúgu'të le ruá' dö'. Ga bití' ridxini xibá na', bití' naca bë' le naca dul-la'. <sup>9</sup> Dza ni'te, zí'atëlö ga bidxín quia' xibá queë' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'. <sup>10</sup> Dios gunná bë'ë xibá na' para gun ga gata' queëru' yöl-la' na'bán, pero ben ga gúquibe'eda' chinati caza'. <sup>11</sup> Guca bë' nazí' yé'eda' ca naca dul-la', tu' ben xibá na' ga gúquibe'eda' nabága'a dul-la', en ralla' gátia'.

<sup>12</sup> Que lë ni na', lá'ayi naca xibá queë' Dios, ate' lá'ayi, en tsahui', en dxi'a naca le gunná bë'ë. <sup>13</sup> ¿Naru' bentsö lë na' naca dxi'a ga bidxín quia' yöl-la' guti? ¿Biti' ca' naca ca'! Le naca dul-la' bugún dxin lë na' naca dxi'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatërö xihui' yúgu'të le naca dul-la'.

<sup>14</sup> Nöziru' Dios Bö' Lá'ayi bennë' queëru' xibá na', pero neda' naca' bönáchisö, en yu'a lu na' dul-la' ca tu bönni' nadó'o que. <sup>15</sup> Na'a, bití' réajni'ida' le runa'. Rë'ënda' guna' ca rinná bë' xibá na', pero bití' runa' lë na' rë'ënda' guna'. Le naca dul-la' le cabí rilé'eda' dxi'a, lë na' runa'. <sup>16</sup> Runa' dul-la' sal-la' bití' rë'ënda' guna' dul-la' na'. Xibá na' rusëdi neda' naca dul-la' le cabí naca dxi'a. Que lë ni na' naca bë'da' naca dxi'a le rinná bë' xibá na'. <sup>17</sup> Caní naca, calëga néda'sö runa' dul-la' na', pero dul-la' na' dzaga neda' run ga runa' dul-la' na'. <sup>18</sup> Nözda' bití' zóalen neda' le naca dxi'a, o huáca innía', lë na' naca dxi'a bití' zóalen le naca yöl-la' bönáchisö quia'. Rë'ënda' guna' le naca dxi'a, pero la' néda'sö bití' gaca guna' lë na' naca dxi'a. <sup>19</sup> Bití' runa' le naca dxi'a le rë'ënda' guna', pero rúntica'sa' le bití' naca dxi'a le cabí rë'ënda' guna'. <sup>20</sup> Que lë ni na', channö

runa' dul-la' na' biti' rě'enda' guna', calëga neda' caz runa' le, pero dul-la' na' dzaga neda' run ga runa' dul-la' na'.

<sup>21</sup> Caní naca le raca queëru' yúgu'tëru'. Cate' rě'ëni ru' gunru' le naca dxi'a, dzaga rě'u le run ga runru' le ruá' dö'. <sup>22</sup> Lu icja ládxi'da'ahua' raza ládxa'a xibá queë' Dios <sup>23</sup> pero réquibe'eda' dzaga idútë le naca' le rinná be'e neda', ate' lë ni ridá'baga' xibá queë' Dios yu'u icja ládxi'da'ahua'. Lë na' dzaga idútë le naca' run ga runa' dul-la'.

<sup>24</sup> ¡Bica' bayechi' neda'! ¿Nuzxi caz gaca usölá neda' lu yöl-la' bönáchisö quia' le run ga runa' dul-la'? <sup>25</sup> ¡Xclenë' Dios, chinularu' na'a ni'a que le benë' Xanru' Jesucristo! Que lë ni na', tsca naca le yu'u icja ládxi'da'ahua' runa' ca rinná bë' xibá queë' Dios, sal-la' yöl-la' bönáchisö quia' run ga rě'enda' guna' dul-la'.

## 8

### *Le runru' tu' zóalenë' Dios Bö' Lá'ayi rě'u*

<sup>1</sup> Que lë ni na', bíti'rö bi xíguia' nabága'gaquië' yugu' bönni' néquiguequinë' queë' Jesucristo, bönni' na' bíti'rö tunë' ca rě'ëni yöl-la' bönáchisö quégaquië', pero ca rě'ënë' Dios Bö' Lá'ayi tunë'. <sup>2</sup> Tu' naca' tuz len Jesucristo, Dios Bö' Lá'ayi, Nu na' nabániru', rácalenë' neda'. Que lë ni na', nulá' lu lë na' ben ga bena' dul-la', enca' lu yöl-la' guti. <sup>3</sup> Chinunë' Dios le cabí guca gun xibá na', tu' cabí bi guzxéqui' gun tu' nácaru' bönáchisö. Dios gusöl-lë'e Zxí'ini cazë', ate' gulgjë' bönachi ca nácaru' rě'u, nácaru' bönachi dul-la', pero biti' bi dul-la' benë' Lë'. Busubaga' cuinë' dul-la' nabága'ru' rě'u, ate' caní guca, guchúguië' que dul-la' runru' lu yöl-la' bönáchisö queëru'. <sup>4</sup> Caní benë' para gaca gunru' idútë le naca tsahui' le rinná bë' xibá queë', nálöru' na' bíti'rö runru' ca rě'ëni yöl-la' bönáchisö queëru', pero ca rě'ënë' Dios Bö' Lá'ayi runru'.

<sup>5</sup> Bönni' tunë' ca rě'ëni yöl-la' bönáchisö quégaquië', tu'í ládxi'gaquië' le naca que yöl-la' bönáchisö quégaquië', pero bönni' tunë' ca rě'ënë' Dios Bö' Lá'ayi, tu'í ládxi'gaquië' le naca queë' Dios Bö' Lá'ayi. <sup>6</sup> Channö ru'í ládxi'siru' le naca que yöl-la' bönáchisö queëru', tsaz gátiru', pero channö ru'í ládxi'ru' le naca queë' Dios Bö' Lá'ayi, chidé yöl-la' na'bán idú queëru', en ribózaru' dxi ládxi'. <sup>7</sup> Núti'tës nu ru'í ládxi'sö le naca que yöl-la' bönáchisö que, biti' rilé'e Dios dxi'a, tu' cabí run nu na' ca rinná bë' xibá queë' Dios, en biti' ca' gaca gun caní. <sup>8</sup> Que lë ni na', bönni' na' tunë' ca rě'ëni yöl-la' bönáchisö quégaquië' biti' gaca ilunë' le raza ládxi'e Dios.

<sup>9</sup> Na'a, bíti'rö runli' ca rě'ëni yöl-la' bönáchisö queëli', pero runli' ca rě'ënë' Dios Bö' Lá'ayi tu' zóalen cazë' Lë' libí'ili'. Tu bönni' biti' zóalenë' Dios Bö' Lá'ayi lë', Nu na' risöl-lë'e

Cristo queëru', biti' néquinë' queë' Cristo. <sup>10</sup> Tu' zóalenë' Cristo libí'ili', chinati caz idútë le guca cázali' tu' nözi dul-la', ate' na'a nabánili'-në' Dios Bö' Lá'ayi tu' nunë' Dios libí'ili' tsahui'. <sup>11</sup> Bö' Lá'ayi queë' Dios, Nu na' busubán Jesús lu yöl-la' guti, zóalenë' libí'ili'. Lë cazë' Dios, Nu busubán Jesucristo lu yöl-la' guti, runë' ga nubanli' lu idútë le gúcali' le rati caz. Caní nunë' tu' zóalenë' Dios Bö' Lá'ayi libí'ili'.

<sup>12</sup> Que lë ni na', libí'ili' böcha'a, dë tu le ral-la'ru', pero calëga que yöl-la' bönáchisö queëru', para cabirö gunru' ca rë'ëni yöl-la' bönáchisö queëru' na'. <sup>13</sup> Channö runli' ca rë'ëni yöl-la' bönáchisö queëli', gátili' tsaz, pero channö len yöl-la' huáca queë' Dios Bö' Lá'ayi runli' ga ila'niti le runli' lu yöl-la' bönáchisö queëli', gata' yöl-la' na'bán idú queëli'.

<sup>14</sup> Yúgu'të nupa tun ca rë'ënë' Dios Bö' Lá'ayi nácgaca zxí'inë' Dios. <sup>15</sup> Dios Bö' Lá'ayi na' zóalenë' libí'ili' biti' nuzóë' libí'ili' leyúbölö ca bönni' nadó'ogaca para gadxi idzöbili', pero chinunë' ga nácali' zxí'inë' Dios caz, en runë' ca' ga rulídzaru'-në' Dios, rnnaru': "Abba", le rnna: Dad. <sup>16</sup> Lë cazë' Dios Bö' Lá'ayi ruzéajni'inë' bö' naca cázaru', en runë' ga nöziru' nácaru' zxí'inë' Dios. <sup>17</sup> Channö chinácaru' zxí'inë' Dios, gata' ca' queëru' tsözxön len Cristo le nequi queë' Xúziru' Dios. Caní gaca queëru' channö riguí'i rizáca'lenru'-në' tsözxön Cristo para uzí'iru' xibé tsözxön len Cristo yöl-la' zxön queë' Dios.

<sup>18</sup> Runi neda', yugu' lë ni riguí'i rizáca'ru' na'a naca tu le cuídi'do'os tsca naca yöl-la' zxön na' gata' queëru' dza si' za'. <sup>19</sup> Ta'böza yúgu'të le nunë' Dios, en ta'zë ládxi'gaca idxintë dza na' ulu'ë lahui Dios yugu' bönni' nácgacquië' zxí'ini cazë'. <sup>20</sup> Yúgu'të lë na' nunë' Dios gula'dödi lu na' le run ga ila'niti, calëga tu' gulë'ëni caz gaca caní, pero tu' benë' Dios ga naca caní. Benë' ca' ga naca löza que idútë lë na' nunë', <sup>21</sup> ate' ulu'lágaca yúgu'të le nunë' Dios lu lë na' run ga ila'niti. Caní gaca, yúgu'të lë na' ulu'zi' ca' xibé yöl-la' rusölá le nazáca'da' na' ulu'zi'ë xibé yugu' zxí'inë' Dios. <sup>22</sup> Nöziru' ta'guí'i ta'zaca' yúgu'të le nunë' Dios ga ridxintë na'a dza, ca na' riguí'i rizáca'nu tu nigula chizóa sóabi' bí'ido' queënu. <sup>23</sup> Riguí'i rizáca'a, calëgasö yödzölió ni, pero riguí'i rizáca'ru' ca' rë'u, sal-la' zóalenë' Dios Bö' Lá'ayi rë'u, Nu na' naca queëru' le rulu'i rë'u ca ral-la' gaca cázaru'. Riguí'i rizáca'ru' tsanni ni ribözaru' dza ni' ulu'ë lahui Dios nácaru' idú zxí'inë', dza ni' únë' ca' idútë le naca cázaru'. <sup>24</sup> Tu' runru' löza lë ni, nuláru' rë'u, pero channö gaca ilé'eru' lë na' runru' löza, biti' naca tu le ribözaru'. Biti' ribözaru' le chirilé'eru'. <sup>25</sup> Na'a, channö runru' löza tu le cabí gaca ilé'eru', lu yöl-la' riböza zxön ladxi' ribözaru' le.



26 Lësca' caní rácalenë' Dios Bö' Lá'ayi rë'u cate' rudú ládxi'ru', tu' cabí nõziru' bi ral-la' inábiru'-në' Dios, pero Lë cazë' Dios Bö' Lá'ayi rudödë' xtídza'ru' lahuë' Dios, ate' lu yöl-la' rinaba yudxi queë' rinnëda' ládxë'ë, tsca cabí gaca nu inná. 27 Dios ruyúë' le yu'u icja ládxi'do'gaca bõnachi, en nõzinë' le rë'ënë' innë' Dios Bö' Lá'ayi na', ate' Lë', ca rë'ëni quëzinë' Dios, rudödë' xtídza'gaca nupa néquiquequi quez queë' Cristo lahuë' Dios.

*Nadëli'tëröru' tu' zóalenë' Cristo rë'u*

28 Nõziru' tu'zi'ë xibé bõnni' yúgu'të le raca quëgaquië', bõnni' na' nadxí'iguequinë' Dios, ate' bulidzë' Dios légaquië' ca nuzóa cazë' gunë'. 29 Yugu' bõnni' na' gurõ cazë' queë' Dios zí'atëlö, buzóë' ca' quëgaquië' zí'atëlö ilácagaquië' ca naca cazë' Zxí'inë', para gáquië' Zxí'inë' lo ladaj zían bõchë'ë. 30 Nupa na' buzóë' Dios quëgaquië' zí'atëlö ca ral-la' ilácagaquië', bulidzë' ca' légaquië', ate' yugu' bõnni' na' bulidzë', benë' légaquië' tsahui', ate' yugu' bõnni' na' benë' légaquië' tsahui', benë' ga tu'zi'ë ca' xibé yöl-la' zxõn queë'.

31 ¿Bizxi caz innaru' na'a ca nácgaca lë ni? Channö rácalenë' Dios rë'u, bití' ral-la' gádxiru' sal-la' bi ilún bõnachi queëru'. 32 Dios, idú ládxë'ë bennë' queëru' Zxí'ini cazë'. Budödë' lë' para gútië' uláz queëru'. Channö caní benë' Dios, ¿naru' cabí gúnnadë'ë queëru' tsõzxõn len Zxí'inë' yúgu'të le dë? 33 ¿Nuzxi caz gaca bí usubaga' nupa na' gurõ cazë' queë' Dios? ¿Cuntu nu gaca, tu' run cazë' Dios ga nuhuóácaru' tsahui'! 34 ¿Nuzxi caz gaca ichugu queëru' gátiru'? ¿Cuntu nu gaca, tu' guti cazë' Cristo uláz queëru', en le nácarö lo, bubanë' lu yöl-la' guti, ate' na'a zoë' cuita lë'ë ibëla Dios ga nácatërë' zxõn, ate' rnnë' dxi'a uláz queëru' lahuë' Dios! 35 Sal-la' bi raca queëru', nõz quëziru' nadxí'inë' Cristo rë'u. Nõziru' nadxí'inë' rë'u: sal-la' riguí' rizáca'ru', o sal-la' risëbi ládxi'ru', o sal-la' ta'bía ládxi'gaca bõnachi rë'u, o sal-la' ridunru', o sal-la' riyadzaj le gácuru', o sal-la' zoa bõnadxi queëru', o sal-la' ilútië' bõnni' rë'u.

36 Ca nácgaca lë ni nazúaj lu guichi lá'ayi, rnna: Tu' néquitu' quiu' Li', túntica'sõ bõnachi ga gátitu'. Nácatu' ca yugu' bö'cu' zxila', nadõdigacaba' lu na' nu guti légacaba'.

37 Na'a, tu' zóalen rë'u Nu na' nadxí'i rë'u, nácatërö löza idéli'ru' lu le raca queëru'. 38-39 Que lë ni na' runi neda': Bití' bi sequi' gun ga bíti'rö idxí'inë' Dios rë'u. Nadxí'inë' rë'u tu' néquiru' queë' Xanru' Jesucristo. Bití' sequi' gun caní yöl-la' guti o yöl-la' na'bán, o yugu' gubáz lá'ayi o nupa ta'nná bë', o yugu' yöl-la' huáca que tu' xihui',

o bíti'tës bi zoa o bíti'tës bi si' za',  
o tu le dë xitsá'alö o tu le dë cadxi'ilö,  
o bíti'tës bi nunë' Dios.

## 9

### *Dios gurö cazë' queë' bönachi Israel*

<sup>1</sup> Ruá'a didza' idútë li tu' néquida' queë' Cristo, ate' röjölöz didza' ni le naca queë' Dios Bö' Lá'ayi le yu'u icja ládxi'da'ahua'. ¡Biti' rizi' yë'a! <sup>2</sup> Ruhuí'inide'eda', en risëbitica'sö ládxa'a <sup>3</sup> tu' raca ládxa'a guna' ga ulu'lë' böchi' luzá'a, bönni' uládz quia'. La'tu' huácalen légaquië', guë'ëni quézida' ubéaj ládxe'ë Dios neda', en ulá'alena' Cristo. <sup>4</sup> Yugu' bönni' uládz quia' na' nácagaquië' xzí'ini xi'sóë' Israel, ate' Dios bë'ë légaquië' lataj ilácagaquië' xzí'ini cazë'. Yöl-la' xzön queë' Dios guzóalen légaquië', ate' Dios budödë' lu ná'agaquië' didza' rucá'ana tsahui', enca' xibá queë'. Bulidzë' légaquië' para tseaj ládxi'gaquië' Lë', ate' budödë' lu ná'agaquië' yugu' le guxzí' lu në'ë gunë' le ilún tsahui' bönachi. <sup>5</sup> Nácagaquië' xzí'ini xi'sóagaquië' xuz xtó'otu' Abraham, en Isaac, en Jacob, ate' ladaj di'a dza quégaquië', ca naca yöl-la' bönachi queë', guljë' Cristo, Nu naca caz Dios, en rinná bé'enë' yúgu'të. ¡Rácatica'sö queë' yöl-la' ba! ¡Ca' gaca!

<sup>6</sup> Sal-la' yúgu'të bönni' uládz quia' biti' nazi' lu ná'agaquië' Cristo, biti' ral-la' innaru': Nítisö böáca xtídzë'ë Dios. Calëga yúgu'të xzí'ini xi'sóë' Israel nácagaquië' idú bönachi Israel, nupa néquiguequi queë' Dios. <sup>7</sup> Sal-la' gúljagaquië' zían xzí'ini xi'sóë' Abraham, biti' guláquië' yúgu'të idú xzí'ini xi'sóë' Abraham, pero guca ca na' nazúaj lu guichi lá'ayi, le rnna: "Yugu' xzí'ini xi'sóë' Isaac ilaca idú xzí'ini xi'sú'." <sup>8</sup> Caní naca, nupa nácagaca xzí'inë' tu bönni' néquinë' queë' Dios, calëga yúgu'të nácagaquië' xzí'inë' Dios. Lësca' caní, nácagaca idú xzí'ini xi'sóë' Abraham núpasö na' náljagaca ni'a que lë na' guxzí' lu në'ë Dios. <sup>9</sup> Lë na' guxzí' lu në'ë Dios unödzejë' queë' Abraham rnna caní: "Ia'tú iz na'a dza huöda', ate' Sara quiu' uzóanu-bi' tubi' bi'i bönni'do'."

<sup>10</sup> Calëgasö lë ni guca caní, pero lësca' cate' Rebeca ni nuá'anu-bi' yugu' bi'i bönni'do' queë' Isaac, xuz xtó'otu', <sup>11-13</sup> cate' ni' si' iláljabi', en biti' bi núnigacabi' le naca dxi'a o le ruá' dö', Dios gudxe'-nu Rebeca na', gunné': "Bi'i bönni' zí'alö quiu' gunbi' xichinbi' bi'i buropi." Didza' ni röjölöz lë na' nazúaj lu guichi ca gunné' Dios, le rnna: "Bidxi'ida'-në' Jacob, en calëga Esaú." Caní guca, bugá'ana tsutsu le buzóë' tsaz Dios ca naca lë na' chiguró cazë'. Que lë ni na' biti' raca caní ni'a que tu le gaca ilún bönachi, pero naca caní tu' ribö cazë' Dios nu rulidzë'.

<sup>14</sup> ¿Bizxi caz innaru' na'a? ¿Naru' runtsë' Dios le cabí naca tsahui'? ¿Biti' ca' runë' caní! <sup>15</sup> Dios gudxë' Moisés, gunnë': "Huéchi' ládxa'a nu rë'ënda' huéchi' ládxa'a, en gü'i ládxa'a nu rë'ënda' gü'i ládxa'a." <sup>16</sup> Que lë ni na', biti' raca caní ni'a que le të'ëni caz bönachi, o tu' runë' bayudxi nu bönni', pero naca tu' rë'ëni quézinë' Dios, ruhuéchi' ládxe'ë bönachi. <sup>17</sup> Ca naca lë ni nazúaj lu guichi lá'ayi ca na' Dios gudxë' Faraón, gunnë': "Que lë ni na' buzóa' li' ga rinná bë'u para ulu'a lahui yöl-la' huáca quia' ga zu', en guna' ga ilunbë' bönachi idútë yödzülió le naca' neda'." <sup>18</sup> Caní naca, Dios ruhuéchi' ládxe'ë nu rë'ëni quézinë', en lësca' caní runë' zidzaj icja ládxi'da'ahuë' nu bönni' rë'ëne' gunë' zidzaj icja ládxi'da'ahuë' bönni' na', ca na' benë' queë' Faraón na'.

<sup>19</sup> Na'a guiëli' neda': "Channö caní naca, ¿bizx que rusubáguë'ë Dios bönachi xíguia'? ¿Nuzxi caz gaca tá'baga' le rë'ëni quézinë' Dios gunë'?" <sup>20</sup> ¿Biti' ca' naca caní! ¿Nuzxi caz li' rnnió' que Dios? ¿Naru' huácatsö tu yusu' néquini yu guië bönni' huen rö'ö, inná: "¿Bizx que benu' neda' caní?" <sup>21</sup> ¿Naru' cabí dë lu në'ë bönni' huen rö'ö gunë' que guna' na' tu yusu' nu ugún le dxin ga liná', en que la' guna' ná'asö gunë' ia'tú yusu' nu ugún le dxin ga biti' naca liná'?

<sup>22</sup> Rë'ëni quézinë' Dios ulu'ë lahui ca gunë' xíguia' nu ruá' dö' en gunë' ga gaca bë' yöl-la' huáca queë', pero lu yöl-la' riböza zxön ladxi' queë' biá' gulënë' yugu' bönni' ni' ral-la' ichúguië' quégaquië', yugu' bönni' na' nabága'gaquië' xíguia', en run bayudxi usunítië' légaquië'. <sup>23</sup> Caní runë' Dios para gaca bë' nácatërö lesaca' yöl-la' ruzá' ladxi' queë', lë na' rulu'ë lahui lógaca nupa na' ruhuéchi' ládxe'ë, bönni' na' buzóë' quégaquië' zí'atëlö ulu'zi'ë xibé yöl-la' zxön queë'. <sup>24</sup> Yugu' bönni' caní bulidzë' Dios. Calégasö bulidzë' netu', bönachi judío, pero lësca' bulidzë' bönachi izá'a. <sup>25</sup> Ca naca lë ni nazúaj lu guichi lá'ayi ca na' bë'ë didza' Oseas uláz queë' Dios, gunnë':

Nupa biti' nácgaca bönachi quia',

gu'a láguequi: Bönachi quia',

ate' nupa na' biti' bidxí'ida',

gu'a láguequi: Nupa nadxí'ida'.

<sup>26</sup> La' ná'asö ga gunnía' quéguequi:

"Biti' nácali' bönachi quia'",

si' láguequi: "Yugu' xzí'inë' Dios ban."

<sup>27</sup> Na'a, ca naca quégaca xzí'ini xi'sóë' Israel, Isaías gunnë':

Sal-la' ila'yanë' xzí'ini xi'sóë' Israel,

en iláquië' tsa naca yuzxi tu ra' yegu zxön,

ulu'lë' nabábasë'.

<sup>28</sup> Xanru' Dios la' guntë' ga gaca idútë

lë na' ichúguië' quégaca bönachi yödzülió ni.

<sup>29</sup> Lësca' caní Isaías bë'ë didza' zí'atëlö, gunnë':  
Dios, Xanru' unná bë' idú,  
la'tu' cabí buca'anë' queëru' yugu' zxi'ini xi'sóaru',  
ugá'anaru' ca yödzö Sodoma, en yödzö Gomorra,  
yugu' yödzö na' busunítië' Dios.

*Bönachi Israel, en didza' dxi'a*

<sup>30</sup> ¿Bizxi caz innaru' na'a? Yugu' bönni' biti' nabábagaquië'  
Israel chibila'déli'në' nuhuóácagaquië' tsahui' lahuë' Dios, en  
biti' gulunë' bayudxi ulu'huóáquië' tsahui' lahuë' Dios, pero  
nuhuóácagaquië' tsahui' tu' ta'yéajlë'ë Dios. <sup>31</sup> Na'a, sal-la'  
gulunë' bayudxi yugu' bönni' Israel ilunë' ca rinná bë' xibá  
queë' Dios, le ral-la' gun ga ilácagaquië' tsahui', biti' bila'déli'në'  
le ral-la' gata' quégaquië' tu' tunë' ca rinná bë' xibá na'. <sup>32</sup> ¿Bizx  
que na' guca caní? Caní guca, tu' cabí gulunë' caní lu yöl-  
la' réajlë' quégaquië' Dios, pero rácasö quégaquië' gulë'ënnë'  
ilunë' ca rinná bë' xibá na', ate' que lë ni na' gula'chíxinë', o  
huáca innaru': Yöjchëgu'gaquië' lu lë na' nazí'i le: Guiöj Ga Nu  
Röjchegu'. <sup>33</sup> Ca naca lë ni nazúaj lu guichi lá'ayi, rnna:  
¡Buli'yú! Uzóa'-në' yödzö Sión bönni' na'  
gáquië' ca tu guiöj ga nu tsöjchegu',  
guiöj na' gun ga nu ichixi inigui.  
Nu tséajlë' Lë', biti' ca' utuí'i nu na'.

## 10

<sup>1</sup> Libí'ili', böcha'ado', le rizé ládxa'a, en le rinábida'-në' Dios  
gunë' quégaca bönachi Israel naca gunë' ga ulu'lë'. <sup>2</sup> Runa' ba  
nalí quégaquië', idú ládxi'gaquië' tu'í ládxi'gaquië' Dios, pero  
calëga len yöl-la' réajni'í idú. <sup>3</sup> Biti' nözguequinë' ca runë' Dios,  
runsë' ga nácaru' tsahui', pero té'ënnë' ilún cuíngaquië' tsahui'  
rácasö quégaquië', en biti' ta'cu'ë nöxaj ladxi' lahuë' Dios para  
gaca gunë' légaquië' tsahui'. <sup>4</sup> Budxi benë' Cristo le ré'ëni gun  
xibá queë' Moisés, benë' ga gaca ulu'huóáca tsahui' yúgu'të  
nupa ila'yéajlë' Lë'.

<sup>5</sup> Ca naca que nu huóáca tsahui' tu' run ca rinná bë' xibá  
queë' Dios, buzúajë' Moisés lu guichi le rnna caní: "Bönni' na'  
gunë' idútë ca rinná bë' xibá na', soë' ibanë' tu' gunë' caní."  
<sup>6</sup> Na'a, ca naca que nu huóáca tsahui' tu' réajlë' Dios, rnna  
caní: "Biti' innó' lu icja ládxi'do'o, biti' innó': ¿Nuzxi caz cuen  
ni' yehua' yubá?" Lë ni naca, para gun nu na' ga huötjë'  
Cristo, <sup>7</sup> en biti' innó': "¿Nuzxi caz huötaj ga dë lataj que nupa  
chinátigaca?" Lë ni naca, para gun nu na' ga cuenë' Cristo,  
urúajë' lu yöl-la' guti. <sup>8</sup> Na'a, ¿bizxi caz rnna? Caní rnna: "Gala'  
ga zu' zoa caz xtídzë'ë Dios. Lu ru'u, en lu icja ládxi'do'o zoa  
xtídzë'ë na'." Lë ni naca didza' que le réajlë'ëru' Dios runtu'  
libán que, rnnatu': <sup>9</sup> "Channö didza' gu'u gaca bë' Jesús náquië'

Xanu', en uyéaj lè'u idú láchxu'u Dios busubanè' Lè' lu yöl-la' guti, uló' lí'." <sup>10</sup> Lu icja láchxi'do'oru' réajlè'èru' Jesús para gácaru' tshai', ate' len didza' ru'íru', rulu'íru' lahui le náquiè' Jesucristo para uláru'.

<sup>11</sup> Nazúaj lu guichi lá'ayi le rnna: "Biti' ca' ulu'tuf'i yúgu'tè nupa ta'yéajlè' Lè'." <sup>12</sup> Dios, la' tuz ca ru'í láchxè'è yugu' bönni' judío, enca' yugu' bönni' idútè yödzölió, tu' Lè cazè' Xanru' náquiè' Xángaquiè' yúgu'tè', en nápadè'è bi unödzjè' quégaca yúgu'tè nupa tu'lidza Lè'. <sup>13</sup> Ca naca lè ni nazúaj lu guichi lá'ayi, rnna: "Ulu'lá yúgu'tè nupa ulu'lidza Lè' Xanru'."

<sup>14</sup> ¿Nacxi gaca ulu'lidzè' Lè' channö cabí ta'yéajlè'è Lè'? ¿Nacxi gaca ila'yéajlè'è Lè' channö catu caz bila'yönnè' ca naca queè'? ¿Nacxi gaca ila'yönnè' channö cuntú nu zoa nu gun libán lógaquiè'? <sup>15</sup> ¿Nacxi caz gaca ilunè' libán channö cuntú nu isölla' légaquiè'? Ca naca lè ni nazúaj lu guichi, rnna: "Bica' bágaca nupa na' ila'dxinè' ga nacua' bönni' rójéngaquiè' libán que le ribequi dxi láchxi'ru', en tunè' libán que didza' dxi'a."

<sup>16</sup> Na'a, calèga yúgu'tè' gula'zí' lu náagaquiè' didza' dxi'a. Ca naca lè ni, Isaías gunnè': "Xan, ¿nuzxi caz guyéajlè' le bentu' libán que?" <sup>17</sup> Caní naca, ila'yéajlè' Lè' nupa ila'yöni, ate' lè na' ral-la' ila'yöni naca didza' ru'è Cristo.

<sup>18</sup> Na'a rnnía': ¿Naru' cabí bila'yönnè'? Le nácatè bila'yönnè', ca na' nazúaj lu guichi lá'ayi, le rnna: Idútè yödzölió bila'yöni chí'iguequi. Yúgu'tè lataj bila'dxín xtídza'guequi.

<sup>19</sup> Lësca' rnnía': ¿Naru' cabí guléquibe'enè' bönni' Israel lè ni? Le nácatè guléquibe'enè' le. Ga risí lo, bè'è didza' Moisés uláz queè' Dios, gunnè':

Gun caza' ga uzxé'eli,  
tu' idxí'ida' bönachi bití' nabábagaca libí'ili'.

Ni'a quégaca bönachi cabí ta'yéajni'i guna' ga leli'.

<sup>20</sup> Gudödi ni' gúcadè'è rugu ladxi' Isaías na', en bè'è didza' uláz queè' Dios, gunnè':

Bila'dzöli neda' nupa bití' gula'guílaj neda'.

Bulu'í' lahua' lógaquiè' bönni' bití' bí gula'nábinè' neda'.

<sup>21</sup> Na'a, ca naca quégaquiè' bönni' Israel, Isaías na' bè'è didza' uláz queè' Dios, gunnè': "Idú dza bulí na'a, bulidza' bönachi bití' túngaca ca rnna xtídza'a, en ta'dá'bagá' neda'."

## 11

### *Nupa nulágaca ladaj bönachi Israel*

<sup>1</sup> Na'a rnnía': ¿Naru' nusán nè'è Dios bönachi Israel? ¿Biti' ca' naca caní! Neda' caz naca' bönni' Israel. Naca' xzí'ini xí'sóè' Abraham, en nababa' di'a dza queè' Benjamín, xzí'ini cazè' Israel na'. <sup>2</sup> Dios bití' nusán nè'è bönachi queè', nupa

na' gurõ cazë' queë' dza ni'te. ¿Naru' cabí núnbë'ëli' lë na' nazúaj lu guichi lá'ayi ca na' benë' Elías? Bulidzë' Dios, en buzéguië' bönachi Israel didza', gunnë': <sup>3</sup> "Xan, chigulútië' bönni' gulu'ë didza' uláz quiu', en bulu'quinnajë' yugu' bu-cugu lá'ayi quiu' ga buzéguigacatu'-ba' bõa' bëdxido' lo' Li'. Tuza' neda' nagá'ana' quiu', ate' të'ennë' ilútië' ca' neda'."

<sup>4</sup> Na'a, ¿bizxi didza' bubí'ë Dios? Caní gunnë': "Nun chí'igaca caza'-në' quia' tsónnalalaj yu' chi gáyu'ë bönni' bití' tu'zechu zxíbigaquië' lo budó' guiõj na' nazí'i le Baal." <sup>5</sup> Lësca' caní naca dza ni zóaru' na'a, nagá'anagaca bal-la bönachi Israel, nupa na' gurõ cazë' queë' Dios tu' ruzá' lãdxë'ë caní quégaquië'.

<sup>6</sup> Channõ naca le ruzá' lãdxë'ë caní quégaquië', bití' naca ni'a que tu le gaca ilunë'. La'tu' guca ni'a que tu le gaca gunru', lë na' ruzá' lãdxë'ë queëru' Dios bítí'rõ gaca tu le ruzá' lãdxë'ë queëru'.

<sup>7</sup> ¿Bizxi caz innaru' na'a? Lë na' gula'guíljë' bönni' Israel, bití' bila'déli'në', pero chibila'déli' le nupa ni' gurõ cazë' queë' Dios, ate' ia'zica'rë' na', Dios benë' zidi icja lãdxi'do'gaquië'.

<sup>8</sup> Ca naca lë ni nazúaj lu guichi lá'ayi, rnna: "Dios benë' ga nácaquië' chul-la niti." Caní benë', en sal-la' gaca ila'lé'enë' le runë', en ila'yönnë' xtídzë'ë, bití' ca' ta'yéajni'inë'. Caní naca quégaquië' ga ridxintë dza ni zóaru' na'a. <sup>9</sup> Ca naca lë ni bë'ë ca' David didza', gunnë':

Yugu' laní quégaquië' ulu'huõaca le ila'zõn légaquië',  
en ca tu yalaj ga ila'rõlinë'.

Ilaca ca' le ilún ga ila'chíxinë',  
en ca tu le uzí' lëbi légaquië'.

<sup>10</sup> Ila'chul-la guiõj lógaquië', para cabí ila'lé'enë'.  
Ila'yechu tsaz cúdzu'gaquië' tu' ilu'ë yua'.

### *Ca gaca ulu'lágaca bönachi bití' náca gaca judío*

<sup>11</sup> Na'a rnnía': ¿Naru' gula'chíxinë' yugu' bönni' judío ga bidxintë gula'nítië' tsaz? ¿Bití' ca' guca ca'! Gula'dá'baguë'ë xtídzë'ë Dios, ate' na'a Dios ru'ë lataj ulu'lágaca nupa bití' náca gaca judío para gunë' ga ulu'zxé'enë' yugu' bönni' judío léguequi.

<sup>12</sup> Le gulunë' bönni' judío, gula'chíxinë', ben ga bidxín quégaca bönachi yõdzõlió ni le naca ca tu yõl-la' tsahui'. Channõ caní guca, guta' yõl-la' tsahui' quégaca nupa bití' náca gaca judío tu' gula'nítië' yugu' bönni' judío, zxõntë'rõ gaca le gata' quéguequi cate' yugu' bönni' judío na' ulu'huõáquië' queë' Dios.

<sup>13</sup> Na'a rea' libí'ili' bití' nácalí' judío, rnnía': Tu' naca' gubáz nasõl-lë'ë Dios lógaca nupa bití' náca gaca judío, runa' zxõn lë na' dë lu na'a <sup>14</sup> para nadxi ca' huáca guna' ga ulu'zxé'enë' bönni' uládz quia' libí'ili', en caní guna' ga ulu'lë' bal-lë'. <sup>15</sup> Channõ bulu'huõaca bönachi nacua' idú yõdzõlió queë' Dios tu' bulu'nítië' yugu' bönni' judío xilátjagaquië', zxõntë'rõ gaca

le gata' quéguequi cate' ulu'huóázië' xilátjagaca cazë' na'. Gaca ca raca cate' tu' bángaca nupa chinátigaca. <sup>16</sup> Channö rigú'uru' quez queë' Dios cúa nílado' rubéajru' zí'alö, lësca' cúa na' nagá'ana naca quez queë', en channö uzóaru' quez queë' Dios luí yaga, lësca' ilaca quez queë' ni'a në'e yaga na'.

<sup>17</sup> Nácagaquië' bal-lë' bönni' judío ca ni'a në'e tu yaga olivo narúgugaca, ate' libí'ili', ca ni'a në'e tu yaga olivo guí'a, yójtá'ali' yaga olivo dxi'a na', en buázili' xilátjagaca nupa na' gurúgugaca, en ruzí'ili' xibé luí, en xichöni yaga olivo dxi'a na'. <sup>18</sup> Que lë ni na', biti' gun ba zxön cuinli', biti' uzóali' tsölá'alö nupa nácagaca ca ni'a në'e na' narúgugaca. Channö run ba zxön cuinli', ral-la' inözili' calëga libí'ili' rugáguli' luí yaga na', pero luí yaga na' rugagu libí'ili'.

<sup>19</sup> Nadxi ca' innó: "Gula'rugú ni'a në'e yaga na' para gaca tsázia' neda' xilátjagaca." <sup>20</sup> Nácate didza' ru'u, pero gula'rúguië' tu' cabí gula'yéajlë'ë, ate' yójtó'o li' yaga na' tu' réajlë'u Dios. Que lë ni na', biti' ral-la' gun ba zxön cuinu', pero ral-la' gádxinu' Dios. <sup>21</sup> Channö benë' Dios léguequi xíguia', nupa na' nácagaca caz ni'a në'e yaga dxi'a na', ¿naru' cabí gunë' xíguia' ca' li'? <sup>22</sup> Buyútsöca' na'a ca náquië' dxi'i ladxi' Dios, en ca rúndë'ë ca' xíguia'. Le nácate rúndë'ë xíguia' nupa na' gula'chixi, pero náquië' dxi'i ladxi' len li'. Que lë ni na', ral-la' gúntica'su' ca sa'yéaj yöl-la' dxi'i ladxi' queë' na', para cabí ichúguië' ca' li' lu yaga queë' na'. <sup>23</sup> Lësca' caní gaca quégaquië' channö cabí ulu'gá'anë' lu yöl-la' cabí réajlë' quégaquië', tsójtá'gaquië' leyúbölö lu yaga na', tu' napë' Dios yöl-la' huáca gunë' ga tsójtá'gaquië' le leyúbölö. <sup>24</sup> Nacu' li' ca tu ni'a në'e gurugu lu yaga olivo guí'a, en yójtó'o yaga olivo dxi'a ga cuntú nu udá' tu ni'a në'e yaga guí'a. Yénni'tërö huáca quégaquië', nácagaca cazë' ni'a në'e yaga dxi'a na', huáca tsójtá'gaquië' leyúbölö lu yaga quéguequi cazë' na'.

### *Ca gaca ulu'lágaca bönachi Israel*

<sup>25</sup> Böcha'ado', ré'ënda' inözili' lë ni bigachi', para cabí gun ba zxön cuinli' ca naca yöl-la' réajni'i queéli'. Bulu'huóaca bal-la bönachi Israel zidi ladxi', ate' caní iláquië' ga idxinrö dza chinayá zgaca yúgu'të bönachi biti' nácagaca judío ga rinná bë'ë Dios, nupa na' ral-la' ulu'lágaca. <sup>26</sup> Tödi na' gata' lataj ulu'lë' ca' yúgu'të bönni' Israel, ca na' nazúaj lu guichi lá'ayi, rnna:

Irúaj yödzö Sión Nu rusölá,

en ugúa le ruá' dö' nabága'gaca zxí'ini xi'sóë' Jacob.

<sup>27</sup> Lë ni naca didza' dzaga gúnlena' légaquië'

cate' ugúa' dul-la' nabága'gaquië'.

<sup>28</sup> Caní naca, gula'dá'baguë'ë didza' dxi'a, ate' Dios guléaj ládxë'ë légaquië' para gaca uláli' libí'ili', pero nadxí'inë' ca'

légaquië', tu' gurö cazë' queë' xuz xtó'ogaquië'. <sup>29</sup> Tsaz runödzejë' Dios le runödzejë', en tsaz rulidzë' bönachi. <sup>30</sup> Ca na' naca queëli', zí'atëlö biti' benli' ca rnna xtídzë'ë Dios, ate' na'a ruhuéchi' ládxë'ë Dios libí'ili' tu' cabí gulunë' yugu' bönni' judío ca rnnë'. <sup>31</sup> Lësca' caní naca quégaquië' na'a, biti' tunë' ca rnnë' Dios, pero caní gácasö ga idxinrö dza huéchi' ládxë'ë Dios légaquië', ca ruhuéchi' ládxë'ë libí'ili' na'a. <sup>32</sup> Dios guléaj ládxë'ë yúgu'të bönachi para ila'dá'baguë'ë xtídzë'ë, para gaca huéchi' ládxë'ë yúgu'të'.

<sup>33</sup> Zxönterö naca yöl-la' tsahui' queë' Dios, lë na' naca yöl-la' huáca zxön, en yöl-la' réajni'i queë'. Cuntu nu gaca tséajni'i le nuzóë' Dios gunë', en biti' gaca nu inözi yugu' le runë' Dios. <sup>34</sup> ¿Nuzxi caz guyéajni'i le guzá' ládxë'ë Xanru'? ¿Nuzxi caz buzéajni'i Lë'? <sup>35</sup> ¿Nuzxi caz bi bunödzej queë' Dios para gun bayudxi bi ubi'ë Dios que? <sup>36</sup> Yúgu'të le dë narúajgaca lu në'ë Dios, en taca lu në'ë, en nácgaca para uzi'ë xibéguequi. ¡Gácatíca'sö queë' Dios yöl-la' ba! ¡Ca' gaca!

## 12

### *Ral-la' udödi cuinru' quez queë' Dios*

<sup>1</sup> ¡Böchi' luzá'ado'! ¡Ruhuéchi' ládxë'ë Dios rë'u! Que lë ni na' ráta'yua' loli' udödi cuinli' lu në'ë Dios, gácali' ca tu le naca ban rigú'uru' lahuë' Dios, para gácali' quez queë', le gaca tu le tsaza ládxë'ë Dios. Lë ni ral-la' gunli', ca sa'yéaj le reaj ládxí'ru'-në' Dios. <sup>2</sup> Bítí'rö gunli' la' lébisö ca tun bönachi dza ni zóaru' na'a, pero guli'gaca bönachi cubi tu' nucubë' Dios icja ládxí'do'oli'. Guli'gún caní para gaca inözili' le naca dxí'a rë'ënë' Dios gunli', lë na' raza ládxë'ë, en le naca idú.

<sup>3</sup> Na'a, tu' zoa le buzá' ládxë'ë quia' Dios, rea' yúgu'tëli': Biti' gun ba zxön cuinli', le cabí ral-la' gunli', pero ral-la' gácali' nöxaj ladxi' ca ribequi ícjali', tsca naca yöl-la' réajlë' queëli' Dios le bennë' que queëli'. <sup>4</sup> Ca na' naca tuz idútë le naca cázaru', sal-la' zían le nagudi' dzágalenru', en calëga tuz dxin tun yúgu'të le zían na' nagudi' dzágalenru', <sup>5</sup> lësca' caní naca queëru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, ate' que lë ni na' yúgu'tëru' nácaru' tuz turu' len ia'turu'.

<sup>6</sup> Tu turu' dë lu ná'aru' tu le bennë' queëru' Dios, ate' nadzá'gaca tu tu tsca naca le buzá' ládxë'ë que queëru'.

Bönni' na' Dios bunödzejë' queë' gu'ë didza' uláz queë', tsca réajlë'ë Lë', ral-la' gu'ë didza' bönni' na'.

<sup>7</sup> Bönni' na' Dios bunödzejë' queë' gunë' xichinë', dxí'ado' ral-la' gunë' dxin na'.

Bönni' na' Dios bunödzejë' queë' usédinë' bönachi, dxí'ado' ral-la' usédinë' bönachi.



<sup>8</sup> Bönni' na' Dios bunödzejë' queë' uzéajni'inë' bönachi,  
dxí'ado' ral-la' uzéajni'inë' légaquië'.

Bönni' bi unödzejë' que nu yúbölö,  
idú ládxë'ë ral-la' unödzejë'.

Bönni' rinná bé'enë' bönachi,  
idú ládxë'ë ral-la' gunë' caní.

Bönni' rácalenë' luzé'ë,  
len yöl-la' rudzeja ral-la' gunë' caní.

*Yugu' le ral-la' gun nu nequi queë' Cristo*

<sup>9</sup> Ral-la' idxí'ili' luzá'ali' idú ládxí'li'.

Bulí'cá'ana le ruá' dö'.

Gulí'güí' ládxí'li' gunli' le naca dxi'a.

<sup>10</sup> Gulí'dxí'i-guéquinë' luzá'ali'  
ca nadxí'igueli'-në' böchi' cázali'.

Ca runli'-në' bal luzá'ali'  
ral-la' gunli' ga gácarë' lo ca nácali' la' cuínsili'.

<sup>11</sup> Bulí'típatica'sö ládxí'li', en bití' gácali' xöhuëdi.

Gulí'gún xichinë' Xanru' idú ládxí'li'.

<sup>12</sup> Bulí'dzeja tu' zoa le runli' löza.

Gulí'cöz zxön ladxi' cate' bi riguí'i rizáca'li'.

Bulí'lídžatica'së' Dios.

<sup>13</sup> Bulí'nödžaj quégaca bönachi queë' Cristo  
tsca nayádzjaguequinë'.

Gulí'güí' lataj ga ila'cuá' nupa ta'dxín queëli'.

<sup>14</sup> Gulí'nábinë' Dios gunë' dxi'a  
quégaca nupa ta'bía ládxí'gaca libí'ili'.

Gulí'naba gaca dxi'a quégaquië',  
en bití' udxíali' légaquië' dö'.

<sup>15</sup> Bulí'dzéjalen nupa tu'dzeja.

Gulí'cödxilen nupa ta'bödxí.

<sup>16</sup> Gulí'gaca tuz len luzá'ali'.

Bití' gun ba zxön cuinli',

pero gulí'gún tsözxön yugu' bönni' nöxaj ladxi'.

Bití' guéquili' chinadéli'li' idútë yöl-la' réajni'i.

<sup>17</sup> Cuntu nu ubí'ili' que,

bití' guá'ali' dö' que nu ruá' dö' queëli'.

Gulí'gún dxi'a quégaca yúgu'të bönachi.

<sup>18</sup> Channö huáca, tsca séqui'li', gulí'cöz dxi'a  
len yúgu'të bönachi.

<sup>19</sup> Böchi' luzá'ado', bití' uzí' lëbili' bönachi la' libí'isili', pero  
gulí'güí' lataj ubi'ë Dios quégaca bönachi na', tu' nazúaj lu  
guichi lá'ayi le rnna:

Neda' caza' uzí' lëba'.

Neda' ubi'a quégaca bönachi.

Caní gunnë' Xanru' Dios. <sup>20</sup> Lësca' caní rnna:

Channö zoë' nu bönni' bití' ridžguië' li' dxi'a,

en ridunë', bē'ë le gahuë'.

Channö ribidxë' nisa, bē'ë le guí'jē'.

Cate' gunu' caní, gunu' ga utuí'inë' bönni' na'.

<sup>21</sup> Biti' gu'u lataj inná be'e le ruá' dö' li',

pero gunná be'e le ruá' dö' na',

ugunu' dxin le naca dxi'a.

## 13

<sup>1</sup> Yúgu'tëli' ral-la' gunli' ca ta'nnë' bönni' yúlahui'. Dios caz budödë' lu ná'agaquië' yöl-la' unná bē' nápagaquië', en nucu'ë xilátjagaquië' bönni' ni dē lu ná'agaquië' yöl-la' unná bē'. <sup>2</sup> Que lē ni na', nu ridá'baga' yúlahui' ridá'baga' le nuzóa cazë' Dios, ate' nupa ta'dá'baga' caní, nabága'gaca xigua'. <sup>3</sup> Nacu'ë bönni' yúlahui', calēga para ulu'zenë' bach nu run le naca dxi'a, pero para ulu'zenë' bach nu ruá' dö'. Channö rē'ënu' gunu' ga biti' ulu'zenë' li' bach, ben le naca dxi'a, ate' uruju' dxi'a lógaquië'. <sup>4</sup> Náquië' bönni' yúlahui' ni'a nē'ë Dios para gácalenë' li', pero channö runu' le ruá' dö', ral-la' gádxinu', tu' cabí nu'ë nítisö xiyaga yúlahui'. Náquië' ni'a nē'ë Dios para uzi' lēbë', gunë' xigua' nu ruá' dö'. <sup>5</sup> Que lē ni na' run bayudxi gunli' ca rnnë' bönni' na' dē lu nē'ë, calēgasö tu' budödë' Dios lu nē'ë gunë' libí'ili' xigua', pero lēasca' para soa dxi ládxi'do'oli' lahuë' Dios. <sup>6</sup> Que lē ni na' ca' riguíxaj lázali' que yúlahui', tu' nácaagaquië' bönni' yúlahui' ni'a nē'ë Dios, en tunë' le nudödi cazë' lu ná'agaquië'.

<sup>7</sup> Guli'guíxaj yúgu'të bönachi le rál-la'li' quégaquië'. Guli'guíxaj lázali' lu na' nu ral-la' quíxaj lázali'. Guli'guíxaj dumí nu ral-la' quíxjali'. Guli'gadxi nu ral-la' gádxili', en guli'gún bal nu ral-la' gunli' bal. <sup>8</sup> Cuntu nu bi ral-la' gál-la'li' que, pero tuz ral-la' idxí'ili' luzá'ali', tu' chibén idú ca rinná bē' xibá queë' Dios nu nadxí'i luzë'e. <sup>9</sup> Caní ta'nná bē' xibá na':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' inníó' que luzó'o le cabí nácatë.

Biti' sē ládxi'u le dē que luzó'o.

Yugu' xibá ni, en yúgu'të xibá ia'zica'rö, údxi gun nu run ca rna didza' rna caní:

Bídxí'i luzó'o ca nadxí'i cuinu'.

<sup>10</sup> Nu na' nadxí'i luzë'e biti' bi run que luzë'e le ruá' dö'. Caní naca, nu na' nadxí'i luzë'e run idú ca rinná bē' xibá queë' Dios.

<sup>11</sup> Guli'gún caní tu' nözili' ca raca dza ni zóaru' na'a, en nözili' ca' chibídxín dza usubán ládxi'li' ca rubán nu chiguxi, tu' chizóarö gal-la' dza uláru' lu le ruá' dö' ca guca cate' ni' gusi loru' réajlé'ëru' Cristo. <sup>12</sup> Ga zóaru' na'a naca ca chí'i dzö'ölö,

ate' chizóa tödi rëla na', pero ga na' zoë' Cristo naca ca lahui' dza, ate' chizóa tsöjsóaru' ni'. Que lë ni na' ral-la' ucá'anaru' le tun bönachi ga naca chul-la que dul-la'. Ca na' rugacu cuinë' tu bönni' rejë' gudil-la le run chi'i lë' lu gudil-la, ral-la' taru' lu bení' queë' Dios, le gun chi'i rë'u lu na' tu' xihui'. <sup>13</sup> Para gunru' caní ral-la' gunru' dxi'a ca ral-la' gun nu ridá lahui' dza.

Biti' ral-la' súdxiru', en cabí gágulë'ëru'.

Biti' ral-la' gunru' le ruá' dö', en calëga le gun ditaj rë'u.

Biti' ral-la' tíl-lalenru' luzá'aru', en cabí uzxé'ëru' luzá'aru'.

<sup>14</sup> Na'a, ral-la' un cuinli' lu icja ládxi'do'oli' ca náquië' Xanru' Jesucristo, en bití' güi' ládxi'li' gunli' le rizé ládxi'li' lu yöl-la' bönáchisö queëli'.

## 14

*Biti' ral-la' si' quídza'ru' böchi' luzá'aru'*

<sup>1</sup> Guli'güi' lataj nu réajlë' Cristo gun libí'ili' tsözxön sal-la' bití' naca idú ca réajlë' nu na' Lë'. Biti' tíl-lalenli' nu na' ca nácagaca le runi nu na' huáca nu gun. <sup>2</sup> Ca naca lë ni, nacu'ë bönni' runi légaquië' huáca ilahuë' yúgu'të le tagu bönachi, pero ia'bal-lë' bönni', tu' cabí naca idú ca ta'yéajlë'ë Cristo, tágusë' le raza ruzóaru'. <sup>3</sup> Na'a, bönni' na' rahuë' yúgu'të bití' ral-la' uzóë' tsölá'alö nu bönni' bití' rahuë' yúgu'të, en lësca' caní, bönni' na' bití' rahuë' yúgu'të bití' ral-la' si' quídzë'ë bönni' na' rahuë' yúgu'të, tu' nazí' lu në'ë Dios iropë' bönni' na' ta'yéajlë'ë Cristo. <sup>4</sup> ¿Nuzxi caz li', rizí' quídzu'u bönni' huen dxin que nu yúbölö? Bönni' na' náquië' huen dxin queë' Dios, lahuë' Xan cazë' urúajë' tsahui' o bití' urúajë' tsahui'. Channö urúajë' tsahui' lahuë' Dios, naca tu' gun cazë' Xanru' Dios ga urúajë' tsahui'.

<sup>5</sup> Nadxi ca' zoë' nu bönni' runrë' bal tu dza ca runë' bal ia'zica'rö dza, ate' bönni' yúbölö, tuz ca runë' bal yúgu'të dza. Tu turu' ral-la' usédada'aru' channö naca dxi'a le runru'. <sup>6</sup> Bönni' na' runë' bal tu dza, runë' le bal para tseaj ládxi'ë Xanru', ate' bönni' na' bití' runë' bal dza na', para tseaj ládxi'ë Xanru' bití' runë' bal dza na'. Lësca' caní, bönni' na' rahuë' yúgu'të, rahuë' caní para tseaj ládxi'ë Xanru', en rë'ë Dios: "Xclenu", ate' bönni' na' bití' rahuë' yúgu'të, bití' rahuë' le para tseaj ládxi'ë Xanru', en rë'ë ca' Dios: "Xclenu".

<sup>7</sup> Bití' zoë' nabanë' queëzë' nitúë' bönni' nabábalenë' rë'u, en bití' ratië' queëzë' nitúë' bönni'. <sup>8</sup> Channö zóaru' nabanru', para tseaj ládxi'ru'-në' Xanru' zóaru' nabanru', en channö gátiru', para gaca yöl-la' ba queë' Xanru' gátiru'. Caní naca, channö zóaru' nabanru' o channö gátiru', nequi quéziru' queë' Xanru'. <sup>9</sup> Que lë ni na' ca' gútië' Cristo, en bubanë', para gáquië' Xángaca nupa chinátigaca, en nupa nabángaca.

10 Na'a li', ¿bizx que richugu bē'u böchi' luzó'o? ¿Bizx que ruzú' tsólá'alö böchi' luzó'o? Yúgu'tēru' idxinru' lahuē' Cristo ga uchi'a usöröë' rē'u. 11 Ca naca lē ni nazúaj lu guichi lá'ayi, rna:

Rnnē Xanru': "Ni'a quia' neda' caz, ulu'zechu zxi bigaca yúgu'tē bönachi lahua' neda'. Ila'guixjö' yálajdo' naca' Dios."

12 Caní naca, uchi'a usöröë' Dios yúgu'tēru'.

*Biti' ral-la' gunru' ga ichixi iníguinë' böchi' luzá'aru'*

13 Que lē ni na', bítirö ral-la' ichugu bé'eru' luzá'aru', pero ral-la' gun yúdxiru' cabí gunru' ga ichixi iníguinë' böchi' luzá'aru', en para cabí gunru' ga gunē' dul-la'. 14 Nöz quézida' bití' bi dē le ráguru' le gaca gun ga bítirö nácaru' tsahui' lahuē' Dios, ate' röjlöz lē ni didza' bē'ē Xanru' Jesús. Channö réquinē' tu bönni' zoa bi gaca gun ga bítirö náquiē' tsahui' lahuē' Dios, queē' bönni' ni, caní naca. 15 Channö rusuhú'innu' böchi' luzó'o, tu' ragú' le runi lē bití' ral-la' gáguru', bití' runu' ca ral-la' gun nu nadxí'i böchi' luzé'e. Bití' bi ral-la' gagu' le gun ga gaca chopa ládxē'ē bönni' na', gútiē' Cristo uláz queē'. 16 Que lē ni na', bití' bi gunlí' le gun ga ila'nnē xihui' bönachi que le rusáca'li' queēli' naca tsahui'. 17 Cate' rinná bé'enē' Dios rē'u, bití' ruí'i ládxi'ru' le guí'aj gáguru', pero ruí'i ládxi'ru' gácaru' tsahui', en sóaru' dxi ladxi', en udzéjaru', yugu' le gaca gunru' tu' zóalenē' Dios Bö' Lá'ayi rē'u. 18 Núti'tēs nu run xichinē' Cristo ca nácgaca lē ni, run le raza ládxiē'ē Dios, ate' urúaj dxi'a lógaca bönachi.

19 Que lē ni na' ral-la' gunru' le ilún ga gata' le ribequi dxi ládxi'ru' len yúgu'tē bönachi, en le ilún tsutsu turu' ia'turu' ca réajlē'ēru' Cristo. 20 Bití' bi ral-la' gagu' le gun ga gaca chopa ladxi'nu na' nuzóē' Dios. Nácatē lē na' ta'nná bönachi: "Yúgu'tē dē lataj gáguru'", pero gunru' le ruá' dö' channö gunru' ga ichixi iníguinë' luzá'aru' tu' nözi lē na' ráguru'. 21 Gácarö dxi'a cabí gagu' béla', en cabí guí'ju' xisi uva nal-la, en bití' bi gunu' le gun ga ichixi iníguinë' böchi' luzó'o, o le gun ga gaca chopa ládxiē'ē, o le gun ga huöaj ládxiē'ē ca réajlē'ē Cristo. 22 Channö réajlē'u dē lataj bi gunu', ral-la' gunu' le lahuē' Dios ga zu' tuzu'. Bica' ba bönni' na' bití' ruxösa ládxi'da'ahuē' lē' tu' nözi lē na' runi lē' dē lataj gunē', 23 pero bönni' na' raca chopa ládxiē'ē tu' nözi le rahuē', nabáguē'ē xíguia', tu' runē' le cabí runi lē' dē lataj gunē'. Naca dul-la' yúgu'tē le runru', le cabí runi rē'u dē lataj gunru'.

## 15

*Ral-la' gunru' le raza ládxiē'ē böchi' luzá'aru'*

<sup>1</sup> Que lë ni na', channö nácaru' tsutsu ca réajlë'ëru' Cristo, ral-la' guá' ilenru' nupa na' nagul-la ládxi'gaca ca ta'yéajlë' Cristo. Biti' ral-la' gunru' le raza ládxi'ru' la' cuínsiru'. <sup>2</sup> Yúgu'tëru' ral-la' gunru' le raza ládxi'ë böchi' luzá'aru' para gaca dxi'a queë', en idipa ládxi'ë ca réajlë'ë Cristo. <sup>3</sup> Caní ral-la' gunru', tu' cabí benë' Cristo le guyaza ládxi'ë la' cuinsé', pero guca queë' ca na' nazúaj lu guichi lá'ayi, le rnna: "Budubága'gaca neda' yugu' didza' xihui' gulu'i nupa gula'nné xihui' quiu' Li', Dios." <sup>4</sup> Yúgu'të le bulu'zúajë' lu guichi lá'ayi dza ni'te, bulu'zúajë' lu guichi para usëdi rë'u. Lë na' nazúaj lu guichi lá'ayi run ga ribözaru' zxön ladxí', en ruhué tsahui' rë'u. Que lë ni na' zoa le runru' löza. <sup>5</sup> Rinábida'-në' Dios, Nu run ga ribözaru' zxön ladxí', en Nu ruhué tsahui' rë'u, gunë' ga gunli' tuz ca rusáca'li' queéli', para gácali' ca na' ré'ënë' Jesucristo. <sup>6</sup> Caní ral-la' gunli' para gácali' tuz, cú'uli'-në' tsözxön yöl-la' ba Dios, Xuzë' Xanru' Jesucristo. <sup>7</sup> Que lë ni na', para gaca yöl-la' ba queë' Dios, guli'sí' lu ná'ali' tuli' ia'tuli' ca na' Cristo guzxí' lu në'ë ca' rë'u. <sup>8</sup> Caní ral-la' gunli', tu' rea' libí'ili': Bidë' Jesucristo, en gúcalenë' bönachi judío, ate' caní bulu'e lahui naca idütë li didza' ru'ë Dios, ate' benë' ga bulu'dxín le guzxí' lu në'ë Dios unödzjë' quégaquië' xuz xtó'otu'.

*Yugu' bönachi izá'a ila'yöni didza' dxi'a*

<sup>9</sup> Bidë' ca' Cristo para benë' ga ila'gú'u Dios yöl-la' ba nupa bití' náca'gaca judío tu' ruhuéchi' ládxi'ë Dios légaquië'. Ca naca lë ni nazúaj lu guichi lá'ayi le rnna: Que lë ni na', ulu'a lahui le nacu' Li' lógaca bönachi idütë yödzölió, en gul-la' quiu' yöl-la' ba.

<sup>10</sup> Ga yúbölö nazúaj lu guichi lá'ayi le rnna: Libí'ili', bönachi idütë yödzölió, buli'dzéjalen bönachi queë' Dios.

<sup>11</sup> Ga yúbölö nazúaj ca' lu guichi lá'ayi le rnna: Guli'cu'ë Xanru' yöl-la' ba, yúgu'tëli' bití' nácali' judío. Guli'tséaj ladxí' Lë', yúgu'tëli' zóali' idütë yödzölió.

<sup>12</sup> Lësca' caní buzúajë' Isaías lu guichi le rnna: Ilá' lahui Nu nababa di'a dza queë' Isái. Gaca lo Nu na' para inná be'e nupa bití' náca'gaca judío. Nupa ni ilún löza Lë'.

<sup>13</sup> Rinábida'-në' Dios, Nu run ga runru' löza, gunë' ga udzéjade'eli', en ga soa dxi ládxi'li' tu' réajlë'ëli' Lë', en gunë' ga gaca idú ca runli' löza, tu' zóalen yöl-la' huáca queë' Dios Bó Lá'ali libí'ili'.

14 Böchi' luzá'ado'. Chinóz quézida' rúntica'sili' le naca dxi'a, en dēda' yöl-la' réajni'i queēli' para gaca uzéajni'ili' luzá'ali'.  
 15 Na'a naca' rugu ladxi', ruzúaja' queēli' lu guichi ni, böcha'a, en rusá'a ládxi'li' tu' zoa le buzá' ládxi'ē Dios quia' neda'.  
 16 Que lē ni na' runa' xichinē' Jesucristo lógaca bönachi biti' nácagaca judío, en runa' libán que didza' dxi'a queē' Dios, para gaca ugu'a bönachi biti' nácagaca judío lu nē'ē Dios, nupa na' guró cazē' Dios Bö' Lá'ayi queē' Lē'. Ilácagaquiē' ca tu le rigúuru' lu nē'ē Dios, le raza ládxi'ē Lē'.

17 Na'a, tu' rúnlena' tsözxön Jesucristo dxin, dē lu na'a tsaza ládxa'a ca naca le nuna' lu xichinē' Dios. 18 Lē'sca' rurúguida' innía' ca naca lē na' benē' Cristo lu na'a neda', benē' ga tun bönachi biti' nácagaca judío ca rna xtídzē'ē Dios. Lē ni benē' Lē', bugunē' dxin didza' bē'a neda', en yugu' dxin bena' neda'.  
 19 Lu na'a neda' bugunē' dxin ca' le nácagaca bē' bulu'e lahui Lē', en yugu' yöl-la' huáca zxön benē', en yöl-la' huáca na' queē' Dios Bö' Lá'ayi le guzóalen neda'. Caní guca, gusí lahua' runa' libán lu yödzo Jerusalén, ate' idú gásibi'ilö ga ridxintē luyú Ilírico, chinuna' libán que didza' dxi'a ca naca queē' Cristo.  
 20 Bē' ládxa'a bena' libán que didza' dxi'a ga biti' bila'yöni bönachi ca naca queē' Cristo. La'tu' guna' libán ga chibila'yöni bönachi, guna' neda' ca runē' tu bönni' ruguelē'ē lahui dxin zxön chinunē' bönni' yúbölö. 21 Ca bena' neda' naca ca na' nazúaj lu guichi lá'ayi le rna:

Ila'lé'e nupa nacuá' ga cuntu nu ben libán queē' Lē',  
 en ila'yéajni'i nupa catu caz bila'yöni ca naca queē'.

### *Rē'ēnē' Pablo tsejē' yödzo Roma*

22 Que lē ni na', sal-la' zían luzuí gú'unida' guída' ga zóali', biti' guca guída'. 23 Na'a, chibudxi bena' dxin quia' yugu' lataj ni, en chirē'ēnda' zían iz guída' ga zóali'. 24 Que lē ni na', cate' tseja' luyú España, tōda' ga zóali' libí'ili', tu' runa' löza uduyúa' libí'ili', en udzéalenda' libí'ili'. Tōdi ni' huáca ugu'uli' neda' nöza. 25 Na'a ral-la' tseja' Jerusalén, tsöju'a tu le gácalen nupa ni' néquiquequi queē' Cristo. 26 Caní guna', le gula'yaza ládxi'gaquiē' bönni' nacu'ē luyú Macedonia, en luyú Acaya, bulu'tubē' bi tu'nödzejē' quéguequi bönachi yechi' dzágagaca bönachi queē' Cristo, nacu'ē Jerusalén. 27 Gula'yaza ládxi'gaquiē' bönni' biti' nácagaquiē' judío gulunē' lē ni. Le nácatē naca tu le rál-la'gaquiē' quégaca bönachi judío ni'. Channö bönni' biti' nácagaquiē' judío tu'zi'ē xibé le nácagaca queē' Dios ni'a que le núngaca bönachi judío, lē'sca' ral-la' ilácalenē' bönachi judío na', ulu'gunē' dxin le dē quégaquiē'.  
 28 Que lē ni na', cate' údxi udōda' lu ná'agaca bönachi judío lē na' bulu'nödzejē' bönni' ni, ní'rö tōda' ga zóali' libí'ili' cate'

tseja' luyú España. <sup>29</sup> Cate' guída' ga zóali', runa' löza idxínlena' yúgu'tè le ruzí'iru' xibé ni'a que didza' dxi'a queë' Cristo.

<sup>30</sup> Ni'a queë' Xanru' Jesucristo, en ni'a que yöl-la' nadxí'i ruchízië' Dios Bõ' Lá'ayi icja ládxi'do'oru', ráta'yua' loli', böcha'ado', ulídzali'-në' Dios tsözxön len neda', inábili'-në' gácalenë' neda'. <sup>31</sup> Guli'nabi-në' Dios gunë' ga ulá' neda' lu ná'agaquië' bönni' biti' ta'yéajlë'ë nacu'ë luyú Judea, en gunë' ga ila'yaza ládxi'gaquië' ila'zi'ë lë na' tsöju'a lu ná'agaquië' bönni' nácagaquië' queë' Cristo, nacu'ë Jerusalén. <sup>32</sup> Guli'nabi-në' ca', channö naca ca rë'ënë' Dios, gunnë' neda' lataj idxina' queëli' len yöl-la' rudzeja quia', para uzí' ládxi'lena' libí'ili'. <sup>33</sup> Na'a rinábida'-në' Dios, Nu run ga zoa dxi ládxi'ru', sóalenë' yúgu'tëli'. ¡Ca' gaca!

## 16

### *Tu'gapa Dios luzë'eguequi bönachi queë' Cristo*

<sup>1</sup> Rigu'a-nu lu ná'ali' Febe, nigula zanru' dá'anu Xanru'. Nácanu nigula huen dxin queë' Dios dzáganu bönachi queë' Cristo nacué' yödzö Cencrea. <sup>2</sup> Uláz queë' Xanru' guli'sí' lu ná'ali'-nu nigula na', ca ral-la' ilún bönachi queë' Cristo. Guli'gácalen lënu, unödzejali' queënu bíti'tës bi riquínnu. Lë cázanu gúcalennu bönachi zían, en gúcalennu ca' neda'.

<sup>3</sup> Guli'gapa Dios Priscila, en Aquilo, nupa na' gulunlen neda' tsözxön dxin queë' Jesucristo. <sup>4</sup> Chopë' ni gula'dödë' ga guzóa bönadxi ilátië' para gulunë' ga cabí gátia' neda', ate' rea' légaquië': "Xclenli'", en calégasö neda', pero lësca' yúgu'të böchi'luzá'aru' nabábagaquië' gapa nacué' bönachi queë' Cristo biti' nácagaca judío, tē'ë légaquië': "Xclenli'." <sup>5</sup> Guli'gapa Dios bönachi queë' Cristo tu'dubë' lu yu'u lídxigaquië' Priscila, en Aquilo na'. Guli'gapa Dios Epeneto, bönni' na' nadxí'ida'. Bönni' ni guyéajlë'ë Cristo zí'atëlö ca yúgu'të bönachi luyú Acaya. <sup>6</sup> Guli'gapa Dios María, nigula na' bennu dxin zxön queë' Cristo ga ni' rudúbili' libí'ili'. <sup>7</sup> Guli'gapa Dios Andrónico, en Junias, yugu' bönni' uládz quia'. Yugu' bönni' ni gula'dzúnlenë' neda' tsözxön lidxi guíë, en nadéli'gaquië' lataj lo ladaj bönni' gubáz nasöl-lë'ë Cristo. Lësca' gula'yéajlë'ë Cristo zí'alö ca neda'.

<sup>8</sup> Guli'gapa Dios Amplias, bönni' na' nadxí'ida', en néquinë' queë' Xanru'. <sup>9</sup> Guli'gapa Dios Urbano, bönni' na' bënlenë' netu' tsözxön dxin queë' Jesucristo. Guli'gapa Dios Estaquis, bönni' na' nadxí'ida'. <sup>10</sup> Guli'gapa Dios Apeles, bönni' na' naca bë' réajlë'ë Cristo. Guli'gapa Dios nupa nacué' lidxë' Aristóbulo. <sup>11</sup> Guli'gapa Dios Herodiön, bönni' uládz quia'. Guli'gapa Dios nupa nacué' lidxë' Narciso, en ta'yéajlë'ë Xanru'. <sup>12</sup> Guli'gapa Dios Trifena, en Trifosa, nigula na' tunnu

dxin queë' Xanru'. Guli'gapa Dios Pérsida, nigula na' bennu dxin zxön queë' Xanru', ate' nadxí'iru'-nu. <sup>13</sup> Guli'gapa Dios Rufo, bönni' rö queë' Xanru'. Guli'gapa Dios xin'é' Rufo na', nácanu ca' ca xiná' caza'. <sup>14</sup> Guli'gapa Dios Asíncrito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacuá'lenë' légaquië'. <sup>15</sup> Guli'gapa Dios Filólogo, en Julia, en Nereo, en nigula zanë' Nereo na', enca' Olimpas, en yúgu'të böchi' luzá'aru' ta'yéajlë'ë Cristo, nacuá'lenë' légaquië'.

<sup>16</sup> Guli'gapa Dios luzá'ali', unída'li' luzá'ali' lu yöl-la' nadxí'i queë'li'. Tu'gapë' Dios libí'ili' yúgu'të böchi' luzá'aru' nabábagaquië' gapa nacuá' bönachi queë' Cristo luyú ni.

<sup>17</sup> Na'a, ráta'yua' loli', böcha'ado', guli'gún ga ilaca bè' nupa tun ga irúajli' choplö, en tun ga ichixi iníguili', tu' tu'sédinë' le cabí röjlöz le nazédali'. Guli'cuíta ga nacuá' bönachi caní <sup>18</sup> tu' cabí tun xichinë' Jesucristo. Tunë' dxin para bi gata' quégacasë', en ta'z'í' yé'enë' yugu' bönni' nöxaj ladxi', tu'gunë' dxin didza' nöxaj ladxi', en didza' tséajlë'ëru' le cabí nácatë. <sup>19</sup> Rizé didza' ca na' runli' ca rnna xtídzë'ë Xanru', ate' ta'yöni yúgu'të bönachi. Que lë ni na' rudzëjada' ni'a que le runli' libí'ili'. Na'a, rë'ënda' gácali' sina' gunli' le naca dxi'a, en calëga gunli' le ruá' dö'. <sup>20</sup> Dios, Nu run ga zóaru' dxi ladxi', si' gunë' ga ucúl-lali' Satanás, tu' xihui'. Rinábida'-në' Xanru' Jesucristo uzá' lãdxë'ë queë'li' le gácalen libí'ili'.

<sup>21</sup> Bi'i Timoteo, bi'i na' rúnlenbi' neda' tsözxön dxin, rugápabi' Dios libí'ili'. Lucio, en Jasón, en Sosípater, yugu' bönni' uládz quia', tu'gapë' Dios libí'ili'.

<sup>22</sup> Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguie' Xanru' neda'.

<sup>23</sup> Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të bönachi queë' Cristo ni, rugapë' Dios libí'ili'. Erasto, bönni' yu'u lu në'ë dumí que yödzo ni, rugapë' Dios libí'ili'. Böchi'ru'do' Cuarto rugapë' Dios libí'ili'.

<sup>24</sup> Rinábida'-në' Xanru' Jesucristo uzá' lãdxë'ë queë'li' yúgu'tëli' le gácalen libí'ili'. ¡Ca' gaca!

### *Yöl-la' ba Dios*

<sup>25</sup> Na'a, rigú'utu'-në' yöl-la' ba Dios, Nu gaca gun tsutsu libí'ili' ca naca didza' dxi'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', lë na' bucáchë'ë Lë' dza ni'te ga bidxintë na'a dza. <sup>26</sup> Na'a chibulu'ë lahui lë ni yugu' lu guichi bulu'zúajë' bönni' gulu'ë didza' uláz queë' Dios ca na' gunná cazë' Dios, Nu zóatica'sö. Na'a raca libán que lógaca yúgu'të bönachi para gaca ila'yéajlë' Cristo, en ilún ca rnna xtídzë'ë.



<sup>27</sup> ¡Ni'a que le benë' Jesucristo, gácatíca'sö yöl-la' ba queë' la's  
dui Dios, Nu rácatërö caz! ¡Ca' gaca!

## DIDZA' ZÍ'ALÖ GUSÖL-LË'Ë PABLO YÖDZÖ CORINTO

*Pablo rugapë' Dios bönachi queë' Cristo nacu'ë Corinto*

<sup>1</sup> Ca rë'ëni quézinë' Dios bulidzë' neda', Pablo, para gaca' gubáz queë' Jesucristo. Böchi'ru' Sóstenes runë' neda' tsözxön. <sup>2</sup> Rugapa' Dios libí'ili', böchi' luzá'ado', rudúbili' queë' Dios lu yödzo Corinto, en nácali' quez queë' Dios tu' nácali' tuz len Jesucristo. Dios caz bulidzë' libí'ili' para guéquili' quez queë' tsözxön len yúgu'të nupa nacuá' yúgu'të lataj, en tu'lidzë' Dios, tu'gunë' dxin La la'ayi queë' Xanru' Jesucristo, Xángaquië', enca' Xanru'. <sup>3</sup> Ráta'yua' lahuë' Xúziru' Dios, en lahuë' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

*Yugu' le ruzi'iru' xibé tu' néquiru' queë' Cristo*

<sup>4</sup> Rética'sa'-në' Dios: "Xclenu" ca naca queëli', tu' zoa le buzá' ládxë'ë Dios queëli' tu' nácali' tuz len Jesucristo. <sup>5</sup> Tu' nácali' tuz len Cristo, Dios chinagú'udë'ë xinözili' yúgu'të le nequi queë'. Rácalenë' libí'ili' ca naca yúgu'të didza' ru'ili', en runë' ga réajni'ili' yúgu'të. <sup>6</sup> Caní naca, tu' guzxi' lu ná'ali' idú ládxi'li' le runtu' liná' lo ca naca queë' Cristo. <sup>7</sup> Que lë ni na', biti' bi riyadzaj queëli' que le runnë' Dios Bö' Lá'ayi queëru', tsanni ni ribözali' dza na' ilá' lahuë' Xanru' Jesucristo. <sup>8</sup> Lë cazë' utipë' ládxi'li' para gaca guá' ilenli' yúgu'të ga idxintë dza údxi, para cabí gaca nu bi innë queëli' dza ni' huödë' Xanru' Jesucristo. <sup>9</sup> Dios runë' ca rnnë', en Lë cazë' bulidzë' libí'ili' para gácali' tuz len Zxi'inë', Xanru' Jesucristo.

*Narúajgaca choplö bönachi queë' Cristo nacu'ë Corinto*

<sup>10</sup> Ni'a queë' Xanru' Jesucristo ráta'yua' loli', böchi' luzá'ado', guli'gún tuz xtídza'li' yúgu'tëli'. Biti' irúajli' choplö, pero guli'gaca tuz ca rizá' ládxi'li', en ca runi libí'ili'. <sup>11</sup> Caní rea' libí'ili', böchi' luzá'ado', tu' gula'guíxjöi'inë' neda' bönni' nacu'ë lídxinu Cloé ca runli', ta'nnë' ridil-la dídza'li'. <sup>12</sup> Lë ni rnnía': Nadzá'lö didza' ru'ili' tu tuli'. Bál-lali' rnnali' dá'ali' Pablo. Ia'bál-lali' rnnali' dá'ali' Apolos. Ia'bál-lali' rnnali' dá'ali' Cefas, ate' ia'bál-lali' rnnali' dá'ali' Cristo. <sup>13</sup> ¿Naru' birúajtsë' choplö Cristo? ¿Naru' gudá'atsa' neda', Pablo, lë'e yaga cruz uláz queëli'? ¿Naru' bidí'latsali' nisa para gácali' tuz len neda'? <sup>14</sup> Rea'-në' Dios: "Xclenu", tu' cabí buquila' nisa niturö libí'ili', pero chópasë' Crispo, en Gayo. <sup>15</sup> Que lë ni na' biti' gaca innali' bidí'lali' nisa para gácali' tuz len neda'. <sup>16</sup> Lësca' buquila' nisa Estéfanos, en nupa nacuá' lidxë'. Biti' røjneda' channö buquila'

nisa nu yúbölö. <sup>17</sup> Gusöl-lë'ë Cristo neda', calëga para uquila' bönachi nisa, pero para guna' libán que didza' dxi'a. Ru'a didza', calëga lu yöl-la' rácada' que caza', para cabí ucácha'a yöl-la' huáca que le benë' Cristo lë'e yaga cruz.

*Cristo napa cazë' yöl-la' huáca, en yöl-la' réajni'i queë' Dios*

<sup>18</sup> Nupa nácatë chul-la niti téquiguequi cá'asö naca libán runru' ca naca queë' Jesús, ca na' gútië' lë'e yaga cruz, pero rë'u na' nuláru', réquibe'eru' dzaga le yöl-la' huáca queë' Dios le rusólá rë'u. <sup>19</sup> Caní naca, tu' nazúaj lu guichi lá'ayi le rnna: Guna' ga huóaca nítisö yöl-la' rácada'

quégaca nupa taca yenni'.

Tsólá'aló ucá'ana' yöl-la' réajni'i

quégaca nupa ta'yéajni'i yenni'.

<sup>20</sup> ¿Bizxi caz uzi'tsë' xibé bönni' réajni'inë' yenni'? ¿Bizxi caz uzi'tsë' xibé bönni' nazédadë'ë? ¿Bizxi caz uzi'tsë' xibé bönni' nabé'ede'enë' ru'ë didza'? Dios chibenë' ga böáca cá'asö yöl-la' réajni'i quégaca bönachi yödzölió ni. <sup>21</sup> Dios, lu yöl-la' réajni'i queë', biti' bë'ë lataj ilúnbe'e bönachi yödzölió ni Lë' ni'a que yöl-la' rácada' quégaquië'. Dios guyaza ládxë'ë busölë' nupa ta'yéajlë' Lë' ni'a que libán na' runru', sal-la' téquiguequi bönachi cá'asö naca.

<sup>22</sup> Të'ënnë' yugu' bönni' judío ila'lé'enë' yöl-la' huáca nácatë bë', ate' bönni' zi'tu' ta'guiljë' yöl-la' réajni'i. <sup>23</sup> Rë'u ni runru' libán queë' Cristo, ca na' gútië' lë'e yaga cruz. Le nácatë, libán runru' ca gútië' Cristo, run ga ta'chixi ta'nigui bönachi judío, ate' ia'zícá'rö bönachi téquiguequi cá'asö naca. <sup>24</sup> Bönni' na' bulidzë' Dios légaquië', sal-la' nácatë' bönni' judío o bönni' zi'tu', téquibe'enë' napa cazë' Cristo yöl-la' huáca queë' Dios, en yöl-la' réajni'i queë' Dios. <sup>25</sup> Téquiguequi bönachi yödzölió ni le benë' Dios naca bë' biti' bi nözinë', pero lë na' benë' náparö yöl-la' réajni'i ca yöl-la' réajni'i quégaca bönachi. Téquiguequi le benë' Dios naca bë' nacuídi'në', pero lë na' benë' náparö yöl-la' huáca ca yöl-la' huáca quégaca bönachi. <sup>26</sup> Na'a, böchi' luzá'ado', guli'tsöjné ca gúcali' cate' bulidzë' Dios libí'ili'. Biti' gula'cu'ë ladjali' zían bönni' ta'yéajni'inë' lu yöl-la' bönáchisö quégaquië', en biti' gula'cu'ë ladjali' zían bönni' unná bë', en calëga zían bönni' nácatë' lo. <sup>27</sup> Téquiguequi bönachi yödzölió ni yugu' bönni' na' guröë' Dios biti' bi nözguequinë'. Caní benë' Dios para gunë' ga ulu'tuí' nupa ta'yéajni'i. Lësca' caní guröë' Dios nupa nacuídi'gaca yödzölió ni para gunë' ga ulu'tuí' nupa nál-lagaca. <sup>28</sup> Lësca' caní, téquiguequi bönachi yödzölió ni nupa na' guröë' Dios nácatë cá'asö, en biti' bi nácatë, en nacuídi'gaca. Caní benë' Dios para gunë' ga ulu'gá'ana cá'asö lë na' tun zxön bönachi yödzölió ni. <sup>29</sup> Que lë ni na', cuntú nu gaca gun ba zxön cuini lahuë' Dios. <sup>30</sup> Dios caz benë' ga nácaru'

tuz len Jesucristo, en benë' ga náparu' yöl-la' réajni'i queë' Cristo. Tu' náquië' Cristo tuz len rë'u, nuhuöácaru' tsahui', en néquiru' quez queë' Dios, en nuláru'. <sup>31</sup> Naca ca na' nazúaj lu guichi lá'ayi, le rnna: "Channö zoa nu bi rë'ëni gun zxön, ralla' gun zxön Xanru'."

## 2

### *Libán runru' queë' Cristo, ca gudë'ë lë'e yaga cruz*

<sup>1</sup> Caní guca, böchi' luzá'ado', cate' bidxina' queëli'. Bena' libán loli' que xtídzë'ë Dios, calëga len yöl-la' réajni'i quia', en biti' bë'a didza' lu yöl-la' rácada' quia'. <sup>2</sup> Cate' ni' guzóalena' libí'ili', bë' ládxa'a cabí gu'a didza' que le yúbölö, pero ca nácatë queë' Jesucristo bë'a didza', ca na' gudë'ë lë'e yaga cruz. <sup>3</sup> Guzóalena' libí'ili' lu yöl-la' ricuidi' quia', ate' lu yöl-la' radxi quia' guxzízida'a. <sup>4</sup> Bë'lëna' libí'ili' didza', en bena' libán que xtídzë'ë Dios, calëga ca tuí' didza' bönachi lu yöl-la' rácada' quéguequisö, pero guzóalënë' Dios Bö' Lá'ayi neda', ate' guzóalen yöl-la' huáca queë' Dios neda', le guca bë' naca idútë li didza' bë'a. <sup>5</sup> Caní bena' para gaca tséajlë'ëli' Dios, calëga tu' biyönili' yöl-la' rácada' quégaca bönachi, pero tu' bilé'eli' yöl-la' huáca queë' cazë' Dios.

### *Dios Bö' Lá'ayi runë' ga núnbë'ëru'-në' Dios*

<sup>6</sup> Ruí'itu' didza' lu yöl-la' rácada' lógaca nupa chinácarö idú ca ta'yéajlë' Dios. Yöl-la' rácada' ni biti' naca ca le nápagaca bönachi yödzülió ni, en biti' naca ca le nápagaquië' bönni' ta'nná bë'ë dza ni zóaru' na'a, nupa na' ta'niti caz. <sup>7</sup> Ruí'itu' didza' que yöl-la' rácada' nagachi', lë na' runödzejë' Dios, tu' bigachi' yöl-la' rácada' na' buzöë' Dios dza ni'te para uzí'iru' xibé. <sup>8</sup> Yugu' bönni' ta'nná bë'ë dza ni zóaru' na'a biti' gulúnbë'ë yöl-la' rácada' na'. La'tu' gulúnbë'ë le, biti' ulu'dë'ë Xanru' nayëpisëtërë' lë'e yaga cruz. <sup>9</sup> Naca ca na' nazúaj lu guichi lá'ayi le rnna: Chinupë'ë Dios le ulu'zí' xibé nupa nadxí'iguequi Lë', yugu' le cuntú nu ble'e, en biti' biyöni, en biti' gula'zá' ládxi'gaca bönachi ca naca que.

<sup>10</sup> Na'a, Dios nuzéajni'inë' rë'u yugu' lë ni lu nëë Dios Bö' Lá'ayi, tu' ruyú cazë' Dios Bö' Lá'ayi yúgu'të, enca' le yu'u icja ládxi'da'ahuë' Dios caz.

<sup>11</sup> ¿Naru' gaca inözinë' nu bönni' le yu'u icja ládxi'da'ahuë' ia'tué' bönni'? Tuz bö' naca cazë' bönni' na' nözi lë na'. Lëšca' caní, cuntú nu nözi le yu'u icja ládxi'da'ahuë' Dios. Tuzë' Dios Bö' Lá'ayi nözinë' lë ni. <sup>12</sup> Rë'u ni, biti' nazí' lu ná'aru' tu bö' ridasö yödzülió ni, pero nazí' lu ná'aru' Dios Bö' Lá'ayi, Nu na' ruchízië' Dios rë'u para gaca gúnbë'ëru' yugu' le buzá' ládxië'ë Dios queëru'. <sup>13</sup> Yugu' lë na' buzá' ládxië'ë Dios queëru' ruí'iru'

didza' que, calëga len didza' tu'sédinë' bönachi rë'u len yö-la' rácada' quéguequi, pero len yugu' didza' rusédinë' Dios Bö Lá'ayi rë'u. Caní naca, ruzéajni'iru' bönachi zóalenë' Dios Bö Lá'ayi légaquië' ca naca le rusédinë' Dios Bö' Lá'ayi rë'u.

<sup>14</sup> Tu bönni' biti' zóalenë' Dios Bö' Lá'ayi lë' biti' rizí' lu në'ë le rusédinë' Dios Bö' Lá'ayi rë'u, tu' réquinë' cá'asö naca. Biti' gaca tséajni'inë' bönni' na' lë ni, tu' gaca guéquibe'enë' tuzë' bönni' zóalenë' Dios Bö' Lá'ayi lë' le nazaca' lë ni. <sup>15</sup> Tu bönni' zóalenë' Dios Bö' Lá'ayi lë' gaca guéquibe'enë' le nazaca' yúgu'të, pero cuntú nu gaca guéquibe'e le nazaca' cazë' bönni' na'.

<sup>16</sup> Nazúaj lu guichi lá'ayi le rnna:  
¿Nuzxi caz nözi le rizá' ládxi'ë Xanru'?

¿Nuzxi caz gaca uzéajni'i Lë'?

Le rizá' ládxi'ë Cristo yu'u icja ládxi'do'oru' rë'u.

### 3

#### *Nácaru' huen dxin tsözxön len Dios*

<sup>1</sup> Que lë ni na', böchi' luzá'ado', biti' guca gü'ílena' libí'ili' didza' ca ruí'ílena'-në' didza' tu bönni' nudödi cuinë' lu në'ë Dios Bö' Lá'ayi, pero bë'lëna' libí'ili' didza' ca ruí'ílena' nu naca bönáchisö didza', biti' zóalenë' Dios Bö' Lá'ayi nu na'. Nácali' ca yugu' bi'i huë'ëni. Biti' nácali' tsutsu ca réajlë'ëli-në' Cristo. <sup>2</sup> Busévida' libí'ili' le cabí naca böniga, lë na' guca ca nidxi' gü'í'ili'. Biti' busévida' libí'ili' le naca böniga ca bëla' gáguli'. Biti' guca tséajni'ili' le naca ca bëla' gáguli', en biti' rácali' na'a. <sup>3</sup> Caní naca, tu' nácali' ca nu naca bönáchisö ga ridxintë na'a dza. Tsanni ni ruzxé'eli' luzá'ali', en ridil-la dídza'li', en rirúajli' choplö, nácali' ca nu naca bönáchisö, en runli' tuz ca tun bönachi yödzölió ni. <sup>4</sup> Cate' zóalen libí'ili' nu rnna da' Pablo nu na', en ia'tú nu rnna da' Apolos, nácali' ca nu naca bönáchisö.

<sup>5</sup> ¿Nuzxi caz naca' neda', Pablo? ¿Nuzxi caz na' Apolos? Nácatu' huen dxin queë' Dios, ate' ni'a que le bentu' guyéajlë'ëli' Cristo. Tu tutu' runtu' dxin na' bennë' Xanru' que queëtu'. <sup>6</sup> Dxin bentu' lu icja ládxi'do'oli' naca ca dxin run nu raza ruzóa. Neda' guza' xisedo', ate' Apolos gulu'ë nisa, pero Dios benë' ga gulén, en guzxön xisedo' na' nadúz icja ládxi'do'oli'. <sup>7</sup> Caní naca, láti'do'os nazáquië' bönni' guz, en láti'do'os ca' bönni' rigu'ë nisa, pero nazáca'dë'ë Dios Nu run ga rilén, en rizxön xisedo' na'. <sup>8</sup> Tuz ca nácaquië' bönni' razë', en bönni' rigu'ë nisa. Dios ubi'ë que queëgaquië' tsca naca dxin runë' tu tuë'. <sup>9</sup> Nácatu' huen dxin tsözxön len Dios, ate' libí'ili' nácali' ca la' yëla queë' Dios ga runtu' dxin.

Lëasca' caní nácali' ca tu yu'u runë' Dios. <sup>10</sup> Ca naca le buzá' ládxi'ë Dios quia', naca' ca tu bönni' huen zö'ö lo. Neda' gulu'a xilibi zö'ö, ate' nu yúbölö richisa zö'ö na'. Tu turu' ral-la'

uyuru' ca richísaru' zö'ö lahui xilibi zö'ö na'. <sup>11</sup> Dios chigulu'ë tu xilibi zö'ö le naca Lë cazë' Jesucristo, ate' cuntu nu gaca cu'u ia'tú xilibi zö'ö caní. <sup>12</sup> Dxin runru' queë' Cristo naca ca richísaru' zö'ö lahui xilibi zö'ö na'. Lahui xilibi zö'ö na' gaca nu gun dxin le naca ca richisa zö'ö le naca ca le néquini oro, o plata, o guiöj nazáca'da'gaca, o gaca nu gun dxin le naca ca richisa zö'ö le néquini yaga, o guizxi, o guixi' cá'asö. <sup>13</sup> Gaca bë' ca naca dxin núngaca tu tu bönachi. Cate' idxín dza ichúguië' Dios quégaca bönachi, ilá' lahui dxin nunru', tu' tödi dxin na' lu guí', ate' guí' na' si' bë' dxin núngaca tu tu bönachi. <sup>14</sup> Channö dxin nunë' tu bönni' urúaj dxi'a lu guí' na', le naca ca tu zö'ö guchisë', Dios ubi'ë queë' ca sa'yéaj dxin nunë'. <sup>15</sup> Channö tsegui dxin nunë' tu bönni' le naca ca tu zö'ö guchisë', unítië' le ré'ënë' ubi'ë Dios queë', pero ulá cazë' lë', ate' gaca queë' ca raca que nu rulá tu lu guí'.

<sup>16</sup> ¿Naru' cabí nözili' naca cázali' yudo' queë' Dios, ate' zoë' Dios Bö' Lá'ayi icja ládxi'do'oli'? <sup>17</sup> Channö nu usuniti yudo' queë' Dios, Dios usunítië' nu na', tu' naca lá'ayi yudo' queë' Dios, ate' libí'ili' naca cázali' yudo' na'.

<sup>18</sup> Biti' si' ye'e cuinli'. Channö réqui nu nutsa' ladjali' rácada' ca tácada' bönachi yödzölió ni, ral-la' huóaca nu na' ca tu bönni' biti' bi nözinë', para gata' que yöl-la' rácada' le naca idú. <sup>19</sup> Nu bönni' napzë' yöl-la' rácada' que yödzölió ni náquië' tu bönni' biti' bi nözinë' lahuë' Dios. Nazúaj lu guichi lá'ayi le rnna: "Dios runë' ga ila'chixi ila'nigui nupa tácada', rugunë' dxin yöl-la' rácada' quéguequi." <sup>20</sup> Lësca' caní rnna: "Xanru' nözinë' nítisö naca le ta'bequi ícjagaca bönachi tácada'." <sup>21</sup> Que lë ni na', biti' ral-la' gunli' zxön le gaca gunë' tu bönni'. Nequi queëli' yúgu'të. <sup>22</sup> Néquiquequi queëli':

Pablo, en Apolos, en Cefas,  
 en yödzölió ni,  
 en yöl-la' na'bán, en yöl-la' guti,  
 en dza ni zóaru' na'a, en dza si' za'.  
 Yúgu'të nequi queëli',

<sup>23</sup> ate' libí'ili' néquili' queë' Cristo,  
 ate' Cristo néquinë' queë' Dios.

## 4

### *Dxin tunë' bönni' gubáz nasöl-lë'ë Cristo*

<sup>1</sup> Que lë ni na', ral-la' guéquili' nácatu' netu' huen dxin queë' Cristo, en nazí' lu na'tu' le nagachi' queë' Dios. <sup>2</sup> Yugu' bönni', Dios nudödë' lu ná'agaquië' ulu'gunë' dxin le nequi queë', run bayudxi ilunë' idú dxi'a le tunë'. <sup>3</sup> Biti' bi ruí'i ládxa'a channö uchi'a usöröli' neda', o channö ulu'chi'a ulu'sörö bönachi yödzölió ni neda'. Biti' ca' ruchi'a rusörö cuina'. <sup>4</sup> Biti'

ruxõs lãdxi'da'ahua' neda'. Lẽ ni biti' naca bẽ' biti' nabãga'a xĩguia'. Xanru' nãquiẽ' Nu ruchi'a rusõrõẽ' neda'. <sup>5</sup> Que lẽ ni na', biti' ral-la' uchi'a usõrõli' nu bõnni' zĩ'alõ ca idxĩn dza que. Guli'cõz dza ni' huõdẽ' Xanru', ate' Lẽ' ubẽajẽ' ga linã' le nagachi' ga chul-la, en ulu'ẽ lahui le yu'u icja lãdxi'do'gaca yũgu'tẽ bõnachi. Nĩ'irõ Dios ubi'ẽ que queẽgaca bõnachi le gun bal lẽguequi ca ral-la' gaca quẽguequi.

<sup>6</sup> Na'a, bõchi' luzã'ado', ca naca lẽ ni, bẽ'a didza' que le runtu' netu', Apolos, en neda'. Huãca usẽdali' ca runtu' netu' para gunli' le nazũajsõ lu guichi lã'ayi, en biti' gunli' zxõn tuẽ' bõnni', en biti' uzõali' tsõlã'alõ ia'tuẽ'. <sup>7</sup> ¿Nuzxi bentsõ ga nacu' li' lo? ¿Bizxi caz bidẽli'nu' li' le cabĩ bennẽ' Dios quiu'? Channõ Lẽ' bẽnnasẽ' quiu' lẽ na' dẽ lu no'o, ¿bizx que run ba zxõn cuinu', rẽquinu' rãcasõ quiu' bidẽli'nu' lẽ na'?

<sup>8</sup> ¿Naru' rẽquitseli' nadẽli'tẽrõli'? ¿Naru' rẽquitseli' rilẽ'eli' yõl-la' tsahui' queẽli'? ¿Naru' rẽquitseli' rinnã bẽ'eli', sal-la' biti' rinnã bẽ'ẽtu' netu'? Ni'a queẽ' Xanru' Dios rẽ'ẽnda' innã bẽ'eli' para gaca innã bẽ'lentu' libĩ'ili' tsõzxõn. <sup>9</sup> Runi neda' naca queẽtu', bõnni' gubãz queẽ' Dios, ca nuzõẽ' netu' zẽajtu' xibãnitẽ ca na' raca quẽgaquiẽ' bõnni' chinarugu quẽgaquiẽ' ilãtiẽ' lahui' lógaca bõnachi. Nãcatu' ca tu le tu'yuda' bõnachi yõdzõliõ ni, enca' ca tu le tu'yudẽ'ẽ gubãz lã'ayi queẽ' Dios. <sup>10</sup> Tu' rẽ'ẽnitũ' guntu' xichinẽ' Cristo, ru'itu' bõnachi lataj tẽquiguequi nãcatu' bõnni' biti' bi nõzquequinẽ', pero libĩ'ili' rẽquili' rãcada'ali' tu' nãcali' queẽ' Cristo.

Libĩ'ili' rẽquili' chinãl-lali',

pero tẽquiguequi bõnachi nacuĩdi'tu' netu'.

Tu'zõa bõnachi netu' tsõlã'alõ,

pero tun libĩ'ili' bal.

<sup>11</sup> Ga ridxintẽ na'a dza, riduntu', en ribĩdxitu' nisa.

Biti' dẽ lari' gãcutu'.

Tun bõnachi netu' zi', en biti' zoa lĩdxitu'.

<sup>12</sup> Rusaca' zi' cuintu', la' nẽtu'sõ runtu' dxin.

Tu'lidza bõnachi netu' zi',

pero netu' rinãbatu' le gãcalen lẽguequi.

Ta'bĩa lãdxi'gaca bõnachi netu',

pero ruã' rilentu' le.

<sup>13</sup> Ta'nnẽ' queẽtu',

pero lu yõl-la' nõxaj ladxi' ru'ilentu' lẽgaquiẽ' didza'.

Ga ridxintẽ na'a dza nãcatu' ca bẽbu que yõdzõliõ ni,

en ca tu le ta'rũ'una yũgu'tẽ bõnachi.

<sup>14</sup> Ruzũaja' queẽli' canĩ lu guichi, calẽga tu' rẽ'ẽnda' guna' ga utuĩ'ili', pero rẽ'ẽnda' uzẽajni'ida' libĩ'ili', runa' ca runẽ' tu bõnni' ruzẽajni'inẽ' yugu' xzi'ini cazẽ' tu' nãdxĩ'inẽ' lẽgacabi'.

<sup>15</sup> Sal-la' gaca zĩãn gãyu'ẽ bõnni' ilã'cuã'alen libĩ'ili', en

ulu'sédinë' libí'ili' ca naca queë' Cristo, tuz nu zoa naca ca xúzili', nu na' ben ga néquili' queë' Cristo. Lu yöl-la' na'bán cubi le nápalí' tu' dzágali' Cristo, neda' caz naca' ca xúzili' tu' busiyönda' libí'ili' didza' dxi'a. <sup>16</sup> Que lë ni na', ráta'yua' loli' güi'í ládxi'li' gunli' ca runa' neda'.

<sup>17</sup> Que lë ni na' ca' risöl-la'a-bi' bi'i Timoteo ga zóali'. Tu' rúnlenbi' neda' dxin queë' Xanru' nácabi' ca xzí'ini caza', en nácabi' idú ladxi', ate' nadxí'ida'-bi'. Gunbi' Timoteo ga tsöjnéli' yugu' xibá rusédida' tu' néquida' queë' Cristo, yugu' le rusédida' yúgu'të lataj lógaca yúgu'të cö' bönachi queë' Cristo. <sup>18</sup> Bál-lali' run ba zxön cuinli' tu' réquili' bíti'rö udxina' ga zóali'. <sup>19</sup> Na'a, la' udxíntea' ga zóali' channö Xanru' gunné' neda' lataj. Ní'irö guéquibe'eda', calégasö didza' tu'ë bönni' tun ba zxön cúngaquië', pero guéquibe'eda' channö zóalen yöl-la' huáca queë' Dios légaquië'. <sup>20</sup> Channö nazí' lu ná'ali' rinná bé'enë' Dios libí'ili', bití' naca bë' naca caní tu' rnnásili' ca'. Naca bë' naca caní channö zóalen libí'ili' yöl-la' huáca queë' Dios. <sup>21</sup> ¿Bízxilö ré'ënili'? ¿Naru' ré'ënili' udxina' ga zóali' len gubá'ayi, para guna' libí'ili' zi', o len yöl-la' nadxí'i, en lu yöl-la' nöxaj ladxi'?

## 5

*Pablo ruchí'a rusöröë' tuë' bönni' runë' le ruá' dö'*

<sup>1</sup> Rizé didza' zóalenë' libí'ili' tuë' bönni' runë' le ruá' dö', tu' zóalenë' nigula queë' xuzë'. Le ruá' dö' caní bití' ca' tun bönachi bití' núnbë'gaca Dios. <sup>2</sup> Libí'ili' run ba zxön cuinli', pero ralla' hu'ínili', en ubéajli' nu na' run dul-la' na' ga zóali'. <sup>3</sup> Sal-la' bití' zóalena' libí'ili' lu idútë le naca', le nácate zóalena' libí'ili' lu bö' naca caza'. Ca chizóalen caza' libí'ili' chibuchí'a busöröa' nu na' run dul-la' na'. <sup>4</sup> Cate' udúbili' queë' Xanru' Jesucristo guna' libí'ili' tsözxön lu bö' naca caza'. Ní'irö, len yöl-la' huáca queë' Xanru' Jesús <sup>5</sup> buli'dödë' bönni' na' lu na' Satanás tu' xihui' para iníti idútë le naca cazë', pero ulá bö' naca cazë' dza ni' huödë' Xanru'.

<sup>6</sup> Bití' naca dxi'a gun ba zxön cuinli' ca naca le runli'. ¿Naru' cabí nözili' didza' na' rnna: "Cua zído'os que yöta xtila gun ga chaxxaj idútë cúa nazí'i le"? <sup>7</sup> Na'a, guli'cúa ga zóali' dul-la' na' le naca ca tu cúa zi gulás, para gácali' dxi'a. Ní'irö gácali' ca tu cúa cubi le cabí nazí'i cúa zi que, ca na' le nácate chinácali'. Naca queëru' ca chizóaru' Laní Pascua cate' tahuë' yöta xtila bití' nazí' cúa zi que, en chigulútië'-ba' uláz queëru' bö'cu' zxila' que Laní Pascua na', bö'cu' zxila' na' náquië' Lë cazë' Cristo. <sup>8</sup> Que lë ni na' ral-la' gunru' laní na', caléga zóalen rë'u cúa zi gulás na' le rulu'í le ruá' dö', en le cabí nazaca', pero ralla' ugunru' dxin yöta xtila na' bití' nazí'i cúa zi que, yöta xtila na' rulu'í le naca idú dxi'a, en le naca idútë li.



<sup>9</sup> Cate' buzúaja' queéli' lu guichi zí'alö, gudxi caza' libí'ili' biti' gunli' tsözxön bönni' tunë' le ruá' dö'. <sup>10</sup> Gudxa' libí'ili' caní, calëga para ucuítali' tsaz ga nacuá' bönachi yödzülió ni, nupa tun le ruá' dö', en ga nacuá' bönachi ta'zë ládxi'gaca le dë que luzë'eguequi, en ga nacu'ë yugu' bönni' gubán, en bönachi ta'yéaj ládxi'gaca budó' guió' budó' yaga. Para gunli' caní gun bayudxi irúajli' yödzülió ni. <sup>11</sup> Le ré'ëni inná didza' na' buzúaja' queéli' zí'alö naca para cabí gunli' tu zxön tuë' bönni' rnnë' néquinë' queë' Cristo, pero runë' dul-la' le lë'e, o rizë ládxi'ë le dë que luzë'ë, o reaj ládxi'ë tu budó' néquini, o rinnë xihuë'ë, o rizúdxinë', o ribanë'. Biti' ca' gágulenli' tsözxön tuë' bönni' caní. <sup>12-13</sup> Biti' nequi quia' neda' uchi'a usöröa' nupa biti' nabábagaca rë'u. Dios uchi'a usöröë' léguequi. Libí'i cázali' ral-la' uchi'a usöröli' nupa nabábagaca libí'ili'. Que lë ni na', guli'cüë' ga zóali' bönni' xihui' na'.

## 6

*Biti' ral-la' ichë'ëru' böchi' luzá'aru' lógaca bönachi yúlahui'*

<sup>1</sup> Cate' ridil-la dídza'li' tuli' len ia'tuli', ¿nacxi caz rurúguili' tséajli' yúlahui' ga ulu'chi'a ulu'sörö nupa biti' ta'yéajlë' Cristo libí'ili'? Dxí'arö tséajli' lógaca bönachi queë' Cristo para ulu'chi'a ulu'sörö libí'ili'. <sup>2</sup> ¿Naru' cabí nözili' nupa néquiguequi queë' Cristo ral-la' ulu'chi'a ulu'sörö yúgu'të bönachi yödzülió? Channö libí'i cázali' uchi'a usöröli' bönachi yödzülió, ¿naru' cabí náпали' yöl-la' réajni'i uchi'a usöröli' didza' bizxaj caní? <sup>3</sup> ¿Naru' cabí nözili' ral-la' uchi'a usöröru' yugu' gubáz lá'ayi? Rüntërö bayudxi uchi'a usöröru' le taca yödzülió ga ni zóaru' na'a. <sup>4</sup> Na'a, channö raca tu le run bayudxi nu uchi'a usörö, lë na' raca yödzülió ni, ¿bizx que rucuá'ali' nupa ulu'chi'a ulu'sörö le, nupa na' biti' bi dë lu në'eguequi lád'jagaca bönachi queë' Cristo? <sup>5</sup> Rnnía' caní para guna' ga utuí'ili'. ¿Naru' cabí zóalen libí'ili' nu raca lati' nu gaca uchi'a usörö le raca quégaquië' böchi' luzá'ali'? <sup>6</sup> ¿Nacxi caz gaca tu bönni' réajlë'ë Cristo ichë'ë böchi' luzë'ë yúlahui' ga ulu'chi'a ulu'sörö bönachi biti' ta'yéajlë' Cristo légaquië'?

<sup>7</sup> Le nácatë richixi riní'guili' tu' ridil-la dídza'li'. ¿Bizx que biti' guá' ilenli' nu ruá' dö' queéli'? ¿Bizx que biti' guá' ilenli' nu rucáchi'lan le dë queéli'? <sup>8</sup> Libí'ili' ruá'ali' dö', en rucachi' lanli', ate' runli' caní quégaquië' böchi' luzá'ali' ta'yéajlë'ë Cristo.

<sup>9-10</sup> ¿Naru' cabí nözili' biti' ila'yaza bönachi biti' nácgaca tsahui' ga rinná bë'ë Dios? ¡Biti' si' ye'e cuinli'! Biti' ca' tsaz ga rinná bë'ë Dios nu run le ruá' dö': Cuntu nu reaj ladxi' budó' guió' budó' yaga, en cuntu nu riguitsaj xibá que yöl-la' nutsaga na',

en cuntu nu bönni' run cuinë' ca nigula,  
 en cuntu nu bönni' zóalenë' la' luzë'e bönni'së',  
 en cuntu nu bönni' gubán, en cuntu nu ruhuidi',  
 en cuntu nu rizudxi, en cuntu nu rinnë xihui',  
 en cuntu nu rucáchi'lan.  
 Biti' ca' tsaz nu run caní ga rinná bē'ē Dios.

<sup>11</sup> Caní gúcali' bál-lali' libí'ili', pero na'a chinuhuóacali' dxi'a que dul-la' gubága'li', en chinéquili' quez queë' Dios, en chinuhuóacali' tsahui' ni'a que le benë' Xanru' Jesús. Bö' Lá'ayi queë' Dios runë' ga raca caní.

### *Idútë le naca cázaru' nequi quez queë' Dios*

<sup>12</sup> Ta'nná bönachi: "Yúgu'të dē lataj gunru'." Sal-la' nácatë didza' ni, biti' ral-la' gunru' yúgu'të. Sal-la' dē lataj guna' yúgu'të, biti' gu'a lataj bi inná be'e neda'. <sup>13</sup> Ta'nná ca' bönachi: "La' huagu naca le tsaz lē'ëru', ate' lē'ëru' naca ga tsudzu la' huagu." Nácatë didza' ni, pero idxín dza usunítië' Dios la' huagu, enca' lē'ëru'. Dios benë' idútë le naca cázaru', calëga para ugunru' le dxin gunru' le ruá' dö'. Naca para uzi'ë xibé Xanru', ate' Xanru' náquië' para uzi' xibë' idútë le naca cázaru'. <sup>14</sup> Dios busubanë' Xanru' Cristo lu yöl-la' guti. Lë'sca' caní, len yöl-la' huáca queë' usubanë' rë'u.

<sup>15</sup> ¿Naru' cabí nözili', idútë le nácali' naca tuz len le naca cazë' Cristo? ¿Nacxi caz gaca cúali' tu le da' Cristo, en gunli' ga ta' tu nigula udá dzaga? ¿Biti' ca' ral-la' gunli' caní! <sup>16</sup> ¿Naru' cabí nözili' channö tu bönni' zóalenë'-nu nigula udá dzaga, náquië' tuz len lënu? Ca naca lë ni nazúaj lu guichi lá'ayi le rnna: "Ilácagaquië' ca tuz bönachi iropë' na'." <sup>17</sup> Na'a, nu bönni' náquië' tuz len Xanru', náquië' tuz len Lë' lu bö' naca cazë'.

<sup>18</sup> Que lë ni na', biti' ca' gunli' le ruá' dö'. Bítitës dul-la' yúbölö runë' tu bönni', ní'ilö lu le naca cazë' runë' dul-la' na'. Nu bönni' runë' dul-la' le lë'ë, runë' dul-la' le dzaga lë cazë'. <sup>19</sup> ¿Naru' cabí nözili' idútë le naca cázali' naca yudo' queë' Dios Bö' Lá'ayi? Dios caz nuchizë' Dios Bö' Lá'ayi na' libí'ili', ate' Lë' zoë' icja ládxi'do'oli'. Que lë ni na' biti' nequi queëzili' idútë le naca cázali'. Na'a, nequi queë' Dios. <sup>20</sup> Dios gú'uë' libí'ili' len tu le zxön le gudizxjë'. Guli'gún dxin idútë le nácali', enca' bö' naca cázali' para gaca queë' Dios yöl-la' ba, tu' néquiguequi queë' Dios idútë le naca cázali', enca' bö' naca cázali'.

## 7

### *Rusëdinë' Pablo ca naca que yöl-la' nutsaga na'*

<sup>1</sup> Na'a, ubi'a didza' yugu' le rinábili' neda', le buzúajli' quia' lu guichi. Gácarö dxi'a queë' nu bönni' channö cabí sóalenë'-nu nigula. <sup>2</sup> Tu' tunda' bönachi le ruá' dö' ga ni' zóali', yúgu'të bönni' nabábagaquië' libí'ili' ral-la' ila'cuá'lenë'-nu nigula que

queëgaquië', ate' yúgu'të nigula ral-la' ila'cuá'lennu-në' bönni' que queëgacanu. <sup>3</sup> Bönni' na' zóanu nigula queë' ral-la' gunë' queënu nigula queë' ca naca yöl-la' run que yöl-la' nutsaga na', en la' lébisö ral-la' gunnu nigula len bönni' queënu. <sup>4</sup> Biti' dë lu ná'asönu nigula le naca cázanu, pero bönni' queënu dë lu në'ë ca' le. Lësca' caní, bití' dë lu ná'asë' bönni' le naca cazë', pero nigula queë' dë lu ná'anu ca' le. <sup>5</sup> Biti' ral-la' ila'dá'baguë'ë luzá'agaquië' bönni', en nigula na', nutsaga ná'agaquië'. Huácasö ca' channö ilunë' tuz didza' bití' ila'dzá'güië' tu chí'isö para gaca ulu'lidzë' Dios idú ládxi'gaquië'. Tödi na', bönni' na' ral-la' sóalenë'-nu nigula queë' leyúbölö, para cabí sequi' Satanás tu' xihui' gun ga tsázagaquië' nöza dul-la' tu' cabí gaca ila'nná be'e cuíngaquië'.

<sup>6</sup> Lë ni rea' libí'ili' naca tu le runnë' Xanru' libí'ili' lataj. Biti' naca le gunná bë'ë. <sup>7</sup> Runi neda' gácarö dxi'a ulu'gá'anë' tuz yúgu'të bönni', ca na' zoa' tuza' neda'. Tu tuë' bönni' rizi'ë tsca le runödzejë' Dios queë' gunë'. Tuë' rizi'ë tu le runödzejë', ate' ia'tué' rizi'ë ia'tú le runödzejë'.

<sup>8</sup> Na'a, rea' nupa zóagaca tuz, enca' yugu' nigula uzëbi, gácarö dxi'a qué'guequi ulu'gá'ana tuz ca na' zoa' tuz neda'. <sup>9</sup> Channö cabí gaca ila'nná be'e cuíngaquië', huáca ulu'tsaga ná'agaquië', tu' gácarö dxi'a ulu'tsaga ná'agaquië', en cabí ila'zë ládxi'gaquië' le ruá' dö'.

<sup>10</sup> Rinná bé'eda' nupa chinutsaga në'eguequi, en calëga néda'sö runa' xibá ni, pero Lë cazë' Xanru' runë' le, rnnë': "Biti' ulá'alennu tu nigula bönni' queënu." <sup>11</sup> Channö nu nigula ulá'alennu-në' bönni' queënu, ral-la' ugá'ananu túzinu, o huóacanu tuz len bönni' queënu na'. Lësca' caní tu bönni' bití' ral-la' ucá'anë'-nu nigula queë'.

<sup>12</sup> Na'a, néda'sö rea' ia'zíca'rö bönachi, en calëga rnnë' Xanru' caní, rnnía': Channö zoë' nu böchi' luzá'aru' réajlë'ë Cristo, ate' nigula queë' bití' réajlë'ënu Xanru', en channö ré'ëninu ugá'analennu lë', bití' ral-la' ulá'alennë'-nu. <sup>13</sup> Lësca' caní rnnía': Channö zóanu nu nigula zanru' réajlë'ënu Cristo, ate' bönni' queënu bití' réajlë'ë Xanru', en channö ré'ënnë' ugá'analennë'-nu, bití' ral-la' ulá'alennu lë'. <sup>14</sup> ¡Caní ral-la' ilunë'! Bönni' cabí réajlë'ë na', Dios rilé'enë' lë' ca tu bönni' néquinë' quez queë' tu' náquië' tuz len nigula queë' réajlë'ënu Cristo, ate' nigula caní, bití' réajlë'ënu, Dios rilé'enë'-nu ca tu nigula néquinu quez queë' tu' nácanu tuz len bönni' queënu náquië' böchi' luzá'aru' réajlë'ë Cristo. La'tu' cabí naca caní, ilácabi' zxi'inigaquië' ca yugu' bi'i lan lahuë' Dios. Na'a, nácagacabi' quez queë' Dios. <sup>15</sup> Nu bönni' o nigula nu cabí réajlë' Cristo, channö ré'ëni ulá'alennu na' nutsaga ná'alennu, huáca ca'. Bití' run bayudxi' ugá'analennu na' böchi' luzá'aru'

o zanru' nu réajlë' Cristo, tu' bulidzë' Dios rè'u para cózaru' tsáhu'i'do'. <sup>16</sup> ¡Caní ral-la' gaca! Nadxi ca' li', nigula, huáca gunu' ga ulë' bönni' quiu', ate' nadxi ca' li', bönni', huáca gunu' ga ulanu nigula quiu'.

<sup>17</sup> Ral-la' gunru' tu turu' tsca le bennë' queëru' Xanru', enca' tsca guca queëru' cate' bulidzë' Dios rè'u para guéquiru' queë'. Rusédida' yúgu'të cö' bönachi queë' Cristo xibá ni. <sup>18</sup> Channö Dios bulidzë' nu bönni' narugu lu xipëlë'ë le naca bë' néquinë' queë' Dios, ral-la' ugá'anë' caní, zoa lu xipëlë'ë lë na' naca bë'. Lësca' caní, channö Dios bulidzë' nu bönni' biti' narugu lu xipëlë'ë lë na' naca bë', biti' ral-la' ichúguië' lë na' lu xipëlë'ë. <sup>19</sup> Biti' bi nazaca' lë na' narugu lu xipëlë'ë tu bönni', en channö biti' narugu lu xipëlë'ë bönni' lë na' naca bë', biti' bi nazaca'. Le nácada' lesaca' naca gunru' ca rinná bë' xibá queë' Dios. <sup>20</sup> Ral-la' ugá'anë' tu tuë' bönni' ca na' gúquië' cate' ni' bulidzë' Dios lë'. <sup>21</sup> Channö bulidzë' li' cate' ni' nacu' bönni' nadó'o, biti' cö'u böniga tu' nacu' caní, pero channö gata' quiu' lataj iruju' lu na' xanu', buzí' xibé lataj na' gata' quiu' iruju'. <sup>22</sup> Channö bulidzë' Xanru' nu bönni' cate' ni' nado'ë, lahuë' Xanru' náquië' ca nu bönni' narúajë' lu në'ë xanë' na', para gunë' xichinë' Xanru'. Lësca' caní, channö bulidzë' Xanru' nu bönni' cate' ni' narúajë' lu në'ë xanë' na', bönni' ni náquië' ca tu bönni' nadó'o queë' Cristo. <sup>23</sup> Zxöntërö le gudixxjë' Dios, gú'uë' libí'ili'. Que lë ni na' biti' ral-la' guti' cuinli' lu ná'agaca bönachi. <sup>24</sup> Que lë ni na' ca', böchi' luzá'ado', ral-la' sóali' lahuë' Dios tsca guca queëli' tu tuli' cate' ni' bulidzë' Dios libí'ili'.

<sup>25</sup> Ca naca quégaca nupa biti' nutsaga ná'agaca, biti' bi gunná bé'enë' Xanru' neda'. Caní runi neda', ate' huáca uzxöni ládxi'li' neda' tu' ruhuéchi' ládxi'ë Xanru' neda'. <sup>26</sup> Tu' taca zían le raca queëru' dza ni zóaru' na'a, runi neda' gácarö dxi'a channö ulu'gá'anë' yúgu'të bönni' ca nácagaquië' na'a. <sup>27</sup> Channö nutsaga ná'lenu'-nu nigula, biti' ulá'alenu'-nu. Lësca' caní, channö zu' tuzu', biti' quilju' tu nigula para utsaga ná'lenu'-nu. <sup>28</sup> Na'a, channö utsaga ná'lenu'-nu nigula, biti' gunu' dul-la', en channö tu bi'i nigula utsaga ná'aleni-bi-në' bönni', biti' gunbi' dul-la', pero ila'guí'i ila'zaca' nupa nutsaga ná'agaca yödzülió ni, ate' ré'ënda' guna' ga uláli' lu yöl-la' riguí'i rizaca' na'.

<sup>29</sup> Na'a, rea' libí'ili' lë ni, böchi' luzá'ado'. ¡Chizóa idxín dza údxi! Que lë ni na', yugu' bönni' nutsaga ná'lengaquië'-nu nigula ral-la' ilu' ládxi'gaquië' Dios, ca runë' nu bönni' biti' nutsaga ná'alene' nigula. <sup>30</sup> Lësca' caní, nupa ta'bödxi yechi' ral-la' ulu'dzeja lahuë' Dios ca run nu biti' ribödxi, ate' nupa tu'dzeja ral-la' ila'cuá' nōxaj lahuë' Dios ca run nu biti' rudzeja, ate' nupa to'o ral-la' ilaca ca nu biti' bi dë que. <sup>31</sup> Nupa

tu'gún dxin le dē yōdzōlió ni ral-la' ilaca ca nu biti' ruí'i ladxi' le dē yōdzōlió ni, tu' udōdi quégaca le rilé'eru' yōdzōlió ni.

<sup>32</sup> Rě'enda' biti' ubi ugu'ili'. Tu bōnni' biti' zóanu nigula queē' ruí'i lādxi'ē le nequi queē' Xanru', naca gunē' le raza lādxi'ē Xanru'. <sup>33</sup> Tu bōnni' nutsaga ná'lenē'-nu tu nigula ruí'i lādxi'ē le raza yōdzōlió, naca gunē' le raza lādxi'nu nigula queē'. <sup>34</sup> Lēasca' caní raza queēnu tu nigula nutsaga ná'lennu-nē' bōnni', en queēnu nigula na' zóanu túzinu. Nigula na' zóanu túzinu ruí'i lādxi'nu le nequi queē' Xanru', naca sóanu quez queē' Dios lu le naca cázanu, en lu bö' naca cázanu. Nigula na' nutsaga ná'lennu-nē' tu bōnni' ruí'i lādxi'nu le raza yōdzōlió ni, naca gunnu le raza lādxi'ē bōnni' queēnu.

<sup>35</sup> Yugu' lē ni rea' libí'ili' para uzí'ili' xibé lē ni, en calēga para uzága'a xinōzili'. Rě'enda' gunli' le ral-la' gunli', para gunli' xichinē' Xanru' idú lādxi'li'.

<sup>36</sup> Channō zoē' tu bōnni' réquinē' biti' naca dxi'a ugá'anabi' túzibi' bi'i nigula ra'bando' queē', en chizóa iz queēbi', en rě'énide'ebi' utsaga ná'alēnbi'-nē' bōnni', huáca utsaga ná'alēnbi'-nē'. ¡Biti' gunbi' dul-la'! <sup>37</sup> Channō chinún tsutsu xtídzē'ē bōnni' na', en biti' run bayudxi gunē' caní, en dē lu nē'ē naca gunē', en chinún tsutsu xtídzē'ē ugá'anabi' túzibi', gunē' le naca dxi'a bōnni' na'. <sup>38</sup> Caní naca, nu ruí'i lataj bi'i que utsaga ná'alēnbi'-nē' bōnni', run le naca dxi'a, pero nu run ga ugá'anabi' túzibi' run le nácarō dxi'a.

<sup>39</sup> Nigula na' nutsaga ná'lennu-nē' bōnni', rinná be'e xibá que yōl-la' nutsaga na' lēnu tsanni ni zoē' nabanē' bōnni' queēnu. Channō gátie' bōnni' queēnu, gata' lu ná'anu utsaga ná'lennu-nē' nu bōnni' rě'éninu, channō réajlē'ē Xanru' bōnni' na'. <sup>40</sup> Runi neda' gácarōnu bica' ba channō ugá'ananu túzinu, en réquida' Bö' Lá'ayi queē' Dios runē' neda' tzazxōn.

## 8

### *Le ta'gú'u bōnachi lógaca budó' guiōj budó' yaga*

<sup>1</sup> Na'a, gu'a didza' ca naca que le rě'aj ráguru', lē na' gula'gú'u bōnachi lógaca budó' guiōj budó' yaga. Ta'nná bōnachi: "Yúgu'tēru' náparu' yōl-la' réajni'i." ¡Nácatē didza' ni! Yōl-la' réajni'i caní run ga run ba zxōn cuinru', pero yōl-la' nadxí'i queēru' luzá'aru' run ga rácalenru' luzá'aru'. <sup>2</sup> Channō zoē' nu bōnni' réquinē' chiréajni'inē', biti' bi réajni'ininē' ca ral-la' tséajni'inē', <sup>3</sup> pero nu bōnni' nadxí'inē' Dios, Dios caz zóalēnē' bōnni' na'.

<sup>4</sup> Na'a, ca naca que le rě'aj ráguru', lē na' gula'gú'u bōnachi lógaca budó' guiōj budó' yaga, nōziru' biti' bi nazáca'gaca budó' guiōj budó' yaga na' yōdzōlió ni, en cúnturō nu zoa naca Dios. <sup>5</sup> Sal-la' nacuá' le téquiquequi bōnachi nácacaca dios, le

nacuá' lúzhiba, en le nacuá' luyú, ate' zían le tu'lidza bönachi, en tu'i lágaca: dios, enca': xan, <sup>6</sup> pero queéru' rë'u:

Tuzë' náquië' Dios, Lë' Xuz.

Lë' benë' yúgu'të le rilé'eru',

ate' zóaru' nabanru' para tseaj ládxi'ru' Lë'.

Tuzë' náquië' Xanru', Lë' Jesucristo.

Lu në'ë Lë', Dios benë' yúgu'të le dë,

ate' nabániru' Lë'.

<sup>7</sup> Calëga yúgu'të böchi' luzá'aru' ta'yéajni'inë' lë ni. Bal-lë', nupa ni' zí'alö gula'yéaj ládxi'gaca budó' guiöj budó' yaga, ga ridxintë na'a dza tē'aj tahuë' le gula'gú'u bönachi lógaca budó' guiöj budó' yaga, ate' téquinë' napa yöl-la' huáca que budó' na'. Tu' cabí naca idú ládxi'gaquië', que lë ni na' téquinë' nabága'gaquië' xíguia' channö tahuë' lë na'. <sup>8</sup> Biti' gun le guí'aj gáguru' ga gunë' Dios rë'u bal. Channö gáguru' le, bití' gácaröru' dxí'a, en channö cabí gáguru' le, bití' gácaröru' cá'asö. <sup>9</sup> Dë lu ná'ali' guí'aj gáguli' bítitës. Gulí'gún chí'i cuinli' para cabí gunli' ga ila'chixi ila'nigui nupa bití' naca idú ca ta'yéajlë' Cristo. <sup>10</sup> Nadxi ca' li' réquinu' napu' yöl-la' réajni'i ca naca lë ni, en huáca gagu' bítitës. Channö cö'u xilataj budó' guiöj budó' yaga, en guí'aj gagu' le gula'gú'u bönachi lo budó' guiöj budó' yaga na', ate' channö nu böchi' luzó'o bití' naca idú ládxi'ë ilé'enë' li', rö'u ragu' ni', nadxi ca' gunu' ga gahuë' lë na' gula'gú'u bönachi lo budó' guiöj budó' yaga na'. <sup>11</sup> Caní gaca, tu' réquinu' napu' yöl-la' réajni'i, gunu' ga ichixi iníguinë' böchi' luzó'o bití' naca idú ládxi'ë. ¿Naru' guntso' caní queë' böchi' luzó'o, ni'a que nu na' gútië' Cristo? <sup>12</sup> Channö caní gunu', gunu' dul-la' tu' usubágu'u böchi' luzó'o xíguia', en gunu' ga ichixi iníguinë' tu' cabí naca idú ládxi'ë, en gunu' ca' dul-la' le ruzóa Cristo tsölá'alö. <sup>13</sup> Que lë ni na', channö le guí'aj gahua' gun ga ichixi iníguinë' böchi' luzá'a, bítirö gahua' bëla' na', para cabí guna' ga gunë' böchi' luzá'a dul-la'.

## 9

### *Le dë lu në'ë nu bönni' gubáz nasöl-lë'ë Cristo*

<sup>1</sup> ¿Naru' cabí naca' gubáz nasöl-lë'ë Cristo? ¿Naru' cabí nadéli'da' yöl-la' rusölá? ¿Naru' cabí bilé'eda'-në' Xanru' Jesús? ¿Naru' cabí nácali' queë' Cristo ni'a que dxin bena' neda' uláz queë' Xanru'? <sup>2</sup> Nadxi ca' téquiquequi ia'zícá'rö bönachi bití' naca' gubáz nasöl-lë'ë Cristo. Libí'ili' run bayudxi guéquili' naca' gubáz queë' Cristo. Tu' nácali' queë' Xanru', le naca cázali' naca bë' naca' gubáz nasöl-lë'ë Xanru'.

<sup>3-4</sup> Nacuá' nupa ta'zí' quidza' neda'. Caní rubi'a didza', rea' légaquië': Dë lu na'a inaba' le guí'aj gahua' tu' runa' dxin ni. <sup>5</sup> Lësca' caní dë lu na'a utsaga ná'alena'-bi' tubi' bi'i

nigula zanru' réajlë'ëbi' Cristo para gunbi' neda' tsözxön ga ridá', ca na' tunë' ia'zica'rë' gubáz nasöl-lë'ë Cristo, en yugu' bönni' böchë'ë Xanru', enca' Pedro. <sup>6</sup> ¿Naru' réquili' tuza' neda', en Bernabé ral-la' guntu' dxin lahui' dza, para idzölitu' le gágutu'? <sup>7</sup> ¿Nuzxi caz bönni' rejë' gudil-la, ate' riguijxjë' la' cuinsë'? ¿Nuzxi caz bönni' rudë'ë tu la' yëla que lubá uva, en biti' rahuë' le ribía lubá na'? ¿Nuzxi caz bönni' rapa chi'ë-ba' bö'cu' zxila', en biti' re'jë' nidxi' quégacaba'? <sup>8</sup> Biti' guéquili' la' néda'sö ruá'a caní didza'. Lësca' caní rnna le nazúaj lu guichi lu xibá queë' Moisés. <sup>9</sup> Lu xibá queë' Moisés nazúaj lu guichi le rnna: Biti' cu'u du rúa'aba' bëdxi cate' rulíbiba' xzoa' xtila. Bë'ë Dios didza' ni, calégasö tu' ruí'i lãdxë'ë-ba' bëdxi, <sup>10</sup> pero para uzí'iru' ca' xibé rë'u. Que lë ni na' nazúaj lu guichi didza' na', ate' bönni' na' rugá'anë'-ba' bëdxi, enca' bönni' na' runë' ga tu'líbiba' bëdxi xzoa' xtila, iropë' na' ral-la' ilunë' löza ila'zi'ë que le rulá' luyú na'. <sup>11</sup> Na'a, channö bentu' dxin ga zóali', le naca ca dxin guz gú'una, lë na' naca queë' Dios Bõ' Lá'ayi, ¿naru' réquitseli' biti' ral-la' uzí'itu' xibé tu le do' dë queëli' ca na' ruzi'ë xibé bönni' guz gú'una le rulapë'? <sup>12</sup> Ia'zica'rö bönachi tu'zëajni'inë' libí'ili' tu'zi'ë xibé le dë queëli'. ¿Naru' cabí rála'tërö uzí'itu' xibé netu' le dë queëli'?

Catu caz buzi'tu' xibé lë ni dë lu na'tu', pero biá' gulentu' yúgu'të para gaca guntu' libán que didza' dxi'a ca naca queë' Cristo. <sup>13</sup> Nöz quézili' ca raca quégaca nupa tun dxin que yudo', tu'zí' xibé gun que yudo'. Lësca' caní nupa ta'gú'u rön quégacaba' böa' bëdxi lu bucugu lá'ayi queë' Dios, tahuë' bëla' quégacaba' böa' bëdxi na'. <sup>14</sup> Lësca' caní nuzöë' Xanru' ca ral-la' gaca quégaquië' bönni' tunë' libán que didza' dxi'a. Nupa tu'zí' xibé libán na' tunë' ral-la' ulu'gagu légaquië'. <sup>15</sup> Neda' catu caz buzi'a xibé lë ni dë lu na'a, ate' lë ni ruzúaja' lu guichi ni biti' naca le rinábini nu bi gunna quia'. Run ba zxön cuina' tu' cabí nazxja' cate' runa' libán que didza' dxi'a. Guë'ënitëra' gátia' ca gu'a lataj nu innë runa' libán na' tu' nazxja'.

<sup>16</sup> Biti' dë lu na'a gun ba zxön cuina' tu' runa' libán que didza' dxi'a, tu' run bayudxi guna' libán que. Bica' bayechi' neda' channö cabí guna' libán que didza' dxi'a. <sup>17</sup> La'tu' runa' libán tu' rë'ëni quézida', huáca inaba' lazxja', pero run bayudxi guna' libán, tu' naca tu le busubáguë'ë Dios neda' guna'. <sup>18</sup> ¿Bizxi lazxja' uzi'tsa' xibé channö? Ruzi'a xibé le raza lãdxa'a tu' cabí nazxja' cate' runa' libán que didza' dxi'a. Biti' ca' ruzi'a xibé lë na' dë lu na'a tu' runa' libán que didza' dxi'a.

<sup>19</sup> Na'a, sal-la' cuntu nu yu'a lu në'e, chibén cuina' ca tu bönni' nadó'o quégaca yúgu'të bönachi para gaca guna' ga ulu'lágaca zíanrö ca' bönachi. <sup>20</sup> Cate' runa' libán lógaca bönachi judío, run cuina' ca tu bönni' judío para gaca guna' ga

ulu'lægaca bönachi judío na'. Bönachi judío na' tun ca rinná bē' xibá queē' Moisés. Que lē ni na' run cuina' ca tu bönni' runē' ca rinná bē' xibá na' sal-la' biti' yu'a lu na' xibá na'. Caní runa' para gaca guna' ga ulu'lægaca nupa tun ca rinná bē' xibá na'.<sup>21</sup> Cate' runa' libán lógaca bönachi izá'a, nupa biti' rinná be'e xibá queē' Moisés léguequi, run cuina' ca tu bönni' zi'tu' na', para gaca guna' ga ulu'lē'. Biti' rucá'ana' cá'asö xibá queē' Dios. Neda' runa' ca rinná bē' xibá queē' Cristo.<sup>22</sup> Run cuina' ca tu bönni' biti' naca idú ca réajlë'ë Cristo para gaca guna' ga ulu'lægaca nupa na' biti' naca idú ca ta'yéajlë' Lë'. Run cuina' ca náagaca yúgu'të bönachi para gaca guna' ga ulu'lægaca bal-la bönachi na'.<sup>23</sup> Lu yúgu'të lē ni runa', runa' ga ta'yöni bönachi didza' dxi'a, para gaca uzi'a xibé tsözxön len libí'ili' didza' dxi'a na'.

<sup>24</sup> Chinöz quézili' ca tunē' bönni' nútsa'gaquiē' lu huitaj. Ta'xíti'ë yúgu'të', pero tuzē' bönni' idéli'nē' uzi'ë xibé lataj lo. Lësca' caní ral-la' gunli' xichinë' Dios, gácali' ca bönni' nútsa'gaquiē' lu huitaj, para idéli'li' uzí'ili' xibé le ubi'ë Dios queéli'.<sup>25</sup> Yúgu'të bönni', cate' tu'pá'a cuíngaquiē' para gaca ila'yáziē' lu huitaj, ta'nná be'e cuíngaquiē' lu yúgu'të le tunē'. Tunē' caní para ila'déli'nē' tu bregui' zin le inítitë, pero idéli'ru' rē'u tu le uzí'tica'siru' xibé.<sup>26</sup> Que lē ni na', naca' neda' ca tu bönni' idú ládxe'ë rixíti'ë. Naca' ca' ca tu bönni', idú ládxe'ë ridil-lë'. Biti' rucudxa' lu bö'ös.<sup>27</sup> Ca runē' bönni' na' rulidzē' bönachi para tsöjtsázagaca lu huitaj, runa' ca' neda', runa' libán para ulu'lægaca bönachi. Bönni' na' nútsē'ë lu huitaj runē' ga gaca tsutsu idútë le naca cazē', en rinná bé'enē' le. Lësca' caní runa' neda', para cabí unítia' xilatja' lu dxin queē' Dios.

## 10

### *Biti' ral-la' tseaj ládxi'ru' budó' guiöj budó' yaga*

<sup>1</sup> Ré'ënda' uzéajni'ida' libí'ili', böchi' luzá'ado', ca guca quégaquiē' xuz xtó'otu'. Dios benē' ga gulú'u zxul-la tu böaj yúgu'të'. Lësca' caní, gula'dödë' yúgu'të' gatsaj láhui'lö nísado'.<sup>2</sup> Lu böaj ni', en lu nísado' ni', guca quégaquiē' ca raca que nu ridila nisa. Lē na' guca quégaquiē' guca bē' guláquiē' tuz len Moisés.<sup>3</sup> Lësca' caní, gulahuē' yúgu'të' yöta xtildo' na' bunödzej' Dios Bö' Lá'ayi quégaquiē'.<sup>4</sup> Gulé'ajē' yúgu'të' nisa na' bunödzej' Dios Bö' Lá'ayi quégaquiē', tu' gulé'ajē' nisa birúaj lē'e guiöj na' bulu'e lahui Dios Bö' Lá'ayi, guiöj na' gula'báininē' légaquiē'. Ca guca guiöj na' naca cazē' Cristo, nabániru' Lë'.<sup>5</sup> Sal-la' guca caní, biti' guyaza ládxe'ë Dios yúgu'të'. Que lē ni na' gulátiē' lu lataj cá'asö.



<sup>6</sup> Yúgu'të lë ni naca tu le ruzéajni'i rë'u, para cabí së ládxi'ru' le ruá' dö', ca na' gula'zë ládxi'gaquië' légaquië'. <sup>7</sup> Biti' ral-la' tseaj ládxi'ru' budó' guiöj budó' yaga, ca na' gulunë' bal-lë' légaquië'. Nazúaj lu guichi lá'ayi le rna: "Gula'bö'ë bönni' ni', en gulë'aj gulahuë', ate' gula'yasë', en gulunë' laní que budó' na'." <sup>8</sup> Biti' ral-la' gunru' le ruá' dö', ca na' gulunë' bal-lë' légaquië' le ruá' dö', ate' tu dzasö gulátië' idú ca tsonnuru' milë'. <sup>9</sup> Biti' ral-la' si' bë'ëru' Xanru', ca na' gula'zì' bë'ë Lë' bal-lë' légaquië', ate' gulátië' tu' guláguya'aba' bëla sínia' légaquië'. <sup>10</sup> Lësca' caní, biti' ral-la' innëru' queë' Dios ca na' gula'nnë' queë' bal-lë' légaquië', ate' tuë' gubáz lá'ayi queë' Dios busunítië' légaquië'.

<sup>11</sup> Yúgu'të lë ni le gulaca quégaquië' xuz xtó'otu', tu'zéajni'i rë'u, en nazúaj lu guichi lá'ayi para gun gadxi rë'u, tu' chizóaru' dza chizóa údxi que yödzölió ni. <sup>12</sup> Que lë ni na', nu réqui chinal-la, ral-la' gun chi'i cuini, para cabí ichixi inigui. <sup>13</sup> Ca naca le ta'zì' bë' libí'ili' raca ca' quéguequi yúgu'të bönachi. Dios runë' ca rnnë', en biti' gu'ë lataj bi si' bë' libí'ili' le cabí gaca guá' ilenli', pero cate' bi si' bë' libí'ili', ulu'ínë' libí'ili' naca gaca irúajli' lu na' tu' xihui', para gaca guá' ilenli'.

<sup>14</sup> Que lë ni na', böchi' luzá'ado', biti' tseaj ládxi'li' budó' guiöj budó' yaga. <sup>15</sup> Ru'ílena' libí'ili' didza' ca ru'ílena' didza' nupa ta'yéajni'i. Buli'chi'a buli'sörö didza' ni gu'a. <sup>16</sup> Cate' inábiru'-në' Dios gun lá'ayë' le rë'ajru' cate' rusubanru' ca gútië' Cristo, lë na' rë'ajru' rulu'í nácaru' tuz len Cristo, en ruzí'iru' xibé le benë' Cristo cate' bulaljë' xichönë' cate' gútië' lë'e yaga cruz. Lësca' caní, yöta xtila na' ruzxúzxjaru', en ráguru', rulu'í dzágaru'-në' Cristo, en ruzí'iru' xibé le benë' Cristo cate' budödë' idütë le naca cazë' uláz queëru'. <sup>17</sup> Sal-la' zianru' nácaru', yúgu'tëru' ráguru' tuz yöta xtila na', en que lë ni na' nácaru' ca tuz bönachi.

<sup>18</sup> Buli'yútsöca' ca tunë' bönni' Israel. Bönni' ni' tahuë' lahuë' Dios le ta'gu'ë lu bucugu lá'ayi queë', lë na' tahuë' rulu'í dzágagaquië' Dios. <sup>19</sup> ¿Bizxi rna didza' ni ruá'a? Biti' rnnía' napa budó' guiöj budó' yaga yöl-la' huáca, en le ta'gú'u bönachi lógaca budó' guiöj budó' yaga na' biti' napa yöl-la' huáca. <sup>20</sup> Caní rnnía': Lë na' ta'gú'u bönachi biti' núnbë'gaquië' Dios lógaca budó' guiöj budó' yaga, ta'gú'u lógaca bö' xihui', en calëga lahuë' Dios. Rë'ënda' biti' idzágali' yugu' bö' xihui'. <sup>21</sup> Biti' gaca gu'jali' le rulu'í nácaru' tuz len Xanru', enca' lë na' ulu'í nácali' tuz len yugu' bö' xihui'. Biti' gaca gáguli' le rulu'í dzágaru'-në' Xanru', enca' le ulu'í dzágali' yugu' bö' xihui'. <sup>22</sup> ¿Naru' gúntsaru' ga uzxé'enë' Xanru'? ¿Naru' réquitseli' nápatëröli' yöl-la' huáca ca napë' Lë'?

*Le dë lu ná'aru' gunru', en ca ral-la' idxí'igacru'-në' böchi' luzá'aru'*

<sup>23</sup> Naca idütë li didza' na' rnna: "Yúgu'të dë lu ná'aru' gunru'." Na'a, neda' rnnía': Calëga yúgu'të ral-la' gunru'. Yúgu'të dë lu ná'aru' gunru', pero calëga yúgu'të gun ga gácarö idú ca réajlë'ëru' Cristo. <sup>24</sup> Ral-la' güí'i ládxi'ru' gunru' le gun ga gaca dxi'a quégaquië' böchi' luzá'aru', en calëgasö le gun ga gaca dxi'a que la' cuínsiru'.

<sup>25</sup> Bítí'tës bi tuti' bönachi lu yé'ëyi, huáca gáguli', en bití' bi ral-la' inábali' que, para cabí cuéqui böniga ládxi'do'oli'. <sup>26</sup> Nazúaj lu guichi le rnna: "Queë' Xanru' nequi yödzölió ni, enca' yúgu'të le dë yödzölió ni."

<sup>27</sup> Channö ulidzë' tu bönni' bití' réajlë'ë Dios libí'ili' para guídali' lidxë', ate' guë'ënili' tséajli', guli'gagu yúgu'të le cu'ë loli', en bití' bi inábali' que, para cabí cuéqui böniga ládxi'do'oli'. <sup>28</sup> Channö nútí'tës nu guíë libí'ili': "Lë ni gula'gu'ë lo budó' guió'j budó' yaga", bití' gáguli' lë na' para gaca dxi'a que nu na' gudíxjoi'i caní libí'ili', en para cabí cuéqui böniga ládxi'da'ahuë'. <sup>29</sup> Rnnía': Para cabí cuéqui böniga ládxi'da'ahuë' bönni' na' gudíxjoi'inë' caní libí'ili', en calëga para cabí cuéqui böniga ládxi'do'oli' libí'i cázali'.

Nadxi ca' nu inábini neda', inná: "¿Bizx que ral-la' uzóa' tsölá'aló le dë lu na'a guna' tu' ribequi böniga ládxi'da'ahuë' bönni' yúbölö?" <sup>30</sup> Huáca inná ca' nu na': "Channö guía'-në' Dios: Xclenu', ni'a que lë na' rahua', ¿bizx que nu uzegui neda' didza' ni'a que lë na' rahua'?" <sup>31</sup> Channö bi gáguli' o bi guí'jali', o bítí'tës bi gunli', guli'gún yúgu'të para gaca queë' Dios yöl-la' ba. <sup>32</sup> Bití' bi gunli' le gun ga ila'chixi ila'nigui bönachi judío, en bití' gunli' le gun ga ila'chixi ila'nigui bönachi bití' nácagaca judío, en bití' gunli' le gun ga ila'chixi ila'nigui bönachi queë' Dios. <sup>33</sup> Guli'gún ca runa' neda'. Ruí'i ládxa'a guna' le ila'yaza ládxi'gaca yúgu'të bönachi, en bití' ruí'i ládxa'a guna' le uzi'a xibé la' neda'sö, pero le ulu'zí' xibé ia'zíca'rö bönachi para ulu'lágaca.

## 11

<sup>1</sup> Guli'gún ca runa' neda', ca na' neda' ca' runa' ca benë' Cristo.

*Le tunnu nigula lógaca bönachi queë' Cristo*

<sup>2</sup> Runa' libí'ili' zxon, böchi' luzá'ado', tu' röjnética'sili' neda', en nazí' lu ná'ali' xibá budöda' lu ná'ali'. <sup>3</sup> Na'a, ré'ënda' tséajni'ili' rinná bé'enë' Cristo yúgu'të bönni', ate' bönni' rinná bé'enë'-nu nigula, ate' Dios rinná bé'enë' Zxí'inë', Bönni' na' náquië' Cristo. <sup>4</sup> Channö tu bönni' rulidzë' Dios, o ru'ë didza' uláz queë' Dios, en dxía icjë' xilu'ë, rucá'anë' Cristo cá'asö.

<sup>5</sup> Na'a, channö tu nigula rulídzanu Dios, o ruí'ínu didza' uláz queé' Dios, en bití' bi zxoa ícjanu, rucá'ananu bönni' queénu cá'asö, en naca queénu ca naca queénu tu nigula narugu guitsa' ícjanu. <sup>6</sup> Channö tu nigula cabí bi zxoa ícjanu, ral-la' irugu ca' guitsa' ícjanu. Channö gun ga utuí'ínu nigula na' channö nu chugu guitsa' ícjanu, ral-la' bí íxóa ícjanu. <sup>7</sup> Tu bönni' bití' bi ral-la' udxía ícjé' cate' ridxiné' lahué' Dios, tu' náquié' ca naca cazé' Dios, ate' lè na' náquié' bönni' rulu'í lahui yöl-la' zxön queé' Dios, pero le nácanu nigula na' rulu'í lahui yöl-la' zxön queé' bönni' queénu. <sup>8</sup> Cate' bené' Dios bönachi, bití' bubéajé' bönni' na' lu nigula. Nigula na', lu bönni' na' bubéajé'-nu. <sup>9</sup> Lësca' caní, bití' bené' Dios bönni' para uzi'ínu xibé' nigula, pero bené' nigula para uzi'è xibánu bönni'. <sup>10</sup> Que lè ni na', nigula na' ral-la' íxóa ícjanu le rulu'í zoa nu rinná be'e lènu tu' tu'yúé' gubáz lá'ayi queé' Dios rè'u. <sup>11</sup> Na'a, lahué' Xanru', tu bönni' riquinné'-nu nigula queé', ate' nigula na' riquíninuné' bönni' queénu. <sup>12</sup> Ca na' bené' Dios, bubéajé'-nu nigula lu bönni', lësca' caní na'a, yúgu'tè bönni' náljlengaquié'-nu nigula, ate' yúgu'tè rirúaj lu në'è Dios.

<sup>13</sup> Buli'chi'a buli'sörö la' libí'isili'. ¿Naru' ral-la' ulídzanuné' Dios tu nigula bití' bi zxoa ícjanu? <sup>14</sup> ¿Naru' cabí rusèdi libí'ili' yöl-la' nácatè quégaca bönachi, ral-la' utuí'iné' bönni' na' ru'è lataj itunna guitsa' ícjé'? <sup>15</sup> Na'a, channö natúnna guitsa' ícjanu tu nigula, naca yöl-la' lachi queénu, tu' bë'è Dios queénu guitsa' ícjanu para usubín ícjanu. <sup>16</sup> Channö zoa nu gué'èni tá'baga' didza' ní, canisö nazi' lu na'tu' runtu', en lèbisö tun yugu' cö' bönachi queé' Dios.

*Bönachi Corinto tu' cá'ana cá'asö le rè'aj ráguru' para usubanru' ca gútié' Xanru'*

<sup>17</sup> Bití' runa' libí'ili' bal ca naca le uzéajni'ida' libí'ili' na'a. Le runli' bití' run ga raca dxi'a queéli' cate' rudúbili' queé' Cristo, pero run ga raca queéli' le cabí naca dxi'a. <sup>18</sup> Risí lahua' ruzéajni'ida' libí'ili' lè ni ta'guíxjö'i' bönachi neda', ta'nná: "Cate' rudúbili' queé' Cristo, narúajli' choplö", ate' réajlè'a nadxi ca' naca caní. <sup>19</sup> Run bayudxi ila'cuá'alén libí'ili' nupa tu'sedi le cabí nácatè para ilaca bë' nupa nácagaca idú bönachi queé' Cristo. <sup>20</sup> Que lè ni na', cate' rudúbili', lè na' ráguli' tsözxön bití' naca le rè'aj ráguru' para usubanru' ca gútié' Xanru'. <sup>21</sup> Caní naca, tu' runli' bayudxi tu tuli' ráguli' le nuá'ali' que queéli' cate' ráguli' tsözxön, ate' que lè ni na' ridunli' bál-lali', ate' ia'bál-lali' rè'aj ráguli' ga ridxintè rizúdxili'. <sup>22</sup> ¿Naru' cabí zoa lídxili' ga huáca guí'aj gáguli'? Ca na' runli', rucá'anali' bönachi queé' Dios cá'asö, en runli' ga tu'tuí' nupa bití' bi dè

quéguequi. ¿Bizxi caz guá' libí'ili'? ¿Naru' guntsa' libí'ili' bal? Biti' ca' runa' libí'ili' bal ca naca lë ni runli'.

*Le rë'aj ráguru' para usubanru' ca gútië' Xanru'*

<sup>23</sup> Xanru' caz budödë' lu na'a lë na' busédida' libí'ili', ca na' benë' Xanru' Jesús yëla ni' cate' nu budödi Lë' lu ná'agaquië' bönni' gulútië' Lë'. Gudélë'ë yöta xtila, <sup>24</sup> en cate' budxi gudxë' Dios: "Xclenu", buzzuxjë' le, en gunné': "Guli'gagu. Lë ni naca xipéla'a le nayuzxaj uláz queëli'. Guli'gún caní, para usubanli' ca gaca quia' neda'." <sup>25</sup> Lë'sca' caní, gudödi gulahuë', gudélë'ë tu zxíga'do', en gunné': "Le yudzu zxíga'do' ni naca xichöna', le run tsutsu didza' cubi rucá'ana tsahui'. Guli'gún caní yúgu'të luzuí guí'jali' le, para usubanli' ca gaca quia' neda'." <sup>26</sup> Caní gaca ga idxintë dza huödë' Xanru'. Yúgu'të luzuí gáguli' yöta xtila caní, en guí'jali' que le yudzu zxíga'do' caní, uluí'ili' lahui ca gútië' Xanru'.

*Ca ral-la' gunru' cate' guí'aj gáguru' para usubanru' ca gútië' Xanru'*

<sup>27</sup> Que lë ni na', núti'tës nu gagu yöta xtila ni o guí'aj que le yudzu zxíga'do' ni queë' Xanru', en bití' run le bal, nabaga' xíguia' nu na', en run dul-la', tu' rucá'ana xipélë'ë Xanru', enca' xichönë' cá'asö. <sup>28</sup> Que lë ni na', ral-la' uchi'a usöröru' la' cuínsiru' tu turu', ate' ní'irö huáca gáguru' yöta xtila ni, en guí'ajru' que le yudzu zxíga'do' ni. <sup>29</sup> Núti'tës nu rë'aj ragu lë ni, en bití' run le bal tu' cabí réquibe'e ruluí'i le guca queë' Xanru', rusubaga' cuini dul-la' ni'a que lë na' rë'aj ragu. <sup>30</sup> Que lë ni na' te'e zían nupa dzágagaca libí'ili', en ta'cuídi', ate' ziónguequi chinátigaca. <sup>31</sup> La'tu' uchi'a usöröru' la' cuínsiru', bití' uchi'a usöröë' Xanru' rë'u. <sup>32</sup> Channö gun bayudxi uchi'a usöröë' Xanru' rë'u, usaca' zi'ë rë'u, para cabí irugu queëru' cate' ichúguië' quéguequi bönnachi yödzöliö ilátigaca.

<sup>33</sup> Que lë ni na', böchi' luzá'ado', cate' udúbili' para guí'aj gáguli' para usubanli' ca gútië' Xanru', guli'cöza luzá'ali'. <sup>34</sup> Channö zoa nu ridún, ral-la' gagu nu na' ga naca lu yu'u lidxi, para cabí gun bayudxi uchi'a usöröë' Dios libí'ili' cate' udúbili'. Nacuá' ia'bal-la le runli', pero ucá'ana' tsahui' yugu' lë na' cate' uduyúa' libí'ili'.

## 12

*Yugu' yöl-la' huáca runnë' queëru' Dios Bö' Lá'ayi*

<sup>1</sup> Na'a, böchi' luzá'ado', rë'ënda' tséajni'ili' ca zeaj naca yöl-la' huáca runnë' queëru' Dios Bö' Lá'ayi.

<sup>2</sup> Nöz quézili' ca guca cate' ni' bití' réajlë'ënili' Cristo, bë'ëli' lataj gula'ché' bönnachi libí'ili' ga yúbölö. Guyéaj ládxi'li' budó' guiöj budó' yaga, le cabí ta'nnë. <sup>3</sup> Que lë ni na', ruzéajni'ida'

libí'ili' caní, rnníá': Ladaj yúgu'të nupa tu'i didza' uláz queë' Bõ' Lá'ayi queë' Dios, cuntunu gaca innë xihui' queë' Jesús, en nitüë' gaca innë': "Jesús náquië' Xanru'", channõ cabí zóalenë' Dios Bõ' Lá'ayi nu na'.

4 Na'a, nadzá'gaca tu tu le runnë' Dios Bõ' Lá'ayi queëru', pero tuzë' náquië' Bõ' Lá'ayi na'. 5 Lësca' caní, nadzá'gaca tu tu dxin rigu'ë Xanru' lu ná'aru', pero tuzë' náquië' Xanru' na'. 6 Nadzá'gaca ca' tu tu yöl-la' huáca náparu' le rúniru' xichinë' Dios, pero tuzë' náquië' Dios, Nu na' runna yöl-la' huáca na' queëru' para gunru' xichinë'. 7 Dios runnë' que queëru' tu le naca bë' náparu' yöl-la' huáca queë' Dios Bõ' Lá'ayi, lë na' ruzí'iru' xibé yúgu'tëru'. 8 Dios Bõ' Lá'ayi runödzejë' queë' tu bönni' yöl-la' huáca ru'ë didza' len yöl-la' rácada', atë' ia'tüë' bönni', Lë cazë' Bõ' Lá'ayi runödzejë' queë' yöl-la' huáca ru'ë didza' lu yöl-la' réajni'i. 9 Lësca' caní, Lë cazë' Dios Bõ' Lá'ayi na' runödzejë' queë' ia'tüë' bönni' yöl-la' réajlë' Cristo bi gunë', atë' ia'tüë' bönni' runödzejë' queë' yöl-la' huáca ruúnë' nupa te'e. 10 Ia'tüë' bönni' runödzejë' queë' yöl-la' huáca runë' yugu' yöl-la' huáca que yehua' yubá, atë' ia'tüë' bönni' ru'ë lë' lataj ru'ë didza' uláz queë' Dios, atë' ia'tüë' bönni' runödzejë' queë' yöl-la' huáca réquibe'enë' channõ bö' dzaga nu bönni' nequi queë' Dios, o nequi que tu' xihui'. Runödzejë' queë' ia'tüë' bönni' yöl-la' huáca ru'ë didza' yúbölö le cabí nazëdë', atë' queë' ia'tüë' bönni' yöl-la' huáca rudödë' didza' yúbölö na' biti' nazëdë'. 11 Yúgu'të lë ni runë' Lë cazë' Dios Bõ' Lá'ayi, tu' runödzejë' que tu tu bönachi tsca rë'ëni quëzinë'.

*Yúgu'tëru' nácaru' ca tuz bönachi*

12 Ca na' naca tuz idütë le naca cázaru', sal-la' zían le nagudi' dzágalenru', atë' le zían na' nagudi' dzágalenru' nácagaca tuz idütë le naca cázaru', lësca' caní naca queë' Cristo. 13 Tu' zóalenë' Lë cazë' Dios Bõ' Lá'ayi rë'u, lë ni naca queëru' ca tu le nadílaru' nisa, le naca bë' nácaru' ca tuz bönachi, sal-la' nácaru' yugu' bönni' judío, en yugu' bönni' zi'tu', enca' yugu' bönni' nadó'ogaquië', en yugu' bönni' biti' nadó'ogaquië'. Yúgu'tëru', Dios bë'ë rë'u lataj sí'iru' le runödzejë' cazë' Bõ' Lá'ayi.

14 Na'a, lu idütë le naca cázaru', zían le nagudi' dzágalenru', en calëga tuz. 15 La'tu' huáca gü'i didza' ní'aru', huanná: "Tu' cabí naca' në'ë bönni', biti' néquida' queë'", didza' ni biti' gun ga biti' nequi queë' bönni' na'. 16 La'tu' huáca gü'i didza' nágaru', huanná: "Tu' cabí naca' guiöj lahuë', biti' néquida' queë' bönni' ni", didza' ni biti' gun ga biti' nequi queë' bönni' na'. 17 La'tu' naca guiöj loru' idütë le naca cázaru', ¿nacxi gaca yöniru'? La'tu' naca nágaru' idütë, ¿nacxi gaca ilé'e zxína'ru'? 18 Na'a, Dios nucu'ë yúgu'të le nagudi' dzágalenru' ca gú'uni quëzinë' Lë'. 19 La'tu' naca tuz le nagudi' dzágalenru', bíti'rö soa idú ca

naca cázaru'. <sup>20</sup> Na'a, ca nácaru', zían le nagudi' dzágalenru', pero tuz le nácaru'.

<sup>21</sup> Que lë ni na', guiøj loru' biti' gaca guié ná'aru', inná: "Biti' riquinda' li'." Lësca' caní, ícjaru' biti' gaca guié ní'aru', inná: "Biti' riquinda' libí'ili'." <sup>22</sup> Na'a, yugu' le nagudi' dzágalenru', lë na' réquiru' nácacagarö cuídí'sö, lë ni naquíniröru'. <sup>23</sup> Lësca' caní, yugu' le nagudi' dzágalenru', le réquiru' nácacagarö cá'asö, lë ni rugácuröru' dxi'a, en yugu' le réquiru' biti' ral-la' ilá' lahui, rugácuröru' ca' dxi'a. <sup>24</sup> Biti' run bayudxi gunru' caní que le nácarö lachi que le néquiniru'. Dios benë' idütë le naca cázaru', en benë' ga nácarö lesaca' lë na' réquiru' rë'u nácarö cá'asö. <sup>25</sup> Caní benë', ate' biti' narúajgaca choplö le nagudi' dzágalenru', tu' tun chi'i luzë'eguequi tu ia'tú. <sup>26</sup> Channö gaca zi' tu le néquiniru', ilaca zi' tsözxön len le yúgu'të le néquiniru' na', en channö tu le néquiniru' zoa bi ruzí' xibé, yúgu'të le nagudi' dzágalenru' tu' zí' xibé tsözxön le.

<sup>27</sup> Na'a, libí'i cázali' dzágali' idütë le naca cazë' Cristo, ate' tu tuli' nácali' ca yugu' le nagudi' dzágalenë'. <sup>28</sup> Lësca' caní, ladaj bönachi queë' Cristo, Dios nucu'ë nupa tun xichinë'.

Ga naca lo nucu'ë yugu' bönni' gubáz queë' Cristo.

Ga naca buropi nucu'ë yugu' bönni' tu'ë didza' uláz queë'.

Ga bunny nucu'ë yugu' bönni' tu'sédinë' luzá'aru'.

Ní'irö nucu'ë nupa tun yugu' yöl-la' huáca que yehua' yubá.

Ní'irö nucu'ë nupa tu'ún nupa te'e.

Ní'irö nucu'ë nupa tácalen böchi' luzá'aru'.

Ní'irö nucu'ë yugu' bönni' tu'luí'inë' rë'u dxin gunru'.

Ní'irö nucu'ë yugu' bönni' tu'ë didza' yúbölö biti' nazédagaquië'.

<sup>29</sup> Calëga yúgu'të' nácaagaquië' gubáz queë' Cristo.

Calëga yúgu'të' tu'ë didza' uláz queë' Dios.

Calëga yúgu'të' tu'sédinë' luzá'aru'.

Calëga yúgu'të' tunë' yugu' yöl-la' huáca que yehua' yubá.

<sup>30</sup> Calëga yúgu'të' dë lu ná'agaquië' ulu'únë' nupa te'e.

Calëga yúgu'të' tu'ë didza' yúbölö biti' nazédagaquië'.

Calëga yúgu'të' tu'dödë' didza' yúbölö biti' nazédagaquië'.

<sup>31</sup> Guli'güí ládxi'li' cu'ë Dios lu ná'ali' yugu' yöl-la' huáca na' nácacagarö lesaca'. Na'a, uluí'ida' libí'ili' tu le nácarö lesaca' ca yúgu'të lë ni.

## 13

### *Yöl-la' nadxí'i*

<sup>1</sup> Sal-la' gaca gu'a xtídza'gaca bönachi le cabí nazëda', enca' xtídza'gaquië' gubáz lá'ayi queë' Dios, pero channö cabí nadxí'ida' luzá'a, didza' gu'a biti' gácarö lesaca' ca bö le run gui rucódxiru' o guié rutil-laru' luzë'e. <sup>2</sup> Sal-la' nazí' lu na'a

gu'a didza' uláz queë' Dios en tséajni'ida' yúgu'të le nagachi', en yúgu'të didza' réajni'i, en sal-la' naca idú ca réajlë'a Dios ga ridxintë huáca cúa' yugu' gu'a, pero channö cabí nadxí'ida' luzá'a, biti' bi nazáca'a. <sup>3</sup> Sal-la' quísia' idútë le dë quia' para ugahua' yugu' bönachi yechi', en sal-la' udöda' idútë le naca' ga ulu'zegui bönachi le tu' réajlë'a Cristo, pero channö cabí nadxí'ida' luzá'a, biti' ca' uzi'a xibé lë na' runa'.

<sup>4</sup> Nu bönni' nadxí'inë' luzë'ë, ribözë' zxön ladxi'.

Náquië' dxi'i ladxi', en biti' ruzxë'enë' luzë'ë.

Nadxí'inë' luzë'ë idú lãdxë'ë.

Biti' run ba zxön cuinë', en biti' run cuinë' lo.

<sup>5</sup> Biti' runë' le ruá' dö'.

Biti' rudúli'në' le dë queë'.

Biti' rilétenë', en biti' rönjenë' dö' gulu'i bönachi queë'.

<sup>6</sup> Biti' ca' rudzéjanë' cate' nu run le ruá' dö'.

Rudzéjanë' cate' nu run le naca idútë li.

<sup>7</sup> Ruá' rilenë' bíti'tës bi gun luzë'ë queë'.

Réajlë'tica'së' luzë'ë.

Rúntica'së' löza gun luzë'ë le naca dxi'a.

Ribözatica'së' zxön ladxi'.

<sup>8</sup> Bíti'rö tōdi que yöl-la' nadxí'i. Huadōdi que le dë lu ná'agaca bönachi ilu'i didza' uláz queë' Dios. Huadxín dza cate' bíti'rö gata' lu ná'agaca bönachi ilu'i didza' yúbölö le cabí nazëdagaca, ate' huadōdi que yöl-la' réajni'i quéguequi bönachi.

<sup>9</sup> Láti'do'os réajni'iru' na'a, en láti'do'os ca' ruí'iru' didza' uláz queë' Dios. <sup>10</sup> Cate' idxín le naca idú, ní'irö údxi que lë na' naca láti'do'os.

<sup>11</sup> Cate' ni' naca' bí'ido', bë'a didza' ca bí'ido', en gulequi icja' ca bí'ido', en guzá' lãdxa'a ca bí'ido'. Cate' bigula' buca'ana' le nequi que bí'ida'ahua'. <sup>12</sup> Na'a le rilé'eru' naca ca le rilé'eru' cate' ruyú cuinru' tu lu guié dxí'ido'. Biti' rilé'eru' idú ca naca. Dza ní'irö ilé'eru' idú ca naca yúgu'të. Na'a núnbë'a láti'do'os. Dza ní'irö gúnbë'a yúgu'të ca na' Dios caz núnbë'ë neda'. <sup>13</sup> Na'a, nacuá'tica'sö yöl-la' réajlë' queëru' Dios, en yöl-la' run löza queëru' Dios, en yöl-la' nadxí'i queëru' luzá'aru'. Nacuá' yonna ni, pero le naca lo naca yöl-la' nadxí'i.

## 14

*Yugu' yöl-la' huáca runnë' queëru' Dios Bö' Lá'ayi*

<sup>1</sup> Guli'gún bayudxi idxí'ili' luzá'ali', en guli'gü' lãdxi'li' sí'ili' ca' yugu' yöl-la' huáca runnë' queëru' Dios Bö' Lá'ayi, en le naca lo, yöl-la' huáca gü'ili' didza' uláz queë' Dios. <sup>2</sup> Nu ruí'i didza' yúbölö le cabí nazëda, calëga bönachi ruí'ilen didza' nu na'. Dios caz ruí'ilen didza' nu na', tu' cuntú nu zoa réajni'i didza' ruí'i nu na'. Dios Bö' Lá'ayi ru'ë nu na' lataj ruí'i didza' ca nátagaca le nagachi' queë' Dios. <sup>3</sup> Nu na' ruí'i didza' uláz

queë' Dios, ruí'ilen bönachi didza' para gácarö idú ca ta'yéajlë' Cristo. Rutipa ládxi'guequi, en ruhuë tsahui' léguequi. <sup>4</sup> Nu na' ruí' didza' yúbölö le cabí nazëda run tsutsu la' cuinsi, pero nu ruí' didza' uláz queë' Dios run tsutsu yúgu'të bönachi queë' Cristo.

<sup>5</sup> Raca ládxa'a gü'ili' didza' yúbölö le cabí nazëdali' yúgu'tëli', pero le naca lo, rë'enda' gü'ili' didza' uláz queë' Dios. Ruzí'iröru' xibé nu ruí' didza' uláz queë' Dios ca ruzí'iru' xibé nu ruí' didza' yúbölö le cabí nazëda, channö cabí zoa nu udödi didza' yúbölö na' le cabí nazëda, para ilaca tsutsu bönachi queë' Cristo. <sup>6</sup> Que lë ni na', böchi' luzá'ado', cate' guída' ga zóali', channö gü'ilena' libí'ili' didza' yúbölö le cabí nazëda', bití' bi uzí'ili' xibé. Uzí'sili' xibé didza' na' gü'ilena' libí'ili' le nulu'inë' Dios neda', o didza' uzéajni'i rë'u, o didza' gu'a uláz queë' Dios, o le naca xibá queë'.

<sup>7</sup> Lësca' caní raca que le ta'gú'u bö, yugu' le cabí nabángaca, ca naca gui rucödxiru', o ca naca guitarra. Channö cabí tul-la ca ral-la' ilún, ¿nacxi caz gúnbë'ëru' bízxilö le tul-la na', lë na' rul-la gui na', o guitarra na'? <sup>8</sup> Channö cabí cödxí ca ral-la' gun lúzuba' böa' na' ulidza rë'u lu gudil-la, ¿nuzxi caz upá' cuini para tseaj lu gudil-la na'? <sup>9</sup> Lësca' caní raca queéli'. Channö len lúdxí'li' gü'ili' didza' le cabí taca bönachi, bití' ca' ila'yéajni'i didza' gü'ili'. Caní gaca, nítisö gü'ili' didza'. <sup>10</sup> Le nácatë nacuá' zían didza' yúbölö tuí' zían cö' bönachi izá'a lu yödzölió ni, ate' nacuá' bönachi ta'yéajni'i tu tu didza' na'. <sup>11</sup> Na'a, channö cabí réajni'ida' didza' ru'ë tu bönni', gaca' ca tu bönni' zi'tu' lahuë' bönni' na' ru'ë didza', ate' bönni' na' ru'ë didza' gáquië' ca' lahua' neda' ca tu bönni' zi'tu'. <sup>12</sup> Lësca' caní naca queéli'. Ruí'ida' ládxi'li' sí'ili' yugu' le runnë' queëru' Dios Bö' Lá'ayi. Que lë ni na', gulí'güí' ládxi'li' sí'ili' le ilún ga ilácarö tsutsu bönachi queë' Cristo.

<sup>13</sup> Que lë ni na' ca', nu ruí' didza' yúbölö le cabí nazëda ral-la' ulidza Dios, en inabi Lë' gunnë' que yöl-la' huáca quixjö' le rë'ëni inná didza' na' ruí' nu na'. <sup>14</sup> Cate' rulidza'-në' Dios, channö ruá'a didza' yúbölö le cabí nazëda', lu bö' naca caza' rulidza'-në' Dios, pero tu' cabí réajni'ida' didza' ruá'a, lu yöl-la' réajni'i quia' bití' ruzi'a xibé didza' na' ruá'a. <sup>15</sup> ¿Nacxi caz ral-la' guna' channö? Ulidza'-në' Dios lu bö' naca caza', enca' lu yöl-la' réajni'i quia' ulidza'-në' Dios. Gul-la' yöl-la' ba lu bö' naca caza', enca' lu yöl-la' réajni'i quia' gul-la' yöl-la' ba. <sup>16</sup> Channö lu bö' naca cazu' rulidza lá'ayu'-në' Dios, ate' zoa ni' nu riyönisö, channö cabí réajni'i didza' ru'u, ¿nacxi caz gaca inná: "Ca' gaca", ni'a que didza' ru'u, rë'u-në' Dios: "Xclenu"?" <sup>17</sup> Nadxi ca' dxí'ado' ru'u didza', rë'u-në' Dios: "Xclenu'." Channö cabí réajni'i didza' ru'u, bití' bi uzí' xibé



nu na' riyöni. <sup>18</sup> Rea'-në' Dios: "Xclenu", tu' ru'ira' didza' yúbölö le cabí nazëda' ca yúgu'tëli'. <sup>19</sup> Lógaca bönachi queë' Dios guë'ënitëroda' gu'a gáyu'sö didza' le gaca ila'yéajni'i bönachi ca zían gayuá' didza' yúbölö le cabí nazëda', ate' cuntu nu gaca tséajni'i. Gaca usédida' ia'zica'rö bönachi tuzi channö ila'yéajni'i didza' gu'a.

<sup>20</sup> Böchi' luzá'ado', bití' gácali' ca bí'ido' ca naca le rizá' ládxi'li'. Guli'gaca ca bí'ido' para cabí gunli' le ruá' dö', pero guli'gaca bönni' chinácagaca ca naca le rizá' ládxi'li'. <sup>21</sup> Nazúaj lu guichi lá'ayi le rnna: "Len didza' yúbölö, en lu ruá'agaca bönachi izá'a gü'ílena' bönachi ni didza'. Sal-la' guna' caní, bití' ulu'zë náagagaca xtídza'a." ¡Caní rnnë' Xanru'! <sup>22</sup> Caní naca, Dios ru'ë rë'u lataj ru'iru' didza' yúbölö le cabí nazëdaru' para gaca tu le naca bë' lógaca bönachi bití' ta'yéajlë', en calëga lógaca nupa ta'yéajlë' Cristo. Ru'ë rë'u lataj ru'iru' didza' uláz queë' Lë' le ulu'zí' xibé nupa ta'yéajlë' Cristo, en calëga bönachi na' bití' ta'yéajlë'. <sup>23</sup> Que lë ni na', cate' udúbili' tsözxön, yúgu'tëli' na' néquili' queë' Cristo, channö gü'íli' didza' yúbölö le cabí nazëdali' yúgu'tëli', ate' tsázagaca nupa nazëdagaca láti'do'os, o nupa bití' ta'yéajlë' Cristo, ¿naru' cabí ila'nná: "Nachixi ícjali'?" <sup>24</sup> Na'a, channö yúgu'tëli' gü'íli' didza' uláz queë' Dios, ate' tsaz nu cabí réajlë' Cristo o nu nazëda láti'do'os, guéquibe'e nu na' nabaga' xíguia', ate' Dios uchi'a usöröë' lë'. Caní guéquibe'e nu na', tu' tseajni'i didza' gü'íli' yúgu'tëli'. <sup>25</sup> Guéquibe'e ca naca le rizá' ladxi' nu na', lë na' bigachi', ate' uzóa zxibi nu na', en tseajladxi' Dios, ate' inná: "Le nácatë Dios zóalenë' libí'ili'."

### *Ca ral-la' gunru' ga rudúbiru' queë' Cristo*

<sup>26</sup> Que lë ni na', böchi' luzá'ado', cate' rudúbili' queë' Cristo, rul-lë' tuë' bönni' dzáguie' libí'ili' tu salmo, ate' rusédinë' ia'tué' tu xibá, ate' ia'tué' rigu'íxjöi'inë' libí'ili' tu le bulu'íinë' Dios lë', ate' ia'tué' ru'ë didza' yúbölö le cabí nazëdë', ate' ia'tué' rudödë' didza' yúbölö na' le cabí nazëdë'. Yúgu'të le gunli' ral-la' gaca le ulu'zí' xibé nupa tu'dubi queë' Cristo. <sup>27</sup> Cate' nacuá' ni' nupa tu'í didza' yúbölö le cabí nazëdagaca, bití' ral-la' gü'íli' didza' caní zíanrö ca chopa tsónnasili'. Huáca gu'ë didza' tuzë' bönni' na', ate' tödi na' huáca gu'ë didza' ia'tué', pero run bayudxi soa nu udödi didza' yúbölö na' le bití' nazëdali'. <sup>28</sup> Channö cuntu nu zoa nu gaca udödi didza' yúbölö na' le cabí nazëdali', nu na' ru'í didza' yúbölö le cabí nazëda ral-la' soa dxisö ga na' nudúbili', ate' huáca gü'ílen Dios didza' na' lu icja ládxi'da'ahui. <sup>29</sup> Lëscá' caní, yugu' bönni' tu'ë didza' uláz queë' Dios ral-la' ilu'ë didza' chopa tsónnasë', ate' ia'zica'rë' bönni' na' tu'ë didza' uláz queë' Dios ral-la' ulu'chi'a ulu'söröë' didza' ru'ë bönni' na'. <sup>30</sup> Channö Dios ulu'íinë' tu bönni' röë

ni' le rě'eni inná xtídzě'ě, ral-la' soa dxisö nu na' ruí'i didza'.  
<sup>31</sup> Yúgu'těli' huáca güí'ili' didza' uláz queë' Dios tu tuli' para  
 izédali' yúgu'těli', en idipa ládxi'li' ca' yúgu'těli'. <sup>32</sup> Yugu' bönni'  
 tu'ë didza' uláz queë' Dios huáca ila'nná be'e cuíngaquië', en  
 ila'cu'ë dxisö. <sup>33</sup> Calëga Dios nu run ga rutsátsaru', tu' rě'enë'  
 Lë' gácaru' ba'a ladxi', ca na' runë' ga nacuá' yúgu'të cö' bönachi  
 queë' Cristo.

<sup>34</sup> Ral-la' ila'cuá'anu dxisö nigula queëli' ga na' rudúbili'.  
 Biti' dë lu ná'agacanu ilu'ínu didza' ni'. Ral-la' ila'cuá'anu  
 nöxaj ca na' rinná bë' xibá queë' Dios. <sup>35</sup> Channö tē'ëninu  
 ila'yéajni'ínu ia'lati', ral-la' ila'nábinu bönni' que queëgacanu  
 cate' ni' nacu'ë lédxigaquië'. Biti' ral-la' ilu'ínu didza' yugu'  
 nigula ga na' rudúbiru' queë' Dios.

<sup>36</sup> ¿Naru' réquitseli' bunödzejë' Dios xtídzě'ě lu ruá'ali'  
 libí'isili'? ¿Naru' réquitseli' bidxín xtídzě'ě Dios queëzili' libí'ili'?  
<sup>37</sup> Channö nu bönni' nútsë'ë ládjali' réquinë' ru'ë didza' uláz  
 queë' Dios, o réquinë' zóalenë' Dios Bö' Lá'ayi lë', bönni' ni  
 ral-la' si' lu nē'ë naca xibá queë' Xanru' le ruzúaja' queëli' lu  
 guichi ni. <sup>38</sup> Na'a, channö cabí ruí'i ládxi'ë' didza' ni, bití' güí'i  
 ládxi'li'-në' bönni' na'.

<sup>39</sup> Que lë ni na', böchi' luzá'ado', guli'güf' ládxi'li' güí'ili'  
 didza' uláz queë' Dios, en bití' inná bé'eli' nu ruí'i didza'  
 yúbölö le cabí nazëda. <sup>40</sup> Ral-la' gunru' yúgu'të ca sa'yéaj, en  
 lu yöl-la' ba'a ladxi'.

## 15

### *Bubanë' Cristo lu yöl-la' guti*

<sup>1</sup> Na'a, böchi' luzá'ado', riguíxjöi'ida' libí'ili' ca naca didza'  
 dxi'a na' bena' libán que ga zóali', lë na' guzxí' lu ná'ali', ate'  
 run ga nácarö idú ca réajlë'ëli' Cristo. <sup>2</sup> Ni'a que didza' ni uláli',  
 channö gunli' ca rnna didza' dxi'a na' bena' libán que ga zóali',  
 channö le nácatë guyéajlë'ëli'-në' Cristo.

<sup>3</sup> Ga gusí lo budöda' lu ná'ali' le budödë' Dios lu na'a neda'.  
 Caní rnna: "Gútië' Cristo uláz queëru' tu' nabága'ru' dul-la'."  
 Ca naca lë ni nazúaj lu guichi lá'ayi le rnna ben bayudxi benë'.  
<sup>4</sup> Rnna ca: "Bigachë'ë yeru ba, en cate' bizá'a tsonna dza,  
 bubanë' lu yöl-la' guti", ca na' nazúaj ca' lu guichi lá'ayi le rnna  
 ben bayudxi guca queë'. <sup>5</sup> Gudödi ni' buluí'i lahuë' Cristo,  
 ate' bilé'enë' Pedro Lë', en gudödi ni' idxínmutë' gubáz queë'  
 bila'lé'enë' Lë'. <sup>6</sup> Ní'irö buluí'i lahuë' lógaquië' zíanrö ca gayu'  
 gáyu'ë böchi' luzá'aru' ta'yéajlë'ë Cristo, cate' ni' nudúbigaquië'  
 tsözxön. La'tu'biqiu' yúgu'të' böchi'ru' ni nacu'ë nabángaquië'  
 na'a, sal-la' bal-lë' chinátigaquië'. <sup>7</sup> Ní'irö Jacobo bilé'enë' Lë',  
 en gudödi ni' buluí'i lahuë' lógaquië' yúgu'të bönni' gubáz queë'.

<sup>8</sup> Ga yějsetě bulu'í lahuë' ca' lahua' neda'. Ca guca lë ni, naca' ca tu b'í'ido' gúljabí' cate' chigudödi dza ral-la' gáljabí'.  
<sup>9</sup> Caní naca, tu' nácara' neda' cá'asö ca yúgu'të bönni' gubáz queë', en bití' naca' neda' lesaca' si' la' gubáz queë', tu' gudxía ládxa'a bönachi queë' Dios. <sup>10</sup> Na'a, tu' buzá' ládxe'ë quia' Dios naca' le naca' na'a, en calëga nítisö buzá' ládxe'ë quia'. Béntëra' neda' xichinë' ca ia'zícá'rë' gubáz queë', sal-la' calëga rácasö quia' bena' dxin na'. Dios caz, lu yöl-la' ruzá' ladxi' queë', bugunë' neda' dxin. <sup>11</sup> Na'a, channö bena' libán neda' o channö gulunë' libán ia'zícá'rë' bönni', lë ni le runtu' libán que, en le guyéajlë'ëli' libí'ili'.

### *Ubanru' lu yöl-la' guti*

<sup>12</sup> Runtu' libán queë' Cristo ca na' bubanë' lu yöl-la' guti. Channö caní naca, çnacxi caz naca, rnnali' bál-lali': "Bití' ulu'bán nupa chinátigaca"? <sup>13</sup> La'tu' cabí ulu'bán nupa chinátigaca, bití' bubanë' Cristo, <sup>14</sup> en la'tu' cabí bubanë' Cristo, nítisö naca le bentu' libán que, en nítisö naca yöl-la' réajlë' queëli' Lë'. <sup>15</sup> Ia'stú, la'tu' cabí bubanë' Cristo, rizí' yë'ëtu' cate' runtu' ba nalí queë' Dios, rnnatu' busubanë' Cristo, ate' la'tu' cabí usubanë' nupa chinátigaca, Dios bití' busubanë' Cristo. <sup>16</sup> La'tu' cabí ulu'bán nupa chinátigaca, bití' bubanë' Cristo, <sup>17</sup> en la'tu' cabí bubanë' Cristo, nítisö naca yöl-la' réajlë' queëli' Lë', ate' nagá'anagaca dul-la' nabága'li'. <sup>18</sup> Lësca' caní, nupa na' chinátigaca, en gula'yéajlë' Cristo, tsaz gulati channö cabí bubanë' Lë'. <sup>19</sup> Channö tsánnisö ni zóaru' nabanru' huáca uzí'iru' xibë' Cristo, nácaröru' bayechi' ca yúgu'të bönachi.

<sup>20</sup> Na'a, le nácatë bubanë' Cristo lu yöl-la' guti, en náquië' nu gusí lo bubán tsaz ladaj yúgu'të nupa ulu'bán tsaz lu yöl-la' guti. <sup>21</sup> Ca na' guyú'u yöl-la' guti ni'a que le benë' tuë' bönni', lësca' caní, ni'a que le benë' ia'túë' bönni' guyú'u yöl-la' rubán quégaca nupa chinátigaca. <sup>22</sup> Ca na' tati yúgu'të bönachi tu' náljlengaca Adán, lësca' caní ulu'bán yúgu'të nupa na' náljlengaca Cristo. <sup>23</sup> Tu tuë' ubanë' ca ral-la' gaca. Zí'alö bubanë' Cristo, ate' tödi ni ulu'bán nupa néquiguequi queë' Cristo cate' huödë'. <sup>24</sup> Ní'irö idxín dza údxi cate' ugúë' Cristo idútë le dë lu në'e, en idútë yöl-la' unná bë', en idútë yöl-la' huáca que tu' xihui', ate' udödë' yöl-la' unná bë' queë' lu në'ë Dios Xuz. <sup>25</sup> Run bayudxi inná bë'ë Cristo ga idxinrö dza chibenë' Dios ga ulu'zëchu zxíbigaca lahuë' Lë' yúgu'të nupa ta'dá'baga' Lë'. <sup>26</sup> Le ridá'baga' Lë' le usunítie' ga údxi naca yöl-la' guti. <sup>27</sup> Dios chinudödë' yúgu'të lu në'ë Xzí'inë' para inná bé'enë' le. Nazúaj lu guichi lá'ayi, rnná: "Budödë' yúgu'të lu në'ë para inná bé'enë' le." Na'a, naca bë' bití' budödi cuinë'

lu në'ë Zxí'inë', tu' naca cazë' Lë' Nu rudödi yúgu'të lu në'ë Zxí'inë'. <sup>28</sup> Cate' idxín dza ni' chinudödë' Dios lu në'ë Cristo yúgu'të para inná bé'enë' le, ní'irö Lë' cazë' Zxí'inë' udödi cuinë' lu në'ë Dios, Nu na' budödi lu në'ë Zxí'inë' yúgu'të, ate' ga údxi, Dios inná bé'enë' tsaz yúgu'të.

<sup>29</sup> Bál-lali' ridílali' nisa uláz quégaca nupa chinátigaca. Channö réquili' biti' ulu'bán nupa na' chinátigaca, ¿bizx que ridílali' nisa uláz quégaca nupa chinátigaca?

<sup>30</sup> Zoa bönadxi queëtu' gátitu' yúgu'të dza. ¿Bizx que ruí'itu' lataj gaca caní channö cabí ubanru' lu yöl-la' guti? <sup>31</sup> Yúgu'të dza zoa bönadxi gátia'. Riguíxjöi'ida' libí'ili' lë ni, böchi' luzá'ado', tu' raza ládxa'a le bena'. Caní naca tu' bena' ga réajlë'ëli' Xanru' Jesucristo. <sup>32</sup> Channö tu' gú'unisida' gudíl-lalena' böa' guixi' sínia' lu yödzo Éfeso, ¿bizxi caz uzi'a xibé? Channö cabí ulu'bán nupa chinátigaca, ral-la' gunru' ca ta'nná bönachi: "Gui'aj gáguru' tu' huátiru' cuxö huidzaj."

<sup>33</sup> Biti' güí'ili' lataj nu si' ye'e libí'ili'. Channö si' lu ná'ali' láti'do'os le cabí nácatë, idútëli' huóacali' chul-la niti. <sup>34</sup> Buli'bí'i ládxi'li', en biti' gunli' dul-la' tu' cabí núnbë'ëli'-në' Dios bál-lali' libí'ili'. Rnnía' caní para guna' ga utuí'ili'.

### *Ca ilaca nupa ulu'bán lu yöl-la' guti*

<sup>35</sup> Nadxi ca' zoa nu inná: "¿Nacxi ulu'bán nupa chinátigaca? ¿Nacxi gaca idú ca nácagaca cazë' cate' ulu'dxinë'?" <sup>36</sup> Li', bönni' biti' bi nözinë'. Lë na' rázu' luyú biti' ilén channö cabí initi. <sup>37</sup> Lë na' rázu' luyú naca tu xisédo'os, nadxi ca' que zxoaxtila o que ia'tú guixi' cuando'. Lë na' rázu' biti' naca guixi' cuando' na' ral-la' ilén. <sup>38</sup> Dios runë' ga gaca guixi' cuando' ca nun cazë' que. Ca naca tu tu xisedo' na' runë' ga gaca guixi' cuando' que. <sup>39</sup> Lësca' caní, biti' naca lëbisö bëla' que queégacaba' yúgu'tëba' böa' guixi'. Zoa tu bëla' quégaca bönachi, en ia'tú ca naca bëla' quégacaba' böa' guixi'. Ia'tú ca naca bëla' quégacaba' biguínni, en ia'tú ca naca bëla' quégacaba' böla. <sup>40</sup> Lësca' caní nadzá' idú ca nácagaca caz nupa nacuá' yehua' yubá ca naca idú ca nácagaca caz nupa nacuá' luyú ni. Zoa tu yöl-la' lachi quégaca nupa nacuá' yehua' yubá, en ia'tú ca naca yöl-la' lachi quégaca nupa nacuá' luyú ni. <sup>41</sup> Zoa tu yöl-la' lachi que gubidza, en ia'tú que beo', en ia'tú quéquequi bölj lúzxiba. Yöl-la' lachi que tu bölj lúzxiba nadzá' ca naca yöl-la' lachi que ia'tú bölj lúzxiba. <sup>42</sup> Lësca' caní gaca cate' ulu'bán nupa chinátigaca. Cate' rigachi' lu yeru ba naca tu bëla' initi. Cate' ubán, ní'irö gaca tu le soa tsaz. <sup>43</sup> Cate' rigachi' lu yeru ba naca tu bëla' cá'asö, en le nacuidi'. Cate' ubán, ní'irö gaca tu le lachi, en le nál-la. <sup>44</sup> Cate' rigachi' lu yeru ba naca tu bëla' que yödzülió ni. Cate' ubán, ní'irö gaca tu le soa tsaz yehua' yubá. Zoa tu bëla' que yödzülió ni, en ia'tú ca gaca le idzaga bö' naca cázaru'.

<sup>45</sup> Nazúaj lu guichi lá'ayi le rnna: "Bönni' na' gusí lahuë' zoë' luyú ni, lë' Adán, Dios benë' lë' bönni' ban", pero Bönni' na' guyázië' xilatjë' Adán, Lë' Cristo, Dios benë' ga náquië' Bö' nabániru'. <sup>46</sup> Biti' blë'ë zí'alö Bönni' na' náquië' Bö'. Bla' zí'alö nu na' naca bönáchisö, ate' ní'rö blë'ë Bönni' na' náquië' Bö'. <sup>47</sup> Bönni' ni' blë'ë zí'alö, gúquinë' yu. Bönni' na' blë'ë burópilö, Nu na' naca Xanru', birúajë' yehua' yubá. <sup>48</sup> Nupa nacué' luyú ni nácgaca ca gúquië' bönni' na' gúquinë' yu, ate' nupa ral-la' tsöjcuá' yehua' yubá ilaca ca naca Nu na' birúaj yehua' yubá. <sup>49</sup> Ca na' na'a dë queëru' tu bëla' le naca ca guca bëla' queë' bönni' na' gúquinë' yu, lësca' ral-la' huöéquiru' ca néquinë' Nu na' birúaj yehua' yubá.

<sup>50</sup> Caní rë'ëni inná lë ni rea' libí'ili', böchi' luzá'ado', rnniá': Le néquini bëla', en rön biti' gaca tsaz ga ni' rinná bë'ë Dios, en lësca' caní, lë na' initi biti' gaca ideli' lë na' soa tsaz. <sup>51</sup> Buli'yútsöca', rea' libí'ili' tu le bigachi': Biti' gátiru' yúgu'tëru', pero Dios utsë'ë ca nácaru' yúgu'tëru'. <sup>52</sup> Tsárido'os gaca, tsca naca tu le rutásö guiöj loru', cate' cödxí lúzuba' böa' le röjsetë. Cödxí lúzuba' na', ate' ulu'bán nupa chinátigaca, en iléquini tu le soa tsaz, ate' Dios utsë'ë le néquiniru' yúgu'tëru'. <sup>53</sup> Lë na' nácaru' le riniti ral-la' huöáca le soa tsaz, ate' le néquiniru', lë na' ral-la' gati, huöáca tu le catu caz gati. <sup>54</sup> Cate' lë na' riniti chinuhuöáca le soa tsaz, enca' lë na' ral-la' gati chinuhuöáca le catu caz gati, ní'rö idxín lë na' nazúaj lu guichi lá'ayi, le rnna: Nadúa tsaz yöl-la' guti.

Chibidéli'në' Cristo.

<sup>55</sup> Bítirö inná be'e yöl-la' guti rë'u.

Bítirö gaca yöl-la' guti bi gun queëru'.

<sup>56</sup> Huáca bi gun yöl-la' guti queëru' tu' nabága'ru' dul-la', ate' nabága'ru' dul-la' tu' ridá'baga'ru' xibá queë' Dios. <sup>57</sup> ¡Xclenë' Dios! ¡Lë cazë' runë' ga nuláru' lu yöl-la' guti ni'a que le benë' Xanru' Jesucristo!

<sup>58</sup> Que lë ni na', böchi' luzá'ado', guli'sóa tsutsu. Guli'gaca idú ládxi'li', gúntica'sili' xichinë' Xanru' tu' nöz quézili' biti' runli' nítisö xichinë' Xanru'.

## 16

*Yugu' bönachi Corinto tu'nödzej quégaquië' böchi'gaca ta'yádzjanë'*

<sup>1</sup> Na'a, ca naca que dumí na' unödzejali', le gácalen böchi'ru' ta'yéajlë'ë Cristo nacué' Jerusalén, guli'gún na'a ca na' gunná bé'eda' yugu' cö' bönachi queë' Cristo, nacué' luyú Galacia. <sup>2</sup> Yugu' dza domingo, tu tuli' ral-la' cú'uli' quez lati' dumí, tsca na' Dios runnë' queëli'. Guli'gún chi'i le, para cabí gun bayudxi bi utúbili' cate' idxina' ga zóali'. <sup>3</sup> Cate' ni' idxina' ga

zóali', isöl-la'a Jerusalén bönni' na' cöli' libí'ili'. Uzúaja' tu lu guichi le gun ga ilaca bé'gaquié', ate' ilu'ë dumí na' unödzejali'.  
 4 Channö ral-la' tseja' ca' neda', tsöjácalenë' neda'.

### *Le rë'ënë' gunë' Pablo*

5 Guída' ga zóali' cate' údxi töda' yugu' yödzo luyú Macedonia, tu' run bayudxi töda' yugu' yödzo na'. 6 Réquida' ugá'analena' libí'ili' tu chi'i, o nadxi ca' ugá'ana' ni' yugu' beo' ziaga. Ní'irö huáca gácalenli' neda', ugú'uli' neda' nöza gátitës ga ral-la' tseja'. 7 Cate' guída' uduyúa' libí'ili' biti' rë'ënda' tödisa' ni'. Runa' löza sóalena' libí'ili' xidzé, channö gunnë' Xanru' neda' lataj. 8 Ugá'ana' ni lu yödzo Éfeso ga idxinrö dza Pentecostés 9 tu' dë lataj ni guna' tu dxin zxön queë' Xanru', sal-la' zían nupa ta'dá'baga' neda'.

10 Channö idxinbi' bi'i Timoteo ga na' zóali', guli'gü'i ládxi'li'-bi', para cabí ubi uguí'ibi' tsanni ni' sóaleni' libí'ili', tu' runbi' xichinë' Xanru' ca na' runa' neda' xichinë'. 11 Que lë ni na', cuntú nu ral-la' uzóa lëbi' tsölá'alö. Guli'gácalen-bi', ugú'uli'-bi' nöza idú tsáhu'i'do', para udxinbi' ga ni zoa' neda', tu' riböza'-bi' lëbi', enca' yugu' böchi'ru' túnlenë'-bi' tsözxön dxin.

12 Ca naca queë' böchi'ru' Apolos, gúta'yua' lahuë' tsejé' tsöjyúë' libí'ili' tsözxön len yugu' böchi'ru', pero biti' rë'ënë' tsejé' na'a. Guídë' cate' séqui'në'.

### *Didza' ru'ë Pablo ga ruúdx*

13 Buli'subán ládxi'li', en guli'gaca tsutsu ca réajlë'ëli'-në' Cristo. Guli'gaca rugu ládxi', en buli'tipa ládxi'li'. 14 Len yölla' nadxi'i guli'gún bititës bi gunli'.

15 Na'a, böchi' luzá'ado', chinöz quézili' ca naca queë' Estéfanos, enca' quégaca dí'a dza queë'. Nácagaca nupa gula'sí lógaca ta'yéajlë' Cristo ladaj bönachi nacua' luyú Acaya. Bulu'dödi cúngaquié' para ilunë' xichíngaca bönachi queë' Dios. 16 Ráta'yua' loli', böchi' luzá'ado', gunli' bal nupa nácagaca ca böchi'ru' na', enca' ca nácagaca nupa tunlen légaquié' tsözxön dxin, en tácalen légaquié'. 17 Rudzédada' tu' bila'dxinë' Estéfanos, en Fortunato, en Acaico ga zoa', tu' gúcalengaquié' neda' uláz queëli'. 18 Bulu'huë tsáhuë'ë neda' ca na' bulu'huë tsáhuë'ë ca libí'ili'. Guli'gún bal bönachi caní.

19 Yugu' cö' bönachi queë' Dios luyú Asia ni tu'gapa Dios libí'ili'. Aquilo, en Priscila, enca' nupa tu'dubi queë' Dios ga naca lu yu'u lúdxigaquié' tu'gapë' Dios libí'ili'. 20 Yúgu'të böchi'ru' ni tu'gapë' Dios libí'ili'. Guli'gapa Dios tuli' ia'tuli', en unída'li' luzá'ali'.

21 Neda', Pablo, len na' cuin caza' ruzúaja' lu guichi lë ni, rnnía': Rugapa' Dios libí'ili'.

<sup>22</sup> Nu bití' naxí'i Xanru' Jesucristo, chinabía dö' nu na'.

Gudá Xanru'.

<sup>23</sup> Rinábida'-ně' Xanru' Jesucristo uzá' lădxě'ě queěli'.

<sup>24</sup> Naxí'ida' yúgu'těli' tu' nácaru' tuz len Xanru' Jesucristo.  
¡Ca' gaca!

## DIDZA' BUROPI GUSÖL-LË'Ë PABLO YÖDZÖ CORINTO

*Pablo rugapë' Dios bönachi queë' Cristo nacu'ë Corinto*

<sup>1</sup> Neda', Pablo, naca' gubáz queë' Jesucristo tu' rë'ënë' caní Dios. Bi'i böchi'ru' Timoteo runbi' neda' tsözxön. Rugapa' Dios libí'ili', rudúbili' queë' Dios lu yödzö Corinto, enca' yúgu'tëli' néquili' quez queë' Dios luyú Acaya ga na' nababa Corinto. <sup>2</sup> Rinábida'-në' Xúziru' Dios, en Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

*Yugu' le gudí'i guzxáque'ë Pablo*

<sup>3</sup> jYöl-la' ba Dios, Xuzë' Xanru' Jesucristo, tu' náquië' Xúziru', en ruhuéchi' ládxë'ë rë'u, en náquië' ca' Dios, Nu ruhué tsáhui'tica'sö rë'u! <sup>4</sup> Dios ruhué tsáhuë'ë rë'u cate' raca bítí'tës bi raca queëru', para gaca huë tsáhui'ru' ca' nupa bi raca quéguequi. Ruhue tsáhui'ru' légaquië' ca na' Dios ruhué tsáhuë'ë rë'u.

<sup>5</sup> Tsca ta'yán le riguí'i rizáca'ru', ca na' gudí'i guzxáque'ë Cristo, lësca' caní ta'yán le tu'hué tsahui' rë'u, tu' nácaru' tuz len Cristo. <sup>6</sup> Que lë ni na', channö bi riguí'i rizáca'tu', raca caní queëtu' para gaca huë tsáhui'tu' libí'ili', en guntu' ga uláli'. Channö Dios ruhué tsáhuë'ë netu', raca caní para gaca huë tsáhui'tu' libí'ili', ate' lu yöl-la' riböza zxön ladxi' queëli', gaca guá' ilenli' yugu' le quí'i sáca'li', ca na' raca ca' queëtu'. <sup>7</sup> Ruzxöni ládxi'tu'-në' Dios gúntica'së' ga gaca dxi'a queëli', tu' chinözitu' ca na' riguí'i rizáca'li' tsözxön len netu', lësca' caní ruzí'ili' xibé tsözxön len netu' le ruhué tsáhuë'ë Dios rë'u.

<sup>8</sup> Ré'ënitú' inözili', böchi' luzá'ado', ca naca le zían le gulaca queëtu' luyú Asia. Gudödité bë' lë na' guca queëtu', ate' guca zítërö ca le guca guá' ilentu'. Ca' guca, bítí'rö bentu' löza sóatu' ibantu'. <sup>9</sup> Gúquitu' guca queëtu' ca raca quégaquië' bönni' chinarugu quégaquië' ilátië'. Guca caní queëtu' para cabí uzxöni ládxi'tu' la' cuínsitu', pero uzxöni ládxi'tu'-në' Dios, Nu rusubán nupa chinátigaca. <sup>10</sup> Dios busölë' netu' lu lë na' ben ga guzóa bönadxi gátitu', ate' rusölë' netu' yúgu'të dza. Runtu' löza usölë' Lë' netu' caní leyúbölö <sup>11</sup> channö gácalenli' netu', ulídzali'-në' Dios, en inábili'-në' gácalenë' netu'. Dios gunë' ca na' inábili'-në' tsözxön len bönachi zían, uzá' ládxë'ë queëtu', ate' ila'nná: "Xclenë' Dios" ni'a queëtu'.

*Rigúxjö'ë Pablo bixz que ridzenë' idxinë' Corinto*

<sup>12</sup> Lë ni le run ga rudzéjatu'. Bö' naca castu' ruluí'i netu', len yöl-la' ba'a ladxi' queëtu', en idú ládxi'tu' runtu' bi runtu'



yödzölió ni, ate' caní bentu' ca' ga ni' zóali'. Caní bentu', tu' gúcalen netu' le buzá' ládxe'ë Dios queëtu', en calëga len yöl-la' réajni'i queëztu' bentu' caní. <sup>13</sup> Ruzájúsötu' queëli' lu guichi le gaca ulábali', en le gaca tséajni'ili'. Raca ládxa'a tséajni'ili' idú <sup>14</sup> lë na' réajni'ili' lati'. Ní'irö cate' idxín dza huödë' Xanru' Jesucristo, gaca gunli' netu' zxön ca na' netu' guntu' libí'ili' zxön.

<sup>15-16</sup> Tu' bena' löza lë ni, guzá' ládxa'a guída' ga zóali' zí'alö cate' gudöda' luyú Macedonia, ate' guída' ga zóali' leyúbölö cate' uzá'a ni para uzí'ili' xibá' chopa luzuí. Tödi ni' huáca gácalenli' neda' ugú'uli' neda' nöza tseja' luyú Judea. Caní gú'unida' guna'. <sup>17</sup> ¿Naru' réquitseli' guzxí' yë'a tu' butsa'a ca guna'? ¿Naru' réquitseli' lu yöl-la' bönáchisö quia' runa' le rizá'asö icja', en bë'ësa' ca' didza' cate' gunniá': "Caní guna"?' <sup>18</sup> Ni'a queë' Xanru' Dios, Nu run idütë ca rnna xtídzë'ë, biti' bë'ësa' ca' didza' cate' bë'lëna' libí'ili' xtídzë'ë Dios. <sup>19</sup> Jesucristo, Zxí'inë Dios, Nu na' bentu' libán que ga zóali', neda' len Silvano, en Timoteo, biti' ru'isë' ca' didza'. Lë' ru'ë didza' idütë li. <sup>20</sup> Cristo caz runë' ga naca idütë löza yúgu'të le guzxí' lu në'ë Dios, ate' ni'a queë' Lë' gaca innaru': "Ca' gaca", para gaca queë' Dios yöl-la' ba. <sup>21</sup> Dios caz runë' ga runtu' löza tsözxön len libí'ili' néquiru' queë' Cristo, en budödë' lu na'tu' dxin queë' runtu'. <sup>22</sup> Bennë' queëru' le naca bë' néquiru' queë', tu' guchízië' icja ládxi'do'oru' Dios Bö' Lá'ayi, Nu naca queëru' le run ga naca löza yúgu'të le gunnë' Dios queëru'.

<sup>23</sup> Ni'a queë' Xanru' Dios, Nu nözi le rizá' ládxa'a, ruá'a didza' idütë li. Nözinë' Lë' biti' bida' ga zóali' lu yödzö Corinto, para cabí gun bayudxi guna' ga hu'ínili'. <sup>24</sup> Biti' rë'ënitú inná bé'etu' libí'ili' ca réajlë'ëli' Cristo, tu' chinácali' tsutsu ca réajlë'ëli' Lë'. Rë'ënitú guntu' le gun ga udzeja ládxi'li'.

## 2

<sup>1</sup> Que lë ni na' bë' ládxa'a cabí guídatea' queëli' zí'alö, para cabí guna' ga hu'ínili'. <sup>2</sup> Channö guna' neda' ga hu'ínili', ¿nuzxi caz gun ga udzëjada' neda'? ¿Naru' guntsa' ga hu'ini nu ral-la' gun ga udzëjada' neda'? <sup>3</sup> Que lë ni na' buzúaja' queëli' lu guichi zí'alö. Biti' gú'unida' guída' ga zóali', para cabí gunli' libí'ili' ga hu'ínida' neda', tu' ral-la' gácali' libí'i cázali' le gun ga udzëjada' neda'. Tu' ruzxöni ládxa'a libí'ili', nözda' udzëjali' yúgu'tëli' channö udzëjada' neda'. <sup>4</sup> Cate' ni' buzúaja' queëli' lu guichi lë na', gusëbide'e ládxa'a, en bu'ínide'e ládxa'a ga bidxintë gurödxá'. Buzúaja' caní lu guichi, calëga para guna' ga hu'ínili', pero para inözili' ca nadxí'ide'eda' libí'ili'.

*Ral-la' uniti loru' nu ruá' dö' cate' rubí'i ladxi'*

<sup>5</sup> Channö zoë' tu bönni' ni', bönni' na' busuhu'ininë' rë'u, calëga neda'sö busuhu'ininë', pero huáca innaru' busuhu'ininë' yúgu'tëli' libí'ili'. Rnní'a': "Huaca innaru'", para cabí tödi bē' ichugu bē'a queë' bönni' na'. <sup>6</sup> Tscati' gaz xíguia' chibenli' látu'biqui' yúgu'tëli' queë' bönni' na'. <sup>7</sup> Na'a, ral-la' uniti loli' bönni' na', en utípalí' ládxë'ë, para cabí tödi bē' hu'ininë', en para cabí gaca tsaz chopa ládxë'ë. <sup>8</sup> Que lë ni na' ráta'yua' lolí' gunli' le gaca bē' nadxí'ili'-në' idú ládxí'li'. <sup>9</sup> Que lë ni na' ca' buzúaja' queëli' lu guichi lë na'. Gú'unida' si' bē'a libí'ili' para inözda' channö rúntica'sili' ca rnna xtídza'a. <sup>10</sup> Cate' nu runiti loli' libí'ili', neda' ca' runiti lahua' nu na'. Cate' nu runiti lahua', channö bi ben nu na' runiti lahua', runa' caní uláz queë' Cristo para gaca bi uzí'ili' xibé. <sup>11</sup> Caní runa', para cabí sequi' Satanás tu' xihui' ucúl-la rë'u, tu' chinöziru' yugu' le rë'ëni gun queëru'.

### *Gurö'ë böniga Pablo lu yödzö Troas*

<sup>12</sup> Cate' bidxina' lu yödzö Troas para guna' libán que didza' dxi'a queë' Cristo, bénnadë'ë Xanru' neda' lataj guna' libán ni'. <sup>13</sup> Sal-la' guca caní, gurö'a böniga tu' cabí yöjxáca'a-bi' bi'i böchi'ru' Tito ni'. Que lë ni na' buzá'alena' bönachi ni', ate' guyija' luyú Macedonia.

### *Idéli'ru' tu' zóalenë' Cristo rë'u*

<sup>14</sup> ¿Xclenë' Dios! Riché'tica'së' rë'u ca tu le naca bē' bidéli'në' Cristo yöl-la' rusölá queëru'. Dios rugunë' dxin rë'u para rulu'ë lahui ca gaca ilúnb'e bönachi Cristo. Le nácaru' naca ca tu le rilá' zxixi, le riguisi gátí'tës. <sup>15</sup> Nácaru' ca tu nōri rilá' zxixi, le ruzégui'ë Cristo lahuë' Dios, en le riguísië' lógaca nupa nulágaca, en nupa nanítigaca. <sup>16</sup> Lógaca nupa na' nanítigaca nácaru' ca tu le rilá' siguti le naca bē' ilátie'. Lógaca nupa na' nulágaca nácaru' ca tu le rilá' zxixi le naca bē' ibántica'siru'. ¿Nuzxi caz naca lesaca' gaca que caní? <sup>17</sup> Biti' runtu' ca tun zían bönachi, nupa tu'gún dxin xtídzë'ë Dios ca tu le tuti', en to'o. Tu' nasól-lë'ë Dios netu', idú ládxí'tu' ruí'itu' didza' lahuë' Lë' tu' nácatu' tuz len Cristo.

## 3

### *Ca naca didza' le ruín rë'u tuz len Dios*

<sup>1</sup> ¿Naru' réquitseli' run ba zxön cuintu' cate' ruí'itu' caní didza'? ¿Naru' runtsö bayudxi uluí'itu' libí'ili' tu guichi le rulu'i le nácatu'? ¿Naru' ral-la' inábitu' libí'ili' gúnnali' queëtu' tu guichi caní, ca na' tun bal-la bönachi? <sup>2</sup> Libí'i cázali' nácali' ca tu guichi le rulu'i le nácatu', le nazúaj lu icja ládxí'do'otu', ate' yúgu'të bönachi gaca ulu'laba le, en tséajni'igüequi le. <sup>3</sup> Le nácali' nalá' lahui ca tu guichi nuzúajë' Cristo, le gusól-lë'ë lu na'tu'. Biti' nazúaj tu lu guichi, pero Bö' Lá'ayi queë' Dios

ban nuzúajë' le, calëga tu lu guiõjta'a, pero lu icja lãdxi'do'oli' nuzúajë'.

<sup>4</sup> Ruí'itu' caní didza' tu' ruzxõni lãdxi'tu'-në' Dios tu' zóalenë' Cristo rë'u. <sup>5</sup> Biti' réquitu' bi gaca guntu' rácasõ queëtu', pero Dios runnë' queëtu' yõl-la' huáca bi guntu'. <sup>6</sup> Dios caz bennë' queëtu' yõl-la' huáca guntu' xichinë' lu didza' cubi na', le ruún rë'u tuz len Dios. Didza' ni bití' naca tu xibá nazúaj lu guichi, pero naca tu le nusëdinë' Dios Bõ' Lá'ayi rë'u. Xibá na' nazúaj lu guíchisõ richugu queëru' gátiru', pero Dios Bõ' Lá'ayi nabániru'.

<sup>7</sup> Yugu' xibá queë' nazúajgaca lu guichi, Dios buzúajë' yugu' lu guiõjta'a, ate' bulu'e lahui yõl-la' bení' queë' cate' budödë' le lu në'ë Moisés. Sal-la' gudõdi que, guyëpitëro yõsa bení' lahuë' Moisés. Caní guca, bití' guca ulu'yú bõnachi Israel lahuë' Moisés. Channõ yõl-la' bení' caní yõjtsaga xibá na', ate' xibá na' richugu quégaca bõnachi ilátigaca, <sup>8</sup> zxõntëro naca yõl-la' bení' na' dzaga yugu' le runë' Dios Bõ' Lá'ayi. <sup>9</sup> Yõjtsaga yõl-la' bení' lë na' ben ga narugu quégaca bõnachi ilátigaca. Zxõntëro naca yõl-la' bení' que lë na' run ga rnnë' Dios nãcagaca tsahui' bõnachi. <sup>10</sup> Tu' nãcatëro lesaca' yõl-la' bení' na' nalá' lahui na'a, cuídí'sõ nagá'ana yõl-la' bení' na' bilá' lahui cate' Dios bunõdzjë' xibá queë' quégaca bõnachi. <sup>11</sup> Channõ guzóa yõl-la' bení' que lë na' guzóa tu chí'ido'osõ, zxõntëro naca yõl-la' bení' que lë ni soática'sõ.

<sup>12</sup> Tu' zoa lë ni runru' löza, ruí'itu' didza' lu yõl-la' rugu ladxi'. <sup>13</sup> Biti' runtu' ca benë' Moisés, bucache' lahuë' len tu lári'do', para cabí ulu'yú bõnachi Israel yõl-la' bení' na' zeaj riniti. <sup>14</sup> Gula'chul-la gula'nítië' yugu' bõnni' ni'. Ga ridxintë na'a dza cate' tu'labë' guichi que didza' gula na' le ruún bõnachi tuz len Dios, naca tsca nagá'ana la' leze lári'do' na' lógaquië', lë na' gaca ugüë' tuzë' Cristo. <sup>15</sup> Ga ridxintë na'a dza, cate' tu'labë' guichi ga na' nazúaj didza' queë' Moisés, zxa ca tu lári'do' guiõj lógaquië' le run ga nachul-la nanítigaquië'. <sup>16</sup> Cate' nu ruhuóaca queë' Xanru', rigúa lë na' run ga nachul-la naniti nu na'. <sup>17</sup> Cate' ni rnnatu': "Xanru'", ruí'itu' didza' queë' Dios Bõ' Lá'ayi. Ga zoë' Bõ' Lá'ayi queë' Xanru', ni' zoa caz yõl-la' nadzán. <sup>18</sup> Yúgu'tëru' rë'u bití' bi nusayaj loru'. Nácaru' ca tu guíë dxili ga nalá' yõl-la' bení' que lahuë' Xanru', ate' yõl-la' bení' na' queë' Xanru', Nu naca Bõ' Lá'ayi, rutsá' rë'u, en run ga zeaj rácarõru' ca náquië' Cristo caz, en ráta'rõ queëru' yõl-la' bení' queë'.

## 4

<sup>1</sup> Dios buéchi' lãdxë'ë netu', en budödë' lu na'tu' dxin ni runtu'. Que lë ni na' bití' raca chopa lãdxi'tu'. <sup>2</sup> Chibucá'anatu' le tun bõnachi bagáchi'sõ, en le tun ga rutuí'iru'. Cuntu nu

rizi' yé'etu', en biti' rutsá'atu' xtídzë'ë Dios. Tu' ruí'itu' didza' que le naca idútë li, ruí'i ládxi'tu' guntu' le iléquibe'e yúgu'të bönachi naca dxi'a lahuë' Dios. <sup>3</sup> Channö zoa nu biti' réajni'ini didza' dxi'a runtu' ba nalí que, nácagacasö nupa nachul-la nanítigaca biti' ta'yéajni'i le. <sup>4</sup> Biti' ta'yéajlë' bönachi na'. Ben tu' xihui' ga naca caní, nu na' nun cuini ca dios, en rinná be'e bönachi dza ni zóaru' na'a. Ben ga nachul-la nanítigaca, para cabí ila'lé'e bení' que didza' dxi'a ca naca yöl-la' bení' queë' Cristo, Nu na' naca idú ca náquië' Dios caz. <sup>5</sup> Biti' runtu' libán que la' cuínsitu', pero runtu' libán queë' Jesucristo, en rigu'xjö'ötu' náquië' Xanru', ate' netu' ni nácatu' huen dxin queëli' tu' nadxí'itu'-në' Jesús. <sup>6</sup> Dios, Nu ben ga buzení' bení' ga ni' guca chul-la, náquië' Nu rigú'u bení' icja ládxi'do'oru', le ruzéajni'i rë'u para gúnbë'ëru' yöl-la' bení' queë' Dios, lë na' ruzení' lahuë' Jesucristo.

*Tu' réajlë'ëru' Dios runru' ca rë'ënë' Lë'*

<sup>7</sup> Yöl-la' tsahui' ni yu'u icja ládxi'do'oru' rë'u. Nácaru' ca yugu' yusu' yu, para gaca bë' nequi queë' Dios yöl-la' huáca zxön na', en calëga que cázaru'.

<sup>8</sup> Tu'saca' zi' bönachi netu', pero biti' rudú ládxi'tu'.

Rö'ötu' böniga, pero biti' raca chopa ládxi'tu'.

<sup>9</sup> Ta'bía ládxi' bönachi netu', pero biti' rubéaj ládxi'ë'ë Dios netu'.

Ta'zé'ede'e netu' yu, pero biti' tu'suniti netu'.

<sup>10</sup> Lu idú le naca caztu' rátitica'stu' tsözxön len Jesús, na' naca bë' lu le naca caztu' nabánitu' Lë'.

<sup>11</sup> Tsanni ni zóatu' nabantu', zóatica'sö bönadxi gátitu' tu' néquitu' queë' Jesús para gaca bë' nabánitu' Lë' lu le naca caztu' le riniti. <sup>12</sup> Caní naca, zoa bönadxi queëtu' gátitu', pero ni'a que lë ni rata' yöl-la' na'bán queëli'.

<sup>13</sup> Nazúaj lu guichi lá'ayi le rnna: "Guyéajlë'a Dios, ate' que lë ni na' bë'a didza'." Lë'sca' caní raca queëtu', réajlë'ëtu' Dios, en que lë ni na' ruí'itu' didza'. <sup>14</sup> Nöztu' ca gunë' Dios, Nu busubán Xanru' Jesús, usubanë' ca' netu' tsözxön len Jesús, en usudxinë' netu' tsözxön len libí'ili' lahuë' Lë'. <sup>15</sup> Raca caní yúgu'të lë ni para gaca bi' uzí'ili' xibé. Channö ila'deli' zianró ca' bönachi le ruzá' ládxi'ë'ë Dios queëru', ila'nnë': "Xclenë' Dios", ate' gaca yöl-la' ba queë' Dios.

<sup>16</sup> Que lë ni na', biti' raca chopa ládxi'tu'. Sal-la' riniti idú le naca caztu', yúgu'të dza rucubë' Dios le nácatu' lu icja ládxi'do'otu'. <sup>17</sup> Le cuídi'sö rigu'í' rizáca'ru' ni tu chí'ido'osö run ga gata' queëru' le uzí'da'aru' xibé le sóatica'sö, en le nácatëro lesaca' ca gaca gúnbë'ëru'. <sup>18</sup> Biti' ruí' ládxi'ru' le rilé'ëru' luyú ni, pero le biti' gaca ilé'ëru' ruí' ládxi'ru'. Lë na' rilé'ëru', tu chí'ido'osö zoa, pero le cabí gaca ilé'ëru' sóatica'sö.

## 5

<sup>1</sup> Nöziru' cate' initi idütë le naca cázaru', le naca ca tu yu'u lári'do' yödzölió ni, Dios chinupë'ë tu le cubi queëru', le naca ca tu yu'u le zoa tsaz ni' yehua' yubá, lë na' nun cazë' Lë'. <sup>2</sup> Que lë ni na' rinnë ládxi'ru' tu' rë'ëni ru' tsú'uru' le cubi ni', lë na' naca ca tu lídxiru' ni' yehua' yubá. <sup>3</sup> Tsú'uru' le cubi ni' ca na' rácuru' tu lari', para cabí sóaru' ga biti' zoa idütë le naca cázaru'. <sup>4</sup> Tsanni ni zóaru' lu idütë le naca cázaru', le naca ca tu yu'u lári'do', rinnë ládxi'ru' lu yöl-la' risëbi ladxi' queëru'. Biti' runru' caní tu' rë'ëni ru' ucá'anaru' idütë le naca cázaru', pero rë'ëni ru' tsú'uru' tsaz le cubi ni'. Caní gaca, ucá'anaru' idütë le naca cázaru' le riniti, ate' tsú'uru' lu yöl-la' na'bán idú. <sup>5</sup> Dios chinupë'ë yúgu'të lë ni queëru', ate' guchízië' rë'u Dios Bö' Lá'ayi, Nu naca queëru' le naca bë' naca löza sí'uru' lë na' nupë'ë queëru'.

<sup>6</sup> Que lë ni na' nadipa ládxi'ru'. Tsanni ni yú'uru' lu le naca cázaru', nöziru' zóaru' zi'tu' ga zoa lidxë' Xanru'. <sup>7</sup> Runru' ca runru' tu' réajlë'ëru'-në' Dios, en calëga tu' zoa bi rilé'ëru'. <sup>8</sup> Tu' runru' löza lë ni, rë'ëni ru' ucá'anaru' le naca cázaru' ni para tsöjsóalenru'-në' Xanru'. <sup>9</sup> Que lë ni na' ru'i ládxi'ru' gunru' le raza ládxi'ë Xanru', channö ugá'anaru' lu idütë le naca cázaru' ni, o channö tsöjsóalenru'-në' Xanru' ni'. <sup>10</sup> Caní runru' tu' run bayudxi idxinru' yúgu'tëru' lahuë' Cristo ga ni' rö'ë ruchi'a rusöröë'. Ní'irö ubi'ë que queëru' tsa naca le benru' tsanni ni yú'uru' lu le naca cázaru', channö benru' le naca dxi'a o le cabí naca dxi'a.

*Le ruún rë'u tuz len Dios*

<sup>11</sup> Que lë ni na', tu' rádxitu'-në' Dios, ru'i ládxi'tu' uzéajni'itu' bönachi. Nözinë' Dios ca naca le yu'u icja ládxi'do'otu', ate' ruzxöni ládxa'a nözili' dxi'a ca' libí'ili' lë na' yu'u icja ládxi'do'otu'. <sup>12</sup> Biti' rubéaj cuintu' dxi'a loli'. Rë'ëni tu' gata' lataj queéli' gunli' netu' bal, para gaca ubí'ili' didza', bi guiéli' yugu' bönni' tun ba zxön cuíngaquië' ca na' tu'lu'isö lahui cuíngaquië', en calëga ca nácagaquië' lu icja ládxi'do'gaquië'. <sup>13</sup> Channö nachixi ícjatu', naca para gaca yöl-la' ba queë' Dios, en channö cabí nachixi ícjatu', naca para gaca bi uzí'ili' xibé. <sup>14</sup> Run bayudxi bi guntu' tu' nadxí'inë' Cristo rë'u, tu' chinöziru' tuz Nu guti uláz quégaca yúgu'të bönachi, en que lë ni na' naca quégaca yúgu'të bönachi tsa nátilengaca Lë' tsözxön. <sup>15</sup> Lë' gútië' uláz quégaca yúgu'të bönachi para cabirö ilunë' bönni' nabángaquië' le nequi quégacasë', pero le nequi que Nu na' guti uláz quégaquië', en bubán lu yöl-la' guti. <sup>16</sup> Que lë ni na', bíti'rö gúnbë'ëtu' bönachi tsa naca le nalá'gaca láhui'lö, en sal-la' canisö bënbe'ëtu'-në' Cristo, biti' núnbë'ëtu'-në' caní na'a. <sup>17</sup> Channö nuhuóaca nútí'tës bönachi tuz len Cristo,

chinaca bönachi cubi nu na'. Chigudödi que le gulaca zí'alö, ate' chinucúbigaca yúgu'të.

<sup>18</sup> Yúgu'të lë ni nunë' Dios, Nu bun rë'u tuz len Lë' lu në'ë Cristo, en budödë' lu na'tu' guntu' libán ca gaca ulu'huöáca yúgu'të bönachi tuz len Lë'. <sup>19</sup> Libán runtu' rna caní: "Dios guzóalenë' Cristo, en benë' ga gaca ulu'huöáca bönachi yödzölió ni tuz len Lë', en biti' röjnenë' dul-la' gula'baga'." Budödë' lu na'tu' didza' dxi'a ni, ca gaca ulu'huöáca bönachi tuz len Dios. <sup>20</sup> Na'a, nácatu' gubáz queë' Cristo, en raca na'a ca Dios caz ráta'yüë' loli' lu rú'atu' netu'. Que lë ni na' ráta'yutu' loli' uláz queë' Cristo, guli'huöáca tuz len Dios. <sup>21</sup> Cristo biti' bi dul-la' benë', pero Dios budödë' Lë' ca tu bönni' dul-la' uláz queëru', para gata' queëru' lataj gácaru' tsahui' ca náquië' Dios caz tu nácaru' tuz len Cristo.

## 6

<sup>1</sup> Tu' runtu' dxin tsözxön len Dios, ráta'yutu' loli', rnnatu': Biti' udödili' cá'asö le ruzá' ládxe'ë Dios queëli'. <sup>2</sup> Nazúaj lu guichi lá'ayi ca gunné' Dios le rna:

Tu dza buzá' ládxa'a quiu', biyönda' li',  
ate' dza bena' ga gaca uló, gúcalena' li'.

¡Buli'yútsöca! ¡Na'a naca dza ruzá' ládxe'ë queëru'! ¡Na'a naca dza gaca uláru'!

<sup>3</sup> Biti' rë'ënitü' bi guntu' le gun ga nu ichixi inigui, para cabí soa nu ucá'ana cá'asö dxin ni runtu'. <sup>4</sup> Ni'a que bíti'tës bi runtu', ruí'i ládxi'tu' gaca bë' nácatu' huen dxin queë' Dios. Que lë ni na', len yöl-la' riböza zxön ladxi' ruá' rilentu' yugu' le riguí'i rizáca'tu', en yugu' le riyadzaj queëtu', en yugu' le tun ga rö'ötu' böniga. <sup>5</sup> Caní bentu' sal-la' gula'zé'ede'e bönachi netu' yu, en gula'gu'ë netu' lidxi guíë, en gula'bía di'i netu'. Gudödi bë' bentu' dxin, en biti' guta' lataj queëtu' gásitu' o bi gágutu'. <sup>6</sup> Bë' ládxi'tu' gaca bë' nácatu' huen dxin queë' Dios. Guca bë' lë ni:

Tu' nácatu' ba'a ladxi', en tu' nápatu' yöl-la' réajni'i,  
en tu' riböztu' zxön ladxi', en tu' nácatu' dxi'i ladxi',  
en tu' zóalenë' Dios Bö' Lá'ayi netu',  
en tu' naca idú ca nadxí'itu' luzá'atu'.

<sup>7</sup> Ruí'itu' didza' idütë li, ate' zóalen netu' yöl-la' huáca queë' Dios. Le naca tsahui' naca ca tu le rudí'initu' lu gudil-la, enca' le run chí'i netu' lu gudil-la na'.

<sup>8</sup> Nacuá' nupa tun netu' bal, enca' nupa tu'zóa netu' tsölá'alö. Nacuá' nupa tu'lidza ditaj netu', enca' nupa tu'lidza tsahui' netu'.

Sal-la' ta'nná bönachi rizí' yë'ëtu', ruí'itu' didza' idütë li.

<sup>9</sup> Sal-la' nacuá' bönachi biti' núnbë'gaquië' netu', nacuá' ca' nupa núnbë'gaca netu'.

Ridatu' ga zoa bönadxi gátitu', pero ni zóatu' nabantu'.

Tunë' netu' xíguia', pero biti' tutië' netu'.

<sup>10</sup> Tu'suhuí'ini netu', pero rudzëjatica'stu'.

Nácatu' bönni' yechi', pero runtu' ga rata' yöl-la' tsahui' idú  
quegaca bönachi zían.

Sal-la' biti' bi dë queëtu', nequi queëtu' yúgu'të le dë.

<sup>11</sup> Idú ládxi'tu' ruí'ilentu' libí'ili' didza', böchi' luzá'ado', zóali' Corinto. Buluí'itu' libí'ili' ca ruí'i ládxi'da'tu' libí'ili'. <sup>12</sup> Channö cabí nácaru' tuz biti' naca tu' cabí ruí'i ládxi'tu' libí'ili', pero libí'i cázali' biti' ruí'i ládxi'li' netu'. <sup>13</sup> Na'a, ruí'lena' libí'ili' didza' ca runë' tu bönni' ruí'ilenë'-bi' zxi'inë' didza', rnní'a': Buli'bí'i queëtu' ca rúnlentu' libí'ili'. Guli'güi' ladxi' netu'.

*Nácaru' ca tu yudo' ga yu'ë Dios ban*

<sup>14</sup> Biti' gácali' tuz len bönachi biti' ta'yéajlë'.

¿Nacxi gácatsö ilaca tuz le naca tsahui', en le cabí naca tsahui'?

¿Nacxi gácatsö ilaca tuz le naca chul-la, en le naca bení'?

<sup>15</sup> ¿Nacxi gácatsö ilácagaquië' tuz Cristo, en Satanás, tu' xihui'?

¿Nacxi gácatsö ilácagaquië' tuz tu bönni' réajlë'ë Cristo, en tu bönni' biti' réajlë'ë?

<sup>16</sup> ¿Nacxi gácatsö ilaca tuz yudo' queë' Dios, en budó' guiöj budó' yaga?

Libí'i cázali' nácali' ca tu yudo' ga yu'ë Dios ban. Ca naca lë ni, Dios caz gunnë':

Sóalena' légaquië', en tálena' légaquië'.

Gaca' Dios quégaquië', ate' légaquië' iláquië' bönachi quia'.

<sup>17</sup> Que lë ni na', gunnë' ca' caní:

Guli'rúaj ládjagaquië', en buli'lá'alén légaquië'.

Rnnë' Xanru': "Biti' gútsa'li' le ruá' dö', ate' si' lu na'a libí'ili'.

<sup>18</sup> Neda' gaca' xuz cázali', ate' libí'ili' gácali' zxi'ina', bönni', en nigula."

Caní rnnë' Xanru', Nu napa caz idútë yöl-la' huáca.

## 7

<sup>1</sup> Böchi' luzá'ado', néquiguequi queëru' yugu' lë ni guzxi' lu në'ë Dios. Que lë ni na' ral-la' un cuinru' dxi'a, en ubéajru' yúgu'të le rucá'ana cá'asö idútë le naca cázaru', en bö' naca cázaru'. Lu yöl-la' radxi queëru' Dios ral-la' guéquiru' quez queë' Lë'.

*Ca bulu'bí'i ládxi'gaca nupa ta'yéajlë' Cristo*

<sup>2</sup> Guli'sí' lu ná'ali' netu'.

Cuntu nu biá'atu' dö' que, nu dzaga libí'ili'.

Cuntu nu bentu' ga ichixi inigui.

Cuntu nu guzxi' yé'etu'.

<sup>3</sup> Ruá'a caní didza', calëga para usubága'a libí'ili' xíguia', pero naca ca na' chigunní'a' zí'alö, rnní'a': Zoa' sina' ibánlena' libí'ili'

o gátilena' libí'ili' tu' ruí'i ládxa'a libí'ili'. <sup>4</sup> Ruzxónida' ládxa'a libí'ili', en rúnda'a libí'ili' zxon. Sal-la' zían le riguí'i rizáca'tu', nadípada' ládxa'a, en rudzėjade'e ládxa'a.

<sup>5</sup> Cate' bidxintu' luyú Macedonia, ga ridxintē na'a dza, biti' rata' queētu' lataj uzi' ládxi'tu', pero zían le taca queētu'. Ta'díl-lalen bönachi netu', ate' lu icja ládxi'do'otu' yú'ugaca le tun ga rádxitu'. <sup>6</sup> Ní'irö Dios, Nu rutipa ladxi' nu chizóa gaca chopa ladxi', butipē' ládxi'tu' cate' budxinbi' bi'i Tito ga guzóatu'. <sup>7</sup> Biti' gúcasö tu' budxinbi' queētu', pero tu' gudíxjöi'ibi' ca' netu' ca na' libí'ili' butípali' ládxi'bi'. Gudíxjöi'ibi' netu' ca na' rē'ēnide'eli' ulé'eli' neda', en ca na' ruhuí'inili' ni'a que lē na' guca ni', enca' ca ruí'i ládxi'li' neda'. Yúgu'tē lē ni ben ga rudzeja ládxa'a.

<sup>8</sup> Sal-la' le buzúaja' queēli' lu guichi zí'alö ben ga buí'inili', biti' ruhuí'inda' na'a. Zí'alö buí'inida' cate' gúquibe'eda' ben ga buí'inili' libí'ili' tu chí'ido', <sup>9</sup> pero na'a rudzėjada', calēga tu' buí'inili', pero tu' ben yöl-la' ruhuí'ini queēli' na' ga bubí'i ládxi'li'. Dios bugunē' dxin yöl-la' ruhuí'ini queēli', para cabí ichixi iníguili' ni'a que le bentu' netu'. <sup>10</sup> Yöl-la' ruhuí'ini na' rugunē' dxin Dios run ga nu ubí'i ladxi' para ulá nu na', ate' que lē ni na' biti' ral-la' huí'iniru' que. Yöl-la' ruhuí'ini le naca que yödžolió ni run ga ilátigaca bönachi. <sup>11</sup> Buli'yútsöca' ca bugunē' Dios dxin yöl-la' ruhuí'ini queēli' na'.

Ben ga ruí'i ládxi'li'-nē' Dios.

Ben ga gú'unili' urúajli' dxi'a.

Ben ga guléli' nu na' ben dul-la'.

Ben ga rádxili'-nē' Dios.

Ben ga bē' ládxi'li' gunli' ca rnna xtídzē'ē Dios.

Ben ga nadxí'ili'-nē' Dios idú ládxi'li'.

Ben ga gú'unili' gunli' xíguia' nu na' ben dul-la'.

Benli' le naca bē' biti' bi dul-la' nabága'li' ni'a que lē na' guca.

<sup>12</sup> Que lē ni na', sal-la' buzúaja' caní lu guichi na', biti' guca ni'a que nu na' ben dul-la', en calēga ni'a que nu na' gudí'i guzxaca', pero para gaca bē' lahuē' Dios le nácatē ruí'i ládxi'li' netu'. <sup>13</sup> ¡Lē ni butipa ládxi'tu'! Calēgasö bidipa ládxi'tu', pero rudzėjade'e ládxi'tu' tu' rudzėjabi' bi'i Tito ni'a que le benli' libí'ili', tu' butípali' ládxi'bi'.

<sup>14</sup> Bena' libí'ili' zxon lobi' Tito, ate' biti' benli' ga utu'ida'. Bē'lentica'stu' libí'ili' didza' idútē li, ate' lēasca' caní naca idútē li didza' bē'lentu'-bi' Tito cate' bentu' libí'ili' bal. <sup>15</sup> Zeaj rácarö idú ca nadxí'ibi' bi'i Tito libí'ili' cate' röjnebi' ca na' benli' ca rnna xtídzá'tu', en ca na' benli'-bi' bal lu yöl-la' radxi Dios queēli' en lu yöl-la' nōxaj ladxi' queēli'. <sup>16</sup> Rudzėjade'eda' tu' gaca uzxöni ládxa'a libí'ili' idú ládxa'a.



## 8

*Ca ral-la' unödzej nu réajlë' Cristo le dë que*

<sup>1</sup> Na'a, böchi' luzá'ado', ré'ënitü' quíxjöi'itu' libí'ili' ca naca le buzá' ládxe'ë Dios quégaca yugu' cö' bönachi queë' Cristo luyú Macedonia. <sup>2</sup> Sal-la' yenni' gula'gu'i gula'záquië' lu yugu' le guzí' bë' légaquië', bulu'dzëjade'enë', en idú ládxi'gaquië' bulu'nödzejadë'ë sal-la' nácaqaquië' bönachi yechi'. <sup>3</sup> Neda' runa' ba nalí quégaquië', idú ládxi'gaquië' bulu'nödzejadë'ë tsca gula'zéqui'në', en bulu'nödzejare' tsca gula'zéqui'në'. <sup>4</sup> Gula'nábide'enë' netu', en guláta'yudë'ë lotu' güi'itu' légaquië' lataj tsözxön len netu' ilácalenë' böchi'ru' ta'yéajlë'ë Cristo. <sup>5</sup> Gulunrë' ca guqui ícjavu' ilunë'. Bulu'dödi cuíngaquië' zí'alö lu në'ë Xanru', enca' lu na'tu' netu', le naca le raza ládxe'ë Dios. <sup>6</sup> Que lë ni na' gunábitu'-bi' bi'i Tito údxi gunbi' xichinbi' ga ni' zóali', en utúbibi' dumí runödzejali' lu yöl-la' dxi'i ládxi' queëli', ca na' gusí lobi' benbi' zí'alö. <sup>7</sup> Nácali' lo ca naca yúgu'të le runli',

ca réajlë'ëli' Cristo,

en ca réajni'ili',

en ca ruzéajni'ili' bönachi,

en ca ruí'li ládxi'li' luzá'ali',

enca' ca nadxí'ili' netu'.

Lësca' caní ral-la' gácali' lo ca gácalenli' luzá'ali', lu yöl-la' dxi'i ládxi' queëli' bi unödzejali' quégaquië'.

<sup>8</sup> Biti' rinná bé'eda' libí'ili' gunli' caní. Ruá'a didza' ca tun ia'zica'rö bönachi, tu'nödzej idú ládxi'gaca, para guna' ga gunli' le gaca bë' naca idú ca nadxí'ili' luzá'ali'. <sup>9</sup> Nöz quézili' le buzá' ládxe'ë Xanru' Jesucristo queëru'.

Bilé'enë' yöl-la' tsahui'

pero para gácalenë' libí'ili'

böáquië' yechi'

para gata' queëli' yöl-la' tsahui',

tu' gúquië' Lë' yechi'.

<sup>10</sup> Caní runi neda': Dxi'arö gaca queëli' údxi gunli' lë na' gusí loli' runli' chiguca tu iz. Gúcali' lo, calégasö ca bunödzejali', pero lësca' ca gú'unili' unödzejali'. <sup>11</sup> Na'a, idú ládxi'li' buli'siyudxi gunli' lë na' gusí loli' runli', idú ládxi'li' bunödzejali'. Buli'nödzej na'a tsca séqui'li'. <sup>12</sup> Channö ré'ënili' bi unödzejali', Dios runë' bal le runödzejali' tsca naca le dësö queëli'. Biti' rinabë' unödzejari' tsca le dësö queëli'.

<sup>13</sup> Biti' ré'ënda' guna' ga unödzejali' le gácalen ia'zica'rö bönachi ga idxintë yadzaj queëli'. <sup>14</sup> Ré'ënda' gaca tuz ca dë queëli', en quégaquië'. Na'a dëda' queëli' le gaca unödzejali' para bi gata' quégaca nupa ni' riyadzaj quéguequi. Ní'irö cate' bi yadzaj queëli', légaquië' huáca bi ulu'nödzejë' queëli' para

caní gaca tuz ca dë queëli', en quégaquië' yúgu'tëli'. <sup>15</sup> Lësca caní nazúaj lu guichi lá'ayi le rnna: "Nu na' butúbida', biti' bugá'ana que, ate' nu na' butubi láti'do'os, biti' biyadzaj que."

*Ca runbi' bi'i Tito, enca' nupa dzáagagaca lëbi'*

<sup>16</sup> Xclenë' Dios, tu' benë' Lë' ga ruí' ládxi'bi' bi'i Tito libí'ili', ca na' ruí' ládxa'a neda' libí'ili'! <sup>17</sup> Calégasö runbi' ca rnna xtídza'a bi rinábida'-bi', pero tu' ruí' ladxi' cázabi' libí'ili', rácasö queëbi' gú'unibi' tsöyubi' libí'ili'.

<sup>18</sup> Risöl-la'tu'-në' tsözxön len lëbi' böchi'ru' na' tun lë' bal yúgu'të cö' bönachi queë' Cristo, tu' runë' dxi'a dxin que didza' dxi'a. <sup>19</sup> Ia'stú, gula'bö yugu' cö' bönachi queë' Cristo bönni' ni, para tséajlenë' tsözxön netu' guá'atu' lë na' runödzjali', para gaca yöl-la' ba queë' Xanru', en gaca bë' ca' ruí' ládxi'ru' luzá'aru' ta'yéajlë'ë Cristo. <sup>20</sup> Caní gaca, gunë' netu' tsözxön para cuntu nu bi gaca innë queëtu', ca rúnlentu' dumí na' runödzjada'ali', le gácalen bönachi yechi'. <sup>21</sup> Ruí' ládxi'tu' guntu' le naca dxi'a, calégasö lahuë' Xanru', pero lësca' lógaca bönachi.

<sup>22</sup> Risöl-la'tu'-në' ca' ia'tué' böchi'ru' tsözxön len légaquië', ate' zían luzuí guzxi' bë'ëtu' lë', ate' naca bë' rë'ënë' gácalenë' rë'u idú ládxe'ë. Ia'stú, tu' ruzxöni ládxe'ë libí'ili', rë'ënitëronë' ca' gácalenë' rë'u lu dxin ni. <sup>23</sup> Channö nu bi inaba ca nácabi' bi'i Tito, nácabi' luzá'a, rúnlenbi' neda' tsözxön dxin para gácalentu' libí'ili'. Channö nu bi inaba ca nácagaquië' ia'zica'rë böchi'ru' na', nasöl-la'gaca yugu' cö' bönachi queë' Cristo légaquië', ate' tunë' ga gaca yöl-la' ba queë' Cristo. <sup>24</sup> Guli'gún ga gaca bë' nadxi'ili' légaquië' para iléquibe'e yugu' cö' bönachi queë' Cristo runli' caní, en ila'nözi naca idútë li didza' dxi'a ruí'itu' ca naca queëli'.

## 9

*Ca naca dumí rutúbiru' le gácalen yugu' böchi'ru'*

<sup>1</sup> Ca naca le runödzjali' quégaquië' böchi'ru' ta'yéajlë'ë Cristo, biti' run bayudxi uzúaja' queëli' lu guichi ni. <sup>2</sup> Chinözda' ca rë'ënili' gunli' lë ni, ate' ruá'a didza' lógaca bönachi ta'yéajlë' Cristo luyú Macedonia ni ca naca le dxi'a runli'. Riguíxjöi'ida' légaquië' ca naca queëli', zóali' luyú Acaya, chiguca tu iz chizóa gunli' lë ni, ate' tu' ruí' ládxi'li' gunli' lë ni, bidipa ládxi'gaca lá'tu'biqui' yúgu'të bönachi ni ta'yéajlë' Cristo. <sup>3</sup> Na'a, risöl-la'a yugu' böchi'ru' ni queëli' para gaca bë' naca idútë li didza' ruí'itu' ca naca queëli', ate' naca ca na' chigunnía' queëli', chizóa gunli' lë na' gácalen yugu' luzá'aru'. <sup>4</sup> Channö ila'zá'alén bal-la bönachi Macedonia ta'yéajlë' Cristo neda' tsözxön, ate' gaca bë' biti' zuíni gunli' lë na', ní'irö utuí'itu' tu' buzxöni ládxi'tu' libí'ili', ate' libí'i cázali' ca' ral-la' utuí'ili'.

<sup>5</sup> Que lë ni na' gúquida' ral-la' isól-la'a yugu' böchi'ru' ni para ila'dxinë' ga zóali' zí'alö ca neda', ate' ilácalenë' libí'ili' para udxí utúbili' lë na' guzxi' lu ná'ali' unödzejali'. Caní gaca, údxí utúbili' dumí na' zí'alö ca idxina', ate' gaca bë' runödzejali' tu' rë'ëni cázali', en calëga tu' rinná bë'etu' libí'ili' bi unödzejali'.

<sup>6</sup> Gulí'tsöjné lë na' rnna:

Nu raza ruzóa láti'do'os, láti'do'os ca' uzí'.

Nu raza ruzóa sizxöni, sizxöni ca' uzí'.

<sup>7</sup> Tu tuli' ral-la' unödzejali' tsca na' chinuzóali' icja láchxi'do'oli', en calëga lu yöl-la' ruhuí'ini queéli' o tu' run bayudxi, tu' nadxí'inë' Dios nu runödzej idú láchxi'. <sup>8</sup> Dios gaca gúnnadë'ë queéli' ca riquínili' para gata' queéli' yúgu'të lë na' riquínili', ate' ugá'ana queéli' para gaca gácalenli' nu bi riyadzaj que. <sup>9</sup> Lësca' caní nazúaj lu guichi lá'ayi le rnna: Idú láchxë'ë bunödzejë' quégaca bönachi yechi'.

Naca bë'tica'sö yöl-la' dxi'i láchxi' queë'.

<sup>10</sup> Dios, Nu runna queëru' bi gaz uzóaru', enca' bi guí'aj gáguru', gunnë' ca' queéli' bi unödzejali', le naca ca lë na' nu raza ruzóa, en gunë' ca' ga ila'yán le ilápali' le nácagaca yugu' le dxi'a runli'. <sup>11</sup> Dios gunë' ga gáta'da' queéli' yöl-la' tsahui' para gaca unödzejada'ali'. Caní gaca, yugu' le unödzejali', lë na' quisitu' uláz queéli', gun ga ila'nná bönachi zían: "Xclenë' Dios." <sup>12</sup> Lë na' runödzejali' le gácalen yugu' böchi'ru', calëgasö gü'i quégaquië' le ta'yádzjanë', pero gun ga ila'nnë': "Xclenë' Dios." <sup>13</sup> Cate' gunli' caní, ila'gu'ë Dios yöl-la' ba tu' gaca bë' runli' ca rnna didza' dxi'a queë' Cristo ca na' rnnali' runli'. Ila'gu'ë Lë' yöl-la' ba ca', tu' nácali' dxi'i láchxi', runödzejali' quégaquië', enca' quégaca ia'zica'rö bönachi. <sup>14</sup> Ulu'lidzë' Dios, en ila'nábinë' Lë' gácalenë' libí'ili' tu' nadxí'iguequinë' libí'ili' ni'a que le buzá' láchxi'dë'ë Dios queéli'. <sup>15</sup> ¡Xclenë' Dios, bennë' tu le nácada' lesaca' queéli'!

## 10

### *Yöl-la' unná bë' dë lu në'ë Pablo*

<sup>1</sup> Ta'nná bönachi naca' nöxaj láchxi' cate' zóalena' libí'ili', pero cate' zoa' zi'tu' ga zóali' naca' rugu láchxi' ca ruzúaja' lu guichi. Tu' náquië' nöxaj láchxi', en dxi'i láchxi' Cristo, neda', Pablo, ráta'yua' loli' <sup>2</sup> cabí gunli' ga gun bayudxi gaca' rugu láchxi' len libí'ili' cate' idxina' ga zóali'. Chizóa gaca' rugu láchxi' len nupa ni' ta'nná runtu' dxin ni lu yöl-la' bönáchisö queëtu'. <sup>3</sup> Le nácate' nácatu' bönachi, pero calëga rácasö queëtu' runtu' xichinë' Dios. <sup>4</sup> Yugu' le rudí'initu' lu gudil-la, biti' nácagaca ca le tu'dí'ini bönachi yödözlió ni lu gudil-la, pero yugu' le rudí'initu' lu gudil-la nápagaca yöl-la' huáca queë' Dios, le ruguntu' dxin para usunítitu' le nál-lagaca que tu' xihui'.

<sup>5</sup> Rusunítitu' yugu' didza' biti' nácatë le tu'zxöni ládxi'gaca bönachi, en yúgu'të le tun ga tun ba zxön cuínguequi, en le tun ga cabí ilunbë' Dios. Runtu' ga gaca ila'nná bé'enë' yúgu'të le ta'zá ládxi'gaquië', lë na' tun ga ta'dá'baguë'ë Dios, ate' runtu' ca' ga tunë' ca rnnë' Cristo. <sup>6</sup>Tödi gunli' le gaca bë' naca idú ca runli' ca rnna xtídzë'ë Cristo, sóatu' sina' guntu' xíguia' yúgu'të nupa ni' ta'dá'baga' xtídzë'ë.

<sup>7</sup>Ruyuli' le nalá' láchuisö. Channö réquinë' nu bönni' dzáguië' libí'ili' néquinë' queë' Cristo, ral-la' guéquibe'enë' ca' lë ni: Ca na' lë' néquinë' queë' Cristo, lësca' caní netu' néquitu' queë' Cristo. <sup>8</sup>Biti' ca' rutuí'ida' sal-la' gudödi bë' ben ba zxön cuina' ca naca yöl-la' unná bë' budödë' Xanru' lu na'tu'. Lë na' dë lu na'tu' naca para guntu' ga gácarö idú ca réajlë'ëli' Cristo, en calëga para usunítitu' libí'ili'. <sup>9</sup>Biti' ré'ënda' guéquili' ré'ënda' gun gádxida' libí'ili' ni'a que le ruzúaja' queéli' lu guichi ni. <sup>10</sup>Nacuá' ni' nupa ila'nná: "Yugu' le ruzúajë' Pablo queëru' lu guichi, rulidza zi'ë ré'u, en ralë' didza', pero cate' zóalenë' ré'u runë' nöxaj ladxi', en didza' gúlado' ru'ë." <sup>11</sup>Nu na' ruí'i caní didza' ral-la' guéquibe'e lë ni: Ca na' nácatu' cate' bi ruzúajtu' queéli' lu guichi tsanni ni zóatu' zi'tu' ga zóali', gácatu' ca' lu le guntu' cate' ni' sóalentu' libí'ili'.

<sup>12</sup>Le nácatë biti' nácatu' rugu ladxi' para innatu' nácatu' lëbi ca nácgaca nupa ni' tun ba zxön cuínguequi. Nácgaca nupa ni' yugu' bönni' biti' bi nözguequinë'. Lu le ta'za'sö ládxi'gaquië' tu'zöë' ca ral-la' ilaca bönachi, en tu'chi'a tu'söröë' la' légacasë' tsca naca lë na' ta'za'sö ládxi'gaquië'. <sup>13</sup>Netu' biti' gunrö ba zxön cuintu' ca ral-la' guntu', pero ca nácatë dxin budödë' Dios lu na'tu', ate' lu dxin ni, ral-la' guntu' le ga ni' zóali' libí'ili'. <sup>14</sup>Channö budödë' Dios lu na'tu' dxin guntu' ga zóali', biti' ca' gudödi bë'ëtu' ca bentu' cate' bidxintu' ga zóali', en bentu' libán que didza' dxi'a ga na' zóali'. <sup>15</sup>Biti' run ba zxön cuintu' ca naca dxin núngaca ia'zíca'rö bönachi, pero ca nácasö dxin na' budödë' Dios lu na'tu'. Runtu' löza gácarö idú ca réajlë'ëli' Cristo para gaca guntu' dxin ga zóali' le nácarö lesaca', tsca naca le budödë' Dios lu na'tu' guntu'. <sup>16</sup>Ní'irö gaca guntu' libán que didza' dxi'a ga nacué' yödzö dzö'ö zí'tu'rö ga zóali'. Caní gaca, biti' gun bayudxi gun ba zxön cuintu' ni'a que dxin núngaca ia'zíca'rö bönachi, lë na' budödë' Dios lu në'eguequi.

<sup>17</sup>Nazúaj lu guichi lá'ayi le rnna:

Nu ré'ëni bi gun zxön,

le ben cazë' Xanru' ral-la' gun zxön.

<sup>18</sup>Nurúajë' dxi'a tu bönni' cate' rnnë' Xanru' nurúajë' dxi'a, en calëga cate' ru'ë caní didza' bönni' na' que la' cuinsë'.

## 11

*Ca nácaqaquië' Pablo, en bönni' tun cúngaquië' gubáz queë' Cristo*

<sup>1</sup> Rë'ënda' guá' ilenli' neda' tsanni ni gu'a didza' lu yöl-la' biti' bi nözi quia'. Buli'sá' ládxi'li' quia'. <sup>2</sup> Ruí'i ládxa'a libí'ili' ca na' Dios caz ruí'i ládxi'ë libí'ili', tu' nácali' ca nácabí' tubí' bi'i nigula ra'bando', naca idú ládxi'bi', rusudxina'-bi' lahuë' Cristo para utsaga ná'alenbi' Lë cazë'. <sup>3</sup> Rádxida' idxín queëli' nu si' ye'e libí'ili', en gun ga usanli' ca nadxí'ili'-në' Cristo idú ládxi'li', ca na' guca queënu Eva, nigula queë' Adán, cate' guzxí' ye'e Satanás tu' xihui' lënu lu yöl-la' sina' que. <sup>4</sup> Caní rnnía' tu' idú ládxi'li' ruí'ili' nu za' queëli' lataj, en run libán que xibá queë' Jesús, le nadzá' ca naca xibá na' bentu' netu' libán que, ate' rizi' lu ná'ali' tu bö', en tu didza' dxi'a le nadzá'gaca ca nácaqaca Bö' Lá'ayi na', en didza' dxi'a na' guzxí' lu ná'ali' lu na'tu' netu'. <sup>5</sup> Réquida' biti' nácara' cuídi'sö ca nácaqaquië' bönni' ni' nácatërögaquië' lo, ate' réquili' nácaqaquië' gubáz queë' Cristo. <sup>6</sup> Nadxi ca' naca' cuídi'sö ca ruá'a didza', pero biti' naca' cuídi'sö ca naca yöl-la' réajni'i napa'. Zián luzuí, en zían ca buluí'itu' libí'ili' ca naca yöl-la' réajni'i nápatu'.

<sup>7</sup> Nadxi ca' biti' naca dxi'a tu le bena', biti' bi buquixja' libí'ili' cate' bena' libán ga zóali' que didza' dxi'a. Ben cuina' cá'asö, ate' bena' ga gúcali' libí'ili' zxön. <sup>8</sup> Buguna' dxin le nequi quéguequi ia'zica'rö cö' bönachi queë' Cristo, tu' guzxí'a dumí bulu'nödzejë' légaquië' quia' para guca bena' dxin ga zóali' libí'ili'. <sup>9</sup> Cate' guzóalena' libí'ili', en biyadzaj quia', biti' busaca' zi'a nituli' libí'ili', pero lë na' biyadzaj quia', gulunnë' quia' böchi'ru' bila'rúajë' luyú Macedonia, en bila'dxinë' ga zoa'. Catu caz busaca' zi'a libí'ili', ate' la' lëbisö ca guna'. <sup>10</sup> Ni'a que le naca idútë li queë' Cristo le zóalen neda', biti' soa' dxisö, gun ba zxön cuina' ca naca lë ni idú luyú Acaya. <sup>11</sup> ¿Naru' réquitseli' rnnía' caní tu' cabí nadxí'ida' libí'ili'? Nözinë' Dios nadxí'ida' libí'ili'.

<sup>12</sup> Gúntica'sa' ca runa' na'a, para cabí gata' quégaquië' lataj ilún ba zxön cúngaquië' bönni' ni' ta'nnasë' nácaqaquië' gubáz queë' Cristo, en ta'nnë' tunë' xichinë' Lë' ca runtu' netu'. <sup>13</sup> Biti' ca' nácaqaquië' gubáz nasöl-lë'ë Cristo. Ta'zì' yë'ë ca naca dxin tunë', en tun cúngacasë' gubáz queë' Cristo. <sup>14</sup> Biti' ral-la' ubániru' ca tunë' bönni' na'. Lë'sca' Satanás caz, tu' xihui', rulu'i cuini ca tu gubáz lá'ayi queë' Dios, ridë' lu bení'. <sup>15</sup> Que lë ni na' biti' ral-la' ubániru' channö yugu' huen dxin que tu' xihui' na' tu'lu'i cúngaquië' ca nupa tun xichini Nu na' naca tsahui'. Udxi quégaquië' ca sa'yéaj le tunë'.

*Yugu' le gudí'i guzxáquë'ë Pablo*

16 Leyúbölö rea' libí'ili': Cuntu nu ral-la' guequi nachixi icja'. Channö réquili' nachixi icja', guli'güi' neda' lataj gu'a didza' ca tu bönni' nachixi icjé', para gun ba zxön cuina' tu chí'ido'. 17 Didza' ni ruá'a biti' naca le rinná bē'ē Xanru', pero ruá'a didza' ca tu bönni' nachixi icjé', run ba zxön cuina'. 18 Nacu'ē zían bönni' tun ba zxön cuíngaquié' ca náca gaca le tunē' lu yöl-la' bönáchisö quégaquié'. Que lē ni na', neda' ca' gun ba zxön cuina'. 19 Tu' réquili' rácada'ali', idú ládxi'li' ruí'ili' lataj ilu'ē didza' yugu' bönni' nachixi ícjagaquié'. 20 Ruí'ili' ca' lataj nu gun libí'ili' bönni' nadó'ogaca, o nu cúa le dē queéli', o nu inná be'e libí'ili', o nu ucá'ana libí'ili' cá'asö, o nu capa' rú'ali'. 21 Rutuí'ida' rnnía' lē ni: Biti' bentu' caní queéli' tu' gudödi bē' gúcatu' nōxaj ladxi'.

Channö zoa nu naca rugu ladxi' para gun ba zxön cuini, neda' ca' gaca' rugu ladxi', en gu'a didza' ca tu bönni' nachixi icjé'.

22 ¿Naru' náca gaudié' bönni' hebreo?

Lē sca' naca' neda'.

¿Naru' náca gaudié' bönni' Israel?

Lē sca' naca' neda'.

¿Naru' náca gaudié' zxi'ini xi'sóē' Abraham?

Lē sca' naca' neda'.

23 ¿Naru' náca gaudié' huen dxin queē' Cristo?

Lē sca' nácatēra' neda'.

(Na'a ruá'a didza' ca tu bönni' nachixi icjé' cate' rnnía' caní.)

Béntēra' dxin ca gulunē' légaquié'.

Guyu'a lidxi guíé zíanrö luzuí ca gula'yu'ē légaquié'.

Gula'zé'eda' neda' yu bönachi zíanrö luzuí ca guca quégaquié'.

Guzóa bönadxi gátia' zíanrö luzuí ca guzóa quégaquié'.

24 Gayu' luzuí yugu' bönni' judío gula'guínē' neda' guídi.

Tu tu luzuí na' gula'guínē' neda' chēna uruá' luzuí.

25 Tsonna luzuí gula'guínē' neda' gubá'ayi.

Tu luzuí bulu'ladxē' neda' guiöj.

Tsonna luzuí guzóa' tu lē'e barco le guca ditaj, en bötaj lu nísado'.

Tu luzuí guzóa' idú tu yēla, en tu dza lu nisa que nísado'.

26 Zían luzuí cate' ni' yu'a nōza,

gudöda' gapa guzóa bönadxi quia' yugu' lu yegu,

en gapa guzóa bönadxi quia' lu ná'agaquié' gubán,

en gapa guzóa bönadxi quia' lu ná'agaquié' bönni' uládz quia',

en gapa guzóa bönadxi quia' lu ná'agaquié' bönni' zi'tu',

en gapa guzóa bönadxi quia' lu yödzö,

en gapa guzóa bönadxi quia' lu lataj cá'asö,

en gapa guzóa bönadxi quia' lu nísado',

en gapa guzóa bönadxi quia' lu ná'agaquié' bönni' ta'z'í' yē'ē, ta'nnē' náca gaudié' böchi'ru' ta'yéajlē'ē Cristo.

27 Bena' dxin zi'i, en gudú ládxa'a.  
 Zián luzuí biti' guta' quia' lataj gásia'.  
 Guduna', en gubidxa' nisa.  
 Zián luzuí biti' guta' quia' bi gahua', o ga utsë'e cuina', o lari'  
 gácuá'.

28 Ia'stú, yúgu'të dza ruúbi ruguí'ida' tu' ru'ida' ládxa'a yúgu'të cō' bōnachi queë' Cristo. 29 Cate' nu ricuidi', neda' ca' ricuídi'da'. Cate' nu run ga ichixi iníguinë' tu bōchi'ru', rileda' nu run caní. 30 Channō run bayudxi gun ba zxōn cuina', gun ba zxōn cuina' ca naca le nácagaca bē' ricuídi'da'. 31 ¡Dios, Xuzē' Xanru' Jesucristo, gácativa'sō queë' yōl-la' ba! ¡Lē' nōzinē' ruá'a didza' idútē li! 32 Cate' ni' guzóa' lu yōdzō Damasco, bōnni' ni' guta' lu nē'ē uláz queë' bōnni' rinná bē'ē, lē' Aretas, bucu'ē yugu' bōnni' gula'bō' nísie' para ila'zōnē' neda', 33 pero yugu' bōchi'ru' ni' bulu'dödē' neda' tu ga ra'a bení' que yu'u, yu'a tu ga'bōra zxōn, en bulu'zōtjē' neda' ní'ilo lu zō'ō run chi'i yōdzō na'. Caní guca, bulá' lu ná'agaquie' bōnni' ni' gula'bō' nísie' neda'.

## 12

### *Yugu' le bulu'inē' Dios Pablo*

1 Le nácate' biti' ral-la' gun ba zxōn cuina'. Sal-la' caní naca, na'a gu'a didza' ca nácagaca le bulu'inē' Xanru' neda', en le buzéajni'inē' neda'. 2 Núnbē'a-nē' tu bōnni' réajlē'ē Cristo, chiguca chidá' iz zoa nu guchē' lē' yehua' yubá. Biti' nōzda' channō guyijē' ni' lu idútē le naca cazē', o lu bō' naca cazē'. Tuzē' Dios nōzinē'. 3 Nōzda' guyáziē' lataj lachi queë' Dios, nazí'i le paraíso. Biti' nōzda' channō guyijē' ni' lu idútē le naca cazē', o cabí. Tuzē' Dios nōzinē'. 4 Tsanni ni' zoē' ga na', biyōnnē' le tun ga nu rubani, yugu' le biti' dē' lataj nu gú'i didza' que. 5 Bōnni' ni huáca guna' lē' zxōn, pero biti' gun ba zxōn cuina'. Tuz gun ba zxōn cuina' tu' ricuídi'da'. 6 La'tu' guē'ēnida' gun ba zxōn cuina', biti' gaca' bōnni' biti' bi nōzinē', channō innía' le naca idútē li. Na'a, biti' gun ba zxōn cuina' tu' cabí rē'ēnda' nu gunrō neda' bal tsca le bilé'e bena' neda', o tsca naca didza' biyōni bē'a neda'.

7 Ní'irō, para cabí tōdi bē' gun ba zxōn cuina' tu' bilé'eda' lē' na' tun ga nu rubani, Dios buzóē' tu huē' lu xipēla'a le riláda' ca rilá ga rinē' tu yōtsi'. Huē' na' guca ca tu le bugún dxin tu' xihui', para busaca' zi' neda'. Caní guca quia' para cabí tōdi bē' gun ba zxōn cuina'. 8 Tsonna luzuí gúta'yua' lahuē' Xanru', en gunábida' Lē' ugúē' xihuē'a na'. 9 Xanru' gudxē' neda': "Nácate' quiu' le ruzá' ládxa'a quiu'. Uzí'teru' xibé le ruzá' ládxa'a quiu' cate' ricuídi'nu'." Que lē' ni na', rudzējade'eda' tu' ricuídi'da'. Tu' raca caní quia', rácalentērō

yöl-la' huáca queë' Cristo neda'. <sup>10</sup> Que lë ni na', tu' nadxí'ida'-në' Cristo, rudzédada' cate' ricuídida', en cate' nu rulidza neda' zi', en cate' bi riyadzaj quia', en cate' nu ribía ladxi' neda', en cate' bi raca quia'. Cate' nacuídida', nápatërö caza' yöl-la' huáca queë' Lë'.

*Pablo ruí'i ládxe'ë bönachi queë' Cristo nacua' Corinto*

<sup>11</sup> Naca' tu bönni' biti' bi nözinë' tu' bë'a didza' ca naca le dxi'a bena' neda'. Libí'í cázali' benli' bayudxi bena' caní. Libí'ili' ral-la' gunli' neda' bal, ate' sal-la' biti' bi naca' neda', biti' ca' nácara' cuidi' ca nácaquië' bönni' ni' nácada'gaquië' lo, ta'nnë' nácaquië' gubáz queë' Cristo. <sup>12</sup> Yugu' le bena' lu yöl-la' riböza zxon ladxi' quia' ga ni' zóali' nácagaca bë' naca' gubáz queë' Cristo. Bilé'eli' yugu' le bena', le nácagaca bë', en le tun ga nu rubani, en yugu' yöl-la' huáca zxon que yehua' yubá. <sup>13</sup> Tuz le cabí bena' ga zóali' le bena' ga nacua' ia'zícá rö cö' bönachi queë' Cristo. Biti' busaca' zi'a libí'ili' bi gúnnali' le guí'aj gahua'. Buli'niti lo neda' tu' cabí bena' caní queëli'.

<sup>14</sup> Chizóa guída' ga zóali' le bunni luzuí. Biti' bi inaba' gúnnali' quia'. Ré'ënda' gunna cuin cázali' quia', en calëga bi dë queëli'. Yugu' bi'i huë'ënido', biti' run bayudxi ulu'gágubi' xuz xiná'agacabi'. Xuz xiná'agacabi' na' ral-la' ulu'gahuë' zxi'inigaquië'. <sup>15</sup> Idú ládxa'a utöa' yúgu'të le dë quia', en udödi cuina' ni'a queëli' para gaca bi uzí'ili' xibé, sal-la' réquida' cate' nadxí'iröda' libí'ili', zeaj ruhuéchi' yöl-la' nadxí'í queëli' neda'.

<sup>16</sup> Nöz quézili' biti' busaca' zi'a libí'ili'. Na'a, bál-lali' innali' guca' sina', ate' len didza' biti' nácatë buzi'a xibali'. <sup>17</sup> ¿Naru' réquitseli' guzxí' yé'eda' libí'ili' cate' gusöl-la'a yugu' gubáz quia' ga zóali'? <sup>18</sup> Gúta'yua' lobi' bi'i Tito tséajbi' ga zóali', ate' gusöl-la'a-në' böchi'ru' na' tsözxön len lëbi'. ¿Naru' réquitseli' buzi'ibi' xibali' bi'i Tito? ¿Naru' cabí bentu' la' lëbisö ca runtu' bi'i Tito, en neda', enca' la' lëbisö didza' bë'ëtu'?

<sup>19</sup> ¿Naru' réquitseli' rubéaj cuintu' dxi'a loli' libí'ili'? Lahuë' Dios ruí'itu' didza' uláz queë' Cristo, böchi' luzá'ado', ate' yúgu'të le runtu' nácagaca para gácarö idú yöl-la' réajlë' queëli' Cristo. <sup>20</sup> Rádxida' biti' gácali' ca ré'ënda' gácali' cate' guída' ga zóali', ate' neda' biti' gaca' ca ré'ënili' libí'ili' gaca'. Rádxida' ridil-la dídza'li', en ruzxé'eli' luzá'ali', en rileli' luzá'ali', en rulidza díjtali' luzá'ali', en rnnëli' que luzá'ali', en run ba zxon cuinli', en rutsátsali'. <sup>21</sup> Cate' guída' ga zóali', channö caní raca queëli', rádxida' gunë' Dios ga utuí'ida' ca naca queëli', ate' gun bayudxi cödxá' ni'a quégaca zían nupa ni' gulún dul-la', en biti' bulu'bí'í ládxi'gaca ca nácagaca le cabí naca tsahui' gulúngaca, en yugu' le gula'zë ládxi'guequi le cabí naca dxi'a.



## 13

*Pablo ruzéajni'inë' bönachi Corinto, en rugapë' Dios légaquië'*

<sup>1</sup> Le bunni luzuí ni guída' ga zóali'. Nazúaj lu guichi lá'ayi le rnna: "Run bayudxi ila'cuá' chopa tsonna nupa ilún ba nalí channö nu bi uzegui luzë'e didza'." <sup>2</sup> Chibuzéajni'ida' nupa gulún dul-la' cate' ni' guzóalena' libí'ili' le buropi luzuí, ate' na'a ruzéajni'ida' légaquië' leyúbölö, enca' yúgu'të nupa tun dul-la', sal-la' ni zoa' zi'tu', rnnía': Channö guída' ga zóali' leyúbölö biti' gaca' nöxaj ladxí' para til-la' légaquië'. <sup>3</sup> Rinábali' tu le gaca bë' ruá'a didza' uláz queë' Cristo. Lë na' guna' gaca bë' ruá'a caní didza'. Biti' ca' ricuídi'në' Cristo cate' bi runë' queëli', pero lu yöl-la' huáca zxön queë' runë' bi runë' queëli'. <sup>4</sup> Le nácatë gudë'ë lë'e yaga cruz ca nu ricuidi', pero zoë' nabanë' tu' zóalen yöl-la' huáca queë' Dios Lë'. Netu' ca' ricuídi'tu' tsözxön len Lë', pero tu' nácatu' tuz len Lë' nabantu', ate' zóalen netu' yöl-la' huáca queë' Dios bi guntu' ga ni' zóali'.

<sup>5</sup> Buli'yú cuinli' channö réajlë'ëli' Cristo o cabí. Guli'sí bë' la' cuínsili'. ¿Naru' cabí nözili' zóalenë' Jesucristo libí'ili' channö le nácatë réajlë'ëli' Lë'? <sup>6</sup> Runtu' löza chinöz quézili' le nácatë netu' réajlë'ëtu' Cristo. <sup>7</sup> Rulídzatu'-në' Dios rinábitu'-në' gácalenë' libí'ili', para cabí guá'ali' dö', calëga para urúajtu' dxi'a netu', pero para gunli' libí'ili' le naca tsahui' sal-la' guéquili' richixi riníguitu' netu'. <sup>8</sup> Biti' ca' gaca tá'baga'tu' le naca idútë li, pero gácasö guntu' ca sa'yéaj le naca idútë li. <sup>9</sup> Que lë ni na' rudzéjatu' cate' ricuídi'tu', ate' libí'ili' ridipa ladxí'li'. Rulídzatica'stu'-në' Dios, rinábitu'-në' gunë' ga gaca idú ca réajlë'ëli' Cristo. <sup>10</sup> Que lë ni na' ruzúaja' queëli' lu guichi lë ni tsanni ni zoa' zi'tu' ga zóali'. Ní'irö cate' guída' ga zóali' biti' gun bayudxi usaca' zi'a libí'ili', pero uguna' dxin yöl-la' unná bë' nudödë' Xanru' lu na'a, le naca para utipa' ladxí'li', en calëga para usunítia' libí'ili'.

<sup>11</sup> Na'a, böchi' luzá'ado', dipa ladxí'li'.

Guli'güí ladxí'li' gaca idú ca réajlë'ëli' Cristo.

Guli'güí ladxí'li' ca' lë ni rea' libí'ili'.

Guli'gaca tuz len luzá'ali', en guli'cöza dxí'ado'.

Rinábida'-në' Dios sóalenë' libí'ili'.

Lë' nadxí'inë' rë'u, en runë' ga ribözaru' dxí'ado'.

<sup>12</sup> Guli'gapa Dios luzá'ali', tuli' ia'tuli', en unída'li' luzá'ali'.

<sup>13</sup> Yúgu'të böchi' luzá'aru' ni tu'gapë' Dios libí'ili'.

<sup>14</sup> Rinábida'-në' Dios gunë' ga gata' queëli' yúgu'tëli' le ruzá' ladxë'ë Xanru' Jesucristo queëru', en idxí'inë' ca' libí'ili', en gunë' ga gácali' tuz len Dios Bö' Lá'ayi. ¡Ca' gaca!

## DIDZA' GUSÖL-LË'Ë PABLO LUYÚ GALACIA

*Ruzúajë' Pablo quégaca bönachi luyú Galacia*

<sup>1</sup> Neda', Pablo, naca' gubáz queë' Cristo. Biti' gula'söl-la' bönachi neda'. Jesucristo caz gusöl-lë'ë neda', en nunë' Xúziru' Dios tu zxön Lë'. Lë' busubanë' Jesús lu yöl-la' guti. <sup>2</sup> Ruzúaja' queëli' lu guichi ni, libí'ili', yugu' cö' bönachi tu'dubi queë' Cristo luyú Galacia. Núngaquië' yugu' böchi'ru' ni tu zxön neda'. <sup>3</sup> Rinábida' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'. <sup>4</sup> Jesucristo caz budödi cuinë' lu yöl-la' guti tu' nözi dul-la' nabága'ru' para busölë' rë'u lu le naxihui' raca dza ni zóaru' na'a. Benë' caní tu' naca ca ré'ëni quézinë' Xúziru' Dios. <sup>5</sup> ¡Gácatíca'sö queë' Dios yöl-la' ba! ¡Ca' caz!

*Tuz naca le rinnë dxi'a queë' Jesucristo*

<sup>6</sup> Rubánide'eda' ca runli', rucá'anatëli' Dios. Lë' bulidzë' libí'ili' para guéquili' queë' tu' nözi le ruzá' ládxë'ë Jesucristo queëru', ate' na'a ré'ënilí' si' ladxi' ná'ali' tu le rinnë dxi'a izá'a. <sup>7</sup> Le nácatë bití' ca' zoa ia'tú le rinnë dxi'a pero ruá'a caní didza' tu' nacu'ë bönni' tu'tsë'ë libí'ili', en té'ënë' ulu'tsë'ë le rinnë dxi'a queë' Cristo. <sup>8</sup> Channö zoa nu gun ba nalí que tu le rinnë dxi'a le cabí naca tuz ca naca lë na' bentu' ba nalí que loli' libí'ili', rinábida'-në' Dios udxíë' dö' nu na' run caní. Ral-la' udxíë' neda' dö' channö guna' caní, en channö gunë' caní tu gubáz queë' Dios zë'ë yehua' yubá, Dios caz udxíë' ca' lë' dö'. <sup>9</sup> Chigunná caza' caní zí'alö, ate' na'a rnnía' caní leyúbölö: Channö zoa nu gun ba nalí que tu le rinnë dxi'a le cabí naca tuz ca naca lë na' chiguzxí' ladxi' ná'ali', rinábida'-në' Dios udxíë' dö' nu na'.

<sup>10</sup> ¿Réquitseli' ré'ënda' cú'uli' neda' yöl-la' zxön cate' ru'a caní didza'? ¡Biti' ca'! Ré'ënda' urúaja' tsahui' lahuë' Dios. ¿Réquili' ré'ënda' uzaca' baládxilengaca bönachi neda'? La'tu' ré'ënda' uzaca' baládxilengaca bönachi neda', bití' gaca' huen dxin queë' Cristo.

*Naca böáquië' Pablo bönni' gubáz queë' Cristo*

<sup>11</sup> Ral-la' inözili' lë ni, böchi' zána'do'. Le rinnë dxi'a na' runa' ba nalí que bití' gulén icja lo ládxi'da'ahuiguequi bönachi. <sup>12</sup> Cuntu nu bönni' budödë' lu na'a le rinnë dxi'a na', en calëga nu bönni' busédinë' neda' le. Jesucristo caz buzéajni'inë' neda' ca naca le rinnë dxi'a queë'. <sup>13</sup> Chibiyön quézili' ca na' ben caza' neda' zí'atëlö cate' ni' nazí' lu na'a ca tequi le bach Dios bönni' judío. Nözili' ca bena', yenni' gudxía nahua' bönachi

queë' Dios ta'yija ladxi' Cristo, en gú'unda' usulu usunítia' léguequi. <sup>14</sup> Lu le tequi le bach Dios bönni' judío, guyëpisëtëra' neda' ca lá'tu'biqúi' yúgu'të luzá'a bönni' judío yú'ugaquië' iz ca yu'a neda', tu' guzxi'rö ladxi' na'a ca léguequi le bulu'dödë' xuz xtó'oru' loru' ca tun cazë'. <sup>15</sup> Caní bena' neda', pero tu' náquië' dxi'i ladxi' Dios, gurö cazë' neda' zí'atëlö ca gulja', ate' bulidzë' neda' para guna' xichinë'. <sup>16</sup> Ní'irö, cate' gú'uni quëzinë' Dios, benë' ga núnbë'a-në' zxi'inë', en gusöl-lë'ë neda' tsöjena' libán que le rinnë dxi'a ca naca queë' Lë' lógaca bönachi izá'a. Cate' benë' caní, biti' yödilja' nu naca bönachi nu usedi neda'. <sup>17</sup> Cabí guyija' yödzö Jerusalén para tsöyúa' nupa ni' nácgaca bönni' gubáz queë' Cristo zí'alö ca neda', pero guyija' luyú Arabia, ate' gudödi ni' böja' yödzö Damasco.

<sup>18</sup> Caní guca, chigudödi tsonna iz cate' ni' guyija' yödzö Jerusalén, yöyúa'-në' Pedro, ate' bugá'analena' lë'idú ca chidá' gubidza. <sup>19</sup> Tsanni ni' zoa' ni' biti' ca' bilé'eda' ia'turë' bönni' gubáz queë' Cristo, pero tuzë' Jacobo, bönni' böchë'ë Xanru' bilé'eda'. <sup>20</sup> Didza' ni ruzúaja' queëli' lu guichi nácatë. Ni'a queë' Dios biti' ca' rizí' yë'a.

<sup>21</sup> Gudödi ni' guyija', gudöda' yugu' yödz luyú Siria, en luyú Cilicia. <sup>22</sup> Yugu' dza ni' biti' núnbë'gaquië' neda' böchi'ru' tu'dubë' queë' Cristo gapa naca luyú Judea. <sup>23</sup> Gula'nözisinë' lë na' gúla'guixjö' quia' ia'zíca'rö bönachi, gula'nná: "Bönni' na' gudxía nahuë' rë'u zí'alö, runë' libán na'a que le reja ládxi'ru', lë na' gú'unë' usulu usunítie'." <sup>24</sup> Caní guca, gula'gu'ë yöl-la' ba Dios tu' nözda' neda'.

## 2

### *Bönni' gubáz queë' Cristo guzxi' lu ná'agaquië' Pablo*

<sup>1</sup> Cate' chigudödi chidá' iz, guyéajlena' Bernabé, en budxina' yödzö Jerusalén. Guchë'a-bi' Tito, dzágabi' neda'. <sup>2</sup> Guyija' ni', en bë'lena' didza' tsölá'alö bönni' ni' yu'u lu ná'agaquië' dxin queë' Cristo, ate' gudíxjöi'ida' légaquië' ca naca libán runa' que le rinnë dxi'a lógaca bönachi izá'a. Caní bena' tu' gú'unda' cabí ugá'ana nítisö dxin na' chibena', enca' dxin ni runa' na'a. <sup>3</sup> Salla' nácabi' Tito, bi'i luzá'a, bi'i griego, biti' gulunë' bönni' ni ga irugu lu xpéla'bi' lë na' naca bë' bönachi queë' Dios ca tun cazë' bönni' judío. <sup>4</sup> Le nácatë gula'cuá' bal-la bönachi ni', nupa ni' ta'zí' yë', ta'ná nácgaca böchi'ru', ate' gulë'ëni ilún ga irugu lu xpéla'bi' Tito lë na' naca bë'. Yugu' bönni' ni núnagaquië' tu zxön rë'u pero tu'yusë' ca runru' para iléquibe'enë' ca nuláru' lu yöl-la' unná bë' que le rinná bë' xibá queë' Moisés tu' nácaru' tuz len Jesucristo. Gulë'ënë' ilunë' ga huóácaru' leyúbölö huen dxin tsaz lu xibá na'. <sup>5</sup> Biti' ca' bë'tu' légaquië' lataj. Caní bentu'

para gun chí'itu' le nácatë que le rinnë dxi'a para gaca uzí'ili' xibé le rinnë dxi'a na'.

<sup>6</sup> Yugu' bönni' ni' réquiru' yu'u lu ná'agaquië' dxin queë' Cristo biti' bi gula'nná be'e neda' le naca cubi, pero biti' ruí'i ládxa'a ca ná'cagaquië'. Dios biti' ruchi'a rusöröë' rë'u ca tu'chi'a tu'sörö bönachi rë'u. <sup>7</sup> Biti' bi gula'nná be'e neda' tu' guléquibe'enë' Dios nudödë' lu na'a dxin queë', para tsöjena' libán que le rinnë dxi'a lógaca bönachi izá'a, ca na' nudödë' lu në'ë Pedro dxin queë', para gunë' libán que le rinnë dxi'a lógaca bönachi judío. <sup>8</sup> Len yöl-la' huáca queë', Dios benë' neda' bönni' gubáz queë' para usédida' bönachi izá'a, ca na' benë' Pedro bönni' gubáz queë' para usédinë' bönachi judío.

<sup>9</sup> Jacobo, en Pedro, en Juan, bönni' ni' réquiru' yu'u lu na'agaquië' dxin queë' Cristo, guléquibe'enë' Dios nudödë' lu na'a dxin ni. Que lë ni na' guzxi' ladxi' ná'agaquië' neda', enca' Bernabé, ate' bentu' tuz didza' tsöjentu' xichinë' Dios lógaca bönachi izá'a neda', en Bernabé, ate' légaquië' ilunë' xichinë' Dios lógaca bönachi judío. <sup>10</sup> Gulá'ta'yusë' lotu' tsönetu' gácalentu' bönachi yechi', ate' lë ni naca tu le ruí'itica'sö ládxa'a runa'.

*Ca guca cate' Pablo gudíl-lalenë' Pedro lu yödzö Antiquía*

<sup>11</sup> Cate' bidxinë' Pedro lu yödzö Antioquía, gudíl-lalena' lë' didza' tu' lë cazë' guchíxinë' ca benë'. <sup>12</sup> Caní guca tu' zí'atëlö gudágulenë' tsözxön yugu' bönachi izá'a ni'. Benë' caní ga bila'dxinrë' bal-la bönni' dá'gaquië' Jacobo. Ní'irö gusí lahuë' rubíguië', en bítirö gudágulenë' tsözxön bönachi izá'a na' tu' gúdxinë' bi ilunë' bönni' na' nazi' lu ná'agaquië' ilunë' ga irugu lu xpéla'gaca bönachi izá'a ca rinná bë' xibá queë' Moisés. <sup>13</sup> Ní'irö ia'zíca'rë' bönni' judío ni' ta'yija ládxe'ë Cristo gulunë' tu zxön Pedro ca runë' lu yöl-la' radxi queë', ate' caní guca ga bidxintë gulunë' ga gúdxinë' ca' Bernabé, ate' lë' benë' tu zxön légaquië'. <sup>14</sup> Cate' bilé'eda' biti' tunë' ca naca le nácatë le rusedi rë'u le rinnë dxi'a, gudxa'-në' Pedro lógaca yúgu'të nupa ni' nudúbigaca queë' Cristo, gunnía': "Li' nacu' bönni' judío, pero runu' li' ca túngaca bönachi izá'a, en calëga ca tunë' bönni' judío. ¿Bizx queë' rë'ënu' gunu' ga ilúngaca bönachi izá'a ca tunë' bönni' judío?"

*Nulágaca bönachi judío ca na' nulágaca ca' bönachi izá'a*

<sup>15</sup> Gudxa' ca' Pedro: "Rë'u ni nácaru' bönni' judío tu' ná'cagaquië' xuz xiná'aru' judío, en calëga bönachi izá'a, nupa cabí núnbë'gaca Dios. <sup>16</sup> Nöz quéziru' cuntu nu huóaca tsahui' lahuë' Dios tu' run nu na' tsa rinná bë' xibá queë' Moisés, pero huóaca tsahui' tuzi nu na' reja ladxi' Jesucristo. Lës caní ca' rë'u reja ládxi'ru' Jesucristo para huóácaru' tsahui' lahuë' Dios, en calëga tu' runru' tsa rinná bë' xibá queë' Moisés.

Cuntu caz nu huóaca tsahui' lahuë' Dios tu' run tsca rinná bē' xibá queë' Moisés.

<sup>17</sup> Na'a, réquiru' nuhuóacaru' tsahui' tu' reja ládxi'ru' Cristo, pero channö naca bē' nácaru' bönni' dul-la' ca nácacaca bönachi izá'a, ¿innátsaru' runē' Cristo ga runru' dul-la'? ¡Biti' caz!  
<sup>18</sup> Channö ru'í ládxa'a uchisa' le chibuquinja', lē ni naca bē' riguitsja' xibá le gunná bē'ē Dios. <sup>19</sup> Tu' cabí guca uzóa' didza' xibá na' gunná bē'ē Moisés, guca quia' tsca chinátia'. Tu' caní naca, nulá' na'a lu xibá na' para soa' ibana', en guna' ca rē'ēnē' Dios. <sup>20</sup> Naca quia' ca chigútilena' tsözxön Cristo lē'e yaga cruz ga na' gútiē' Lē'. Que lē ni na' calēga neda' ni zoa' nabana', pero Cristo zoë' nabanē' lu icja ládxi'da'ahua'. Tsca naca zoa' nabana' na'a, naca tu' reja ládxa'a Lē' xzí'inē' Dios, Bönni' na' bidxí'inē' neda', en budödi cuinē' lu yöl-la' guti uláz quia' neda'. <sup>21</sup> Biti' rē'ēnda' uzóa' tsölá'alö le ruzá' ládxe'ē queëru' Dios. Channö huáca huóaquie' tsahui' tu bönni' lahuë' Dios tu' runē' tsca rinná bē' xibá queë' Moisés, ní'irö nítisö gútiē' Cristo."

### 3

*Le rinná bē' xibá queë' Moisés, en le reja ládxi'ru' Cristo*

<sup>1</sup> Libí'ili', tu' canöz, libí'ili', bönni' Galacia. ¿Nuzxi gulú'utsö libí'ili' nēbi para cabirö uzóali' didza' le nácatē? Gate ga rē' bulu'itu' libí'ili' le sa'yéaj ca gútiē' Jesucristo lē'e yaga cruz. <sup>2</sup> Gudíxjöi'i neda' lē ni. ¿Bidisóalenē' libí'ili' Dios Bö' lá'ayi tu' benli' ca rinná bē' xibá queë' Moisés o tu' guyija ládxi'li' le rinnē dxi'a biyönili'? <sup>3</sup> ¿Nacxi guca nácali' tu' canöz caní? Gusí loli' nácali' bönachi queë' Dios tu' zóalenē' libí'ili' Dios Bö' lá'ayi. ¿Réquitseli' huáca udxí gunli' ga guéquili' queë' Dios rácasö queëli'? <sup>4</sup> ¿Guca nítisö guca queëli' yúgu'tē lē na' guxzaca' gudí'ili'? ¡Biti' ca' guca caní! <sup>5</sup> Cate' Dios risöl-lē'ē queëli' Dios Bö' lá'ayi, en ru'ē libí'ili' lataj gunli' yugu' yöl-la' huáca que yehua' yubá, ¿runē' caní tu' runli' ca rinná bē' xibá queë' Moisés o tu' reja ládxi'li' le rinnē dxi'a na' biyönili'?

<sup>6</sup> Lu guichi lá'ayi rnna: Abraham guyija ládxe'ē Dios, ate' Dios gunné' náquie' bönni' tsahui' tu' guyija ládxe'ē Lē'. <sup>7</sup> Que lē ni na na' ral-la' inözili', nupa na' ta'yija ladxi' Dios nácacaca idú xzí'ini xi'sóe' Abraham. <sup>8</sup> Lu guichi lá'ayi ru'í didza' zí'atēlö ca gunē' Dios, innē' nácacaguie' tsahui' bönni' izá'a ila'yija ládxe'ē Lē'. Que lē ni na' Dios gudíxjöi'inē' Abraham zí'atēlö ca naca le rinnē dxi'a, gunné': "Lu nē'ē Zzí'ini xi'sú' guna' ga gaca dxi'a quégaca bönachi idutē yödzülió." <sup>9</sup> Caní naca, Abraham guyija ládxe'ē Dios, ate' Dios benē' ga guca dxi'a queë'. Lēs caní ca' na'a, Dios runē' ga raca dxi'a quégaca yúgu'tē nupa ta'yija ladxi' Lē'.

<sup>10</sup> Nupa na' tu'zxöni ladxi' ulu'huóaca tsahui' tu' túngaca ca rinná bē' xibá queē' Moisés, nabága'gaca xíguia'. Caní naca tu' nazúaj lu guichi lá'ayi, le rnna: "Yúgu'tē nupa na' cabí túngaca idutē ca rinná bē' xibá na' nabága'gaca xíguia'." <sup>11</sup> Na'a, naca bē' cuntu nu huóaca tsahui' lahuē' Dios tu' run nu na' le rinná bē' xibá na', tu' zoa lu guichi lá'ayi le rnna: "Nu na' nuhuóaca tsahui' lahuē' Dios soa ibán tu' reja ladxi' Lē'." <sup>12</sup> Ca na' nuhuóaca tsahui' lahuē' Dios nu na' reja ladxi' Cristo nadzá' ca naca que nu na' ruzxöni ladxi' nuhuóaca tsahui' tu' run ca rinná bē' xibá queē' Moisés. Zoa lu guichi lá'ayi le rnna: "Nu na' run idutē ca rinná bē' xibá na' soa ibán tu' run caní'."

<sup>13</sup> Cristo busölē' rē'u lu le richugu queēru' le rinná bē' xibá na' tu' bē'ē latja nu guchugu queē' uláz queēru'. Caní naca tu' zoa lu guichi lá'ayi le rnna: "Narugu quégaca yúgu'tē nupa na' dá'gaca lē'e yaga." <sup>14</sup> Caní guca queē' Cristo para gaca gunē' Dios ca na' guzxí' lu nē'ē queē' Abraham, gunē' ga gaca dxi'a quégaca bönachi izá'a lu nē'ē Jesucristo, en para gaca gunē' ga idisóalenē' Dios Bö' lá'ayi rē'u channö uyija ládxi'ru' Lē', ca na' guzxí' lu nē'ē Dios gunē'.

*Le rinná bē' xibá queē' Moisés, en le guzxí' lu nē'ē Dios gunē' queēru'*

<sup>15</sup> Na'a, böchi' zána'do', uzúaja' queēli' tu le rucudzu' didza', tu le raca queēru'. Cate' chopá bönni' chigulunē' tuz xtídza'gaquiē', en chigulunē' tsutsu didza' na', cuntu nu gaca utsá' didza' na', en cabí gaca nu bi udá' lē'e didza' na'. <sup>16</sup> Dios guzxí' lu nē'ē bi gunē' queē' Abraham, en que zxí'ini xi'sóé'. Ga zoa lu guichi lē'ni, bití' rnna: "Quégaca zxí'ini xi'sú'", le ruí'i didza' que zían bönachi, pero rnna: "Que zxí'ini xi'sú'." Lē'ni ruí'i didza' que tuz bönni', Lē' Cristo. <sup>17</sup> Lē'ni na' le rē'ēnda' innía': Dios benē' tuz didza' len Abraham, en guzxí' lu nē'ē gunē' ca na' gunnē'. Le nazúaj lu xibá queē' Dios, le benē' Dios tapa gayuá' yu' chi-uruá' iz gudödi ni' cate' gudxē' caní Abraham, bití' gaca ugúa' lē'na' guzxí' lu nē'ē Dios gunē', en cabí gaca usulu le. <sup>18</sup> Na'a, channö ral-la' gunru' ca rinná bē' xibá na' para sí'iru' le guzxí' lu nē'ē Dios gunsē', bítí'rö naca tu le guzxí' lu ná'asē' gunē'. Dios runsē' caní tu' caní guzxí' lu nē'ē bi gunē' queē' Abraham.

<sup>19</sup> Channö caní naca, ¿bizx queē' gunná bē'ē Dios xibá na' nazúajgaca lu didza' queē'? Dios gunná bē'ē caní para gaca bē' xíguia' nabága'ru', pero gúcasö caní ga bidxintē dza na' bilá' lahuē' zxí'ini xi'sóé' Abraham na', Bönni' na' guzxí' lu nē'ē Dios gunē' queē' lē'na'. Yugu' le gunná bē'ē Dios lu xibá queē', gusöl-lē'ē yödzölió ni lu ná'agaquiē' gubáz lá'ayi queē', ate' Moisés budödē' didza' ca nácagaca xibá na'. <sup>20</sup> Bití' naquín nu

udödi didza' cate' naca tuz nu run tuz didza', ate' Dios, tuz náquië'.

*Bixz queë gunná bë'ë Dios le zóagaca lu xibá queë'*

<sup>21</sup> Le nazúajgaca lu xibá queë' Dios, ¿ta'dá'gaca lë na' guzxí' lu në'ë Dios gunë'? ¡Biti' ca'! La'tu' gunná bë'ë Dios tu xibá le gaca gun ga sóaru' ibanru' tsaz, ní'rö huáca huóácaru' tsahui' lahuë' Dios channö gunru' ca na' rinná bë' xibá na'. <sup>22</sup> Tsca naca lë na' nazúaj lu guichi lá'ayi, yúgu'tëru' nabága'ru' dul-la'. Caní naca para gaca sí'iru' lë na' guzxí' lu në'ë Dios gata' queëru' cate' tseja ládxi'ru' Jesucristo.

<sup>23</sup> Zí'atëlö ga bidxín dza gaca tseja ládxi'ru' Cristo, le rnna xibá na' gunná be'e rë'u, ca na' zoa le rinná be'e tu bönni' yu'ë lidxi guíë. Caní guca ga bidxintë dza bilá' lahui gaca huóácaru' tsahui' channö uyija ládxi'ru' Lë'. <sup>24</sup> Caní naca, le nazúaj lu xibá queë' Dios gunná be'e rë'u, lë na' busedi rë'u ca tu bönni' usedi ga bidxintë dza bilá' lahuë' Jesucristo, para gaca huóácaru' tsahui' lahuë' Dios channö uyija ládxi'ru' Lë'. <sup>25</sup> Na'a, tu' bidxín dza gaca huóácaru' tsahui' channö uyija ládxi'ru' Cristo, bíti'rö inná be'e rë'u lë na' busedi rë'u.

<sup>26</sup> Yúgu'tëli' nácali' bi'i queë cazë' Dios tu reja ládxi'li-në' Jesucristo, en chinácali' tuz len Lë'. <sup>27</sup> Yúgu'të nupa nadílagaca nisa para huóácagaca tuz len Jesucristo, nuhuóácagaca ca náquië' Lë cazë'. <sup>28</sup> Bíti'rö narúaj choplö bönni' judío, en bönni' izá'a, en cabí narúaj choplö bönni' náquië' tsaz huen dxin, en bönni' nazán, en cabí narúaj choplö bönni', en nigula, tu' cate' böácali' tuz len Jesucristo, yúgu'tëli' böácali' ca' tuz len luzá'ali' tuli' ia'tuli'. <sup>29</sup> Na'a, channö néquili' queë' Cristo, nácali' ca' zxí'ini xi'sóë' Abraham, ate' nazí'ili' lë na' guzxí' lu në'ë Dios gunné' queë' Abraham.

## 4

<sup>1</sup> Lë ni le ré'ënda' innía': Tsanni ni ribözabi' tu bi'i bönni'do' sí'ibi' bi ral-la' gunné' xúzibi' queëbi', ni' nácabi' bí'ido', en bití' nayëpisëtëröbi' ca raca que tu nu naca tsaz huen dxin, sal-la' le nácatë nequi queëbi' yúgu'të. <sup>2</sup> Tsanni ni' nácabi' bí'ido', nacué' nupa tun chi'i lëbi', en tu'gún dxin le nequi queëbi' ga idxintë dza chinuzóë' xúzibi' queëbi'. <sup>3</sup> Lës caní raca ca' queëru'. Tsanni ni' gúcaru' ca bí'ido', gunná be'e xibá na' rë'u ca raca quégaca bönachi yödzölió ni. <sup>4</sup> Cate' bizá'a dza, Dios gusöl-lë'ë zxí'ini cazë' ni. Gúquië' zxí'ininu tu nigula ca nácaru' rë'u, en gunná be'e le zoa lu xibá quégaca bönni' judío Lë'. <sup>5</sup> Caní guca queë' para guca busölë' nupa na' rinná be'e le zoa lu xibá léguequi, para gaca huóácaru' bi'i queë' Dios.

<sup>6</sup> Para gaca bë' chinácali' bi'i queë cazë', Dios guchizë' Dios Bö' lá'ayi ládxi'do'oli', ate' Lë cazë' rulidzë' Dios uláz queëli',

rnnë: “Xuza.” <sup>7</sup> Caní naca, chinácali’ bi’i queë’ Dios, en bíti’rö nácali’ ca yugu’ bönni’ tsaz nácagaquië’ huen dxin. Na’a, tu’ nácali’ bi’i queë’ cazë’ Dios, Lë cazë’ nazí’ ladxi’ në’ë guequi queëli’ le nequi queë’ tu’ nácali’ tuz len Cristo.

*Pablo ru’i ládxe’ë bönni’ Galacia ta’yija ládxe’ë Cristo*

<sup>8</sup> Cate’ ni’ biti’ núnbë’ëli’-në’ Dios, gúcali’ ca yugu’ bönni’, tsaz nácagaquië’ huen dxin, en benli’ dxin quégaca budó’ néquini. Biti’ ca’ nácagaca budó’ na’ Dios. <sup>9</sup> Na’a, tu’ núnbë’ëli’-në’ Dios, o huáca innaru’: Tu’ núnbë’ë Dios libí’ili’, ¿bizx queë’ rë’ënilí’ ubí’ili’ yugu’ lu xibá cané na’ cabí nu uzí’ xibé? ¿Rë’ënilí’ huóacali’ huen dxin tsaz, en gunli’ ca rinná bë’ xibá na’? <sup>10</sup> Rápali’ tu ia’tú dza, enca’ tu ia’tú beo’, enca’ tu ia’tú cusu na, en tu ia’tú iz. <sup>11</sup> Rádxida’ bi gaca queëli’. ¿Naru’ nuhuóaca nítisö dxin bena’ para gúnbë’ëli’ le nácaté? <sup>12</sup> Ráta’yua’ loli’, böchi’ zána’do’, gácali’ ca naca’ neda’, nulá’ na’a lu na’ xibá benë’ Moisés. Caní ral-la’ gácali’ tu’ böáca’ neda’ ca gúcali’ libí’ili’. Biti’ bi le cabí naca dxi’a benli’ quia’ neda’.

<sup>13</sup> Chinöz quézili’ bizx queë’ na’ gusí lahua’ runa’ libán loli’ que le rinné dxi’a. Bena’ libán ni’ tu’ gú’ida’. <sup>14</sup> Biti’ bucá’anali’ neda’ cané, en cabí buzóali’ neda’ tsólá’alö sal-la’ bigútili’ ca guca yödzöhué’ quia’ na’. Benli’ neda’ bal, tuz ca gunli’ bal tu gubáz lá’ayi queë’ Dios, o ca runli’ bal Jesucristo caz. <sup>15</sup> Budzéjalë’ëli’ dza ni’. ¿Bizxi guca queëli’ tu’ cabirö raca caní? Lë ni gaca innía’ ca guca queëli’: La’tu’ huáca gunli’, bubéajli’ guió’j lo quézili’, le gúnnali’ quia’. <sup>16</sup> Na’a, ¿réquili’ nuhuóaca’ tu nu riléde’e libí’ili’ tu’ gudxa’ libí’ili’ le nácaté?

<sup>17</sup> Bönni’ ni’ tu’tsë’ë libí’ili’ tu’i ládxe’ë libí’ili’, pero calëga para gaca dxi’a queëli’. Të’ëné’ ilunë’ ga ucá’anali’ netu’ para gú’i ládxi’li’ légaquië’. <sup>18</sup> Na’a, naca dxi’a zoa nu ru’i ladxi’ libí’ili’, pero tuz channö naca para gaca dxi’a queëli’. Caní ru’itica’sö ládxa’a libí’ili’, en calëgasö cate’ ni’ zóalena’ libí’ili’. <sup>19</sup> Libí’ili’, zxi’ina’do’. Ca na’ raca queënu nigula chizóa sóabi’ bí’ido’ queënu, rigú’i rizáca’nu, lës caní rigú’i rizáca’a neda’ ni’a queëli’ leyúbölö ga idxinrö dza gácali’ idú ca náquië’ Cristo. <sup>20</sup> Nácaru la’ zóalena’ libí’ili’ na’a para gaca gú’ilena’ libí’ili’ didza’ nadzá’alö, tu’ ruúbi rugú’ilë’ëda’ ni’a queëli’.

*Le rucudzu’ didza’ ca guca quégacanu Agar en Sara*

<sup>21</sup> Na’a, libí’ili’, nuli’ rë’ënilí’ uzóa cuinli’ lu xibá queë’ Moisés, guli’ná’tsöca’ didza’ ni gu’a. ¿Catu caz buzë nágali’ le rnna xibá na’? <sup>22</sup> Rnna xibá na’ caní: gula’cuá’abi’ chópabi’ bi’i bönni’do’ queë’ Abraham. Tubi’ gúcabi’ zxi’ininu tu nigula tsaz nácanu huen dxin, ate’ ia’tubi’ gúcabi’ zxi’ininu nigula nazannu. <sup>23</sup> Zxi’ininu nigula huen dxin na’ gúlajbi’ lu ni’a lu na’ tu bönni’ tsca tálajbi’ yúgu’të bí’ido’, pero zxi’ininu nigula



nazannu na' gúlajbi' tu' guzxí' lu në'ë Dios gunë' ga gálajbi'.  
 24 Lë ni naca ca tu le rucudzu' didza'. Ca guca quegacanu  
 chópanu nigula ni sa'yéaj ca naca chopá didza' Dios bénlenë'  
 bönachi. Tu didza' na' naca le buzöë' Dios lu guí'a Sinaí, le  
 sa'yéaj lë na' guca queënu Agar. Nupa na' rinná be'e xibá  
 na' léguequi, nácgaca ca zxí'ininu Agar, en nácgaca ca huen  
 dxin tsaz lu xibá na'. 25 Le gúcanu Agar na' sa'yéaj ca' ca naca  
 guí'a Sinaí na' le zoa luyú Arabia, en sa'yéaj ca' ca naca yödzö  
 Jerusalén na'a dza, tu' naca yödzö na' ca tu bönni' tsaz náquië'  
 huen dxin tsözxön len nupa nacua' lu yödzö na'. 26 Jerusalén  
 na' zoa yehua' yubá nazán, ate' rë'u ni nácaru' bönachi uládz  
 que yödzö ni'. 27 Nazúaj lu guichi lá'ayi le rnna:

Budzeja, nigula huödx, cabí nacua' zxí'inu'.

Lu yöl-la' rudzeja quiu' gurödxí'a,

sal-la' catu caz guca quiu' le riguí'i rizáca'nu nigula  
 chizóa sóabi' bí'ido' queënu.

Budzeja tu' sal-la' nusán në'eguequi bönachi li',

gunë' Dios ga ila'yántërö zxí'inu'

ca bi'i queënu nigula zóalennu bönni' queënu.

28 Libí'ili', böchi' zána'do', rë'u ni nácaru' ca gúcabi' Isaac,  
 zxí'inë' Abraham. Nácaru' ca yugu' zxí'ini xi'sóë' Abraham,  
 guzxí' lu në'ë Dios gata' queë'. 29 Dza ni', bi'i na' gúlajbi' ca  
 táljabi' yúgu'të bí'ido', gudxía ná'abi' bi'i na' gúlajbi' tu' nözi yöl-  
 la' huáca queë' Dios Bö' lá'ayi. Lës caní raca ca' queëru' na'a,  
 ta'bía no bönachi yödzölió ni rë'u. 30 ¿Bizxí rnna le zoa lu guichi  
 lá'ayi? Caní rnna: "Gurú'una-nu nigula na' tsaz nácanu huen  
 dxin tsözxön len zxí'ininu, tu' bití' gaca zxí'ininu nigula na'  
 sí'ibi' tsözxön zxí'ininu nigula nazannu le guzxí' lu në'ë Dios  
 guequi queëbi' zxí'ininu nigula nazannu na'." 31 Caní naca,  
 böchi' zána'do'. Bití' nácaru' ca nácabí' zxí'ininu nigula na', tsaz  
 gúcanu huen dxin, pero nácaru' ca zxí'ininu nigula nazannu  
 na'.

## 5

### *Guli'gún chi'i cuinli', ugá'anali' lu yöl-la' nazán*

1 Chinazanru' tu' busanë' Cristo rë'u. Guli'sóa tsutsu  
 channö, ugá'anali' lu yöl-la' nazán na'. Bití' uzóa cuinli'  
 leyúbölö lu xibá queë' Moisés para cabí gácali' ca tu bönni', tsaz  
 náquië' huen dxin.

2 Buli'zë nágali' neda'. Neda', Pablo, rea' libí'ili', channö  
 ruí'ili' lataj nu ichugu lu xpéla'li' ca rinná bë' xibá na', bití'  
 ca' uzí'ili' xibé le benë' Cristo. 3 Leyúbölö rë'ënda' guía'  
 núti'tës bönni' ru'ë lataj nu ichugu lu xpélë'ë caní, run bayudxi  
 gunë' idutë ca le rinná bë' xibá queë' Moisés. 4 Nuli' réquili'  
 huóacali' tsahui' lahuë' Dios tu' runli' ca rinná bë' xibá na',

chibulá'alenli'-nē' Cristo. Chibusán ná'ali' le ruzá' ládxi'ë Dios queëru'. <sup>5</sup> Rē'u ni ruzxōni ládxi'ru' huóácaru' tsahui' lahuē' Dios ni'a que yōl-la' huáca queë' Dios Bō' lá'ayi tu' reja ládxi'ru' Cristo. <sup>6</sup> Channō nácaru' tuz len Jesucristo, biti' bi run channō narugu lu xpēla'ru' ca rinná bē' xibá na' o channō cabí narugu caní lu xpēla'ru'. Le run bayudxi naca tseja ládxi'ru' Cristo, le run ga idxí'iru' luzá'aru'.

<sup>7</sup> Dxí'ado' guca ca gusí loli' runli' dza ni'. ¿Nuzxi ben ga bucá'anali' le nácatē? <sup>8</sup> Biti' benē' Dios, Bōnni' rulidzē' libí'ili', ga benli' caní. <sup>9</sup> Biti' gal-la ládxi'li' lē na' rnna: "Látisō cúa zi que yōta xtila ruhuóázx idutē cúa ga nayú'u cúa zi na'." <sup>10</sup> Tu' nácaru' tuz len Xanru', runa' löza ca naca queéli', sa' ládxi'li' tuz ca rizá' ládxa'a neda', ate' Dios gun zi'ë bōnni' na' rutsē'ë libí'ili', nútiti's nu naca bōnni' na'.

<sup>11</sup> Ca naca quia' neda', böchi' zána'do', nacuá' nupa ta'nná rusédida' bōnachi ral-la' irugu lu xpēla'guequi ca rinná bē' xibá queë' Moisés. Channō runa' caní, ¿bizx queë' ta'bía nahuē' bōnni' judío neda'? La'tu' rusédida' caní, cunttu nu ilé neda' tu' runa' libán ca gútiē' Cristo lē'e yaga cruz. <sup>12</sup> Ca naca que nupa ni' tu'tsá' libí'ili', té'ëni irugu lu xpēla'li' lē na', nácōru la' ila'chugu tsaz cuínguequi.

<sup>13</sup> Ca naca queéli', böchi' zána'do', Dios bulidzē' libí'ili' para gácali' bōnachi nazángaca. Biti' ugunli' dxin yōl-la' nazán na' para gunli' ca rizēsō ládxi'li', pero para gunli' dxin que luzá'ali', tuli' ia'tuli', tu' nadxí'ili' luzá'ali'. <sup>14</sup> Yúgu'tē le rinná bē' xibá queë' Dios rusudxín nu na' run ca rinná bē' xibá na' rnna: "Ral-la' idxí'inu' luzó'o ca nadxí'i cuinu'." <sup>15</sup> Channō rizí' quídza'li' luzá'ali' tuli' ia'tuli', runli' ca tunba' bōa' guí'a sínia', táguya'aba', en táguba' luzá'aba'. Buli'yú tsate' usulu usunítili' luzá'ali' tuli' ia'tuli'.

*Le runru' lu yōl-la' bōnáchisō queëru', en le runru' len yōl-la' huáca queë' Dios Bō' lá'ayi*

<sup>16</sup> Lē ni na' rea' libí'ili': Guli'güi' latja inná bé'enē' libí'ili' Dios Bō' lá'ayi, ate' ní'irō bítirō gunli' ca rizēsō ládxi'ili' lu yōl-la' bōnáchisō queéli'. <sup>17</sup> Yugu' le rizē ládxi'ru' gunru' lu yōl-la' bōnáchisō queëru' biti' röjlöz le ré'ënē' Dios Bō' lá'ayi gunru', ate' lē na' ré'ënē' Dios Bō' lá'ayi biti' röjlöz le ré'ëni ru' gunru' lu yōl-la' bōnáchisō queëru'. Chopa ni, biti' röjlözgaca, en que lē ni na' biti' gaca gunli' ca ré'ëni quézili'. <sup>18</sup> Channō ruí'ili' lataj inná bé'enē' Dios Bō' lá'ayi libí'ili', bítirō inná be'e xibá queë' Moisés libí'ili'.

<sup>19</sup> Naca bē' le tun bōnachi lu yōl-la' bōnáchisō quéguequi. Tun dul-la' le riguitsaj xibá que yōl-la' nutsaga na', enca' dul-la' le lē'ë.

Tun yugu' le naxihui', en yugu' le catsahui'.

<sup>20</sup> Téquiguequi le bach budó' néquiniguequi.

Tun yöl-la' gudzá'.

Tu'dí'i luzé'eguequi, en ta'díl-lalen léguequi.

Tu'zxé'e luzé'eguequi, en ta'lé nupa na', en tu'huídi'.

Ta'rúaj choplö, en tu'béaj tsölá'alö nupa dá'gaca léguequi.

<sup>21</sup> Ta'zé ladxi' le dë que luzé'eguequi, en ta'guilaj xíguia'.

Ta'zudxi, en tagu lë'e.

Tu'dödi bë' ca túnguequi.

Le zían le caní túnguequi. Neda' ruxösa' ládxi'li' na'a para cabí gunli' caní ca na' buxösa' ládxi'li' zí'alö, rnní'a': Nupa túngaca caní biti' ca' ila'deli' ila'yú'u ga na' rinná bë'ë Dios.

<sup>22</sup> Channö zóalen Dios Bö' lá'ayi rë'u runru' caní:

Nadxi'iru' luzá'aru'.

Rudzeja ládxi'ru'.

Zoa dxi ládxi'do'oru'.

Ribözaru' zxön ladxi'.

Ruí'i ládxi'ru' luzá'aru'.

Nácaru' dxi'i ladxi'.

Rusudxinru' xtídza'ru'.

<sup>23</sup> Nácaru' nöxaj ladxi'.

Rinná be'e cuinru'.

Biti' ca' gunná bë'ë Moisés rë'u para cabí gunru' yugu' le caní. <sup>24</sup> Nupa néquiguequi queë' Cristo biti'rö tun ca té'ëni quez, en cabí tun le ta'zësö ladxi' lu yöl-la' bönáchisö quéguequi.

<sup>25</sup> Dios Bö' lá'ayi runnë' yöl-la' na'bán queëru'. Lë' cazë' ral-la' inná bé'enë' rë'u ca naca yúgu'të le runru'.

<sup>26</sup> Biti' ral-la' gun ba zxön cuinru', en cabí utsá'aru' luzá'aru', en cabí uzxé'aru' luzá'aru' turu' ia'turu'.

## 6

### *Ral-la' gácalenru' luzá'aru' turu' ia'turu'*

<sup>1</sup> Na'a, böchi' zána'do', channö ilé'eli' runë' dul-la' tu bönni' böchi'li', nuli' zóalenë' Dios Bö' lá'ayi libí'ili', ral-la' gunli' ga ubí'i ládxi'ë bönni' na', pero run bayudxi gunli' caní lu yöl-la' nöxaj ladxi' queëli', en uyú cuinli' tsate' cu'u tu' xihui' libí'ili' nöza dul-la'. <sup>2</sup> Guli'gácalen luzá'ali' tuli' ia'tuli' tsca naca yuá' nabága'li'. Channö gunli' caní uzóali' didza' le gunná bé'enë' Cristo rë'u.

<sup>3</sup> Channö zoa nu réqui chinadeli' yöl-la' nayëpisë, en biti' bi nadeli' nu na', nu ni na' rizi' ye'e la' cuinsi. <sup>4</sup> Tuhuéaj tuhuéajë' bönni' ral-la' uchi'a usöröë' que le runë'. Ní'irö channö urúajë' dxi'a, huáca gun ba zxön cuinë' ni'a que le chinunë', en biti' gun bayudxi uyúë' ca núngaca ia'zíca'rö bönachi channö ba benrë' dxi'a o cabí. <sup>5</sup> Tuhuéaj tuhuéajë' bönni' ral-la' gu'ë le nusubáguë'ë Dios lë'.

<sup>6</sup> Channö zoa nu rusedi libí'ili' ca naca le rinnë dxi'a, ral-la' unödjali' nu na' rusedi libí'ili' lati' que yúgu'të le do' dë queëli'.

<sup>7</sup> Biti' si' ye'e cuinli' tu' cuntu nu gaca si' ye'e Dios. Ulápali' tsca naca le rázali'. <sup>8</sup> Channö le rázali' naca yugu' le runli' ca rizësö ládxi'li' lu yöl-la' bönáchisö queéli', le ulápali' gaca yöl-la' guti. Channö le rázali' naca yugu' le runli' ca raza ládxi'ë Dios Bö' Lá'ayi, ulápali' le gunnë' Dios Bö' lá'ayi queéli', le naca yöl-la' na'bán idú. <sup>9</sup> Caní naca, biti' ral-la' huöa ládxi'ru' gunru' le naca dxi'a, tu' channö cabí huöa ládxi'ru', idxín dza uláparu'. <sup>10</sup> Que lë ni na', bátati'tës gata' queëru' lataj, ral-la' gunru' le naca dxi'a quégaca yúgu'të bönachi, en le naca lo, ral-la' gunru' caní quégaca böchi' zanru' ta'yija ladxi' Cristo.

*Le buzúajë' Pablo lu guichi ga ruúdx*

<sup>11</sup> Buli'yú cate' bach didza' ni ruzúaja' lu guichi len na' cuina'. <sup>12</sup> Nupa na' t'ëni ilún ga irugu lu xpéla'li' ca rinná bë' xibá queë' Moisés, túngaca caní para ulu'rúaj dxi'a lógaca bönachi, en cabí bi ilún quéguequi tu' túngaca libán ca gútië' Cristo lë'e yaga cruz. <sup>13</sup> Yugu' bönni' na' ta'zí' lu ná'agaquië' le narugu lu xpéla'gaquië' ca rinná bë' xibá queë' Moisés, biti' tu'zóë' didza' idutë ca rnna xibá na'. Të'ënë' ilunë' ga irugu lu xpéla'li' para gaca ilún ba zxon cúngaquië' tu' ta'nná bé'enë' libí'ili' para irugu lu xpéla'li' caní. <sup>14</sup> Ca naca quia' neda', cú'usa' yöl-la' ba le benë' Xanru' Jesucristo cate' gútië' lë'e yaga cruz. Tu' nözi le benë' Cristo lë'e yaga cruz, yugu' le dë yödzölió ni naca quia' ca tu le chinati, biti' ru'í' ládxa'a le, ate' neda' naca' quégaca bönachi yödzölió ni ca tu bönni' nati, biti' tu'í' ladxi' neda'. <sup>15</sup> Channö nácaru' tuz len Jesucristo, biti' bi run channö narugu lu xpéla'ru' ca rinná bë' xibá na' o channö cabí narugu lu xpéla'ru' caní. Le run bayudxi naca gácaru' bönachi cubi niu' lë'e ládxi'do'oru'. <sup>16</sup> Yúgu'të bönni' na' tunë' ca rinná bë' xibá runa' ni, en yúgu'të bönni' na' néquiguequinë' queë' Dios, rinábida'-në' Dios gunë' ga soa dxi ládxi'do'gaquië', en huéchi' ládxi'ë légaquië'.

<sup>17</sup> Na'a zë lo, cuntu nu bönni' ral-la' utsë'ë neda', tu' nácgaca bë' butsóa zóagaca lu xpéla'a naca' huen dxin queë' Xanru' Jesús.

<sup>18</sup> Na'a, böchi' zána'do', rinábida'-në' Xanru' Jesucristo uzá ládxi'ë queéli' yúgu'tëli'. Ca' caz.

## DIDZA' GUSÖL-LË'Ë PABLO YÖDZÖ ÉFESO

*Pablo rugapë' Dios bönachi queë' Cristo nacua' Éfeso*

<sup>1</sup> Neda', Pablo, naca' gubáz nasöl-lë'ë Jesucristo tu' gú'uni quézinë' Dios gaca' caní. Rugapa' Dios libí'ili', zóali' Éfeso. Néquili' quez queë' Dios, en réajlë'ëli' Jesucristo. <sup>2</sup> Rinábida-në' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

*Le naca queë' Dios Bö' Lá'ayi rata' queëru'*

<sup>3</sup> ¡Ral-la' cú'uru'-në' yöl-la' ba Dios, Xuzë' Xanru' Jesucristo! Tu' nácaru' tuz len Cristo, Dios chibuzá' ládxë'ë queëru' yúgu'të le naca dxi'a que yehua' yubá, le runë' Dios Bö' Lá'ayi ga rata' queëru'. <sup>4</sup> Zí'atëlö ca benë' Dios yödzölió ni, gurö cazë' rë'u para guéquiru' quez queë' tsözxön len Cristo, en gácaru' bönachi lá'ayi queë', en gácaru' idú dxi'a lahuë' Lë'. <sup>5</sup> Dios bucözë' zí'atëlö si' lu në'ë rë'u ca zxi'ini cazë' tsözxön len Jesucristo, tu' guyaza ládxë'ë gaca caní, en tu' naca le gú'uni quézinë' gunë'. <sup>6</sup> ¡Ral-la' cú'utica'siru'-në' Dios yöl-la' ba ni'a que le buzá' ládxë'ë queëru', yugu' le bénnasë' queëru' tu' nácaru' tuz len Zxi'inë', Nu na' nadxí'inë'! <sup>7</sup> ¡Cristo böá'uë' rë'u cate' ni' gútië' uláz queëru' para gaca uniti lahuë' Dios rë'u ca naca dul-la' nabága'ru'! ¡Zxöntërö naca le buzá' ládxë'ë Dios queëru', <sup>8</sup> lë na' rúnnadë'ë Lë' queëru'! ¡Lu yöl-la' rácada' queë', en lu yöl-la' réajni'i queë' <sup>9</sup> benë' Dios le bucözë' queëru', ate' buluí'inë' rë'u lë na' bigachi', le buzóa cazë' zí'atëlö usudxinë' lu në'ë Cristo! <sup>10</sup> Lë na' buzóa cazë' Dios usudxinë' cate' izá'a dza, naca gunë' ga ilaca tuz, en ila'cuá' lu në'ë Cristo yúgu'të le dë, le nacua' yehua' yubá, en le nacua' yödzölió ni.

<sup>11</sup> Tu' nácaru' tuz len Cristo, Dios gurö cazë' rë'u zí'atëlö para guequi queëru' le nequi queë' Xúziru' Dios, lë na' bucözë' queëru' ca naca le gú'uni quézinë' Dios, Nu run yúgu'të ca rë'ëni quézinë' Lë'. <sup>12</sup> Caní benë' Dios para cú'uru'-në' yöl-la' ba ca naca yöl-la' zxön queë', rë'u ni ruzxöni ládxi'ru'-në' Cristo zí'atëlö ca ia'zíca'rö bönachi. <sup>13</sup> Lësca' caní guca queëli'. Cate' biyönili' didza' idútë li, didza' dxi'a ca gaca uláru', guyéajlë'ëli' Cristo, ate' Dios buzóë' queëli' le naca bë' nácali' queë', tu' guchízië' icja ládxi'do'oli' Dios Bö' Lá'ayi, Nu na' guzxi' lu në'ë Dios isöl-lë'ë queëru'. <sup>14</sup> Tu' zóalenë' Dios Bö' Lá'ayi rë'u, naca löza guequi queëru' le nequi queë' Xúziru' Dios cate' údxi huóá'uë' rë'u, rë'u na' chinéquiru' queë'. Caní naca para gaca yöl-la' ba que yöl-la' zxön queë'.

*Pablo rinábinë' Dios gunnë' queëru' yöl-la' réajni'i*

<sup>15</sup> Que lë ni na', cate' biyönda' ca réajlë'ëli'-në' Xanru' Jesús, en ca nadxí'ili' yúgu'të bönachi queë' Dios, ga ridxintë na'a dza <sup>16</sup> bití' ca' rusana' rea'-në' Dios: "Xclenu'", ca naca queëli'. Røjneda' libí'ili' cate' rulidza'-në' Dios. <sup>17</sup> Rinábida'-në' Dios queë' Xanru' Jesucristo, Dios na' náquië' Xúziru' nayëpisëtëre', rinábida'-në' isöl-lë'ë Dios Bö' Lá'ayi queëli', Bö' na' runna yöl-la' réajni'i queëru', en ruluí'i rë'u ca naca cazë' Dios, para gaca idú ca núnbë'ëru'-në'. <sup>18</sup> Rinábida'-në' Dios uzéajni'inë' libí'ili' lu icja láchxi'do'oli' para gaca inözili' ca naca le runru' löza, lë na' bulidzë' libí'ili' para uzí'ili' xibé, en para inözili' ca naca yöl-la' tsahui' que yehua' yubá, le guequi quégaca nupa néquiguequi queë' Dios, <sup>19</sup> enca' para inözili' cate' zxön naca yöl-la' huáca queë', le rácalen rë'u ni réajlë'ëru' Lë'. Yöl-la' huáca zxön ni naca la' lëbisö na' bulu'e lahui Dios <sup>20</sup> cate' ni' busubanë' Cristo lu yöl-la' guti, en benë' ga gurö'ë cuita lë'ë Lë cazë' ga nayëpisëtëre' ni' yehua' yubá. <sup>21</sup> Rinná bé'enë' nupa ni' ta'nná bë', en nupa ni' dë lu në'eguequi, en nupa ni' nadéli'gaca yöl-la' huáca, en nupa ni' nácagaca xan. Cristo nayëpisëtëre' ca yúgu'të nupa nadéli'gaca yöl-la' unná bë' yödzölió ni, en lu yödzölió si' za'. <sup>22</sup> Dios budödë' lu në'ë Cristo yúgu'të le dë para inná bé'enë' le, en buzöë' Lë' quégaca bönachi queë' para gáquië' Xanru' lu yúgu'të le nequi queëru'. <sup>23</sup> Yugu' bönachi queë' Cristo nácagaca ca idútë le naca cazë', ate' raquië' Lë' idú lu le naca cazë' na'. Run cazë' Lë' ga raca idú yúgu'të le dë.

## 2

*Nuláru' tu' nadxí'inë' Dios rë'u*

<sup>1</sup> Dios chibennë' yöl-la' na'bán idú queëli', sal-la' gúcali' zí'atëlö ca bönni' nátigaca tu' nözi dul-la' nabága'li', en ni'a que dö' biá'ali'. <sup>2</sup> Dza ni' benli' lëbisö ca tun bönachi bití' nácagaca tsahui' nacuá' yödzölió ni, en benli' ca gú'uni tu' xihui', nu rinná bë' lu bö'ös, en rugún dxin nupa bití' túngaca ca rnna xtídzë'ë Dios. <sup>3</sup> Lësca' caní gúcaru' yúgu'tëru' rë'u. Benru' ca guzësö láchxi'ru', en ca guyaza láchxi'ru' lu yöl-la' bönáchisö queëru'. Que lë ni na' gubága'ru' dul-la' lahuë' Dios le nun ga gunë' rë'u xíguia' ca gunë' quéguequi ia' zíca rö bönachi. <sup>4-5</sup> Ní'irö cate' ni' nácaru' ca bönni' nátigaca tu' nözi dul-la' gubága'ru', Dios busubanë' rë'u lu yöl-la' guti tsözxön len Cristo tu' buéchi' láchxë'ë rë'u, en bidxí'ide'enë' rë'u. Nuláli' tu' zoa le buzá' láchxë'ë Dios queëli'. <sup>6</sup> Dios busubanë' rë'u tsözxön len Cristo para gunë' ga cõ'öru' tsözxön len Lë' ga ni' rinná bë'ë yehua' yubá. <sup>7</sup> Caní benë' Dios, en buluí'inë' bönachi si' zá'gaca ca naca yöl-la' tsahui' que le buzá' láchxë'ë queëru', tu' budödë'

Jesucristo ni'a queëru', le naca bē' ca nadxí'ide'enē' rē'u. <sup>8</sup> Nuláli' tu' zoa le buzá' ládxe'ē Dios queëli' tu' réajlē'ëli' Cristo. Busölē' libí'ili', calēga tu' nacua' le naca dxi'a benli' libí'ili', pero tu' naca le runsē' Dios. <sup>9</sup> Cuntu nu gaca gun ba zxön cuini tu' nulá, tu' cabí nulá nu na' tu' nacua' le naca dxi'a nun nu na'. <sup>10</sup> Le nácaru' naca le nun cazē' Dios. Tu' nácaru' tuz len Jesucristo, bucu'ē rē'u para gunru' le nácacaga dxi'a, le bucözē' zí'atëlō gunru'.

*Rō'ō dxi icja ládxi'do'oru' lahuē' Dios ni'a que le benē' Cristo*

<sup>11</sup> Gulí'tsöjné ca gúcali' zí'atëlō. Gúcali' bönachi izá'a, en que lē ni na' yugu' bönni' judío, bönni' na' ta'chúguiē' lu xipēla'gaquiē' le naca bē' dá'gaquiē' Dios, en nazi' lāgaquiē' bönni' narugu lu xipēla'gaquiē', ta'nnē' nácali' libí'ili' bönni' biti' narugu lu xipēla'gaquiē'. <sup>12</sup> Dza ni' nubíga'li' ga zoē' Cristo. Gúcali' bönni' zí'tu' lógaca bönachi Israel, en biti' buzí'ili' xibé didza' benē' tsutsu Dios, en guzxi' lu nē'ē bi gata' quégaca bönachi queē'. Guzóali' yōdzölió ni, biti' zoa le runli' löza, en biti' núnbē'ënili'-nē' Dios. <sup>13</sup> ¡Na'a, nácali' tuz len Jesucristo! ¡Zí'atëlō nubíga'li' libí'ili' zí'tu' ga zoē' Dios, pero na'a nudxíguē'ē Dios libí'ili' gála'sō tu' gútiē' Cristo uláz queëru'! <sup>14</sup> Lē cazē' Cristo runē' ga rō'ō dxi icja ládxi'do'oru' lahuē' Dios. Lē benē' ga yugu' bönni' judío, en yugu' bönni' zí'tu' bulu'huóaqiē' tuz bönachi, en busúluē' yöl-la' rilé le guléaj légaquiē' choplō ca tu zō'ō zxön. <sup>15</sup> Lē ni benē' Cristo cate' gútiē' uláz queëru', en gudúē' yugu' xibá, en yugu' le rinná bē' nazúajgaca lu xibá quégaca bönachi judío, ate' chopá cō' bönachi na', bunē' tuz bönachi cubi, nupa nácacaga tuz len Lē cazē'. Caní benē', en gulequi dxíē' yöl-la' rilé na'. <sup>16</sup> Cate' gútiē' Cristo lē'e yaga cruz, busúluē' yöl-la' rilé na', ate' chopá cō' bönachi na', bunē' légaquiē' ca tuz bönachi, en gulequi dxíē' icja ládxi'do'gaquiē' lahuē' Dios.

<sup>17</sup> Caní guca, bulu'í lahuē' Cristo, en benē' libán que didza' dxi'a ca ribequi dxíē' yúgu'tē bönachi, libí'ili' na' nácali' bönachi izá'a, en zóali' zí'tu' ga zoē' Dios, enca' bönachi judío nacua' gála'sō. <sup>18</sup> Na'a, ni'a que le benē' Cristo, gaca ibíga'ru' lahuē' Xúziru' Dios, tu' zóalenē' Lē cazē' Dios Bö' Lá'ayi rē'u, sal-la' nácaru' bönachi judío o bönachi izá'a. <sup>19</sup> Que lē ni na', libí'ili', bönachi izá'a, bítirō nácali' ca bönachi zí'tu' zóali' tu luyú biti' nequi queëli', pero nabábalenli' bönachi queē' Dios. ¡Chinácali' ca bi'í queē' cazē' Dios! <sup>20</sup> Libí'ili' nácali' ca tu yu'u zoa tsaz. Nácali' ca yugu' guió'j zxóagaca lahui xilibi zō'ō, le bulu'cu'ē yugu' bönni' gubáz queē' Cristo, en yugu' bönni' gulu'ē didza' uláz queē' Dios, ate' Lē cazē' Jesucristo náquiē' ca guió'j lo que xilibi zō'ō na'. <sup>21</sup> Idútē yu'u na' le nácali' libí'í cázali' riyasa lahui xilibi zō'ō na' naca cazē' Cristo, en nacua' tu'lapa yugu'

guióǵ que, para gaca tu yudo' lá'ayi le naca tuz len Xanru'.  
 22 Libí'í cázali' nácali' tuz len Cristo Nu buzóa libí'ili' para gácali'  
 ca tu yu'u ga na' yu'ë Dios, tu' dzáguë' Dios Bö' Lá'ayi libí'ili'.

### 3

*Náquië' Pablo huen libán que didza' dxi'a lógaca bönachi izá'a*

1 Que lë ni na', neda', Pablo, yu'a lidxi guië tu' runa'  
 libán queë' Jesucristo para uzí'ili' xibë', libí'ili', bönachi izá'a.  
 2 Réquida' chinóz quézili' ca benë' Dios, budödë' lu na'a dxin  
 runa' para uzí'ili' xibé le ruzá' ládxë'ë queëru'. 3 Dios bulu'e  
 lahui le bigachi' queë', en buzéajni'inë' neda' ca naca. Ca naca  
 lë ni chibuzúaja' láti'do' queéli' lu guichi. 4 Cate' ulábali' lë  
 ni, gúnbë'ëli' le réajni'ida' ca naca le bigachi' ca naca queë'  
 Cristo. 5 Dza ni'te cuntu nu buzéajni'inë' Dios ca naca le  
 bigachi' na', pero na'a, lu në'ë Dios Bö' Lá'ayi, chibulu'ë lahui  
 Dios ca naca, tu' buluí'inë' yugu' bönni' gubáz lá'ayi queë',  
 en yugu' bönni' tu'ë didza' uláz queë'. 6 Caní rnna lë na'  
 bigachi': "Ni'a que didza' dxi'a ila'deli' bönachi izá'a tsözxön  
 len bönachi judío le nequi queë' Dios, ate' ulu'huóáquië' ca tuz  
 bönachi, en ulu'zi'ë xibé tsözxön len légaquië' le guzxi' lu në'ë  
 Dios unödzejë' quégaquië' tu' dá'gaquië' Jesucristo." 7 Dios buzá'  
 ládxë'ë quia' le bennë' quia'. Lu yöl-la' huáca zxön queë' benë'  
 neda' huen libán que didza' dxi'a queë'. 8 Nacra' cá'asö ca  
 yúgu'të bönachi queë' Dios, pero Lë' buzá' ládxë'ë quia' gaca'  
 huen libán lógaca bönachi izá'a que didza' dxi'a ca naca yöl-la'  
 tsahui' queë' Cristo, le nazáca'da'. 9 Dios budödë' lu na'a guna'  
 ga iléquibe'e yúgu'të bönachi ca naca le buzóa cazë' Dios dza  
 ni'te, lë na' naca tu le bigachi' queë' Dios, Nu ben yúgu'të le  
 rilé'eru'. 10 Caní guca, para iléquibe'e yúgu'të nupa ta'nná bë',  
 en nupa dë lu në'eguequi ni' yehua' yubá, idú ca naca yöl-la'  
 réajni'í queë' Dios cate' ila'lé'e ca náca gaca bönachi queë' Cristo.  
 11 Dios benë' lë ni, busudxinë' lë na' buzóa cazë' dza ni'te, le  
 benë' lu në'ë Xanru' Jesucristo. 12 Tu' nácaru' tuz len Cristo,  
 nazí'iru' lataj ibíga'ru' idú ladxi'ru' lahuë' Dios, tu' réajlë'ëru'  
 Lë'. 13 Que lë ni na' ráta'yua' loli' biti' gaca chopá ládxi'li' tu'  
 nözi le riguí'í rizáca'a neda' para gácalena' libí'ili', le naca tu le  
 uzí'ili' xibé.

*Ca naca yöl-la' nadxi'í queë' Cristo*

14 ¡Que lë ni na', ruzechu zxiba' lahuë' Xuzë' Xanru' Jesu-  
 cristo! 15 Ca lë', nazí'í ca' lágaca yúgu'të bönachi queë', nupa  
 nacuá' yehua' yubá, en nupa nacuá' yödzölió ni. 16 Rinábida'-  
 në' Xúziru' Dios, lu yöl-la' zxön queë', le nazáca'da', gunnë'  
 queéli' yöl-la' huáca queë' Dios Bö' Lá'ayi, en gunë' ga gálali' lu  
 icja ládxi'do'oli'. 17 Rinábida'-në' Cristo soë' icja ládxi'do'oli' tu'  
 réajlë'ëli' Lë'. Rinábida'-në' gunë' ga sóali' tsaz lu yöl-la' nadxi'í



queë', en biti' tséaj bö' icja ládxi'do'oli' ca nadxí'ili'-në', <sup>18</sup> para gaca tséajni'ili' tsözxön len yúgu'të bönachi queë' Cristo ca naca yöl-la' nadxí'i queë', tsca ga ridxín ní'ilö, en ná'alö, en cadxí'ilö, en xitsá'alö. <sup>19</sup> Rinábida'-në' Dios gunë' ga gúnbë'ëli' yöl-la' nadxí'i na', le cabí gaca gúnbë'ëru' idú ca naca, para sóalen libí'ili' idú le naca cazë' Dios.

<sup>20</sup> ¡Na'a, yöl-la' ba Dios, Nu gaca gúntëro ca gaca inábaru' o ca gaca sa' ládxi'ru', ugunë' dxin yöl-la' huáca queë' lu icja ládxi'do'oru'! <sup>21</sup> ¡Gácatica'sö queë' Dios yöl-la' ba lógaca bönachi queë' Cristo, en lahuë' Lë cazë' Jesucristo, na'a dza, en yúgu'të dza zá'gaca! ¡Ca' gaca!

## 4

### *Dios Bö' Lá'ayi nunë' rë'u tuz*

<sup>1</sup> Na'a, neda' ráta'yua' loli', yu'a lidxi guié ni tu' runa' libán queë' Cristo, rinábida' libí'ili' gunli' idú ca ral-la' ilún nupa bulidzë' Dios para ilequi queë', ca na' bulidzë' ca' libí'ili'.

<sup>2</sup> Guli'gaca nõxaj ladxi', en dxi'i ladxi'. Guli'cöz zxön ladxi'. Guli'güi' ladxi' luzá'alí' tuli' ia'tuli' lu yöl-la' nadxí'i queëli'.

<sup>3</sup> Guli'güi' ladxi' gácatica'sili' tuz ca na' chinunë' Dios Bö' Lá'ayi libí'ili', gunli' caní lu yöl-la' riböza tsáhui'do' queëli' le rutsaga libí'ili'.

<sup>4</sup> Tuz naca idútë le naca cazë' Cristo le nadzágaru' rë'u.

Tuzë' náquië' Dios Bö' Lá'ayi dzáguië' rë'u.

Tuz naca le runru' löza, lë na' bulidzë' rë'u Dios para uzí'iru' xibé.

<sup>5</sup> Tuzë' náquië' Xanru'.

Tuz le réajlé'ëru'.

Tuz le bidílaru' nisa.

<sup>6</sup> Tuzë' náquië' Dios Nu naca Xúziru' yúgu'tëru'.

Lë' rinná bé'enë' yúgu'tëru'.

Rugunë' dxin yúgu'tëru'.

Riböza cazë' Lë' lu icja ládxi'do'oru' yúgu'tëru'.

<sup>7</sup> Tu turu' nazí'iru' tu yöl-la' huáca queë' Dios tsca naca le bennë' Cristo que queëru'. <sup>8</sup> Naca caní ca na' nazúaj lu guichi lá'ayi le rnna:

Buëpë' yehua' yubá, guchë'ë zían bönachi gula'dzúngaca.

Gudísië' quégaca bönachi le runödjasë' quégaquië'.

<sup>9</sup> ¿Bizxi rë'ëni inná lë na' rnna: buëpë'? Rusëdi rë'u bötjë' zí'alö, en bidxinë' yödzülió cadxí'ilö ni. <sup>10</sup> Nu na' bötaj naca Bönni' na' buëpë' xitsá'tëro ni' yehua' yubá para budzë'ë yúgu'të len le naca cazë' Lë'. <sup>11</sup> Cristo caz bennë' que queëru' yugu' yöl-la' huáca queë':

Bë' lataj bal-lë' bönni' iláquië' gubáz queë'.

Benë' ga tu'ë didza' uláz queë' Dios ia'bal-lë' bönni'.

Gusöl-lë'ë ia'bal-lë' tsöjégaquië' libán que didza' dxi'a.

Bucu'ë ia'bal-lë' para ilún chi'ë bönachi queë'.

Bucu'ë ia'bal-lë' para ulu'sëdinë' bönachi queë'.

<sup>12</sup> Cristo caz bupë'ë bönachi queë' caní para gaca ilún xichinë', para ilún ga ilaca idú nupa nácgaca ca idútë le naca cazë' Lë'. <sup>13</sup> Caní gaca ga idxintë dza huóácaru' tuz yúgu'tëru' ca réajlë'ëru' Cristo, en ca núnbë'ëru'-në' Zxí'inë' Dios. Gácaru' nál-la, en huóácaru' idú ca náquië' Lë cazë' Cristo. <sup>14</sup> Bítirö gácaru' ca yugu' bí'ido', ca nácgaca nupa na' tu'tsa'të ca túngaca, en nácgaca ca tu le nachë' lu yegu, o ca tu le røjchë' bítitës bö' recja, tu' ta'zí' lu në'eguequi bítitës didza' nu rusëdi léguequi, nu na' rizí' ye'e léguequi len yöl-la' sina' que, en run ga ta'chixi ta'nigui. <sup>15</sup> Na'a, rë'u ni, tu' nadxí'iru' luzá'aru', ral-la' gü'iru' didza' le naca idútë li para gaca huóácaru' idú ca náquië' Cristo, en gácaru' tuz len Lë', Nu naca Xani idú le naca cazë', le nácaru' rë'u. <sup>16</sup> Cristo caz runë' ga rutsaga dxi'a idútë le naca cazë', le nácaru' rë'u, ate' idútë le naca cazë' na' naguela' tsözxön ni'a que lë na' run tuz idútë le naca cazë'. Cate' tu turu' runru' xichinru', rë'u na' dzágaru' le naca cazë', idútë rizxön, en raca idú, ca na' zeaj rácarö idú ca nadxí'iru' luzá'aru'.

*Yöl-la' na'bán cubi náparu' tu' nácaru' tuz len Cristo*

<sup>17</sup> Uláz queë' Xanru' rea' libí'ili' lë ni, en rigu'a le lu ná'ali', rnnía': Bítirö gunli' ca tun nupa bití' núnbë'gaquië' Dios, nupa na' tun ca ta'za'sö ládxi'guequi, <sup>18</sup> en nachul-la nanítigaca icja ládxi'do'guequi. Tu' cabí nözguequinë' le nácatë, en nazídigaquië', bití' nazí'gaquië' yöl-la' na'bán na' runnë' Dios queëru'. <sup>19</sup> Bití' ca' tu'tuí'inë'. Nudödi cúngaquië' lu le ruá' dö'. Idú ládxi'gaquië' tunë' yúgu'të le cabí naca tsahui'. <sup>20</sup> Nupa ni' bulu'sedi libí'ili' ca naca queë' Cristo, bití' ca' bulu'sedi libí'ili' gunli' ca tun bönachi caní. <sup>21</sup> Le naca idútë li biyönili' ca naca queë' Cristo, en le nácali' queë' tu'sëdinë' libí'ili' le naca idútë lí na' zóalen Jesús. <sup>22</sup> Guli'nná be'e yöl-la' bönáchisö queëli' le gúcali' zí'alö, lë na' riniti ni'a que yöl-la' rizë ladxi' queëli' le ruá' dö' le guzxi' ye'e libí'ili'. <sup>23</sup> Ral-la' huóácali' cubi lu icja ládxi'do'oli', en lu bö' naca cázali'. <sup>24</sup> Ral-la' sí'ili' yöl-la' bönachi cubi le nunë' Dios ca naca cazë' Lë', le ruluí'i cuini ni'a que le naca dxi'a, en le naca tsahui' runli', en run ga gaca gunli' caní.

<sup>25</sup> Que lë ni na', bítirö si' yë'ëli'. Yúgu'tëru' ral-la' gü'ilenru' luzá'aru' didza' le nácatë, tu' dzágaru' yúgu'tëru' idútë le naca cazë' Cristo.

<sup>26</sup> Channö hualéli', bití' ral-la' gunli' dul-la'. Bití' ileli' xidzé. <sup>27</sup> Bití' bi gunli' le gü'i lataj tu' xihui' ucúl-la libí'ili'.

<sup>28</sup> Nu bönni' ribanë' ral-la' usanë' yöl-la' gubán queë', en tsázië' huen dxin para gata' queë' bi unödzejë' quegaca nupa ta'yadzaj.

<sup>29</sup> Biti' gü'ili' didza' xihui', pero guli'güi' didza' dxi'a, yugu' le ilácalen nu yöni, en ilún ga gaca dxi'a que nu na'. <sup>30</sup> Biti' usuhu'ini' Dios Bö' Lá'ayi, tu' naca bē' néquili' queē' Dios tu' zóalenē' Dios Bö' Lá'ayi libí'ili', ate' idxín dza údxi usölē' libí'ili' lu dul-la'.

<sup>31</sup> Guli'cúa ladaj libí'ili' yöl-la' ruzxē'e, en yöl-la' ridzá'a, en yöl-la' rilé, en yöl-la' ridil-la didza', en yöl-la' rutsaga yudxi, en yúgu'tē yöl-la' biti' rilé'e luzá'ali' dxi'a.

<sup>32</sup> Ral-la' gácali' dxi'i ladxi', en huéchi' ládxi'li' luzá'ali' tuli' ia'tuli', en uniti loli' luzá'ali' tuli' ia'tuli', ca na' benē' Dios, buniti lahuē' libí'ili' tu' nácali' tuz len Cristo.

## 5

*Ca ral-la' ilaca nupa nácaqaca ca bi'i queē cazē' Dios*

<sup>1</sup> Tu' nácali' ca bi'i queē cazē' Dios, ate' nadxi'inē' libí'ili', guli'güi' ladxi' gácali' ca náquiē' Lē'. <sup>2</sup> Ca naca yúgu'tē le runli': Ral-la' idxí'ili' luzá'ali' ca na' benē' Cristo. Bidxi'inē' rē'u, en budōdi cuinē' lu yöl-la' guti uláz queēru'. Ben cuinē' ca böa' bēdxido' rútiru'-ba' lahuē' Dios tu' nözi dul-la' nabága'ru'.

Gúquiē' ca' ca tu le rilá' zxixi le raza ládxi'ē Dios le rigú'uru' lu bucugu lá'ayi queē'.

<sup>3</sup> Tu' nácali' queē' Dios, biti' ca' gunli' le ruá' dö', en biti' gunli' le cabí ral-la' gunli', en biti' uhuídi'li'. Ní'irō cuntu nu gaca bi innē queēli'.

<sup>4</sup> Biti' gü'ili' didza' xihui', o didza' canöz, o didza' cá'asö, yugu' le cabí ral-la' gunli', pero nácarö dxi'a guiéli'-nē' Dios: "Xclenu'."

<sup>5</sup> Chinöz quézili' nitué' bönni' runē' le ruá' dö' biti' ca' tsáziē' ga rinná bē'ē Cristo tsözxön len Dios, o nu bönni' runē' le cabí ral-la' gunē', o nu bönni' ruhuídi'nē'. Nu na' ruhuídi' naca ca nu reaj ladxi' budó' guiöj budó' yaga. <sup>6</sup> Biti' gü'ili' lataj nu si' ye'e libí'ili' len didza' biti' nácatē. Tu' nözi dul-la' caní Dios gunē' xíguia' nupa biti' túngaca ca rnna xtídzē'ē. <sup>7</sup> Biti' ca' gunli' tuz bönachi caní.

<sup>8</sup> Zí'atēlō guzóali' ga naca chul-la que dul-la', pero na'a zóali' lu bení, tu' nácali' tuz len Xanru'. Guli'gaca ca bönachi ta'dá lu bení, <sup>9</sup> tu' run bení na' ga gácaru' dxi'i ladxi', en ga gü'iru' didza' le naca idútē li, en ga gácaru' tsahui'. <sup>10</sup> Guli'güi' ladxi' inözili' le raza ládxi'ē Xanru'. <sup>11</sup> Biti' gútsa'li' nupa tun le ruá'

dö, lë na' tunë' ga naca chul-la que dul-la', pero buli'béaj ga liná' yugu' lë na' tunë'. <sup>12</sup> Utu'iru' güi'iru' didza' ca naca le tun bönachi na' bagáchi'sö. <sup>13</sup> Cate' bi ubéajru' ga liná', gaca bë' yúgu'të tsca nácagaca, tu' gun le naca beni' ga gaca bë' yúgu'të. <sup>14</sup> Que lë ni na' nazúaj lu guichi lë na' rna:

Bubán, li' na' rasiu'.

Guyasa ladaj nupa nátigaca.

Cristo uzení'ë quiu'.

<sup>15</sup> Buli'yú cuinli' ca runli'. Biti' gácali' nupa bití' ta'yéajni'ini, pero guli'gaca bönachi ta'yéajni'i. <sup>16</sup> Guli'sí' xibé lataj dë queéli' tu' chizóaru' dza bití' raca dxi'a queëru'. <sup>17</sup> Biti' gácali' bönni' bití' bi nözguequinë'. Guli'güi' ladxi' tséajni'ili' le rë'enë' Xanru' gunli'.

<sup>18</sup> Biti' súdxili', tu' gun yöl-la' rizudxi ga nítili' tsaz.

Guli'güi'ida' lataj inná bé'enë' Dios Bö' Lá'ayi libí'ili'.

<sup>19</sup> Guli'güi'ilen luzá'ali' didza' tuli' ia'tuli',

ugunli' dxin yugu' le rul-la légaca salmo,

en yugu' le rul-la yöl-la' ba Dios,

en yugu' le rul-la nagu'ë Dios Bö' Lá'ayi icja ládxi'do'oru'.

Idú ládxi'ru' ral-la' gúl-laru' queë',

le cú'uru'-në' Dios yöl-la' ba.

<sup>20</sup> Guli'gún dxin Lë' Xanru' Jesucristo,

en guli'guíetica'së' Xúziru' Dios: "Xclenu'" ca naca yúgu'të.

*Ca ral-la' gunru' quegaca di'a dza queëru'*

<sup>21</sup> Guli'gún ca rna xtídza' luzá'ali' tuli' ia'tuli' para caní gunli'-në' Dios zxön.

<sup>22</sup> Libí'ili', yugu' nigula, guli'gún ca rna xtídza'gaquië' bönni' que queéli', ca na' ral-la' gunli' ca rna xtídzë'ë Xanru'.

<sup>23</sup> Caní ral-la' gunli', tu' rinná bé'enë' bönni' nigula queë' ca na' runë' Cristo, rinná bé'enë' bönachi queë'. Cristo náquië' ca' Nu rusólá bönachi queë', nupa na' dzágagaca le naca cazë' Lë'. <sup>24</sup> Ca na' tun bönachi queë' Cristo ca rna xtídzë'ë, lësca' caní ral-la' ilunnu nigula ca rna xtídza'gaquië' bönni' que queégacanu ca naca yúgu'të le raca.

<sup>25</sup> Libí'ili', yugu' bönni', ral-la' idxí'ili'-nu nigula que queéli' ca na' Cristo nadxí'inë' bönachi queë', en budödi cuinë', gútië' uláz quégaquië'. <sup>26</sup> Gútië' Cristo para bubéajë' quez queë' Dios bönachi queë' na', ate' nayárigaca tu lu nisa le naca xtídzë'ë.

<sup>27</sup> Gútië' uláz quégaquië' para gaca usudxinë' légaquië' lahuë' Dios, nácagaquië' ca tu lari' lachi, bití' nuá' bösaj le në'aj, en bití' naxú'una, en bití' zoa nitú le run ditaj le, pero runë' ga ilácagaquië' idú dxi'a, cuntú nu gaca bi innë' quégaquië'. <sup>28</sup> Ral-la' idxí'ili'-nu nigula que queéli' ca na' nadxí'i cuinli'. Nu bönni' nadxí'inë'-nu nigula queë', nadxí'i cuinë'. <sup>29</sup> Cuntú nu bönni' runi zi' cuinë', pero rugahuë', en run chí'i cuinë', ca

runë' ca' Cristo, ca rúnlenë' bönachi queë', <sup>30</sup> nupa dzágagaca idútë le naca cazë'.

¡Rë'u ni dzágaru' le naca cazë' Lë'!

¡Néquiniru' xipëlä'ë, en dxita queë'!

<sup>31</sup> Lësca' caní nazúaj lu guichi lá'ayi le rnna: "Que lë ni na' tu bönni' ral-la' ucá'anë' xuz xinë'ë para tsöjsóalenë'-nu nigula queë', ate' irópatë' ulu'huöáquië' tuz." <sup>32</sup> Lë na' nazúaj lu guichi ni rulu'i lahui tu le naca idútë li, ate' neda' réquida' ru'i didza' ca' ca naca queë' Cristo, en quégaca bönachi queë' na'. <sup>33</sup> Lësca' ru'i didza' ca naca queë'li'. Yúgu'tëli' libí'ili', bönni', ral-la' idxí'ili'-nu nigula que queë'li' ca na' nadxí' cuinli', ate' yugu' nigula ral-la' ilunnu bal bönni' que queë'gacanu.

## 6

<sup>1</sup> Libí'ili', yugu' bí'ido', ral-la' gunli' ca rnna xtídza'gaquië' xuz xiná'ali' para caní gunli' ca rnna xtídzë'ë Xanru'. Ral-la' gunli' le naca tsahui'. <sup>2</sup> Xibá zí'alö na' benë' Dios le nachë' tu le guzxí' lu në'ë gunë', naca lë na' rnna: "Ben bal xuz xinó'o, <sup>3</sup> ate' gaca dxi'a quiu', ate' xidzé su' ibanu' yödzölió ni."

<sup>4</sup> Libí'ili', yugu' xuz, biti' gun leli' zxí'inili', pero buli'xön légacabi', en guli'sína' légacabi', en buli'sëdi légacabi' ca raza ládxë'ë Xanru'.

<sup>5</sup> Libí'ili', núlöli' nácali' bönni' nadó'ogaca, guli'gún ca rnna xtídza'gaquië' xanli' luyú ni idú ládxi'li', gunli' légaquië' bal lu yöl-la' radxi queë'li', en gunli' xichíngaquië' ca ral-la' gunli' xichinë' Cristo. <sup>6</sup> Guli'gún xichíngaquië', calégasö cate' ni' tu'yúë' libí'ili' para urúajli' dxi'a lógaquië', pero idú ládxi'li' guli'gún xichíngaquië' ca raza ládxë'ë Dios, ca na' ral-la' gunli' xichinë' Cristo. <sup>7</sup> Idú ládxi'li' guli'gún xichíngaquië', ate' caní gaca, gunli' xichinë' Xanru', en calégasö xichíngaca bönachi. <sup>8</sup> Nöz quézili' ca gunë' Xanru'. Ubi'ë que queë'ru' tsa naca le dxi'a runru' sal-la' nadzanru', o sal-la' nácaru' bönni' nadó'ogaquië'.

<sup>9</sup> Libí'ili', nacuá' queë'li' bönni' nadó'ogaca, guli'gún dxi'a caní quégaca huen dxin queë'li' na', en biti' uzéli' ba nadx légaquië'. Guli'tsöjné ca naca queë'li', yú'uli' lu në'ë Xanru' zoë' yehua' yubá la' ca nácatë quégaquië', ate' Lë' biti' rutsë'ë ca runë' que que bönachi.

### *Dios runnë' queë'ru' le tun chi'i rë'u*

<sup>10</sup> Na'a, böchi' luzá'ado', guli'gaca tsutsu tu' nácali' tuz len Xanru', en zóalen libí'ili' yöl-la' huáca zxön queë'. <sup>11</sup> Guli'gún chi'i cuinli', ugunli' dxin yugu' le runnë' Dios queë'ru', le tun chi'i rë'u, para gaca sóali' tsutsu cate' guë'ëni si' bë' tu' xihui' libí'ili'. <sup>12</sup> Biti' ridí'l-lalenru' bönachi néquiguequini bëla', en dxita, pero ridí'l-lalenru' yöl-la' unná bë' quégaca bö' xihui' ta'dá

lu bö'ös, en dzágagaca nupa ta'nná bē', en nupa nadéli'gaca yöl-la' unná bē', en nupa dē lu ná'agaca, nupa nacua' yödzölió ni ga naca chul-la que dul-la'. <sup>13</sup> Que lē ni na':

Guli'sí' yúgu'tē le runnē' queēru' Dios le tun chi'i rē'u, para cate' idxín queēru' dza ni' ilaca le nácagaca xihui', gaca guá' ilenli', en cate' údxi gunli' caní, ugá'anali' tsutsu.

<sup>14</sup> Guli'sóa tsutsu.

Guli'sí' le naca idútē li,

le gaca queéli' ca tu guídi guga' lē'ēli'.

Guli'gaca tsahui' tu' gun chi'i libí'ili' le naca tsahui' ca run tu lari' yödx run chi'i luchu'ē bönni' rejē' gudil-la.

<sup>15</sup> Guli'sóa sina' para gunli' libán que didza' dxi'a

le ribequi dxi icja ládxi'do'oru' lahuē' Dios,

ca na' ruzóa cuiné' sina',

en ridē'ē xiráchuē' tu bönni' rejē' gudil-la.

<sup>16</sup> Le naca lo, yöl-la' réajlē' queéli' Cristo

gaca queéli' ca tu le naca tsutsu uzēli' loli',

para cabí gál-la' yugu' le usán tu' xihui' libí'ili',

le nácagaca ca yaga túchi'do' zoa guí' láhuilöguequi.

<sup>17</sup> Yöl-la' rusölá gaca queéli' ca tu lu'u guié le gun chi'i ícjali'.

Xtídzē'ē Dios gaca queéli' ca tu guié tuchi'

le runnē' Dios Bö' Lá'ayi queēru',

para utíl-lalenru' le naca xihui'.

<sup>18</sup> Guli'gún yúgu'tē lē ni,

en buli'lidzē' Dios inábili'-nē' gácalenē' libí'ili'.

Buli'lidzatica'sē' Dios zóalenē' Dios Bö' Lá'ayi libí'ili'.

Para gunli' caní ral-la' usubán ládxi'li' en cabí huöaj ládxi'li',

inábili'-nē' Dios gácalenē' nupa néquiquequi queē'.

<sup>19</sup> Buli'lidzē' Dios, inábili'-nē' gácalenē' ca' neda', en gunnē'

quia' didza' cate' ral-la' gu'a didza', en gunē' ga gaca' rugu

ládxi' cate' guna' libán para uzéajni'ida' bönachi ca naca le

bigachi' que didza' dxi'a. <sup>20</sup> Dios budödē' lu na'a didza' dxi'a

na' para guna' libán que, ate' tu' bena' caní yu'a lidxi gué ni.

Buli'lidzē' Dios channö, inábili'-nē' gunē' ga gaca' rugu ládxi'

para guna' libán que didza' dxi'a ca ral-la' guna'.

### *Ruúdx didza' bē'ē Pablo*

<sup>21</sup> Tíquico, böchi'ru' na' nadxí'iru'-nē', en runē' xichinē'

Xanru' idú ládxe'ē, quíxjöi'inē' libí'ili' idú ca raca quia', en

ca runa' neda' ni. <sup>22</sup> Que lē ni na', isöl-la'a-nē' queéli', ate'

ulu'inē' libí'ili' ca raca queētu', ate' caní utipē' ládxi'li'.

<sup>23</sup> Rinábida'-nē' Xúziru' Dios, enca' Xanru' Jesucristo gunē' ga

soa dxi icja ládxi'do'oli', en gata' queéli' yöl-la' nadxí'ili le dzaga

yöl-la' réajlē' queéli' Cristo, yúgu'tēli' na' néquili' queē'. <sup>24</sup> Le

ruzá' láchë'ë Dios queëru' gaca queëli', yúgu'tëli' na' nadxí'ili'-  
në' Xanru' Jesucristo, naca idú yöl-la' nadxí'i queëli' Lë'. ¡Ca'  
gaca!

## DIDZA' GUSÖL-LË'Ë PABLO YÖDZÖ FILIPOS

*Pablo rugapë' Dios bönachi queë' Cristo nacua' Filipos*

<sup>1</sup> Neda', Pablo, enca' bi'i Timoteo, nactu' huen dxin queë' Jesucristo. Rugapa' Dios libí'ili', réajlë'ëli' Cristo, en libí'ili', dë lu ná'ali' xichinë' Cristo, en libí'ili', run chí'ili' bönachi queë' Cristo. Zóali' Filipos, en néquili' queë' Dios, en nácali' tuz len Jesucristo. <sup>2</sup> Rinábida'-në' Xúziru' Dios, enca' Xanru' Jesucristo gunnë' queëli' le ruzá' ládxë'ë queëru', en gunë' ga soa dxi icja ládxido'oli'.

*Pablo rinábinë' Dios bi gunë' quegaca bönachi ta'yéajlë' Cristo*

<sup>3</sup> Rea'-në' Dios: "Xclenu'", cate' rizá' ládxa'a queëli'. <sup>4</sup> Cate' rulidza'-në' Dios, en rinábida'-në' gácalenë' libí'ili', rudzeja ládxa'a <sup>5</sup> tu' røjneda' ca bënlenli' neda' tsözxön dxin que didza' dxi'a. Gusí loli' runli' dxin na' dza ni' si' biyönili', en runli' le ga ridxintë na'a dza. <sup>6</sup> Dios gusí lahuë' runë' tu le naca dxi'a lu icja ládxido'oli'. Ruzxöni ládxa'a Lë' gúntica'së' caní ga idxintë dza huödë' Jesucristo. <sup>7</sup> Ca na' rizá' ládxa'a queëli' naca ca ral-la' guna' tu' nadxí'ide'eda' libí'ili'. Yúgu'tëli' ruzí'ili' xibë tsözxön len neda' le ruzá' ládxë'ë Dios queëru', tsanni ni yu'a lidxi guíë, en lësca' caní benli' cate' ni' bë'a didza', cate' na' bena' libán que didza' dxi'a le bena' ga bidxín queëli' tsaz. <sup>8</sup> Nözínë' Dios ca nadxí'ide'eda' libí'ili'. Naca ca na' nadxí'ide'enë' Lë cazë' Jesucristo rë'u. <sup>9</sup> Rinábida'-në' Dios gunë' ga idxí'iröli' luzá'ali', en gáta'da' queëli' yöl-la' rácada', en yöl-la' réajni'i idú <sup>10</sup> para gaca cöli' le nácatëro dxi'a. Channö gaca caní queëli', gácali' idú dxi'a, ate' cuntu nu gaca bi innë queëli' dza ni' huödë' Cristo. <sup>11</sup> Le nácali' naca bë' le naca dxi'a runë' Cristo lu icja ládxido'oli' para ilá' lahui yöl-la' zxon queë' Dios, en gaca queë' yöl-la' ba.

*Zóaru' nabanru' para gácaru' ca náquië' Cristo*

<sup>12</sup> Böchi' luzá'ado', rë'ënda' inözili' lë ni: Yúgu'të le guca quia' gulácalen neda' para guzxéqui'röda' bena' libán que didza' dxi'a. <sup>13</sup> Caní guca, yúgu'të ni'a náagaquië' bönni' yúlahui', en ia'zíca'rë' bönni' ni nözguequinë' yu'a lidxi guíë ni tu' runa' xichinë' Cristo. <sup>14</sup> Tu' yu'a neda' lidxi guíë ni ben ga látu'biqui' yúgu'të böchi'ru' nácacarë' rugu ladxi', ate' tu'zxöni ládxigaquië' Xanru', en bíti'rö tádxinë' tunë' libán que txdzë'ë Dios.

<sup>15</sup> Le nácatë bal-lë' tunë' libán queë' Cristo tu' tu'zxé'enë' neda', en ta'dil-lë', pero ia'bal-lë' tunë' libán queë' idú ládxigaquië'. <sup>16</sup> Yugu' bönni' tu'zxé'enë' na' tunë' libán



queë' Cristo lu yöl-la' run ba zxön cuíngaquië', en calëga idú ládxi'gaquië'. Të'ennë' ulu'saca' zí'ë neda' tsanni ni yu'a lidxi guíë. <sup>17</sup> Yugu' bönni' idú ládxi'gaquië' na', lu yöl-la' nadxí'i quegaquië' tunë' libán queë', tu' nözguequinë' Dios caz budödë' lu na'a dxin runa', runa' libán que didza' dxi'a. <sup>18</sup> Biti' run lë na' ga rō'a bōniga. Rudzëjada' tu' raca libán queë' Cristo nácati'tës, sal-la' tunë' libán idú ládxi'gaquië' o bití' tunë' le caní.

Na'a, rudzëjarōda' <sup>19</sup> tu' chinözida' ulá' lu le raca quia', yu'a lidxi guíë ni, tu' rulídzali'-në' Dios, en tu' rácalenë' Dios Bö' Lá'ayi neda'. Náquië' Bö' risöl-lë'ë Jesucristo queëru'. <sup>20</sup> Caní rë'ënda', en ruzxōni ládxa'a-në' Dios, gunë' ga bití' utuída', en gunë' ga gaca gu'a didza' lu yöl-la' rugu ladxi', atë' lu na'a neda' gácatíca'sō yöl-la' ba queë' Cristo na'a dza, en yugu' dza zá'gaca, sal-la' gun bayudxi gátitea', o soa' ibana'. <sup>21</sup> Ca runi neda', channō zoa' nabana', naca para gaca' ca náquië' Cristo, en channō gátia', naca tu le uzí'ira' xibé. <sup>22</sup> Channō huáca guna' dxin le gácalen didza' dxi'a queë' Cristo channō sóasa' ibana', bití' nözda' bízxilō ral-la' cōa'. <sup>23</sup> Naca bōniga cōa'. Rë'ënda' gátitea' para tsōjsóalentea'-në' Cristo, tu' gácatërō dxi'a quia', <sup>24</sup> pero runrō bayudxi sóasa' ibana' para séqui'da' gácalena' libí'ili'. <sup>25</sup> Tu' chinözida' naca caní, nözda' ca' ugá'analena' libí'ili' para gácalena' libí'ili' para gácarō idú ca réajlë'ëli' Cristo, atë' udzëjarōli' tu' réajlë'ëli' Lë'. <sup>26</sup> Caní naca, udusóalena' libí'ili' leyúbölō, le gun ga tsaz ládxi'li'-në' Jesucristo ni'a que le gunë', gácalenë' neda'.

<sup>27</sup> Guli'güi'sō ladxi' gácali' ca sa'yéaj didza' dxi'a queë' Cristo. Caní gaca, channō uduyúa' libí'ili' o channō soa' zí'tu', huayōnida' nácali' tsutsu, en nácali' tuz, runli' tsōzxōn dxin que le réajlë'ëru' le za' queëru' ni'a que didza' dxi'a. <sup>28</sup> Bití' güi'ili' nupa bití' ta'lé'e libí'ili' dxi'a lataj ilún gadxi libí'ili'. Lë ni uluí' légaquië' ila'nítie', pero uláli' libí'ili', le gaca bë' rácalenë' Dios caz libí'ili'. <sup>29</sup> Dios ru'ë libí'ili' lataj gunli' xichinë' Cristo, calëgasō ca réajlë'ëli' Lë', pero lësca' ca riguí' rizáca'li' cate' runli' xichinë'. <sup>30</sup> Na'a, gaca gunli' neda' tsōzxōn güi' ládxi'ru' gunru' libán que didza' dxi'a. Bilé'e quézili' ca gudí' guzáca'a cate' bena' caní zí'alō, atë' riyōnili' ca riguí' rizáca'a ca' na'a.

## 2

*Gúquië' Cristo nōxaj ladxi', atë' bidéli'në' yöl-la' zxön*

<sup>1</sup> Cristo runë' ga rutipa ládxi'li',  
 en lu yöl-la' nadxí'i queë' ruhuéchi' ládxe'ë libí'ili',  
 en runë' ga nácali' tuz len Dios Bö' Lá'ayi,  
 en ga nadxí'ili' luzá'ali',

en ga ruhuéchi' ládxi'li' luzá'ali' tuli' ia'tuli'.

<sup>2</sup> Na'a guli'gún ga udzéjarö ládxa'a. Para gunli' caní, ral-la' gácali' tuz len luzá'ali', en gaca lëbisö ca nadxí'ili' luzá'ali' tuli' ia'tuli'. Lësca' caní ral-la' gácali' tuz lu bö' naca cázali', en ca rizá' ládxi'li'. <sup>3</sup> Ca naca le runli', biti' bi ral-la' gunli' lu yöl-la' rudul-li' queéli', o para gun ba zxön cuinli', pero dxí'ado' ral-la' gunli' yúgu'të, en cabí guéquili' nadéli'röli' libí'ili' ca luzá'ali'. <sup>4</sup> Guli'gü' ladxí' gaca dxi'a ca' que luzá'ali', en calëga queézili'.

<sup>5</sup> Ral-la' gácali' nöxaj ladxí' ca na' gúquië' Jesucristo nöxaj ladxí'. <sup>6</sup> Lë' naca cazë' lëbisö ca náquië' Dios caz, pero biti' gúquinë' ral-la' gunë' bayudxi ugá'anë' lëbisö ca na' náquië' Dios. <sup>7</sup> Bucá'ana cazë' yúgu'të le napë', en ben cuinë' ca tu bönni' nadó'o. Guljë' ca talaj bönachi, en gúquië' idú bönachi. <sup>8</sup> Cate' ni' náquië' bönni', gúquië' nöxaj ladxí', en benë' ca rnna xtídzë'ë Dios, en gútië'. Gudë'ë lë'e yaga cruz ca na' raca queë' nu bönni' nabáguë'ë dul-la'. <sup>9</sup> Que lë ni na' Dios buchisë' Lë', en benë' ga náquië' lo ni' yehua' yubá, en benë' ga lë' tu le nácatëro lo ca yúgu'të lágaca bönachi. <sup>10</sup> Caní benë' Dios para cate' ila'yöni ca na' lë' Jesús, ulu'zechu zxíbigaca yúgu'të nupa nacué' yehua' yubá, en lu yödzölió, en lu lataj chul-la. <sup>11</sup> Yúgu'të' ila'guíxjö'ë yálajdo' Jesucristo náquië' Xanru' para gaca yöl-la' ba queë' Xúziru' Dios.

*Ral-la' gácaru' ca tu le ta'gú'u bení' yödzölió ni*

<sup>12</sup> Que lë ni na', böchi' luzá'ado', ca na' benli' ca rnna xtídzá'a cate' ni' zóalena' libí'ili', runrö bayudxi gunli' ca rnna xtídzá'a na'a, tsanni ni zoa' zi'tu' ga zóali'. Guli'gún xichinë' Xanru' ga idxintë dza údxi usölë' libí'ili'. Guli'gún caní lu yöl-la' radxi queéli' Lë', en lu yöl-la' rizxizi. <sup>13</sup> Lë' cazë' Dios runë' dxin lu icja ládxi'do'oli'. Runë' ga rë'ënili' gunli' le raza ládxe'ë Lë', en runë' ca' ga séqui'li' gunli' lë na'.

<sup>14</sup> Guli'gún yúgu'të le ral-la' gunli', en biti' bi innëli' que, en biti' til-la dídza'li'. <sup>15</sup> Caní ral-la' gunli', para cabí gaca nu bi innë queéli', pero caní gácali' ca zxi'ini cazë' Dios, nácali' idú dxi'a yödzölió ga ni zóali' ladaj bönachi biti' nácacaca tsahui', en nucá'anagaca Dios. Libí'ili' rigú'uli' bení' ládjagaquië' ca na' ta'gú'u bení' böljaj lúzxiba cate' ni naca chul-la, <sup>16</sup> cate' ru'ili' lógaquië' didza' ibániguequinë'. Channö caní gunli', huáca udzëjade'eda' ni'a que le naca cázali' dza huödë' Cristo, tu' inözda' biti' guca nítisö guzóa bönadxi gátia', en calëga nítisö bena' dxin. <sup>17</sup> Yöl-la' réajlë' queéli' Cristo naca tu le raza ládxe'ë Dios. Sal-la' gun bayudxi gátia' para gaca idú yöl-la' réajlë' queéli' Lë', udzëjada', en uzí'lena' xibé tsözxön yúgu'tëli'.

18 Lësca' caní ral-la' udzėjali' libí'ili', en uzí'lenli' tsözxön neda' xibé.

*Ca tunbi' bi'i Timoteo, en bi'i Epafrodito*

19 Channö caní rě'ëně' Xanru' Jesús, runa' löza isöl-la'tea'-bi' bi'i Timoteo ga zóali', ate' ní'irö udzėjada' cate' huödabi' ududí'xjöi'ibi' neda' cátěze raca queėli'. 20 Túzibi' lěbi' rizá' lądxi'bi' ca na' rizá' lądxa'a neda', en ru'ida' lądxi'bi' libí'ili'. 21 Yúgu'tě bönni' ia'zica'rö, le naca quegacasě' tu'i lądxi'gaquiě'. Biti' tu'i lądxi'gaquiě' xichině' Cristo. 22 Nöz quezili' ca benbi' bi'i Timoteo, ca na' burúajbi' dxi'a. Bénlenbi' neda' tsözxön dxin que didza' dxi'a, ate' nácabi' quia' ca tubi' bi'i bönni' rúnlenbi'-ně' tsözxön xúzibi' dxin. 23 Isöl-la'a-bi' bi'i Timoteo ga zóali' cate' inözda' nacxi gaca quia' ni 24 sal-la' ruzxöni lądxa'a-ně' Xanru' guně' ga uduyútea' libí'ili'.

25 Lësca' réquida' run bayudxi isöl-la'a-bi' bí'i böchi'ru' Epafrodito ga zóali'. Bi'i ni bénlenbi' neda' tsözxön dxin queě' Cristo, ate' gudíl-lalentu' tu' xihui'. Libí'i cázali' gusölla-li'-bi' ga zoa' para gácalenbi' neda'. 26 Lě cázabi' rě'ënibi' uduyúbi' libí'ili', en ru'ida' lądxi'bi' libí'ili' tu' biyönilí' ben bayá' queėbi'. 27 Le nácate' gü'ibi', en guqui gátibi', pero buéchi' lądxě'ě-bi' Dios, en calėgasö lěbi', pero buéchi' lądxě'ě ca' neda', para cabí isěbirö lądxa'a ca na' risěbi lądxa'a na'a. 28 Que lě ni na', gú'uniröda' isöl-la'a-bi' queėli' para gaca udzėjali' leyúbölö cate' ulé'eli'-bi', en bítí'rö isěbi lądxa'a neda'. 29 Guli'sí' lu ná'ali' lěbi' lu yöl-la' rudzeja queėli', tu' nácabi' bi'i böchi'ru' réajlě'ěbi' Cristo. Guli'gún bal yúgu'tě bönachi nácagaca ca nácabi' lěbi', 30 tu' guzóa bönadxi queėbi' gátibi' tu' benbi' xichině' Cristo, en tu' gúcalenbi' neda' uláz queėli'.

### 3

*Le naca idú tsahui'*

1 ¡Na'a, böchi' luzá'ado', buli'dzeja tu' nácali' tuz len Xanru'! Biti' rupizxaj neda' uzúaja' queėli' leyúbölö lě na' buzúaja' queėli' zí'alö, tu' gácalen lě ni libí'ili'. 2 Guli'gún chi'i cuinli' lógaca nupa ni' tuá' dö'. Nácagaca ca yugu' bö'cu' sínía', nupa na' tun bayudxi irugu lu xipéla'gaquiě' bönni' le naca bě' nazí' lu ná'gaquiě' xtídžě'ě Dios. 3 Rě'u nadéli'ru' lě na' naca idúte li, le naca bě' nazí' lu ná'aru' le runně' queėru' Dios. Tu' réajlě'ėru' Dios, zóaleně' Dios Bö' Lá'ayi rě'u, ate' rudzėjaru' tu' nácaru' tuz len Jesucristo. Biti' ca' ruzxöni lądxi'ru' tu le runru' rácasö queėru'. 4 La'tu' ruzxöni lądxi'ru' lě ni, lësca' neda' chinadéli'da' bi' uzxöni lądxa'a. Channö zoě' nu bönni' réquině' ulě' tu' nacua' le nuně', neda' nadéli'röda' ca bönni' na': 5 Gurugu lu xipéla'a lě na' naca bě' cate' ni' gúquida' xunu' dza. Gulja' ladaj di'a dza quegaca bönachi Israel.

Nababa' zxi'ini xi'sóe' Benjamín.

Xuz xiná'a nácaquié' idú bönachi hebreo.

Guca' bönni' yudo' fariseo ca na' bena' ca rinná bē' xibá queé' Dios.

6 Bē'da' ládxa'a xibá na' ga bidxintē gudxía ládxa'a bönachi queé' Cristo.

Tsca gaca gáquié' tsahui' tu bönni' tu' runē' ca rinná bē' xibá na', cuntu nu bi guca inné quia'.

7 Na'a, yúgu'tē lē na' bena' zxön zí'alō, nuzóa' tsölá'alō tu' néquida' queé' Cristo. 8 Calégasō yugu' lē na', pero nuzóa' ca' tsölá'alō yúgu'tē le dē, para gaca gúnbe'eda'-nē' Xanru' Jesucristo, le nácatērō lesaca' ca yúgu'tē lē na'. Para gúnbe'eda' Lē' gurú'una' ní'lō yúgu'tē, en réquida' naca ca bēbu, para uzi'a xibé' Cristo, 9 en para gaca' tuz len Lē'. Nuhuóaca' tsahui', calēga tu' runa' ca rinná bē' xibá na', pero Dios caz bunē' neda' tsahui' tu' réajlē'a Cristo, ca na' ruúnē' tsahui' yúgu'tē nupa ta'yéajlē' Lē'. 10 Ré'ēnisida' gúnbē'a-nē' Cristo, en sóalen yöl-la' huáca queé' Dios neda', lē na' busubán Cristo lu yöl-la' guti, ate' guna' Lē' tsözxön, qui'i saca'a ca na' gudí'i guz xáquē'ē Lē', en soa' sina' gátia' ca gútiē' Lē', 11 tu' runa' löza Dios, usubanē' ca' neda' lu yöl-la' guti.

### *Le runru' para idxinru' xilatjaru'*

12 Biti' rnnía' chinadéli'da' yúgu'tē lē ni gunnē' quia', en bití' réquida' chinaca' idú tsahui'. Na'a, runa' bayudxi idéli'da' yúgu'tē lē na', tu' chibidéli'nē' Jesucristo neda'. 13 Böchi' luzá'ado', bití' ca' nadéli'da' yugu' lē ni, pero tuz le runa' bayudxi. Ruzál-la ládxa'a le chibidéli'da', ate' runa' bayudxi idéli'da' le za'. 14 Runa' ca runē' tu bönni' rixítí'dē'ē para idxinē' xilatjē' para idéli'nē' tu le uzi'ē xibé. Caní runa' para idéli'da' lē na' bulidzē' Dios rē'u para gata' queēru' ni' yehua' yubá tu' nácaru' tuz len Jesucristo.

15 Caní ral-la' gunru' yúgu'tēru' rē'u, naca idú ca réajlē'ēru' Cristo. Channō réquili' bál-lali' ral-la' gunli' tu le yúbölō, rinábida'-nē' Dios uzéajni'inē' libí'ili'. 16 Na'a, ca naca lē na' bidéli'ru', ral-la' gúntica'siru' caní.

17 Böchi' luzá'ado', guli'gún ca na' runa' neda'. Chibulu'itu' libí'ili' ca ral-la' gunli'. Buli'yú ca tun nupa na' tun ca na' bentu' netu'. 18 Chigudxi caza' libí'ili' zían luzuí, ate' rea' libí'ili' leyúbölō len yöl-la' ribödxí quia', rnnía': Le tunē' zían bönni' run ga nácaquié' ca nupa bití' ta'lé'e Cristo dxi'a, tu' tu'zóe' tsölá'alō le ben cazē' Lē' lē'e yaga cruz. 19 Yugu' bönni' tunē' caní, tsöjáquié' lu guí' gabila, tu' naca le ta'zēsō ládxi'gaquié' dios quégaquié', ate' tun ba zxön cúngaquié' ní'a que lē na' ral-la' gun ga ulu'tuí'inē'. Tuí'i ládxi'sē le dē yödzölió ni, 20 pero rē'u ni ruí'i ládxi'ru' le dē yehua' yubá ga nabábaru',

en ribózaru' dza huödë' Xanru' Jesucristo, Nu rusólá rë'u, urúajë' yehua' yubá na'. <sup>21</sup> Lë' utsë'ë idütë le naca cázaru', le riniti caz, en gunë' ga huóáca ca naca idütë le naca cazë' Lë', le sóatica'sö. Caní gunë' len yöl-la' huáca zxön queë' le ugunë' dxin para inná bé'enë' yúgu'të.

## 4

### *Ral-la' udzéalentica'siru'-në' Xanru'*

<sup>1</sup> Que lë ni na', böchi' luzá'ado', guli'gaca tsutsu ca réajlë'ëli'-në' Xanru'. Nadxí'ide'eda' libí'ili', en rë'ënda' uduyúa' libí'ili'. Runli' ga rudzėjada', en nácali' ca tu le ruzi'a xibé.

<sup>2</sup> Libí'ili', Evodia, en Síntique, ráta'yua' loli' gácali' tuz ca rala' ilaca nupa néquiguequi queë' Xanru'. <sup>3</sup> Na'a, böcha'a idú, rë'ënda' gácalenu' irópanu ni, tu' gulúnlennu neda' dxin, cate' bentu' libán que didza' dxi'a. Lësca' bulu'dzáguië' Clemente, en ia'zíca'rë' luzá'a na' netu'. Chinazúajgaca lágaquië' yehua' yubá ga na' nazúajgaca lágaca nupa chinadéli'gaca yöl-la' na'bán idú.

<sup>4</sup> ¡Buli'dzéalentica'sö-në' Xanru'!

Leyúbölö, rnnía': ¡Buli'dzeja!

<sup>5</sup> ¡Guli'gaca dxi'i ladxi' len yúgu'të bönachi!

¡Chizóa huödë' Xanru'!

<sup>6</sup> Biti' ubi uguí'ili', pero guli'nabi-në' Dios le riquínili', en guli'guíë': "Xclenu" ca naca yúgu'të lë na' rinábali'. <sup>7</sup> Dios gunë' ga gaca queëli' le cuéqui dxi icja ládxi'do'oli', lë na' nadödirö bë' ca le gaca ila'yéajni'i bönachi. Lë na' ribequi dxi icja ládxi'do'oru' gun chi'i icja ládxi'do'oli', en le rizá ládxi'li' tu' nácali' tuz len Jesucristo.

### *Ral-la' sa' ládxi'ru' le nácaqaca dxi'a*

<sup>8</sup> Ga ruúdxitë, böchi' luzá'ado', guli'sá' ládxi'li':

Yúgu'të le naca dxi'a, en le naca bica' ba,

en le naca idütë li, en le naca idú,

en le naca tsahui', en le naca ba'a,

en le naca lachi, en le ral-la' gunru' bal.

<sup>9</sup> Guli'gún ca na' busédida' libí'ili', lë na' guzxí' lu ná'ali' tsca na' bë'lëna' libí'ili' didza', en tsca na' bena' ga ni' zóali'. Dios, Nu runna queëru' le ribequi dxi icja ládxi'do'oru' sóalënë' libí'ili'.

### *Le tsahui' gulunë' yugu' bönni' Filipos queë' Pablo*

<sup>10</sup> Rudzėjalenda'-në' Xanru' tu' ruí'li ládxi'li' neda' leyúbölö. Biti' rnnía' gul-la ládxi'li' neda', pero biti' guta' queëli' lataj gácalenli' neda' zí'alö. <sup>11</sup> Lësca' caní, biti' rnnía' caní tu' zoa bi riyadzaj quia', tu' nazëda' tsaza ládxa'a le dësö quia'. <sup>12</sup> Chigudöda' lu yöl-la' yechi', en lu yöl-la' tsahui'. Nazëda' soa' nácati'tës, sal-la' nóljada' o nabila riduna', en sal-la' dëda' quia'

o zoa bi riyadzaj quia'. <sup>13</sup> Yúgu'të huazéqui'da' tu' rutipë' Cristo ládxa'a. <sup>14</sup> Benli' dxi'a cate' ni' gúcalenli' neda', en butípali' ládxa'a cate' gudí'i guzxáca'a.

<sup>15</sup> Libí'ili', bönni' Filipos, nöz quezili' ca guca quia' dza ni' cate' buzá'a luyú Macedonia, para yöjena' libán que didza' dxi'a. Tscá nacuá' bönachi queë' Cristo, cúnturö nu gúcalen neda', pero libí'sili' gúcalenli' neda'. Gusöl-la'li' quia' bi bunödzejali', tu' guxzí' lu ná'ali' libán bena' neda'. <sup>16</sup> Tsanni ni' guzóa' yödzö Tesalónica, tu chopa luzuí gusöl-la'li' quia' le bunödzejali' cate' ni' biyadzaj quia'. <sup>17</sup> Biti' ru'i ládxa'a bi si'a, pero rë'ënda' gáta'rö queëli' le uzí'ili' xibé yehua' yubá. <sup>18</sup> Rea' libí'ili': Chiguzxi'a yúgu'të lë na' gusöl-la'li' quia', ate' gudödité bë' tscá le biyádzjada'. Ben ga naca caní lë na' gusöl-la'li' lu ná'abi' bi'i Epafrodito. Lë na' bunödzejali' naca ca tu le rilá' zixixi le ridxintë lahuë' Dios, en ca tu le rigú'uru' lahuë' Dios le raza ládxe'ë. <sup>19</sup> Dios gunnë' queëli' yúgu'të le riyadzaj queëli', tscá naca yöl-la' tsahui' rö'ö yehua' yubá, tu' nácali' tuz len Jesucristo. <sup>20</sup> ¡Gácatíca'sö queë' Xúziru' Dios yöl-la' ba! ¡Ca' gaca!

*Yugu' bönachi queë' Cristo tu' gapa Dios luzë'eguequi*

<sup>21</sup> Uláz quia' neda', guli' gapa Dios nupa ni' néquiguequi queë' Dios tu' nácagaca tuz len Jesucristo. Tu' gapë' Dios libí'ili' böchi' luzá'aru' núngaquië' neda' tsözxön ni. <sup>22</sup> Lëscá' yúgu'të nupa ni' néquiguequi queë' Dios, tu' gapa Dios libí'ili', en lëscá' caní, yugu' bönni' huen dxin nacu'ë lidxe' bönni' rinná bë'ë idú luyú Roma tu' gapë' Dios libí'ili'.

<sup>23</sup> Rinábida'-në' Xanru' Jesucristo uzá' ládxe'ë queëli' yúgu'tëli'. ¡Ca' gaca!

## DIDZA' GUSÖL-LË'Ë PABLO YÖDZÖ COLOSAS

*Pablo rugapë' Dios bönachi queë' Cristo nacu'ë Colosas*

<sup>1</sup> Neda', Pablo, naca' gubáz queë' Jesucristo tu' rë'ënë' Dios caní, ate' dzágabi' bi'i böchi'ru' Timoteo neda'. <sup>2</sup> Rugapa' Dios libí'ili', zóali' Colosas. Nácali' böchi'tu' réajlë'ëli' Cristo, en nácali' quez queë' Dios. Rinábida'-në' Xúziru' Dios uzá' ládxe'ë queëli', en gunë' ga soa dxi icja ládxi'do'oli'.

*Pablo rulidzë' Dios, en rë' Lë': "Xclenu"*

<sup>3</sup> Rética'stu'-në' Dios, Xuzë' Xanru' Jesucristo: "Xclenu" cate' rulidztu'-në' Dios, en rinábitu'-në' bi gunë' queëli' <sup>4</sup> tu' biyönitu' didza' ca réajlë'ëli' Jesucristo, en ca nadxí'ili' yúgu'të nupa néquiguequi quez queë' Dios. <sup>5</sup> Caní runli' tu' runli' löza le nuzóë' Xanru' queëli' ni' yehua' yubá, lë na' biyönili' que cate' bë'lentu' libí'ili' didza', le naca löza sí'ili' ni'a que didza' dxi'a. <sup>6</sup> Didza' dxi'a na' bidxín queëli' ca ridxín ca' iduté yödzülió. Run dxin, en raca libán que, iduté yödzülió, la' tuz ca raca ga zóali', dza ni'te ga ridxintë na'a dza, cate' ni' biyönili', en bénbë'ëli' iduté le ruzá' ládxe'ë queëru' Dios. <sup>7</sup> Epafras, bönni' nadxí'iru'-në', busëdinë' libí'ili' lë ni. Lë' rúnlenë' netu' tsözxön dxin, en rácalenë' libí'ili'. Náquië' huen dxin idú queë' Cristo. <sup>8</sup> Bönni' ni gudíxjöi'inë' netu' ca nadxí'ili' luzá'ali', ate' runë' Dios Bö' Lá'ayi ga gaca gunli' caní.

<sup>9</sup> Que lë ni na' netu' ca', dza ni'te ga ridxintë na'a dza, tu' réquibe'etu' lë ni, biti' ca' rizóa dxitu' rulidztu'-në' Dios, en rinábitu'-në' gácalenë' libí'ili', en gunë' ga gúnbë'ëli' idú le rë'ëni quézinë' Lë', en gunnë' queëli' yúgu'të yöl-la' rácada', en yöl-la' réajni'i le rigu'ë Dios Bö' Lá'ayi rë'u. <sup>10</sup> Caní rinábitu'-në' para gaca gunli' ca ral-la' ilún nupa néquiguequi queë' Xanru', gunli' yúgu'të le raza ládxe'ë Lë', en séqui'li' gunli' yúgu'të le naca dxi'a, en gácarö idú ca núnbë'ëli'-në' Dios. <sup>11</sup> Rinábitu'-në' utipë' ládxi'li', en gunnë' queëli' yöl-la' huáca idú queë', para gaca guá' ilenli' yúgu'të, en cözali' zxön ladxi', en udzeja ládxi'li'. <sup>12</sup> Lu yöl-la' rudzeja queëli' guli'guië' Dios Xuz: "Xclenu", tu' budödë' lu ná'aru' gata' queëru' lataj lu bení' queë', en gunru' tsözxön nupa néquiguequi quez queë'. <sup>13</sup> Dios Xuz na' busölë' rë'u lu na' nu rinná bë' lataj chul-la, en budödë' rë'u ga na' rinná bë'ë Zxí'ini cazë', Nu nadxí'inë'. <sup>14</sup> Zxí'inë' na' böá'uë' rë'u, tu' gútië' uláz queëru', ate' buniti lahuë' rë'u ca naca dul-la' gubágaru'.

*Nuhuöácaru' tuz len Dios tu' gútië' Cristo uláz queëru'*

15 Cristo náquië' tuz ca náquië' Dios caz, Nu biti' gaca ilé' eru'. Zoa cazë' Lë' zí' atëlö ca yúgu'të le benë' Dios. 16 Lu në' ë Cristo benë' Dios yúgu'të le dë, le nacuá' lúzxiba, en le nacuá' luyú, yugu' le rilé' eru', en yugu' le cabí gaca ilé' eru', lë na' nácagaca lataj lo, en yugu' yöl-la' unná bë', en le nápagaca yöl-la' zxon, en yugu' yöl-la' huáca que yehua' yubá, en que luyú ni. Yúgu'të benë' Dios lu në' ë Cristo para uzi' ë xibé Lë'. 17 Cristo zoa cazë' zí' alö ca yúgu'të le dë, ate' yúgu'të nacuá'tica'sö ni'a queë' Lë'. 18 Cristo náquië' Xángaca bönachi queë', en runödzejë' quégaquië' yöl-la' na'bán. Náquië' ca' Nu gusí lo bubán tsaz lu yöl-la' guti. Zí' alö Lë' bubanë' tsaz lu yöl-la' guti para tsëpisëtërë' ca yúgu'të le dë. 19 Caní guca, tu' guyaza ládxi' ë Dios Xuz sóalen Cristo idútë le naca cazë' Lë'. 20 Ni'a que le benë' Cristo, Dios benë' ga gaca ulu'huóaca tuz len Lë' yúgu'të le dë, le nacuá' luyú, en le nacuá' lúzxiba. Bunë' léguequi tuz len Lë' tu' bulaljë' Cristo xichönë' cate' gútië' lë'e yaga cruz.

21 Libí'ili', zí' atëlö nulá'alenli'-në' Dios, en gúcali' ca yugu' bönni' biti' ta'lé'enë' Dios dxi'a lu icja ládxi'do'oli' ni'a que dö' biá'ali', pero na'a chibunë' libí'ili' tuz len Lë'. 22 Caní guca, tu' budödi cuinë' Cristo, en gútië' uláz queéli' para gaca usudxinë' libí'ili' lahuë' Dios, nácali' quez queë', en idú dxi'a, ate' cuntu nu bi gaca innë' queéli'. 23 Caní gaca channö ugá'anali' tsutsu ca réajlë'ëli' Cristo. Gácali' ca tu yu'u zxoaga re' xilibi zö'ö que, en biti' tseaj bö' ládxi'do'oli' ca runli' löza didza' dxi'a biyönili', lë na' raca libán que idútë yödzölió le benë' Dios zxon lúzxiba. Dios buzóë' neda', Pablo, para gaca' huen dxin que didza' dxi'a na'.

### *Dxin budödë' Dios lu në' ë Pablo*

24 Rudzëjada' na'a ca naca le riguí'i rizáca'a para gácalena' libí'ili', en ruúdxí rizá'a lu idútë le naca' le riguí'i rizáca'léna' tsözxön Cristo uláz que idú le naca cazë' Lë', le naca bönachi queë'. 25 Dios benë' ga naca' huen dxin quégaca bönachi queë' Cristo, ate' runa' xichinë' Dios, le budödë' lu na'a guna' para gácalena' libí'ili', quíxjö'a idú ca naca xtídzë' Dios. 26 Ruzéajni'ida' bönachi le nagachi', lë na' bigachi' dza ni'te, ate' cuntu nu benbë' le, pero na'a Dios chibuluf'inë' bönachi néquiguequi quez queë' ca naca que. 27 Dios gú'uni quézinë' gunë' ga ilúnbë'e yugu' yöl-la' tsahui' idú que le nagachi' ni, lë na' ta'yöni bönachi izá'a. Caní rna lë na' bigachi': "Cristo náquië' tuz len libí'ili', en náquië' le naca löza idéli'li' tsazli' lu bení' queë'."

28 Runtu' libán queë' Cristo, en rusá'atu' ládxi'gaca yúgu'të bönachi, ate' rusëditu' léguequi idútë yöl-la' réajni'i, para gaca usudxintu' yúgu'të bönachi lahuë' Dios, naca idú ládxi'gaca tu' nácagaca tuz len Jesucristo. 29 Para gaca caní runa' dxin, en



ruí'i ládxa'a údxi guna' lë ni, rugúna' dxin yöl-la' huáca idú na' runnë' Cristo quia'.

## 2

<sup>1</sup> Rë'ënda' inözili' ruí'ida' ládxa'a runa' le gácalen libí'ili', enca' le gácalen bönachi yödzö Laodicea, en le gácalen ca' yúgu'të nupa biti' ila'lé'eni neda'. <sup>2</sup> Runa' caní para ila'dipa ládxi'gaquië', en iláquië' tuz lu yöl-la' nadxí'i, en ulu'zi'ë xibé yúgu'të yöl-la' tsahui' que yöl-la' run löza idú le runna yöl-la' réajni'i queéru'. Caní raca para ilúnbë'ë le bigachi' queë' Dios Xuz, lë na' naca cazë' Cristo. <sup>3</sup> Lu në'ë Cristo ruzí'iru' xibé yúgu'të yöl-la' tsahui' que yöl-la' rácada', en yöl-la' réajni'i. <sup>4</sup> Lë ni rea' libí'ili', para cabí gaca nu si' ye'e libí'ili', nu gü'i didza' tséajlë'ëru' le cabí nácatë. <sup>5</sup> Sal-la' zoa' zi'tu' ga zóali' lu idútë le naca', lu bö' naca caza' zóalena' libí'ili', en rudzëjada' tu' rilé'eda' rö'ö xibá queëli', en nácali' tsutsu ca réajlë'ëli' Cristo.

<sup>6</sup> Que lë ni na', ca na' guzxí' lu ná'ali' Xanru' Jesucristo, lësca' caní ral-la' gunli' yúgu'të le gunli', dzáguië' Lë' libí'ili'. <sup>7</sup> Ca na' nun ga rë' luí yaga, enca' ca na' nayás zö'ö lu xilibi zö'ö, guli'sóalen Cristo. Guli'sóa tsutsu ca réajlë'ëli' Lë', ca na' chinazëdali'. Guli'guíëtica'së' Dios: "Xclenu'."

### *Le cubi nácaru' tu' dzágaru'-në' Cristo*

<sup>8</sup> Guli'gún chi'i cuinli' para cabí gü'ili' lataj nu si' ye'e libí'ili', nu ugún dxin yöl-la' réajni'i quégaca bönachi, en yugu' didza' ta'nнасë' nácgaca idútë li, ca naca le ta'lëbi tun bönachi, en ca naca le tu'sedi bönachi le naca que yödzölió ni, en calëga le naca xtídzë'ë Cristo.

<sup>9</sup> Idútë le naca cazë' Dios zóalen Cristo sal-la' böáquië' bönachi, <sup>10</sup> ate' libí'ili' nápalí' idútë le náquië' Dios tu' dzágali'-në' Cristo, Nu rinná be'e yúgu'të nupa ta'nná bë', en yugu' bönni' dë lu ná'agaquië'. <sup>11</sup> Narugu lu xipëla'gaquië' bönni' judío le ruluí'i dá'gaquië' Dios, pero libí'ili', tu' dzágali' Cristo, zóalen libí'ili' le ruluí'i néquili' queë' Dios, le cabí néquini lu ni'a lu ná'agaca bönachi. Yugu' bönni' judío tu'güë' tu guídido', pero libí'ili', nadúa idútë yöl-la' bönachi queëli' le bënlenli' dul-la'. Caní naca queëli' tu' benli' tsözxön Cristo cate' gútië' lë'e yaga cruz. <sup>12</sup> Cate' bidíalali' nisa guca ca bigáchi'lenli'-në' Cristo tsözxön yeru ba, en bubánlenli'-në' tsözxön tu' guyéajlë'ëli' Dios, len yöl-la' huáca queë' busubanë' Cristo lu yöl-la' guti. <sup>13</sup> Zí'atëlö gúcali' ca nupa chinátigaca tu' nözi dul-la' gubága'li', en biti' guzóalen libí'ili' le ruluí'i néquili' queë' Dios, pero na'a Dios nunë' ga nabánlenli'-në' tsözxön Cristo, en buniti lahuë' libí'ili' ca naca yúgu'të dul-la' gubága'li'. <sup>14</sup> Dios busúluë' yugu' le nabága'ru' le nazúajgaca lu xibá queë', lë na' tu'zegui rë'u didza'. Bugüë' lë na' nabága'ru', en budë'ë le lë'e yaga cruz

ca tu le nabáguë'ë Cristo. <sup>15</sup> Cate' gútië' Cristo lë'e yaga cruz, bugúë' yöl-la' huáca unná bë' quégaca bö' xihui' unná bë', en quégaca bö' xihui' dë lu në'eguequi yöl-la' huáca, tu' bulu'e lahui le nácgaca bö' xihui' na', en bugúë' idutë le guta' lu në'eguequi.

*Ral-la' güi'í ládxi'ru' le naca que yehua' yubá*

<sup>16</sup> Que lë ni na', bití' güi'íli' lataj nu uzegui libí'ili' didza' ca naca le rë'aj ráguli', o tu' cabí runli' zxön yugu' dza laní, o tu' cabí runli' zxön beo' sí' ruzé, o tu' cabí runli' zxön yugu' dza lá'ayi quégaca bönachi. <sup>17</sup> Yúgu'të lë ni naca ca tu bixín que le ral-la' gaca, ate' le rulu'í yúgu'të lë ni náquië' Cristo caz. <sup>18</sup> Bití' güi'íli' lataj nu gun ga unítli' le ral-la' sí'ili', nu runda' bayudxi ga ilaca nöxaj ládxi'gaca bönachi, en ilún zxön yugu' gubáz lá'ayi. Tu'gutsa' cuíngaquië' le cabí bila'lé'enë', en tun ba zxön cuíngaquië' ca naca le dzö'ösö ícjagaquië' lu yöl-la' bönáchisö quégaquië'. <sup>19</sup> Nu run caní bití' da' Cristo. Náquië' Xanru', en ruzóë' tsutsu idútë le naca cazë', le nácaru' rë'u. Rugahuë' le, en runë' ga naca tuz ni'a que le zeaj lu dxita lu bin, ate' rizxön idútë le naca cazë' ca rë'ënë' Dios uxönë' le.

<sup>20</sup> Libí'ili' chinátilenli'-në' Cristo para cabirö ila'nná be'e xibá que yödzülió libí'ili'. ¿Bizx que runli' tsca ni nácali' que yödzülió, en runli' ca ta'nná bë' xibá que? <sup>21</sup> Caní ta'nná yugu' xibá que yödzülió ni:

Bití' quítjanu' lë ni.

Bití' gagu' lë na'.

Bití' canu' ia'tú le dë.

<sup>22</sup> Yúgu'të lë ni ila'niti cate' chibugunru' léguequi dxin. Caní nácgaca le ta'nná bë' bönachi, en yugu' xibá nazí' lu në'eguequi. <sup>23</sup> Le nácatë, yugu' xibá ni, téqui bönachi nápagaca yöl-la' réajni'i. Tun ga tu'luí'í cuínguequi ca bönachi yudo', en ga tu'luí'í cuínguequi nöxaj ladxi', en ga tu'saca' zí'gaca idútë le zeaj naca caz, pero xibá ni bití' ca' tácalen rë'u para gaca inná bé'eru' yugu' le rizé ládxi'ru' lu yöl-la' bönáchisö queëru'.

### 3

<sup>1</sup> Na'a, channö nubánlenli'-në' Cristo, guli'güi' ladxi' le nácgaca que yehua' yubá ga ni' rö'ë Cristo cuita lé'ë ibëla Dios, ga náquië' lo. <sup>2</sup> Guli'sá' ladxi' le taca xitsá'aló, en calëga le taca luyú ni. <sup>3</sup> Naca queëli' tsca chinátli', ate' yöl-la' na'bán queëli' rapa chi'ë Cristo ga ni' zoa cazë' Dios. <sup>4</sup> Cristo nabánili' libí'ili'. Cate' uluf'í lahuë' Lë', ní'irö uluf'í loli' ca' libí'ili' tsözxön len Lë' lu bení' queë'.

*Yöl-la' na'bán gula, en yöl-la' na'bán cubi*

<sup>5</sup> Que lë ni na', guli'gún ga ila'niti le nacua'len libí'ili' que yödzülió ni:

Yugu' le ruá' dö', en le nácgaca xihui',  
 en yugu' le rizé ládxi'li' le ruá' dö',  
 en yugu' le rizé ládxi'li' le naca xihui',  
 en yöl-la' ruhuidi'.

Yöl-la' ruhuidi' naca lëbi ca nu reax ladxi' budó' guiöj budó'  
 yaga, tu' cabí reax ladxi' Dios nu ruhuidi'. <sup>6</sup> Tun bönachi yugu'  
 le caní, ate' gunë' Dios xíguia' yúgu'të nupa biti' túngaca ca rnna  
 xtídzë'ë. <sup>7</sup> Yugu' dul-la' caní benli' ca' libí'ili' cate' ni' nadó'dili'  
 lu në'eguequi. <sup>8</sup> Na'a, bíti'rö gunli' yugu' lë ni:

Bíti'rö idzá'ali', en bíti'rö leli'.

Bíti'rö nu gunli' zi', en bíti'rö innë xíhui'li'.

Bíti'rö innali' le ruá' dö'.

<sup>9</sup> Biti' si' yé'eli' luzá'ali' tuli' ia'tuli' tu' chinucá'anali' le gúcali'  
 zí'alö, en yugu' le benli' zí'alö. <sup>10</sup> Chinácali' bönachi cubi, ate' tu  
 tu dza ricúbili', ruhuöácaröli' ca naca Nu na' bun libí'ili', para  
 gúnbë'ëli' Lë' idú ca náquië' Lë'. <sup>11</sup> Tu' chidzágaru'-në' Cristo:

Bíti'rö nácaru' bönni' zi'tu', en bönni' judío.

Bíti'rö nácaru' bönni' narugu lu xipéla'gaquië' le naca bë' nu  
 da' Dios, en bönni' biti' narugu lu xipéla'gaquië' lë na'  
 naca bë'.

Bíti'rö nácaru' bönni' ta'yéajni'inë', en bönni' biti' ta'yéajni'inë'.

Bíti'rö nácaru' bönni' nadó'ogaquië', en bönni' biti'  
 nadó'ogaquië'.

Na'a, Cristo náquië' yúgu'të le nácgaca lesaca', en dzáguië'  
 yúgu'tëru'.

<sup>12</sup> Dios nadxí'inë' libí'ili', en guröë' libí'ili' para guéquili'  
 quez queë'. Que lë ni na', ral-la':

Gü'i ládxi'li' luzá'ali', en gácali' dxi'i ladxi',

en nöxaj ladxi', en cuidi' ladxi',

en cözali' zxon ladxi'.

<sup>13</sup> Channö raca didza' bizxaj tuli' len ia'tuli', guli'guá' ilén  
 luzá'ali' tuli' ia'tuli', en buli'niti lo luzá'ali' tuli' ia'tuli' ca na'  
 benë' Cristo, buniti lahuë' libí'ili'. <sup>14</sup> Le nazáca'tërö ca yúgu'të  
 lë ni, ral-la' idxí'ili' yúgu'të bönachi, tu' naca yöl-la' nadxí'i le  
 run ga nácaru' tuz, en ga nácaru' idú. <sup>15</sup> Guli'güi' lataj le ribequi  
 dxi icja ládxi'do'oru' inná bë' lu icja ládxi'do'oli', lë na' runnë'  
 Dios queëru'. Que lë ni na' bulidzë' libí'ili', para gácali' tuz lu  
 iduté le naca cazë' Cristo. Guli'guié' Dios: "Xclenu'."

<sup>16</sup> Guli'sí' lu ná'ali' xtídzë'ë Cristo le gaca queëli' tu yöl-  
 la' tsahui' zxon. Tu' zóalen libí'ili' yöl-la' réajni'i queë' Dios,  
 buli'sedi, en buli'zëjni'i luzá'ali' tuli' ia'tuli'. Idú ládxi'li'  
 guli'gul-la yugu' salmo queë' Dios, en yugu' le rul-la yöl-la'  
 ba, en yugu' le rul-la lá'ayi, ate' guiëli'-në' Dios: "Xclenu'."

<sup>17</sup> Yúgu'të le runli', le naca didza' ruí'ili' o le naca dxin runli',  
 guli'gún yúgu'të lu Lë' Xanru' Jesús, en guiëli'-në' Dios Xuz:  
 "Xclenu'", dzáguië' Cristo libí'ili'.

*Le ral-la' gunru' que luzá'aru' tu' néquiru' queë' Cristo*

<sup>18</sup> Libí'ili', nigula nutsaga ná'alenli' bönni' queëli',  
guli'gún ca rnna xtídza'gaquië' bönni' que queëli'  
ca ral-la' gunli', tu' néquili' queë' Xanru'.

<sup>19</sup> Libí'ili', bönni' nutsaga ná'alenli' nigula queëli',  
guli'dxí'i nigula que queëli',  
en bití' uzéli' bach légacanu.

<sup>20</sup> Libí'ili', bi'i ra'bán,  
guli'gún ca rnna yúgu'të xtídza'gaquië' xuz xiná'ali'.  
Lë ni raza ládxë'ë Xanru'.

<sup>21</sup> Libí'ili', núlöli' nácali' xúzgaca bí'ido',  
bití' tódi bë' usína'li' zxi'inili',  
para cabí huőaj ládxí'gacabi'.

<sup>22</sup> Libí'ili', núlöli' nácali' bönni' nadó'ogaquië',  
guli'gún ca rnna yúgu'të xtídza'gaquië' xanli' luyú ni.  
Calégasö gunli' caní cate' tu'yúé' libí'ili'  
ca na' tun nupa té'ëni ilún ga ila'yaza ládxí'gaca bönachi,  
pero idú ládxí'li' guli'gún xichíngaquië'  
ca ral-la' ilún nupa tadxi Dios.

<sup>23</sup> Ca naca yúgu'të le runli', guli'gún idú ládxí'li',  
gaca ca runli' xichinë' Xanru',  
en calégasö ca runli' xichíngaca bönachi.

<sup>24</sup> Chinóz quézili' ubi'ë Xanru' queëli',  
gunné' queëli' le chinupë'ë Dios quégaca nupa nácgaca zxi'ini  
cazë'.

Caní gaca, tu' runli' xichinë' Xanru' Jesucristo.

<sup>25</sup> Nu ruá' dö', ubi'ë Xanru' que nu na' ca naca dö' ruá' nu  
na', tu' cabí utsë'ë Dios ca ral-la' ubi'ë que queëgaca bönachi.

## 4

<sup>1</sup> Libí'ili', núlöli' nácali' xángaca bönachi,  
guli'gún le naca tsahui', en le naca dxi'a  
ca rugunli' dxin yugu' bönni' huen dxin queëli'.  
Guli'tsöjné zoa ca' Xanli' yehua' yubá.

<sup>2</sup> Libí'ili', yúgu'tëli',  
buli'lídzatica'së' Dios.  
Buli'subán ládxí'li' ulídzali'-në' Dios,  
en guli'guié': "Xclenu'."

<sup>3</sup> La' ná'asö cate' rulídzali'-në' Dios, guli'nabi-në' ca' gácalenë'  
netu', en gunné' netu' lataj quíxjö'ötu' xtídzë'ë Xanru', para  
gaca uzéajni'itu' bönachi le bigachi' ca naca queë' Cristo. Tu'  
runa' caní nadzuna' lidxi guié' ni. <sup>4</sup> Guli'nabi-në' ca' Dios,  
gunné' neda' lataj usalaj lá'ana' le bigachi' na' ca ral-la' guna'.

<sup>5</sup> Lu yöl-la' réajni'i queëli', guli'gún le runli' lógaca nupa bití'  
ta'yéajlë' Cristo. Guli'gunda' dxin yugu' dza uzá' ládxë'ë Dios  
queëli', gunli' xichinë'. <sup>6</sup> Ral-la' gü'ili' didza' ca raza ládxë'ë

Dios, en ca ral-la' gun nupa néquiguequi queë'. Ral-la' inözili' ca' naca ral-la' ubí'ili' didza', bi guiéli' tu tu bönachi.

*Yugu' bönachi queë' Cristo tu'gapa Dios luz'eguequi*

<sup>7</sup> Tíquico quíxjöi'inë' libí'ili' le raca quia' ni. Náquië' böchi'ru' nadxí'iru'-në'. Náquië' ca' huen dxin idú queë' Xanru', en rúnlenë' neda' tsözxön dxin queë' Xanru'. <sup>8</sup> Que lë ni na' risöl-la'a-në' ga zóali', para uzéajni'inë' libí'ili' le raca quia', en utipë' ládxi'li'. <sup>9</sup> Onésimo, böchi'ru' na' nabábalenë' libí'ili' sa'yéajlenë' lë' tsözxön. Náquië' ca' böchi'ru' nadxí'iru'-në', en réajlë'ë Xanru'. Chopë' ni ulu'siyönnë' libí'ili' yúgu'të le raca ni.

<sup>10</sup> Aristarco, bönni' na' yú'ulenë' neda' tsözxön lidxi guié rugapë' Dios libí'ili'. Bi'i Marcos, bi'i bönni' queënu nigula zanë' Bernabé rugápabi' Dios ca' libí'ili'. Chigudxa' libí'ili' bi gunli' queëbi' bi'i Marcos na'. Channö huídabi' ga zóali', guli'gún-bi' bal. <sup>11</sup> Bönni' ni lë' Jesús, en zoa ia'tú lë' Justo lësca' rugapë' Dios libí'ili'. Nacuá' zían bönachi judío ta'yéajlë' Cristo, pero tsónnasë' ni ladaj bönachi judío tunë' dxin que le rinná bë'ë Dios tsözxön len neda', en tu'huí' zxöndë'ë neda'. <sup>12</sup> Epafras, bönni' ni nababë' ca' libí'ili' rugapë' Dios libí'ili'. Náquië' huen dxin queë' Cristo, en idú ládxe'ë rulidzë' Dios, en ráta'yutica'së' lahuë' gácalenë' libí'ili' para gácali' idú ladxí', en sóali' ca' sina' gunli' yúgu'të le ré'ëni quézinë' Dios. <sup>13</sup> Runa' ba nalí queë' Epafras na', ruí'ida' ládxe'ë libí'ili' enca' nupa nacué' yödzö Laodicea, en nupa nacué' yödzö Hierápolis. <sup>14</sup> Demas, enca' Lucas tu'gapë' Dios libí'ili'. Náquië' Lucas bönni' na' ruúnë' bönachi, ate' nadxí'iru'-në'.

<sup>15</sup> Guli'gapa Dios böchi'ru' nacu'ë Laodicea, enca' Ninfas, en bönachi queë' Cristo nacué' lídxinu Ninfas na'. <sup>16</sup> Cate' údxi ulábalí' guichi ni ga ni' zóali', guli'gún ga ulu'laba le bönachi queë' Cristo nacué' Laodicea. Buli'laba ca' libí'ili' guichi na' íla'söl-la' bönachi Laodicea na' queéli'. <sup>17</sup> Guli'guié' Arquipo: "Bë' ládxi'u gunu' dxin na' budödë' Xanru' lu no'o."

<sup>18</sup> Neda', Pablo, ruzúaj caza' lu guichi dídzado' ni, rnnía': Rugapa' Dios libí'ili'. Guli'tsöjné ca raca quia' nadzuna' lidxi guié ni. Rinábida'-në' Dios uzá' ládxe'ë queéli' le naca dxi'a. ¡Ca' gaca!

## DIDZA' ZÍ'ALÖ GUSÖL-LË'Ë PABLO YÖDZÖ TESALÓNICA

*Pablo rugapë' Dios bönachi queë' Cristo nacué' Tesalónica*

<sup>1</sup> Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzágagaquië' neda' Silvano, en bi'i Timoteo. Rinábida'në' Xúziru' Dios, enca' Xanru' Jesucristo uzá' ládxe'ë queëli', en gunë' ga soa dxi icja ládxi'do'oli'.

*Yugu' le taca bë' ta'yéajlë' bönachi Tesalónica Dios*

<sup>2</sup> Rética'stu'në' Dios: "Xclenu'" cate' röjnetu' ca naca queëli' yúgu'tëli'. Röjnética'stu' libí'ili', bi rinábitu'në' Dios ni'a queëli' cate' rulidztu'në'. <sup>3</sup> Röjnética'stu' lahuë' Xúziru' Dios ca naca le runli' tu' réajlë'ëli' Cristo, en ca naca dxin runli' tu' nadxí'ili'në', en ca na' nácatíca'sili' tsutsu tu' runli' löza Xanru' Jesucristo. <sup>4</sup> Böchi' luzá'atu', Dios nadxí'inë' libí'ili', ate' nöztu' gurö cazë' Lë' libí'ili'. <sup>5</sup> Caní naca, tu' bidxín queëli' didza' dxi'a runtu' libán que, calëga len dídza'sö, pero lësca' len yöl-la' huáca bidxín queëli', ate' Dios Bö' Lá'ayi benë' tsutsu le, ate' idú ládxi'li' benli' löza le. Nöz quézili' ca gúcatu' ga zóali' tu' nadxí'itu' libí'ili'.

<sup>6</sup> Libí'ili' butsó' cuinli', ate' runli' ca runtu' netu', enca' ca benë' Xanru', tu' guzxí' lu ná'ali' xtídzë'ë, ate' sal-la' gudí'i guzxáca'da'ali', budzéjali' tu' zóalenë' Dios Bö' Lá'ayi libí'ili'.

<sup>7</sup> Caní naca, chinácali' tu le naca bë' lógaca yúgu'të bönachi ta'yéajlë' Cristo nacué' luyú Macedonia, en luyú Acaya. <sup>8</sup> Caní naca, tu' guzë xtídzë'ë Xanru' ni'a queëli'. Calëgasö luyú Macedonia, en luyú Acaya, pero lësca' yúgu'të lataj guzë didza' ca réajlë'ëli' Dios. Caní naca, biti' bi run bayudxi innatu', <sup>9</sup> tu' ta'guixjö' la' léguequisö bönachi ni' queëtu' ca benli' netu' bal, en ca na' butsó' cuinli'. Bucá'anali' yugu' budó' guiöj budó' yaga, en böácali' queë' Dios para gunli' xichinë' Dios ban, Nu naca idú Dios. <sup>10</sup> Na'a, ribözali' dza huödë' Zxí'inë' Dios, irúajë' yehua' yubá. Dios busubanë' Lë' lu yöl-la' guti. Nu ni naca Jesús, Nu rusölá rë'u lu dul-la', para cabí soa le gun ga ichúguie' Dios queëru' dza si' za'.

## 2

*Xichinë' Dios benë' Pablo yödzö Tesalónica*

<sup>1</sup> Böchi' luzá'atu', nöz quézili' biti' guca nítisö dxin queë' Dios bentu' cate' ni' bidxintu' ga zóali'. <sup>2</sup> Nözili' ca guca queëtu' lu yödzö Filipos, ca na' gudí'i guzxáca'tu', ate' guluá' dö' bönachi

ni' queëtu'. Ní'irö cate' bidxintu' ga zóali' gúcatu' rugu ladxi' tu' guzóalenë' Dios queëru' netu', ate' bentu' libán loli' que didza' dxi'a le budödë' Dios lu na'tu'. Caní bentu' sal-la' gula'dá'baga'da' bönachi ládzali' netu'. <sup>3</sup> Cate' ni' guchízatu' icja nágali' xtídzë'ë Dios, bë'ëtu' didza', calëga tu' nazi'i ye'e netu', en calëga tu' bi guzë ládzi'tu' le dë queëli', en biti' guzxi' yé'etu' libí'ili'. <sup>4</sup> Tu' nuzxöni ládzë'ë Dios netu', budödë' lu na'tu' guntu' libán que didza' dxi'a queë', ate' canísö ru'itu' didza'. <sup>5</sup> Nöz quézili' catu' caz bë'lentu' libí'ili' didza' le gun zxön libí'ili', en biti' gulëaj tsahui' cuintu' ca run nu bi rizë ladxi' le dë queëli'. Nöz quézinë' Dios naca caní. <sup>6</sup> Biti' gudíljatu' yöl-la' ba le naca que yödzülió ni, lë na' cú'uli' libí'ili' netu', en calëga le ila'gú'u bönachi netu'. Sal-la' dë lu na'tu' inná bé'etu' libí'ili' tu' nácatu' gubáz nasöl-lë'ë Cristo <sup>7</sup> guzóalentu' libí'ili' dxi'i ládzi'do', en bentu' ca runnu xiná'agacabi' bi'i huë'enido', run chí'inu léga'cabi' dxi'i ládzi'do'. <sup>8</sup> Caní guca, bidxi'ide'etu' libí'ili', ga bidxintë gú'unitu' udödítu' lu ná'ali', calëgasö didza' dxi'a queë' Dios, pero lá'tu'biqui' udödi caztu' yöl-la' na'bán queëtu', tu' nadxi'ide'etu' libí'ili'. <sup>9</sup> Röjneli', böchi' luzá'atu', ca na' guca cate' ni' bentu' libán loli' que didza' dxi'a queë' Dios, ca béntica'stu' dxin zí'i, ate' rëla, en të dza bentu' dxin para cabí usaca' zí'itu' nituli' libí'ili'.

<sup>10</sup> Libí'ili' na' réajlë'ëli' Cristo, huáca gunli' ba nali, ate' nözinë' Dios ca na' gudá'entu' libí'ili' idú ca raza ládzë'ë Dios, en idú dxí'ado', en ca na' cuntu nu gaca bi innë que. <sup>11</sup> Lësca' caní nözili' ca bentu' ca runë' tu bönni' quégacabi' zxí'inë', guchízatu' icja nágali', en butípatu' ládzi'li' tu tuli'. <sup>12</sup> Busá'atu' ládzi'li' gunli' ca ral-la' gun nu nequi queë' Dios. Lë cazë' bulidzë' libí'ili' para gaca tsú'uli' ga na' rinná bë'ë Lë' lu bení' queë'.

<sup>13</sup> Que lë ni na' ca', rética'stu'-në' Dios: "Xclenu'." Caní runtu' tu' guzxi' lu ná'ali' xtídzë'ë Dios le biyönili' bë'ëtu' didza', calëga ca xtídzä' bönáchisö, pero ca le nácatë naca, xtídzë'ë Dios naca. Xtídzë'ë na' run dxin lu icja ládzi'do'oli' libí'ili', réajlë'ëli' Cristo. <sup>14</sup> Böchi' luzá'atu', raca queëli' ca raca quégaca bönachi queë' Dios, nupa néquiquequi queë' Jesucristo luyú Judea. Caní naca tu' chigudí'i guzáca'da'ali' lu ná'agaca bönachi uládz queëli', lëbisö ca na' gula'guí'i gula'záquië' légaquië' lu ná'agaca bönachi uládz quégaquië', nupa ni' ná'agaca bönni' judío. <sup>15</sup> Yugu' bönni' judío na' gulútië' Xanru' Jesús, en gulútië' ca' yugu' bönni' gulu'ë didza' uláz queë' Dios. Gula'bía ládzi'gaquië', en bulu'láguë' ca' netu'. Biti' tunë' le raza ládzë'ë Dios, tu' cabí ta'lé'enë' dxi'a yúgu'të bönachi izá'a. <sup>16</sup> Tu'záguë'ë ca' xinöztu', para cabí guntu' libán lógaca bönachi izá'a na' biti' nabábagaca légaquië', tu' ru'í'entu'

léguequi didza' para ulu'lágaca. Caní raca, tu'zántica'së' dul-la' nabága'gaquië', en chinabága'gaquië' xíguia' le run ga ichúguië' Dios queágaquië'.

*Pablo rë'ënë' tsöjyúë' böchi'ru' nacu'ë Tesalónica*

<sup>17</sup> Na'a, böchi' luzá'atu', ruhu'ínitu' ca runë' tu bönni' uzëbi tu' nulá'alentu' libí'ili' tu chí'ido', pero sal-la' bití' rilé'etu' libí'ili', bití' nál-la ládxi'tu' libí'ili'. Que lë ni na', ruí'i ládxi'rötu' ulé'etu' loli', tu' rizëda' ládxi'tu' guntu' caní. <sup>18</sup> Que lë ni na' ca' gú'unitu' guídatu' ga zóali', ate' neda', Pablo, le nácatë bë' ládxa'a guída' chopa tsonna luzuí, pero Satanás, tu' xihuí', buzaga' xinöztu'. <sup>19</sup> ¿Bizxi caz naca le run ga runtu' löza, o le run ga rudzéjatu', o le ral-la' idéli'tu', le uzí'itu' xibé lahuë' Xanru' Jesucristo cate' huödë'? ¿Naru' cabí libí'i cázali' na'? <sup>20</sup> Libí'i cázali' nácali' le run ga nácatu' bica' ba, en le run ga rudzéjatu'.

### 3

<sup>1</sup> Que lë ni na', cate' bítí'rö guca guá' ilentu', ben xtídza'tu' ugá'anatu' chópatu' lu yödzo Atenas, <sup>2</sup> ate' gusöl-la'tu'-bi' bi'i böchi'ru', Timoteo ga zóali'. Nácabi' bi'i huen dxin queë' Dios, en rúnlenbi' neda' tsözxön libán que didza' dxi'a queë' Cristo. Gusöl-la'tu'-bi' ga zóali' para cuéqui' libí'ili' tsutsu, en ichízabi' icja nágali' ca ral-la' tséajlë'ëli' Cristo, <sup>3</sup> para cabí soa nu gaca chopa ladxi' ni'a que le tu'saca' zi' bönachi ni netu'. Nöz quézili' zóaru' yödzölió ni para guá' ilenru' le caní. <sup>4</sup> Lësca' cate' ni' guzóalentu' libí'ili', busiyöntu' libí'ili' ca chizóa gaca le ulu'saca' zi' rë'u, le gaca ca na' chiguca queëtu', ate' nöz quézili' lë na'. <sup>5</sup> Que lë ni na', cate' bítí'rö guca guá' ilena', gusöl-la'a-bi' bi'i Timoteo ga zóali', para ududí'xjöi'ibi' neda' ca naca queëli' ca réajlë'ëli'-në' Cristo, en channö cabí gulú'u tu' xihuí' libí'ili' nöza dul-la', nu na' rigú'u bönachi nöza dul-la', en channö cabí böáca nítisö dxin na' bentu' ga zóali'.

<sup>6</sup> Cate' buzá'abi' bi'i Timoteo ga zóali', en budxinbi' ga zóatu', busiyönbi' netu' le naca dxi'a. Bë'ëbi' didza' ca na' réajlë'ëli' Cristo, en ca na' nadxí'igacali'-në' yugu' böchi' luzá'aru', en ca na', lu yöl-la' dxi'i ladxi' queëli' röjnética'sili' netu', enca' ca na' raca ládxi'li' ulé'eli' netu', ca na' netu' raca ládxi'tu' ca' ulé'etu' libí'ili'. <sup>7</sup> Que lë ni na', böchi' luzá'atu', cate' ni' gudí' guxzáca'tu' yúgu'të lë ni, en zían le guca queëtu', bidxín didza' queëtu' le buí'i zxön netu' cate' biyönitu' ca réajlë'ëli'-në' Cristo. <sup>8</sup> Na'a, nuhuöáca ládxi'tu' tu' riyönitu' rö'öli' tsutsu ca réajlë'ëli'-në' Xanru'. <sup>9</sup> ¿Nacxi caz gaca guíëtu'-në' Dios: "Xclenu" ca ral-la' guntu' ni'a que yúgu'të le run ga rudzeja ládxi'tu' lahuë' Dios queëru' ni'a que le nácali' libí'ili'? <sup>10</sup> Bayudxi rulidztu'-në' Dios, en rinábitu'-në' rëla, en të dza



para gaca ulé'etu' libí'ili', en usá'atu' le riyadzaj queéli' ca naca le réajlë'ëli'-në' Cristo.

<sup>11</sup> Na'a rinábitu'-në' Xúziru' Dios, enca' Xanru' Jesucristo, cu'ë netu' nõza ga idxintu' ga zóali'. <sup>12</sup> Lësca' rinábitu'-në' Xanru' gunë' ga gala, en gaca idú ca nadxí'ili' luzá'ali' tuli' ia'tuli', en ca nadxí'ili' yúgu'të bönachi, ca na' netu' nadxí'itu' ca' libí'ili'. <sup>13</sup> Rinábitu'-në' gunë' ga gaca tsutsu, en idú dxi'a icja ládxi'do'oli' lahuë' Xúziru' Dios ca sa'yéaj le naca lá'ayi, ate' gunë' caní ga idxinrö dza huödë' Xanru' Jesucristo, dzágagaca bönachi lá'ayi queë' Lë'.

## 4

### *Le runru' le raza ládxe'ë Dios*

<sup>1</sup> Ia'stú, böchi' luzá'atu', ni'a queë' Xanru' Jesús ráta'yutu' loli', en richízatu' icja nágalí' para gunlí' ca naca le chinazédali' lu na'tu' ca ral-la' gunlí' le raza ládxe'ë Dios. Ca na' chirunlí', ca' ral-la' gúntica'sili'.

<sup>2</sup> Chinöz quézili' yugu' le gunná bé'etu' libí'ili' uláz queë' Xanru' Jesús. <sup>3</sup> Le ré'ënë' Dios naca gácali' idú dxi'a, en bití'rö gunlí' le cabí naca tsahui', <sup>4</sup> en inözili' tu tuli' nacxi ral-la' sóalenlí'-nu nigula que queéli' idú ca sa'yéaj le naca lá'ayi, en gunlí' légacanu bal. <sup>5</sup> Biti' ral-la' sóalenlí'-nu nigula queéli' lu yöl-la' rizé ládxi' le ruá' dö', ca na' tun bönachi bití' nabábagaca Dios, en bití' núnbë'gaca Dios. <sup>6</sup> Ca nácagaca lë ni, cuntu nu ral-la' tödi bë', en cabí si' ye'e böchi' luzé' bagáchi'sö, tu' ichúguië' Lë cazë' Xanru' quégaca yúgu'të nupa tun le caní, gunë' ca na' chigúdxitu' libí'ili', en bentu' ba nalí que loli'. <sup>7</sup> Dios bulidzë' rë'u, calëga para gunru' le ruá' dö', pero para gácaru' idú dxi'a. <sup>8</sup> Caní naca, nu ruzóa tsölá'alö lë ni, calëga bönáchisö ruzóa tsölá'alö, pero Dios caz ruzóa tsölá'alö, tu' gusöl-lë'ë Lë cazë' Dios Bö' Lá'ayi queëru', Nu ruí' caní didza'.

<sup>9</sup> Biti' run bayudxi uzúaja' queéli' lu guichi ca ral-la' idxí'igacali'-në' böchi' luzá'ali', tu' chinazédali' la' libí'isili' lu në'ë Dios idxí'ili' luzá'ali' tuli' ia'tuli'. <sup>10</sup> Le nácatë nadxí'igacali'-në' yúgu'të böchi' luzá'aru' nacu'ë luyú Macedonia. Na'a, ráta'yutu' loli', böchi' luzá'atu', para idxí'igacaröli'-në' ca' yúgu'të böchi' luzá'ali'. <sup>11</sup> Ráta'yutu' loli' ca', gú'i ládxi'li' cözali' dxí'ado', en gunlí' yugu' le dë lu ná'asili', en gunlí' dxin len na'a cuinlí' ca na' chigunná bé'etu' libí'ili'. <sup>12</sup> Gunná bé'etu' libí'ili' caní para gaca gunlí' le naca dxí'ado' lógaca nupa bití' nabábagaca libí'ili', en caní gaca, bití' bi yadzaj queéli'.

### *Ca gaca cate' huödë' Xanru' Jesucristo*

<sup>13</sup> Lësca', böchi' luzá'atu', ré'ënitú inözili' ca raza quégaca nupa chinátigaca, para cabí huí'inili' ca tun ia'zica'rö bönachi bití' zoa le tun löza. <sup>14</sup> Channö réajlë'ëru' gútië' Jesús, en

bubanë', lësca' caní ral-la' uzzöni ládxi'ru'-në' Dios gunë' ga huödalengaca tsözxön Jesús nupa ni' chigulati, en gula'yéajlë' Lë'.

<sup>15</sup> Que lë ni na' rigu'xjöi'itu' libí'ili' xtídzë'ë Xanru' le rnna caní: "Rë'u ni zóaru' nabanru', en ugá'anaru' ga idxinrö dza huödë' Xanru' Jesucristo, bití' tsöjtságaru'-në' Cristo zí'aló ca nupa chigulati." <sup>16</sup> Caní gaca, tu' huötjë' Lë cazë' Xanru', en irúajë' yehua' yubá, ate' yön chi'ë, len yöl-la' unná bë' ulidzë', ate' yön ca' chi'ë gubáz lá'ayi lo, ate' yön ca' luzu ucödxë' Dios, ate' ulu'bán nupa na' chigulati, en gula'yéajlë' Cristo. <sup>17</sup> Ní'irö rë'u ni zóaru' nabanru', en nagá'anaru' luyú ni, uchisé' rë'u tsözxön len léguequi lu böaj lúzxiba para tsöjtságaru'-në' Xanru' lu bö'ös. Caní gaca, sóaléntica'siru'-në' Xanru'. <sup>18</sup> Que lë ni na', guli'huí' zxön luzá'ali' tuli' ia'tuli' ca nácagaca didza' ni.

## 5

<sup>1</sup> Na'a, ca naca dza na', o rëla na' cate' ilaca lë ni, bití' run bayudxi uzúaja' queëli' lu guichi, böchi' luzá'atu'. <sup>2</sup> Libí'ili' chinöz quézili' dxi'a ca gaca dza cate' huödë' Xanru'. Idxinë' tsárido'os ca ridxinë' gubán chi'i dzö'ölö. <sup>3</sup> Cate' ila'nná bönachi: "Raca dxi'a queëru', en bití' bi gaca queëru'", ní'irö la' idxintë' le usuniti léguequi, lë na' idxín quéguequi ca na' ridxín le rigu'í rizáca'nu nigula na' chizóa sóabi' bí'ido' queënu, ate' cuntú nu nutsa' ladaj bönachi yödzülió ni nu ulá cate' gaca lë na' gaca dza na'. <sup>4</sup> Na'a, böchi' luzá'atu', bití' zóali' chul-la niti, en que lë ni na' bití' idxín dza ni' queëli' bagáchi'sö ca ridxinë' bönni' gubán. <sup>5</sup> Yúgu'tëli' nácali' bönachi que bení', en que lahui' dza. Bití' nácaru' bönachi que chi'i dzö'ölö, en calëga que le naca chul-la. <sup>6</sup> Que lë ni na', bití' ral-la' tödi yëla loru' ca raca quégaca nupa bití' nabábagaca rë'u, pero ral-la' usubán ládxi'ru', en cözarú ba'a ládxi'do'. <sup>7</sup> Nupa tasi, chi'i dzö'ölö tasi, en nupa ta'zudxi, chi'i dzö'ölö ca' ta'zudxi. <sup>8</sup> Na'a, rë'u ni, nácaru' que lahui' dza, en ral-la' cözarú ba'a ládxi'do', tu' chinácuru' zxaru' le run chi'i rë'u, le naca yöl-la' réajlë' queëru' Dios, en yöl-la' nadxí'i, ate' le runru' löza uláru' naca ca tu lu'u guíë le run chi'i ícjaru'. <sup>9</sup> Caní naca, tu' nuzóë' Dios rë'u ni, calëga para idxinru' ga ichúguië' queëru', pero para uláru' tu' ruzxöni ládxi'ru'-në' Xanru' Jesucristo, <sup>10</sup> tu' gútië' Jesús uláz queëru' para sóaru' ibanru' tsözxön len Lë' cate' huödë', sal-la' chinátiru' o sóaru' ibanru' dza ni'. <sup>11</sup> Que lë ni na' ral-la' utí'pali' ládxi'li' tuli' ia'tuli', en gunli' tsutsu tuli' ia'tuli' ca na' chirunli'.

*Pablo richízië' icja nágagaquië' böchi' luzë'ë ta'yéajlë'ë Cristo*

<sup>12</sup> Ráta'yutu' loli', böchi' luzá'atu', gúnbë'ëli' nupa tun xichinë' Xanru' ga zóali', nupa na' ta'nná be'e libí'ili' uláz queë' Xanru', en tu'sá ládxi'li'. <sup>13</sup> Ráta'yutu' loli' ca', gunli' légaquië'

bal lu yöl-la' nadxí'i queéli', tu' tunë' dxin na'. Guli'cöza dxi'ado' tuli' len ia'tuli'.

<sup>14</sup> Lësca' caní richízatu' icja nágalí', böchi' luzá'atu', para usá'ali' ládxi'gaca nupa bití' túngaca dxin, en utípalí' ládxi'gaca nupa tu'huöaj ládxi'guequi, en gácalenlí' nupa bití' naca tsutsuca ta'yéajlé' Cristo, en gácalí' nöxaj ladxí' lógaca yúgu'të bönachi.

<sup>15</sup> Guli'gún chi'i cuinlí' para cabí uzí' lëbi luzá'ali', en cabí guá'ali' dö' que nu ruá' dö' queéli', pero guli'güí' ládxi'li' gúntica'silí' le naca dxi'a que luzá'ali' tuli' ia'tuli', en quegaca yúgu'të bönachi.

<sup>16</sup> Buli'dzéjatica'sö,

<sup>17</sup> en buli'lídzatica'së' Dios,

<sup>18</sup> en guli'guíë' Lë': "Xclenu'."

Caní ral-la' gunlí' ni'a que yúgu'të le raca queéli', tu' nácagaca lë ni le rë'ënë' Dios gunlí' tu' nácalí' queë' Jesucristo.

<sup>19</sup> Bití' uzóa dxilí' le rulídzatica'së' Dios Bö' Lá'ayi libí'ili'.

<sup>20</sup> Bití' uzóali' tsölá'alö xtídzë'ë bönni' ru'ë didza' uláz queë' Dios.

<sup>21</sup> Guli'sí' bë' yúgu'të, en guli'sí' lu ná'ali' le naca dxi'a.

<sup>22</sup> Bití' bi gútsa'li' le ruá' dö'.

<sup>23</sup> Lë cazë' Dios, Nu run ga zoa dxi icja ládxi'do'oru', gunë' ga gácalí' idú dxi'a, en gun chi'ë bö' naca cázali', en icja ládxi'do'oli', en idútë le nácalí', ate' cuntu nu gaca bi innë queéli' dza ni' huödë' Xanru' Jesucristo. <sup>24</sup> Runë' Dios ca rnnë', Bönni' na' bulidzë' libí'ili'. Lë cazë' gunë' yugu' lë ni.

*Pablo rígu'ë yugu' böchi' luzë'ë lu në'ë Dios*

<sup>25</sup> Böchi' luzá'atu', buli'lidzë' Dios, en inábili'-në' gácalenë' netu'.

<sup>26</sup> Buli'gapa Dios yúgu'të böchi' luzá'aru', en unída'li' légaquië' lu yöl-la' nadxí'i queéli'.

<sup>27</sup> Ni'a queë' Xanru' Dios ruchi'a libí'ili' ulábali' guichi ni lógaca yúgu'të böchi' luzá'aru' nabábagaquië' Cristo.

<sup>28</sup> Rinábida'-në' Xanru' Jesucristo uzá' ládxi'ë queéli' le nácagaca dxi'a queë'. ¡Ca' gaca!

## DIDZA' BUROPI GUSÖL-LË'Ë PABLO YÖDZÖ TESALÓNICA

*Pablo rugapë' Dios bönachi queë' Cristo nacua' Tesalónica*

<sup>1</sup> Neda', Pablo, rugapa' Dios libí'ili', zóali' Tesalónica. Nácali' queë' Xúziru' Dios, enca' queë' Xanru' Jesucristo. Silvano, en bi'i Timoteo dzágagaquië' neda'. <sup>2</sup> Rinábitu' Xúziru' Dios, en Xanru' Jesucristo, uzá' ládxë'ë queëli', en gunë' ga soa dxi icja ládxi'do'oli'.

*Dios ichúguië' quégaca bönachi dul-la' ila'nítigaca cate' huödë' Cristo*

<sup>3</sup> Ral-la' guíetica'stu'-në' Dios: "Xclenu" ca naca queëli', böchi' luzá'atu', ate' naca dxi'a guntu' caní, tu' zeaj rácarö idú ca réajlë'ëli'-në' Dios. Lësca' caní, ca nadxí'ili' luzá'ali' tuli' ia'tuli' zeaj rácarö idú. <sup>4</sup> Que lë ni na', len yöl-la' rudzeja riguixjö'ötu' ca naca queëli' lógaca bönachi queë' Dios ni, tu' ribózali' zxön ladxi', en réajlë'ëli' Dios sal-la' ta'bíada' ládxi'gaca bönachi libí'ili', en riguí'i rizáca'da'ali', pero ruá' rilenli' yúgu'të. <sup>5</sup> Yugu' lë ni taca bë' naca tsahui' ca ruchi'a rusöröë' Dios bönachi. Ru'ë lataj riguí'i rizáca'li' na'a, para gácali' lesaca' tsázali' ga ni' rinná bë'ë Lë'.

<sup>6</sup> Naca tsahui' ca gunë' Dios, ubi'ë quégaca nupa tu'saca' zi' libí'ili', gunë' ga ila'guí'i ila'zaca' nupa na'. <sup>7</sup> Ia'stú, libí'ili' riguí'i rizáca'li' na'a, ate' ubi'ë Dios queëli', gunë' ga uzí' ládxi'li' tsözxön len netu', dza ni' ilá' lahuë' Xanru' Jesucristo, cate' irúajë' yehua' yubá. Yugu' gubáz lá'ayi ni'a në'ë ilunë' Lë' tsözxön, en ulu'lu'ë lahui yöl-la' huáca zxön queë'. <sup>8</sup> Ilá' lahuë' Cristo dza ni' ca tu guí' zxön cate' ni' gunë' zi' nupa bití' núnbë'gaca Dios, en bití' túngaca ca rnna didza' dxi'a queë' Xanru' Jesucristo. <sup>9</sup> Yugu' bönni' caní, uzí' lëbë' légaquië', ate' tsaz tsöjtsázagaquië' lu guí' gabila. Ila'cuitë' tsaz lahuë' Xanru', ga nalá'gaca yöl-la' zxön queë', en yöl-la' huáca queë'. <sup>10</sup> Caní gaca dza ni' cate' huödë' para gaca queë' yöl-la' ba ni'a que le nácagaca bönachi lá'ayi queë', ate' ulu'bani ni'a que le benë' ga nácagaca yúgu'të nupa ta'yéajlë' Lë'. Caní gaca ca' queëli' tu' guyéajlë'ëli' le bentu' ba nalí que loli' ca naca queë' Jesús.

<sup>11</sup> Que lë ni na' ca', rulídzatica'stu'-në' Dios queëru', en rinábitu'-në' gácalenë' libí'ili', en gunë' ga gácali' lesaca' idéli'li' lë na' bulidzë' libí'ili' para uzí'ili' xibé. Lësca' rinábitu'-në' gunë' ga gaca idú yúgu'të le ruí'i ládxi'li' gunli' le naca dxi'a, en yúgu'të dxin runli' lu yöl-la' réajlë' queëli' Lë'. Len yöl-la' huáca queë' Dios huáca gunli' lë ni. <sup>12</sup> Caní gaca, gaca yöl-la' ba que

Lë' Xanru' Jesucristo ni'a que le runli', ate' gácali' libí'ili' bica' ba ni'a que le gunë' Lë', gaca ca naca le buzá' ládxe'ë queëli' Dios queëru', enca' Xanru' Jesucristo.

## 2

### *Ulu'i lahuë' Bönni' Xihui'*

<sup>1</sup> Na'a, ca naca que dza huödë' Xanru' Jesucristo, en ca gaca, udutubë' rë'u queë' Lë', ráta'yutu' loli', böchi' luzá'atu', <sup>2</sup> para cabí güi'ili' lataj nu gun chixi libí'ili' ca nácagaca le guzxi' lu ná'ali'. Biti' cuéqui böniga icja ládxi'do'oli' ni'a que bi ta'nnë' bönni' ta'zi' yë'ë, ta'nnë' zóalenë' Dios Bö' Lá'ayi légaquië', o ni'a que bi didza' tu'i bönachi, o ni'a que bi nazúaj tu lu guichi ta'nnë' netu' gusöl-la'tu', le rnna: "Chigudödi dza huödë' Xanru'." <sup>3</sup> Biti' ca' güi'ili' lataj nu si' ye'e libí'ili', tu' cabí idxín dza ni' huödë' Jesús channö cabí ila'lá' lahui zí'alö zían nupa ila'dá'baga' Dios, ate' ilá' lahuë' Bönni' Xihui', bönni' na' ral-la' tsázië' lu guí' gabila. <sup>4</sup> Bönni' ni uzáguë'ë, ate' lu yöl-la' run ba zxön cuinë' tá'baguë'ë yúgu'të le nequi queë' Dios, o le tun zxön bönachi lu yöl-la' run Dios bal quéguequi. Gunë' bönni' na' caní ga idxintë cö'ë ca Dios caz lu yudo' ga naca xilatjë' Dios, en gun cuinë' ca Dios.

<sup>5</sup> ¿Naru' cabí röjneli' busiyönda' libí'ili' yugu' lë ni cate' ni' zóalena' libí'ili'? <sup>6</sup> Na'a, núnbë'ëli' Nu ruzaga' xinözë' Bönni' Xihui' na', para cabí ilá' lahuë' zí'alö ga idxinrö dza queë'. <sup>7</sup> Chirún dxin le nagachi' que le naca xihui', pero ná'atë zoa Nu ruzaga' xinözë' Bönni' Xihui' na' ga idxinrö dza ucuíta cuini Nu na' ruzaga' xinözë'. <sup>8</sup> Ní'irö ilá' lahuë' Bönni' Xihui' na', ate' Xanru' Jesucristo ucul-lë' lë' len bö' irúaj ru'ë, en usunítië' lë' len le tsëpi yösa bení' que dza huödë'. <sup>9</sup> Cate' idxinë' Bönni' Xihui' na', len yöl-la' huáca que Satanás tu' xihui' ilá' lahuë'. Len yöl-la' huáca que le cabí nácatë, gunë' yúgu'të yöl-la' huáca zxön, en yúgu'të le ilaca bë', en yúgu'të le ilún ga ulu'bani bönachi. <sup>10</sup> Len yöl-la' huáca que le cabí nácatë, gunë' caní lógaca nupa ila'niti tu' cabí gula'zi' lu në'eguequi idú ládxi'guequi le naca idútë li, para ulu'láguequi. <sup>11</sup> Que lë ni na' Dios gu'ë lataj idxín quéguequi tu nu run yöl-la' huáca, nu si' ye'e léguequi para ila'yéajlë' le cabí nácatë. <sup>12</sup> Caní gaca para ila'baga' xíguia' yúgu'të nupa bití' gula'yéajlë' le naca idútë li, pero gula'yaza ládxi'gaca le cabí naca tsahui'.

### *Nupa gurö cazë' Dios para ulu'lágaca*

<sup>13</sup> Böchi' luzá'atu', libí'ili' na' nadxí'inë' Xanru' libí'ili', ral-la' guíëtica'stu'-në' Dios: "Xclenu'" ni'a que le naca queëli', tu' chigurö cazë' Dios libí'ili' dza ni'te para uláli' ni'a que le runë' Dios Bö' Lá'ayi, para gácali' idú tsahui' tu' réajlë'ëli' le naca idútë li. <sup>14</sup> Para gaca caní queëli', Dios caz bulidzë' libí'ili',

para idéli'li' gunli' tsözxón Xanru' Jesucristo lu beni' queë'. Caní gaca ni'a que didza' dxi'a runtu' libán que.

<sup>15</sup> Que lë ni na', böchi' luzá'atu', guli'sóa tsutsu, en guli'gún chi'i didza' na' nazédali', le bé'lentü' libí'ili', en buzúajtu' queëli' lu guichi. <sup>16-17</sup> Rinábitu'-në' Xanru' Jesucristo, en Xúziru' Dios, utipë' ládxi'li', en gunë' ga gácali' tsutsu ca naca yúgu'të le naca tsahui' runli', en yúgu'të didza' dxi'a ruí'ili'. Lë cazë' nadxí'inë' rë'u, en bennë' queëru' le ruhuí' zxóntica'sö rë'u, en le naca dxi'a runru'löza, yugu'lë na' buzá' ládxi'ë Dios queëru'.

### 3

#### *Le ral-la' inábiru'-në' Dios*

<sup>1</sup> Ia'stú, böchi' luzá'atu', buli'lidzë' Dios, en inábili'-në' gácalenë' netu', runtu' libán ni, para së xtídze'ë Xanru', ate' ilún le bal bönachi, para gaca ni ca na' guca ga ni' zóali' libí'ili'. <sup>2</sup> Inábili'-në' ca' para ulatu' lu ná'agaquië' bönni' xihui' tuá' dö', tu' cabí ta'yéajlë' yúgu'të bönachi Dios. <sup>3</sup> Na'a, tu' runë' Xanru' ca rnnë', gunë' ga gácali' tsutsu, en gun chi'ë libí'ili', para cabí idzunli' lu na' tu' xihui'. <sup>4</sup> Ruzxöni ládxi'tu'-në' Xanru' ca naca queëli', gunli' yugu' lë ni si' gunábitu' libí'ili', ca na' chirunli'. <sup>5</sup> Rinábitu'-në' Xanru' usë'ë ládxi'li' para idxí'ili'-në' Dios, en cözali' zxon ladxí' ca na' benë' Cristo.

#### *Ca run bayudxi gunru' dxin*

<sup>6</sup> Ni'a que Lë' Xanru' Jesucristo ruchí'atu' libí'ili', böchi' luzá'atu', icuítali' ga nacu'ë böchi' luzá'aru' ta'dasë' ca', en bití' tunë' ca naca xibá buséditu' libí'ili'. <sup>7</sup> Nöz quézili' ral-la' gunli' ca runtu' netu'. Bití' gudásitu' ca' netu' ga ni' zóali'. <sup>8</sup> Bití' gudágusötu' le bénnali' queëtu', pero lu yöl-la' ruúbi ruguí'i, en lu yöl-la' ricuidi' bentu' dxin rëla, en te dza para cabí usaca' zí'itu' nituli' libí'ili'. <sup>9</sup> Caní bentu' para gácatu' loli' ca tu le ru-luí' libí'ili' ca ral-la' gunli', sal-la' dë lu na'tu' inábatu' bi gunli' queëtu'. <sup>10</sup> Lësca' cate' ni' guzóalentu' libí'ili', buchí'atu' libí'ili' caní, le rnna: "Channö cabí rë'ënë' nu bönni' gunë' dxin, bití' güí'ili' le gahuë'." <sup>11</sup> Canísö rnnatu' tu' riyönitu' nútsa'gaquië' ládjali' yugu' bönni' ta'dasë' ca', bití' bi dxin tunë', pero ta'dasë' ca' bi tun bi ta'nnë'. <sup>12</sup> Ni'a queë' Xanru' Jesucristo ruchí'atu' yugu' bönni' tunë' caní, en richízatu' icja nágagaquië' ilunë' dxin lu yöl-la' riböza dxí'ado', para gaca ilahuë' le nequi quegacasë'.

<sup>13</sup> Na'a, böchi' luzá'atu', bití' soa dxili', gúntica'sili' le naca dxi'a. <sup>14</sup> Channö núti'tës bönni' bití' gunë' ca rnna xtídza'tu', le ruzúajtu' lu guichi ni, guli'gún ga gaca bë'ë bönni' na', en bití' gunli' tsözxón lë' para utuí'inë'. <sup>15</sup> Bití' ral-la' ilé'eli'-në' ca tu bönni' bití' rilé'enë' libí'ili' dxi'a, pero guli'sá' ládxi'ë ca böchi' cázali'.

*Pablo rigu'ë lu në'ë Dios yugu' böchi'ru' nacu'ë Tesalónica*

<sup>16</sup> Rinábitu'-në' Xanru' gúntica'së' ga cuía dxi icja ládxi'do'oli' ca naca yúgu'të le runli', en sóalenë' yúgu'tëli'. Lë cazë' runë' ga rö'ö dxi icja ládxi'do'oru'.

<sup>17</sup> Neda', Pablo, len na' caza' ruzúaja' lu guichi ni le rugapa' Dios libí'ili', ate' naca tu le naca bë' yúgu'të guichi risöl-la'a. Canísö ruzúaja' lu guichi. <sup>18</sup> ¡Le ruzá' ládxe'ë Xanru' Jesucristo queëru' gaca queëli' yúgu'tëli'! ¡Ca' gaca!

## DIDZA' ZÍ'ALÖ GUSÖL-LË'Ë PABLO QUEËBI' BÍ'I TIMOTEO

*Pablo rugapë' Dios bí'i Timoteo*

<sup>1</sup> Neda', Pablo, naca' gubáz nasöl-lë'ë Jesucristo. Caní naca' tu' caní gunná bë'ë Dios, Nu rusölá rë'u, enca' tu' gunná bë'ë caní Xanru' Jesucristo, Nu na' runru' löza. <sup>2</sup> Rugapa' Dios li', böcha'ado' Timoteo. Nacu' ca zxi'ini caza' tu' benru' tsözxön xichinë' Dios. Rinábida'-në' Xúziru' Dios, enca' Xanru' Jesucristo uzá' ládxë'ë quiu', en huéchi' ládxë'ë li', en gunë' ga soa dxi icja ládxí'do'o.

*Pablo rus'ë ládxí'bi' Timoteo ca naca xibá cabí naca idú*

<sup>3</sup> Ráta'yua' lo' na' a gunu' ca na' gúta'yua' lo' cate' ni' guyija' luyú Macedonia, para ugá'anu' lu yödzo Éfeso, en inná bé'enu' bal-lë' bönni' ni' cabí ulu'sédinë' tu xibá yúbölö, <sup>4</sup> en cabí ilunë' zxön yugu' didza' ridasö, en lágaca ziántërö cö' xuz xtó'ogaca bönachi, yugu' le tun ga tu'i ládxí'gaca bönachi le nácagaca nítisö. Yugu' le caní bití' tun tsutsu bönachi queë' Dios ca naca le ta'yéajlë' Lë'.

<sup>5</sup> Le rë'ëni gun lë ni rea' li', naca para ila'dxi'i bönachi luzë'eguequi, naca idú ládxí'gaca, en gaca dxi'a le ta'zá' ládxí'gaca, en gaca idú le ta'yéajlë' Dios. <sup>6</sup> Ca nácagaca lë ni, bití' bulu'rúajë' bal-lë' bönni' dxi'a, pero gula'guélë'ë tu nöza yúbölö, en tunë' bal yugu' le bití' nácatë. <sup>7</sup> Të'ënnë' ulu'sédinë' bönachi ca naca le rinná bë' xibá queë' Dios, sal-la' bití' ta'yéajni'inë' lë na' tu'sédinë', en bití' ta'yéajni'inë' le ta'nnë' nácatë.

<sup>8</sup> Rë'u nöziru' naca dxi'a xibá gunná bë'ë Dios, channö nu rugún le dxin ca ral-la' gun. <sup>9</sup> Lë ni nöziru': Dios gudixjë' xibá queë', calëga para inná be'e bönachi tsahui', pero para inná be'e bönachi caní:

Nupa ta'dá'baga' le rinná bë' xibá na'.

Nupa bití' túngaca ca rinná bë' xibá na'.

Nupa tu'cá'ana Dios cá'asö.

Nupa tun le naca xihui'.

Nupa bití' túngaca Dios zxön.

Nupa tu'cá'ana le nequi queë' Dios cá'asö.

Nupa tuti xuz xiná'aguequi.

Nupa tuti bönachi.

<sup>10</sup> Nupa tun le ruá' dö'.

Yugu' bönni' nacua'lenë' la' löjödxi bönni'gaquië'.

Nupa ta'bán yugu' bí'ido'.



Nupa ta'zí yě'.

Nupa tun tsutsu xtídza'guequi, ta'nná le cabí nácatē.

Nupa ta'dá'bagá yugu' xibá tsahui'.

<sup>11</sup> Nöziru' naca caní tu' bidxín queëru' didza' dxi'a buzá' ládxë'ë Dios queëru'. Lë' náquië' lá'ayi, en budödë' lu na'a didza' dxi'a na' runa' libán que.

*Pablo rë' Cristo: "Xclenu" tu' buéchi' ládxë'ë lë'*

<sup>12</sup> Rea'-në' Xanru' Jesucristo, Nu rutipa ládxa'a, "Xclenu" tu' buzzöni ládxë'ë neda', en buzóë' neda' guna' xichinë'. <sup>13</sup> Caní benë' sal-la' zí'alö neda' gunnë' zi'a queë', en gudxía ládxa'a bönachi queë', en zían le bi'a dö' quéguequi, pero Cristo buéchi' ládxë'ë neda', tu' bena' caní lu yöl-la' bití' réajni'i quia' cate' ni' bití' réajlë'ënida' Lë'. <sup>14</sup> Na'a, zxöntërö naca le buzá' ládxë'ë quia' Xanru' Jesucristo, lë na' run ga réajlë'ëru' Lë', enca' ga nadxí'iru'-në'.

<sup>15</sup> Didza' idütë li lë ni, en le naca lesaca' ila'zí' lu ná'agaca yúgu'të bönachi, le rna: Lë cazë' Jesucristo bidë' yödzölió ni para busölë' bönachi dul-la', ate' busölë' neda' sal-la' nácara' bönni' dul-la' ca yúgu'të bönachi. <sup>16</sup> Que lë ni na' buéchi' ládxë'ë neda', ate' bulu'e lahui Jesucristo ni'a quia' neda', bönni' dul-la', ca naca yöl-la' zxon ladxi' idú queë', para gaca' tu le ruluí'i lógaca nupa ila'yéajlë' Lë', en gata' quéguequi yöl-la' na'bán idú. <sup>17</sup> Na'a rnnía': ¡Yöl-la' ba Dios, Nu rinná bé'tica'sö, Nu catu caz údxi que, en Nu bití' gaca ilé'ëru', la's dui Dios Nu nözi caz yúgu'të! ¡Queë' Lë' gácatíca'sö yöl-la' run bal, en yöl-la' ba, na'a dza, en yúgu'të dza zá'gaca! ¡Ca' gaca!

<sup>18</sup> Zxí'ina'do' Timoteo, rudöda' lu no'o xibá ni para gunu' xichinë' Dios ca runë' tu bönni' idú ládxë'ë rejë' gudil-la, en para uzi'u xibé yugu' le gula'guíxjö' zí'alö nupa ni' guluí'i didza' uláz queë' Dios ca gaca quiu'. <sup>19</sup> Len yöl-la' réajlë' quiu' Cristo ral-la' gunu' caní, naca idú dxi'a icja ládxi'do'o. Chigula'chixi gula'nigui bal-la bönachi, nupa bulu'zóa tsölá'alö le réajlë'ëru' Cristo. <sup>20</sup> Caní gulunë' Himeneo, en Alejandro, nupa na' busana' lu na' Satanás tu' xihui' para ila'zëdë' ca ral-la' ilunë', para cabirö ila'nnë' zi'ë que le nequi queë' Dios.

## 2

*Le rusedi rë'u ulídzaru'-në' Dios*

<sup>1</sup> Que lë ni na' le naca lo le richízia' icja ná'agaca bönachi naca ca ral-la' ulídzaru'-në' Dios, en ca ral-la' gátayuru' lahuë', en ca ral-la' inábiru'-në' gunnë' bi riquíniru', en ca ral-la' guiëru'-në': "Xclenu'." Yugu'lë ni ral-la' gunru' uláz quéguequi yúgu'të bönachi. <sup>2</sup> Lësca' caní ral-la' gunru' uláz quégaca nupa ta'nná bë', en quégaca yúgu'të nupa ná'agaca lo. Caní ral-la' gunru' para gaca dxi'a queëru', en gata' queëru' yöl-la' riböza

tsáhui'do'. Ral-la' gunru' caní lu yöl-la' réajlë' queëru' Dios, en lu yöl-la' ba'a ladxi' queëru'. <sup>3</sup> Lë ni naca dxi'a, en le raza ládxë'ë Dios, Nu rusölá rë'u. <sup>4</sup> Dios caz rë'ënë' ulu'lágaca yúgu'të bönachi, en rë'ënë' ilúnbë'e le naca idútë li. <sup>5</sup> Tuzë' náquië' Dios, en tuzë' bönni' ruúnë' dzaga Dios, en bönachi. Nu ni naca Jesucristo, Nu gulaj bönachi. <sup>6</sup> Lë cazë' budödi cuinë' lu yöl-la' guti, le benë' tu' nözi dul-la' nabága'gaca yúgu'të bönachi. Dios benë' ba nalí queë' cate' bidxín dza queë' gútië'. <sup>7</sup> Ca naca lë ni, Dios buzóë' neda' para guna' libán que, en gaca' gubáz nasöl-lë'ë Cristo, para usédigacada' bönachi izá'a ca naca le réajlë'ëru' Cristo, en ca naca le naca idútë li. Rilítëda', en bití' ca' rizí' yë'a.

<sup>8</sup> Na'a, rë'ënda' ulu'lidzë' bönni' Dios, en iláta'yuë' lahuë' gáti'tës, nácaqaquië' idú dxi'a, en cabí ila'lenë' luzá'agaquië', en cabí ila'dil-la dídza'gaquië'. <sup>9</sup> Lësca' caní, rë'ënda' ilácunu nigula le naca ba'a. Le naca lachi le ral-la' ulu'lu'ínu lahui naca yöl-la' nöxaj ladxi', en le naca idú ladxi', en calëga le tu'pá'asinu icja lógacanu len oro, en yugu' bugá, en lari' nazáca'da'. <sup>10</sup> Yugu' le dxi'a tunnu ulu'lu'í lahui le nácazacanu ca na' run le tácunu le naca ba'a. Caní ral-la' ilunnu nigula núnbë'gacanu Dios. <sup>11</sup> Ral-la' ila'cuá'anu yugu' nigula dxisö cate' nu rusedi lézacanu, en ila'cuá'anu nöxaj. <sup>12</sup> Biti' runna' yugu' nigula lataj ulu'sédinu, en calëga ila'nná bé'enu yugu' bönni'. Ral-la' ila'cuá'anu dxisö ga nudúbigaca bönachi queë' Cristo. <sup>13</sup> Caní ral-la' gaca, tu' buzóë' Dios zí'alö Adán, ate' gudödi na' buzóë'-nu Eva. <sup>14</sup> Adán na', bití' guzxi' ye'e tu' xihui' lë', pero nigula queë', guzxi' ye'e lënu. Caní guca, gudítsjanu xibá queë' Dios, <sup>15</sup> pero ulanu nu nigula ruzóanu-bi' bí'ido' channö gúntica'sinu ca röjlöz le réajlë'ëru' Dios, en yöl-la' nadxí'i, en channö gácanu idú dxi'a, en idú ladxi'.

### 3

#### *Ca ral-la' ilácagaquië' bönni' tapa chi'ë bönachi queë' Cristo*

<sup>1</sup> Didza' idútë li lë ni rna: Channö ru'í ládxe'ë nu bönni' gáquië' nu gapa chi'i bönachi queë' Cristo, dxin dxi'a rizë ládxe'ë. <sup>2</sup> Nu bönni' rapa chi'ë bönachi queë' Cristo run bayudxi gáquië':

Tu bönni' cuntu nu gaca bi innë queë'.

Zoa túzinu nigula queë'.

Ral-la' gáquië' ban ladxi', en idú ladxi', en nöxaj ladxi'.

Ral-la' gu'ë ga ila'cu'ë böchi'ru' ta'dxinë' lidxë'.

Ral-la' gáquië' bönni' nazéqui'de'enë' usédinë' bönachi.

<sup>3</sup> Biti' gáquië' bönni' re'jë', en calëga bönni' sínia'.

Biti' gaquië' bönni' rizë ládxi'së' si'ë dumí.

Ral-la' gáquië' bönni' dxi'i ladxi', en zxön ladxi'.

Biti' gáquië' bönni' ruhuídi'në'.

<sup>4</sup>Ral-la' gáquië' bönni' rinná bé'enë' dxi'a bönachi nacuá' lidxë'. Ral-la' ilunbi' zxi'inë' ca rnna xtídzë'e lu yöl-la' run bal xúzgacabi'.

<sup>5</sup>¿Naru' huácatsö tu bönni' gapa chi'ë bönachi queë' Dios channö cabí raca inná bé'enë' dxi'a bönachi nacuá' lidxë'?

<sup>6</sup>Biti' ral-la' gáquië' tu bönni' si' gusi lahuë' të'ë Cristo, para cabí tödi bë' gun ba zxön cuinë', en biti' gaca queë' ca na' guca que tu' xihui', nu ben ba zxön cuini, ate' Dios guchúguië' que tsöjgá'ana lataj chul-la. <sup>7</sup>Lësca' ral-la' gáquië' bönni' ta'nná dxi'a queë' nupa cabí nabábagaca bönachi queë' Cristo, para cabí soa nu uzóa lë' tsölá'alö, en para cabí idzunë' lu yalaj que tu' xihui'.

*Ca ral-la' iláquië' bönni' tácalenë' bönachi queë' Cristo*

<sup>8</sup>Lësca' caní ral-la' iláquië' bönni' tácalenë' bönachi queë' Cristo:

Ral-la' iláquië' bönni' idú ládxi'gáquië'.

Biti' iláquië' bönni' tu'rixë' didza'.

Biti' iláquië' bönni' té'ajë'.

Biti' iláquië' bönni' ta'zë ládxi'së' dumí.

<sup>9</sup>Ral-la' gaca ilapa chi'ë idútë le réajlë'ëru' Cristo.

Ral-la' ilaca idú dxi'a icja ládxi'do'gáquië'.

<sup>10</sup>Yugu' bönni' ni ral-la' si' bë'ëli' légaquië' zí'alö, ate' ní'irö gata' lu ná'agaquië' ilácalenë' bönachi queë' Cristo, channö cabí zoa nu gaca bi innë' queégaquië'. <sup>11</sup>Lësca' caní, nigula que queégaquië' ral-la' ila'cuá'anu idú ládxi'gacanu, en cabí ilácanu unnë' que luzë'e. Ral-la' ilácanu zxön ladxi', en ilácanu li ladxi' lu yúgu'të le tunnu. <sup>12</sup>Yugu' bönni' ilácalenë' bönachi queë' Cristo ral-la' soa túzinu nigula que queégaquië'. Lësca' ral-la' ila'nná bé'enë' dxi'a zxi'inigaquië', enca' bönachi ulidxi que queégaquië'. <sup>13</sup>Run bayudxi gaca caní, tu' ta'déli'në' lataj ga ilún bal bönachi xtídzá'gáquië', channö tunë' dxi'a dxin tunë' tácalenë' bönachi queë' Cristo, ate' ilácarë' rugu ladxi' para ilu'ë didza' ca naca le réajlë'ëru' Jesucristo.

*Le bigachi' que le reaj ládxi'ru'-në' Dios*

<sup>14</sup>Yugu' didza' ni ruzúaja' quiu' lu guichi, sal-la' runa' löza uduyútea' li'. <sup>15</sup>Channö huadzéda', ruzúaja' quiu' didza' ni para inözinu' naca ral-la' gunu' lógaca bönachi nacuá' lidxë' Dios, nupa nácgaca bönachi queë' Dios ban, en nácgaca tsutsu, en ta'guíxjö' dxi'a le naca idútë li. Nácgaca ca yugu' ya'zxön, en le nunída'gaca zö'ö, le nácgaca tsutsu, en ta'zón yu'u. <sup>16</sup>Le nácatë, zxöntëro naca le bigachi' que le reaj ládxi'ru'-në' Dios, ca na' nazúaj lu guichi le rnna:

Dios buluí'i lahuë', gúquië' bönachi.

Guca bë' náquië' tsahui' tu' guzóalenë' Dios Bö' Lá'ayi Lë'.

Gulácalenë' gubáz lá'ayi queë' Dios Lë'.  
 Guca libán queë' lógaca bönachi izá'a.  
 Gula'yéajlë' bönachi yödzölió Lë'.  
 Dios buchisë' Lë' xitsá' ga nayëpisëtëre'.

## 4

### *Nupa ulu'huöaj ládxi'gaca ca naca le réajlë'ëru'-në' Cristo*

<sup>1</sup> Yálajdo' riguíxjö'ë Dios Bö' Lá'ayi, rnnë': Dza tsöjsëtëgaca, ila'dá'baga' bal-la bönachi Cristo. Ulu'huöaj ládxi'gaquië' ca naca le réajlë'ëru' Cristo. Ulu'zë nágagaquië' xtídza'gaca bönachi nacuá'len bö' ta'zí' yë léguequi, ate' ulu'zë nágagaquië' yugu' xibá quéguequi bö' xihui'. <sup>2</sup> Ulu'zë nágagaquië' xtídza'gaca bönachi tu'lu'isö tsahui' cuínguequi. Yugu' bönachi na' tu'í didza' le cabí nácatë, en chinazidi ládxi'do'guequi, para cabí uxösa léguequi. <sup>3</sup> Caní naca, tu'záguë'ë xinözguequi nupa tē'ëni ulu'tsaga ná'agaca, en ta'nná bé'enë' bönachi para cabí ilágugaca le nagu'ë Dios para uzí'iru' xibé, lë na' huáca ilágugaca nupa ta'yéajlë' Dios, nupa na' chinúnbë'gaca le naca idútë li, en tē' Dios: "Xclenu" cate' tahuë' le. <sup>4</sup> Dxi'a naca yúgu'të le benë' Dios, en bití' bi ral-la' uzóaru' tsölá'aló channö ráguru' le, en rëru'-në' Dios: "Xclenu'." <sup>5</sup> Rusedi xtídzë'ë Dios rë'u, Lë' únë' dxi'a yúgu'të le gáguru' channö ulídzaru'-në' Dios, en inábiru'-në' gun lá'ayë' lë na' gáguru'.

### *Ca rurúajë' dxi'a huen dxin queë' Jesucristo*

<sup>6</sup> Channö usédinu' yugu' böchi' luzá'aru' yugu' didza' ni, urúaju' dxi'a, en gacu' huen dxin dxi'a queë' Jesucristo, en gaca bë' nazëdu' dxi'a ca naca didza' que le réajlë'ëru'-në' Cristo, en ca naca xibá dxi'a rapa chi'u. <sup>7</sup> Gurú'una yugu' didza' ridasö que yödzölió ca naca didza' tu'ínu yugu' nigula gula. Béntica'sö le gun ga gacu' tsutsu para gunu' ca rē'ënë' Dios. <sup>8</sup> Látí'do'os uzi'u xibé gunu' le gun ga gácarö nál-la ni'a no'o, pero idú uzi'u xibé gunu' ca rē'ënë' Dios. Cate' runru' caní, lë ni run ga runru' löza sóaru' ibanru' yödzölió ni, enca' sóaru' ibanru' dza zá'gaca, tödi uzá'aru' yödzölió ni. <sup>9</sup> Didza' idútë li lë ni, en le naca lesaca' ila'zí' lu ná'agaca yúgu'të bönachi. <sup>10</sup> Que lë ni na', rusáca'da' zi' cuinru' runru' dxin, tu' runru' löza Dios ban. Cristo gútië' para usölë' yúgu'të bönachi. Tu'zí' xibé le benë' nupa na' ta'yéajlë' Lë'.

<sup>11</sup> Gunná be'e, en busedi bönachi ilún yugu' lë ni. <sup>12</sup> Cuntu nu ral-la' uzóa li' tsölá'aló tu' nacu' bi'i ra'bán, pero ral-la' gunu' le ulu'í nupa ta'yéajlë' Dios ral-la' ilún ca runu' li'. Caní ulu'ínu' légaquië':

Len didza' ru'u, en len le runu'.

Ca nadxí'ínu' luzó'o, en ca ru'u lataj zóalenë' Dios Bö' Lá'ayi li'.

Ca runu' ca rnnö', en ca nacu' idú tsahui'.

<sup>13</sup> Tsanni za'a idxina' quiu', bé'tica'sö ladxi' ulabu' guichi lá'ayi lógaca bönachi nacuá' ga ni' zu'. Guchiza icja nágagaquië' lë ni, en busedi légaquië'. <sup>14</sup> Biti' udödu' cá'asö le buzá' ládxë'ë Dios quiu', lë na' bennë' quiu' ca na' gula'nná nupa ni' gulu'í didza' uláz queë' Dios, cate' ni' bönni' gula tapa chi'ë bönachi queë' Cristo gula'xóa ná'agaquië' li', en bulu'lidzë' Dios.

<sup>15</sup> Béntica'sö yugu' lë ni. Bé'tica'sö ládxu'u gunu' caní, para ila'lé'e yúgu'të bönachi ca na' zeaj ridéli'nu' le nequi queë' Cristo. <sup>16</sup> Gudapa chi'i cuinu', en gudapa chi'i xibá rusédiru'. Béntica'sö yugu' lë ni, ate' channö gunu' caní, uló' li', en ulu'lágaca ca' nupa ila'yöni li'.

## 5

### *Ca ral-la' gunbi' Timoteo ni'a quégaca bönachi queë' Cristo*

<sup>1</sup> Biti' uzenu' bach yugu' bönni' gula, pero guchiza icja nágagaquië' didza', tsca nácagaquië' xuz cazu'.

Guchiza icja nágagacabi' bi'i bönni' ra'bán didza', tsca nácagacabi' bi'i böchi' cazu'.

<sup>2</sup> Guchiza icja nágagacanu nigula gula didza', tsca nácagacanu xiná' cazu'.

Guchiza icja nágagacabi' bi'i nigula ra'bán didza', tsca nácagacabi' bi'i zan cazu', ca na' röjölöz le naca idú dxi'a.

<sup>3</sup> Ben bal yugu' nigula ba guti bönni' que queëgacanu, nácagacanu túzinu. <sup>4</sup> Channö zóanu tu nigula caní nacuá'abi' bi'i queënu o xzí'ini xi'sóanu, ral-la' ila'zédabi' ilunbi' ca rë'ënë' Dios, para ilácalenbi' zí'alö bönachi nacuá' lídxigacabi', en ulu'bí'ibi' quégaquië' xuz xiná'agacabi'. Lë ni naca dxi'a, en le raza ládxë'ë Dios. <sup>5</sup> Na'a, nigula na' nagá'ananu túzinu, runnu löza Dios, ate' rëla, en te dza rinábatca'sinu lahuë' Dios, en rulídzanu Lë' ni'a quégaca bönachi queë', <sup>6</sup> pero nigula túzinu na' runnu ca naca le rizë ládxí'nu nácanu ca tu nigula chinátinu cate' ni zóanu nabannu. <sup>7</sup> Lë'sca' caní, gunná be'e bönachi nacuá' ga ni' zu', para ilún ca sa'yéaj yugu' lë ni, para ilaca bönachi cuntu nu gaca bi innë quéguequi. <sup>8</sup> Channö zoa nu bönni' cabí rugahuë' yugu' di'a dza queë', en le nácarö lo, channö cabí rugahuë' bönachi nacuá' lidxë', chigudá'baguë'ë le réajlë'ëru' Cristo, en nácarë' xihui' ca nu cabí réajlë' Dios.

<sup>9</sup> Túzinu nigula zoanu túzinu caní chiyú'urönu ca tsónnalalaj iz huáca ibábanu nupa gácalenli', channö cabí buca'ananu-në' bönni' queënu para sóalennu-në' ia'tué' bönni'. <sup>10</sup> Run bayudxi soa nu gun ba nalí queënu ca nácagaca le dxi'a runnu. Gácalenli'-nu channö buscúlunu-bi' yugu' bí'ido', en channö ruí'ínu ga ila'cuá' böchi'ru' zá'gaquië' yödzo zi'tu', en channö ruí'ínu le ilë'aj ilágugaca bönachi queë' Dios, en channö rácalennu nupa ta'guí'i ta'zaca',

en channö rúntica'sinu yúgu'të le naca dxi'a.

<sup>11</sup> Yugu' nigula túzinu biti' yu'igacanu tsónnalalaj iz, biti' ibábagacanu nupa gácalenli', tu' ilunnu ca ta'zësö ládxi'gacanu, en ila'dá'baga'nu Cristo, en ilé'ëninu ulu'tsaga ná'agacanu leyúbölö. <sup>12</sup> Caní gaca, ila'bága'nu dul-la' tu' tu'zóanu tsölá'alö le gula'yéajlë'ënu Cristo zí'alö. <sup>13</sup> Lësca' ilácanu nigula xöhuëdi, en nigula ta'dasö ca', en calégasö ilácanu xöhuëdi, pero lësca' ilácanu nigula unnë que luzë'e, en tsöjgútsa'gacanu ga yúbölö, en ila'nnanu le cabí nácatë. <sup>14</sup> Que lë ni na', rë'ënda' ulu'tsaga ná'agacanu leyúbölö nigula túzinu cani yú'ugacanu iz cuidi', en ulu'scúlanu-bi' yugu' bí'ido', en ila'nná bé'ënu bi'i nacuá'abi' yu'u que queëgacanu, para cabí ilu'ínu nu ridá'baga' rë'u lataj bi innë queëru', rë'u na' réajlë'ëru' Cristo. <sup>15</sup> Caní ralla' gaca, tu' chibulu'bíga'nu bál-lagacacnu, ate' tunnu ca rë'ëni Satanás tu' xihui'.

<sup>16</sup> Channö nútité's bönni' o nigula nu réajlë' Cristo, nacuá'anu nigula túzinu lídxigaca nupa na', ral-la' ilácalen légacanu, para cabí ulu'saca' zí' bönachi queë' Cristo. Caní gaca, bönachi queë' Cristo na' gaca ilácalen yugu' nigula nagá'anagacanu túzinu.

<sup>17</sup> Benrö bal yugu' bönni' gula tapa chi'ë bönachi queë' Cristo, yugu' bönni' na' ta'nná bé'ë dxi'a, en béntërö ca' bal yugu' bönni' gula na' tunë' dxin, tunë' libán, en tu'sédinë' bönachi. <sup>18</sup> Nazúaj lu guichi lá'ayi le rnna: "Biti' cu'u du ruá'aba' bëdxi na' rulíbiba' zxoá' xtila." Rnna ca': "Náquië' lesaca' nu bönni' huen dxin si'ë lazxjë'."

<sup>19</sup> Biti' si' lu no'o didza' ruí'i nu ruzegui didza' tu bönni' gula rapa chi'ë bönachi queë' Cristo, channö cabí nacuá' chopa tsonna nupa tun ba nalí que le benë'. <sup>20</sup> Nupa túntica'sö dul-la', busidxi léguequi lógaca yúgu'të bönachi queë' Cristo para iladxi ia'zíca'rö bönachi ni' Dios. <sup>21</sup> Ni'a queë' Xanru' Dios, en Xanru' Jesucristo, en ni'a quégaquië' gubáz lá'ayi rö queë', rinná bé'eda' li' gunu' ca ta'nná didza' ni. Tuz ca ral-la' uchi'a usöröu' yúgu'të bönachi, en biti' gunu' bal tuzë' bönni'. <sup>22</sup> Cuntu nu bönni' ixóatë no'o, cabí gunu' ga gáquië' huen dxin queë' Cristo, para cabí íbágu'u le runë' channö gunë' bönni' na' dul-la'.

<sup>23</sup> Bítirö guí'ju' nísasö. Tu' rúntica'sö bayá' lë'u ral-la' guí'ju' láti'do' xisi uva nal-la para cö' dxi'a lë'u.

<sup>24</sup> Yugu' dul-la' quéguequi bal-la bönachi ila'lá' lahui zí'alö cate' si' ila'dxín ga uchi'a usöröë' Dios léguequi, ate' tódi ni' ila'lá' lahui dul-la' nabága'gaca ia'zíca'rö bönachi. <sup>25</sup> Lësca' caní, ila'lá' lahui dxin dxi'a núngaca bönachi, ate' channö cabí nalá'gaca lahui, cuntu nu bönni' gaca ucáchë'ë tsaz dxin na' nunë'.

## 6

<sup>1</sup> Yúgu'të bönni' nadó'ogaca ral-la' ilúndë'ë bal xángaquië', para cabí gaca nu innë' zì' que La lá'ayi queë' Dios, en que xibá queë'. <sup>2</sup> Nupa ni' nacu'ë xángaca ta'yéajlë'ë Cristo, biti' ral-la' ulu'cá'ana cá'asó légaquië' tu' nácagaquië' böchi'guequi. Ral-la' ilunrö dxi'a xichíngaquië' tu' ta'yéajlë'ë Cristo, bönni' ni' tu'zi'ë xibé dxin dxi'a na', tu' nadxí'inë' Lë cazë' légaquië'. Ca naca lë ni, busëdi bönachi nacuá' ni', en guchiza le icja nágagaquië'.

*Le reaj ládxi'ru'-në' Dios le ruzí'iru' xibé*

<sup>3</sup> Channö zoa nu bönni' rusëdinë' xibá yúbölö, en biti' rusëdinë' yugu' didza' dxi'a queë' Xanru' Jesucristo, ca naca xibá na' rusedi rë'u ca ral-la' gunru' ca rë'ënë' Dios, <sup>4</sup> bönni' ni run ba zxön cuinë', en biti' bi nözinë'. Didza' biti' naca dxi'a rizë ládxi'ë ca nácagaca didza' böniga, en didza' bizaj, yugu' le tun ga tu'zx'é bönachi luzë'eguequi, en ta'díl-lalen luzë'eguequi didza'. Lësca' tun didza' caní ga ta'nnë' zì' bönachi que luzë'eguequi, en ta'zá' ládxi'gaca que luzë'eguequi le cabí nácate. <sup>5</sup> Lësca' caní tun ga ta'díl-latica'së' didza' bönni' biti' ta'yéajni'inë', nupa biti' nazi' lu në'eguequi le naca idútë li. Téquini huáca ila'zì' dumí zían channö ilúngaca tsözxön nupa ta'yéaj ládxi'gaca Dios. Gucuíta ga nacuá' bönachi caní. <sup>6</sup> Zxön naca le ruzí'iru' xibé cate' len yöl-la' riböza zxön ladxi' reaj ládxi'ru'-në' Dios. <sup>7</sup> Biti' bi nuá'aru' cate' ridxinru' yödzölió, en lësca' caní, biti' bi uá'aru' cate' uzá'aru' yödzölió ni. <sup>8</sup> Que lë ni na', channö dësö queëru' le gáguru', en le gácuru', ral-la' udzéjaru'. <sup>9</sup> Yugu' bönni' té'ënnë' gata' quégaquië' yöl-la' tsahui', gaca quégaquië' le si' bë' légaquië' le xihui', ate' ila'yu'ë lu yalaj que tu' xihui', ate' lu yöl-la' biti' bi nözi quégaquië' zían le ila'zë ládxi'gaquië', le ilún ditaj légaquië'. Yugu' lë ni ulu'suniti légaquië', en ilún ga ila'nítië' tsaz. <sup>10</sup> Tu' ta'zë ládxi'gaca bönachi dumí, lë ni run ga tun yúgu'të le cabí naca tsahui'. Bal-lë' bönni', tu' ta'zë ládxi'gaquië' le, bulu'cá'anë' le gula'yéajlë'ë Cristo, en chiraca quégaquië' zían le tu'saca' zì' légaquië'.

*Nu run dxin queë' Cristo naca ca tu bönni' rejë' gudil-la*

<sup>11</sup> Na'a, bönni' queë' Dios, gucuíta ga raca le caní. Bë'tica'sö ládxi'u gunu' le naca tsahui', en le rë'ënë' Dios. Guyéajlë'tica'së' Cristo, en bidxí'i yugu' luzó'o. Bë' ladxi' gacu' zxön ladxi', en nöxaj ladxi'. <sup>12</sup> Ca runë' tu bönni' idú ládxi'ë rejë' gudil-la, ben dxin que le réajlë'ëru' Cristo, ate' beni quiu' yöl-la' na'bán idú. Para gaca caní bulidzë' Dios li'. Dxi'a guca le gunnó' yalaj lulu ca réajlë'u Cristo, lë na' gunnó' lógaca zían nupa tun ba nalí que didza' bë'u. <sup>13-14</sup> Ni'a queë' Xanru' Dios, Nu na' nabánigaca yúgu'të le nacuá', enca' ni'a queë' Jesucristo, Nu ben ba nalí le

naca dxi'a le gunné' yálajdo' lahuë' Poncio Pilato, rinná bé'eda' li' gun chi'u yugu' lë na' gunná bé'enë' Cristo rë'u. Ral-la' gacu' idú tsahui', en biti' bi gunu' le gü'i lataj nu bi innë quiu', ga idxintë dza ni' ulu'i lahuë' Xanru' Jesucristo. <sup>15</sup> Cate' idxín dza na' huödë' Jesús, Dios ulu'ë lahui Lë'.

¡Dios náquië' lá'ayi!

¡Tuzë' Lë' dë lu në'ë yöl-la' unná bë',  
en rinná bé'enë' yúgu'të nupa ta'nná bë',  
en náquië' ca' Xángaca yúgu'të nupa nácacaca xan!

<sup>16</sup> ¡Tuzë' Lë' zóatica'së'!

¡Zoë' lu bení' ga biti' gaca nu idxín rácasö que!

¡Catu caz nu bilé'e Lë', en biti' gaca nu ilé'e Lë'!

¡Queë' Lë' gácativa'sö le run Lë' bal, en yöl-la' unná bë'!

¡Ca' gaca!

<sup>17</sup> Gunná be'e yugu' bönni' dë quégaquië' yöl-la' tsahui' dza ni zóaru' na'a, para cabí ilún ba zxön cuíngaquië', en para cabí ulu'zxöni ládxi'gaquië' yöl-la' tsahui' na' biti' naca löza. ¡Ral-la' ilunë' löza Dios ban, Nu rúnnada' queëru' yúgu'të le ruzí'iru' xibé! <sup>18</sup> Gunná be'e légaquië' ilunë' le naca dxi'a, para ila'yanda' dxin dxi'a tunë', lë na' naca tu yöl-la' tsahui' idú. Ral-la' bi ulu'nödzjë' quégaca bönachi yechi', en ilu'i ládxi'gaquië' léguequi. <sup>19</sup> Channö ilunë' caní, ulu'tubë' yöl-la' tsahui' na' naca idú, le ulu'zi'ë xibé dza si' za', en ila'déli'në' yöl-la' na'bán idú.

### *Le gulu'ë Pablo lu ná'abi' bi'i Timoteo*

<sup>20</sup> Böcha'ado' Timoteo, ben chi'i le nadödi lu no'o. Gucuíta ga nacuá' nupa tuí'i didza' cá'asö, en yugu' didza' biti' nazaca', en yugu' didza' bizxaj, yugu' didza' na' tuí'i nupa ta'nnasö tácada', ate' nazí' yé'eguequi ca naca lë na' tun. <sup>21</sup> Bal-la bönachi gula'zí' lu në'eguequi yugu' didza' caní, ate' gula'chixi gula'nigui ca naca le réajlë'ëru' Cristo.

Rinábida'-në' Dios uzá' ládxi'ë quiu' le nácacaca dxi'a queë'.

¡Ca' gaca!



## DIDZA' BUROPI GUSÖL-LË'Ë PABLO QUEËBI' BI'I TIMOTEO

### *Pablo rugapë' Dios bi'i Timoteo*

<sup>1</sup> Neda', Pablo, naca' gubáz nasöl-lë'ë Cristo. Caní naca' tu' rë'në' Dios gaca' caní, para caní gaca le guzxi' lu në'ë, gunnë' queëru' yöl-la' na'bán idú, le ruzá' ládxe'ë Jesucristo queëru'. <sup>2</sup> Rugapa' Dios li', böcha'ado' Timoteo. Nacu' ca zxi'ini caza' tu' benru' tu zxön xichinë' Cristo, ate' nadxi'ida' li'. Rinábida'-në' Xúziru' Dios, enca' Xanru' Jesucristo, uzá' ládxe'ë quiu', en huéchi' ládxe'ë li', en gunë' ga cö' dxi icja ládxi'do'o.

### *Timoteo ral-la' gunbi' ba nalí queë' Jesucristo*

<sup>3</sup> Rea'-në' Dios: "Xclenu'" ca naca quiu' cate' rulidza'-në' Dios. Biti' rizóa dxía' rinaba' ni'a quiu' rëla, en te dza lahuë' Dios, Nu na' runa' xichinë' idú ládxa'a ca na' gulunë' xuz xtá'ahua'. <sup>4</sup> Cate' röjneda' ca na' gurödxu', rizë ládxa'a ulé'eda' li', para gaca udzëjada' idú ládxa'a. <sup>5</sup> Rea'-në' Dios: "Xclenu'" tu' zoa le run ga röjneda' ca réajlë'u Cristo idú ládxi'u. Lësca' caní, gula'yéajlë'ënu xinó'o gula Loida, enca' xinó'o Eunice Lë' zí'aló ca li', ate' runa' löza, lësca' caní réajlë'u Lë' na'a.

<sup>6</sup> Tu' naca caní, rusá'a ládxi'u para usubanu' le bennë' Dios quiu', lë na' bidxín quiu' cate' ni' guxóa na'a li', en bulidza'-në' Dios. <sup>7</sup> Bö' na' bennë' Dios queëru' biti' naca tu bö' le gun ga gádxiru', pero bennë' queëru' Bö' Lá'ayi Nu run ga náparu' yöl-la' huáca, en run ga nadxi'iru' luzá'aru', en run ca' ga rinná be'e cuinru'. <sup>8</sup> Que lë ni na', biti' utuí'inu' gunu' ba nalí queë' Xanru', en biti' utuí'inu' ca raca quia' neda' ni, nadzuna' lidxi guíë tu' runa' xichinë', pero ben tsözxön nupa ta'guí'i ta'zaca' tu' tun libán que didza' dxi'a. Dios gunnë' yöl-la' huáca quiu' para gunu' caní. <sup>9</sup> Dios caz busölë' rë'u, en bulidzë' rë'u para gácaru' idú dxi'a. Biti' bulidzë' rë'u tu' zoa le dxi'a benru', pero bulidzë' rë'u tu' gú'uni quézinë' Lë', en tu' ruzá' ládxe'ë caní queëru'. Dza ni'te buzóë' caní queëru' zí'atëló ca guta' yödzülió ni, tu' néquiru' queë' Jesucristo. <sup>10</sup> Na'a, chibuluí'i lahui le ruzá' ládxe'ë Dios queëru', tu' buluí'i lahuë' Jesucristo Nu rusölá rë'u. Bugúë' yöl-la' guti, en bulu'e lahui yöl-la' na'bán idú na', le cabí ca' initi. Caní naca ca rnna didza' dxi'a.

<sup>11</sup> Cristo buzóë' neda' para guna' libán que didza' dxi'a na', en para gaca' gubáz queë' para usédigacada' bönachi izá'a. <sup>12</sup> Que lë ni na' riguí'i rizáca'a ca' yugu' le raca quia' ni, pero biti' rutuí'ida', tu' núnbë'a Nu na' réajlë'a. Runa' löza Lë', napë'

yöl-la' huáca gapa chi'ë le budöda' lu në'ë ga idxintë dza ni huödë'.

<sup>13</sup> Didza' dxi'a na' biyönnu' bena' libán que ral-la' gaca quiu' tu le ruluí'i ca ral-la' usédinu' bönachi ca réajlë'ëru' Jesucristo, en ca nadxí'iru' Lë'. <sup>14</sup> Ben chi'i le naca dxi'a na' nadödi lu no'o, ate' gaca gunu' caní len yöl-la' huáca queë' Dios Bö' Lá'ayi, Nu zóalen rë'u.

<sup>15</sup> Chinöz quézinu' ca na' gulunë' zian bönni' ta'yéajlë'ë Cristo nacu'ë luyú Asia bulu'béaj láchxi'gaquië' neda'. Figelo, en Hermógenes nabábagaquië' bönni' ni. <sup>16-17</sup> Rinábida'-në' Xanru' Dios huéchi' láchxë'ë bönachi nacuá' lidxë' Onesíforo, tu' butipë' láchxa'a bönni' ni zían luzuí. Cate' bidxinë' Roma, idú láchxë'ë buguiljë' neda', ate' budzölinë' neda'. Biti' butuí'inë' ni'a quia' neda' tu' nadzuna' lidxi guíë ni, nága'a du guíë. <sup>18</sup> Rinábida'-në' Xanru' huéchi' láchxë'ë lë' dza ni' idxinë' lahuë' Dios. Chinöz quézinu' ca na' gúcalenë' bönni' ni rë'u, cate' ni' gúzóaru' yödzö Efeso.

## 2

*Ral-la' gácabi' Timoteo ca tu bönni' idú láchxë'ë rejë' gudil-la*

<sup>1</sup> Na'a, xzí'ina'do', butipa láchxu'u ca naca le ruzá' láchxë'ë Jesucristo quiu'. <sup>2</sup> Didza' biyönnu' bë'a lógaca zían nupa tun ba nalí que, didza' ni budödi lu ná'agaquië' bönni' tunë' ca ta'nnë', bönni' gaca ulu'sédinë' ca' ia'bal-la bönachi.

<sup>3</sup> Ral-la' guá' ilenu' le ulu'saca' li' zi' ca na' ruá' rilén nu naca bönni' queë' Jesucristo idú láchxë'ë rejë' gudil-la. <sup>4</sup> Nu bönni' rejë' gudil-la, bití' ca' gútsë'ë yugu' le tun bönachi yödzölió ni, para tsaza láchxë'ë bönni' na' nuzóë' lë' gáquië' bönni' queë' rejë' gudil-la. <sup>5</sup> Lë'sca' caní, nu nutsa' lu huitaj, bití' bi ideli' channö cabí run ca ral-la' gun. <sup>6</sup> Nu bönni' gúz gú'una runë' dxin, zí'aló lë' uzi'ë xibé lë na' razë'. <sup>7</sup> Busá' láchxu'u lë ni rea' li', ate' Xanru' caz gunë' ga tséajni'inu' yúgu'të.

<sup>8</sup> Yöjné ca guca queë' Jesucristo. Guljë', en gúquië' xzí'ini xi'sóë' David, en gudödi gútië', bubanë' lu yöl-la' guti. Caní rnna didza' dxi'a runa' libán que. <sup>9</sup> Tu' runa' libán que didza' dxi'a, riguí'i rizáca'a le raca quia', ga ridxintë nága'a lidxi guíë ni, ca raca queë' tu bönni' huía' dö', pero bití' ca' nága'të xtídzë'ë Dios. <sup>10</sup> Que lë ni na' ruá' riléna' yúgu'të lë ni tu' nadxí'ida' nupa guröë' Dios, para ulu'lë' ca' légaquië'. Jesucristo caz runë' ga ulu'lágaca bönachi na' para ila'cuá' lu bení' idú queë'. <sup>11</sup> Catëz naca lë ni rnna:

Channö nátilenru' Lë', sóalenru'-në' ca' ibanru'.

<sup>12</sup> Channö guá' ilenru' le quí'i sáca'ru', inná bë'lenru' ca' Lë'. Channö ridá'baga'ru' Lë', Lë' tá'baguë'ë ca' rë'u.

<sup>13</sup> Sal-la' bití' runru' ca rnnaru', Lë' rúntica'së' ca rnnë'. Lë' bití' gaca tá'baguë'ë le náquië'.

*Nu bönni' huen dxin queë' Cristo rurúajë' dxi'a*

14 Busá' ládxi'gaca nupa nacuá' ga ni' zu' ca naca lë ni, ate' ni'a queë' Xanru' Dios gunná be'e légaquië' para cabí ila'dil-la dídzë'ë ca nácgaca didza' cabí nazáca'gaca. Yugu' didza' caní tun ga ila'niti nupa tu'zë nagui léguequi. 15 Bë'tica'sö ládxi'u urúaju' dxi'a lahuë' Dios para gacu' ca tu bönni' huen dxin bití' rutuí'inë' ca naca dxin nunë'. Dxi'ado' ral-la' ugunu' dxin didza' idútë li. 16 Na'a, gucuíta ga nacuá' nupa tuí'i didza' bití' nazaca', en didza' cá'asö, tu' tun didza' caní ga ilunrë' le cabí rë'ënë' Dios. 17 Ila'zë didza' tu'ë ca rizxön huë' nudzu' le ridúdu' rilá. Himeneo, en Fileto nabábagaquië' nupa tuí'i didza' caní. 18 Iropë' ni gula'chixi gula'níguinë' ca naca le naca idútë li, tu' ta'nnë' chigudödi dza ral-la' ulu'bán nupa chinátigaca, ate' gula'béquië' baröli bal-la bönachi ga ridxintë bítí'rö ta'yéajlë' Cristo. 19 Le benë' tsutsu Dios zóatica'sö, en dë tu le naca bë', le rnna: "Núnbë'ë Dios nupa néquiguequi queë'." Rnna ca': "Guli'cuíta ga raca le ruá' dö', yúgu'tëli' libí'ili' néquili' queë' Cristo."

20 Tu lu yu'u zxön yú'ugaca le néquini, calégasö oro, en plata, pero lësca' le néquini yaga, en yu. Bal-la tu'gún bönachi léguequi dxin ga liná', ate' ia'bal-la tu'gún léguequi dxin ga bití' naca liná'. 21 Para gácaru' ca naca lë na' tu'gún bönachi dxin ga liná', en para gaca gunru' le naca dxi'a, en gácaru' lesaca' ugunë' Xanru' ré'u dxin, ral-la' ucuítaru' ga raca le ruá' dö'. Channö gunru' caní, gácaru' lesaca' gunru' yúgu'të dxin dxi'a.

22 Gurú'una le tun ga nu së ladxi' le ruá' dö' ca raca quégaquië' bönni' ra'bando'. Bë' ladxi' gacu' tsahui'. Ben le run ga réajlë'u Cristo, en le run ga nadxí'inu' yugu' luzó'o, en le run ga ribözu' dxi'ado'. Ca nácgaca lë ni, ben tsözxön nupa tu'lidza Xanru', naca idú dxi'a icja ládxi'do'guequi. 23 Na'a, gurú'una yugu' didza' cá'asö, en didza' bití' nazaca', tu' chinöz quézinu' tun didza' caní ga ta'dil-la didza' bönachi. 24 Bönni' huen dxin queë' Xanru' bití' ral-la' tíl-lalenë' bönachi didza', pero ral-la' gáquië' nöxaj ladxi' lógaca yúgu'të bönachi. Ral-la' gaca usédinë' bönachi, en gáquië' ca' zxön ladxi'. 25 Lu yöl-la' nöxaj ladxi' ral-la' uzéajni'inë' nupa ta'dá'baga' le runë' libán que. Channö gunë' caní, nadxi ca' Dios gu'ë légaquië' lataj ulu'bí'i ládxi'gaquië' para ilúnbë'ë le naca idútë li. 26 Caní ulu'lë' lu yalaj que tu' xihui' ga nadzúngaquië', ate' ulu'huóáquië' tsahui' para ilunë' ca rë'ënë' Dios.

### 3

*Ca ilaca bönachi dza tsöjsétëgaca*

<sup>1</sup> Lësca' ral-la' inözinu' lë ni: Dza tsöjsétëgaca ilaca dza ila'gu'i ila'zaca' bönachi. <sup>2</sup> Yugu' dza ni' ila'cu'ë bönni' ilácagaquië' caní:

Ila'dxí'i la' cuíngacasë', en ulu'huídi'në'.

Ilún ba zxön cuíngaquië', en ulu'luí'i cuíngaquië' zxön.

Ila'nnë' zi'ë que le naca lá'ayi.

Ila'dá'baguë'ë xuz xiná'agaquië'.

Ilácagaquië' bönni' cabí ta'yaza ládxi'gaquië'.

Biti' ilunë' ca rë'ënë' Dios.

<sup>3</sup> Biti' ila'dxí'inë' ca ral-la' ilunë'.

Ilácagaquië' zidzaj ladxi'.

Ila'nnë' que luzá'agaquië'.

Biti' ila'nná be'e cuíngaquië'.

Ilácagaquië' bönni' dza'a.

Biti' ila'lé'enë' dxi'a le naca dxi'a.

<sup>4</sup> Ilácagaquië' hueti luzé'e, en bití ila'dzáguië' dxi'a.

Ulu'luí'i cuíngaquië' ca bönni' nayëpisëgaquië'.

Ila'dxí'inë' le ila'yázaso ládxi'gaquië', en calëga Dios.

<sup>5</sup> Ulu'luí'i cuíngaquië' ca bönni' núnbë'gaquië' Dios.

Ila'dá'baguë'ë le ruzá' ládxi'ë Dios queëru'.

Gucuíta ga nacua' bönachi caní. <sup>6</sup> Lësca' caní, lu yöl-la' banísa quégaquië' ila'yazë' gapa naca lu yu'u, en ila'zí' yé'enë' yugu' nigula bití' bi nözguequinu para ila'zí' lu ná'agacanu le ulu'sédinë'. Ila'bága'nu nigula na' dul-la' zían, en iluí'i ládxi'gacanu yugu' le ila'zësö ládxi'gacanu le cabí nazaca'.

<sup>7</sup> Ila'yönitica'sinu nigula ni didza' ilún libán que bönachi, pero bití' ca' ila'déli'nu ila'yéajni'ininu le naca idütë li. <sup>8</sup> Ca na' guláquië' Janes, en Jambres, bönni' ni' gula'dá'baguë'ë Moisés, lësca' caní ilácagaquië' bönni' ni, ila'dá'baguë'ë le naca idütë li. Ilácagaquië' chul-la niti, en ila'chíxinë' ca naca le réajlë'ëru' Cristo. <sup>9</sup> Biti' ila'déli'rönë', pero gaca bë' nácagaquië' bönni' bití' bi nözguequinë' lógaca yúgu'të bönachi, ate' gaca quégaquië' ca na' guca quégaquië' Janes, en Jambres na'.

### *Le rigu'ë Pablo lu ná'abi' bi'i Timoteo*

<sup>10</sup> Nöz quézinu' ca naca le rusédida' bönachi, en ca runa'. Nözinu' ca' le ruí'i ládxa'a guna', en ca réajlë'a Cristo, en ca naca' nöxaj ladxi', en ca nadxí'ida' luzá'a, en ca riböza' zxön ladxi'. <sup>11</sup> Nözinu' ca' yugu' le gula'bía ládxi'gaca bönachi neda', en yugu' le gudí'i guzáca'a, le gulaca quia' lu yödzö Antioquia, en lu yödzö Iconio, enca' lu yödzö Listra. Yugu' le gula'bía ládxi'gaca bönachi ni' neda' biá' guléna', ate' Xanru' Jesús busölë' neda' lu yúgu'të lë na'. <sup>12</sup> Yúgu'të nupa tē'ëni ilaca idú dxi'a tu' néquiguequi queë' Jesucristo, lësca' ila'gu'i ila'záquië' yugu' le ila'bía ládxi'gaca bönachi légaquië'.

<sup>13</sup> Na'a, bönni' tuá' dö', en bönni' ta'zí' yë'ë ilácarë' xihui'. Ila'zí' yé'enë' bönachi, ate' ila'zí' ye'e bönachi ca' légaquië'.

<sup>14</sup> Na'a, ben chi'i yugu' le buzëdu', en le guzxi' lu no'o, tu' nunbë' cazu' nupa bulu'sedi li'. <sup>15</sup> Ga gudela' nacu' bí'ido' núnbë'u le nazúajgaca lu guichi lá'ayi, le huáca ulu'zéajni'ide'e li' para uló' tu' réajlë'u Jesucristo. <sup>16</sup> Yúgu'të le nazúajgaca lu guichi lá'ayi guchízië' Dios icja ládxi'do'gaca bönachi queë', nupa na' bulu'zúaj lu guichi didza' na' bë'ë Dios. Lë na' nazúaj lu guichi nácada' lesaca' usedi rë'u, en ubéaj ga liná' le runru', en ugú'u rë'u tu nöza, en usedi rë'u para gácaru' tsahui'. <sup>17</sup> Caní run, para gaca sina' nu naca queë' Dios, en gácada' gun yúgu'të le naca dxi'a.

## 4

<sup>1-2</sup> Ni'a queë' Xanru' Dios, enca' Xanru' Jesucristo, rinná bé'eda' li' gunu' libán que xtídzë'ë Xanru'. Lë cazë' uchi'a usöröë' nupa ni nabángaca, en nupa chinátigaca, dza ni' huödë' idinná bë'ë. Bë' ladxi' gunu' lë ni channö raca dxi'a quiu' o bití' raca dxi'a. Lu yöl-la' zxön ladxi', guléaj ga liná' le tun bönachi. Busá' ládxi'gaquië', en guchiza icja nágagaquië' ca naca lë na' rusédiru'. <sup>3</sup> Caní ral-la' gunu' tu' idxín dza cate' bití' ulu'zë nágagaquië' xibá tsahui', pero ilë'ëninë' ila'yönnë' le ta'dánisinë'. Ca ta'zësö ládxi'gaquië' ulu'tubë' quégaquië' nupa ulu'sedi légaquië'. <sup>4</sup> Ulu'cá'anë' le naca idútë li, en ila'zí' lu ná'agaquië' yugu' didza' ridasö. <sup>5</sup> Na'a, ral-la' gacu' zxön ladxi' lu yúgu'të le runu'. Biá' gulén le ulu'saca' li' zí'. Ben libán que didza' dxi'a. Idú ládxi'u ben dxin le budödë' Cristo lu no'o gunu'.

<sup>6</sup> Ca naca quia' neda', nudödi cuina' lu në'ë Dios, ate' chizóa ilútië' neda' tu' runa' xichinë', ate' dza uzá'a yödzölió ni chizóa idxín. <sup>7</sup> Ca runë' tu bönni' idú ládxi'ë rejë' gudil-la, lësca' caní bena' neda' dxin, en chibudxi bena' le budödë' Cristo lu na'a guna', tu' bena' idú ca sa'yéaj le réajlë'ëru' Cristo. <sup>8</sup> Ia'stú, naca löza quia' idéli'da' le ral-la' ila'zí' nupa nácagaca tsahui', le gunnë' Xanru' quia' dza ni', ate' tsahui' naca ca ruchí'a rusöröë' rë'u. Calégasö quia' neda' gunnë' le, pero lësca' gunnë' le quégaca yúgu'të nupa ta'dxí'i Lë', en idú ládxi'guequi ta'böza dza huödë'.

### *Le buzúajë' lu guichi Pablo gunbi' Timoteo*

<sup>9</sup> Bë' ladxi' guídateo' ga ni zoa' <sup>10</sup> tu' guléaj ládxi'ë Demas neda', tu' nadxí'inë' le ruzi'ë xibé yödzölió ni, ate' guyijë' yödzö Tesalónica. Crescente guyijë' luyú Galacia, ate' bí'i Tito guyéajbi' luyú Dalmacia, tu' caní ben bayudxi ilunë'. <sup>11</sup> Tuzë' Lucas zóalenë' neda'. Guchë'ë-bí' bí'i Marcos para guídalenbí' li' tsözxön, tu' nácabi' gúnlenbí' neda' tsözxön xichinë' Cristo.

<sup>12</sup> Gusöl-la'a-bi' bi'i Tíquico lu yödzö Éfeso. <sup>13</sup> Cate' guídu', biá' quia' lari' guitsa' na' bucá'ana' lu yödzö Troas lu yu'u lidxë' Carpo, en biá' ca' quia' yugu' guichi, en le naca lo, biá' quia' yugu' guichi néquiguequini guídi.

<sup>14</sup> Alejandro, bönni' gubëdxi guié, zían le bi'ë dö' quia'. Lë cazë' Xanru' ubi'ë queë' ca' nácagaca le benë' bönni' ni quia'.

<sup>15</sup> Ben chi'i cuinu' queë' bönni' ni, tu' ridá'baga'dë'ë didza' runru' libán que.

<sup>16</sup> Cate' le zí'alö luzuí bidxina' lógaquië' bönni' yúlahui', cuntunu gúcalen neda', pero bulu'béaj ládxi'gaca yúgu'të bönachi neda'. Biti' rë'ënda' uzí' lëbë' Dios légaquië'. <sup>17</sup> Guzóalenë' Xanru' neda', en butipë' ládxa'a para údxi' guna' libán que xtídzë'ë para ila'yöni yúgu'të bönachi izá'a le. Caní guca, busölé' Xanru' neda', ate' guca quia' tsca burúaja' lu ruá'aba' bëdxi' guixi'. <sup>18</sup> Lë cazë' Xanru' usölé' neda' lu yúgu'të le cabí raca dxi'a, en gun chi'ë neda' ga idxíntea' ga rinná bë'ë Lë' ni yehua' yubá. ¡Gácatica'sö queë' yöl-la' ba yúgu'të dza zá'gaca! ¡Ca' gaca!

*Pablo rugapë' Dios bönachi queë' Cristo*

<sup>19</sup> Bugapa Dios Priscila, en Aquilo, enca' bönachi nacué' lidxë' Onesíforo. <sup>20</sup> Bugá'anë' Erasto lu yödzö Corinto, ate' bucá'ana'-në' Trófimo luyú Mileto tu' ré'enë'. <sup>21</sup> Bë' ladxi' guídu' ga zoa' zí'alö cate' idxín beo' ziaga. Eubulo, en Pudente, en Lino, en Claudia, en yúgu'të böchi' luzá'aru' ni tu'gapë' Dios li'.

<sup>22</sup> Rinábida'-në' Xanru' Jesucristo sóalenë' li'. ¡Gácalen li' le ruzá' ládxi'ë Dios quiu'! ¡Ca' gaca!

## DIDZA' GUSÖL-LË'Ë PABLO QUEËBI' BI' I TITO

### *Pablo rugapë' Dios bi' i Tito*

<sup>1</sup> Neda', Pablo, naca' huen dxin queë' Dios, en gubáz nasöl-lë'ë Jesucristo. Gusöl-lë'ë neda' para guna' ga ila'yéajlë' bönachi chigurö cazë' Dios, para ulu'únbë' le naca idútë li ca ral-la' gun nu nunbë' Dios. <sup>2</sup> Caní naca' tu' runa' löza uzi'a xibë yöl-la' na'bán idú le guzxi' lu në'ë Dios gunnë' queëru' dza ni'te, cate' si' gusí lo rata' yúgu'të le dë, ate' run cazë' Lë' le nazí' lu në'ë gunë'. <sup>3</sup> Cate' bidxín dza que, Dios bulu'e lahui xtídzë'ë, le gulu'ë lu na'a guna' libán que. Caní gunná bé'enë' Dios, Nu busölá rë'u, neda'. <sup>4</sup> Rugapa' Dios li', böcha'ado' Tito. Nacu' idú zxi'ini caza' tu' naca lébisö ca réajlë'ëru' Cristo. Rinábida-në' Dios Xuz, en Xanru' Jesucristo Nu busölá rë'u, uzá' ládxe'ë quiu', en huéchi' ládxe'ë li', en gunë' ga soa dxi icja ládxi'do'o.

### *Dxin queë' Cristo runbi' bi' i Tito luyú Creta*

<sup>5</sup> Que lë ni na' bucá'ana' li' luyú Creta, para usó'o le riyadzaj quégaca bönachi queë' Cristo nacua' ni', para ilácagaca idú bönachi queë' Cristo, en para ucú'u bönni' gula yúgu'të yödzö para ilún chi'ë bönachi queë' Cristo nacua' tu tu yödzö ni', ca na' chigunná bé'eda' li' gunu'. <sup>6</sup> Nu bönni' gula rapa chi'ë bönachi queë' Cristo ral-la' gáquië': Bönni' cuntú nu bi gaca innë queë'. Zoa túzinu nigula queë'.

Yugu' zxi'inë' ral-la' ila'yéajlë'ëbi' Cristo.

Biti' soa nu gaca innë quégacabi' ta'dá dzágasibi' ca', o ta'dá'baga'bi' xuz xiná'agacabi'.

<sup>7</sup> Nu bönni' rapa chi'ë bönachi queë' Cristo run bayudxi:

Biti' runë' le gü'i lataj nu bi innë queë' ca runë' xichinë' Dios.

Biti' gáquië' bönni' zidi o bönni' icja dza'a,

o bönni' re'jë', o bönni' ribíxjanë',

o bönni' rizé ládxi'sé' dumí.

<sup>8</sup> Ral-la' gu'ë ga ila'cu'ë böchi'ru' ta'dxinë' lidxë'.

Ral-la' sé ládxe'ë gunë' le naca dxi'a.

Ral-la' gáquië' bönni' réajni'i, en bönni' tsahui'.

Ral-la' gádxinë' Dios, en inná be'e cuinë'.

<sup>9</sup> Ral-la' gun chi'ë didza' idútë li ca chinazëdë',

para gaca ichizië' icja nágagaca bönachi ca sa'yéaj xibá dxi'a,

en para gaca usayjé' rú'agaca bönachi ta'nnë que.

<sup>10</sup> Caní ral-la' gáquië' tu' ta'dá'baguë'ë zían bönni', en tu'ë didza' biti' nazaca', en ta'zí' yé'enë' bönachi. Zían bönni' tunë'

caní nácagaquië' judío. <sup>11</sup> Yugu' bönni' ni, run bayudxi gunu' ga tsayaj ruá'agaquië', tu' tunë' ga ta'chixi ta'nigui yúgu'të bönachi nacuá' yu'u gapa ta'yázië', en tu'sédinë' le cabí ral-la' ulu'sédinë'. Caní tunë' para ila'z'isë' dumí.

<sup>12</sup> Tuë' bönni' gubábë' bönachi Creta ga na' zu', bönni' na' bë'ë didza' uláz que yudo' quégaquië', gunnë': "Ta'z'í yé'tica'së' bönni' Creta, en nácagaquië' ca böa' gu'a sínia'. Nácagaquië' bönni' huágulë'ë xöhuëdi." <sup>13</sup> Didza' ni benë' ba nalí quégaquië' naca idútë li. Que lë ni na' gudil-la légaquië' para gaca idú ca ta'yéajlë'ë Cristo, <sup>14</sup> en para cabí ulu'zë' nágagaquië' yugu' didza' ridasö quégaquië' bönni' judío, en bití' ilunë' ca ta'nná bë' bönachi nucá'anagaca le naca idútë li.

<sup>15</sup> Yúgu'të naca dxi'a quégaca nupa nácagaca dxi'a, pero quégaca nupa nácagaca xihui', en bití' ta'yéajlë', bití' bi naca dxi'a, pero nácagaca xihui' ga ridxintë le ta'bequi ícjaguequi, en le ta'zá' ládxi'gaca. <sup>16</sup> Ta'nnë' núnbë'gaquië' Dios, pero le túngaquië' bití' röjlöz le ta'nnë' tu' nácagaquië' bönni' tu'dí'inë' Dios. Ta'dá'baguë'ë xtídzë'ë, en bití' ca' gaca ilunë' le naca dxi'a.

## 2

*Xibá dxi'a le ral-la' usédiru'*

<sup>1</sup> Na'a, ral-la' gu'u didza' le röjlöz xibá dxi'a.

<sup>2</sup> Busedi yugu' bönni' gula:

Bití' ral-la' ilë'ajë'.

Ral-la' iláquië' ba'a ladxi', en bönni' ta'yéajni'inë'.

Ral-la' gaca idú ca ta'yéajlë'ë Cristo.

Ral-la' ila'dxí'inë' luzá'agaquië', en ila'bözë' zxön ladxi'.

<sup>3</sup> Busedi yugu' nigula gula:

Ilunnu le raza ládxe'ë Dios.

Cabí ila'nnënu que luzá'agacanu, en cabí ilë'ajnu.

Ral-la' ulu'sédinu le naca dxi'a.

<sup>4</sup> Ral-la' ulu'sédinu' nigula ni' yú'ugacanu iz cuidi' para ila'dxí'inu bönni' que queégacanu, enca' xzí'inigacanu.

<sup>5</sup> Ral-la' ilácanu nigula ta'yéajni'inu, en nigula dxi'a ladxi'.

Ral-la' ilún chí'inu le dë lídxigacanu, en ilácanu dxi'a.

Ral-la' ilunnu bal bönni' que queégacanu.

Ral-la' cabí bi ilunnu le gü'i lataj nu innë zi' que xtídzë'ë Dios.

<sup>6</sup> Busedi yugu' bönni' ni' nacu'ë iz cuidi':

Ral-la' ilácagaquië' bönni' ta'yéajni'inë'.

<sup>7</sup> Ral-la' gúntica'su' le naca dxi'a,

ulu'inu' bönachi caní ca ral-la' ilúngaca.

Ca rusédinu' ral-la' uluf'i nacu' idú ladxi', en ba'a ladxi'.

<sup>8</sup> Ral-la' usédinu' didza' dxi'a le cabí gaca nu bi innë que.

Caní gunu' ga utuf'inë' bönni' ridá'baguë'ë, en bití' gaca bi innë' queéli' runli' le ruá' dö'.



<sup>9</sup> Busedi böchi'ru' ni' ta'yéajlë'ë Cristo, en nadó'ogaquië':  
Ral-la' ila'cu'ë nöxaj lógaquië' xángaquië'.

Ral-la' ilunë' yúgu'të le ila'yaza ládxi'gaquië' xángaquië'.

Biti' ral-la' tá'baga'gaquië' le ta'nná bë'ë.

<sup>10</sup> Biti' bi ulu'cáchi'lanë'.

Ral-la' ulu'lu'í cuíngaquië' tsahui' ca naca yúgu'të le tunë'.

Caní ulu'í lo naca dxi'a xibá queë' Dios, Nu busölá rë'u.

<sup>11</sup> Cristo, bönni' na' buzá' ládxi'ë Dios queëru' chibulu'í lahuë' lógaca yúgu'të bönachi para ulu'lágaca. <sup>12</sup> Lë' rusédinë' rë'u ucá'anaru' le cabí raza ládxi'ë Dios, en cabí së ládxi'ru' le naca que yödzülió ni, pero cözaru' zxön ladxí', en gácaru' tsahui' dza ni zóaru' na'a, en gunru' ca rë'ëni quézinë' Dios.

<sup>13</sup> Ral-la' cözaru' le runru' löza le gun ga gácaru' bica' ba, lë na' gaca dza ni' cate' ulu'í lahuë' Jesucristo lu bení idú queë'. Náquië' Dios zxön, Nu rusölá rë'u. <sup>14</sup> Lë cazë' budödi cuinë' uláz queëru', para böá'uë' rë'u lu yúgu'të le naca xihui', ate' ruúnë' rë'u tsahui' para gácaru' bönachi queë', en gü'í ládxi'ru' gunru' le naca dxi'a.

<sup>15</sup> Yugu' lë ni bë' didza', en guchiza icja náagaca bönachi ni', ate' len yöl-la' unná bë' gudil-la léguequi. Béntica'sö caní, para cabí si' lataj nu ucá'ana cá'asö xtídz'u.

### 3

#### *Le ral-la' ilún bönachi ta'yéajlë' Cristo*

<sup>1</sup> Busá' ládxi'gaquië' böchi'ru' ni' ilunë' ca ta'nnë' bönni' dë lu ná'agaquië', en bönni' yúlahui', para ilunë' ca rna xtídz'a'gaquië'. Ral-la' ila'cu'ë sina' ilunë' le naca dxi'a. <sup>2</sup> Biti' bi le ruá' dö' ral-la' ila'nnë' que luzá'agaquië', en bití' ila'díl-lalenë' légaquië' didza', pero ral-la' ilácagaquië' nöxaj ladxí', en idú ladxí' lógaca yúgu'të bönachi.

<sup>3</sup> Lë'sca' rë'u, zí'alö gúcaru' yugu' bönni' bití' ta'yéajni'inë', en gudá'baga'ru' Dios. Gudarú' nanítiru', en gúcaru' ca nupa nadó'ogaca, tu' benru' le guzë ládxi'ru' le ruá' dö', en ia'bal-la le guyaza ládxi'ru'. Benru' ca' le ruá' dö', en buzxé'eru' luzá'aru'. Biti' bila'lé'e bönachi rë'u dxi'a, ate' rë'u bití' bilé'eru' dxi'a luzá'aru' turu' ia'turu'. <sup>4</sup> Ní'irö bulu'e lahui Dios, Nu rusölá rë'u. Naca bë' náquië' idú dxi'a, en nadxi'inë' yúgu'të bönachi, <sup>5</sup> tu' busölë' rë'u, calëga tu' zoa bi le naca dxi'a benru' rë'u, pero tu' buéchi' ládxi'ë rë'u. Bunë' rë'u dxi'a, en benë' ga nácaru' bönachi cubi. Dios Bö' Lá'ayi rucubë' rë'u. <sup>6</sup> Dios gusöl-lë'ë Dios Bö' Lá'ayi queëru' tu' néquiru' queë' Jesucristo, Nu rusölá rë'u. <sup>7</sup> Buzá' ládxi'ë queëru', en bunë' rë'u tsahui' para gata' yöl-la' na'bán idú queëru', le runru' löza gunnë' queëru'.

<sup>8</sup> Didza' idútë li lë ni nuzúaja' lu guichi. Rë'ënda' usédide'enu' yugu' bönni' ni' yugu' lë ni para ilu'í ládxi'gaquië' ilúntica'së'

le naca dxi'a tu' ta'yéajlë'ë Dios. Lë ni naca dxi'a, en nácada' lesaca' ila'zí' lu ná'agaca yúgu'të bönachi. <sup>9</sup>Na'a, biti' gu'u lataj nu gü'i didza' le cabí nazaca', o nu gü'i ladxi' ca nácagaca lágaca zióntë'ö cö' xuz xtó'ogaca bönachi, o nu tsöjgutsa' yugu' didza' bizxaj, en yugu' le ridil-la didza' ca naca que xibá queë' Moisés, tu' cabí bi nazáca'gaca le caní, ate' cuntu nu uzí' xibé didza' caní.

<sup>10</sup>Channö zoa nu bönni' ni', rubéajë' choplö bönachi queë' Cristo, tödi usó'o ládxe'ë tu ia'tú luzuí, bubéajë' bönni' na'. <sup>11</sup>Nöz quézinu' chiböáquië' caní nu bönni' biti' náquië' tsahuí, en runë' dul-la'. Chinabáguë'ë xíguia' ni'a que lë na' runë'.

*Le buzúajë' Pablo lu guichi le gunbi' bi'i Tito*

<sup>12</sup>Cate' isöl-la'a-në' Artemas o Tíquico ga zu', bë' ladxi' guídu' ga ni zoa' lu yödzo Nicópolis, tu' chinuna' quia' ugá'ana' ni yugu' beo' ziaga. <sup>13</sup>Zenas, bönni' na' rudödë' didza' ca rinná bë' bönachi yúlahuí, enca' Apolos, ila'dxinë' ga ni' zóali'. Bugú'u légaquië' nöza lu yöl-la' rácalen, para cabí bi yadzaj quégaquië'. <sup>14</sup>Busedi yugu' böchi' luzá'aru' ilúntica'së' le naca dxi'a, en bi ulu'nödzejë' quégaca nupa bi riyadzaj quéguequi, para gaca bë' caní le nácagaquië' queë' Cristo.

*Pablo rugapë' Dios bönachi queë' Cristo*

<sup>15</sup>Yúgu'të nupa nacuá'len neda' tu'gapa Dios li'. Bugapa Dios nupa ni' nadxí'igaca rë'u tu' ta'yéajlë' Dios. Le ruzá ládxe'ë Dios queëru' gácalen yúgu'tëli'. ¡Ca' gaca!

## DIDZA' GUSÖL-LË'Ë PABLO QUEË' FILEMÓN

### *Pablo rugapë' Dios Filemón*

<sup>1</sup> Neda', Pablo, dzágabi' neda' bi'i böchi'ru' Timoteo. Nadzuna' lidxi guié tu' runa' xichinë' Jesucristo. Rugapa' Dios li', Filemón. Nacu' bönni' nadxí'itu', en runu' xichinë' Cristo ca runtu' netu'. <sup>2</sup> Rugapa' Dios Apia, nigula quiu'. Nácanu zanru' réajlë'ënu Cristo. Rugapa' Dios ca' xzí'inu', Arquipo. Nácabí' queë' Jesucristo ca tu bönni' rejë' gudil-la, tu' runbi' xichinë' Lë' ca runtu' netu'. Lë'sca' rugapa' Dios bönnachi queë' Cristo tu'dubë' lu yu'u lidxu'. <sup>3</sup> Rinábida'-në' Xúziru' Dios, enca' Xanru' Jesucristo, uzá' ládxë'ë queë'li', en gunë' ga soa dxi icja ládxi'do'oli'.

### *Ca runë' Filemón tu' réajlë'ë Cristo*

<sup>4</sup> Rética'sa'-në' Dios queëru' "Xclenu'", en röjnética'sida' li' cate' rulidza'-në'. <sup>5</sup> Caní runa' tu' ridxín quia' didza' ca nadxí'inu'-në' Xanru' Jesús, en réajlë'u Lë', en nadxí'inu' ca' yúgu'të bönnachi rö queë'. <sup>6</sup> Rinábida'-në' Dios gunë' ga gunda' dxin libán runu' ca naca le réajlë'u Cristo, para ulu'zí' xibë nupa nacuá' ni' yúgu'të le naca dxi'a, le ruzá' ládxë'ë Jesucristo queëru'. <sup>7</sup> Rudzëjada', en ruzí' zxöna' tu' nadxí'inu' yugu' böchi'ru', en benu' li', böcha'a, ga bulu'huóaca ládxi'gaca bönnachi ta'yéajlë' Cristo.

### *Filemón ral-la' uniti lahuë'-bi' Onésimo, bi'i nadó'o queë'*

<sup>8</sup> Que lë ni na', sal-la' dë lu na'a tu' naca' gubáz nasöl-lë'ë Cristo inná bé'eda' li' ca ral-la' gunu', <sup>9</sup> ráta'yua' lo' len yöl-la' nadxí'i, neda' ni chinaca' bönni' gula, en yu'a lidxi guié tu' runa' xichinë' Jesucristo. <sup>10</sup> Ráta'yua' lo' uláz queëbi' Onésimo, bi'i na' bena' ga böácabi' queë' Cristo, en que lë ni na' nácabi' ca xzí'ini caza' ga ni nadzuna' lidxi guié.

<sup>11</sup> Bi'i ni, zí'alö biti' gúcabi' lesaca' quiu', pero na'a nácabi' lesaca' quiu' li', enca' quia' neda'. <sup>12</sup> Bi'i ni rusöl-la'a-bi' ga zu'. Ben bal lëbi' ca neda' caz runu' bal, tu' nadxí'ida'-bi'. <sup>13</sup> Gú'unida' ugá'analenbi' neda' ni, para uláz quiu' gunbi' xichina' tsanni ni yu'a lidxi guié tu' runa' libán que didza' dxi'a, <sup>14</sup> pero biti' bi' ré'ënda' guna' le cabí naca didza' quiu', para cabí guna' bayudxi gácalenu' neda', pero huáca gácalenu' neda' tu' ré'ëni quézinu' ca'. <sup>15</sup> Nadxi ca' que lë ni na' buzá'abi' Onésimo ga zu' tu chí'ido' para udxinbi' tsaz ga zu'. <sup>16</sup> Na'a, bíti'rö gácabi' quiu' ca tu bi'i nadó'o, pero gácabi' quiu' ca

bi'i böchi' casu', tu' nácabi' bi'i böchi'ru' réajlë'ëbi' Cristo, en nadxí'iru'-bi'. Nácabi' caní quia' neda', ate' ral-la' gácaröbi' ca' caní quiu', calégasö ca böchi' luzó'o, pero lësca' ca bi'i böchu'u réajlë'ëbi' Xanru' Jesucristo.

<sup>17</sup> Que lë ni na', channö nunu' neda' tuz, ben lëbi' bal ca neda' caz runu' bal. <sup>18</sup> Channö bi xíguia' benbi' quiu' o channö bi rál-la'bi' quiu', gunnátëz neda' ral-la'a. <sup>19</sup> Neda', Pablo, len na'a caza' ruzúaja' quiu' lu guichi lë ni: Neda' caz quixxa' bi rál-la'bi', en calëga guía' li': Lësca' ral-lu'u quia' yúgu'të le dë quiu' tu' bena' neda' ga napu' yöl-la' na'bán idú. <sup>20</sup> Ca' gaca, böcha'a. Channö dë le uzi'a xibó' tu' néquiru' queë' Xanru', ben lë na' chigúta'yua' lo' tu' naca' böchu'u réajlë'a Cristo, ate' caní gunu' ga huöáca ládxa'a.

<sup>21</sup> Ruzúaja' quiu' lu guichi ni, tu' ruzxöni ládxa'a li', gunu' ca rna xtídza'a, en nözda' gunu' ia'lati' ca lë na' chigúta'yua' lo'. <sup>22</sup> Lësca' rinaba' lo' upó'o quia' ga soa' lu yu'u lidxu', tu' runa' löza urúaja' lidxi guié ni, ate' guída' ga zóali' tu' rulídzali'-në' Dios, en rinábali' lahuë' ni'a quia' neda'.

*Pablo ruzúajë' lu guichi le rugapa Dios Filemón*

<sup>23</sup> Epafra, bönni' yú'ulenë' neda' tsözxön lidxi guié ni tu' runë' xichinë' Jesucristo, rugapë' Dios li'. <sup>24</sup> Lësca' tu'gapë' Dios li' Marcos, en Aristarco, en Demas, en Lucas, yugu' bönni' ni túnlenë' neda' tsözxön dxin queë' Cristo.

<sup>25</sup> Rinábida'-në' Xanru' Jesucristo uzá' ládxe'ë queëli'. ¡Ca' gaca!

## DIDZA' RUZÉAJNI'I YUGU' BÖNACHI HEBREO

*Dios bë'lenë' rë'u didza' lu ru'ë Zxí'ini cazë'*

<sup>1</sup> Zián luzuí, en zían ca benë' Dios, bë'lenë' xuz xtó'oru' didza' dza ni'te lu ruá'agaquië' bönni' gulu'ë didza' uláz queë'.  
<sup>2</sup> Na'a, ga ruúdxí xtídzë'ë, dza ni zóaru' na'a, Dios bë'lenë' rë'u didza' lu ru'ë Zxí'ini cazë'. Dios buzóë' Lë' para guequi queë' Zxí'inë' yúgu'të le nequi queë' Lë', ate' lu në'ë Zxí'inë' na', Dios benë' yödzölió ni. <sup>3</sup> Zxí'inë' na' náquië' ca tu le rulu'í lahui yöl-la' xön queë' Dios, en ca náquië' Zxí'inë' rulu'í lahui idú le náquië' Dios caz. Run cazë' ga naca'tica'sö yúgu'të, rugunë' dxin didza' ru'ë, en yöl-la' huáca queë'. Cate' budxi benë' le ruún rë'u dxí'a que le naca dul-la' nabága'ru', yöjchö'ë cuita lë'ë ibëla Dios, Nu rö'ö rinná bë' xitsá'tërö.

*Zxí'inë' Dios nayëpisëtërë' ca yugu' gubáz lá'ayi*

<sup>4</sup> Zxí'inë' Dios nayëpisëtërë' ca yugu' gubáz lá'ayi queë' Dios, tu' nácatërö lo le lë', lë na' Dios gulu'ë Lë' tu' náquië' Zxí'ini cazë', ca lágaquië' gubáz lá'ayi queë' na'. <sup>5</sup> Dios catu caz gudxë' tuë' gubáz lá'ayi queë' ca na' gudxë' Zxí'inë'. Gunnë': Zxí'ina' nacu'. Buzóa' Li' na'a.

Catu caz bë'ë didza' queë' tuë' gubáz lá'ayi ca na' bë'ë didza' ca naca queë' Zxí'inë'. Gunnë':

Naca' Xuzë', ate' Lë' náquië' Zxí'ina'.

<sup>6</sup> Lësca' caní, cate' Dios buzóë' Bi'i que cazë' lu yödzölió ni, gunnë':

Yúgu'të gubáz lá'ayi queë' Dios ila'yéaj ládxi'gaquië' Lë'.

<sup>7</sup> Ca nácaquië' gubáz lá'ayi queë', rna:

Lë' runë' ga nácaquië' gubáz lá'ayi queë' ca bö' recja, ate' gubáz lá'ayi huen dxin queë', runë' ga nácaquië' ca guí'.

<sup>8</sup> Na'a, ca naca cazë' Zxí'inë', rnnë':

Ga rö'u rinná bë'u, inná bë'tica'su', Dios.

Tsahui' naca ca rinná bë'u.

<sup>9</sup> Nadxí'inu' le naca tsahui', en calëga le ruá' dö'.

Que lë ni na' Dios budödë' lu no'o yöl-la' unná bë', en benë' ga ruzí'itëru' Li' xibé yöl-la' unná bë' ca le tu'z'í' xibé luzó'o.

<sup>10</sup> Lësca' caní rnnë':

Li', Xan, cate' gusí lo, benu' yödzölió,

ate' len ná'asu' buzú' lúzxiba.

<sup>11</sup> Huadödi quéguequi, pero Li', tsaz idi'u.

Yúgu'të itëbigaca ca ritëbi lari',

<sup>12</sup> en ca lari' utubu' léguequi, en utsó'o léguequi, pero Li', catu caz utsá' cuinu'

en catu caz igulu'.

<sup>13</sup> Dios catu caz gudxë' tuë' gubáz lá'ayi queë' ca gudxë' Zxí'inë', gunnë':

Gurö'ö cuita lë'a ibëla

cate' gunra' ga ulu'zechu zxíbigaca lo'

nupa bití' ta'lé'e Li' dxi'a.

<sup>14</sup> Yúgu'të gubáz lá'ayi queë' Dios nácaquië' bö' huen dxin queë' Dios, ate' nasöl-lë'ë légaquië' para ilácalenë' nupa ni nulágaca.

## 2

*Bití' ral-la' ucá'anaru' cá'asö yöl-la' rusölá*

<sup>1</sup> Que lë ni na', ral-la' gü'i ládxi'röru' le chibiyöniru', para cabí gaca chopa ládxi'ru'. <sup>2</sup> Guca bë' naca idütë li didza' na', le bidxín dza ni'te lu ná'agaquië' gubáz lá'ayi queë' Dios, ate' yúgu'të nupa gula'dödi bë' ca rnna didza' na', en bití' gulún ca rnna, Dios benë' léguequi xíguia' ca na' röjölz le gulúngaca.

<sup>3</sup> Lëscá' caní bití' ca' uláru' rë'u lu xíguia' na' channö ucá'anaru' cá'asö yöl-la' rusölá ni, le benë' Lë cazë' Xanru' libán que zí'alö, ate' nupa bila'yöni Lë' bulu'lu'i rë'u naca idütë li. <sup>4</sup> Lëscá' caní Dios caz benë' tsözxön légaquië' ba nalí, tu' benë' le náca gaca bë', en le tun ga rubániru', en yugu' yöl-la' huáca zxön. Gudísië' ca' yugu' le runödzejë' Dios Bö' Lá'ayi quégaquië' tsca gú'uni quézinë' Dios.

*Dios benë' ga böáquië' Jesús idú ca nácaru' rë'u*

<sup>5</sup> Dios bití' budödë' yödzölió si' za' lu ná'agaquië' gubáz lá'ayi que yehua' yubá queë', lë na' ruí'iru' didza' que. <sup>6</sup> Na'a, ca naca lë ni, nazúaj lu guichi lá'ayi didza' bë' nu run ba nalí le rnna:

Dios, rubánide'eda' tu' ruí'i ládxi'u bö'nachi.

Rubánide'eda' tu' rácalenu' léguequi.

<sup>7</sup> Ia'láti'sö cá'asö ca yugu' gubáz lá'ayi que yehua' yubá quiu' benu' bö'nachi.

Buzú' quéguequi yöl-la' zxön, en yöl-la' run bal,

en budödu' yúgu'të le benu' Li' lu në'eguequi.

<sup>8</sup> Yúgu'të budödu' lu në'eguequi para ilá'nná be'e le.

Nazúaj lu guichi lá'ayi lë na' rnna: "Budödu' lu në'eguequi yúgu'të." Bití' bi bucá'anë' le cabí budödë' lu në'eguequi, pero ga ridxintë na'a dza, bití' rilé'eru' yu'u lu në'eguequi yúgu'të.

<sup>9</sup> Réquibe'eru' le guca queë' Jesús. Tu chí'isö, Dios benë' ga böáquië' ia'láti'sö cuidí' ca yugu' gubáz lá'ayi que yehua' yubá queë'. Guljë' bö'nachi para gútië', ate' gudí' guzjáquë'ë Jesús lu yöl-la' guti uláz quégaca yúgu'të bö'nachi, tu' buzá' ládxië'ë Dios queëru' caní. Tu' benë' Jesús caní, Dios benë' ga rata' queëru' yöl-la' zxön, en yöl-la' run bal.

<sup>10</sup> Dios benë' yúgu'të le rilé'eru', en runë' ga nacuá'tica'sö. Dios benë' ca ral-la' gunë' cate' benë' ga naca bë' náquië' Cristo idú tsahui' ni'a que le gudí'i guzxaqué'ë. Caní benë' Dios queë' Cristo, Nu bideli' yöl-la' rusólá para gaca ichë'ë bönachi zián yehua' yubá queë'. <sup>11</sup> Cristo ruúnë' tsahui' bönachi para ilequi quez queë' Dios. Tuzë' náquië' Xúzguequi nupa na' ruúnë' Cristo tsahui', en Xuz cazë'. Que lë ni na', biti' ca' rutu'inë' Zxí'inë' Dios cate' rnnë' nácagaquië' böchi' luzë'ë. <sup>12</sup> Ca naca lë ni nazúaj lu guichi lá'ayi le rnna:

Usiyönda' böchi' luzá'a ca nacu' Li', Dios.

Gatsaj láhui'lö bönachi tu'dubi quiu',  
gul-la' yöl-la' ba quiu'.

<sup>13</sup> Lësca' caní rnnë':

Uzxöni ládxa'a-në' Dios.

Ga yúbölö nazúaj le rnnë':

¡Buli'yútsöca' neda', en yugu' zxi'inë',  
nupa na' Dios bennë' quia'!

<sup>14</sup> Que lë ni na', tu' néquiguequinë' bëla' en rön yugu' zxi'inë' na', lësca' caní Cristo ben cuinë' ca nácagaquië'. Guljë' bëla' en rön. Caní guljë' para guca gútië', en caní guca busunítië' yöl-la' huáca unná bë' que tu' xihui', nu na' dë lu në'e guti bönachi.

<sup>15</sup> Caní benë' Cristo para guca busanë' yúgu'të nupa gulaca ca bönni' nadó'ogaquië' tsanni ni nacuá' nabángaca, tu' guladxi yöl-la' guti. <sup>16</sup> Naca bë' biti' benë' caní para gácalenë' yugu' gubáz lá'ayi que yehua' yubá queë' Dios, pero para gúcalenë' yugu' zxi'ini xi'sóë' Abraham. <sup>17</sup> Que lë ni na', ben bayudxi böáquië' Cristo idú ca nácagaquië' böchi' luzë'ë na', para gáquië' lahuë' Dios tu bixúz lo, tu bixúzi runë' ca rnnë', en ruhuéchi' ládxe'ë bönachi, enca' para gunë' le gun ga gata' lu në'ë ugúë' dul-la' nabága'gaca bönachi. <sup>18</sup> Na'a, tu' gudí'i guzxaqué'ë Lë cazë' Cristo, ate' guzxi' bë' tu' xihui' Lë', que lë ni na' napë' yöl-la' huáca gácalenë' nupa ni, rizi' bë' tu' xihui' léguequi.

### 3

#### *Jesús nayëpisëtë'rë' ca Moisés*

<sup>1</sup> Que lë ni na', böchi' luzá'ado', libí'ili' na' nácali' quez queë' Dios tu' bulidzë' Dios libí'ili', buli'yú dxi'a ca náquië' Jesucristo. Náquië' gubáz nasól-lë'ë Dios, enca' bixúz lo que le nazí lu ná'aru'. <sup>2</sup> Jesús ni runë' ca rnna xtídzë'ë Dios, Nu na' buzóa Lë' xilatjë', ca na' benë' ca' Moisés, benë' ca rnna xtídzë'ë Dios lógaca yúgu'të bönachi queë' Dios. <sup>3</sup> Nayëpisëtë'rë' Jesús ca Moisés, para gaca queë' yöl-la' ba, ca na' nácarë' lo bönni' nequi queë' tu yu'u ca naca huen dxin zoë' lu yu'u na'. <sup>4</sup> Yúgu'të yu'u, zoa nu ben le, pero Dios náquië' Nu ben yúgu'të le rilé'eru'. <sup>5</sup> Le nácatë Moisés benë' ca rnna xtídzë'ë Dios lógaca bönachi queë'

Dios, pero gúquië' ca tu bönni' huen dxin, ate' benë' ba nali que didza' ral-la' gu'ë Dios, <sup>6</sup> pero Cristo runë' ca rnna xtídzë'ë Dios, en náquië' Zxí'ini cazë', ate' nacué' lu në'ë bönachi queë' Dios. Rë'u ni, nácaru' bönachi na' queë' Dios channö gácaru' tsutsu ga idxinrö dza údxi. Ral-la' gácaru' tsutsu ca ridipa ládxi'ru', enca' ca rudzéjalenru' lë na' runru' löza.

*Dë lataj ga ulu'zí' ládxi' gaca bönachi queë' Dios*

<sup>7</sup> Que lë ni na', nazúaj lu guichi ca rnnë' Dios Bö' Lá'ayi le rnna:

Na'a, channö riyönili' didza' ru'ë Dios,

<sup>8</sup> biti' gácali' zidi lu icja ládxi'do'oli'

ca na' gulaca nupa ni' gula'dá'baga' Dios

cate' ni' gula'zí' bë' Lë' lu lataj cá'asö.

<sup>9</sup> Gula'zí' bë'ë xuz xtó'oli' neda' ni'

sal-la' bila'lé'enë' le bena' idú ca choá' iz.

<sup>10</sup> Que lë ni na' guléda' bönachi dza ni', en gunniá':

"Ta'chíxítica'sinë' ca ta'zá' ládxi'gaquië'.

Biti' té'ënnë' ila'nözinë' le rë'ënda' ilunë'."

<sup>11</sup> Que lë ni na' guléda' légaquië', en bena' tsutsu xtídzá'a, gunniá':

"Biti' ila'yázië' ga ulu'zí' ládxi'gaquië' tsözxön len neda'."

<sup>12</sup> Guli'gún chi'i cuinli', böchi' luzá'ado', para cabí gácali' nituli' libí'ili' tu bönni' xihui' cabí réajlë'ë, en para cabí usanli'në' Dios ban.

<sup>13</sup> Na'a, buli'zéajni'i tuli' ia'tuli' yúgu'të dza, tsanni ni naca dza ni zóaru' na'a, para cabí si' ye'e le naca xihui' libí'ili', en para cabí gácali' nituli' libí'ili' zidi lu icja ládxi'do'oli'.

<sup>14</sup> Yúgu'tëru' gunru' tsözxön Cristo channö gácaru' tsutsu ga idxinrö dza údxi, ca na' gusí lo ridipa ládxi'ru'.

<sup>15</sup> Caní ral-la' gunru' tsanni ni rnna:

Na'a, channö riyönili' chi'ë Dios,

biti' gácali' zidi lu icja ládxi'do'oli',

ca na' gulaca nupa ni' gula'dá'baga' Dios.

<sup>16</sup> ¿Nupxi na' bila'yöni xtídzë'ë Dios, en gula'dá'baga' Lë'? Gulún caní yúgu'të nupa ni' bubéajë' Moisés léguequi luyú Egipto.

<sup>17</sup> ¿Nupxi na' gulénë' Dios idú ca choá' iz? Gulaca nupa ni' gulún dul-la', ate' gulati lu lataj cá'asö.

<sup>18</sup> ¿Nupxi ni' benë' tsutsu xtídzë'ë Dios, gunné' bití' ila'yaza ga ulu'zí' ládxi'guequi tsözxön len Lë'? Gulaca nupa ni' bití' gulún ca rnna xtídzë'ë Dios.

<sup>19</sup> Na'a, réquibe'ëru' bití' guca ila'yázië' tu cabí gula'yéajlë'ë Dios.

## 4

<sup>1</sup> Na'a, tsanni ni nagá'ana le guzxí' lu në'ë Dios queëru' para gaca tsú'uru' lataj queë' ga uzí' ládxi'ru', ral-la' gádxiru' para cabí unítiru' lataj tsú'uru' ni'. <sup>2</sup> Biyönru' rë'u didza' dxi'a ca na' bila'yönnë' légaquië', pero légaquië' bití' bulu'zi'ë xibé didza'



na' bila'yönnë', tu' cabí gula'yéajlë'ë Dios cate' bila'yönnë' le.  
 3 Rë'u ni réajlë'ëru' Dios, en tsú'uru' lataj queë' ga uzí' ládxi'ru'.  
 Raca ca na' gunné' Dios:

Que lë ni na' guléda' légaquië'  
 en bena' tsutsu xtídza'a, gunnía':

Biti' tsú'ugaquië' ga ulu'zí' ládxi'lenë' neda'.

Dë lataj tsú'uru' rë'u ga uzí' ládxi'lenru'-në' Dios, sal-la' budxi benë' Dios xichinë' dza ni'te cate' ni' benë' yödzülió ni, en chiruzí' ládxi'ë. 4 Nazúaj lu guichi lá'ayi ga ru'í' didza' ca naca que dza igadxi, le rnna: "Buzí' ládxi'ë Dios dza igadxi yugu' lu dxin benë'." 5 Ga yúbölö rnna: "Biti' tsú'ugaquië' ga ulu'zí' ládxi'lenë' neda'." 6 Nupa ni' bila'yöni zí'aló didza' dxi'a, biti' guyú'ugaca ni' tu' cabí gulún ca rnna xtídzë'ë Dios. Que lë ni na', ral-la' tsú'ugaca bönachi yúbölö ni'. 7 Que lë ni na' ca', Dios bulu'e tu dza yúbölö, gunné': "Na'a dza." Caní naca, cate' chigudödi iz zían, bë'ë didza' Dios lu ru'ë David, ca na' nazúaj lu guichi lá'ayi le rnna:

Na'a dza, channö riyönili' didza' ru'ë Dios,  
 bití' gácali' zidi lu icja ládxi'do'oli'.

8 La'tu' benë' Josué ga bulu'zí' ládxi'gaquië' cate' gula'yu'ë lu xiyúgaquië', bití' bë'ë Dios didza' gudödi ni' que ia'turö dza cate' nu uzí' ládxi'len Lë'. 9 Que lë ni na', nagá'ana quégaca bönachi queë' Dios lataj ila'déli'në' ga ulu'zí' ládxi'gaquië'. 10 Nupa tsú'ugaca ga ulu'zí' ládxi'lengaca Dios, ulu'zí' ládxi'gaquië' lu dxin tunë', ca na' buzí' ládxi'ë Dios yugu' lu dxin benë' Lë'. 11 Que lë ni na', ral-la' gü'í' ládxi'ru' tsú'uru' ga ni' uzí' ládxi'lenru'-në' Dios. Biti' ral-la' tá'baga'ru' xtídzë'ë ca na' gulún nupa ni' bití' gula'yéajlë' Dios, en bití' gula'yu'ë ni'.

12 Xtídzë'ë Dios naca ban caz, en napa caz yöl-la' huáca. Richúgurö ga rë' ca guíë tuchi' natuchi' iropa ru'í'. Richugu ridxín ga ta'dzaga bö' naca cázaru', en le zoa lu icja ládxi'do'oru', enca' róxaj ga ridxintë lu dxita lu bin. Run ga naca bë' le ribequi ícjaru', en le rizá' ládxi'ru'. 13 Biti' bi gaca ucáchi'ru' ga bití' gaca ilé'enë' Dios le. Yúgu'të le nun cazë' Dios nalá' lahui, en narúaj ga liná' lahuë' Dios. Lahuë' Lë' run bayudxi quíxjö'öru' le nunru'.

*Jesús náquië' bixúz lo, Nu nácatërö zxön*

14 Zoa queëru' tu bixúz lo, nácatërë' zxön, Nu na' gudödi ni' yehua' yubá, Jesús, Zxí'inë' Dios. Que lë ni na' ral-la' ugá'anaru' tsutsu ca naca le nazí' lu ná'aru'. 15 Zoa queëru' tu bixúz lo, Nu gaca huéchi' ladxi' rë'u ca nácgaca le raca queëru', tu' guzxi' bë' tu' xihui' Lë cazë' idútë ca na' rizí' bë' tu' xihui' na' rë'u, pero bití' bi dul-la' benë' Lë'. 16 Que lë ni na', idú ládxi'ru' ral-la' ibíga'ru' gala' ga rö'ë rinná bë'ë Dios,

Bönni' ruzá' ladxë'ë queëru', en inábaru' lahuë' huéchi' ladxë'ë rë'u, en uzá' ladxë'ë queëru', para gácalenë' rë'u cate' bi raca queëru'.

## 5

<sup>1</sup> Dios ribö cazë' núti'tës bixúz lo ladaj bönachi, en ruzóë' lë' para gunë' yugu' le runë' lahuë' Dios uláz quégaca bönachi, en cu'ë lahuë' Dios yugu' le tu'nödzej bönachi, en yugu' böa' bëdxi tútigaquië'-ba' lu bucugu lá'ayi tu' nözi dul-la' nabága'gaquië'.

<sup>2</sup> Bixúz lo na', tu' raca queë' lëbisö ca raca quégaca bönachi, gaca gáquië' zxön ladxí' len nupa nácgaca yugu' bönni' canöz, en nupa ta'chixi ta'nigui. <sup>3</sup> Que lë ni na', tu' náquië' bixúz lo na' bönáchisö, ral-la' cu'ë lahuë' Dios böa' bëdxi na' tútigaquië'-ba' lu bucugu lá'ayi ni'a que dul-la' nabaga' cazë', ca na' runë' ca' ni'a que dul-la' nabága'gaca bönachi.

<sup>4</sup> Cuntu nu gaca gun cuini bixúz lo, pero Dios rulidzë' nu ral-la' gaca bixúz lo, ca na' bulidzë' Aarón. <sup>5</sup> Lësca' caní guca queë' Cristo. Biti' ben cuinë' bixúz lo, pero Dios buzóë' Lë' ca bixúz lo. Ca naca lë ni, Dios gudxë' Lë':

Li' nacu' Zxí'ina'.

Buzóa' Li' na'a.

<sup>6</sup> Lësca' caní gudxë' Lë' le nazúaj ga yúbölö, gunné':

Li' nácatuca'su' bixúz,

ca na' gúquië' Melquisedec bixúz.

<sup>7</sup> Cristo, cate' ni' zoa cazë' yödzölió ni, bulidzë' Dios, en gúta'yuë' lahuë'. Gurödxí'ë, en gurödxë' lahuë' Dios, Bönni' guca usölë' Lë' lu yöl-la' guti, ate' Dios biyönnë' Lë' tu' gúdxinë' Lë' idú ladxë'ë. <sup>8</sup> Sal-la' gúquië' Zxí'inë' Dios, bizédë' gunë' ca rnna xtídzë'ë Dios tu' gulaca queë' yugu' le gudí' guz xáquë'ë.

<sup>9</sup> Cate' chigúquië' Cristo idú ca ral-la' gáquië' tu bixúz lo, Dios benë' Lë' Bönni' rusölë' tsaz yúgu'të nupa tun ca rnna xtídzë'ë.

<sup>10</sup> Ní'irö Dios buzóë' Lë' para gáquië' bixúz lo ca na' gúquië' Melquisedec na' bixúz lo.

*Zoa bönadxi queëru' huöaj ladxí'ru', en tá'baga'ru'-në' Cristo*

<sup>11</sup> Ca naca lë ni, zían le ral-la' gú'ilentu' libí'ili' didza', le naca böniga quíxjöi'itu' libí'ili', tu' cabí réajni'inili'.

<sup>12</sup> Chigudödi dza ral-la' gaca usédili' bönachi xtídzë'ë Dios, tu' chibiyónili' xidzé, pero riquínili' nu quíxjöi'i libí'ili' leyúbölö yugu' le cabí naca böniga nazí' lu në'e nu si' réajlë'. Nagá'anali' ca yugu' bi'i huë'ënido' ta'quínibi' nidxi', en calëga la' huagu tsutsu. <sup>13</sup> Yúgu'të bönni' naquíniguequinë' nu usedi légaquië' lë na' bití' naca böniga, nácgacaquië' ca yugu' bí'ido' té'ajbi' nidxi'. Biti' nazédagaquië' ca sa'yéaj le naca tsahui'. <sup>14</sup> La' huagu tsutsu tu'zí' xibé nupa chinál-lágaca, nupa na' gaca iléquibe'e

le naca dxi'a, en le cabí naca dxi'a, tu' nugúngaquië' dxin yöl-la' réajni'i quégaquië'.

## 6

<sup>1</sup> Que lë ni na', biti' ral-la' usédatica'siru' yugu' xibá buzédaru' cate' si' gusi lo riyóniru' ca naca queë' Cristo. Ral-la' tsöjnöröru' para gácaru' idú bönachi queë' Cristo. Biti' naquíni usédaru' leyúbölö yugu' xibá biti' naca böniga:

ca ral-la' ubí'i ládxi'ru',

en ca bítirö gunru' le ruá' dö',

en ca ral-la' tséajlë'ëru'-në' Dios,

<sup>2</sup> en ca naca xibá que le ridílaru' nisa,

en ca rixóa ná'aru' bönachi ta'yéajlë' Cristo,

en ca ral-la' ulu'bán nupa nátigaca,

en ca gunë' Dios, ichúguië' quégaca bönachi tuá' dö'.

<sup>3</sup> Caní gunru' channö gunnë' Dios rë'u lataj.

<sup>4-6</sup> ¿Naru' huácatsö gunru' ga ulu'bí'i ládxi'gaca leyúbölö nupa tu'huöaj ladxi', en ta'dá'baga' Dios? Channö bidxín quéguequi bení' queë' Dios, en bulu'zí' xibé le runödzejë' Dios zoë' yehua' yubá, en gulaca tuz len Dios Bö' Lá'ayi, en channö bulu'zí' xibé didza' dxi'a queë' Dios en yöl-la' huáca que dza si' za', en channö ní'irö tu'huöaj ladxi', en ta'dá'baga' Dios, biti' ca' gaca nu gun ga ulu'bí'i ládxi'gaca leyúbölö, tu' gaca tsca ulu'dá' leyúbölö Zxí'inë' Dios lë'e yaga cruz en ilún tsca ulu'titaj Lë' lahui' lógaca bönachi. <sup>7</sup> Nupa tun caní nácagaca ca yu na' ruzí' xibé nisa guiöj le ribixi láhuilö zían luzuí. Channö yu na' runödzej le tu'zí' xibé nupa tá'ana yu na', raza ládxe'ë Dios le, <sup>8</sup> pero channö ruzóasö yu na' lubá yötsi', en bësigá', naca ditaj, en nabía dö', en naca para nu uzegui le.

### *Le runru' löza le run ga nácaru' tsutsu*

<sup>9</sup> Sal-la' ruí'itu' caní didza', libí'ili' na' nadxí'itu', réquitu' ruzí'ili' xibé le nácagacarö dxi'a, le tu'zí' xibé nupa nulágaca.

<sup>10</sup> Dios náquië' tsahui', en biti' gal-la ládxe'ë dxin tsahui' benlí', en yugu' le benlí' tu' nadxí'ili' Lë'. Gúcalenlí' nupa néquiguequi quez queë' Dios, en runlí' xichínguequi. <sup>11</sup> Na'a, ré'ënitü' güf'i ládxi'li' luzá'ali' tu ia'tuli', en gunlí' caní ga idxinrö dza údxi,

para gata' idú queëli' lë na' runlí' löza. <sup>12</sup> Ré'ënitü' cabí gácali' xöhuëdi, pero gunlí' ca tun nupa ta'yéajlë' Dios, en ta'böza zxön ladxi', para idéli'li' yugu' le guzxí' lu në'ë Dios gunnë' queëru'.

<sup>13</sup> Caní gaca, tu' benë' tsutsu Dios xtídzë'ë cate' guzxí' lu në'ë bi gunnë' queë' Abraham. Tu' cabí zoa nu nácarö lo ca Dios, que lë ni na' buzetaj cuinë', cate' ni' benë' tsutsu xtídzë'ë.

<sup>14</sup> Caní gunnë' Dios: "Le nácate' guna' ga gaca dxi'a quiu', en guna' ga ila'yánda'abi' zxí'ini xi'sú'." <sup>15</sup> Gulözë' Abraham zxön ladxi', ate' bidéli'në' le guzxí' lu në'ë Dios gunnë' queë'. <sup>16</sup> Cate'

tu bönni' runë' tsutsu xtídzë'ë, ruzõtjë' nu nácatërö lo ca lë', ate' lë ni ruzóa dxisö yúgu'të didza' bizxaj, tu' nunë' tsutsu xtídzë'ë. <sup>17</sup> Que lë ni na' Dios benë' tsutsu le guzxí' lu në'ë gunë', en buzõtaj cuinë', tu' gú'unnë' uluí'inë' nupa ulu'zí' xibé le guzxí' lu në'ë unödzejë' quéguequi, nácada' löza, en tsaz naca le nuzóa lahuë' gunë'. <sup>18</sup> Le guzxí' lu në'ë Dios, en le benë' tsutsu, chopa ni catu caz idzá'gaca, en ca naca quégaca chopa ni, biti' gaca si' yë'ë Dios. Caní benë' Dios para gácada' löza queëru' tu le huë tsahui' rë'u. Ruzxöni ládxi'ru' Lë' idéli'ru' lë na' runru' löza le gunné' sí'iru'. <sup>19</sup> Lë na' runru' löza ruzóatica'sö tsutsu icja ládxi'do'oru', en naca ca tu du guié ruzóa dxisö barco. Lë na' runru' löza run chi'ë Cristo ni'a queëru' ga ni' zoë' Dios yehua' yubá, le nadxín lu lataj lá'ayi na' zoa cúdzi'lö lari' nala' lu yudo' röö yehua' yubá. <sup>20</sup> Guyázië' Jesús uláz queëru' ca Nu röjnöru loru' ga ni' zoë' Dios, ate' Dios nuzóë' Lë' náquië' tsaz bixúz lo ca na' gúquië' Melquisedec bixúz lo.

## 7

### *Jesús náquië' bixúz lo ca gúquië' Melquisedec*

<sup>1</sup> Melquisedec gúquië' bönni' na' gunná bë'ë lu yödzö Salem, enca' bixúz queë' Dios, nayëpisëtërë'. Cate' suzë'ë Abraham, söhuöjë' gudödi guca gudil-la cate' bucul-lë' yugu' bönni' ta'nná bë'ë, birúajë' Melquisedec na', yöjtságuië' Abraham, en gunábinë' Dios gun lá'ayë' Abraham. <sup>2</sup> Abraham bë'ë queë' tu cö' tu' chi cö' que yúgu'të le bidéli'në' lu gudil-la na'. Ca lë' Melquisedec na' rna lu didza' xidza': "Bönni' Unná Bë' Tsahui'", en náquië' ca' Bönni' unná bë' que yödzö Salem, le rna lu didza' xidza': "Bönni' Unná Bë' Ríbequi Dxíë'." <sup>3</sup> Biti' zoa lu guichi le rna gula'cu'ë xuz xinë'ë, o xuz xtá'ahuë', en biti' nazúaj dza guljë' o dza gútië', pero náquië' ca náquië' Zxí'inë' Dios tu' náquië' tsaz bixúz lo.

<sup>4</sup> Buli'yútsöca' na'a, ca na' gúquië' zxön Melquisedec na', tu' lë cazë' xúziru' Abraham bë'ë queë' tu cö' tu' chi cö' que lë na' guléajë' lu ná'agaquië' bönni' ta'nná bë'ë ni' bucul-lë' lu gudil-la. <sup>5</sup> Lu xibá queë' Moisés, Dios rinná bé'enë' yugu' xzí'ini xi'sóë' Leví, nupa nácacaca bixúz, ila'zi'ë tu cö' tu' chi cö' que le ta'zí' bönachi Israel, sal-la' nácacaca di'a dza quégaquië', tu' nácacagaquië' yúgu'të' xzí'ini xi'sóë' Abraham. <sup>6</sup> Melquisedec na' biti' náquië' di'a dza quégaquië', pero guzxí'ë tu cö' tu' chi cö' lu në'ë Abraham, nu na' bideli' yugu' le guzxí' lu në'ë Dios gunné' queë'. Lësca' Melquisedec na' gunábinë' Dios gun lá'ayë' Abraham, <sup>7</sup> ate' cuntu nu gaca tá'baga' lë na' rna: Nu nadéli'rö lahuë' Dios rinábini Dios gun lá'ayë' nu nacuídí'rö. <sup>8</sup> Na'a, dza ni zóaru' na'a, nupa ta'zí' tu cö' tu' chi cö' lu ná'agaca bönachi nácacaca ca' bönachi tati caz, pero Melquisedec na',

zoa le run ba nalí queë' le rnna zoë' nabanë'. <sup>9</sup> Na'a, huáca innaru' queë' Leví, en quégaca xzí'ini xi'sóë', nupa na' ta'zí' tu cö' tu' chi cö' lu ná'agaca bönachi, lësca' gula'gúíxjè' tu cö' tu' chi cö' cate' ni' Melquisedec na' guzxi'è tu cö' tu' chi cö' lu nëë Abraham, xuz gula gudödi quégaquië'. <sup>10</sup> Caní naca, tu' huáca innaru' Abraham ni' nu'è lë'è Leví, en yugu' xzí'ini xi'sóë' cate' ni' yöjtságuië' Melquisedec lë', tu' cabí náljaniguequinë'.

<sup>11</sup> Ta'zí' bönachi Israel xibá gunná bë'è Moisés lu ná'agaca bixúz, nupa náca'gaca xzí'ini xi'sóë' Leví ga nababë' ca' Aarón, bixúz lo. Na'a, la'tu' guca ulu'huóaca bönachi idú tsahui' lahuë' Dios tu' tun ca rinná bë' xibá queë' Moisés, biti' ben bayudxi soa ia'tué' bixúz ca gúquië' Melquisedec, en calëga ca gúquië' Aarón. <sup>12</sup> Channö rutsë'è Dios ca ral-la' gáquië' bixúz, run bayudxi utsë'è ca' ca naca xibá queë'. <sup>13</sup> Xanru', Nu na' nazúaj lu guichi ca naca queë' yugu' lë ni, nababë' ia'turö cö' xzí'ini xi'sóë' Israel ca le nababë' Leví na', ate' que cö' xzí'ini xi'sóë' ga nababë' Xanru', cuntu nu guca bixúz lahuë' Dios. <sup>14</sup> Naca caní tu' naca bë' guljè' Xanru' lu cö' di'a dza queë' Judá, ate' Moisés biti' bë'è didza' queë' Judá na' cate' bë'è didza' quégaca nupa ral-la' ilaca bixúz.

<sup>15</sup> Nácatërö bë' lë ni ni'a que le raca na'a. Ca na' gúquië' Melquisedec bixúz, chibulu'i lahuë' ia'turë' bixúz, Jesús. <sup>16</sup> Bönni' ni, biti' gúquië' bixúz tu' rinná bë' xibá ca ral-la' ilaca di'a dza queë', pero náquië' bixúz tu' napë' yöl-la' huáca que yöl-la' na'bán le catu caz údxi. <sup>17</sup> Nazúaj lu guichi lá'ayi le run ba nalí queë' le rnna:

Tsaz nacu' bixúz  
ca na' gúquië' Melquisedec bixúz.

<sup>18</sup> Na'a, nadúa xibá gula ni', tu' cabí gudapa yöl-la' huáca unná bë', en biti' bi guca gun. <sup>19</sup> Xibá queë' Moisés na' biti' guca un bönachi idú tsahui'. Na'a, chiguyú'u tu le runru' löza le nácarö dxi'a, le run ga gaca ibíga'ru' gala' ga zoë' Dios.

<sup>20</sup> Cate' benë' Dios ga náquië' Jesús bixúz, benë' tsutsu xtídzë'è. <sup>21</sup> Dios biti' benë' tsutsu xtídzë'è cate' bucu'è bönachi ni' ca bixúz, pero cate' benë' ga náquië' Jesús bixúz, benë' tsutsu xtídzë'è, gunné':

Bena' tsutsu xtídz'a'a neda', Xanu', gunnía':

"Biti' utsá'a ca guna'.

Tsaz nacu' bixúz  
ca na' gúquië' Melquisedec bixúz."

<sup>22</sup> Que lë ni na', Cristo náquië' Nu run ga naca löza didza' rucá'ana tsahui' le nácarö dxi'a ca lë na' guca zí'alö. <sup>23</sup> Yugu' bixúz ni' guláquië' bönni' zían, tu' cabí guca ulu'gá'anë' yödzölió ni tu' gulátië', <sup>24</sup> pero tu' zóatica'së' Jesús, tsaz náquië' bixúz, en biti' gaca nu huóaza xilatjè' para gaca bixúz. <sup>25</sup> Que

lë ni na', tsaz gaca usölë' nupa ta'biga' gala' ga zoë' Dios, nupa tu'gún dxin Lë', tu' zóatica'së' nabanë', en rnnë' dxi'a uláz quégaquië' lahuë' Dios.

<sup>26</sup> Ben bayudxi soa tu bixúz lo caní queëru'. Náquië' lá'ayi, en idú tsahui', en biti' náquië' tsözxõn bönachi dul-la', pero nayëpisëtërë' ca yúgu'të le nacua' ni' yehua' yubá. <sup>27</sup> Jesús ni, biti' náquië' ca yugu' bixúz lo yödzölió ni, tu' ben bayudxi gula'gu'ë rön lahuë' Dios yugu' dza, ate' gulútië'-ba' böa' bëdxi lahuë' Lë' tu' nözi dul-la' nabága'gaca cazë', ate' gudödi ni' gulunë' caní tu' nözi dul-la' nabága'gaca bönachi. Na'a, Jesús, tsaz gulu'ë rön lahuë' Dios, cate' ni' budödi cuinë' lahuë' Dios, en bulaljë' xichõn cazë' tu' nözi dul-la' nabága'gaca yúgu'të bönachi. <sup>28</sup> Lu xibá queë' Moisés bönachi biti' náca'gaca idú dxi'a náca'gaca bixúz, pero gudödi bidxín xibá queë' Moisés, Dios benë' tsutsu xtídzë'ë, cate' benë' ga náquië' Zxí'ini cazë' bixúz lo, tu' náquië' idú tsahui' ca ral-la' gáquië' bixúz.

## 8

### *Jesús náquië' Bixúz Lo queëru'*

<sup>1</sup> Na'a, ca rnna lë na' si' gunnía', naca caní: Zoa queëru' tu Bixúz Lo caní. Gurö'ë cuita lë'ë ibëla Dios, ate' rö'ë, rinná bë'ë yehua' yubá ni'. <sup>2</sup> Lë' runë' dxin ca Bixúz Lo lu lataj nácatërö lá'ayi, le naca yudo' le naca idútë, lë na' buchisë' Xanru', en calëga bönachi. <sup>3</sup> Dios rucu'ë yúgu'të bixúz lo para ila'gu'ë yugu' le tu'nödzej bönachi, enca' xichõngacaba' böa' bëdxi lahuë' Dios. Que lë ni na' ben bayudxi soa bi gulu'ë Cristo lahuë' Dios. <sup>4</sup> La'tu' zoë' luyú ni, biti' ca' gáquië' bixúz, tu' nacua'tica'së' bixúz ni, nupa ta'gú'u yugu' le tu'nödzej bönachi lahuë' Dios ca rinná bë' xibá queë' Moisés. <sup>5</sup> Yugu' bixúz ni tunë' dxin que tu le rulu'isö, en le naca ca tu bixín que lë na' rö'ö yehua' yubá. Caní naca, tu' gúdxidë'ë Dios Moisés cate' si' uchisë' yú'udo' na' néquini guídi, gunné': "Buyútsöca', ben yúgu'të idú ca naca lë na' buluí'ida' li' lu gu'a ni'." <sup>6</sup> Na'a, Bixúz Lo queëru' ni runë' dxin que le nácatërö lesaca', ate' ni'a que le benë' Lë' zoa tu didza' rucá'ana tsahui' queëru' le nácatërö lesaca', en le ru'í' didza' que le nácatërö lesaca' guzxí' lu në'ë Dios gata' queëru'.

<sup>7</sup> La'tu' gudapa didza' na' rucá'ana tsahui' le guzóa zí'alö idútë yöl-la' huáca, biti' ben bayudxi soa didza' buropi ni rucá'ana tsahui'. <sup>8</sup> Na'a, Dios rulu'ë biti' gulaca bönachi ni' idú dxi'a cate' bë'ë didza' ca na' nazúaj lu guichi lá'ayi, gunné':

Bulí'yútsöca', gunné' Xanru': Zá'gaca dza cate' uzóa' tu didza' cubi ucá'ana tsahui', le gúnlena' bönachi Israel, en bönachi Judá.

<sup>9</sup> Biti' gaca ca guca didza' rucá'ana tsahui' na',

lë na' bénlena' xuz xtó'ogaquië',  
 dza ni' gudéla'a ná'agaquië',  
 en bubéaja' légaquië' luyú Egipto.  
 Tu' bulu'cá'anë' didza' quia' rucá'ana tsahui',  
 neda' bucá'ana' légaquië', rnnë' Xanru'.  
 10 Que lë ni na', caní gaca didza' ucá'ana tsahui'  
 gúnlena' bönachi Israel  
 tödi yugu' dza ni', rnnë' Xanru'.  
 Uchízia' icja ládxi'do'gaquië' xibá quia'  
 en uzúaja' le lu icja ládxi'do'gaquië'.  
 Ní'irö gaca' Dios quégaquië'  
 ate' légaquië' iláquië' bönachi quia'.  
 11 Biti' gun bayudxi nu usedi luzé'e, inná:  
 Bénbë'ë Xanru', tu' ilúnbë'ë yúgu'të' neda',  
 ga isí lo nu naca cá'asö, ga idxintë nu naca lo.  
 12 Huéchi' ládxa'a légaquië',  
 en uniti lahua' le cabí naca tsahui' gulunë',  
 en bíti'rö tsöjneda' dul-la' nabága'gaquië'.  
 13 Cate' ni' ru'ë Dios didza' que tu didza' cubi rucá'ana  
 tsahui', naca tu' chibigula lë na' guzóa zí'alö, ate' chizóa idúa  
 lë na' nagula, en chinaca gulasi.

## 9

*Lataj lá'ayi dë luyú, en lataj lá'ayi dë yehua' yubá*

1 Na'a, didza' rucá'ana tsahui' na' guzóa zí'alö, dzágagaca  
 xibá le ca ral-la' ila'yéaj ládxi'gaca bönachi Dios, en lataj lá'ayi  
 bidzága le guca que luyú ni. 2 Caní naca lataj lá'ayi na'  
 néquini guídi. Lu lataj na' dë láhuilö, nazí'i le Lataj Lá'ayi,  
 gula'cuá' le nuá' guí', en bucugu lá'ayi ga ni' gula'gu'ë yugu'  
 yöta xtildo' lahuë' Dios. 3 Cúdzi'lö le buropi lari' nal-la' lu  
 yu'u na' zoa lataj ni' nazí'i le, Lataj Idú Lá'ayi, 4 ate' lu lataj  
 ni' gula'cuá' tu bucugu néquini oro ga na' bulu'zégui'ë nöri,  
 enca' tu guí'ina ga yu'u didza' rucá'ana tsahui', en nacu  
 guí'ina na' oro. Lu guí'ina na' gula'cuá' xzíga'do' na' néquini  
 oro, le nadzá' yöta xtildo' na' nazí'i le maná, enca' xuyaga  
 queë' Aarón, lë na' bubö' ni'a në'e, enca' yugu' guiöj blaga  
 na', nazúaj láhuilöguequi didza' rucá'ana tsahui'. 5-6 Lahui  
 guí'ina na' gula'cuá' chopa gubáz lá'ayi néquiquequini oro,  
 légaca querubín que lataj ga bulu'i lahuë' Dios, ate' bulu'xzóa  
 xiliguequi láhuilö lataj ga ni' gulu'ë bixúz lo rön tu' nözi dul-la'.  
 Caní bulu'cu'ë yugu' lë ni. Biti' dë lataj uzúaja' na'a idútë ca  
 nácagaca lë ni.

Ta'yázatica'së' yugu' bixúz lu lataj zoa láhuilö, ga na' tunë'  
 dxin quégaquië' que le ta'yéaj ládxi'gaquië' Dios. 7 Tuzë'  
 bixúz lo guyázië' lu lataj buropi ni' tu luzuísö tu iz, en bi'ë

rön le gulu'ë lahuë' Dios tu' nözi dul-la' nabaga' cazë', enca' tu' nözi dul-la' nabága'gaca bönachi, dul-la' gulunë' le cabí guléquibe'enë'. <sup>8</sup> Caní ruzéajni'inë' Dios Bö' Lá'ayi rë'u, biti' ca' guca idxinru' lahuë' Dios caz tsanni ni' tu'gunë' dxin lataj lá'ayi na' zoa lálhuilö lu yu'u lá'ayi na' néquini guídi, lë na' bidzága didza' rucá'ana tsahui' le guzóa zí'alö. <sup>9</sup> Yugu' lë ni naca tu le rulu'isö que le raca na'a dza. Yugu' le gula'gu'ë lahuë' Dios, en rön quégacaba' böa' bëdxi na' gulútië'-ba' lahuë' Dios biti' guca ulu'ún idú dxi'a icja ládxi'do'gaquië' bönni' ni' gula'yéaj ládxi'gaquië' Dios caní. <sup>10</sup> Yugu' lë ni bulu'i lahui quégacasö le gulë'aj gulahuë', en ca ral-la' ila'guíbi cuíngaquië', en quégaca xibá ca ral-la' gaca que idú ca zeaj naca cazë'. Yugu' lë ni buzóë' Dios quégaquië' ga bidxintë dza ral-la' utsë'ë yúgu'të.

<sup>11</sup> Na'a, chibudulu'i lahuë' Cristo, en náquië' Bixúz Lo que le naca idú dxi'a, le bilá' lahui ni'a que le benë' Lë'. Lataj lá'ayi ga na' guyázië' Lë' nácarö lo, en nácarö idú, en biti' néquini lu ni'a lu ná'agaca bönachi, en biti' naca que luyú ni. <sup>12</sup> Na'a, chiguyázië' Cristo lu lataj lá'ayi na', caléga len xichöngacaba' bëdxi'do', en xichöngacaba' chivo, pero len rön queë' cazë'. Guyázië' lu lataj idú lá'ayi tu luzuísö, ate' caní guca, benë' ga nuláru' tsaz. <sup>13</sup> Le nácatë xichöngacaba' bëdxi, en chivo, en dö queë'ba' bëdxi'do' bulu'zégui'ë'-ba', yugu' le gula'gu'ë lu ícjugaca nupa nabága'gaca dul-la', guca ulu'gúa dul-la' na' nabága'gaca bönachi para ulu'ún légaquië' dxi'a idú ca zeaj naca cazë' ca naca que yöl-la' yudo' quégaquië'. <sup>14</sup> Na'a, gúntërö ca' xichönë' Cristo, tu' budödi cuinë' queë' Dios, en gúquië' idú tsahui', ate' zóalenë' Dios Bö' Lá'ayi Lë', Nu zóatica'sö. Na'a, xichönë' Cristo ruún idú dxi'a icja ládxi'do'oru' lu yugu' le gubága'ru' le tun ga nu gati, para gaca gunru' xichinë' Dios ban.

<sup>15</sup> Que lë ni na' náquië' Jesucristo Nu ben tsutsu didza' cubi rucá'ana tsahui', tu' gútië' Lë', en bugúë' dul-la' gula'baga' bönachi cate' ni' zoa didza' gula rucá'ana tsahui'. Gútië' ca' para gaca ila'zi'ë lë na' guxzí' lu në'ë Dios unödzejë' quégaquië' bönni' bulidzë', le zóatica'sö. <sup>16</sup> Cate' ratië' nu bönni', en nucá'anë' tu didza' ca ral-la' ila'guísië' le nequi queë', run bayudxi gaca bë' chinátië' bönni' na' para gaca ilunë' ca rnna didza' na' nucá'anë'. <sup>17</sup> Cate' chinátië' bönni' na', gaca ilunë' ca rnna didza' na', pero tsanni ni zoë' nabanë', biti' ca' gaca ilunë' ca rnna didza' na'. <sup>18</sup> Que lë ni na', didza' na' rucá'ana tsahui' le guzóa zí'alö guca lesaca' tu' bidzága rön didza' na', le rulu'isö zoa nu guti. <sup>19</sup> Cate' ni' gudíxjöi'inë' Moisés bönachi ni' ca nácgaca yúgu'të xibá queë' Dios, gudélë'ë rön quégacaba' bëdxi'do', en quégacaba' chivo, le nutsi' nisa, ate' len tu guíxi'do' nazí'i le hisopo, en lítsa'ba' bö'cu' zxila' le në'aj xiná, buchéajë'



rön, en nisa na' lahui guichi ga na' nazúaj xibá na', enca' láhuigaca bönachi. <sup>20</sup> Ní'irö gudxë' légaquië': "Lë ni naca rön le run tsutsu didza' rucá'ana tsahui' le gunná bé'enë' Dios rë'u para gunru' ca rnna." <sup>21</sup> Lësca' caní buchéajë' Moisés rön na' lu lataj lá'ayi néquini guídi, en lahui yúgu'të le tu'gunë' dxin para ila'yéaj ládxi'gaquië' Dios. <sup>22</sup> Ca na' rinná bë' xibá na', látu'biqui' yúgu'të ral-la' un dxi'a rön léguequi, ate' channö cabí tu'laljë' rön, biti' udúa dul-la'.

### *Xichönë' Jesucristo rugúa dul-la'*

<sup>23</sup> Caní naca, ben bayudxi guzóa le bun dxi'a yudo' luyú ni le naca tu le rulu'isö ca naca lë na' rö'ö yehua' yubá, pero ca naca lë na' rö'ö yehua' yubá, ben bayudxi soa le un dxi'a nupa ila'yaza le, le nácarö lesaca' ca xichóngacaba' böa' bëdxido' caní. <sup>24</sup> Biti' guyázië' Cristo lataj lá'ayi néquini lu ni'a lu ná'agaca bönachi, lë na' naca tu le rulu'isö ca naca le naca idú, pero guyázië' yehua' yubá caz para gaca ulu'i lahuë' na'a lahuë' Dios uláz queëru'. <sup>25</sup> Bixúz lo zoë' luyú ni razië' lataj nácatërö lá'ayi tu tu iz len rön quégacaba' böa' bëdxi, pero biti' run bayudxi tsázië' Cristo zían luzuí para udödi cuinë' lahuë' Dios. <sup>26</sup> La'tu' guca caní, gun bayudxi qui'i sáquë'ë Cristo, en gátië' zían luzuí dza ni'te cate' guta' yödzülió ga ridxintë na'a dza, pero na'a cate' naca dza údxi, tsaz bulu'i lahuë' tu luzuísö, en budödi cuinë' lahuë' Dios, cate' gútië' para bugúë' dul-la' nabága'ru'. <sup>27</sup> Ca na' run bayudxi ilátigaca bönachi tu luzuísö ate' tödi ni' uchi'a usöröë' Dios léguequi, <sup>28</sup> lësca' caní, gútië' Cristo tu luzuísö, cate' budödi cuinë' lahuë' Dios para bugúë' dul-la' nabága'gaca bönachi zían. Na'a, ulu'i lahuë' le buropi luzuí, calëga para ugúë' dul-la', pero para usölë' tsaz nupa ta'böza Lë'.

## 10

<sup>1</sup> Xibá na' gunná bë'ë Moisés guca tu le rulu'isö ca zeaj naca le tsahui' si' zá'gaca, en biti' guca idú ca ná'agaca. Que lë ni na', xibá na' queë' Moisés biti' guca un idú tsahui' nupa ni' bila'dxín lahuë' Dios, en biá'gaca rön quégacaba' böa' bëdxido', lë na' gula'gú'utica'së' lahuë' Dios yugu' iz. <sup>2</sup> La'tu' guca un légaquië' idú tsahui', biti' gula'gú'utica'së' rön ni' lahuë' Dios, tu' cabirö iléqui'be'enë' bönni' guca caní quégaquië' nabága'gaquië' dul-la' channö chibulu'huöáquië' idú tsahui'. <sup>3</sup> Rön ni' gula'gu'ë lahuë' Dios yugu' iz busá' ládxi'gaquië' nabága'gaquië' dul-la'. <sup>4</sup> Caní guca, tu' cabí guca xichóngacaba' bëdxi, en chivo ugúa dul-la'.

<sup>5</sup> Que lë ni na', cate' bidxinë' Cristo yödzülió ni, gudxë' Dios ca na' nazúaj lu guichi lá'ayi le rnna: Biti' ré'ënu' nu cu'u rön quégacaba' böa' bëdxi lo'

pero benu' ga naca' bönáchisö.

<sup>6</sup> Biti' raza ládxi'u nu uzegui'-ba' böa' bēdxi lo',  
o nu cu'u xichõngacaba' lo' tu' nözi dul-la'.

<sup>7</sup> Ní'irö gunná': Ni zoa' para guna' ca rē'ēnu' Li', Dios.  
Naca ca na' nazúaj lu guichi lá'ayi ca gaca quia'.

<sup>8</sup> Lē na' nazúaj zí'alö rnna: "Biti' rē'ēnē' Dios nu cu'u rön  
quégacaba' böa' bēdxi lahuē'." Didza' ni ruluí'i rē'u bíti'rö raza  
ládxi'ē Dios lē ni sal-la' lu xibá queē' Moisés rinná bé'enē' Dios  
nu gun caní. <sup>9</sup> Gudödi ni' rnna: "Ni zoa' para guna' ca rē'ēnu'  
Li', Dios." Didza' ni ruluí'i rē'u rugúē' Dios lē na' gula'guē'  
lahuē' zí'alö, en ruzóē' xilataj le gulu'ē Zxí'ini cazē' lahuē'.  
<sup>10</sup> Na'a, Dios ruúnē' rē'u idú tsahui' tu' benē' Cristo ca rē'ēnē'  
Dios cate' ni' budödi cuinë' lahuē' Dios uláz queēru', en gútiē'  
tu luzuísö.

<sup>11</sup> Le nácatē yúgu'tē bixúz luyú ni zuíguequinē' yugu' dza, en  
tunē' xichíngaqüē', en la' tuz ca tunē', ta'gu'ē lahuē' Dios zían  
luzuí xichõngacaba' böa' bēdxi, yugu' le cabí gaca ulu'gúa dul-  
la'. <sup>12</sup> Na'a, Cristo, tu le gulu'ē tsaz lahuē' Dios tu luzuísö tu'  
nözi dul-la', ate' ní'irö yõjchõ'ē cuita lē'ē ibēla Dios. <sup>13</sup> Ribözē'  
ni' dza gunē' Dios ga ulu'zechu zxíbigaca lahuē' nupa bití'  
ta'lé'e Lē' dxi'a. <sup>14</sup> Ní'a que tuz le gulu'ē lahuē' Dios, tsaz  
benē' ga nácgaca idú tsahui' nupa na' bunē' dxi'a, en bubéajē'  
léguequi quez queē' Dios. <sup>15</sup> Lēscá' caní Dios Bö' Lá'ayi runē' ba  
nalí loru', tu' gunnē' zí'alö lē na' nazúaj lu guichi le rnna:

<sup>16</sup> Caní gaca didza' ucá'ana tsahui' gúnlena' légaquüē'  
tödi yugu' dza ni', rnnē' Xanru'.

Uchízia' icja ládxi'do'gaquüē' xibá quia',  
en uzúaja' le lu icja ládxi'do'gaquüē'.

<sup>17</sup> Gudödi na' gunnē':  
Bíti'rö tsõjneda' dul-la' nabága'gaquüē'  
en dö' biá'gaquüē'.

<sup>18</sup> Que lē ni na', channö chinadúa dul-la', bíti'rö run bayudxi  
nu bi cu'u lahuē' Dios tu' nözi dul-la'.

### *Huáca ibíga'ru' gala' ga zoē' Dios*

<sup>19</sup> Na'a, yugu' böchi' luzá'ado', idú ládxi'ru' gaca idxinru'  
lahuē' Dios caz, ni'a que xichõnē' Jesucristo. <sup>20</sup> Tséajlenru' tu  
nöza cubi, en idú tsahui' le nuzóē' Cristo, le ridxín cúdzi'lö lari'  
na' busayaj ga nu riyaza lataj idú lá'ayi na', o huáca innaru',  
nöza na' gusaljē' Cristo ni'a queēru' tu' budödē' idütē' le naca  
cazē'. <sup>21</sup> Jesús náquüē' queēru' tu bixúz nayēpisētērē', en rinná  
bé'enē' bönachi queē' Dios. <sup>22</sup> Que lē ni na' huáca ibíga'ru' gala'  
ga zoē' Dios idú ládxi'ru', en lu yõl-la' run löza queēru', tu'  
réajlē'ēru' Cristo, tu' chibunē' dxi'a icja ládxi'do'oru', para cabí  
uxõsa ládxi'do'oru' rē'u, ate' gudibē' idütē' le naca cázaru' len le  
naca tu nisa nácatērö idú. <sup>23</sup> Ral-la' gácaru' tsutsu, en cabí gaca

chopa ládxi'ru' ca naca le runru' löza que le nazí' lu ná'aru', le guzxi' lu në'ë Dios gunnë' queëru', ate' Lë' runë' ca rnnë'.  
 24 Ral-la' utipa ládxi'ru' turu' ia'turu', para gunru' ga idxí'iröru' luzá'aru', en gúnröru' ca' le naca tsahui'. 25 Bal-la bönachi bíti'rö tu'dubi len rë'u. Biti' ral-la' gunru' ca tun bönachi na', pero ral-la' utipa ládxi'ru' turu' ia'turu', en gúnröru' caní tu' rilé'eru' chizóa idxín dza huödë' Xanru'.

26 Channö zéajlenru' runru' dul-la' tödi núnbë'ëru' le naca iduté li, bití' ca' nagá'ana bi gaca cú'uru' lahuë' Dios le ugúa dul-la'. 27 Yugu' bönni' tunë' caní, lu yöl-la' radxi ridzöbi quégaquië' ta'bözë' dza ichúguië' Dios quégaquië' ila'yázië' lu guí' gabila, lë na' uzéguitica'sö nupa ta'dá'baga' Dios. 28 Cate' nu bönni' buzóë' xibá queë' Moisés tsölá'alö, gulútië' lë' channö chopa tsonna bönachi gulún ba nalí que le benë', ate' cuntu nu buéchi' ladxí' bönni' na'. 29 Na'a, nu bönni' uzóë' tsölá'alö Zxí'inë' Dios, en uzóë' tsölá'alö ca' xichönë' le run tsutsu didza' rucá'ana tsahui', le ruún rë'u dxi'a, ibága'rë' ca' xíguia'. Nu bönni' gunë' caní ucá'anë' cá'asö Dios Bö' Lá'ayi, Nu ruzá' ladxí' queëru' le riquíniru'. 30 Caní gaca, tu' núnbë'ëru' në' Dios, Nu gunná: "Quia' neda' nequi yöl-la' ruzí' lëbi. Neda' ubi'a quégaca bönachi, rnnë' Xanru'." Lësca' caní gunné': "Xanru' uchi'a usöröë' bönachi queë'." 31 Ral-la' gadxi idzöbi nu ral-la' si' xíguia' lu në'ë Dios ban.

32 Guli'tsöjné yugu' dza chigula'dödi cate' ni' si' bidxín queëli' bení', ate' biá' gulenli' zían le bulu'saca' zi'ë libí'ili'. 33 Bulu'lidza ditaj bönachi libí'ili', en bulu'dxía libí'ili' dö' lahui' lógaca bönachi, ate' benli' tsözxön ca' nupa gula'guí' gula'zaca' caní. 34 Caní guca, tu' buéchi' ládxi'li' nupa nadzúngaca lidxi guíë, en lu yöl-la' rudzeja queëli' biá' gulenli' nupa gula'béaj lídxili' yugu' le guta' queëli'. Caní benli' tu' nözili' nequi queëli' le nácarö dxi'a, en le zóatica'sö ni' yehua' yubá. 35 Na'a, bití' ucá'anali' lë na' runli' löza, le nachë' tu le zxön ubi'ë Dios queëli'. 36 Run bayudxi cózali' zxön ladxí', para cate' chibenli' ca rë'ënë' Dios, sí'ili' le guzxi' lu në'ë gunnë' queëli', ca na' nazúaj lu guichi lá'ayi, ca gunné' Dios le rnna:

37 Ia'tú chí'ido'osö idxinë' Bönni' na' ral-la' guídë'.

Biti' ca' tsenë'.

38 Ní'irö nu naca tsahui' lahua' neda',

ulá nu na' tu' réajlë' neda'.

Channö huöaj ladxí', en tá'baga' neda',

bíti'rö tsaz ládxa'a nu na'.

39 Na'a, rë'u ni, bití' nácaru' ca nupa tu'huöaj ladxí', en ta'dá'baga' Dios, en ila'niti, pero réajlë'ëru' Cristo, en nadéli'ru' yöl-la' rusólá.

## 11

*Ca naca yöl-la' réajlë' queëru' Dios*

<sup>1</sup> Na'a, tu' réajlë'ëru' Dios, naca löza queëru' sí'iru' le runru' löza, ate' naca bë' zoa le cabí gaca ilé'ëru'. <sup>2</sup> Caní gula'yéajlë'ë xuz xtó'oru' Dios, ate' que lë ni na' nazúaj lu guichi lá'ayi ca guca quégaquië' le rnna: Bulu'rúajë' tsahui' lahuë' Dios.

<sup>3</sup> Tu' réajlë'ëru' Dios, réquibe'ëru' benë' Lë' yödzölió ni len didza' bë'ësë'. Lësca' caní, cate' benë' Dios yúgu'të le rilé'ëru', bugunë' dxin le cabí nalá'.

<sup>4</sup> Tu' guyéajlë'ë Abel Dios, gulu'ë rön queëba' böa' bédxido' lahuë' Dios, tu le nácatëro lesaca' ca le gulu'ë Caín lahuë' Dios, en que lë ni na' Dios benë' ba nalí queë' Abel na', gunné' náquië' tsahui', en benë' bal lë na' gulu'ë lahuë'. Sal-la' chinátië' Abel na', ga ridxintë na'a dza, naca tsca ru'ë didza', tu' guyéajlë'ë Dios.

<sup>5</sup> Tu' guyéajlë'ë Enoc Dios, gudödë' ni' yehua' yubá, en bití' ca' gútië', ate' bíti'rö nu budzöli lë', tu' buchë'ë Dios lë', ate' nazúaj lu guichi lá'ayi ca naca queë' le rnna: "Zí'aló ca buchë'ë Dios lë', benë' Enoc le raza ládxe'ë Dios." <sup>6</sup> Na'a, channö cabí réajlë'ëru' Dios, bití' gaca gunru' le raza ládxe'ë Lë', ate' para íbígá'ru' gala' ga zoë' Dios, run bayudxi tséajlë'ëru' zoa cazë' Lë', en rubi'ë que nu ruí'i ladxi' Lë'.

<sup>7</sup> Cate' ni' Dios buzéajni'inë' Noé ca ral-la' ilaca le cabí rilé'ëninë' Noé na', tu' guyéajlë'ë Noé Dios, benë' ca rnna xtídzë'ë Dios. Bupë'ë barco zxön na' nazí'i le Arca, ate' lë'e barco na' bulu'lá bönachi di'a dza queë' Noé. Tu' guyéajlë'ë Noé Dios, benë' ga naca bë' narugu quégaca bönachi yödzölió ilátigaca, ate' bidéli'në' gúquië' tsahui' lahuë' Dios, le ta'deli' nupa ta'yéajlë' Lë'.

<sup>8</sup> Cate' ni' Dios bulidzë' Abraham, tu' guyéajlë'ë Abraham Lë', benë' ca rnna xtídzë'ë Dios, en buzë'ë ladzë' para tsejë' lataj ni' ral-la' sí'ë ca tu le guequi tsaz queë', ate' birúajë' ladzë' sal-la' bití' nözinë' gazxi na' ral-la' tsejë'. <sup>9</sup> Tu' guyéajlë'ë Abraham Dios, gúquië' ca tu bönni' zi'tu', en guzóë' luyú na' Dios guzxi' lu në'ë unödzejë' queë'. Guzóë' lu yu'u guídido', en lëbisö ca gulunë' Isaac, en Jacob, xzí'ini xi'sóë' Abraham, nupa ni' guzxi' lu në'ë Dios unödzejë' quéguequi lë na' guzxi' lu në'ë unödzejë' queë' Abraham. <sup>10</sup> Caní benë' Abraham, tu' benë' löza idéli'në' yödzö na' rö'ö tsaz xilibi zö'ö que, le nuzóë' Dios xilibi zö'ö que, ate' gulu'ë le ga na' zoë' Lë' cazë'.

<sup>11</sup> Lësca' caní Sara, sal-la' chinácanu nigula huödx, guyéajlë'ënu Dios, ate' Lë' bë'ë queënu yöl-la' huáca buzóanu-bi' bí'ido'. Buzóanu-bi' bi'i bönni'do' sal-la' chigudödi izi queënu, tu' guyéajlë'ënu Dios gunë' ca rnna xtídzë'ë na' guzxi' lu në'ë queënu. <sup>12</sup> Que lë ni na', sal-la' chibigúladë'ë Abraham,

gula'cuá'abi' ziantërobi' xzí'ini xi'sóë'. Gula'cuá'abi' tsca rő'öba' böljaj lúzxiba, en tsca rő'ö yuzxi tu ra' nisa zxön, cuntu nu gaca ulaba légacabi'.

13 Yúgu'të bönni' ni gulátië', en biti' gula'zi'ë lë na' guzxi' lu në'ë Dios unödzejë' quégaquië', pero gula'yéajlë'ë Dios, ate' zi'tu' zí'tu'sö bila'lé'enë' lë na' ral-la' ila'zi'ë. Gula'yéajlë'ë Dios, en gulunë' ba nalí que lë ni. Caní guca, bulu'lu'ë nácagaquië' ca bönni' zi'tu', en bönni' ta'dazë' yödžolió ni. 14 Yugu' bönni' tu'ë caní didza', tu'lu'ë ta'guiljë' tu lataj le gaca ládzagaquië'. 15 La'tu' gula'zá' ládxi'gaquië' caní que luyú ga ni' bila'rúajë', le nácaté ulu'džölinë' nacxi huőajgaquië' ni', 16 pero gula'zá' ládxi'gaquië' que luyú na' nácarö dxi'a, le rő' yehua' yubá. Que lë ni na' biti' rutu'ínë' Dios cate' ta'nnë' náquië' Dios quégaquië', tu' chinupë'ë tu yödžö quégaquië'.

17 Tu' guyéajlë'ë Abraham Dios, cate' guzxi' bë'ë Dios lë', budödë'-bi' bi'i Isaac queë' lahuë' Dios ca na' tu'dödë'-ba' yugu' böa' bëdxi tútigaquië'-ba' lahuë' Dios. Guzóë' sina' Abraham gútië'-bi' bi'i bönni' zí'alö queë' na' lahuë' Dios sal-la' nácabi' bi'i na' guzxi' lu në'ë Dios unödzejë' queë'. 18 Caní benë' sal-la' gudxë' Dios lë', gunnë': "Lu ná'abi' bi'i Isaac quiu' ichísagaca'-bi' xzí'ini xi'sú'." 19 Caní benë' Abraham, tu' gúquibe'enë' napë' Dios yöl-la' huáca usubanë'-bi' lu yöl-la' guti, ate' ca tu lugá'a luséqui', huáca innaru' buzi'ë'-bi' lu yöl-la' guti sal-la' biti' guti cázabi'.

20 Tu' guyéajlë'ë Isaac Dios, gunábinë' Dios gun lá'ayë'-bi' bi'i Jacob, enca' bi'i Esaú ca zeaj naca le ulu'z'í'ibi' xibé dza si' za'. 21 Tu' guyéajlë'ë Jacob Dios, cate' ni' chizóa gátië' gunábinë' Dios gun lá'ayë'-bi' tu tubi' xzí'inë' José, ate' guyéaj ládxië'ë Dios, ni' nayéchuë' lu xiyaga queë'. 22 Tu' guyéajlë'ë José Dios, cate' ni' chizóa gátië', bë'ë didza' que dza na' ila'rúajë' xzí'ini xi'sóë' Israel luyú Egipto, ate' gunná bë'ë ca ral-la' ilu'ë dxita queë' luyú ga na' tsőjcu'ë.

23 Tu' gula'yéajlë'ë Dios, cate' gúljabi' bí'ido' Moisés, xuz xiná'abi' bulu'cáché'ë'-bi' idú ca tsonna beo', tu' bila'lé'enë' nácabi' bi'i bönni'do' na' lachi, en biti' guládxinë' bönni' rinná bé'enë' bönachi Egipto, bönni' na' gunná bë'ë ilútië'-bi' yugu' bi'i bönni'do' na'. 24 Tu' guyéajlë'ëbi' Moisés Dios, cate' guzxonbi', bíti'rö bë'ëbi' lataj nu uzóa lëbi' bi'i bönni' queënu nigula xzí'inë' Faraón, bönni' na' rinná bé'enë' bönachi Egipto. 25 Caní benbi' tu' gúquibi' nácarö dxi'a nu usaca' zi' lëbi' tsözxön len bönachi queë' Dios ca uzí'ibi' xibé tu chí'isö yugu' le tu'z'í' xibé nupa tun dul-la'. 26 Gúquibi' nácarö lesaca' nu ulidza ditaj lëbi', ca na' gaca ca' queë' Cristo, ca idéli'bi' yugu' yöl-la' tsahui' quégaca bönachi Egipto, tu' guzá' ládxi'bi' ca naca le ubi'ë Dios queëbi'. 27 Gudödi ni', tu' guyéajlë'ë Moisés Dios, birúajë' luyú

Egipto, en biti' gúdxinë' yöl-la' rilé queë' bönni' rinná bé'enë' bönachi Egipto, ate' biá' guléné' ca run nu rilé'e Dios, Nu na' biti' gaca ilé'eru'.

<sup>28</sup> Tu' guyéajlë'ë Moisés Dios, benë' Laní Pascua ca gunná bé'enë' Dios lë', en buchéajë' rön ra' yu'u lídxigaquië', para cabí guti xzí'inigaquië' nu na' ral-la' usuniti yugu' bi'i bönni' zí'aló quégaca bönachi Egipto. <sup>29</sup> Tu' gula'yéajlë'ë yugu' bönni' Israel Dios, gula'dödë' luyú bidxi gatsaj láhui'lö nísado' nazí'i le Nisa Xiná. Cate' gulë'ënnë' ila'dödë' ca' bönni' Egipto ni', gula'yëpinë' nisa, en gulátigaquië' lu Nisa Xiná na'.

<sup>30</sup> Tu' gula'yéajlë'ë bönni' Israel Dios, cate' budxi gula'dödë' idú gásibi'ilö yödzö Jericó yugu' dza idú gadxi dza, bila'guínnaj yugu' zö'ö gulún chi'i yödzö na'. <sup>31</sup> Tu' guyéajlë'ënu Rahab Dios, nigula ruí'ínu lataj bönachi, biti' gútinu tsözxön len bönachi Jericó na' biti' gulún ca rnna xtídzë'ë Dios, tu' bennu bal bönni' Israel na' buduyúlangaquië' le rácalen bönachi Jericó.

<sup>32</sup> ¿Bízxirö ral-la' innía'? Riyadzaj lataj uzúaja' ca gulunë' Gedeón, en Barac, en Sansón, en Jefté, en David, en Samuel, enca' yugu' bönni' gulu'ë didza' uláz queë' Dios.

<sup>33</sup> Tu' gula'yéajlë'ë Dios, bulu'zötjë' zían yödzö zxön.

Gulunë' le naca tsahui', ate' gula'déli'në' le guzxi' lu në'ë Dios unödzjë' quégaquië'.

Bulu'sayjë' ruá'agacaba' bëdxi guixi'.

<sup>34</sup> Bulu'lë' yugu' lu guí' zxön.

Bila'ruájë' lu ná'agaca nupa gulë'ëni iluti légaquië' len guíë tuchi'.

Dios bunë' légaquië' tsutsu cate' ni' gula'cuídi'në'.

Bulu'huóáquië' ca' tsutsu lu gudil-la.

Bulu'láguie' bönni' guizxi yu röjáquië' gudil-la quégaquië' bönni' zí'tu'.

<sup>35</sup> Yugu' nigula dza ni' bulu'zí'ínu bi'i que queégacanu nubángacabi' lu yöl-la' guti.

Ia'bal-lë' bönni' ni' gulatië' lu ná'agaquië' bönni' ni' bulu'saca' zi'ë légaquië', en tu' cabí gulë'ënnë' ulu'cá'anë' Dios, biti' gula'zi'ë lataj nu usán légaquië'. Caní gulunë' para ila'déli'në' yöl-la' rubán lu yöl-la' guti, lë na' guléquinë' nazáca'rö. <sup>36</sup> Ia'bal-lë' biá' guléngaquië' yöl-la' rutitaj, en xíguia' que gubá'ayi, ate' gula'dzunë' lidxi guíë, nága'gaquië' du guíë.

<sup>37</sup> Bulu'ladxi' bönachi bal-lë' guiöj, en gula'chözë' ia'bal-lë'. Gula'zí' bë'ë légaquië', en gulútigaca ziángaqië' len guíë tuchi'. Gula'dödë' ná'alö ní'ilö, nácugaquië' guídi zxágacaba' bö'cu' zxila', en chivo. Guláquië' yechi', en gula'guí'i gula'záquë'ë, ate' bulu'dxía bönachi légaquië' dö'. <sup>38</sup> Caní guláquië' bönni' na', ate' biti' gulaca bönachi yödzölió ni lesaca' ulu'zí' xibégaquië'. Gula'dasë' lu lataj cá'asö, en yugu' lu guí'a, ate' gula'cuá'asë'

yugu' zxan bulóaj, en yugu' yeru luyú. <sup>39</sup> Yúgu'tè' bulu'rúajè' tsahui' lahuè' Dios tu' gula'yéajlè'è Lè', sal-la' biti' gula'zi'è luyú ni le guzxi' lu në'è Dios unödzejè' quégaquiè'. <sup>40</sup> Caní guca, tu' nupè'è Dios ni'a queëru' tu le nácarò dxi'a para cate' únè' légaquiè' idú dxi'a, rë'u ni gunru' légaquiè' tsözxön.

## 12

### *Ral-la' uyuru'-nè' Cristo*

<sup>1</sup> Que lè ni na', lësca' rë'u, tu' nacuá' idú gásibi'ilò ga ni zóaru' zióntèrò nupa tun ba nalí ca ta'yéajlè' Dios, ral-la' ucá'anaru' yúgu'tè le ruá' dö' le naca ca tu le naca zi'i nuá'aru', enca' yúgu'tè dul-la' nazöngaca rë'u, ate' lu yöl-la' riböza zxön ladxi' queëru', ral-la' gunru' xichiné' Dios, le naca tsca xíti'ru' lu huitaj le zoa loru'. <sup>2</sup> Ral-la' uyuru'-nè' Jesús, Nu na' run ga gaca tséajlè'ëru' Dios, en Nu run ga raca idú yöl-la' réajlè' queëru' Lè'. Jesús gudí'i guzxi'què'è lè'e yaga cruz, en biá' gulénè' yöl-la' rutuí'i que, tu' gú'unnè' idéli'nè' yöl-la' rudzeja na' uzi'è xibé, ate' yöjchö'è cuita lè'è ibèla Dios, ga ni' röö'è rinná' b'è.

<sup>3</sup> Buli'yúé' Jesús, ca na' gudí'i guzxi'què'è le bulu'saca' zi'è bönni' dul-la' Lè', para cabí icuídi'li', en para cabí gaca chopa ládxi'li'. <sup>4</sup> Ga ridxintè na'a dza, biti' bi biá' gulenli' ga idxintè nu gun libí'ili' hué' tu' ridá'baga'li' le naca dul-la'. <sup>5</sup> Nadxi ca' chizá' ral-la ládxi'li' lè na' ruzéajni'inè' Dios libí'ili'. Nácali' ca yugu' zxi'ini cazè', ca na' nazúaj lu guichi le rnnè':

Zxi'ina', biti' uzú' tsölá'alò le gunè' Xanru',

cate' usèdi uzéajni'inè' li',

en biti' huöaj ládxi'u cate' uní'inè' li'.

<sup>6</sup> Xanru' runí'inè' nu nadxi'inè',

en rusèdi ruzéajni'inè' yúgu'tè nupa ta'zì' lu në'e ilaca zxi'ini cazè'.

<sup>7</sup> Ral-la' guá' ilenli' le uní'inè' Dios libí'ili', tu' runè' Dios caní queëli' tsca nácali' zxi'ini cazè'. Biti' ca' zóabi' tubi' bí'ido' biti' uní'inè'-bi' xúzibi'. <sup>8</sup> Na'a, channö cabí runí'inè' Dios libí'ili' ca na' runè' quégaca yúgu'tè zxi'ini cazè', ní'irö nácali' ca yugu' bi'i lan, en biti' nácali' idú zxi'inè' Dios. <sup>9</sup> Ia'stú, cate' ni' nácaru' bí'ido', gula'cu'è xuz xiná'aru' luyú ni, bulu'ní'inè' rë'u, pero runru' légaquiè' bal. Ca' naca, ral-la' gúnroru' ca rnna xtídzè'è Xúziru' zoè' yehua' yubá para sóaru' ibanru' tsaz. <sup>10</sup> Yugu' xuz xiná'aru', tu chí'sö bulu'ní'inè' rë'u tsca le guléquisinè' naca dxi'a, pero cate' runí'inè' Dios rë'u, naca para gaca tu le uzí'iru' xibé, para gácaru' idú lá'ayi ca naca cazè' Lè'. <sup>11</sup> Le nácatè biti' nalá' lahui na'a le uzí'iru' xibé que le runí'inè' rë'u, pero run ga ruhuí'iniru'. Channö güf'iru' lataj usèdi rë'u le runí'inè' rë'u, gun ga cözaru' dxi'ado', en ga gácaru' tsahui'.

*Soa bönadxi queëru' channö cabí uzè' nágaru' chí'è Dios*

<sup>12</sup> Que lë ni na' buli'ún tsutsu ná'ali' le röjxéqui'guequi, enca' zxi'bili' le ta'zxi'zi, en idipa ládi'li' para gunli' le naca dxi'a. <sup>13</sup> Guli'sóa nōza tsahui', para cabi' gunli' ga ucá'ana nu ricuidi' ladi' nōza na', pero guli'gún ga huóaca ladi' nu na'.

<sup>14</sup> Guli'güi' ládi'li' cōzalenli' dxi'a yúgu'të bōnachi, en gácali' tsahui' lahuë' Dios, tu' channō cabi' gunli' caní, biti' gaca ilé'eli'-në' Xanru'. <sup>15</sup> Guli'gún chi'i cuinli' para cabi' soa nu ucá'ana le ruzá' ládi'ë Dios queëru', en para cabi' soa nu gaca ca tu guixi' silá', para cabi' utsá' libí'ili', en cabi' gun ga cabi' gácali' tsahui' zianli' libí'ili'. <sup>16</sup> Guli'gún chi'i cuinli' para cabi' gun nu dzaga libí'ili' le ruá' dö', o le cabi' naca tsahui', ca na' benë' Esaú, zxi'inë' Isáac. Esaú na' bëti'ë le ral-la' gata' lu në'ë tu' náquië' bi'i bōnni' huaca queë' xuzë' para guzxi'ë tu le do' gudahuë'. <sup>17</sup> Chinōz quézili' ca na' guca queë' Esaú gudōdi ni' cate' gú'unnë' idéli'në' le inabë' xuzë' lahuë' Dios para gaca le tsahui' queë'. Buéchi' ládi'ë xuzë' lë', pero biti' guta' lataj ubí'i ládi'ë Esaú na' sal-la' gudilaj ládi'ë le len yöl-la' ribōdxi queë'.

<sup>18</sup> Ca raca queëli' biti' naca ca guca quégaquië' bōnni' Israel. Légaquië' gula'biguë'ë gala' ga zoa tu gu'a le gaca nu can, ate' guyegui gu'a ni', en bōaca chul-la' lahui' dza tu' gurō'ō bōaj gasaj, en guyécjada' bō'. <sup>19</sup> Bila'yōnnë' ta'bōdxi lúzuba' bōa', enca' chi'ë Dios Nu bë' didza'. Cate' bila'yōnnë' lë ni, guláta'yüë' lahuë' Moisés para cabirō gü'ilenë' Dios légaquië' didza'. <sup>20</sup> Caní gulunë' tu' cabi' guca guá' iléngaquië' lë na' gunná bé'enë' Dios légaquië', gunnë': "Channō tsōjlibiba' tuba' bōa' guíxi'do'os gu'a ni, ral-la' ulu'ládi'ë-ba' guiōj, o ulu'dödë'-ba' yaga tuchi'." <sup>21</sup> Lë na' bila'lé'enë' ben gádxida' légaquië', ate' Moisés gunnë': "Radxi ridzōbida', en rizzízida'a."

<sup>22</sup> Na'a, libí'ili' ral-la' gádxitë'rōli' tu' ribíga'li' gala' tu lu gu'a nazí'i le Sión, en ga zoa yōdzō queë' Dios ban, le nazí'i le Jerusalén que yehua' yubá, ga na' nacu'ë gubáz lá'ayi guizxi' yu queë' Dios. <sup>23</sup> Ribíga'li' gala' ga ni' nudúbigaca zxi'ini cazë' Dios lahuë' Lë', nupa na' nazúajgaca láguequi lu guichi ni' yehua' yubá, enca' ga zoë' Dios Nu ruchí'a rusörōë' yúgu'të bōnachi, en ga na' nacuá' yugu' bō' gulaca cazë' yugu' bōnni' tsahui', tu' bunë' Dios légaquië' tsahui'. <sup>24</sup> Ribíga'li' ca' ga zoë' Jesús, Nu ben tsutsu didza' cubi na' rucá'ana tsahui', enca' ga nagu'ë Jesús rōn queë' le run ga runiti lahuë' Dios rë'u, rōn na' run le nácarō dxi'a ca le ben xichōnë' Abel, lë na' ben ga guchúguië' Dios queëbi' bi'i böchë'ë.

<sup>25</sup> Que lë ni na', guli'gún chi'i cuinli' para cabi' tá'baga'li' Nu na' ru'i didza'. Biti' ca' bulu'lá nupa ni' gula'dá'baga' nu na' bulidza légaquië' luyú ni. Nácatë'rō löza biti' ca' uláru'



rë'u channö tá'baga'ru' Nu na' rulidza rë'u, zoë' yehua' yubá.  
<sup>26</sup> Dza ni' guzxizi luyú ni tu' biyõn chi'ë Dios, pero na'a chiguzxí' lu në'ë, gunnë': "Ia'tú luzuísö, en calëgasö luyú uxízia', pero lúzxiba ca' uxízia'." <sup>27</sup> Cate' ni' rnnë': "Ia'tú luzuísö", lë ni rulu'í' rë'u ral-la' udúa yugu' le gaca ila'zxízi, lë na' rö'ö yödzölió ni, ate' ulu'gá'ana le cabí gaca ila'zxízi, lë na' rö' yehua' yubá. <sup>28</sup> Que lë ni na', tu' ral-la' idéli'ru' tu lataj ga inná bë'ëru', le cabí izxizi, ral-la' guiëru'-në' Dios: "Xclenu'", ate' lu yöl-la' ba'a ladxi', en lu yöl-la' radxi Lë' tseaj ládxi'ru' Lë' ca na' raza ládxi'ë Lë', <sup>29</sup> tu' náquië' Dios queëru' ca tu gu' le rusuniti le cabí naca idú tsahui'.

## 13

### *Le ral-la' gunru' le raza ládxi'ë Dios*

<sup>1</sup> Ral-la' idxí'tica'sili' luzá'ali' tuli' ia'tuli'. <sup>2</sup> Guli'tsöjné ral-la' uzóali' lídxili' nu idxín ga zóali'. Cate' gulún caní bal-la bönachi, bulu'cuá' lídxiguequi gubáz lá'ayi que yehua' yubá queë' Dios, sal-la' biti' gulé'quibe'e náca'gaquië' gubáz lá'ayi.

<sup>3</sup> Guli'tsöjné nupa nadzúngaca lidxi guië tsca nunli' légaquië' tsözxõn, nadzunli' ca' lidxi guië. Guli'güi' ládxi'li' yugu' bönni' ta'bía ládxi'gaca bönachi légaquië', tsca libí'ili' rigufí rizáca'lenli' légaquië' tsözxõn.

<sup>4</sup> Ral-la' gunli' bal yöl-la' nutsaga na', ate' tu tuë' bönni' ral-la' sóalenë'-nu nigula queë' lu yöl-la' ba'a ladxi' queë', tu' ichúguië' Dios quégaca nupa tun le ruá' dö', en nupa ta'guítsaj xibá que yöl-la' nutsaga na'.

<sup>5</sup> Biti' bi uhuí'di'li', pero guli'tsaza ládxi'li' tsca le dë queëli' na'a, tu' chigunnë' Dios: "Catu caz ucá'ana' li', en biti' ca' ubéaj ládxa'a li'." <sup>6</sup> Caní naca, huáca innaru' idú ládxi'ru' lë na' rnna: Xanru' náquië' Nu rácalen neda'.

Biti' ca' gádxida' bi gun bönachi quia'.

<sup>7</sup> Guli'tsöjné yugu' bönni' tu'yüë' libí'ili', nupa na' tu'sédinë' libí'ili' xtídzë'ë Dios. Buli'yú ca nadéli'gaquië', en guli'gún ca tunë' lu yöl-la' réajlë' quégaquië' Dios.

<sup>8</sup> Lëbisö ca náquië' Jesucristo, néaje, en na'a, en cá'tica'sö. <sup>9</sup> Biti' güi'ili' lataj yugu' xibá izá'a, en xibá nadzá' ichë'gaca libí'ili' nöza yúbölö. Naca dxi'a gunli' tsutsu icja ládxi'do'oli' ca naca le ruzá' ládxi'ë Dios queëli', en calëga ca náca'gaca xibá que le rë'aj ráguru', lë na' biti' ulu'z'í' xibé nupa tu'í' ládxi'gaca léguequi.

<sup>10</sup> Zoa queëru' tu bucugu lá'ayi, le cabí ulu'z'í' xibé nupa tun dxin que didza' rucá'ana tsahui' na' bilá' z'í'alö. <sup>11</sup> Bixúz lo que yu'u lá'ayi na' gulu'ë xichõngacaba' böa' bëdxi lu lataj idú lá'ayi tu' nözi dul-la', pero bulu'zéguië bëla' cá'asö quégacaba' ga naca ní'ilö ra' yödzö. <sup>12</sup> Lë'sca' caní gudí' guzáquë'ë Jesús

ní'ilo ra' yödzo para bunë' bönachi dxi'a len rön queë cazë'.  
 13 Tsöjtá'aru'-në' Jesús, sal-la' ila'béaj bönachi rë'u lu yödzo, en  
 sí'uru' tsözxön len Lë' lë na' bulu'lidza ditaj bönachi Lë'. 14 Biti'  
 zoa tu yödzo queëru' yödzölió ni le soa tsaz, pero rigu'jaru' lë  
 na' si' za'. 15 Que lë ni na', ral-la' cú'utica'siru'-në' Dios yöl-  
 la' ba, ugunru' dxin Lë' Jesucristo. Yöl-la' ba na' naca ca tu  
 le rigu'uru' lahuë' Dios. Len ruá'a cuinru' guiëru'-në' Dios:  
 "Xclenu'" ni'a que le náquië' Lë'. 16 Biti' gal-la ládxi'li' gunli' le  
 naca dxi'a, en gácalenli' luzá'ali' tuli' ia'tuli', tu' naca lë ni ca tu  
 le rigu'uru' lahuë' Dios le raza ládxi'ë Lë'.

17 Guli'gún ca rnna xtídza'gaquië' böchi'ru' tu'yúë' libí'ili',  
 en guli'gü' lataj ila'nná bé'enë' libí'ili', tu' tapa chi'ë bö' naca  
 cázali', ca tunë' yugu' bönni' ral-la' ila'guíxjö'ë lahuë' Dios le  
 núngaquië'. Guli'gún caní para ilunë' dxin na' lu yöl-la' rudzeja  
 quégaquië', en calëga lu yöl-la' risëbi ladxi' quégaquië', tu' cabí  
 uzí'ili' xibé dxin na' ilunë' lu yöl-la' risëbi ladxi' quégaquië'.

18 Buli'lidzë' Dios, inábili'-në' gácalenë' netu', tu' runtu' löza  
 soa dxi icja ládxi'do'otu', para cabí uxösa netu', ate' ruí'  
 ládxi'tu' gúntica'situ' le naca dxi'a. 19 Le nácarö lo, ráta'yua'  
 loli' inábili'-në' Dios ugu'ë neda' tu nöza para udxina' ga zóali'  
 bayöntë.

*Dios uzá' ládxi'ë queëru' le gácalen rë'u*

20 Na'a, rinábitu'-në' Dios, Nu run le rucá'ana rë'u tsahui',  
 en Nu busubán Xanru' Jesucristo lu yöl-la' guti, Nu na' naca  
 Bönni' Lo Uyú Bö'cu' Zxila', tu' bulaljë' rön queë' le run tsutsu  
 didza' rucá'ana tsahui', le zoa tsaz, 21 rinábitu'-në' gunë' ga  
 gácali' idú tsahui', para gaca gunli' yúgu'të dxin dxi'a, en gunli'  
 ca rë'enë' Lë', ate' gunë' queëli' le raza ládxi'ë Lë', tu' néquili'  
 queë' Jesucristo. ¡Queë' Cristo gácatíca'sö yöl-la' ba! ¡Ca' gaca!

22 Ráta'yua' loli', böchi' luzá'ado', güi' ládxi'li' didza' ni  
 ruzéajni' i libí'ili', tu' naca láti'do'os lë ni ruzúaja' queëli'. 23 Ral-  
 la' inözili' chiburúajbi' bi'i Timoteo, bi'i böchi'ru'do', lidxi guié,  
 ate' channö idxíntëbi' ga zoa' ni, gunbi' neda' tsözxön uduyútu'  
 libí'ili'.

24 Buli'gapa Dios böchi'ru' tu'yúë' libí'ili', enca' yúgu'të  
 bönachi rö queë' Dios. Tu'gapa Dios libí'ili' bönachi ta'yéajlë'  
 Cristo nacua' luyú Italia.

25 ¡Dios uzá' ládxi'ë queëli' yúgu'tëli'! ¡Ca' gaca!

## LE BUZÚAJĚ' LU GUICH SANTIAGO

*Santiago rugapë' Dios bönni' judío ta'dë'ë Cristo*

<sup>1</sup> Neda', Jacobo, naca' huen dxin queë' Dios, enca' queë' Xanru' Jesucristo. Rugapa' Dios libí'ili', nácali' idxinnu cö' di'a dza quégaca bönachi Israel, násilasili' idú yödzölió ni.

*Yöl-la' réajni'i le runnë' Dios queëru'*

<sup>2</sup> Böchi' luzá'ado', cate' gaca bi gaca queëli' le si' bë' libí'ili', ral-la' udzėjali' idú lądxi'li' <sup>3</sup> tu' nöz quézili', cate' bi raca queëli' le rizí' bë' libí'ili' ca réajlë'ëli' Cristo, lë ni rusedi libí'ili' cözali' zxön ladxi'. <sup>4</sup> Guli'güi' lądxi'li' gaca idú yöl-la' zxön ladxi' queëli', para údxi gácali' bönni' ta'yéajni'inë', en biti' bi yadzaj queëli' ca nácacaga lë ni.

<sup>5</sup> Channö zoa ladaj libí'ili' nu biti' réajni'ini, nu na' ral-la' inabi-në' Dios, ate' Dios caz gunnë' yöl-la' réajni'i que, tu' runödzejë' yödxi yana' quégaca yúgu'të bönachi, en biti' ca' réqui quézinë' gunnë' queëru'. <sup>6</sup> Na'a, nu bi rinabi-në' Dios, run bayudxi tséajlë' Lë', en cabí gaca chopa ladxi'. Nu raca chopa ladxi', raca que ca raca que bidxina' que nísado' cate' rutá bö' le, ruzéaj bö' le nilö ná'alö. <sup>7</sup> Nu naca caní biti' ral-la' gun löza si' bi unödzejë' Xanru'. <sup>8</sup> Bönni' na' reaj bö' lądxi'da'ahuë' biti' ridzölinë' nácalö gunë'.

<sup>9</sup> Channö zoë' tu bönni' böchi'ru' réajlë'ë Cristo, en náquië' cá'asö yödzölió ni, ral-la' udzéjanë' tu' chinadéli'në' tu lataj lo lahuë' Dios. <sup>10</sup> Bönni' böchi'ru' na' rilé'enë' yöl-la' tsahui' queë' ral-la' udzéjanë' cate' runë' Dios ga bítirö ruzxöni lądxi'ë lë na' dë queë'. Nu ruzxöni ladxi' yöl-la' tsahui' que, gaca que nu na' ca raca que xiyija guíxi'do', la' ridödité que. <sup>11</sup> Caní naca, tu' gaca que nu na' ca raca que xiyija guíxi'do' na' cate' rilén gubidza, en rudzá'ada', la' ribídxité guixi' na', en riguínaj xiyija, en riniti yöl-la' lachi que. Lësca' caní gaca queë' bönni' rilé'enë' yöl-la' tsahui' queë', inítië' tsanni ni runë' dxin riguiljë' yöl-la' tsahui' na'.

*Le ta'zí' bë' rë'u*

<sup>12</sup> Bica' ba bönni' böchi'ru' na' ruá' rilenë' le rizí' bë' lë'. Cate' chiburúajë' tsahui', idéli'në' yöl-la' na'bán idú, ca na' rideli' nu nutsa' lu huitaj, nu rideli' tu bregui' zin. Bönni' böchi'ru' na' náquië' bica' ba tu' idéli'në' yöl-la' na'bán idú na' guzxi' lu në'ë Dios unödzejë' quégaca nupa nadxi'iguequi Lë'. <sup>13</sup> Cate' bi raca queëru' le run ga guë'ëni'ru' gunru' le ruá' dö', biti' ral-la' innaru': "Dios rizí' bë'ë rë'u len le naca xihui'." Dios biti' rizí' bë'ë nu bönni' len le cabí naca dxi'a. <sup>14</sup> Na'a, channö

nu bi raca que le rizi' bë' le len le cabí naca dxi'a, naca tu rize' ladxi' le ruá' dö', ate' lë ni ben ga gú'uni gun le ruá' dö'.  
 15 Lë na' rize' ládxi'ru' le ruá' dö' run ga gunru' dul-la', en cate' chibudxi benru' dul-la' na', la' dul-la' ná'asö rusubaga' rë'u xíguia' gátiru'.

16 Böchi' luzá'ado', biti' si' ye'e la' cuínsili'. 17 Yúgu'të le naca dxi'a, en yúgu'të le naca idú le ruzí'iru' xibé, zá'gaca saca' xitsá'alö, en ta'rúaj ga zoë' Xúziru' Dios, Nu ben yugu' le ta'yëpi yösa lúzxiba, yugu' le tu'tsá' cuínguequi, pero Lë' biti' rutsá' cuinë', en biti' rutsë'ë ca runë', rünnatica'së' queëru' le naca tsahui'. 18 Ca rë'ëni quézinë' Dios, benë' ga nácaru' bönachi cubi queë'. Bugunë' dxin didza' queë' le naca idútë li, para gácaru' ca tu gulapa zí'alö queë' ladaj yúgu'të nupa na' gurö cazë' Dios.

### *Le reaj ládxi'ru'-në' Dios le naca li ladxi'*

19 Que lë ni na' rea' libí'ili', böchi' luzá'ado', yúgu'tëli' ral-la' sóali' sina' yónili', pero biti' ral-la' innëtëzili', en biti' ilëtëzili'.  
 20 Nu na' riletëz biti' run le naca tsahui' lahuë' Dios. 21 Que lë ni na', guli'cá'ana yúgu'të le ruá' dö', en yúgu'të le zían le cabí naca tsahui', ate' lu yöl-la' nöxaj ladxi' guli'sí' lu ná'ali' didza' na' chinayaza icja ládxi'do'oli', tu' huáca gun didza' ni ga uláli'.

22 Na'a, guli'gún ca rnna didza' ni, en cabí yónisili', tu' channö yónisili' didza' ni, si' yé'eli' la' cuínsili'. 23 Nu riyónisö didza' ni, en biti' run ca rnna, nu ni naca ca tu bönni' ruyúë' lahuë' tu lu guié dxili, 24 tu' ruyú cuinë', en söhuöjë', ate' la' ral-latë ládxe'ë ca rinë'ë. 25 Na'a, nu bönni' biti' ral-la ládxe'ë le riyönnë', pero ruí'i ládxe'ë xibá queë' Dios le naca idú li, en le gaca gun ga uláru', ate' ugá'anë' tsutsu, en gúntica'së' ca rinná bë' xibá na', gaquië' bica' ba ca naca yúgu'të le runë'.

26 Channö nu bönni' ladaj libí'ili' réquinë' naca dxi'a ca reaj ládxe'ë Dios, pero biti' rapa chi'ë lúdxë'ë para cabí innësë' ca', bönni' ni rizi' yé'enë' la' cuinsë', ate' biti' raza ládxe'ë Dios ca reaj ládxe'ë bönni' na' Lë'. 27 Le reaj ládxi'ru'-në' Dios, le naca idú, en le naca dxi'a, naca gácalenru' yugu' bi'i uzëbido', enca' yugu' nigula nagá'ananu túzínu, cate' ta'guí'i ta'zaca' nupa na', en cabí gútsa'ru' le cabí naca tsahui' le raca yödzölió ni.

## 2

### *Tuz ca ral-la' gunru' bönachi bal*

1 Böchi' luzá'ado', channö réajlë'ëli' Xanru' Jesucristo, Nu nácatëro lo, biti' ral-la' utsá'ali' ca gunli' bal tu tu bönachi.  
 2 Channö tsázië' tu bönni' ga na' nudúbili', en nagu'ë xibön në'ë le néquini oro, en nácuë' lari' nazáca'da', ate' tsázië' ca' tu bönni' yéchi'do', nácuë' lari' cá'asö, 3 channö gunli' bal bönni' na' nácuë' lari' nazáca'da', en guiëli'-në': "Gurö'ölen rë'u ga ni

naca dxi'a", pero guiëli' bönni' yéchi'do' na': "Ná'asö guzuí", o guiëli'-në': "Gurö'i lu yu ni." <sup>4</sup> Channö caní runli', rutsá'ali' ca runli' bal tu tu luzá'ali', en run cuinli' ca nu ruchí'a rusörö luzé'e, biti' naca dxi'a ca rizá' ládxi'li'.

<sup>5</sup> Böchi' luzá'ado', buli'zé nágali' lë ni. Dios gurö cazë' yugu' bönni', sal-la' téquiguequi bönnachi yödžölió ni nácagaquië' cá'asö, para ila'déli'në' yöl-la' tsahui' lahuë' Lë' tu' ta'yéajlë'ë Cristo, en gata' quégaquië' lataj ga ni' rinná bë'ë Lë'. Gata' quégaquië' lë na' guzxi' lu në'ë Dios unödžjë' quégaca nupa ta'dxi'i Lë'. <sup>6</sup> Libí'ili' rucá'anali' cá'asö bönnachi yechi' ca', en runli' bal yugu' bönni' dë yöl-la' tsahui' quégaquië', ate' bönni' na' dë yöl-la' tsahui' quégaquië' tu'saca' zi'ë libí'ili', tu' tu'gunë' libí'ili' dxin. Lësca' tu'dödë' libí'ili' lu ná'agaquië' bönni' yúlahui'. <sup>7</sup> Yugu' bönni' na' dë yöl-la' tsahui' quégaquië' ta'nnë' zi'ë ca' que Lë' Jesucristo le nazáca'tërö, en ca naca Lë' nazi' lali': "Nupa Dá'gaca Cristo."

<sup>8</sup> Runli' dxi'a channö runli' idú ca rinná bë' xibá lo, le nazúaj lu guichi, en rna caní: "Ral-la' idxí'inu' luzó'o ca nadxi'i cuinu'." <sup>9</sup> Na'a, channö rutsá'ali' ca runli' bal tu tu bönnachi, runli' dul-la', en nabága'li' xíguia' lu xibá queë' Dios, tu' riguitsjali' xibá na'. <sup>10</sup> Channö runë' tu bönni' idú ca rinná bë' xibá queë' Dios, pero channö ichíxinë' ca naca tuz le rinná bë' xibá na', chinabáguë'ë xíguia' que idútë le rinná bë' xibá na'. <sup>11</sup> Lë cazë' Dios gunné': "Biti' gunu' dul-la' le riguitsaj xibá que yöl-la' nutsaga na'", en gunné' ca': "Biti' gútiu' bönnachi." Na'a, channö cabí runu' dul-la' le riguitsaj xibá que yöl-la' nutsaga na', pero rútiu' bönnachi, nabágu'u xíguia' que idútë xibá queë' Dios. <sup>12</sup> Ca innali', en ca gunli', ral-la' gunli' ca ral-la' ilún nupa uchi'a usöröë' Dios légaquië' ca rinná bë' xibá na', le run ga uláru'. <sup>13</sup> Nupa cabí tu'huechi' ládxi'gaca luzé'eguequi, uchi'a usöröë' Dios léguequi, ate' cuntu nu huéchi' ladxi' léguequi, pero nupa na' tu'huechi' ládxi'gaca luzé'eguequi ulu'rúaj dxi'a cate' uchi'a usöröë' Dios léguequi.

### *Le ral-la' gunru' tu' réajlë'ëru' Cristo*

<sup>14</sup> Böchi' luzá'ado', biti' bi uzi'ë xibé tu bönni' channö inasë': "Réajlë'a Cristo", pero biti' runë' le naca tsahui'. Biti' gaca ulë' bönni' na' channö innasë' réajlë'ë Cristo. <sup>15</sup> Channö nacu'ë böchi' luzá'aru' ta'yéajlë'ë Cristo, en biti' dë le ilácuë', en calëga le ilahuë', <sup>16</sup> ate' channö tu nu dzaga libí'ili' guiësö légaquië': "Böaj lídxili' tsáhui'do'. Chibölaj budzé'eli'", pero channö cabí unödžaj quégaquië' lë na' ta'yádzjanë', biti' ca' gúcalen légaquië'. <sup>17</sup> Lësca' caní raca que nu bönni' rnnasë' réajlë'ë Cristo. Channö cabí runë' le naca bë' naca idú ca réajlë'ë Lë', biti' naca lesaca' yöl-la' réajlë' queë'.

18 Nadxi ca' guië' tu bönni' luzë'ë: "Li' réajlë'ësu' Cristo, ate' neda' runa' le naca tsahui'. Biti' gaca ulu'ínu' neda' réajlë'u Cristo channö cabí zoa le naca tsahui' runu'. Neda' ulu'ida' li' réajlë'a Cristo ni'a que le naca tsahui' runa'." 19 Li' réajlë'u tuzë' náquië' Dios. Naca dxi'a ca runu'. Lësca' caní ta'yéajlë' yugu' bö' xihui', en ta'zxizi tádxida' Lë'. 20 Li', bönni' bití' bi nözinë'. Ral-la' inözi quézinu' channö zoa nu rnasö réajlë' Cristo, pero bití' run le naca tsahui', bití' naca lesaca' yöl-la' réajlë' Lë' que nu na'. 21 Naca bë' burúajë' xúziru' Abraham tsahui' lahuë' Dios ni'a que lë na' benë', cate' ni' gulu'ë-bi' bi'i Isaac queë' lahuë' Dios. Gulu'ë-bi' ca na' tun bönachi ta'gú'u le tu'zegui' lahuë' Dios, sal-la' bití' buzégui'ë-bi'. 22 Na'a gaca inözili' ca guca queë' Abraham. Lë na' benë' guca bë' guyéajlë'ë Dios. Ca' naca, guca bë' naca idú ca guyéajlë'ë Dios ni'a que lë na' benë'. 23 Caní guca lë na' nazúaj lu guichi lá'ayi le rnna: "Abraham guyéajlë'ë Dios, ate' Dios bilé'enë' lë na' benë' ca tu le ben ga böáquië' Abraham tsahui'." Que lë ni na' guzxí'i lë': "Luzë'ë Dios."

24 Na'a, rilé'e quézili' naca bë' rurúajë' tu bönni' dxi'a ni'a que le runë', en calégasö tu' réajlë'ë Dios. 25 Lësca' caní guca queënu Rahab, nigula bë'ënu bönachi lataj. Lësca' naca bë' burúajnu dxi'a tu' zoa tu le tsahui' bennu, lë na' bennu cate' ni' bennu bönni' tu'yulan bal, en gúcalennu légaquië' para bulu'guélé'ë yöjhuöjgaquië' nöza yúbölö. 26 Ca na' raca que idútë le naca cázaru' channö cabí yu'u bö', chinati, lësca' caní naca que le réajlë'ëru' Cristo channö cabí nalá' yöl-la' run que, bití' naca lesaca'.

### 3

#### *Yugu' le rnna lúdxiru'*

1 Böchi' luzá'ado', bití' guntëz zían cuinli' bönni' tu'sédinë' bönachi, tu' chinöz quézili' zítërö uchi'a usöröë' Dios rë'u, núlöru' rusédiru' bönachi. 2 Yúgu'tëru' runru' zían le richixi riníguiru'. Channö cabí richixi riníguinë' tu bönni' ca naca didza' ru'ë, bönni' ni náquië' idú tsahui', en raca inná be'e cuinë' ca naca yúgu'të le runë'. 3 Cate' rigú'uru' guíë ruá'agacaba' böa' para gunru' ga ilunba' ca ré'ëniuru', gaca inná bé'eru' légacaba' lu idútë le tunba'. 4 Buli'yú ca' ca raca quéguequi barco. Sal-la' zxöntërö naca tu barco, en récjada' bö' ruzéaj le, cuídi'do'os naca në'e xiyágui barco na' le ruzecaj rudxí'i barco para tseaj gátitës ga gué'ënnë' bönni' rusë'ë le. 5 Lësca' caní naca lúdxiru'. Sal-la' cuídi'do'os naca, zióntërö le rnna lúdxiru' na'. Buli'yútsöca' ca run guí'. Sal-la' guí'do'os ribíbiru', tu guí'a sibi huayégui. 6 Lësca' lúdxiru' na' naca ca tu guí'. Yúgu'të le ruá' dö' raca yödzolió ni rnna lúdxiru', en

tu' dzaga lúdxí'ru' na' idútë le naca cázaru', que lë ni na' run ga raca xihui' idútë le nácaru'. Le rnna lúdxí'ru' ribequi guí', le ruzegui' rë'u ca naca yúgu'të le runru', ate' tu' rnna caní lúdxí'ru' na', naca que tsca chinaguéla'të guí' le nabequi' tu' xihui'. <sup>7</sup> Yúgu'tëba' böa' guixi' ta'daba' luyú, en yugu' böa' zoa xíligacaba', en yugu' böa' tá'ayöj lë'ëba' lu yu, enca' yúgu'tëba' böa' dzö'öba' lu nísado', huáca ila'nná be'e bönachi luyú ni légacaba', <sup>8</sup> pero cuntú nu bönni' gaca inná bé'enë' lúdxë'ë, tu' rnna lúdxí'ru' le ruá' dö', en bití' gaca nu uzaga' xinözi. Zíántërö le rnna lúdxí'ru' le naca ca tu le nachë' yöl-la' guti. <sup>9</sup> Len la' lúdxí'ru' ná'asö rulidza tsáhui'ru'-në' Dios Xuz, en rulidza dí'tjaru' ca' yugu' bönni', ate' benë' Dios légaquië' ca naca cazë' Lë'. <sup>10</sup> Caní naca, len la' ruá'asiru' na' rulidza tsáhui'ru' bönachi, en rulidza dí'tjaru' bönachi. Böchi' luzá'ado', bití' ral-la' gaca caní. <sup>11</sup> Bití' ca' ta'lén nisa siziá', en nisa zöna' la' tuzi ga ta'lén. <sup>12</sup> Böchi' luzá'ado', tu yaga higo bití' gaca cuía le ribía yaga olivo, ate' tu lubá uva bití' gaca cuía le ribía yaga higo na'. Lë'sca' caní, nitú ga rilén nisa bití' gaca ila'lén nisa zöna', en nisa siziá'.

### *Yöl-la' réajni'i le naca idú*

<sup>13</sup> Channö zoë' tu bönni' ládjali' rácadë'ë, en réajni'de'enë', lu yöl-la' nöxaj ladxi' queë' ral-la' ulu'ë náquië' caní ni'a que le naca tsahui' runë'. <sup>14</sup> Na'a, channö ruzxé'eli' luzá'ali', en runli' dxin para ila'gú'u bönachi libí'ili' yöl-la' ba, bití' ral-la' gun ba zxön cuinli' ca naca yöl-la' réajni'i queë'li'. Nu run caní rizí' yë', en ridá'baga' le naca idútë li. <sup>15</sup> Yöl-la' réajni'i caní bití' naca le runödzjë' Dios, pero que yödzülió ni naca, enca' quégaca bönachi yödzülió ni, en que tu' xihui'. <sup>16</sup> Yugu' bönni' tu'zxé'enë' luzá'agaquië', en të'ënnë' ila'gú'u bönachi légaquië' yöl-la' ba, lë'sca' ta'díl-la dídzë'ë, en tunë' yúgu'të le ruá' dö'. <sup>17</sup> Yugu' bönni' nápaqaquië' yöl-la' réajni'i na' runödzjë' Dios: Tunë' le naca idú tsahui', en ta'bözë' dxí'ado'. Nácaqaquië' zxön ladxi', en nöxaj ladxi'. Tu'huechi' ládxi'gaquië' bönachi, en tunë' le naca dxí'a. Tuz ca tu'chi'a tu'söröë' luzá'agaquië', en bití' ta'béaj bë'ë luzá'agaquië'.

<sup>18</sup> Nupa tuí'i ládxi'gaca ila'bequi dxi le raca, ta'böza dxí'ado', para gaca ca' dxí'a idútë le zeaj naca caz.

## 4

### *Nupa tun zxön le nacué' yödzülió*

<sup>1</sup> ¿Bizx que na' ridíl-lali', en raca didza' bizxaj queë'li'? Raca caní queë'li' tu' rizë ládxi'li' zían le rizë ládxi'li' tu tuli', en que lë ni na' ridíl-lalenli' luzá'ali'. <sup>2</sup> Zían le ruhuí'di'li', en tu' cabí

rizí'ili' le, que lē ni na' rútili' bōnachi. Ruzxé'eli' le dē que luzá'ali', en tu' cabí ridéli'li' le, que lē ni na' rizóa ribō'ōli', en ridíl-lali'. Biti' rata' queēli' le rē'ēnili', tu' cabí rinábali'-nē' Dios lē na'. <sup>3</sup> Sal-la' zoa bi rinábali', biti' bi rizí'ili', tu' cabí naca dxi'a ca rinábali', tu' rē'ēnili' lē na' rinábali' para ugunli' le dxin ca raza lādxi'sili'. <sup>4</sup> Libí'ili', bōnachi nusanli'-nē' Dios, ¿naru' cabí nōzili' channō runli' zxon le nacuá' yōdzōlió ni, chinuhuóacali' ca nu bití' rilé'e Dios dxi'a? Núti'tēs nu rē'ēni gun zxon le nacuá' yōdzōlió ni, nuhuóaca ca nu bití' rilé'e Dios dxi'a. <sup>5</sup> Biti' rnasō ca' le nazúaj lu guichi lá'ayi le rnna: “Dios risōl-lē'ē Dios Bō' Lá'ayi queēru', Nu zóalen rē'u, ate' Lē' nadxí'inē' rē'u, en rudúli'nē' rē'u channō rusanru'-nē'.” <sup>6</sup> Na'a, zxōntērō le ruzá' lādxe'ē Dios queēru', tu' nazúaj lu guichi lá'ayi le rnna: “Dios ruzáguē'ē xinōzguequi nupa tun ba zxon cuínguequi, pero ruzá' lādxe'ē quégaca nupa nácagaca nōxaj ladxi'.” <sup>7</sup> Que lē ni na', guli'sóa nōxaj ladxi' lahuē' Dios. Guli'nná be'e tu' xihui', ate' uzxunnaj ga zóali'. <sup>8</sup> Guli'gūi' lādxi'li' sóalenli'-nē' Dios, ate' Lē' idisóalenē' libí'ili'. Libí'ili', bōnachi dul-la', guli'gaca tsahui', en bití'rō gunli' dul-la'. Libí'ili', núlōli' reax bō' lādxi'do'oli', en chopa le nadxí'ili', guli'gún dxi'a icja lādxi'do'oli'. <sup>9</sup> Guli'sēbi lādxi'li', en buli'hu'ini, en guli'cōdxi. Na'a ruzxídxili, pero ral-la' cōdxili'. Rudzėjali', pero ral-la' hu'ini'. <sup>10</sup> Guli'gaca nōxaj ladxi' lahuē' Xanru', ate' Lē' gunē' ga tsēpisēli'.

*Biti' ral-la' ichugu bē'ēru' le run luzá'aru'*

<sup>11</sup> Bōchi' luzá'ado', bití' innēli' que luzá'ali' tuli' ia'tuli'. Nu bōnni' rinnē' que bōchi' luzē'ē, en rilaga yudxē' le runē', bōnni' ni rinnē' que xibá queē' Dios, en ruchi'a rusōrōē' le rinná bē' xibá na'. Na'a, channō ruchi'a rusōrōu' le rinná bē' xibá na', run cuinu' nu ruchi'a rusōrōē' le, en bití' runu' ca rinná bē' xibá na'. <sup>12</sup> Na'a, tuzē' náquiē' Dios, Nu ben xibá na', en náquiē' ca' Nu ruchi'a rusōrōē' le runru'. Lē' cazē' gaca usōlē' bōnachi o usunítie' bōnachi na'. Na'a, ¿núzxitē run cuinu', rilaga yudxu' luzó'o?

*Biti' gaca gunru' löza le gaca cuxō huidzaj*

<sup>13</sup> Na'a, buli'zē' nágali', núlōli' rnnali': “Cuxō huidzaj tséajtu' yōdzō ni', ate' sóatu' ni' tu iz, en zían le gá'utu', en úti'tu', ate' caní gáta'da' dumí queētu'.” <sup>14</sup> Biti' nōzili' bizxi gaca cuxō huidzaj. ¿Nacxi caz naca queēru', tsca zóaru' yōdzōlió ni? Nácaru' ca bōchila le nalá' tu chí'ido'osō, en la' rinítitē. <sup>15</sup> Que lē ni na', caní ral-la' innali': “Channō guē'ēnnē' Xanru', sóaru' ibanru', en tu ia'tú le gunru'.” <sup>16</sup> Na'a, libí'ili', lu yōl-la' run ba zxon queēli' rigú'uli' yōl-la' ba la' cuínsili'. Yúgu'tē le caní le runli' zeaj naca le ruá' dō'. <sup>17</sup> Channō nōziru' le naca dxi'a le ral-la' gunru', en bití' gunru' lē na', runru' dul-la'.



## 5

*Santiago rusë'ë ládxi'gaquië' bönni' dë yöl-la' tsahui' quégaquië'*

<sup>1</sup> Libí'ili', bönni' rilé'eli' yöl-la' tsahui', guli'cödxí, en guli'cödxí'a, tu' sí' za' dza ilé'eli' yöl-la' yechi'. <sup>2</sup> Chinaca ditaj yöl-la' tsahui' queéli', ate' chinutögacaba' le ráculi' böljado' que. <sup>3</sup> Chinaca que dumí oro, en dumí plata queéli' ca naca que guíë nazön yöni que, ate' yöni que na' naca ca tu le ruzegui libí'ili' didza', ate' gaca queéli' ca tu guí' le usuniti libí'ili'. Caní gaca queéli', tu' busó' butúbili' queézili' yöl-la' tsahui' dza ni zóaru' chiröjsétëgaca. <sup>4</sup> ¡Buli'yútsöca! Yugu' bönni' huen dxin gula'lapë' yöla queéli' chita'naba yúdxinë' lászjagaquië', tu' cabí riguízjanili' légaquië', ate' lë na' ta'nabë' bönni' huen dxin na' chibidxín didza' na' lahuë' Xanru', ate' Lë' rinná bé'enë' ni'a në'ë guizxi yu. <sup>5</sup> Benli' ga buné'eli', en güi' gudáguticá'sili' le rnnasö queéli' lu yödzölió ni. Buxön cuinli', pero chizóa idxín dza údxi queéli'. Gaca queéli' ca raca queéba' bëdxi renni', chibú'u dza gútiru'-ba'. <sup>6</sup> Richúguli' quégaquië' bönni' tsahui', en rútili' légaquië', ate' légaquië' biti' ta'dá'baguë'ë libí'ili' cate' rútili' légaquië'.

*Cözaru' zxön ladxi', en ulídzaru'-në' Dios*

<sup>7</sup> Na'a, böchi' luzá'ado', guli'cöza zxön ladxi' ga idxinrö dza huödë' Xanru'. Buli'yú ca runë' tu bönni' guz gú'una. Lu yöl-la' riböza zxön ladxi' ribözë' guiöjsiu', en guiöj cusu lin, ate' tödi ni' ulapë', en utubë' yöz zían. <sup>8</sup> Lë'sca' caní, libí'ili' na' réajlë'ëli' Cristo, guli'cöza zxön ladxi', en buli'tipa ládxi'li', tu' chizá' gala' dza huödë' Xanru'. <sup>9</sup> Böchi' luzá'ado', biti' innëli' que luzá'ali' tuli' ia'tuli', para cabí ibága'li' xíguia'. ¡Buli'yútsöca! ¡Chirudzaga lo udxinë' Xanru', ate' uchi'a usöröë' le runli'! <sup>10</sup> Böchi' luzá'ado', buli'yú ca guca quégaquië' bönni' gulu'ë didza' uláz queë' Xanru'. Nácagaquië' ca tu le rulu'í rë'u ca ral-la' quí'í sáca'ru', en cözaru' zxön ladxi'. <sup>11</sup> Na'a, nucuá'aru' légaquië' ca yugu' bönni' guláquië' bica' ba, nupa ni' gula'guí'í gula'zaca'. Chibiyönili' ca benë' Job. Gulözë' zxön ladxi' sal-la' gudí'í guzxacá'dë'ë, ate' nözili' ca' ca benë' Xanru' queë' ga búdxitë. Ruhuéchi'da' ládxi'ë Xanru' rë'u, en ruí'í ládxi'ë rë'u.

<sup>12</sup> Böchi' luzá'ado', le nácatërö lo naca lë ni rea' libí'ili': ¡Biti' uzötjali' Nu zoa yehua' yubá, en biti' uzötjali' le nacua' luyú ni, en biti' uzötjali' bíti'tës bi run tsutsu xtídzali'! Cate' innali' "Ön" ral-la' innásili' "Ön." Cate' innali' "Biti'" ral-la' innásili' "Biti'." Caní ral-la' gunli', para cabí ibága'li' xíguia' lahuë' Dios.

<sup>13</sup> Channö riguí'í rizáca' nu dzaga libí'ili', ral-la' ulidza Dios nu na'. Channö zoa nu rudzeja, ral-la' gul-la' yöl-la' ba nu na'. <sup>14</sup> Channö re'e nu dzaga libí'ili', ral-la' ulidza bönni' gula tapa chi'ë bönachi queë' Cristo, para ulu'lidzë' Dios, en ila'nábinë'

Lë' únë' bönni' huë' na'. Ral-la' ila'gu'ë lë' le za, en ulu'gunë' dxin Lë' Xanru'. <sup>15</sup> Cate' ulu'lidzë' Dios, en ta'yéajlë'ë gunë' Cristo ga huöáquië' bönni' huë' na', ní'rö gunë' Xanru' ga huöása uzöë', en channö benë' dul-la' bönni' huë' na', Xanru' uniti lahuë' lë'. <sup>16</sup> Que lë ni na', guli'xóalëpi dul-la' nabága'li' tuli' ia'tuli', en guli'naba que luzá'ali' tuli' ia'tuli' lahuë' Dios para únë' libí'ili', para urúaj yödzöhuë' na' ré'eli'. Le rulidzë' tu bönni' tsahui' Dios, le runë' idú ládxe'ë, nácada' lesaca'. <sup>17</sup> Elías, bönni' ni' bë'ë didza' uláz queë' Dios, gúquië' tu bönni' yödzölió ca nácaru' rë'u, pero cate' bulidzë' Dios, en gunábinë' Lë' para cabí galaj guiöj, idú tsonna iz yu' xopa beo' biti' gulaj guiöj luyú ni. <sup>18</sup> Gudödi ni' bulidzë' Dios leyúbölö, ate' böálaj guiöj, ate' bunödzej le gulazë' yugu' bönni' dza ni'.

<sup>19</sup> Böchi' luzá'ado', lë ni ral-la' inözili'. Channö nunbë' nu bönni' dzáguië' libí'ili' le naca idútë li, en richixi riníguinë', ate' zoa nu gun ga ubí'i ládxe'ë bönni' na' richixi riníguinë', <sup>20</sup> nu na' gun ga ubí'i ládxe'ë bönni' dul-la' na' gudë' ga yúbölö, usölë' bönni' dul-la' na' lu yöl-la' guti, en gunë' ga uniti lahuë' Dios dul-la' zían nabáguë'ë bönni' na'. ¡Ca' gaca!

## DÍDZA'DO' ZÍ'ALÖ BUZÚAJË' PEDRO

*Pedro rugapë' Dios nupa ta'dá' Cristo*

<sup>1</sup> Neda', Pedro, naca' gubáz nasöl-lë'ë Jesucristo. Ruzúaja' queëli' lu guichi ni, libí'ili' násilasili' zí'tu' gapa dë ládzali', zóali' luyú Ponto, en luyú Galacia, en luyú Capadocia, en luyú Asia, en luyú Bitinia. <sup>2</sup> Gurö cazë' Xúziru' Dios libí'ili' ca na' bucözë' dza ni'te, para guéquili' quez queë' lu në'ë Dios Bö' Lá'ayi, en gunli' ca rnna xtídzë'ë Cristo, en gácali' idú tsahui' ni'a que xichönë' Cristo. Rinábida'-në' Dios uzá' láchxë'ë queëli', en gunë' ga soa dxi icja láchxi'do'oli'.

*Le rúntica'siru' löza*

<sup>3</sup> ¡Yöl-la' ba Dios, Xuzë' Xanru' Jesucristo! ¡Lu yöl-la' ruhuéchi' ladxi' zxön queë' bucubë' yöl-la' na'bán queëru' tu' busubanë' Jesucristo lu yöl-la' guti! ¡Lë ni run ga rúntica'siru' löza, <sup>4</sup> en gun ga idéli'ru' lë na' rapa chi'ë Dios queëru' yehua' yubá! Lë na' rapa chi'ë Dios, le unödzjë' quégaca bönachi queë', bití' initi, en bití' itëbi, en bití' igula. <sup>5</sup> Tu' réajlë'ëli' Lë', lu yöl-la' huáca zxön queë', Dios gun chi'ë libí'ili' cate' idxinrö dza ni' uzí'ili' xibé yöl-la' rusölá idú na' chinupë'ë queëru', en ulu'ë lahui dza údxi.

<sup>6</sup> Que lë ni na' rudzëjade'eli', sal-la' na'a ral-la' quí'i sáca'li' tu chí'ido' tu' taca zían le ta'zí' bë' libí'ili'. <sup>7</sup> Tu' ruá' rilenli' yugu' lë na' ta'zí' bë' libí'ili', naca bë' naca idú ca réajlë'ëli' Cristo. Lësca' caní rizí' bë'ëru' oro, le initi, cate' ruchí'aru' le lu guí'. Que lë ni na', cate' chinazí' bë' yöl-la' réajlë' queëli' Cristo, le nácarö lesaca' ca oro, gaca queëli' yöl-la' zxön, en yöl-la' run bal dza ni' ulu'í' lahuë' Jesucristo.

<sup>8</sup> Libí'ili' nadxí'ili'-në' Cristo sal-la' catu caz bilé'eli' Lë'. Réajlë'ëli' Lë' sal-la' bití' rilé'eli'-në' na'a, ate' rudzëjali'. Yöl-la' rudzeja zxön queëli' le cabí gaca quíxjö'öru' tsca naca, naca idútë li. <sup>9</sup> Caní naca, tu' ridéli'li' yöl-la' rusölá que bö' naca cázali', le rata' queëli' tu' réajlë'ëli'-në' Cristo.

<sup>10</sup> Dza ni'te yugu' bönni' gulu'ë didza' uláz queë' Dios bulu'sëdë' dxí'ado' ca naca yöl-la' rusölá na' dë queëru' na'a, ate' gulu'ë didza' ca naca le ruzá' láchxë'ë Dios queëru'. <sup>11</sup> Bö' Lá'ayi dzáguië' Cristo buzéajni'inë' zí'atëlö bönni' na' gulu'ë didza' uláz queë' Dios, en bulu'ínë' légaquië' ca ral-la' quí'i sáquë'ë Cristo, enca' ca gaca queë' yöl-la' zxön tödi na'. Que lë ni na' gulu'í' láchxi'gaquië' ila'nözinë' bátaxi gaca lë ni, en nuzxi na' gaca que lë na' bulu'ínë' Bö' dzáguië' Cristo légaquië'. <sup>12</sup> Dios bulu'ínë' bönni' na' gulu'ë didza' uláz queë' bití' naca tu le ila'lé'enë' légaquië', pero rë'u ni rilé'eru' lë na' gulu'ë

didza' que, ate' libí'ili' riyõnili' na'a ca naca que. Yugu' bönni' tunë' libán que didza' dxi'a tu'ë didza' que lë ni, ate' zóalen yõl-la' huáca queë' Dios Bö' Lá'ayi légaquië', Nu na' risõl-lë'ë Dios zoë' yehua' yubá queëru', ate' t'ënnë' gubáz lá'ayi queë' Dios ila'nõzinë' ca naca lë na' gulu'ë didza' que dza ni'te.

*Dios rulidzë' rë'u para gácaru' lá'ayi*

<sup>13</sup> Que lë ni na', guli'sóa ban ladxi', en guli'cözatica'sõ bá'ado'. Idú ládxi'li' buli'zxõni ládxi'li' lë na' uzá' ládxi'ë queëli' Dios dza ni' ulu'i lahuë' Jesucristo. <sup>14</sup> Guli'gún ca rnna xtídzë'ë Dios, en biti' güi'ili' lataj yugu' le rizë ládxi'li' ila'chë' libí'ili' ga yúbölö, ca na' benli' dza ni' biti' núnbë'ënili'-në' Dios. <sup>15</sup> Ral-la' gácali' lá'ayi ca naca yúgu'të le runli', ca na' náquië' lá'ayi Dios, en bulidzë' libí'ili' para guéquili' queë'. <sup>16</sup> Lësca' caní nazúaj lu guichi lá'ayi, ca na' gunnë' Dios le rnna: "Guli'gaca lá'ayi, tu' naca' neda' lá'ayi."

<sup>17</sup> Rëli'-në': "Xuztu'" cate' rulídzali'-në' Dios, ate' Lë', lëbisõ ca ruchi'a rusöröë' yúgu'të bõnachi tsca naca le núngaca tu tu bõnachi na'. Que lë ni na' ral-la' gádxili' Lë' tsanni ni zóali' yõdzõlió ni, le cabí naca idú ládzali'. <sup>18</sup> Dios busölë' libí'ili' lu lë na' gúcali' dza ni' cate' benli' ca nácgaca le cá'asõ bulu'dödë' xuz xtó'oli' loli'. Nöz quézili' böa'uë' libí'ili', calëga len tu le initi ca naca oro, en plata, <sup>19</sup> pero len xichõnë' Jesucristo le nácatërõ lesaca', tu' budõdi cuinë', en gúquië' ca tuba' bö'cu' zxila' nácabá' idú dxi'a, böa'do' tutië'-ba' lahuë' Dios para ugúa dul-la'. <sup>20</sup> Dios gurõ cazë' Cristo zí'atëlö ca benë' yõdzõlió ni, ate' dza ni zóaru' na'a benë' ga bulu'i lahuë' para uzí'ili' xibë'. <sup>21</sup> Ni'a que le benë' Cristo réajlë'ëli'-në' Dios, busubanë' Lë' lu yõl-la' guti, en benë' ga náquië' lo. Caní naca, réajlë'ëli'-në' Dios, en ruzxõni ládxi'li' Lë'.

<sup>22</sup> Na'a, chinún cuinli' dxi'a tu' runli' ca rnna le naca idútë li, en naca idú ca nadxí'ili' yugu' böchi' luzá'ali' ta'yéajlë'ë Cristo. Que lë ni na', idú ládxi'li' ral-la' idxí'ili' luzá'ali' tuli' ia'tuli'. <sup>23</sup> Chibõáljali' leyúbölö, calëga tu' nuzóagaca bõnachi tati caz libí'ili', pero nuzóa Nu zoa caz libí'ili', en náljalenli' xtídzë'ë Dios, le naca ban, en le zóatica'sõ. <sup>24</sup> Caní naca, tu' nazúaj lu guichi lá'ayi le rnna:

Yúgu'të bõnachi nácgaca ca naca guixi'.

Yõl-la' lachi quéguequi naca ca xiyija guixi' na'.

Ribidxi guixi' na', en riguinnaj xiyija,

<sup>25</sup> pero xtídzë'ë Dios zóatica'sõ.

Didza' ni bidxín queëli' lu didza' dxi'a.

## 2

<sup>1</sup> Que lë ni na', guli'cá'ana yúgu'të le ruá' dö'. Bítirõ si' yë'ëli', en biti' ubéaj dxi'a cuinli' lógaca bõnachi. Bítirõ uzxë'ëli', en

biti' innëli' que luzá'ali'. <sup>2</sup> Ral-la' sē lādxi'li' le naca queë' Dios Bō' Lá'ayi para gálali' ca na' tunbi' bi'i huë'ënido', ta'zē lādxi'bi' nidxi'. Caní ral-la' gunli' ga idxinrō dza uláli', <sup>3</sup> channō réquibe'eli' náquië' Xanru' dxi'i ladxi'.

*Cristo náquië' ca tu guiōj naca ban*

<sup>4</sup> Guli'biga' ga zoë' Xanru'. Náquië' ca tu guiōj naca ban. Náquië' ca tu guiōj bulu'cá'ana bōnachi cá'asō pero naca tu le gurō cazē' Dios le nazáca'tērō. <sup>5</sup> Lēasca' caní, libí'ili' nácali' ca yugu' guiōj nabángaca. Guli'gū' Dios lataj ugunē' libí'ili' dxin, atē' gunē' ga gácali' ca tu yudo' ga soë' Dios Bō' Lá'ayi. Lu yudo' na' gácali' ca bixúz néquiguequinē' quez queë' Dios, atē' lu nē'ë Jesucristo gaca udōdili' yugu' le runnē' Dios Bō' Lá'ayi queëli' lahuë' Dios, lē na' raza lādxi'ë Dios. <sup>6</sup> Que lē ni na' nazúaj ca' lu guichi lá'ayi le rnna:

Rigu'a lu zō'ō yōdzō Siōn tu guiōj lo squin zō'ō,  
le gurō caza' neda', en naca lesaca'.

Nu réajlë' Lē', biti' ichixi inigui.

<sup>7</sup> Naca guiōj ni queëli' libí'ili' na' réajlë'ëli' Cristo tu le nazáca'da', pero quégaca nupa biti' ta'yéajlë' Cristo, naca ca na' nazúaj lu guichi lá'ayi le rnna:

Guiōj na' bulu'zōë' bōnni' tu'cu'ë zō'ō tsōlá'alō,  
tu' guléquinē' naca cá'asō,  
guiōj ni chinaca guiōj lo squin zō'ō.

<sup>8</sup> Lēasca' caní nazúaj lu guichi lá'ayi le rnna:  
Guiōj ni gun ga tsōjchégu'gaca bōnachi,  
en gun ga tsōjtsō'ōgaca.

Le nácatē yōjchégu'gaquië' bōnni' biti' ta'yéajlë'ë Cristo, tu' gula'chíxinē' cate' bulu'zōë' xtídzē'ë Dios tsōlá'alō. Dios bucu'ë légaquië' para ilunē' caní.

*Nupa néquiguequi quez queë' Dios*

<sup>9</sup> Libí'ili' nácali' bōnachi gurō cazē' Dios. Yúgu'tëli' nácali' bixúz queë' Bōnni' Unná Bē' Lá'ayi. Nácali' ca tu yōdzō nequi quez queë' Dios. Nácali' bōnachi que cazē' Dios. Caní nácali' para gaca gunli' libán que le zxōn benē' Dios, Bōnni' na' bulidzē' libí'ili' para birúajli' ga naca chul-la que dul-la', en guyázali' lu bení' idú queë'.

<sup>10</sup> Zí'atëlō biti' gúcali' bōnachi queë' Dios,  
pero na'a chinácali' bōnachi queë'.

Zí'atëlō cuntu nu buéchi' ladxi' libí'ili',  
pero na'a Dios caz ruhuéchi' lādxi'ë libí'ili'.

*Zóaru' nabanru' para gunru' ca rē'ënē' Dios*

<sup>11</sup> Bōchi' luzá'ado', nácali' ca bōnachi zí'tu', en ridásili' yōdzōlió ni. Que lē ni na', ráta'yua' lolí', biti' gū'ili' lataj ila'nná be'e le rizēsō lādxi'li' libí'ili', yugu' le ta'díl-lalen bō' naca cázali'.

<sup>12</sup> Guli'gún le naca dxi'a lógaca bönachi biti' núnbë'gaquië' Dios. Caní gaca, channö ulu'zegui libí'ili' didza', en ila'nná tútili' bönachi, gaca ila'lé'e bönachi yugu' le dxi'a runli', ate' dza huödë' Xanru' ila'gu'ë Dios yöl-la' ba ni'a que le naca cázali'.

<sup>13</sup> Tu' néquili' queë' Xanru', guli'gún bal yúgu'të bönni' ta'nná bë'e, bönni' na' nucuá'agaca bönachi légaquië', sal-la' náquië' bönni' rinná bé'enë' idütë yödzölió, tu' náquië' bönni' lo unná bë', <sup>14</sup> o channö náquië' bönni' rinná bé'enë' tu yödzö, nu na' nuzöë' bönni' lo unná bë' na' para gunë' xíguia' nupa tua' dö', en gunë' bal nupa tun le naca dxi'a. <sup>15</sup> Caní ré'ënë' Dios gunli' para ila'bö' dxië' yugu' bönni' biti' bi nözguequinë', en biti' núnbë'gaquië' Lë', cate' ila'lé'enë' le naca dxi'a na' runli'.

<sup>16</sup> Guli'gaca ca yugu' bönni' nazánagaquië', pero biti' ugunli' dxin yöl-la' nazán queëli' para gunli' le ruá' dö'.

Guli'gaca ca yugu' bönni' nadó'ogaquië' queë' Dios.

<sup>17</sup> Guli'gún bal yúgu'të bönachi.

Guli'dxí'i yugu' böchi' luzá'ali'.

Guli'gadxi-në' Dios.

Guli'gún bal bönni' na' rinná bé'enë' idütë yödzölió.

*Le gudí'i guzáquë'ë Cristo ruzéajni'i rë'u ca ral-la' gunru'*

<sup>18</sup> Núlöli' nácali' bönni' nadó'ogaca, guli'gadxi bönni' xanli', en guli'gún légaquië' bal, calégasö gunli' bal yugu' bönni' xanli' na' nácagaquië' tsahui', en tuí'i ládxi'gaquië' libí'ili', pero guli'gún bal ca' yugu' bönni' xanli' na' tu'saca' zi'ë libí'ili' lu dxin runli' quégaquië'. <sup>19</sup> Channö quí'i sáca'li', en biti' bi nabága'li', ate' guá' ilenli' lë na' tu' réquili' naca ca ré'ënë' Dios, urúajli' tsahui' lahuë' Dios. <sup>20</sup> Na'a, channö ruá'ali' dö', ate' yugu' bönni' yúlahui' ilunë' libí'ili' xíguia', ¿nacxi caz uzí'ili' xibë sal-la' len yöl-la' riböza zxön ladxi' queëli' guá' ilenli' lë na' gaca queëli'? Channö ribözali' zxön ladxi', en ruá' rilenli' le riguí'i rizáca'li', ate' benli' le naca dxi'a, ní'irö urúajli' dxi'a lahuë' Dios. <sup>21</sup> Dios bulidzë' libí'ili' para quí'i sáca'li' caní, tu' gudí'i guzáquë'ë Lë cazë' Cristo uláz queëli', en buzöë' queëli' tu le ruluí'i libí'ili' ca ral-la' gunli', para quí'i sáca'li' ca na' gudí'i guzáquë'ë Lë'.

<sup>22</sup> Cristo biti' bi dul-la' benë', en catu caz guzxi' yë'ë.

<sup>23</sup> Cate' bulu'dídza' yúdxinë' Lë',

biti' butsagai yúdxinë' légaquië'.

Cate' bulu'saca' zi'ë Lë',

biti' buzenë' légaquië' le bach,

pero budödi cuinë' lu në'ë Dios,

Nu na' ruchí'a rusöröë' le runru' ca sa'yéaj.

<sup>24</sup> Lë cazë' Cristo guzxi'ë dul-la' queëru' lu idú le naca cazë' cate' ní' gútië' lë'e yaga cruz, para gácaru' ca yugu' bönni' nati, para cabirö gunru' dul-la', pero sóaru' ibanru' para gunru' le

naca dxi'a. Lë' gúquië' huë' uláz queëru' para huóácaru' rë'u dxi'a. <sup>25</sup> Gúcali' ca yugu' bö'cu' zxila' nanítigacaba', pero na'a budxinli' queë' Cristo, Nu ruyú libí'ili', en rapa chi'ë bö' naca cázali'. Náquië' queëli' ca tu' bönni' uyú bö'cu' zxila'.

### 3

#### *Ca ral-la' ilún nupa nutsaga ná'gaca*

<sup>1-2</sup> Lësca' caní, libí'ili' nigula, ral-la' gunli' bal bönni' que queëli', en channö cabí ta'yéajlë'ë xtídzë'ë Cristo, ila'yéajlë'ë Lë' cate' ila'lé'enë' le naca dxi'a runli', en ca na' nácali' ba'a ladxi', en runli' légaquië' bal, sal-la' biti' bi didza' ruí'ilenli' légaquië' ca naca queë' Cristo. <sup>3</sup> Yöl-la' lachi queëli' biti' naca le zoa láchuisö, tsca rupá'ali' ícjali', en tsca nácagaca le néquini oro nusí' cuinli', en lari' nazáca'da' náculi'. <sup>4</sup> Yöl-la' lachi queëli' ral-la' gaca le yu'u icja ládxi'do'oli'. Yöl-la' lachi le ridiá'tica'sö naca yöl-la' nöxaj ladxi', en yöl-la' ba'a ladxi', le nazáca'da'gaca lahuë' Dios. <sup>5</sup> Lësca' caní guca yöl-la' lachi queégacanu nigula gula'yéaj ládxi'nu Dios, nigula na' gula'cuá'anu dza ni'te. Bulu'zxöni ládxi'nu Dios, en gulunnu bal bönni' que queégacanu. <sup>6</sup> Caní bennu Sara, tu' bennu ca rnna xtídzë'ë Abraham, bönni' queënu, en bulídzanu lë', gunnánu: "Xan." Libí'ili' ca' gunli' ca bennu Sara na' channö gunli' le naca dxi'a, en biti' bi gádxili'.

<sup>7</sup> Lësca' caní, libí'ili', bönni', ral-la' gü'i ládxi'li' nigula que queëli'. Guli'gún légacanu bal, calégasö tu' nöta'gacanu ca yöl-la' nál-la queëli', pero lësca' tu' nadéli'gacanu yöl-la' na'bán na' runnë' Dios queëru', lëbisö ca nadéli'li' libí'ili'. Guli'gún caní para cabí uzaga' tu' xihui' xinözili' cate' ulídzali'-në' Dios.

#### *Huagú'i huazáca'ru' sal-la' gunru' le naca dxi'a*

<sup>8</sup> Ga ruúdxitë, guli'gaca tuz tuli' len ia'tuli' yúgu'tëli', en guli'gü' ládxi'li' luzá'ali' tuli' ia'tuli'. Guli'gaca dxi'i ladxi', en zxön ladxi'. <sup>9</sup> Biti' ubí'ili', cabí guá'ali' dö' que nu ruá' dö' queëli', en biti' utsaga yúdxili' nu rutsaga yudxi libí'ili', pero caní ubí'ili', inábili'-në' Dios gunë' ga gaca bica' ba nu na', tu' bulídzë' Dios libí'ili' para gácali' bica' ba. <sup>10</sup> Caní naca le nazúaj lu guichi lá'ayi le rnna:

Nu bönni' ré'ënë' uzi'ë xibé yöl-la' na'bán queë', en cözë' dxi'ado',

ral-la' ucá'anë' didza' xihui', en cabirö si' yë'ë.

<sup>11</sup> Ral-la' ucá'anë' le ruá' dö', en gunë' le naca dxi'a.

Ral-la' gü'i ládxi'ë cözë' zxön ladxi', en gúntica'së' caní,

<sup>12</sup> Xanru' rapa chi'ë yugu' bönni' tsahui'

en ruzé náguië' le tu'lídzë' Lë',

pero ruzáguë'ë xinözguequi nupa tua' dö'.

<sup>13</sup> ¿Nuzxi caz guá' dö' queéli' channö ruí'i ládxi'li' gúntica'sili' le naca tsahui'? <sup>14</sup> Sal-la' quí'i sáca'li' cate' runli' le naca tsahui', gácali' bica' ba. Cuntu nu gádxili', en biti' ubi ugu'ili' <sup>15</sup> pero buli'zxöni ládxi'li'-në' Cristo, en güi'ili' Lë' lataj inná bé'enë' lu icja ládxi'do'oli'. Guli'sóa sina' quíxjöi'ili' yúgu'të nupa ila'nabi libí'ili' bizx que runli' löza Cristo, en gunli' lë ni lu yöl-la' nōxaj ladxi' queéli', en lu yöl-la' run bal nupa na'. <sup>16</sup> Guli'gúntica'sö le naca dxi'a lahuë' Dios, en channö nacué' nupa ta'nnë xihui' que le naca tsahui' runli' tu' réajlë'ëli' Cristo, ní'irö ulu'tuí'i tu' nözi le ta'nnë queéli'. <sup>17</sup> Channö quí'i sáca'li', dxi'arö gaca channö naca tu' runli' le naca dxi'a, en calëga tu' ruá'ali' dö', channö Dios rë'enë' quí'i sáca'li' caní.

<sup>18</sup> Lë cazë' Cristo gudí'i guzxaquë'ë, en gútië' uláz queëru' para bugúë' dul-la' nabága'ru'. Lë' náquië' dxi'a, pero gútië' ní'a queëru', yugu' bönni' dul-la'. Caní benë' para bunë' rë'u tuz len Dios. Lu yöl-la' bönachi queë' gútië' pero lu bö' naca cazë' ni zoë' nabanë' lu le cubi le naca cazë'. <sup>19</sup> Lu bö' naca cazë' guyijë' yöjenë' libán lógaca bö' nadzúngaca. <sup>20</sup> Bö' ni gulaca cazë' yugu' bönni', dza ni'te gula'dá'baguë'ë xtídzë'ë Dios, dza ni' zoë' Noé, cate' ni' gulözë' Dios lu yöl-la' riböza zxon ladxi' queë', en biti' busiúdxë' légaquië', tsanni ni' benë' Noé barco zxon na'. Lë'e barco na' bulu'lá nabábasö bönachi lu nisa. Gulaca xunu' bönachi, bönni', en nigula. <sup>21</sup> Nisa ni' naca tu le ruluí'i ca naca nisa ga na' ridílaru' nisa, le naca bë' nuláru' lu yöl-la' guti tu' bubanë' Jesucristo lu yöl-la' guti. Lë na' ridílaru' nisa biti' naca tu le run dxi'a le nácaru' láchuisö, pero ruluí'i ruí'i ládxi'ru' gaca dxi'a icja ládxi'do'oru' lahuë' Dios. <sup>22</sup> Jesucristo bubenë' yehua' yubá, ga na' yöjchö'ë cuita lë'ë ibëla Dios, en rinná bé'enë' yugu' gubáz lá'ayi, en nupa ni' ta'nná bë', en nupa nadéli'gaca yöl-la' zxon.

## 4

*Ral-la' ugunru' dxin yöl-la' huáca queë' Dios para gunru' xichinë' Cristo*

<sup>1</sup> Que lë ni na', ca na' gudí'i guzxaquë'ë Cristo lu le naca cazë', lësca' libí'ili' ral-la' soa cözali' quí'i sáca'li'. Nu na' riguí'i rizáca'a tu' da' le naca tsahui' chibucá'ana dul-la'. <sup>2</sup> Na'a isí lo, ral-la' gúntica'sili' ca rë'enë' Dios, en calëga ca rizësö ládxi'li' lu yöl-la' bönachi queéli'. <sup>3</sup> Tsca'ti' gaz le chibenli' chibenli'. Bítirö gunli' ca na' tun nupa biti' núnbë'gaca Dios. Dza ni'te benli' yugu' le cabí ral-la' gunli'. Guzé ládxi'li' le ruá' dö'. Guzúdxili'. Gudödi bë' güi' gudáguli', en guyéaj ládxi'li' budó' guiöj budó' yaga, le rigútinë' Dios. <sup>4</sup> Na'a, tu'báninë' bönni' tunë' caní tu' cabirö runli' tsözxön légaquië' cate' tunë' le ruá' dö' caní, en que lë ni na' tu'tsaga yúdxinë' libí'ili'. <sup>5</sup> Légaquië' run bayudxi ulu'luí'i cuíngaqië' lahuë' Dios, ate' Lë' chizóa



uchi'a usöröë' nupa nabángaca, en nupa chinátigaca. <sup>6</sup> Que læ ni na' guca libán que didza' dxi'a lógaca nupa chinátigaca, nupa na' Dios buchi'a busöröë' léguequi cate' ni' gula'cuá' yödzölió ni, ca na' ruchi'a rusöröë' yúgu'të bönachi. Guca libán lóguequi para ila'cuá' lu yöl-la' na'bán lu bö' nácagaca caz, ca na' zoa cazë' Dios lu yöl-la' na'bán.

<sup>7</sup> Chizóa idxín dza údxi que yúgu'të le dë. Que læ ni na', guli'gaca ba'a ladxi', en buli'subán ládxi'li' para gaca ulídzali'në' Dios. <sup>8</sup> Tu' runtë bayudxi, guli'dxí'i luzá'ali' tuli' ia'tuli', ate' channö dzágali' lu yöl-la' nadxí'i, gácali' sina' uniti loli' yugu' luzá'ali' tua' dö' queëli'. <sup>9</sup> Guli'güi' lataj ila'cuá' böchi' luzá'ali' lídxili', en biti' innëli' quégaquië'. <sup>10</sup> Ral-la' ugunli' dxí'ado' dxin yugu' le buzá' ládxe'ë Dios queëli', en gácaleni' luzá'ali' tuli' ia'tuli'. <sup>11</sup> Nu bönni' runë' ba nalí, ral-la' gunë' ba nalí que xtídzë'ë Dios, ate' nu bönni' runë' xichinë' Cristo, ral-la' ugunë' dxin yöl-la' huáca na' runnë' Dios queë', ate' ni'a que yúgu'të le runli', gaca yöl-la' ba queë' Dios ni'a que le nunë' Jesucristo. ¡Gácatica'sö queë' Dios yöl-la' ba, en yöl-la' unná bë'! ¡Ca' gaca!

### *Le ila'guí'i ila'zaca' bönachi ta'yéajlë' Cristo*

<sup>12</sup> Böchi' luzá'ado', biti' ubánili' tu' nözi le ta'zí' bë'da' libí'ili'. Biti' naca tu le cabí núnbë'gaca bönachi. <sup>13</sup> Guli'dzëjade'e tu' dë lataj queëli' gunli'-në' tsözxön Cristo lu le riguí'i rizáqueë'ë Lë' ni'a que bönachi queë' para gaca udzëjali' ca' dza na' huödë' Cristo, cate' ilé'eli' yöl-la' zxön queë'. <sup>14</sup> Channö tu'dzaga yudxi bönachi libí'ili' tu' dá'ali' Cristo, bica' ba libí'ili', tu' naca bë' zóalenë' Dios Bö' Lá'ayi libí'ili', Nu na' za' yehua' yubá. Bönachi yödzölió ni tu'dzaga yudxi Lë', pero libí'ili' runli'-në' bal. <sup>15</sup> Channö riguí'i rizáqueë'ë nu bönni' dzáguië' libí'ili', ral-la' gaca caní tu' dë'ë Cristo, en calëga tu' rútië' bönachi, o ribanë', o ru'ë dö', o tu' yöjgútsë'ë ga yúbölö. <sup>16</sup> Na'a, channö núlöli' riguí'i rizáca'li' tu' dá'ali' Cristo, biti' ral-la' utuí'ili', pero guli'cu'ë Dios yöl-la' ba tu' nazí' lali' bönachi queë' Cristo.

<sup>17</sup> Chibidxín dza isí lahuë' Dios uchi'a usöröë' bönachi rö queë'. Channö zí'alö uchi'a usöröë' rë'u, ¿nácxitëro gaca quégaca nupa biti' túngaca ca rna didza' dxi'a queë' Dios? <sup>18</sup> Channö naca böniga ulu'lágaca nupa tun le naca dxi'a, ¿nácxitëro gaca quégaca nupa ta'dá'baga' Dios, en tun dul-la'? <sup>19</sup> Caní naca, yugu' bönni' ni ta'guí'i ta'zaqueë' tu' rë'në' Dios gaca caní, ral-la' ilúntica'së' le naca tsahui', en ulu'dödë' bö' nácagaca cazë' lu në'ë Dios, tu' ben cazë' Lë' légaquië', en runë' ca rna xtídzë'ë.

## 5

*Pedro ruzéajni'inë' nupa ta'yéajlë' Cristo*

<sup>1</sup> Na'a, ruzéajni'ida' libí'ili', bönni' gula tapa chí'ili' nupa néquiguequi queë' Cristo, tu' naca' neda' ca' bönni' gula ca nácali' libí'ili', en bilé'eda' le gudí'i guzxáqueë' Cristo, ate' guna' ca' tsözxön libí'ili', uzí'iru' xibé yöl-la' zxön na' ilá' lahui. <sup>2</sup> Guli'gaca ca bönni' tu'yúë' bö'cu' zxila', gun chí'ili' bönachi na' Dios gulu'ë lu ná'ali'. Guli'gún caní idú ládxi'li' ca rë'ënë' Dios, en calëga tu' run bayudxi queëli', o tu' rizë ládxi'li' dumí. Guli'gún xichinli' tu rë'ënisili', <sup>3</sup> en calëga tu' rë'ënili' inná bé'esili' nupa na' nagu'ë lu ná'ali'. Guli'güi' ládxi'li' gácali' tu le rulu'i ca ral-la' ilaca nupa na' run chí'ili'. <sup>4</sup> Caní naca, cate' ulu'i lahuë' Cristo, bönni' lo uyú bö'cu' zxila', idéli'li' tu le uzí'ili' xibé le catu caz initi.

<sup>5</sup> Lë'sca' caní, bi'i cuidi', guli'gún ca ta'nnë' yugu' bönni' gula. Yúgu'tëli' ral-la' gunli' bal luzá'ali', tuli' ia'tuli', lu yöl-la' nöxaj ladxí' queëli', tu' nazúaj lu guichi lá'ayi le rnna: Dios ruzáguë'ë xinözguequi nupa tun ba zxön cuínguequi pero rácalenë' nupa náca'gaca nöxaj ladxí'.

<sup>6</sup> Guli'sóa nöxaj ladxí' lu në'ë Dios, ate' Lë' uchisë' libí'ili' cate' izá'a dza. <sup>7</sup> Guli'cú'u yúgu'të le run ga ruúbi rugu'ili' lu në'ë Dios, tu' ru'í' ládxi'ë libí'ili'.

<sup>8</sup> Guli'gaca ba'a ladxí', en buli'subán ládxi'li', tu' zoa tu' xihui', nu bití' rilé'e libí'ili' dxi'a, ridá idú gásibi'ilö, en naca ca tuba' bëdxi guixi' ribödxi'aba', riguiljba' nu gáguba'. <sup>9</sup> Guli'gaca tsutsu ca réajlë'ëli' Cristo, en guli'zága' xinöza tu' xihui', tu' nözili' ta'gu'í' ta'záque'ë böchi' luzá'ali' idútë yödzölió ni ca na' riguí' rizáca'li' libí'ili'. <sup>10</sup> Ní'irö cate' chigudí'i guzxáca'li' tu chí'isö, Dios gunë' ga gácali' idú tsahui', en ga gácali' tsutsu, en ga gálali', en ga sóali' tsaz. Lë cazë' Dios ruzá' ládxi'ë queëru' yúgu'të le ruzí'iru' xibé, en bulidzë' rë'u para uzí'iru' xibé yöl-la' zxön queë' le zóatica'sö tu' nácaru' tuz len Jesucristo. <sup>11</sup> ¡Gácativa'sö yöl-la' ba, en yöl-la' unná bë' queë' Lë'! ¡Ca' gaca!

### *Pedro ruzenë' didza' nupa ta'dá' Cristo*

<sup>12</sup> Dídza'do' ni ruzúaja' queëli' lu guichi lu në'ë Silvano. Réquida' náquië' böchi'ru' idú ladxí'. Rë'ënda' utipa' ládxi'li', en runa' ba nalí loli', le nácatë lë ni naca le ruzá' ládxi'ë queëru' Dios. ¡Guli'gaca tsutsu tu' ruzí'ili' xibé lë ni!

<sup>13</sup> Yugu' bönachi queë' Cristo nacua' Babilonia tu'gapa Dios libí'ili'. Dios gurö cazë' léguequi ca na' guröë' libí'ili'. Lë'sca' bi'i Marcos rugápabi' Dios libí'ili'. Nácabi' ca xzí'ini caza'. <sup>14</sup> Guli'gapa Dios luzá'ali' tuli' ia'tuli', en lu yöl-la' nadxí'i queëli' luzá'ali' unída'li' luzá'ali' tuli' ia'tuli'.

Rinábida'-në' Dios gunë' ga soa dxi icja ládxi'do'oli', yúgu'tëli' na' néquili' queë' Jesucristo. ¡Ca' gaca!

## DÍDZA 'DO' BUROPI BUZÚAJĚ' PEDRO

*Pedro rugapě' Dios nupa ta'dá' Cristo*

<sup>1</sup> Neda', Simón Pedro, naca' huen dxin queě' Jesucristo, en gubáz nasól-lě'ě Lě'. Rugapa' Dios libí'ili', réajlě'ěli'-ně' Jesús. Lěbisö ca nazáca'gaca yöl-la' réajlě' queěli' Lě', en yöl-la' réajlě' queětu' Lě'. Dios beně' ga réajlě'ěli' Lě' tu' naca cazě' tsahui', en tu' náquiě' ca' Xanru' Jesucristo, Nu na' rusölá rě'u, tsahui'.  
<sup>2</sup> Rinábida'-ně' Dios guně' ga gata' queěli' idútě le ruzá' lădxě'ě queěru', en guně' ga soa dxi icja lădxi'do'oli' tu' núnbě'ěli'-ně' Dios, enca' Xanru' Jesús.

*Le náca'gaca nupa ta'yéajlě' Cristo*

<sup>3</sup> Lu yöl-la' huáca zxon queě', Dios chibenně' queěru' yúgu'tě le riquíniru' para gata' queěru' yöl-la' na'bán idú, en para gácaru' ba'a ladxi', tu' núnbě'ěru' Nu na' bulidza rě'u para gata' queěru' yöl-la' zxon queě', en le naca tsahui' queě'.  
<sup>4</sup> Tu' runě' caní, beně' ga gaca uzi'iru' xibé yugu' le zxon, en le naca tsahui' guzxi' lu ně'ě gunně' queěru', ate' tu' naca caní nuláru' lu le ruá' dō' raca yōdzōlió ni tu' ta'zě lădxi'gaca bōnachi le cabí naca tsahui'. Nuláru' para gácaru' ca náquiě' Lě cazě' Dios.  
<sup>5</sup> Que lě ni na':

Channö réajlě'ěli' Cristo,

guli'gü' lădxi'li' gácali' dxi'i ladxi'.

Channö chinácali' dxi'i ladxi',

guli'gü' lădxi'li' gata' ca' queěli' yöl-la' rácada'.

<sup>6</sup> Channö nápalí' yöl-la' rácada',

guli'gü' lădxi'li' inná be'e cuinli'.

Channö rinná be'e cuinli',

guli'cōza zxon ladxi'.

Channö ribōzali' zxon ladxi',

guli'sóa ba'a ladxi'.

<sup>7</sup> Channö zóali' ba'a ladxi',

guli'dxi'i luzá'ali'.

Channö nadxi'ili' luzá'ali',

guli'dxi'i ca' yúgu'tě bōnachi.

<sup>8</sup> Channö caní runli', en zeaj rácarō idú ca runli' caní, lě ni gun ga biti' gaca nítisö yöl-la' réajlě' queěli' Lě', ate' tseaj gácarō idú ca núnbě'ěli'-ně' Xanru' Jesucristo. <sup>9</sup> Nu bōnni' biti' ruí' lădxi'ě guně' caní, náquiě' ca tu bōnni' nachul-la nanítie', tu' chizá' ral-la lădxi'ě buně' Cristo lě' tsahui', en bugúe' yugu' dul-la' gubágu'e'ě zí'atělō. <sup>10</sup> Que lě ni na', bōchi' luzá'ado', ral-la' gü'itě' lădxi'li' gué'quibe'eli' bulidzě' Dios libí'ili', en gurō cazě' libí'ili'. Channö gunli' caní, biti' ca' ichixi iníguili'.

11 Caní gaca, idú ládxë'ë Dios gúnнасë' queëli' lataj tsázali' ga inná bé'tica'së' Xanru' Jesucristo, Nu rusölá rë'u.

12 Que lë ni na' gúntica'sa' ga tsöjnéli' yugu' lë ni sal-la' chinöz quézili' le, en rugunli' dxin le naca idútë li na' chiguzxí' lu ná'ali'. 13 Runi neda' ral-la' usubana' ládxí'li' ca náca gaca lë ni tsanni ni zoa' nabana'. 14 Ral-la' guna' caní tu' nözda' sí' gátia'. Xanru' Jesucristo chigudxi cazë' neda' gaca caní quia'. 15 Que lë ni na' ruí'ida' ládxa'a guna' ga tsöjnética'sili' yugu' lë ni tödi gátia'.

### *Nupa bila'lé'e yöl-la' zxön queë' Cristo*

16 Biti' bé'lentú' libí'ili' tu didza' ridasö lu yöl-la' sina' queëtu', cate' buzéajni'itu' libí'ili' ca ral-la' idxín dza huödë' Xanru' Jesucristo, napë' yöl-la' unná bé' zxön. Netu' bilé'e quézitu' yöl-la' zxön queë'. 17 Bilé'etu' Lë' cate' Xúziru' Dios benë' Lë' bal, en bé'ë Lë' yöl-la' zxön, ate' biyön chi'ë Dios, le birúaj lataj bení' queë', cate' gunné': "Bönni' ni náquië' Zxí'ina'. Nadxí'ida' Lë', en raza ládxa'a Lë'." 18 Netu' biyön quézitu' chi'ë na' le birúaj yehua' yubá cate' ni' guzóalentu'-në' Xanru' lu guí'a lá'ayi na'.

19 Lë na' guca, naca bé'da' zeaj nácatë didza' gulu'ë yugu' bönni' uláz queë' Dios, ate' ral-la' gü'i ládxí'li' didza' na', tu' naca ca tu guí' ruzení' tu ga naca chul-la ga idxintë dza uzení' lu icja ládxí'do'oli' Nu na' naca ca böläj hui sila queëru'. 20 Lë ni runda' bayudxi tséajni'ili': Cuntu nu bönni', rácasö queë' bití' gaca tséajni'inë' didza' bé'ë tu bönni' uláz queë' Dios. 21 Yugu' didza' gulu'ë yugu' bönni' uláz queë' Dios bití' ca' gulu'ë tu' gulë'ëni quézinë', pero gulu'ë didza' uláz queë' Dios le guchízië' Dios Bö' Lá'ayi icja ládxí'do'gaquië'.

## 2

### *Ca náca gaca nupa tu'sédinë' le cabí nácatë*

1 Yugu' bönni' ta'zí' yë'ë gula'cuá'lenë' bönachi Israel, en gula'nnë' náca gaquië' bönni' tu'ë didza' uláz queë' Dios. Lë'sca' caní yugu' bönni' ila'zí' yë'ë ila'cuá'lenë' libí'ili', en ulu'sédinë' libí'ili' le cabí nácatë. Lu yöl-la' sina' quégaquië' ulu'sédinë' libí'ili' xibá quégacasë' le gun ga soa bönadxi queëli' uca'anali' le naca idútë li. Ila'dá'baguë'ë ca' Xanru', Nu busölá rë'u. Le ilunë' gun ga usunítië' Dios légaquië'. 2 Zianli' libí'ili' gunli' légaquië' tsözxön lu le ruá' dö' ilunë', ate' tu' gunli' bál-lali' caní ila'nnë' xihui' bönachi que didza' dxi'a le naca idútë li. 3 Lu yöl-la' ruhuidi' quégaquië' ulu'sédinë' libí'ili' le cabí nácatë, para gata' quégaquië' dumí queëli'. Chinarugu quégaquië' bönni' ni, ate' naca löza ila'nítië' tsaz.

4 Dios bití' buniti lahuë' yugu' gubáz lá'ayi queë' na' gulunë' dul-la', pero gurú'unë' légaquië' lataj chul-la. Nága'gaquië'

du guië ga naca chul-la na', ga na' ta'bözë' dza usiúdxë' Dios légaquië'. <sup>5</sup> Lësca' caní, bití' buniti lahuë' bönachi gula'cuá' dza ni'te cate' gusöl-lë'ë nisa guiój le busuniti yödzölió le beti bönachi nácagaca xihui', pero busölë' Noé lu nisa na', bönni' ni' benë' libán que le naca tsahui'. Dios busölë' ca' ia'gadxi di'a dza queë' Noé na' lu nisa. <sup>6</sup> Lësca' caní, Dios guchúguië' quégaca bönachi gula'cuá' yödzö Sodoma, en yödzö Gomorra. Busunítië' léguequi lu guí', ate' bulu'huóaca dö. Le guca quéguequi naca tu le ruluí'i le run gadxi nupa tua' dö'. <sup>7</sup> Cate' busunítië' yugu' yödzö na', Dios busölë' Lot, tu bönni' tsahui', lu guí' na'. Buí'inida' ládxë'ë Lot cate' bilé'enë' le xihui' gulún bönachi tuá' dö' na'. <sup>8</sup> Caní guca, tu' guzóalenë' bönni' tsahui' na' léguequi, ate' bilé'enë', en biyönnë' le ruá' dö' na' gulúngaca, ate' tu' gúquië' tsahui' gusëbi ládxë'ë yúgu'të dza ni'a que yugu' le cabí naca tsahui' gulúngaca. <sup>9</sup> Caní naca, Xanru' nözinë' usölë' nupa na' tadxi Lë' lu na' nu run ga tsázagaca bönachi nöza dul-la', pero nucözë' xíguia' gunë' nupa bití' nácagaca tsahui' ga idxinrö dza ichúguië' quéguequi ila'niti tsaz.

<sup>10</sup> Ichúguda'arö quégaquië' bönni' ni tunë' yugu' le ta'zë ládxë'ë le ruá' dö', en ta'dá'baguië' yöl-la' unná bë' queë' Xanru'. Nácagaquië' rugu ladxi', en zidi ladxi'. Bití' tádxinë' tu'lidza ditjë' gubáz lá'ayi ta'dë' lu bení'. <sup>11</sup> Gubáz lá'ayi na' nápagacatërë' yöl-la' unná bë', en yöl-la' huáca ca yugu' bönni' na', pero gubáz lá'ayi na' bití' tu'huázxjanë' nu ulu'zéguië' didza' lahuë' Xanru'.

<sup>12</sup> Yugu' bönni' ni nácagaquië' ca böa' guixi', bití' bi ta'yéajni'iba', pero náljagacaba' para nu sön légacaba', en guti légacaba'. Ta'nnë xihuë'ë que le cabí ta'yéajni'inë', ate' ila'nítië' tsaz ca raca quégacaba' böa' guixi' na'. <sup>13</sup> Dios ubi'ë quégaquië' le ila'gui'i ila'záquë'ë, tu' bulu'saca' zi'ë bönachi. Téquinë' naca xibágaquië' tu'zi'ë xibé le raca na'a dza. Nácagaquië' ca tu huë' nudzu', en tu le run ditaj cate' ni' tahuë' tsözxön len libí'ili', ate' tu'dzëjanë' tu' ta'zi' yé'enë' libí'ili'.

<sup>14</sup> Lu yöl-la' rizë ladxi' quégaquië' le ruá' dö' tu'yüë'-nu yugu' nigula. Bití' nacu'ë dxisö túngaquië' dul-la'. Túngaquië' ga ta'chixi ta'nigui nupa bití' nácagaca tsutsu ca ta'yéajlë' Cristo. Ta'guílatica'së' yugu' le tu'huídi'në'. Dios chin-uchúguië' quégaquië' ilátigaquië'. <sup>15</sup> Bulu'cá'anë' le naca idütë li, ate' nachul-la nanítigaquië'. Tunë' ca benë' Balaam, zxi'inë' Beor, bönni' ni' bidxi'inë' dumí, ate' benë' le ruá' dö' tu' nazxjë'. <sup>16</sup> Dios buzenë' le bach Balaam na' tu' benë' le ruá' dö' na'. Tuba' búrrodo' bë'lenba' lë' didza' ca na' tuí'i didza' bönachi, ate' buzága'ba' xinözë' Balaam ga na' sa'yéajë' lu yöl-la' ridá'bagá queë'.

17 Nácagaquië' bönni' ni ca tu buduá' chibuí'i nisa que, enca' ca tu böaj le riché' bö' budunu'. Chinabá'a xilátjagaquië' lataj chul-la. 18 Caní nácagaquië' tu' tu'ë didza' yugu' le zxön lu yöl-la' bití' bi nözi quegaquië', en tu'gunë' dxin yugu' le ta'zë ládxi'gaca bönachi le ruá' dö', en tunë' ga ta'chixi ta'nigui nupa si' bulu'lá ladaj nupa nácagaca chul-la niti. 19 Të' bönachi ila'deli' yöl-la' rusölá, pero légaca cazë' nadzúngaquië', en tunë' bayudxi le ruá' dö'. Nadzúngaquië' yúgu'të bönni' lu na' bi rinná be'e icja ládxi'do'gaquië'. 20 Channö bulu'lë' lu le cabí naca tsahui' nacuá' yödzölió ni tu' gulúnbë'ë Xanru' Jesucristo, Nu rusölá rë'u, ate' ní'rö ta'röli le cabí naca tsahui' na' légaquië' leyúbölö, en ta'nná be'e légaquië', le nácatë nabága'gacatë'rë' xíguia' ga röjsetë ca le gula'báguë'ë zí'alö. 21 Dxi'arö gaca quegaquië' la'tu' catu caz ilúnbë'ë Nu ruzóa rë'u nöza tsahui' ca le gaca quegaquië' channö gulúnbë'ë Lë', ate' ní'rö bulu'cá'anë' xibá lá'ayi bë'ë Dios quegaquië'. 22 Chibudxín quegaquië' didza' na' rnna: Ruhuécjaba' bö'cu', ruhuóáguba' le si' gúbaba'. Ruyázaba' cuchi na' si' gudíbiru'-ba' lu guna'.

### 3

#### *Naca löza huödë' Xanru'*

1 Didza' ni naca le buropi ruzúaja' queëli' lu guichi, böchi' luzá'ado'. Lu irópatë guichi na' ruí'i ládxa'a usubana' ládxi'li' ca nácagaca lë ni. 2 Guli'tsöjné yugu' didza' gulu'ë bönni' queë' Dios zí'atëlö, ca gulu'ë didza' uláz queë'. Guli'tsöjné ca' xibá na' Xanru', Nu rusölá rë'u, gunná bé'enë' rë'u, lë na' bulu'sédinë' bönni' gubáz nasól-lë'ë Lë' libí'ili'.

3 Ral-la' tsöjnéli' lë ni naca lo. Dza tsöjsëtëgaca ulu'luí'i lahuë' bönni' ilunë' le ta'zë ládxi'ë le ruá' dö'. 4 Ulu'titjë', ila'nnë': "¿Gazxi caz lë na' guzxi' lu në'ë Cristo? Gunnë': Huöda' leyúbölö. Dza ni'te cate' gulatië' xuz xtó'oru', yúgu'të raca tuz ca guca cate' gusí lo rata' yödzölió ga ridxintë na'a dza." 5 Tu'zöé' tsölá'alö le guca dza ni'te. Bë'ë didza' Dios, ate' gulata' lúzxiba, en luyú. Birúaj luyú na' lu nisa ate' zoa gatsaj láchui'lö nisa. 6 Len nisa ca' busunítië' Dios yödzölió dza ni'te cate' ni' gusól-lë'ë nisa guiöj le beti yugu' bönachi dul-la'. 7 Lúzxiba, en yödzölió ni le nacuá' na'a dza, Dios nucu'ë léguequi ga idxinrö dza usunítië' léguequi lu guí'. Caní gaca tu' gunné' caní Dios caz. Uzégui'ë léguequi dza ni' ichúguië' quégaca bönachi bití' nácagaca tsahui' gátigaca.

8 Bití' gal-la ládxi'li' lë ni, böchi' luzá'ado'. Tu dza naca queë' Xanru' ca zían gayuá' iz, ate' zían gayuá' iz nácagaca queë' ca tu dza. 9 Bití' ridzenë' Xanru' gunë' le guzxi' lu në'ë gunë'. Téquiguequi bal-la bönachi ridzenë', pero ribözë' zxön ládxi', en

ruá' rilenë' rë'u tu' cabí rë'ënë' initi nitú bönachi, pero rë'ënë' ulu'bí'i ládxi'gaca yúgu'të bönachi.

<sup>10</sup> Tsárido'os idxín dza huödë' Xanru' ca ridxinë' tu bönni' gubán chi'i dzö'ölö. Lu dza na' huadödi que lúzxiba len tu bö zxon. Ila'niti yúgu'të le nacuá' lu guí' zxon. Ila'yegui yödzölió ni, en le nacuá' yödzölió ni.

<sup>11</sup> Channö caní gaca, ila'niti yúgu'të lë ni, ¿bizxi caz ral-la' gunli'? Ral-la' gácali' ba'a ladxi', en udödi cuinli' lu në'ë Dios.

<sup>12</sup> Ral-la' cözali' dza huödë' Xanru', en gü'i ládxi'li' gunli' ga idxinrö bayön dza ni' cate' initi lúzxiba, ate' ila'niti yúgu'të le nacuá' ni lu guí'. <sup>13</sup> Caní gaca, pero rë'u ribözaru' le guzxi' lu në'ë Dios. Gunë' tu lúzxiba cubi, en tu luyú cubi ga ni' soa le naca tsahui'.

<sup>14</sup> Que lë ni na', böchi' luzá'ado', tsanni ni ribözali' yugu' lë ni, guli'güi' ládxi'li' gácali' idú tsahui' lahuë' Dios, ate' gunli' ga cuntu nu bi gaca innë queéli', en cözali' dxí'ado' cate' idxinrö dza ni'. <sup>15</sup> Ral-la' inözili' ribözë' Dios zxon ladxi' para gata' quégaca bönachi lataj ulu'lágaca, ca na' gunné' ca' böchi'ru' Pablo. Buzúajë' queéli' lu guichi, zóalen lë' yöl-la' réajni'i na' bë'ë Xanru' queë'. <sup>16</sup> Yúgu'të lu guichi ruzúajë', ru'ë didza' ca nácagaca lë ni, sal-la' nútsa'gaca ca' léguequi yugu' didza' nácagaca böniga tséajni'iru'. Yugu' didza' caní tu'chíxinë' bönni' bití' nözguequinë', en bönni' bití' naca idú ládxi'gaquië'. Lë'sca' caní tunë' quégaca ia'bal-la didza' nazúajgaca lu guichi lá'ayi, le gun ga usunítië' Dios légaquië'.

<sup>17</sup> Chinöz quézili' lë ni, böchi' luzá'ado'. Que lë ni na' guli'gún chi'i cuinli', para cabí ila'zí' ye'e bönachi bití' nácagaca tsahui' libí'ili', en para cabí ilún ga tseaj bö' icja ládxi'do'oli' ca réajlë'ëli' Cristo. <sup>18</sup> Guli'güi' ládxi'li' gácarö idú ca núnbë'ëli'-në' Xanru' Jesucristo, Nu rusölá rë'u, ate' ruzí'ili' xibë'. ¡Yöl-la' ba Lë' na'a dza, en yúgu'të dza zá'gaca! ¡Ca' gaca!

## DÍDZA'DO' ZÍ'ALÖ BUZÚAJË' JUAN

### *Didza' nabániru'*

<sup>1</sup> Rusiyöntu' libí'ili' ca naca queë' Bönni' na' zoa cazë' dza ni'te, le biyöñitu' bë'ë didza', en le bilé'etu' ca naca queë', en le buyutu' benë' Bönni' na'. Gudantu' Lë'. Bönni' ni náquië' Jesús, lë' ca' Didza' Nabánigaca Bönachi. <sup>2</sup> Bönni' na' nabánigaca bönachi buluí'i lahuë', ate' bilé'etu' Lë'. Runtu' ba nalí queë', en ruluí'itu' libí'ili' ca naca queë' Bönni' na' nabániru'. Bönni' ni guzóalenë' Dios Xuz, en chibuduluí'i lahuë' ga zóaru'. <sup>3</sup> Le bilé'etu', en le biyöñitu' rusiyöntu' libí'ili' para gácali' ca' libí'ili' tuz len netu'. Le nácatë naca yöl-la' tuz queëru' len Dios Xuz, enca' len Jesucristo Zxí'inë' Dios. <sup>4</sup> Ruzúajtu' queëli' lu guichi lë ni para gaca udzëjaru' idú ládxi'ru'.

### *Dios náquië' bení'*

<sup>5</sup> Lë ni naca didza' biyöñitu' bë'lenë' Jesús netu', ate' le rusiyöntu' libí'ili'. Caní rna: Dios náquië' bení', ate' nitú le naca chul-la' que dul-la' biti' zóalen Lë'. <sup>6</sup> Channö innaru': "Nácaru' tuz len Dios", pero channö runru' le naca chul-la' que dul-la', lë ni naca bë' rizí' yë'ëru', en biti' runru' le naca idütë li. <sup>7</sup> Na'a, channö runru' le naca tsahui', en ridaru' lu bení' ca na' Lë' náquië' tsahui', en zoë' lu bení', nácaru' tuz turu' len ia'turu', ate' xichönë' Jesucristo, Zxí'inë' Dios ruún rë'u dxi'a, en rugúa yúgu'të dul-la' nabága'ru'.

<sup>8</sup> Channö rnnaru': "Biti' bi dul-la' runru'", rizí' yë'ëru' la' cuínsiru', en biti' nazí' lu ná'aru' le naca idütë li. <sup>9</sup> Channö ixóalëpiru' lahuë' Dios dul-la' nabága'ru', Lë' runë' ca rnnë', en náquië' tsahui'. Uniti lahuë' dul-la' nabága'ru', en únë' rë'u tsahui', ugúë' yúgu'të le ruá' dö' dzaga rë'u. <sup>10</sup> Channö innaru': "Biti' bi dul-la' nabága'ru'", naca ca innaru': "Dios rizí' yë'ë", ate' biti' runru' ca rna xtídzë'ë.

## 2

### *Cristo náquië' Nu rudödi xtídzaru' lahuë' Dios*

<sup>1</sup> Libí'ili', zxi'ina'do', ruzúaja' queëli' lu guichi lë ni, para cabí gunli' dul-la'. Na'a, channö nútítës nu gun dul-la', zoa nu rudödi xtídzaru' lahuë' Dios Xuz, Lë' Jesucristo, Nu naca tsahui'. <sup>2</sup> Naca cazë' Bönni' budödi cuinë', en gútië' para bugúë' dul-la' nabága'ru' lahuë' Dios. Calégasö gútië' para bugúë' dul-la' nabága'ru' rë'u, pero gútië' ca' para bugúë' dul-la' nabága'gaca bönachi idütë yödzülió.



<sup>3</sup> Channö runru' ca naca le gunná bé'enë' rë'u, nõziru' chinúnbë'ëru' Lë'. <sup>4</sup> Nu rnna: "Neda' núnbë'a-në' Dios" pero biti' run ca rinná bë' xibá queë', nu ni rizí' yë', en biti' run le naca idútë li. <sup>5</sup> Nu run ca rnna xtídzë'ë Dios, le nácatë nadxí'i nu ni Dios ca ral-la' gun. Channö runru' caní, nõziru' néquiru' queë' Dios. <sup>6</sup> Lësca' caní, nu rnna: "Neda' néquida' queë' Cristo", ral-la' gaca nu na' ca na' gúquië' Cristo cate' gudë' yödzölió ni.

### *Tu xibá cubi*

<sup>7</sup> Böchi' luzá'ado', ruzúaja' queëli' lu guichi xibá ni. Biti' naca tu xibá cubi, pero xibá gula na', le zóalen libí'ili' dza ni'te. Xibá gula na' naca didza' biyõnili' dza ni'te. <sup>8</sup> Lësca' naca ca ruzúaja' queëli' lu guichi tu xibá cubi, lë na' le nácatë benë' Jesús ca rnna, ate' runli' ca' libí'ili' ca rnna, tu' chiridõdi que le naca chul-la que dul-la', ate' bení' idú chiruzeni'.

<sup>9</sup> Nu rnna: "Zoa' lu bení'", pero biti' rilé'e dxi'a böchi' luzë'e, nu ni ni run le naca chul-la que dul-la'. <sup>10</sup> Nu nadxí'i böchi' luzë'e zoa lu bení', ate' le run ga nu ichixi inigui biti' zóalen nu na'. <sup>11</sup> Le naca chul-la que dul-la' run ga nu biti' rilé'e dxi'a böchi' luzë'e, en ga ridá nu na' ga chul-la. Biti' nõzi ga zeaj, tu' run le naca chul-la na' ga nachul-la naniti nu na'.

<sup>12</sup> Ruzúaja' queëli' lu guichi, zxí'ina'do', tu' chibunít lahuë' Dios dul-la' nabága'li', tu' runë' le guzxí' lu në'ë gunë'. <sup>13</sup> Ruzúaja' queëli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Ruzúaja' queëli' lu guichi, bi'i ra'bán, tu' chibucúl-lali' tu' xihui'.

<sup>14</sup> Chibuzúaja' queëli' lu guichi, zxí'ina'do', tu' núnbë'ëli'-në' Dios Xuz. Chibuzúaja' queëli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Chibuzúaja' queëli' lu guichi, bi'i ra'bán, tu' nácali' bi'i nál-la, en nazí' lu ná'ali' xtídzë'ë Dios, en chibucúl-lali' tu' xihui'.

<sup>15</sup> Biti' idxí'isili' yödzölió ni, en calëga le dë yödzölió ni. Channö zoa nu nadxí'i yödzölió, biti' nadxí'i Dios Xuz. <sup>16</sup> Caní naca, tu' naca le tun bönachi yödzölió ni le cabí rë'ënë' Dios Xuz, pero naca le të'ëni bönachi yödzölió ni.

Tunë' le riyaza ladxi' yöl-la' bönáchisö quégaquië'.

Tunë' le ruá' dö' le ridani guió'j lógaquië'.

Tun ba zxön cuíngaquië' ni'a que le dë quégaquië'.

Caní nácgaca le ruá' dö' tunë'. <sup>17</sup> Huadõdi que yödzölió ni, enca' que le ta'zë ládxi'gaca bönachi, pero nu run ca rë'ënë' Dios sóatica'sö.

### *Nu ru'i didza' idútë li, en nu rizí' yë'*

<sup>18</sup> Zxí'ina'do', chizóaru' dza údxi, en ca na' chibiyõnili' huidë' bõnni' ridá'baguë'ë Cristo, lësca' na'a chigusí lo nacu'ë zían bõnni' ta'dá'baguë'ë Cristo. Que lë ni na' nõziru' chizóaru' dza

údxi. <sup>19</sup> Bila'rúajë' bönni' caní ládjaru', pero biti' guláquië' tuz len rë'u. La'tu' guláquië' tuz len rë'u, ila'cuá'lentica'së' rë'u. Na'a, bila'rúajë' para gaca bë' biti' nácagaquië' yúgu'të' tuz len rë'u.

<sup>20</sup> Na'a, Bö' Lá'ayi nagú'u Nu naca lá'ayi rë'u, chizóalen libí'ili', ate' nöz quézili' yúgu'të. <sup>21</sup> Buzúaja' queëli' lu guichi, tu' chinözili' le naca idútë li, en calëga tu' cabí nözili' le. Nözili' ca' biti' ca' rizí' yë' nu nözi le naca idútë li.

<sup>22</sup> ¿Nuzxi caz na' nu rizí' yë'? ¿Naru' cabí naca nu na' ridá'baga' náquië' Jesús Nu gusöl-lë'ë Dios? Naca nu ni bönni' ridá'baguë'ë Cristo, tu' ridá'baguë'ë náquië' Dios Xuzë' Jesús, en ridá'baguë'ë ca' náquië' Jesús Zxí'inë' Dios. <sup>23</sup> Núti'tës nu ridá'baga' Dios Zxí'ini, biti' ca' zóalenë' Dios Xuz nu na'. Núti'tës nu rnna yálajdo' Jesús náquië' Zxí'inë' Dios, lësca' zóalenë' Dios Xuz nu na'.

<sup>24</sup> Na'a, guli'gü' lataj le biyónili' dza ni'te ugá'analentica'sö libí'ili'. Channö le biyónili' dza ni'te ugá'analentica'sö libí'ili', lësca' libí'ili' ugá'analentica'sili'-në' Dios Zxí'ini, enca' len Dios Xuz. <sup>25</sup> Le guzxi' lu në'ë Dios naca lë ni: Gunnë' gunnë' yöl-la' na'bán idú queëru'.

<sup>26</sup> Chibuzúaja' queëli' lu guichi lë ni ca naca quégaca nupa ta'zì ye'e libí'ili'. <sup>27</sup> Na'a, zóalenë' Dios Bö' Lá'ayi libí'ili'. Cristo gusöl-lë'ë Lë' queëli', ate' Lë' cazë' zóalentica'së' libí'ili'. Que lë ni na' biti' riquínili' nu usedi libí'ili', tu' chizóalen Nu na' libí'ili', en rusedi libí'ili'. Didza' idútë li ru'ë Lë', en biti' rizí' yë'ë. Ca na' chinazédali', guli'sóalentica'së' Cristo.

<sup>28</sup> Na'a, zxi'ina'do', guli'sóalentica'së' Cristo para cate' uluí' lahuë' Lë', gácaru' rugu ladxi', en biti' utuí'iru' sóaru' lahuë' Lë' cate' huödë'. <sup>29</sup> Channö nözili' náquië' Dios tsahui', ral-la' inözili' ca' yúgu'të nupa tun le naca tsahui' nácagaca zxi'inë' Dios.

### 3

#### *Nupa nácagaca zxi'inë' Dios*

<sup>1</sup> Bulí'yú ca nadxí'ide'enë' Dios Xuz rë'u, benë' ga nazí'i laru' zxi'inë' Dios caz. Que lë ni na' bönachi yödzülió ni biti' ca' núnbë'gaca le nácaru', tu' cabí gulúnbe'e Jesús. <sup>2</sup> Böchi' luzá'ado', na'a chinácaru' zxi'inë' Dios, en biti' naca bé'eni le ral-la' gácaru'. Nöziru' cate' uluí' lahuë' Jesús, gácaru' ca náquië' Lë', ate' ilé'eru'-në' catëz náquië' Lë'. <sup>3</sup> Núti'tës nu run löza gaca ca náquië' Jesús, ru'í ladxi' nu na' gaca dxi'a ca na' náquië' Jesús dxi'a.

<sup>4</sup> Núti'tës nu run dul-la' riguitsaj xibá queë' Dios, tu' naca dul-la' le riguitsaj xibá. <sup>5</sup> Nözili' buluí' lahuë' Jesús para bugúë' dul-la' nabágaru', en biti' bi dul-la' runë' Lë'. <sup>6</sup> Núti'tës

nu dzaga Lë' biti' run dul-la'. Núti'tës nu run dul-la' catu caz bilé'e Jesús, en biti' núnbe'e Lë'. <sup>7</sup> Zxí'ina'do', guli'gún chi'i cuinli' para cabí nu si' ye'e libí'ili'. Nu run le naca tsahui', naca tsahui' nu na' ca na' náquië' Jesús tsahui'. <sup>8</sup> Nu rúntica'sö dul-la' nequi que tu' xihui', tu' run dul-la' tu' xihui' dza ni'te. Que lë ni na' budulu'í lahuë' Zxí'inë' Dios, para usunítië' yugu' le nun tu' xihui'.

<sup>9</sup> Núti'tës nu naca zxi'inë' Dios biti' rúntica'sö dul-la', tu' zóaléntica'sö le guzxi' lu në'ë Dios Xuz nu na'. <sup>10</sup> Caní naca bë' nupa nátagaca zxi'inë' Dios, en nupa nátagaca zxi'ini tu' xihui'. Núti'tës nu biti' run le naca tsahui', en biti' nadxi'i böchi' luzë'e biti' nequi queë' Dios.

### *Ral-la' idxí'iru' yugu' böchi'ru' ta'yéajlë'ë Cristo*

<sup>11</sup> Lë ni naca didza' biyónili' dza ni'te, le rnna: Ral-la' idxí'iru' luzá'aru' turu' ia'turu'. <sup>12</sup> Biti' ral-la' gunru' ca na' benë' Caín. Gúquië' Caín que tu' xihui', ate' bëtië'-bi' bi'i böchë'ë. ¿Bizx que bëtië'-bi' bi'i böchë'ë? Bëtië'-bi' tu' gulaca le benë' Caín na' le ruá' dö', pero le benbi' bi'i böchë'ë, gulaca tsahui'.

<sup>13</sup> Böcha'ado', biti' ubánili' channö cabí ta'lé'e bönachi yödzölió ni libí'ili' dxi'a. <sup>14</sup> Nöziru' chigudödiru' lu yöl-la' guti, en chidë yöl-la' na'bán idú queëru' tu' nadxi'iru' yugu' böchi'ru'. Nu biti' nadxi'i böchi' luzë'e, chinati caz nu na'. <sup>15</sup> Núti'tës nu biti' rilé'e dxi'a böchi' luzë'e, naca huëti bönachi nu na', ate' nözili' nu ruti bönachi biti' dë yöl-la' na'bán idú que. <sup>16</sup> Caní núnbe'ëru' yöl-la' nadxi'i le naca idú. Naca ca budödë' Jesús yöl-la' na'bán queë', en gútië' uláz queëru'. Lësca' caní rë'u ral-la' udödiru' yöl-la' na'bán queëru', para gácalenru' yugu' böchi'ru'. <sup>17</sup> Na'a, núti'tës nu dë yöl-la' tsahui' que, lë na' dë yödzölió ni, ate' rilé'e böchi' luzë'e, bi riyadzaj queë', en biti' ruhuëchi' ladxí' lë', bi unödzej queë', ¿naru' nadxi'itsö nu na' Dios? <sup>18</sup> Libí'ili', zxi'ina'do', ral-la' idxí'iru' luzá'aru', calëga len dídza'sö o lu yöl-la' rinnësö queëru', pero idú ladxí'ru', enca' len idütë yöl-la' run queëru' ral-la' idxí'iru' luzá'aru'.

### *Le runru' löza lahuë' Dios*

<sup>19-20</sup> Channö caní nadxi'iru' yugu' böchi' luzá'aru', nöziru' néquiru' que Nu na' naca idütë li, ate' lahuë' Dios huáca cö' dxi icja ladxí'do'oru' channö ruxösa ladxí'do'oru' rë'u, tu' rácada'arë' Dios ca ladxí'do'oru', ate' Lë' nözinë' yúgu'të. <sup>21</sup> Böchi' luzá'ado', channö cabí ruxösa ladxí'do'oru' rë'u, dë le runru' löza lahuë' Dios <sup>22</sup> tu' nöziru' gunnë' queëru' bítitës bi inábaru' lahuë'. Caní naca, tu' runru' ca rinná bë' xibá queë', en le raza ladxë'ë Lë'. <sup>23</sup> Lë ni naca xibá queë', para tséajlë'ëru'-në' Jesucristo, Zxi'inë' Dios, en idxí'iru' luzá'aru' ca na' chigunná bé'enë' rë'u. <sup>24</sup> Zóalen Dios nu run ca rinná

bë' xibá queë', ate' Dios caz zóalenë' nu na'. Caní nõziru' dzágatica'së' Lë' rë'u, tu' chigusöl-lë'ë Dios Bö' Lá'ayi queëru'.

## 4

### *Le naca bë' zóalenë' Dios Bö' Lá'ayi rë'u*

<sup>1</sup> Böchi' luzá'ado', bití' tséajlë'ëli' nútí'tës bönni' rnnë' zóalenë' Dios Bö' Lá'ayi lë', pero guli'sí' bë' bönni' na', channö zóalenë' Dios Bö' Lá'ayi lë', tu' ta'dë' zían bönni' ta'zí' yë'ë yödzülió ni. Ta'nnë' tu'ë didza' uláz queë' Dios. <sup>2</sup> Caní gúnbë'ëli'-në' nu bönni' zóalenë' Dios Bö' Lá'ayi lë'. Nequi queë' Dios bönni' na' rnnë' yálajdo' ca bidë' Jesucristo, Nu gusöl-lë'ë Dios, rnnë' guca cazë' bönachi. <sup>3</sup> Lësca' caní, bití' nequi queë' Dios nu bönni' bití' rnnë' yalaj lulu ca bidë' Jesucristo, rnnë' bití' guca cazë' bönachi. Bönni' ni néquinë' que nu na' ridá'baga' Cristo, bönni' na' chibiyónili' ral-la' guidë', ate' na'a chiridë' yödzülió ni.

<sup>4</sup> Zxí'ina'do', néquili' queë' Dios, en chibucúl-lali' nupa na' ta'zí' yë', tu' náparö Nu na' zóalen libí'ili' yöl-la' huáca unná bë' ca nu na' ridá yödzülió ni. <sup>5</sup> Légaquië' nácagaquië' bönachi yödzülió. Que lë' ni na' tu'ë didza' que le naca que yödzülió, ate' bönachi yödzülió ni tu'zë' nágagaca légaquië'. <sup>6</sup> Néquiru' rë'u queë' Dios. Nu nunbë' Dios ruzé' nagui rë'u. Nu bití' nequi queë' Dios bití' ruzé' nagui rë'u. Caní núnbë'ëru' nu na' yu'u le Bö' ruí'i didza' le naca idútë' li, enca' nu na' yu'u le tu bö' rizí' yë'.

### *Náljalén Dios yöl-la' nadxí'i*

<sup>7</sup> Böchi' luzá'ado', ral-la' idxí'iru' luzá'aru', tu' náljalén Dios yöl-la' nadxí'i, ate' nútí'tës nu nadxí'i luzë'e náljalén ca' Dios, en núnbe'e Dios. <sup>8</sup> Nu bití' nadxí'i luzë'e, bití' núnbe'e Dios, tu' náljalén Dios yöl-la' nadxí'i. <sup>9</sup> Caní bulu'e lahui Dios ca nadxí'inë' rë'u, gusöl-lë'ë la's dui Zxí'ini cazë' yödzülió ni, para gata' yöl-la' na'bán idú queëru' ni'a queë' Lë'. <sup>10</sup> Caní naca bë' yöl-la' nadxí'i idú, calëga ca nadxí'iru'-në' Dios, pero ca na' Lë' bidxí'inë' rë'u, en gusöl-lë'ë Zxí'ini cazë' para gütie', en caní bugüë' dul-la' nabága'ru'.

<sup>11</sup> Böchi' luzá'ado', channö caní bidxí'ide'enë' Dios rë'u, lësca' rë'u ral-la' idxí'iru' luzá'aru'. <sup>12</sup> Catu caz nu bilé'e Dios, pero channö nadxí'iru' luzá'aru', Dios zóalenë' rë'u, ate' naca bë' nadxí'iru'-në' Dios idú ladxí'ru'. <sup>13</sup> Nõziru' zóalenru'-në' Dios, ate' Lë' zóalenë' rë'u, tu' guchízië' Dios Bö' Lá'ayi rë'u. <sup>14</sup> Netu' bilé'etu' le benë' Dios Xuz, en runtu' ba nalí que. Lë' gusöl-lë'ë Zxí'ini cazë' Nu rusölá bönachi yödzülió. <sup>15</sup> Nu bönni' rnnë' yálajdo' náquië' Jesús Zxí'inë' Dios, Dios zóalen cazë' bönni' na', ate' lë' zóalenë' Dios.

<sup>16</sup> Rë'u ni nõziru', en réajlë'ëru' nadxí'inë' Dios rë'u. Yöl-la' nadxí'i náljalén Dios, ate' nu bönni' nadxí'inë' luzë'ë, zóalenë'

bönni' na' Dios, ate' Dios zóalenë' lë'. <sup>17</sup> Caní run dxin yöl-la' nadxí'i lu icja ládxi'do'oru', run ga bíti'rö rádxiru' dza ichúguië' Dios quégaca bönachi ilátigaca. Ca náquië' Jesús, nácaru' ca' rë'u yödzülió ni. <sup>18</sup> Channö nadxí'iru'-në' Dios, biti' bi gádxiru'. Cate' nadxí'iru'-në' Dios idú ládxi'ru', runë' ga biti' rádxiru'. Nu radxi, rigu'í rizáca'a. Nu na' radxi, biti' nadxí'i Dios idú ladxi'.

<sup>19</sup> Rë'u ni nadxí'iru'-në' Dios, tu' zí'alö bidxí'i quézinë' Lë' rë'u. <sup>20</sup> Channö nu inná: "Neda' nadxí'ida'-në' Dios", pero biti' rilé'e dxi'a böchi' luzë'e, nu ni rizi' yë'. Nu biti' nadxí'i böchi' luzë'e nu rilé'e caz, ¿nacxi caz gaca idxí'i Dios, en catu caz bilé'e Lë'? <sup>21</sup> Caní gunná bé'enë' Jesús rë'u. Gunnë': Nu nadxí'i Dios, ral-la' idxí'i ca' böchi' luzë'e.

## 5

### *Ca gaca idéli'ru' lu le raca queëru' yödzülió ni*

<sup>1</sup> Núti'tës bönni' réajlë'ë Jesús náquië' Cristo, náquië' zxi'inë' Dios, ate' núti'tës bönni' nadxí'inë' Dios Nu buzóa lë', ral-la' idxí'inë' ca' luzë'ë nu naca bi'i queë' Dios. <sup>2</sup> Caní réquibe'eru' nadxí'iru' yugu' bi'i queë' Dios. Naca caní channö nadxí'iru'-në' Dios, en runru' ca rinná bé'enë' rë'u. <sup>3</sup> Caní naca bë' nadxí'iru'-në' Dios. Naca caní channö runru' ca rinná bé'enë' rë'u, ate' lë na' rinná bé'enë' rë'u biti' naca böniga. <sup>4</sup> Núti'tës bönni' náquië' bi'i queë' Dios ridéli'në' lu le raca yödzülió ni. Chibidéli'ru' lu le raca yödzülió tu' réajlë'ëru'-në' Dios. <sup>5</sup> ¿Nuzxi na' rideli' lu le raca yödzülió? Run caní nu réajlë' náquië' Jesús Zxi'inë' Dios.

### *Dios Bö' Lá'ayi runë' ba nalí queë' Cristo*

<sup>6</sup> Caní blë'ë Jesucristo. Bidë' bidilë' nisa, en bulaljë' xichönë'. Calégasö bidilë' nisa, pero lësca' bulaljë' xichönë'. Dios Bö' Lá'ayi náquië' Nu run ba nalí queë', tu' naca idútë li didza' ru'ë Dios Bö' Lá'ayi. <sup>7</sup> Tsonna nupa tun ba nalí queë' Jesús yehua' yubá ni', Dios Xuz, en Dios Zxi'ini, lë' ca' Didza', en Dios Bö' Lá'ayi. Yonnë' ni nácagaquië' tuz. <sup>8</sup> Lësca' caní, tsonna le tun ba nalí queë' luyú ni, ca na' zóalenë' Dios Bö' Lá'ayi Lë', en le bidilë' Jesús nisa, en rön ni' bulaljë' lë'e yaga cruz, ate' yonna ni, tuz ca ta'nná. <sup>9</sup> Channö si' lu ná'aru' le tun ba nalí bönachi, le runë' ba nalí Dios nácatë'rö lesaca'. Lë na' benë' ba nalí Dios naca le benë' ba nalí queë' Jesús, gunné' náquië' Zxi'ini cazë'. <sup>10</sup> Nu réajlë' Zxi'inë' Dios, nazí' lu në'e le nunë' ba nalí Dios. Nu cabí réajlë' Dios, naca ca rna nu na': Dios rizi' yë'ë. Caní naca, tu' cabí guyéajlë' le benë' ba nalí Dios queë' Zxi'inë'. <sup>11</sup> Lë ni naca le benë' ba nalí Dios. Gunnë' chibennë' yöl-la' na'bán idú queëru', ate' Zxi'inë' na' náquië' Nu nabániru' caní. <sup>12</sup> Nu bönni' zóalenë' Zxi'inë' Dios lë', dë yöl-la' na'bán idú queë'. Nu

bönni' biti' zóalenë' Zxí'inë' Dios læ', biti' dë yöl-la' na'bán idú queë'.

*Ca nõziru' dë yöl-la' na'bán idú queëru'*

<sup>13</sup> Libí'ili' na' réajlë'ëli'-në' Zxí'inë' Dios, ruzúaja' queëli' lu guichi læ ni para inözili' chidë yöl-la' na'bán idú queëli', en para gaca idú ca réajlë'ëli'-në' Zxí'inë' Dios.

<sup>14</sup> Lë ni naca le ruzxöni ládxi'ru' Lë'. Channö bi inábiru' Lë' ca rë'ënë' Lë', Lë' riyönnë' rë'u. <sup>15</sup> Channö nõziru' riyönnë' rë'u ca naca bi rinábiru' Lë', nõziru' ca' ideli' quéziru' læ na' rinábaru'.

<sup>16</sup> Channö ilé'eru' böchi' luzá'aru' runë' dul-la' le cabí nachë' yöl-la' guti, ral-la' inábaru' queë' lahuë' Dios, ate' Lë' unödzjë' yöl-la' na'bán queë'. Caní rnníá': Ral-la' inábali' quégaca nupa tun dul-la' le cabí nachë' yöl-la' guti. Dë dul-la' le nachë' yöl-la' guti. Biti' rnníá' inábali' que nu run dul-la' caní. <sup>17</sup> Yúgu'të le cabí naca tsahui' naca dul-la', pero dë dul-la' le cabí nachë' yöl-la' guti. <sup>18</sup> Nõziru' biti' rúntica'sö dul-la' nu naca zxi'inë' Dios, tu' rapa chi'ë Zxí'ini cazë' Dios nu na', ate' tu' xihui' biti' sequi' bi gun que.

<sup>19</sup> Nõziru' yú'uru' lu në'ë Dios, ate' yúgu'të bönachi tuí'i ládxi'gaca le dë yödzölió ni yú'ugaca lu na' tu' xihui'.

<sup>20</sup> Na'a, nõziru' chibidë' Zxí'inë' Dios, en bennë' yöl-la' réajni'i queëru', para gúnbë'ëru' Nu na' naca idútë li. Zóalenru' Nu na' naca idútë li tu' zóalenru'-në' Jesucristo, Zxí'inë' Dios. Nu ni naca Dios idú, en Nu runna yöl-la' na'bán idú queëru'. <sup>21</sup> Zxí'ina'do', guli'gún chi'i cuinli' para cabí tseaj ládxi'li' yugu' budó' guiöj budó' yaga. ¡Ca' gaca!

## DÍDZA'DO' BUROPI BUZÚAJË' JUAN

*Núnbë'ëru' le naca idútë li, en yöl-la' nadxí'i*

<sup>1</sup> Neda', bönni' gula run chi'a bönachi queë' Cristo, rugapa' li' Dios, nigula rö queë' Dios, tsözxön len yúgu'të zxí'inu'. Nadxí'ida' libí'ili' tu' núnbë'ëru' le naca idútë li, en calëgasö neda', pero lësca' yúgu'të nupa chinúnbë'gaca le naca idútë li ta'dxí'i libí'ili'. <sup>2</sup> Nadxí'itu' libí'ili' tu' núnbë'ëru' le naca idútë li, le zóalenta'sö rë'u. <sup>3</sup> Rinábida'-në' Dios Xuz, en Xanru' Jesucristo, Zxí'ini cazë' Dios, uzá' lãdxë'ë queëli', en huéchi' lãdxë'ë libí'ili', en gunë' ga soa dxi icja lãdxí'do'oli' tu' núnbë'ëli' le naca idútë li, en nadxí'ili' luzá'ali'.

<sup>4</sup> Budzëjade'eda' cate' biyönda' tunbi' zxí'inu' ca naca le naca idútë li, tu' tunbi' ca na' gunná bé'enë' Dios Xuz rë'u. <sup>5</sup> Na'a, ráta'yua' lo', nigúlado', gunu' ca rinná bë' xibá queë' Cristo. Biti' ruzúaja' quiu' lu guichi tu xibá cubi. Ruzúaja' la' lëbisö lë na' gunná bé'enë' rë'u dza ni'te. Gunnë' ral-la' idxí'iru' luzá'aru'. <sup>6</sup> Caní naca bë' nadxí'iru'-në' Dios. Naca caní channö runru' ca rna le gunná bé'enë' rë'u. Lë na' gunná bé'enë' rë'u naca para idxí'iru' luzá'aru' ca na' chibiyönili' dza ni'te.

*Nupa të'ëni ila'zì ye'e rë'u*

<sup>7</sup> Lë ni riguixjöi'ida' libí'ili', tu' chita'dá zían nupa ta'zì ye' yödzölió ni, nupa na' biti' ta'zì lu në'eguequi ca bidë' Jesucristo, gúquië' idú bönachi. Nu na' run caní, naca nu rizì ye', en nu ridá'baga' Cristo. <sup>8</sup> Guli'gún chi'i cuinli' para cabí initi le nadéli'li' tu' guzxí' lu na'li' Cristo, pero guli'güí' lãdxí'li' idéli'li' idútë le ral-la' sí'ili' lu në'ë Dios.

<sup>9</sup> Núti'tës nu riguela' nöza yúbölö, en rucá'ana xtídzë'ë Cristo, biti' zóalenë' Dios nu na'. Nu dá'tica'sö xtídzë'ë Cristo, zóalenë' Dios Xuz, enca' Zxí'inë' nu na'. <sup>10</sup> Channö núti'tës nu za' ga zóali', en rusedi xibá yúbölö, biti' ulëbili' nu na' lídxili', en biti' guiëli' le: "Guyú'u len netu'." <sup>11</sup> Nu rë le: "Guyú'u len netu'", run tsözxön nu na' ca naca le ruá' dö' run nu na'.

*Runë' Juan löza idxinë' ga nacu'ë böchi' luzë'ë*

<sup>12</sup> Sal-la' le zían ral-la' uzúaja' queëli' lu guichi, biti' rë'ënda' uzúaja' yúgu'të lu guichi. Runa' löza guída' ga zóali', ate' güí'iru' didza' ruá'a cuinru', para gaca udzëjaru' idú lãdxí'ru'.

<sup>13</sup> Zxí'ininu nigula zxilu', nigula rö queë' Dios, tu'gápabi' Dios li'. ¡Ca' gaca!

## DÍDZA'DO' BUNNI BUZÚAJĚ' JUAN

### *Le naca tsahui' runě' bönni' lě' Gayo*

<sup>1</sup> Neda', bönni' gula run chi'a bönachi queë' Cristo, rugapa' Dios li', Gayo dxi'i ladxi'. Nadxi'ida' li' tu' núnbë'ëru' le naca idútě li.

<sup>2</sup> Böcha'ado', rinábida'-ně' Dios guně' ga gaca dxi'a quiu' lu yúgu'tě le runu', en su' ca' dxi'a, ca na' raca dxi'a que bö' naca cazu'. <sup>3</sup> Rudzėjada' tu' ta'dxině' yugu' böchi'ru' ga zoa', en tuně' ba nalí quiu', ta'nně' nacu' li ladxi', en runu' ca naca le naca idútě li. <sup>4</sup> Biti' bi dě le runrö ga rudzėjada' ca lě ni, riyönda' tun nupa nácagaca ca bi'i que caza' ca rnna le naca idútě li.

<sup>5</sup> Böcha'ado', runu' le naca tsahui', rácalenu' böchi'ru', en runu' ca' le nácarö lesaca', rácalenu' böchi'ru' biti' núnbe'enu' légaquiě'. <sup>6</sup> Yugu' böchi'ru' ni tuně' ba nalí quiu' lógaca bönachi queë' Cristo ni, ta'guíxjö'ě ca na' nadxi'ínu' légaquiě'. Runu' le naca dxi'a, rugú'u légaquiě' nōza, en rácalenu' légaquiě' ca na' sa'yéaj gunu' quégaca nupa tun xichině' Dios, para ulu'ú'ě nōza. <sup>7</sup> Légaquiě' bila'rúajě' ni tu' nadxi'igaquiě' Jesús, en biti' bi ta'zi'ě lu ná'agaca bönachi biti' ta'dá' Cristo. <sup>8</sup> Que lě ni na' ral-la' gunru' bal bönachi tun caní, para gúnlenru' légaquiě' dxin que le naca idútě li.

### *Le cabí naca tsahui' runě' Diótfrefes*

<sup>9</sup> Chibuzúaja' lu guichi le uzéajni'i bönachi queë' Cristo ni', pero Diótfrefes, bönni' ni' raza ládxe'ě gáquiě' lo ládjagaquiě', biti' runě' netu' bal. <sup>10</sup> Que lě ni na', channö huida' ga zóalí, usá'a ládxi'li' cate' udúbili' ca nácagaca le runě'. Rizí' quídzě'ě netu', en rnně' queëtu' le cabí nácate'. Biti' rizxón ládxe'ě tsa lě nisö, pero lěsca' biti' runě' bal böchi'ru' ta'dxině' ni', ate' ruzáguě'ě xinözguequi nupa ni' tě'eni ilún légaquiě' bal, en rubéajě' nupa na' ladaj bönachi queë' Cristo.

<sup>11</sup> Böcha'ado', biti' gunu' ca tun nupa tua' dö', pero ca tun nupa tun le naca tsahui' gunu'. Nu run le naca tsahui' nequi queë' Dios, pero nu ruá' dö' catu caz benbë' Dios.

### *Le naca tsahui' runě' Demetrio*

<sup>12</sup> Yúgu'tě böchi'ru' tuně' ba nalí queë' Demetrio, ate' naca bě' runě' le naca idútě li. Lěsca' netu' runtu' ba nalí queë', ate' nözili' nácate' lě ni runtu' ba nalí queë'.

### *Le rinabě' Juan lahuě' Dios*

<sup>13</sup> Ziánrö ca' le gú'unida' uzúaja' quiu' lu guichi, pero biti' rě'ěnda' uzúaja' le lu guíchisö. <sup>14</sup> Na'a, runa' löza ilé'eteda' li', ate' gü'iru' didza' ruá'a cuinru'.



<sup>15</sup> Rinábida'-ně' Dios guně' ga soa dxi icja ládxi'do'o. Nupa ni ta'dxí'i rě'u tu'gapa Dios li'. Lěsca' li', bugapa Dios tu tu nupa ni' ta'dxí'i rě'u. ¡Ca' gaca!

## DÍDZA'DO' BUZÚAJĚ' JUDAS

*Judas rugapë' Dios nupa nulidzë' Dios*

<sup>1</sup> Neda', Judas, tsaz naca' huen dxin queë' Jesucristo, en naca' ca' böchë'ë Jacobo. Rugapa' Dios libí'ili', nulidzë' Dios Xuz libí'ili', en nadxí'inë' libí'ili', en rapa chi'ë libí'ili' tu' nácali' tuz len Jesucristo. <sup>2</sup> Rë'ënda' inözili' ca ruhuéchi'da' lãdxë'ë Dios libí'ili', en nadxí'ide'enë' libí'ili', enca' ruzóadë'ë dxi icja lãdxi'do'oli'.

*Nupa tu'sedi le cabí'nacatë'*

<sup>3</sup> Libí'ili', böchi' luzá'ado', gúcada' lãdxa'a uzúaja' queëli' lu guichi ca naca yöl-la' rusölá nadéli'ru', pero run bayudxi uchízia' icja nágalí' para idú lãdxi'li' tíl-lalenli' nupa ta'dá'baga' le réajlë'ëru'-në' Dios, lë na' budödë' Dios tsaz lu ná'agaca nupa néquiguequi quez queë' para ulu'zë didza' que lógaca yúgu'të bönachi. <sup>4</sup> Caní run bayudxi guna' tu' bagáchi'sö chigula'yázalenë' bal-lë' bönni' rë'u, Dios buzóë' quégaquië' dza ni'te ichúguië' quégaquië' ila'nítië' tsaz. Biti' ta'yéaj lãdxi'gaquië' Dios bönni' caní. Tu' zoa le ruzá' lãdxë'ë Dios queëru', téquinë' huáca ilunë' le ruá' dö'. Ta'dá'baguë'ë Xanru' Jesucristo. Tuzë' Lë' rinná bé'enë' rë'u.

<sup>5</sup> Chinöz quézili' lë ni, pero rë'ënda' usá'a lãdxi'li' ca benë' Xanru' Dios. Sal-la' busölë' bönachi Israel cate' bubéajë' léguequi luyú Egipto, gudödi ni' busunítië' nupa bítsa'gaca lãdjaguequi, en bití' gula'yéajlë' Lë'. <sup>6</sup> Lësca' caní, yugu' gubáz lá'ayi queë' Dios, nupa ni' bití' gulún xichíngaquië', pero bulu'cá'anë' xilátjagaquië', Dios busayjë' légaquië' tu lataj chulla. Nága'gaquië' tsaz ni' ga idxinrö dza usiúdxë' Dios yödzölió ni. <sup>7</sup> Lësca' caní guca quégaca yödzö Sodoma, en yödzö Gommorra, enca' yugu' yödzö dzágagaca léguequi. Ca na' gulunë' gubáz lá'ayi na', gula'dá'baguë'ë Dios, lësca' caní gulunë' bönni' yugu' lu yödzö na'. Bulu'dödi cuíngaquië' para gulunë' le ruá' dö', en le gula'zësö lãdxi'gaquië' le tun ga nu rutuí'i. Na'a, tu' busaca' zi'ë Dios légaquië' lu guí' le cabirö ulu, lë na' guca quégaquië' naca tu le run gadxi yúgu'tëru', para cabí gunru' la' lëbisö.

<sup>8</sup> Sal-la' gulaca lë ni, la' canísö tunë' bönni' ni, bönni' röjácalenë' yëla ta'nënë'. Tun dítjanë' idútë le naca cazë'. Ta'dá'baguë'ë le rinná bé'enë' Dios rë'u, en ta'nnë' zi'ë quégaca nupa ta'nná bë' yehua' yubá. <sup>9</sup> Miguel caz, gubáz lá'ayi lo, cate' gudíl-lalenë' tu' xihui' para gaca u'ë idú le naca cazë' Moisés, bití' burúguinë' udxíë' dö' tu' xihui' na', pero gudxë' le: "Xanru' uzenë' li' bach." <sup>10</sup> Yugu' bönni' ni ta'nnë' zi'ë

quégaca le runë' Dios, yugu' le biti' ta'yéajni'inë', ate' yugu' le ta'yéajni'inë' rácasö quégaquië' ca na' tunba' böa' guixi' biti' ta'yéajni'iba', lë ni tu'gunë' dxin, en caní tu'dxia dö' cuíngaquië'.

11 Bica' bayechi' légaquië' tu' chigulunë' dul-la' ca na' benë' Caín, ate' lu yöl-la' ruhuidi' quégaquië' chigula'chixi gula'níguinë' ca na' guchixi guníguinë' Balaam para si'ë dumí, ate' chinarugu quégaquië' ilátië' ca na' gútië' Coré cate' gudá'baguië' Moisés. 12 Yugu' bönni' ni tágulenë' tsözxön libí'ili' cate' ráguli' yugu' gú'i huagu lu yöl-la' nadxí'i queëli'. Tunë' ga ta'chixi ta'nigui nupa dzágagaca libí'ili', tu' t'aj tagu lizë'. Nácagaquië' ca yugu' bönni' ral-la' ulu'gágugaquië'-ba' bö'cu' zxila', pero la' cuíngacasë' tu'gahuë'. Nácagaquië' ca böaj lúzxiba biti' nachë'gaca nisa, ate' ruá' bö' léguequi ná'alö ní'ilo'. Nácagaquië' ca' ca yugu' yaga chibidxín dza bi ila'bía, pero biti' bi ta'bía. Nácagaquië' ca' ca yugu' yaga chigula'bidxi idú luí, en chinaládu'gaca. 13 Nácagaquië' ca' ca nísado' cate' riyasa ridxia, ate' ribö' bidxina' que, lë na' ruluí'i ca naca yöl-la' stu' tunë'. Nácagaquië' ca yugu' bölj lúzxiba nucá'anagacaba' xinözgcaba'. Dios chinunë' quégaquië' ila'yázië' tsaz lataj chul-la.

14 Ca naca quégaquië' bë'ë ca' didza' Enoc uláz queë' Dios. Enoc na' gúquië' tu bönni' gubábalenë' le igadxi cö' xzi'ini xi'sóë' Adán. Gunnë': "Buli'yútsöca', zë'ë Xanru', ate' dzágagaca Lë' zían gayuá' bönachi néquiquequi quez queë'. 15 Zë'ë para gunë' xíguia' yúgu'të bönachi, en ichúguië' quégaca yúgu'të nupa tua' dö' ila'niti tsaz." Caní gunë' tu' nözi yúgu'të didza' zi' gula'nnë' bönni' dul-la' na' queë' Lë'. 16 Yugu' bönni' caní ta'nnë' queë', en ta'zi' quídzë'ë, en tunë' ca naca le ta'zësö ladxí'gaquië'. Tu'ë didza' lu yöl-la' run ba zxön cuíngaquië', en para ulu'zi'ë xibéquequi, tu'ë didza' le ta'gú'u bönachi yöl-la' zxön.

### *Judas rusë'ë ladxí'gaca nupa ta'yéajlë' Cristo*

17 Na'a, böchi' luzá'ado', guli'tsöjné yugu' didza' gulu'ë bönni' gubáz queë' Xanru' Jesucristo dza ni'te. 18 Yugu' bönni' na' gulë' libí'ili': "Yugu' dza tsöjsëtëgaca ulu'luí'i lógaquië' bönni' ulu'titjë' le naca lá'ayi, en ilunë' ca naca le ta'zësö ladxí'gaquië' le ruá' dö'." 19 Yugu' bönni' ni tunë' ga irúajli' chopló. Tu'ë didza' lu yöl-la' bönáchisö quégaquië', en biti' zóalenë' Dios Bö Lá'ayi légaquië'.

20 Na'a, böchi' luzá'ado', guli'sóa tsutsu lu yöl-la' réajlë' queëli' Dios le naca idú lá'ayi. Buli'lidzë' Dios, ugunli' dxin yöl-la' huáca queë' Dios Bö' Lá'ayi. 21 Buli'gá'analenë' Dios, Nu nadxí'i rë'u, en guli'cöza dza ni' ulu'í'lahuë' Xanru' Jesucristo, Nu ruhuéchi' ladxë'ë rë'u para gata' yöl-la' na'bán idú queëru'.

<sup>22</sup> Guli'gún ga ila'dipa ládxi'gaca nupa raca chopa ládxi'gaca.  
<sup>23</sup> Guli'gún ga ulu'lé', le gaca tsca ubéajli' légaquië' lu guí'.  
 Lu yöl-la' radxi queëli' buli'huéchi' ládxi'li' ia'zica'rö bönachi.  
 Guli'gún chi'i cuinli', para cabí gunli' tsözxön légaquië', en cabí  
 gútsa'li' le ruá' dö' tunë'.

*Le rigú'uru' Dios yöl-la' zxön*

<sup>24-25</sup> Dios la's dui, Nu nözi caz yúgu'të, en Nu busölá rë'u ni'a  
 que le benë' Xanru' Jesucristo, napë' yöl-la' huáca gun chi'ë  
 libí'ili', para cabí ichixi iníguili', en usudxinë' libí'ili' lahuë'  
 Lë' ga zoë' lu bení' idú. Gunë' ga gácali' idú tsahui', en ga  
 udzéjade'eli'. ¡Gaca caz queë' Dios yöl-la' ba, en yöl-la' zxön,  
 en yöl-la' naca lo, en yöl-la' unná bë', na'a dza, en yúgu'të dza  
 zá'gaca! ¡Ca' gaca!

## LE BULUÍ'INĒ' DIOS JUAN

### Apocalipsis

*Le bulu'e lahui Dios ca naca queë' Jesucristo*

<sup>1</sup> Lë ni naca le bulu'e lahui Jesucristo, le bë'ë Lë' lataj Dios ulu'ínë' yugu' huen dxin queë' ca naca le run bayudxi ilácatë. Jesucristo gusól-lë'ë tuë' gubáz lá'ayi queë', nu na' buzéajni'i neda', Juan, huen dxin queë' Cristo. Gubáz lá'ayi na' bulu'ínë' neda' ca naca lë ni. <sup>2</sup> Neda', Juan, ruzúaja' lu guichi ni le naca idútë li ca naca yúgu'të le bilé'eda', en runa' ba nalí que xtídzë'ë Dios, en que le benë' ba nalí Jesucristo.

<sup>3</sup> Bica' ba nu ulaba didza' ni, ate' bica' bágaca nupa ulu'zë nágagaca nu na' ulaba xtídzë'ë Dios ni, en ilún ca rnna lë ni nazúaj lu guichi, tu' chizóa gaca.

*Juan ruzúajë' le uzéajni'i gadxi cö' bönachi queë' Cristo*

<sup>4</sup> Neda', Juan, ruzúaja' lu guichi didza' ni le uzéajni'i gadxi cö' bönachi queë' Cristo nacua' luyú Asia. Dios, Bönni' zoa cazë', en guzóatica'së', en ral-la' huödë', rinábida'-në' uzá ládxi'ë queëli', en gunë' ga cö'ö dxi icja ládxi'do'oli', ate' dzágagaca gadxi bö' Lë' nacua' lahuë' Lë' ga ni' rö'ë rinná bë'ë. <sup>5</sup> Dzáguië' ca' Jesucristo Lë'. Jesús ni runë' ca rnnë', en runë' ba nalí queë' Dios. Zí'alö Lë' hubanë' tsaz lu yöl-la' guti, en rinná bé'enë' bönni' ta'nná bë'ë yödzölió ni. Lë' nadxi'inë' rë'u, en gudibë' rë'u, tu' bugüë' dul-la' nabága'ru' len xichönë' le bulaljë' lë'e yaga cruz, cate' gútië' uláz queëru'. <sup>6</sup> Jesucristo benë' ga rinná bë'ëru', en ga nácaru' yugu' bixúz, para cú'uru'-në' Dios, Xuzë' Jesús, yöl-la' ba. ¡Yöl-la' ba Lë', en gácatica'sö queë' yöl-la' unná bë'! ¡Ca' gaca!

<sup>7</sup> ¡Buli'yútsöca'! ¡Zë'ë Cristo lu böaj lúxibal! ¡Ila'lé'e Lë' yúgu'të bönachi, enca' nupa ni' gulún Lë' huë', en bëtigaca Lë'! ¡Ila'bödx yechi' yúgu'të bönachi yödzölió ni cate' ila'lé'e Lë'! ¡La'tu' gátatë caní! ¡Ca' gaca!

<sup>8</sup> Caní rnnë' Lë': "Neda' naca' Bönni' zoë' zí'alö, enca' Bönni' röjsétië' ca naca le risí lo, en le ruúdxitë." Caní rnnë' Xanru', Bönni' napa cazë' yöl-la' huáca. ¡Zoa cazë' Lë', en guzóatica'së', en si' ulë'ë!

*Rilé'enë' Juan yöl-la' zxön queë' Jesucristo*

<sup>9</sup> Neda', Juan, naca' böchi' luzá'ali', en tsözxön riguí'i rizáca'lena' libí'ili', en tsözxön len libí'ili' ruzi'a xibé le rinná bë'ë Dios, en nadéli'da' yöl-la' ribóza zxön ladxi' na' rnnë' Jesucristo queëru'. Nadzuna' tu luyú bidxi ni gatsaj láhui'lö nísado', nazí'i le Patmos. Nadzuna' tu' bena' libán que xtídzë'ë

Dios, en tu' bena' ba nali' queë' Jesucristo. <sup>10</sup> Lu dza lá'ayi queë' Xanru', guzóalenë' Dios Bö' Lá'ayi neda', ate' biyönda' cúdzu'la' chi'ë tu bönni' rulidzë' zidzaj. Biyön chi'ë ca ribödxilú'zuba' böa' bëdxi. <sup>11</sup> Bönni' ni gudxë' neda': "Neda' naca' Bönni' zoë' zí'alö, en Bönni' röjsétië' ca naca le risí lo, en le ruúdxitë. Buzúaj lu guichi le riyönnu', en rilé'enu', ate' gusölla' le quéguequi gadxi cö' bönachi quia' nacuá' luyú Asia, nupa nacuá':

Lu yödzö Éfeso,  
 lu yödzö Esmirna,  
 lu yödzö Pérgamo,  
 lu yödzö Tiatira,  
 lu yödzö Sardis,  
 lu yödzö Filadelfia,  
 lu yödzö Laodicea."

<sup>12</sup> Buécja' para ilé'eda' Bönni' na' rulidzë' neda'. Cate' buécja', bilé'eda' gadxi le nuá'gaca guí' le néquiguequini oro. <sup>13</sup> Ladaj gadxi le nuá'gaca guí' na' bilé'eda' tu Bönni' rinë'ë ca tu bönni'. Nácuë' tu lari' tunna le ridxín xini'ë, en luchu'ë nasíë' tu le néquini oro. <sup>14</sup> Chiguí'chido'os naca guitsa' icjë' ca naca zxila' o ca riná' bögui', ate' rëpi yösa bení' guiöj lahuë' ca guí'. <sup>15</sup> Rëpi yösa bení' ni'ë ca guié' bronze dxílido', le nudzé'eda' lu guí' ca bo' yalaj. Zidzaj biyön chi'ë ca riyön tu yegu zxön. <sup>16</sup> Lu në'ë ibëla zxóagacaba' gadxi böläj bení', ate' rirúaj didza' ru'ë le naca ca tu guié' tuchi' natuchi' iropa la'a. Rëpi yösa bení' lahuë' ca gubidza cate' rudzá'a.

<sup>17</sup> Cate' bilé'eda' Lë' gudzö'a xini'ë ca tu bönni' nati. Ní'irö Lë' guxóa në'ë neda' len në'ë ibëla, en gudxë' neda': "Biti' gádxinu'. Neda' naca' Bönni' zoë' zí'alö, en röjsétië'. <sup>18</sup> Naca' Nu nabán caz. Gútia', ate' na'a zóaticá'sa' nabana'. Dë lu na'a inná bé'eda' yöl-la' guti, en lataj ga nacuá' nupa nátigaca. <sup>19</sup> Buzúaj lu guichi lë na' chibilé'enu', en le raca na'a, enca' le ral-la' gaca tódi na'a. <sup>20</sup> Lë ni naca le nagachi' ca naca quégacaba' gadxi böläj bení' na' bilé'enu' zxóagacaba' lu na'a ibëla, en ca naca gadxi le nuá'gaca guí' le néquiguequini oro. Gadxi böläj bení' na' sa'yéajgacaba' gadxi gubáz quégaca gadxi cö' bönachi quia', ate' gadxi le nuá'gaca guí' na' sa'yéajgaca gadxi cö' bönachi quia' na'."

## 2

### *Didza' gusöl-lë'ë yödzö Éfeso*

<sup>1</sup> Gunnë' ca' Bönni' na': "Buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Éfeso. Caní uzúaju' lu guichi: Ru'ë didza' Bönni' na' zxóagacaba' gadxi böläj bení' lu në'ë ibëla, en ridë' gatsaj láhui'lö gadxi le nuá'gaca

guí' na' néquiguequini oro. <sup>2</sup> Caní rnnía': Neda' nöz quézida' yugu' le runli', en ca rúnda'ali' dxin. Nözda' ribözali' zxön ladxi', en biti' gaca guá' ilenli' nupa tua' dö'. Nözda' chiguzxi' bë'ëli' nupa ta'nná nácagaca gubáz quia' pero biti' ca' nácagaca, ate' na'a nözili' ta'zí' yé'. <sup>3</sup> Ribözali' zxön ladxi', en chigudí'i guzxáca'li' tu' dá'ali' neda', pero biti' gucuidi' ládxi'li'. <sup>4</sup> Na'a, dë tu le ruzegui libí'ili' didza': Biti'rö nadxí'ili' neda' ca na' bidxi'ili' neda' zí'alö. <sup>5</sup> Que lë ni na', guli'tsöjné ca na' benli' zí'alö, lë na' busanli', ate' na'a, buli'bí'i ládxi'li', en guli'gún ca na' benli' zí'alö. Channö cabí ubí'i ládxi'li', guídatia' queëli', ate' ugúa' le nuá' guí' queëli' xilataj. <sup>6</sup> Na'a, zoa tu le rácalen libí'ili'. Biti' rilé'eli' dxi'a le tunë' bönni' nicolaíta, nupa na' ta'yéaj ládxi'gaca budó' guiöj budó' yaga, en tun le ruá' dö', lë na' lësca' biti' rilé'eda' dxi'a. <sup>7</sup> Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca le ribía yaga da' gatsaj láchui'lö luyú lachi queë' Dios, le gun ga ila'cuá'tica'sö nabán."

#### *Didza' gusöl-lë'ë yödzö Esmirna*

<sup>8</sup> Gunnë' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Esmirna. Caní uzúaju' lu guichi: Ru'ë didza' Bönni' na' zoë' zí'alö, en náquië' ca' Nu röjsete, Bönni' na' gútië', en bubanë' tsaz. <sup>9</sup> Caní rnnía': Neda' nöz quézida' le runli', en ca riguí'i rizáca'li'. Nözda' nácali' yechi', pero le nácate' rilé'eli' yöl-la' tsahui' le naca idú. Nözda' ca' ca ta'nnë' queëli' nupa ni' ta'nná nácagaca bönachi judío, pero biti' ca' nácagaca caní. Nupa ni ta'dá' Satanás, tu' xihui'. <sup>10</sup> Biti' ca' gádxili' le ral-la' quí'i sáca'li'. Tu' xihui' na' gun ga idzunli' bál-lali' libí'ili' lidxi' guié. Caní si' bë' libí'ili', ate' quí'i sáca'li' idú ca chi dza. Guli'tséajlë' neda' ga idxintë dza gátili', ate' neda' gunna' yöl-la' na'bán idú queëli'. <sup>11</sup> Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' didza' yugu' cö' bönachi quia' neda', Cristo, rnnë': Nupa ila'deli' lu le raca yödzölió, biti' bi gun yöl-la' guti' quéguequi, lë na' gaca le buropi luzuí' quégaca nupa ila'cuá'tica'sö lu guí' gabila."

#### *Didza' gusöl-lë'ë yödzö Pérgamo*

<sup>12</sup> Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Pérgamo. Caní uzúaju' lu guichi: Ru'ë didza' Bönni' na' nu'ë guié tuchi' na' natuchi' iropa la'a. <sup>13</sup> Neda' nöz quézida' le runli'. Nözda' ca' zóali' ga ni' rinná bë' Satanás, tu' xihui', pero ni ruzxöni ládxi'li' neda'. Biti' ca' nusanli' ca réajlë'ëli' neda'. Biti' busanli' le yugu' dza ni' cate' gulútië' Antipas, bönni' ni

béntica'sē' ba nalí quia', en gútiē' ga ni' zoa Satanás, tu' xihui'.  
 14 Na'a, dē tu chopa le tu'zegui libí'ili' didza': Nacuá'len libí'ili'  
 bal-la bönachi lu yödzo Pérgamo, nazí' lu nē'eguequi xibá  
 queē' Balaam, bönni' ni' busédinē' Balac benē' ga gula'chixi  
 gula'nigui bönachi Israel, ate' gulahuē'-ba' yugu' böa' bēdxido'  
 gulútigaquiē'-ba' lógaca budó' guiöj budó' yaga, en gulunē' le  
 ruá' dö'. 15 Lēasca' caní nacuá'len libí'ili' nupa ni' nazí' lu  
 nē'eguequi xibá quégaca bönachi nicolaíta, lē na' bití' rilé'eda'  
 neda' dxí'a. 16 Que lē ni na', buli'bí'i ládxi'li' na'a. Channö  
 cabí ubí'i ládxi'li', guídatea' ga zóali', en tíl-lalena' légaquiē' len  
 didza' rirúaj ruá'a, le naca ca tu guiē tuchi'. 17 Nu riyöni ral-  
 la' uzē nagui lē ni rnnē' Dios Bö' Lá'ayi, ru'ilenē' yugu' cö'  
 bönachi quia' neda', Cristo, didza', rnnē': Nupa ila'deli' lu le  
 raca yödzölió, guna' ga ilágugaca yöta maná nagachi'. Unödza'  
 ca' tu guiöj chiguíchido' quégaquiē', ate' lu guiöj na' nazúaj tu la  
 cubi, cuntu nu nunbē' le, pero núpasö na' ila'zí'i le, ilünbē'e la  
 na'."

### *Didza' gusöl-lē'ë yödzo Tiatira*

18 Gunnē' ca': "Lēasca' caní, buzúaj lu guichi didza' ni isöl-  
 lu'u queē' gubáz quia' zóalenē' bönachi quia' lu yödzo Tiatira.  
 Caní uzúaju' lu guichi: Ru'ē didza' Zxí'inē' Dios, Bönni' na' dxía  
 guiöj lahuē' nácagaca ca guí, ate' ni'ē nácagaca ca guiē bronce  
 dxíldo'. 19 Caní rnnē': Neda' nöz quézida' le runli'. Nözda'  
 ca nadxí'ili' neda', en ca réajlē'ëli' neda'. Nözda' ca' ca runli'  
 xichina' lu yöl-la' riböza zxön ladxí' queéli'. Nözda' nácarö idú  
 ca runli' yugu' lē ni ca benli' zí'aló. 20 Nacuá' tu chopa le  
 tu'zegui libí'ili' didza': Ruí'ili'-nu lataj nigula na' lēnu Jezabel,  
 rnnanu ruí'inu didza' uláz queē' Dios, ate' ni'a que le rusédinu  
 rizi' yé'enu bönni' tunē' xichina'. Rusédinu légaquiē' le run ga  
 tunē' le ruá' dö', en tahuē'-ba' böa' bēdxido' ta'gu'ë légacaba'  
 lógaca budó' guiöj budó' yaga. 21 Neda' bē'a-nu lataj ubí'i  
 ládxi'nu, pero bití' rē'ëninu ucá'ananu le ruá' dö' na' runnu.  
 22 Que lē ni na' chú'una'-nu tu le gátí'nu ga na' quí'i sáca'nu  
 lu xihuē'ënu tsözxön len nupa gulún tsözxön len lēnu le ruá'  
 dö'. Caní guna' na'a channö cabí ulu'bí'i ládxi'guequi para  
 cabirö ilún dul-la' na'. 23 Guna' ga ilátibi' zxi'ininu. Caní gaca,  
 iléquibe'e yúgu'tē cö' bönachi quia' ruyúa' le ta'bequi ícjaguequi,  
 en le ta'zá' ládxi'gaca bönachi, ate' ubi'a queéli' tsca naca le  
 runli'. 24 Ia'zica'li' zóali' yödzo Tiatira, núlöli' bití' nazí' lu ná'ali'  
 lē na' rusédinu, en bití' nazédali' lē na' ta'nná bönachi ni' naca  
 le nayéajni'i idú, pero le nácatē naca xtidza' Satanás, tu' xihui',  
 rea' libí'ili': Bití' usubága'a libí'ili' ia'tú le ral-la' gunli'. 25 Na'a,  
 lē na' chinazí' lu ná'ali', guli'gún chi'i ga idxintē dza huöda'.  
 26 Bönni' ni' ila'déli'nē' lu le raca yödzölió, en ilunē' ca rē'ënda'  
 neda' ga údxitē, neda' guna' ga ila'nná bé'enē' bönachi idütē



yödzülió. <sup>27</sup> Ca na' budödë' Xuza' Dios yöl-la' unná bè' lu na'a, neda' ca' guna' ga ila'nná bé'enë' yugu' yödzö, ate' gata' lu ná'agaquië' tu xiyaga guië, ate' ulu'zxuzxjë' bönachi na' ca nu ruzxuzxaj zxiga' yö'öna néquini yu. <sup>28</sup> Gu'a ca' le naca ca bölaj hui sila quégaquië'. <sup>29</sup> Nu riyöni ral-la' uzë nagui lë ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza'."

### 3

#### *Didza' gusöl-lë'ë yödzö Sardis*

<sup>1</sup> Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Sardis. Caní uzúaju' lu guichi: Ru'ë didza' Bönni' na' nacuá'len Lë' gadxi bö' na', ate' zxóagacaba' gadxi bölaj bení' lu në'ë ibëla, rnnë': Neda' nöz quézida' le ruá' dö' runli', en nözda' chinati cázali' sal-la' téquiquequi bönachi zóali' nabanli'. <sup>2</sup> Buli'subán ládxi'li'. Guli'gún tsutsu le nacuá'len libí'ili', le chizóa ilátigaca, tu' réquibe'eda' le runli' biti' naca idú tsahui' lahuë' Dios. <sup>3</sup> Guli'tsöjné' na'a xibá na' biyönili' le guzxi' lu ná'ali'. Guli'gún ca rnna xtídzë'ë Dios, en buli'bí'i ládxi'li'. Channö cabí usubán ládxi'li', guída' ga zóali' tsárido'os ca na' ridxinë' tsárido'os gubán, en biti' inözili' bizxi dza na' guída' ga zóali'. <sup>4</sup> Nacuá'len bal-la bönachi libí'ili' lu yödzö Sardis, nupa biti' nácagaca xihui'. Ila'dalen nupa ni neda', nácugaca lari' chiguíchido'os le ruluí'i nuhuóacagaca idú tsahui', en nácagaca lesaca' gaca caní quéguequi. <sup>5</sup> Nupa ila'deli' lu le raca yödzölió ugácu' léguequi lari' chiguíchido'os, en biti' usúlua' láguequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Si' lu na'a nupa ni lahuë' Xuza' Dios, enca' lógaquië' gubáz lá'ayi queë'. <sup>6</sup> Nu riyöni ral-la' uzë nagui lë ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza'."

#### *Didza' gusöl-lë'ë yödzö Filadelfia*

<sup>7</sup> Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Filadelfia. Caní uzúaju' lu guichi: Ru'ë didza' Bönni' na' náquië' lá'ayi, en ru'ë didza' idútë li, en dë lu në'ë xzí'ini guië queë' David, bönni' gunná bë'ë. Bönni' na' ru'ë didza' risálajë' ga nu riyaza, ate' cuntu nu gaca usayaj le, en rusayjë' ga nu riyaza, ate' cuntu nu gaca isalaj le. <sup>8</sup> Bönni' ni rnnë': Neda' nöz quézida' le runli'. Nözda' nápalí' láti'do'os yöl-la' huáca, pero runli' ca rnna xtídzá'a, en biti' rutuí'ili' rnnali' néquili' quia'. Que lë ni na' nuzóa' loli' tu ga nu tsaz le nayalaj, ate' cuntu nu gaca usayaj le. <sup>9</sup> Buli'yútsöca', ta'dé' bönni' ni' Satanás, tu' xihui', en ta'zí' yë'ë, ta'nnë' nácagaquië' bönachi judío ta'yéaj ládxi'gaca Dios, pero biti' nácagaquië' caní, guna' ga ila'dxinë' loli', en

ulu'zechu zxíbigaquië' xini'ali'. Ní'irö iléquibe'enë' nadxí'ida' libí'ili'. <sup>10</sup> Tu' benli' ca rnna xtídza'a, en gulözali' zxön ladxi', gun chi'a libí'ili' dza na' ila'gu'i ila'zaca' yúgu'të bönachi lu yödzülió ni, lë na' gaca para si' bë' léguequi. <sup>11</sup> ¡Si' guída'! Que lë ni na' guli'gún chi'i le nápalí', para cabí gaca nu gun ga cabí sí'ili' lë na' ral-la' gunna' queéli'. <sup>12</sup> Núlöli' ni' idéla'li' lu le raca yödzülió, neda' guna' ga gácali' tsutsu ca nácagaca ya'zxön, ate' sóali' yudo' ga na' zoë' Dios, en catu caz irúajli' ni'. Udá'a libí'ili' ca lë' Dios quia', enca' ca lë yödzo queë' Dios le naca Jerusalén cubi, le huötaj irúaj yehua' yubá lu në'ë Dios. Lësca' udá'a libí'ili' La' cubi. <sup>13</sup> Nu riyöni ral-la' uzë nagui lë ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza'."

### *Didza' gusöl-lë'ë yödzo Laodicea*

<sup>14</sup> Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Laodicea. Caní uzúaju' lu guichi: Ru'ë didza' Bönni' na' zoë' tsaz, Bönni' runë' ca rnnë', en ru'ë didza' idútë li ca runë' ba nalí, en náquië' ca' Bönni' na' gulén lu në'ë yúgu'të le benë' Dios. <sup>15</sup> Caní rnnë': Neda' nöz quézida' le runli'. Ca runli' naca ca nisa biti' naca ziaga, tu' cabí rucá'anali' tsaz neda', en biti' naca ca nisa zögui', tu' cabí dá'ali' neda' idú ládxi'li'. Dxi'arö gaca la' gácali' ca nisa ziaga o ca nisa zögui'. <sup>16</sup> Na'a, tu' nácali' ca nisa nati yúlasö, en biti' nácali' ca nisa ziaga, en biti' nácali' ca nisa zögui', chú'una' libí'ili' ca run nu ruhuëbi nisa nati yula na'. <sup>17</sup> Libí'ili' rnnali' rilé'eli' yöl-la' tsahui' queéli', en raca dxi'a queéli', en biti' bi riyadzaj queéli', pero biti' réquibe'eli' le nácali'. ¡Bayechi' nácali'! ¡Nácali' xizi'! ¡Nácali' yechi', en lo chul-la, en ridali' xiguídisö! <sup>18</sup> Que lë ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxi'a lu guí', para gata' yöl-la' tsahui' idú queéli'. Ral-la' gá'uli' ca' lari' chiguichi quia' le gáculi' para igachi' yöl-la' xiguídidö queéli' le run ga nu rutufí. Ral-la' gá'uli' ca' quia' le gun ga ulu'huóaca guiöj loli' para gaca ilé'eli' le naca quia'. <sup>19</sup> Neda' ruzeda' bach, en run zi'a yúgu'të nupa nadxí'ida' channö cabí tun le naca dxi'a. Que lë ni na', buli'bí'i ládxi'li', en guli'gún xichina' idú ládxi'li'. <sup>20</sup> Buli'yútsöca', neda' caz zuína' ga nu riyaza, en rulidza'. Channö núti'tës nu yöni chi'a, en isalaj quia', tsázia', en gágulena' nu na', ate' nu na' gágulen neda'. <sup>21</sup> Núlöli' idéli'li' lu le raca yödzülió, neda' guna' ga cö'öli' tsözxön len neda' ga na' rö'a rinná bë'a, ca na' benë' ca' Xuza' quia' neda'. Bidéli'da' neda' lu le guca quia', ate' gurö'lena' Xuza' tsözxön ga na' rö'ë rinná bë'ë. <sup>22</sup> Nu riyöni, ral-la' uzë nagui lë ni rnnë' Dios Bö' Lá'ayi, ru'ilenë' didza' yugu' cö' bönachi quia' neda', Cristo."

## 4

*Yöl-la' ba ta'gu'ë Dios yehua' yubá*

<sup>1</sup> Gudödi gulaca yugu' lë ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chi'ë bönni' na' biyönda' zí'alö, ate' bulidza zidzaj ca ribödxí lúzuba' böa' bëdxí. Chi'i ni bulidza neda', gunná: "Gudá xitsá'alö ni, ate' neda' ulu'ida' li' le run bayudxi ilaca tödi ni."

<sup>2</sup> La' ní'sö guzóalenë' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'ö rinná bë', en bilé'eda' ca' Nu na' rö'ö lataj na'. <sup>3</sup> Rëpi yösa bení' Nu na' rö'ö lataj na', ca na' rëpi yösa bení' guiöj jaspe, en guiöj cornalina, yugu' guiöj nazáca'da'. Idú gásibi'ilö lataj na' zoa biguita' le naca lachi ca naca guiöj esmeralda, le rëpida' yösa bení'. <sup>4</sup> Idú gásibi'ilö lataj na' nacuá' ca' ia'tapa uruá' lataj gapa ta'bö' nupa ta'nná bë', ate' yugu' lataj na' rö'ögaquië' tapa uru'ë bönni' gula, nácugaquië' lari' chiguíchido'os, en dxíagaca ícjagaquië' le néquiguequini oro. <sup>5</sup> Ta'rúaj yösa, en guziú' rinné lu lataj lo ga ni' rö'ö Nu na', ate' bö zxön ru'u. Lahui' lo lataj na' tu'zení' gadxi le ta'gú'u bení', le nácagaca gadxi bö' dzágagaca Dios. <sup>6</sup> Ca dödílö lahui lataj ni dë tu ca naca tu nísado' le rëpi yösa bení' ca guiöj jara.

Nacuá' tapa nupa nabángaca cuiti lataj na', tsölá'a huéaj, ate' zían guiöj lógaca dxíagaca zaca' cúdzi'löguequi, en láhuilöguequi. <sup>7</sup> Tu nu nutsa' ladaj tapa ni nalá' ca nácaba' bëdxí guixi'. Nu na' buropi nalá' ca nácaba' bëdxí, ate' nu na' bunni nalá' lahui ca naca lo bönni', ate' nu budapi nalá' ca nácaba' bisia' ruzuba'. <sup>8</sup> Idápatë nupa ni, nacuá' xopa xíligaca que queëguequi, ate' idá'alöguequi, en lé'elöguequi xíliguequi dxíada'gaca zían guiöj löguequi. Rëla, en te ža bití' ta'cuá' dxisö, ta'nná:

¡Lá'ayi! ¡Lá'ayi! ¡Lá'ayi náquië' Xanru' Dios!

¡Napa cazë' yöl-la' huáca!

¡Guzóa cazë' Lë', en zoa cazë', en chizóa ulë'!

<sup>9</sup> Nupa na' nabángaca ta'gú'u yöl-la' ba Nu na' rö'ö rinná bë', en zóatica'sö nabán. Tun bal Nu na', en të Nu na': "Xclenu'." Bátati'tës tun idapa na' caní, <sup>10</sup> tu'tsaga lógaca tapa uru'ë bönni' gula na' lu yu lahui' lo Nu na', en ta'yéaj ládxi'gaca Nu na' zóatica'sö, en tu'cu'ë le néquiguequini oro dxía ícjagaquië' lahui' lo lataj ga ni' rö'ö rinná bë' Nu na', ta'nnë':

<sup>11</sup> ¡Xantu' Dios, nacu' lesaca'

cú'utu' Li' yöl-la' ba, en guntu' Li' bal,

en gata' quiu' yöl-la' unná bë' tu' benu' yúgu'të le dë!

¡Ca rë'ëni quézinu' nacuá', en gula'sí lo nacuá'!

## 5

*Tu guichi, en Bönni' náquië' Bö'cu' Zxíla'do'*

<sup>1</sup> Ní'irö bilé'eda' tu guichi lu na' ibëla Nu na' rö'ö lataj lo. Guichi na' naca tu guichi nudubi, en dá'gaca didza' l'é'elö, en láhulö. Naguela' guichi na' gadxi le nusáyajgaca le. <sup>2</sup> Bilé'eda'-në' tuë' gubáz lá'ayi lo, ate' bë'ë zidzaj didza', gunnë': "¿Nuzxi naca lesaca' uladzu' le naguéla'gaca guichi ni, en usalaj le?"

<sup>3</sup> Cuntu nu guca usalaj guichi na', en biti' guca nu uyú le, calëga nu zoa yehua' yubá, en calëga nu zoa luyú, en calëga nu zoa zxánilö luyú. <sup>4</sup> Ní'irö gurödxá' tu' cabí bidzöli nu naca lesaca' usalaj guichi na', en biti' bidzöli nu naca lesaca' ulaba le, en cuntu nu naca lesaca' uyú le. <sup>5</sup> Ní'irö tuë' bönni' gula ni' gudxë' neda', gunnë': "Biti' cödxu'. Bönni' na' náquië' ca bëdxi guixi', en nabábalenë' zxí'ini xi'sóë' Judá, en náquië' ca' zxí'ini xi'sóë' David, chibidéli'në' lu yúgu'të le raca, en séqui'në' uládzu'ë le naguéla'gaca guichi ni, en usalajë' le."

<sup>6</sup> Ní'irö bilé'eda'-në' Bönni' náquië' Bö'cu' Zxíla'do', zuínë' lahui' lo lataj lo na' zoa gatsaj láhui'lö nupa na' nabángaca, en gatsaj láhui'lë' ca' yugu' bönni' gula na'. Dxië' huë' ca naca que tu bö'cu' zxila' zoa nu bëti lëba' lahuë' Dios, nacua' gadxi lúzuba', en gadxi guiöj loba', le tu'luí'i ca nácagaca gadxi bö' na' dzágagaca Dios, nasöl-lë'ë léguequi idütë yödzölió. <sup>7</sup> Gudödë' Bönni' náquië' Bö'cu' Zxíla'do', en gudélë'ë guichi na' lu na' ibëla Nu na' rö'ö lataj lo na'. <sup>8</sup> Cate' chigudélë'ë guichi na', bulu'zóa zxibiguequi idapa nupa na' nabángaca, en idapa uru'ë bönni' gula na' lahuë' Bönni' na' náquië' Bö'cu' Zxíla'do'. Tu tuë' bönni' gula na' zöngaquië' le rul-la nazí'i le arpa, en nuá'agaquië' ca' yugu' zxíga'do' néquiquequini oro, yugu' le yúdzugaca yalaj, lë na' ruluí'i yöl-la' rulidza Dios quégaca bönachi queë'. <sup>9</sup> Tul-lë' tu le rul-la yöl-la' ba, le naca cubi, le rnna caní:

Nacu' lesaca' quél'u guichi na',  
 en uládzu'u le naguéla'gaca le,  
 tu' bë'u lataj yugu' bönni' gulútië' Li',  
 ate' len xichönu' böá'uu' bönachi para ilequi queë' Dios,  
 nupa nácagaca bönachi izá'a nacua' idütë yödzölió,  
 bönachi tuí'i yúgu'të didza' yúbölö,  
 en nabábagaca yúgu'të yödzö,  
 en yúgu'të luyú nacua' idütë yödzölió.

<sup>10</sup> Benu' ga nácagaquië' bönni' ta'nná bë'ë  
 en ga nácagaquië' bixúz queë' Dios queëru'.  
 Benu' ga ta'nná bë'ë lu yu yödzölió.

<sup>11</sup> Ní'irö buyúa', en biyönda' chí'igaquië' gubáz lá'ayi zían. Zían gáyu'ë, en gáyu'ë nacu'ë. Nacu'ë idú gásibi'ilö lataj lo na' tsözxón len nupa na' nabángaca, enca' yugu' bönni' gula na'.  
<sup>12</sup> Tu'ë zidzaj didza' yúgu'të', ta'nnë':  
 ¡Bönni' na' náquië' Bö'cu' Zxíla'do' gulútië',

náquië' lesaca' gata' yöl-la' unná bē' lu nē'ë,  
 en yöl-la' tsahui', en yöl-la' réajni'i, en yöl-la' huáca!  
 ¡Náquië' lesaca' gunru'-nē' bal, en tseaj ládxi'ru' Lē',  
 en cú'uru'-nē' yöl-la' ba!

<sup>13</sup> Ní'irō biyōnda' tul-la yúgu'tē le benē' Dios yehua' yubá, en lu yu yōdzölió, en zxánilō luyú, en lu nísado'. Tul-la yúgu'tē le nacué' yugu' lataj na', ta'nná:

¡Yöl-la' ba Nu na' rö'ö lataj lo,  
 enca' Bönni' na' náquië' Bö'cu' Zxíla'do'!

¡Gúntica'siru'-nē' bal  
 en cú'utica'siru'-nē' yöl-la' ba,  
 ate' inná bē'tica'sē' Lē'!

<sup>14</sup> Idápatē nupa na' nabángaca ta'nná: “¡Ca' gaca!”

Ní'irō idapa uru'ë bönni' gula na' bulu'tsaga lógaquië' lu yu, en gula'yéaj ládxi'gaquië' Nu na' zóatica'sö.

## 6

### *Yugu' le naguela' gaca guichi*

<sup>1</sup> Ní'irō bilé'eda'-nē' Bönni' náquië' Bö'cu' Zxíla'do', ate' buládu'ë tu le naguela' guichi na', ate' biyōnda' tu nu nutsa' ladaj idapa na' nabángaca, ate' biyōn chí'i ca guziú' rinnē, gunná: “¡Gudá uyú'!”

<sup>2</sup> Buyúa', en bilé'eda'-ba' tuba' böa' chiguichi, ate' nu na' dxía lēba' zōn tu uxiti' yaga. Gulu'ë lē' tu le néquini oro udxíë' icjē', ate' birúajē' ca tu nu nácatērō lo para idéli'nē' lu gudil-la.

<sup>3</sup> Cate' buládu'ë le buropi le naguela' guichi na', biyōnda' nu buropi na' nabán, ate' gunná: “¡Gudá uyú'!”

<sup>4</sup> Ní'irō birúajba' ia'tuba' böa', nácabá' xiná. Bulu'dödē' lu nē'e nu na' dxía lēba' yöl-la' huáca unná bē' tsōjtúa yöl-la' ribōza dxí'a tsáhui'do' quégaca bōnachi, en gun ga iluti luzé'eguequi. Bulu'nōdzjē' queē' tu guié tuchi' zxōn.

<sup>5</sup> Cate' buládu'ë le bunní le naguela' guichi na', biyōnda' nu bunní na' nabán, ate' gunná: “¡Gudá uyú'!”

Buyúa', en bilé'eda'-ba' tuba' böa' gasaj, ate' nu na' dxía lēba' zōn tu zxigóns. <sup>6</sup> Biyōnda' ruí'i didza' tu chí'i gatsaj láchui'lō tapa na' nabángaca, ate' gunná: “Chopa guié zxoá' xtila len lazaj que tu dza huen dxin tu' gaca gubín, en xopa guié zxoá' cebada len lazaj que tu dza huen dxin, pero bití' gunu' ga yadzaj le naca za, en bití' bi gunu' que xisi uva nal-la.”

<sup>7</sup> Cate' buládu'ë le budapi le naguela' guichi na', biyōnda' ruí'i didza' nu budapi na' nabán, ate' gunná: “¡Gudá uyú'!”

<sup>8</sup> Buyúa', en bilé'eda'-ba' tuba' böa' gulaj, ate' nu na' dxía lēba' nazí'i le Yöl-la' Gutí, ate' zéajlen nu na' nu nazí'i le Lataj Chul-la. Bulu'dödē' lu nē'e nu na' inná be'e gatsaj tu gatsaj bōnachi nacué' yōdzölió para guti léguequi len guié tuchi', en

len yöl-la' ridún, en len yugu' yödzöhué', en len yugu' böa' guixi' sínia' dzö'öba' luyú.

<sup>9</sup> Cate' buládu'ë le guyu' le naguela' guichi na', bilé'eda' zxan bucugu yehua' yubá ni' yugu' bö' gulaca cazé' bönni' ni' gulútié' légaquié' tu' guluné' libán que xtídzé'ë Dios, en tu' guluné' ba nalí queé'. <sup>10</sup> Gulu'i zidzaj didza' yugu' bö' ni, gula'nná: "¡Xantu' Lá'ayi, runu' ca rnno'! ¿Bátaxi caz uchi'a usöröu' queétu', en uzí'i lébu' yugu' bönni' nacu'ë yödzölió tu' gulútié' netu'?"

<sup>11</sup> Bulu'nödzjé' quéguequi yugu' lari' chiguíchido'os ilácué', en gulé' léguequi: "Ral-la' uzí' ládxi'li' ia'tú chí'ido'osö, ga idxinró dza ila'dxín yúgu'té luzá'ali' huen dxin queé' Cristo ni, yugu' bönni' na' ral-la' iluti bönachi légaquié' ca' ca na' bëtigaca libí'ili'."

<sup>12</sup> Cate' buládu'ë le buzxopi le naguela' guichi na', buyúa', en bilé'eda' gudödida' budó' zxu' luyú. Böáca gasaj gubidza, en guca ca tu lari' guitsa' gasaj, ate' böáca beo' xiná ca naca rön. <sup>13</sup> Gula'guínnaj bölaj lúzxiba lu yu, le guca ca raca que yaga higo, cate' ta'guínnaj le ribía cate' rutá le bö' budunu'. <sup>14</sup> Gudödi que lúzxiba, ate' guca que ca raca que tu guichi cate' nu rutubi le. Bulu'tsá' xilátjagaca yúgu'té guí'ado', enca' yúgu'té gapa zoa luyú bidxi lu nísado'. <sup>15</sup> Ní'irö yugu' bönni' ta'nná bë'ë luyú, en yugu' bönni' lo, en yugu' bönni' ta'lé'ené' yöl-la' tsahui', en yugu' bönni' ta'nná bë'ené' bönni' rójáquié' gudil-la, en yugu' bönni' dë lu ná'agaquié', en yúgu'té nupa nadó'ogaca, en yúgu'té nupa bití' nadó'ogaca bulu'cachi' lógaquié' gapa naca zxan bulóaj, en gapa naca lë'e guiöj lu guí'ado'. <sup>16</sup> Gulé' yugu' guí'ado' na', en yugu' lë'e guiöj na': "Guli'dubága' netu', en buli'cachi' netu', para cabí ilé'e Nu na' rö'ö lataj lo ni' netu', en para cabí ideli' yöl-la' rilé queé' Bönni' na' náquié' Bö'cu' Zxíla'do' netu'. <sup>17</sup> Chibidxín dza uluí'i lahui yöl-la' rilé quégaquié', ate' ¿nuzxi caz sequi' guá' ilén le?"

## 7

### *Tu gayuá' yu' tapa-un milë' bönni'*

<sup>1</sup> Gudödi gulaca yugu' lë ni bilé'eda' tapa gubáz lá'ayi zuíguequiné' idapa la'a yödzölió. Tu'zágué'ë xinözgaca idapa bö' recja tsölá'a huéaj luyú, para cabí tsecja bö' luyú yödzölió, en para cabí tsecja lu nísado', en para cabí utá yaga. <sup>2</sup> Bilé'eda' ca' ia'túé' gubáz lá'ayi zë'ë rirúajé' ga rilén gubidza. Nu'ë tu le udé'ë nupa nacagaca queé' Dios ban le gaca bë' léguequi. Bë'ë zidzaj didza', en bulidzé' idapë' gubáz lá'ayi ni' nadödi lu ná'agaquié' yöl-la' huáca unná bë' ilún dítjané' luyú, en nísado'. <sup>3</sup> Gudxë' légaquié': "Bití' gun dítjali' luyú, en nísado', en yugu'

yaga cate' udá'arötu' tu le gaca bē' ra' xigágaquiē' bönni' huen dxin queē' Dios queēru'."

<sup>4</sup> Biyönda' tsca nácagaquiē' bönni' da' légaquiē' lē na' naca bē'. Nácagaquiē' idú tu gayuá' yu' tapa-un milē' ladaj yúgu'tē cō' zxi'ini xi'sóē' Israel. <sup>5</sup> Yugu' bönni' na' da' légaquiē' lē na' naca bē' nácagaquiē':

Chinnu milē' di'a dza queē' Judá.

Chinnu milē' di'a dza queē' Rubén.

Chinnu milē' di'a dza queē' Gad.

<sup>6</sup> Chinnu milē' di'a dza queē' Aser.

Chinnu milē' di'a dza queē' Neftalí.

Chinnu milē' di'a dza queē' Manasés.

<sup>7</sup> Chinnu milē' di'a dza queē' Leví.

Chinnu milē' di'a dza queē' Isacar.

<sup>8</sup> Chinnu milē' di'a dza queē' Zabulón.

Chinnu milē' di'a dza queē' José.

Chinnu milē' di'a dza queē' Benjamín.

*Bönachi guizxi yu nácugaca lari' chiguíchido'os*

<sup>9</sup> Gudödi guca lē ni buyúa', en bilé'egacada' bönachi zían, cuntu nu gaca ulaba léguequi. Nabábagaquiē' yúgu'tē yödzö tu'i didza' yúbölö idútē yödzölió. Zuíguequinē' ca dödilö lahui lataj lo, ga na' rö'ē ca' Bönni' na' náquiē' Bö'cu' Zxíla'do', en nácugaquiē' lari' chiguíchido'os, en zóngaqueiē' zin. <sup>10</sup> Tu'ē zidzaj didza' yúgu'tē', ta'nnē':

¡Yöl-la' rusölá za' lu nē'ē Dios queēru', rö'ē lataj lo ni, en za' ca' lu nē'ē Bönni' na' náquiē' Bö'cu' Zxíla'do'!

<sup>11</sup> Zuíguequinē' yúgu'tē gubáz lá'ayi idú gásibi'ilö lataj lo na', enca' idú gásibi'ilö ga nacu'ē bönni' gula, enca' idú gásibi'ilö ga nacuá' idapa na' nabángaca, ate' tu'tsaga lógaquiē' lu yu ca dödilö lahui lataj lo na', en ta'yéaj ládxi'gaquiē' Dios, <sup>12</sup> ta'nnē':

¡Ca' gaca! ¡Yöl-la' ba Li', Dios queētu'!

¡Napu' yöl-la' zxon, en yöl-la' réajni'i!

¡Rétu' Li': "Xclenu", en runtu' Li' bal!

¡Napu' yöl-la' unná bē', en yöl-la' huáca!

¡Gácatíca'sö caní quiu', Dios queētu'!

¡Ca' gaca!

<sup>13</sup> Ní'irö gunábinē' neda' tuē' bönni' gula na', gunné': "¿Nupxi na' nácugaca lari' chiguíchido'os, en gapxi bönni' légaquiē'?"

<sup>14</sup> Neda' gudxa' lē': "Xan, li' nöz quézinu'."

Lē' gudxē' neda': "Nupa ni gula'gu'i gula'záca'da'. Gula'guibē' lari' nácugaquiē', en bulu'ún léguequi chiguíchido'os len xichönē' Bönni' na' náquiē' Bö'cu' Zxíla'do'. <sup>15</sup> Que lē ni na' nacu'ē ca dödilö lahui lataj lo ga rö'ē rinná bē'ē Dios, en tunē' dxin lahuē' Lē' rēla, en tē dza lu yudo' queē'. Nu na' rö'ö lataj lo ni gun chí'i légaquiē' tu' zóaléntica'sö légaquiē'. <sup>16</sup> Bítirö

ila'dunë', en bítirö ila'bidxë' nisa, en bítirö ila'yéguinë' gubidza, en bítirö iléquinë' xilá <sup>17</sup> tu' uyúë' Bönni' na' náquië' Bö'cu' Zxíla'do' légaquië' ca nu uyú bö'cu' zxila'. Zoë' gatsaj láhui'lö lataj lo na'. Ichë'ë légaquië' gapa ralaj nisa le ruí' yöl-la' na'bán, ate' Dios uzxië' légaquië' nisa ta'bödxë'."

## 8

### *Le igadxi le naguela' guichi*

<sup>1</sup> Cate' buládu'ë le igadxi le naguela' guichi na', gurö'ö dxi yehua' yubá idú gatsaj hora. <sup>2</sup> Ní'irö bilé'egacada'-në' gadxi gubáz lá'ayi na' zuíguequinë' lahuë' Dios, ate' bulu'dödë' lu ná'agaquië' gadxi lúzuba' böa' bëdxi. <sup>3</sup> Ní'irö bidë' ia'túë' gubáz lá'ayi, nu'ë tu zxíga'do' néquini oro, en guzuínë' ra' bucugu yehua' yubá ni'. Gulú'udë'ë yalaj lu në'ë para ugutsë' le len yöl-la' rulidza Dios le gulún yúgu'të bönachi queë' Cristo, en uzégui'ë le lu bucugu na' néquini oro, le zoa lahui lo lataj lo na'. <sup>4</sup> Gurén dzön que yalaj na' zoa lu në'ë gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate' bidxín ga na' rö'ë Dios. <sup>5</sup> Ní'irö gubáz lá'ayi na' bulíë' zxíga'do' na' len bo' yalaj dxía lu bucugu na', ate' gurú'unë' le luyú. Gunnë guziú', ate' bö zidzaj biyön. Guyëpi yösa, en gudödi budó' zxu'.

### *Tu'cödxë' lúzuba' böa' bëdxi*

<sup>6</sup> Ní'irö igádxitë' gubáz lá'ayi na' zöngaquië' gadxi lúzuba' böa' bëdxi na' gula'cu'ë sina' ulu'cödxë' léguequi.

<sup>7</sup> Bucödxë' gubáz lá'ayi zí'alö lúzuba' böa' bëdxi, ate' gurö'ö guiöj bögui' yöla sunna, en guí' nutsí'i rön, ate' bulu'huöxaj luyú. Guyegui tu cö' tsa tu tsonna cö' le dë luyú ni, ate' guyegui ca' tu cö' tsa tu tsonna cö' yaga. Guyegui ca' yúgu'të guixi' ya'a.

<sup>8</sup> Bucödxë' gubáz lá'ayi buropi na' lúzuba' böa' bëdxi, ate' gubixi tu le naca ca tu guí'a zxön régui lu nísado', ate' ia'látido'os ca gatsaj tu gatsaj nísado' na' böáca rön. <sup>9</sup> Guti tu cö' tsa tu tsonna cö' le nabángaca dzö'ö lu nisa zxön na', ate' guca ditaj tu cö' tsa tu tsonna cö' le ta'dödi láhui'lö nisa na'.

<sup>10</sup> Bucödxë' gubáz lá'ayi bunní lúzuba' böa' bëdxi, ate' böxaj tu böläj lúzhiba, le régui ca tu guí' yöri gapa dë nisa yegu, enca' gapa ralaj nisa, ate' guca caní que ia'látido'os ca gatsaj tu gatsaj nisa na' rö'ö luyú. <sup>11</sup> Böläj ni lëba' Ajenjo, le naca tu le silá', ate' böáca silá' ia'látido'os ca gatsaj tu gatsaj nisa gapa na' dë nisa, en guca ca naca le silá' na', ate' gulati bönachi zían ni'a que nisa na' böáca silá'.

<sup>12</sup> Bucödxë' gubáz lá'ayi budapi lúzuba' böa' bëdxi, ate' böáca chul-la ia'látido'os ca gatsaj tu gatsaj gubidza, en lësca' caní guca que beo', ate' böáca chul-la tu cö' tsa tu tsonna cö' böläj. Caní guca, bití' buzení' gubidza ia'látido'os ca gatsaj tu gatsaj



dza, en biti' bulu'zeni' böljaj, en beo' ia'láti'do'os ca gatsaj tu gatsaj rëla.

<sup>13</sup> Ní'irö buyúa', en biyönda' ru'ë zidzaj didza' tuë' gubáz lá'ayi ridödë' gatsaj lähui'lö lúzhiba, en rnnë': "¡Bica' bayechi' libí'ili! ¡Bica' bayechi' libí'ili! ¡Bica' bayechi' libí'ili' zóali' luyú ni cate' ulu'cödxë' ia'tsonnë' gubáz lá'ayi na' lúzuba' böa' bëdxi!"

## 9

<sup>1</sup> Bucödxë' gubáz lá'ayi guyu' lúzuba' böa' bëdxi, ate' bilé'eda' nu naca ca tu böljaj lúzhiba böxaj luyú, ate' bulu'nödzjë' nu na' zxi'ini guié que lataj chul-la. <sup>2</sup> Gusaljë' lataj chul-la na', ate' gurén dzön que lataj chul-la, le guca ca dzön rirúaj ga tu'zégui'ë bulá'do', ate' gula'chul-la gubidza, en lúzhiba ni'a que dzön na'. <sup>3</sup> Lu dzön na' bila'rúajba' böchi'zu, yugu' le gula'zxóasiba' luyú, ate' Dios bë'ë légacaba' lataj iládu'ba' bönachi ca tunba' xöjnö' dzö'öba' luyú. <sup>4</sup> Gunná bé'enë' légacaba' biti' ilún dítjaba' guixi' rö'ö luyú, en biti' ilún dítjaba' yugu' le naca ya'a, en calëga yugu' yaga, pero gácasö iládu'ba' bönachi na' biti' da' lë na' naca bë' nu nequi queë' Dios ra' xigágaquië'. <sup>5</sup> Biti' bë'ë légacaba' lataj ilútiba' légaquië', pero ulu'saca' zí'siba' légaquië' idú ca gayu' beo'. Riláda' ga tádu'ba' ca na' rilá ga rádu'ba' xöjnö'. <sup>6</sup> Yugu' dza na' ilë'ënë' yugu' bönni' iluti cuíngaquië', pero biti' ila'zéqui'në'. Ilë'ëninë' ilátie', pero ucuíta cuini yöl-la' guti.

<sup>7</sup> Nalá'gacaba' böchi'zu na' ca nácagacaba' böa' nácagacaba' le néquiguequini guié, para tsöjácaba' gudil-la. Dxíagaca ícjagacaba' le nácagaca ca tu le néquini oro. Naca lógacaba' ca naca lógaca bönachi. <sup>8</sup> Naca guítsa' ícjagacaba' ca naca guítsa' ícjanu nigula. Nácagaca láyi'gacaba' ca nácagaca láyi'ba' bëdxi guixi'. <sup>9</sup> Nácugaca luchú'ugacaba' le néquini guié. Ta'gú'u bö xiligacaba' ca na' ta'gú'u bö carreta ná'ayöjgacaba' böa' ta'xíti'ba' lu gudil-la. <sup>10</sup> Nácagaca xibángacaba' ca naca xibángacaba' xöjnö', zoa lí'igacaba'. Lu xibángacaba' na' zoa le tu'dí'iniba', para ilunba' zi' bönachi idú ca gayu' beo'. <sup>11</sup> Zoa nu rinná be'e légacaba', nu na' naca gubáz xihui' que lataj chul-la. Gubáz ni nazí'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

<sup>12</sup> Chigudödi tu le rusuniti bönachi, le za' zí'alö, pero zá'gaca ia'chopa le ulu'suniti bönachi.

<sup>13</sup> Bucödxë' gubáz lá'ayi buzxopi lúzuba' böa' bëdxi, ate' biyönda' tu chi'i ruí'i didza' gatsaj lähui'lö tapa le nácagaca ca lúzuba' bëdxi dá'gaca tapa squin bucugu na' néquini oro, le rö' lahuë' Dios. <sup>14</sup> Chi'i ni ruí'ilen didza' gubáz lá'ayi buzxopi na' si' bucödxë' lúzuba' böa' bëdxi, en rnna: "Busedxi idápatë' gubáz xihui' na' nága'gaca ra' yegu Eufrates."

<sup>15</sup> Ní'irö bulu'sedxë' tapa gubáz xihui' na', chinucözë' Dios léguequi para la' ná'asö, le naca dza na', en beo' na', en izi na', para ilútigaca tu cö' tsa tu tsonna cö' bönachi nacuá' yödzölió. <sup>16</sup> Biyönda' tsca nácagaquië' bönni' rójáquië' gudil-la dxíagaquië'-ba' böa', en dzágagaquië' tapa gubáz xihui' na'. Nácagaquië' idú chopa gayuá' mil milë'.

<sup>17</sup> Bilé'egacada'-ba' böa' na' ca tu lu bixín, ate' nupa ta'bía légacaba' nacu luchú'uguequi le naca gui'do'os, en ya'a ca lúzxiba, en gulaj. Nácagaca ícjagacaba' böa' na' ca ícjaba' bëdxi guixi', ate' lu ruá'agacaba' ta'rúaj guí', en dzön, en tu le ruzégui'da', nazí'i le azufre. <sup>18</sup> Yugu' lë na' ta'rúaj ruá'agacaba' bëtigaca tu cö' tsa tu tsonna cö' bönachi nacuá' luyú, lë na' nácagaca guí', en dzön, en lë na' ruzégui'da'. <sup>19</sup> Yugu' le tu'dí'iniba' böa' na' ta'rúaj ruá'agacaba', en dzö'ö lu xibángacaba', tu' nácagaca xibángacaba' ca yugu' bëla zoa ícjagacaba' le tu'dí'iniba'.

<sup>20</sup> Ia'zica'rö bönachi, nupa biti' gulati lu chopa ni tu'suniti, biti' bulu'bí'i ládxi'guequi para cabirö ilúngaca ca na' túngaca, en biti' bulu'sán ta'yéaj ládxi'guequi yugu' bö' xihui', en yugu' budó' guiöj budó' yaga, yugu' budó' na' biti' ta'lé'e, en biti' ta'yöni, en biti' gaca sá'gaca. <sup>21</sup> Biti' bulu'bí'i ládxi'guequi para cabirö iluti bönachi, en calëga para cabirö ilúngaca yölla' gudzá' quéguequi, en le ruá' dö' túngaca, en yöl-la' ribán quéguequi.

## 10

### *Gubáz lá'ayi, nuá' lu në'ë tu guíchido'*

<sup>1</sup> Ní'irö bilé'eda'-në' ia'túë' gubáz lá'ayi nál-la, bötjë' birúajë' yehua' yubá, nácuë' böaj lúzxiba, en zoa ca tu biguita' ícjälë'. Rëpi yösa bení' lahuë' ca run gubidza, ate' nácagaca ni'ë ca ya'zxón ta'yegui. <sup>2</sup> Zoa lu në'ë tu guíchido' nayalaj, ate' tu ni'ë ibëla nulibë' lu nísado', en ia'tú ni'ë yögöla nulibë' luyú bidxi. <sup>3</sup> Ní'irö bë'ë zidzaj didza', ate' biyön chi'ë ca riyön cate' ribödxi'aba' bëdxi guixi', en cate' budxi bë'ë zidzaj didza' na', bila'yöni chí'igaca gadxi guziú'. <sup>4</sup> Cate' budxi bila'yöni chí'igaca guziú' na', neda' si' uzúaja' lu guichi, pero biyönda' nu ruí'i didza' yehua' yubá, rë neda': "Bucáchi'sö didza' ni guluí'i gadxi guziú' na'. Biti' uzúaju' didza' na' lu guichi."

<sup>5</sup> Ní'irö gubáz lá'ayi na' bilé'eda'-në' zuínë' lu nísado', en luyú bidxi, guchisa në'ë ibëla zaca' lúzxibalö, <sup>6</sup> ate' ben tsutsu xtídzë'ë ni'a que Nu na' zoa caz, Nu na' ben yehua' yubá, en le nacuá' ni', enca' yödzölió, en le nacuá' ni', enca' nísado', en le nacuá' ni', ate' gunné': "¡Biti'rö tse! <sup>7</sup> Cate' ucödxë' gubáz lá'ayi igadxi lúzuba' böa' bëdxi, usudxinë' Dios le nagachi' queë', lë

na' bulu'ínē' yugu' huen dxin queē', bōnni' ni' gulu'ē didza' uláz queē'."

<sup>8</sup> Ní'irō chi'i na' biyōnda' rirúaj yehua' yubá bē'len neda' didza' leyúbölö. Gunná: "Guyéaj, yöjxí' guíchido' nayalaj na' zōnē' gubáz lá'ayi na' nulibē' lu nísado', en luyú bidxi."

<sup>9</sup> Guyija' ga na' zoē' gubáz lá'ayi na', en gunábida'-nē' gunnē' guíchido' na' quia'. Gubáz lá'ayi na' gudxē' neda', gunnē': "¡Guzxí', gudagu! Lu ru'u gaca zxixi ca naca bidxína'do' queēba' buz, pero lē' u huóaca silá'."

<sup>10</sup> Guzxí'a guíchido' na' zōnē', en gudahua' le. Lu ruá'a guca zxixi ca naca bidxína'do' na', pero cate' budxi gudahua' le, bōaca silá' lē'a. <sup>11</sup> Ní'irō gudxē' neda': "Ral-la' gu'u didza' leyúbölö uláz queē' Dios lógaca zían cō' bōnachi izá'a, en gapa nacua' yúgu'tē yödzō, en gapa tu'i zían didza' yúbölö, en lógaca zían bōnni' unná bē'."

## 11

### *Chopē' bōnni' tunē' ba nalí*

<sup>1</sup> Ní'irō bidxín nu benna tu gui quia' le naca ca tu yaga ribixi, en gudxi neda': "Guyasa, en burixi yudo' queē' Dios. Burixi ca' bucugu lá'ayi que, en bulaba nupa nacua' ni' ta'yéaj láchigaca Dios. <sup>2</sup> Bucá'ana ca' lö'a que yudo' na' dē ní'lö, en biti' urixu' le, tu' nadōdi lu ná'agaca bōnachi izá'a, ate' ulu'libi ulu'léaj yödzō lá'ayi na' idú ca chop-a-un beo'."

<sup>3</sup> Gudxē' ca' neda': "Isól-la'a chopē' bōnni' ilunē' ba nalí quia', ate' ilu'ē didza' uláz quia' idú ca chinnu gayuá' yu' tsónnalalaj dza, nácugaquiē' lari' le naca bōdzázdado'." <sup>4</sup> Chopē' bōnni' ni' tunē' ba nalí, nácagaquiē' chop-a yaga olivo na' nazúaj lu guichi lá'ayi ca naca quégaquiē', en nácagaquiē' ca' chop-a le nuá'gaca guí' na' nacua' lahuē' Dios, Xani yödzölió. <sup>5</sup> Channö guē'eni nu guá' dö' quégaquiē', irúaj guí' ruá'agaquiē' le usuniti nu na' ré'eni guá' dö' quégaquiē', en guti nu na', enca' nupa ta'dá'baga' légaquiē'. <sup>6</sup> Chopē' ni' dē lu ná'agaquiē' ulu'záguē'ē xinōza nisa guiōj lúzxiba, para cabí galaj guiōj tsca dza na' ral-la' ilu'ē didza' uláz queē' Dios, ate' dē lu ná'agaquiē' ca' ilunē' ga huóaca nisa rōn, en ilunē' ga gatsaj yödzöhuē' yödzölió. Ilunē' caní bálati'tēs luzuí ilē'ennē'. <sup>7</sup> Cate' údxi ilunē' ba nalí, irúajba' böa' sínia' lataj chul-la, en tál-lalenba' légaquiē', en ucúl-laba' légaquiē', en gútiba' légaquiē'. <sup>8</sup> Le gulaca cazē' ila'tulusō ca' la' nöza lu yödzō zxōn, ga ni' gudē'ē ca' Xanru' lē'e yaga cruz, en ca rucúdzuru' didza', nazí'i le ca' Sodoma, enca' Egipto. <sup>9</sup> Idú ca tsonna dza yu' gatsaj bōnachi yúgu'tē yödzō, en yúgu'tē bōnachi izá'a, en bōnachi tu'i zían didza' yúbölö, en bōnachi yúgu'tē luyú, ila'lé'eni le gulaca cazē', en biti' ilu' lataj nu ucache' légaquiē' yeru ba. <sup>10</sup> Ulu'dzėjade'e nupa nacua'

yödölió tu' gulatië', ate' lu yöl-la' rudzeja quéguequi ila'sól-la' le ulu'nödzej quégaca luzé'eguequi, tu' bulu'saca' zí'ë chopë' ni gulu'ë didza' uláz queë' Dios bönachi nacuá' yödzölió.

<sup>11</sup> Ní'irö cate' chibizá'a tsonna dza yu' gatsaj na', Dios busubanë' légaquië', ate' gula'yasë' gulazuinë', ate' guladxi gula'dzöbi yúgu'të nupa bila'lé'e légaquië'. <sup>12</sup> Ní'irö bë' zidzaj didza' tu chi'i yehua' yubá, en gudxi légaquië': "Guli'cuén ni."

Gula'benë' lu böaj lúzxiba zaca' yehua' yubálo, ate' nupa na' gula'dá'baga' légaquië' bila'lé'e légaquië'. <sup>13</sup> La' ní'isö gudödida' budó' xzu', ate' biguinnaj tu cö' tsa tu chi cö' yugu' yu'u dzö'ö lu yödzö na', ate' lu budó' xzu' na', gulati tsónnalalaj yu' chi gayuá' bönachi. Guladxi gula'dzöbi nupa ni' nagá'anagaca, ate' gula'gú'u yöl-la' ba Dios zoë' yehua' yubá.

<sup>14</sup> Chigudödi le buropi le rusuniti bönachi, ate' chizóa idxín le bunni le usuniti léguequi.

*Rucödxë' gubáz lá'ayi igadxi lúzuba' böa' bëdxi*

<sup>15</sup> Bucödxë' gubáz lá'ayi igadxi lúzuba' böa' bëdxi, ate' gulu'í' zidzaj didza' yugu' chi'i yehua' yubá, ta'nná:

Gapa ta'nná bë' bönachi yödzölió nadödigaca lu në'ë Xanru' Dios,

en lu në'ë Cristo.

Lë' inná bë'tica'së'.

<sup>16</sup> Ní'irö idapa uru'ë bönni' gula na' rö'ögaquië' gapa na' ta'nná bë'ë lahuë' Dios, bulu'tsaga lógaquië' lu yu, en ta'yéaj ládxi'gaquië' Dios. <sup>17</sup> Ta'nnë':

¡Xantu' Dios, napa cazu' yöl-la' huáca!

¡Guzóa cazu', en zoa cazu', en ral-la' guída cazu'!

¡Xclenu', tu' chibugunu' dxin yöl-la' huáca zxön quiu',

en risí lo' rinná bë'u!

<sup>18</sup> ¡Gula'lé bönachi yugu' yödzö

pero chibidxín dza gunu' léguequi xíguia'!

¡Naca dza uchi'a usöröu' nupa chinátigaca!

¡Ubi'u quégaquië' huen dxin quiu',

yugu' bönni' gulu'ë didza' uláz quiu',

nupa néquiguequi quez quiu', en gulún bal Lo',

nupa nácgaca cá'asö, en nupa nácgaca lo!

¡Chibidxín dza usunítu' nupa bulu'suniti yödölió!

<sup>19</sup> Ní'irö gualaj yudo' queë' Dios rö'ö yehua' yubá, ate' bilá lahui guí'ina lá'ayi ga yu'u didza' rucá'ana tsahui' le nunë' Dios. Guyëpi yösa, en gulú'u bö zidzaj, en gunné guziú' luyú. Gudödi budó' xzu', en gurö'ö guiój bögui' yöla sunna.

## 12

*Tunu nigula, en tuba' bëla zxön xitsini'*

<sup>1</sup> Ní'irö bilá' lahui yehua' yubá tu le naca bē'da', buluí'i lonu tu nigula náccunu le naca ca gubidza, en zoa zcan ní'anu beo'. Dxía ícjanu tu le néquini oro ga dxíagacaba' chinnu böljaj bení'. <sup>2</sup> Nigula ni chizóa soa bí'ido' queënu, en ribödxinu tu' rúdia' lé'ënu. Riguí'i rizáca'nu ruzóanu bí'ido' queënu. <sup>3</sup> Ní'irö ia'tú le naca bē' bilá' lahui yehua' yubá. Buluí'i loba' tuba' bëla zxon xitsiní'. Nácaba' xiná guí'is, ate' dxíagaca gadxi ícjaba', en chi lúzuba', ate' dxía tu le néquini oro tu tu ícjaba' na'. <sup>4</sup> Len xibanba' gú'uyöjba' tu cö' tsa tu tsonna cö' böljaj lúzhiba, en gurú'unaba' légacaba' luyú. Guzu'íba' bëla zxon xitsiní' na' lonu nigula na' chizóa sóabi' bí'ido' queënu. Zóaba' sina' gáguba'-bi' bí'ido' queënu na' ca gáljabi' na'. <sup>5</sup> Buzóanu-bi' tubi' bi'i bönni'do' ral-la' inná bé'ebi' yúgu'të yödzö len tu xiyaga guíë. La' bucuítatë'-bi' Dios bí'ido' queënu na', en buchisé'-bi' ga ni' zoa cazë' Lë', rö'ë lataj lo ga na' rinná bë'ë. <sup>6</sup> Buzxúnnajnu nigula na', zéajnu lu lataj cá'asö, ga ni' chinupë'ë Dios lataj queënu. Ulu'gahuë'-nu ni' idú ca chinnu gayuá' yu' tsónnalalaj dza.

<sup>7</sup> Gudödi gulaca lë ni, gúcada' gudil-la yehua' yubá. Gubáz lá'ayi lo lë Miguel, en yugu' gubáz lá'ayi dá'gaquië' lë' gula díllalenë'-ba' bëla zxon xitsiní' na'. Gula'dil-la bëla zxon na', en yugu' gubáz xihui' dá'gaca lëba'<sup>8</sup> pero biti' bila'deli' lu gudil-la na'. Que lë ni na' bítirö bidzöli xilátjagaca yehua' yubá. <sup>9</sup> Caní guca, gula'rú'unë'-ba' bëla zxon xitsiní' na' ní'ilo. Nácaba' bëla na' zóaba' dza ni'te, lëba' tu' xihui'. Gula'rú'unë' tu' xihui' yödzölió, dzágagaca le gubáz xihui' na' dá'gaca le.

<sup>10</sup> Ní'irö biyönda' tu chi'i ruí'i zidzaj didza' yehua' yubá, rnna: "Na'a chibidxín dza nulu'ë lahui yöl-la' rusölá nunë' Dios, en yöl-la' huáca queë', en le rinná bë'ë, enca' le rinná bë'ë Cristo, tu' chigula'rú'unë' ní'ilo nu na' buzegui yugu' böchi' luzá'aru' didza'. Rëla, en të dza buzegui légaquië' didza' lahuë' Dios queëru'. <sup>11</sup> Yugu' böchi' luzá'aru' ni bulu'cul-lë' nu na', tu' bulu'gunë' dxin xichönë' Bönni' na' náquië' Bö'cu' Zxíla'do' queë' Dios, en tu' bulu'gunë' dxin didza' na' gulunë' ba nali queë'. Biti' guluí'i láchí'gaquië' yöl-la' na'bán quégaquië', pero gulatië'. <sup>12</sup> Que lë ni na' gaca yöl-la' rudzeja yehua' yubá. ¡Buli'dzeja libí'ili', zóali' ni'! ¡Bica' bayechi' libí'ili' zóali' yödzölió, en lu nísado', tu' chibötaj tu' xihui', en bidxín ga zóali'! Riléde'e tu' xihui' na' tu' chiréquite'e ia'tú chí'isö dë lataj que."

<sup>13</sup> Cate' gúquite'eba' bëla zxon xitsiní' na' chigula'rú'unë'-ba' luyú, ní'irö yöjsóa régu'ba'-nu nigula na' buzóanu bi'i bönni'do' na' queënu. <sup>14</sup> Ní'irö Dios bë'ë-nu nigula na' chopa xíliba' bisíá' nácagaca zxon para gaca sunu, en icuítanu ga na' zóaba' bëla zxon xitsiní' na', en ídxinnu xilátjanu lu lataj cá'asö. Ní' ulu'gahuë'-nu idú tsonna iz yu' gatsaj. <sup>15</sup> Bëla zxon xitsiní'

na' gúbaba' nisa zile zaca' cúdzu'lönu, le guca ca tu nisa yegu, en gú'uniba' gua'të nigula na'. <sup>16</sup> Ní'irö luyú gúcalen nigula na'. Guyalaj luyú na', en gü'i nisa yegu na' gúbaba' bëla zxön xitsini' na'. <sup>17</sup> Ní'irö bëla zxön xitsini' na' guléde'eba'-nu nigula na', ate' guyéajba' yöjtíl-lalenba' nupa nagá'anagaca queënu di'a dza queënu, nupa na' tun ca rnna le gunná bë'ë Dios, en nazí lu në'eguequi le nunë' Jesucristo ba nali.

## 13

### *Chópaba' böa' s'inia'*

<sup>1</sup> Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' s'inia' dxíagaca gadxi ícjaba', en chi lúzuba'. Dxíagaca lúzuba' chi le néquini oro, ate' láhuigaca ícjaba' da' tu la le naca xihui' le cabí rilé'e Dios dxi'a. <sup>2</sup> Böa' s'inia' na' bilé'eda'-ba' riná'aba' ca nácaba' tu bédxito', nacuá' ní'aba' ca nácagaca ní'aba' oso, ate' ruá'aba' naca ca naca ruá'aba' bédxi guixi'. Bëla zxön xitsini' na' budödiba' lu na'aba' böa' s'inia' ni yöl-la' huáca queëba', enca' xilátjaba' ga rinná bë'ëba', en yöl-la' unná bë' zxön queëba'. <sup>3</sup> Dxía huë' tu ícjaba' böa' s'inia' na', le naca le guti lëba', pero buniti huë' na', ate' bulu'bani yúgu'të bönachi yödzölió, en yöjdá'gaca böa' s'inia' na'. <sup>4</sup> Gula'yéaj ládxi'gaquië'-ba' bëla zxön xitsini' na', tu' budödiba' yöl-la' unná bë' queëba' lu ná'aba' böa' s'inia' na'. Gula'yéaj ládxi'gaquië'-ba' böa' s'inia' na', en gula'nnë': "¿Nuzxi caz naca zxön ca naca zxön böa' s'inia' na', en nuzxi caz sequi' tíl-lalen lëba'?"

<sup>5</sup> Guta' lu ná'aba' böa' s'inia' na' bë'ëba' didza' ba zxön, en didza' xihui' le rinnëba' queë' Dios. Idú ca chop-a-un beo' guta' lu ná'aba' yöl-la' unná bë'. <sup>6</sup> Gusí loba' rinnëba' queë' Dios, en rinnë xihui'ba' que Lë' Dios, en que lataj lá'ayi queë', en quégaca nupa nacuá' yehua' yubá. <sup>7</sup> Guta' lu ná'aba' gudíl-lalenba' nupa néquiguequi quez queë' Dios, en bucúl-laba' légaquië'. Guta' ca' lu ná'aba' gunná bé'eba' yúgu'të bönachi izá'a, bönachi yúgu'të yödzö, en bönachi tu'i yúgu'të didza' yúbölö, en bönachi idútë yödzölió. <sup>8</sup> Yúgu'të bönachi nacuá' yödzölió gula'yéaj ládxi'gaca böa' s'inia' na', nupa na' biti' nazúajgaca láguequi lu guichi que yöl-la' na'bán, guichi na' buzúajë' Bönni' na' náquië' Bö'cu' Zxíla'do' queë' Dios cate' si' guta' yödzölió. Buzóa cazë' Dios gútië' Bönni' na' ni'a quégaca bönachi queë'.

<sup>9</sup> Channö nu riyöni, ral-la' uzë nagui. <sup>10</sup> Nupa nucu'ë Dios idzúngaca, ral-la' idzúngaca, ate' nupa nucu'ë Dios para nu guti léguequi len guié tuchi', len guié tuchi' ilátigaca. Que lé ni na', ral-la' ila'böza zxön ladxi' nupa néquiguequi queë' Dios, en ta'yéajlë' Lë'.

11 Gudödi na' bilé'eda'-ba' ia'tuba' böa' sínia' gurenba' birúajba' lu yu. Dxíagaca chopa lúzuba' ca naca lúzuba' bö'cu' zxila', en ruí'iba' didza' ca na' ruí'iba' didza' bëla zxön xitsini' na'. 12 Dë lu ná'aba' böa' sínia' ni yúgu'të yöl-la' unná bë' queëba' böa' sínia' bidxinba' zí'alö, cate' dzágaba' lëba'. Runba' böa' sínia' buropi ni ga ta'yéaj ládxi'gaca yúgu'të bönachi nacua' yödzülió böa' sínia' zí'alö na', böa' na' buniti huë' le guti lëba'. 13 Böa' buropi na' runba' ca' le nácagaca bë' ga ridxintë runba' ga ruhuöxaj guí' le za' lúzxiba, en ruhuöxaj luyú lógaca yúgu'të bönachi. 14 Rizí' yé'eba' bönachi nacua' yödzülió len le nácagaca bë' dë lu ná'aba' runba' loba' böa' sínia' zí'alö na'. Rinná bë'eba' bönachi nacua' yödzülió ilunë' tu budó' ca nácaba' böa' sínia' na' gúcaba' huë' que guíë' tuchi', ate' nabanba'. 15 Dë lu ná'aba' runba' ga soa ibán budó' na' naca ca nácaba' böa' sínia' zí'alö na', en güi' didza' budó' ni, en gun ga nu guti yúgu'të nupa bití' ila'yéaj ládxi'gaca le. 16 Benba' ga gudá' yúgu'të bönachi tu le naca bë' dá'gaca lëba', nupa nácagaca cá'asö, en nupa nácagaca lo, nupa ta'lé'e yöl-la' tsahui', en nupa nácagaca yechi', nupa bití' nadó'ogaca, en nupa nadó'ogaca. Budá'aba' le lu ná'agaca ibëla o ra' xigágaca bönachi na'. 17 Cuntu nu gaca bi ga'u o bi guti' channö cabí da' nu na' lë na' naca bë', o channö cabí da' nu na' laba' böa' sínia' na', o le nabábaba' nuá'aba'. 18 Na'a riquínnu' yöl-la' réajni'i. Nu napa yöl-la' réajni'i ral-la' ulábatëz tsca le nabábaba' nuá'aba' böa' sínia' na', le naca ca le nababë' tu bönni', ate' le nabábaba' na' naca xopa gayuá' yu' tsónnalalaj yu' xopa.

## 14

### *Le tul-lë' tu gayuá' yu' tapa-un milë' bönni'*

1 Gudödi ni' buyúa', en bilé'eda'-në' Bönni' na' náquië' Bö'cu' Zxíla'do' zuinë' lu guí'ado' nazí'i le Sión. Nacuá'lenë' Lë' tu gayuá' yu' tapa-un milë' bönni', da' ra' xigágaquië' Lë' Bönni' na' náquië' Bö'cu' Zxíla'do', enca' Lë' Xuzë'. 2 Ní'irö biyönda' tu le rigú'u bö yehua' yubá, le rinnë zidzaj ca rinnë tu yegu zxön, en ca rinnë guziú'. Biyönda' le riyön cate' ta'guínnië' lë'e tu le rul-la zë zían du que. 3 Tul-lë' tu le rul-la cubi, nacué' ca dödilö lahui lataj lo ni', enca' ca dödilö lahui ga na' nacua' idapa nupa na' nabángaca len yugu' bönni' gula na'. Cúnturö nu gaca gul-la le rul-la ni, pero légacasë' tu gayuá' yu' tapa-un milë' bönni' ni, bönni' na' böá'uë' Cristo légaquië' ladaj bönachi yödzülió. 4 Nácagaquië' bönni' ni idú ladxi'. Bití' gula'cuá'lenë' nigula, tu' nácagaquië' idú bönni' ra'bán. Söjácalenë' Bönni' na' náquië' Bö'cu' Zxíla'do' gátitës ga sa'yéajë'. Cristo caz böá'uë' légaquië' ládjagaca bönachi, ate' nácagaca nupa bulu'dödi cuíngaquië' zí'alö queë' Dios, enca' queë' Bönni' na' náquië'

Bö'cu' Zxíla'do'. <sup>5</sup> Catu caz gula'zì' yë'ë, ate' cuntu nu gaca bi innë quëgaquië' ga na' nacu'ë ca dödilö lahui lataj lo ga rö'ë Dios.

*Didza' röjuá'gaquië' tsonna gubáz lá'ayi*

<sup>6</sup> Ní'irö bilé'eda' ia'túë' gubáz lá'ayi, ridödë' lu bö'ös lúzxiba, en röju'ë didza' dxi'a zóatica'sö para gunë' libán que lógaca nupa nacuá' yödzölió, bönachi idútë luyú, yúgu'të bönachi izá'a, en bönachi tu'í yúgu'të didza' izá'a, en bönachi yúgu'të yödzö. <sup>7</sup> Ru'ë zidzaj didza', rnnë': "¡Gulí'gádxí Dios, en guli'cu'ë yöl-la' ba tu' chizóa uchi'a usöröë' bönachi! ¡Guli'tséaj ládxi'ë Dios, nunë' lúzxiba, en luyú, en nísado', en gapa ralaj nisa!"

<sup>8</sup> Ia'túë' gubáz lá'ayi söjnéhuë' gubáz lá'ayi ni, en rnnë': "¡Chibudxi que yödzö Babilonia! ¡Chibudxi que yödzö zxön na'! Caní guca que, tu' gulún nupa nacuá' ni' ga gula'zì' lu ná'agaquië' bönni' yúgu'të yödzö ilunë' ca nácagaca le ta'zë ládxi'gaquië' le ruá' dö'."

<sup>9</sup> Ia'túë' gubáz lá'ayi söjnéhuë' gubáz lá'ayi buropi ni, en ru'ë zidzaj didza', rnnë': "¡Channö nu tseaj ladxi'-ba' böa' sínia' na', enca' budó' queéba', en gü'í lataj ta' ra' xigué o lu në'e le naca bë' da' lëba', <sup>10</sup> gunë' Dios nu ni xíguia' lu yöl-la' rilé queë'! ¡Qui'í saca' nu na' lu guí', en lu lë na' ruzégui'da', lógaca gubáz lá'ayi, en lahuë' Bönni' na' náquië' Bö'cu' Zxíla'do'! <sup>11</sup> Cuéntica'sö dzön que guí' ga ni' qui'í saca' nu na'. Rëla, en te dza qui'í saca', ate' catu caz gata' lataj ulu'zì' ládxi'gaca nupa ila'yéaj ládxi'gaca-ba' böa' sínia' na', en budó' queéba'. Biti' ulu'zì' ládxi'gaca nupa ilu'í lataj ta' laba' léguequi. <sup>12</sup> Que lë ni na' nupa na' néquiquequi queë' Dios, en tun ca rnna le gunná bë'ë, en ta'yéajlë' Jesús, ral-la' ila'böza zxön ladxi'."

<sup>13</sup> Ní'irö biyönda' chi'í nu ru'í didza' yehua' yubá, en rë neda': "Buzúaj lu guichi lë ni: ¡Bica' bágaca nupa ilátigaca na'a si lo, nupa na' ta'yéajlë' Xanru'!"

Dios Bö' Lá'ayi rnnë': "¡Ca' gaca! ¡Ulu'zì' ládxi'gaquië' lu dxin gulunë', en ulu'zì'ë xibé ca sa'yéaj le gulunë'!"

*Tu'zi'ë le rulá' luyú*

<sup>14</sup> Ní'irö buyúa', en bilé'eda' tu böaj lúzxiba chiguíchido'os, ate' lu böaj na' rö'ë tu bönni' náquië' ca náquië' Bönni' Guljë' Bönachi, ate' dxía icjë' tu le néquini oro, ate' zönë' tu guíë tuchi' lu në'ë. <sup>15</sup> Birúajë' tuë' gubáz lá'ayi lu yudo' rö'ö yehua' yubá, ate' bë'ë zidzaj didza', en gudxë' Nu na' rö'ö lu böaj na', gunné': "¡Bugún dxin guíë tuchi' quiu', en guchugu xzoa' xtila, tu' chibidxín dza nu uzí' le! ¡Chinabídx do que le dë yödzölió!"

<sup>16</sup> Ní'irö Nu na' rö'ö lu böaj na' bugún dxin guíë tuchi' idútë yödzölió, ate' buzi'ë le rulá' luyú.



17 Ní'irö birúajë' tu gubáz lá'ayi lu yudo' zoa yehua' yubá. Nu'ë ca' tu guié tuchi'. 18 Birúajë' ia'túë' gubáz lá'ayi ra' bucugu ni', dë lu në'ë inná bé'enë' guí, ate' bë'ë zidzaj didza', en bulidzë' gubáz lá'ayi zí'aló na' nu'ë guié tuchi', gunné': "¡Bugún dxin guié tuchi' quiu', en butubi tu'xóa huéaj le ta'bia lubá uva rő'gaca yödzölió, tu' chiná le ta'bia lubá uva!"

19 Ní'irö gubáz lá'ayi ni bugunë' dxin guié tuchi' idütë yödzölió, en butubë' le ta'bia lubá uva rő'gaca luyú, ate' yöjchú'unë' le ta'bia lubá uva na' lu yeru zxön ga izí xisi. Yugu' lë ni rulu'i ca gunë' Dios, gunë' xíguia' bönachi nacua' yödzölió. 20 Bulu'libë' le ta'bia lubá uva na' lu lerui zoa ní'iló ra' yödzö, ate' lu lerui na' birúaj rön, en gurén ga bidxintë ruá'agacaba' böa', en gudödi rön na' idú tsa gaca sá'aru' idú chinu dza.

## 15

*Yugu' gubáz lá'ayi nuá'gaquië' gadxi yödzöhuë'*

1 Bilé'eda' ia'tú le nácada' bë' yehua' yubá, le run ga nu rubani. Bila'rúajë' gadxi gubáz lá'ayi, nuá'agaquië' gadxi yödzöhuë' röjsétegaca, le ugunë' dxin Dios, údxi gunë' xíguia' bönachi yödzölió.

2 Bilé'eda' ca' tu le naca ca tu nísado' le rëpi yösa bení' ca guiöj jara le nutsí'i guí. Nupa na' bulu'xicja lu böa' sínia' na', en lu budó' queéba', en lu laba', zuígaca lu lë na' naca ca tu nísado', en nuá'agaquië' le tul-la, yugu' le bë'ë Dios queégaquië'. 3 Tul-lë' le rul-la na' bil-lë' Moisés, bönni' huen dxin queë' Dios. Naca tu le rul-la queë' Bönni' na' náquië' Bö'cu' Zxíla'do'. Ta'nnë':

¡Li', Xantu' Dios, zxöntërö nacu' Li'!

¡Zxöntërö naca yúgu'të le benu',

le tun ga rubánitu'!

¡Li' rinná bé'enu' yugu' yödzö!

¡Idú dxí'ado', en idú tsahui' naca ca bi runu'!

4 ¿Nuzxi caz cabí gadxi Li', Xantu'?

¿Nuzxi caz cabí cu'u Li' yöl-la' ba?

¡Tuzu' Li' nacu' lá'ayi!

¡Ila'dxín bönachi yúgu'të yödzö,

en ila'yéaj ládxi'guequi Li'

tu' ta'lé'e naca tsahui' yúgu'të le runu'!

5 Gudödi guca lë ni, buyúa', en bilé'eda' guyalaj yudo' yehua' yubá ga ni' dë lataj lá'ayi que le naca bë' zóalenë' Dios bönachi queë'. 6 Bila'rúajë' gadxi gubáz lá'ayi lu lataj lá'ayi na', nuá'agaquië' gadxi yödzöhuë' na'. Nácugaquië' lari' nazáca'da' le rëpi yösa bení', en núga'gaca luchú'ugaquië' le néquiguequini oro. 7 Ní'irö tu nu nutsa' ladaj idapa nupa na' nabángaca, bë' que queégaquië' gadxi gubáz lá'ayi na' gadxi zxíga'do' néquiguequini oro, en yúdzugaca le rulu'i yöl-la' rilé

queë' Dios, Bönni' zoa cazë'. <sup>8</sup> Lu lataj lá'ayi na' bidzá'a dzön, tu' zoa ni' yöl-la' bení', en yöl-la' huáca zxön queë' Dios. Cuntu nu sequi' tsaza lu lataj lá'ayi na' cate' gátsjarö gadxi yödzöhuë' na' nuá'agaquië' gadxi gubáz lá'ayi na'.

## 16

*Yugu' zxíga'do' yúdzugaca le rulu'i yöl-la' rilé queë' Dios*

<sup>1</sup> Ní'irö biyönda' chí'i nu ru'í zidzaj didza' lataj lá'ayi na', en rë gadxi gubáz lá'ayi na', rnna: "¡Guli'tséaj! ¡Guli'tsöjlálaj gadxi zxíga'do' na' lu yödzölió, le yúdzugaca lë na' rulu'i yöl-la' rilé queë' Dios!"

<sup>2</sup> Guyijë' gubáz lá'ayi zí'alö, en yöjlanjë' le yudzu zxíga'do' na' zönë' lu yödzölió. Lë na' yudzu zxíga'do' na' ben ga gutsaj yudzu' ya'a le riláda' idütë le naca caz nupa na' da' léguequi le naca bë' dá'gaca böa' sínia' na', enca' nupa na' ta'yéaj ládxi'gaca budó' queëba'.

<sup>3</sup> Ní'irö guyijë' gubáz lá'ayi buropi, en yöjlanjë' le yudzu zxíga'do' na' zönë' lu nísado', ate' nisa na' böáca rön ca naca rön queë' tu bönni' nati, ate' gulati yúgu'të nupa nabángaca nacua' lu nísado' na'.

<sup>4</sup> Guyijë' gubáz lá'ayi bunni, en yöjlanjë' le yudzu zxíga'do' na' zönë' gapa dë yegu, en gapa ralaj nisa, ate' gapa dë nisa na' bulu'huóaca rön. <sup>5</sup> Ní'irö biyönda' ru'ë didza' gubáz lá'ayi na' dë lu në'ë rinná bé'enë' nisa na', rnnë': "¡Xantu' Dios Lá'ayi! ¡Zoa cazu', en guzóa cazu'! ¡Tshui' nacu' tu' richugu' caní quégaca bönachi <sup>6</sup> tu' bulu'laljë' rön quégaca nupa néquiquequi quez quiu', en quégaca nupa gulu'i didza' uláz quiu'! ¡Na'a, Li' runu' ga ilé'ajë' rön, tu' caní ral-la' gaca quégaquië'!"

<sup>7</sup> Ní'irö biyönda' ru'í didza' tu nu zoa ra' bucugu yehua' yubá ni', rnna: "¡Ca' gaca, Xantu' Dios, napa cazu' yöl-la' unná bë'! ¡Idütë li, en tshui' naca ca richugu' quégaca bönachi!"

<sup>8</sup> Guyijë' gubáz lá'ayi budapi na', en yöjlanjë' le yudzu zxíga'do' na' zönë' lu gubidza, ate' gubidza na', bë'ë Dios le lataj uzégui'da' bönachi len guí' que. <sup>9</sup> Gula'yégui'da' yúgu'të bönachi tu ruzégui'da' gubidza, pero biti' bulu'bí'i ládxi'gaca, en biti' gula'gú'u Dios yöl-la' ba. Gula'nnë' zi' queë' Dios, Bönni' dë lu në'ë inná bé'enë' yugu' lë ni tu'saca' zi' bönachi.

<sup>10</sup> Guyijë' gubáz lá'ayi guyu' na', en yöjlanjë' le yudzu zxíga'do' zönë' lu xilataj böa' sínia' ga na' rinná bë'ëba', ate' gurö'ö chul-la gapa rinná bë'ëba'. Ní'irö, tu' gula'gu'i gula'zaca' bönachi, guláguya'a lúdxigüequi, <sup>11</sup> pero biti' bulu'bí'i ládxi'gaca para cabirö ilúngaca le ruá' dö' tunë'. Gula'nnë' zi' queë' Dios zoë' yehua' yubá tu' ta'gu'i ta'zaca', en tu' dxíagaca yudzu' ya'a na'.

<sup>12</sup> Guyijë' gubáz lá'ayi buzxopi na', en yöjlaljë' le yudzu zxíga'do' na' zönë' lu yegu zxön nazí'i le Eufrates, ate' gubidxi nisa yegu na' para íbá'a nōza ga ila'dōdi nupa ta'nná bē', nupa ila'rúaj zaca' ga rilén gubidza.

<sup>13</sup> Ní'irō bilé'eda' bēla zxön xitsiní' na', en böa' sínia' na', en bönni' ru'ë didza' uláz quégacaba'. Bila'rúaj tsonna bö' xihui' tun ditaj bōnachi lu ruá'agaca nupa na'. Nalá'gaca ca nalá'gacaba' buludzu. <sup>14</sup> Nácagaca yonna bö' ni bö' que tu' xihui', bö' na' tun le nácagaca bē' le ilún ga ulu'bani bōnachi. Yōjaca bö' xihui' na' idú yōdzōlió, en yōjtúbigaca nupa ta'nná bē', para tsójáquië' lu gudil-la na' gaca lu dza zxön queë' Dios, Bönni' napa cazë' yöl-la' unná bē'. <sup>15</sup> Caní rnnë' Dios: "¡Buli'yútsöca! Guída' tsárido'os ca ridxinë' tu bönni' gubán. Bica' ba nu zoa ban ladxi', en run chi'i le nacu nu na', en rúntica'sö dxi'a, para cabí gun bayudxi ta xiguídisö, en para cabí utuí'i nu na' lahui' lógaca bōnachi." <sup>16</sup> Yugu' bö' xihui' na' bulu'tubi yugu' bönni' ta'nná bē'ë, ate' bulu'dubë' tu lataj nazí'i le lu didza' hebreo: Armagedón.

<sup>17</sup> Guyijë' gubáz lá'ayi igadxi na', en yöjlaljë' le yudzu zxíga'do' na' zönë' lu bö'ös, ate' bē' zidzaj didza' tu nu zoa lu lataj lá'ayi zoa yehua' yubá ga dë lataj lo na', rñna: "Chinaca."

<sup>18</sup> Ní'irō guyëpi yōsa, en gur'ōda' bö, en gunné guziú'. Gudōdida' budó' xzu', le gudōdida'rō ca gudōdi tsanni ni nacuá' bōnachi yōdzōlió. <sup>19</sup> Birúaj tsonna cō'öló yōdzö zxön na', ate' gula'guínnaj yōdzö nacuá' yōdzōlió. Yōjnenë' Dios le naca xihui' gulún bōnachi yōdzö zxön na' nazí'i le Babilonia, ate' lu yöl-la' rilé queë' benë' xíguia' nupa nacuá' ni'. <sup>20</sup> Bila'gachi' yugu' luyú bidxi dzö'ö lu nísado', ate' bití'rō gula'lá' yugu' guí'ado'. <sup>21</sup> Böxaj ca' guiöj bögui' yōla sunna, le za' lúzxiba, en yōjsóa ícjagaca bōnachi, ate' nál-li' tu tu guiöj bögui' na' ca tu gayuá' guíë, ate' yúgu'të bōnachi gula'nnë xihui' queë' Dios tu' nözi guiöj bögui' na' tu' bulu'sáca'da' zì'i léguequi.

## 17

### *Dios richúquië' queënu nigula udá dzaga*

<sup>1</sup> Ní'irō bidxinë' tuë' gubáz lá'ayi ga zoa', nababë' gadxi gubáz lá'ayi na' gula'zönë' gadxi zxíga'do' na' néquiguequini oro. Bē'lenë' neda' didza', gunné': "Gudá ni, ate' uluí'ida' li' ca gunë' Dios, gunë'-nu xíguia' nigula udá dzaga na', rō'önu lu nísado' zían. <sup>2</sup> Gula'cua'len lënu nupa ta'nná bē' luyú yōdzōlió, en gulún le ruá' dö', ate' gula'zudxi nupa nacuá' yōdzōlió ni, tu' gulunlen lënu le bití' naca dxi'a."

<sup>3</sup> Dios Bö' Lá'ayi guzóalenë' neda', ate' gubáz lá'ayi na' guchë'ë neda' tu lu lataj cá'asö, ate' bilé'eda'-nu tu nigula ni' dxíanu cúdzu'ba' tuba' böa' sínia', nácaba' xiná guí'ido'os.

Dxíagaca gadxi ícjaba', en chi lúzuba', en dá'gaca ca' lèba' le ta'nné xihui' queé' Dios. <sup>4</sup> Nigula na' dxíanu lèba' nácunu lari' xiná chul-la, en lari' xiná guí'ido'os. Nazí'i biquitaj queènu le néquiguequini oro, en yugu' guió'j nazaca', en yugu' bugá. Lu ná'anu rō'ō tu zxíga'do' néquini oro, en yudzu le nácagaca xihui', en le ruá' dō' runnu. <sup>5</sup> Ra' xigánu dá'gaca ca lènu, le tu'luí'i tu le nagachi', en ta'nná caní: "Yōdzō Babilonia Le Naca Lo", en "Xiná'agacanu Nigula Udá Dzaga", en "Xiná'agaca Le Xihui' Dzō'ō Yōdzōlió." <sup>6</sup> Gúquibe'eda' nazúdxinu nigula na' tu' bennu ga gulaj rōn quégaca nupa néquiguequi queé' Dios, en quégaca nupa na' zoa nu bēti léguequi tu' gulún ba nalí queé' Jesús. Cate' bilé'eda'-nu, bubánide'eda'. <sup>7</sup> Gudxē' gubáz lá'ayi na' neda', gunné': "¿Bizx que rubániu? Uzéajni'ida' li' lē na' nagachi', le ruluí'i ca naca nigula ni, enca' le ruluí'i ca naca bōa' sínia' na' dxíanu-ba', bōa' na' dxíagaca gadxi ícjaba', en chi lúzuba'. <sup>8</sup> Bōa' sínia' na' bilé'enu' guzóaba' zí'alō, pero bití' zóaba' na'a. Bōa' ni chizóa irúajba' lataj chul-la, ate' tséajba' ga nítiba' tsaz. Ulu'bánide'e nupa nacuá' luyú cabí nazúajgaca láguequi lu guichi que yōl-la' na'bán, le buzúajē' Dios dza ni'te quez cate' sí' gata' yōdzōlió. Cate' ila'lé'eni bōa' sínia' na' guzóaba' zí'atēlō, pero bití' zóaba' na'a, ulu'bani tu' nubanba'.

<sup>9</sup> 'Lē ni naca tu le uzéajni'i nu gaca tséajni'i: Gadxi ícjaba' na' tu'luí'i gadxi guí'ado' gapa rō'ōnu nigula na'. <sup>10</sup> Lēscá' caní gadxi ícjaba' na' tu'luí'i gadxē' bōnni' ta'nná bē'ē. Gáyu'ē bōnni' ni chigudōdi quégaquiē'. Tuē' bōnni' ni rinná bē'ē na'a, ate' ia'tué' bití' ridxíninē', pero cate' guidē', inná bē'ē tu chí'ido'osō. <sup>11</sup> Bōa' sínia' na' guzóaba', pero bití' zóaba' na'a, ruluí'i tu bōnni' izxunu', inná bē'ē. Nunē' tsōzxōn bōnni' gadxi na', ate' tōdi ni nítie' tsaz.

<sup>12</sup> 'Chi lúzuba' na' bilé'enu' tu'luí'i chiē' bōnni' ila'nná bē'ē. Bití' ta'zí'ininē' yōl-la' unná bē', pero ila'zí'ē yōl-la' unná bē' tu chí'ido'osō, en ila'nná bē'ē tsōzxōn len bōa' sínia' na'. <sup>13</sup> Chiē' bōnni' ni, lēbisō nácagaquiē', ate' ulu'dōdē' yōl-la' unná bē' quégaquiē', en le nazí' lu ná'agaquiē' lu ná'aba' bōa' sínia' na'. <sup>14</sup> Ila'díl-lalenē' Bōnni' na' náquiē' Bō'cu' Zxíla'do', pero Lē' ucul-lē' légaquiē', tu' náquiē' Xángaca yúgu'tē nupa nácagaca xan, en náquiē' Bōnni' rinná bé'enē' yúgu'tē nupa ta'nná bē'. Nupa nacuá'len Lē', bulidzē' Dios léguequi, en gurōē' léguequi, ate' tsaz dá'gaca Lē'."

<sup>15</sup> Gubáz lá'ayi na' gudxē' ca' neda', gunné': "Yugu' nísado' na' bilé'enu' gapa ni' rō'ōnu nigula udá dzaga na', tu'luí'i bōnachi yugu' yōdzō, en yugu' bōnachi izá'a, en bōnachi tuí'i yugu' didza' yúbölō, en bōnachi yugu' luyú. <sup>16</sup> Chi lúzuba' bōa' sínia' na' bilé'enu', en tu'luí'i chiē' bōnni', bití' ila'lé'enē'-nu nigula udá dzaga na' dxi'a, ate' ulu'cá'anē'-nu cá'asō, en

xiguídisö. Ilahuë' xipéla'nu, en ulu'zégui'ë-nu len guí'. <sup>17</sup> Dios uchízië' icja ládxi'do'gaquië' chië' bönni' na' le gun ga ilunë' ca rë'ëni quézine' Lë', ate' ilácagaquië' tuz, en ulu'dödë' yöl-la' unná bë' quégaquië' lu ná'aba' böa' sínia' na' para gaca ca rnna xtídzë'ë. <sup>18</sup> Nígula na' bilé'enu'-nu rulu'í' yödzö zxön na' rinná be'e nupa ta'nná bë' yödzölió ni."

## 18

### *Riguinnaj yödzö Babilonia*

<sup>1</sup> Gudödi na' bilé'eda'-në' ia'túë' gubáz lá'ayi ruhuötjë' rirúajë' yehua' yubá, en dë lu në'ë yöl-la' unná bë' zxön, ate' guyëpi yösa bení' luyú ni'a que yöl-la' bení' queë' gubáz lá'ayi na'. <sup>2</sup> Bë'ë zidzaj didza' gubáz lá'ayi na', gunnë':

¡Chibiguínnaj! ¡Chibiguínnaj Babilonia, yödzö zxön na'!

¡Chiböáca xilataj tu' xihui', en xilátjagaca bö' xihui' tun ditaj bönachi!

¡Yugu' biguínni xitsiní', en yugu' biguínni xihui' tu'zóaba' xilátajgacaba' ni'!

<sup>3</sup> Caní guca que yödzö na' ni'a que le gulún bönachi nacuá' ni'. Gulunë' ga gulún bönachi yúgu'të yödzö ca nácagaca le ta'zësö ladxi' le ruá' dö'.

Nupa ta'nná bë' luyú yödzölió gulunlen légaquië' le ruá' dö', ate' guta' yöl-la' tsahui' quégaquië' bönni' to'o tuti' nacu'ë yödzölió

tu' guyánda' yugu' le nazaca' gula'zë ladxi' bönachi ni'.

<sup>4</sup> Ní'irö biyönda' ruí' didza' ia'tú nu zoa yehua' yubá, rnna: Guli'rúaj lu yödzö na', libí'ili' néquili' quia' para cabí gunli' dul-la' tsözxön len légaquië', en para cabí quí'í sáca'li' le gaca quégaquië'.

<sup>5</sup> Nayánda' dul-la' nabága'gaquië', en chinayasa nadxín caz lúzxiba, pero Dios röjnenë' le ruá' dö' núngaquië'.

<sup>6</sup> Buli'bí'í quégaquië' ca na' gulunë' queëli'.

Buli'bí'í quégaquië' chopa cö' tsca le gulunë'.

Buli'bí'í quégaquië' chopa cö' tsca le naca xihui' gulunë' queëli'.

<sup>7</sup> Guli'gún ga ila'guí'í ila'záquië', en ila'bödxi yéché'ë tsca guca yöl-la' ba, en yöl-la' zxön gulu'í' cuíngaquië'.

Ta'zá ládxi'gaquië', ta'nnë':

Rö'ötu' ni, rinná bë'ëtu'.

Biti' nácatu' uzëbi, en catu caz cödxí yéchi'tu'.

<sup>8</sup> Que lë ni na', tu dzasö ila'dxín quégaquië' le ila'guí'í ila'záquië',

yöl-la' guti, en yöl-la' ribödxi yechi', en yöl-la' ridún.

Iléguië' lu guí', tu' napa cazë' yöl-la' huáca zxön Xanru' Dios.

Lë cazë' usiúdxë' quégaquië'.

<sup>9</sup> Ní'irö gunné': "Ila'bödxí nupa ta'nná bë' luyú yödzülió, en gulún le ruá' dö' tsözxön len légaquië', en bulu'zí' xibé le nequi quégaquië'. Ila'bödxë', en ila'bödxí yéché'ë cate' ila'lé'enë' dzön que yödzö zxön na' régui. <sup>10</sup> Zi'tu' zí'tu'sö ila'cu'ë tu' iládxinë' ca gaca xíguia' le gaca que yödzö na', ate' ila'nnë': ¡Bica' bayechi' Babilonia, yödzö zxön ni, le gúcada' lo! ¡Tu dzasö guca xíguia' que!"

<sup>11</sup> Ní'irö gunné': "Ila'bödxë' ca' bönni' to'o tuti' nacu'ë yödzülió, en ila'bödxí yéché'ë ni'a que yödzö na' tu' cabirö soa nu ga'u bi ilúti'ë ni'." <sup>12</sup> Cúnturö nu ga'u ni':

Le néquiguequini oro, en plata,  
 en yugu' guió'j zaca', en yugu' bugá,  
 en yugu' lari' nazáca'da', en lari' xiná chul-la,  
 en lari' dxí'ado', en lari' xiná guí'ido'os,  
 en yugu' yaga rilá' zxixi,  
 en le néquiguequini dxita nazáca'da',  
 en le néquiguequini yaga nazáca'da',  
 en le néquiguequini guíë cobre,  
 en le néquiguequini guíë,  
 en le néquiguequini guió'j jara.

<sup>13</sup> Cúnturö nu ga'u ni':

Canel, en yugu' le rilá' zxixi, en yalaj,  
 en le rilá' zxixi que mirra, en que yó'j olíbano,  
 en xisi uva nál-la, en le naca za,  
 en yiözja dxí'ado', en zxa' xtila,  
 en yugu' búrrodo', en yugu' bö'cu' xzila',  
 en yugu' böa', en yugu' carreta,  
 en yugu' bönni' huen dxin, en ia'bal-la bönachi.

<sup>14</sup> Nupa na' to'o tuti' ilë légaquië', ila'nná:

Nadúagaca le guzé ládxi'li'.  
 Chigudödi quégaca yöl-la' tsahui',  
 en le náagaca lachi queéli',  
 ate' bíti'rö idzölili' léguequi.

<sup>15</sup> Ní'irö gunné': "Ila'bödxë' bönni' to'o tuti' na', tu' guta' quégaquië' yöl-la' tsahui' tu' gulúti'ë lu yödzö na', ate' ila'cu'ë zí'tu' zí'tu'sö tu' iládxinë' ca gaca xíguia' le gaca que yödzö na', en ila'bödxí yéché'ë." <sup>16</sup> Ila'nnë':

¡Bica' bayechi' yödzö ni guca zxön!  
 Guca ca tu nigula nágunu lari' nazáca'da',  
 en lari' xiná chul-la, en lari' xiná guí'ido'os,  
 en nazí'i biquitaj queënu le néquiguequini oro  
 en le néquiguequini guió'j zaca', en yugu' bugá.

<sup>17</sup> Tu dzasö guniti yöl-la' tsahui' que yödzö ni.

Ní'irö gunné': "Yúgu'të bönni' xan barco, en nupa nacuá' lé'egaca barco na', en nupa tu'sá' yugu' barco na', en nupa tun dxin lu nísado', ila'cu'ë zí'tu' zí'tu'sö." <sup>18</sup> Cate' ila'lé'enë' dzön que yödzo na' régui, ila'bödxë', en ila'nnë': "¿Bízxilö yödzo guca zxön ca naca yödzo ni?"

<sup>19</sup> Ní'irö gunné':

Ulu'dxié' bëchtö ícjagaquië'.

Ila'bödxë', en ila'bödxí yechë'ë, ila'nnë'.

¡Bica' bayechi' yödzo ni guca zxön!

Yöl-la' tsahui' que yödzo ni ben ga guta' yöl-la' tsahui'

quégaca yúgu'të nupa nácagaca xan barco lu nísado'.

Tu dzasö guniti yödzo ni.

<sup>20</sup> Buli'dzeja ca gaca que yödzo ni, libí'ili' zóali' yehua' yubá,

enca' libí'ili' néquili' queë' Dios,

libí'ili', bönni' gubáz queë',

en libí'ili', bönni' ruí'ili' didza' uláz queë'.

Buli'dzeja, tu' chiguchúguië' Dios que yödzo ni

ni'a que bi gulún queëli' nupa nacuá' lu yödzo ni.

<sup>21</sup> Ní'irö tuë' gubáz lá'ayi nál-la buchisë' tu guiöj zxön le naca ca tu guichi riyëtu, ate' gurú'unë' le lu nísado', gunné':

La' canísö gaca que yödzo Babilonia,

tu' iguínaj yödzo na' guca lo,

ate' bíti'rö nu udzöli le.

<sup>22</sup> Bíti'rö nu yöni lu yödzo na' nupa ta'guínni lë'e le rul-la,

en calëga nupa tu'cödxí gui

en calëga nupa tu'cödxí lúzuba' böa' bëdxí.

Bíti'rö udzöli bönni' huen dxin ni',

en bíti'rö yöni bö rigú'u le rutu ni'.

<sup>23</sup> Bíti'rö uzení' nitú guí' lu yödzo na',

en bití' yöni chi'ë bönni' rutsaga në'ë ni',

en calëga chí'ibi' bi'i nigula rutsaga ná'abi'.

Caní gaca sal-la' nácali' lo, libí'ili' rá'uli', en rúti'li' lu yödzo ni,

en guzxi' yé'eli' bönachi idütë yödzo lió len yöl-la' gudzá' queëli'.

<sup>24</sup> Lu yödzo ni gulaj xichóngaqueië' bönni' gulu'ë didza' uláz queë' Dios,

en xichóngaca nupa néquiquequi queë' Dios,

enca' xichóngaca yúgu'të bönachi yödzo lió,

tu' bëtigaca nupa nacuá' yödzo ni léguequi.

## 19

<sup>1</sup> Gudödi lë ni biyönda' tuí'i zidzaj didza' bönachi zián nacuá' yehua' yubá, ta'nná:

¡Yöl-la' ba Dios! ¡Yöl-la' rusölá runë',

ate' yöl-la' zxön, en yöl-la' unná bë' napë' Dios queëru'!

<sup>2</sup> ¡Naca idütë li, en tsahui' ca rusiúdxë'!

¡Guchúguië' que yödzo na' naca ca tu nigula udá dzaga,

en quégaca bönachi lu yödzö na' ila'niti tsaz!  
 ¡Gulún ditaj bönachi yödzölió tu' nözi le ruá' dö' guluné!  
 ¡Dios buzí' lëbë' légaquië'  
 tu' gulútië' yugu' huen dxin queë'!

<sup>3</sup> Leyúbölö gula'nnë': "¡Yöl-la' ba Dios! ¡Cuéntica'sö dzön ga régui yödzö na'!"

<sup>4</sup> Idapa uru'ë bönni' gula ni' bulu'tsaga lógaquië' lu yu tsözxön len idapa nupa ni' nabángaca, en ta'yéaj ládxi'gaquië' Dios, Bönni' rö'ë lataj lo queë'. Gula'nnë': "¡Ca' gaca! ¡Yöl-la' ba Dios!"

<sup>5</sup> Ní'irö biyönda' ruí'i didza' tu nu zoa lataj lo na', rnna:  
 ¡Guli'cu'ë Dios queëru' yöl-la' ba  
 yúgu'tëli' runli' xichinë', libí'ili' na' rádxili' Lë',  
 nácali' bönachi cá'asö, en bönachi lo!

*Laní que yöl-la' rutsaga na' queë' Bönni' náquië' Bö'cu' Zxíla'do'*

<sup>6</sup> Biyönda' ca' nu ruí'i zidzaj didza', le biyön ca riyön cate' tuí'i didza' bönachi zían, en biyön ca' ca riyön ga ridödi tu yegu zxön, o ca riyön cate' rinnë guziú', ate' rnna:

¡Yöl-la' ba Dios tu' risí lahuë' rinná bë'ë!  
 ¡Napa cazë' yöl-la' huáca!

<sup>7</sup> ¡Ral-la' udzeja ládxi'ru', en uzí'iru' xibë',  
 en cú'uru'-në' yöl-la' ba

tu' chibidxín dza laní que yöl-la' rutsaga na'  
 queë' Bönni' na' náquië' Bö'cu' Zxíla'do'!

¡Si' lu në'ë Cristo nupa néquiguequi queë'!

¡Chinabá'a queëbi' bi'i utsaga ná'alénbi' Lë'!

¡Nácabi' le ruluí'i nupa na' néquiguequi queë'!

<sup>8</sup> ¡Dios ru'ë-bi' lataj gácubi' lari' nazáca'da'  
 le naca idú, en rëpi yösa bení'!

Lari' nazáca'da' na' ruluí'i le naca tsahui' núngaca nupa néquiguequi queë' Dios.

<sup>9</sup> Ní'irö gubáz lá'ayi na' gudxë' neda', gunné': "Buzúaj lu guichi didza' ni: ¡Bica' bágaca nupa na' nulidzë' Dios légaquië' para ila'cu'ë laní que yöl-la' rutsaga na' queë' Bönni' náquië' Bö'cu' Zxíla'do'!"

Gudxë' ca' neda': "¡Yugu' didza' idútë li ni ru'ë didza' Dios cazí!"

<sup>10</sup> Buzóa zxiba' xini'ë gubáz lá'ayi na' para tseaj ládxa'a lë', pero gudxë' neda': "¡Biti' gunu' caní! Neda' ca' naca' huen dxin queë' Dios ca nacu' li', en ca nácagaquië' böchi' luzó'o nazí' lu ná'agaquië' le naca idútë li ca naca queë' Jesús. ¡Guyéaj ládxe'ë Dios!"

Nupa tuí'i didza' uláz queë' Dios, tuí'i didza' le naca idútë li ca naca queë' Jesús.



*Bönni' dxíë'-ba' böa' chiguichi*

<sup>11</sup> Ní'irö bilé'eda' nayałaj lúzxiba, ate' buluí'i loba' tuba' böa' chiguichi, ate' lë' Bönni' dxíë'-ba', Nu Run Ca Rnna, enca' Nu Ruí'i Didza' Le Nácatë. Caní lë' tu' ruchi'a rusöröë' ca naca le naca idútë li, enca' caní tsejë' gudil-la. <sup>12</sup> Rëpi yösa bení guióğ lahuë', le náçagaca ca guí', en dxíagaca icjë' zían le néquiguequini oro. Nazúaj lahuë' tu le lë', le cuntu nu nözi, pero tuzë' Lë' nözinë'. <sup>13</sup> Nácuë' tu lari' në'aj rön, en lë' ca' "Nu Naca Xtídzë'ë Dios." <sup>14</sup> Röjnógaquië' Lë' ni'a në'ë guizxi yu nacu'ë yehua' yubá, dxíagaquië'-ba' böa' chiguichi, en náçugaquië' lari' nazáca'da', le naca chiguíchido'os, en bití' naca bösaj. <sup>15</sup> Rirúaj ru'ë le naca ca tu guië tuchi' le gúninë' zí' bönachi yugu' yödzö. Inná bé'enë' légaquië' len tu xiyaga guië, en gunë' légaquië' xíguia', le gaca quégaquië' ca raca que le ribía lubá uva, zoa nu rulibi léguequi, tu' riléde'enë' Dios, Bönni' napa cazë' yölla' unná bë'. <sup>16</sup> Nazúaj lu lari' nácuë', enca' lu xigatsjë' ca lë', "Bönni' Rinná Bé'enë' Nupa Ta'nná Bë'", enca' "Bönni' Náquië' Xángaca Nupa Náçagaca Xan."

<sup>17</sup> Ní'irö bilé'eda'-në' tuë' gubáz lá'ayi zuínë' lu gubidza, ate' bë'ë zidzaj didza', en gudxë'-ba' böa' ta'daba' lúzxiba, rnnë': "ıGulí'dá, bulí'dubi ga ni gáguli' laní zxön queë' Dios! <sup>18</sup> Gáguli' xipëla'gaca nupa ta'nná bë', en xipëla'gaca nupa ta'nná bë'ë bönni' röjáquië' gudil-la, en xipëla'gaca nupa nál-lagaca, en xipëla'gacaba' böa', en xipëla'gaca nupa ta'bía légacaba', en xipëla'gaca yúgu'të bönachi, nupa bití' nadó'ogaca, en nupa nadó'ogaca, nupa náçagaca cá'asö, en nupa náçagaca lo."

<sup>19</sup> Ní'irö bilé'eda'-ba' böa' sínia' na', enca' yugu' bönni' ta'nná bë'ë yödzölió, en bönni' röjáquië' gudil-la guizxi yu quégaquië', nudúbigaquië' para ilúnlenë' gudil-la Bönni' dxíë'-ba' böa' chiguichi, dzágagaca Lë' ni'a në'ë guizxi yu. <sup>20</sup> Bidzunba' böa' sínia' na', enca' bönni' na' bë'ë didza' uláz queëba', bönni' na' benë' yugu' le nácada' bë' loba', en guzxí' yé'enë' nupa ni' guluí'ılataj nu uzúaj láhuiguequi lë na' naca bë' dá'gaca lëba', en gula'yéaj lądxi'gaca budó' queëba'. Böa' sínia' na', enca' bönni' na' bë'ë didza' uláz queëba', gula'ru'unë' léguequi nabángacasö ca' ga rö'ö guí' zxön le réguilen lë na' ruzégui'da'. <sup>21</sup> Bönni' na' dxíë'-ba' böa' chiguích bëtië' yúgu'të nupa na' gudá'gaca léguequi len guië tuchi' na' rirúaj ru'ë, ate' bulu'huóljaba' yúgu'tëba' böa' na' ta'daba' lúzxiba, tu' guláguba' xipëla'guequi.

**20***Chi gayuá' iz*

<sup>1</sup> Gudöni lë ni bilé'eda' ruhuötjë' tu gubáz lá'ayi, zë'ë yehua' yubá, en zönë' zxi'ini guië que lataj chul-la, ate' nu'ë tu du guië yödx. <sup>2</sup> Guzxönë'-ba' bëla zxön xitsini' na', náçaba' bëla

guzóaba' dza ni'te, bëla na' lëba' Tu' Xihui', enca' Satanás, ate' béguë'ë-ba', en bucá'anë'-ba' caní chi gayuá' iz. <sup>3</sup> Yöjchú'unë'-ba' lataj chul-la, en busayjë' lataj na', ate' budë'ë tu le riguela' le rusayaj lataj na' para cabirö si' yé'eba' bönachi yugu' yödzö ga izá'arö chi gayuá' iz na', ate' tödi ni' ral-la' yédxiba' tu chí'ido'.

<sup>4</sup> Ní'irö bilé'eda' yugu' lataj gapa ta'bö' nupa ta'nná bë', ate' nupa bila'deli' ulu'chi'a ulu'sörö le raca ta'bö' yugu' lataj na'. Bilé'eda' ca' yugu' bö' gulaca caz bönachi bulu'rixë' yénguequi yugu' bönni' bití' nácagaquië' tsahui' tu' gulún ba nali' queë' Jesús, en tu' gulún libán que xtídzë'ë Dios. Yugu' bönachi ni bití' gula'yéaj ládxi'gaca böa' sínia' na', en budó' queëba', en bití' gulu'i lataj nu uzúaj ra' xigáquequi, o lu në'eguequi lë na' naca bë' nu da' lëba'. Bulu'bán nupa ni lu yöl-la' guti, ate' gula'nná bë'len Cristo chi gayuá' iz, <sup>5</sup> pero ia'zica'rö bönachi nátigaca bití' bulu'bán. Cate' izá'arö chi gayuá' iz na' ulu'bán. Yöl-la' rubán lu yöl-la' guti guca ni naca le raca zí'alö. <sup>6</sup> ¡Bica' ba, en bica' lá'ayi nupa ta'deli' yöl-la' rubán na' raca zí'alö! ¡Yöl-la' guti le raca burópilö bití' bi gaca gun quéguequi, pero ilácagaca bixúz queë' Dios, enca' queë' Cristo, ate' ila'nná bë'len Lë' chi gayuá' iz na'!

<sup>7</sup> Cate' izá'a chi gayuá' iz na', ulu'sanë' Satanás ga na' nadzún. <sup>8</sup> Urúaj Satanás, en tsöjzxi' ye'e bönachi yugu' yödzö nacuá' idapa la'a yödzölió. Si' ye'e ca' bönachi yödzö Gog, en yödzö Mago, ate' utubi léguequi lu gudil-la. Tsca nácagaca nupa ni, nácagaca ca naca yuzxi rö'ö tu ra' yegu zxon. <sup>9</sup> Guizxi yusö gula'dödë' idütë luyú, ate' gula'cu'ë lë'ajlö lataj ga na' nacuá' bönachi néquiquequi queë' Cristo, le naca yödzö na' nadxí'inë' Dios. Ní'irö benë' Dios ga böxaj guí' le birúaj yehua' yubá, le buzegui' légaquië'. <sup>10</sup> Tu' xihui' na' nazí' ye'e légaquië', yöjchú'unagaquië' le ga rö'ö guí' zxon que lë na' ruzéguí'da', ga na' chizóaba' böa' sínia' na', enca' bönni' na' bë'ë didza' uláz queëba'. Ila'guí' ila'zaca' ni' rëla, en te dza yúgu'të iz zá'gaca.

### *Ta'dxín bönachi lahuë' Dios ga rö'ë ruchi'a rusöröë'*

<sup>11</sup> Ní'irö bilé'eda' tu lataj lo chiguichi, en bilé'eda' ca' Nu rö'ö ruchi'a rusöröë' lataj na'. Lahui' lo Nu ni gula'nítitë yödzölió, en lúzxiba, ate' bití'rö budzöli xilátjaguequi. <sup>12</sup> Bilé'eda' ca' nupa chinátigaca, nupa nácagaca lo, en nupa nácagaca cá'asö, zuíguequinë' lahuë' Dios. Gula'yálaj guichi, en guyalaj ca' ia'tú guichi ga na' nazúajgaca lágaca nupa nadéli'gaca yöl-la' na'bán idú. Buchi'a busöröë' Dios nupa na' chinátigaca tsca naca le nazúaj yugu' lu guichi na', lë na' gulúngaca. <sup>13</sup> Lu nísado' bulu'rúaj nupa chinátigaca, nacuá' lu nísado'. Lu yöl-la' guti, en lu lataj chul-la bulu'rúaj nupa chinátigaca, gula'cuá' gapa ni', ate' buchi'a busöröë' Dios tu tu tsca naca le gulúngaca. <sup>14</sup> Ní'irö

yöjtsázagaca yöl-la' guti, en lataj chul-la ga ni' rö'ö guí' zxön le naca lataj que yöl-la' guti le raca burópilö. <sup>15</sup> Nupa biti' nazúajgaca lu guichi quégaca nupa nadéli'gaca yöl-la' na'bán idú yöjtsázagaca lataj na'.

## 21

### *Tu lúzxiba cubi, en tu luyú cubi*

<sup>1</sup> Gudödi na' bilé'eda' tu lúzxiba cubi, en tu luyú cubi, tu' chigudödi quégaca lúzxiba na', en luyú na' gula'cuá' zí'alö. Bítirö dē nísado'. <sup>2</sup> Neda', Juan, bilé'eda' yödzö lá'ayi na', le naca Jerusalén cubi, ruhuötaj, rirúaj yehua' yubá ga zoë Dios, en chinabá'a que ca nabá'a queëbi' bi'i nigula chizóa utsaga ná'alenbi' tu bönni'. <sup>3</sup> Biyönda' ruí' didza' nu rnna yehua' yubá: "¡Buli'yútsöca! ¡Ga zoë Dios zóalen bönachi! ¡Sóalenë' léguequi, ate' léguequi ilácagaca bönachi queë! ¡Dios caz sóalenë' léguequi, en gáquië' Dios quéguequi!" <sup>4</sup> Dios uzxië' nisa ribödxí zoa guiöj lóguequi. Cúnturö nu gati, en cúnturö nu cödxí, en cúnturö nu cödxí yechi', en cúnturö nu qui'i saca', tu' chigudödi quégaca lē na' gulaca zí'alö."

<sup>5</sup> Ní'irö Nu na' rö'ö lataj lo ni' gunná: "¡Buyútsöca! ¡Yúgu'tē ruúna' cubi!"

Gudxi ca' neda': "¡Buzúaj lu guichi lē ni, tu' naca idütē li didza' ni, en naca löza!"

<sup>6</sup> Ní'irö gudxi neda': "¡Chinaca caz! ¡Neda' naca' Nu zoa zí'atēlō, enca' Nu röjsete ca naca le risí lo, en le ruúdxitē! ¡Nu ribidxi nisa, neda' guna' ga guí'aj nisa na' runna yöl-la' na'bán! <sup>7</sup> Nupa ila'deli' lu le raca yödzölió, gaca quéguequi yúgu'tē lē ni. Neda' gaca' Dios quéguequi, ate' léguequi ilácagaca zxi'ini caza', <sup>8</sup> pero nupa tadxi, en nupa biti' ta'yéajlē' neda', en nupa náacagaca xihui', en nupa tuti bönachi, en nupa tun le biti' naca tsahui', en nupa náacagaca udzá', en nupa ta'yéaj lādxi'gaca budó' guiöj budó' yaga, en yúgu'tē nupa ta'z'í yē', chizóa riböza xilátjaguequi lu guí', ga ni' rö'ö guí' zxön que lē na' ruzégui'da', lē na' naca yöl-la' guti le raca burópilö."

### *Yödzö Jerusalén le naca cubi*

<sup>9</sup> Ní'irö tuë' gubáz lá'ayi nababë' gadxë' gubáz lá'ayi ni' gula'zönë' gadxi zxi'ga'do' yúdxugaca gadxi yödzöhuë' yöjsétegaca, bidë' ga zoa'. Gudxë' neda': "¡Gudá ni! ¡Uluí'ida' li' bi'i nigula na' si' utsaga ná'alenbi' Bönni' na' náquië' Bö'cu' Zxíla'do'!"

<sup>10</sup> Guzóalenë' Dios Bö' Lá'ayi neda', ate' guchë'ë gubáz lá'ayi na' neda' tu lu guí'a sibi, en buluí'inë' neda' yödzö lá'ayi Jerusalén, ruhuötaj, rirúaj yehua' yubá ga zoë Dios. <sup>11</sup> Yödzö ni rēpi yösa bení' tu' zóalen le yöl-la' bení' queë' Dios. Rēpi yösa bení' ca rēpi yösa bení' tu guiöj nazáca'da' ca naca guiöj

gui'do'os nazí'i le jaspe. Naca yödzö na' yení'ido' ca naca gui'oj jara. <sup>12</sup> Zoa tu zö'ö zxon, en sibi idú gásibi'ilö yödzö na'. Lë'e zö'ö na' nacua' chinnu gapa nu riyaza. Ra' gapa nu riyaza na' nacu'ë chinnuë' gubáz lá'ayi tapa chi'ë. Tu tu ga nu riyaza na' nazúaj tu tu lágaca idxinnu cö' di'a dza xzí'ini xi'sóë' Israel. <sup>13</sup> Lë'e zö'ö le ruyú saca' ga rilén gubidza nacua' tsonna gapa nu riyaza, en saca' ga za' bö' ziaga nacua' tsonna gapa nu riyaza, en saca' tsölá'a ga ridödi gubidza beo' ziaga nacua' tsonna gapa nu riyaza, en saca' ga ribía gubidza nacua' ca' tsonna gapa nu riyaza. <sup>14</sup> Zxan zö'ö que yödzö na' nacua' chinnu xilibi zö'ö, ate' lë'egaca xilibi zö'ö na' nazúajgaca lágaquië' idxínnutë' bönni' gubáz queë' Bönni' na' náquië' Bö'cu' Zxíla'do'.

<sup>15</sup> Gubáz lá'ayi na' ruí'ilenë' neda' didza' zönë' tu yaga urixi le néquini oro para urixë' tsca naca yödzö na', en tsca nácgaca gapa nu riyaza, en tsca naca zö'ö que. <sup>16</sup> Yödzö na', lédi'i nácgaca idapa la'a. Lédi'i naca yöl-la' tunna que, en yöl-la' blaga' que. Len yaga na' burixë' tsca naca yödzö na', naca idú tsca gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' bölága' que. <sup>17</sup> Burixë' ca' yöl-la' yödx que zö'ö na', naca tu gayuá' yu' tapa-un dxita, tsca naca dxita que na' bönachí, lë na' ruríxinë' gubáz lá'ayi na'.

<sup>18</sup> Zö'ö na' néquini gui'oj jaspe, ate' yödzö na' néquini órotëz, le naca yení'ido' ca naca gui'oj jara. <sup>19</sup> Yugu' xilibi zö'ö que yödzö na' nazí'gaca biquitaj gui'oj nazáca'da'gaca.

Xilibi zö'ö zí'alö néquini gui'oj jaspe.

Le buropi néquini gui'oj zafiro.

Le bunní néquini gui'oj ágata.

Le budapi néquini gui'oj esmeralda.

<sup>20</sup> Le guyu' néquini gui'oj ónice.

Le buzxopi néquini gui'oj cornalina.

Le igadxi néquini gui'oj crisólito.

Le izxunu' néquini gui'oj berilo.

Le igá néquini gui'oj topacio.

Le idxí néquini gui'oj crisoprasa.

Le idxinéaj néquini gui'oj jacinto.

Le idxinnu néquini gui'oj amatista.

<sup>21</sup> Chinnu gapa nu riyaza na' ta'yáyjani chinnu bugá. Tu tu ga nu riyaza na' riyáyjani tuz bugá. Luyú la' nöza lo que yödzö na' néquini órotëz, le naca yení'ido' ca naca gui'oj jara.

<sup>22</sup> Biti' bilé'eda' tu yudo' lu yödzö na', tu' náquië' Xanru' Dios yudo' que, napa cazë' iduté yöl-la' unná bë', en lësca' caní náquië' Bönni' náquië' Bö'cu' Zxíla'do', náquië' yudo' que yödzö na'. <sup>23</sup> Biti' run bayudxi tsení'gaca gubidza, en beo' lu yödzö na', tu' uzení' yöl-la' bení' queë' Dios lu yödzö na',

ate' lësca' Bönni' náquië' Bö'cu' Zxíla'do' náquië' le uzení' ni'.  
<sup>24</sup> Bönachi yugu' yödzo, nupa nulágaca, ila'dá lu bení' que yödzö na',  
 ate' yugu' bönni' ta'nná bē'ē yödzölió idiguá'agaquië' yöl-la' tsahui'  
 quégaquië' lu yödzö na'.<sup>25</sup> Catu caz tsáyajgaca gapa nu riyaza lu yödzö na'  
 lahui' dza, ate' lataj na' catu caz gaca rëla.<sup>26</sup> Bönachi yugu' yödzö  
 idiguá'agaquië' ni' le nácagaca lesaca', en yöl-la' tsahui' quéguequi.  
<sup>27</sup> Tu le ruá' dö' biti' ca' tsaza ni', en calëga tu le naca xihui', en calëga nu rizí' yē',  
 pero tsázagacasö ni' nupa nazúajgaca láguequi lu guichi queë'  
 Bönni' náquië' Bö'cu' Zxíla'do', ga na' nazúajgaca lágaca nupa nadéli'gaca  
 yöl-la' na'bán.

## 22

<sup>1</sup> Ní'irö gubáz lá'ayi na' buluí'inë' neda' tu yegu yení'ido', le naca nisa yegu le runna yöl-la' na'bán. Rëpi yösa bení' yegu na' ca rëpi yösa bení' guiöj jara. Rirúaj yegu na' lu lataj lo ga rö'ë Dios, en ga rö'ë ca' Bönni' náquië' Bö'cu' Zxíla'do'.<sup>2</sup> Rizá' yegu ni gatsaj láchui'lö nöza lo que yödzö na'. Tsölá'a huéaj ra' yegu na' rö'ö tu yaga le runna yöl-la' na'bán, ate' ta'bía chinnu luzuí tu iz. Tu tu beo' ta'bía yaga na'. Xilágu'i'gaca yaga na' nácagaca le tu'ún bönachi yugu' yödzö.<sup>3</sup> Biti' soa ni' nitú le dxía dö'. Soa lu yödzö na' lataj lo ga rö'ë Dios, enca' ga rö'ë Bönni' náquië' Bö'cu' Zxíla'do', ate' yugu' huen dxin queë' ila'yéaj ládxi'gaquië' Lë'.<sup>4</sup> Ila'lé'enë' lahuë' Lë', ate' le nazí'i Lë' nazúaj ra' xigágaquië'.<sup>5</sup> Biti' gaca rëla ni', ate' nupa nacué' ni' biti' ila'quínna tu le cu'u bení', en calëga bení' que gubidza, tu' gáquië' Xanru' Dios bení' quégaquië'. Nupa nacué' ni' ila'nná bē'tica'sö.

### *Chizóa huödë' Cristo*

<sup>6</sup> Ní'irö gubáz lá'ayi na' gudxë' neda', gunné': "Didza' ni naca idütë li, en naca löza. Xanru' Dios, Nu ruchiza Bö' Lá'ayi icja ládxi'do'gaquië' yugu' bönni' tu'ë didza' uláz queë', chigusöl-lë'ë gubáz lá'ayi queë' para uluí'inë' yugu' huen dxin queë' le ral-la' gácatë.<sup>7</sup> Caní rnnë' Jesucristo: ¡Chizóa huöda! ¡Bica' ba nu run ca rna didza' ruá'a uláz queë' Dios, le nazúaj lu guichi ni!"

<sup>8</sup> Neda', Juan, biyönda', en bilé'eda' yugu' lë ni. Gudödi biyönda', en bilé'eda' yugu' lë ni, buzóa zxiba' xini'ë gubáz lá'ayi na' buluí'inë' neda' yugu' lë ni para guna' lë' zxön.  
<sup>9</sup> Ní'irö lë' gudxë' neda': "Biti' gunu' caní, tu' naca' neda' huen dxin queë' Dios ca nacu' li', en ca nácagaquië' böchi' luzó'o na' tu'ë didza' uláz queë' Dios, enca' ca nácagaca yúgu'të nupa tun ca rna le nazúaj lu guichi ni. ¡Ben zxön Dios!"

<sup>10</sup> Gudxë' ca' neda': "Biti' ucachu'u xtídzë'ë Dios ni, didza' ruá'a uláz queë', en nazúaj lu guichi ni, tu' chizóa ilaca yugu'

lë ni. <sup>11</sup> Nu ruá' dö' guá'tica'sö dö'. Nu run le cabí naca tsahui' gúntica'sö le cabí naca tsahui'. Nu run dxi'a, gúntica'sö dxi'a, ate' nu nequi quez queë' Dios, guéquitica'sö quez queë'."

<sup>12</sup> Rnnë' Jesús: "¡Chizóa huöda! Nu'a lu na'a le nadéli'gaca bönachi, ate' ubi'a que queë'guequi tsca naca le gulúngaca.

<sup>13</sup> Neda' naca' Nu zoa zí'atëlö, enca' Nu röjsete, ca naca le risí lo, en le ruúdxitë. Naca' ca' Nu run ga risí lo, en Nu rusiúdxí."

<sup>14</sup> Ní'irö gunnë': "¡Bica' ba nupa nayari le nácugaca, en tun le naca dxi'a! ¡Nazí'guequi lataj ilahuë' le ribía yaga le runna yöl-la' na'bán, en gaca ila'yaza gapa nu riyaza lu yödzö na'!

<sup>15</sup> Nupa nácagaca xihui', en nupa nácagaca udzá', en nupa tun le ruá' dö', en nupa tuti bönachi, en nupa ta'yéaj ládxi'gaca budó' guió'j budó' yaga, en nupa ta'yaza ládxi'gaca ta'zí' yë' ila'cuá' ní'iló ra' yödzö na'. <sup>16</sup> Neda', Jesús, gusól-la'a gubáz lá'ayi quia', ate' buluí'inë' libí'ili' yugu' lë ni, libí'ili' na' dzágali' yugu' cö' bönachi quia'. Neda' naca' di'a dza queë' David, enca' xzí'ini xi'söë'. Naca' ca' bölj hui sila."

<sup>17</sup> Tu'ë didza' Dios Bö' Lá'ayi, enca' bi'i nigula utsaga ná'aleni'-në' Bönni' náquië' Bö'cu' Zxíla'do', ta'nnë': "¡Gudá!"

Nu riyöni didza' ni ral-la' inná: "¡Gudá!"

¡Nu ribidxi nisa, en nu rizë ladxi' le, ral-la' guídi, en gu'aj nisa le runna yöl-la' na'bán!

<sup>18</sup> Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnnía': Channö nu udá' lë'e didza' ni, Dios ubi'ë que nu na'. Gunë' lë' xíguia' ca naca le nazúajgaca lu guichi ni. <sup>19</sup> Lësca' caní, channö nu cúa bítitës didza' ni ruá'a uláz queë' Dios, en nazúaj lu guichi ni, Dios ugüë' ca' xilataj nu na' lu guichi ga nazúajgaca lágaca nupa nadéli'gaca yöl-la' na'bán idú, enca' lu yödzö lá'ayi, ca na' nazúaj qué'guequi lu guichi ni.

<sup>20</sup> Xanru', Nu run ba nalí qué'guequi lë ni rnnë': "¡Ön! ¡Huödatea'!"

¡Ca' gaca! ¡Gudá, Xantu' Jesús!

<sup>21</sup> Rinábida'-në' Xanru' Jesucristo uzá' ládxe'ë queëli' yúgu'tëli'. ¡Ca' gaca!